

# ಕೊಡಗರ ಭೂಪಟ



ಕೊಡಗ್



ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ  
ಮಡಿಕೇರಿ, ಕೊಡಗ್

ಮೂಲ ಕನ್ನಡತ್ : ಡಿ.ಎನ್. ಕೃಷ್ಣಯ್ಯ  
ಕೊಡವಕ್ : ಅಜ್ಜನಿಕಂಡ ಪ್ರಮೀಳ ನಾಚಯ್ಯ



# ಕೊಡಗೂರ ಇತಿಹಾಸ

ಮೂಲ :

ಡಿ.ಎಸ್. ಕೃಷ್ಣಯ್ಯ : 1974

ಕೊಡವ ತಕ್ಕ್‌ಕ್ :

ಅಜ್ಜಿನಿಕಂಡ ಪ್ರಮೀಳ ನಾಚಯ್ಯ : 2013

ಬೊಳ ಪಡ್‌ತನವು :



ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ,  
ಮಡಿಕೇರಿ





**KODAG'RA ITHIHAASA** in Kodava language translated from original kannada script by Ajjinikanda Pramila Nachaiah, Poomaale Weekly is published by Karnataka Kodava Sahithya Academy, Madikeri on 1.2.2013.

ಒಟ್ಟು ಪಾಳೆ	: 472 + VIII + 4
ಕ್ರಯ	: ಉ. 300.00
ಪ್ರತಿ	: 1,000 (ಓರ್ ಆಯಿರ)
ಆದ್ಯತ ಅಚ್ಚ	: 1974 (ಕನ್ನಡತ್)
ದಂಡನೆ ಅಚ್ಚ	: 2013 (ಕೊಡವಕ್)

@ ಹಕ್ಕ್ ಕಾತ್‌ಬೆಚ್ಚಿತ್

ಮೂಡ್‌ಪಾಳೆ ಪಿಞ್ ಪುಸ್ತಕಕ್ ರೂಪ್ ಬರ್‌ಂದವು

'ಮಾಮಾಲೆ' ಕ್ರಿಂಟರ್ಸ್ ಐಂಡ್ ಪಬ್ಲಿಷರ್ಸ್,  
ಫೀಲ್ಡ್ ಮಾರ್ಷಲ್ ಕೆ.ಎಂ. ಕಾರ್ಯಪ್ಪ ನಡೆ, ವೀರಾಜಪೇಟೆ-571218,  
ಕೊಡಗ್. ಫೋನ್ : 08274-256360, 9886933467





ಡಿ.ಎನ್.ಕೃಷ್ಣಯ್ಯ

1904 - 1973

1904ತ್ ಪುಟ್ಟಾನ ಡಿ.ಎನ್.ಕೃಷ್ಣಯ್ಯ ಮೂರ್ನಾಡ್, ವೀರಾಜಪೇಟೆ, ಮಡಿಕೇರಿಲ್ ಓದಿತ್ ಮಿಲ್ಲಾಕ್ ಮಂಗಳೂರ್ ಸರ್ಕಾರಿ ಕಾಲೇಜ್‌ಲ್ ಬಿ.ಎ ಪದವಿ ಪಡ್‌ಂದವು. 1926ತ್ ಮಡಿಕೇರಿ ಸರ್ಕಾರಿ ಸ್ಕೂಲ್‌ಲ್ ಶಿಕ್ಷಕನಾಚಿ. 1929ತ್ ರಾಜಮಹೇಂದ್ರಿಯ ಶಿಕ್ಷಕ ತರಬೇತಿ ಕಾಲೇಜ್‌ಲ್ ಬಿ.ಎಡ್ ಪದವಿ ಪಡ್‌ಂದತ್. 1935ತ್ ಮೆಡ್ರಾಸ್ ವಿಶ್ವವಿದ್ಯಾನಿಲಯತ್‌ಂಜ ಇತಿಹಾಸತ್ ಎಂ.ಎ. ಪದವಿ. ಇತಿಹಾಸಕ್ ಸಮೃಂಧಪಟ್ಟಿನ್ನಕೆ ಸುಮಾರ್ ಎಳ್ತ್ ಪ್ರಕಟ ಆಯಿತ್. 'ಸುಂದರ ನಾಡು ಕೊಡಗು' ಪಿಲ್ಲಾ 'ವೀರರಾಜ ವಿಜಯ' ಎಣ್ಣುವ ಕಾದಂಬರಿ ಎಳ್ಳಿತ್.





## ಮೂಲ ಎಳ್ತಕಾರಂಡ ಸೊಲ್ಲೋಲೆ

ನಾನ್ ಇತಿಹಾಸತನ ಮುಖ್ಯ ವಿಷಯ ಆಯಿತ್ ಬೆಚ್ಚಂಡ್ ಎಂ.ಎ. ಪದವಿ ಪಡ್ಂಡ. 1960ತ್ ಸರ್ಕಾರಿ ಪ್ರೌಢಶಾಲೆರ ಮುಖ್ಯೋಪಾಧ್ಯಾಪಕಾಂಜ ನಿವೃತ್ತಿ ಆನನ್ನಕೆ 'ಕೊಡಗರ ಇತಿಹಾಸ' ಎಳ್ತೊಂಡೊಂದ್ ನಾಕ್ ಆಸೆ ಆಚಿ. ಆಂಗ್ ಮುಪ್ಪಡೆ ಕೊಡಗರ ಚೆನ್ನಂಗ್ ಕೇಳಿಪೋನ ಒಕ್ಕತರ ಪೆರಿಯಯಿಂಗಳ ಕಂಡಿತ್, ಅಯಿಂಗಡ ಪಕ್ಕ ಇಂಜ ರೆಕಾರ್ಡ್‌ನೆಲ್ಲ ಓದಿತ್ ವಿಷಯತನ ಪಡ್ಂಡಂದ. ಕೂಟ್‌ಕ್ ಡೆಲ್ಲಿರ ರಾಷ್ಟ್ರೀಯ ಪತ್ರಾಗಾರ, ಕೊಲ್ಕತ್ತಾ ರಾಷ್ಟ್ರೀಯ ಗ್ರಂಥಾಲಯ, ಉತ್ತರ ಪ್ರದೇಶ ಸರ್ಕಾರತರ ಪಳೀಯ ದಾಖಲೆರ ಆಫೀಸ್, ಮಡಿಕೇರಿ ಡೆಪ್ಯುಟಿ ಕಮಿಷನರ್ ಆಫೀಸ್‌ಲ್ ಉಳ್ಳ ಕೊಡಗ್ ರಾಜಂಗಡ ಪಿಳ್ಳಾ ಬ್ರಿಟಿಷಡ ಕಾಲತರ ರೆಕಾರ್ಡ್... ಇನ್ನತಾನುಂಡ್ ಬೋಂಡಿಯಾನ ವಿಷಯತನ ಪಡ್ಂಡಂಡಿತಿಂಜ.

ಇನ್ನನೆ ಒಕ್ಕಚೆ ಕೂಟಿಯಂಡ ಎಲ್ಲಾ ವಿಷಯತನ ಇತಿಹಾಸ ರೂಪತ್ ಎಳ್ತುವಕ್ ನಾಕ್ ಆದ್ಲ ಪುರ್‌ಡ್ ತಂದವು ಮಡಿಕೇರಿ 'ಶಕ್ತಿ' ದಿನಪತ್ರಿಕೆರ ಸಂಪಾದಕ ಶ್ರೀ ಬಿ.ಎಸ್.ಗೋಪಲಕೃಷ್ಣ ಅವು. ಆ ಪತ್ರಿಕೆರ ನಾರಾಚೆರ ಸಂಚಿಕೆಲ್ 1961ತ್‌ಂಜ 1971ಕೆತ್ತನೆ ಧಾರಾವಾಹಿ ಆಯಿತ್ ಈ ಇತಿಹಾಸ ಪ್ರಕಟ ಆಚಿ. ಅನ್ನನೆ ಕೊಡಗರ ಅಕ್ಕತ ಜಿಲ್ಲಾಧಿಕಾರಿ ಪಿಳ್ಳಾ ಸಿನೇತ ಶ್ರೀ ಕೆ. ನರಸಿಂಹಮೂರ್ತಿರ ಸಲಹೆ ಪಿಳ್ಳಾ ಒರಾತತ್ ಈ ಎಳ್ತನೆಲ್ಲ ಕೂಟಿತ್ ಪುಸ್ತಕ ರೂಪತ್ ತಯಾರ್ ಮಾಡಿತ್ ಮೈಸೂರ್ ವಿಶ್ವವಿದ್ಯಾನಿಲಯತನ ಪ್ರಕಟಣೆಕ್ ಕೇಟಂಡ.

ವಿದ್ಯಾಪಕ್ಷಪಾತಿ, ಉದಾರ ಮನಸ್ಸುಕಾರಳಾನ ವಿಶ್ವವಿದ್ಯಾನಿಲಯ ಪ್ರಕಾಶ ಸಮಿತಿರ ಅಧಿಕಾರಿಯ ಪ್ರಕಟಣೆಕ್ ಒತ್ತಂಡ್ ಉಪಕಾರ ಮಾಡಿತ್, ಆಪಚ್ಚೆಕ್ ಬೆರಿಯ ಪುಸ್ತಕ ಬೋಳಿಪಡ್‌ತುವಕ್ ಕಾರಣಕರ್ತಂಗಳಾಯಿತ್. ವಿಶ್ವ ವಿದ್ಯಾನಿಲಯ ಪ್ರಸಾರಾಂಗತರ ನಿರ್ದೇಶಕ ಡಾ.ಪ್ರಭುಶಂಕರ್ ಅಯಿಂಗಕ್, ಅಯಿಂಗಡ ಸಹದ್ಯೋಗಿಯಕ್, ವಿಶ್ವ ವಿದ್ಯಾನಿಲಯ ಪ್ರಕಟಣ ಸಮಿತಿಕ್ ಕೃತಜ್ಞನಾಯಿತುಳ್ಳ. ಅನ್ನನೆ ಕೊಡಗರ ಇತಿಹಾಸತರ ಮೂಲ ಪ್ರೇರಕ ಶ್ರೀ ಬಿ.ಎಸ್.ಗೋಪಾಲ ಕೃಷ್ಣ ಪಿಳ್ಳಾ ಮಿತ್ರ ಶ್ರೀ ಕೆ.ನರಸಿಂಹ ಮೂರ್ತಿ ಅಯಿಂಗಕೂ ಕೃತಜ್ಞ.

ಡಿ.ಎನ್.ಕೃಷ್ಣಯ್ಯ





## ಮುಂಜೂಲ್ಲ್

ಡಿ.ಎನ್.ಕೃಷ್ಣಯ್ಯ, ಕೊಡಗ್ಗರ ಪೆದಪೋನ ಸಂಶೋಧಕ ಪಿಳ್ಳಾ ಚರಿತ್ರಕಾರ.

1974ತ್ ಕನ್ನಡತ್ ಎಳ್ಲ್ದಿನ 'ಕೊಡಗಿನ ಇತಿಹಾಸ' ಎಣ್ಣುವ ಈ ಕೃತಿ ಇಂದ್ ನಂಗಡ ಕೊಡಗ್ಗರ ಇತಿಹಾಸತ್‌ನ ಅರ್ಂಜವಕ್ ಉಳ್ಳ ಪುಸ್ತಕತ್ ಒಂದ್.

ತಪ್ಪು-ನೆಪ್ಪುರ ಚರ್ಚೆ ಓದುಗಂಗಕ್ ಬುಟ್ಟಿದ್. ಕೊಡಗ್ಗರ ಇತಿಹಾಸ ಎಲ್ಲಾರ್‌ಕೂ ಗೊತ್ತಿರೊಂಡು. ನಂಗಡ ಮಿಳ್ಳಾತ ಪೀಳಿಗೆಕೂ ಇದ್‌ಂಡ ಅನಿವಾರ್ಯತೆ ಉಂಡ್. ಇಂದಿಕ್ಕ ಕನ್ನಡತ್ ಎಳ್ಲ್ದಿನ ಈ ಕೃತಿ ಎಲ್ಲಿಯೂ ಕೊಟ್ಟಿಯಂಡಿಲ್ಲೆ. ಈ ಕೊರುನ ನೀಸುವಕ್ ಈ ಕೃತಿನ ಕೊಡವ ತಕ್ಕಲ್ 'ಪೂಮಾಲೆ' ಪತ್ರಿಕೆರ ಸಂಪಾದಕ ಅಜ್ಜಿನಿಕಂಡ ಮಹೇಶ್ ನಾಚಯ್ಯ ಅಯಿಂಗಡ ಪೊಣ್ಣ್ ಪ್ರಮೀಳ ನಾಚಯ್ಯ ಕೊಡವ ತಕ್ಕಕ್ ಮಾತಿತ್.

'ಕೊಡವ ತಕ್ಕಲ್ ತರ್ಜುಮೆ ಸಾಹಿತ್ಯ ಬೊಳಿಯೊಂಡು' ಎಣ್ಣುವದ್ ಅಕಾಡಮಿರ ಚಿಂತನೆಯೂ ಅಕ್ಕು. ಈ ನಾಟ್ಲ್ ತರ್ಜುಮೆ ಮಾಡಿತ್ 'ಕೊಡಗ್ಗರ ಇತಿಹಾಸ' ಎಣ್ಣುವ ಪುಸ್ತಕತ್‌ನ ನಿಂಗಡ ಮಿಳ್ಳಾಲ್ ಬೆಚ್ಚಂಡುಂಡ್.

'ಕೊಡಗ್ಗರ ಇತಿಹಾಸ'ತ್‌ನ ಇಚ್ಚಕೋರ್ ಚಾಯಿಲ್ ಕೊಡವ ತಕ್ಕಕ್ ಮಾತಿತ್ ಪುಸ್ತಕ ರೂಪತ್ ಕೊಂಡಬಂದಿತುಳ್ಳ ಅಜ್ಜಿನಿಕಂಡ ಪ್ರಮೀಳ ನಾಚಯ್ಯಂಗ್ ಅಕಾಡಮಿರ ಪರ ಕೃತಜ್ಞತೆ ಬಯಂದವಿ.

ಅನ್ನನೆ ನೇರಕೊತ್ತ, ಚಂದೋಳತೆ ಪ್ರಿಂಟ್ ಮಾಡಿತ್ ತಂದಿತುಳ್ಳ 'ಪೂಮಾಲೆ ಪ್ರಿಂಟರ್ಸ್'ಕೂ ನಾಡ ವಂದನೆ.

ಕೊಡವ ತಕ್ಕ - ಸಾಹಿತ್ಯಾಭಿಮಾನಿಯ ಪ್ರತಿಯೊಬ್ಬಂಡ ಮನೆಲ್ ಈ ಪುಸ್ತಕ ಇಂಜಿತ್ ಕೊಡವ ತಕ್ಕರ ಕೇಳಿಕ್ ಸಹಾಯ ಆಡೋಂದ್ ಬಯಂದವಿ.

ಮಡಿಕೇರಿ

01-02-2013

ಅಡ್ಡಂಡ ಸಿ. ಕಾರ್ಯಪ್ಪ

ಅಧ್ಯಕ್ಷ

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡಮಿ

ಮಡಿಕೇರಿ



## ಕೊಡಗ್ಗರ್ ಇತಿಹಾಸತ್‌ನ ಓದುವಾಂಗ್ ಮುಪ್ಪಡೆ

ಎದೇ ಓರ್ ಜಾಗ, ಜನಾಂಗ, ಪರಿಸರತ್‌ರ ಪಳೆಯಾಮೆನ ಅರಿಯೊಂಡುಪೇಂಗಿ ಇದ್‌ಂಗ್ ಸಮ್ಮಂಧಪಟ್ಟ ಇತಿಹಾಸ ಪೇರ್ತ್ ಮುಖ್ಯ. ಈ ನೌಟ್‌ಲ್ ಕೊಡಗ್ಗರ್ ಸಮ್ಮಂಧಪಟ್ಟನ್ನೆ ನಾನ್ ಕೊಡವ ತಕ್ಕ್‌ಕ್ ಮಾತಿತುಳ್ಳ 'ಕೊಡಗ್ಗರ್ ಇತಿಹಾಸ' ಚಿನ್ನಂಗ್ಗರ ಮಟ್ಟೆ ಪಳೆಯಾಮೆರ ಬರಿಯ ನಂಗಲ ಕೊಂಡಪೋಪ.

ಈ ಪುಸ್ತಕತ್ ಕ್ರಿ.ಶ 10ನೆ ಶತಮಾನತ್‌ಂಜ ಇಪ್ಪರ ಕೊಡಗ್ಗರ್ ಆಳ್‌ನ ರಾಜವಂಶಸ್ಥಂಗ, ಅಯಿಂಗಡ ಆಡಳಿತ ವ್ಯವಸ್ಥೆ, ಜನದ ಸಾಮಾಜಿಕ ಪಿಳ್ಳಾ ಆರ್ಥಿಕ ಪರಿಸ್ಥಿತಿರ ಮೀದ ಅರಿವಿಕೆ ಕೊಟ್ಟವ. ರಾಜಂಗಡ ಕಾಲತ್ ಪ್ರಜೆಯದ ಬದ್‌ಕರ ಚಿತ್ರಣ ದುಂಬ ಬೇಜಾರ ಆಪನ್ನತದ್. ಎನ್ನಂಗ್ಗಣ್ಣಕ ಅಂದ್ ಕಾಲತ್ ರಾಜ ಎಣ್ಣನನ್ನೆ ಪ್ರಜೆಯ. ಇಲ್ಲೇಂದ್ ಕಂಡಕ ನಿರಪರಾಧಿಯೂ ಮಂಡೆ ಕಳಂದಂವಡಿಂಜತ್. ಇನ್ನತ ಘಟನೆರ ಚಿತ್ರಣತ್‌ನ ಈ ಪುಸ್ತಕತ್ ಕಾಂಬ.

ರಾಜಂಗಡ ಆಡಳಿತ ಕೈಂಜದು ಕೊಡಗ್ಗರ್ ಬ್ರಿಟಿಷ್‌ಕಾರ ಬಂದಲ್ಲಿ ಕೊಡಗ್ಗಲ್ ಓರಚ್ಚಕ್ ಸ್ಕೂಲ್ ತೊರಂದತ್. ಬಲ್ಯ ಬಲ್ಯ ಕಾಡಂಜ ದುಂಬಪೋಯಿತಿಂಜ ಆಯಿರಾರ್ ಕಣ್‌ಕರ ಜಾಗತ್ ಕಾಫಿ ತೋಟ ಎದ್ದತ್. ಆನಗುಂಡ್ ಕೊಡಗ್ಗರ್ ಜನದ ಆರ್ಥಿಕ ಪರಿಸ್ಥಿತಿ ಪಿಳ್ಳಾ ಜನ ವಿದ್ಯಾಭ್ಯಾಸತ್ ಮಿಳ್ಳಾಕ್ ಬಪ್ಪಕ್ ಮೊಳಿಯಾಚಿಂದ್ ಎಣ್ಣೊಲು.

ಅಂದ್ ಕಾಲತೆ ರಾಜಂಗ ಪಿಳ್ಳಾ ಬ್ರಿಟಿಷ ಇಲ್ಲಿಂಜ ಏಪಾಟಿ ಪೊನ್ನ, ಮಾಲೆಮಟ ಎಡ್‌ತಂಡ್ ಪೊರಮೆ ಪೋಚಿ ಎಣ್ಣಕ ಕೊಡಗ್ಗ ಪಂಡಂಜೇ ಅದೇದ್ ಮಾದರಿ ಪೊನ್ನ, ಪಣತ್ ದುಂಬಿತ್ ಇಂಜತ್ ಎಣ್ಣವದ್ ಆಶ್ವರ್ಯ ಆಪ.

ಅನ್ನನೇ ರಾಜಂಗ ಕೆಟ್‌ಚಿಟ್ಟ ಪೇಟೆ, ಕೋಟೆ, ತಿರಿಕೆಲ್ಲ ಓರಂದ್ ಹಿನ್ನೆಲೆ ಉಂಡ್.

ಮೂಲಕೃತಿಲ್ ಓರಂದ್ ವಿಷಯಕ್ ಸಮ್ಮಂಧಪಟ್ಟನ್ನೆ ತಂದಿತುಳ್ಳ ಮಾಹಿತಿ ಸೆರಿ ಇಲ್ಲೆ ಎಣ್ಣವ ಅಭಿಪ್ರಾಯ ಇಂಜಕೋ (ಎಚ್ಚಕೋ ಓದುಗಂಗ ಎಣ್ಣನಪೋಲೆ ಪಿಳ್ಳಾ ನಾಡಲ್ಲಿ) ತರ್ಜುಮೆ ಮಾಡುವಕ ಇದ್‌ನ ಸೆರಿ ಕೂಟಿಯವಕ್ ಪೋಯಿತಿಲ್ಲೆ.

ಕನ್ನಡತ್‌ಂಜ ಕೊಡವ ತಕ್ಕ್‌ಕ್ ಮಾತುವಕ ಆಪಚ್ಚಕ್ ಕೊಡವ ತಕ್ಕ್‌ಕ್ ಒತ್ತ್ ಕೊಡ್‌ತಿಯೆ. ಇನ್ನತ ಪುಸ್ತಕ ಪ್ರತಿಯೊಬ್ಬಂಡ ಮನೆಲ್ ಪಿಳ್ಳಾ ಇದತ್ ಉಳ್ಳ ವಿಷಯ ಪ್ರತಿಯೊಬ್ಬಂಡ ಮನತ್ ಇರಂಡಿಯದ್ ಅವಶ್ಯ.



ನಾನ್ ಈ ಪುಸ್ತಕತ್ ಅರಂಜಮಟ್ಟಿಕೆ, “ದಾನ ಕೊಡ್‌ಪಾಂಗೂ, ಕೊಡ್‌ತ ದಾನತ್‌ನ ಪಾಲನೆ ಮಾಡುವಕೂ ಉಳ್ಳ ವ್ಯತ್ಯಾಸ”ತ್‌ನ ಕಲ್ಲೆಳ್ತರ ಶಾಸನತ್ ವಿವರಾಚಿಟ್ಟಿದ್ ಪೇರ್ತ್ ಚಾಯುಂಡ್. “ಒಂದೊ ದಾನ ಕೊಡ್‌ಪ ಇಲ್ಲೇಂಗಿ ಅದ್‌ನ ಕಾಪಾಡುವ. ಇದತ್ ಕಾಪಾಡುವದ್, ಕೊಡ್‌ಪಾಂಗ್‌ಇಲ್ಲ ನಲ್ಲದ್. ಕೊಡ್‌ಪಾನುಂಡ್ ಸ್ವರ್ಗ ಕೊಟ್ಟುವ. ಕಾಪಾಡುವಾನುಂಡ್ ನಾಶ ಇಲ್ಲತ ಪದವಿ ಕೊಟ್ಟುವ. ಕೊಡ್‌ಪಾಂಗ್‌ಇಲ್ಲ ಇಇಕ್ಕೊಬ್ಬ ತಂದ ದಾನತ್‌ನ ಕಪ್ಪಾನುಂಡ್ ತಾನ್ ಕೊಡ್‌ತ ದಾನ ನಿಷ್ಪಯೋಜಕ ಆಪ! ತಾನ್ ಕೊಡ್‌ತ ಭೂಮಿ ಮೋವಡನ್ನಕೆ. ಅಪ್ಪ ತಂದದ್ ತಂಗರನ್ನಕೆ, ಬೋರೆಯವು ತಂದದ್ ತಾಂಡ ಅವ್ವಂಡನ್ನಕೆ. ಆನಗುಂಡ್ ದಾನ ಆಯಿತ್ ತಂದ ಭೂಮಿನ ಬುಡುವಕಯ್ಯ”. ಈ ಎಳ್ತ್ ಇಂದೇತ ನಂಗಡ ಬದಲಾಯಂಡುಳ್ಳ ಕೊಡಗರ ಮೂಲನಿವಾಸಿಯಡ ಸಾಮಾಜಿಕ, ಸಾಂಸ್ಕೃತಿಕ ಪಿಳ್ಳಾ ಲೌಕಿಕ ವಿಚಾರಕ್ ಸಮೃಂಧಪಟ್ಟನ್ನಕೆ ದುಂಬಾ ಬೇರ್‌ಚ್‌ಡುವನ್ನತದ್.

ನಾಡ ಈ ಎಲ್ಲಾ ಓರ್ ಪ್ರಯತ್ನಕ್ ಪುರ್‌ಡ್ ಪಿಳ್ಳಾ ಅವಕಾಶ ಮಾಡಿ ತಂದ ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿರ ಅಧ್ಯಕ್ಷ ಶ್ರೀ ಅಡ್ಡಂಡ ಸಿ. ಕಾರ್ಯಪ್ಪ ಪಿಳ್ಳಾ ಸದಸ್ಯಂಗಕ್ ನಾಡ ಮನದುಂಬ್‌ನ ಕೃತಜ್ಞತೆ.

ಅನ್ನನೆ ಕೊಡವ ತಕ್ಕಕ್ ತರ್ಜುಮೆ ಮಾಡುವಕ್ ನಾಕ್ ಸಹಕಾರ ತಂದ ನಾಡ ವಡಿಯ, ಪೂಮಾಲೆ ಪತ್ರಿಕೆರ ಸಂಪಾದಕ ಅಜ್ಜಿನಿಕಂಡ ಮಹೇಶ್ ನಾಚಯ್ಯ ಅಯಿಂಗಕ್ ನಾಡ ವಂದನೆ.

ಕೊಡವ ತಕ್ಕಕ್ ಇಂಜಕ ಮಾತ್ರ ಕೊಡವ ತಕ್ಕಪರೆವ ಜನಾಂಗತ್‌ರ ಅಸ್ತಿತ್ವ ಇಪ್ಪಕ್ ಸಾಧ್ಯ. ಈ ನೊಟ್‌ಲ್ ಮಿಳ್ಳಾಕ್ ಆಪಚ್ಚಕ್ ಕೊಡವ ತಕ್ಕರ ಪುಸ್ತಕ ಪ್ರಕಟ ಆಂಡು. ಅನ್ನನೆ ಬೋರೆ ಬೋರೆ ತಕ್ಕಂಜ ಕೊಡವಕ್ ತರ್ಜುಮೆ ಆಂಡು.


ವೀರಾಜಪೇಟೆ

ಅಜ್ಜಿನಿಕಂಡ ಪ್ರಮೀಳ ನಾಚಯ್ಯ



## ಪುಸ್ತಕತರ ಒಳ್ಳೆಲ್

1. ಕೊಡಗ್ಗರ ಭೂಸ್ವರೂಪ
2. ಪುರಾಣ ಕಾಲತ ಕೊಡಗ್ಗ
3. ಕೊಡಗ್ಗರ ಚರಿತ್ರರ ಆದಿ ಮೂಲ
4. ಗಂಗ ವಂಶ ರಾಜಂಡ ಆಳ್ವಿಕೆ
5. ಚೆಂಗಾಳ್ವ ಪಿಳ್ಳಾ ಚೋಳರಾಜಂಡ ಅಧಿರಾಜತ್ವ
6. ಹೊಯ್ಸಳ ರಾಜ ಪಿಳ್ಳಾ ಕೊಂಗಾಳ್ವ
7. ಹೊಯ್ಸಳ ರಾಜ ಪಿಳ್ಳಾ ಚೆಂಗಾಳ್ವ
8. ಪದಿನಾಲನೆ ಶತಮಾನತ್ ಕೊಡಗ್ಗ
9. ನಂಜರಾಜಪಟ್ಟತರ ಚೆಂಗಾಳ್ವ
10. ನಾಯಕಂಗಡ ಆಳ್ವಿಕೆ
11. ಬೇಲೂರ್ ನಾಯಕಂಡ ಪ್ರಭುತ್ವ
12. ಹಾಲೇರಿ ರಾಜವಂಶ ಸ್ಥಾಪನೆ
13. ಸುರೂವೆತ 3 ರಾಜಂಗ : ವೀರರಾಜೇಂದ್ರ ಒಡೆಯ, ಅಪ್ಪಾಜಿ ರಾಜ ಪಿಳ್ಳಾ ಮುದ್ದುರಾಜ
14. ಚಿಕ್ಕವೀರಪ್ಪ ಒಡೆಯ
15. ದೇವಪ್ಪರಾಜ
16. ದೊಡ್ಡ ವೀರರಾಜೇಂದ್ರ ಒಡೆಯ
17. ಲಿಂಗರಾಜೇಂದ್ರ ಒಡೆಯ
18. ಚಿಕ್ಕ ವೀರರಾಜೇಂದ್ರ ಒಡೆಯ
19. ಕೊಡಗ್ಗರ ಆಖೇರಿ 3 ರಾಜಂಗಡ ಆಳ್ವಿಕೆ : ರಾಜಂಗೂ, ಪ್ರಚೆಯಕೂ ಇಂಬ ಸಮ್ಮಂಧ
20. ಕೊಡಗ್ಗಲ್ ಬ್ರಿಟಿಷಡ ಆಳ್ವಿಕೆ
21. ಕೊಡಗ್ಗ ಜನಡ ಬದ್‌ಕ್ - ಸಂಸ್ಕೃತಿ



## ಕೊಡಗ್ ಇತಿಹಾಸ

### 1. ಕೊಡಗ್ ಭೂಸ್ವರೂಪ

ಕೊಡಗ್ ಜಿಲ್ಲೆ ಕರ್ನಾಟಕದ ಪಡೆವ್ವಾರ್ ಕುಂದ್ ಸಾಲ್‌ಲ್ ಉಳ್ಳನ್ನತ ಪ್ರಕೃತಿ ಸಿರಿಬೋಜತರ್ ನಾಡ್. ಈ ಕುಂದ್‌ಕಾಡ್ ಸೀಮೆರ ಚಾಯಿನ ಕಂಡಿತ್ ಕೊಡಗ್‌ನ 'ದಕ್ಷಿಣತರ್ ಕಾಶ್ಮೀರ್' ಎಣ್ಣಿಯಂಡ್ ಎಚ್ಚಕೋ ಜನ ಪಂಡ್ ಕಾಲತೇ ಕಾಕಿತ್.

ಪಂಡ್ ಕೊಡಗ್‌ಲ್ ಜಿಲ್ಲಾ ಮ್ಯಾಜಿಸ್ಟ್ರೇಟ್ ಆಯಿತಿಂಜ ಸ್ವರ್ಗಿ ಹಿಲ್ಮನ್ ಬ್ರಾನ್ ಎಣ್ಣುವ ಐ.ಪಿ.ಎಸ್. ಅಧಿಕಾರಿ, "ಭೂಮಿರ ಬೋಜತ್‌ಲೂ, ಕುಂದ್‌ಸಾಲ್, ಪೊಳೆ-ತೋಡ್, ಕುಂಡ್ -ಕುಡ್‌ಪುರನ್ನತ ಎದೆದುಂಬಿ ಬಪ್ಪ ನೈಸರ್ಗಿಕ ಲಕ್ಷಣತ್‌ಲೂ, ಕಾಡ್ ಪ್ರಾಣಿಯ ದುಂಬಿತ್ತುಳ್ಳ ಕಾಡ್ ಕೋವುಲೂ ಕೊಡಗ್‌ನ ಯೂರೋಪ್ ಎಂಡತರ್ ಸ್ಕಾಟ್‌ಲ್ಯಾಂಡ್‌ಕ್ ಹೋಲಿಕೆ ಆಪಾ"ಂದ್ ಎಣ್ಣಿಕಾಟಿತ್. ಕೊಡವಡ ಪಾಟ್‌ಲೂ, "ದೇಶಕೆಲ್ಲೊಯಂದದೂ ಪೊಮ್ಮಾಲೆ ಕೊಡುಮಲೆ, ದೇಶಕೆಲ್ಲಾ ಬಯಂದದೂ ಪೊಮ್ಮಾಲೆ ಕೊಡುಮಲೆ"ಂದ್ ಎಣ್ಣಿತ್. 'ಕೊಡುಮಲೆ' ಎಣ್ಣಿಕ ಪೊನ್ನಾರ ಮಾಲೆ, ಪೊಮ್ಮಾಲೆ ಎಣ್ಣುವ ಅರ್ಥ.

ಕೊಡಗ್ ಜಿಲ್ಲೆ, ಪಂಡೇತ ಮೈಸೂರ್ ರಾಜ್ಯತ್ ನೈಋತ್ಯ ದಿಕ್ಕ್‌ಲ್ ಉಂಡ್. ಇದೊಂಡ ಉದ್ದಗಲ 1,586 ಚದರ ಮೈಲ್. ಉತ್ತರ ದಕ್ಷಿಣ ಆಯಿತ್ ಹೇಮಾವತಿ ಪೊಳೆಂಜ ದಕ್ಷಿಣತರ್ ಬ್ರಹ್ಮಗಿರಿಕೆತ್ತನೆ ಇದೊಂಡ ಉದ್ದ 60 ಮೈಲ್. ಕೊಡಗ್‌ರ ಉತ್ತರ ಬರಿಲ್ ಸುಮಾರ್ 12 ಮೈಲ್ ಉದ್ದ, 6 ಮೈಲ್ ಅಗಲತರ್ ಜಾಗ ಚೆರ್‌ಜನೆ ಹಾಸನ ಜಿಲ್ಲೆರ ಒಳಕ್ ಪೋಯಿತ್.



ಕೊಡಗ್ಗರ ಮಡಿಕೇರಿ ಕೋವು ಸಮುದ್ರ ಮಟ್ಟತಾಂಜ 3,809 ಅಡಿ ಎತ್ತರತ ಉಂಡ್. ಈ ಸಮುದ್ರಮಟ್ಟ ಉತ್ತರತ ಸೋಮವಾರಪೇಟೆಕೆತ್ತನೆ ಒರೇಪೋಲೆ ಉಂಡ್. ಆಚೀಂಗಿ, ಪೂರ್ವ ದಿಕ್ಕಲ್ ಉಳ್ಳ ಕಾವೇರಿ ಪೊಳೆ ಒಕ್ಕುವ ಪ್ರದೇಶಕಾಲೆ ಕುಶಾಲನಗರತ 2,720 ಅಡಿ ಎತ್ತರತ ಉಂಡ್. ಕೊಡಗ್ಗ ಜಿಲ್ಲೆರ ಉತ್ತರ ಪಿಳ್ಳಾ ಪೂರ್ವತ ಹಾಸನ ಪಿಳ್ಳಾ ಮೈಸೂರ್ ಜಿಲ್ಲೆ, ಪಶ್ಚಿಮತ ದಕ್ಷಿಣ ಕನ್ನಡ ಜಿಲ್ಲೆ, ದಕ್ಷಿಣತ ಕೇರಳ ರಾಜ್ಯ ಉಂಡ್.

ಪೂರ್ವ ತೆರಿ ಭಾಗತನ ಬುಟ್ಟಕ ಬಾಕಿ ಎಲ್ಲಾ ಕುಂದ್ ಸೀಮೆ. ಇಲ್ಲಿಯತ ಕುಂದ್ ಮೋಳ್‌ಡೀಯ ಪಿಲ್ಲ ದುಂಬಿತುಂಡ್. ಉತಾರ ಜಾಗತೆಲ್ಲ ಮರಕಾಡ್, ಅನ್ನನೆ ಈಂಡ ಉದ್ದಕೂ ಪೊಳೆ, ತೋಡ್ ಒಕ್ಕುವ. ಕುಂದಲ್ ಕಾಡ್, ಅಗಲವಾನ ತಳಾಟ್‌ಲ ನೆಲ್ಲಾರ ಬೇಲ್. ಬೇಲ್‌ರ ಬರಿಲ್ ರೈತಂಗಡ ಮನ. ಕುಂದ್‌ರ ಉತಾರ ಜಾಗತ ಕಾಪಿತೋಟ, ಅನ್ನನೆ ಶೀತ ಉಳ್ಳ ಜಾಗತ ಯಾಲಮಲೆ ಉಂಡ್.

ಸೋಮವಾರಪೇಟೆರ ಸುತ್ತು ಕುಂದ್ ಸಾಧಾರಣ ತಿರು ತಿರು ಆಯಿತ್ ಇಳಿಚಾರ್ ಪರಂಬಲ್ ಅಲ್ಲಲ್ಲಿ ಮರ ಉಂಡ್. ಮಡಿಕೇರಿ ಪಕ್ಕ ದುಂಬ ಕುಂದ್ ಉಂಡ್. ಕುಂದ್ ನಡುವೆತ ತಳಾಟ್ ದುಂಬ ಆಳವಾನ ಕಾಡಾಯಿತ್ ದುಂಬಿತುಂಡ್. ಕುಶಾಲನಗರತರ ಬರಿಯ ದೂರ ದೂರ ಕುಂದ್ ಉಳ್ಳ ಬಲ್ಯ ಬಯಲ್‌ಸೀಮೆ ಉಂಡ್.

ವೀರರಾಜೇಂದ್ರಪೇಟೆರ ಬರಿಯ ಮುಖ್ಯವಾಯಿತ್ ಬೆಪ್ಪುನಾಡ್, ಕಟಯತ್ನಾಡಲ್ ಬಟ್ಟ ಜಾಗ. ಏರ ಮರಕಾಡ್ ಇಲ್ಲೆ. ಪಚ್ಚೆ ದುಂಬನ ಬಲ್ಯ ಪರಂಬ್, ನೆಲ್ಲ ಬೇಲ್‌ರ ಜಾಗ ಉಂಡ್. ಕಾವೇರಿ ಪಿಳ್ಳಾ ಲಕ್ಷ್ಮಣತೀರ್ಥ ಪೊಳೆರ ನಡುವೆ ಉಳ್ಳ ಕೊಡಗ್ಗರ ಪೂರ್ವದಿಕ್ಕಲ್ ವಿಸ್ತಾರವಾನ ಕಾಡ್ ಉಂಡ್.

### ಕುಂದ್‌ಸಾಲ್

ಪಡಿಇ್ಯಾರ್ ಕಾಡ್‌ರ ಮುಖ್ಯ ಸಾಲ್ ವಾಯವ್ಯ ದಿಕ್ಕಲ್ ಉಳ್ಳ ಪ್ರಷ್ಕಕುಂದ್‌ಂಜ ದಕ್ಷಿಣತರ ಬ್ರಹ್ಮಕುಂದ್‌ಕೆತ್ತನೆ ಸುಮಾರ್ 60 ಮೈಲಾರಚ್ಚಕ್ ನ್‌ಳತೆ ಪಬ್ಬಿತ್. ಈ ಕುಂದ್ ಸಾಲ್‌ಂಜ ಚೆರಿಯ ಚೆರಿಯ ಬೋರೆ ಕುಂದ್‌ಸಾಲ್ ಕವಲೊಡ್‌ಂದ್ ಪಶ್ಚಿಮ ದಿಕ್ಕಂಜ ಪೂರ್ವಕ್ ಪೋಯಿತ್.

1. **ಸುಬ್ರಹ್ಮಣ್ಯ ಕುಂದ್‌ಸಾಲ್:** ಈ ಕುಂದ್‌ಸಾಲ್ ಮಡಿಕೇರಿ ಪೀಠಭೂಮಿಂಜ ಸಂಪಾಜೆ ತಳಾಟ್‌ರ ಮುಂಬರ (ಉತ್ತರ)ಕ್ 6 ಮೈಲಾಕೆತ್ತನೆ ಪಬ್ಬಿತ್ ಅಲ್ಲಿಂಜ ಈಶಾನ್ಯ ಬರಿಕ್ ತಿರಿತ್ ಕೊಡಗ್ಗರ ಉತ್ತರತ ಉಳ್ಳ ಮಂಜರಾಬಾದ್‌ಕೂ, ಕೊಡಗ್ಗಕೂ

ನಡುಲ್ ಉಳ್ಳ ಬಿಸತಿ ಕುಂದ್‌ಕೆತ್ತನೆ ಪಬ್ಬಿತ್. ಇದೊಂದ ಉತ್ತರತ್‌ರ ತುದಿಲ್ ಸಮುದ್ರ ಮಟ್ಟತ್‌ಂಜ 5,626 ಅಡಿ ಎತ್ತರ ಉಳ್ಳ ಸುಬ್ರಹ್ಮಣ್ಯ ಯಾ ಪುಷ್ಪಕುಂದ್ ಉಂಡ್. ಕವಲ್ ಒಡೊಂದ ಕುಂದ್‌ಲ್ ಮುಖ್ಯವಾನದ್ ಮಡಿಕೇರಿಂಜ 9 ಮೈಲ್ ಉತ್ತರತ್ ಉಳ್ಳ ಕೋಟೆಬೆಟ್ಟ ಸಾಲ್. ಇದತ್ ದಂಡ್ ಶಿಖರ ಉಳ್ಳ ಓರ್ ಕುಂದ್ ದುಂಬ ಎತ್ತರ ಆನದ್.

5,400 ಅಡಿ ಎತ್ತರತ್‌ರ ಮೋಳ್ (ಶಿಖರ)ಕ್ ಕೋಟೆಬೆಟ್ಟಾಂದೂ, ಇನ್ನೊಂದ್ ಚೆನ್ನ ಎತ್ತರ ಕಮ್ಮಿ ಉಳ್ಳ ಶಿಖರಕ್ ಹಾರಂಗಾಲ್ ಬೆಟ್ಟಾಂದೂ ಪೆದ. ಕೋಟೆಬೆಟ್ಟತ್‌ರ ತುದಿಲ್ ಎಕ್ಸೋಲು ನೀರ್ ದುಂಬಾನ ದಂಡ್ ಕೆರೆ ಉಂಡ್. ಲನ್ನನೆ ಚೆರಿಯ ಓರ್ ತಿರಿಕೆಯೂ ಉಂಡ್.

2. ಮಡಿಕೇರಿ ಪೀಠಭೂಮಿ : ಪೀಠಭೂಮಿ ಎಣ್ಣೆಕ ನಡುಲ್ ಎತ್ತರವಾನ ಭೂಮಿ ಆಯಿತ್ ಸುತ್ತೂ ಉತಾರ (ಇಳಿಜಾರ್) ಉಳ್ಳ ಜಾಗ. ಮಡಿಕೇರಿ ಪೀಠಭೂಮಿ ಕೋಟೆ ಉಳ್ಳಲ್ಲಿ 3,800 ಅಡಿ ಆನಕ, ಸರಾಸರಿ ಎತ್ತರ 3,500 ಅಡಿ. ಈ ಪೀಠಭೂಮಿ ಉತ್ತರಕ್ ಸೋಮವಾರಪೇಟೆಕೆತ್ತನೆ 26 ಮೈಲ್ ದೂರ ಪೋಯಿತ್. ಪೂರ್ವದಿಕ್ಕಲ್ ಕಾವೇರಿ ಪೊಳೆಕೆತ್ತನೆ ಸುಮಾರ್ 20 ಮೈಲ್ ಉತಾರತೆ ಉಂಡ್. ಕಾವೇರಿ ಪೊಳೆರ ಪಕ್ಕ ಈ ಭೂಮಿ 2,700 ಅಡಿ ಎತ್ತರತ್ ಉಂಡ್. ಈ ಪೀಠಭೂಮಿಲ್ ಚೆನ್ನಂಗ್ ಚೆರಿಯ ಕುಂದ್ ಸಾಲ್ ಉಂಡ್. ಪಶ್ಚಿಮತ್ ಸುಬ್ರಹ್ಮಣ್ಯ ಕುಂದ್‌ಸಾಲೂ, ದಕ್ಷಿಣತ್ ಹೊಸೂರ್ ಕುಂದ್‌ಸಾಲೂ ಉಂಡ್.

3. ಬೇಂಗ್‌ನಾಡ್ ಕುಂದ್‌ಸಾಲ್ : ಸುಬ್ರಹ್ಮಣ್ಯ ಕುಂದ್‌ಸಾಲ್‌ರ ದಕ್ಷಿಣತ್ ಮಡಿಕೇರಿರ ಪೀಠ ಭೂಮಿಂಜ ಪಶ್ಚಿಮತ್‌ರ ಬರಿ ಬೇಂಗ್‌ನಾಡ್ ಕುಂದ್‌ಸಾಲ್ ಪೋಯಿತ್. ಈ ಕುಂದ್‌ಸಾಲ್‌ಕ್ ಉತ್ತರತ್ ಸಂಪಾಜೆ ತಳಾಟ್ ತೆರಿ ಆನಕ, ಕೇದಕ್ ದಕ್ಷಿಣ ಕನ್ನಡತ್‌ರ ಬಯಲ್‌ನಾಡ್‌ಕೆತ್ತನೆ 15 ಮೈಲ್ ಉದ್ದಕ್ ಇದ್ ವಿಸ್ತಾರ ಆಯಿತ್ ಉಂಡ್. ಮಡಿಕೇರಿ ಮಂಗಳೂರ್ ರಾಜನಡೆ (ಮಾರ್ಗ) ಈ ತಳಾಟ್‌ಕಾಲೆ ಪಾಂಜಿಪೋಪ.

4. ಹೊಸೂರ್ ಕುಂದ್‌ಸಾಲ್ : ಈ ಕುಂದ್‌ಸಾಲ್ ಮಡಿಕೇರಿ ಸಮತಟ್ಟಾನ ಪ್ರದೇಶತ್‌ರ ದಕ್ಷಿಣತ್‌ಂಜ ಪೂರ್ವ ಬರಿಕ್ ಕುಶಾಲನಗರಕೆತ್ತನೆ ಡೊಂಕ್ ಡೊಂಕಾಯಿತ್ ಪೋಯಿತ್. ಇದತ್ ಮುಖ್ಯ ಆನದ್ ಕಲ್ಲೂರ್ ಕುಂದ್.

5. ನೂರೊಕ್ಕಡ ಕುಂದ್‌ಸಾಲ್ : ನೂರೊಕ್ಕಡ ಕುಂದ್ ಸಾಲ್ ಮಡಿಕೇರಿರ ದಕ್ಷಿಣತ್‌ಂಜ ಪೂರ್ವತ್‌ರ ಬರಿಕ್ ಉಂಡ್. ಇದ್ ಸಿದ್ಧಾಪುರತ್‌ರ ಪಕ್ಕತ್ ಉಳ್ಳ ಕಾವೇರಿ ಪೊಳೆಕೆತ್ತನೆ ಪಬ್ಬಿತ್. ಎತ್ತರ ಆಯಿತುಳ್ಳ ನೂರೊಕ್ಕಡ ಮೋಳ್ (ಶಿಖರ)ತ್‌ರ ಕೊಡಿಂಜ ನೋಟಾನಕ

ಕೊಡಗ್ಗಡೀ ಕಾಂಬ.

6. ಪೆರಾಂಬಾಡಿ ನಾಲ್ವಾಡ್ ಕುಂದ್ ಸಾಲ್ : ಪಡಿಇಯಾರ್ ಮುಖ್ಯಪಟ್ಟ ಕುಂದ್ ಸಾಲ್. ಇದ್ ಕಾವೇರಿಪೊಳೆ ಪುಟ್ಟುವ ಜಾಗಕ್ ಪಕ್ಕತೆ ಉಳ್ಳ ತೊಡಿಕಾನ ತಳಾಟ್ಂಜ ಆಗ್ನೇಯಕ್ ಉಳ್ಳ ಪೆರಾಂಬಾಡಿ ತಳಾಟ್ ಕೆತ್ತಣೆ ಪಬ್ಬಿತ್. ಇದ್ಂಡ ಮೋಳ್ ಲ್ ನಾಲ್ವಾಡ್ ಲ್ ಉಳ್ಳ ತಡಿಯಂಡಮೋಳ್ ಎಣ್ಣುವ ಕುಂದ್ ಸಮುದ್ರಮಟ್ಟತ್ಂಜ 5,729 ಅಡಿ ಎತ್ತರತ್ ಉಂಡ್. ಇದ್ ಕೊಡಗ್ಗಲೇ ಎತ್ತರವಾನ ಕುಂದ್. ಇದ್ಂಡ ಆಗ್ನೇಯ ದಿಕ್ಕ್ ಲ್ 6 ಮೈಲ್ ದೂರತ್ ಸೋಮಮಲೆ ಮೋಳ್ ಉಂಡ್. ಇದ್ ಕಡಿಯತ್ನಾಡ್ ಲೆ ಎತ್ತರ ಉಳ್ಳ ಮೋಳ್. ಇಲ್ಲಿ ಮಲೆತಂಬಿರಾನ್ ಎಣ್ಣುವ ದೇವಡ ತಿರಿಕೆ ಉಂಡ್. ತಡಿಯಂಡಮೋಳ್ ಕುಶಾನ್ಯಕ್ ದಂಡ್ ಮೈಲ್ ದೂರತ್ ಇಗ್ಗುತ್ತಪ್ಪ ಮೋಳ್ ಉಂಡ್. ಈ ಮಲೆರ ಸಾಲ್ ಲೆ ತುಂಬೆಮಲೆ, ಪೇರೂರ್ ಕುಂದ್ ಪಿಳ್ಳಾ ಶ್ರೀಮಂಗಲ ಕುಂದ್ ಉಂಡ್. ಈ ಸಾಲ್ ರ ಇಇಸ್ಕೋರ್ ಮುಖ್ಯಪಟ್ಟ ಮೋಳ್ ತಾವುನಾಡ್ ಲ್ ಕಾವೇರಿ ಪೊಳೆ ಪುಟ್ಟುವ ಬ್ರಹ್ಮಕುಂದ್. ಇಇಸ್ಕೋ ಇದ್ಂಡ ದಕ್ಷಿಣತ್ ಪೆರಾಂಬಾಡಿ ತಳಾಟ್ ರ ಮೂಲಕ ವೀರಾಜಪೇಟೆಂಜ ಪಶ್ಚಿಮ ಕರಾವಳಿಲ್ ಉಳ್ಳ ತಲಚೇರಿ, ಕಣ್ಣಾನೂರ್ ಕ ರಾಜನಡೆ ಪಾಂಜಿಪೋಪ.

7. ಮಲೆನಾಡ್ ಕುಂದ್ ಸಾಲ್ : ಕೊಡಗ್ಗರ ನೈರುತ್ಯ ಮೂಲೆಲ್ ಉಳ್ಳ ದಕ್ಷಿಣ ಬ್ರಹ್ಮಕುಂದ್ ಯಾ ಮಲೆನಾಡ್ ಕುಂದ್ ಕೊಡಗ್ಗನ ಪೈನಾಡ್ಂಜ ಪ್ರತ್ಯೇಕ ಮಾಡಿತ್. ಈ ಕುಂದ್ ಸಾಲ್ ಲ್ ದುಂಬಾ ಎತ್ತರ ಉಳ್ಳ ಹುಯ್ಯಾಲೆ ಮಲೆ ಎಣ್ಣುವ ಚಾಯುಳ್ಳ ಮೋಳ್ ಪೀಠಭೂಮಿಂಜ ಕೊಡಿಕ್ ಏವ ದೇವಾಸಿ ಕುಂದ್. ಇದ್ಂಡ ಪಶ್ಚಿಮಕ್ ಹನುಮ ಕುಂದ್ ಪಿಳ್ಳಾ ಪೆರುಮಾಲೆ ಎಣ್ಣುವ ದಂಡ್ ಮೋಳ್ ಉಂಡ್. ಈ ಕುಂದ್ ಸಾಲ್ ಂಜ ಅದೆಚ್ಚಕೋ ಚೆರಿಯ ಚೆರಿಯ ಕುಂದ್ ಕ್ಗ್ಗಟ್ನಾಡ್ ರ ಎಲ್ಲಾ ಬರಿಲ್ಲಾ ಪಬ್ಬಿಯಂಡ್ ಕಾವೇರಿ ಪೊಳೆಕೆತ್ತನೆ ಪೋಯಿತ್. ವೀರಾಜಪೇಟೆರ ಪಕ್ಕತ್ ಉಳ್ಳ ಅಂಬಟ್ಟಿ ಕುಂದ್, ಹಾತೂರ್ ರ ಪಕ್ಕತ್ ಉಳ್ಳ ಬುಟ್ಟಂಗಾಲ ಕುಂದ್, ಕುಂದತ್ ಬೊಟ್ಟ್, ಸಿದ್ವೇಶ್ವರಂಡ ಕುಂದ್ ಪಿಳ್ಳಾ ಮಣಕಾಲ್ ಕುಂದ್ ರ ಮದ್ಯತ್ ವಿಸ್ತಾರವಾನ ಬೇಲ್ ಬಾಣೆ ಉಂಡ್.

8. ವಿಳಾಯಿರ ಸೀಮೆ ಕುಂದ್ ಸಾಲ್ : ಕೊಡಗ್ಗರ ಉತ್ತರ ಬರಿಂಜ ಓರ್ ಕುಂದ್ ಸಾಲ್ ಪೊರಟಿತ್ ದಕ್ಷಿಣಕ್ ಬಂದಿತ್ ಕಾವೇರಿ ಪೊಳೆಕ್ ಮುಟ್ಟುವ. ಈ ಕುಂದ್ ಸಾಲ್ ಲ್ ಮಾಲಂಬಿ ಕುಂದ್, ಕಣಗಾಲ್ ಕುಂದ್ ಉಂಡ್. ಮಾಲಂಬಿ ಕುಂದ್ ರ ಎತ್ತರ 4,490 ಅಡಿ. ಈ ಕುಂದ್ ಸಾಲ್ ಪಶ್ಚಿಮ ಘಟ್ಟತ್ ರ ಕುಂದ್ ಸಾಲ್ ಕ್ ಕೂಡಿತ್ ಲ್ಲೆ.



## ಪೊಳೆ

**ಕಾವೇರಿ :** ಕೊಡಗರ ಪೊಳೆಲ್ ಮುಖ್ಯಪಟ್ಟದ್ ಕಾವೇರಿ. ಪಶ್ಚಿಮಘಟ್ಟತುಳ್ಳ ಬ್ರಹ್ಮಕುಂದರ ಮೊರಡಲ್ ಕಾವೇರಿ ಪುಟ್ಟುವ. ಈ ಪೊಳೆ ಪುಟ್ಟುವ ಜಾಗಕ್ ತಲಕಾವೇರಿ ಎಣ್ಣುವ ಪೆದ. ಇದ್ ಓರ್ ತೀರ್ಥಯಾತ್ರರ ಜಾಗ. ಇಲ್ಲಿಂಜ ಕಾವೇರಿ ಪೊಳೆ ಭಾಗಮಂಡಲಕ್ ಪರ್ಂಜಿತ್ ಅಲ್ಲಿ ಬಾಗಿ ಜಿಲ್ಲೆರ ಬೆಲ್ಕ ಮಿಣ್ಣುಕ್ (ಪೂರ್ವಕ್) ಪರಿವ. ಸಿದ್ಧಪುರತರ ಪಕ್ಕತ್ ಈಶಾನ್ಯಕ್ ತಿರಿತ್ ಶಿರಂಗಾಲಕೆತ್ತನೆ ಪರ್ಂಜಿತ್ ಅಲ್ಲಿಂಜ ಹಾಸನ, ಮೈಸೂರ್, ಮಂಡ್ಯ ಜಿಲ್ಲೆರ ಮೂಲಕ ಒಕ್ಕಿತ್ ಸೇಲಮ್, ಕೊಯಮತ್ತೂರ್ ಜಿಲ್ಲೆರ ನಡುಲ್ ಚೆನ್ನಂಗ್ ದೂರ ಪೋಯಿತ್ ತಿರುಚಿನಾಪಳ್ಳಿ, ತಂಜಾವೂರ್ ಜಿಲ್ಲೆಲ್ ಪರ್ಂಜಂಡ್ ಬಂಗಾಳಕೊಲ್ಲಿನ ಕೂಡುವ. ಇದಂಡ ಉದ್ದ 475 ಮೈಲ್. ಕಾವೇರಿ ಪೊಳೆಕ್ ಸಮೃದ್ಧ ಪುರಾಣಕತೆ, ಚಾತ್ರ, ಜಲಪಾತತನ ಪ್ರತ್ಯೇಕ ಆಯಿತ್ ವಿಪರಣೆ ತಪ್ಪ.

**ಹಾರಂಗಿ :** ಮಡಿಕೇರಿ ಪೀಠಭೂಮಿಂಜ ಪರ್ಂಜಿ ಬಪ್ಪ ಪಟ್ಟಿಪೊಳೆ, ಕೋಟೆಬೆಟ್ಟತ್ಂಜ ಪರ್ಂಜಿ ಬಪ್ಪ ಮಾದಾಪುರ ಪೊಳೆ ಮಾದಾಪುರತರ ಪೂರ್ವ ಒಂಸರೆ ಮೈಲ್ ದೂರತ್ ಕೂಡಿತ್ ಹಾರಂಗಿ ಯಾ ಸುವರ್ಣಾವತಿ ಎಣ್ಣುವ ಬಲ್ಕ ಪೊಳೆ ಆಪ. ಈ ಪೊಳೆಕ್ ಶಾಂತಳ್ಳಿಂಜ ಬಪ್ಪ ಚೋರಪೊಳೆ, ಸೋಮವಾರ ಪೇಟೆಂಜ ಒಕ್ಕಿಯಂಡ್ ಬಪ್ಪ ಕಕ್ಕೆಪೊಳೆ ಕೂಡುವ. ಕುಶಾಲನಗರಕ್ ಚೆನ್ನಂಗ್ ಕೊಡಿಲ್ (ಉತ್ತರತ್) ಹಾರಂಗಿ ಪೊಳೆ ಕಾವೇರಿ ಪೊಳೆನ ಕೂಡುವ. ಕಾವೇರಿ, ಹಾರಂಗಿ ಪೊಳೆ ಇಲ್ಲಿ ಕೂಡುವಾನಗುಂಡ್ ಈ ಜಾಗಕ್ 'ಕೂಡಿಗಿ' ಎಣ್ಣುವ ಪೆದ ಬಂದಿತ್.

**ಹೇಮಾವತಿ :** ಹೇಮಾವತಿ ಪೊಳೆ ಚಿಕ್ಕಮಗಳೂರ್ ಜಿಲ್ಲೆಲ್ ಪುಟ್ಟಿತ್, ಹಾಸನತ್ ಪರ್ಂಜಿತ್, ಕೊಡಗ್ ಪಿಳ್ಳಾ ಹಾಸನ ಜಿಲ್ಲೆಕ್ ಉತ್ತರತ್ ಚೆನ್ನಂಗ್ ದೂರ ತೆರಿ ಆಯಿತ್, ಮಿಣ್ಣುಕ್ ಮೈಸೂರ್ ಜಿಲ್ಲೆ ಕೃಷ್ಣರಾಜನಗರತರ ಚೆನ್ನ ಕೊಡಿಬರಿಲ್ ಕಾವೇರಿ ಪೊಳೆನ ಕೂಡುವ.

**ಲಕ್ಷ್ಮಣತೀರ್ಥ :** ಲಕ್ಷ್ಮಣತೀರ್ಥ ಪೊಳೆ ಕೊಡಗರ ದಕ್ಷಿಣತರ ಮಲೆನಾಡ್ ಕುಂದ್‌ಸಾಲ್‌ರ ದೇವಾಸಿ ಕುಂದಲ್ ಪುಟ್ಟಿತ್ ಕ್ಕಗ್ಗಟ್ಟನಾಡಲ್ ಈಶಾನ್ಯ ದಿಕ್ಕುಕ್ ಒಕ್ಕಿತ್ ಮೈಸೂರ್‌ಲ್ ಕಾವೇರಿ ಪೊಳೆನ ಕೂಡುವ. ಇದ್ ಪುಟ್ಟಿತ್ ಚೆನ್ನಂಗ್ ದೂರತ್ ಇರ್ಪು ಎಣ್ಣುವ ಎತ್ತರವಾನ ಜಾಗತ್ಂಜ ಕಲ್ಬುಬಂಡೆರ ಮೀದ ಒಕ್ಕಿತ್ ವಾಯಾವ್ಯ ದಿಕ್ಕಲ್ ಒಕ್ಕಿಯಂಡ್ ರಾಮತೀರ್ಥ ಎಣ್ಣುವ ಪೊಳೆನ ಕೂಡಿಯಂಡ್ ಮಿಣ್ಣುಕ್ ಪೋಪ.

ರಾಮತೀರ್ಥತರ ಪಕ್ಕ ಪೇರ್ಮಾರ್ಡ್ ಎಣ್ಣುವಲ್ಲಿ ಶಿವಪಾದರೆಲೂ, ಇರ್ಪುಲ್ ಶಿವಪಾದರೆರ ಪಿತ್ಯಾಂದೂ ಕಾಲಕ್ ಒಮ್ಮತೆ ಬಲ್ಯ ಜಾತ್ರೆ ನಡಪ. ಅಂದ್ ಯಾತ್ರಿಕಂಗ ಸುಮಾರ್ 80 ಅಡಿ ಎತ್ತರಾತ್ಂಜ ಒಕ್ಕುವ ಪೊಳೆನೀರ್ಕ್ ಮಂಡೆನ ಕಾಟಿಯಂಡ್ ಕುಳಿಪ. ಕೊಡಗ್ಂಜ ಪಶ್ಚಿಮಕ್ ಪರಂಜಂಡ್ ಅರಬ್ಬಿಸಮುದ್ರಕ್ ಕೂಡುವ ಪೊಳೆಯ ಮೂಂದ್.

**ಬರಪೊಳೆ :** ಕ್ಗಟ್ನಾಡಲ್ ದಕ್ಷಿಣತರ ಬ್ರಹ್ಮಕುಂದಲ್ ಪುಟ್ಟಿತ್ ಆಳವಾನ ತಳಾಟ್ಲ್ ಪಶ್ಚಿಮಕ್ ಒಕ್ಕಿತ್ ಉತ್ತರ ಮಲಬಾರರ ಚರಕಲ್ ಎಣ್ಣುವ ಊರರ ಪಕ್ಕಲ್ ಸಮುದ್ರಕ್ ಕೂಡುವ. ಕ್ಗಟ್ನಾಡಲ್ ಕುಟ್ಟಿಂದಿ ಊರಂಜ ಪರಂಜಂಡ್ ಬಪ್ಪ ಸಾರತ್ ಎಣ್ಣುವ ಇದಂಡ್ ಕೈಮೊಳೆ 434 ಅಡಿ ಎತ್ತರತ್ಂಜ ಒಕ್ಕಿ ಬುದ್ದಂಡ್ ಬರಪೊಳೆಕ್ ಕೂಡುವ. ಈ ಜಲಪಾತಕ್ ಸಾರತಬ್ಬಿ ಎಣ್ಣುವ ಪೆದ. ಸಾರತಬ್ಬಿರ ಕೇದಕ್ ಬರಪೊಳೆಕ್ ಕಟ್ಟೆ ಕೆಟ್ಟಿತ್ ಕರೆಂಟ್ ಉತ್ಪಾದನೆ ಮಾಡುವ ಯೋಜನೆ ಮೈಸೂರ್ ರಾಜ್ಯ ಸರ್ಕಾರತರ ಪರಿಶೀಲನೆಲ್ ಉಂಡ್.

**ನೊಜೆಕಲ್ ಪೊಳೆ :** ಸಂಪಾಜೆ ಕಣಿವೆಲ್ ಪುಟ್ಟಿತ್ ದಕ್ಷಿಣ ಕನ್ನಡ ಜಿಲ್ಲೆಲ್ ಒಕ್ಕಿತ್ ಕಾಸರಗೋಡ್ ಟೌನ್ರ ಪಕ್ಕತ್ ಸಮುದ್ರ ಕೂಡುವ. ಅಲ್ಲಿ ಈ ಪೊಳೆಕ್ ಪಯಸ್ವಿನಿ ಎಣ್ಣುವ ಪೆದ.

**ಕುಮಾರಾಧಾರಾ :** ಸುಬ್ರಹ್ಮಣ್ಯ ಕುಂದ್ಸಾಲ್ ಪುಟ್ಟಿತ್ ಚೆನ್ನಂಗ್ ದೂರ ಹಾಸನತರ ಮಂಜರಾಬಾದ್ ತಾಲೂಕ್ಕೂ, ಕೊಡಗ್ಕೂ ನಡುಲ್ ಕೊಡಗ್ಗರ ಉತ್ತರ ತೆರಿಕಾಲೆ ಪರಂಜಂಡ್ ಬಿಸಲೆಘಾಟ್ ಮೂಲಕ ದ.ಕನ್ನಡ ಜಿಲ್ಲೆಕ್ ನುಗ್ಗಿತ್ ಸುಬ್ರಹ್ಮಣ್ಯ ಪುಣ್ಯಕ್ಷೇತ್ರತ್ ಒಕ್ಕಿತ್ ದ.ಕನ್ನಡತರ ಉಪ್ಪಿನಂಗಡಿ ಎಣ್ಣುವ ಊರಲ್ ನೇತ್ರಾವತಿ ಪೊಳೆನ ಕೂಡುವ.

## ಸಸ್ಯ ಸಂಪತ್

ಕೊಡಗ್ಗರ ಸಸ್ಯ ಸಂಪತ್ ಮಾಮೂಲಾಯಿತ್ ಪಶ್ಚಿಮ ಘಟ್ಟತರ ಪ್ರದೇಶತಲೆಲ್ಲ ಕಂಡ್ಬಪ್ಪದ್. ಕೊಡಗ್ಗಲ್ ಮಾಮೂಲಾಯಿತ್ ಮೂಂದ್ ತರತರ ಕಾಡ್ ಉಂಡ್.

1. ಪಶ್ಚಿಮ ಭಾಗತರ ಕುಂದ್ನ ಮುಚ್ಚಿತುಳ್ಳ ಸದಾ ಪಚ್ಚಿ ರಂಗ್ಗರ ಮಲೆಕಾಡ್. ಈಂಡ ಉದ್ದಗಲ 314 ಚದರ ಮೈಲ್.

2. ಪೂರ್ವಭಾಗತರ ತಗ್ಗ್ ಬಾಗ್ತನ ಮುಚ್ಚಿತುಳ್ಳ ಕಣಿವೆ ಕಾಡ್. ಇದಂಡ್ ವಿಸ್ತೀರ್ಣ 165 ಚದರ ಮೈಲ್. ಇಲ್ಲಿ ಪುಂಡ ಭಾರಿ ಚಾಯಿತೆ ಬೊಳ್ಂದಿತಿಪ್ಪ.

3. ಇದ್ ದಂಡಾಂಗೂ ಒಳಪಡತ ಚಿರಿಯ ಮರ ದುಂಬಿತುಳ್ಳ ಕಾಡ್. ಇದ್ ಸುಮಾರ್ 37 ಚದರ ಮೈಲ್‌ರಚ್ಚಕ್ ಉಂಡ್.

ಈ ಕಾಡ್ ಎಲ್ಲ ಸರ್ಕಾರ ಕಾತ್‌ಬೆಚ್ಚ ಕಾಡ್ ಆಯಿತುಂಡ್. ಕೊಡಗ್ಗರ ಒಟ್ಟು ವಿಸ್ತೀರ್ಣವಾನ 1,591 ಚದರ ಮೈಲ್‌ಲ್ 516-39 ಚದರ ಮೈಲ್‌ರಚ್ಚಕ್ ಕಾತ್‌ಬೆಚ್ಚ ಕಾಡ್‌ಂದ್ ಮೈಸೂರ್‌ರ ಅಂಕಿಅಂಶ (ಸ್ಟ್ಯಾಟಿಸ್ಟಿಕಲ್ ಔಟ್‌ಲೈನ್), 1969ಂಡ ಮೋಲೆ ಗೊತ್ತ್ ಕೊಟ್ಟುಪ.

ಕೊಡಗ್ಗರ 516-39 ಚದರ ಮೈಲ್‌ರಚ್ಚಕ್ ಕಾತ್‌ಬೆಚ್ಚ ಕಾಡ್‌ಲ್ ಉತ್ತರ ಕೊಡಗ್ಗಲ್ 377.6 ಚದರ ಮೈಲ್, ದ.ಕೊಡಗ್ಗಲ್ 138.70 ಚದರ ಮೈಲ್, ಅಲ್ಲತೆ 8,579 ಎಕ್ರೆ ಊರಂಬಲ, 7,895 ಎಕ್ರೆ ದೇವಕಾಡ್, 17780 ಎಕ್ರೆ ಪೈಸಾರಿ ಕಾಡೂ ಉಂಡ್. ಇದಲ್ಲತೆ ಖಾಸಗಿ ಒಡೆತನಕ್ ಕೂಡಿತ್ತುಳ್ಳ 2,02,590 ಎಕ್ರೆ ಕುರ್‌ಚಲ್ ಗೌಡ ಪಿಳ್ಳಾ ಚಿರಿಯ ಮರ ದುಂಬಿತುಳ್ಳ ಬಾಣೆ ಉಂಡ್. ಕೊಡಗ್ಗಲ್ ಸರ್ಕಾರ ಪಿಳ್ಳಾ ಖಾಸಗಿ ಜನಡ ಪುಡ್‌ತತ್ ಉಳ್ಳ ಎಲ್ಲಾ ತರತರ ಚಿರಿಯ, ಬಲ್ಲ ಕಾಡ್‌ರ ವಿಸ್ತೀರ್ಣ ಸುಮಾರ್ 1,127 ಚದರ ಮೈಲ್. ಇದತ್ 610 ಚ.ಮೈಲ್‌ರಚ್ಚಕ್ ಕಾಡ್, ಬಾಣೆ ಖಾಸಗಿ ಜನಡ ಪುಡ್‌ತತ್ ಉಂಡ್. ಊರಂಬಲ ಪಿಳ್ಳಾ ಪೈಸಾರಿ ಜಾಗತಾನ ಸರ್ಕಾರ ಜನಕ್ ಕೃಷಿಕ್ ಕೊಡ್‌ತಿತ್. ಖಾಸಗಿ ಜನಡ ಸ್ವಂತ ಬಾಣೆ ತೋಟ ಆಯಿತ್ ಪರಿವರ್ತನೆ ಆನದ್ ದುಂಬ ಉಂಡ್. ಆನಗುಂಡ್ ಕೊಡಿಯತ ಅಂಕಿ ಸಂಖ್ಯೆ ಇಕ್ಕತ ಪರಿಸ್ಥಿತಿಕ್ ಚೆನ್ನಂಗ್ ಭಿನ್ನ ಆಯಿತ್ ಇಂಜಕೋ ಸಾಧಾರಣ ಆಯಿತ್ ಓದುಗಂಗಕ್ ಓರ್ ಅಂದಾಜ್ ಕೊಡ್‌ಕೊಲು.

ಭಾರತತರ ರಾಷ್ಟ್ರೀಯ ಅರಣ್ಯ ಸಂರಕ್ಷಣಾ ನೀತಿಕ್ ಒತ್ತನ್ನೆಕೆ ಪಶ್ಚಿಮಘಟ್ಟತರ ಮಲೆನಾಡ್ ಜಾಗತ್ ನೂರಾಂಗ್ ಅರುವದಾಂಡಚ್ಚಕ್ ಕಾಡ್‌ಜಾಗ ಇರೊಂಡು ಎಣ್ಣುವ ನಿಯಮ ಉಂಡ್. ಕೊಡಗ್ಗರ ಸರ್ಕಾರಿ ಪಿಳ್ಳಾ ಖಾಸಗಿ ಕಾಡ್‌ನ ಕುರ್‌ಚಲ್ ಗೌಡತರ ಕಾಡ್‌ಂದ್ ಕೂಟಾನಕ ಇದ್ ಸುಮಾರ್ ಶೇ. 40 ಆಕು.

### ಕೊಡಗ್ಗರ ಮಲೆಕಾಡ್‌ಲ್ ಬೊಳೆವ ಮರ :

ತಾಂದಿಮರ, ಕೂವೆ ಮರ, ಚಟ್ಟ ಮರ, ಚಪ್ಪೆ ಪೂ, ಕರಿ, ಆಜಿನಿ, ಉಪ್ಪಾಲಿ, ನೊಗ, ಬೈನೆ, ಕರಡಿ ಪಿಳ್ಳಾ ಉರ್‌ಪ್ ಮರ. ಕಣಿವೆ ಕಾಡ್‌ಲ್ ಬೂಟಿ, ತೇಗ, ಮತ್ತಿ, ಬೊಳ್ಳಂದಿ, ಹೊನ್ನೆ, ಪುಂಡ ಇಂಜಕ ಚಿರಿಯ ಮರ ಕಾಡ್‌ಲ್ ಚಾಂದ್‌ಮರ, ಪುಳ್ಳಿಕ್ ಬೋಂಡಿಯಾನ ಮರ ಕಂಡ್‌ಬಪ್ಪ.

ನಾಡ್‌ಕಾರಡ ಮನೆರ ಬೆಂಬರಿಲ್ ಮಾಂಗ ಮರ, ಚೆಕ್ಕಿ ಮರ, ಪುಳಿ, ಚೋರಂಗಿ,



ಸಪೋಟಿತ್‌ರನ್ನತ ಪಣ್ಣಾಪಲತ್‌ರ ಮರ ಇಪ್ಪದ್ ಮಾಮೂಲ್. ಬಾಳೆಗ್‌ಡ ಕೊಡಗರ ಎಲ್ಲ ಜಾಗತೂ ಚಾಯಿತೆ ಬೊಳೆವ.

ಪಂಡೇತ ರಾಜಂಗಡ ಕಾಲತ್ ಕೊಡಗ್ ಪೂರ್ತಿ ಓರ್ ಬಲ್ಯ ಕಾಡೇ ಆಯಿತಿಂಜತ್‌ಂದ್ ಎಣ್ಣೊಲು. ಅಕ್ಕ ಮಡಿಕೇರಿ ಕೋಟೆರ ಪೆರ್‌ಂಬಡಿ (ಮುಖ್ಯ ದ್ವಾರ)ಂಜ ರಾಜಸೀಟ್‌ಕ್ ಪೋಂಡುವೇಂಗಿ ಎಚ್ಚಕೋ ಮರಗ್‌ಚತ್‌ನ ದಾಟಿಯಂಡ್ ಪೋಂಡಿಂಜತ್‌ಂದ್ ಪಂಡೇತವು ಎಣ್ಣುವ. ಕಾಡ್ ಉಳ್ಳಚ್ಚಕ್ ಪ್ರಯೋಜನಾಂದ್ ಅಂದ್ ಕಾಲತ್‌ರ ಜನ ನಂಬಿತಿಂಜತ್. ಎನ್ನಂಗ್ಣೊಕ ಪಡೆಪೊತ್ ಬಂದ ಶತ್ರುವಳ ತಡ್‌ಪಕೂ, ಓರಂದ್ ಸಂದರ್ಭತ್ ಶತ್ರುವಡ ಕಣ್ಣ್ ತಪ್ಪಿಚಿಟ್ಟಿಂಡ್ ಓಡುವಕೂ ಕಾಡ್ ದುಂಬ ಪ್ರಯೋಜನಕ್ ಬಪ್ಪ ಇಂಜತ್. ಟಿಪ್ಪು ಸುಲ್ತಾನಂಡ ಸೈನಿಕಂಗಡ ಕೂಡ ಕೊಡಗರ ರಾಜಂಗ ಪಂಡ್ ಪಡೆಪೊತ್ತಿತ್ ಎಚ್ಚಕೋ ಕುರಿ ಇನ್ನತ ಕಾಡ್‌ಲ್ ಚೋಪ್‌ಚಿಟ್ಟಿತಿಂಜತ್.

1834ತ್ ಕೊಡಗ್‌ನ ಇಲ್ಲಿಯತ ರಾಜನುಂಡ್ ವಶ ಪಡ್‌ತಿಯವಕ್ ಕೊಡಗರ ಉತ್ತರ, ಪೂರ್ವ, ದಕ್ಷಿಣ ಪಿಳ್ಳಾ ಪಶ್ಚಿಮ ದಿಕ್ಕೊಂಜ ಸೈನ್ಯತ್‌ನ ಅಯೆಚತ್. ಅದತ್ ಪೂರ್ವ ದಿಕ್ಕೊರ ಪರಂಬ್‌ಸೀಮೆಂಜ ಬಂದ ಸೈನ್ಯ, ರಾಜಂಡ ಸೈನ್ಯತ್‌ನ ಚೋಪ್‌ಚಿಟ್ಟಿತ್ ಕುಶಾಲನಗರ ಎತ್ತಚಿ. ಬೋರೆ ಮೂಂದ್ ದಿಕ್ಕೊಂಜ ಬಂದ ಸೈನ್ಯಕ್ ರಾಜಂಡ ಸೈನಿಕಂಗ ಕಣಿವೆ ಬಟ್ಟೆಕಾಲೆ ಬಲ್ಯ ಬಲ್ಯ ಮರತ್‌ನ ಅಡ್ಡ ಬೂಕಿತ್ ಕೆಟ್ಟೊನ ಅಡೆತಡೆನ ದಾಟುವ ಕಯ್ಯತೆ ವಾಪಾಸ್ ಪೋಪ ಪರಿಸ್ಥಿತಿ ನಿರ್ಮಾಣ ಆಚಿ.

ಕೊಡಗರ ಪೂರ್ವಭಾಗತ್ ಬಲ್ಯ ಬಲ್ಯ ಪುಂಡ್‌ತರ ಕಾಡ್ ಇಂಜತ್. ರಾಜಂಡ ಕಾಲತ್ ಮುಂಬಾ ಪುಂಡ ಇಂಜಾನುಂಡ್ ಇನ್ನತ ಕಾಡ್‌ರ ಒಳಕ್ ನುಗ್ಗುವಕ್ ಕಷ್ಟ ಆಪ ಇಂಜತ್. ಅಮ್ಮತ್ತಿ ನಾಡ್‌ಲ್ ಇಂಜ ಇನ್ನತ ಓರ್ ಪುಂಡ ಕಾಡ್‌ನ 1855ನೆ ಇಸವಿಲ್ ಪ್ರಾಟೆಸ್ಟೆಂಟ್ ಮತಪ್ರಚಾರಕ ಡಾ. ಮೂಗ್ಲಿಂಗ್ ಕೆತ್‌ಚಿಟ್ಟಿತ್. ಇದೇ ನೇರತ್ ಕ್ರೈಸ್ತಮತಕ್ ಮತಾಂತರ ಆನ ಅಳಮಂಡ ಸ್ಪೀಫನ್ ಸೋಮಯ್ಯ ದಂಪತಿಯಳ ಪಿಳ್ಳಾ ಅಳಮಂಡ ಒಕ್ಕತ್‌ರ ಜಮ್ಮ ಪೊಲೆಯಳ ಅಲ್ಲಿ ಇಪ್ಪಕ್ ಎಣ್ಣಿತ್, ಆ ಜಾಗಕ್ 'ಆನಂದಪುರ' ಎಣ್ಣುವ ಪೆದ ಇಟ್ಟಿತ್. ಇಕ್ಕ ಸಿದ್ಧಾಪುರತ್‌ಂಜ ಅಮ್ಮತ್ತಿಕ್ ಪೋಪ ಬಟ್ಟೆಲ್ ಆನಂದಪುರ ಕಾಟ್ಟುವ.

ರಾಜಂಡ ಕಾಲತ್ ಬೊಳೊಂದ್ ನಿಂದಿತಿಂಜ ಪುಂಡಕಾಡ್ ಪಂಡ್ ಕೊಡಗ್‌ಕ್ ಬಂದಂಡ್ ಇಪ್ಪ ಇಂಜ ಬ್ರಿಟಿಷ್ ಸೈನ್ಯಾಧಿಕಾರಿಯಕ್ ದುಂಬ ಚಾಲು ಕಾಂಬ ಇಂಜತ್. 1813ತ್ ಕೊಡಗ್‌ಕ್ ಬೋಟೆಕ್ ಬಂದಿತಿಂಜ ಕ್ಯಾಪ್ಟನ್ ಬೇಸಿಲ್‌ಹಾಲ್ ಎಣ್ಣುವ ಸೈನ್ಯಾಧಿಕಾರಿ ಪುಂಡ ಕಾಡ್‌ನ ಕಂಡಿತ್ ಆಶ್ವರ್ಯಪಟ್ಟಂಡ್ ಇನ್ನನೆ ಎಳ್ಳಿತ್:

("ಪುಂಡ ಕಾಡ್‌ರ ಒಳ್ಳೆಕ್ ನುಗ್ಗುವಕ್) ಏದೋ ಓರ್ ಬಲ್ಯ ಪಿಳ್ಳಾ ಮಾಯಾಲೋಕತ್‌ರ ಯೂರೋಪ್‌ಲ್ ಕಂಡ್‌ಬಪ್ಪ ಗಾಥಿಕ್ (gothic) ಪೋಲೆತ ಚರ್ಚ್‌ರ ಗುಡ್ಡೆ ಗುಡ್ಡೆ ಗೋಪುರತ್‌ರ ನಡುಲ್ ನಾನ್ ನಡ್‌ಂದಂಡ್ ಪೋಯಂಡ್ ಉಳ್ಳನ್ನೆಕೆ ನಾಕ್ ಕಂಡತ್. ನೆಲ ಪೂರ್ತಿ ಸಮಾಧಿರ ಕೊಡಿಲ್ ಬಿರ್‌ಚ (ಹಾಸ್‌ನ) ಕಲ್ಲರನ್ನೆಕೆ, ಕಾಡ್‌ಗ್‌ಡ ಇಲ್ಲತೆ ಸಮತಟ್ಟಾಯಿತ್, ನೈಸಾಯಿತ್ ಇಂಜತ್. ಇನ್ನತೆ ಸಮಜಾಗತ್‌ರ ಭೂಮಿರ ಕೊಡಿಂಜ ಎಲ್ಲಾ ಬರಿಲೂ ಈ ಕಾಡ್‌ರ ಒಳ್ಳೆಕ್ ಕಣ್ಣ್ ಪೋಪಚ್ಚಿಕ್ ದೂರಕೆತ್ತನೆ ಭಾರಿ ಬಲ್ಯ ಒರೇ ತರತ್‌ರನ್ನೆಕೆ ಕಾಂಬ ಪುಂಡ ಬೊಳೆರ ಗುಡ್ಡೆ ಎದ್ದಿತಿಂಜತ್. ಈಂಡ ಮೊರ್‌ಡ್‌ರ ವ್ಯಾಸತ್‌ನ ನಾನ್ ಅಳೆತೆ ಮಾಡುವಕ್ ಅದ್ 6 ಅಡಿಂಜ 20-30 ಅಡಿಕೆತ್ತನೆ ವ್ಯತ್ಯಾಸ ಇಂಜತ್. ನೆಲತ್‌ಂಜ 8 -10 ಅಡಿ ಎತ್ತರಕ್ ಕೊಡಿಕ್ ಬೊಳೊಂದಂಡ್ ಸುತ್ತೂ ಪಬ್ಬಿತಿಂಜತ್. ಪ್ರತಿಯೋರ್ ಪುಂಡ ಚಾಯಿತೆ ಕಾಂಬನ್ನೆಕೆ ಬಾಂಗಿತ್ ಕೊಡಿಕ್ ಆಕಾಶತ್‌ರ ಬರಿಯ ನೋಟುವ ಇಂಜತ್. ಚೆನ್ನಂಗ್ ಪುಂಡ 60-80-100 ಅಡಿ ಕೊಡಿಕ್ ಪೋಯಿತ್ ಇಂಗ್ಲೆಂಡ್‌ರ ಯುವರಾಜ ಪ್ರಿನ್ಸ್ ಆಫ್ ವೇಲ್ಸ್‌ರ ಮಂಡೆ ತುಣೆರ ಗರಿ ಬಾಂಗ್‌ನನ್ನೆಕೆ ಕಾಂಬ ಇಂಜತ್. ಇನ್ನತೆ ಪುಂಡ ಓರ್ ಪುಂಡತ್‌ಂಜ ಇಇಫ್ಲೋರ್ ಪುಂಡಕ್ 15-20 ಗಜ ದೂರತ್ ಇಂಜಂಡ್ ಓರ್ ಮೈಲ್‌ಕಾಂಜ ಏರ ಎಲ್ಲಾ ದಿಕ್ಕೊಲೂ ಬೋರೆ ಬೋರೆ ಆಯಿತ್ ಕಾಂಬ ಇಂಜತ್"

ಈಂಗ್‌ಮುಪ್ಪಡೇ ವಿವರ್‌ಚ್‌ಟ್ಟ ನೆಡಿಕೂಡ್‌ನ ಕಾಡ್‌ರ ದೃಶ್ಯತ್‌ನಾಡ್, ನೆಜ್ಜಿ ಬೊಳೊಂದ ಪುಂಡತ್‌ರ ಕುಡಿನಾಡ್ ರಾಜಂಡ ಕಾಲತ್ ಇಂಜನ್ನೆಕೆ ಇಕ್ಕ ಕಾಂಬಕ್ ಸಾಧ್ಯ ಇಲ್ಲೆ. ಕಾಲಪೋನನ್ನೆಕೆ ಕೊಡಗಲ್ ಕಾಡ್‌ಚಾಗ ಎಲ್ಲ ಕಮ್ಮಿ ಆಯಂಡ್ ಬಾತ್. ಕೈಂಜ ಶತಮಾನತ್‌ರ ನಡೂಲ್ ಯೂರೋಪ್‌ಕಾರ ಕೊಡಗ್‌ಕ್ ಬಂದಿತ್ ಕೊಡಗ್‌ರ ಎಚ್ಚಕೋ ಏಕ್ರೆ ಕಾಡ್ ಜಾಗತ್‌ನೆಲ್ಲ ಕೆತ್ತಿತ್ ಕಾಪಿಗ್‌ಡ ನಡ್‌ಪಕ್ ಸುರು ಮಾಡ್‌ಚಿ. ಅಂದ್‌ಂಜ ಇಂದೇಕೆತ್ತನೆಕೂ ಕಾಡ್‌ನ ಕೆತ್ತಿತೆ ತೋಟ ಮಾಡಿಯಂಡ್ ಉಂಡ್. ಕಾಲಕ್ರಮೇಣ ಕಾಡ್‌ಲ್ ಇಂಜ ಬಲ್ಯ ಬಲ್ಯ ಮರತ್‌ನೆಲ್ಲ ಕೆತ್ತಿತ್ ಮಾರುವಕ್ ಸುರು ಮಾಡ್‌ಚಿ. ಜನಡ ಪಿಳ್ಳಾ ಸರ್ಕಾರತ್‌ರ ಉತ್ತತ್ತಿನ ಚಾಸ್ತಿ ಮಾಡುವಕ್ ಪುದಿಯ ಜಾಗತ್‌ನ ಕೃಷಿಕ್ ಗುರ್‌ತ್ ಮಾಡುವಕ್ ಕಾಡ್‌ನ ಕೆತ್ತ್‌ಚಿ. ಆಚೇಂಗಿ, ಓರ್ ಬರಿಲ್ ಮರ ಕೆತ್ತ್‌ನಕ, ಇಇಫ್ಲೋರ್ ಬರಿ ಗಾಡ ನೆಟ್ಟಿತ್ ಮರಕಾಡ್‌ನ ಒಪ್ಪೊಂಡು. ಇನ್ನೆ ಮರತ್‌ನ ಮುಂಡತೆ ಕೆತ್ತಿಯಂಡ್ ಪೋನಕ ಮಿಳ್ಳಾಕ್ ಮರಗ್‌ಡ ಇಲ್ಲತೆ ನಂಗಡ ಮಿಳ್ಳಾತ ಪೀಳಿಗೆಕಾರ ದುಃಖಪಟ್ಟಂಡ್ ನಂಗಕ್ ಶಾಪ ಇಡುವ ಕಾಲೋ ಬಕ್ಕು.

## ಜಾತಿ, ಪಕ್ಷಿ, ನೆಲ ಜಲಚರ ಸಂಪತ್

ಕೊಡಗು ಮಾಮೂಲಾಯಿತ್ ನಲ್ಲ ಮಳೆ, ಬೊಳೆ ಇಪ್ಪ ಜಾಗ. ಈ ಮಣ್ಣೆಲ್ ನೆಡಿಕೊಡ್‌ನ ಕಾಡ್ ಉಳ್ಳಾನಗುಂಡ್ ಇಲ್ಲಿ ತರಾವರಿ ಕಾಡ್‌ಜಾತಿಯ, ಪಕ್ಷಿ ಪಿಳ್ಳಾ ಬೋರೆ ಪುಳು-ಪರ್‌ಪು ಉಂಡ್. ಆಚೇಂಗಿ, ಇಕ್ಕತ ಕಾಲತ್ ಕಾಡ್ ಕಮ್ಮಿ ಆಯಂಡ್ ಉಳ್ಳಾನುಂಡ್, ಜನ ಬೋಟೆಕ್ ಪೋಪಾನುಂಡ್ ಕಾಡ್‌ಜಾತಿಯಡ ಸಂಖ್ಯೆ ಬಲ್ಯಕಣಕ್‌ಲ್ ಕಮ್ಮಿ ಆಯಂಡ್ ಬಂದಂಡ್ ಉಂಡ್. ರಾಜಂಗಡ ಕಾಲತ್ ಕಾಡ್‌ಸಂಪತ್ ಬೋಂಡಿಯಾನದ್ ಇಂಜತ್.

ಕೊಡಗುಲ್ ಯರ್ಚಿ ತಿಂಬ ಜಾತಿಯಡಾತ್ ನರಿ ಮುಖ್ಯಪಟ್ಟದ್. ರಾಜಂಗಡ ಕಾಲತ್ ನರಿಯಳ ರಾಜಂಗಳೆ ಬೋಟೆಯಾಡಿ ಕೊಲ್ಲುವ ಇಂಜತ್. 1811ತ್‌ಂಜ 1820ಗತ್ತನೆ ಆಳ್‌ನ ಲಿಂಗರಾಜ ಕೊಂದ ನರಿಯಕ್ ಕಣಕೆ ಇಲ್ಲೆ. ನರಿಯಳ ಪಳಗ್‌ಚಿಟ್ಟಿತ್ ತಾಂಡ ಅರಮನೆರ ಆವರಣತ್ ಚಾಕಿಯಂಡ್ ಇಂಜತ್.

ರಾಜಂಗಡ ಕಾಲತೂ ಕೊಡಗುಲ್ ನರಿ ಕೊಂದಂವಂಗ್ ವಿಶೇಷ ಗೌರವ ಇಂಜತ್. ನರಿ ಕೊಂದಂವನ ಬಂಬ ಎಣ್ಣೆತ್ ನರಿ ಮಂಗಲ ಕೈಪ ಇಂಜತ್. ಬೋಟೆಲ್ ನರಿನ ಕೊಂದಪಿಳ್ಳಾ ಬೆಂದು - ಚಜ್ಜಾದಿಯ, ಊರ್‌ಕಾರ, ಧೋಳ್, ಕೊಂಬ್‌ಕೊಟ್ಟಾ ಪಾಟ್‌ಕಾರ ನರಿ ಕೊಂದ ಬಂಬನ ಮುಂಬಲ್‌ಟ್ಟಾ ಚತ್ತ ನರಿನ ಪೊರ್‌ತಂಡ್ ಊರ್‌ಮಂದ್‌ಕ್ ಪೋಪ ಇಂಜತ್. ಆ ದಿನತ್‌ರ ತಕ್ಕ, ಮುಖ್ಯಸ್ಥಂಗ ನರಿನ ಕೊಂದಂವನ ಪಿಳ್ಳಾ ನರಿರ ಬಾಲ್‌ನ ಆದ್ಯ ಮುಟ್ಟಾನಂವನ ಬೊಳ್ಳಿರ ಒಡಿಕತ್ತಿ ಕೊಡ್‌ತಿತ್ ಸನ್ಮಾನ ಮಾಡುವ ಇಂಜತ್.

ಚತ್ತ ನರಿನ ಓರ್ ಬಲ್ಯ ದೊಣ್ಣೆಲ್ ನೇತಿಯಂಡ್ ನರಿ ಕೊಂದ ಬಂಬಂಡ ಮನೆಕ್ ಕೊಂಡಬಂದಿತ್ ಅವಂಡ ಪಟ್ಟಿಲ್ ಬುದ್ಧಾಕುವ ಇಂಜತ್. ಅಕ್ಕಣೆಕ್ ನರಿ ಕೊಂದ ಸುದ್ದಿ ಕೇರಿ ಊರ್‌ಡೀ ಪಬ್ಬಿತ್ ಇಪ್ಪ ಇಂಜತ್. ನರಿ ಕೊಂದಂವಂಗ್ ಮಂಗಲಕಾರಂಡ ಉಡ್‌ಪ್ ಇಟ್ಟಿತ್ ನರಿರ ಎದಿಕೆ ಮುಕ್ಕಾಲಿರ ಮೀದ ಅಳತವ ಇಂಜತ್. ನರಿ ಮಂಗಲಕ್ ಬಂದ ಬೆಂದುವೆಲ್ಲ ನರಿ ಕೊಂದ ವ್ಯಕ್ತಿರ ಬಂಬತನತ್‌ನ ಕುಶಿಪಟ್ಟಾ ಪೊನ್ನಾ, ಪಣ, ಕೊದಿಮೊದ ಕೊಡ್‌ತಿತ್ ಆಶೀರ್ವಾದ ಮಾಡುವ ಇಂಜತ್.

ಇದಾನಪಿಳ್ಳಾ ಚತ್ತ ನರಿರ ಸುತ್ತೋಡ್ ಸುತ್ತು ಕೊಂಬು ಕೊಟ್ಟಾ ವಾಲಗತ್ತೋಡೆ ಆಡಿಯಂಡ್ ಗೌಜಿ ಗದ್ದಾಳತ್‌ರ ಊಟ ಆಯಿತ್ ಪಿರಿವ ಇಂಜತ್. ಇನ್ನನೆ ನರಿ ಮಂಗಲ ಮಾಡಿಯಂಡಪಿಳ್ಳಾ ಅಂದ್ ಕಾಲತ್ ವೀರರಾಜಂಗ ಏದ್‌ಪೋಲೆ ಕೊಂಬ ಮೀಸೆ ಬೆಚ್ಚವ ಇಂಜತೋ ಅದೇ ಪೋಲೆ ಕೊಂಬ ಮೀಸೆನ ನರಿ ಕೊಂದ ಬಂಬನೂ ಬೆಚ್ಚವಲಿಂಜತ್.

ನರಿ ಮಂಗಲತರಂದ್ ಉರ್ಕಾರ ಪಿಳ್ಳಾ ಬೆಂದು, ಚೆಜ್ಜಾದಿಯ ಅಳ್ತಂಡ್  
ದುಡಿಕೊಟ್ಪ್ ಪಾಟಾಯಿ ನರಿ ಕೊಂದ ಬಂಬನೋ ಕೊಂಡಾಡುವ ಇಂಜತ್. ಆ ಪಾಟ್‌ರ  
ಚೊಲ್ಲೋಲೆ ಇನ್ನನೆ ಉಂಡ್. (ಈ ಪಾಟ್‌ಲ್ ಬಪ್ಪ ಅಪ್ಪಣ್ಣ ಎಣ್ಣುವ ಪೆದತ್‌ರ  
ಬದ್‌ಲ್‌ಕ್ ನರಿ ಕೊಂದ ವೀರಂಡ ಪೆದತ್‌ನ ಎಣ್ಣೆತ್ ಪಾಡುವ).

ಬಾಳೋ ಕೇಳಿ ಚೆಜ್ಜಾದಿ  
ಪಾಡುವ ಮೊಳಿ ಕೇಳಿ  
ಪೊಮ್ಮಾಲೆ ಕೊಡಪುಲ್  
ಕೇಳಿಪೋನ ನಾಡೋನೊ  
ನಲ್ಲೋರಾಚೆ ನಾಳಾಯಿ  
ಅಯ್ಯಪ್ಪ ಚೆನಿಯಾಚೆ  
ಪೊಲಬೋಲೆ ಪೊಲುವಕ  
ಪೂವರ್‌ಕ್ ನೆಟ್ಟಿತ್  
ಮೈ ಜಳಂದಿತ್ ಎದ್ದಿತ್  
ಸೂರ್ಯನ ತೊತ್ತಿತ್  
ತಾನೊಡನೆ ಬಂದಿತ್  
ಕಾಲ್ ಮೂಡ್ ಕತ್ತಿತ್  
ಕುಕ್ಕುಮೆಕ್ ಕೂಳಾಯಿ  
ಉಂಡಿತೂ, ಕುಡ್‌ಚಿತೂ  
ತಾನು ತನ್ನಡೂರೋನು  
ಬಾಂಗಾಡ್ ಬನತ್‌ಲ್  
ಮುಂಗಾಡ್‌ಲ್ ನಿಂದಿತ್  
ನಾಯಿನೆಡಿ ಕೂಟನೆ  
ಚೀಲನಲ್ಲ ನಾಯಿಯು  
ಚೆನ್ನ ದೂರ ಪೋಕಣೆ  
ಪಟ್ಟೆ ಬಲ್ಲಿಯ ಪೆಬ್ಬಲೆ  
ಬಾಂಗ್‌ನ ಮರತ್ತಡಿ  
ತೂಂಗ್‌ನ ನೆಡಿ ಅಡಿ  
ಬುದ್ಧ ಮರಕುಂಬಡಿ  
ಮಕ್ಕಿ ಬುದ್ ವರುಪಕ





ಪಟ್ಟೆ ಬಲ್ಲಿಯ ಪೆಬ್ಬುಲಿ  
 ನೆಕ್ಕ ನೆಚಿ ಕಂಡದೊ  
 ಎನ್ನಂದೆಣ್ಣೆ ಅರಿವಿರಾ  
 ಡೀಸೆರ್ ಮನ್‌ಸಂಗ  
 ನೈ ತೋಕ್ ಕೈಲಾಯಿ  
 ಕಾಡ್ ಬೋಟೆ ಬಂದಿತ್  
 ಬಿಲ್ಲ ಮಾರ್ ಕಟ್ಟಿತ್  
 ನೆಕ್ಕನಚಿ ಕಂಡಿತೊ  
 ನೈ ಜಳಂದಿತ್ತದ್ದಿತೊ  
 ಏರ ಚೊಡಿ ಬಂದಿತೊ  
 ಏಬಾರ್ ಪರಂದಿತೊ  
 ನಾಕ್ ಎದ್‌ರ್ ಬಂದಂವನ  
 ಕಂಡತುಂಡ್ ಮಾಡುವಿ  
 ಜಬ್ಬುಮಿಕ್ ಚಾಡುವಿ  
 ಎಂದೆಣ್ಣೆ ಪರಂದಿತ್  
 ಬಾಯಿಬುಟ್ಟ್ ಅರಂದಿತ್  
 ಪಾರಿಗೊಂಡ್ ಬಪ್ಪಕ  
 ಚೀಲನಲ್ಲ ಅಪ್ಪಣ್ಣ  
 ಬೈ ಕಾಡ್‌ಂಜಿ ಓಡಿತೊ  
 ಮುಂಗಾಡ್‌ಲ್ ನಿಕ್ಕಣೆ  
 ಪಟ್ಟೆ ಬಲ್ಯ ಪೆಬ್ಬುಲಿ  
 ಪಾರಿಗೊಂಡ್ ಬಪ್ಪಕ  
 ನೈ ತೋಕ್ ಪುಡ್‌ಚಿತ್  
 ಕನ್ನಡಿ ಕಂವುಕ್‌ಕ್  
 ತಿತ್ ಬೊಡಿ ಬೆಚ್ಚಿತ್  
 ಅಕ್ಕಣೆಕ್ ಪೆಬ್ಬುಲಿ  
 ಬಾಯಿ ಬುಟ್ಟ್ ಅರಂದಿತ್  
 ಜಬ್ಬುಮಿಕ್ ಬುದ್ದತೊ  
 ಬೀರಾಜೋಗ ಬುಟ್ಟಿತೊ  
 ಅಕ್ಕಣೆಕ್ ಬಾಲಂಗ್

ಓಡೊ ಪಾರೊ ಪೋಯಿತ್  
 ಬಾಯರಂದ ಪೆಬ್ಬಲಿ  
 ಬಾಯಿ ಬುಟ್ತ್ ಕೊರ್ಕ್‌ನ  
 ಈನಗುಂಡ್ ಪೋರಾಂದ್  
 ಪಟ್ತ್‌ಪೋಲೆ ಊರೋನ್  
 ಪೆಬ್ಬಲಿರ ಕುಳ್ಳಿ ನಾ  
 ಊರ್‌ಡ ನಡುವಲ್  
 ಪೂವೆಲಂಗೆ ಮಂದಲ್  
 ಅಲ್ಲಿಕೊಂಡ್ ಬೆಚ್ಚೆತ್ತ  
 ನೇರೊಯಿಪತಾಪಕ  
 ಪಟ್ಟತಾನೆ ಅಪ್ಪಣ್ಣ  
 ಕಾಳೆ ಪಂದಿ ಕೆತ್ತಿತ್  
 ಇಲ್ಲವನು, ಬೆಂದುಕೂ  
 ವಾಲೆ ಆಳ್ ಅಯೆಚಿತ್  
 ಓರಂದೀರಂಡೆಣ್ಣಣೆ  
 ಎಲ್ಲಾ ಬಂದ್ ಕೂಡುವಕ  
 ಚೀಲ ನಲ್ಲ ಅಪ್ಪಣ್ಣ  
 ಪೊಂಗುಳಿ ಕುಳ್ಳಚಿತ್  
 ಮಾಜುತ್ತಿ ಮಡಿಪಾಂಜ  
 ತಾನು ತನ್ನ ಊರೋನು  
 ಆಡಿಪಾಡಿ ಪೋಯಿತ್  
 ಪೂವೆಲಂಗ್ ಮಂದಲ್  
 ಪೆಬ್ಬಲಿರ ಮಿಳ್ಳಲ್  
 ಕೇಕೋಕಿ ಮೊಗವಾಯಿ  
 ಮೂರ್ತಕಳ್‌ತಿತೊ  
 ತಾನದ್‌ನ ಕಾಂಬಕ  
 ತನ್ನ ಪೆತ್ತ ಅವ್ವನು  
 ಇಲ್ಲವನು ಬೆಂದು  
 ಮಂಡೆಕಕ್ಕಿ ಇಟ್ಟಿತ್  
 ಪೊಂಬಣ ಕೊಡ್‌ತಿತೊ

ಓರಂದೀರಂದೆಣ್ಣಣೆ  
 ಮೂರ್ತ ಕಯಿಂಜತೊ  
 ತಾನು ತನ್ನ ಊರೋನು  
 ಆಡಿ ಪಾಡಿ ಬಂದದೊ ತಮ್ಮನೆಕ್ ಬಂದಿತ್  
 ಕೂಡ್‌ನೋರ್ ಮಾಲೊರೊ  
 ಉಂಡಿತ್; ಕುಡ್‌ಚಿತ್  
 ತಕ್ಕಾರ ಪೆರ್‌ಜಾಯಿ  
 ವಯ್ಯನೆ ಪಿರಿಂಜಿತೊ  
 ಎಂದೆಣ್ಣೆ ಪಾಡುವಾ  
 ಪಾಡುವಾನ ಬೆಪ್ಪಿನೊ  
 ಬೆಪ್ಪಕೊಮ್ಮ ಎಡ್‌ಪಕೊ  
 ಪಾಟ್‌ರಾ ಮೊಳಿಯಾಲೆ  
 ಲೆಲ್ಲಾ ಲೇಲೋ ಲೇಲೆ ಲಾ

ಕೊಡಗುಲ್ ನರಿ ಮಾತ್ರ ಅಲ್ಲತೆ ಚಿರತೆ, ಬೆಕ್ಕ್, ಕಬ್ಬೆಕ್ಕ್, ಕತ್ತೆಕಿರ್‌ಬ, ಕುರ್ಕ, ತೋಳ, ಕೆನ್ನಾಯಿ, ನೀರ್‌ನಾಯಿಯಳೊ ವಾಸ ಇಂಜತ್.

ಪುಷ್ಟಗಿರಿ, ಕೋಟೆಬೆಟ್ಟ, ಪಿಳ್ಳಾ ಕಲ್ಲೂರ್ ಕುಂದ್‌ಸಾಲ್‌ಲ್ ಪಂಡ್ ಕರಡಿಯ ವಾಸ ಇಂಜತ್. ಇಲ್ಲಿ ಬೋಂಡಿಯಾನ ತೇನ್ ಇಂಜಾಂಗ್ ಕರಡಿಯ ಇಲ್ಲಿ ಏರಕಣಿಕ್‌ಲ್ ಇಂಜದ್ ಗೊತ್ತ್‌ಕ್‌ಟ್ಟುವ.

ಅನ್ನನೆ ಮೊನ, ಮುಳ್ಳಪಂದಿಯ. ಕಾಡ್ ಪಂದಿಯ ಸಾಧಾರಣತರ ಕಾಡ್‌ಲೂ ಇಪ್ಪ ಇಂಜತ್. ಕಡ್‌ಮ, ಕಾಡ್‌ಕೊರಿ, ಜಿಂಕೆ, ಕಾಟಿ ಇನ್ನತ ಜಾತಿಯ ಬೋಂಡಿಯಾನದ್ ಇಂಜಿತ್ ಕ್ರಮೇಣ ಕಣಿಕ್‌ಲ್ ಕಮ್ಮಿ ಆಯಿರ್‌ತ್.

ಕೊಡಗುಲ್ ಆನೆಯಡ ಕಣಿಕ್ ಕಮ್ಮಿಲೊಂದೊ ಇಂಜಲೆ. ಬಲ್ಯ ಬಲ್ಯ ಮರತ್‌ರ ತುಂಡ್‌ನ ಕಡ್‌ತುವಕ್, ದೇವಡ ನಮ್ಮ ನಾಳರ ಸಂದರ್ಭತ್ ತಡ್‌ಂಬುನ ಪೊರ್‌ತಂಡ್ ಮೆರವಣಿಗೆ ಮಾಡುವಕ್ ಆನೆಯ ದುಂಬ ಪ್ರಯೋಜನ ಆಪ ಇಂಜತ್. ಇಂದ್ ಮಾತ್ರ ಅಲ್ಲ, ರಾಜಂಗಡ ಕಾಲತೇ ಆನೆಯಡ ಹಾವಳಿ ಇಂಜತ್. ಅವು ಗೆಡಿ ಗೆಡಿ ಬೇಲ್, ತೋಟ ತೊಡಿಯಕ್ ಧಾಳಿ ಮಾಡಿತ್ ಫಸಲ್‌ನೆಲ್ಲ ಪಾಳಿ ಮಾಡುವ ಇಂಜತ್. ಇನ್ನತ ನೇರತ್ ರಾಜಂಗ ಆನೆಯಳ ಬೊಡಿಬೆಚ್ಚಿತ್ ಕೊಲ್ಲುವ ಇಂಜತ್. ಅನ್ನನೆ ಓರಂದ್ ಸಂದರ್ಭತ್ ಉಪಾಯತ್ ಪುಡ್‌ಚಿತ್ ಪಳಿಗ್‌ಚಿಡುವದೊ ಇಂಜತ್.

1822ನೇ ಇಸವಿಲ್ ಕೊಡಗರ ಆಖೀರಿ ರಾಜನಾನ ಚಿಕ್ಕವೀರ ರಾಜ ಬೋಟಿಯಾಡಿತ ಕೊಂದಪಿಳ್ಳಾ, ಜಿಂಪತೋಡೆ ಪುಡಾಚ ಆನೆಯದ ಕಣಕಾನ ಓರ್ ಶಾಸನತ್ ಎಳ್ಳಿಚಿಟ್ಟಿತ ಮಡಿಕೇರಿ ಅರಮನೆಲ್ ಬೆಚ್ಚಿತಿಂಜತ್.

ಕೊಡಗಲ್ ಉಳ್ಳ ಕೋಡಂಗಳ ಮೂಂದ್ ಗುಂಪ್ ಮಾಚೊಲು. ಕರಿಂಗೋಡ, ಬೂದಿಕೋಡ ಪಿಳ್ಳಾ ಮುಚ್ಚಿ.

ಮುಚ್ಚಿ ಎಣ್ಣುವ ಗುಂಪಾರ ಕೋಡನ ಬೋಟಿಯಾಡಿತ ಕೊಂದಿತ ತಿಂಬ ಇಂಜತ್. ಅಲ್ಲತ ಕೋಡಂಗಡ ತೋಲ್‌ನ ದುಡಿ ತಯಾರ್ ಮಾಡುವಕೂ ಉಪಯೋಗ್‌ಚಿಡುವ.

### ಪಕ್ಷಿಯು

ಕೊಡಗಲ್ ಬೋಂಡಿಯಾನ ಪಕ್ಷಿಯ ಪಂಡ್ ಕಾಲತ್ ಇಂಜತ್. ಅದತ್ ಜಡ್ಡಪದ್ವ್, ಪದ್ವ್, ಗಾಡ್‌ಗ, ಕೊಂಬಕ್ಕಿ, ಮೀಂಗೊತ್ತಿ, ಗೀಜಪಕ್ಕಿ, ಮಲೆಗಾಣಿ, ಮರಕೊಟ್ಟಿ, ಕಾಡ್‌ಕೋಳಿ, ತೋರೆ ಪಕ್ಕಿ ಬಡುವತೊರೆ, ಮಣಿತೊರೆ, ಕಾಡ್‌ಕೋಳಿ, ಕೆದಕೋಳಿ, ಬಾಲಾಟಿ ಚಂಬೆ, ಗರುಡ, ನವಿಲ್, ಪೋಳಿ, ಗೂಮ, ಕೋಗಿಲೆ, ಕಾಕೆ, ಮಿಂಚುಳ್ಳಿ, ಮನೆಪಕ್ಕಿ, ಮೈನಾ, ಮೋರಂಗೋಳಿ, ಪಾರಿವಾಳ, ಕೊಟ್ಟ್ ಮುಡಾಚ, ಕುರುಳಿ ಪಕ್ಕಿ, ಬಾತ್‌ಕೋಳಿ ಇನ್ನತದ್.

ಚೆನ್ನಂಗ್ ಜನ ಇಕ್ಕಲೂ ತಂಗಡ ಮನೆಲ್ ಕೋಳಿ, ಪಾರಿವಾಳ, ಬಾತ್‌ಕೋಳಿಯಳ ಚಾಕುವ.

### ಪರ್‌ಪ ಜಾತಿಯು

ರಾಮಸ್ವಾಮಿ ಕಣಿವೆರ ಪಕ್ಕತ ಕಾವೇರಿ ಪೊಳೆಲ್ ಓರಮ್ಮತ ವೊಸಳೆಯ ಕಾಂಬ್‌ಚಿಟ್ಟಿವ. ಕೊಡಗಲ್ ಜಡೆಯ, ಪಟ್ಟೆ ಕೊಳಕ, ಬಳೆಮುರಿ ಪಿಳ್ಳಾ ಪೆರಂಬಾಂಬ್ ಮನುಷ್ಯಂಗ್ ಅಪಾಯ ತಪ್ಪ. ಬಲ್ಯ ಕುಂದಲ್ ಪೆರಂಬಾಂಬು, ಕುರ್ತ್ ಮಂಡುಳಿಯ ಇಪ್ಪ ಕೇರೆ, ಪಚ್ಚಿ ಪಾಂಬು, ನೀರ್ ಪಾಂಬು ಅಪಾಯ ಇಲ್ಲೆ.

ಚಿಕ್ಕವೀರರಾಜ ಕೊರಿ, ಎಮ್ಮೆ, ಪೋರಿಯಕ್ ಪಾಂಬುನುಂಡ್ ಕಡಾಪ್‌ಚಿಟ್ಟಿತ ಅವು ಆರೆಗಂಟೆಲ್ ಚಾವಾಂದ್ ಕಂಡ್ ಪುಡಾಚಿತಿಂಜತಲೊ.

ಕೊಡಗರ ಪೊಳೆ ಪಿಳ್ಳಾ ಕೆರೆಲ್ ಪಲತರತರ ಮೀನ್ ಉಂಡ್. ಅದತ್ ಬಾಳೆಮೀನ್, ಬರೆ ಮೀನ್, ಕೊಯಿಲೆ ಮೀನ್, ಬಂಡ್‌ಮೀನ್, ಪಂದಿಮೀನ್, ಬೊಳ್ಳಿಮೀನ್, ಮಳಂಜಿ ಮೀನ್ ಕೊಟ್ಟುವ. ಅನ್ನನೆ ನೀರ್ ದುಂಬಾನ ಬೇಲ್‌ಲ್



ತರಾವರಿ ಮೀನ್ ಕಟ್ಟುವ. ಈ ಎಲ್ಲಾ ಮೀನ್‌ನ ಮಾಮೂಲ್ ಆಯಿತ್ ಕೊಡಗ್ಗರ ತಂಗಡ ಉಣ್ಣತೀನಿಲ್ ಬಳ್ಳಸುವ.

ಕೊಡಗ್ಗಲ್ ತೇನ್ ಪುಳುವಳುಂಡ್ ನಲ್ಲ ಗುಣಮಟ್ಟತರ ತೇನ್, ಮೇಣ ಕಟ್ಟುವ ಇಂಜತ್.

ಮಳೆಗಾಲತ್ ಉಂಬುಳುವ ಕಾಡ್ಲ್ ತಿರ್‌ನಯಿಂಗಡ ಚೋರೆ ಉತಿತ್ ಆಯೆಪ. ಟಿಪ್ಪು ಸುಲ್ತಾನಂಡ ಸೈನಿಕಂಗ ಬಣ್ಣಚಾತಿರ ಉಂಬುಳುವ ಮನುಷ್ಯಂಡ ಚೋರೆ ಉತುವಾನ ಕಂಡಿತ್ ಬೊತ್ತಿತ್ ಪೋಯಿತಿಂಜತ್‌ಲೋ.

### ಕೊಡಗ್ಗರ ಹವಾಮಾನ ಪಿಳ್ಳಾ ಮಳೆ

ಕೊಡಗ್ಗ ಕುಂದ್‌ಮಲೆರ ಪ್ರದೇಶ ಆಯಿತುಳ್ಳಾನುಂಡ್ ಇಲ್ಲಿ ಸಾಧಾರಣ ಸಮಶೀತೋಷ್ಣ ಇಪ್ಪ. ಏಪ್ರಿಲ್ (ಎಡಮ್ಯಾರ್) ತಿಂಗತ್ ಹವಾಮಾನ ಸುಮಾರ್ 90 ಫ್ಯಾರನ್ ಹೀಟ್ ಇಂಜಕ, ಡಿಸೆಂಬರ್, ಜನವರಿಲ್ (ದಲ್ಮಾರ್, ಮಾಲ್ಮಾರ್) 50 ಫ್ಯಾರನ್ ಹೀಟ್ ಇಪ್ಪ. ಈ ದಂಡೂ ಸಮಯತರ ನಡುವೆತ ವ್ಯತ್ಯಾಸ 50-90 ಇಪ್ಪ.

ಇಕ್ಕ ಕೊಡಗ್ಗಲ್ ಮರಕಾಡ್ ಕಮ್ಮಿ ಆಯಂಡ್ ಉಳ್ಳಾನಗುಂಡ್ ಬೇನಿಲ್ ಬೆದಾರ ಕಾತ್ ವಿಪರೀತ. ಇಕ್ಕ ಕೊಡಗ್ಗರ ಹವಾಮಾನ ಎನ್ನುಂಡೇಂಗಿಯೂ ಸುಮಾರ್ 180 ಕಾಲಕ್ ಬಯ್ಯ ಎಣ್ಣಕ ಟಿಪ್ಪು ಸುಲ್ತಾನ್ ಕೊಡಗ್ಗಕ್ ಪಡೆಪೊತ್ ಬಪ್ಪಕ ಅವಂಡ ಕೂಡೆ ಬಂದ ಮೈಸೂರ್ ಸೈನಿಕಂಗಕ್ ಇಲ್ಲಿಯೆತ ವಾತಾವರಣ ಒಗ್ಗಲೆ. ಅಕ್ಕ ಕೊಡಗ್ಗರ ಶೀತ ವಾತಾವರಣತಾನ ಟಿಪ್ಪು ಸುಲ್ತಾನಂಡ ಚರಿತ್ರೆಕಾರ ಎಳ್ಳಾನಾನ ನೋಟುವಕ ಆಯಿಂಗಕ್ ಆನ ಅನುಭವ ಎಂತ ಎಣ್ಣವದ್ ಗೊತ್ತಾಪ.

ಇಲ್ಲಿಯೆತ ಕುಳ್‌ರಾನುಂಡ್ ಪೆನ್ನಲ್ ಎಳ್ಳುವಕ್ ಪೊರ್‌ಡುವಾಂಗ್ ಮುಪ್ಪಡೇ, ನೀರ್ ಮಂಜಿಕೆಟ್ವನ ಸಮುದ್ರತ್ ಮುಳ್‌ಕಿತ್ ಇಟ್ಟಕ ಕೋಡಿ ಪೋನನ್ನಕೆ ಇಪ್ಪ. ಈ ಹವಾಮಾನತರ ವಾಸ್ತವತೆನ ಎಣ್ಣವಕ್ ಪೊರ್‌ಟಕ ಕಿರಿ ಮುಚ್ಚಿ ಪೋಕು ಎಣ್ಣವ ಪೋಡಿ. ಸ್ವರ ಕಮ್ಮಿ ಆಯಿಪೋಪ. ಆನಗುಂಡ್ ಎಂತ ಮಾತ್ರ ಎಣ್ಣೋಲು? ಸೂರ್ಯ ತಾಂಡ ತಾಕತ್ತ್ ಮೀರಿತ್ ಎಚ್ಚಕ್ ಬೆದಲ್ ಉಂಡೇಂಗಿಯೂ ಇಲ್ಲಿಯೆತ ಕುಳ್‌ರಾರ ಕೋಟಕ ಬೊತ್ತಿತ್ ಎಕ್ಕೋಲು ತಾಂಡ ಮಂಡೆನ ಮೋಡತರ ಒಳಿಯ ಮರ್‌ತವ. ಅಲ್ಲತೆ ಈ ಜಾಗತ್ ಎತ್ತಚೇಂದ್ ಕಂಡಕ ಬೆರಿಯ ಓಟ್‌ಮುರ್‌ಕಿರುವ. ಚೂರ್‌ನೂ ಅಚ್ಚಿಕೆ. ಈ ಜಾಗಕ್ ಬಾತ್‌ಂದ್ ಕಂಡಕ ಎಕ್ಕೋಲು ಬೈಟ್ ಬೊತ್ತಿತ್ ತಾಂಡ ಮೂಡ್‌ನ ಆಕಾಶತರ ನೀಲಿ ಮುಸುಕ್‌ರ ಒಳ್‌ಲ್ ಪೊತ್ತಿಯುಂಡ್ ಕೂಡಿಯವ. ಇದ್ ಎನ್ನನೆಯೂ

ಬೇನಿರ ವಿವರಣೆ. ಮಳೆಗಾಲ ಪಿಳ್ಳಾ ಕುಳಾರ್‌ಗಾಲತ್‌ಂಜ ದೇವಳೆ ನಂಗಳ ಕಾಪಾಡೊಂಡು. ಎನ್ನಂಗೆಣ್ಣಕ ಕಾಲತ್ ಆರ್ ತಿಂಗಳೆತ್ತನೆ ಆಕಾಶತ್‌ಡೀ ಮೋಡ. ದೇಶತ್‌ಲೆಲ್ಲ ಮಳೆ ತೊರಿಯುವ"

"ಸೂರ್ಯ ಉದ್‌ಚಿತ್ ದಂಡ್ ಗಂಟೆಕೆತ್ತನೆಯೂ ಮಂಜಿ ಬುದ್ದದ್ ಅನ್ನನೆ ಕೌಂಜಿತಿಪ್ಪ. ತಡಿಲ್ ಉದ್ದಕ್ಕೂ, ಬಣ್ಣಕ್ಕೂ ಬೊಳ್‌ಂದಿತಿಪ್ಪ ಬಾಲೆಕಾರ ಕುಳಾರ್‌ಕ್ ಬೊತ್ತಿತ್, ಬಿಲ್ವರ ಪೋಲೆ ತಂಗಡ ಪಿಲ್ವ ಮನರ ಒಳ್‌ಲ್ ತುರ್‌ಂಡಿ ಬುದ್ದಂಡಿತಿಪ್ಪ"

ಕೊಡಗಲ್ ಮಾರ್ಚಿಂಜ ಮೇ (ಮೀನ್ಯಾರ್‌ಂಜ ಕಾದ್ಯಾರ್) ಆಖೀರಿಕೆತ್ತನೆ ಬೇನಿಕಾಲ. ಜೂನ್‌ಂಜ ಅಕ್ಟೋಬರ್ (ಆದರೆಂಜ ತೊಲೆಯಾರ್) ಆಖೀರಿಕೆತ್ತನೆ ಮಳೆಕಾಲ. ನವೆಂಬರ್‌ಂಜ ಫೆಬ್ರವರಿಕೆತ್ತನೆ (ಬಿರ್ಚಾರ್‌ಂಜ ಕುಂಬ್ಬಾರ್) ಕುಳಾರ್‌ಕಾಲ. ಕುಂದ್‌ಕಾಡ್ ದುಂಬ್‌ನ ಕೊಡಗ್ ನೈಋತ್ಯ ದಿಕ್ಕೊಂಜ ಬೂವ ಮುಂಗಾರ್ ಮಳೆರ ತಾಣ. ಕೊಡಗರ ಕುಂದ್‌ರ ಮೀದ ಈ ಮಾನ್ಸೂನ್ ಗಾಳಿ, ಮೋಡತ್‌ನ ಓಡ್‌ಚಿಟ್ಟಿಂಡ್ ಬಪ್ಪಕಾಪಕ ಕುಂದ್‌ರ ಮೀದೇತ ಕೋಟಗಾಳಿ ಮೋಡತ್‌ನ ತೇಕಿಯಂಡ್ ಮಳೆ ಕೊಂಡ ಬಪ್ಪ.

ಮಾರ್ಚ್ ತಿಂಗಳ್ ಕಾಂಬ್‌ಚಿಟ್ಟಿವ ಚೆನ್ನ ಚೆನ್ನಂಗ್ ಮೋಡ ಮಳೆನಗುಂಡ್ ಕಾಪಿ ಗೌಡತ್ ಪೂಬುಟ್ಟಿತ್ ಬೀರುವ. ಮೇ ತಿಂಗಳ್ ಆಖೀರಿಲ್ ಮೋಡ ಆಕಾಶತ್‌ರ ಪಶ್ಚಿಮ ಭಾಗತ್ ಕರ್ಪು ಕೌಂಜಿತಿಪ್ಪ. ಜೂನ್ ತಿಂಗಳ್‌ರ ಆದಿಂಜ ಮುಂಗಾರ್ ಮಳೆ ಚೋರ್‌ಲ್ ಬೂವಕ್ ಸುರುವಾಪ. ಗಾಳಿ ಒರಮ್ಮತೆ ಪೇರ್ತ್ ರಭಸತೇ ಬೀಜುವ. ಜುಲೈ, ಆಗಸ್ಟ್‌ಲ್ ಇನ್ನನೆ ಪೋಯಂಡಿಪ್ಪ. ಎಚ್ಚಕ್ಕೋ ದಿನಕೆತ್ತನೆ ಸೂರ್ಯನ ಕಾಂಬಕೆ ಕಟ್ಟುಲೆ. ಪೊಳೆಲೆಲ್ಲಾ ನೀರ್ ದುಂಬಿಯಂಡ್ ಕುಂದ್‌ರ ಕೊಡಿಂಜ ಜೊರೋಂಡ್ ರಭಸತ್ ಬಯಲ್‌ಸೀಮೆಕ್ ಒಕ್ಕುವ. ಬೇಲೆಲ್ಲಾ ನೀರ್ ದುಂಬಿತಿಪ್ಪ.

ಆಗಸ್ಟ್ ತಿಂಗಳ್‌ರ ಆಖೀರಕ್ ಮಳೆ ದಿನ ದಿನಕ್ ಕಮ್ಮಿ ಆಯಂಡ್ ಬಪ್ಪ. ಸೆಪ್ಟೆಂಬರ್ ತಿಂಗಳ್ ಚೆನ್ನಂಗೆಲ್ಲ ಬೆದ್, ಮಳೆ ಬುದ್ದಂಡಿಪ್ಪ. ಅಕ್ಟೋಬರ್ ತಿಂಗಳ್ ಮುಂಗಾರ್ ಮಳೆ ನಿಂದಿತ್ ಹಿಂಗಾರ್ ಮಳೆ ಸುರುವಾಪ. ಅಕ್ಟೋಬರ್‌ಂಜ ಡಿಸೆಂಬರ್ ತಿಂಗಳ್‌ರ ಆದಿಕೆತ್ತನೆ ಈಶಾನ್ಯ ದಿಕ್ಕೊಂಜ ಗಾಳಿ ಮೋಡತ್‌ನ ದೊವ್‌ತಿಯಂಡ್ ಬಪ್ಪ. ಅಕ್ಟೋಬರ್, ನವೆಂಬರ್ ತಿಂಗಳ್ ಚೆನ್ನೆರ ದಕ್ಷಿಣತ್ ಪೂರ್ವ ಕರಾವಳಿಕ್ ಬಲವಾಯಿತ್ ಮಳೆ ಗಾಳಿ ಬೂವ. ಈ ನೇರತ್ ಚೆನ್ನಂಗೆಲ್ಲ ಮೋಡ ಕೊಡಗರ ಮೀದೋ ಬಂದಿತ್ ಇಲ್ಲಿ ಮಳೆ ಬೂವ.

ಮಳೆಗಾಲತ್ ಕೊಡಗರ ಪಶ್ಚಿಮ ಭಾಗತ್ ಬೂವಚ್ಚಕ್ ಮಳೆ ಪೂರ್ವ ಭಾಗತ್



ಉಳ್ಳ ಕುಶಾಲನಗರ ಕೋವು ಪಿಳ್ಳಾ ಶನಿವಾರಸಂತೆ ಕೋವುಕಾಲೆ ಬೂವುಲೆ. ಕೊಡಗ್ಗರ ಪಶ್ಚಿಮ ಭಾಗತ್ ಕಾಲಕ್ 120ತ್ಂಜ 250 ಇಂಚ್‌ರಚ್ಚಕ್ ಮಳೆ ಬೂವ. ಪೂರ್ವಭಾಗತ್ 50ತ್ಂಜ 60 ಇಂಚ್‌ರಚ್ಚಕ್ ಮಳೆ ಬಪ್ಪ. ಉತ್ತರತ್ಂಜ ದಕ್ಷಿಣತ್‌ರ ಮಧ್ಯಭಾಗತ್ 70ತ್ಂಜ 90 ಇಂಚ್ ಮಳೆ ಬೂವ.

ಆಚೇಂಗಿ, 1961ನೆ ಇಸವಿ ಮೇ ತಿಂಗ ಆದಿಂಜ ಅಕ್ಟೋಬರ್‌ಕೆತ್ತನೆ ಕೊಡಗ್ಗಲ್ ಬುದ್ಧ ಮಳೆ ಕೈಂಜ ಸುಮಾರ್ 70 ಕಾಲತ್ ಬುದ್ಧ ಮಳೆರ ದಾಖಲೆನ ಮೀರಿತ್. ಆ ಕಾಲ ಜನವರಿ 1ತ್ಂಜ ಅಕ್ಟೋಬರ್ 28ಂಗತ್ತನೆ ಮಡಿಕೇರಿಲ್ ಸುಮಾರ್ 240 ಇಂಚ್ ಮಳೆ ಬುದ್ಧಿತ್. ಭಾಗಮಂಡಲತ್ 400 ಇಂಚ್‌ಕೂ ಅಧಿಯಾನ ಮಳೆ ಪೊಜ್ಜಿತ್. ಆ ಕಾಲ ಹಿಂದೂಸ್ಥಾನತ್‌ರ ಪಶ್ಚಿಮ ಭಾಗತ್‌ರ ಪಶ್ಚಿಮ ಘಟ್ಟ ಪ್ರದೇಶತ್‌ಲೆಲ್ಲ ವಿಪರೀತ ಮಳೆ ಬುದ್ಧಿತ್ ಭೂಮಿಕಾಣಿಕೂ, ಅತ್ತ ಕಡ್‌ಚಿಯಕೂ, ಮನೆ ಮಾರ್‌ಕೂ ಎಣ್ಣೆಯವ ಕಯ್ಯತ ನಷ್ಟ ಆಯಿತ್. ಕೊಡಗ್ಗಲ್ ಆ ಕಾಲಕ್ ಪೊಜ್ಜ ಮಳೆಕ್‌ಂಜ ಜಾಸ್ತಿ ಮಳೆ ಪೊಜ್ಜಿಯೆ 1882ನೆ ಇಸವಿಲ್. ಮಡಿಕೇರಿಲ್ ಅಕ್ಕ ಬುದ್ಧ ಮಳೆ 223 ಇಂಚ್ 17 ಸೆಂಟ್. ಕೊಡಗ್ಗಲ್ ಉಳ್ಳೊಟ್ಟು ಕಮ್ಮಿ ಮಳೆ ಪೊಜ್ಜಿತ್ ಬರಗಾಲ ಬಂದಿಯೆ 1899ತ್. ಅದ್ ಕಾಲ ಮಡಿಕೇರಿಲ್ ಬೊರಿ 91 ಇಂಚ್ 12 ಸೆಂಟ್ ಮಳೆ ಆಯೆ. ವೀರಾಜಪೇಟೆಲ್ 128 ಇಂಚ್ 42 ಸೆಂಟ್ ಪೊಜ್ಜಿತ್.

ಕೊಡಗ್ಗರ ಬೋರೆ ಬೋರೆ ಜಾಗತ್ ಪೊಜ್ಜ ಮಳೆ 91 ಇಂಚ್ 12 ಸೆಂಟ್ ಪೊಜ್ಜಿತಿಂಜತ್. ಕೊಡಗ್ಗರ ಬೋರೆ ಬೋರೆ ಜಾಗತ್ ಕೈಂಜ 50 ಕಾಲತ್ ಪೊಜ್ಜ ಮಳೆರ ಸರಾಸರಿ ಲೆಕ್ಕತ್‌ನ ಈ ಕೋದತ ಪಟ್ಟಿಲ್ ಕಾಟಿತ್. ಇದ್‌ನುಂದ್ ಕೊಡಗ್ಗಲ್ ಮಳೆರ ಹಂಚಿಕೆ ಎನ್ನನೆ ಇಂಜತ್ ಎಣ್ಣುವದ್ ಗೊತ್‌ಕ್‌ಟ್ಟುವ.

1. ಮಡಿಕೇರಿ	- 128.42 ಇಂಚ್
2. ವೀರಾಜಪೇಟೆ	- 105.91 ಇಂಚ್
3. ಸೋಮವಾರಪೇಟೆ	- 85.16 ಇಂಚ್
4. ಭಾಗಮಂಡಲ	- 227.54 ಇಂಚ್
5. ನಾಪೋಕ್ಲ್	- 119.89 ಇಂಚ್
6. ಸಂಪಾಜೆ	- 161.38 ಇಂಚ್
7. ಪೊನ್ನಂಪೇಟೆ	- 93.06 ಇಂಚ್
8. ಶ್ರೀಮಂಗಲ	- 108.83 ಇಂಚ್

9. ಮಾವುಕೂಟ	- 190.29 ಇಂಚ್
10. ಅಮ್ಮತ್ತಿ	- 87.64 ಇಂಚ್
11. ಕುಶಾಲನಗರ	- 43.76 ಇಂಚ್
12. ಶನಿವಾರಸಂತೆ	- 73.80 ಇಂಚ್
13. ಸುಂಟಿಕೊಪ್ಪ	- 70.07 ಇಂಚ್
14. ತಿತಿಮತಿ	- 52.27 ಇಂಚ್
15. ಕರಿಕೆ	- 190.64 ಇಂಚ್

ಸರಾಸರಿ ಆಯಿತ್ ಕೊಡಗ್ಗರ ಹವಾಮಾನ 70 ಡಿಗ್ರಿ ಫ್ಯಾರನ್ ಹೀಟ್. ಇದ್ ಆರೋಗ್ಯಕರ ಪಿಳ್ಳಾ ಮನಸ್ಸಕ್ ಕುಶಿಯಾಪನ್ನಕೆ ಇಪ್ಪ. ಕಾಲ ಇಡೀ ಬೈಟ್ ನೇರತ್ ತಂಪ್ ಆಯಿತ್ ಇಪ್ಪ. ಕೊಡಗ್ಗರ ಪಶ್ಚಿಮ ಪಿಳ್ಳಾ ಮಧ್ಯಭಾಗತ್ ಏರ ಮಳೆ ಬುದ್ದಂಡ್ ಇಪ್ಪಕ ಮಡಿಕೇರಿಂಜ ಆಯಿರ ಅಡಿ ಕೋದತ್ ಉಳ್ಳ ಕುಶಾಲನಗರತ್ ಮಳೆ ಪಿಳ್ಳಾ ಕುಳಾರ್ ಕಮ್ಮಿ ಇಂಜಿತ್ ಹವಾಮಾನ ಚಾಯಿತೆ ಇಪ್ಪ. ಈ ಕಾರಣತ್‌ನಗುಂಡ್ ಕೈಂಜ ಶತಮಾನತ್ ಕೊಡಗ್ಗಲ್ ಆಡಳಿತ ನಡತ್‌ನ ಬ್ರಿಟಿಷ್ ಅಧಿಕಾರಿಯ ಜೂನ್‌ಂಜ ಅಕ್ಟೋಬರ್ ಆಖೀರಿಕೆತ್ತನೆ ಕುಶಾಲನಗರತ್ ತಂಗಡ ಕಚೇರಿನ ನಡ್ತಿಯಂಡ್ ಇಂಜತ್.

ಕೊಡಗ್ 40 ಕಾಲಕ್ ಬಯ್ಯ ಮಾರಪನಿರ (Malaria) ತಾಮನೆಂದ್ ಪೆದ ಎಡ್‌ತಿತಿಂಜತ್. ಈನಗುಂಡ್ ಕೊಡಗ್ಗಕ್ ಪೊರಮೆತ ಜನ ತೋಟ ಪಣಿಕಾಡ್, ಸರ್ಕಾರಿ ಚಾಕ್ರಿಕಾಡ್ ಬಪ್ಪಕ್ ಬೊತ್ತುವ ಇಂಜತ್. ಆಚೀಂಗಿ, ಇಕ್ಕ, ಚೆನ್ನಂಗ್ ಕಾಲತ್‌ಂಜ ಕೊಡಗ್ಗಲ್ ಮನೆ ಮನೆಕ್ ಮಾರಪನಿ ಕೊಂಡಬಪ್ಪನ್ನತ ಸೊಳ್ಳೆಯ ಪುಟ್ಟುವ ಕುಂಡ್ ಕುಡ್‌ಪ್‌ಕ್ ಡಿಡಿಟಿ ಪೊಜ್ಜಿತ್ ಈ ಕಾಯಿಲ ಬರತನ್ನಕೆ ಮಾಡಿರ್‌ತ್‌ಂದ್ ಎಣ್ಣೊಲು.

## 2. ಪುರಾಣ ಕಾಲತ್‌ರ ಕೊಡಗ್

ಪ್ರಪಂಚತ್‌ರ ಏದೇ ದೇಶತ್‌ರ ಇತಿಹಾಸತ್‌ನ ಎಡ್‌ತಂಚಕೊ ಓರ್ ಸೆರಿಯಾನ ನೇರ, ಗೆಳಿಗರ ಕಾಲಕ್‌ಂಜ ಸುರುವಾಪ ಚಾರಿತ್ರಿಕ ಘಟನೆಕ್‌ಂಜ ಪಂಡ್ ಅನಿರ್ದಿಷ್ಟವಾನ ಪುರಾಣ ಕಾಲ ಒಂದ್ ಇಪ್ಪ. ಇದ್‌ಂಗ್ ಕಾರಣ ಇಚ್ಚಕೆ.

ಪಂಡೇತ ಕಾಲತ್ ಜನಕ್ ಎಳ್ಳುವಕ್ ಲಿಪಿ ಇಂಚ್‌ಲೆ. ಲಿಪಿನ ಮಾಡಿಯಂಡಪಿಳ್ಳೊ

ಲಿಪಿನ ಪಡ್ಚಂಡವು ಪೇರ್ತ್ ಕಮ್ಮಿ. ಆನಗುಂಡ್ ಎಳ್ತಕ್ ಬೋಂಡಿಯಾನ ಸಾಮಗ್ರಿ ಕಮ್ಮಿ ಇಂಜಾನುಂಡ್ ಅಕ್ಕತ ಜನ ನಡ್ಂದ ಸಂಗತಿನ ಬಾಯಿಂಜ ಬಾಯಿಕ್, ಅಪ್ಪನುಂಡ್ ಮೋಂವಂಗ್, ಮರ್‌ಮಕ್ಕಕ್ ಇನ್ನನೆ ತಲೆಮಾರ್‌ಂಚೆ ಚೆನ್ನಂಗಲ್ಲ ಕಾಲಕೆತ್ತನೆ ಎಣ್ಣಿಯಂಡೆ ಬಾತ್. ಆನಗುಂಡ್ ತಲೆಮಾರ್‌ಂಜ ನಡ್ಂದ ಘಟನೆ ಪೆರಿಯಯಿಂಗಳುಂಡ್ ಎಳಿಯಯಿಂಗಳು ಬಾಯಿ ತಕ್ಕಲ್ ಬಾತ್.

ಇನ್ನನೆ ಅಯಿಂಗಡ ಕತೆಲ್ ಇಕ್ಕ ನಂಗಕ್ 'ನಡ್ಂದಿತ್ ಇಪ್ಪಕಲ್ಲೆ ಕಾಂಬ' ಎಣ್ಣುವ ಚೆನ್ನಂಗ್ ಸಂಗತಿ ಕೂಡಿಯಂಡತ್. ಅಲ್ಲತೆ ಆ ಕಾಲತ್ ಜನಕ್ ಘಟನೆನ ಅದ್ ನಡ್ಂದ ಕಾಲತನ ಕೂಟತ್ ಎಣ್ಣೊಂಡೂಂದ್ ಅರಿವಿಕೆ ಇಂಚಾಲೆ. ಆನಗುಂಡ್ ಅಕ್ಕತ ಸಂಗತಿರ ಕತೆಲ್ ಚೆನ್ನಂಗ್ ಚಾರಿತ್ರಿಕ ಅಂಶ ಇಂಜಕೊ ಅವು ಕಲ್ಪನೆರ ವಿಷಯತ್‌ರ ಕೂಡ ಕೂಡಿ ಪೋಯಿತ್ ಪಿಳ್ಳಾ ಸೆರಿಯಾನ ಕಾಲತ್‌ರ ಆಧಾರ ಇಲ್ಲತಾನಗುಂಡ್ ಇನ್ನತ ಕತೆಕ್ 'ಪುರಾಣ'ಂದ್ ಎಣ್ಣುವ. ಅನ್ನನೆ ಏದೇಂಗೋರ್ ದೇವತೆಯಡ ಮಹಿಮೆ, ತೀರ್ಥ ಕ್ಷೇತ್ರತ್‌ರ ಪಾವಿತ್ರ್ಯತೆ ಪಿಳ್ಳಾ ವಿಶೇಷತೆನ ವಿವರೊಚಿಡುವ ಪುಸ್ತಕತನ 'ಪುರಾಣ'ಂದ್ ಕಾಕುವ.

ಪ್ರಪಂಚತ್‌ರ ಪುರಾತನ ರಾಜ್ಯತ್ ಇತಿಹಾಸ ಕಾಲಕ್ ಬಯ್ಯ, ಪುರಾಣಕಾಲ ಇಂಜನ್ನಕೆ ಕೊಡಗುಲೂ ಪುರಾಣ ಕಾಲ ಇಂಜತ್. ಅಕ್ಕತ ಕೊಡಗುರ ವರ್ಣನೆನ 'ಕಾವೇರಿ ಮಹಾತ್ಮೆ'ಲ್ ವಿವರಣೆ ತಂದಿತ್. ಸ್ಕಂಧ ಪುರಾಣತ್ ಉಳ್ಳ ಈ ಕಾವೇರಿ ಮಹಾತ್ಮೆಲ್ ಕಾವೇರಿ ಪೊಳೆ ಪುಟ್ಟನಾಂಡ ಕೂಟ್‌ಕ್ ಕೊಡಗುಕ್ ಪಂಡ್ ಇಂಜ ಪೆದ, ಆ ಪೆದ ಎನ್ನನೆ ಬಾತ್, ಕೊಡವಡ ಹುಟ್ಟ್...ಇನ್ನತ ಎಚ್ಚಿಕೊ ವಿಷಯತ್‌ರ ಮೀದ ಕತೆ ಉಂಡ್.

ಕೊಡಗುಕ್ ಪಂಡ್ ಮೂಂದ್ ಪೆದ ಇಂಜತ್. 'ಬ್ರಹ್ಮ ಕ್ಷೇತ್ರ', 'ಮತ್ಸ್ಯ ದೇಶ' ಪಿಳ್ಳಾ 'ಕ್ರೋಢ ದೇಶ'. ಈ ಪೆದ ಎನ್ನನೆ ಬಾತ್‌ಂದ್ ನೋಟನ.

**ಬ್ರಹ್ಮಕ್ಷೇತ್ರ:**

ಒಮ್ಮತೆ ಬ್ರಹ್ಮದೇವ ತೀರ್ಥಯಾತ್ರೆರ ಮಾರೀಪತ್ ಹಿಂದೂದೇಶಕ್ ಬಾತ್. ಆ ನೇರತ್ ಪಡಿಇಾರ್ ಮಲೆರ ಕೊಡಿಲ್ ಇಂಜ ಓರ್ ಚಾಯುಳ್ಳ ಜಾಗಕ್ ಬಪ್ಪ. ಅಲ್ಲಿ ಓರ್ ಕುಂದ್. ಆಂಡ ಬರಿಯತ ಓರ್ ದಾಟ್ವೆಲ್ ನೂರ್ ಕೊಂಬೆ ಉಳ್ಳನ್ನತ ಓರ್ ನೆಲ್ಲಿಗೆ ಮರತ್‌ನ ಕಾಂಬ. ಆ ಮರತ್‌ನ ನೋಟಿಯಂಡ್ ಇಂಜನ್ನಕೆ ಬ್ರಹ್ಮ ದೇವಂಗ್ ಚಂಗ್, ಚಕ್ರ ಪಿಳ್ಳಾ ಗದಾಧಾರಿಯಾನ ವಿಷ್ಣುನ ಕಾಂಬ. ಆಚೇಂಗಿ, ಕೂಡೆನ್ನೆ ವಿಷ್ಣುದೇವ ಅಲ್ಲಿಂಜ ಮಾಯ ಆಯಿರುವ. ಇನ್ನನಾಯಿತ್ ಬ್ರಹ್ಮದೇವ ಆ ನೆಲ್ಲಿಗೆ ಮರಕ್ ಎಕ್ಕೋಲು ತಾಂಡ ಕಮಂಡಲತ್‌ಂಜ ನೀರ್ ಬೂಕಿಯಂಡ್ ಪೂಜೆ ಮಾಡುವಕ್ ಸುರು ಮಾಡುವ.



ಆನಗುಂಡ್ ಈ ಕ್ಷೇತ್ರಕ್ಕೆ 'ಬ್ರಹ್ಮಕ್ಷೇತ್ರ', 'ಕಾವೇರಿ ಮಂಡಲ' ಎಣ್ಣುವ ಪೆದ ಬಾತ್.

**ಮತ್ಸ್ಯ ದೇಶ :**

ಕೊಡಗ್ ದೇಶತನ 'ಮತ್ಸ್ಯದೇಶಾ'ಂದ್ ಕಾಕುವಕ್ ದಂಡ್ ಕತೆ ಉಂಡ್‌ಂದ್ ಪುರಾಣಕಾರಂಗ ಎಣ್ಣುವ.

ಓರ್ ಕತೆರಪೋಲೆ, ಕೊಡಗಲ್ 'ಅರೆಚಂದ್ರ'ಂದ್ ಕಾಕುವ ಓರ್ ಕುಂದ್ ಇಪ್ಪ. ಆಂಡ ಪಕ್ಕತೆ ಓರ್ ಪವಿತ್ರವಾನ ತೀರ್ಥಸ್ಥಳ ಉಂಡ್. ಇಲ್ಲಿ ವಿಷ್ಣುದೇವ ಓರ್ ಮೀನಾರ ಆಕಾರ ಪಡ್‌ಂದಿತ್ ಶಿವಂಡ ಪೂಜೆ ಮಾಡ್‌ಚಿ. ಮೀನ್ ರೂಪತ್ ಇಂಜಂಡ್ ಪೂಜೆ ಮಾಡ್‌ನಾಂಗ್ ಶಿವ, ಮೀನ್‌ಕ್ ಅಮರತ್ವ ಕೊಡ್‌ಪ. ಆನಗುಂಡ್ ವಿಷ್ಣು ಈ ದೇಶತನ 'ಮತ್ಸ್ಯ ದೇಶಾ'ಂದ್ ಕಾಕುವಕ್ ಸುರು ಮಾಡ್‌ಚಿ.

ಇಇಚ್ಚೋರ್ ಕತೆರ ಪೋಲೆ ಪೂರ್ವಕಾಲತ್ ಮೈಸೂರ್ ದೇಶತರ ಉತ್ತರ ಭಾಗತ್ ಮತ್ಸ್ಯ ಎಣ್ಣುವ ಓರ್ ದೇಶ ಇಂಜತ್. ಆ ರಾಜ್ಯ ಇಕ್ಕತ ಧಾರಾವಾಡ ಜಿಲ್ಲೆರ ಹಾನಗಲ್ಗರ ಸುತ್ತು ಇಂಜತ್‌ಂದ್ ಚರಿತ್ರಕಾರ ಎಣ್ಣುವ. ಮತ್ಸ್ಯ ದೇಶತನ ಸಿದ್ಧಾರ್ಥರಾಜ ಆಳುವ ಇಂಜತ್. ಈ ರಾಜಂಗ್ ನಾಲ್ ಮೋನೆಯ. ಅಯಿಂಗಡಾತ್ ಎಳಿಯಂವನಾನ ಚಂದ್ರವರ್ಮ ಬುದ್ಧಿವಂತನೂ, ದೈವಭಕ್ತಿ ಉಳ್ಳಂವನೂ ಆಯಿತಿಂಜತ್.

ಅಂವ ತಾಂಡ ಅಪ್ಪಂಡ ಒಪ್ಪಿಗೆ ಪೋಲೆ ಹಿಂದೂಸ್ಥಾನತರ ಪುಣ್ಯ ಕ್ಷೇತ್ರತನೆಲ್ಲ ಸಂದರ್ಶನ ಮಾಡಿಯಂಡ್ ಚೆನ್ನಂಗ್ ಸಮಯ ಕೈಂಜಪಿಳ್ಳಾ ಕೊಡಗರ ಪಡಿಇಾರ್ ಮಲೆರ ಬ್ರಹ್ಮ ಕುಂದ್‌ಕ್ ಬಾತ್. ಅಲ್ಲಿ ಚಂದ್ರ ವರ್ಮಂಗ್ ರಾಜ್ಯತನ ಪಡ್‌ಂದವಂಡು ಎಣ್ಣುವ ಆಸೆ ಆಚಿ. ಅಕ್ಕ ಅಂವ ಪಾರ್ವತಿದೇವಿನ ಗೇನ ಮಾಡಿತ್ ಉಗ್ರ ತಪಸ್ಸಕ್ ಅಳ್ತತ್. ಈ ಪೋಲೆ ಪಾರ್ವತಿ ದೇವಿ, ಚಂದ್ರವರ್ಮಂಡ ತಪಸ್ಸಕ್ ಮೆಚ್ಚಿತ್ ವರ ಕೇಪನ್ನಕೆ ಎಣ್ಣ್‌ಚಿ.

ಅಕ್ಕ ಚಂದ್ರವರ್ಮ "ನಾಕ್ ನಾಡ ಅಪ್ಪಂಡ ರಾಜ್ಯಕ್‌ಂಜ ಚಾಯುಳ್ಳ ರಾಜ್ಯ ಬೋಂಡು. ನಾಕ್ ನಾಡ ಜಾತಿರ ಕನ್ನಿಯೆ ಪೊಣ್ಣಾಂಡು. ಅನ್ನನೆ ಅವ ದುಂಬಾ ಮಕ್ಕಡ ಅವ್ವ ಆಂಡು. ನಾಕ್ ಶತ್ರುವಡ ವಿರುದ್ಧ ಗೆಲು ಕೊಟ್ಟೊಂಡು ಹಿಳ್ಳಾ ನಾನ್ ಚೆತ್ತದು ಕೈಲಾಸಕ್ ಪ್ರವೇಶ ಕೊಟ್ಟೊಂಡು"ಂದ್ ಕೇಟಂಡತ್:

ಅಕ್ಕ ಪಾರ್ವತಿ ದೇವಿ "ನೀಡ ದಂಡನೆ ಬೋಡಿಕೆನ ಬುಟ್ಟಕ ಜಾಕಿ ಎಲ್ಲಾ ಬೋಡಿಕೆನ ನಾನ್ ನೀಸಿತಪ್ಪಿ. ನೀನ್ ಕೈಂಜ ಜನ್ಮತ್ ಮಾಡ್‌ನ ಪಾಪಕಾಯಿತ್ ನೀಡ ಜಾತಿರ ಕನ್ನಿನುಂಡ್ ನೀಕ್ ಮಕ್ಕಳ ಪಡ್‌ಂದವಕ್ ಕಯ್ಯಲೆ. ಆ ಆಸೆನ ಈ ಜನ್ಮತ್ ಬುಟ್ಟರ್. ಅದ್ ನೀಡ ಇಇಚ್ಚೋರ್ ಜನ್ಮತ್ ಆಪ. ಆಚೇಂಗಿ, ನೀನ್ ಪುಣ್ಯ ಕಾರ್ಯ ಮಾಡುಪಕ್

ನೀಡ ಪೊಣ್ಣಾಯಿತ್, ನೀಕ್ ಸಹಾಯ ಮಾಡುವಕ್ ನೀಡ ಜಾತಿರ ಪೊಣ್ಣೆ ನೀಕಿಪ್ಪ. ಆಚೇಂಗಿ, ಅವಳೆ ಅಲ್ಲತೆ ನೀಕ್ ಓರ್ ಶೂದ್ರತಿ ಸಹ ಓರ್ ಪೊಣ್ಣ್ ಆಪ. ಅವೆ ನನ್ನಗುಂಡ್ ಪನ್ನಂದ್ ಮಕ್ಕಳ ಪೆರುವ"ಂದ್ ಎಣ್ಣಾಚಿ.

ಅನ್ನನೆ ಪಾರ್ವತಿ ದೇವಿ ಸರ್ವಾಂಗ ಸುಂದರಿಯಾನ ಓರ್ ಶೂದ್ರ ಕನ್ನಿನ ಸೃಷ್ಟಿ ಮಾಡಿತ್ ಚಂದ್ರವರ್ಮಂಗ್ ಕೊಡ್ತತ್. ಅಕ್ಕ ಚಂದ್ರವರ್ಮ 'ಈ ಶೂದ್ರ ಮಕ್ಕಳುಂಡ್ ನಾಕ್ ಎಂತ ಪ್ರಯೋಜನ? ನಾಕ್ ನಾಡ ಜಾತಿರ ಮೋಂವನೆ ಇಲ್ಲೇಂದಾನಕ ಸ್ವರ್ಗಕ್ ಪಡಿ ಮುಚ್ಚಿಪೋನ ಲೆಕ್ಕ. ಇನ್ನನೆ ಆನಕ ನಾಕ್ ರಾಜ್ಯ ಎನ್ನಂಗಾಯಿತ್ ಬೋಂಡು? ಸುಖ, ಸಂತೋಷ ನಾಕ್ ಎಲ್ಲಿಂಜ ಕೊಟ್ಟವ? ಇನ್ನನಿಪ್ಪಕ ನಾನ್ ಆ ಕನ್ನಿರ ಕೂಡೆ ಎಂತ ಮಾಡಡ್? ಓ ದೇವಿ. ಈ ಕನ್ನಿನ ಬಯ್ಯಕ್ ಎಡ್ತಾ"ಂದ್ ಬೇಜಾರತ್ ಎಣ್ಣಾಚಿ.

ಅದ್‌ಂಗ್ ಪಾರ್ವತಿ ದೇವಿ "ಚಂದ್ರವರ್ಮ...ನೀಡ ಬೇಜಾರತ್‌ನ ಬುಡ್. ನಾಡ ಕೃಪೆನುಂಡ್ ನೀನ್ ಈ ಜನ್ಮತೂ, ಮಿಳ್ತಾ ಜನ್ಮತೂ ಸುಖತ್ ಬಡ್‌ಕುಪಿಯ. ನಾಡ ತಕ್ಕಾನ್ ಕೇಳ್. ನೀಕ್ ಈ ಕನ್ನಿನುಂಡ್ ಪನ್ನಂದ್ ಮೋನೆಯ ಪುಟ್ಟುವ. ಆಚೇಂಗಿ, ಅವು ಶೂದ್ರಂಗಳಾಪುಲೆ. ಕ್ಷತ್ರಿಯ ಅಪ್ಪಂಡ ಪಿಳ್ತಾ ಶೂದ್ರತಿ ಅವ್ವಂಡ ಮಕ್ಕ ಶೂರಂಗಳಾಪ. ಅವು ವೀರ ಪುರುಷಂಗಳೂ, ಶಿವ ಪಿಳ್ತಾ ನಾಡ ಆರಾಧಕಂಗಳೂ, ಸದ್ಗುಣಿಯಳೂ, ಸತ್ಯವಂತಂಗಳೂ, ನಂಬಿಕಸ್ಥಂಗಳೂ, ಪಟ್ಟಮಡಲ್ಲಿ ಭಕ್ತಿಭಾವ ಉಳ್ಳವೂ, ರಾಜಂಗಳುಂಡ್ ಗೌರವಾನ್ವಿತಂಗಳೂ ಆಯಿತ್, ರಾಜ್ಯತಾನ್ ಆಳುವಕ್ ಯೋಗ್ಯಂಗಳಾಯಿತಿಪ್ಪ. ಅನ್ನನೆ ನಾಲ್ ವೇದಾಧ್ಯಯನ ಬುಟ್ಟಕ ಬಾಕಿ ಎಲ್ಲ ವಿಷಯತ್ ಕ್ಷತ್ರಿಯಕ್ ಸಮಾನಂಗ ಆಯಿತಿಪ್ಪ. ಅವು ಈ ಲೋಕತ್, ಪರಲೋಕತ್ ನೀಕ್ ಕುಶಿ ತಪ್ಪವು ಆಯಿತಿಪ್ಪ"ಂದ್ ಚಂದ್ರವರ್ಮನ ಸಮಧಾನ ಪಡ್‌ತಚಿ.

ಅನ್ನನೆ ಪಾರ್ವತಿ ದೇವಿ ಶೂದ್ರ ಕನ್ನಿನ ಕೊಡ್‌ಪಾಂಡ ಕೂಟ್‌ಕ್ ಆ ದೇಶತ್‌ನ ನಾಸ್ತಿಕ, ಅನಾಗರಿಕ ಜನಳುಂಡ್ ಗೆದ್ದವಕುಳ್ಳ ಓರ್ ಖಡ್ಗತ್‌ನೊ, ಗಾಳಿರಚ್ಚಕ್ ರಭಸ ಉಳ್ಳ ಓರ್ ಬೊಳ್‌ತ ಕುದರೆನೊ, ಓರ್ ಸೈನ್ಯತ್‌ನೊ ಕೊಡ್‌ತತ್. ಆ ದೇಶತ್ ತಾನ್ ಓರ್ ಪೊಳೆಯಾಯಿತ್ ಪುಟ್ಟಿತ್ ಜನಕ್ ಸುಖ ಕೊಡ್‌ಪಿಂದೂ ತಕ್ಕ ಕೊಡ್‌ತಿತ್ ಆಶೀರ್ವಾದ ಮಾಡ್‌ಚಿ.

ಇನ್ನನೆ ದೇವಿರ ಕೃಪೆನುಂಡ್ ಚಂದ್ರವರ್ಮ ದುಷ್ಟ ಶತ್ರುವಳ ಚೋಪ್‌ಚಿಟ್ಟಿತ್, ದೇಶತ್‌ನ ತಾಂಡ ಪುಡ್‌ತಕ್ ಎಡ್‌ತಂಡ್ ಆಳುವಕ್ ಕೂಡ್‌ಚಿ. ಇನ್ನನೆ ಈ ದೇಶತ್‌ರ ಆದ್ಯತ ರಾಜ ಮತ್ಸ್ಯ ದೇಶತ್‌ರ ರಾಜಂಡ ಮೋಂವ ಚಂದ್ರವರ್ಮ ಆನಾನುಂಡ್ ಕೊಡಗ್ ದೇಶಕ್ 'ಮತ್ಸ್ಯದೇಶ' ಎಣ್ಣುವ ಪೆದ ಬಾತ್. ಈ ರಾಜಂಡ ಅರಮನೆ ಮಡಿಕೇರಿಲ್

ಇಕ್ಕ ರಾಜ ಸಮಾಧಿ ಉಳ್ಳ ಜಾಗತರ ಎಡ್ತೆ ಬರಿಯ ಎಣ್ಣಕ ನೈಯತ್ಯ ದಿಕ್ಕರ ಕುಂದ್ ಕೊಡಿಲ್ ಇಂಜತ್ಂದ್ ಎಣ್ಣವ.

**ಕ್ರೋಢ ದೇಶ :**

ಕೊಡಗುಕ್ ಪಂಡ್ 'ಕ್ರೋಢ ದೇಶ' ಎಣ್ಣವ ಪೆದವೂ ಇಂಜತ್. ಈ ಪೆದ ಬಪ್ಪಕ್ ಮೂಲಕಾರಣ ಇನ್ನನೆ ಉಂಡ್.

ಕೊಡಗುರ ಆದ್ಯ ರಾಜನಾನ ಚಂದ್ರವರ್ಮಂಗ್ ಪನ್ನಂದ್ ಕಣ್ಣಮಕ್ಕ ಇಂಜತ್. ಈ ನೇರತ್ ವಿದರ್ಭ ರಾಜ್ಯತರ ರಾಜ ತಾಂಡ 100 ಮೂಡಿ ಕುಳ್ಳಿಯಳ ಚಂದ್ರವರ್ಮಂಡ ಕಣ್ಣಮಕ್ಕ ಬಯತ್ತ್ ಬಂದಾಂಗ್ ಮಂಗಲ ಕೈಪ. ಇದತ್ ಚಂದ್ರವರ್ಮಂಡ ಪೆರಿಯ ಮೋಂವ ದೇವಕಾಂತ 20 ಮೂಡಿಯಳ, ದಂಡನೆಯಂವ 16, ಮೂಂದನೆಯಂವ 12, ನಾಲನೆಯಂವ 10, ಅಂಜನೆ ಪಿಳ್ಳಾ ಆರನೆಯ ಮೋನೆಯ ಆಳಣ್ಣ 8 , ಏಳನೆ ಪಿಳ್ಳಾ ಎಟ್ಟನೆ ಮೋನೆಯ ಆಳಣ್ಣ 7 ಪಿಳ್ಳಾ ಬಾಕಿ 3 ಮೋನೆಯ ಆಳಣ್ಣ 4 ರಾಜಕುಮಾರಿಯಳ ಮಂಗಲ ಕೈಚತ್.

ಇನ್ನನೆ ಚಂದ್ರವರ್ಮಂಡ ಪನ್ನಂದ್ ರಾಜಕುಮಾರಂಗಳ ಮಂಗಲಾನ ನೂರ್ ರಾಜಕುಮಾರಿಯ ಎಚ್ಚಕೊ ಮಕ್ಕಡ ಅವ್ವಂಗಳಾಪ. ಅನ್ನನೆ ಪ್ರತಿಯೋರ್ ರಾಜಕುಮಾರಂಗೂ ನೂರಾಂಗೂ ಅಧಿಯಾನ ಕಣ್ಣ ಕುಳ್ಳಿಯಳಾಪ. ಬಲ್ಮಪು ಆನಪಿಳ್ಳಾ ಇವು ವಿದರ್ಭ ರಾಜಕುಮಾರಿಯಡ ಕೂಡೆ ಕೊಡಗುಕ್ ಬಂದಿತ್ ತಂಗಡ ಬದ್‌ಕ್‌ಕ್ ಬೋಂಡಿಯಾನ ಬೊಳೆ ಬೊಳೆತುವಕೂ, ವಾಸ ಮಾಡುವಕೂ ಜಾಗ್ ಪೋರತಾಪ.

ಅಕ್ಕ ಅವು ಪಂಡ್ ತಂಗ ಇಂಜ ಜಾಗತರ ಸುತ್ತೂ ಜಾಗತನ ಸಮ ಮಾಡಿಯಂಡ್, ಕೃಷಿಕ್ ಯೋಗ್ಯವಾನ ಜಾಗತನ ಮಾಡಿಯಂಡತ್. ಅಕ್ಕ ಸರಿಯಾನ ಆಯುಧ, ಹತ್ತಾರ್ ಇಲ್ಲತಾಂಗ್ ಅವು ಕಾಡ್‌ಪಂದಿಯ ಮಣ್ಣಾನ ಉಪ್ಪನ್ನಕೆ ತಂಗಡ ಕೈ ಪಿಳ್ಳಾ ಕೈ ಬೆರತ್‌ರ ಸಹಾಯತ್ ಕೆಲಸ ಮಾಡಂಡಿಯಾಚಿ. ತಂಗಡ ಕೈನುಂಡ್ ಈ ಜಾಗತನೆಲ್ಲ ಸಮ ಮಾಡ್‌ನಾಂಗ್ ಕೊಡಗು ದೇಶಕ್ 'ಕ್ರೋಢ ದೇಶ' ಎಣ್ಣವ ಪೆದ ಬಾತ್. ಕ್ರೋಢ ದೇಶ ಎಣ್ಣವ ಪೆದ ಕ್ರಮೇಣ 'ಕೊಡಗು' ಎಣ್ಣವ ರೂಪಕ್ ಬಾತ್‌ಂದ್ ಎಣ್ಣವ.

### 3. ಕೊಡಗ್ಗರ ಚರಿತ್ರೆರ ಮೂಲ

ಕೊಡಗ್ಗರ ಚರಿತ್ರನ ಸುರು ಮಾಡುವಾಂಗ್ ಮುಪ್ಪಡೆ ಚರಿತ್ರೆಕ್ ಆಧಾರ ಆಯಿತ್ ಎಡ್ತಂಡ ಮೂಲ (source material) ತ್ತನ ಓದುಗಂಗಕ್ ಎಣ್ಣಂಡಿಯಾಪ. ಅದತ್ ಪಂಡೇತ ಪೆರಿಯವು ತಂಗಡ ಮಕ್ಕ, ಕ್ಕರ್ ಮಕ್ಕಕ್ ಎಣ್ಣೆನ ಪುರಾಣ ಕತೆ, ವೀರಂಗಡ, ಶೂರಂಗಡ ಕತೆ, ಭೂಮಿನ ಕಳ್ಳಪಕ ಕ್ಕಟ್ಟನ ನಗ -ನಾಣ್ಯ, ಪಾತ್ರ-ಪಗಡಿ, ಕಟ್ಟಿದತ್ತರ ಪಳೇಯ ಚೂರ್ಪಾರ್, ನೆರರಾಜ್ಯ ಪಿಳ್ಳಾ ದೇಶತ್ತರ ಸಾಹಿತ್ಯ, ಇಲ್ಲೇಂಗಿ ಬೋರೆ ದೇಶತ್ತರ ರಾಯಭಾರಿಯಡ ಗ್ರಂಥತ್ ಉಲ್ಲೇಖ ಆಯಿತುಳ್ಳ ಅಂಶ, ಪಂಡೇತ ರಾಜಂಗ, ಜನ ಕಲ್ಲ್, ತಗಡ್, ಇರ್ಂಬು ಕಂಬತ್ತರ ಮೀದ ಎಳ್ಳೆನ ಶಾಸನ... ಇನ್ನತದ್ ಚರಿತ್ರೆಕಾರಕ್ ಮೂಲ ಆಯಿತುಂಡ್.

ಪಂಡ್ ಕಾಲತ್ ರಾಜಂಗ ಆಳ್ವನ ರಾಜ್ಯ, ಪಡೆ ಪೊತ್ತದ್, ಪಡೆಲ್ ಗೆದ್ದ ಭೂಮಿ ಪಿಳ್ಳಾ ಜಾಗ, ಇನಾಂ ಆಯಿತ್ ಕೊಡ್ತ ಜಹಗೀರ್ ಉಂಬಳಿ ಭೂಮಿ, ತಿರಿಕೆ, ಬಸದಿ, ತಿರಿಕೆಕ್ ಮಾಡ್ತ ಸೇವೆ ಪಿಳ್ಳಾ ದಾನ ಕೊಡ್ತ ವಿವರ, ಪಡೆ ಪೊತ್ತಿತ್ ವೀರಮರಣ ಕಂಡ ಸ್ವರ್ಗೀಯಡ ಗೇನಕ್ ನೆಟ್ಟ ಕಲ್ಲ್... ಇನ್ನತಾಂಡ ವಿವರತ್ತನ ಶಾಶ್ವತ ಆಯಿತ್ ಬೆಪ್ಪಕ್ ಕಲ್ಲ್ ಚಪ್ಪಡಿ, ತಾಮ್ರ, ತಗಡ್, ಇರ್ಂಬುರ ಮೀದ ಎಳ್ಳೆಚಿಟ್ಟ ಬೆಚ್ಚತ್. ಇನ್ನತ ಶಾಸನ ಎಲ್ಲ ಚರಿತ್ರೆಕಾರಕ್ ಓರ್ ಅಮೂಲ್ಯವಾನ ಮೂಲ ಆಯಿತುಂಡ್. ಈ ಪೋಲೆ 12ನೆ ಶತಮಾನತ್ತರ ಚರಿತ್ರನೆಲ್ಲ ಕೊಡಿಲ್ ಎಣ್ಣೆನ ಮೂಲತ್ತಾಂಜ ಸಂಗ್ರಹ ಮಾಡಿತ್.

'ಕ್ರೋಢ ದೇಶತ್ತರ ಚಂದ್ರವರ್ಮಂಡ ಕತೆಲ್ ಕೊಡವಡ ಮೂಲ ಅಡ್ಂಗಿತ್'ಂದ್ ಕರ್ನಲ್ ವಿಲ್ಕ್ಸ್ ಎಣ್ಣುವ ಚರಿತ್ರೆಕಾರ ಅಭಿಪ್ರಾಯ ಪಡುವ. ಚಂದ್ರವರ್ಮ ಕದಂಬ ರಾಜವಂಶತ್ತರ ಓರ್ ರಾಜಾಂದೂ, ಕದಂಬಂಗ ಕೊಡಗ್ಗನ ಕ್ರಿಸ್ತ ಶಕತ್ತರ ಆದಿ ಭಾಗತ್ ಆಳಿಯಂಡ್ ಇಂಜತ್ತೇಂದೂ ಚೆನ್ನಂಗ್ ಚರಿತ್ರೆಕಾರಂಗಡ ಅಭಿಪ್ರಾಯ.

ಕ್ರಿ.ಶ. 2ನೆ ಶತಮಾನತ್ತಾಂಜ 6ನೆ ಶತಮಾನಕ್ಕೆತ್ತನೆ ಆಳ್ವನ ಕದಂಬ ವಂಶತ್ತರ ಎಚ್ಚೆಕೊ ರಾಜಂಗಡ ಪೆದ ಸಹ ಚಂದ್ರವರ್ಮಂದ್ ಎಣ್ಣುವ. ಈ ಶತಮಾನತ್ ಕದಂಬ ರಾಜ್ಯ ಮೈಸೂರ್ ರಾಜ್ಯತ್ತರ ಪಶ್ಚಿಮ ಭಾಗತ್ತನೊ, ಉ. ಕನ್ನಡ, ದ.ಕನ್ನಡ ಜಿಲ್ಲೆನ ಕೂಟಿಯಂಡ್ ಇಂಜತ್ತೇಂದೂ, ಬನವಾಸಿ ಅದ್ಂಡ ರಾಜಧಾನಿ ಆಯಿತ್ ಇಂಜತ್ತಾಂದೂ ಚರಿತ್ರನುಂಡ್ ಗೊತ್ತ್ ಕಟ್ಟುವ. ಕದಂಬಂಗಡ ಇಚ್ಚಕ್ ವಿಸ್ತಾರವಾನ ರಾಜ್ಯತ್ ಅಕ್ಕ ಎರ ಜಾಗ ಕಾಡ್ತುಂಡ್ ದುಂಬಿತ್ ಇಂಜಾಂಗ್ ಕೊಡಗ್ಗ ಸಹ ಕೂಡಿಕಿಕ್ಕೊಂದ್, ಕೊಡಗ್ಗನ ಆದ್ಯ ತಾಂಡ ಪುಡ್ತತ್ ಬೆಚ್ಚಂಡ್ ಆಳ್ವನ ಚಂದ್ರವರ್ಮನ

ಅಲ್ಲಿಂಜ ಇಪ್ಪರತ್ತರ ಸಂಸ್ಕೃತ ಪುರಾಣ ಕರ್ತಂಗ, ಕಾವೇರಿ ಮಹಾತ್ಮರ ಚಂದ್ರವರ್ಮನಾಯಿತ್ ಪರಿವರ್ತನೆ ಮಾಡಿತ್ ಕತೆ ಕೆಟ್ಟಚಿಂದ್ ಕ.ವಿಲ್ಲ್ಯಾ ಪಿಳ್ಳಾ ಬಿ.ಎಲ್.ರೈಸ್ ಗೇನ ಮಾಡುವ.

ಅಯಿಂಗಡ ಗೇನಕ್ ಇಇಳ್ಳೋರ್ ಸಮರ್ಥನೆ ಉಂಡ್. ಕ್ರಿ.ಶ.6ನೆ ಶತಮಾನತ್ ಕದಂಬಂಗ, ಚಾಲುಕ್ಯಂಗಕ್ ಚೋತತ್. ಅಕ್ಕ ಕದಂಬ ರಾಜ್ಯ ಒಡ್ಂದಿತ್ ಅಯಿಂಗಡ ಸಂತಾನಕಾರಳುಂಡೆ ಆಳ್ವಿಕೆಕ್ ಒಳಪಟ್ಟ ಚೆರಿಯ ಚೆರಿಯ ರಾಜ್ಯ ಉ.ಕೊಡಗ್, ಮಂಜರಬಾದ್, ಕೊಡಗುರ ದಕ್ಷಿಣತ್ ಬಯಲ್ ಸೀಮೆ ಎಣ್ಣೆಕ ಇಕ್ಕತ ಮೈನಾಡ್, ಗೋವ ಪಿಳ್ಳಾ ಧಾರವಾಡತ್ ಹಾನಗಲ್ಲೊ ಕ್ರಿ.ಶ. 12ನೆ ಶತಮಾನಕ್ಕೆತ್ತನೆ ಇಂಜದ್ ಚರಿತ್ರೆಲ್ ಕಂಡ್ಬಪ್ಪ. ಉ. ಕೊಡಗ್ ಪಿಳ್ಳಾ ಮಂಜರಾಬಾದ್ ಕದಂಬ ರಾಜಂಗಡ ಓರ್ ಶಾಸನ ಕೊಡಗುರ ಯಡವನಾಡ್, ಯಡೂರ್ ಪಿಳ್ಳಾ ಸುಗ್ಗಿದೇವಡ ಗುಡಿಲ್ ಉಂಡ್. ಇದ್ ಕದಂಬ ದುದ್ದರಸಂಡ ಗೇನಕ್ ಅವಂಡ ತಮ್ಮಣ ಭೂಜರಸ ಬೆಚ್ಚ ವೀರಶಾಸನ. ಈಂಡ ಕಾಲ ಕ್ರಿ.ಶ. 1095.

ಆ ವೀರಶಾಸನ ಇನ್ನನೆ ಉಂಡ್.

ಸ್ವಸ್ತಿ ಸಖವರ್ಷ 1017 (ಕ್ರಿ.ಶ. 1095)ನೆಯ ಯುವಸಂವತ್ಸರದ ಸ್ವಾವಣ ಮಾಸದ ಸುದಿಬಿದಿಗೆ ಆದಿವಾರದಂದು| ಶ್ರೀ ಮನು ಮಹಾಮಾನ್ಯಳೇಶ್ವರ ತ್ರಿಪುರಾಧಿಸ್ವರ ಬಲಿನ್ನಕುಳ ಕಮಳ ಮಾರ್ತಣ್ಣ| ಚತುರ್ಮುಖಿಗಣ್ಣ ಸರಃಸಾಗತ ವಜ್ರಪಂಜರ ವೈರಿಗಜ ಕೇಸರಿ ಬಲಿಯಿರ ಭೀಮ ಸಂಗ್ರಾಮರಾಮ| ಮಲೆಪರ ನಂದನವನಂ| ಸಂಸ್ಕೃತೃವಂದಿಜನಂ ಪರಮಣ್ಣನ ಸೂಟಿಕಾಟಂ| ಅಯ್ಯನಂಕಕಾರ ಶಿವಪಾದಸೇವಿರಂ, ಶತ್ಯರಾತ್ಮಕರಂ ರಿಪುಹೃದೆಯ| ಕರ್ಕ್ಕಸಂ ಅರಸಂಕ ರಕ್ಕ|ಸ ನನೇಕ ನಾಮಾವಳಿ ಮುಖ್ಯನಪ್ಪ ಹಿಟ್ಟೆ|ಯರಸಂಗಂ ಜುಂಜಲ ದೇವಿಗಂ ಪುಟ್ಟಿ ಅತುಳಬಳ ಪರಾಕ್ರಮನಾಗಿ| ನವಯೌವನಾ ರೂಢನಂ ವಿಜಯಲಕ್ಷ್ಮೀಕಾಂತನುಮಾಗಿ ಮಲೆಯಂ ಪ್ರತಿಪಾಳಿಸಿರಿಪುಗಳಂ ಬೆದಲು ಬೆಂಕೊಣ್ಣ ಕೋಟೆಗಳಂ ನಿರ್ದ್ವಾಟಿಸಿ ವೀರಾವತಾರನುಂ, ಕಲಿಯುಗಾಂತಕಂ ಸಂಪಥ ನಾಡು ಮಂಪಾಕುವಾಡಿಯಂ ಮೊದಲಾಗಿ ಪ್ರತಿಪಾಳಿ ಸಿಯಾ|ಬ್ಬ ಪದಿನಯ್ಯ ಕುದುರೆಯು ಅಯ್ಯತ್ತು ಲೆಂಕರುಂ ಇನ್ನೊಯ್ಯತ್ತು ಎಕ್ಕಟಿ|ಗರುಂ ನಾಲುಪತ್ತಯ್ಯ ಕುಳಪುಟ್ಟಿಗೆ ಗಾಯದಾಳು ಮನೇಕ ಪ್ರಜೆ ಪರಿವಾರ ಬಂಧುವರ್ಗ ಮುಂತಳವರ್ಗ|ಮುಂ ಕುಲಸ್ತ್ರೀ ಚಿಕಲದೇವಿಯುಂ ಚೆಸಕೆಯೈಸು ಜಲಿದೆಯಿಂ ರಾಜಕೀಯಂ ಕಟ್ಟಿಸಿ ಯಮ ನೆತ್ತಿಸಿ ದಿವರು ಬ್ರಾಹ್ಮಣರ್ಗ್ಗೆ ಚತ್ರಮಂ ನಿಲಿಸಿ ತೊಲಿಗಲಿಯ ಮಾಡಿಸಿ ಅನೇಕ ಧಮ್ಮಮ ಬೆಳಗಿ ಶಿವಲೋಕ ಪ್ರಾಪ್ತನಾಗಲ್| ಸಹೋದರಂ ಜೂಜರಸಂ ಸ್ನೇಹದಿಂ ಪರೋಕ್ಷ ವಿನಯಂ ಗೆಯ್ದು| ವೀರಶಾಸನವುಂ ಬರೆಯಿಸಿದಂ ಮೊಳತೆಯ



ದುದ್ದಮಲ್ಲಸನ್ನಿ ವಿಗ್ರಹಿ, ಸೇನಭೋವ ರಾಜಿಮಯ್ಯನ ಮಗಂ ಬಮ್ಮದೇವನಿಂ ಇನ್ನು ದುದ್ದರಸಂ ಮಾಡಿಸಿದ ತೊಟಗಲ್ದಿಯಂ ಮಾಟಕೊಣ್ಣವಂ ಬಾಣರಾಸಿಯಲು ಹಸುವುಂ ಹಾರುವನಂ ಕೊಂದ| ಮಂಗಳ ಮಹಾ ಶ್ರೀ ಶ್ರೀ||

ಈ ಶಾಸನತ್ ದುದ್ದರಸಂಡ ಎಚ್ಚಕೊ ಬಿರ್‌ದಲ್ 'ಮಲೆಪರ ನಂದನವನ' ಎಣ್ಣುವ ಬಿರ್‌ದ್ ಕಂಡ್ ಬಪ್ಪ. ಮಲೆಪರ ನಂದನವನ ಎಣ್ಣುಕ ಮಲೆನಾಡ್‌ರ ರಾಜ / ರಾಜಂಗಕ್ ನಂದನವನತ್‌ರ ಪೋಲೆ ಆಶ್ರಯ ಕೊಡ್‌ಪಂವ ಎಣ್ಣುವ ಅರ್ಥ ಮಾಡಿಯವಲು. ಅಕ್ಕ ಕ್ರಿ.ಶ. 1095ತ್ ಉ. ಕೊಡಗ್‌ಲ್ ಕದಂಬ ರಾಜಂಗಡ ಆಳ್ವಿಕೆ ಇಂಜತ್ ಎಣ್ಣುವದ್ ಶಾಸನತ್‌ನುಂಡ್ ಗೊತ್ತ್‌ಕ್‌ಟ್ಟುವ.

1095ನೆ ಇಸವಿಲ್ ಕೊಡಗ್ ಜಿಲ್ಲೆರ ಆಕಾರ ಇಕ್ಕ ಉಳ್ಳನ್ನೆಕೆ ಇಂಜಲ್. ಆ ನೇರತ್ ಇಕ್ಕತ ಸೋಮವಾರಪೇಟೆ ಪಿಳ್ಳಾ ಮಂಜರಾಬಾದ್ ಓರ್ ರಾಜ್ಯ ಆಯಿತ್ ಇಂಜನ್ನೆಕೆ ಕಾಂಬ. ಕದಂಬ ಸಾಮ್ರಾಜ್ಯ ಒಡ್‌ಂದಿತ್ ಚೆರ್ ಚೆರಿಯ ರಾಜ್ಯ ಆನ ನೇರತ್ ಉ.ಕೊಡಗ್ ಮಾತ್ರ ಕದಂಬ ರಾಜ್ಯಕ್ ಕೂಡಿತಿಂಜತ್. ಆಚೇಂಗಿ, ಕ್ರಿ.ಶ.ತ್‌ರ ಆದಿಲ್ ಕದಂಬ ಸಾಮ್ರಾಜ್ಯ ಸ್ವತಂತ್ರ ಆಯಿತ್ ಪ್ರಬಲ ಆಯಿತಿಪ್ಪಕ ಇಡೀ ಕೊಡಗ್, ಕದಂಬ ಸಾಮ್ರಾಜ್ಯತ್ ಅಡ್‌ಂಗಿತಿಕ್ಕೊಂದ್ ಗೇನ ಮಾಡಿಯವಲು.

ಕ್ರಿ.ಶ.ತ್‌ರ ಆದಿಭಾಗತ್ ಕದಂಬ ವಂಶತ್‌ರ ಚಂದ್ರವರ್ಮ ದ್ರಾವಿಡ ಬುಡಕೆಟ್ಟ್‌ಕ್ ಕೂಡ್‌ನ / ಆದಿನಿವಾಸಿಯಡ ಜಾಗತ್‌ನ ಗೆದ್ದಿತ್ ತಾಂಡ ಪುಡ್‌ತತ್ ಬೆಚ್ಚಂಡ ವಿಷಯತ್‌ನ 'ಕಾವೇರಿ ಮಹಾತ್ಮೆ'ಲ್ ವರ್ಣನೆ ಮಾಡಿತಿಕ್ಕು ಎಣ್ಣುವಾತ್ ಚೆನ್ನಂಗ್ ಸತ್ಯಾಂಶ ಇಕ್ಕು. ಕೊಡವ, ಅಕ್ಕ ಕೊಡಗ್‌ನ ಆಳ್ವೆನ ಕದಂಬರಾಜಂಡ ಸೈನಿಕಂಗಡ ಸಂತಾನಕಾರ ಆಯಿತಿಕ್ಕೊಂದ್ ಕ.ವಿಲ್ಕ್ಲ ಅಭಿಪ್ರಾಯ ಪಡುವ.

#### 4. ಪಾಂಡವ ಪಾರೆ, ಪಾಂಡವ ಮನೆ ಪಿಳ್ಳಾ ಕೊಲೆಕಲ್

ಕೊಡಗ್‌ಲ್ ಕದಂಬಂಗಕ್ ಮುಪ್ಪಡೆ / ಸುಮಾರ್ 4ನೆ ಶತಮಾನತ್‌ಂಜ ಕೊಡಗ್‌ರ ದ.ಭಾಗತ್ ಆಳ್ವೆನ ಗಂಗಾ ವಂಶತ್‌ರ ರಾಜಂಗಕ್ ಮುಪ್ಪಡೆ ದ್ರಾವಿಡ ಬುಡಕೆಟ್ಟ್‌ಕ್ ಕೂಡ್‌ನ ಜನ / ದ. ಹಿಂದೂಸ್ಥಾನತ್ ಪೂರ್ವ ನಿವಾಸಿಯ ವಾಸ ಮಾಡಿಯಂಡ್ ಇಂಜನ್ನೆಕೆ ಗೊತ್ತ್‌ಕ್‌ಟ್ಟುವ. ಅಕ್ಕ ಅವು ಚೆರ್ ಚೆರಿಯ ಗುಂಪಾಯಿತ್ ಇಂಜಂಡ್ ಆ ಗುಂಪ್‌ರ ಯಜಮಾನ ಎಣ್ಣ್‌ನನ್ನೆಕೆ ಕೇಪ ಇಂಜನ್ನೆಕೆ ಕಾಂಬ.

ಕೊಡಗಲ್ ದ್ರಾವಿಡ / ಪೂರ್ವನಿವಾಸಿ ಬುಡಕೆಟ್ಟಾಕ್ ಕೂಡ್‌ನ ಜನ ವಾಸ ಇಂಜತ್‌ಂದ್ ಎಣ್ಣುವಕ್ ನಂಗಕ್ ಕೊಟ್ಟುವ ಆಧಾರ ಎಣ್ಣುಕ ಕೊಡಗಲ್ ಎಚ್ಚಕೊ ಜಾಗತ್ ಉಳ್ಳ ಕಲ್ಲೆಚಪ್ಪಡಿ (stone slab) ಪಿಳ್ಳಾ ಭೂಮಿಲ್ ಮಾಡಿತುಳ್ಳ ಅಂಕಣ (cairns). ಇನ್ನತ ಅಂಕಣ ಕೊಡಗಲ್ ಮಾತ್ರ ಅಲ್ಲತೆ ದ. ಹಿಂದೂಸ್ಥಾನತರ್ ಎಲ್ಲಾ ಭಾಗತೂ ಕಂಡ್ ಬಂದಿತ್. ಈನಗುಂಡ್ ಆ ಕಾಲತ್ ಕೊಡಗ್‌ನೊ ಕೂಟಿತ್ ದಕ್ಷಿಣ ಹಿಂದೂಸ್ಥಾನತರ್ ಎಲ್ಲಾ ಭಾಗತೂ ಸಾಧಾರಣ ಒರೇ ಬುಡಕೆಟ್ಟಾಕ್ ಕೂಡ್‌ನ ಜನ ವಾಸ ಮಾಡಿಯಂಡ್ ಇಂಜತ್‌ಂದ್ ಎಣ್ಣೊಲು.

ಅಂಕಣತ್ ಪಂಡೇತ ಕಾಲತ್ ಚತ್ತ ಜನಡ ಚಾವುನ ಪೂತಿತ್ ಬೆಚ್ಚನ್ನಕ್ ಗೊತ್ತ್‌ಕೊಟ್ಟುವ. ಇದತ್ ವಿಚಿತ್ರ ಅಕಾರತರ್ ಮಣ್ಣಾರ ಕುಡಿಕೆ ಕೊಟ್ಟಿತ್. ಇನ್ನತ ಕುಡಿಕೆರ ಒಳ್‌ಲ್ ಮಣ್ಣ್, ಮಣ, ಮೂಳೆ, ಇರ್‌ಂಬುರ ಶೂಲ ಪಿಳ್ಳಾ ಮಣ್ ಇನ್ನತದ್ ಕಂಡ್ ಬಂದಿತ್.

ಕೊಡಗ್ ಪಿಳ್ಳಾ ದ.ಹಿಂದೂ ಸ್ಥಾನತರ್ ಜನ ಪಂಡೇತ ಕಲ್ಲೆ ಚಪ್ಪಡಿರ ಅಂಕಣತ್‌ನ 'ಪಾಂಡುಪಾರೆ' / 'ಪಾಂಡವ ಪಾರೆ'ಂದೂ, ರೌಂಡ್ ಆಯಿತುಳ್ಳ ಅಂಕಣತ್‌ನೆಲ್ಲ 'ಪಾಂಡವ ಮನೆ'ಂದೂ ಕಾಕುವಕ್ ಸುರು ಮಾಡ್‌ಚಿ. ಇಯಂಗಕ್ ಪಾಂಡವಂಗಡ ಶೌರ್ಯ ಪಿಳ್ಳಾ ಸಾಸತರ್ ಕತೆ ಎಲ್ಲ ಗೊತ್ತಿಂಜನ್ನಕೆ ಆಪ.

ಪಾಂಡವಂಗ ತಂಗಡ ಅಜ್ಞಾತವಾಸತರ್ ನೇರತ್ ದ. ಹಿಂದೂಸ್ಥಾನತ್ ಸಂಚಾರ ಮಾಡಿತ್‌ಂದ್ ಅವು ನಂಬಿತಿಂಜತ್. ಎನ್ನಂಗಣ್ಣುಕ ದಕ್ಷಿಣ ಹಿಂದೂ ಸ್ಥಾನತ್ ಭಾರಿ ಬಲ್ಯ ಗುಹೆ, ಬಲ್ಯ ಬಲ್ಯ ವಸ್ತು ಏದೇಂಗಿ ಇಂಜಕ ಅದ್ ಭೀಮಂಗ್ ಸಮ್ಮಂಧ ಪಟ್ಟಿದ್‌ಂದ್ ಅವು ಎಣ್ಣುವ ಇಂಜತ್. ಅನ್ನನಾಯಿತ್ ಇಕ್ಕಲೂ ಸಹ ಭಾಗಮಂಡಲತ್‌ಂಜ ತಲಕಾವೇರಿಕ್ ನಡ್‌ಂದಂಡ್ ಪೋಪ ಬಟ್ಟೆಲ್ ಕಾಂಬ ಬಲ್ಯ ಬಲ್ಯ ಬಂಡೆಕಲ್ಲೆನ 'ಭೀಮಕಲ್ಲೆ'ಂದೆ ಕಾಕುವ.

ಈ ಕಲ್ಲೆ ಭೀಮ ಉಂಬಕಾಪಕ ಕೂಳಾರ ಮಧ್ಯ ಕೊಟ್ಟೆನ ಕಲ್ಲೆಂದೂ, ಇನ್ನತ ಕಲ್ಲೆನೆಲ್ಲ ಭೀಮನೆ ಅಲ್ಲಿ ಬೆಚ್ಚಾಂಗ್ 'ಭೀಮಕಲ್ಲೆ' ಎಣ್ಣುವ ಪೆದ ಬಾತ್‌ಂದ್ ಜನ ಎಣ್ಣುವ. ಉ.ಕನ್ನಡ ಜಿಲ್ಲೆಲ್ ಉಗಮ ಆಯಿತುಳ್ಳ ಧರ್ಮನದಿ, ಧರ್ಮರಾಯ ಜಲದೇವತೆನ ಪೊಳೆ ಆಯಿತ್ ಪರಿಯೊಂಡೂಂದ್ ಬೋಡ್‌ನಾಂಗ್ ಉದ್ಭವ ಆನ ಪೊಳೆಂದೂ, ಅದ್‌ಂಗಾಯಿತ್ ಈ ಪೊಳೆಕ್ 'ಧರ್ಮನದಿ' ಎಣ್ಣುವ ಪೆದ ಬಾತ್‌ಂದೂ ಎಣ್ಣುವ. ಚಪ್ಪಡಿ ಕಲ್ಲೆರ ಅಂಕಣ ಪಿಳ್ಳಾ ರೌಂಡ್ ಕಲ್ಲೆನೆಲ್ಲ ಪಾಂಡವಂಗ ನಿರ್ಮಾಣ ಮಾಡ್‌ಚಿ ಎಣ್ಣುವ ಗೇನತ್ ಪಾಂಡವ ಪಾರೆ ಪಿಳ್ಳಾ ಪಾಂಡವ ಮನೆಂದ್ ಪೆದ ಬಾತ್.

ಕೊಡಗರ ಎಚ್ಚಿಕೊ ಕಾಡಲ್ ಪಾಂಡವ ಪಾರೆ ಇಂಜತ್. ಊರಲ್ ಇಂಜನ್ನತ ಪಾರೆ ಎಲ್ಲ ಮಣ್ಣಲ್ ಮುಚ್ಚಿಪೋಯಿತ್.

ವೀರಾಜಪೇಟೆರ ಪಕ್ಕತ ಬೆಪ್ಪುನಾಡ್ ಅರಮೇರಿಲ್ ಅಳಮಂಡ ಮನೆರ ಪಕ್ಕತ್ ಆದ್ಯದಾಯಿತ್ ಎಣ್ಣಕ 1856ಲ್ ಡಾ.ಮೂಗ್ಗಿಂಗ್ ಪಾಂಡವಪಾರೆನ ಕಂಡ್‌ಪುಡ್‌ಚತ್. ಅಲ್ಲಿಂಜ 1868 ಪಿಳ್ಳಾ 1870ಂಡ ನೇರತ್ ಕೊಡಗರ ಆಡಳಿತಾಧಿಕಾರಿ ಆಯಿತಿಂಜ ಲೆ.ಮೆಕೆನ್ನಿ ಪಿಳ್ಳಾ ಕ್ಯಾ.ಕೋಲ್ ಕೊಡಗರ ಎಚ್ಚಿಕೊ ಜಾಗತ್ ಮಣ್ಣಲ್ ಮುಚ್ಚಿ ಪೋಯಿತಿಂಜ ಅಂಕಣತನ ಕಂಡ್ ಪುಡ್‌ಚತ್. 1894ಲ್ ಭಾರತ ಪ್ರಾಚೀನ ಇತಿಹಾಸ ಪಿಳ್ಳಾ ಪುರಾತತ್ವ ಇಲಾಖೆಕಾರ ಕೊಡಗರ ಶಿಲ್ಪಕೃತಿ, ಅರಮನೆರ ಅವಶೇಷ, ಅರಮನೆರ ಕಡಂಗ, ಕೊಲೆಕಲ್ಲ, ಮಹಾಸತಿ ಕಲ್ಲ, ಶಾಸನ ಕಲ್ಲ... ಇನ್ನತ ಪಟ್ಟಿನ 1894ತ್ ಪ್ರಕಟ ಪಡ್‌ತ್‌ಚಿ.

ಕೊಲೆಕಲ್ಲ/ ವೀರಕಲ್ಲ ಪಡಲ್ ವೀರಮರಣ ಪಟ್ಟಿಯಿಂಗಡ ಗೌರವಾರ್ಥ ಪೂತ್‌ಬೆಚ್ಚಿದ್. ಇದ್ ಸುಮಾರ್ ಮುನ್ನೂರ್ ಕಾಲತ್‌ಂಜ ಇಷ್ಟರತದ್. ಇನ್ನತದ್ ಕೊಡಗರ ಪೂರ್ವಭಾಗತ್ ಕಂಡ್‌ಬಪ್ಪ. ಬಲ್ಯ ಬಲ್ಯ ಕಡಂಗತ್‌ರ ಅರುವೆ ಉಂಡ್. ಇದ್ ಆರಡಿ ಎತ್ತರ, ನಾಲಡಿ ಅಗಲ ಪಿಳ್ಳಾ ಒಯಿಂಬದ್ ಇಂಚ್ ಬಣ್ಣತ ಕಲ್ಲರ ಚಪ್ಪಡಿ. ಈ ಕಲ್ಲ ಚಪ್ಪಡಿರ ಎದಿಕೆ ಕೋದತ್‌ಂಜ ಕೊಡಿಕೆತ್ತನೆ ಮೂಂದ್ ಭಾಗ ಉಂಡ್. ಕೋದತ ಭಾಗತ್ ಆ ವೀರ ಪೋರಾಡಿತ ಚತ್ತ ಪಡೆರ ದೃಶ್ಯ, ನಡುಭಾಗತ್ ಅಪ್ಪರೆ ಸ್ತ್ರೀಯ ಆ ವೀರನ ಸ್ವರ್ಗಕ್ ಕೂಟಿಯಂಡ್ ಪೋಪ ದೃಶ್ಯ, ಕೊಡಿಭಾಗತ್ ಆ ವೀರ ಸ್ವರ್ಗಲೋಕತ್ ತಾಂಡ ಇಷ್ಟದೇವತೆಯಡ ಪ್ರತಿಮೆರ ಎದಿಕೆ ಅಳತಂಡಿತುಳ್ಳ ದೃಶ್ಯ ಇಪ್ಪ. ಇನ್ನತ ವೀರಕಲ್ಲಲ್ ಲಿಂಗತ್‌ನೆ ಕೆತ್ತಿತ್ ಉಳ್ಳಾನಗುಂಡ್ ಇದ್‌ನ ಶಿವನ ಆರಾಧಕಂಗಳೆ ನಟ್ಟನ್ನೆ ಕಾಂಬ. ಈ ಕಲ್ಲಲ್ ಮಡಿಕೇರಿರ ಕನ್ನಂಡ ದೊಡ್ಡಯ್ಯಂಡ ವೀರಕಲ್ಲ ಒಂದಲ್ಲತೆ ಬೋರೆ ಎಲ್ಲಾ ಕಲ್ಲ ಓರ್ ತುಂಡ್ ವಸ್ತ್ರತನ ಸುತ್ತಿಯಂಡ ವೀರಂಗಡ ಆಕಾರತನ ಹೊಂದಿಯಂಡಿತ್.

ಮಹಾಸತಿ ಕಲ್ಲಲ್ ಸ್ತ್ರೀಯಡ ರೂಪ ಇಪ್ಪ. ಇವು ಮರಣಪಟ್ಟಿ ವಡಿಯಂಗಡ ಕೂಡೆ ಚತ್ತ ಪೋಣ್ಣಾಳಡ ಗೇನತ್ ಪೂತ್ ಬೆಚ್ಚ ಕಲ್ಲ, ಶಾಸನ ಕಲ್ಲ ಎಣ್ಣಕ ರಾಜಶಾಸನತನ ಕೆತ್ತಿತ್ ಬೆಚ್ಚಿತಿಪ್ಪ ಕಲ್ಲ.

ಕೊಡಗಲ್ ಪಂಡ್ ಕಂಡ್ ಬಂದ ಪಾಂಡವಪಾರೆ, ಪಾಂಡವಡ ಮನೆ, ಕೊಲೆಕಲ್ಲ, ಮಹಾಸತಿ ಕಲ್ಲ ಇನ್ನತದ್ ಈ ಕೋದತ್ ಕಾಟನ ಜಾಗತ್ ಉಂಡ್. ಕಲ್ಲ ಚಪ್ಪಡಿಕಾಯಿತ್ ಅದತ್ ಚೆನ್ನಂಗಾನ ಬಲೆಚಿಟ್ಟಿ ಸಾಧ್ಯತೆ ಇಕ್ಕು.

## ಮಡಿಕೇರಿ ತಾಲೂಕ್

ಹೊರೂರ್ ಹಾಲೇರಿ ನಾಡ್ ಪಿಳ್ಳಾ ನೂರೊಕ್ಕಲ್ ನಾಡ್

ಮಡಿಕೇರಿ ಕನ್ನಂಡ ಬಾಣಲ್ ಓರ್ ವೀರಕಲ್ಲ, ಹಾಲೇರೀಲ್ 4 ಕೊಲೆ ಕಲ್ಲ, ಕಾಂಡನಕೊಲ್ಲಿಲ್ 2 ಕೊಲೆಕಲ್ಲ, ಕೊಪ್ಪತೂರ್ಲ್ 3 ಕೊಲೆಕಲ್ಲ, ಕೋಟೆ ಕಾಡಲ್ ಚೆನ್ನಂಗ್ ಕೊಲೆಕಲ್ಲ, ಹೊರೂರ್ಲ್ 5, ಇಬ್ಬಿವಳವಾಡಿಲ್ ಓರ್ ಕೊಲೆ ಕಲ್ಲ, ಈರಳೆಲ್ ಒಂದ್, ಕಡಗದಾಳ್ಲ್ 3, ಪೊದ್ದಲ್ 2 ಕೊಲೆಕಲ್ಲ ಉಂಡ್.

## ಸೋಮವಾರಪೇಟೆ ತಾಲೋಕ್

ಹುಲುಗುಲಿ ಮೂಂದ್‌ಗೇರಿ ನಾಡ್

ಅಂದಗೋವೆಲ್ 20 ಕೊಲೆಕಲ್ಲ, 3 ಪಾಂಡವ ಮನೆ, ಅಂಜನ ಗೇರಿ ಬೆಟ್ಟಗೇರಿಲ್ ಜೈನಬಸದಿ ಪಿಳ್ಳಾ ಆಣ್, ಪೊಣ್ಣ್ ದೇವತೆಯಡ ಪ್ರತಿಮೆ, 14 ಕೊಲೆಕಲ್ಲ, ಅತ್ತೂರ್-ನಲ್ಲೂರ್ಲ್ 18 ಕೊಲೆಕಲ್ಲ, ಜೈಚನಹಳ್ಳಿ -ಕಾನ್‌ಜೈಲ್ 18, ಹರೂರ್ಲ್ 4, ಕೊಡಗರಳ್ಳಲ್ 4 ಕೊಲೆಕಲ್ಲ, 2 ಪಾಂಡವಡ ಮನೆ, ಮೊಳೂರ್ಲ್ 2 ಪಾಂಡವ ಪಾರೆ, 2 ಕೊಲೆ ಕಲ್ಲ, ಓರ್ ಕೊಲೆ ಕಲ್ಲಲ್ ಸ್ತ್ರೀರೂಪ, ನಾಲ್ಕೂರ್ಲ್ 21 ಕೊಲೆಕಲ್ಲ, 2 ಮಹಾಸತಿ ಕಲ್ಲ, ನಾರಹಲೆಲ್ ಓರ್ ಪಾಂಡವಪಾರೆ, ಶಿರಂಗಾಲತ್ ಪೊಣ್ಣ್ ಪಿಳ್ಳಾ ಆಣ್ ಆಕಾರ ಉಳ್ಳ 29 ಕೊಲೆಕಲ್ಲ, ಉಲು ಗುಲಿಲ್ 8 ಕೊಲೆಕಲ್ಲ.

## ನಂಜರಾಯಪಟ್ಟ ಹೋಬಳಿ

ಬಾಳ್‌ಗೋಡಲ್ 5 ಪಾಂಡವ ಪಾರೆ, ಬಸವನಳ್ಳಲ್ 6 ಪಾಂಡವ ಪಾರೆ, ಚಿತ್ರಕೆಲಸ ಮಾಡ್‌ನ 2 ಕೊಲೆ ಕಲ್ಲ, ಬೆಟ್ಟೂರ್ಲ್ 9 ಪಾಂಡವ ಪಾರೆ, ಚಿತ್ರಕೆಲಸ ಮಾಡ್‌ನ 2 ಕೊಲೆ ಕಲ್ಲ, ಚಿಕ್ಕತೂರ್ಲ್ 4 ಪಾಂಡವ ಪಾರೆ, ಚಿತ್ರಕೆಲಸ ಮಾಡ್‌ನ 3 ಕೊಲೆ ಕಲ್ಲ, ಕುಶಾಲನಗರತ್ 10 ಕೊಲೆ ಕಲ್ಲ, ಗುಡ್ಡೆಹೊಸೂರ್ಲ್ 8 ಪಾಂಡವ ಪಾರೆ, ಗುಮ್ಮನ ಕೊಲ್ಲಿಲ್ 3 ಪಾಂಡವ ಪಾರೆ, ಓರ್ ಕೊಲೆ ಕಲ್ಲ, ಗುಂಡಿಬಸವನ ಹಳ್ಳಲ್ 4 ಕೊಲೆಕಲ್ಲ, ಹೊಸಕೋಟೆಲ್ 5 ಪಾಂಡವ ಪಾರೆ, 6 ಕೊಲೆಕಲ್ಲ, ಚೆನ್ನಂಗ್ ಮಂಟಪತಾರ ದೊಟ್ಟೆ, ಹೊಸಪಟ್ಟತ್ 2 ಪಾರೆ, ಕೊಡ್ಲೂರ್ಲ್ 16 ಪಾಂಡವ ಪಾರೆ, ಓರ್ ಕೊಲೆಕಲ್ಲ, ಮಾದಪಟ್ಟಲ್ 3 ತೂರತಾರ ಕೆಲಸ ಮಾಡ್‌ನ ಕೊಲೆಕಲ್ಲ, 3 ಪಾಂಡವ ಪಾರೆ, ಕೂಡ್ ಮಂಗಳೂರ್ಲ್ ಓರ್ ಪಾಂಡವ ಮನೆ,

ನಂಜರಾಯ ಪಟ್ಟಣ 5 ಆಕೃತಿ ಉಳ್ಳ ಓರ್ ಕೊಲೆ ಕಲ್ಲ, ಕಾವೇರಿ ಪೊಳೆರ ಕರಲ್ ನಂಜುಂಡ ರಾಜಂಡ ಸಮಾಧಿ, ವಿರೂಪಾಕ್ಷಿಲ್ 4 ಪಾಂಡವ ಮನೆ.

### ರಾಮಸ್ವಾಮಿ ಕಣಿವೆ ಹೋಬಳಿ

ಹಲಗೇರಿ -1 ಪಾಂಡವ ಪಾರೆ, 2 ಕೊಲೆ ಕಲ್ಲ, ಹಾಲುಬಾಯಿ - 2 ಕೊಲೆ ಕಲ್ಲ, ಹೆಗ್ಗಡಹಳ್ಳಿ - 1 ಕೊಲೆ ಕಲ್ಲ, ಹೊಸಕೋಟೆ - 2 ಕೊಲೆ ಕಲ್ಲ, ಹುದನೂರ್ - 1 ಪಾಂಡವ ಪಾರೆ, 2 ಕೊಲೆ ಕಲ್ಲ, ಮಣಜೂರ್-2 ಕೊಲೆ ಕಲ್ಲ, ನಲ್ಲೂರ್- 3 ಕೊಲೆ ಕಲ್ಲ, ಸಿದ್ಧಸಿಂಗನಪುರಿ - ಮಂಜುನಾಥ ಎಣ್ಣುವ ಪೆಡತ್ ಕೆತ್ತಿತುಳ್ಳ ಓರ್ ಆಕೃತಿರನ್ನತ ಕಲ್ಲ, ಶಿರಂಗಾಲ- 2 ಕೊಲೆ ಕಲ್ಲ, ಓರ್ ಪಾಂಡವ ಪಾರೆ.

### ಸೂರ್ಲಬ್ಬಿ ಮುತ್ತುನಾಡ್

ಸೂರ್ಲಬ್ಬಿ - 13 ಕೊಲೆ ಕಲ್ಲ

### ಯಡವನಾಡ್

ಅಬ್ಬಿಮಠ - 29 ಕೊಲೆ ಕಲ್ಲ, ಅಲೆಯೂರ್ - 17 ಕೊಲೆ ಕಲ್ಲ, ಬಳಗುಂದ - 34 ಕೊಲೆ ಕಲ್ಲ, ಬೇಳೂರ್ ಬಸವನಹಳ್ಳಿ - 40 ಕೊಲೆ ಕಲ್ಲ, ಬೆಟ್ಟದಹಳ್ಳಿ - 40 ಕೊಲೆ ಕಲ್ಲ, ಚೌಡ್ಲು - 36 ಕೊಲೆ ಕಲ್ಲ, ಹಿಕ್ಕಬ್ಬೂರ್ - 14 ಕೊಲೆ ಕಲ್ಲ, ಚಿಕ್ಕತೋಳೂರ್- 35 ಕೊಲೆ ಕಲ್ಲ, ದೊಡ್ಡಬ್ಬೂರ್- 19 ಕೊಲೆ ಕಲ್ಲ, ದೊಡ್ಡ ತೋಳೂರ್ - 30 ಕೊಲೆ ಕಲ್ಲ, ಹಾನಗಲ್ಲ ಶೆಟ್ಟಿಳ್ಳಿ - 30 ಕೊಲೆ ಕಲ್ಲ, ಹಾನಗಲ್ಲ - 25 ಕೊಲೆ ಕಲ್ಲ, ಹರಗ - 55 ಕೊಲೆ ಕಲ್ಲ ಪಿಳ್ಳಾ ಓರ್ ಕಡಂಗ, ಹಾರೋಹಳ್ಳಿ- 8 ಕೊಲೆ ಕಲ್ಲ ಪಿಳ್ಳಾ ಓರ್ ಶಿಲಾ ಶಾಸನ, ಹಿತ್ತುಮಕ್ಕಿ - 14 ಕೊಲೆ ಕಲ್ಲ, ಹೊಸಬೀಡು - 25 ಕೊಲೆ ಕಲ್ಲ, ಹೊಸಹಳ್ಳಿ - 18 ಕೊಲೆ ಕಲ್ಲ, ಕಲ್ಕಂದೂರ್ - 47 ಕೊಲೆ ಕಲ್ಲ ಪಿಳ್ಳಾ ಬ್ರಹ್ಮದೇವಂಡ ಓರ್ ಮೂರ್ತಿ, ಕಿಬ್ಬೆಟ್ಟಿ - 20 ಕೊಲೆ ಕಲ್ಲ, ಕೊಲೂರ್ ಸಿಕ್ಕಳ್ಳಿ - 140 ಕೊಲೆ ಕಲ್ಲ, ಕೊತ್ತನಹಳ್ಳಿ - 38 ಕೊಲೆ ಕಲ್ಲ, ಕೂತಿ - 48 ಕೊಲೆ ಕಲ್ಲ, ಕೊತ್ತನಹಳ್ಳಿ - 38 ಕೊಲೆ ಕಲ್ಲ, ಕೂತಿ - 48 ಕೊಲೆ ಕಲ್ಲ, ಕುಮ್ಮರಹಳ್ಳಿ - 80 ಕೊಲೆ ಕಲ್ಲ, ಕುಂದಹಳ್ಳಿ - 40 ಕೊಲೆ ಕಲ್ಲ, ಕುಸುಬೂರ್ - 46 ಕೊಲೆ ಕಲ್ಲ, ಮಸಗೋಡ್ - 19 ಕೊಲೆ ಕಲ್ಲ,

ನಗರೂರ್ ಪಿಳ್ಳಾ ಸೋಮವಾರ ಪೇಟೆ- 28 ಕೊಲೆ ಕಲ್ಲ, ನೇರಗಲೆ - 20 ಕೊಲೆ ಕಲ್ಲ, 4 ಪಾಂಡವ ಪಾರೆ, ನೇರ್ಲೆ - 9 ಕೊಲೆ ಕಲ್ಲ, ನೇರಳೆಕರ್ಕಳ್ಳಿ - 23 ಕೊಲೆ ಕಲ್ಲ, ಶಾಂತಳ್ಳಿ - 45 ಕೊಲೆ ಕಲ್ಲ, ತಲ್ಲಾರೆ ಶೆಟ್ಟಿಳ್ಳಿ - 60 ಕೊಲೆ ಕಲ್ಲ,

ಯಲಕನೂರ್ - 40 ಕೋಲೆ ಕಲ್ಲ, ಯಡೂರ್ - 90 ಕೋಲೆ ಕಲ್ಲ.

**ಬಿಲ್ಲು ಹೋಬಳಿ**

ಬೆಂಬಳೂರ್ - 1 ಮಹಾಸತಿ ಕಲ್ಲ, ದೊಡ್ಡ ಬಿಲ್ಲು - 1 ಪಾಂಡವ ಪಾರೆ, ಶಿರಂಗಾಲ  
- 1 ಮಹಾಸತಿ ಕಲ್ಲ, ಶೀವರಹಳ್ಳಿ - 1 ಮಹಾಸತಿ ಕಲ್ಲ.

**ನಿಡ್ತ ಬೋಹಳಿ**

ಮೂಲಂಬಿ - 2 ಮಹಾಸತಿ ಕಲ್ಲ, ಮೆಣಸ - 1 ಕೋಲೆ ಕಲ್ಲ, ನಿಡ್ತ - 2  
ಮಹಾಸತಿ ಕಲ್ಲ.

**ವೀರರಾಜಪೇಟೆ ತಾಲೂಕ್ : ಬೆಪ್ಪುನಾಡ್**

1. ಅರಮೇರಿ - ಅಳಮಂಡ ಮನೆರ ಪಕ್ಕ ಓರ್ ಪಾಂಡವ ಪಾರೆ, ನೆಲ ಸಮ ಮಾಡ್‌ನ  
ಕೋಟೆರ ಘಂಡೇಶನ್

**ಎಡೆ ನಾಲ್ಕಾಡ್**

2. ಐಮಂಗಲ-ಚಿನ್ನಂಗ್ ಪಾಂಡವ ಪಾರೆ, 3. ಕುಕ್ಕೂರ್ - ಸರ್ಕಾರಿ ಹೈಸ್ಕೂಲಾರ  
ಪಕ್ಕ ಪಾಲೆಕಂಡ ಮನೆರ ಓರ್ ಪಾಂಡವ ಪಾರೆ, 4. ಪೊದಕೋಟೆ - ಓರ್ ಕಲ್ಲಲ್  
ಚಿತ್ರ ಕೆತ್ತನ ಜೈನ ಬಸದಿ

**ಬೊಟ್ಟಿಯತ್ ನಾಡ್**

5. ಹಾತೂರ್-ಕುಂದತ್ ಬೊಟ್ಟೂರ ಪಕ್ಕ ಪಾಂಡವಂಗ ಆಶ್ರಯ ಪಡ್‌ಂದ ಗುಹೆ  
ಎಣ್ಣುವ ಕೆಟ್ಟ ಕತೆರ ಗುಹೆ.

**ಪತ್ತ್‌ಗಟ್ಟ್ ನಾಡ್**

6. ಬಾಳೆಲೆ -14 ಕಲ್ಲ ಕಂಬತ್‌ರ ಓರ್ ಪಳೀಯ ಕಟ್ಟಡ, ಪುರಾತನ ಕಾಲತ್‌ರ  
ಚೌಕಾಕಾರತ್‌ರ ಕಲ್ಲರ ಕಟ್ಟಡ.

7. ಪಾಲ್ಪರೆ - ಕೀರೆ ಪೊಳೆರ ಕರೆಲ್ ಕೊಲ್ಲಿನಿಂಗ ಪಿಳ್ಳಾ ಬೆಣ್ಣೆಕ್ಕಪ್ಪ ಎಣ್ಣುವ ಬೇಡಂಡ  
ಜಾತಿರ ಪಾಳೆಗಾರಳುಂಡ್ ಕೆಟ್ಟನದ್‌ಂದ್ ಎಣ್ಣುವ ಪಾಳುಬುದ್ಧ ಓರ್ ಕೋಟೆ.

## ಅಂಜಿ ಗೇರಿ ನಾಡ್

8. ತೂಚಮಕೇರಿ- ಓರ್ ಪಾಂಡವ ಪಾರೆ, 3 ಪಾಂಡವಡ ಮನೆ.

## ಶ್ರೀಮಂಗಲ ನಾಡ್

9. ಹರಿಹರ - ಪಾಳ್ ಬುದ್ಧ ಓರ್ ಕೋಟೆ.

ಈ ಕೊಡಿಯತ ಪಟ್ಟಿನುಂಡ್ ಕೊಡಗಲ್ ಎಚ್ಚಕೋ ಊರ್ಲ್ ಪಾಂಡವ ಪಾರೆ ಇಂಜತ್ಂದೂ, ಅದತ್ ಕೊಡಗರ್ ಪೂರ್ವ ಭಾಗತ್ ನಾಡಲ್ ಉತ್ತರ ಭಾಗತ್ ಏರ ಕಣಕ್ ಪಾಂಡವ ಪಾರೆ ಪಿಳ್ಳಾ ಪಾಂಡವಡ ಮನೆ ಇಂಜತ್ಂದ್ ಗೊತ್ತ್ ಕಟ್ಟುವ.

ಆ ನೇರತ್ ದ.ಹಿಂದೂ ಸ್ಥಾನತ್ ತಮಿಳಂಗಕ್ ಕೊಡಗರ್ ಪೆದ ಗೊತ್ತಿಂಜತ್ಂದ್ ಕನಕ ಸಭಾ ಪಿಳ್ಳೆ 1800 ಕಾಲಕ್ ಬಯ್ಕೆ ಎಣ್ಣೆತ್. ಕ್ರಿ.ಶ.ತ್ ಬಯ್ಯತ ಪಿಳ್ಳಾ ಮಿಳ್ಳಾತ ದಂಡೂ ಶತಮಾನತ್ ತಮಿಳಡ ಪಾಂಡ್ಯರಾಜ ಪೇರ್ತ್ ಪೆದಪೋಯಿತಿಂಜತ್. ಕ್ರಿ.ಶ.ತ್ 2ನೆ ಶತಮಾನತ್ ಪಾಂಡ್ಯ ರಾಜವಂಶತ್ ನೆಡುಂಜಲಿಯನ್ ಎಣ್ಣುವ ರಾಜ ಚೋಳ ಪಿಳ್ಳಾ ಪಶ್ಚಿಮ ಚೇರ ರಾಜಂಗಳ ಚೋಪ್ಚಿಟ್ಟಿತ್ ಅಯಿಂಗಡ ಮೀದ ತಾಂಡ ಪ್ರಭುತ್ವತ್ ಸ್ಥಾಪನೆ ಮಾಡ್ಚಿ. ಅಂಪಂಡ ರಾಜಧಾನಿ ಮಧುರೈ. ಕ್ರಿ.ಶ.ತ್ ಆದಿಲ್ 'ಸಂಗಮ್ ಸಾಹಿತ್ಯ' ಎಣ್ಣುವ ತಮಿಳ್ ಸಾಹಿತ್ಯ ಭಾರಿ ಪೆದ ಪೋಯಿತಿಂಜತ್. ಪಾಂಡ್ಯ ರಾಜಂಗಡ ರಾಜ್ಯ ವಿಸ್ತಾರ ತಮಿಳ್ ಸಾಹಿತ್ಯತ್ ಇನ್ನನೆ ವರ್ಣನೆ ಆಯಿರುಂಡ್.

ಕುಡಕಂ ಕುನಗ ಕಡಲ್  
ಕೂಮಾರಿ ತಿರುವಂಗಡಂ  
ಇನ್ನಾಂಗು ತಮಿಳ  
ನೆಟ್ಟಿನ್ ಎಲ್ಲಾಯಿ

ಇದ್ಂಡ ಅರ್ಥ್, 'ತಮಿಳ್ ರಾಜ್ಯ ಓರ್ ಬರಿಲ್ ಕೊಡಗ್ಂಜ ಬಂಗಾಳ ಕೊಲ್ಲಿಕೆತ್ತನೆಕೂ, ಇನ್ನೋರ್ ಬರಿಲ್ ಕನ್ಯಾಕುಮಾರಿಂಜ ತಿರುಪತಿಕೆತ್ತನೆಕೂ ಉಂಡ್' ಎಣ್ಣೆಯಂಡ್ ಆ ಕಾಲತ್ ಕೊಡಗ್ಂಜ 'ಕುಡಕಂ', 'ಕುಡುಮಲೈ ನಾಡ್' ಎಣ್ಣೆಯಂಡ್ ತಮಿಳ್ಕಾರ ಕಾಕುವ ಇಂಜತ್. ಪಾಂಡ್ಯ ರಾಜ ಕ್ರಿ.ಶ.ತ್ ಆದಿಲ್ ಕೊಡಗ್ಂಜ ಕೂಟಿಯಂಡ್ ಇಲ್ಲೇಂಗೂ ಕೊಡಗ್ಂಜನೆ ಪಬ್ಬಿತಿಂಜತ್ಂದ್ ಎಣ್ಣುವ.

ಆಚೇಂಗಿ, ಪಾಂಡ್ಯ ರಾಜ್ಯತ್ ಪ್ರಾಬಲ್ಯ ಚೆನ್ನಂಗ್ ಕಾಲಕೆತ್ತನೆ ಮಾತ್ರ ಇಂಜತ್ಂದ್ ಚರಿತ್ರಲ್ ಗೊತ್ತ್ಕಟ್ಟುವ. ಪಾಂಡ್ಯಂಗಡ ಕಾಲತ್ ಇಕ್ಕಾಕಲೆ ಎಣ್ಣೆನಪೋಲೆ ಕಲ್ಲಾರ ಅಂಕಣತ್ ಪಾಂಡ್ಯಪಾರೆ, ಕಲ್ಲಾರ ವರ್ತುಲಕ್ ಪಾಂಡ್ಯಂಗಡ ಮನೆಂದ್ ಪೆದ ಇಂಜದ್



ಕ್ರಮೇಣ ಪಾಂಡವಪಾರೆ, ಪಾಂಡವಡ ಮನೆಂದ್ ಕಾಕುವಕಾಚಿ ಎಣ್ಣುವ ಅಭಿಪ್ರಾಯ ಉಂಡ್.

ಕೊಲೆಕಲ್ಲ್ ಉ. ಕೊಡಗ್ಗರ ಪೂರ್ವಭಾಗತ್ ಉರಾಲೆ ಏರೆ ಕಂಡ್‌ಬಂದಾಂಗ್ ಹಾಲೇರಿ ರಾಜಂಗಡ ಕಾಲತ್ ಪಿಳ್ಳಾ ಅಯಿಂಗಡ ಕಾಲಕ್‌ಂಜ ಮುಪ್ಪಡೆ ಆ ಪ್ರದೇಶಕ್ ದುಂಬ ಕುರಿ ಆಕ್ರಮಣ, ತೆರಿ ಜಗಳ, ಚೆರ್ ಚೆರಿಯ ಗಲಾಟೆ ಆಯಂಡ್ ಇಂಜತ್‌ಂದ್ ಗೊತ್ತಾಪ.

## 5. ಕೊಡಗಲ್ ಗಂಗ ವಂಶ ರಾಜಂಗಡ ಆಳ್ವಿಕೆ

ಕೊಡಗ್ಗರ ಉತ್ತರ ಭಾಗತ್ ಕದಂಬಂಗ ಆಳಿಯಂಡ್ ಇಪ್ಪಕ ದಕ್ಷಿಣ ಭಾಗ ಗಂಗರಾಜಂಗಡ ಪುಡ್‌ತತ್ ಇಂಜತ್‌ಂದ್ ಶಾಸನತ್ ಗೊತ್ತ್‌ಕ್‌ಟ್ಟುವ. ಗಂಗ ರಾಜಂಡ ಉತ್ತರತ್ ಗಂಗಾನದಿರ ಕಣಿವೆಂಜ ಮಾರ್ಯವಂಶತ್‌ರ ಕೇಳಿಪಟ್ಟಿ ರಾಜ ಚಂದ್ರಗುಪ್ತ ಮಾರ್ಯ ತಾಂಡ ಆಖೀರಿ ಕಾಲತ್ ಜೈನಂಗಡ ಓರ್ ಬಲ್ಯ ಕೂಡ್ ಕುಟುಂಬತ್‌ರ ಕೂಡೆ ಮೈಸೂರ್ ಸಂಸ್ಥಾನತ್‌ರ ಶ್ರವಣ ಬೆಳಗೊಳಕ್ ಬಂದಿತಿಂಜತ್. ಅಕ್ಕ ರಾಜಂಡ ಕೂಡೆ ಇಂಜ ಇಕ್ಖಾ ಕುಲತ್‌ರ ದಂಡ್ ಜೈನ ರಾಜಕುಮಾರಂಗಳುಂಡ್ ಸ್ಥಾಪನೆ ಆಚೀಂದ್ ಚರಿತ್ರೆಲ್ ಎಣ್ಣುವ. ಈ ವಂಶತ್‌ರ ರಾಜಂಗಡ ರಾಜಧಾನಿ ಕ್ರಿ.ಶ. 2ನೆ ಶತಮಾನತ್‌ಂಜ 11ಂಗತ್ತನೆ ಮೈಸೂರ್ ಜಿಲ್ಲೆರ ಕಾವೇರಿ ಪೊಳೆರ ಎಡ್‌ತೆ ಬರಿಯ ಉಳ್ಳ ತಲಕಾಡ್ ಆಯಿತಿಂಜತ್.

ಗಂಗ ವಂಶತ್‌ರ ರಾಜಂಗಡ ಪಳೆಯ ಶಾಸನ ಶಾಲಿವಾಹನ ಶಕ 388 ಇಲ್ಲೇಂಗಿ ಕ್ರಿ.ಶ. 466ನೆ ಇಸವಿರದ್. ತಗಡಲ್ ಉಳ್ಳ ಈ ಶಾಸನ ಕೈಂಜ ಶತಮಾನತ್ ಮಡಿಕೇರಿ ಅರಮನೆರ ವಿಜಾನೆಲ್ ಗೊತ್ತ್‌ಕ್‌ಟ್ಟಿತ್. ಆಚೇಂಗಿ, ಪಿಚ್ಚೋಳೆರ ತಗಡಲ್ ಎಳ್ಳಿತುಳ್ಳ ಭೂಮಿರ ದಾನಶಾಸನ ಇಕ್ಕತ ಕೊಡಗ್ಗರ ಏದೇ ಭೂಮಿಕೂ ಸಮ್ಮಂಧಪಡುಲೆ. ಅಲ್ಲತೆ ಈ ಶಾಸನತ್‌ನ ಎಳ್ಳೆನ ನೇರತ್ ಅಚ್ಚೆಕೆ ಎನ್ನಂಗ್ ಶಾಸನ ಎಳ್ಳೆನಪಿಳ್ಳೊ 12 ಶತಮಾನಕೆತ್ತನೆ ಕೊಡಗಲ್ ಮಡಿಕೇರಿ ಎಣ್ಣುವ ಉರ್ ಇಂಜಾಲೆ! ಅಲ್ಲಿ ಅರಮನೆಯೂ ಇಂಜಾಲೆ. ಆನಗುಂಡ್ ಈ ಶಾಸನ ಕ್ರಿ.ಶ. 1600ತ್‌ಂಜ ಇಪ್ಪರಕ್ ಆಳ್‌ನ ಹಾಲೇರಿ ಅರಸಡ ಕಾಲತ್ ಅಯಿಂಗಡ ಸೈನಿಕಂಗ ಕೊಡಗ್ಗರ ಪೂರ್ವ ದಿಕ್ಕಲ್ ಇಂಜ ಸೀಮೆರ ಮೀದ ಧಾಳಿ ಮಾಡುವಕ ಅಲ್ಲಿ ಕೊಟ್ಟೆನ ಶಾಸನ ಆಯಿತಿಕ್ಕುಂದ್ ಅವು ಆದ್‌ನ

ಕೊಂಡಬಂದಿತ್ ಮಡಿಕೇರಿಲ್ ತಂಗಡ ರಾಜಂಗ್ ಕೊಡ್ತಿತ್ತಿಕ್ಕೊಂದ್ ತೋಂದುವ.

ಈ ಶಾಸನತ್ ಗಂಗರಾಜನಾನ ಕೊಂಗುಣಿ ಮಹಾರಾಜ ಅವನಿತ ಎಣ್ಣುವಂವ ರಾಷ್ಟ್ರಕೂಟ ಅಕಾಲ ವರ್ಧನಂಡ ಮಂತ್ರಿ ಆಯಿತ್, ಅಲ್ಲಿಂಜ ಸನ್ಯಾಸಿ ಆನ ಚಂಡಂಬಿ ಭಟಾರ ಎಣ್ಣುವ ಜೈನ ಗುರುಕ್ ಪುನ್ನಾಡ್ ಆರಾಯಿರ ಸೀಮೆರ ಬದನೆಗುಪ್ಪೆ ಎಣ್ಣುವ ಊರಾನ ಕೊಡ್ತನ್ನಕೆ, ಈ ಜೈನ ಗುರು ಈ ಊರಾನ ತಲಕಾಡಾರ ಶ್ರೀ ವಿಜಯಜಿನ ತಿರಿಕೆಕ್ ಕೊಡ್ತನ್ನಕೆ ಎಲ್ಲಿತುಂಡ್. ಗಂಗರಸ ಕೊಂಗುಣಿ ಮಹಾರಾಜ, ಕದಂಬ ರಾಜ ಕಕುತ್ಸ್ಥಂಡ ಮೋವ ಪಿಳ್ಳಾ ಕೃಷ್ಣವರ್ಮಂಡ ತಂಗೆರ ಮೋಂವ. ಇಂವ ಕೊಡಗರ ಕೇಕ್ ಬರಿ ಎಣ್ಣಕ ಪೂರ್ವದಿಕ್ಕೊಂಜ ಪೊನ್ನಾಡ್ ಆರಾಯಿರ ಸೀಮೆರ ರಾಜಂಡ ಮೋವಳ ಮಂಗಲಾಚಿ. ಇಂವಂಡ ಆಲ್ಪಿಕೆ ಕ್ರಿ.ಶ. 430ತ್ಂಜ 482ಕೆತ್ತನೆ ಇಂಜತ್ಂದ್ ಚರಿತ್ರಂಜ ಗೊತ್ತ್ ಕೊಟ್ಟುವ. ಅವನಿತ ಜೈನಗುರುಕ್ ದಾನ ಆಯಿತ್ ಕೊಡ್ತ ಬದನೆಗುಪ್ಪೆ ಗ್ರಾಮ ಪುನ್ನಾಡ್ ಆರಾಯಿರ ಸೀಮೆಲ್ ಇಂಜತ್. ಈ ಊರ್ ಇಕ್ಕಲೂ ಇದೇ ಪೆದತ್ ಮೈಸೂರ್ ಜಿಲ್ಲೆರ ಚಾಮರಾಜ ನಗರತ್ ಉಂಡ್. ಅವನಿತಂಡ ಈ ದಾನ ಶಾಸನ ಕೊಡಗರ ಒಳ್ಳಲ್ ಏದೆ ಜಾಗಕೂ ಸಮ್ಮಂಧ ಪಡತೆ ಉಂಡೇಂಗಿಯೂ ಕ್ರಿ.ಶ. 2ನೆ ಶತಮಾನತ್ಂಜ 11ನೆ ಶತಮಾನಕೆತ್ತನೆ ಪಡಿಇಾರ್ ಮಲೆಂಜ ಪಂಡೇತ ಮೈಸೂರ್ ರಾಜ್ಯತ್ ದಕ್ಷಿಣ ಭಾಗತ್ ಕೋವುನೆಲ್ಲ ಗಂಗರಸಂಗ ಆಳಿಯಂಡ್ ಇಂಜಾನುಂಡ್, ಈ ಶಾಸನತ್ ದಾನ ಕೊಡ್ತಿತುಳ್ಳ ಊರ್ ಕೊಡಗರ ಒಳ್ಳಲ್ ಉಳ್ಳ ಜಾಗತ್ ಸಮ್ಮಂಧ ಪಡುವಾನಗುಂಡ್ ಕೊಡಗ್ ಕ್ರಿ.ಶ.ತ್ ರ ಆದಿ ಶತಮಾನತ್ಂಜೆ ಗಂಗರಸಂಗಡ ಆಲ್ಪಿಕೆಕ್ ಒಳಪಟ್ಟಿತ್ ಇಂಜತ್ಂದ್ ಚರಿತ್ರಕಾರ ಅಭಿಪ್ರಾಯ ಪಡುವ. ಈ ಶತಮಾನತ್ ಕೊಡಗರ ಪಡಿಇಾರ್ ಭಾಗ ಕುಂದ್ ಕಾಡ್ನುಂಡ್ ದುಂಬಿತ್ ಇಂಜಾನುಂಡ್ ಕೊಡಗರ ಪೂರ್ವಭಾಗತ್ ಬಯಲ್ ಸೀಮೆಲೆ ಜನ ನೆಲೆ ನಿಂದಿತಿಂಜನ್ನಕೆ ಕಂಡ್ ಬಪ್ಪ.

ಗಂಗರಾಜಂಗಡ ಶಾಸನತ್ ಕೊಡಗ್ ಸಮ್ಮಂಧಪಟ್ಟ ಆದ್ಯಶಾಸನ ಶಾ.ಶ. 809 ಇಲ್ಲೇಂಗಿ ಕ್ರಿ.ಶ.888ನೆ ಇಸವಿರದ್. ಈ ಶಾಸನ ಅದ್ಂಡ ಇಪ್ಪರತ್ ಶಾಸನ ಕಲ್ಲ್ಲ್ ಎಳ್ಳನದ್. ಇದತ್ ಗಂಗರಸ ಸತ್ಯ

ವಾಕ್ಯ ಕೊಂಗುಣಿವರ್ಮ ಧರ್ಮ ಮಹಾರಾಜ ಪೆನ್ನಕಡಂಗತ್ ಸತ್ಯವಾಕ್ಯ ಜಿನಬಸದಿಲ್ ಪೂಜೆ ಮಾಡುವಕಾಯಿತ್ ಜೈನಗುರು ಸುವರ್ಣಂದಿ ದೇವಕ್ ಕ್ಕಗ್ಗಟ್ಟ್ ನಾಡ್ ಪೆದ್ದೋರೆಗರೆರ ಬಿಳೂರ ಪನ್ನೆರಂಡ್ ಕೇರಿನ ದಾನ ಮಾಡ್ನ ಎಳ್ಲ್ ಉಂಡ್.

ಪೆದ್ದೋರೆ ಎಣ್ಣಕ ಕ್ಕಗ್ಗಟ್ಟ್ ನಾಡ್ ಬಲ್ಯಪೊಳೆ ಲಕ್ಷ್ಮಣ ತೀರ್ಥ ಪೊಳೆ. ಈ ಪೊಳೆನ ಅಲ್ಲಿಯತ್ ಜನ ಇಕ್ಕಲೂ ಸಹ 'ಬಲ್ಯಪೊಳೆ'ಂದ್ ಕಾಕುವ. ಕ್ಕಗ್ಗಟ್ಟ್ ನಾಡ್

ಬಿಳೂರ್ ಕಡಂಗತ್ ಗಂಗರಸಂಗಡ ಶಿಲಾ ಶಾಸನ ಉಳ್ಳದ್ ಕಂಡ್ ಬಪ್ಪ. ರಾಜ ಕೊಂಗುಣಿವರ್ಮ ದಾನ ಮಾಡ್‌ನ ಸಾಕ್ಷಿಯಾಯಿತ್ ಗಂಗವಾಡಿರ ಅಧಿಕಾರಿಯ, ಪೆದ್ದೊರೆಗರೆರ 80 ಜನ, ಎಟ್ಲ್ ಒಕ್ಕಕಾರಡ ಪೆದ ಉಂಡ್. ದಾನ ಮಾಡ್‌ನ ಜಾಗತ್‌ನ ಚಾಯೋಡೆ ನೋಟಿಯವಕ್ ಮಲೆಸೀಮೆರ ಜನಳೂ ಅಲ್ಲಿ ಇಂಜತ್. ಪೆನ್ನ ಕಡಂಗ ಎಣ್ಣುವ ತಕ್ಕನುಂಡ್ ಆ ಕಾಲತ್ ಕ್ಕೆಟ್ಟ್ ನಾಡ್‌ಲ್ ಬಲ್ಯ ಕಡಂಗ ಇಂಜತ್‌ಂದ್ ಕಾಂಬ. ಈ ಶಾಸನ ಇನ್ನನೆ ಉಂಡ್.

ಭದ್ರವಸ್ತು ಜಿನ ಶಾಸನಾಯ ಸಕನ್ಯಪಾ| ತೀತಾಕಾಲ ಸಂವತ್ಸರಂಗಳೆಣ್ಣು ನೂರೊಮ್ಮತ್ತನೆಯ ವರ್ಷಂ| ಪ್ರವರ್ತಿಸುತ್ತಿರೆ ಸ್ವಸ್ತಿ ಸತ್ಯವಾಕ್ಯ ಕೊಂಗುಣಿವರ್ಮ ಧರ್ಮ ಮಹಾರಾಜಾಧಿರಾಜ ಕೊವಳಲ ಪುರವರೇಶ್ವರ ನನ್ನಗಿರಿನಾಥ ಶ್ರೀಮತ್ತೈರ್ಮನಡಿಯ ರಾಜ್ಯಾಭಿಷೇಕಂಗೈಯ ಪದಿನೆಣ್ಣನೆಯ ವರ್ಷದನ್ನು ಪಾಲ್ಗುಣ ಮಾಸದ ಶ್ರೀ ಪಂಚಮೆಯನ್ನು ಶಿವಣ್ಣಿಸಿದ್ದಾನ್ದ ಭಟರರ ಶಿಷ್ಯಸ್ವರ್ವ್ವಣ್ಣಿದೇವಗ್ಗೆ ಪೆಣ್ಣೆ ಗಡಂಗದ ಸತ್ಯವಾಕ್ಯ ಜಿನಾಲಯಕ್ಕೆ ಪೆದ್ದೊರೆಗರೆಯ ಬಿಳಿ ಉರ್ಪನ್ನಿಪ್ಪಳ್ಳಿಯುಮಂ ಸರ್ವ್ವಪಾದಪರಿಹಾರ ಪೆಮ್ಮಾನಡಿ ಕೊಟ್ಟೊತ್ತೊಮ್ಮತ್ತರು ಸಾಸಿರ್ಪ್ಪ ರುಮಯ್ಯಾಮನ್ನರು ಬೆದ್ದೊರೆಗರೆಯ ಎಳ್ಳದಿಮ್ಮರು ಎಣ್ಣೊಕ್ಕಲುಂ ಇದಕ್ಕೆ ಸಾಕ್ಷಿ ಮಲೆ ಸಾಸಿವ್ವರು ಮಯ್ಯವ್ವರುಂ ಮಯ್ಯಮರಿಗರುಂ ಇದಕ್ಕೆ ಕಾಪು ಇದನಳಿದೊಂಬಾರಣಾಸಿಯುಮಂ ಸಾಸಿರ್ಪ್ಪಾರ್ಪ್ಪಾರುಮಂ ಸಾಸಿರಂ ಕವಿಲೆಯುಪನಳಿದೊಂ ಪಂಚ ಮಹಾಪಾತಕನಕ್ಕುಂಸೆದೋಜನ ಲಿಖಿತ್ತ| ಬೆಳಿಯೂರ ಎಣ್ಣತ್ತು ಗಡ್ಡಾಣ ಪೊನ್ನೂ ಎಣ್ಣು ನೂರುಬತ್ತಮುಂ ತೆರುವೊಂ.

ಈ ನೇರತ್ ಇಞ್ಞೋರ್ ಶಿಲಾಶಾಸನ ಕ್ಕೆಟ್ಟ್‌ನಾಡ್‌ರ ಕೋತೂರ್ ಊರ್‌ರ ಲಕ್ಕುಂದ ಕಾಡ್‌ಲ್ ಉಂಡ್. ಇದತ್ ಗಂಗರಸ ಸತ್ಯವಾಕ್ಯಕೊಂಗುಣಿ ವರ್ಮ ಮಹಾರಾಜ, ಬೀಡಲ ಎರೆಯಂಗ ಗೌಡಂಡ ಮೋಂವಂಗ್ ನಾಪದ್ ಪೊನ್ನಾರ ಗಡ್ಡಾಣ ಪಿಞ್ಞ ನೂರ್ ಸೇರ್ ಬಿತ್ತ ನೆಲ್‌ನ ದೇಣಿಗೆಪೋಲೆ ಕೊಡ್‌ತ ಪಟ್ಟಿ ಉಂಡ್.

ಇದೇ ಪಂಶತ್‌ರ ರಾಜಂಗಡ ಮೂಂದನೆ ಶಿಲಾಶಾಸನ ಕ್ಕೆಟ್ಟ್‌ನಾಡ್‌ರ ಪೆಗ್ಗೂರ್‌ಲ್ ಉಳ್ಳದ್ ಗೊತ್ತ್‌ಕೊಟ್ಟಿತ್. ಈಂಡ ಕಾಲ ಶಾ.ಶ. 899 ಇಲ್ಲೇಂಗಿ ಕ್ರಿ.ಶ. 978. ಇದತ್ ಕೊಂಗುಣಿ ಮಹಾ ವರ್ಮ ತಲಕಾಡ್‌ನ ಆಳಿಯಂಡ್ ಇಪ್ಪಕ ಅವಂಡ ತಮ್ಮಣ ರಕ್ಕಸಗಂಗ ಪೆದ್ದೊರೆಗರೆನ ಆಳಿಯಂಡ್ ಇಂಜತ್‌ಂದೂ, ಶ್ರವಣಬೆಳಗೊಳತ್‌ರ ಅನಂತ ವೀರಯ್ಯ ಎಣ್ಣುವ ಜೈನಗುರು ಆ ನೇರತ್ ಪೆಗ್ಗಡೂರ್ ಪಿಞ್ಞ ಪುದಿಯ ಕಡಂಗತ್‌ನ ದಾನ ಪಡ್‌ಂದತ್‌ಂದೂ ಎಳ್ಳಿತ್. ಈ ದಾನಕ್ 96 ಆಯಿರ ಸೀಮೆಕಾರ, ಅಂಜಿ ಸಾಮಂತ ರಾಜಂಗ, ಪೆದ್ದೊರೆಗರೆರ 70 ಜನ, ಎಟ್ಲ್ ಒಕ್ಕಕಾರ ಸಾಕ್ಷಿಯಾಯಿತೂ, ನಾಲ್

ಮಲೆಪತಿಯ, 200 ಜನ ಪಿಳ್ಳಾ ಪೂಮಾಲೆ ತಯಾರ್ ಮಾಡುವ ಅಂಜಾಳ್ ರಕ್ಷಣೆಕ್ ಇಂಜತ್.

ಕೊಡಿಯತ 3 ಶಿಲಾ ಶಾಸನ ಕ್ಕೊಟ್ಟನಾಡಾರ ಊರಾಲೆ ಇಂಜಿತ್ ಅವು ಅಲ್ಲಿಯತ ಜಾಗಕ್ ಸಮ್ಮಂಧ ಪಟ್ಟಿತುಳ್ಳಾನುಂಡ್ ಆ ಶತಮಾನತ್ ಗಂಗರಸಂಗಡ ಆಳ್ವಿಕೆ ಕ್ಕೊಟ್ಟನಾಡಾರ್ ಇಂಜತ್‌ಂದ್ ಗೊತ್ತಾಪ. ಕೊಡಗ್ಗರ ಈ ಭಾಗತನ ಗಂಗವಂಶತರ ರಾಜಂಗಡ ಅಧೀನತ್ ಅಯಿಂಗಡ ಬೆಂದು-ಚಿಜ್ಜಾದಿಯ / ಸಾಮಂತಂಗ ಆಳಿಯಂಡ್ ಇಂಜನ್ನೆ ಕಾಂಬ. ಗಂಗ ವಂಶತರ ರಾಜಂಗ ಜೈನಂಗಳಾಯಿತಿಂಜತ್. ಆನಗುಂಡ್ ಅಯಿಂಗಡ ರಾಜ್ಯತ್‌ಲೆಲ್ಲ ಜೈನ ಬಸದಿ ಇಂಜತ್‌ಂದೂ, ಆ ಬಸದಿಕೆಲ್ಲ ಇವು ಭೂಮಿನ ದಾನ ಮಾಡಿತೆಂದೂ ಶಾಸನತ್ ಎಳ್ಳಿತುಂಡ್.

ರಾಜ ಕೊಂಗುಣವರ್ಮ ಆಳಿಯಂಡ್ ಇಪ್ಪಕ ಅವಂಡ ತಮ್ಮಣಂಡ ಮೋಂವ ಈರೆಯಪ್ಪ ಕೊಂಗನಾಡ್ ಎಟ್ಟಾಯಿರ ಸೀಮೆನ ಓರ್ ಮಾಂಡಲಿಕನಾಯಿತ್ ಆಳಿಯಂಡ್ ಇಂಜತ್. ಅವಂಡ ಪುಡ್ತತ್ ಇಂಜ ಸೀಮೆಲ್ ಇಕ್ಕತ ಎಳಾಯಿರಸೀಮೆ ಇಂಜತ್‌ಂದ್ ಹುಣಸೂರರ 92ಂಡ ಶಾಸನತ್‌ಂಬ ಗೊತ್ತಾಕ್‌ಟ್ಟುವ. ಈ ಕಾಲತರ ಆಖೀರತ ಶಾಸನ ಉ.ಕೊಡಗ್ಗರ ಗಣಗೂರ್ ಊರ್‌ಕ್ ಸಮ್ಮಂಧಪಟ್ಟದ್. ಇಕ್ಕತ ಸೋಮವಾರಪೇಟೆರ ಅಕ್ಕ ಪಕ್ಕತ ನಾಡ್, ರಾಮಸ್ವಾಮಿ ಕಣಿವೆ, ಹೆಬ್ಬಾಲೆ, ಶಿರಂಗಾಲತ್ ಇಯಂಗಡ ಆಳ್ವಿಕೆ ಇಂಜದ್ ಗೊತ್ತಾಪ. ಕೊಡಗ್ಗರ ಸಮ್ಮಂಧಪಟ್ಟ ಈ ಶಾಸನ ಶಾ.ಶ. 926 ಯಾ ಕ್ರಿ.ಶ. 1000ನೆ ಇಸವಿರ ಆಯಿತುಂಡ್.

ಗಂಗರಸಂಡ ಕಾಲತ್ ಕೊಟ್ಟನ ಆಖೀರಿ ಶಾಸನತ್ ಗಣಗೂರ್ ಊರರ ಹಣಚಿ ಧರ್ಮಶೆಟ್ಟಿ ಎಣ್ಣುವಂವ ಕುಣಂದೊರ ಎಣ್ಣುವ ವ್ಯಕ್ತಿರ ಸೇವೆಲ್ ಇಂಜತ್. ಅವ ತಾನ್ ಮಾಡ್‌ನ ಪಾಪತನ ಕಾವೇರಿ ಪೊಳೆಲ್ ಕುಳ್‌ಚಿತ್ ಪರಿಹಾರ ಮಾಡಿಯಂಡ್, ರಾಮೇಶ್ವರನ ಅರ್ಚನೆ ಮಾಡಿತ್ ತಿರಿಕೆಕ್ ಓರ್ ಬಟ್ಟಿ ನೆಲ್ಲ್ ಬೊಳಿಯುವ ಜಾಗ ಪಿಳ್ಳಾ ಚೆನ್ನಂಗ್ ಜಾಗತನೆ ದಾನ ಆಯಿತ್ ಕೊಡ್‌ತತ್‌ಂದೂ, ಈ ಧರ್ಮತನ ಕಮ್ಮಿ ತರತ್ ಪಾಳ್ ಮಾಡ್‌ನಂವಂಗ್ ಕಪಿಲೆ ಪಯ್ಯನ ಕೊಂದನ್ನತ ಪಾಪ ಕೊಟ್ಟುವಾಂದೂ ಎಳ್ಳಿತ್. ಈ ಶಿಲಾಶಾಸನ ಕುಶಾಲ ನಗರ ಹೋಬಳಿಲ್ ಇಂಜತ್. ಚೆನ್ನಂಗ್ ಕಾಲ ಕೈಂಜಪಿಳ್ಳಾ ಈ ಶಾಸನತನ ಮಡಿಕೇರಿಲ್ ಉಳ್ಳ ಸರ್ಕಾರಿ ಹೈಸ್ಕೂಲರ ಕಯ್ಯಾಲೆಲ್ ಪೂತ್ ಬೆಚ್ಚಿತಿಂಜತ್.

ಕೊಡಿಯತ ವಿವರಣೆಂಜ ಕೊಡಗ್ಗರ ಜಾಗಕ್ ಸಮ್ಮಂಧ ಪಟ್ಟನ್ನೆ ಗಂಗರಸಂಡ ಕಾಲತರ ಶಾಸನ 4 ಇಂಜದ್ ಗೊತ್ತಾಕ್‌ಟ್ಟುವ. ಈ ಶಾಸನತ್‌ಂಬ 11ನೆ ಶತಮಾನಕೆತ್ತನೆ

ಗಂಗರಸಂದ ಅಲ್ಲಿಗೆ ದ.ಕೊಡಗರ ಕ್ಕಗ್ಟ್ ನಾಡ್‌ಕೆತ್ತನೆ ಇಂಜತ್‌ಂದ್ ಎಣ್ಣುವದ್ ಗೊತ್ತಾಪ.

## 6. ಚಿಂಗಾಳ್ಳ ಪಿಳ್ಳಾ ಚೋಳ ರಾಜಂಗಡ ಅಧಿ ರಾಜತ್ವ

ಕ್ರಿ.ಶ. 10ನೆ ಶತಮಾನತ್ ಕೊಡಗರ ಪೂರ್ವಭಾಗ ಪಿಳ್ಳಾ ಇಕ್ಕತ ಹುಣಸೂರ್ ತಾಲೂಕ್‌ಲ್ ಚಿಂಗಾಳ್ಳ ಎಣ್ಣುವ ಓರ್ ಚೆರಿಯ ಸಂಸಾರ ಇಂಜತ್. ಇವು ಗಂಗರಸಂದ ಮಾಂಡಲಿಕಂಗ. ಅನ್ನನೆ ಚೋಳರಸಂಗ 12ನೆ ಶತಮಾನತ್ ಮಾಂಡಲಿಕಂಗಳಾಚಿ.

ಕ್ರಿ.ಶ. 10 ಪಿಳ್ಳಾ 11ನೆ ಶತಮಾನತ್ ಇಕ್ಕತ ಚೆನ್ನೈರ ಪೂರ್ವ ಭಾಗತ್ ಚೋಳರಾಜಂಗ ಮಿಳ್ಳಾಕ್ ಬಾತ್. ಅಯಿಂಗಕೂ, ಗಂಗರಸಂಗಕೂ ಗೆಡಿ ಗೆಡಿ ಪಡೆ ಪೊಪ್ಪದ್ ಮಾಮೂಲ್. ಕ್ರಿ.ಶ. 1004ತ್ ಮಹಾಪರಾಕ್ರಮಿ ರಾಜೇಂದ್ರಚೋಳ ಗಂಗರಸಂದ ರಾಜಧಾನಿ ತಲಕಾಡ್, ಮೈಸೂರ್ ದಕ್ಷಿಣ ಪಿಳ್ಳಾ ಪೂರ್ವಸೀಮೆ ಪಿಳ್ಳಾ ಗಂಗರಾಜ್ಯತ್‌ನ ಪುಡ್‌ತಕ್ ಎಡ್‌ತಂಡತ್. ಅಲ್ಲಿಕ್ ಗಂಗರಸಂದ ಅಲ್ಲಿಗೆ ಆಖೀರ ಆಚಿ.

ಚೋಳಂಗ, ಗಂಗರಸನ ಚೋಪ್‌ಚಿಟ್ಟತ್ ಅಯಿಂಗಡ ರಾಜ್ಯತ್‌ನ ತಂಗಡ ಪುಡ್‌ತಕ್ ಎಡ್‌ತವಕ ಚಿಂಗಾಳ್ಳಂಗ ಚೋಳ ರಾಜಂಗಳ ಎದ್‌ರ್‌ಚಿಟ್ಟತ್. ಆಚೇಂಗಿ, ಚಿಂಗಾಳ್ಳಂಗ ಕಾವೇರಿ ಪೊಳೆರ ಬರಿಲಿಂಜ ಹನಸೋಗೆ ಎಣ್ಣುವಲ್ಲಿ ನಡ್‌ಂದ ಪಡಲ್ ಚೋತಾನುಂಡ್ ಚೋಳ ರಾಜಂಗಡ ಮಾಂಡಲಿಕಂಗಳಾಚಿ. ಈ ನೇರತ್‌ಂಜ ಚಿಂಗಾಳ್ಳ ರಾಜಂಗ ತಂಗಡ ಪೆದತ್‌ರ ಆಖೀರತ್ ಚೋಳ ಎಣ್ಣುವ ಪೆದತ್‌ನ ಕೂಟಿಯಂಡತ್. ಅಂದ್‌ಂಜ ಚೋಳಂಗಡ ಅಧೀನ ರಾಜ್ಯತ್‌ರ ಪಟ್ಟಿಲ್ 'ಕುಡಮಲ್ಯೆ ನಾಡ್' ಎಣ್ಣಕ 'ಮಲೆನಾಡ್‌ರ ಕೊಡಗ್' ಪೆದ ಕೂಡ್‌ಚಿ.

ಚಿಂಗಾಳ್ಳಂಗಳ ಕಾವೇರಿ ಪೊಳೆಕರೆರ ಹನಸೋಗೆಲ್ ಚೋಪ್‌ಚಿಟ್ಟಂವ ಚೋಳ ಸೈನ್ಯತ್‌ರ ಮಣಿಜ ಎಣ್ಣುವ ವ್ಯಕ್ತಿ. ಮಣಿಜಂಡ ಪರಾಕ್ರಮನ್‌ನ ಮೆಚ್ಚಿತ್ ರಾಜರಾಜ ಚೋಳ ಅವಂಗ್ 'ಕ್ಷತ್ರಿಯ ಶಿಖಾಮಣಿ ಕೊಂಗಾಳ್ಳ' ಎಣ್ಣುವ ಬಿರ್‌ದ್, ಉ.ಕೊಡಗರ ಏಳಾಯಿರ ಸೀಮೆ, ಮೈಸೂರ್ ಅರಕಲಗೂಡ್ ತಾಲೂಕ್‌ನ ಇನಾಂ ರೂಪತ್ ಕೊಡ್‌ತಿತ್ ತಾಂಡ ಮಾಂಡಲಿಕ ಆಯಿತ್ ಮಾಡಿಯಂಡತ್. ಮಣಿಜಂಗ್ ಕ್ಷತ್ರಿಯ ಶಿಖಾಮಣಿ ಕೊಂಗಾಳ್ಳ ಎಣ್ಣುವ ಬಿರ್‌ದ್‌ನೊ ಪಿಳ್ಳಾ ಕೊಡಗರ ಮಾಲಂಬಿ ಸೀಮೆನೊ ಕೊಡ್‌ತಾನ ಎಲ್ಲಿತುಳ್ಳ ಶಿಲಾಶಾಸನ ನಿಡ್ತ ಹೋಬಳಿ ಮಾಲಂಬಿ ಊರ್‌ರ ಪಳೇಯ ನಿವೇಶನತ್‌ರ

ಪಕ್ಕತ್ ಉಂಡ್. ಆ ಶಾಸನ ಇನ್ನನೆ ಉಂಡ್.

ಸ್ವಸ್ತಿ ಸೂರ್ಯಾನ್ವಯ ಸುರತರುಸ್ತಂಭಾಯಮಾನ ಚೋಳಕುಲ ಗಘನಗಭಸ್ತಿ ಮಾಳಿ ಸಕಳ ಜನ ದುರಿತ ಹರಣ ನಿಪುಣ ಕವೇರಕನ್ಯಾಕಾಸಖೀಯಮಾನ ಚೋಳಮಹಾ ಮಹೀಪತಿ ಶ್ರೀ ರಾಜಕೇಸರಿ ವರ್ಮ ಪೆರ್ಮ ನಡಿಗಳ್ಳಿನಿಜಂಗಿ ಪನಸೋಗೆಯ ಕಾಳೆಗದಲೊಡ್ಡಿ ಕೆಯ್ಲಂ ನೆರಿದಿಕ್ಕು ಬರೆನೆನ್ನು ಆತನ ನಡಹಿದಸ್ಸತ್ತ ರೆನ್ನು ಪಿರಿದುಂಕಾರು|ಣ್ಣದಿನ್ದ ಪಟ್ಟವ ಕಟ್ಟಿ ನಾಡ ಕುಡುಗನ್ನು ಪಂಚಪನ್| ಮಾರಾಯಗ್ಗಟ್ಟಲಾತಂ ಕ್ಷತ್ರಿಯ ಸಿಖಾಮಣಿ| ಕೊಂಗಾಳ್ಳನೆನ್ನು ಪಟ್ಟವ ಕಟ್ಟಿ ಮಾಲವ್ವಿಯ ನಿತ್ತರಿ|ದಕ್ಕೆ ಗಾವುಣ್ಣ ರಾಚಮ್ಮನ ವಂಶಮೆ ಸಾಕ್ಷಿ ಕಣವಂಗಲ|ದ ಆದಿತ್ಯ ಗಾಮುಣ್ಣನುಂಗಳನಿಯ ನನ್ನಿಯ ಮೇರುವುಂ| ಕಳನೆ...ಚ ಗಾವುಣ್ಣನುಂ ನಲ್ಲೂರೆಯಂಗ ಗಾವುಣ್ಣ|... ಳ್ಳುನ್ನ್ಯಾಡೆ ಕಲ್ಲಾಡೊ ಪೊರಗೆನ್ನು ನುಡಿಯಲ್ಯಾ....(ಅಕ್ಷರ ತಿಕ್ಕಿ ಪೋಯಿತ್)

ಕೊಡಗ್ಗನ ಎರ ಕಾಲ ಆಳನವು ಚೆಂಗಾಳ್ಳ ರಾಜಂಗ. ಇವು 10-17ನೆ ಶತಮಾನಕೆತ್ತನೆ ಮೈಸೂರ್ ಪಶ್ಚಿಮ ಭಾಗ ಪಿಳ್ಳಾ ಕೊಡಗ್ಗನ ಆಳಚಿ. ಇಕ್ಕತ ಹುಣಸೂರ್ ಪಿಳ್ಳಾ ಪಿರಿಯಾಪಟ್ಟಿ ತಾಲೂಕ್ ಅಯಿಂಗಡ ಮುಖ್ಯ ರಾಜ್ಯ ಆಯಿತಿಂಜತ್. ಅಕ್ಕ ಈ ಜಾಗಕ್ 'ಚಂಗನಾಡ್' ಎಣ್ಣುವ ಪೆದ ಇಂಜತ್. ರಾಜಂಗ ತಂಗ ಚಂದ್ರವಂಶಕಾರ, ಯಾದವಂಗಾಂದೂ ಎಣ್ಣಿಯವ ಇಂಜತ್.

ಇಯಂಗಡ ಮೂಲ ಪುರುಷಂಡ ಪೆದ ಚೆಂಗಾಳ್ಳಂದ್ ಇಂಜಾನುಂಡ್ ಆ ವಂಶಕ್ ಚೆಂಗಾಳ್ಳ ಎಣ್ಣುವ ಪೆದ ಬಾತ್. ಇಯಂಗಡ ರಾಜಧಾನಿ ದ್ವಾರಾವತಿ. ಈ ಜಾಗ ಹೊಯ್ಸಳಂಗಡ ದ್ವಾರ ಸಮುದ್ರಂದ್ ಎಣ್ಣಿಯವ ಕಯ್ಲೆ. ಚೆಂಗಾಳ್ಳಂಗ ತಂಗಳ ಮಹಾ ಮಾಂಡಲೀಕ, ಮಂಡಲೇಶ್ವರ, ಮಹಾಮಂಡಲೇಶ್ವರ ಎಣ್ಣುವ ಪೆದತ್ ಕಾಕಿಯಂಡ್ ಇಂಜತ್. ಆನಗುಂಡ್ ಇವು ಸ್ವತಂತ್ರ ರಾಜಂಗಳಾಕತೆ ಅಧಿರಾಜಂಗಡ ಮುಖ್ಯ ಮಾಂಡಲಿಕಗಳಾಯಿತ್ ಇಂಜತ್ಂದ್ ಅಯಿಂಗಳೆ ಒಪ್ಪಿಯಂಡಪೋಲೆ ಕಂಡ್‌ಬಪ್ಪ, ಚೆಂಗಾಳ್ಳಂಗ ಸುಮಾರ್ 13ನೆ ಶತಮಾನಕೆತ್ತನೆ ಜೈನಂಗಳಾಯಿತ್ ಇಂಜತ್. ಈ ರಾಜಂಗಡ ಶಿಲಾ ಶಾಸನ ಕೊಡಗ್, ಇಕ್ಕತ ಹುಣಸೂರ್ ತಾಲೂಕ್‌ರ ಯಡತೋರೆ / ಕೃಷ್ಣರಾಜನಗರತ್ ಕಂಡ್ ಬಂದಾನುಂಡ್ ಅಯಿಂಗಡ ಆಳ್ವಿಕೆ ಈ ಜಾಗತ್‌ಲೆಲ್ಲ ಇಂಜದ್ ಗೊತ್ತ್‌ಕೊಟ್ಟುವ. ಇಯಂಗಡ ಕಾಲತ್ ಹೊತ್ತಗೆ ಗೆಚ್ಚ ಮರತ್‌ರ ಜೈನಗುರುವ ಹುಣಸೂರ್ ತಾಲೂಕ್‌ರ ಹನಸೋಗೆ ಪಿಳ್ಳಾ ತಲಕಾವೇರಿರ ಜೈನ ಬಸದಿಯಡ ಮೀದ ಸರ್ವಾಧಿಕಾರ ಸ್ಥಾಪನೆ ಮಾಡಿತಿಂಜದ್ ಗೊತ್ತ್‌ಕೊಟ್ಟುವ. ಈ ಜಾಗತ್ ಇಕ್ಕ ಪಾಳ ಬುದ್ಧಿಶುಳ್ಳ ಜೈನ ಬಸದಿ ಗಂಗರಸಂಗಡ ಕಾಲತ್ ಕೆಟ್ಟನದ್. ಇದ್‌ನ ಚೆಂಗಾಳ್ಳಂಗ ರಿಪೇರಿ ಮಾಡ್‌ಚಿ.

ಪತ್ತನೆ ಶತಮಾನತರ ಆಖೀರತ್ ನನ್ನಿ ಚೆಂಗಾಳ್ವ ಎಣ್ಣುವ ರಾಜ ಇಂಜತ್. ನನ್ನಿ ಚೆಂಗಾಳ್ವಂಡ ಪೆದೆ ನಂಗಕ್ ಚರಿತ್ರಲ್ ಆದ್ಯದಾಯಿತ್ ಕಾಟ್ಟುವ ಪೆದೆ. ಗಂಗರಸಂಗಳ ಚೋಳ ರಾಜಂಗ ಚೋಪಾಚಿಟ್ಟತ್. ಪಶ್ಚಿಮತ್ ಕೊಡಗರ ತೆರಿಕ್ ಪಡೆಪೊತ್ತ ಬಂದಿತ್ ಹನಸೋಗಿಲ್ ಚೆಂಗಾಳ್ವಂಗಳ ಎದಾರ್‌ಟ್ಟಲ್ಲಿ, ಚೆಂಗಾಳ್ವಂಗ ಚೋತಿತ್ ಚೋಳ ರಾಜಂಗ ಮಾಂಡಲಿಕಂಗಳಾಚಿ.

ಅಂದಾಂಜ ಸುಮಾರ್ ಓರ್ ಶತಮಾನಕೆತ್ತನೆ ಚೆಂಗಾಳ್ವಂಗ ತಂಗಡ ಪೆದತ್ ಆಖೀರತ್ ರಾಜೇಂದ್ರಚೋಳ, ಕುಲೋತ್ತಂಗ ಚೋಳಂದ್ ಕೂಟಿಯಂಡತ್. ನನ್ನಿ ಚೆಂಗಾಳ್ವಂಗ 11ನೆ ಶತಮಾನತರ ಆದಿಲ್ ಚೋಳ ಮಾಂಡಲಿಕನಾಯಿತಿಂಜತ್. ಚೋಳಂಗ 11ನೆ ಶತಮಾನತ್ ಮೈಸೂರ್ ದ್ವಾರಸಮುದ್ರತರ ಹೊಯ್ಸಳ ರಾಜಂಗಳುಂಡ್ ಚೋತತ್. ಇನ್ನನಾಯಿತ್ ಗಂಗರಸಂಗಳುಂಡ್ ವಶ ಪಡ್‌ತಿಯಂಡ್ ಇಂಜ ಮೈಸೂರರ ದಕ್ಷಿಣ ಭಾಗ ಪಿಳ್ಳಾ ಕಾವೇರಿ ಪೊಳೆರ ಪ್ರದೇಶತನ ಕಳಂದಂಡತ್.

ಚೆಂಗಾಳ್ವ ರಾಜಂಗಡಲ್ಲಿ ಮಾಂಡಲಿಕಂಗಳಾಯಿತ್ ಇಂಜವು ಈ ಪೋಲೆ ಉಂಡ್.

1. ನನ್ನಿ ಚೆಂಗಾಳ್ವ ರಾಜೇಂದ್ರ ಚೋಳ - 1034
2. ---
3. ಮಾದೇವ ಚೆಂಗಾಳ್ವ, ಕುಲೋತ್ತಂಗ ಚೋಳ - 1090
4. ಉದಯಾದಿತ್ಯ ಚೆಂಗಾಳ್ವ ರಾಜೇಂದ್ರ ಚೋಳ - 1097
5. ಅನ್ನದಾನಿ ಚೆಂಗಾಳ್ವ ಕುಲೋತ್ತಂಗ ಚೋಳ - 1106

ಈ ರಾಜಂಗಡ ಕೂಟಲ್ ಮಾದೇವ ಚೆಂಗಾಳ್ವಂಗ್ ಸಮ್ಮಂಧಪಟ್ಟ ಓರ್ ಶಾಸನ ಇಕ್ಕತರ ಸುಂಟಿಕೊಪ್ಪತರ ಪಕ್ಕತ್ ಉಳ್ಳ ಗರಗಂದೂರ್ ಎಣ್ಣುವ ಊರ್‌ಲ್ ಕಾಟ್ಟಿತ್. ಓರ್ ವೀರ ಕಲ್ಲಲ್ ಎಳ್ಳನ ಈ ಶಾಸನತ್ ಸುಮಾರ್ ಅಕ್ಕರ ಎಲ್ಲ ತಿಕ್ಕಿ ಪೋನಾನಗುಂಡ್ ಆ ಎಳ್ಳನ ಓದಾನಕ ಅದ್ ಅರ್ಥ ಆಕತನ್ನತ ಸ್ಥಿತಿಲ್ ಉಂಡ್. ಆನಗುಂಡ್ ಅದ್ ಇಕ್ಕ ಉಳ್ಳನ್ನಕೆ ಇಲ್ಲಿ ಕಾಟಿತ್.

....ಸ್ವಸ್ತಿ ಶ್ರೀ ಮನು ಮಹಾ ಮಣ್ಣಿಳೇಶ್ವರ ತ್ರಿಭುವನ... ಮಲ್ಲವೀರ... ಮತ್ತು... ಚೆಂಗಾ...  
ಮಹಾಮ... ದಿತ್ಯದೇವಗೆ... ಇಲ್ಲ.. ರಪ

ಈ ಶಾಸನತನುಂಡ್ 11ನೆ ಶತಮಾನತ್ ಸುಂಟಿಕೊಪ್ಪ ನಾಡ್ ಚೆಂಗಾಳ್ವಂಗಡ ಆಳ್ವಿಕೆಲ್ ಇಂಜತ್‌ಂದ್ ಗೊತ್ತಾಪ.





## 7. ಹೊಯ್ಸಳ ರಾಜಂಗ ಪಿಳ್ಳಾ ಕೊಂಗಾಳ್ವಂಗ

ಹೊಯ್ಸಳ ರಾಜಂಗದ ಪೆದ ಚರಿತ್ರಲ್ ಆದ್ಯದಾಯಿತ್ 10ನೆ ಶತಮಾನತರ್ ಮದ್ಯತ ಕೇಟ್ ಬಪ್ಪ. ಇವು ಇಕ್ಕತ ಚಿಕ್ಕಮಗಳೂರ್ ಜಿಲ್ಲೆರ ಬಾಬಬುಡನ್ ಗಿರಿಲ್ ಪುಟ್ಟನ ವೇದಾವತಿ ಪೊಳೆರ ಕರಲ್ ನಾಯಕಂಗ ಆಯಿತ್ ಇಂಜತಂದ್ ಗೊತ್ತ್ ಕೊಟ್ಟವ. 11ನೆ ಶತಮಾನತರ್ ಆದಿಲ್ ಎಣ್ಣಕ ಸುಮಾರ್ 1006ನೆ ಇಸವಿಲ್ ಹೊಯ್ಸಳ ರಾಜಂಗ, ಕೊಂಗಾಳ್ವಂಗಳ ಚೋಪ್ಚಿಟ್ಟಿತ್ ಅಲ್ಲಿಂಜ ದಕ್ಷಿಣಕ್ ಪೋಯಿತ್ ತಲಕಾಡಾರ ಕಾವೇರಿ ಪೊಳೆ ಕರಲ್ ಇಂಜ ಚೋಳಸಾಮಂತ ಅಪ್ರಮೇಯಂಡ ಕೂಡ ಪಡೆ ಪೊತ್ತತ್. ಈ ಪಡೆಲ್ ಅಪ್ರಮೇಯ ಚತ್ತಕೊ ಹೊಯ್ಸಳಂಗ ಗೆದ್ದಲೆ. ಕೊಂಗಾಳ್ವಂಗ 1006ಂಡ ನೇರತ್ ಬಲಿಷ್ಠಂಗಲಾಯಿತ್ ಕದಂಬರಾಜ್ಯತನ ತಂಗಡ ಪುಡ್ತತ್ ಬೆಚ್ಚಂಡ್, ಮಿಳ್ಳಾಕ್ ಹೊಯ್ಸಳ ರಾಜ್ಯತರ ಬರಿಯ ಬಂದದ್ ಗೊತ್ತ್ ಕೊಟ್ಟವ. ಎನ್ನಂಗಣ್ಣಕ ಹೊಯ್ಸಳ ರಾಜ್ಯತರ ರಾಜೇಂದ್ರಪುರತ್ ಕೊಟ್ಟನ ಕ್ರಿ.ಶ. 1022ನೆ ಇಸವಿರ ಶಾಸನತ್ ರಾಜೇಂದ್ರಚೋಳ ಪೃಥ್ವಿ ಮಹಾರಾಜ ಕೊಂಗಾಳ್ವ, ಹೊಯ್ಸಳ ನೃಪಕಾಮಂಡ ಕೂಡ ಪಡೆಪೊತ್ತದ್ ಎಳ್ಳಿತ್. ಆಚೇಂಗಿ, ಕ್ರಿ.ಶ. 1026ಲ್ ಅರಕಲಗೂಡಾರ 76ನೆ ಶಾಸನತ್ ಇದೇ ಪೃಥ್ವಿ ಮಹಾರಾಜ ಕೊಂಗಾಳ್ವ, ಹೊಯ್ಸಳ ನೃಪಕಾಮಂಡ ಕೂಡ ಪಡೆಪೊತ್ತಿತ್ ಗೆದ್ದತಂದ್ ಎಳ್ಳಿತ್. ಆಚೇಂಗಿ, ಬಯ್ಯ ಕೊಂಗಾಳ್ವ ಚೋತತಂದ್ ಕಾಂಬ. ಎನ್ನಂಗಣ್ಣಕ ಅಲ್ಲಿಂಜ ಸುಮಾರ್ 30 ಕಾಲಕೆತ್ತನೆ ಕೊಂಗಾಳ್ವಂಗಡ ಪೆದ ಶಾಸನತ್ ಕಂಡ್ ಬಪ್ಪಲೆ. ಈ ನೇರತ್ ಕೊಂಗಾಳ್ವಂಡ ಸೋಲ್ ಕ್ ಹೊಯ್ಸಳ ರಾಜಂಗಕಂಜ ಚಾಲುಕ್ಯ ಚಕ್ರವರ್ತಿ ಅಯೆಚ ದಂಡ ನಾಯಕನೆ ಕಾರಣಾಂದ್ ಕಾಂಬ.

ಚಾಲುಕ್ಯ ಚಕ್ರವರ್ತಿ ವಿಕ್ರಮಾದಿತ್ಯ ಸುಮಾರ್ 1024ನೆ ಇಸವಿಲ್ ದಕ್ಷಿಣತ್ ತಾಂಡ ಪ್ರಭಾವತನ ಜಾಸ್ತಿ ಮಾಡಿಯವಕ್ ಮಲ್ಲಿದೇವ ಎಣ್ಣುವ ದಂಡ ನಾಯಕನ ಅಯೆಪ. ಮಲ್ಲಿದೇವ ಆ ನೇರತ್ ಚಿಂಗಾಳ್ವ, ಕೊಂಗಾಳ್ವ ಪಿಳ್ಳಾ ಚೋಳರಾಜಂಗಲುಂಡ್ ಕಪ್ಪಕಾಣಿಕೆನ ಪಡ್ಂದಂಡ್, ಹೊಯ್ಸಳಂಗಡ ಮೀದ ಗೆದ್ದತಂದ್ ಗೊತ್ತಾಪ.

ಮಲ್ಲಿದೇವಂಡ ಈ ಗೆಲುರ ಆಯಿತ್ ನುಪ್ಪದ್ ಕಾಲಕೆತ್ತನೆ ಕೊಂಗಾಳ್ವ ರಾಜಂಗಡ ಪೆದ ಕೇಟ್ ಬಪ್ಪಲೆ. ಕ್ರಿ.ಶ. 1058ಲ್ ಆಳನ 2ನೆ ರಾಜೇಂದ್ರ ಚೋಳ ಪಿಳ್ಳಾ ಅವಂಡ ಅಪ್ಪ ನಿಡ್ತ ಹೋಬಳಿಲ್ ಕೆಟ್ಟನ ಬಸದಿಲ್ ಹಾರುವನ ಹಳ್ಳಿ, ಅರಕನ ಹಳ್ಳಿ ಪಿಳ್ಳಾ ನಿಡ್ತ ಊರ್ಲ್ ಬೊಳೆ ಬೊಳೆತುವ ಜಾಗ ಪಿಳ್ಳಾ ಗಾಣೆದಣ್ಣೆನ ದಾನ ಆಯಿತ್ ಕೊಡ್ತತಂದೂ, ಆ ದಾನತನ ಅವಂಡ ಪೊಣ್ಣ್ ಪಿಳ್ಳಾ ಮೋಂವ ರಾಜಾಧಿರಾಜ ಕೊಂಗಾಳ್ವಂಡ ಅವ್ವ ಪೋಚಬ್ಬರಸಿ ಬಸದಿಕಾಯಿತ್ ತಾಂಡ ಗುರು ಗುಣಸೇನ ಪಂಡಿತ

ದೇವಂಗ್ ಕೊಡ್‌ಪ್‌ಚಿಟ್ಟತ್‌ಂದೂ ಕೊಡಗುರ ನಿಡ್ತ ಹೋಬಳಿರ ಮುಳ್ಳೂರ್ ಬಸದಿರ ದಕ್ಷಿಣತ್‌ರ ಶಿಲಾ ಶಾಸನತ್ ಉಂಡ್.

ಎದಿಕೆ

ಧರ್ಮಸೆಟ್ಟಿ ಬರೆದಂ

ಸ್ವಸ್ತಿ ಶಕವರ್ಷ 980|ತ್ತನೆಯ ವಿಳಂಬಿ ಸಂ|ವತ್ಸರದ ಉತ್ತರಾಯಣ ಸಂಕ್ರಾಂತಿಯಂದು ಶ್ರೀ ರಾಜೇಂದ್ರ ಕೊಂಗಾಳ್ತಂ ತಂಮಯ್ಯ ಮಾಡಿಸಿದ ಬಸದಿಗೆ ಕೊಟ್ಟ ಹಾರುವನ|ಹಳ್ಳಿ ಅರಕಿನ ಹಳ್ಳಿ

ಒಂದನೆ ಬರಿ

ಕಾಚ್ಚೊಂಡ ಹಳ್ಳಿ ಹಂಗಲ ಬವಾನಿ ಖಣ್ಣು|ಗಂ 10 ಹುಣಿಸಿದಾರು ಖಣ್ಣು| ಗಂ 10| ಗಣಪತಿ ಗೊಡಲು ಖಣ್ಣು| ಗಂ 3 ಅಸಗಿಪೊಳೆ ಖಣ್ಣು|ಗಂ 4

ದಂಡನೆ ಬರಿ

ನಿಡುತದ| ಗೊಡಲ ಖಣ್ಣು|ಗಂ 3ಕೆ ಸಿಕುನಿಯು| ಒಳಗೆರೆಯಂ ಖಣ್ಣು|ಗಂ 3 ಹೆನ್ನೆ|ಲ್ಲೂರ ಭೂ|ಮಿಖಣ್ಣು|ಗಂ 10 ಒಂದು ಗಾಣದೆಣ್ಣೆ|

ಬೆಂಬರಿ

ಶ್ರೀ ರಾಜಾಧಿರಾಜ ಕೊಂಗಾಳ್ತ|ನಬ್ಬೆ ಪೋಚಬ್ಬರಸಿ| ಯರ್ತ್ತಮ್ಮ ಗುರುಗಳು| ದ್ರವಿಳ ಗಣದ ನಂದಿ ಸಂಘದರುಂಗಳಾನ್ತ| ಯದ ಗುಣಸೇನೆ| ಪಣ್ಣಿತ ದೇವಗ್ಗೆ ಮಾಡಿಸಿ ಧಾರಾ ಪೂರ್ವಕಂ| ಕೊಟ್ಟರು|| ಸ್ವದತ್ತಂ ಪರ ದತ್ತಂ ವಾಯೋಹರೇತಿ|ವಸುನ್ದರಾಂ ಪಷ್ಕಿರ್ವರ್ಷ ಸಹಸ್ರಾಣಿ ವಿಷ್ಣು|ಯಾಂ ಜಾಯತೇ ಕ್ರಿಮಿಃ||

ರಾಜೇಂದ್ರ ಕೊಂಗಾಳ್ತಂಡ ಕಾಲ ಕೈಂಜದು ಅದಾತಾರಾದಿತ್ಯ ಎಣ್ಣುವ ರಾಜ ಆಳ್‌ನನ್ನಕೆ ಕಾಂಬ. ಇಂವ ಕ್ರಿ.ಶ. 1066ತ್‌ಂಜ 1100ಕೆತ್ತನೆ ಆಳ್‌ಚಿಂದೂ ಬಲ್ಯ ತಾಕತ್ತರ ರಾಜ ಆಯಿತಿಂಜತ್ ಎಣ್ಣುವ. ಇಂವಂಗ್ ತ್ರಿಭುವನ ಮಲ್ಲ ಕೊಂಗಾಳ್ತ ತ್ರಿಭುವನಮಲ್ಲ, ಚೋಳ ಕೊಂಗಾಳ್ತ ಪಿಳ್ಳಾ ರಾಜೇಂದ್ರ ಪೃಥ್ವಿ ಕೊಂಗಾಳ್ತ ಎಣ್ಣುವ ಬಿರ್‌ದ್ ಇಂಜದ್ ಗೊತ್ತ ಕಟ್ಟುವ. ಕೊಂಗಾಳ್ತಂಗ ಕ್ರಿ.ಶ. 11ನೆ ಶತಮಾನತ್ ಚೋಳಂಗಡ ಮಾಂಡಲಿಕಂಗ ಆಯಿತಿಂಜತ್. ಇಂವ ಕ್ರಿ.ಶ. 1070ತ್ ನಿಡ್ತ ಹೋಬಳಿರ ಹೊಸಹಳ್ಳಿಲ್ ವೀರಸಿದ್ಧೇಶ್ವರಂಡ ತಿರಿಕೆರ ಅರ್ಚಕಂಡ ಬದ್‌ಕುಕ್ ಸುಳ್‌ಗೋಡುರ ಗೌಡತಿ ಕೆರೆರ ಕೇದತ ಬೇಲಾನ ದಾನ ಆಯಿತ್ ಕೊಡ್‌ತನ್ನಕೆಯೂ ಪಿಳ್ಳಾ ರಾಜ ಮಲ್ಲಭ

ಶೆಟ್ಟಿ ಎಣ್ಣುವಂವ ಆ ಕೆರೆ ಕೆಲಸಕ್ 40 ಗದ್ಯಾಣತ್‌ರ ಪೊನ್ನಾರ ಪೊನ್‌ನ, ಒಂದರೆ ಪಾದಿ ಗದ್ಯಾಣತ್‌ನ ಕೊಡ್‌ತನ್ನಕೆಯೂ ಎಳ್ಳೊನ ಶಾಸನ ಹೊಸಹಳ್ಳಿರ ಪಣಿಯಾಲ ಕಟ್ಟೆರ ಪಕ್ಕ ನೆಟ್ಟಿತುಂಡ್. ಈ ಶಾಸನತ್ ಈ ದಾನತ್‌ನ ಪಾಳ್ ಮಾಡ್‌ನಂವ ಇಲ್ಲೇಂಗಿ ತಪ್ಪಿಚಿಟ್ಟಿಂವ, ಪಯ್ಕೆತ್ತಳ ಕೊಂದ ಪಾಪಿರನ್ನಕೆ ಆಪಾಂದೂ, ಅರುವದ್ ಆಯಿರ ಕಾಲ ಹೇಸಿಗಲ್ ಕ್ರಿಮಿ ಆಯಿತೆ ಪುಟ್ಟುಪಾಂದೂ ಎಳ್ಳಿತುಂಡ್.

ಸ್ವಸ್ತಿ ಶಕವರ್ಷ 993ನೆಯ ಸಾಧಾರಣ ಸಂವತ್ಸರದ ಚೈತ್ರ ಮಾಸದ ಅಮಾವಾಸೆಯಂದು ಶ್ರೀ ಮದ್ರಾಚೇ|ನ್ನಪ್ಪತುದಿ ಕೊಂಗಾಳ್ವಂ ಸುಳ್ಳಿಗೋಡಿನ| ಗೌರತಿಯ ಕೆರೆಯ ಕೆಳಗಣಮ|ಕ್ಕೆ ಮೂಡಣ ಹಡುವಣಗೋಡ| ಬಾಳಗಾಗಿ ಅಯ್ಯತ್ತು ಖಣ್ಣುಗ| ಬಿಡಭೂಮಿಯಂ ಹೊಷವಳ್ಳಿ ವೀ|ರಸಿದ್ದೇಶ್ವರ ದೇವರ್ಗ್ಗಂ ಅರ್ಚ್ಚನಾ|ಭೋಗಕ್ಕಂ ಧಾರಾಪೂರ್ವಕಂ ಬಿಟ್ಟಂ| ರಾಜವಲ್ಲಭಸೆಟ್ಟಿ ಕೆರೆಗೆ ಕೊಟ್ಟ ಗ|ದ್ಯಾಣಂ 40 ಅಡವಲಂ ಗದ್ಯಾ|ಣಂ ತಪ್ಪಿದಂ ಕವಿಲೆಯನಳಿದಂಸ್ವದ|ತ್ತಂ ಪರದತ್ತಂ ನಾ ಯೋಹರೇತ ವಸುಂಧರಾಂ| ಷಷ್ಟಿವರ್ಷ ಸಹಸ್ರಾಣಿ ವಿಷ್ಣಾಯಾಂ ಜಾಯತೇ ಕ್ರಿಮಿಃ || [ಎ.ಕ.ಪು 34]

ಈ ನೇರತ್ ಕೊಂಗಾಳ್ವಂಗ ಲಿಂಗಾಯತ ಮತತ್‌ನ ಅವಲಂಬನೆ ಮಾಡ್‌ನನ್ನಕೆ ಕಾಂಬ. ಚಿಂಗಾಳ್ವಂಗ 12ನೆ ಶತಮಾನ ಕೈಂಜದು ಲಿಂಗಾಯತಂಗಳಾನದ್ ಚರಿತ್ರೆಲ್ ಉಲ್ಲೇಖ ಆಯಿತ್.

ಶಕವರ್ಷ 999ನೆ ಪಿಂಗಳ ಸಂವತ್ಸರ ಎಣ್ಣಕ ಕ್ರಿ.ಶ. 1077ತ್ ರಾಜೇಂದ್ರ ಪೃಥ್ವಿ ಕೊಂಗಾಳ್ವಂಡ ಮಾರಾಣಿ ಪದ್ಮಲಾದೇವಿ ಚತ್ವಪೋನಾನ ಎಳ್ಳೊಚಿಟ್ಟಿ ಕಲ್ಲ್ ಮುಳ್ಳೂರ್ ಉರಾರ ಕೆರೆ ಏರಿರ ಮೆಪ್ಪುಣಿಲ್ ಉಂಡ್.

ರಾಜೇಂದ್ರ ಪೃಥ್ವಿ ಕೊಂಗಾಳ್ವ ಎಣ್ಣುವ ಪೆದತ್‌ನ ಅದಾತಾರಾದಿತ್ಯ ಬೆಚ್ಚೆಂಡ್ ಪಶ್ಚಿಮ ಚಾಲುಕ್ಯ ಚಕ್ರವರ್ತಿ 2ನೆ ವಿಕ್ರಮಾದಿತ್ಯನುಂಡ್ ಚೋತಿತ್ ಕಪ್ಪ ಕಾಣಿಕೆ ಕೊಡ್‌ಪ ನೇರ ಬಂದೆತ್ತನಲ್ಲಿ ಕ್ರಿ.ಶ. ಸುಮಾರ್ 1089ತ್, 2ನೆ ವಿಕ್ರಮಾದಿತ್ಯ ದಕ್ಷಿಣಕ್ ಸೈನ್ಯತೋಡೆ ಬಂದಿತ್ ಚಿಂಗಾಳ್ವಂಗ, ಕೊಂಗಾಳ್ವಂಗ, ಮಲೆಯಾಳತ್‌ರ ಚೇರಂಗ, ಸಿಂಗಲೀಕ ರಾಜಂಗಳೊ ಚೋಪ್‌ಚಿಟ್ಟಿತ್. ಸಿಂಗಲೀಕ ರಾಜ ಎಲ್ಲಿ ಆಳಿಯುಂಡ್ ಇಂಜತ್‌ಂದ್ ಗೊತ್ತಿಲ್ಲೆ. ವಿಕ್ರಮಾದಿತ್ಯ ಈ ದಂಡಯಾತ್ರೆಲ್ ಹೊಯ್ಸಳ ರಾಜ ವಿನಯಾದಿತ್ಯ ಅಂವಂಗ್ ಸಹಾಯ ಮಾಡ್‌ಚಿಂದ್ ಕಾಂಬ. ಈ ನೇರತ್ ಸುಮಾರ್ ನೂರ್ ಕಾಲಕೆತ್ತನೆ ಹೊಯ್ಸಳಂಗ ಪೆದಕಾಯಿತ್ ಚಾಲುಕ್ಯಂಗಡ ಅಧಿರಾಜತ್ವತ್‌ನ ಒತ್ತಂಡಿತಿಂಜತ್.

ಹೊಯ್ಸಳರಾಜ ವಿನಯಾದಿತ್ಯಂಡ ಕಾಲ ಕೈಂಜದು ಒಂದನೆ ಬಲ್ಲಾಳ್, ಅಲ್ಲಿಂಜ

ವಿಷ್ಣುವರ್ಧನ ರಾಜ್ಯ ಆಳಾಚಿ. ವಿಷ್ಣುವರ್ಧನ ಭಾರಿ ಬಲ್ಯ ಶೂರ. ಸಿಂಹಾಸನಕ್ಕೆ ಬಂದಪಿಳ್ಳಾ ತಾಂಡ ದಂಡನಾಯಕ ಪುನೀಶನ ಕೂಟಿಯಂಡ್ ಎಚ್ಚಕೊ ರಾಜ್ಯತ್‌ರ ರಾಜಂಗಳ ಚೋಪ್‌ಚಿಟ್ಟತ್. ಕ್ರಿ.ಶ. 1115 /1116ತ್ ಕೊಂಗಾಳ್ವ ರಾಜಕುಮಾರಿ ಚಂದಲಾ ದೇವಿನ ವಿಷ್ಣುವರ್ಧನ್ ಮಂಗಲಾಪ. ಈನಗುಂಡ್ ಕೊಂಗಾಳ್ವ ರಾಜಂಗ ಪಡೆಲ್ ಚೋತಿತ್ ಅಕ್ಕ ರಾಜಮನೆತನತ್ ವಾಡಿಕೆ ಇಂಜನ್ನೆ ತಾಂಡ ಮೋವಳ ಹೊಯ್ಸಳ ರಾಜಂಗ್ ಕೊಡ್‌ತಿತ್ ಮಂಗಲ ಕೈಚಿಕೊಡ್‌ತಿತ್ ಒಪ್ಪಂದ ಮಾಡಿಯಂಡನ್ನೆ ಕಾಂಬ.

ಈ ನೇರತ್ ವಿಷ್ಣುವರ್ಧನ ದಕ್ಷಿಣಕ್ ಸೈನ್ಯ ಎಡ್‌ತಂಡ್ ಪೋನಂವ ತಲಕಾಡಲ್ ಇಂಜ ಚೋಳ ಅಧಿಕಾರಿಯಳ ಅಲ್ಲಿಂಜ ಓಡ್‌ಚಿಡುವ. ಅಂದ್‌ಂಜ ಪಂಡ್ ಗಂಗ ವಂಶತ್‌ರ ರಾಜಂಗಳುಂಡ್ ಚೋಳಂಗ ಗೆದ್ದಿತಿಂಜ ಕನ್ನಡ ಸೀಮೆ ಎಲ್ಲ ಹೊಯ್ಸಳಂಗಡ ಪುಡ್‌ತಕ್ ಬಾತ್. ಹೊಯ್ಸಳಂಗ ಆ ನೇರತ್ ಕೊಂಗಾಳ್ವ, ಚಿಂಗಾಳ್ವಂಗಳ ತಂಗಡ ಸಾಮಂತಂಗಾಂದ್ ಅರ್‌ಂಜಂಡಕೊ, ಇದ್‌ಂಗ್ ಒತ್ತವತ ಕೊಂಗಾಳ್ವ ಪಿಳ್ಳಾ ಚಿಂಗಾಳ್ವಂಗ ಹೊಯ್ಸಳಂಗಡ ಕೂಡೆ ಪಡೆಪೊತ್ತಿತ್ ಆಖೀರಕ್ ಚೋತಿತ್ ಅಯಿಂಗಡ ಅಧಿಕಾರತ್‌ನ ಒತ್ತಂಡನ್ನೆ ಕಾಂಬ.

ಕ್ರಿ.ಶ.1171ತ್ ಹೊಯ್ಸಳ ರಾಜ ತಂಗಡ ಮೀದ ತಿರಿತ್ ಬುದ್ಧ ನೈಋತ್ಯ ದಿಕ್ಕರ ರಾಜಂಗಡ ಮೀದ ಧಾಳಿ ನಡತ್‌ಚೀಂದೂ, ಅಕ್ಕ ಕೊಂಗಾಳ್ವಂಗಡ ರಾಜ್ಯತ್ ಇಂಜ ಮೊಳತೆರ ಬೀಡು ಎಣ್ಣುವ ಊರ್‌ನ ಮುತ್ತಿಗೆ ಇಟ್ಟತ್‌ಂದ್ ತೋಂದುವ. ಈ ಬಾಗ ಕೊಡಗಲ್ ಇಂಜತೊ, ಹಾಸನತ್ ಇಂಜತೊ ಗೊತ್ತಿಲ್ಲೆ.

ಕೊಂಗಾಳ್ವ ರಾಜಂಡ ಕಾಲತ್ ನಂಗಕ್ ಗೊತ್ತುಳ್ಳ ಆಖೀರಿ ರಾಜಂಡ ಪೆದ ವೀರ ಚೋಳ ಕೊಂಗಾಳ್ವ. ಇಂವ ಸುಮಾರ್ 1171ತ್‌ಂಜ ಕೊಂಗಾಳ್ವ ರಾಜ್ಯತ್‌ನ ಆಳನ್ನೆ ಕಾಂಬ. ಅನ್ನನೆ ಇಂವ ಓರ್ ಮಾಂಡಲಿಕ ಆಯಿತಿಂಜತ್‌ಂದ್ ಶಾಸನತ್‌ನುಂಡ್ ಗೊತ್ತಾಪ.

ಸ್ವಸ್ತಿ ಶ್ರೀ ಮನ್ನಹಾಮಮ್ಗಳೇಸ್ವರಂ ವೀರ ಚೋಳ ಕೊಂಗಾಳುವ ದೇವಪ್ರಿಥವೀ ರಾಜ್ಯಂಗೈಯುತ್ತಿರೆ ತಾಯಿ ಪದುಮಲ ದೇವಿ ಸೋಮಲ ದೇವಿ ತೋಳೂರದುದ್ವರಸ, ಬಲ್ಲೆಯದಣ್ಣನಾಯಕ ಹಡಿಯಿರಕಿರಿಕಣಯಿಂತ್ತಿನಿಬರು ಮುಂತಾಗಿದ್ದು ಮನುಮತ ಸಂವಭರದ ಕುಂಭ ಮಾಸ ಆದಿವಾರದಸಮಿಯಂದು ಮುಳ್ಳು ನಾಡೆಪ್ಪತ್ತಕ್ಕಂ ಅಣ್ಣತ್ತಮ್ಮನ ಮಕ್ಕಳ ಮಕ್ಕಳಿಗೆತ್ತೆಯ್ತೊ ಸಲುವುದು ಸುಂಕದ ಬೆಡುಂಗೊಳು| ನಲ್ಲೆತ್ತು ಪರಿಹಾರ ಹೆಗ್ಗಡೆಗದ್ದಾನ ಗನಹೂರಲು ಒಂದು ಹಳ್ಳಿಗೆ ಹಣವೈದು ಕಾಣಿಕೆ ಗದ್ದಾನ| ಗನಹೂರಲೊಂದು ಹಳ್ಳಿಗೆ ಹಣವೈದು| ಅರತೆರೆ ಹಂದಲ ಹಣ ಪರಿಹಾರ ಗಂಗ| ಸಿದ್ಧಾಯ

ಹೊರಗಾಗಿ ಆಯದಾ ಆ ಬಿಟ್ಟು ಬೆಸ ಹಡುವಗೇರಿಗೆ ಪರಿಹಾರವಂ ಬಿಟ್ಟು| ವೀರ ಚೋಳ ಕೊಂಗಾಳ್ಳು ದೇವ ಕೊಟ್ಟುದಂ ತಪ್ಪ ನು|ಡಿದವ ಗಂಗೆಯ ತಡಿಯ ಕವಿಲೆಯಂ| ಬ್ರಾಮ್ಮಣನಂ ಕೊಂದ|| ಬ್ರಹ್ಮಾತಿಯಂ ಎ|ಪ್ಪತ್ತರೊಳಗೆ ಮನೆಗೈಗುಳ ಭತ್ತಸಲುವುದು| ಗಂಗೋಜಂಗೆ ಬೂಚಣಂಗೆ||

ಈ ಶಾಸನತನುಂಡ್ ವೀರ ಚೋಳ ಕೊಂಗಾಳ್ಳು ಹೊಯ್ಸಳ ರಾಜಂಡ ಅಧಿರಾಜತ್ವ ಒತ್ತಂಡನ್ನಕೆ ಕಂಡ್‌ಬಪ್ಪ. ಇದತ್ ಎಣ್ಣಾನನ್ನಕೆ ಪದ್ಮಲಾದೇವಿ ಕ್ರಿ.ಶ. 1172ಂಜ 1219ಂಗೆತ್ತನೆ ಆಳನ ಇಮ್ಮಡಿ ವೀರಬಲ್ಲಾಳಂಡ ಪೊಣ್ಣ್. ಇವಡ ಮೋಂವನೆ ಮಿಳ್ಳಾಕ್ ರಾಜ ಇಮ್ಮಡಿ ನರಸಿಂಹ. ಸೋಮಲಾದೇವಿ, ಪದ್ಮಲಾದೇವಿರ ಮೋವ. ಬೇಲೂರ್‌ರ 86ನೆ ಶಾಸನತ್ ಕೊಂಗಾಳ್ಳಂಗ, ಚೆಂಗಾಳ್ಳಂಗ, ವೀರಬಲ್ಲಾಳ ಯುವರಾಜ ಆಯಿತಿಂಜ ನೇರತ್ ದಕ್ಷಿಣತ್ ವಿಜಯಯಾತ್ರನ ಮಾಡ್‌ನಲ್ಲಿ ಅಂವಂಗೆ ಕಪ್ಪಕಾಣಿಕೆನೆ ಕೊಡ್‌ತ ಉಲ್ಲೇಖ ಮಾಡಿತ್. ಆಚೇಂಗಿ, ಈ ಕಾಲ ಕೈಂಜದು ಕೊಂಗಾಳ್ಳಂಗಡ ಆಳ್ವಿಕೆ ಏರ ಕಾಲ ಇಂಜನ್ನಕೆ ಕಾಂಬುಲೆ. ಎನ್ನಂಗೆಣ್ಣಕ ಕ್ರಿ.ಶ. 1296ತ್ ಮುಳ್ಳೂರ್ ನಾಡ್ ಚೆಂಗಾಳ್ಳಂಗಡ ಪುಡ್‌ತತ್ ಇಂಜದ್ ಶಾಸನತನುಂಡ್ ಗೊತ್ತಾಪ.

## 8. ಹೊಯ್ಸಳಂಗ ಪಿಳ್ಳಾ ಚೆಂಗಾಳ್ಳಂಗ

ಚೆಂಗಾಳ್ಳಂಗ ಹೊಯ್ಸಳಂಗಡ ಅಧಿರಾಜತ್ವತನ ಒತ್ತಂಡ್ ಇಂಜತ್‌ಂದ್ ಎಣ್ಣುವಾಂಗೆ ಚೆನ್ನರಾಯಪಟ್ಟತರ 199ನೆ ಶಾಸನತ್ ಆಧಾರ ಉಂಡ್. ಈ ಶಾಸನತ್ ಕ್ರಿ.ಶ. 1139ತ್ ಚೆಂಗಾಳ್ಳ ಪುರಾಣಿಕ ಓರ್ ದಾನ ಶಾಸನತನ ಸಿಂಧು ಮಾಡಿಯವಕಾಯಿತ್ ಹೊಯ್ಸಳ ರಾಜಂಗ್ ಬೋಡಿಕೆರ ಕಾಗದತನ ಎಳ್ಳಂಡಿಯಾಚೇಂದ್ ಎಣ್ಣಿತ್. ಚೆಂಗಾಳ್ಳಂಗ, ಹೊಯ್ಸಳಂಗಡ ಮಾಂಡಲಿಕಂಗಳಾಯಿತ್ ಇಂಜಕೊ ಅವು ಗಡಿ ಗಡಿ ಹೊಯ್ಸಳಂಗಡ ಕೂಡೆ ಪಡೆ ಪೊತ್ತಂಡ್ ಇಂಜನ್ನಕೆ ಗೊತ್ತ್ ಕೊಟ್ಟವ.

ಕ್ರಿ.ಶ.1145ತ್ ವಿಷ್ಣುವರ್ಧನಂಡ ಮೋಂವ 1ನೆ ನರಸಿಂಹ, ಚೆಂಗಾಳ್ಳ ರಾಜನೆ ಕೊಂದಿತ್ ಅಂವಂಡ ಆನೆ, ಕುದರೆ, ಪೊನ್ನ ಪಿಳ್ಳಾ ಮಾಲ್‌ಮಟತನ ವಶ ಪಡ್‌ತಿಯಂಡತ್‌ಂದ್ ನಾಗಮಂಗಲತರ 26ನೆ ಶಾಸನತ್ ಎಳ್ಳಿತ್. ಅನ್ನನೆ ಕ್ರಿ.ಶ. 1155ತ್ ನರಸಿಂಹಂಡ ಸೈನ್ಯಾಧಿಕಾರಿ ಚೋಕಿಮಯ್ಯ ಚೆಂಗಾಳ್ಳನ ಚೋಪ್‌ಚೆಟ್ಟಿತ್ ಅಂವಂಡ ರಾಜ್ಯತನ ತಾಂಡ ಅಧೀನಕ್ ಕೊಂಡಬಾತ್‌ಂದ್ ಹಾಸನತರ 69ನೆ ಶಾಸನತ್

ಎಳ್ಳಿತುಂಡ್.

ಕ್ರಿ.ಶ. 1169ಂಡ ಓರ್ ಶಾಸನತ್ ನರಸಿಂಹ ರಾಜಂಡ ಸಾಮಂತ ಆಯಿತಿಂಜ ಹುಲಿಯೇರಿ ನಾಯಕ, ಹೊಯ್ಸಳ ವಿಷ್ಣುವರ್ಧನಂಡ ತಮ್ಮಣ ಗೋವಿದೇವ, ಚೆಂಗಾಳ್ವಂಡ ಕೂಡ ಪಡೆ ಪೊತ್ತಂಡಿಪ್ಪಕ ಅಳತಿತಿಂಜ ಓರ್ ಆನೆರ ಮೂಡ್‌ಕ್ ಶೂಲ ಕನ್‌ಚಿತ್ ಗಾಯ ಮಾಡ್‌ನ ಗೋವಿ ದೇವಂಡ ಶೌರ್ಯತ್‌ನ ವರ್ಣನೆ ಮಾಡಿತ್. ಕ್ರಿ.ಶ. 1171ತ್ ಚೆಂಗಾಳ್ವ ತಾಂಡ ಭದ್ರತೆಕಾಯಿತ್ ಹುಣಸೂರ್‌ಲ್ ಇಂಜ ತಾಂಡ ರಾಜಧಾನಿನ ಬುಟ್ಟಿತ್ ಕೊಡಗರ ಕ್ಕಗ್ಗಟ್ವನಾಡ್‌ರ ಪಾಲ್ವರಲ್ ಕೋಟೆ ಕೆಟ್ಟಿತ್ ನೆಲೆ ನಿಂದತ್.

ಕ್ರಿ.ಶ. 1171ತ್ ಬಲ್ಲಾಳ ಪಟ್ಟಿಕ್ ಬಾತ್. ಆ ನೇರತ್ ಚೆಂಗಾಳ್ವ ಮಹಾದೇವ ತಾಂಗ ವಿರೋಧ ಆಯಿತ್ ಉಳ್ಳಾನ ಅರ್‌ಂಜ ಬಲ್ಲಾಳ ತಾಂಡ ದಂಡನಾಯಕ ಬೆಟ್ಟರಸ ಪಿಳ್ಳಾ ಸೈನ್ಯತ್‌ನ ಪಾಲ್ವರಕ್ ಆಯೆಪ. ಆ ಪಡೆಲ್ ಬೆಟ್ಟರಸ ಚೆಂಗಾಳ್ವ, ಮಹಾದೇವನ ಕೊಂದಿತ್ ತಾಂಡ ಆಡಳಿತತ್‌ನ ಪಾಲ್ವರಲ್ ಸ್ಥಾಪನೆ ಮಾಡುವ. ಅಕ್ಕ ಪಾಲ್ವರೆ ಓರ್ ಬಲ್ವ ಪಟ್ಟಣ ಆಯಿತಿಂಜತ್‌ಂದ್ ಎಣ್ಣುವ. ಆಚೇಂಗಿ ಕ್ರಿ.ಶ. 1174ತ್ ಮಹಾದೇವಂಡ ಮೋಂವ ಪೆಮ್ಮವೀರಪ್ಪ, ಬಾಡಂಗಡ ನಂದಿದೇವ, ಕುರುಚಿರ ಉದಯಾದಿತ್ಯ ಪಿಳ್ಳಾ ಕೊಡಗರ ಎಲ್ಲಾ ನಾಡ್‌ರ ಜನಳೊ ಕೂಟಿಯಂಡ್ ಬೆಟ್ಟರಸಂಡ ಕೂಡ ಪಡೆಪೊಪ್ಪ. ಬೆಟ್ಟರಸ ಸುರೂಲ್ ಚೋಪನ್ನಕ್ಕೆ ಇಂಜಕೊ ಆಖೀರಕ್ ತಾಂಡ ಸೇನಾನಾಯಕನಾನ ಮಹಾದೇವನಾಯಕಂಡ ಶೌರ್ಯ, ಸಾಸತ್ ಗೆಲು ಪಡ್‌ಂದತ್. ಆಚೇಂಗಿ, ಈ ಪಡೆಲ್ ಮಹಾದೇವನಾಯಕ ಪಿಳ್ಳಾ ಅಂವಂಡ ದಂಡ್ ವೀರ ಮೋನೆಯ ಚತ್ತ್‌ಪೋಪ. ಈ ಪಡೆರ ವಿಚಾರತ್‌ನ ಹುಣಸೂರ್‌ಲ್ ಕ್ಕಟ್ವನ 20ನೆ ಶಾಸನತ್ ಎಳ್ಳಿತ್. 'ಕೊಡಗರು' ಎಣ್ಣುವ ಪೆದ ಆದ್ಯದಾಯಿತ್ ಪುಟ್ಟಿಯೆ ಈ ಶಾಸನತ್.

'ಕೊಡಗರು'ಂದ್ ಓರ್ ಜಾತಿ / ಕೋಮ್‌ರ ಜನಾಂಗತ್‌ರ ಮೀದ ಎಳ್ಳಿತೊ ಗೊತ್ತಾಪುಲೆ. ಶಾಸನತ್ ಬಾಡಂಗಡ ನಂದಿದೇವ ಪಿಳ್ಳಾ ಕುರುಚಿರ ಉದಯಾದಿತ್ಯ ದೇವಂಡ ಪೆದ ಕಾಂಬುಲೆ. ಆಚೇಂಗಿ, ರೈಸ್ ಅವು ಎಳ್ಳೆನ ಕೊಡಗ್ ಶಾಸನತ್‌ನುಂಡ್ ಆಂಜಿತ್‌ಡತ್ ಮೈಸೂರ್ ಪಿಳ್ಳಾ ಕೊಡಗರ ಚರಿತ್ರೆಲ್ ಈ ನಾಯಕಂಡ ಪೆದ ಕಂಡ್‌ಬಪ್ಪ. ಶಾಸನ ಇನ್ನನೆ ಉಂಡ್.

...ಕೋಟೆಯ ಕುಪ್ಪೆಯ ಮಾದೆಯ! ನಾಯ್ಕಂಗೆ ಉಯಣ ಬಾಳು ಹತು. ದುರೆವಬಾಳಿಕೆಯನೂ ಕೊಟ್ಟು ಆ ಮಾದೆಯ ನಾಯ್ಕನ ಸಪೂವರಣೆಯ ಕಂದಾಯಕೆ ಕುಪ್ಪನಾಡೊಳಗೆ ಕೋಟೆ! ಯ ಕುಪ್ಪೆ ಆ ಸ್ಥಳಕ್ಕೆ ಸಲುವ ಕಾಲುವಳಿ ಹತನೂ ಆತನ ಮಕ್ಕಳು ಮಕ್ಕಳು ತಪ್ಪದೆ ಆ ಹತ್ತು ನಾಡುವನು ಆತನ ಸಲ ಉವರಣೆಯ ಕಂದಾಯ ಸಾವಿರಕೆ

ಸಿಲುವಂ! ತಾಗಿ ಕಾರುಣ್ಯಂ ಮಾಡಿ || ಶ್ರೀಮನು ಮಹಾ ಪ್ರಧಾನಂ ಬೆಟ್ಟರ್ದದಂಣಯ್ಯರ  
ಕೂಡೆ ಪಾಲ್ವರೆಗೆ ಹೇಳಿಕೆಯಾಗಿ ಕಲ್ಪಿಸಿಕೊಂಡು ಬಂದಲ್ಲಿ. ಆ ಬೆಟ್ಟರ್ದದಂಣಯ್ಯರು  
ಪಾಲ್ವರೆ ನಡೆದು ಚಿಂಗಾಳ್ಳ ಮಹದೇವನು ಕೆಡ್ಡಿ ಪಾಲ್ವರೆಯ ಪಟ್ಟಣವನು ಕಟ್ಟಿ,  
ನೆಲವೀಡಾಗಿರುತ್ತಿದ್ದಲ್ಲಿ ಶ್ರೀಮನುಮಹಾಮಂಡಳೀಸ್ವರಂ ಚಿಂಗಾಳ್ಳ ಪೆಂಮದೇವಪ್ಪನು  
ಬಾಳಿ ಗಂಡ ನಂದಿದೇವ ಕುರುಚೆಯರು ದೇಯಾದಿತ್ಯದೇವ ಮುಂತಾದ ಎಲ್ಲಾ ನಾಡ  
ಕೊಡಗರು ಕೂಡಿ ಪಾಲ್ವರೆಗೆ ನಡೆದು ಬಂ.ಬೆಟ್ಟರ್ದ ದಂಣಂಯಕರ ಕೂಡೆ ಕಾದಿದಲಿಯಹ  
ಸಂಗ್ರಾ

(ಎರಡನೆಯ ಕಲ್ಲಿನಲ್ಲಿ)

ಮವಾದ ರಣದಲ್ಲಿ... ವಲ್ಲಭ...ರದಿವ ದಾನಶ್ರೀ.....  
ಡಳಿಕ ಗಂಡರ ಗೋವವೀರ ಘಂಟೆ ಕೋಟೆಯ ಕುಪ್ಪೆಯ ಮಾದೆಯ ನಾಯ್ಕ...  
ಯಂಣನು! ಪಾಲ್ವರೆ ಯವಸಹಸಂಗ್ರಾಮದಲಿ|| ಬೆಟ್ಟರ್ದ....  
ಟೆ ಕೆಡುವಾಗ!...ಯದಳಮ. ...ಹ...  
ಬೀರಜಯಶ್ರೀಯನೆಯ್ವಿ ಸ್ವಸ್ತಿ ಶ್ರೀ ವಿಜಯಾಭ್ಯುದಯಶ್ಚ ಶಕ.... ಜಯ...  
ಸು! ೧೩ | ಬ್ರಿ! ದಂಡು ಅಪ್ಪರಗಣಿ! ... ಯ...ರಡು...  
ಪುರುಪ್ರಿಷ್ಟಿಗಳೊಲಗೆ ದೇವಲೋಕದ ಪ್ರಾಪ್ತಿಗಾಗಿ ಮಹ ಪದವಿಯನು ಹಡೆದ  
ಮವಾದ ರಣದಲ್ಲಿ....ಪಾಲ್ವರೆಯ ಸಹಸ ಸಂಗ್ರಾಮದಲಿ ... ದೇವಲೋಕ ಪ್ರಾಪ್ತಿಗಾಗಿ  
ಮಹಾಪದವಿಯನು ಹಡೆದ  
ಆಮಾಯನಾಯ್ಕನ ಮಕ್ಕಳು ಮಾದೆಪ್ಪ... ಯಣ ಮಲಪ್ಪನೊಳಗಾದವರುಗಳಿಗೆ...  
ನಾಡೊಳಗಣ ಹೊಂಗೆಯನ ಹಳಿಯನೂ ಪಾಲ್ವರೆಯವು.... ಯನೂ  
ಬೆಟ್ಟರಸದಂಣಾಯಕರು ಆಚಂ! ದ್ರಾಕ್ಷಸ್ಥಾಯಿಯಾಗಿ ನೆತ್ತರು ಕೂಡಗಿಯಾಗಿ...  
ನು...ಮಹಾಶ್ರೀ

ಈ ಶಾಸನದ ಸಾರಾಂಶವು ಹೀಗಿದೆ.

ಮಾದೆಯ ನಾಯಕ ಎಣ್ಣುವಂವಂಗ್ ಕುಪ್ಪನಾಡಲ್ ಭೂಮಿನೊ, ಅದ್‌ಂಗ್  
ಕೆಟ್ಟಂಡಿಯ ಕಂದಾಯತ್‌ರ ವಿನಾಯಿತಿನೊ ಹೊಯ್ಕಳ ರಾಜ ಕೊಡತಿತ್ ಬೆಟ್ಟರಸ  
ದಂಡ ನಾಯಕಂಡ ಕೂಡೆ ಪಾಲ್ವರೆಕ್ ಅಯೆಚ ನೇರತ್ ಬೆಟ್ಟರಸ ದಂಡ ನಾಯಕ  
ಪಾಲ್ವರೆಕ್ ಪೋಯಿತ್ ಚಿಂಗಾಳ್ಳ ಮಾದೇವನ ಕೊಂದಿತ್ ಪಾಲ್ವರೆ ಪಟ್ಟಣತ್‌ನ ಕೆಟ್ಟತ್  
ಅಲ್ಲಿ ಮನೆ (ರಾಜ್ಯ ಯಾ ಅಧಿಕಾರ) ಸ್ಥಾಪನೆ ಮಾಡಿಯಂಡ್ ಇಪ್ಪಕ..... ಇನ್ನತ ಎಲ್ಲಾ  
ನಾಡ್‌ರ ಕೊಡವ ಬೆಟ್ಟರಸಂಡ ಕೂಡೆ ಪಡೆ ಪೊತ್ತ ಪರಿಣಾಮ ಆ ಬಲ್ಯ ಪಾಲ್ವರೆರ ಓರ್



ಊರಾನ ಬೆಟ್ಟರಸ ಸೂರ್ಯ, ಚೆನ್ನೂರ ಇರಣೆಕೂ ಚೋರೆ ಇನಾಂ ಆಯಿತ್ ಎಣ್ಣಕ ಪಡಲ್ ಚೋರೆ ಚೆಲ್ಲನಯಿಂಗಕ್ ಇನಾಂ ಆಯಿತ್ ಭೂಮಿನ ಕೊಡತತ್.

ಹಾಸನ ಜಿಲ್ಲೆರ ಚನ್ನರಾಯ ಪಟ್ಟಣತಾರ ಪಕ್ಕ ಪಂಡ್ ಚೋರೆ ಇನಾಂ ಆಯಿತ್ ಕೊಡತ ಓರ್ ಊರ್ ಇಕ್ಕಲೂ 'ನೆತ್ತರು ಕೊಡಗಿ' ಎಣ್ಣಕ ಇನಾಂ ಕೊಡತ ಭೂಮಿ ಉಂಡ್. ಈ ಸೋಲಾರ ಪರಿಣಾಮ ಚೆಂಗಾಳ್ವಂಗ ಹೊಯ್ಸಳಂಗಡ ಅಧಿರಾಜತ್ವತನ ಪೂರ್ತಿ ಆಯಿತ್ ಒತ್ತಂಡನ್ನಕೆ ಕಾಂಬ. ಎನ್ನಂಗಣ್ಣಕ ಈ ಪಡೆರ ಪಿತ್ಯಕಾಲ ಎಣ್ಣಕ ಕ್ರಿ.ಶ. 1175ತ್ ಹೊಯ್ಸಳ 2ನೆ ಬಲ್ಲಾಳ ಕೊಡಗರ ಬಲಹ ಹೋಬಳಿ ಸಿರಹ ಊರ್ಲಾ ಮಾಯಣ್ಣ ಎಣ್ಣವ ವ್ಯಕ್ತಿಕ್ ಭೂಮಿನ ಎಟ್ವ ಹಕ್ಕಾಯಿತ್ ದಾನ ಕೊಡತಿತ್ ಎಟ್ವ ಚಿಟ್ಟಿ ಶಿಲಾಶಾಸನ ಇಕ್ಕತ ಸೋಮವಾರಪೇಟೆ ತಾಲ್ಲೂಕ್ ಬಿಲಹ ಹೋಬಳಿ ಸಿರಹ ಊರ್ಲಾ ರಾಮೇಶ್ವರ ಗುಡಿರ ಮಿಳ್ಳಾಲ್ ಉಂಡ್. ಆ ಶಾಸನತ್ ಇನ್ನನೆ ಎಳ್ಳಿತ್.

ಶ್ರೀ ಜಯ ಸಂವಭರದ ಫಾಲ್ಗುಣ ಸುಧಪಾವರ್ನಮಿ ಬ್ರಹ್ಮವಾರದಾಂಲಿ ಹೊಯ್ಸಳ ಭುಜದಳ ಶ್ರೀ ವೀರಬಲ್ಲಾಳ ದೇವರಸರು ಪ್ರೀತ್ವೀ ರಾಜ್ಯಂಗಯುತ್ತಿದ್ದಲ್ಲಿ ಬಿಳುಹು ನಾಡ ಪಡದ ಶಿರಿಯರಕಸಪ ಗವಡಗಳ ಬೀರಯನಾ ಮಗಮಾಯಂಣಂಗ ಸಿರಿಪುರದಾ ಮಲ್ಲಿಕಾರ್ಜುನ ದೇವರ ಅಷ್ಟಭೋಗ ತೇಜಸ್ವಾಮ್ಯ, ನಿಧಿನಿಕ್ಷೇಪ ಜಲ ಪಸಣ ಆಗಾಮಿ ಮುಖ್ಯವಾಗಿ ಮಾಯಂಲಿಂಗ ಕಾಲುಗ ಬೆರಸಾಗಿ ಧಾರೆಯ ಯೆರದು ಕೊಟ ಸಾಸನಯಿದನು ಆರು ಅಳಿಹಿದಡೆ ಗಂಗಯಾ ತಡಿಯಲಿ ಕವಿಲೆಯ ಕೊಂಡ ದೋಷದಲಿ ಹೋಹರು ಮಂಗಳ ಮಾಹಾ ಶ್ರೀ ಶ್ರೀ ಶ್ರೀ ಮರೆವಕ್ಕರ ಕಾವರು ಶ್ರೀ.

ಕ್ರಿ.ಶ. 1252ತ್ ಹೊಯ್ಸಳರಾಜ ಸೋಮೇಶ್ವರ ತಮಿಳ್ ದೇಶತಾರ ಶ್ರೀರಂಗಮಲ್ ವಾಸ ಇಂಜಂವ ಚೋಳವಂಶತಾರ ತಾಂಡ ಪೊಣ್ಣ ಚೆತ್ತಪಿಳ್ಳಾ ಅಲ್ಲಿಂಜ ಬುಟ್ಟಿತ್ ವಾಪಾಸ್ ಹಾಸನ ಜಿಲ್ಲೆರ ತಾಂಡ ರಾಜಧಾನಿ ದ್ವಾರಸಮುದ್ರಕ್ ಪೋಪಕ ಅರಕಲಗೂಡ್ ತಾಲ್ಲೂಕ್ ರಾಮನಾಥಪುರಕಾಲೆ ಪೋಚಿ. ಆ ನೇರತ್ ರಾಜನ ತಕ್ಕಾರ ಮಾಡುವಕ್ ಸೋಮದೇವ ಪಿಳ್ಳಾ ಬೊಪ್ಪದೇವ ಎಣ್ಣವ ದಂಡ್ ಚೆಂಗಾಳ್ವ ರಾಜಂಗ ರಾಮನಾಥ ಪುರಕ್ ಬಂದಿತಿಂಜತ್ಂದ್ ಅರಕಲಗೂಡ್ 53ನೆ ಶಾಸನತ್ ಗೊತ್ತಾಪ.

ಇದೇ ಶಾಸನತ್ಂಜ ಅವು 1245ತ್ ರಾಮನಾಥಪುರ ಕೋಟೆನ ಪುನಾದಿಯ ಕೆಟ್ಟಚಿಟ್ಟಿತ್ಂದೂ ಗೊತ್ತಾಪ. ರಾಮನಾಥಪುರ ಚೆಂಗಾಳ್ವ ರಾಜ್ಯತಾರ ತೆರಿ ಪಟ್ಟಣ ಆಯಿತಿಕ್ಕು. ಪಿಳ್ಳಾ ಹೊಯ್ಸಳರಾಜಂಗ ಇಲ್ಲಿಯೆ ಕಾವೇರಿ ಪೊಳೆನ ದಾಟುವಕ್ ಅನುಕೂಲ ಆಯಿತಿಕ್ಕು. ಈ ಕಾರಣತನಗುಂಡ್ ಹೊಯ್ಸಳ ಸೋಮೇಶ್ವರ ತಾಂಡ ಬಟ್ಟಿಲ್ ಚೆಂಗಾಳ್ವ ರಾಜ್ಯತಾರ ತೆರಿನ ಎತ್ತುವಕ ಚೆಂಗಾಳ್ವರಸ ಅವನ ಮರ್ಯಾದಿ ಕೊಡತಿತ್ ತಕ್ಕಾರ

ಮಾಡ್‌ಚಿಂದ್ ಕಾಂಬ.

ಕೊಡಿಯತ ಶಾಸನತ್‌ನುಂಡ್ ಚೆಂಗಾಳ್ವಂಗಡ ರಾಜಧಾನಿ 1245ತ್‌ಂಜ ಇಕ್ಕತ ಸಿದ್ಧಾಪುರತ್‌ರ ಪಕ್ಕ ಕಾವೇರಿಪೊಳೆ ದಕ್ಷಿಣತ್ ಉಳ್ಳ ಕೊಡಗ್ ಶ್ರೀರಂಗ ಪಟ್ಟಣ ಆಯಿತಿಂಜತ್‌ಂದ್ ಗೊತ್ತ್‌ಹುಟ್ಟುವ.

ಚೆಂಗಾಳ್ವಂಗ 13ನೆ ಶತಮಾನತ್ ಕೊಂಗಾಳ್ವಂಗ ಆಳಿಯಂಡ್ ಇಂಜ ಉತ್ತರ ಕೊಡಗ್‌ನ ತಂಗಡ ಪುಡ್‌ತತ್ ಬೆಚ್ಚಂಡ ನೇರತ್ ಹೆರೂರ್ ಮೂಡಗೇರಿ ನಾಡ್‌ಲ್ ಚೆಂಗಾಳ್ವಂಡ ಕೂಡೆ ಮುನಿವಾರಾದಿತ್ಯ ಎಣ್ಣುವ ನಾಯಕ ಇಂಜನ್ನೆ ಕಾಂಬ. ಇಂಜ ಸುಮಾರ್ ಕ್ರಿ.ಶ. 1220ತ್ ಕೆಟ್ಟ್‌ಚಿಟ್ಟಿ ತಿರಿಕೆನ ಚೆಂಗಾಳ್ವಂಗ ಚಾಯಿತೆ ಅಲಂಕಾರ ಮಾಡ್‌ಚಿಂದ್

ಹೆರೂರ್ ಊರ್‌ಲ್ ನೆಟ್ಟಿ ವೀರಕಲ್ಲಲ್ ಎಳ್ಳಿತ್. ಈ ವೀರ ಕಲ್ಲಲ್ ಸುಮಾರೆಲ್ಲ ಅಕ್ಕರ ತಿಕ್ಕಿ ಪೋನಾನಗುಂಡ್ ಮುನಿವಾರಾದಿತ್ಯಂಡ ವಿಷಯತ್ ಏರ ಒಂದೂ ಗೊತ್ತಾಪುಲೆ.

ಮುನಿವಾರಾದಿತ್ಯಂಡ ಮೋಂವ / ಕೊರ್ಮೋಂವ ವೀರಮುನಿವಾರಾದಿತ್ಯ ಗೋಕುಲ ದೇವರಸ ಸುಂಟಿಕೊಪ್ಪ ನಾಡ್‌ಲ್ ನಾಯಕ / ತುಂಡರಸ ಆಯಿತಿಂಜತ್‌ಂದ್ ಕಾಂಬ. ಎನ್ನಂಗೇಣ್ಣಕ ಅವಂಡ ಕಾಲತ್ ರಕ್ತಾಕ್ಷಿ ಸಂವತ್ಸರತ್‌ರ ಕನ್ಯಾ ಮಾಸತ್ ಎಣ್ಣಕ ಕ್ರಿ.ಶ. 1264ತ್ ದಕ್ಷಿಣತ್‌ರ ನಾಡ್‌ಕಾರ ಉಲುಗುಲಿರ ಅತ್ತಳ ಪುಡ್‌ಪ್‌ಚಿಡುವಕ ಆ ನಾಯಕಂಡ ಧೈರ್ಯಶಾಲಿ ಸೇವಕ ಮೇಲಾಳಿರ ಪೊಣ್ಣ್ ಬಿಡದೆ ದುಂಬ ಚೆಡ್‌ಂಜಂಡ್ ಆ ದಕ್ಷಿಣ ನಾಡ್‌ಕಾರಡ ಕೂಡೆ ಪೋರಾಡಿತ್ ಅವನ ನೆಲಕ್ ಬೂಕಿತ್, ಕಾಲ್‌ಕ್ ಕೇರ್ ಕೆಟ್ಟ್‌ಚೀಂದೂ, ಅದೊಂಗ್ ಅವ ಮೂಕೊರ್ಡ್‌ನ ಇನಾಂ ಆಯಿತ್ ಪಡ್‌ಂದತ್‌ಂದೂ ಸುಂಟಿಕೊಪ್ಪ ನಾಡ್ ಉಲುಗಲಿ ಊರ್‌ಲ್ ಉಳ್ಳ ಓರ್ ಶಿಲಾಶಾಸನತ್ ಎಳ್ಳಿತ್.

ಸ್ವಸ್ತಿ ಶ್ರೀ ಮನುಮಹಾ ಮಂಡಳೇಶ್ವರ ಚ ಉಟು! ವಿಭಾಡ ಛಲದಂಕರಾಮ ಸತ್ಯರಾಯ ಸಂವರಣಾತಿರ ವಜ್ರ ರುದಿರ ಮರೆವಕ್ಕಸಕಾವ! ಶ್ರೀಮದ್ ವೀರಮುನಿವಾರಾದಿತ್ಯ ಗೋಕೂಳ ದೇವರಸರು ರಕ್ತಾಕ್ಷಿ ಸಂವತ್ಸರದ ಕನ್ಯಾಮಾಸದಂದು ತೆಂಗುನಾಡಕಂ ಯಳಘಳೆಯ ತುರು ಇಡಿಸಿದಲ್ಲಿ ಮಾಸಲ ಬಿಣ್ಣ ಮೇಲಾಳಿಯ ಮುರುಳಕಾರಯೋಶಿ ಯಾಳು ಬಿಡದೆ ಗರುಡು! ವಶತಲ್ಲಿ ಬಿಟ್ಟು ದಾನಿಗೆ ಕಾಲೆಗೆ ಸಂದುದು ಮುಕ್ಕೊಡವೆ.

ಚೆಂಗಾಳ್ವ ವಂಶತ್‌ರ ಇಞ್ಚ್ಚಿ ದಂಡಾಳ್‌ರ ಪೆದ ಕ್ರಿ.ಶ. 1280, 1296 ಪಿಞ್ಚ್ಚಿ 1300ನೆ ಇಸವಿರ 3 ಶಾಸನತ್ ಕಂಡ್‌ಬಪ್ಪ. ಆ ಶಾಸನತ್ ಮಲ್ಚಿದೇವ ಪಿಞ್ಚ್ಚಿ ಅವಂಡ ಮೋಂವ ಹರಿಹರ ದೇವಂಡ ಪೆದ ಕಾಂಬ. ಕ್ರಿ.ಶ. 1280ನೆ ಇಸವಿರ ಶಾಸನತ್

ಮಲ್ಲಿದೇವರಸ ರಾಜ್ಯತನ ಆಳಿಯಂಡ್ ಇಪ್ಪಕ ಯಡವನಾಡ್ ಗಟ್ಟಿಬಾಡಿ ತೆರಿರ ಪಕ್ಕತ್ ನಡೊಂದ ಪಡೆಲ್ ಚಿಕ್ಕನಾಯಕ ಚತ್ತ್ ಪೋನಾಂಗ್ ಮಲ್ಲಿದೇವರಸ ಚಿಕ್ಕ ನಾಯಕಂಡ ಮಕ್ಕಕ್ ತೆಂಕ ನಾಡಾರ ಎಲ್ಲಾ....ಕೊಡತತ್ಂದ್ ಎಳ್ಳಿತ್. ಈ ಶಾಸನತಾರ ಕೊಡಿ ಪಿಳ್ಳಾ ಅಡಿ ಭಾಗ ಎಲ್ಲ ತಿಕ್ಕಿಪೋಯಿತ್. ಆನಗುಂಡ್ ಈ ಶಾಸನತಾರ ಆದಿಲ್ ಎಳ್ಳೊನ ಸುಮಾರಲ್ಲ ವಿಷಯ ನಂಗಕ್ ಗೊತ್ತಾಪುಲೆ. ಈ ಶಾಸನ ಸೋಮವಾರಪೇಟೆ ನಾಡಾರ ಗೋಣಿಮರೂರ್ ಊರ್ಲ್ ಪೂತದ್. ಇದೇ ಜಾಗತ್ ಮಲ್ಲಿ ದೇವರಸಂಡ ಮೋಂವ ಹರಿಹರ ದೇವರಸ ಸುಮಾರ್ ಕ್ರಿ.ಶ. 1300ತ್ ಮನೆ, ತೆರಿಗೆ, ಗೋಪಾಲ ದೇವಂಡ ದಂಡಿ ಕಾಣಿಕೆ, ಬಿಟ್ಟಿ ಚಾಕ್ರಿ ಇನ್ನತಾಂಗ್ ಸ್ವ ಇಚ್ಚೆಲ್ ಮತ್ತಿರ ಬೇಲ್, ದೇವಿ ಕೆರೆರ ಕೋದತ ಬೇಲ್, ಮಾಂಗಿ ಮಕ್ಕಿರ ಒಳ್ಳಲ್ ದಂಡ್ ಜೋಡಿ ಅತ್ತ, ಕೃಷಿಕ್ ಭೂಮಿ ಇನ್ನತಾನ ಕೊಡತಾಂಗ್ ಸೈನ್ ಇಟ್ಟಿತುಳ್ಳ ಶಾಸನ ಉಂಡ್. ಇದತೂ ಸುರೂವೆತ ಭಾಗ ತಿಕ್ಕಿ ಪೋಯಿತ್. ಇನ್ನನಾಯಿತ್ ದಾರ್ ಈ ಭೂಮಿನ ಕೊಡತತ್ಂದ್ ಗೊತ್ತಾಪುಲೆ. ಕೊಡಿಯತ ದಂಡ್ ಶಾಸನತ್ ಕ್ರಿ.ಶ. 1280ಂಡ ಶಾಸನ ಇದ್.

(ಕೊಡಿಯತ ಭಾಗ ಸಹ ತಿಕ್ಕಿಪೋಯಿತ್) ದೇವರಸ ಪ್ರಿಥ್ವಿ ರಾಜ್ಯಂಗಿಯುತ್ತಿದಲಿ ಯಡವು ನಾಡಗಟ್ಟಿ ಬಾಡಿಯ ಗಡಿಯ ಕಾಳೆಗದ ಬವರದಲಿ ಚಿಕ್ಕೆಯ ನಾಯಕ ಬಿದ್ದಂಡು ಚಿಕ್ಕೆಯ ನಾಯಕನ ಮಕ್ಕಳಿಗೆ ಆ ಮಲ್ಲಿದೇವರಸರು ಹರಿಹರ ದೇವರಸರು ತೆಂಕನಾಡ ಸಮಸ್ತ...

ಚೆಂಗಾಳ್ಳ ಹರಿಹರ ದೇವರಸಂಡ ಕಾಲತಾರ ಇಇಸ್ಕೋರ್ ಶಾಸನ ನಿಡತ ಹೋಬಳಿ ಮುಳ್ಳೂರ್ ಊರ್ಲ್ ಉಂಡ್. ಈ ಶಾಸನತಾರ ಕಾಲ ದುರ್ಮುಖಿ ಸಂವತ್ಸರ ಎಣ್ಣಕ ಕ್ರಿ.ಶ.1296.

ದುರ್ಮುಖಿ ಸಂವತ್ಸರ ಚೈತ್ರ ಶುದ್ಧ ಪಂಚಮಿ ತಿಂಗಳಾಚೆ ಬೆಳಹುನಾಡು ಗೊದ್ದುಂಬಾಡಿ ಮುಳಿವರಾದಿತ್ಯ ನಾಡ್ ಮಲ್ಲಿಕಾರ್ಜುನ, ನಿಡುತ, ಮೆಣಸ ಇನ್ನತ ನಾಡಾಕಾರ ಎಲ್ಲ ಕೂಡಿತ್ ಮುಳ್ಳೂರ್ ಕೋಟೆಕ್ ಮುತ್ತಿಗೆ ಇಟ್ಟಿತ್.

ಅಕ್ಕ ಬೊಪ್ಪಗೌಡಿರ ಮೋಂವ ಮಲ್ಲೆಯ ಕೋಟೆಲ್ ಅಡೆತಡೆನ ಎದ್‌ರಾಚಿಟ್ಟಿತ್ ಶತ್ರುವಳ ಕೊಂದಂಡ್ ಇಪ್ಪಕ ವಾರೆ ಆಯಿತಿಂಜ ಕೋಟೆರ ಪಡಿಲ್ ಚತ್ತ್ ಬೂವಕ ಆ ಊರ್, ಅದತೂ ಮುಖ್ಯವಾಯಿತ್ ಮಾಸಾವಿ ಊರ್ ಮುನ್ನೂರ್ ಜನ ಎಲ್ಲ ಸೇರಿತ್ ಮಲ್ಲಯ್ಯಂಡ ವೀರಸೇನೆ ಆಯಿತ್ ಅವಂಡ ಮೋನೆಯಂಗ ಮಾಲೆಯ್ಯ ಪಿಳ್ಳಾ ಮಾದಯ್ಯ ಇಯಂಗಕ್ ಎಟ್ ನೆಲ್ಲರ ಬೇಲ್‌ನ ಕೊಡತತ್. ಮಾಲೆಯ್ಯ ಪಿಳ್ಳಾ ಮಾದಯ್ಯ ಈ ಬೇಲ್‌ರ ಬದಲಾಯಿತ್ ಪುದಿಯ ಆ ಮಾನಿಕೆರೆನ ಒಯಿಂಬದ್ ಗ...ನ



ಎಡ್ತಂಡಲ್ಲಿ ಉರ್ಕಾರ ಅದಾನ ವಿದೇ ಓರ್ ಸುಂಕ, ತೆರಿಗೆ ಇಲ್ಲತೆ ಕೊಡ್ತತ್.

ಇದ್ ಆ ಶಾಸನತ್ ವಿಷಯ.

13ನೆ ಶತಮಾನ ಕೈಂಜದು 15ನೆ ಶತಮಾನಕ್ಕೆತ್ತನೆ ಚೆಂಗಾಳ್ವಂಗಡ ಪೆದ ಕೇಟ್ ಬಪ್ಪಲೆ. 15ನೆ ಶತಮಾನತ್ ಆಳ್ವಾನ ಚೆಂಗಾಳ್ವಂಗ ಸುರೂವೆತ ಚೆಂಗಾಳ್ವ ವಂಶತ್ ಓರ್ ಶಾಖೆ ಆಯಿತ್ತಕ್ಕೊಂದ್ ಕಾಂಬ. ಹೊಯ್ಸಳಂಗಡ ಕಾಲತ್ ಚೆಂಗಾಳ್ವ ರಾಜಂಗ ಇನ್ನನೆ ಉಂಡ್.

1. ಅನ್ನದಾನಿ ಚೆಂಗಾಳ್ವ - 1106
2. ಮಹಾದೇವ ಚೆಂಗಾಳ್ವ - 1174
3. ಪೆಮ್ಮವೀರಪ್ಪ ಚೆಂಗಾಳ್ವ - 1175
4. 5. ಸೋಮದೇವ ಬೊಪ್ಪದೇವ - 1245 - 52
6. ಮಲ್ಲದೇವ - 1280
6. ಮಲ್ಲದೇವ, ಹರಿಹರದೇವ - 1297-99

ಕೊಡಗುರ ಉತ್ತರ ಭಾಗತ್ ಬಲಹ ಹೋಬಳಿಲ್ ಹೊಯ್ಸಳ ಇಮ್ಮಡಿ ವೀರಬಲ್ಲಾಳ ದಾನ ಆಯಿತ್ ಕೊಡ್ತ ಹಕ್ಕನ ಎಳ್ಳಿತುಳ್ಳ ಓರ್ ಶಾಸನ ಪಿಳ್ಳಾ ತಿಕ್ಕಿಪೋನ ಬರೆ ವೀರಬಲ್ಲಾಳಂಡ ಬಿರ್ದಾವಳಿ ಉಳ್ಳ ಇನ್ನೊರ್ ಶಾಸನತ್ ಈಂಗ್ ಮುಪ್ಪಡೆ ನೋಟಿತ್. ಹೊಯ್ಸಳ ರಾಜ ವೀರ ನರಸಿಂಹಂಡ ಕಾಲತ್ ವೀರಗಲ್ಲ್ ಕೊಡಗುರ ಉತ್ತರ ಭಾಗತ್ ನಿಡತ ಹೋಬಳಿರ ಈಶಾನ್ಯ ತೆರಿಲ್ ಉಂಡ್.

ಈ ವೀರಗಲ್ಲ್ ಕ್ರಮವಾಯಿತ್ ಕ್ರಿ.ಶ. 1255 ಪಿಳ್ಳಾ 1285 ಆಯಿತ್. ಸುರೂವೆತ ವೀರಗಲ್ಲ್ನ ವೀರನರಸಿಂಹಂಡ ಕಾಲತ್ ಪಡೆಲ್ ಚತ್ತ್ಪೋನ ಸೋಮಯ್ಯ ಗೌಡ ದೇವಲೋಕ ಸೇರೊಂಡೊಂದ್ ಅವಂಡ ಒಡ್ಹುಟ್ ಮಾರಿ ಗೌಡ, ಅವಂಡ ಮೋಂವ ಮಾಯಿಗ ಸ್ಥಾಪನೆ ಮಾಡ್ಚಿಂದ್ ಎಳ್ಳಿತ್. 2ನೆ ವೀರಗಲ್ಲ್ ಇದೇ ರಾಜಂಡ ಕಾಲತ್ ಕಹಿಗೋಡ್ ಮಾರತಮ್ಮ ಪಡೆಲ್ ಪೋರಾಡಿತ್ ಬೂವಕ ಅವ ದೇವಲೋಕಕ್ ಪೋಂಡೊಂದ್ ಅವಂಡ ತಮ್ಮಣ ಮಲೆಯ ನಾಯಕ ಪಿಳ್ಳಾ ಅವಂಡ ಮೋಂವ ಸೋಮಣ್ಣ ಈ ವೀರಗಲ್ಲ್ನ ಸ್ಥಾಪನೆ ಮಾಡ್ಚಿಂದ್ ಎಳ್ಳಿತ್. ಕಹಿ ಗೋಡ್ ಅರಕಲಗೋಡಲ್ ಕಾವೇರಿ ಪೊಳೆರ ಬಲೆತೆ ಬರಿಲ್ ಉಂಡ್. ಈ ದಂಡ್ ವೀರಗಲ್ಲ್ನ ಶಾಸನತ್ ಮಾದರಿಕಾಯಿತ್ ದಂಡನೆ ಶಾಸನತ್ ಇಲ್ಲಿ ಕೊಡ್ತಿತ್.

ಸ್ಪೆಸ್ತಿ ಶ್ರೀ ವಿಜಯಾಭ್ಯದಯ ಶಕ ವರುಷ 1208 ಪಾರ್ಥಿವ ಸಂರದ ವೈಶಾಖ ಶುದ 12 ಶ್ರೀಮತ್ ಪ್ರತಾಪ ಚಕ್ರವರ್ತಿ ಹೊಯ್ಸಳ ಭುಜಬಲ ಶ್ರೀ ವೀರ ನಾರಸಿಂಹ ದೇವರಸನ

ರಾಜ್ಯಾಭ್ಯುದಯ ಕಾಲದಲ್ಲು ಕಹಿಗೋಡಿನ ಮಾರತಮ್ಮನು ತನ್ನ ಕೊಚನ ಪ್ರತಿತ್ತು ಮತ್ತರ ವಿರೋಧಂಗಳ ಕೂಡಿ ಕಾಳಗದಲ್ಲು ಕಾದಿ ಬಿದ್ದನು. ಆ ಮಾರತಮ್ಮನು ದೇವಲೋಕಕ್ಕೆ ಸಲಬೇಕೆನ್ನು ಆತನ ತಮ್ಮ ಮಲಿನಾಯಕ ಆ ಮಾರತಮ್ಮನ ಮಕ್ಕಳು ಸೋಮಣ್ಣ... ವೀರಗಲ್ಲು ಮಂಗಳ ಮಹಾ ಶ್ರೀ ಶ್ರೀ ಶ್ರೀ.

ಈ ವೀರಗಲ್ಲಲ್ ಪೆದ ಕಾಟಿತುಳ್ಳ ಹೊಯ್ಸಳ ರಾಜ 3ನೆ ನರಸಿಂಹ. ಇಂವ ಕ್ರಿ.ಶ. 1254ತ್ಂಜ 1292ಕೆತ್ತನೆ ಆಳ್ವಾಚಿ. ಇಂವಂಡ ಕಾಲ ಕೈಂಜದು ಆಳ್ವಾಚಿ 4ನೆ ವೀರ ಬಲ್ಲಾಳಂಡ ಕಾಲತ್ ಡೆಲ್ಲಿಂಜ ಸುಲ್ತಾನ್ ಅಲ್ಲಾವುದ್ದೀನ್ ಖಿಲ್ಜಿರ ಸೇನಾಧಿಪತಿ ಮಲ್ಲಿಕ್ ಕಾಫರ್ ದಕ್ಷಿಣಕ್ ತಾಂಡ ಸೈನ್ಯತೋಡೆ ಬಂದಿತ್, ದಕ್ಷಿಣತಾರ ರಾಜಂಗಳ ಚೋಪಾಚಿಟ್ಟಿತ್ ಅಯಿಂಗಳುಂಡ್ ಬೋಂಡಿಯಾನ ಸಂಪತ್ತನ ಎಡ್ತಂಡ್ ಪೋಚಿ. 1310ತ್ ಹೊಯ್ಸಳ ರಾಜ ಮಲ್ಲಿಕ್ ಕಾಫರ್ನುಂಡ್ ಚೋತರ್. ಅಕ್ಕಲೆ ಶಿಲ್ಪಕಲೆಕ್ ಪೆದಪೋನ ಬೇಲೂರ್, ಹಳೇಬೀಡ್ ಪಿಳ್ಳಾ ಸೋಮನಾಥ ಪುರ ತಿರಿಕೆನ್ನೆಲ್ಲ ಸೂರೆ ಮಾಡಿತ್ ಪಾಳ್ ಮಾಡಿತಿಂಜತ್. ಅಂದ್ಂಜ ಕ್ರಿ.ಶ. 1346ಂಗೆತ್ತನೆ ಈ ವಂಶತಾರ ರಾಜಂಗ ಆಳ್ವಾಚಿ ಅಯಿಂಗಡ ತಾಕತ್ ಕಮ್ಮಿ ಆಯಂಡ್ ಬಾತ್. 1346ಂಜ ಹೊಯ್ಸಳಂಗಡ ಪೆದ ಕೇಟ್ ಬಪ್ಪಲೆ.

## 9. 14ನೆ ಶತಮಾನತ್ ಕೊಡಗ್

14ನೆ ಶತಮಾನತ್ ಕೊಡಗ್ಲ್ ಪ್ರಬಲವಾನ ಏದೇ ರಾಜವಂಶ ಉಳ್ಳನ್ನೆಕೆ ಇಕ್ಕಾಕಣೆ ಅರಂಜ ಶಾಸನತ್ಂಜ / ಬೋರೆ ಏದೇ ಆಧಾರತ್ಂಜ ಕಂಡ್ಬಪ್ಪಲೆ. ಅಕ್ಕ ಕೊಡಗ್ ಚೆನ್ನಂಗ್ ಭಾಗತನ ಚೆರಿಯ ಚೆರಿಯ ನಾಯಕಂಗ ಆಳಿಯಂಡ್ ಇಂಜತ್ಂದ್ ಕಾಂಬ. ಹೊಯ್ಸಳಂಗಡ ಆಖೀರಕ್ ಮೈಸೂರರ ಗುಂಡ್ಲು ಪೇಟೆ ತಾಲ್ಲೂಕ್ಲ್ ನವದನ್ನಾಯಕಂಗ (ದಂಡ ನಾಯಕಂಗ) ಆಳಿಯಂಡ್ ಇಂಜತ್ಂದ್ ಚರಿತ್ರನುಂಡ್ ಗೊತ್ತ್ ಕೊಟ್ಟುವ. ಇದತ್ ಮಾಧವ ದನ್ನಾಯಕ ಎಣ್ಣುವಂವ ಗುಂಡ್ಲುಪೇಟೆ ತಾಲ್ಲೂಕ್ ತೆರಕಣಾಂಬಿನ ತಾಂಡ ರಾಜಧಾನಿ ಆಯಿತ್ ಮಾಡಿಯಂಡಿಂಜತ್. ತೆರಕಣಾಂಬಿ ನಾಡ್ನ 'ಕುಡುಗು ನಾಡ್'ಂದ್ ಕಾಕ್ನದ್ ಗುಂಡ್ಲು ಪೇಟೆರ 11ನೆ ಶಾಸನತ್ ಕಂಡ್ ಬಪ್ಪ. ಅನ್ನನೆ ಕಾಕುವಕ್ ಕಾರಣ ಇದ್ನ ಆಳಿಯಂಡ್ ಇಂಜ ದನ್ನಾಯಕಂಗ ಅಯಿಂಗಡ ನಾಡ್ಕ್ ವಾಯವ್ಯ ಬರಿಲ್ ಮುಟ್ಟಿಯಂಡ್ ಇಂಜ ಕೊಡಗ್ ಶ್ರೀಮಂಗಲ ನಾಡ್ನ ಆಳಿಯಂಡ್ ಇಂಜದ್.

ಈ ನಾಯಕಂಗಡಾತ್ ನಾಲ್ ಸೋದರಂಗ ಕೊಡಗುರ ದಕ್ಷಿಣ ದೇವಾಸಿ ಕುಂದಂಜ ಉತ್ತರತ್ ಗೋವಾಕೆತ್ತನೆ, ಪೂರ್ವತ್ ಇಕ್ಕತ ಕೊಯಮತ್ತೂರ್ ಜಿಲ್ಲೆರ ಸತ್ಯಮಂಗಲತ್ಂಜ ಕೊಡಗುರ ವಾಯವ್ಯತ್ ಬಿಸಲೆ ಘಾಟ್ ಕೆತ್ತನೆ ಸೈನ್ಯ ಎಡ್ತಂಡ್ ಪೋಯಿತ್ ಸುಲಿಗೆ ಮಾಡ್ಚಿಂದ್ ಎಣ್ಣುವ. ಆಚೇಂಗಿ, ಈ ದಂಡಯಾತ್ರೆರ ಮೀದ ಕೊಡಗುಲ್ ಏದೇ ಶಾಸನ ಕೊಟ್ಟಿತ್ತಿಲ್ಲೆ. ಬಹುಶಃ ಈ ದನ್ನಾಯಕಂಗಡ ಧಾಳಿ ಚೆನ್ನಂಗ ಸಮಯ ನಡಂದಿತಿಕ್ಕು. ಇಯಂಗಡ ಪೆದ ಇಕ್ಕ ಸತ್ಯ ಮಂಗಲತ್ ನೈಋತ್ಯತ್ 12 ಮೈಲ್ ದೂರತ್ ಉಳ್ಳ ದನ್ನಾಯಕಂಡ ಕೋಟೆಲ್ ಮಾತ್ರ ಉಂಡ್.

ಇದೇ ನೇರತ್ ಕೊಡಗುರ ತಾವುನಾಡ್‌ಲ್ ಮೇಲ್ಪುಂಡಿ ಕುಳ್ಳಿ ಅರಸ ಆಳಿಯಂಡ್ ಇಂಜತ್‌ಂದ್ ಭಾಗಮಂಡಲತ್ ಉಳ್ಳ ಶಾಸನತ್ ಗೊತ್ತಾಪ. ಈ ನೇರತ್ ಕುಳ್ಳಿ ಅರಸಂಡ ಅದಿ. ರಾಜನಾಯಿತ್ ಬೋಧರೂಪ ಭಾಗವರ್ ಎಣ್ಣುವ ರಾಜ ಕೊಡಗುನ ತಾನೆ ಆಳ್ವಾನ್ನಕೆ ಕಾಂಬುಲೆ.

ಈ ರಾಜವಂಶಕಾರ ಹಾಸನ ತಾಲ್ಲೂಕುರ ನೈಋತ್ಯತ್ ಉಳ್ಳ ಮಹಾರಾಜ ದುರ್ಗತ್ ಆಳಿಯಂಡ್ ಇಂಜತ್‌ಂದ್ ಕಾಂಬ. ಎನ್ನಂಗಣ್ಣಕ ಮೂಡುಗೆರೆ 87ನೆ ಶಾಸನತ್ ಬೋಧ ಮಹಾದೇವ ಎಣ್ಣುವಂವ ಕ್ರಿ.ಶ. 1321ತ್ ವಿಜಯನಗರತ್ ಬುಕ್ಕರಾಯ ಆಳಿಯಂಡ್ ಇಪ್ಪಕ ದುರ್ಗತ್‌ನ ಆಳಿಯಂಡ್ ಇಂಜತ್‌ಂದ್ ಎಣ್ಣಿತ್. ಇಂವ ಪುರುಷೋತ್ತಮ ಪರಿಷತ್ತಾರ ಅವಿದ್ಯಾಮೃತ್ಯು ಭಟ್ಟಾರಕ ಎಣ್ಣುವ ಗುರುರ ಶಿಷ್ಯಾಂಡ್ ಶಾಸನತ್ ಎಳ್ಳಿತುಂಡ್.

ಈ ರಾಜ ಮನೆತನತ್‌ರ ವಿಷಯವಾಡ್, ಪುರುಷೋತ್ತಮ ಪರಿಷತ್ತಾರ ವಿಚಾರ ಆಡ್ ಎರ ಗೊತ್ತಾಪುಲೆ. ಈ ರಾಜ ಉತ್ತರ ಮಲಬಾರ್‌ಕಾರ ಆಯಿತಿಕ್ಕು ಎಣ್ಣುವಾಂಗ್ ಚೆನ್ನಂಗ್ ಕಾರಣ ಕೊಟ್ಟುವ. ಕೊಡಗುರ ಚರಿತ್ರೆಲ್ ಈ ರಾಜಂಡ ವಿಷಯ ಪ್ರಸ್ತಾಪ ಮಾಡುವಕ್ ಕಾರಣ ಇಚ್ಚಕೆ.

ಆ ರಾಜ ಕುಯ್ಯಂಗೇರಿ ನಾಡ್‌ರ ಪಾಲ್ಗೂರ್ ಮಾದೇವಡ ಪೂಜೆಕ್, ಭಗಂಡಾಶ್ರಮ (ಭಾಗಮಂಡಲ)ತ್ ಪೂಜೆಕ್ ಏರ್ಪಾಡ್ ಮಾಡ್‌ನ ಕ್ರಮತ್‌ರ ದಂಡ್ ಶಿಲಾಶಾಸನ ಪಾಲ್ಗೂರ್ ಮಹಾಲಿಂಗೇಶ್ವರ ತಿರಿಕೆ ಪಿಳ್ಳಾ ಭಾಗಮಂಡಲ ಭಗಂಡೇಶ್ವರ ತಿರಿಕೆಲೂ ಉಂಡ್. ಕೊಡಗುಲ್ ಇಕ್ಕಾಕಣೆ ಬೊಳಿಕ್ ಬುದ್ದ 106 ಶಾಸನ, ವೀರಕಲ್ಲಲ್ ಈ ದಂಡ್ ಶಾಸನ ಮಾತ್ರ ತಮಿಳ್ ಅಕ್ಷರತ್ ಎಳ್ಳೆನದ್. ಆಚೇಂಗಿ, ಅದಂಡ ಭಾಷೆ ಸುರೂಲ್ ಸಂಸ್ಕೃತ, ಸುಮಾರ್ 4ನೆ, 5ನೆ ಚರಣತ್ ತಮಿಳ್, ಮಲೆಯಾಳ, ಪಳೇಯ ಗ್ರಂಥಾಕ್ಷರ ಪಿಳ್ಳಾ ಚೆನ್ನಂಗ್ ತಾಳೆಗರಿ ಅಕ್ಷರತ್‌ರ ಮಿಶ್ರಣ ಆಯಿತ್. ಪಾಲ್ಗೂರ್

ಮಾಲಿಂಗೇಶ್ವರ ತಿರಿಕೆಲ್ ಉಳ್ಳ ಶಾಸನ ಇನ್ನನೆ ಉಂಡ್.

ಸ್ವಸ್ತಿ ಶ್ರೀ ವಿನಾಯಕಂ ವಿಶೇಷಜ್ಞಂ ಗುರುಂದೇವೀಂ ಸರಸ್ವತೀಂ | ಮಸ್ತುತ್ಯ ಯಥಾ |  
ಶಕ್ತ್ಯಾ ಕರಿಷ್ಯೆ ಶಾಸನಂ ಶುಭಂ ಸ್ವಸ್ತಿ | ಶ್ರೀ ಶ್ರೀಮತ್ ಪುರುಷೋತ್ತಮ  
ಪರ್ಷದವಿದ್ಯಾಮೃತ್ತು ಭಟ್ಟಾರಕ ಶಿಷ್ಯ ಬೋಧರೂಪ ಭಗವರ್ ಪಾಲಯೂರ್  
ಮಹಾದೇವಕುರ್ಚಿ ಚಿದ ಶಿಲಾ ಶಾಸನಂ |

ಪದಿನೆಣ್ಣೇಶಿ ಶ್ರೀ ವೈಷ್ಣವರ್ ಮುಂತಾನ | ಪದಿನೆಣ್ಣೇಶಿ ವಲಂಚಿಯರ್  
ಪದಿನೆಣ್ಣೇಶಿಪ್ಪಡ ಪಿಡಿಚ್ಚ ಪಲ್ಲಾಯಿರವರ್ ಪದಿನೆಟ್ಟು | ನಾಟ್ಟು ಬ್ರಾಹ್ಮಣರಿವ ಗಳಿಲ್  
ಕಂಡಾರ್ ಕಂಡಿರಕ್ಕಿಕ್ಕ ಕಡವರ್ ಎನ್ನು ಚಿದ ಶಿಲಾಶಾಸನಂ ಅವದು ಶಾಂತಿ ನೋಡು  
ಪೂವಿಸ್ಥಾನ ನೋಕ್ಕಿಯಮಚ್ಚಾಮಚ್ಚಪನ | ಚೆಲುಡಿತ್ತಾನಾಗಿಲ್ತನ್ ತಂದೆಯೈ  
ಕೊನಾರುನ್ ತಾಯೈ ಕಲತ್ರಮ್ ವಚ್ಚುನ್ ತಾಮ್ ಪಿರಂದ | ನಾಡು ವಾಳುಮರಶೈತ್ತಾನ್  
ಕೊನಾರವನ್ ನಾಟ್ಟುಲ್ ವಲತ್ತು ಕೆಟ್ಟಿಯಿಡತ್ತು ಪಿಡಿಚ್ಚಾನೈ ಮುಕಾ ಅರುತ್ ಅವನ್  
ಪೆಡಿಯೈ ಕಳತ್ರಂ ವಚ್ಚುನ್ ಪಡಕ್ಕಡವ ದಂಡಂ ಪಡಕ್ಕಡವನ್ ನಿತ್ಯಚ್ಚೆಲವುಂ ಮಿಕ್ಕ  
ಸಂಕೇತಂಗಳುಂ ಶ್ರೀ ಭಂಡಾರ ಪೊತ್ತಗಂ ಆಟೋರುಕ್ಕಾಲ್ ಎಡುತ್ತು ವಾಶಿಪಿತ್ತು ಅದಿಲ್  
ಪಟ್ಟ ಪಡಿಚೆಲ್ಲಾದ ಚಿಲವು ಚೆಲುಟ್ಟಕ್ಕಡ | ವರ್ ಪದಿನೆಣ್ಣೇಶಿ ವಲಂಚಿಯರ್ ನಾಲು  
ಮುತ್ತಾ ಮಯ್ಯಾಲುಂ ಮುನೂರ್ಕ ಮುಂತಯಿ

ಮಂಗಳವಾಗಲಿ, ವಿಶೇಷ ಜ್ಞಾನವನ್ನು ಪಡೆದವರ ಗುರುವಾದ ವಿನಾಯಕನಿಗೂ,  
ಸರಸ್ವತಿಗೂ ನಮಸ್ಕರಿಸಿ ನನಗೆ ಶಕ್ತಿಯಿರುವಷ್ಟು ಈ ಶುಭ ಶಾಸನವನ್ನು ಮಾಡುವೆನು.  
ಮಂಗಳವಾಗಲಿ.

ಶ್ರೀಮತ್ ಪುರುಷೋತ್ತಮ ಪರಿಷತ್ತರ ಅವಿದ್ಯಾಮೃತ್ತು ಭಟ್ಟಾರಕಂಡ ಶಿಷ್ಯ  
ಬೋಧರೂಪ ಭಾಗವರ್ ಪಾಲಯೂರ ಮಹಾದೇವಂಗ್ ಮಾಡ್ನ ಶಿಲಾ ಶಾಸನ 18  
ದೇಶತ್ ಶ್ರೀ ವೈಷ್ಣವಂಗಳೂ, ವರ್ತಕಂಗಳೂ, ಆಯುಧ ಪುಡ್ಚೆ ಆಯಿರ ಆಳ /18  
ನಾಡ್ ಪಟ್ಟಿಮಳೂ ಇದ್ನ ನೋಟಿತ್ ಚಾಯಿತೆ ಕಾಪಾಡುವಂದ್ ಮಾಡ್ನ ಶಿಲಾಶಾಸನ  
ಇದ್. ತಿರಿಕೆನೊ, ದೇವತಾರ್ಚನೆರ ಅವಶ್ಯಕತೆನೊ ನೋಟುನಪಿಳ್ಳಾ ಅಮಚ್ಚಾವನ (ತಿರಿಕೆರ  
ಅಧಿಕಾರಿ) ತೀರ್ಮಾನ ಮಾಡ್ನಪೋಲೆ ದುಡ್ಡ್ನ ದಾರ್ ಕೊಡ್ಪಾಲಿಯೊ, ದಾರ್  
ತಾಂಡ ಅವ್ವನ ಕೊಂದಿತೊ, ದಾರ್ ತಾಂಡ ಅವ್ವನ ಪೊಣ್ಣಾಯಿತ್ ಬೆಚ್ಚವ, ದಾರ್  
ತಾಂಗ್ ಪುಟ್ಟನ ನಾಡ್ ರಾಜನ ಕೊಂದಿತ್ ಇಡುವ, ದಾರ್ ಬಲ್ತೆಬರಿಲ್ ಕೆಟ್ಟನ  
ಒಬ್ಬನ, ಎಡ್ತೆ ಬರಿಂಜ ಪುಡ್ಚೆಂಡ್ ಅವಂಡ ಮೂಕ್ನ ಮುರ್ಚಿತ್ ಇಡುವ,  
ದಾರ್ ತಾನ್ ಮಂಗಲ ಕಯ್ಯತ ಚೋರೆ ಸಮ್ಮಂಧಿಯಡ ಕೂಡೆ ಮಂಗಲ ಸಮ್ಮಂಧ

ಕೈಚವ ಅನ್ನತಯಿಂಗ ಶಿಕ್ಷೆಕ್ ಒಳಪಡುವ.

18 ದೇಶತರ ವರ್ತಕಂಗ ಪಿಳ್ಳಾ ಬೋರೆಯವು ತಿರಿಕೆರ ಭಂಡಾರತರ ಪುಸ್ತಕತ್ ಎಳ್ವಾನ ಬೋರೆ ಸಾಮಗ್ರಿರ ಪಿಳ್ಳಾ ನಿತ್ಯ ಖರ್ಚ್ ವೆಚ್ಚತನ ಕಾಲಕ್ ಒಮ್ಮತ ನೋಟೊಂಡು. ಅದತ್ ಎಳ್ವಾನ ಪ್ರತಿಯೋರ್ ವಿಷಯತ್ ಎದೇಂಗಿ ಒಂದ್ ನಡೆತತೆ ಬುಟ್ತ್ ಪೋಯಿತಿಂಜಕ ಅನ್ನತ ವಿಷಯತನ ಅದತ್ ಎಳ್ವಾನನ್ನಕೆ ಕ್ರಮವಾಯಿತ್ ನಡೆತುವನ್ನಕೆ ನೋಟಿಯವಂಡು.

ಇದೇ ರಾಜಂಡ ಇಳ್ಳೋರ್ ಶಿಲಾಶಾಸನ ಭಾಗಮಂಡಲ ಭಗಂಡೇಶ್ವರ ತಿರಿಕೆರ ಎದಿಕೆ ಉಂಡ್. ಸುರುವೆತ ದೇವಡ ಪ್ರಾರ್ಥನೆ, ಆಖೀರತ ಪೂಜಾವಿಧಿನ ಕ್ರಮವಾಯಿತ್ ನಡೆತತೆ ಇಂಜವಂಗ್ ಆಪ ಶಿಕ್ಷೆ ಪಾಲೂರರ ಮಹಾಲಿಂಗೇಶ್ವರ ತಿರಿಕೆರ ಶಾಸನತ್ ಉಳ್ಳನ್ನಕೆ ಈ ಶಾಸನತೂ ಉಂಡ್. ಆಚೇಂಗಿ, ಇದತ್ ಪಾಲೂರರ ಶಾಸನತ್ ಇಲ್ಲತೆ ಉಳ್ಳ ಚೆನ್ನಂಗ್ ಪೂಜಾ ಕಾಣಿಕೆರ ವಿವರ ಉಂಡ್.

ಸ್ವಸ್ತಿ ಶ್ರೀ ನಮಸ್ಕೃತ್ಯ ಗುರುಮ್ ಭಕ್ತ್ಯಾ ಕನ್ಯಾರೂಢ ಬೃಹಸ್ಪತೌ ವೃಶ್ಚಿಕಾಖ್ಯೇ ಮಹಾಮಾಸೇ ಬೃಹಸ್ಪತ್ಯು ತ್ತರಾದಿನೇ ಕರಿಷ್ಯೇ ಶಾಸನಂ ಸ|ರ್ವ್ವಂ ಗುರೋರಾನನ್ನ ರೂಪಿಣಃ ಶಾಸನಾಂ ಬೋಧರೂಪೋ| ಹಂ ಶ್ರೀ ಭಗಂಡಾಶ್ರಮೇ ಪಿಹಿ ಮೇಲ್ಪುಣ್ಣೆ ಕುನ್ನಿಯರಸನ್ನಾ|ಡುವಾಳಾನಿಕ್ಕ ಶ್ರೀ ಮತ್ಸುಷೋತ್ತಮ ಪರ್ಷತ್ತೋಧ ರೂಪ| ಭಗವರರಸು ಮುನ್ತಾಯಚ್ಚೆವಿತ್ತ ಚೆಪ್ಪೇಟ್ಟಿ, ಲಕಪ್ಪಟ್ಟಿನಿಚ್ಚ|ಚ್ಚಿಲವಡಯವೊರು ನಾಳ್ಪಿಚ್ಚಾನುಕ್ಕು ಕುನ್ನಿಯರಸನ್ನ | ನ್ಯಾಯಾನ್‌ಣ್ಣೆ ಕಪ್ಪಡ ಮೇಲಿನಾಡು ವಾಳಕ್ಕಡವರ | ಸನಾಣಾ ಆಣನತ್ತಪ್ಪು ಪನ್ನಿರಂಡು ಕಾಣಮ್ ಪೊನ್‌ಕಾ|ಸನ್ನಿ ಒರುನಾಳಕ್ಕು ಇರಟ್ಟಿಪ್ಪಡಿ ದೇವಕ್ಕು ಅಪ್ಪಡಿ ಅಚ್ಚಿ|ವಟ್ಟಮ್ ಆದಿಲೇಱುಲ್ ಪನ್ನಾರು ಕಳಚು ಪೊನ್ನೇ ಬುಮಾರ್, ಅರಶುಕ್ಕು ನನ್ನಾವಿಳಕ್ಕು ಪದಿನೇಳು ನಾಳಮು| ದುಮುದಲಾಯ ಪೊದುವಾಳರಿದ ಕೂಡವರಿಯಿರುವತ್ತಣು ನಾಱಪುಷ್ಪತ್ತುಕ್ಕು ನಾನಾಳಿ| ಆಗಮಳ್ಳಾ ಮೂಲಮುಪುತ್ತಿರಣ್ಣು ವೃಶ್ಚಿಕ ವಿಳಿಕ್ಕಾದಿ ಶಾಂತಿ ನೋಡು ಪೂವಿ ಸ್ಥಾನನನೋಕ್ಕಿಯಮಚ್ಚಾ |ನಮಚ್ಚಪಡಿ ಚೆಲುತ್ತಾನಾ ಕಿಲ್ವಾನ್ನಿರನ್ನ ನಾಡುವಾಳುಂ ಅರಸನ್ನೆ ಕುಲಕರುದು ಮಾನಾ ಅವನ್ನಾಟ್ಟಿ|ಲ್ ವಲತ್ತು ಕಟ್ಟಿಯಿಡತ್ತು ಪಿಡಿಚ್ಚಾನ್ನೆ ಮೂಕ್ಕರುತ್ತು ಅವನ್ನೆಣ್ಣೆಲೈತ್ತಾನ್ನಳ ತ್ರವಚ್ಚಾನ್ನಡ|ಕ್ಕಡವ ರಂಡಮ್ ಇವ್ವಾಣಮಿಱುನ್ನೆ ಕಣ್ಣುಂ| ಕೇಟ್ಟು ಮುಪೇಕ್ಕಿತ್ತು ಪೋಮರಸುಕು ತನ್ನಾಟಿಲ್ವ ಕೃ|ತಿಯಾಣ ಆಣತಪ್ಪಿನಾಡು ವಿಡುವಿತ್ತೆಯತ್ತುಕ್ಕು |ವಿಡಕ್ಕಡವರ್ ಪ್ರಕೃತಿ ಪಡಕ ಮುನ್ತಾಯ ಪಣಿಯಂಚು| ಮಹಾಭಾರತಮೊನ್ರು ಇಚ್ಚಿಲವಿಣ್ರು ತಪ್ಪಿ|ಲ್ ನಾಳುಕ್ಕಿರಣ್ಣ ರೈಕ್ಕಾಣಮ್ ಪದಿನೆಣ್ಣೇಶಿ ಪಡಪಿಡಿಚ್ಚ ಪಲ್ಲಾಯಿರವರ್ ವಳಂಚಿಯರ್ ರಕ್ಕಿಕ್ಕ|ವ ಕಂಡಾಲ್ಯೆಯ ಸನ್ಯಾಸಿ ಕಳುಮ್ಯಾರಸು ಮುನ್ತಾಯ| ಐದಿಲ್ಮಿಕ್ಕದು ಬಂಡಾರಪ್ಪೊತ್ತ ಕತ್ತಿಲುಮ್| ಚೆಪ್ಪೇಟ್ಟಿಲು



ಮುರಕ ಪಕಂಡಲ ಅಯಾರಿ ಎಳುತ್ತ.

ಮಂಗಳ ಆಡ್. ಭಕ್ತಿಲ್ ಗುರುಕ್ ನಮಸ್ಕಾರ ಮಾಡಿತ್ ಕನ್ಯಾರಾಶಿಲ್ ಬೃಹಸ್ಪತಿ ಉಳ್ಳ ವೃಷ್ಟಿಕ ಮಹಾಮಾಸತ್‌ರ ಬೇಳಾಚೆರ ಪಿತ್ಯಾಂದ್ ಎಲ್ಲಾ ಗುರುವಕ್ ಆನಂದರೂಪಿ ಆಯಿತುಳ್ಳ ಶಾಸನತ್‌ನ ಬೋಧರೂಪನಾನ ನಾನ್ ಭಗಂಡಾಶ್ರಮತ್ ಸಾ ಮಾಡುವಿ.

ಮೇಲ್ಪುಂಡಿ ಕುಳ್ಳಾಯರಸ ಈ ನಾಡ್‌ನ ಆಳಿಯುಂಡ್ ಇಪ್ಪಕ ಶ್ರೀಮತ್ ಪುರುಷೋತ್ತಮ ಪರಿಷತ್‌ರ ಬೋಧರೂಪ ಭಾಗವರ್ ರಾಜ ಇನ್ನತವು ಓರ್ ತಗಡ್‌ರ ಶಾಸನ ಕೆತ್ತಚಿಟ್ಟಿತ್. ಇದತ್ ಎಳ್ಳೊನ ದಿನಖರ್ಚ್‌ನ ಓರ್ ದಿನಕಾಚೇಂಗೂ ಆಣಾಳಾಡ್, ಪೊಣ್ಣಾಳಾಡ್, ಸ್ವತಃ ಕುಳ್ಳಾರಸನೆ ಆಡ್, ದಾರಾಚೇಂಗೂ ನಿಪ್ಪಚಿಟ್ಟಿಕ ಅಯಿಂಗಕ್ ಈ ನಾಡ್‌ನ ಆಳುವ ರಾಜಾಜ್ಞೆನ ಮೀರ್‌ನನ್ನೆ ಆಪ. ಅನ್ನತಯಿಂಗಕ್ ಓರ್ ದಿನಕ್ ಶಿಕ್ಷೆ, ಪನ್ನೆರಂಡ್ ಕಾನಂ ಪಿಳ್ಳಾ ದೇವಕ್ ನಿತ್ಯ ನೈವೇದ್ಯ ಕಾಣಿಕೆರ ದಂಡರಟ್ಟಿ ಪಿಳ್ಳಾ ಮಿಳ್ಳಾಕ್ ಸಹ ಪೂಜಾ ಕಾರ್ಬಾರ್‌ನ ಓರ್ ವಾರತ್‌ರ ಮಟ್ಟಿಕೆ ನಿಪ್ಪಚಿಟ್ಟಿಕ ರಾಜಂಗ್ ಎಳ್ಳ ಒರೆರ ಪನ್ನೆರಂಡ್ ಪೊನ್ನಾರ ಪೊನ್‌ನ ದಂಡ ಆಯಿತ್ ಕೊಡ್‌ಕೊಂಡು.

17 ಕೆಡ್‌ತ ಬೊಳ್‌ಚ ಇಪ್ಪ. ದಿನಾ ನೈವೇದ್ಯತ್‌ರನ್ನತಾಂಗ್ ಪೊದುವಾಳತ್‌ಂಜ ತರಂಡಿಯ ಅಕ್ಕಿರ ಮೊತ್ತ 26 ನಾಳಿ. ಉಚ್ಚ ಪೂಜೆಕ್ 2 ನಾಳಿ ಪಿಳ್ಳಾ ಪಾವ್‌ಕಾಯಿತ್ 4 ನಾಳಿ. ವೃಷ್ಟಿಕ ಮಾಸತ್ ಎಕ್ಟೋಲು 32 ಪೂವ್‌ರ ಮಾಲೆ ಪಿಳ್ಳಾ 6 ಬೊಳ್‌ಚತ್‌ನ ಸಹ ಪೂಜೆಕ್ ಎತ್ತಚಿಡೊಂಡು. ಓರ್ ನಾಳಿ ಎಣ್ಣೆಕ ಇಕ್ಕತ ಕಾಲ ಸೇರ್.

ತಿರಿಕೆ ಪಿಳ್ಳಾ ಪೂಜೆರ ಅವಶ್ಯಕತೆನ ಪರಿಕ್ಷೆ ಮಾಡ್‌ನಪಿಳ್ಳಾ ಅಮಚ್ಚಾನ, ನಿರ್ಕ್ ಪಡ್‌ತನನ್ನೆ ದಾರ್ ದೇವಕ್ ಎತ್ತಚಿಡುಲಿಯೊ ಅನ್ನತಯಿಂಗಕ್ ಏದ್ ನಾಡ್‌ಲ್ ಪುಟ್ಟಚೊ ಆ ನಾಡ್‌ರ ರಾಜನ ಕೊಲ್ಲುವಕ್ ಒಳಸಂಚ್ ಮಾಡುವ ರಾಜದ್ರೋಹಿರನ್ನೆ ನೋಟುವ. ಒರಾತತ್ ಕೆಟ್ಟನ ಓರ್ ವ್ಯಕ್ತಿನ ಎಡ್‌ತೆ ಬರಿಂಜ ಪುಡ್‌ಚಿಂಡ್ ಅಂವಂಡ ಮೂಕ್‌ನ ಮುರಿಪ ಪಿಳ್ಳಾ ತಾನ್ ಮಂಗಲ ಕಯ್ಯತ ಚೋರೆ ಸಮ್ಮಂಧಿಯಡ ಕೂಡೆ ಮಂಗಲ ಕೈಚವ ವ್ಯಕ್ತಿಕ್ ಆಪ ಶಿಕ್ಷೆಕ್ ಗುರಿಯಾಪ. ಕೊಡಿಲ್ ಎಣ್ಣೆನ ದಂಡತ್‌ನ ಏದ್ ಮನುಷ್ಯ ಕೊಡ್‌ಪಾಲಿಯೊ ಅನ್ನತಯಿಂಗ್‌ಳ ನೋಟಿತ್ ಪಿಳ್ಳಾ ಕೇಟಪಿಳ್ಳಾ ಸಹ ಆ ಮನುಷ್ಯಂಡ ಮೀದ ರಾಜ ಉದಾಸೀನ ಆಯಿತಿಂಜಕ ನಾಡ್‌ರ ಜನ ಅಂವಂಗ್ ಶಾಪ ಇಡುವ.

ಜನ ಅಂಜಿ ತರತ್‌ರ ಸೇವೆ ಮಾಡೊಂಡು. ಇದತ್ ಮಹಾಭಾರತ ಪಠಣ ಒಂದ್. ಇದತ್ ಏದೇ ಓರ್ ತರತ್‌ರ ಖರ್ಚ್‌ನ ನಿಪ್ಪಚಿಟ್ಟಿಕ ಸಾ ಪ್ರತಿ ದಿನಕ್ ದಂಡರೆ ಕಾನಂ ದಂಡ ಇಪ್ಪ.



18 ದೇಶತರ ಆಯುಧ ಪುಡ್‌ಚೆ ಚೆನ್ನಂಗ್ ಆಯಿರ ಜನ ಪಿಳ್ಳಾ ವರ್ತಕಂಗ ವಂಗಡ ತಿರಿಕೆನ ಕಾಪಾಡಡ್. ಸನ್ಯಾಸಿಯ, ರಾಜಂಗ ಇನ್ನತವು ಅಭಿವೃದ್ಧಿಯಾಡ್. ಬಾಕಿ ಉಳ್ಳಪು (ಇಲ್ಲಿ ಎಳ್ಳತೆ ಬುಟ್ಟ್ ಪೋನದ್) ಭಂಡಾರತರ ಪುಸ್ತಕತೂ, ತಾಮ್ರಂಗಡಲೂ ಕಾಂಬ ಕೊಟ್ಟುವ. ಅಮ್ಮಚ್ಚಾನ್ - ಅಮಾತ್ಯಾನ್ ಎಣ್ಣುವಾಂಡ ತದ್ಭವ. ರಾಜ್ಯತರ ಮಂತ್ರಿಂದ್ ಅರ್ಥ ಆಪ. ಪೊದವಾಳಂಗ ಎಣ್ಣಕ ತಿರಿಕೆಲ್ ದೇವಡ ಪೂಜೆಕ್ ಸಾಮಾನ್‌ನ ರೆಡಿ ಮಾಡಿ ಬೆಪ್ಪವು. ಇಕ್ಕಲೂ ಪೊದುವಾಳಂಗ ಎಣ್ಣುವ ವರ್ಗತರ ಜನ ಮಲಬಾರ್‌ರ ಪಯ್ಯಾನೂರ್‌ರ ಸುತ್ತಮುತ್ತ, ಕೊಚ್ಚಿನ್‌ಲ್ ಉಂಡ್‌ಂದ್ ಗೊತ್ತಾಪ.

ಕೊಡಿಯತ ದಂಡ್ ಶಾಸನತನ ಪಾಲೂರ್ ಪಿಳ್ಳಾ ಭಾಗಮಂಡಲ ತಿರಿಕೆಲ್ ಬೆಚ್ಚ ಬೋಧರೂಪ ಭಾಗವರ್ ಅರಸ ಉತ್ತರ ಮಲಬಾರ್‌ಕಾರಾಂದ್ ಈಂಗ್ ಮುಪ್ಪಡೆ ಎಣ್ಣಿತ್. ಈ ಹೇಳಿಕೆನ ಸಮರ್ಥನೆ ಮಾಡುವಕ್ ಈ ಕೋದತ ಕಾರಣ ಕೊಡ್‌ಕೊಲು. ಈ ಶಾಸನತ್ ಗ್ರಂಥಾಕ್ಷರ, ತಾಳೆ ಗರಿ ಎಳ್ತ್, ತಮಿಳ್ ಪಿಳ್ಳಾ ಮಲಯಾಳ ಅಕ್ಷರ ಉಂಡ್. ತಾಳೆ ಗರಿ ಎಳ್ತ್ ಪಿಳ್ಳಾ ಗ್ರಂಥಾಕ್ಷರ ಕ್ರಿ.ಶ. 11ನೆ ಶತಮಾನಕೆತ್ತನೆ ಇಕ್ಕತ ತಮಿಳ್ಳಾಡ್ ಪಿಳ್ಳಾ ಕೇರಳತರ ಲಿಪಿ ಆಯಿತಿಂಜತ್. ಕ್ರಿ.ಶ. 11ನೆ ಶತಮಾನ ಕೈಂಜಪಿಳ್ಳಾ ತಮಿಳ್ ಲಿಪಿ ಬಾತ್. ಅಲ್ಲಿಂಜ ಚೆನ್ನಂಗ್ ಸಮಯ ಕೈಂಜದು ಮಲಯಾಳ ಲಿಪಿನ ಕಂಡ್‌ಪುಡ್‌ಚತ್. ಆಚೀಂಗಿ, ಮಲಯಾಳ ತಕ್ಕ ಪರಯುಪ ಜಾಗತ್ ಸುಮಾರ್ ಕ್ರಿ.ಶ. 18ನೆ ಶತಮಾನಕೆತ್ತನೆ ಮಲಯಾಳ ಲಿಪಿ, ತಾಳೆ ಗರಿ ಎಳ್ತ್ ದಂಡೂ ಸಾಮಾನ್ಯವಾಯಿತ್ ಎಳ್ತ್‌ಲ್ ಬಳಕೆ ಆಯಿಂಡಿಂಜತ್‌ಂದ್ ಕೇಳಿಪಟ್ಟ ಚರಿತ್ರಕಾರ ಕೆ.ಎ.ನೀಲಕಂಠ ಶಾಸ್ತ್ರಿ ತಂಗಡ ಪುಸ್ತಕತ್ ಎಳ್ಳಿತ್. ಗ್ರಂಥಾಕ್ಷರ ಎಣ್ಣಕ ತಮಿಳ್‌ನೆ ಹೋಲಿಕೆಯಾಪ, ಆಚೀಂಗಿ, ತಮಿಳ್‌ಲ್ ಇಲ್ಲತ ಚೆನ್ನಂಗ್ ಅಕ್ಷರ (hard) ಸಹ ಓರ್ ಲಿಪಿ. ಸಂಸ್ಕೃತತರ ಚೆನ್ನಂಗ್ ಶಬ್ದತನ ಎಳ್ಳುವಕ್ ತಮಿಳ್‌ಲ್ ಚೆನ್ನಂಗ್ ಸಂಸ್ಕೃತತರ ಉಚ್ಚಾರತರ ಅಕ್ಷರ ಇಲ್ಲತಾಂಗ್ ಅನತ ಶಬ್ದತನ ಗ್ರಂಥಾಕ್ಷರತ್ ಪಂಡ್ ಪಂಡಿತಂಗ್ ಎಳ್ಳುವ ಇಂಜತ್. ಅಂತೂ ಕೊಡಿಯತ ಶಾಸನತರ ಲಿಪಿ ಎಲ್ಲ ತಮಿಳ್‌ನಾಡ್ ಪಿಳ್ಳಾ ಕೇರಳಕ್ ಸಮ್ಪ್ರದ್ಧಪಟ್ಟಾಂಗ್ ಈ ಶಾಸನತ್ ಬೆಚ್ಚ ರಾಜ ಆ ಕಾಲತ್ ಸಾಧಾರಣ ಇದೇ ಲಿಪಿ ಪ್ರಚಾರತ್ ಇಂಜ ತಮಿಳ್ಳಾಡ್, ಕೇರಳಕ್ ಕೊಡ್‌ನಂವಂದ್ ಎಣ್ಣೊಲು. ದಂಡನೆದಾಯಿತ್ ಈ ಶಾಸನತ್ ಚೈದ, ಅಪ್ಪಡಿ, ಪಿರಂದ, ಒನ್ನು ಇನ್ನತ ತಮಿಳ್‌ಪದ ಕಂಡುಂ, ಕೇಟ್ಟುಂ, ಕಟ್ಟಿ, ಪಿಡಿಚ್ಚು ಇನ್ನತ ಮಲಯಾಳ ಪದ, ಪೊದುವಾಳಂಗ ಎಣ್ಣುವ ಮಲಬಾರ್‌ರ ಓರ್ ಜಾತಿರ ಜನಡ ಪೆದ, ಕಾಣಂ ಎಣ್ಣುವ ತಮಿಳ್ ನಾಣ್ಯತರ ಪೆದ ಉಳ್ಳದ್, ಕೊಡಿಯತ ಶಾಸನ ತಮಿಳ್‌ನಾಡ್ ಪಿಳ್ಳಾ ಕೇರಳಕ್ ಸಮ್ಪ್ರದ್ಧಪಟ್ಟ ರಾಜಂಗಳುಂಡ್ ಬೆಪ್ಪಚಿಟ್ಟದ್ ಎಣ್ಣುವಾಂಗ್ ಸಮರ್ಥನೆ ತಪ್ಪ. ಭಾಗವರ್ ಎಣ್ಣುವದ್

ತಮಿಳ್ ಪೆದ. ಧಂಡನೆ ಶಾಸನ ಎಳ್ತಕಾರ ಪಕಾಂಡಲ ಆಯಾರಿ ಎಣ್ಣುವ ಆಚಾರಿ ಎಣ್ಣುವಾಂಡ ಅಪಭ್ರಂಶ ರೂಪ ಆಯಿತಿಪ್ಪ ಸಾಧ್ಯತೆ ಉಂಡ್.

ಪಂಡ್ ಕಾಲತ್ ಇಕ್ಕತನ್ನಕೆ ವೆಹಿಕಲ್ ಪೋಪ ಬಟ್ಟೆ ಇಂಜಾಲೆ. ಕುಂದ್‌ಕಾಡ್ ಪತ್ತಿತ್, ಕಾಡಾಲೆ ನಡಂದಂಡ್ ಪಿಳ್ಳಾ ಅತ್ತ, ಕುದರೆ, ಆನೆ ಪೋಪ ಅಗಲ ಕಮ್ಮಿ ಉಳ್ಳ ಬಟ್ಟೆ ಇಂಜತ್. ಆ ನೇರತ್ ಪಾಲೂರ್ ಭಾಗಮಂಡಲತರ ನಾಡ್ ಏರ ಕಾಡಾಂಜ ದುಂಬಿತಿಂಜಾನುಂಡ್ ಈ ನಾಡ್ ಪಡಿಞಾರಲ್ ಮಲಬಾರ್ ಜಿಲ್ಲೆಕ್ ತೊಟ್ಟುಂಡ್ ಇಂಜಾನುಂಡ್ ಉತ್ತರ ಮಲಬಾರ್‌ರ ತಮಿಳ್ ಪಿಳ್ಳಾ ಮಲೆಯಾಳತರ ಮಿಶ್ರ ಸಂಪ್ರದಾಯತರ ರಾಜನೊಬ್ಬ ಚೆನ್ನಂಗ್ ಕಾಲ ಈ ನಾಡಲ್ ಅಧಿಪತ್ಯ ಪಡ್‌ಂದಿತ್ ಇಂಜತ್‌ಂದ್ ಎಣ್ಣೊಲು.

ಭಾಗಮಂಡಲತರ ಕುಳ್ಳಾರಸ ಮಲಬಾರ್‌ಕಾರಂದ್ ಅವಂಡ ಪೆದತ್ ಗೊತ್ತಾಪ. ಕೊಡಗ್ಗರ ಶಾಸನತರ ಆಧಾರತ್‌ಂಜ ಆ ಕಾಲತರ ಚರಿತ್ರನ ಎಳ್ವನ ರೈಸ್, ಬೋಧರೂಪ ಭಾಗವರ್ ರಾಜ ಹಾಸನ ಜಿಲ್ಲೆರ ಮಹಾರಾಜ ದುರ್ಗತರ ರಾಜ ಆಯಿತಿಂಜಾಂಗ್ ಕೊಡತ ಆಧಾರ ಮೂಡುಗೆರೆ 87ನೆ ಶಾಸನತ್ ಬೋಧ ಮಹಾದೇವ ಎಣ್ಣುವಂವ ಕ್ರಿ.ಶ. 1321ತ್ ಮಹಾರಾಜ ದುರ್ಗತ್ ಆಳಿಯಂಡ್ ಇಂಜತ್‌ಂದ್ ಎಳ್ವನದ್. ಆನಗುಂಡ್ ಈ ಶಾಸನತರ ಬೋಧರೂಪ ಭಾಗವರ್ ಆ ವಂಶಕಾರ ಆಯಿತಿಕ್ಕೊಂದ್ ಕಲ್ಪನೆ.

ಪಾಲೂರ್ ಭಾಗಮಂಡಲತರ ಶಾಸನತರ ಕಾಲ ಸುಮಾರ್ 1371ನೆ ಇಸವಿ ಆಯಿತಿಕ್ಕೊಂದ್ ರೈಸ್ ಅಭಿಪ್ರಾಯ ಪಡುವ. ಮಹಾರಾಜ ದುರ್ಗತರ ರಾಜನೆ ಈ ಶಾಸನತನ ನೆಟ್ಟಿತಿಂಜಕ ಹಾಸನ ಜಿಲ್ಲೆರ ನೈಋತ್ಯ ಭಾಗತ್‌ಂಜ ಕೊಡಗ್ಗರ ಪಶ್ಚಿಮ ಭಾಗತರ ತಾವುನಾಡ್, ಬೇಂಗ್‌ನಾಡ್ ಪಿಳ್ಳಾ ಕುಯ್ಯಂಗೇರಿ ನಾಡ್‌ರ ಪಾಲೂರ್ ಊರ್‌ಕಾರಕ್ ಉಳ್ಳ ಜಾಗ ಎಲ್ಲ ದುರ್ಗತರ ರಾಜಂಡ ಅಳ್ವಿಕೆಕ್ ಒಳಪಟ್ಟಿಕ್ಕು. ಆಚೇಂಗಿ, ಈ ರಾಜ ಕೊಡಗ್ಗರ ಉತ್ತರ ಭಾಗತನ ಆಳಿಯಂಡ್ ಇಂಜತ್‌ಂದ್ ಎಣ್ಣುವಾಂಗ್ ಶಾಸನತಿಂಜಾಡ್, ಬೋರೆ ಎಳ್ತನುಂಡಾಡ್ ಏದೇ ಆಧಾರ ಕೊಟ್ಟುಲೆ. ಮಹಾರಾಜ ದುರ್ಗಂಡ ರಾಜಂಗ ಕೊಡಿಯತ ಶಾಸನತನ ಎಳ್ವಚಿಟ್ಟಿತಿಂಜಕ ಅದ್ ಕನ್ನಡತೆ ಇರೊಂಡಿಂಜತ್. ಆನಗುಂಡ್ ಬೋಧನರೂಪ ಭಾಗವರ್ ಉತ್ತರ ಮಲಬಾರ್‌ರ ರಾಜಾಂದ್ ತೋಂದುವ.

ಆಚೇಂಗಿ, ಈ ಶತಮಾನತ್ ಕೊಡಗ್ಗರ ಉತ್ತರ ಭಾಗ ವಿಜಯನಗರ ಸಾಮ್ರಾಜ್ಯತರ ಅಳ್ವಿಕೆಕ್ ಒಳಪಟ್ಟ ನಾಯಕಂಗಡ ಪುಡ್‌ತತ್ ಇಂಜತ್‌ಂದ್ ಮುಳ್ಳೂರ್ ನಾಡಲ್

ಚಂದ್ರನಾಥ ಬಸ್ತಿರ ಪಕ್ಕತ್ ಉಳ್ಳ ಶಿಲಾ ಶಾಸನತ್ ಗೊತ್ತಾಪ. ಇದತ್ ಬಾಹುಬಲಿ ದೇವನೆಂಬ ಜೈನ ಸನ್ಯಾಸಿ ದಾನ ಆಯಿತ್ ಪಡ್ಂದ ಬಸದಿನ ಉದ್ಧಾರ ಮಾಡುವಕ್ ರಾಜಾಧಿರಾಜ ಕೊಂಗಾಳ್ವ ತಾಂಡ ಅವ್ವ ಪೋಚ್ಚಬ್ಬರಸಿರ ಪುಣ್ಯಾರ್ಥ ಆಯಿತ್ ಕೊಂಗಾಳ್ವರುಗ್ಗಿಣಿ ದೇವಿರ ರಕ್ಷಕ ದಳತ್‌ರ ವಿಜಯದೇವನ ಮೂಲತ್‌ರ ಮೂರ್ತಿನ ಪ್ರತಿಷ್ಠಾಪನೆ ಮಾಡ್‌ಚಿ ಪಿಳ್ಳಾ ಈ ಜನಕ್ ಚೆನ್ನಂಗ್ ಭೂಮಿನ ಕೊಡ್‌ತತ್.

ಈ ದಾನ ಮುಂದರಿಯೊಂಡೊಂದ್ ವೀರನಾದ ಹರಿಹರ ರಾಯ ಮುಳ್ಳೊನಾಡ್‌ರ ಗುಂಡಪ್ಪ ದಂಡನಾಯಕ ವೀರಂದ್ ಗುರ್‌ತ್‌ಚಿಟ್ಟುಂಡ ಗೊಂಕಾರಚ್ಚಿ ನಾಯಕಂಗ್ ಸ್ವಇಚ್ಚೆಲ್ ಕೊಡ್‌ತತ್. ಸಿದ್ಧಗೌಡ ಪಿಳ್ಳಾ ಬೋರೆ ಪ್ರಚೆಯಳ ಕೂಟಿಯಂಡ್ ಅಣ್ಣಾದೇವಿರ ಕುಮಾರನಳ್ಳಿಕ್ ಭೀಮಾಪುರ ಎಣ್ಣುವ ಪೆದ ಬೆಚ್ಚಿತ್, ನಾಲ್ ತೆರಿಲ್ ನಾಲ್ ಕಲ್ಲ ನೆಟ್ಟಿತ್ ಕಾರಗೋಡ್‌ಕ್ ಅಣ್ಣಾಂಗಪುರಂದ್ ಪೆದ ಬೆಚ್ಚಿತ್, ಕುಶಿಲ್ ಪಾರ್ಶ್ವನಾಥಂಗ್ ಕೊಡ್‌ತತ್. ಗೋಮಾಳಕ್, ಅನ್ನನೆ ಭೂಮಿನ, ಬೇಲ್‌ನ ದಾನಕ್ ಕೊಡ್‌ತತ್. (ಈ ಬೇಲ್‌ರ ವಿವರ ಶಾಸನತ್ ಉಂಡ್) ಅರ್ಜುನ ಈ ಶಾಸನ ಎಳ್ಳೆಚಿಂದ್ ಉಂಡ್. ಈ ಶಾಸನತ್‌ಂಜ ವಿಜಯನಗರತ್‌ರ ಸಾಮ್ರಾಜ್ಯತ್‌ರ ಸರ್ಕಾರ ಕೊಡಗರ್ ಉತ್ತರ ಭಾಗತ್‌ರ ನಾಡ್‌ಕ್ ಪಬ್ಬಿತುಳ್ಳಂದ್ ಗೊತ್ತ್‌ಕ್‌ಟ್ಟುವ. ಆ ಶಾಸನ ಇನ್ನನೆ ಉಂಡ್.

ಸ್ವಸ್ತಿ ಶ್ರೀ ಶಕವರ್ಷ 1313ನೆ ಪ್ರಮೋದೋತ ಸಂವತ್ಸರತ್‌ರ ವೈಶಾಖ ಸುದ್ದಿ ಭಾನವಾರದಲ್ಲು ಶ್ರೀ ಮೂಲಸಂಘ ದೇಸಿಗಣ ಪುಸ್ತಕ ಗಚ್ಚಿದ...ಕೊಂಡ ಕುಂದಾನ್ವಯರಾಯ್ಕ ಸುಬೇನ್ದು ಕಂದ ವಿಜಯ ಕೀರ್ತಿ ದೇವಡ ಪ್ರಿಯಶಿಷ್ಯರಪ್ಪ ಬಾಹುಬಲಿ ದೇವ ಈ ಸ್ಥಾನಮಂ ಪಡೆದುದ್ದರ್ದಿದರು ಶ್ರೀ ರಾಜಾ ಕೊಂಗಾಳ್ವರುಗ್ಗಿಣಿ ದೇವಿಯ ದೇಹಾರದ ವಿಜಯ ದೇವರ ದ್ವಾರಾ ನೆಲೆ ನಿಂದಂದು ಸ್ವಜನನಿ...ತಪುತ್ರ...ಆ ಪೋಚ್ಚಬ್ಬರಸಿಗೆ ಪುಣ್ಯಾರ್ಥವಾಗಿ ಪ್ರತಿಷ್ಠೆಯಂ ಮಾಡ್ತಿ ಅಂಗರಂಗ ಭೋಗ ಬಿಟ್ಟು ಊರು ಅಣಿಲವಾಡಿಯ ನುಲಬಿ ಹಳ್ಳಿಯಂ ನಾಡು ದರಶಿನ ಹಳ್ಳಿಮುಳ್ಳೂರ ಹಾರುವ ಹಳ್ಳಿ ಏ ಸೀಮೆ ಮೂಡಹರಿವ ಹಳ್ಳ ತೆಂಕ... ಬಡಗಣ ಅಗಳ ನಟ್ಟ ಕಲ್ಲು ಪಡುವ ಬೆಟ್ಟ ಬಡಗಣ ಅ...ಕಾರೆ ಗೋಡ.. ಹಳ್ಳಿಯ ಸೀಮೆ ಮೂಡನೆಲ್ಲಿಯ ಹೊಳೆ ನಟ್ಟ ಕಲ್ಲು ತೆಂಕ ಬೆಟ್ಟದ... ಬಡಗ ಕೆರೆ ಏರಿ ಈಶಾನ್ಯ ನಟ್ಟ ಕಲ್ಲು ಮುಳ್ಳೂರ ಗದ್ದೆಗಳಿಗೆ ಲವೋನಿ ಖ 1... ಗೆರೆಯ ಕೆಳಗೆ ಖ 2 ಆಗದೊಳು...ಕೊ ಕನಗೊಡಲ..ಕೊ 10...ಗಾಲ ಖ ಕೊಡ ಗೊಡಲು ಕೊ 2 ಅಚ್ಚಗದೆ ಕೊ 10 ಲೋಕಗದ್ದೆ ಕೊ 10...15 ಸಂಪಗೆ ಗದ್ದೆ ಖ 1 ಬೋಳಗದ್ದೆ ಖ ಕೊ 9 ಆಲದ ಕಾಡಿ ಖಕೊ 10 ಅಸರವಕ್ಕಿ ಖ1 ಕೊ..ವೆಸಿಕುನಿ ಖ 1ಹೆಣ್ಣನೂರ ಭೂಮಿ ಖ 2 ಒಂದು ಗಾಣದೆಣ್ಣೆ ಬಿಟ್ಟಿದು

ಅಚ್ಚನ್ನಾರ್ಕ ಸರ್ವಾಜ ನಾನಂದರ್ ದೀಕ್ಷತೆಯ ಪಟ್ಟಿ ಓದಿ ಪವರ್ತಿಸೆಯಾಗೆ  
ವೀರಹರಿ ಹರೋವ್ವೀಶ ಪಲವರಂಕಾದಿರಾಯ ಮರವೊಕ್ಕರ ಕಾವ ಶರಣಾಗತ ವಜ್ರ  
ಪಂಜರ ಶಂಖ ಗಜದಾರ ಭೃತ್ಯಗೊಂಕಾರಡ್ಡಿ ನಾಯ್ಕಗೆ ಗುಂಡಪ್ಪ ದಣ್ಣನಾಯ್ಕರು  
ಕುರಿತ್ತು ಮುಳ್ಳುನಾಡಂ ಕುಡುವಂತರಾದರ್ ಸ್ವಭಾವಾರ್ಥವಾಗಿ ಸಿದ್ಧಗೌಡ ಪ್ರಚೆಗಳ  
ಕರಕೊಂಡು ಅಂಣಾ ದೇವಿಯ ಕುಮಾರನ ಹಳ್ಳಿಯ ಭೀಮಾಪುರಮೆಂದು ಹೆಸರಿಟ್ಟು  
ಚತುಸ್ಸೀಮೆಯ ಕಲ್ಲನೆಟ್ಟು ಧಾರಾ ಪೂರ್ವಕವಾಗಿ ಪಾರ್ಶ್ವ ನಾಥಂಗಿತ್ತರೂ ಕಿ  
ರತ್ಯದುಗಕ್ಕೆ ದಾನ ಶಾಲೆ ಗೋಮಾಲೆ ಜಯಮಾಳ ಪುರಿಯಲ್ಲಿ ಗದ್ದೆ ಖಿ3 ಗಣಪತಿ  
ಗೋಡಲು ಖಿ3 ಹುಣಿಸೆದಾಳು ಖಿ ಎಳುತ್ತಾರ್ಜುನ ಶಾಸನಂ|| ಶ್ರೀ

ಈ ಶಾಸನತರ ಆಖೀರಕ್ ಎಣ್ಣಾನ ಹರಿಹರ ವಿಜಯನಗರ ಸಾಮ್ರಾಜ್ಯತರ 3ನೆ  
ರಾಜ ಇಮ್ಮಡಿ ಹರಿಹರ ಕ್ರಿ.ಶ. 1376ತಂಜ 1404ಕೆತ್ತನೆ ವಿಜಯನಗರತ  
ಆಳಿಯಂಡ್ ಇಂಜತ್. ಈ ನೇರತ್ ಕೊಡಗ್ಗರ ಉತ್ತರತರ ದುರ್ಗತರ ಅಧಿಪತಿಯ,  
ಬೇಲೂರರ ನಾಯಕಂಗ, ವಿಜಯನಗರ ಸಾಮ್ರಾಜ್ಯತರ ಪೇಲಧಿಕಾರತನ  
ಒತ್ತಂಡಿಂಜತ್.

## 10. ನಂಜರಾಯಪಟ್ಟ ತರ ಚಿಂಗಾಳ್ತಂಗ

14ನೆ ಶತಮಾನತ ಕೊಡಗ್ಗರ ಬೋರೆ ಬೋರೆ ನಾಡ್ನ ಆಳ್ವನ ನಾಯಕಂಗಡ  
ಪೆದ ಆಡ್, ಚರಿತ್ರೆ ಆಡ್ ನಂಗಕ್ ಪೂರ್ತಿ ಗೊತ್ತಿಲ್ಲೆ. ಆ ಶತಮಾನತ ಕೊಡಗ್ಗರ  
ತಾವುನಾಡ್, ಬೇಂಗ್ನಾಡ್, ಕುಯ್ಯಂಗೇರಿ ನಾಡ್ ಪಾಲೂರ್ ಊರನ ಬೋಧರೂಪ  
ಭಾಗವರ್ ರಾಜಂಡ ಅಧಿಕಾರತ್ ತುಂಡರಸಂಗ ಕೊಡಗ್ಗರ ಉತ್ತರ ಭಾಗತರ ನಿಡ್  
ಬಲಹೆ ಹೋಬಳಿನ ವಿಜಯ ನಗರತರ ರಾಜಂಡ ಕೇದತ ನಾಯಕಂಗ ಆಳಿಯಂಡ್  
ಇಂಜತ್ಂದ್ ಶಾಸನತಂಜ ಅರಂಜಿತ್. ಕೊಡಗ್ಗರ ಬಾಕಿ ನಾಡ್ನ ಅಕ್ಕ ದಾರ್  
ಆಳಿಯಂಡ್ ಇಂಜತ್ ಗೊತ್ತಿಲ್ಲೆ.

ಆಚೇಂಗಿ, 15ನೆ ಶತಮಾನತರ ಮಧ್ಯಕಾಲತಂಜ 17ನೆ ಶತಮಾನತರ  
ಮಧ್ಯಕಾಲಕೆತ್ತನೆ ಕೊಡಗ್ಗರ ಪೂರ್ವ ತೆರಿಸಿಮೆನ ಇಕ್ಕತ ಪಿರಿಯಾಪಟ್ಟ ತಾಲೂಕ್ನ  
ನಂಜರಾಯಪಟ್ಟ ತರ ಚಿಂಗಾಳ್ತರಸಂಗ ಆಳಿಯಂಡ್ ಇಂಜತ್ಂದ್ ಶಾಸನತನುಂಡ್  
ಅರಂಜಿಬಪ್ಪ. ಆ ಮನೆತನತರ ಚರಿತ್ರೆ ಇನ್ನನೆ ಉಂಡ್.

## ನಂಜರಾಜ ಪಟ್ಟಣ ಚಿಂಗಾಳ್ವರಸಂಗ :

ಕ್ರಿ.ಶ. 10ನೆ ಶತಮಾನತಾಂಜ 16ನೆ ಶತಮಾನಕೆತ್ತನೆ ಚಿಂಗಾಳ್ವಂಗ, ಗಂಗರಸಂಗ, ಚೋಳಂಗ ಪಿಳ್ಳಾ ಹೊಯ್ಸಳಂಗಡ ಮಾಂಡಲಿಕಂಗಲಾಯಿತ್ ಕೊಡಗುರ ಏರ ಭಾಗ, ಪಿರಿಯಾಪಟ್ಟಿ ಪಿಳ್ಳಾ ಹುಣಸೂರರ ಏರ ಭಾಗತನ ಆಳಿಯಂಡ್ ಇಂಜತ್. ಕ್ರಿ.ಶ. 1245ತ್ ಈ ಚಿಂಗಾಳ್ವಂಗ ಕೊಡಗು, ಶ್ರೀರಂಗಪಟ್ಟಣತನ ತಂಗಡ ರಾಜಧಾನಿ ಮಾಡಿಯಂಡತ್. ಈ ನೇರತ್ ಚಿಂಗಾಳ್ವಂಗ ಲಿಂಗಯತಂಗಲಾಯಿತ್ ಇಂಜತ್. ಇಯಂಗಡ ಕುಲದೇವ ಬೆಟ್ಟದಪುರ ಕುಂದಾರ ತಿರಿಕೆರ ಕೂಳ್‌ದಾನಿ ಮಲ್ಲಿಕಾರ್ಜುನ ದೇವ. ಈ ಮನೆತನತಾರ ಚಿಂಗಾಳ್ವಂಗ 13ನೆ ಶತಮಾನತಾರ ಆಖೀರಿಕೆತ್ತನೆ ಆಳ್‌ಚಿ. ಅಲ್ಲಿಂಜ ಪುನಾದಿಯ ಚಿಂಗಾಳ್ವರಸಂಗಡ ಪೆದ ಕೇಟ್‌ಬಪ್ಪ 15ನೆ ಶತಮಾನತಾರ ಸುಮಾರ್ ಮಧ್ಯಭಾಗತಾಂಜಿ. 13ನೆ ಶತಮಾನತಾಂಜ 15ನೆ ಶತಮಾನತಾರ ಮಧ್ಯಕೆತ್ತನೆ ಚಿಂಗಾಳ್ವರಸಂಗ ತಾಕತ್ ಕಳಂದಂಡನ್ನಕೆ ಕೊಡಗುರ ಶ್ರೀರಂಗಪಟ್ಟಣತಾರ ಸುತ್ತು ಹಳ್ಳಿನ ಆಳಿಯಂಡ್ ಇಂಜತಂದ್ ಕಾಂಬ. ಈ ರಾಜಂಗ ಸಾಹಿತ್ಯತ್ ಆಸಕ್ತಿ ಉಳ್ಳವು. ಇಯಂಗಡ ಓರ್ ದಂಡನಾಯಕ ದೇವಪ್ಪ ಎಣ್ಣುವಂವ ಬಲ್ಯ ಕವಿ ಆಯಿತಿಂಜತ್.

ಅಲ್ಲಿಂಜ 15ನೆ ಶತಮಾನತ್ ಪ್ರಬಲ ಚಿಂಗಾಳ್ವಂಗ ಪಂಡೇತ ಚಿಂಗಾಳ್ವಂಗಡ ಪರಂಪರೆ ರಾಜಂಗಲೊ/ ಅಯಿಂಗಡ ಇಣ್ಣೋರ್ ಶಾಖೆಕ್ ಕೂಡನ ರಾಜಂಗಲೊ ಗೊತ್ತಾಪುಲೆ. ಈ ಚಿಂಗಾಳ್ವಂಗ ಎಚ್ಚಕ್ ಜನ ಆಳ್‌ಚೀಂದೂ ಶಾಸನತಾಂಜ ಗೊತ್ತಾಪುಲೆ. ಶಾಸನತ್ ಪೆದ ಉಳ್ಳ ರಾಜಂಗಡ ಕಣಕ್ 12 .

ನಾಗರಾಜ, ರಂಗರಾಜ, ಪೆರಿಯಣ್ಣ ರಾಜ, ನಂಜರಾಜ 1502 - 33, ನಂಜುಂಡರಾಜ, ಶ್ರೀಕಂಠರಾಜ 1544, ವೀರರಾಜ ಒಡೆಯ 1559-80, ಪೆರಿಯ ರಾಜ ದೇವ, ರುದ್ರಗಣ 1586 - 1607, ನಂಜುಂಡದೇವ, ನಂಜ ರಾಜ ದೇವ 1612 - 19, ಕೃಷ್ಣ ರಾಜದೇವ 1619, ವೀರರಾಜ 1619 - 44. ಈ ಸಂತಾನತ್ ಸುರೂಪೆತ ಮೂಂದ್ ರಾಜಂಗ ಕೊಡಗು ಶ್ರೀರಂಗಪಟ್ಟಣತನ ಆಳ್‌ಚಿ.

ಇಯಂಗಡಾತ್ ನಾಲನೆಯಂವನಾನ ನಂಜರಾಜ ತಾಂಡ ಪೆದತ್ ನಂಜರಾಯ ಪಟ್ಟಣತನ ಕೆಟ್‌ಚಿಟ್ಟಿತ್ ಅದನ ತಾಂಡ ಪುದಿಯ ರಾಜಧಾನಿ ಆಯಿತ್ ಮಾಡಿಯಂಡತ್. ಅಲ್ಲಿಂಜ ಆಳ್‌ನ ಶ್ರೀಕಂಠರಾಜ ಮುಖ್ಯಪಟ್ಟ ರಾಜಂಡನ್ನಕೆ ಕಾಂಬ. ಹುಣಸೂರರ 21ನೆ ಶಾಸನತ್ ಇಂವಂಡ ಎಚ್ಚಕೊ ಬಿರ್‌ದಾರ ಉಲ್ಲೇಖ ಉಂಡ್. ಈ ರಾಜ ಹೊರೂರ್ ಮೂಡಿಗೆರಿ ನಾಡ್, ಚೇರಳ ಶ್ರೀಮಂಗ ಊರರ ತೆರಿಕ್ ಅಡಂಗನ ಮೀನಕೊಲ್ಲಿ ಕಾಡಲ್ ಉಳ್ಳ ಭಕ್ತನಕೋಟೆಕ್ ಸೇರನ ಭೂನ ಲಿಂಗಂಣೊಡೇರು ದೇವಕ್

ಸರ್ವ ಮಾನ್ಯ ಆಯಿತ್ ಕೊಡತಾನ ಎಳ್ವ ಚಿಟ್ಟಿ ಶಿಲಾಶಾಸನ ಇಕ್ಕಲೂ ಭಕ್ತನ ಕೋಟೆಲ್ ಉಂಡ್.

ಶ್ರೀ ಮತ್ತು ಶಾಲಿವಾಹನ ಶಕ ವರುಷ 1466ನೆಯ ಕ್ರೋಧಿ ಸಂವತ್ಸರದ ಚೈತ ಶು 1ಲೂ ಶ್ರೀ ಮನ್ಮಹಾ ಮಂಡಲೇಶ್ವರ ಚಿಂಗಾಳ್ವ ಶ್ರೀಕಂಠರಸುಗಳು ಲಿಂಗಂಣೊಡೇರು ದೇವರಿಗೆ ಬಗುತನ ಕೋಟೆಗೆ ಸಲ್ಲುವ ಭೂಮಿಯನು ಸರ್ವಮಾನ್ಯವಾಗಿ ಕೊಟ್ಟರು ಯಾ ಕೊಡಗೆಯನಳು ವಿದವರು ರೌರವ ನರಕದಲ್ಲಿಯಿರುವರು.

ಈ ರಾಜಂಡ ಆಳ್ವಿಕೆ ಸುಂಟಿಕೊಪ್ಪ ನಾಡ್‌ಕೂ ಪಬ್ಬಿತಿಂಜತ್‌ಂದ್ ಕಾಂಬ. ಕೊಡಿಯತ ಶಾಸನತಾರ ಕಾಲ ಕ್ರಿ.ಶ. 1544ನೆ ಇಸವಿ. ಆ ಕಾಲತೆ ಸುಂಟಿಕೊಪ್ಪ ನಾಡ್‌ರ ಬೆಟ್ಟಗೇರಿ ಊರ್‌ರ ಅಂಜನಗಿರಿಲ್ ಓರ್ ಜೈನ ಬಸದಿ ಕಲ್ಲ್‌ನುಂಡ್ ಕೆಟ್ಟುನದ್‌ಂದ್ ಆ ಬಸದಿರ ಅಡಿಲ್ ಬೆಚ್ಚಿತುಳ್ಳ ಶಾಸನತಂಜ ಗೊತ್ತ್‌ಕಟ್ಟುವ. ಆ ಶಾಸನತ್ "ನಂಜರಾಯಪಟ್ಟಕ್ಕೆ ಸಲ್ಲುವ ಬೆಂಮತ್ತಿ ಬೂತನಹಳ್ಳಿ ಮಗನ ಕೆರೆರ ಸಮಸ್ತ ಹಲರಂ ಕಾಲುಗಲಸಕ್ಕೆ ಸಂದ ಹೊನ್ನಗ 200 ಹನಸೋಗೆಯ ಆದಿ ಶ್ರೀ ಅವ್ವಗಳು ಅಂನುವ ಹೊಸಹಳ್ಳಿಯ ಭುಜಬಲ ಶ್ರೀ ಅವ್ವಗಳಿಂದ ಗರ್ಬ್ ಬೃಹಗೈವಲ್ಲಿ ಕಾಲುಗಲಸಕ್ಕೆ ಸಂದರುಗ 30 ಹೊನ್ನು"ಂದ್ ಇತರ ಬಸದಿರ ಖರ್ಚ್‌ರ ಕೂಡೆ ಎಳ್ವಿತ್.

ನಂಜರಾಯಪಟ್ಟತಾರ ಸುತ್ತು ಮುತ್ತು ಹಳ್ಳಿ, ಪಿರಿಯಾಪಟ್ಟ ತಾಲೂಕ್‌ರ ಹನಸೋಗೆ ನಂಜರಾಯಪಟ್ಟತಾರ ರಾಜಂಡ ಆಳ್ವಿಕೆಕ್ ಒಳಪಟ್ಟಾನುಂಡ್ ಈ ಹಳ್ಳಿರ ಜನ ಜೈನಂಗಳಾಯಿತ್ ಇಂಜತ್‌ಂದೂ, ಇವು ತಂಗಡ ರಾಜಂಡ ರಾಜ್ಯತಾರ ಅಂಜನಗಿರಿ ಬೆಟ್ಟಗೇರಿಲ್ ಜೈನ ಬಸದಿನ ಕಲ್ಲ್, ಪಾರ್ ಪಿಳ್ಳಾ ಕಂಬತ್‌ನುಂಡ್ ಕೆಟ್ಟುವಕ್ ಸಹಾಯ ಮಾಡ್‌ಚೀಂದ್ ಅರ್‌ಂಜವಲು.

ಈ ಬಸದಿ ಕಲ್ಲ್‌ಲ್ ಕೆಟ್ಟಿತ್ ಇಂದೇಕ್ 418 ಕಾಲ ಕೈಂಜಕೊ ಆ ಕಟ್ಟಡ ಇಞ್ಞಾ ಭದ್ರ ಆಯಿತ್ ಪ್ರವಾಸಿಯಡ ಕುತೂಹಲಕ್ ಎಡೆ ಮಾಡಿ ಕೊಡ್‌ಪನ್ನೆಕೆ ಉಂಡ್. ಈ ಬಸದಿ ಸುಮಾರ್ 30 ಅಡಿ ಚೆಚ್ಚಿಕಾರತಾರ ಕಟ್ಟಡ. ಮೂಂದ್ ಬರಿಲ್ ಕಗ್ಗಲ್ಲ್‌ರ ಪಾರ್‌ನುಂಡ್ ಮಾಡ್‌ನ ಕೆಂವ ಉಂಡ್. ಮಾಡಿ ಚಪ್ಪಟೆ ಆಯಿತ್ ಕಲ್ಲ್‌ರ ಪಾರ್‌ಲ್ ಪೊದ್‌ತಿತ್. ಇದ್ ಕಲ್ಲ್ ಕಂಬಾರ ಕೊಡಿಲ್ ನಿಂದಿತುಂಡ್. ಕೆಂವತಾರ ಕರ್ತ ಪಾರ್ ಸಿಮೆಂಟ್ / ಗಾರೆರ ಆಧಾರ ಇಲ್ಲತೆ ಕೆತ್ತನ ಕೆಲಸ ಓರಿಚ್ಚಕೂ ಸೆರೆ ಇಲ್ಲತೆ ಜೋಡ್‌ಚಿಟ್ಟಿದಾಯಿತುಂಡ್.

ಬಸದಿಯ ಒಳ್‌ಲ್ ದಂಡ್ ಅಂಕಣ ಉಂಡ್. ಒಳ ಅಂಕಣ / ಗರ್ಭಗೃಹ. ಇದತ್ ಸುಮಾರ್ ನಾಲಡಿ ಎತ್ತರತಾರ ಮೂಂದ್, ಒಂದರೆ ಅಡಿ ಎತ್ತರತಾರ ಮೂಂದ್ ಇನ್ನನೆ

ಆರ್ ತೀರ್ಥಂಕರ ಕಲ್ಲುರ ದಿಗಂಬರ ಮೂರ್ತಿ ಉಂಡ್. ಪಕ್ಕತೇ ಸ್ತ್ರೀ ದೇವತೆ ಪದ್ಮಾವತಮ್ಮಂಡ ಚಾಯುಳ್ಳ ಬಿಂಬ ಉಂಡ್. ತೀರ್ಥಂಕರ ಬಿಂಬ ದುಂಬ ಚಾಯುಂಡ್. ಈ ಬಿಂಬತನ ಕೊಂಡಬಂದಿತ್ 1965ಲ್ ಮಡಿಕೇರಿಲ್ ಸ್ಥಾಪನೆ ಮಾಡ್ತನ ಪ್ರಾಚೀನ ವಸ್ತು ಸಂಗ್ರಹಾಲಯತ್ ಬೆಚ್ಚಿತ್.

ಬಸದಿರ ಎದಿಕೆ ತೆತ್ತಿರ ಕೊಡಿಯತ ಮಾಡಿ ಕಂಬತರ ಆಧಾರತ್ ನಿಂದಿತ್ ಬಸದಿರ ಎದಿಕೆ ಭಾಗತನ ಚಾಯಿತ ಕಾಂಬನ್ನಕೆ ಮಾಡಿತ್. ಆಚೇಂಗಿ, ಇಕ್ಕ ಬರಿಯತ ಮರ ಬುದ್ಧಿತ್ ಈ ತೆತ್ತಿರ ಮೂಲೆರ ಕಲ್ಲ ಚಪ್ಪಡಿ ಚೆನ್ನಂಗ್ ಒಡ್ಂದ್ ಪೋಯಿತ್. ಈ ಬಸದಿರ ಸುತ್ತು, ಬಲತೆ ಪಿಳ್ಳಾ ಎಡ್ತೆಬರಿಲ್ ಮರ ಕಾಡ್ ಉಂಡ್. ಬೆಂಬರಿಲ್ ಶ್ರೀಮಾನ್ ಡಿ. ಶಿವಪ್ಪ ಅಯಿಂಗಡ ಕಾಫಿ ತೋಟತರ ರಸ್ತೆ ಉಂಡ್. ಸಾರ್ವಜನಿಕಂಗ ನೋಟಂಡಿಯ ಓರ್ ಪ್ರಾಚೀನ ಕಟ್ಟಡವಾನ ಇದ್ನ ರಕ್ಷಣಾ ಇಲಾಖೆಕಾರ ತಂಗಡ ಪುಡ್ತಕ್ ಎಡ್ತವದ್ ನಲ್ಲದ್.

ಶ್ರೀಕಂಠರಸ ಚತ್ತಪಿಳ್ಳಾ ಅವಂಡ ಮೋಂವ ವೀರರಾಜ ಒಡೆಯ 22 ಕಾಲ ರಾಜ್ಯ ಆಳ್ವಾಚಿ. ವೀರರಾಜಂಡ ತಮ್ಮಣ ಪೆರಿಯ ರಾಜದೇವ ಕ್ರಿ.ಶ. 1586ತ್ಂಜ 1607ಕೆತ್ತನೆ ರಾಜ್ಯ ಆಳ್ವಾಚಿ. ನಂಜರಾಜಪಟ್ಟತರ ರಾಜಂಡಲ್ಲಿ ಈ ಪೆರಿಯ ರಾಜದೇವ ಕೇಳಿ ಪೋನಂವ. ಇಂವಂಗ್ 'ರುದ್ರ ಗಣ' ಎಣ್ಣುವ ಬಿರ್ದ್ ಇಂಜತ್. ಇಂವ ತಾಂಡ ರಾಜ್ಯತರ ಪೂರ್ವ ತೆರಿರ ಒಳ್ಳಲ್ ಇಂಜ ಸಿಂಹಪಟ್ಟಣ ಎಣ್ಣುವ ಚೆರಿಯ ಊರ್ಲ್ ಕಲ್ಲುರ ಕೋಟೆನೆ ಕೆಟ್ಟಾಚಿಟ್ಟಿತ್. ಅಲ್ಲಿ ವರ್ತಕಂಗಕ್ ಕೋಟೆರ ಒಳ್ಳಲೆ ವಾಸ ಮಾಡುವಕ್ ಜಾಗ ಕೊಡ್ತಿತ್ ಪೇಟೆ ಕೆಟ್ಟಾಚಿ. ಅನ್ನನೆ ಈ ಊರ್ಕ್ ತಾಂಡ ಪೆದ ಬೆಚ್ಚಿತ್ ಅದ್ನ ಪೆರಿಯಾಪಟ್ಟಂದ್ ಕಾಕ್ಚಿ. ಪೆರಿಯಾಪಟ್ಟ ಸುರೂಲ್ ಸಿಂಹಪಟ್ಟ ಆಯಿತ್ ಕೆಟ್ಟಾಚಿಟ್ಟಾಂಗ್ ಓರ್ ನಲ್ಲ ಕತೆ ಉಂಡ್.

ಚೆಂಗಾಳ್ವಂಗ ಅಂಜನೆ ರಾಜ ನಂಜುಂಡ ಅರಸ ತಾಂಡ ರಾಜಧಾನಿ ನಂಜರಾಯಪಟ್ಟತಂಜ ಕುದರೆ ಪತ್ತಿತ್ ಇಕ್ಕತ ಪಿರಿಯಾಪಟ್ಟ ತಾಲೂಕರ ಹನಗೋಡ್ಕ್ ಓರ್ ಮಂಗಲಕ್ ಪೋಯಂಡ್ ಇಂಜತ್. ಅವ ಕುದರೆ ಪತ್ತಿತ್ ಪೋಯಂಡಿಪ್ಪಕ ಬಟ್ಟೆಲ್ ಇಕ್ಕತ ಪಿರಿಯಾಪಟ್ಟತರ ಜಾಗಕ್ ಬಪ್ಪಕ ಅದೇ ಕಾಡಲ್ ಇಂಜ ಓರ್ ಮೊನಕುಟ್ಟಿ ಓಡಿ ಬಂದಿತ್ ಇಂವಂಡ ಕುದರೆರ ಕಾಲರ ಮುಡಿನ ಕಡಿಪಕೂಡ್ಚಿ!

ಈ ವಿಚಿತ್ರ ಘಟನೆ ನಂಜುಂಡ ರಾಜ ನೋಟಿತ್ ಮೊನ ಕುದರೆನ ಕಡ್ಚಿ ಈ ಭೂಮಿ ಗಂಡ್ ಭೂಮಿ ಆಯಿತ್ತಿಕ್ಕೊಂದ್ ಗೇನ ಮಾಡಿತ್ ಇಲ್ಲಿ ಓರ್ ಮಣ್ಣರ ಕೋಟೆನ



ಕೆಪ್ಪಾಚಿಟ್ಟತ್. ಅದಾನ ತಾಂಡ ದಂಡನೆ ರಾಜಧಾನಿ ಆಯಿತ್ ಮಾಡಿಯಂಡತ್. ಅದೊಂಗ್ 'ಸಿಂಹ ಪಟ್ಟಣ' ಎಣ್ಣುವ ಪೆದ ಇಟ್ಟತ್. ಈ ಸಿಂಹಪಟ್ಟ ಪೆರಿಯ ರಾಜದೇವ ರುದ್ರಗಣಂಡ ಕಾಲತ್ ಪೆರಿಯಾಪಟ್ಟ ಆಚಿ. ಸಿಂಹ ಪಟ್ಟಕ್ ಪೆರಿಯಾಪಟ್ಟಂದ್ ಪೆದ ಇಟ್ಟದ್ ಹುಣಸೂರ್ 15ನೆ ಶಾಸನತ್ ಎಳ್ಳಿತ್.

ಪೆರಿಯರಾಜದೇವ ರುದ್ರಗಣ ಶಾಲಿವಾಹನ ಶಕ 1519ನೆ ಹೇವಿಳಂಬಿ ಸಂವತ್ಸರತ್ ಎಣ್ಣಕ ಕ್ರಿ.ಶ. 1597ತ್ ತಾಂಡ ಅಪ್ಪ, ಅಪ್ಪ ಪಿಳ್ಳಾ ಬೋರೆ ಪೆರಿಯ ವ್ಯಕ್ತಿಯ ಕೈಲಾಸ ಪದವಿ ಪಡೊಂದವಡ್ ಎಣ್ಣುವ ಉದ್ದೇಶತ್ ತಾಂಡ ರಾಜ್ಯತ್ ಗಣಗೂರ್ ಊರ್ಲ್ ಭೂಮಿನ ದಾನ ಆಯಿತ್ ಕೊಡ್ತಿತ್ ಶಿಲಾ ಶಾಸನ ಗಣಗೂರ್ ಊರ್ ಹಳೇಗ್ರಾಮ ನಿವೇಶನತ್ ಉಂಡ್. ಈ ಶಾಸನ ಇನ್ನನೆ ಉಂಡ್.

ಸ್ವಸ್ತಿ ಶ್ರೀ ವಿಜಯಾಭ್ಯುದಯ ಶಾಲಿವಾಹನ ಶಕವರುಷ 1519ನೆಯ ಹೇವಿಳಂಬಿ ಸಂವತ್ಸರದ ಅಶ್ವಯುಜ ಸಭಾಮವಾರ ಗೋತ್ರದ ಅಶ್ವಲಾಯನ ಸೂತ್ರದರುಕುಶಾಖಿ ನಂಜರಾಯ ಪಟ್ಟಣದ ಶ್ರೀಕಂಠ ರಾಜಯನ ಪುತ್ರರಾದ ರುದ್ರ ಗಣಂಗಳುನಕು ಹಂಚಿ...ರವರಿಗೆ ಗಣಗೂರು ಮಹಾ...ಂಗಳು ತಮ್ಮ ತಂದೆ ತಾಯಿಯಿ..ದೂವಾ ಪಿತ್ಯಗಳಿಗೆ ಕೈಲಾಸ ಪದವಿ ಆಗಲಿಯೆಂದು ಕೊಟ್ಟು ಭೂಮಿದಾನ ಕೊಟ್ಟ ಗ್ರಾಮಕ್ಕೆ ಅವನ...ಅಲಿಪಿದರೆ ತಂದೆ..ತಾಯಿ...ಜದವನಲ್ಲಿ ನಂಜರಾಯ..ನಾದದು ಜಮಗೆ ಅಮಂದ ಅತಯಿ ನಾಶಿಕೆಯ ಆನತರೂ...ಶ್ರೀ.

ನಂಜರಾಯಪಟ್ಟತರ ಚೆಂಗಾಳ್ವಂಗ ವಿಜಯನಗರತ್ ಚಕ್ರವರ್ತಿಯಡ ಮಾಂಡಲಿಕಂಗ ಆಯಿತಿಂಜತ್. ವಿಜಯನಗರತ್ ಚಕ್ರವರ್ತಿಯ ದಕ್ಷಿಣ ಹಿಂದೂ ಸ್ಥಾನತ್ಲೆಲ್ಲ ತಂಗಡ ಬಲ್ಯ ಸಾಮ್ರಾಜ್ಯತ್ ತಂಗಡ ಅಧಿಕಾರತ್ ಚಲಾವಣೆ ಮಾಡುವಕ್ ರಾಜ್ಯತ್ ಬೋರೆ ಬೋರೆ ಭಾಗತ್ ಎಣ್ಣಕ ಶ್ರೀರಂಗಪಟ್ಟಣ, ವೆಲ್ಲೂರ್, ಗಿಂಜಿ, ಮಧುರೇರನ್ನತ ಜಾಗತ್ ತಂಗಡ ಅಧಿಕಾರಿಯಳ ಬೆಚ್ಚಿತಿಂಜತ್. ಶ್ರೀರಂಗಪಟ್ಟತ್ ಇಂಜ ವಿಜಯನಗರತ್ ಅಧಿಕಾರಿ ಮೈಸೂರ್, ಕೊಡಗ್ ಪಿಳ್ಳಾ ದ.ಕನ್ನಡತ್ ರಾಜಂಗಡ ಮೀದ ಅಧಿಕಾರ ಕಾಟುವ ಇಂಜತ್.

1336ತ್ ಸ್ಥಾಪನೆಯಾನ ವಿಜಯನಗರ ಸಾಮ್ರಾಜ್ಯ ಕೃಷ್ಣಾ ಪೊಳೆಂಜ ಸುರುವಾಯಿತ್ ದಕ್ಷಿಣತ್ ಸೀಮೆಕಾಲೆ ಸುಮಾರ್ 300 ಕಾಲಕ್ಂಜ ಏರ ಕಾಲ ವೈಭವತ್ ಮೆರೊಂದತ್. ಆಚೇಂಗಿ, ಎಲ್ಲಾ ಸಾಮ್ರಾಜ್ಯ ಇಚ್ಚಕ್ರಮಟ್ಟಿಕೆ ಬೋರೆ ಕಾರಣತ್‌ನುಂಡ್ ನಾಶ ಆನನ್ನಕೆ ವಿಜಯನಗರ ಸಾಮ್ರಾಜ್ಯ ಕ್ರಿ.ಶ. 1565ನೆ ಜನವರಿಲ್ ತಾಂಡ ಕೇಳಿಕೀರ್ತಿನೆಲ್ಲ ಕಳೊಂದಂಡತ್. ಕ್ರಿ.ಶ. 1565ನೆ ಜನವರಿ ತಿಂಗತ್ ವಿಜಯನಗರ ಸೈನ್ಯ ದಖನ್

ಸುಲ್ತಾನಂಗಡ ಸೈನ್ಯತಾರ ಕೂಡೆ. ಪಡೆಪೊತ್ತಲ್ಲಿ ಕೃಷ್ಣಾ ಪೊಳೆರ ಕರೆಲ್ ರಕ್ಕಸತಂಗಡಿ ಎಲ್ಲವಲ್ಲಿ ಚೋತತ್. ಅಲ್ಲಿಂಜ ವಿಜಯ ನಗರತಾರ ಚಕ್ರವರ್ತಿ ಸದಾಶಿವ ರಾಯ ತಾಂಡ ಮಿಂಚೊನ ಸಂಪತ್ತಾನ, ಸೈನ್ಯತಾನ, ದಕ್ಷಿಣತಾರ ಪೆನುಗೊಂಡೆಕ್ ಕಡ್ತಿತ್ ಅಲ್ಲಿಂಜ ತಾಂಡ ಬಾಕಿ ರಾಜ್ಯತಾನ ಆಳಚಿ. ವಿಜಯನಗರ ವೈಭವತಾರ ನೇರತ್ ಮಂಡಲಾಧಿಕಾರಿಯ ತಂಗಡ ಅಧಿಕಾರ ಮುಂದರ್ಚಿಟ್ಟುಂಡ್ ಪೆನುಗೊಂಡೆರ ರಾಜಂಗಕ್ ಅಧೀನಂಗಲಾಯಿತಿಂಜತ್.

ಚೆಂಗಾಳ್ವರಸ ಪೆರಿಯ ರಾಜದೇವ ರುದ್ರಗಣ ಪೆರಿಯಾ ಪಟ್ಟತ್ ಆಳಿಯಂಡ್ ಇಪ್ಪಕ ಶ್ರೀರಂಗಪಟ್ಟತ್ ದಂಡನೆ ತಿರುಮಲ ರಾಜ, ಪೆನುಗೊಂಡೆರ ರಾಜ 1ನೆ ವೆಂಕಟರಾಜಂಡ ಮಂಡಲಾಧಿಕಾರಿ ಆಯಿತಿಂಜತ್. ಮಂಡಲಾಧಿಕಾರಿ 2ನೆ ತಿರುಮಲ ರಾಜ ಕ್ರಿ.ಶ. 1607ತ್ ಇಕ್ಕತ ಹುಣಸೂರ್ ತಾಲೋಕರ ಮಳಲವಾಡಿ ಸೀಮೆರ ಮೂಂದ್ ಊರಾನ ಬೆಟ್ಟದಪುರ ಅನ್ನದಾನಿ ಮಲ್ಲಿಕಾರ್ಜುನ ದೇವಡ ಸೇವೆಕ್ ತಾಂಡ ತಾತ, ಅವಯ್ಯ ಪಿಳ್ಳಾ ಪುಣ್ಯಪ್ರಾಪ್ತಿಕಾಯಿತ್ ನಂಜರಾಜಪಟ್ಟಣತಾರ ಚೆಂಗಾಳ್ವಂಡ ರಾಜ್ಯ ಇರಣೆಕ್ ನಡ್ತೊಂಡು ಎಣ್ಣುವ ಶರತ್ತರ ಮೀದ ಅದೊಂಡ ಖರ್ಚ್ ದಾನ ಆಯಿತ್ ಕೊಡ್ತೊಂಡ್ ಹುಣಸೂರ್ 36ನೆ ಶಾಸನತ್ ಎಳ್ಳಿತ್.

ಈ ನೇರತ್ ತಿರುಮಲ ರಾಜ ಈ ಊರ್ಂಜ ಶ್ರೀರಂಗ ಪಟ್ಟತಾರ ತಾಂಡ ಸರ್ಕಾರಕ್ ಕೆಟ್ಟುಂಡಿಂಜ ಪಗುಡಿ ತೆರಿಗೆನ ಬುಟ್ಟ್ ಕೊಡ್ತತ್. ಬೆಟ್ಟದ ಪುರ ಕೂಳಾದಾನ ಮಲ್ಲಿಕಾರ್ಜುನದೇವ ಚೆಂಗಾಳ್ವರಸಂಡ ಕುಲದೇವ ಆನಾನುಂಡ್ ಚೆಂಗಾಳ್ವರಸಂಗ ಇರಣೆಕೂ ಆ ದೇವಡ ಸೇವೆ ಈ ಊರ್ ರ ಉತ್ಪತ್ತಿಂಜ ನಡ್ಕೊಂಡೊಂಡ್ ತಿರುಮಲ ರಾಜ ಏರ್ಪಾಡ್ ಮಾಡ್ನಾನಗುಂಡ್ ಈ ಊರ್ ಚೆಂಗಾಳ್ವರಸಂಡ ರಾಜ್ಯತೆ ಇಂಜತೊಂಡ್ ಗೊತ್ತಾಪೆ.

ಪೆರಿಯರಾಜದೇವ ರುದ್ರಗಣಂಡ ಕಾಲ ಕೈಂಜದು ನಾಲ್ ರಾಜಂಗ ಪೆರಿಯಾಪಟ್ಟಣತ್ ಆಳಚಿ. ಪೆರಿಯ ರಾಜ ದೇವಂಡ ಕಾಲತ್ ಕೊಡಗರ ಹಾಲೇರಿಲ್ ಇಕ್ಕೇರಿನಾಯಕಂಡ ಸಂತಾನಕಾರಳಾನ ಲಿಂಗಾಯತ ರಾಜಂಗ ತಂಗಡ ರಾಜ್ಯತಾನ ಸ್ಥಾಪನೆ ಮಾಡ್ಚಿ. ನಂಜರಾಜ ಪಟ್ಟಣತಾರ / ಪೆರಿಯಾಪಟ್ಟಣತಾರ ರಾಜಂಗ ಕೊಡಗರ ಹಾಲೇರಿ ಸಂತಾನಕಾರಡ ರಾಜಂಡ ದೂರದ ಸಮ್ಮಂದಿಯ ಆಯಿತಿಂಜತ್.

ಕ್ರಿ.ಶ. 1644ತ್ ಪೆರಿಯಾಪಟ್ಟತ್ ವೀರರಾಜ ಆಳಿಯಂಡ್ ಇಂಜತ್. ಇಂವಂಡ ಅಪ್ಪ ನಂಜರಾಜ ಬಯತ್ ಆನಗುಂಡ್ ರಾಜ್ಯತಾನ ತಾಂಡ ಮೋಂವ ವೀರರಾಜಂಗ್ ವಹಿಸ್ಚಿ. 1644ತ್ ಮೈಸೂರ್ ಕಂಠೀರವ ನರಸರಾಜ ಒಡೆಯಂಡ ಸೈನ್ಯ ಪೆರಿಯಾಪಟ್ಟಕ್ ಮುತ್ತಿಗೆ ಇಟ್ಟಿತ ಅದೊನ ತಾಂಡ ಪುಡ್ತಕ್ ಎಡ್ತಂಡತ್.

ಪೆರಿಯಾಪಟ್ಟಣ್ಣ್ ಆಳಿಯಂಡ್ ಇಂಜ ವೀರ ರಾಜಂಗ್ ಸಕಾಲತ್ ಕೊಡಗ್ಗರ ಸೈನ್ಯ ಸಹಾಯಕ್ ಕೊಟ್ಟಲೆ. ಅಂವಂಡ ತಾಕತ್ ಕಮ್ಮಿ ಆನಾನಗುಂಡ್ ಚೋಕಂಡಿಯಾಚಿ. ಆಚೇಂಗಿ, ಚೋತಿತ್ ಅವಮಾನ ಪಡುವಾಂಗ್ ಇಲ್ಲಿ ಚಾವದೆ ಮೇಲ್ಯಾಂಡ್ ವೀರರಾಜ ತಾಂಡ ಪೊಣ್ಣ್ ಪಿಳ್ಳಾ ಮಕ್ಕಳ ತಾನೆ ಕೊಂದಿತ್ ಪಡೆ ಪೊತ್ತಿತ್ ವೀರಮರಣ ಪಡೊಂದತ್. ಅಂದ್‌ಂಜ ನಂಜರಾಯಪಟ್ಟಣ್ / ಪೆರಿಯಾಪಟ್ಟಣ್ ಚೆಂಗಾಳ್ವಂಗಡ ವಂಶ ನಿರ್ನಾಮ ಆಚಿ. ಇವು ಕೊಡಗ್ಗರ ರಾಜಂಡ ಸಹಾಯ ಕೇಟಾನ, ವೀರರಾಜಂಡ ಅಪ್ಪ ನಂಜುಂಡ ರಾಜ ವೀರರಾಜ ಚತ್ತಪಿಳ್ಳಾ ಕೊಡಗ್ ರಾಜಂಡ ಆಶ್ರಯ ಪಡೊಂದಿತ್ ಕಾವೇರಿ ಪೊಳೆರ ಎಡತೆ ಬರಿಲ್ ಉಳ್ಳ ಹೊಳೆಸಾಲು ಎಣ್ಣುವ ಊರ್‌ಲ್ ನೆಲೆ ನಿಂದಾನ ಮಿಳ್ಳಾಕ್ ನೋಟೊಲು.

## 11. ಕೊಡಗ್ಗಲ್ ನಾಯಕಂಗಡ ಆಳ್ವಿಕೆ

ನಂಜರಾಯಪಟ್ಟಣ್ಣ್‌ರ ಚೆಂಗಾಳ್ವಂಗ ಕೊಡಗ್ಗರ ಪೂರ್ವ ತೆರಿ ಪಿಳ್ಳಾ ಪೆರಿಯಾಪಟ್ಟಣ್ಣ್ ಸೀಮೆನ ಆಳಿಯಂಡ್ ಇಪ್ಪಕ ಕೊಡಗ್ಗರ ಉತ್ತರಭಾಗತಾನ ಬುಟ್ಟಿತ್ ಬೋರೆ ಎಲ್ಲಾ ನಾಡ್‌ನ ನಾಯಕಂಗ ಆಳುವ ಇಂಜತ್. ದಖನ್ನರ ಚರಿತ್ರೆಕಾರ ಫೆರಿಸ್ತ್ 16ನೆ ಶತಮಾನತಾರ ಆಖೀರತ್ ಕೊಡಗ್ಗನ ನಾಯಕಂಗ ಆಳಿಯಂಡ್ ಇಂಜತ್‌ಂದೂ, ಇವು ವಿಜಯನಗರತಾರ ಅಧಿರಾಜತ್ವತಾನ ಒತ್ತಂಡ್ ಇಂಜತ್‌ಂದೂ ಎಳ್ಳುವ. ಕೊಡಗ್ಗರ ನಾಯಕಂಗಡ ಆಳ್ವಿಕೆ ಸುರೂಲ್ ಓರ್ ಕೊಂಬು ಕೇಪ ಜಾಗತ್ / ಚೆನ್ನಂಗ್ ಊರ್‌ಲ್ ಮಾತ್ರ ಇಂಜಿತ್ ನಿಧಾನ ಆಯಿತ್ ಸುತ್ತೂ ನಾಡ್‌ಕ್ ಪಬ್ಬಿತಿಕ್ಕು. ಈ ಕೊಂಬು ತೆರಿ ಆಯಿತ್ ಪೇರ್ತ್ ಆಳ ಪಿಳ್ಳಾ ಅಗಲ ಆನ ಕಡಂಗ ಇಂಜತ್. ನಾಯಕಂಗ ಕೈಂಜಪಿಳ್ಳಾ ಹಾಲೇರಿ ರಾಜಂಗ ಸಹ ಈ ಕಡಂಗತಾನ ಚಾಯಿತೆ ಬೆಚ್ಚಂಡಿಂಜತ್. ಇಕ್ಕಲೂ ಕೊಡಗ್ಗರ ಎಲ್ಲಾ ಜಾಗತ್ ಕಡಂಗ ಕಂಡ್ ಬಪ್ಪ. ಕೊಂಬುರ ನಡುಲ್ ಚೆನ್ನಂಗ್ ಜಾಗತ್ ಬಲ್ಯ ಕಾಡ್ ಇಂಜಂಡ್ ಕೊಂಬು ಮರೆ ಆಯಿಂಜತ್.

ಕೊಡಗ್ಗನ ಆಳ್ವಿಕೆ ನಾಯಕಂಗಡಾತ್ ಚೆನ್ನಂಗಾಳ್ವಾರ ಪೆದ ಮಾತ್ರ ಜನಡ ಮನಸ್ಸಲ್ ಉಂಡ್. ಬಾಕಿ ಎಲ್ಲ ಎಳ್ವೊನ ಚರಿತ್ರೆಲ್ ಉಲ್ಲೇಖ ಆಯಿತ್. ಇನ್ನನೆ ಜನಡ ಗೇನತ್ ಉಳ್ಳಾತ್ ಕೊಟ್ಟನಾಡ್‌ರ ಅಂಜಿಗೇರಿ ನಾಡ್‌ರ ಅಚ್ಚುತ ನಾಯಕ, ತಾವುನಾಡ್‌ರ ಕರ್ಣಿಂಬಾಹು ಕೇಳಿಪಟ್ಟವು. ಬೆಪ್ಪು ನಾಡ್‌ಲೂ ಅಕ್ಕ ನಾಯಕಂಗ ಇಂಜತ್. ಅಯಿಂಗಡ ಪೆದ ಗೊತ್ತಿಲ್ಲೆ. ಈ ನಾಯಕಂಗಡ ಸಂತಾನಕಾರ ಹಾಲೇರಿ ದೊಡ್ಡ ವೀರಪ್ಪಂಡ

ಕಾಲತ್ ಎಣ್ಣೆ 17ನೇ ಶತಮಾನದಿಂದ ಆಖೀರಕ್ಕೆ ದೊಡ್ಡ ವೀರಪ್ಪಂಡ ವೀರೋಧ ಆಯಿತು ಮಲೆಯಾಳದಿಂದ ಕೊಡಗುರದ ವೀರವರ್ಮರಾಜ ಕೊಡಗುರಕ್ಕೆ ಸೈನ್ಯತೋಡ ಬಿಟ್ಟುನು ಕೆ ಪುರಡ್ ಕೊಡಗುರ ಉತ್ತರನಾಯಕ. ಈ ನಾಯಕಂಡ ಸಂತಾನಕಾರಳೆ ಇಕ್ಕತ ನಾಯಕಂಡ ಒಕ್ಕಕಾರಾಂದ್ ಎಣ್ಣುವ.

ಕಡಿಯತ್ತಾಡ್ ಬಾವಲಿಲ್ ಕೊಳ್ಳಕೊಂಗಿ ನಾಯಕ ಇಂಜತ್ ಎಣ್ಣುವ. ಕೊಟ್ಟಾ ನಾಡಲ್ ಅಚ್ಚುನಾಯಕಂಗ್ ಪಂಡ್ ತಾವಳಗೇರಿಲ್ ಕೈಬುಲಿರ ಒಕ್ಕಕಾರ, ಪತ್ತಾಗಟ್ಟಾ ನಾಡಲ್ ಮಾಚಿಂಗಳ ಮನೆಕಾರ, ಮತ್ತೂರ್ಲ್ ಮುಕ್ಕಾಟಿರ ಒಕ್ಕಕಾರ ಯಜಮಾನಂಗ ಆಯಿತಿಂಜತ್‌ಂದ್ ಕಟ್ಟಾ ಕತೆ ಉಂಡ್. ಅಚ್ಚುನಾಯಕಂಡ ಅಪ್ಪ ಚಿಟ್ಟಪ್ಪ ನಾಯಕಂಗೂ, ಮಾಚಿಂಗಡ ನಾಯಕಂಗೂ ಪಿಳ್ಳಾ ಮುಕ್ಕಾಟಿರ ನಾಯಕಂಗೂ ಒಮ್ಮೆ ತೆ ಪಗತನತ್ ಪಡೆ ಆಚಿ. ಅದೊಂಡ ಪರಿಣಾಮ ಚಿಟ್ಟಪ್ಪನಾಯಕ ಎನ್ನನೆ ಮೋಸತ್ ಕೊಲೆ ಆಯಿತ್, ಅಂವಂಡ ಮೋಂವ ಅಚ್ಚುನಾಯಕ ಅನಾಥ ಆಯಿತ್ ಆಖೀರಕ್ಕೆ ಪೆರಿಯಾಪಟ್ಟಾತ್ ಚಿಂಗಾಳ್ವರಸ ನಂಜುಂಡರಸಂಡ ಆಶ್ರಯ ಪಡೊಂದಂಡ್ ಪುನಾದಿಯ ತಾಂಡ ನಾಡನ್ ಎನ್ನನೆ ಪಡೊಂದತ್ ಎಣ್ಣುವಾಂಡ ಮೀದ ಕತೆ ಉಂಡ್.

ಪೆರಿಯಾಪಟ್ಟಾತ್ ನಂಜುಂಡ ಅರಸ, ಅಂವಂಡ ಮೋಂವ ವೀರರಾಜ ಮೈಸೂರ್ ದೊರೆರ ಕೂಡೆ ಪೋರಾಡಿತ್ ಚಿತ್ತಪಿಳ್ಳಾ ಕೊಡಗುರ ಬಂದಿತ್ ಕೊಡಗುರ ಮುದ್ದುರಾಜ ಪಿಳ್ಳಾ ಅಂವಂಡ ಮೋಂವ ದೊಡ್ಡ ವೀರಪ್ಪರಸಂಡ ಆಶ್ರಯತ್ ಇಂಜತ್. ಅಕ್ಕ ಅಚ್ಚುನಾಯಕ ತಾಂಡ ಪೂರ್ವಜರ ನಾಡ್ ಬಂದಿತ್ ನಾಯಕ ಅನನ್ಯಕ್ಕೆ ಕಾಂಬ. ಕೊಡಗುರ ಮುದ್ದುರಾಜ / ಅಂವಂಡ ಮೋಂವ ದೊಡ್ಡ ವೀರಪ್ಪಂಡ ಕಾಲತ್ ಇಂವ ಕೊಡಗುರ ರಾಜಂಗ್ ಕಪ್ಪ ಕಾಣಿಕೆ ಕೊಡಕತೆ ಇಂಜಾನುಂಡ್ ಆ ರಾಜಂಡ ಸೈನ್ಯಾಧಿಕಾರಿನುಂಡ್ ಚೋತಿತ್ ಸೆರೆಯಾಳಾನದ್ ಆ ಸೈನ್ಯಾಧಿಕಾರಿರ ಕುಟುಂಬತ್ ಕತೆಂಜ ಅರೊಂಜಿಬಪ್ಪ.

## 12. ಕೊಡಗರ ಉತ್ತರ ಭಾಗತ ಹೋಬಳಿಲ್ ಬೇಲೂರ್ ನಾಯಕಂಗಡ ಪ್ರಭುತ್ವ

ನಂಜರಾಯಪಟ್ಟಣತರ ಚೆಂಗಾಳ್ವಂಗ ಕೊಡಗರ ಪೂರ್ವ ತೆರಿ ಪಿಳ್ಳಾ ಪೆರಿಯಾಪಟ್ಟಣ ಸೀಮೆನ ಆಳಿಯಂಡ್ ಇಪ್ಪಕ ಕೊಡಗರ ಉತ್ತರ ಭಾಗತರ ಬಲಹ, ನಿಡತ ಪಿಳ್ಳಾ ಕೊಡಲಿ ಹೋಬಳಿ ಹಾಸನ ಜಿಲ್ಲೆರ ಐಗೂರ್ಲ್ ಆಳಿಯಂಡ್ ಇಂಜ 'ಬಲಂ' ಪ್ರಾಂತ್ಯತರ ನಾಯಕಂಗಡ ಅಧೀನತ್ ಇಂಜತಂದ್ ಶಾಸನತಂಜ ಗೊತ್ತಕ್ಟುವ.

'ಬಲಂ' ಪ್ರಾಂತ್ಯತರ ನಾಯಕಂಗಕ್ ಬೇಲೂರ್ ನಾಯಕಂಗಾಂದೂ ಪೆದ ಉಂಡ್. ಈ ನಾಯಕಂಗಡ ಮೂಲಪುರುಷ ಸಿಂಗಪ್ಪ ನಾಯಕಂಗ್ ಕ್ರಿ.ಶ. 1397ಲ್ ಇಕ್ಕತ ಹಾಸನ ಜಿಲ್ಲೆರ ದಕ್ಷಿಣತರ ಪಾದಿ ಸೀಮೆನ ವಿಜಯನಗರತರ ರಾಜಂಗ ಕೊಡತಿತ್ ಅಂವನ ಆ ಸೀಮೆರ ನಾಯಕ ಆಯಿತ್ ಮಾಡ್ಚಿಂದ್ ಚರಿತ್ರೆಲ್ ಉಲ್ಲೇಖ ಆಯಿತ್. ಸಿಂಗಪ್ಪನಾಯಕ ವಿಜಯನಗರತರ ರಾಜಂಗಡ ಸೇನಾನಾಯಕಂಗಡಾತ್ ಒಬ್ಬನಾಯಿತಿಂಜತ್. ಆಚೇಂಗಿ, ಕ್ರಿ.ಶ. 1500ಂಡ ನೇರತ್ ಆಳಿಯಂಡ್ ಇಂಜ ನಾಯಕ ಶತ್ರುವಳುಂಡ್ ಚೋತಿತ್ ತಾಂಡ ಸೀಮೆನ ಕಳಂದಂಡನ್ನಕೆ ಕಾಂಬ. ಎನ್ನಂಗಣ್ಣಕ ಕ್ರಿ.ಶ. 1509ತಂಜ 1530ಂಗತ್ತನೆ ವಿಜಯನಗರ ಸಾಮ್ರಾಜ್ಯತನ ಆಳುನ್ ಕೃಷ್ಣದೇವರಾಯ ತಿರಿತ್ ಬೇಲೂರ್ ಸೀಮೆನ ಎದ್ರಕೃಷ್ಣಪ್ಪ ನಾಯಕಂಗ್ ಕೊಡತದ್ ಶಾಸನತನುಂಡ್ ಗೊತ್ತಾಪ. ಇಂವಂಡ ಪೆರಿಯವು ಚೆನ್ನಂಗ್ ಕಾಲ ಕೃಷ್ಣದೇವ ರಾಯಂಡ ಅಂಗರಕ್ಷಕ ದಳತ್ ಇಂಜಂಡ್ ಕೃಷ್ಣದೇವ ರಾಯಂಡ ಕೊಡಿಯಲೆ ಚೇಲ / ಉರ್ಪೆನ ಪುಡ್ಚೆಂಡ್ ಇಂಜಿತಿಂಜಾನುಂಡ್ ಇಂವಂಡ ಪೆರಿಯ ಮೋಂವ ಉರ್ಪೆ ಕೃಷ್ಣನಾಯಕ ಪಿಳ್ಳಾ ಉರ್ಪೆಬಾಯಪ್ಪ ನಾಯಕ ಎಣ್ಣುವ ಪೆದ ಇಂಜದ್ ಕಂಡ್ ಬಪ್ಪ.

ಕೃಷ್ಣಪ್ಪನಾಯಕಂಡ ಸಂತಾನಕಾರ ಬೇಲೂರ್ ಸೀಮೆಂಜ ತಿರಿತ್ ಸುಮಾರ್ ಕ್ರಿ.ಶ. 1657ಂಡ ನೇರತ್ ಇಕ್ಕೇರಿ / ಬಿದನೂರರ ಶಿವಪ್ಪ ನಾಯಕನುಂಡ್ ಚೋತಿತ್ ಓಡಿ ಪೋನನ್ನಕೆ ತೋಂದುವ. ಬೇಲೂರ್ ಸೀಮೆ ಕ್ರಿ.ಶ. 1694ಂಗತ್ತನೆ ಇಕ್ಕೇರಿ ನಾಯಕಂಗಡ ವಶತ್ ಇಂಜತ್. ಆ ಕಾಲ ಎಣ್ಣಕ 1694ತ್ ಇಕ್ಕೇರಿ ನಾಯಕಂಗೂ, ಮೈಸೂರ್ ಒಡೆಯಂಗೂ ಬೇಲೂರ್ ಸೀಮೆರ ಒಡೆತನಕಾಯಿತ್ ನಡಂದ ಪಡೆ ಆಖೀರಿಯಾಯಿತ್ ಶಾಂತಿ ಒಪ್ಪಂದ ಆಚಿ.

ಈ ಒಪ್ಪಂದಪೋಲೆ ಬೇಲೂರರ ನಾಯಕಂಗಕ್ ಮಂಜರಾಬಾದ್ ಆರ್ ನಾಡ್‌ನ



ಬುಟ್ಟುಕೊಡ್ತಿತ್ ಬಾಕಿ 'ಬಲಂ' ಪ್ರಾಂತ್ಯತ್‌ನ ಇಕ್ಕೇರಿ ನಾಯಕಂಗ ಪಿಳ್ಳಾ ಮೈಸೂರ್ ಒಡೆಯಂಗ ತಂಗೊಡ್‌ಳಾಲೆ ಹಂಚಿಯಂಡತ್. ಆಚೇಂಗಿ, ಬೇಲೂರರ ನಾಯಕಂಗ ಮಂಜರಾಬಾದ್ ಬೇಲೂರ ಸೀಮೆನ ಸುಮಾರ್ 1657ತ್ ಕಳಂದಂಡಕೊ ಆ ನೇರತ್ ಕೊಡಗರ ಉತ್ತರ ಭಾಗತ್‌ರ ಹೋಬಳಿರ ಮೀದ ತಂಗಡ ಒಡೆತನತ್‌ನ ಬೆಚ್ಚಂಡಿಂಜದ್ ಶಾಸನತ್‌ನುಂಡ್ ಗೊತ್ತಾಪ. ಬೇಲೂರ್ ನಾಯಕಂಗಕ್ ಸಮ್ಮಂಧಪಟ್ಟ ಮೂಂದ್ ಶಾಸನ ಕೊಡಗರ ಉತ್ತರ ಹೋಬಳಿಲ್ ಕಟ್ಟಿತ್. ಇದತ್ ಆದ್ಯತ ಶಾಸನ ಶಾಲಿವಾಹನ ಶಕ 1615ನೆ ಎಣ್ಣಕ ಕ್ರಿ.ಶ. 1693ತ್ ಎಳ್ಳನದ್. ಕೊಡ್ತಿ ಹೋಬಳಿ ಕಟ್ಟೆಪುರತ್ ಉಳ್ಳ ಈ ಶಾಸನತ್ ಬೇಲೂರರ ನಾಲನೆ ಕೃಷ್ಣಪ್ಪನಾಯಕ ಯೋಗಪಯ್ಯ ಎಣ್ಣವ ಪಟ್ಟಿಂಗ್ ಹಿರುಮನಹಳ್ಳಿ ಪಿಳ್ಳಾ ಕಟ್ಟೆಪುರ ಊರ್‌ನ ಕೂಟಿತ್ ದಾನ ಕೊಡ್‌ತದ್ ಎಳ್ಳಿತುಂಡ್.

ಶುಭಮಸ್ತು|| ನಮಸ್ತುಂಗ ಶಿರಶ್ಚಂಬಿ ಚಂದ್ರ ಚಾಮರ ಚಾರವೇತ್ಯ ಲೋಕ್ಯ ನಗರಾರಂಭ ಮೂಲಸ್ತಂಭಾಯ ಶಂಭವೇ|| ವನ್ನೇ ಲೀಲಾವರಾಹಸ್ಯ ದುಷ್ಟದಣ ಸ ಪಾತು ನಃ ಉದ್ಭೂತಾ ಪೇದಿನೀ ಯೇನ ಕಲಂಕಮಿವ ಯತ್ರ ಸಾ ಸ್ವಸ್ತಿ ಶ್ರೀ ವಿಜಯಾಭ್ಯುದಯ ಸಾಲಿ ವಾಹನ ಶಕ ವರುಷಗಳು 1615ನೆಯ ಶ್ರೀಮುಖಿ ನಾಮ ಸಂವತ್ಸರದ ಪುಷ್ಯ ಶು ೧೨ಲು ಕಾಶ್ಯಪ ಗೋತ್ರದ ಅಪಸ್ತಂಬ ಸೂತ್ರದ ಬೋಲೂರ ಕೃಷ್ಣಪನಾಯಕರ ಪೌತ್ರರಾದ ಪುಟ್ಟರಸೈಯನ ಪುತ್ರರಾದ ಯೋಗಪೈಯನಿಗೆ ಬರೆಸಿಕೊಟ್ಟ ಗ್ರಾಮದಾನ ಶಾಸಕ ಕ್ರಮವೆಂತೆಂದರೆ ಪೂರ್ವದಲ್ಲಿ ಶ್ರೀ ಮದ್ರಾಚಾಧಿರಾಜ ರಾಜ ಪರಮೇಶ್ವರ ಶ್ರೀ ವೀರ ಪ್ರತಾಪ ಶ್ರೀ ವೀರ ಕೃಷ್ಣದೇವರಾಯ ಮಹಾರಾಯರವರು ನಮ್ಮ ಪೃಥ್ವಿ ಪಿತಾಮಹರಾದ ಸಿನ್ನುಗೋಪಿನ್ದ ಹಿಮಕರ ಗನ್ದ ಧವಲಾಂಕ ಭೀಮ ಮಿ ನಾಗಪುರವರಾಧೀಶ್ವರ ಬಲೀಯದ ಸಪ್ತಾಂಗ ಹರಣರಾದ ಯರ ಕೃಷ್ಣಪ್ಪ ನಾಯಕರೈಯನವರಿಗೆ ಪಾಲಿಸ್ತ ಬೇಲೂರ ಶೀಮೆಗೆ ಸಲುವ ಅರಕಲ್ಲೋಡ ವಲಿತದ ತುಂಗನಾಡ ನೀರುಗುಂದ ಸ್ತಲದಲ್ಲಿ ಕೋಣಿಗನ ಹಳ್ಳಿಗೆ ಪೂರ್ವ ಹೇಮಾವತಿ ನದಿಗೆ ದಕ್ಷಿಣದ ಜಮೀನಿಗೆ ಪಶ್ಚಿಮ ನಿಲುವಾಗಿಲಿಗೆ ಉತ್ತರವಾದ ಕಟ್ಟೆಪುರದ ಗ್ರಾಮ ಇಪ್ಪುಗಳೆಗೆ ಪೂರ್ವವಾದ ಹಿರುಮನಹಳ್ಳಿ ಸಹಾ ಕಾಶ್ಯಪ ಗೋತ್ರದ ಅಪಸ್ತಂಬ ಸೂತ್ರದ ಕೃಷ್ಣಪನಾಯಕರ ಪೌತ್ರರಾದ ವೆಂಕಟಾದ್ರಿ ನಾಯಕರ ಪುತ್ರರಾದ ಕೃಷ್ಣಪನಾಯಕರು ವಸಿಷ್ಟಗೋತ್ರ ಆಶ್ವಾಯನ ಸೂತ್ರದ ಋಕ್ಕಾಖಾಧ್ಯಾಯನರಾದ ಸುಬ್ರಹ್ಮಣ್ಯ ದೇವಗಳ ಪೌತ್ರರಾದ ಪುಟ್ಟರಸೈಯನ ಪುತ್ರರಾದ ಯೋಗಪೈಯನಿಗೆ ಕಟ್ಟೆಪುರದ ಗ್ರಾಮ ಹಿರುಮನಹಳ್ಳಿ ಸಹ ಯೀ ತಥಾ ತಿಥಿ ಮಕರ ಸಂಕ್ರಮಣ ಪುಣ್ಯ ಕಾಲದಲ್ಲಿ ಸಹಿರಣ್ಣೋದಕ ದಾನ ಧಾರಾ ಪೂರ್ವಕವಾಗಿ ಕೊಟ್ಟೆವಾಗೆ ಯೀ ಗ್ರಾಮಕ್ಕೆ ಸಲುವ ಆಕ್ಷಿನಾಗಾಮಿ ನಿಧಿ ನಿಕ್ಷೇಪ ಜಲ ಪಾಷಾನ ಸಿದ್ಧ ಸಾಧ್ಯಂಗಳೆಂಬ ಅಷ್ಟಭೋಗ ಸ್ವಾಮ್ಯವನ್ನು ಆಗುಮಾಡಿಕೊಂಡು ನಿಮ್ಮ

ಸಂತಾನ ಪರಂಪರಾ ಆ ಚಂದ್ರಾರ್ಕ ಸ್ಥಾಯಿಗಳಾಗಿ ದಾನಾದಿ ವಿನಿಮಯ ವಿಕ್ರಯಗಳಿಗೆ ಯೋಗ್ಯವಾಗಿ ಸುಖದಲ್ಲಿ ಅನುಭವಿಸಿಕೊಂಡು ಯಿಹುದುಯೆಂದು ಕಾಶ್ಯಪ ಗೋತ್ರದ ಆಪಸ್ತಂಬ ಸೂತ್ರದ ಕೃಷ್ಣಪ್ಪ ನಾಯಕನ ಪೌತ್ರರಾದ ವೆಂಕಟಾದ್ರಿ ನಾಯಕರ ಪುತ್ರರಾದ ಕೃಷ್ಣಪ್ಪನಾಯಕರು ವಸಿಷ್ಠಗೋತ್ರದ ಆತ್ಮಾಯನ ಸೂತ್ರದ ಋಕ್ಕಾ ಬಾಧ್ಯಾಯನರಾದ ಸುಬ್ರಹ್ಮಣ್ಯ ದೇವಗಳ ಪೌತ್ರರಾದ ಪುಟ್ಟರಸ್ಯಯನ ಪುತ್ರರಾದ ಯೋಗಚೈಯಗೆ ಬರಿಸಿಕೊಟ್ಟ ಶಾಸನ||ಯಿದಕ್ಕೆ ಧರ್ಮಸಾಕ್ಷಿಗಳು ಆದಿತ್ಯ ಚಂದ್ರಾವನಿಲೋನಲಪ್ತ ದ್ಯೌರ್ಭೂಮಿ ರಾಪೋಹೃದಯಂ ಮನಶ್ಚ ಅಹಶ್ಚ ರಾತ್ರಿಶ್ಚವು ಭೇಚ ಸನ್ನೇ ಧರ್ಮಶ್ಚ ಜಾನಾತಿ ನರಸ್ಯ ವೃತ್ತಂ|| ದಾನ ಪಾಲನ ಯೋರ್ಮಧ್ಯೇ ದಾನಾತ್ ಶ್ರೇಯೋನುಪಾಲಂ ದಾನಾತ್ ಸ್ವರ್ಗಮವಾಪ್ನೋತಿ ಪಾಲನಾಗ ಚ್ಯುತಂಪದಂ|| ಸ್ವದತ್ತಾ ದ್ವಿಗುಣ ಪುಣ್ಯಂ ಪರದತ್ತಾನುಪಾಲನಂ ಪರದತ್ತಾಪಹಾರೇಣ ಸ್ವದತ್ತಂ ನಿಷ್ಫಲಂ ಭವೇತ್|| ಸ್ವದತ್ತಾ ಪುತ್ರಕ ಧಾತ್ರೀ ಪಿತೃದತ್ತಾ ಸಹದರೀ ಅನ್ಯದತ್ತಾ ಸ್ವಮಾತಾ ಚ ದತ್ತಭೂಮಿಂ ಪರಿತ್ಯಜೇತ್|| ಯೋಕ್ಯೇವ ಭಗಿನೀ ಲೋಕೇ ಸರ್ವಪಾಮೇವ ಭೂಭುಜಾಂ ನಭೋಜ್ಯಾನ ಕರಗ್ರಾಹ್ಯಾ ವಿಪ್ರದತ್ತಾ ವಸುಂಧರಾ|| ಶ್ರೀ ಕೃಷ್ಣ

ಈ ಶಾಸನತರ ಆಖೀರಕ್ ಸಂಸ್ಕೃತತ್ ದಾನ ಕೊಡಪಾಂಗೂ, ಕೊಡತ ದಾನತನ ಪಾಲನೆ ಮಾಡುವಕೂ ಉಳ್ಳ ವ್ಯತ್ಯಾಸತನ ಶಾಸನಕಾರ ವಿವರಚಿಟ್ಟಿದ್ ಪೇರ್ತ್ ಸ್ವಾರಸ್ಯ ಆಯಿತುಂಡ್. ಓರ್ ದಾನತನ ಕೊಡಪ ಇಲ್ಲೇಂಗಿ ಅದ್‌ನ ಕಾಪಾಡುವ. ಇದತ್ ಕಾಪಾಡುವದ್, ಕೊಡಪಾಂಗ್‌ಳ್ಳಿ ನಲ್ಲದ್. ಕೊಡಪಾನುಂಡ್ ಸ್ವರ್ಗ ಕೊಟ್ಟವ. ಕಾಪಾಡುವಾನುಂಡ್ ನಾಶ ಇಲ್ಲತ ಪದವಿ ಕೊಟ್ಟವ. ಕೊಡಪಾಂಗ್‌ಳ್ಳಿ ಇಣ್ಣೊಬ್ಬ ಕೊಡತ ದಾನತನ ಕಾಪಾಡುವದ್ ದಂಡಾರಟ್ಟಿ ಪುಣ್ಯ ತಪ್ಪ. ಇಣ್ಣೊಬ್ಬ ತಂದ ದಾನತನ ಕಪ್ಪಾನುಂಡ್ ತಾನ್ ಕೊಡತ ದಾನ ನಿಷ್ಠಯೋಜಕ ಆಪ. ತಾನ್ ಕೊಡತ ಭೂಮಿ ಮೋವಡನ್ನಕೆ. ಅಪ್ಪ ತಂದದ್ ತಂಗೆರನ್ನಕೆ, ಬೋರೆಯವು ತಂದದ್ ತಾಂಡ ಅವ್ವಂಡನ್ನಕೆ. ಆನಗುಂಡ್ ದಾನ ಆಯಿತ್ ಕೊಡತ ಭೂಮಿನ ಬುಡುವಕಯ್ಯ. ಓರ್ ಪಟ್ಟಿಂಗ್ ದಾನ ಆಯಿತ್ ಕೊಡತ ಭೂಮಿ ಲೋಕತ್ ಎಲ್ಲಾ ರಾಜಂಗಕ್ ತಂಗೆರನ್ನಕೆ, ಅದ್ ಭೋಗಕಕ್ಕಲ್ಲ ಪಿಳ್ಳಾಮಂಗಲ ಕೈಪಕ್ ಉಳ್ಳದಲ್ಲ ... ಶ್ರೀ ಕೃಷ್ಣ.

ಬೇಲೂರ್ ನಾಯಕಂಗಡ ದಂಡನೆ ಶಾಸನ ಬಲಹ ಹೋಬಳಿ ಮಾದರ ಹಳ್ಳಿರ ಊರರ ಪಡಿಲ್ ನೆಟ್ಟಿತುಂಡ್. ಸಂಸ್ಕೃತತರ ಈ ಶಾಸನತ್ ಬೇಲೂರರ ಅರಮನೆರ ಕೃಷ್ಣಪ್ಪ ನಾಯಕ ಪರಮಹಂಸ ಸನ್ಯಾಸಿಯಡಾತ್ ನಲ್ಲಂವನಾನ ಕೈವಲ್ಯ ಎಣ್ಣುವ ಯೋಗಿಕ್, ಕೃಷ್ಣದೇವಂಗ್ ಶುಭಾರ್ಪಣೆ ಆಯಿತ್ ಓರ್ ಆನೆ ಪಿಳ್ಳಾ ಮಾದವಳ್ಳಿ ಊರನೊ ಕೊಡತತ್‌ಂದ್ ಎಟ್ಟಿತುಂಡ್.

ಶುಭಮಸ್ತು! ಶ್ರೀ ಮತ್ಸರಮ ಹಂ|ಸಾನಾಂ ಪರಿವ್ರಾ|ಚಕ ಸತ್ತಮಂಕೈ| ವಲ್ಯಾಖ್ಯ  
ಮಹಾ ಯೋಗಿಂ| ಸದಾ|ಗ್ಲಾನೈಕ ತತ್ಪರಂ ಬೇಲೂರು ಕೃಷ್ಣ ಭೂ|ಪಸ್ತು ಅಹೂಯ  
ಯತಿಕುಂಜರಂ ಮೂದ್ರ|ವಳ್ಳೀ ಚಗ್ರಾಮಸ್ತು ದತ್ತಂ ಕೃಷ್ಣಾರ್ಪಣಂ| ಶುಭಂ ಕಿಮರ್ಥಃ  
ದತ್ತ ಮಿತ್ಯುಕ್ತೇ

ಈ ಶಾಸನತರ ಕಾಲ ಸುಮಾರ್ 1695 ಆಯಿತಕ್ಕು. ಕೊಡಗಲ್ ಬೇಲೂರ್  
ನಾಯಕಂಗಡ ಮೂಂದನೆ ಪಿಳ್ಳಾ ಆಖೀರತ ಶಾಸನ ನಿಡ್ತಹೋಬಳಿ ಮಾಲಂಬಿ ಊರ್  
ಪಳಿಯ ಗ್ರಾಮ ನಿವೇಶನತರ ಪಡಿಲ್ ಉಂಡ್. ಇದ್ಂಡ ಕಾಲ ಕ್ರಿ.ಶ. 1696.  
ಮಾಲಂಬಿ ರಾಜೇಗೌಡಂಗ್ ಕೃಷ್ಣಪ್ಪ ನಾಯಕ ಭೂಮಿ ಕಂದಾಯ ಪನ್ನೆರಂಡ್ ಪರಹ  
ಬುಟ್ಟ್ ಕೊಡ್ತಾನ ಇಲ್ಲಿ ಎಲ್ಲಿತ್.

ಧಾತು ಸಂವತ್ಸರದ ಅಸ್ವೀಜ ಶುಭ ಶೀಲಾ ಶ್ರೀಮ|ತು ವೆಂಕಟಾದ್ರಿ ನಾಯಕರ ಕೃಷ್ಣ|  
ಪ್ರನಾಯಕರು ಮಾಲಂಬಿ ರಾ|ಜೇಗೌಡರಿಗೆ ಪಾಲಿಸಿಕೊಂಡದು| ಕಂದಾಯ ಗಂ|  
ಹನ್ನೆರಡು ವರಹ|ನು ಪಾಲಿಸಿಕೊಂಡ|ದು ಇದೇವೆ

ಬೇಲೂರ್ ನಾಯಕಂಗಡ ಕೊಡಿಯತ ಮೂಂದ್ ಶಾಸನತನುಂಡ್ ಕೊಡಗಲ್  
ಅಯಿಂಗಡ ಪ್ರಭುತ್ವ ನಿಡತ ಬಿಲಹ ಪಿಳ್ಳಾ ಕೊಡಲಿ ಹೋಬಳಿರ ಮೀದ ಇಂಜತ್ಂಡ್  
ಅರಿವಾಪ. ಈ ಮೂಂದ್ ಹೋಬಳಿ ಅಯಿಂಗಡ ಪುಡ್ತತ್ ಕ್ರಿ.ಶ. ಸುಮಾರ್  
1700ಂಗೆತ್ತನೆ ಇಂಜತ್. ಕ್ರಿ.ಶ. 1694ತ್ ಮೈಸೂರ್ ಚಿಕ್ಕದೇವರಾಯ  
ಮಂಜರಾಬಾದ್ ಆರ್ ನಾಡ್‌ನ ಬುಟ್ಟಿತ್ ಅದ್ಂಡ ಉತ್ತರಕ್ ಇಂಜ ಇಕ್ಕತ ಹಾಸನ  
ಜಿಲ್ಲೆನ ವಶ ಪಡ್ತಿಯವಕ ಕೊಡಗರ್ ಹಾಲೇರಿ ಪಂಶತರ ದೊಡ್ಡವೀರಪ್ಪ ಒಡೆಯ  
ಏಳಾಯಿರ ಸೀಮೆಂದ್ ಕಾಕುವ ಇಂಜ ನಿಡ್ತ, ಬಿಲಹ ಪಿಳ್ಳಾ ಕೊಡಲಿ ಹೋಬಳಿನ  
ಆಕ್ರಮಣ ಮಾಡ್‌ಚಿ. ಅಕ್ಕ ಚಿಕ್ಕದೇವರಾಜ ಒಡೆಯ ಬೇಲೂರ್ ನಾಯಕಂಗಳ  
ಚೋಪ್‌ಚಿಟ್ಟಾಂಗ್ ಬೇಲೂರ್ ನಾಯಕಂಗ್ ಕೂಡ್‌ನ ಕೊಡಗರ್ ಭಾಗ ತಾಂಗೆ  
ಕೂಡೊಂಡೊಂದ್ ದೊಡ್ಡ ವೀರಪ್ಪ ಅದ್‌ನ ತಾಂಗ್ ಬುಟ್ಟ್ ತರೊಂಡೊಂದ್ ದೊಡ್ಡ  
ವೀರಪ್ಪಂಗ್ ಎಣ್ಣಿತ್ ಅಯೆಚತ್.

ಆಚೇಂಗಿ, ದೊಡ್ಡ ವೀರಪ್ಪ  
ಏಳಾಯಿರ ಸೀಮೆನ ಬುಟ್ಟ್ ಕೊಡ್‌ಪಕ್ ಒತ್ತವತಾಂಗ್ ಚಿಕ್ಕ ದೇವರಾಜ ಈ ಸೀಮೆನ  
ಲಂವನುಂಡ್ ಗೆಲ್ಲುವಕ್ ಸೈನ್ಯತನ ಅಯೆಚತ್. ಚಿನ್ನಂಗ್ ಸಮಯ ಕೊಡಗರ್ ಸೈನ್ಯಕೂ,  
ಮೈಸೂರ್ ಸೈನ್ಯಕೂ ಚಿರಿಯ ಚಿರಿಯ ಪಡೆ ನಡೊಂದಪಿಳ್ಳಾ ದಂಡ್ ಕಡೆಕಾರ ಓರ್  
ಒಪ್ಪಂದ ಮಾಡಿಯಂಡತ್. ಈ ಒಪ್ಪಂದತ್ ಪೋಲೆ ಏಳಾಯಿರ ಸೀಮೆ ಕೊಡಗ್  
ರಾಜಂಗ್ ಸೇರೊಂಡೊಂದ್, ಆಚೇಂಗಿ ಆ ಸೀಮೆರ ತೆರಿಗೆಲ್ ಚಿನ್ನಂಗ್ ಭಾಗತ್‌ನ  
ಮೈಸೂರ್ ರಾಜಂಗ್ ಕೊಡ್‌ಕೊಂಡೊಂದ್ ತೀರ್ಮಾನ ಆಚಿ. ಇನ್ನನೆ ಈ ಸೀಮೆಂಜ



ದಂಡೂ ರಾಜ್ಯಕ್ ತೆರಿಗೆ ಇಂಜಾನುಂಡ್ ಈ ಸೀಮೆಕ್ 'ಇತ್ತೇರಿ ಸೀಮೆ'ಂದ್ ಪೆದ ಆಚಿ.

ಐಗೂರ್ಲ್ ಆಳಿಯಂಡ್ ಇಂಜ ಕೃಷ್ಣಪ್ಪ ನಾಯಕ 1792ತ್ ಟಿಪ್ಪು ಸುಲ್ತಾನಂಡ ವಿರೋಧ ಆಯಿತ್ ಇಂಗ್ಲೀಷಡ ಸಹಾಯಕ್ ಶ್ರೀರಂಗಪಟ್ಟಣ್ ಬಂದಂಡಿಂಜ ಮರಾಠ ಸೈನ್ಯತನ ಕೂಡಿಯಂಡತ್. ಟಿಪ್ಪುಕೂ, ಇಂಗ್ಲೀಷಕೂ ಪಡೆ ಆಯಿತ್ ಒಪ್ಪಂದ ಆನಲ್ಲಿ ಕೃಷ್ಣಪ್ಪ ನಾಯಕ, ಟಿಪ್ಪುರ ಪಗೆಕ್ ತಾನ್ ಬಲಿಯಾಂಡೂಂದ್ ಬೊತ್ತಿತ್ ಕೊಡಗ್ಗಕ್ ಓಡಿಬಂದಿತ್ ಮಡಿಕೇರಿಲ್ ದೊಡ್ಡವೀರ ರಾಜೇಂದ್ರಂಡ ಆಸ್ಥಾನತ್ ಆಶ್ರಯ ಪಡ್ಂದತ್. ಆಚೇಂಗಿ, ಟಿಪ್ಪು ತಿರಿತ್ ಕೃಷ್ಣಪ್ಪ ನಾಯಕನ ಐಗೂರ್ ಸೀಮೆಕ್ ಕಾಕಿಯಂಡ್ ಅವಂಗ್ ಆ ಸೀಮೆನ ಆಳುವಕ್ ಬುಟ್ಟತ್.

1799ತ್ ಟಿಪ್ಪು ಚತ್ತಪಿಳ್ಳಾ ಅಕ್ಕ ಐಗೂರ್ ನಾಯಕ ಕೃಷ್ಣಪ್ಪ ನಾಯಕಂಡ ಮೋಂವ ವೆಂಕಟಾದ್ರಿ ನಾಯಕ ತಾನ್ ಸ್ವತಂತ್ರ ಆಯಿತ್ ಆಳುವಕ್ ಸುರು ಮಾಡನದೆ ಅಲ್ಲತೆ ಮೈಸೂರ್ ರಾಜಂಗ್ ಸೇರ್ನ ಐಗೂರ್ಗ ಉತ್ತರ ಸೀಮೆನ ಆಕ್ರಮಣ ಮಾಡುವಕ್ ಪೊರ್ಟತ್. ಅಕ್ಕ ಚೆರಿಯ ಬಯತ್ಕಾರ ಆಯಿತಿಂಜ ಮುಮ್ಮಡಿ ಕೃಷ್ಣರಾಜ ಒಡೆಯಂಡ ಸಹಾಯಕ್ ಬಂದ ಮೈಸೂರ್ಲ್ ಇಂಜ ಇಂಗ್ಲೀಷ್ಕಾರ 1801ತ್ ವೆಂಕಟಾದ್ರಿ ನಾಯಕನ ಚೋಪ್ಚಿಟ್ಟಿತ್ ಪುಡ್ಚೆಂಡ್ ಬಂದಿತ್ ಹಾಸನತ್ ಉಗ್ಗಿ ಹಳ್ಳಿಲ್ ತೂಕಿರ್ತ್. ಇಲ್ಲಿಕ್ ಬೇಲೂರ್ ನಾಯಕಂಗಡ ವಂಶ ನಿರ್ವಂಶ ಆಚಿ.

### 13. ಹಾಲೇರಿ ರಾಜ ವಂಶತ್ ಸ್ಥಾಪನೆ

ದಕ್ಷಿಣತ್ ಅಂಜಿಗೇರಿ ನಾಡ್ಲ್ ಚಿಟ್ಟಪ್ಪ ನಾಯಕ ಆಳುವಕ್ ಸುರು ಮಾಡಿತಿಂಜತಚ್ಚೆ. ಇದೇ ನೇರತ್ ಭಾಗಮಂಡಲ ನಾಡ್ / ತಾವು ನಾಡ್ಲ್ ಕರ್ಣೆಂಬಾಹು ಎಣ್ಣಪ ನಾಯಕ ಆಳಿಯಂಡ್ ಇಂಜತ್. ಇಂವ ಭಾರಿ ಶೂರ. ಮಲಯಾಳತ್ಂಜ ಬಂದಿತ್ ತಾವುನಾಡ್ನ ವಶಪಡ್ತಿಯಂಡ ನಾಯಕಂಗಡ ಸಂತಾನಕಾರ. ಇಂವ ತಾವುನಾಡ್ನ ಆಳಿಯಂಡ್ ಇಪ್ಪಕ ಕೊಡಗ್ಗರ ನಡುಭಾಗತ್ ಏದೇ ನಾಯಕಂಗ ಇಂಜನ್ನಕೆ ಕಾಂಬುಲೆ. ಅಕ್ಕ ಮಡಿಕೇರಿ ಪಿಳ್ಳಾ ಅದ್ಂಡ ಸುತ್ತುಮುತ್ತ ಚೆನ್ನಂಗ್ ಜಾಗತ್ಲೆಲ್ಲ ಬಲ್ಯ ಬಲ್ಯ ಕಾಡ್ ಇಂಜತ್. ಜನಳೆ ಆ ಜಾಗತ್ ವಾಸ ಮಾಡಿಯಂಡ್ ಇಂಚ್ಲೆ.

ಇನ್ನನೆ ಜನ ವಾಸ ಇಲ್ಲತ ಜಾಗಕ್ ಮಡಿಕೇರಿಂಜ ಏಳ್ ಕಿ.ಮೀ. ದೂರತ್ ಉಳ್ಳ

ಇಕ್ಕತ ಹಾಲೇರಿ ಎಣ್ಣುವಲ್ಲಿಕ್ ಶಿವಮೊಗ್ಗ ಜಿಲ್ಲೆರ ಇಕ್ಕೇರಿ ನಾಯಕ ಮನೆತನತರ ಓರ್ ರಾಜಕುಮಾರ ಬಾತ್. ಇಂವ ಕೊಡಗ್ ಬಪ್ಪಕ ವೀರಶೈವಂಗಡ ಜಂಗಮ ವೇಷ ಇಟ್ಟುಂಡ್ ಬಂದಿತ್ ಕೊಡಗಲ್ ನೆಲೆ ನಿಂದತ್. ಇಂವಂಡ ಕೂಡೆ ಚೆನ್ನಂಗ್ ಸಿನೇತಂಗಳೂ ಇಂಜತ್. ಇನ್ನತ ಸಿನೇತಂಗಡ ಕೂಟ್ಲ್ ಇಕ್ಕತ ಕನ್ನಂಡ ಒಕ್ಕತರ ಮೂಲಪುರುಷ ಒಬ್ಬ ಇಂಜತ್ ಎಣ್ಣುವ.

ಈ ರಾಜಕುಮಾರ ಇಲ್ಲಿಂಜ ಸುಮಾರ್ 200 ಮೈಲ್ ದೂರತ್ ಉಳ್ಳ ಶಿವಮೊಗ್ಗ ಜಿಲ್ಲೆರ ಇಕ್ಕೇರಿಂಜ ಬಂದಿತ್ ಕೊಡಗಲ್ ನೆಲೆ ನಿಪ್ಪಕ್ ಅವಂಗ್ ಕೊಡಗರ ಅಕ್ಕತ ರಾಜಕೀಯ ಪರಿಸ್ಥಿತಿರ ಅರಿವು ಎನ್ನನೆ ಗೊತ್ತಾಚಿ ಎಣ್ಣುವಾಂಡ ಮೀದ ತರ್ಕ ಮಾಡುವದ್ ನಲ್ಲದ್. ಅನ್ನನೆ ಈ ರಾಜಕುಮಾರ ಕೊಡಗ್ ಬಪ್ಪಕಲ್ಲಿಕೆತ್ತನೆ ಇಕ್ಕೇರಿ ನಾಯಕಂಗಡ ಮನೆತನತರ ಇತಿಹಾಸ, ಈ ರಾಜಕುಮಾರ ಇಕ್ಕೇರಿ ಮನೆತನಕ್ ಕೂಡ್‌ನಂವ ಎಣ್ಣುವಾಂಗ್ ಆಧಾರ ಕೊಡ್‌ಪದ್ ನಲ್ಲದ್.

ಇಕ್ಕೇರಿ ಮನೆತನತರ ಮೂಲಪುರುಷ ಚೌಡಪ್ಪ ನಾಯಕ ಎಣ್ಣುವಂವ ಕ್ರಿ.ಶ. 1499ತ್ ಶಿವಮೊಗ್ಗ ಜಿಲ್ಲೆರ ಸಾಗರತ್‌ಂಜ 4 ಮೈಲ್ ಉತ್ತರತ್ ಕೆಳದಿ ಎಣ್ಣುವ ಊರ್‌ನ ಕೆಟ್ಟಿತ್ ಅದ್‌ಂಡ ಸುತ್ತು, ಮುತ್ತು ಇಂಜ ನಾಡ್‌ನ ಗೆದ್ದಿತ್ ಆಳುವ ಕೂಡ್‌ಚಿ. ಇಂವಂಡ ಮೋಂವ ಸದಾಶಿವ ನಾಯಕ ಸುಮಾರ್ 1540ಂಡ ಒಳ್‌ಲ್ ಸಾಗರತ್‌ಂಜ 3 ಮೈಲ್ ದಕ್ಷಿಣತ್

ಇಕ್ಕೇರಿ ಎಣ್ಣುವ ದಂಡ್ ಬೀದಿ ಉಳ್ಳ ಟೌನ್‌ನ ಕೆಟ್ಟಿತ್ ಅಲ್ಲಿಕ್ ತಾಂಡ ರಾಜಧಾನಿನ ಬದ್‌ಲ್ ಮಾಡ್‌ಚಿ. ಅಂದ್‌ಂಜ ಈ ಮನೆತನತರ ನಾಯಕಂಗಕ್ 'ಇಕ್ಕೇರಿ ನಾಯಕಂಗ' ಎಣ್ಣುವ ಪೆದ ಬಾತ್.

ಇವು ಲಿಂಗಾಯತಂಗ. ಸದಾಶಿವ ನಾಯಕ ಅಕ್ಕ ವಿಜಯ ನಗರತ್ ಚಕ್ರವರ್ತಿ ಆಯಿತಿಂಜ ಸದಾಶಿವರಾಯನುಂಡ್ ಬಾರಕೂರ್, ಮಂಗಳೂರ್ ಪಿಳ್ಳಾ ಚಂದ್ರಗುತ್ತಿರ ಮೀದೆತ ಅಧಿಕಾರತನ ಪಡ್‌ಂದತ್. ಈ ಮನೆತನತರ ಆರನೆ ನಾಯಕ ಒಂದನೆ ಪೆಂಕಟಪ್ಪನಾಯಕ ವಿಜಯ ನಗರತ್ ಚಕ್ರವರ್ತಿಯ ದಖನ್ನರ ಸುಲ್ತಾನಂಗಳುಂಡ್ ಚೋತಿತ್ ಪಿಳ್ಳಾ ಸ್ವತಂತ್ರ ಆಯಿತ್ ತಾಂಡ ರಾಜ್ಯತನ ದಕ್ಷಿಣತೂ ವಿಸ್ತರಣೆ ಮಾಡ್‌ಚಿ.

ಪಶ್ಚಿಮತ್ ಉತ್ತರ ಕನ್ನಡತರ ಹೊನ್ನಾವರತ್‌ಂಜ ದ.ಕನ್ನಡತರ ಚಂದ್ರಗಿರಿ ಪೊಳೆಕೆತ್ತನೆ ಅವಂಡ ರಾಜ್ಯ ಪಡಿಞಾರ್ ಮಲೆರ ಮೊರ್‌ಡ್‌ಕೆತ್ತನೆ ಪಬ್ಬಿತಿಂಜತ್. ಇಂವಂಡ ಆಳ್ವಿಕೆರ ಕಾಲ ಕ್ರಿ.ಶ. 1582ತ್‌ಂಜ 1629ಕೆತ್ತನೆ. ಕೊಡಗರ ಹಾಲೇರಿಕ್ ಇಕ್ಕೇರಿ ರಾಜಕುಮಾರ ಬಂದಿತ್ ನೆಲೆ ನಿಂದಿಯದೆ ಇಂವಂಡ ಆಳ್ವಿಕೆರ ಕಾಲತ್.

ಆನಗುಂಡ್ ಈ ರಾಜಕುಮಾರ ವೆಂಕಟಪ್ಪ ನಾಯಕ ದ.ಕನ್ನಡಕ್ ಸೈನ್ಯತೋಡೆ ಬಂದಲ್ಲಿ ಅಂವಂಡ ಸೈನ್ಯತ್ ಇಂಜಿತ್ ವಾಪಾಸ್ ಪೋಪಕ ಕೊಡಗರ ರಾಜಕೀಯ ಪರಿಸ್ಥಿತಿನ ಅರಾಂಜಿತಿಕ್ಕು. ಇಲ್ಲೇಂಗಿ ದ.ಕನ್ನಡ ಜಿಲ್ಲೆರ ಜನಳುಂಡ್ ಅರಾಂಜಂಡಿತಿಕ್ಕು.

ಕ್ರಿ.ಶ.15ನೆ ಶತಮಾನತ್‌ಂಜ 17ನೆ ಶತಮಾನತ್‌ರ ನಡುಭಾಗಕ್ಕೆತ್ತನೆ ಆದ್ಯ ಕೊಡಗರ ನಂಜರಾಜಪಟ್ಟತೂ, ಅಲ್ಲಿಂಜ ಮೈಸೂರ್‌ರ ಪಿರಿಯಾಪಟ್ಟತೂ ಆಳೊನ ಚೆಂಗಾಳ್ವಂಗ ಕೊಡಗರ ಹಾಲೇರಿ ರಾಜ ಕುಟುಂಬತ್‌ರ ಬೆಂದು ಚೆಜ್ಜಾದಿಯ ಆಯಿಂಜತಾಂದ್ ಕೊಡಗರ ರಾಜಂಡ ಚರಿತ್ರಂಜ ಗೊತ್ತ್ ಕೊಟ್ಟುವ. ಆಚೇಂಗಿ, ಚೆಂಗಾಳ್ವಂಗ ಪಿಳ್ಳಾ ಕೊಡಗರ ಹಾಲೇರಿ ರಾಜ ಕುಟುಂಬಕಾರ ಒರೇ ಕುಟುಂಬಕಾರ ಅಲ್ಲ. ಎನ್ನಂಗೆಣ್ಣಕ ಚೆಂಗಾಳ್ವಂಗ ತಂಗಳ ಕಾಶ್ಯಪ ಗೋತ್ರಕಾರಂದ್ ತಂಗಡ ಶಾಸನತ್ ಎಳ್ಳಿಯಂಡಿತ್. ಈ ದಂಡ್ ರಾಜ ಮನೆತನಕಾರ ಬೋರೆ ಬೋರೆ ಕುಟುಂಬಕಾರ ಆನಕೊ, ಇವು ಬೆಂದ್‌ಕ ಆನಾನಗುಂಡ್ ಕೊಡಗರ್ಕ್ ಆದ್ಯ ಬಂದ ರಾಜಕುಮಾರ ಇಯಂಗಡ ಆಸ್ತಾನತ್ ಚೆನ್ನಂಗ್ ಸಮಯ ಇಂಜಿತ್ ಕೊಡಗರ ವಿಚಾರತ್‌ನ ಅರಾಂಜಂಡ ಸಾಧ್ಯತೆ ಉಂಡ್.

ಇಳ್ಳಾ ಹಾಲೇರಿ ರಾಜಂಗ ಇಕ್ಕೇರಿಂಜ ಬಂದಿತ್ ನೆಲೆ ನಿಂದ ರಾಜಕುಮಾರಂಡ ಸಂತಾನಕಾರಂದ್ ಎಣ್ಣುವಕ್ ಹಾಲೇರಿ ಸಂತಾನತ್‌ರ ದೊಡ್ಡ ವೀರರಾಜೇಂದ್ರ ಒಡೆಯ 1807ತ್ ಎಳ್ಳಾಚಿಟ್ಟ 'ರಾಜೇಂದ್ರ ನಾಮೆ'ಲ್ ಆಧಾರ ಕೊಟ್ಟುವ. ಸುಮಾರ್ 1700ತ್ ಇಕ್ಕೇರಿಕ್ ಕಾಕ್‌ಚಿಟ್ಟಂಡ್ ಅಲ್ಲಿ ಓರ್ ಸಂದರ್ಭತ್ ದೊಡ್ಡವೀರಪ್ಪಂಡ ಕೂಡೆ 'ನಿಂಗ ನಂಗಕ್ ಸ್ವಂತಕಾರಳೆ ಅಲ್ಲತೆ ಬೋರೆ ಅಲ್ಲ'ಂದ್ ಎಣ್ಣೆತ್ ದೊಡ್ಡ ವೀರಪ್ಪ ಒಡೆಯಂಗ್ 'ಪಾಲ್ ನೆಯ್ಯ'ಂದ್ ಇಕ್ಕತ ದ. ಕನ್ನಡ ಜಿಲ್ಲೆರ ಸುಳ್ಳ ತಾಲೂಕ್‌ರ ಅಮರಮಗಣೆ ಸೀಮೆನ ಕೊಡತದ್ ರಾಜೇಂದ್ರನಾಮೆಲ್ ಉಂಡ್.

ಕೈಂಜ ಶತಮಾನತ್ ಕೊಡಗರ ಚರಿತ್ರನ ಎಳ್ಳಾನ ಐರೋಪ್ಯ ವಿದ್ವಾಂಸಂಗ ಹಾಲೇರಿ ರಾಜವಂಶತ್‌ರ ಸ್ಥಾಪಕ ಇಕ್ಕೇರಿ ರಾಜಕುಮಾರಂದ್ ಎಳ್ಳಿತ್. ವೀರರಾಜ ಹಾಲೇರಿಕ್ ಸುರೂಲ್ ವೀರಶೈವ ಜಂಗಮನಾಯಿತ್ ಬಾತ್. ಇಕ್ಕ ಸುಮಾರ್ 400 ಕಾಲಕ್ ಬಯ್ಯ ಸಾಧು ಸಂತಂಗಳ, ಸನ್ಯಾಸಿಯಳ, ಜಂಗಮಳ ಜನ ಪೇರ್ತ್ ಭಯಭಕ್ತಿ, ಗೌರವತ್ ಕಂಡಂಡ್ ಇಂಜತ್ ಎಣ್ಣುವಾತ್ ಆಶ್ಚರ್ಯ ಒಂದೂ ಇಲ್ಲೆ.

ಇಕ್ಕೇರಿ ರಾಜಕುಮಾರ ಜಂಗಮ ವೇಷಧಾರಿ ಆಯಿತ್ ಚೆರಿಯಪರಿವಾರ ಕೆಟ್ಟಿಯಂಡ್ ಹಾಲೇರಿಕ್ ಬಪ್ಪಕ ಅಲ್ಲಿಯತ ಜನ ಅಂವನ ಪೇರ್ತ್ ಗೌರವತೋಡೆ ತಕ್ಕರ್‌ಚಿಟ್ಟಿತ್ ತಂಗಡ ಊರಾಲೆ ಇಪ್ಪನ್ನಕೆ ಕೇಟಂಡತ್.

ವೀರರಾಜ ಬಲ್ಯ ಆಳಾಯಿತ್, ನೋಟುವಕ್ ನಲ್ಲ ತಡಿಕಾರ. ಹಾಲೇರಿಲ್ ವಾಸ

ಮಾಡುವಕ್ ಸುರುಮಾಡಿತ್ ಚೆನ್ನಂಗಿ ಸಮಯತ್ ಅಲ್ಲಿಯತ ಪಿಳ್ಳಾ ಸುತ್ತು ಮುತ್ತು ನಾಡ್‌ರ ಜನ ತಂಗಡ ಒಕ್ಕಿ ಆನಪಿಳ್ಳಾ ಪತ್ತಾಯಕ್ ದುಂಬ್‌ಚಿಟ್ಟಿತ್, ಬಾಕಿ ಇಂಜ ನೆಲ್ಲ್‌ನ ತಂಗಲಾಯಿತೆ ಇಕ್ಕೇರಿ ರಾಜಕುಮಾರಂಗ್ ಕೊಡ್‌ಪಕ್ ಸುರು ಮಾಡ್‌ಚಿ.

ಈ ನೆಲ್ಲ್ 'ಧೂಳಿ ನೆಲ್ಲ್'ಂದೆ ಪೆದಪೋಚಿ. ದಿನ ದಿನಕ್ ಜಂಗಮ ವೇಷಧಾರಿ ಆಯಿತಿಂಜ ವೀರರಾಜಂಡ ಪೆದ ಪಿಳ್ಳಾ ಪ್ರಭಾವ ದೂರತ ಊರ್‌ಕೆಲ್ಲ ಪಬ್ಬ್‌ಚಿ. ತಾಂಡ ಪ್ರಭಾವ ಜಾಸ್ತಿಯಾನನ್ನಕೆ ವೀರರಾಜಂಡ ಜನ ತಂಗಜ ಇಷ್ಟಪೋಲೆ ಕೊಡ್‌ತಂಡ್ ಬಂದ ನೆಲ್ಲ್‌ಕ್ ಬದಲಾಯಿತ್ ಪ್ರತಿ ಮನೆಕ್ ಕಾಲಕ್ ಒಂದರೆ ಭಟ್ಟಿ ಅಕ್ಕಿ ಪಿಳ್ಳಾ ಒಯಿಂಬದ್ ಆಣೆ, ಎಟ್ತ್ ಪೈಸತ್‌ನ ಕಂದಾಯ ಆಯಿತ್ ತಪ್ಪನ್ನಕೆ ನಿರ್ಕ್ ಪಡ್‌ತಚಿ.

ಇದಾಯಿತ್ ಚೆನ್ನಂಗ್ ಸಮಯತ್ ಹಾಲೇರಿಲ್ ಇಂಜ ತಾಂಡ ಮನೆನ ತಿಂಗ ಇಡೀ ಪಾರ ಕಾಪಕ್ ದಂಡ್ ಜನಳ ಎರ್ಪಾಡ್ ಮಾಡ್‌ಚಿ. ಈ ಜನ ಇಂವಂಡ ಮನೆರ ಎದಿಕೆ ಅಗಲ ಆಯಿತಿಂಜ ಚಾವಡಿಲ್ ಇಂಜಿತ್ ಪಾರ ಕಾಪ ಇಂಜಾನುಂಡ್ ಅಯಿಂಗಕ್ 'ಚಾವಡಿಕಾರ' ಎಣ್ಣವ ಪೆದ ಬಾತ್. ಅಲ್ಲಿಂಜ ವೀರರಾಜ ತಾನ್ ಕೊಡಗುರ ರಾಜಾಂದ್ ಕೊಡ್‌ಗನ್ ಆಳುವಕ್ ಸುರು ಮಾಡ್‌ನಲ್ಲಿಂಜ ಹಾಲೇರಿ ರಾಜಂಡ ಆಳ್ವಿಕೆರ ಆಖೀರಿಕೆತ್ತನೆ ಅರಮನೆರ ಸೈನಿಕಂಗಳೆಲ್ಲ ಚಾವಡಿಕಾರಾಂದೆ ಕಾಕುವ ಇಂಜತ್. ಇಯಂಗಡ ಯೂನಿಫಾರ್ಮ್ ಮೊಣ್ಣೆ ಕಾಲ್‌ಕೆತ್ತಣೆ ಕರ್ತ ಕುಪ್ಪ, ಬೇನಿ ಕಾಲತ್ ಖಾಕಿ ರಂಗ್‌ರ ಕುಪ್ಪ, ಕರ್ತ ಚೀಲೆ ಪಿಳ್ಳಾ ಮಂಡೆಕ್ ಕೊಡವಡನ್ನಕೆ ಕರ್ತ ರಂಗ್‌ರ ಮಂಡೆತುಣಿ.

ಕೊಡಗಲ್ ಹಾಲೇರಿ ರಾಜಂಗಡ ಆಳ್ವಿಕೆ ಆಖೀರಿ ಆನದು ಬ್ರಿಟಿಷಡ ಆಳ್ವಿಕೆರ ನೇರತೂ, ಹಿಂದೂಸ್ಥಾನಕ್ ಸ್ವಾತಂತ್ರ್ಯ ಕ್ಷಾನ್ತನಪಿಳ್ಳಾ 1950ನೆ ಇಸವಿಕೆತ್ತನೆಕೂ ಮಡಿಕೇರಿರ ಪಳೆಯ ಅರಮನೆ ಪಿಳ್ಳಾ ಇಕ್ಕತ ಸರ್ಕಾರಿ ಖಜಾನೆನ ಪಾರಕಾಪವು ಈ ಚಾವಡಿಕಾರಳೆ ಆಯಿತಿಂಜತ್.

ಜಂಗಮ ವೇಷತ್ ಇಂಜ ವೀರರಾಜ, ಹಾಲೇರಿ ಪಿಳ್ಳಾ ಅದೊಂಡ ಸುತ್ತುಮುತ್ತು ನಾಡ್‌ರ ಜನಡ ಮೀದ ತಾಂಡ ಸರ್ವಾಧಿಕಾರ ಕೊಂಡಬಂದಪಿಳ್ಳಾ ತಾನ್ 'ಕೊಡಗುರ ರಾಜಾ'ಂದ್ ಬಹಿರಂಗ ಆಯಿತ್ ಎಣ್ಣಿಯಂಡತ್. ಇಂವ ಇಕ್ಕೇರಿರ ರಾಜಕುಮಾರಾಂದ್ ಅಕ್ಕಣೆ ನಾಡ್‌ರ ಜನಕೆಲ್ಲ ಗೊತ್ತಾನುಂಡ್ ಅವು ವೀರರಾಜನ ಹಾಲೇರಿ ಪಿಳ್ಳಾ ಸುತ್ತುಮುತ್ತು ನಾಡ್‌ರ ರಾಜಾಂದ್ ಒತ್ತಂಡತ್.

ಇದಾನದು ವೀರರಾಜ ಕೊಡಗುರ ಬೋರೆ ನಾಯಕಂಗಳ ತಾಂಡ ಪುಡ್‌ತತ್ ಬೆಚ್ಚಿವಕ್ ಅಯಿಂಗಡ ಮೀದ ಪಡೆ ಪೊತ್ತತ್. ತಾವುನಾಡ್‌ರ ಕರ್ಣಿಂಬಾಹು, ಬೋರೆ ನಾಯಕಂ

ಹಾಲೇರಿ ರಾಜಂಗ್ ತಂಗ, ತಂಗಡ ನಾಡ್‌ಂಜ ಕ್ಕಟ್ಟುವ ಕಂದಾಯ / ತೆರಿಗೆರ ನಾಲಾತ್ ಓರ್ ಭಾಗತ್‌ನ ಕೊಡ್‌ಪ ಪಿಳ್ಳಾ ಮೂಂದ್ ಭಾಗತ್‌ನ ತಂಗ ಬೆಚ್ಚವನ್ನೆ ಒತ್ತಂಡ್. ಆಚೇಂಗಿ, ವೀರರಾಜಂಡ ಪ್ರಾಬಲ್ಯ ಜಾಸ್ತಿ ಆಯಂಡ್ ಬಂದನ್ನೆ ಈ ನಾಯಕಂಗಡ ಅಧಿಕಾರ ಕಮ್ಮಿ ಆಯಿರ್‌ತ್. ಆನಗುಂಡ್ ರಾಜ ಅದತ್ ಚೆನ್ನಂಗಾಳ್‌ನ ಕೊಂದತ್, ಅಧಿಕಾರತ್‌ಂಜ ಉಳ್‌ಪ್‌ಚಿ. ಅಂತೂ ಕ್ರಿ.ಶ. 1600ಂಡ ನೇರಕ್ ಇಡೀ ಕೊಡಗ್ ಸೀಮೆ ಹಾಲೇರಿ ರಾಜಂಡ ಆಡಳಿತಕ್ ಬಾತ್. ಅಂದ್‌ಂಜ ಕ್ರಿ.ಶ.1834ಂಗತ್ತನೆ ಈ ಸಂತಾನತ್‌ರ ರಾಜಂಗಲೆ ಕೊಡಗ್‌ನ ಆಳ್‌ಚಿ.

#### 14. ಹಾಲೇರಿ ಒಡೆಯಡ ಇತಿಹಾಸತ್‌ರ ಮೂಲವಸ್ತು

ಹಾಲೇರಿ ಒಡೆಯಂಗ ಕ್ರಿ.ಶ. 1600ತ್‌ಂಜ ಇಪ್ಪರ ಆಳ್‌ನಾನಗುಂಡ್ ಅಯಿಂಗಡ ಕಾಲತ್‌ರ ಚರಿತ್ರೆಕ್ ಎಚ್ಚಿಕೊ ಮೂಲವಸ್ತು ಕ್ಕಟ್ಟು. ಇದತ್ ಮುಖ್ಯಪಟ್ಟಿದ್ ಕೊಡಗ್‌ಲ್ ಕ್ರಿ.ಶ. 1789ತ್‌ಂಜ 1809ಕೆತ್ತನೆ ಆಳ್‌ನ ದೊಡ್ಡವೀರರಾಜೇಂದ್ರ ಒಡೆಯ ಎಳ್ಳೆಚಿಟ್ಟಿ 'ರಾಜೇಂದ್ರ ನಾಮೆ' ಎಣ್ಣುವ ಪುಸ್ತಕ. ಇದತ್ ಕ್ರಿ.ಶ 1600ತ್‌ಂಜ 1807ಕೆತ್ತನೆ ಕೊಡಗ್‌ರ ಚರಿತ್ರೆ ಉಂಡ್. ದೊಡ್ಡ ವೀರರಾಜೇಂದ್ರ ಆ ಗ್ರಂಥತ್ ಕೊಡಗ್ 1780ತ್‌ಂಜ 1789ಕೆತ್ತನೆ ಮೈಸೂರ್‌ರ ಮುಸಲ್ಮಾನ ನವಾಬ ಪಿಳ್ಳಾ ಸುಲ್ತಾನಂಡ ಆಳ್ವಿಕೆಕ್ ಒಳಪಟ್ಟಲ್ಲಿ ಕೊಡಗ್‌ರ ಪಂಡೇತ ಚರಿತ್ರೆರ ಎಳ್ಳೆ ಪೇರ್ತ್ ಪಾಳಾಯಿತ್. ಆನಗುಂಡ್ ಮಿಂಜ್‌ನ ಚೆನ್ನಂಗ್ ವಸ್ತುನುಂಡ್ ಅವಂಡ ಕಾಲಕೆತ್ತನೆ ಕೊಡಗ್‌ರ ಚರಿತ್ರೆನ ಎಳ್ಳೆಚಿಟ್ಟಿಯೆಂದ್ ಎಣ್ಣಿತ್.

ಸ್ವಸ್ತಿ ಶ್ರೀ ವಿಜಯಾಭ್ಯುದಯ ಕಲಿಯುಗ ಸಂದ ವರುಷ ಳೞೞನೆ ಶಾಲಿವಾಹನ ಶಕ ಸಂದ ೧೭೧೮ನೆ ವರ್ತಮಾನಕ್ಕೆ ಸಲ್ಲುವ ನಳ ಸಂವತ್ಸರದಲ್ಲು ಶ್ರೀ ಮದ್ರಾಜಾ ಧಿರಾಜ ರಾಜಪರಮೇಶ್ವರ ಪ್ರೌಢಪ್ರತಾಪ ಅಪ್ರತಿಮ ವೀರ ನರಪತಿ ಕೊಡಗಿನ ಸಂಸ್ಥಾನದ ಶ್ರೀ ರತ್ನ ಸಿಂಹಾಸನರೂಢರಾಗಿ ಪೃಥ್ವಿ ಸಾಮ್ರಾಜ್ಯಂ ಗೆಯ್ಯುತ್ತಿದ್ದ ಬಾರದ್ವಾಜ ಗೋತ್ರದ ಅಶ್ವಲಾಯನ ಸೂತ್ರದ ಖುಕ್ ಶಾಖಾನೂಪಾಧ್ಯಾಯ ವೀರಶೈವ ಮತಸ್ಥರಾದ ಅಪ್ಪಾಜಿರಾಜೇಂದ್ರರ ಪೌತ್ರರಾದ ಲಿಂಗರಾಜೇಂದ್ರ ಒಡೆಯರವರ ಪುತ್ರರಾದ ವೀರರಾಜೇಂದ್ರ ಒಡೆಯರವರು ಕೊಡಗಿನ ಸಂಸ್ಥಾನದ ರಾಜ್ಯಾಧಿಪತ್ಯವನ್ನು ಮಾಡಿಕೊಂಡು

ಇರುವಾಗ್ಗೆ ತಮ್ಮ ಕೊಡಗಿನ ಸಂಸ್ಥಾನದ ದೊರೆಗಳ ವಂಶಾವಳಿ ಪಾರಂಪರ್ಯವಾಗಿ ಪ್ರಾಕಾರಭೃದಿಂದ ನಡೆದು ಬಂದಂಥಾ ವತ್ತಾಂತಗಳನ್ನು ಬರೆದ ಶಾಸನಗಳ ಜೀರ್ಣೋದ್ಧಾರ ಮಾಡಿ ಬರೆಸಿ, ಇತ್ತಲಾಗಿ ನಡೆತಂಥ ಅಭಿಪ್ರಾಯಗಳನ್ನು ಅದಕ್ಕೆ ಬರೆಸಬೇಕೆಂಬುದಾಗಿ, ಪುರಾಣ ಸಾಧನಗಳನ್ನು ತೆಗೆಸಿನೋಡಿದಲ್ಲಿ, ಕಲಿ ಸಂದ ೪೭೩೪ನೆ ಅಂಗೀರಸ ಸಂವತ್ಸರದ ಆಚೆಗೆ ನಡೆದ ವೃತ್ತಾಂತ, ಬರೆದ ಸಾಧನಗಳು ನವಾಬ ಹೈದರಲ್ಲೇ ಖಾನ ಬಹದ್ದೂರವರು ಅವರ ಮಗ ಟಿಪ್ಪು ಸುಲ್ತಾನರ ದಿವಸದಲ್ಲಿ ಸಹ ಅತಂತ್ರವಾಗಿ ಹೋದದ್ದು ಹೋಗಲಾಗಿ, ಆ ಅಂಗೀರಸ ಸಂವತ್ಸರದ ಇತ್ತಲಾಗಿ ತಮ್ಮ ತಂದೆಯವರಾದ ಲಿಂಗರಾಜೇಂದ್ರ ಒಡೆಯರವರ ದಿವಸ ಪರ್ಯಂತ ಆದ ವಿದ್ಯಮಾನ ಬರೆದ ಸಾಧನಗಳು ಉಳಿದು ಇದ್ದದರಿಂದ ಅದರಲ್ಲಿ ಬರೆದು ಇದ್ದ ವಿವರ ಮತ್ತು ತಮ್ಮ ಕಾಲದಲ್ಲಿ ನಡೆದಂತ ರಾಜಕಾರ್ಯ ಕಾರಣಗಳ ಸಹ, ಸಮಸ್ತರು ತಿಳಿಯುವ ಬಗ್ಗೆ ನಳ ಸಂವತ್ಸರದ ಮಾಘಶುಕ್ರವಾರ ಭಾನುವಾರ ಅಪ್ಪಣೆ ಕೊಟ್ಟು ಬರೆಸಿದ ಕ್ರಮವೆಂತೆಂದರೆ

ಹಾಲೇರಿ ರಾಜವಂಶತರ ಚರಿತ್ರನ ದೊಡ್ಡ ವೀರ ರಾಜೇಂದ್ರಂದ್ರ ಕಾಲಕೆತ್ತನೆ ರಾಜೇಂದ್ರನಾಮಲ್ ಎಳ್ವವಕ್ ಪಂಡೇತ ಎಳ್ತ್ ಕೊಟ್ಟಿತ್ತಿಲ್ಲೇಂದ್ ದೊಡ್ಡ ವೀರರಾಜೇಂದ್ರ ರಾಜೇಂದ್ರ ನಾಮಲ್ ಎಳ್ವಚಿಟ್ಟಕೊ, ಅಂಪಂಡ ಆಸ್ಥಾನತರ ಇತಿಹಾಸಕಾರ 17ನೆ ಪಿಳ್ಳಾ 18ನೆ ಶತಮಾನತರ ಕೊಡಗರ ಪಿಳ್ಳಾ ನೆರೆ ರಾಜ್ಯತರ ಇತಿಹಾಸತನ ಸಂಗ್ರಹ ಮಾಡುವ ಪ್ರಯತ್ನ ಮಾಡ್ಚೀಂದ್ ರಾಜೇಂದ್ರ ನಾಮಲ್ ಚಾಯಿತೆ ಗೊತ್ತಾಪ. ಉದಾರಣೆಕ್ ರಾಜೇಂದ್ರ ನಾಮಲ್ ಈ ತರ ಚೆನ್ನಂಗ್ ವಾಕ್ಯ ಬಪ್ಪ.

ಆ ಮೇಲೆ ಕಲಿ ಸಂದ ೪೭೩೪ನೆಯ ಕ್ಷಯ ಸಂವತ್ಸರತ್ ಮುದ್ದುರಾಜ ಒಡೆಯರವರು ಶಿವಾಧೀನರಾದರು. ದೊಡ್ಡ ವೀರಪ್ಪ ಒಡೆಯರು ಅದೇಮೇರೆ ರಾಜ್ಯಭಾರವನ್ನು ಮಾಡುತ್ತಾ ಇದ್ದರು....ಈ ಮೇರೆ ಇರುತ್ತಾ ಇದ್ದಲ್ಲಿ ಆವಾಗ ಮೈಸೂರ್ ಸಂಸ್ಥಾನದಲ್ಲಿ ಚಿಕ್ಕ ದೇವರಾಜ ಒಡೆಯರೂ ಇಕ್ಕೇರಿ ಸಂಸ್ಥಾನದಲ್ಲಿ ದೊಡ್ಡ ಚನ್ನಮ್ಮಾಜಿಯವರೂ ಸೋಮಶೇಖರ ನಾಯಕರ ಸಾಕಿಕೊಂಡು ದೊರೆತನ ಮಾಡುತ್ತಾ ಇದ್ದರು. ಸ್ವಾದೇ ಸಂಸ್ಥಾನದಲ್ಲಿ ದೊಡ್ಡ ಸದಾಶಿವ ರಾಜರೂ ಬೇಲೂರು ಸಂಸ್ಥಾನದಲ್ಲಿ ವೆಂಕಟಾದ್ರಿ ನಾಯಕರೂ ಚೆರಕಲ ಸಂಸ್ಥಾನದಲ್ಲಿ ವೀರವರ್ಮ ರಾಜರು, ಈ ಮೇರೆ ತಂಮ ತಂಮ ರಾಜ್ಯಭಾರ ಮಾಡಿಕೊಂಡು ಇರುತ್ತಿದ್ದರು.

ಈ ವಾಕ್ಯತ್ ಪೆದ ಉಳ್ಳ ರಾಜಂಗ ತಂಗ ತಂಗಡ ರಾಜ್ಯತ್ ಸಾಧಾರಣ ಸಮಕಾಲೀನಂಗಳಾಯಿತ್ ಆಳಿಯಂಡ್ ಇಂಜತ್ಂದ್ ಅಯಿಂಗಡ ಸಂಸ್ಥಾನತರ ಇತಿಹಾಸತ್ಂಜ ಗೊತ್ತಕ್ಟುವ. ಈ ನೇರ ಆನಪಿಳ್ಳಾ ಹೈದರಾಲಿ ಮೈಸೂರ್ಲ್

ಪ್ರಾಬಲ್ಯಕ್ ಬಪ್ಪಕ್ ಕ್ಕಟ್ಟನ ಅವಕಾಶ ಆ ನೇರತ್ ಮೈಸೂರ್ ಪಿಳ್ಳಾ ಇಕ್ಕೇರಿ / ಬಿದನೂರ್ಲ್ ಆಳಿಯಂಡ್ ಇಂಜ ರಾಜರಾಣಿಯಡ ಇತಿಹಾಸ ಸಂಕ್ಷಿಪ್ತ ಆಯಿತ್ ರಾಜೇಂದ್ರ ನಾಮಲ್ ಎಳ್ಳಿತ್.

ಇನ್ನನೆ ಕೊಡಗ್ಗರ ನೆರೆರಾಜ್ಯತ್ ರಾಜಂಗಡ ಪೆದತ್ ನೊ ಅಯಿಂಗಡ ರಾಜ್ಯತ್ ರ ಆ ಕಾಲತ್ ಚರಿತ್ರನೊ ಕೊಡಗ್ಗರ ಆ ಕಾಲತ್ ಇತಿಹಾಸತ್ ಸುಮಾರ್ 150 ಕಾಲ ಕೈಂಜದು ಎಳ್ಳನ ರಾಜೇಂದ್ರ ನಾಮಲ್ ಕಾಟೊಂಡುವೇಂಗಿ ಆ ಗ್ರಂಥತ್ ಎಳ್ಳನವು ಇತಿಹಾತ್ ಆಸಕ್ತಿ ಉಳ್ಳಯಿಂಗಾಂದೆ ಎಣೊಲು. ಓದುವದ್, ಎಳ್ಳುವದ್ ರಾಜ್ಯತ್ ಚೆನ್ನಂಗಿ ಚೆನ್ನಂಗ್ ಜನಕ್ ಮಾತ್ರ ಗೊತ್ತಿಂಜ 19ನೆ ಶತಮಾನತ್ ಆದಿಲ್ ಕೊಡಗ್ಗಲ್ ಇನ್ನತ ಓರ್ ಚರಿತ್ರರ ಗ್ರಂಥ್ ಎಳ್ಳನ ಇತಿಹಾಸಕಾರನ, ಎಳ್ಳಚಿಟ್ಟ ದೊಡ್ಡವೀರರಾಜೇಂದ್ರನ ಕೃತಜ್ಞತೆಲ್ ತುದಿಕೊಂಡು.

ರಾಜೇಂದ್ರನಾಮಲ್ ದೊಡ್ಡವೀರರಾಜೇಂದ್ರ ಒಡೆಯಂಡ ಕಾಲತ್ ಚರಿತ್ರ ಪೇರ್ತ್ ವಿವರವಾಯಿತ್ ಎಳ್ಳಿತುಂಡ್. ಕೊಡಗ್ಗರ ರಾಜಂಗಡಾತ್ ದೊಡ್ಡ ವೀರರಾಜೇಂದ್ರನೆ ಪೇರ್ತ್ ಕೇಳಿ ಪೋನಂವ. ಇಂವ ಇಂಗ್ಲೀಷ್ ಕಾರಡ ಕೂಡೆ ಸಿನೇತಿಕ್ ಮಾಡಿಯಂಡ್, ಟಿಪ್ಪುಸುಲ್ತಾನಂಗ್ ವಿರೋಧ ಆಯಿತ್ ಸಹಾಯ ಮಾಡ್ ನಂವ. ಇಂವ ತಾಂಡ ಪಿಳ್ಳಾ ತಾಂಡ ಸಂತಾನತ್ ಪಂಡೇತ ರಾಜಂಗಡ ಚರಿತ್ರನ ತಾಂಡ ಸಿನೇತಂಗಲಾನ ಇಂಗ್ಲೀಷ್ ಅಧಿಕಾರಿಯ ಪಿಳ್ಳಾ ಬೋರೆಯಿಂಗಡ ಅರಿವಿಕೆಯಿತ್ ಎಳ್ಳಚಿಟ್ಟತ್.

ಈ ಚರಿತ್ರನ ಆದ್ಯ ಕನ್ನಡತ್ ಎಳ್ಳಚಿಟ್ಟತ್ ಅಲ್ಲಿಂಜ ಇದ್ ನ ಲೆ. ರಾಬರ್ಟ್ ಅಬರ್ ಕ್ರಾಂಬಿನುಂಡ್ ಇಂಗ್ಲೀಷ್ ತರ್ಜುಮೆ ಮಾಡ್ ಚಿ. ಈ ಚರಿತ್ರ ರಾಜಂಡ ಅಪ್ಪಣೆಪೋಲೆ ಎಳ್ಳನಾನಗುಂಡ್ ಅವಂಗಾಡ್, ಅವಂಡ ಸಂತಾನತ್ ಪಳಿಯ ರಾಜಂಗಾಡ್ ಅವಮಾನ ಆಪ ಎದೇ ಸಂಗತಿ ಈ ಚರಿತ್ರಲ್ ಇಲ್ಲೆ. ಇದ್ ಮಾಮೂಲ್. ಏದ್ ರಾಜಂಡ ಚರಿತ್ರ / ದೇಶತ್ ಚರಿತ್ರ ಆಡ್, ಅದ್ ನ ಎಳ್ಳಚಿಟ್ಟಂವಂಡ ಸ್ವಾಭಿಮಾನ, ಸ್ವದೇಶಾಭಿಮಾನ, ಸ್ವಜನಾಭಿಮಾನ ಪಿಳ್ಳಾ ಸ್ವಮತಾಭಿಮಾನತ್ ಚೆನ್ನಂಗ್ ಪರಿಣಾಮ ಪಡ್ಂದಂಡ್, ಸತ್ಯ ಸಂಗತಿನುಂಡ್ ಚೆನ್ನಂಗಾಚೇಂಗೊ ದೂರ ಆಪ ಎಣ್ಣುವದ್ ಇತಿಹಾಸಕಾರಡ ಪಿಳ್ಳಾ ಸಂಶೋಧಕಂಗಡ ಅನುಭವ.

ಮಿಳ್ಳಾಕ್ ಈ ಪುಸ್ತಕತ್ ವಿವರಣೆ ತಪ್ಪ ಸಿದ್ಧೇಶ್ವರಂಡ ಕುಂದ್ ಪಡೆರ ಮೀದ ಟಿಪ್ಪು ಸುಲ್ತಾನಂಡ ಚರಿತ್ರಕಾರನೊ, ದೊಡ್ಡ ವೀರರಾಜೇಂದ್ರನೊ ವಿವರಣೆ ತಂದದ್ ಅಪ್ಪರಿಪ್ಪರ ವಿರೋಧ ಆಯಿತ್. ರಾಜೇಂದ್ರ ನಾಮಲ್ ಹಾಲೇರಿ ಅರಸಂಗ ಸ್ವತಂತ್ರಂಗದ್ ಎಳ್ಳಿತ್. ಆಚೇಂಗಿ, ಹಾಲೇರಿ ರಾಜಂಗಡ ಆದಿ ಮನೆತನಕಾರಲಾನ

ಇಕ್ಕೇರಿ ನಾಯಕಂಗ ಎಳ್ಳೆಚಿಟ್ಟಿ 'ಕೆಳದಿ ನೃಪವಿಜಯ' ಎಣ್ಣುವ ಗ್ರಂಥತ್ ಹಾಲೇರಿ ರಾಜಂಗ ಇಕ್ಕೇರಿ ರಾಜಂಗ್ ಕಪ್ಪಕಾಣಿಕೆ ಕೊಡ್ತಂಡ್ ಅಯಿಂಗಳ ನಂಬಿತಿಂಜತ್‌ಂದ್ ಎಳ್ಳಿತುಂಡ್. ಕೊಡಗರ ರಾಜಂಗ ಇಕ್ಕೇರಿ ನಾಯಕಂಗಳ ನಂಬಿತಿಂಜತ್ ಎಣ್ಣುವಾಂಗ್ ಮೈಸೂರ್‌ರ ಹೈದರ್ ಆಲಿ ಇಕ್ಕೇರಿ / ಬಿದನೂರ್ ನಾಯಕಂಗಳ ಚೋಪ್‌ಚಿಟ್ಟಿತ್ ಅಯಿಂಗಡ ರಾಜ್ಯತ್‌ನ ತಾಂಡ ಪುಡ್‌ತತ್ ಬೆಚ್ಚವಕ ತಾಂಗೂ ಅವು ಕಪ್ಪ ತರೊಂಡೂಂದ್ ಎಣ್ಣಾಚಿ. ವೀರ ರಾಜೇಂದ್ರ, ಟಿಪ್ಪುಸುಲ್ತಾನಂಡ ಆಳ್ವಿಕೆ ಸುರುವಾನಲ್ಲಿಂಜ ಚೆನ್ನಂಗ್ ಕಾಲ ಪೆರಿಯಾಪಟ್ಟಣತ್‌ರ ಕೋಟೆಲ್ ಜೈಲ್‌ಲ್ ಇಪ್ಪಕ ಅವ ಒರಾತತ್ ಮುಸಲ್ಮಾನ ಆಯಿತ್ ಮತಾಂತರ ಆಚೇಂದ್ ವೀರ ರಾಜಂಡ ದಂಡ್ ಸೋದರಿಯಳ ಟಿಪ್ಪುಸುಲ್ತಾನಂಡ ರಾಣಿವಾಸಕ್ ಅಯೆಚಿತ್‌ಂದ್ ಇಂಗ್ಲೀಷ್ ಚರಿತ್ರೆಕಾರಂಗ ಎಳ್ಳೆನ ಪುಸ್ತಕತ್ ಉಂಡ್. ಈ ಘಟನೆರ ಉಲ್ಲೇಖ ರಾಜೇಂದ್ರನಾಮಲ್ ಇಲ್ಲೆ.

ಇನ್ನನೆ ಹಾಲೇರಿ ರಾಜಂಗಡ ಸುಮಾರ್ 200 ಕಾಲತ್‌ರ ಇತಿಹಾಸತ್‌ರ ರಾಜೇಂದ್ರ ನಾಮಲ್ ಚೆನ್ನಂಗ್ ತಪ್ಪು ಉಂಡ್. ಎಳ್ಳೆರ ಆಧಾರ ಇಲ್ಲತೆ ಇಂಜನ್ನತ / ಅಲ್ಲಲ್ಲಿ ಚೆನ್ನಂಗ್ ಮಾತ್ರ ಇಂಜನ್ನತ ಅಂದೇತ ಕಾಲತ್ ಚಾರಿತ್ರಿಕ ಘಟನೆ ನಡ್‌ಂದಿತ್ ದುಂಬಾ ಕಾಲ ಕೈಂಜದು ಎಳ್ಳೆನ ಈ ಇತಿಹಾಸ ಗ್ರಂಥತ್ ಚೆನ್ನಂಗ್ ವಿಷಯ ಎಳ್ಳಿತ್, ಬುಟ್ಟ್ ಪೋನದೂ ಇಲ್ಲತಿಲ್ಲೆ. ಅನ್ನನೆ ಇಂಜಕೊ ರಾಜೇಂದ್ರನಾಮಲ್ ಎಳ್ಳೆಚಿಟ್ಟಿ ಸಂಗತಿಲ್ ದುಂಬ ಸತ್ಯಾಂಶ ಉಳ್ಳಾನುಂಡ್ ಅದ್‌ನ ಹಾಲೇರಿ ರಾಜಂಗಡ ಚರಿತ್ರೆರ ಮುಖ್ಯ ಆಧಾರ ಗ್ರಂಥ ಆಯಿತ್ ಎಡ್‌ತವ.

ರಾಜೇಂದ್ರ ನಾಮನ ಸುಲಭತ್ ಕನ್ನಡಶೈಲಿಲ್ ಎಳ್ಳಿತ್. ಆಚೇಂಗಿ, ಕನ್ನಡ ಶಬ್ದತ್‌ರ ಕೂಡೆ ಎಚ್ಚಿಕೊ ಹಿಂದೂಸ್ಥಾನಿ ಶಬ್ದ ಬಳಕೆ ಆಯಿತ್. ಆ ಕಾಲತೂ, ಅಲ್ಲಿಂಜೊ ಸುಮಾರ್ ಐಂಬದ್ ಕಾಲಕೆತ್ತನೆ ಎಣ್ಣಕ 1860ಂಗತ್ತನೆ ಹಿಂದೂ ಸ್ಥಾನಿ ತಕ್ಕ್ ಹಿಂದೂಸ್ಥಾನತ್‌ರ ಸಾರ್ವತ್ರಿಕ ತಕ್ಕಾಯಿತಿಂಜತ್.

ಈಸ್ಟ್ ಇಂಡಿಯಾ ಕಂಪೆನಿಕಾರ ದೇಶೀಯ ರಾಜಂಗ ಹಿಂದೂ ಸ್ಥಾನತೆ ಅಪ್ಪರಿಪ್ಪರ ಕಾಗದ ವ್ಯವಹಾರ ಮಾಡುವ ಇಂಜತ್ ಪಿಳ್ಳಾ ತಕ್ಕ್-ಬಾಕ್ ನಡ್‌ತುವ ಇಂಜತ್. ಈ ಕಾರಣತ್‌ನಗುಂಡ್ ರಾಜೇಂದ್ರ ನಾಮಲ್ ಕನ್ನಡತ್‌ರ ಕೂಡೆ ಹಿಂದೂಸ್ಥಾನಿ ಶಬ್ದ ಏರ ಬಳಕೆ ಆಯಿತ್.

ರಾಜೇಂದ್ರನಾಮೆ ಸುಮಾರ್ 1600ತ್‌ಂಜ 1807ಂಗತ್ತನೆ ಕೊಡಗರ ಚರಿತ್ರೆನ ಮಾತ್ರ ಎಡ್‌ತಂಡಿಯೆಂದ್ ಮಿಳ್ಳಾಲೆ ಎಣ್ಣಿತ್. ಅಲ್ಲಿಂಜ ಕೊಡಗರ ಚರಿತ್ರೆ ಕೊಡಗರ ರಾಜಂಗಕೂ, ಈಸ್ಟ್ ಇಂಡಿಯಾ ಕಂಪೆನಿರ ಅಧಿಕಾರಿಯಕೂ ನಡ್‌ಂದ ಕಾಗದ ವ್ಯವಹಾರತ್‌ನ ನೋಟತ್ ಬ್ರಿಟಿಷ್ ಎಳ್ಳೆಕಾರ ಎಳ್ಳೆನ ವರದಿಂಜೊ ಗೊತ್ತಾಪ.



**15. ಹಾಲೇರಿಲ್ ಆಳ್ವಾನ್ ಸುರೂವೆತ ಮುಂದ್ ರಾಜಂಗ**

ವೀರರಾಜೇಂದ್ರ ಒಡೆಯ, ಅಪ್ಪಾಜಿರಾಜ ಪಿಳ್ಳಾ ಮುದ್ದು ರಾಜ

ಶಿವಮೊಗ್ಗತರ ಇಕ್ಕೇರಿಂಜ ಕೊಡಗರ ಹಾಲೇರಿಕೆತ್ತನೆ ಬಂದಿತ್ ನೆಲೆ ನಿಂದಿತ್ ಚೆನ್ನಂಗ್ ಕಾಲಕೆತ್ತನೆ ಕೊಡಗಲ್ ರಾಜ್ಯಾಧಿಪತ್ಯ ಸ್ಥಾಪನೆ ಮಾಡ್‌ನಂವ ಇಕ್ಕೇರಿ ರಾಜಕುಮಾರ ವೀರರಾಜ. ಹಾಲೇರಿಯೆ ಇಂವಂಡ ರಾಜಧಾನಿ ಆನಗುಂಡ್ ಇಂವಂಡ ಸಂತಾನತರ ರಾಜಂಗಕೆಲ್ಲ 'ಹಾಲೇರಿ ರಾಜ'ಂದ್ ಪೆದ ಬಾತ್. ಈ ರಾಜಂಗ ತಂಗಡ ಚೆನ್ನಂಗ್ ಶಾಸನತ್ ಹಾಲೇರಿನ ಸಂಸ್ಕೃತತ್ 'ಕ್ಷೀರನಗರ'ಂದ್ ಕಾಕಿತ್. ಬಹುಶಃ ಈಂಡ ಮೂಲ ಪುರುಷ ತಾನ್ ನೆಲೆ ನಿಂದ ಊರ್‌ಲ್ 'ಎರ ಪಾಲ್' ಕ್ಕೆಟ್ಟುವ ಇಂಜಾನುಂಡ್ ಆ ಊರ್‌ಕ್ 'ಹಾಲೇರಿ'ಂದ್ ಪೆದ ಬೆಚ್ಚಿತಿಕ್ಕು. ಸಂಸ್ಕೃತತ್ ಹಾಲೇರಿ, ಕ್ಷೀರನಗರಂದ್ ಆಚಿ.

ಈ ಸಂತಾನತ್ ಒರ್ ಚೆರಿಯ ಬಯತ್‌ರ ರಾಣಿ ಸಹ ಕೂಡ್‌ನನ್ನೆಕೆ ಬಟ್ಟು 13  
ರಾಜಂಗ ಕೊಡಗಲ್ ರಾಜ್ಯ ಆಳಿತ್.

## ಹಾಲೇರಿ ರಾಜವಂಶ

- ## 1. ವೀರರಾಜ

1

- ## 2. ಅಪ್ಪಾಜಿರಾಜ

1

- ### 3. ಮುದ್ದುರಾಜ (1633-1687)

--	--

- #### 4. ದೊಡ್ಡವೀರಪ್ಪ (1687-1736)

- ಅಪ್ಪಾಜಿರಾಜ  
(ಹಾಲೇರಿ)

- ನಂದರಾಜ  
(ಹೊರಮಲೆ)

- ಅಪ್ಪಾಜಿರಾಜ

- ## 6. ಮುದುರಾಜ

- ## 9. ಲಿಂಗರಾಜ


7. ಮುದಯ್ಯರಾಜ

!

5. ಚಿಕ್ಕವೀರಪ್ಪ  
(1736-1766)

1

- ಮಲ್ಯಯ್ಯ



ರಾಜೇಂದ್ರನಾಮಲ್ ಹಾಲೇರಿ ರಾಜಂಗಡಾತ್ ಸುರೂವೆತ ದಂಡ್ ವೀರರಾಜೇಂದ್ರ ಪಿಳ್ಳಾ ಅಪ್ಪಾಜಿರಾಜಂದ್ ಕಾಟಿಯದಲ್ಲತೆ ಅವು ಆಳೊನ ಕಾಲ ಪಿಳ್ಳಾ ಆ ನೇರತ್ ನಡೊಂದ ಸಂಗತಿ ಏದೂ ಕಾಟಿತ್ತಿಲ್ಲೆ. ಆಚೇಂಗಿ, ಇಕ್ಕೇರಿ ನಾಯಕಂಗಡ ಚರಿತ್ರಲ್ ಈ ದಂಡ್ ರಾಜಂಗಳ, ಮೂಂದನೆ ಮುದ್ದುರಾಜಂಡ ಮೀದ ಇನ್ನನೆ ಎಳ್ಳಿತ್.

ಕ್ರಿ.ಶ.1582ತ್ಂಜ 1629ಂಗೆತ್ತನೆ ಆಳೊನ ಇಕ್ಕೇರಿರ 6ನೆ ನಾಯಕ 1ನೆ ವೆಂಕಟಪ್ಪನಾಯಕ ಒಮ್ಮತೆ ದ.ಕನ್ನಡ ಜಿಲ್ಲೆಕ್ ದಂಡಯಾತ್ರೆ ಪೋಯಿತ್ ಅಲ್ಲಿಯತ ಎಲ್ಲಾ ರಾಜಂಗಳ ಪಡಲ್ ಚೋಪ್‌ಚಿಟ್ಟಿತ್ ಅಲ್ಲಿಂಜ ದೇವಡ ದರ್ಶನಕಾಯಿತ್ ಸುಬ್ರಹ್ಮಣ್ಯ ಕ್ಷೇತ್ರಕ್ ಬಂದಿತಿಂಜತ್. ಅಕ್ಕ ಕೊಡಗುರ ರಾಜಂಡ ಮೀದ ಓರ್ ಸೈನ್ಯತ್‌ನ ಅಯೆಚಿತ್. ಅಕ್ಕ ಕೊಡಗುರ ಆಳಿಯಂಡ್ ಇಂಜ ಅಪ್ಪಾಜಿ ರಾಜ ವೆಂಕಟಪ್ಪ ನಾಯಕಂಗ್ ಕಪ್ಪ ಕಾಣಿಕೆನ ಕೊಡ್‌ತಿತ್ ಅಂವಂಡ ಅಧಿರಾಜತ್ವತ್‌ನ ಒತ್ತವಂಡಿಯಾಚಿ. ಇದಾನಪಿಳ್ಳಾ ಕ್ರಿ.ಶ.1629ತ್ಂಜ 1645ಕೆತ್ತನೆ ಇಕ್ಕೇರಿ ನಾಯಕ ವೀರಭದ್ರ ನಾಯಕಂಡ ಕಾಲತ್ ಅಂವಂಡ ಸೇನಾಧಿಪತಿ ಶಿವಪ್ಪ ನಾಯಕ ದ.ಕನ್ನಡಕ್ ಸೈನ್ಯತೋಡೆ ಬಂದಿತ್ ಕಾರ್ಕಳತ್‌ರ ಭೈರರಸ ಒಡೆಯನ ಚೋಪ್‌ಚಿಟ್ಟಿತ್ ದಕ್ಷಿಣತ್ ನೀಲೇಶ್ವರ ಪೊಳೆನ ದಾಟಿತ್ ಮಲಯಾಳ ರಾಜಂಡ ಮೀದ ಪಡೆಪೊತ್ತಿಯಂಡ್ ಪೋಚಿ. ಅಕ್ಕ ಕೊಡಗುರ ರಾಜ ಅಪ್ಪಾಜಿರಾಜ / ಮುದ್ದುರಾಜ ಮಲಯಾಳತ್‌ರ ರಾಜಂಡ ಸಹಾಯಕ್ ಸೈನ್ಯತೋಡೆ ಪೋಚಿ. ಆಚೇಂಗಿ, ಪಡಲ್ ಕೊಡಗುರ ರಾಜ ಚೋತ್ ಪೋಯಿತ್ ಕೊಡಗುಕ್ ವಾಪಾಸ್ ಬಾತ್. ಶಿವಪ್ಪ ನಾಯಕ ಕೊಡಗುರ ರಾಜನ ಅಚ್ಚಕಾಂಗಿ ಬುಡತೆ ಕೊಡಗುಕ್ ನುಗ್ಗಿತ್ ಸುಲಿಗೆ ಮಾಡಿತ್ ರಾಜನ ಪುಡ್‌ಚಿತ್. ಅಕ್ಕ ಕೊಡಗುರ ರಾಜಂಡ ಪೊಣ್ಣ್ ಅರಕಲಗೂಡ್‌ಲ್ ಆಳಿಯಂಡ ಇಂಜ ಬೇಲೂರ್ ಕೃಷ್ಣಪ್ಪ ನಾಯಕಂಡ ಪಕ್ಕ ಪೋಯಿತ್ ಬೋಡಿತ್, ಅಂವಂಡ ಕೂಡೆ ಶಿವಪ್ಪನಾಯಕಂಡಲ್ಲಿಕ್ ಬಂದಿತ್ ತಾಂಡ ವಡಿಯನ ಚೈಲ್‌ಂಜ ಬುಡ್‌ತಿ

ತರೊಂಡೊಂದ್ ಬೋಡಿಯಂಡತ್.

ಶಿವಪ್ಪನಾಯಕ ಅವಡ ಬೋಡಿಕೆನ ಮನ್ನಣೆ ಮಾಡಿತ್ "ಕೊಡಗರ ರಾಜ ಇಕ್ಕೇರಿ ಸಂಸ್ಥಾನಕ್ ಕಪ್ಪ ಕಾಣಿಕೆ ತಂದಂಡ್ ಇರೊಂಡು. ಅಲ್ಲತೆ ಇಕ್ಕೇರಿಕ್ ವಿರುದ್ಧ ಆಯಿತ್ ಎಂದೂ ಆಯುಧ ಕಾಟುವಕಯ್ಯ ಪಿಳ್ಳಾ ಇಕ್ಕೇರಿ ಸಂಸ್ಥಾನಕ್ ಅದೊಂಡ ಪರಾಕ್ರಮ ಪಿಳ್ಳಾ ಸ್ವರಕ್ಷಣೆರ ಎಲ್ಲ ಪಡೆಲ್ ಸಹಾಯ ಮಾಡೊಂಡು" ಎಣ್ಣುವ ಮೊಂದ್ ಇಡ್ಕೆಟ್ನ ಕೊಡಗರ ರಾಜಂಡ ಮೀದ ಪೊರ್ಡ್‌ಚಿಟ್ಟಿತ್ ಅವನ ಬುಡ್‌ಗಡೆ ಮಾಡ್‌ಚಿ. ಅಲ್ಲಿಂಜ ಅವಂಡ ರಾಜ್ಯತನ ವಾಪಾಸ್ ಕೊಡ್‌ತತ್.

ವೀರಭದ್ರ ನಾಯಕ ಮೋನೆಯಂಗ ಇಲ್ಲತೆ 1645ತ್ ಚತ್ತತ್. ಅಲ್ಲಿಂಜ ಇಕ್ಕೇರಿ ರಾಜ ಮನೆತನತರ ಸೇನಾಧಿಪತಿ ಶಿವಪ್ಪನಾಯಕ ದೊರೆಯಾಚಿ. ಇಂವ ಇಕ್ಕೇರಿ ನಾಯಕಂಗಡಾತ್ ಕೇಳಿಪಟ್ಟಂವ. ಅಕ್ಕಣೆಕ್ ಈ ನಾಯಕಂಗಡ ರಾಜಧಾನಿ ಇಕ್ಕೇರಿಂಜ ಬಿದಿರೂರ್ / ಬಿದನೂರ್‌ಕ್ ವರ್ಗ ಆಚಿ. ರಾಜಧಾನಿ ಆಪಾಂಗ್ ಮುಪ್ಪಡೆ ಪುಂಡಕಾಡ್‌ಂಜ ದುಂಬಿತಿಂಜ ಈ ಜಾಗಕ್ 'ಬಿದಿರುಹಳ್ಳಿ' ಎಣ್ಣುವ ಪೆದ ಇಂಜತ್. ರಾಜಧಾನಿ ಆನಪಿಳ್ಳಾ ಇದ್ ಬಿದಿರೂರ್, ಬಿದನೂರ್ ಎಣ್ಣುವ ಪುದಿಯ ಪೆದ ಪಡ್‌ಂದತ್. ಕವಿಯ ತಂಗಡ ಕಾವ್ಯತ್ ಬಿದನೂರ್‌ನ 'ವೇಣುಪುರಾ'ಂದ್ ಕಾಕಿತ್.

ಶಿವಪ್ಪನಾಯಕ ರಾಜ್ಯ ಆಳಿಯಂಡ್ ಇಪ್ಪಕ ಒಮ್ಮತೆ ಹಾಲೇರಿ ರಾಜಂಗಡಾತ್ 3ನೆಯಂವನಾನ ಮುದ್ದುರಾಜನ ಕಾಂಬಕ್ ಬಿದನೂರ್‌ಕ್ ಪೋಚಿ. ಚೆನ್ನಂಗ್ ದಿನ ಇಂಜಿತ್ ಮುದ್ದುರಾಜ ವಾಪಾಸ್ ಕೊಡಗಕ್ ಪೊರ್ಡೊಂಡು ಎಣ್ಣುವಕ, ಶಿವಪ್ಪ ನಾಯಕ "ಏದೇಂಗಿ ಸಹಾಯ ಬೋಂಡುವೇಂಗಿ ಕೇಳ್"ಂದ್ ಎಣ್ಣೊಚಿ.

ಅದೊಂಗ್ ಮುದ್ದುರಾಜ ತಾಂಗ್ ಬೋಂಡಿಯಾನದ್ ಎಲ್ಲ ತಾಂಡಲ್ಲೆ ಉಂಡ್. ಒಂದೂ ಬೋಂಡಾಂದ್ ಜವಾಬ್‌ಚಿ.

ಆಚೇಂಗೊ, ಶಿವಪ್ಪ ನಾಯಕ ಮುದ್ದುರಾಜಂಗ್ ಒರಾತ ಮಾಡುವಕ ತಾಂಗುಳ್ಳ, ಒರೇ ಓರ್ ಕೊರು ತಾನ್ ಚತ್ತಪಿಳ್ಳಾ ತಾಂಡ ಉತ್ತರಾಧಿಕಾರಿ ಆಯಿತ್ ರಾಜ್ಯ ಆಳುವಕ ಮೋನೆಯ ಇಲ್ಲತದೊಂದ್ ಎಣ್ಣೊಚಿ.

ಅಕ್ಕ ಶಿವಪ್ಪನಾಯಕ ತಾಂಡ ಕುಲದೈವ ಕೆಳದಿ ರಾಮೇಶ್ವರನ ಗೇನ ಮಾಡಿತ್ ಓರ್ ಪೊನ್ನಬೊಳ್‌ಚ ಮಾಡ್‌ಚಿಟ್ಟಿತ್. ಅದೊಂಗ್ ಪೈನೆಯ್ಯ ಬೂಕಿತ್, ತಿರಿ ಬೆಚ್ಚಿತ್ ಕತ್ತಾಚಿಟ್ಟಿತ್ "ಓರ್ ಕಾಲಕೆತ್ತನೆ ಕೆಡತನ್ನಕೆ ನೋಟಿಯಾಂದೂ, ಅಕ್ಕಣೆ ದೇವ ನೀಕ್ ಮೋಂವನ ತಪ್ಪಾ"ಂದೂ ಎಣ್ಣೆತ್ ಆ ಬೊಳ್‌ಚತನ ಮುದ್ದುರಾಜಂಗ್ ಕೊಡ್‌ತತ್.

ಅನ್ನನೆ ಮುದ್ದುರಾಜ ಆ ಬೊಳ್‌ಚತನ ಎಡ್‌ತಂಡ್ ತಾಂಡ ರಾಜ್ಯಕ್ ವಾಪಾಸ್

ಪೋಯಿತ್ ಆ ನಂದಾದೀಪತ್‌ನ ಓರ್ ಕಾಲಕೆತ್ತನೆ ಕತ್ತಚಿದಣೆ ರಾಜಂಡ ಪೊಣ್ಣ್ ಓರ್ ಕಣ್ಣ ಕುಣ್ಣಿನ ಪೆತ್ತತ್!

ಕೂಡೆನ್ನೆ ಮುದ್ದುರಾಜ, ಈ ಶುಭಸುದ್ದಿನ ಶಿವಪ್ಪ ನಾಯಕಂಗ್ ಅರಿಚಿದುವಕ್ ಎಚ್ಚಕೊ ಇನಾಂರ ಕೂಡೆ ತಾಂಡ ಆಪ್ತಂಗಳ ಬಿದನೂರ್‌ಕ್ ಅಯೆಚತ್.

ಶಿವಪ್ಪನಾಯಕ ತಾಂಡ ಪ್ರಾರ್ಥನೆರನ್ನೆ ಮುದ್ದುರಾಜಂಗ್ ಕಣ್ಣ ಕುಣ್ಣಿ ಆನ ಸುದ್ದಿ ಕೇಟಿತ್ ಪೇರ್ತ್ ಕುಶಿಪಟ್ಟಿತ್. ಆ ಕುಣ್ಣಿಕ್ (ಮಿಣ್ಣಿಕ್ ದೊಡ್ಡವೀರಪ್ಪ) ಪಾಲ್, ಬೊಣ್ಣೆಕ್ ತಾಂಡ ಪುಡ್‌ತತ್ ಇಂಜ ದ.ಕನ್ನಡ ಜಿಲ್ಲೆರ ಪಡೆಗಾರ್ ಮಲೆಕ್ ಮುಟ್ಟಿತಿಂಬ ಚೆನ್ನಂಗ್ ಊರ್‌ನ ಇನಾಂ ಆಯಿತ್ ಕೊಡ್‌ತತ್.

ಪಾಲ್, ಬೊಣ್ಣೆಕ್‌ಂದ್ ಕೊಡ್‌ತ ಆ ಊರ್‌ರ ಗುಡ್ಡೆಕ್ 'ಅಮೃತ ಮಾಗಣಿ'ಂದ್ ಪೆದ ಆಚಿ. ಇದ್ ಜನಡ ಬಾಯಿಲ್ ಎಣ್ಣೆಯಂಡ್ ಎಣ್ಣೆಯಂಡ್ 'ಅಮರ ಮಾಗಣಿ'ಯಾಚಿ. ಇದ್ ಕೊಡಗ್‌ಕ್ ಬಂದ ವಿಷಯ ರಾಜೇಂದ್ರನಾಮಲ್ ಇಣ್ಣೋರ್ ತರತ್ ಎಳ್ಳಿತ್.

ಮುದ್ದುರಾಜಂಡ ಪೇರ್ತ್ ಕಾಲತರ ಆಳ್ವಿಕೆರ ಆಖೀರಕ್ ಇಕ್ಕೇರಿಲ್ ಅಕ್ಕ ಆಳಿಯಂಡ್ ಇಂಜ ದೇವಮ್ಮಾಜಿ ತಾಂಡ ದತ್ತ ಮೋಂವ ಬಸಪ್ಪ ನಾಯಕನ ಕೂಟಿಯಂಡ್ ದ.ಕನ್ನಡ ಜಿಲ್ಲೆರ ಸುಬ್ರಹ್ಮಣ್ಯಕ್ ಬಂದಿತಿಂಬತ್. ಅಕ್ಕ ಮುದ್ದುರಾಜ ಸುಬ್ರಹ್ಮಣ್ಯತ್ ದೇವಮ್ಮಾಜಿನ ಕಂಡತ್. ದಂಡಾಳೂ ಅಪ್ಪರಿಪ್ಪರ ಪೇರ್ತ್ ಕ್ರಯ ಉಳ್ಳ ಇನಾಂನ ಕೊಡ್‌ತತ್, ಪಡ್‌ಂದತ್. ಕೊಡಗ್ ರಾಜಂಗೂ, ಇಕ್ಕೇರಿ ನಾಯಕಂಗೂ ಇಂಜ ಈ ಸಮ್ಮಂಧ ಇಕ್ಕೇರಿ ನಾಯಕಂಗಡ ಚರಿತ್ರೆಲ್ ಉಂಡ್‌ಂದೂ, ರಾಜೇಂದ್ರನಾಮಲ್ ಎಳ್ವೆಲೆಂದ್ ಈಂಗ್ ಮುಪ್ಪಡೆ ಎಣ್ಣಿತ್.

ರಾಜೇಂದ್ರನಾಮಲ್ ಮುದ್ದುರಾಜಂಡ ಆಳ್ವಿಕೆರ ಮೀದ ಚೆನ್ನಂಗ್ ವಿಷಯ ಕಟ್ಟುವ. ಮುದ್ದುರಾಜ 1633ತ್‌ಂಜ 1687ಂಗತ್ತನೆ ಒಟ್ಟು 54 ಕಾಲ ರಾಜ್ಯಭಾರ ಮಾಡ್‌ಚಿ. ಇಂವಂಗ್ ತಾಂಡ ರಾಜಧಾನಿನ ಹಾಲೇರಿಂಜ ಕೊಡಗರ ಮಧ್ಯ ಭಾಗತ್ ಉಳ್ಳ ಪಿಣ್ಣಾ ಶತ್ರುಪಕ್ ಬಪ್ಪಕ್ ಕಪ್ಪ ಆನ ಓರ್ ಜಾಗಕ್ ಮಾತೊಂದುಂದ್ ಇಂಜತ್.

ಇನ್ನನಿಪ್ಪಕ ಮುದ್ದುರಾಜ ಒನ್ನಾಂದ್ ಬೋಟೆಕ್ ತಾಂಡ ಪರಿವಾರತರ ಕೂಡೆ ಇಕ್ಕತ ಮಡಿಕೇರಿರ ಕೋಟೆ ಪಿಣ್ಣಾ ಅರಮನೆ ಉಳ್ಳ ಕುಂದ್‌ಕ್ ಬಾತ್. ಆ ಕಾಲತ್ ಈ ಕುಂದ್ ಪಿಣ್ಣಾ ಕುಂದ್‌ರ ಕೇದತ ಕೊಲ್ಲಿಲ್ ದುಂಬ ಮರ ಕಾಡ್ ದುಂಬಿತಿಂಬತ್.

ಮುದ್ದು ರಾಜ ಈ ಕುಂದ್‌ರ ಮೀದ ತಾಂಡ ಬೋಟೆ ನಾಯಿಯಳ ಅಲ್ಲಿ ಇಂಜ

ಕಾಡ್‌ಜಾತಿಯದ ಮೀದ ಚೂ ಬುಟ್ಟಿತ್. ಅಕ್ಕ ಓರ್ ಆಣ್ ಮೊನ ಬೋಟೆನಾಯಿನ ಬೊತ್‌ಚಿಟ್ಟಿಂಡ್ ಬಾತ್. ಈ ವಿಚಿತ್ರತನ ಕಂಡ ಮುದ್ದುರಾಜ "ಈ ಭೂಮಿ ಆಣ್ ಚೌಟ್‌ನ ಮಣ್ಣ್. ಇಲ್ಲಿಯೆ ಕೋಟೆ ಪಿಳ್ಳಾ ಅರಮನೆನ ಕೆಟ್ಟ್‌ಚಿಟ್ಟಿತ್ ಈ ಜಾಗತ್‌ನ ನಾಡ ರಾಜಧಾನಿ ಆಯಿತ್ ಮಾಡೊಂಡು"ಂದ್ ತೀರ್ಮಾನ ಮಾಡ್‌ಚಿ.

ಅನ್ನನೆ ಕುಂದ್‌ರ ಕೊಡಿಯತ ಜಾಗತ್‌ನ ಸಮ ಮಾಡುವಕ್ ಗೇನ ಮಾಡ್‌ಚಿ. ಅನ್ನನೆ ಸಮ ಮಾಡಿತ್ ಅಲ್ಲಿ ಕಲಿ ಸಂದ 4783ತ್ ದುರ್ಮತಿ ಸಂವತ್ಸರತ್ ಎಣ್ಣಕ ಕ್ರಿ.ಶ. 1681ತ್ ಮಣ್ಣ್ ಕೆಂವತ್‌ರ ಕೋಟೆ ಕೆಟ್ಟ್‌ಚಿಟ್ಟಿತ್. ಮುದ್ದು ರಾಜ ಈ ಕುಂದ್‌ರ ಕೊಡಿಲ್ ಕೋಟೆ ಪಿಳ್ಳಾ ಅರಮನೆನ ಕೆಟ್ಟ್‌ಚಿಟ್ಟಾನುಂಡ್, ಈ ಕುಂದ್ ಪಿಳ್ಳಾ ಇದೊಂಡ ಸುತ್ತ ಇಂಜ ಕೊಲ್ಲಿ ಜಾಗಕ್ 'ಮುದ್ದು ರಾಜ ಕೇರಿ'ಂದ್ ಪೆದ ಬಾತ್. ಮುದ್ದು ರಾಜ ಕೇರಿ ಜನಡ ಬಾಯಿಲ್ ಎಣ್ಣೆ ಎಣ್ಣೆ ಆಖೀರಕ್ 'ಮಡಿಕೇರಿ' ಎಣ್ಣುವ ಚೆರಿಯ ರೂಪ ಪಡ್‌ಂದತ್.

ಮುದ್ದುರಾಜ ತಾಂಡ ರಾಜಧಾನಿನ ಮುದ್ದುರಾಜ ಕೇರಿಕ್ ವರ್ಗ ಮಾಡ್‌ನ ಕೂಡೆನ್ನೆ ಅಂವಂಡ ಚಾವಡಿಕಾರ, ಪರಿವಾರ ಪಿಳ್ಳಾ ಅರಮನೆ ಚಾಕ್ರಿಲ್ ಇಂಜವು, ವ್ಯಾಪಾರಿಯ ಎಲ್ಲ ಇಲ್ಲಿಕೆ ಬಾತ್. ಕೋಟೆರ ಎದಿಕೆತ ಕೊಲ್ಲಿಲೂ, ದ.ಭಾಗತ್‌ರ ಕೊಲ್ಲಿಲೂ ಮನೆ ಕೆಟ್ಟಿ ನೆಲೆ ನಿಂದತ್. ಇನ್ನನೆ ಮಡಿಕೇರಿ 1681ತ್ ಸ್ಥಾಪನೆ ಆಚಿ.

ಇಕ್ಕೇರಿ ನಾಯಕಂಗ ತಂಗಡ ಆದ್ಯತ ರಾಜಧಾನಿ ಕೆಳದಿಂಜ ಸುಮಾರ್ ಕ್ರಿ.ಶ. 1540ತ್ ಇಕ್ಕೇರಿಕ್ ತಂಗಡ ರಾಜಧಾನಿನ ಬದಲ್ ಮಾಡ್‌ನಾಂಗ್ ಇದೇ ಕಾರಣ ತಪ್ಪು. 'ಕೆಳದಿ ನೃಪವಿಜಯ'ತ್ ಇಕ್ಕೇರಿ ರಾಜಧಾನಿ ಆನಾಂಡ ಮೀದ ಇನ್ನನೆ ಎಳ್ಳಿತ್.

'ಸುತ ಸಹಿತಂ ಚೌಡಪಭೂ

ಪತಿ ತಾನಿಕ್ಕೇರಿಗೈದಿರಲ್

ಮೊಲವೊಂದು

ನ್ನುತಮಾದ ಶುನಕನಂ ತ

ತ್ವಿತ್ಯೊಳ್ಳೆಂಬತ್ತಿ

ಪರಿಯುತಿರಲೀಕ್ಷಿಸುತಂ||

ಇದು ತಾಂ ಪುಂಭೂಮಿಯೆನಿ

ಪ್ಪುದಾನರಿದೊಡನಲ್ಲಿ ಕೋಟೆಯಂ ಬಲಿದು ಬಳಿ

ಕ್ಕದರೊಳರಮನೆಯನಿಂದ್ರನ

ಸದಸಕ್ಕಧಿಕಮೆನೆ

## ರಚನೆಗೈಸಿದನನುವಿಂ||

ಇನ್ನನೆ ಹಿಂದೂಸ್ಥಾನತ್ ಕೋಟೆ, ಅರಮನೆ ಕೆಟ್ಟಾನ ಚಾಗತ್‌ಲೆಲ್ಲ ಇನ್ನತ ಕತೆ ಉಳ್ಳದ್ ಕಂಡ್ ಬಪ್ಪ.

ಮುದ್ದುರಾಜ 54 ಕಾಲತ್‌ರ ದೀರ್ಘಕಾಲ ರಾಜ್ಯಭಾರ ಮಾಡ್‌ನಕೊ ಅವ ತಾಂಡ ರಾಜಧಾನಿನ ಹಾಲೇರಿಂಜ ಮಡಿಕೇರಿಗ್ ಬದಲ್ ಮಾಡ್‌ನದ್ ಬುಟ್ಟಕ ಬೋರೆ ಏದೇ ಘಟನೆ ಅವಂಡ ಕಾಲತ್ ನಡ್‌ಂದದ್ ಗೊತ್ತಾಪುಲೆ. ಅವಂಡ ಕಾಲತ್ ರಾಜ್ಯತ್ ಪಡೆ ನಡಕತೆ ಜನ ಶಾಂತಿ, ನೆಮ್ಮದಿಲ್ ಇಂಜನ್ನಕೆ ಕಂಡ ಬಪ್ಪ. ಅವ ಗಡಿ ಗಡಿ ತಾಂಡ ರಾಜ್ಯತ್‌ರ ಎಲ್ಲಾ ಬರಿ ಪೋಯಿತ್ ಜನಡ ಯೋಗ ಕ್ಷೇಮತ್‌ನ ವಿಚಾರಣೆ ಮಾಡುವ ಇಂಜತ್ ಎಣ್ಣುವದ್ ಈ ಕೋದತ ನಿರೂಪಣೆನುಂಡ್ ಅರಾಂಜಿಬಪ್ಪ. ಅನ್ನನೆ ಕೊಡವತಿಯ ತಂಗಡ ಸಂಸಾರತ್‌ರ ಕೆಲಸ ಕಾರ್ಬಾರಲ್ ಎಚ್ಚಕ್ ತಾಕತ್ ಕಾಟುವ ಇಂಜತ್. ಅಕ್ಕತ ಕಾಲತ ಜನಡ ಬದಕ್ ಎನ್ನನೆ ಇಂಜತ್ ಎಣ್ಣುವಾಂಗ್ ನಂಗಡ ಕಣ್ಣರ ಎದಿಕೆ ಓರ್ ಚಿತ್ರ ನಿಪ್ಪ. ಅದ್ ಇನ್ನನೆ ಉಂಡ್.

## ಮುದ್ದುರಾಜ ಪಿಳ್ಳಾ ಅಳಮಂಡ ದೊಡ್ಡವ್ವ

ಮುದ್ದುರಾಜ ಕೊಡಗಲ್ ಆಳಿಯಂಡ್ ಇಪ್ಪಕ ದ.ಕೊಡಗರ ಬೆಪ್ಪುನಾಡ್‌ರ ಅರಮೇರಿ ಊರರ ಅಳಮಂಡ ಮನೆಲ್ 'ದೊಡ್ಡವ್ವ' ಎಣ್ಣುವ ಓರ್ ಕನ್ನಿ ಇಂಜತ್. ಅವಡ ಅಪ್ಪವ್ವ ದುಂಬಾ ಆಸ್ತಿವಂತಂಗ, ಪೊನ್ನ, ಪಣ ಉಳ್ಳವು. ಅವು ದಂಪತಿಯಕ್ ದೊಡ್ಡವ್ವ ಒರೇ ಮೋವ. ಆನಗುಂಡ್ ಅವಡ ಅಪ್ಪವ್ವ ಸ್ವರ್ಗಸ್ಥಂಗಲಾನಪಿಳ್ಳಾ ಉಳ್ಳ ಆಸ್ತಿ ಪಿಳ್ಳಾ ಬೋರೆ ಸಂಪತ್ತ್‌ಕ್ ದೊಡ್ಡವ್ವನೆ ಅಧಿಕಾರಿ ಆಚಿ. ನಲ್ಲ ಗೆಟ್ಟಿಮುಟ್ಟಾನ ತಡಿ ತಾಕತ್ ಇಂಜ ಅವಕ್ ನಲ್ಲ ಗುಣಮನ, ನಲ್ಲರಿಕೆರ ಸ್ವಭಾವ ಇಂಜತ್. ದೇಶತ್ ಕೊಡವ ಪೊಣ್ಣಾಳಡಲ್ಲಿ ಎಲ್ಲಾರ್‌ಕೆಂಜ ದುಂಬ ಬುದ್ಧಿವಂತೆ, ಪಣಕರ್ತಿ ಪಿಳ್ಳಾ ತಾಕತ್ ಉಳ್ಳ ಪೊಣ್ಣಂದೆ ದೊಡ್ಡವ್ವ ಪೆದ ಪೋಯಿತಿಂಜತ್.

ಈ ಎಲ್ಲ ಕಾರಣತ್‌ನಗುಂಡ್ ಅಕ್ಕ ಕೊಡಗನ ಆಳಿಯಂಡ್ ಇಂಜ ಮುದ್ದುರಾಜ, ದೊಡ್ಡವ್ವನ ಪೇರ್ತ್ ಗೌರವ ಪಿಳ್ಳಾ ಮರ್ಯಾದಿಲ್ ಕಾಂಬ ಇಂಜತ್. ತಾನ್ ರಾಜ್ಯ ಸಂಚಾರ ಮಾಡುವ ನೇರತ್‌ಲೆಲ್ಲ ಬೆಪ್ಪುನಾಡ್‌ಕ್ ಬಂದಕ, ಅಳಮಂಡಲ್ಲಿಕ್ ಪೋಯಿತ್ ದೊಡ್ಡವ್ವನ ಖುದ್ ಕಂಡಿತ್, ತಕ್ಕ-ಬಾಕ್ ಪರಂದಿತ್ ಮಿಳ್ಳಾಕ್ ಪೋಪ ಇಂಜತ್.

ತಾಂಡ ಅಪ್ಪಂಡ ಆಸ್ತಿಗೆಲ್ಲ ಯಜಮಾನತಿ ಆಯಿತಿಂಜ ದೊಡ್ಡವ್ವ, ಮಿಳ್ಳಾಕ್ ತಾಂಡ

ಅಪ್ಪಂಡ ಆಸ್ತಿನ ನಡತಿಯಂಡ್ ಪೋಪಕ್ ಆಣ್ ಸಂತಾನ ಇಲ್ಲ ತಿಂಜಾನಗುಂಡ್ ತಾಂಡ ಮನೆಲೆ ಇಂಜಂಡ್ ಅಪ್ಪಂಡ ಆಸ್ತಿನ ನಡತಿಯಂಡ್, ತಾಂಡ ಅಪ್ಪಂಡ ಒಕ್ಕತರ ಪೆದತ್‌ನ ಬೆಚ್ಚವಕ್ ಒತ್ತವನ್ನತ ಓರ್ ಕೊಡವ ಬೈಂಬನ ಮಂಗಲ ಕಯ್ಯುವನ್ನಕೆ ತೀರ್ಮಾನ ಮಾಡುವ.

ಮನೆಲೆ ಆಣ್ ಸಂತಾನ ಇಲ್ಲತೆ, ಬೊರಿ ಮೂಡಿಮಕ್ಕಳೆ ಆ ಒಕ್ಕತ ಇಂಜಕ, ಅನ್ನತ ಒಕ್ಕಕ್ ತಂಗಡ ಮೋವಳ ಮಂಗಲ ಕೈಚಿತ್, ಅವಡ ವಡಿಯನ ತಂಗಡ ಮನೆಲೆ ಆಕಿಯವನ್ನತ ಓರ್ ವ್ಯವಸ್ಥೆ ಕೊಡವಡಲ್ಲಿ ಉಂಡ್. ಇದ್ ಕೊಡವಡ ಆಸ್ತಿ ವ್ಯವಹಾರತರ ಕಾನೂನ್ ಕಾಯಿದೆ (Coorg Civil Law)ಲ್ ಉಂಡ್. ಈ ಓರ್ ಪದ್ಧತಿಕ್ 'ಮಕ್ಕ ಪರಿಚೆ'ಂದ್ ಎಣ್ಣುವ.

ಈ ಓರ್ ಪದ್ಧತಿನ ಅನುಸರಣೆನ ಮಾಡಿಯಂಡ್ ಅಳಮಂಡ ದೊಡ್ಡವ್ವ, ಮಾತಂಡ ಉತ್ತಚ್ಚ ಎಣ್ಣುವ ಬೈಂಬನ ತಾಂಡ ವಡಿಯನಾಯಿತ್ ಆಯ್ಕೆ ಮಾಡಿಯವ. ಉತ್ತಚ್ಚ ಎಲ್ಲಾ ತರತೂ, ಎಲ್ಲಾ ಮಟ್ಟತೂ ದೊಡ್ಡವ್ವಂಗ್‌ಂಜ ಕಮ್ಮಿ ಮಟ್ಟತೆ ಇಂಜತ್. ಆನಗುಂಡೆ ದುಂಬ ಬುದ್ಧಿವಂತೆ ಆಯಿತಿಂಜ ದೊಡ್ಡವ್ವ ತಾಂಗ್‌ಂಜ ಕಮ್ಮಿ ಬುದ್ಧಿಶಕ್ತಿ ಪಿಳ್ಳಾ ಯೋಗ್ಯತೆ ಉಳ್ಳ ವ್ಯಕ್ತಿನ ಆಯ್ಕೆ ಮಾಡಿಯಂಡಿಕ್ಕು.

ದೊಡ್ಡವ್ವ ತಡಿ ತಾಕತ್‌ಲ್ ಪೇರ್ತ್ ಗೆಟ್ಟಿಮುಟ್ಟ್ ಎಣ್ಣುವ ವಿಷಯ ಮುದ್ದುರಾಜಂಗ್ ಗೊತ್ತಿಂಜತ್. ಅನ್ನನಾಯಿತ್ ಅವಡ ತಡಿರ ತಾಕತ್‌ನ ಪರೀಕ್ಷೆ ಮಾಡುವಕ್ ಮುದ್ದುರಾಜ ಗೇನ ಮಾಡ್‌ಚಿ.

ಆನಗುಂಡ್ ರಾಜ, ದೊಡ್ಡವ್ವ ಪಿಳ್ಳಾ ಬೋರೆ ಚೆನ್ನಂಗ್ ಖನಪಟ್ಟ ಪೊಣ್ಣಾಳಳ ಕಾಕಿತ್ ಓರೋರ ಉಪ್ಪು ಮೂಟೆನ ತಂಗ, ತಂಗಡ ಎಡ್‌ತೆ ನಿಪ್ಪುಲ್ ಬೆಚ್ಚಿತ್ ದೂರಕ್ ಕನಿಪನ್ನಕೆ ಎಣ್ಣಾಚಿ. ಅಕ್ಕ ಅಳಮಂಡ ದೊಡ್ಡವ್ವ ಪಿಳ್ಳಾ ಕಾಂತೂರ್ ಮೂರ್ನಾಡ್ ಬೋನಿರ ಮುತ್ತಣ್ಣಂಡ ತಾಯಿ ಚಿಣ್ಣವ್ವ ಉಪ್ಪು ಮೂಟೆನ ಏದೇ ಓರ್ ಅಲೆ ಇಲ್ಲತೆ ನೇತಿತ್ ತಂಗಡ ನಿಪ್ಪು ಕುಟ್ಟಲ್ ಬೆಚ್ಚಂಡ್ ಓರಚ್ಚಕ್ ಮೊಟ್ಟ್ ದೂರ ಚಾಡ್‌ನಾನ ಕಂಡಿತ್ ರಾಜಂಗ್ ಆಶ್ಚರ್ಯ ಆಯಿರ್‌ತ್! ರಾಜಂಗ್ ಇಯಂಗಡ ತಡಿರ ತಾಕತ್‌ನ ಕಂಡಿತ್ ಕುಶಿಯೋಡ್ ಕುಶಿ.

ಅಲ್ಲಿಂಜ ಅವ ತಾಂಡ ಮೆಚ್ಚುಗೆನ ಕಾಟಿಯವಕಾಯಿತ್ ಅಳಮಂಡ ಒಕ್ಕಕ್ ಊರ್ ತಕ್ಕಾಮೆನ ಅರಮೇರಿಲೂ, ಬೇಂಗ್ ನಾಡ್‌ರ ಕೊಟ್ಟೂರ್‌ಲೂ ಉಂಬಳಿಯಾಯಿತ್ ಭೂಮಿನ ಕೊಡ್‌ತತ್. ಇಕ್ಕಲೂ ಅರಮೇರಿಲ್ ಅಳಮಂಡ ಮನೆಕಾರಡದೇ ಊರ್ ತಕ್ಕಾಮೆ.

ಮುದ್ದುರಾಜಂಡ ನೇರತ್ ಎನ್ನಂಗ್ ಅಲ್ಲಿಂಜ 200 ಕಾಲಕೆತ್ತನೆಕೂ ಎಣ್ಣಕ ಕ್ರಿ.ಶ. 1850ಂಗತ್ತನೆ ಕೊಡಗಲ್ ದಂಡ್ ಚಕ್ರತ್ ವಾಹನ ಆಡ್, ಜನ ಓಡಿಕಳಿಪಕ್ ರಸ್ತೆಯಾಡ್ ಇಂಚ್ಲೆ. ದೇಶತ್‌ಡಿ ಜನ ನಡ್‌ಂದಂಡ್ ಪೋಪ ಇಂಜ ಬಟ್ಟೆ ಮಾತ್ರ ಇಂಜತ್. ರಾಜ, ರಾಣಿಯ ನಡ್‌ಪ ಬಟ್ಟೆ ಎಣ್ಣಕ ಅವು ಆನೆರ ಮೀದೊ, ಕುದರೆರ ಮೀದೊ, ಪಲ್ಲಕ್ಕಿಲೊ ಅಳತಂಡ್ ಪ್ರಯಾಣ ಮಾಡುವಕ್ ಬೋಂಡಿಯಾನ ಅಗಲತ್‌ರ ಬಟ್ಟೆ ಇಂಜತ್.

ಇಕ್ಕತ ರಾಜಾಸೀಟ್‌ರ ಬಲ್‌ತೆ ಬರಿಯ ಕುಂದ್ ಇಳಂಜಿತ್ ತಾಳತ್ತಮಾನಿಕ್ ಪೋಪ ಕಾಲೋಣಿಯೆ ರಾಜಂಗಡ ಕಾಲತ್‌ರ ಬಟ್ಟೆ ಆಯಿತಿಂಜತ್. ಸಂಚಾರ, ಸೌಕರ್ಯ ಈ ಪೋಲೆ ಇಂಜ ಆ ಕಾಲತ್ ಜನ ಓರ್ ಜಾಗತ್‌ಂಜ ಇಇಸ್ಲೋರ್ ಜಾಗಕ್ ಪೋಂಡೂಂದ್ ಕಂಡಕ ಅತ್ತಡ ಬೆನ್ನಲ್ ಸಾಮಾನ್‌ಕೆಟ್ ಇಟ್ಟಂಡ್ ಪೋಪ ಇಂಜತ್. ರಾಜಂಡ ಕಾಲತ್ ಕೊಡಗಂಜ ಪೊರಮೆ ಮಾರುವ ಇಂಜ ನೆಲ್, ಅಕ್ಕಿ ಪಿಳ್ಳಾ ಬೋರೆ ಸಾಮಾನ್ ಕೊಡಗ್ಗಾರ ಪಕ್ಕತ್ ಉಳ್ಳ ಮಲಯಾಳ, ದ.ಕನ್ನಡ ಪಿಳ್ಳಾ ಮೈಸೂರ್ ಸೀಮೆಂಜ ಎಡ್‌ತವ ಉಪ್ಪು, ಇರ್‌ಂಬು ಸಾಮಾನ್, ಬಟ್ಟೆ, ಅಣ್ಣೆ, ಬೆಲ್ಲ ಇನ್ನತಾನ ಅತ್ತಡ ಬೆನ್ನಲ್ ಇಟ್ಟಂಡ್ ನಡ್‌ಪ ಇಂಜತ್.

ಅತ್ತಡ ಬೆನ್ನಲ್ ಸಾಮಾನ್ ಕಡ್‌ತುವ ಈ ಪದ್ಧತಿ ರೋಡ್ ಪಿಳ್ಳಾ ವಾಹನ ಸೌಕರ್ಯ ಉಳ್ಳ ನಂಗಡ ಇಕ್ಕತ ಕಾಲತ್ ತಿರಿಕೆಕ್ ಕಾಲತ್‌ರ ನಮ್ಮೆಲ್ ಪಂಡ್‌ಂಜೇ ಪರಿಕೆ ಕೊಂಡಂಡ್ ಪೋಯಿತ್ ಕೊಡ್‌ಪದ್ ಸಾಕ್ಷಿ ಆಯಿತುಂಡ್. ಇದ್‌ಂಗ್ 'ಎತ್ತ ಪೋರಾಟ' ಎಣ್ಣುವ. ಬೈತೂರ್ ಪಿಳ್ಳಾ ಪಯ್ಯಾಪೂರ್ ತಿರಿಕೆಲ್ ಇಕ್ಕಲೂ ಕೊಡಗ್ಗಾರ ಚೆನ್ನಂಗ್ ಒಕ್ಕತ್‌ಂಜ ಎತ್ತಪೋರಾಟ ಉಂಡ್. ಮಿಳ್ಳತ ಪದ್ಧತಿ, ಪೂಜಾವಿಧಿ ಇಕ್ಕ ತಿರಿಕೆರ ಕಾಲತ್‌ರ ನಮ್ಮೆಲ್ ಮಾತ್ರ ಬಾಕಿ ಉಳ್ಳನ್ನೆಕೆ, ಇಕ್ಕಲೂ ಈ ಎತ್ತಪೋರಾಟ ಉಂಡ್.

ಕಾಲೋದಿ ಬೇನಿಲ್ ದಕ್ಷಿಣ ಕೊಡಗ್ಗಾರ ಬೋರೆ ಬೋರೆ ಊರ್, ನಾಡ್‌ರ ಜನ ತಂಗಡ ಅತ್ತಡ ಮೀದ ಅಕ್ಕಿನ ಪೋರಿಯಂಡ್ ಮಲಬಾರ್ ಪಿಳ್ಳಾ ಬೋರೆ ಊರ್‌ಕೆಲ್ಲ ಪೋಯಿತ್ ಅಕ್ಕಿ ಮಾರಿತ್ ಬಪ್ಪಕ ಅಲ್ಲಿಂಜ ಉಪ್ಪು, ಬಟ್ಟೆ, ಇರ್‌ಂಬುರ ಸಾಮಾನ್‌ನೆಲ್ಲ ಕೊಂಡ ಬಪ್ಪ ಇಂಜತ್.

ಅನ್ನನೆ ಅಳಮಂಡ ದೊಡ್ಡವ್ವ ಇಂಜ ಅರಮೇರಿ ಊರ್‌ಂಜ ಬೇನಿಲ್ ಮಲಬಾರ್ ಇರ್ಕೂರ್‌ಂಜ ಉಪ್ಪು ಕೊಂಡ ಬಪ್ಪಕ್, ಕರಾವಳಿ ಊರ್‌ಕ್ ಅಕ್ಕಿ ಮಾರುವಕ್ ಜನ ಅತ್ತಡ ಮೀದ ಅಕ್ಕಿ ಇಟ್ಟಂಡ್ ಒಂದಾಯಿಪೋಪ ಇಂಜತ್. ಅನ್ನತ ಸಂದರ್ಭತ್



ದೊಡ್ಡವ್ವ ತಾನೆ ಮುಂಬಲ್ ನಿಂದಂಡ್ ಎಲ್ಲಾ ತಯಾರಿ ಮಾಡುವ ಇಂಜತ್. ಅತ್ತಡ ಕೂಡ ಪೋಪ ತಾಂಡ ವಡಿಯ ಪಿಳ್ಳಾ ಆಳಕ್ ಕೂಪೊದಿ ಕೊಡ್ತಿತ್, ಅಡಿಗ ಸಾಮಾನ್‌ನೊ ಸೆರಿ ಮಾಡಿ ಕೊಡ್ಪ ಇಂಜತ್. ಅವಡ ವಡಿಯ ಪಿಳ್ಳಾ ಆಳ ಅತ್ತಡ ಮೀದ ನೆಲ್ಲ್ ಚೀಲತ್‌ನ ಇಡುವಕ ನಿಧಾನ ಕಳಚಕ, ಅಯಿಂಗಳ ಬರಿಲ್ ನಿಪ್ಪಕ್ ಎಣ್ಣೆತ್ ದೊಡ್ಡವ್ವನೆ ಖುದ್ ನೆಲ್ಲ್ ಮೂಟೆನ ಪೊರ್ತಿತ್ ಇಡುವ ಇಂಜತ್! ದೊಡ್ಡವ್ವ ತಾಂಡ ಮನೆಪಣಿಲೊ ಪೇರ್ತ್ ನಲ್ಲರಿಕೆ ಪಿಳ್ಳಾ ಪ್ರಾಮಾಣಿಕತೆ ಬೆಚ್ಚಂಡಿತಿಂಜತ್.

ಇಚ್ಚೆಲ್ಲ ಇಂಜಕೊ ದೊಡ್ಡವ್ವಂಗ್ ಓರ್ ವರೀಸ್ ಎಕ್ಕೋಲು ನೊಂಬಲ ಪಡ್‌ತುವ ಇಂಜತ್. ತಾಂಡ ಆಸ್ತಿರ ಉತ್ತರಾಧಿಕಾರಿ ಆಪಕ್ ಅವಕ್ ಮೋನೆಯ ಇಂಜಾಲೆ. ನಾಲ್ ಮೋಳಿಯ ಇಂಜತ್. ಇಯಂಗಡಾತ್ ಪೆರಿಯವಳ ಪಾಲೆಕಂಡಲ್ಲಿಕ್, ದಂಡನೆಯವಳ ಪೂಳಂಡಲ್ಲಿಕ್, ಮೂಂದನೆಯವಳ ಅಮ್ಮಣಿಚಂಡಲ್ಲಿಕ್ ಮಂಗಲ ಕೈಚಿ ಕೊಡ್ತತ್.

ಆಚೀಂಗಿ, ಎಳೆಯವಳ ತಾಂಡ ಎಲ್ಲಾ ಆಸ್ತಿರ ಹಕ್ಕುದಾರಳಾಯಿತ್ ಮಾಡಿತ್ ಅವಕ್ ಪುಟ್ಟನ ಆಮಕ್ಕಳ ತಾಂಡ ಒಕ್ಕಕೆ ಎಣ್ಣೆಕ ಅಳಮಂಡ ಒಕ್ಕಕೆ ತರೊಂಡು ಎಣ್ಣುವ ಇಡ್‌ಕೆಟ್ಟಾರ ಮೀದ ಎಳೆಯ ಮೋವಳ ಪಾಲೆಕಂಡಲ್ಲಿಕೆ ಮಂಗಲ ಕೈಚತ್. ಅದೃಷ್ಟ ಎಣ್ಣುವನ್ನಕೆ ಈ ಮೋವಕ್ ನಾಲ್ ಕಣ್ಣ ಕುಳ್ಳಿಯ ಪುಟ್ಟಚಿ. ಇದತ್ ಪೆರಿಯ ದಂಡ್ ಕಣ್ಣ ಕುಳ್ಳಿಯಕ್ ದೊಡ್ಡವ್ವ ತಿಮ್ಮಯ್ಯ ಪಿಳ್ಳಾ ಮಾಚಯ್ಯ ಎಣ್ಣುವ ಪೆದ ಇಟ್ಟಿತ್ ಚಾಕ್‌ಚಿ.

ಇವು ದಂಡಾಳೆ ಇಕ್ಕತ ಅಳಮಂಡ ಒಕ್ಕತರ ಮೂಲ ಪುರುಷಂಗ. ಇದತ್ ತಿಮ್ಮಯ್ಯಂಡ ಮೋಂವ ಮುದ್ದಯ್ಯ, ಮುದ್ದ ರಾಜಂಡ ಕೊರಮಕ್ಕಡ ಕಾಲತ್ ಅರಮನೆಲ್ ಚಾಕ್ರಿಲ್ ಇಂಜತ್. ಆನಗುಂಡ್ ಇಂವನ ಊರ್‌ಕಾರ ಅರಮನೆ ಮುದ್ದಯ್ಯಂಡ್ ಕಾಕುವ ಇಂಜತ್.

ದೊಡ್ಡವ್ವಂಡ ದಂಡನೆ ಮೋಂವ ಮಾಚಯ್ಯಂಡ ಮೋಂವ ಅಯ್ಯಪ್ಪ. ಅಯ್ಯಪ್ಪಂಡ ಮೋಂವ ಬೊಳ್ಳು, ಬೊಳ್ಳುರ ಮೋಂವ ಸೋಮಯ್ಯ. ಇಂವ ಕೊಡವಡಾತ್ ಅದ್ ಕೈಸ್ತ ಧರ್ಮತ್‌ನ ಸ್ವೀಕಾರ ಮಾಡ್‌ನಂವ.

## ಮುದ್ದುರಾಜನುಂಡ್ ಪೆರಿಯಾಪಟ್ಟಣ್ ಪಡೆಪೊತ್ತದ್ ನಡಂದಾಲೆ. ಪೆರಿಯಾಪಟ್ಟಣತ್ ನಂಜುಂಡರಸಂಗ್ ಆಶ್ರಯ ಕೊಡತದ್

ಹಾಲೇರಿಲ್ ಮುದ್ದುರಾಜಂಡ ಪೆರಿಯವು ತಂಗಡ ಅಳ್ಳಿಕೆನ ಸ್ಥಾಪನೆ ಮಾಡುವಾಂಗ್ ಮುಪ್ಪಡೆ ಪೆರಿಯಾಪಟ್ಟಣತ್ ಚೆಂಗಾಳ್ವೆಂಗ ಆಳಿಯಂಡ್ ಇಂಜತ್‌ಂದೂ, ಇವು ಹಾಲೇರಿ ರಾಜಂಡ ಸಮ್ಮಂದಿಯ, ದಾಯಾದಿಯ.

ರಣಧೀರ ಕಂಠೀರವ ನರಸರಾಜ ಒಡೆಯ ಪೆರಿಯಾಪಟ್ಟಣ್ ಮುತ್ತಿಗೆ ಇಡುವಕ್ ಹಾಲೇರಿಲ್ ಮುದ್ದುರಾಜ ಆಳಿಯಂಡ್ ಇಂಜತ್. ಚೆಂಗಾಳ್ವೆಂಗ ಹಾಲೇರಿ ರಾಜಂಗ ಅಪ್ಪರಿಪ್ಪರ ಪೇರ್ತ್ ಚಾಯಿತೆ ಸಿನೇತಿಕೆಲ್ ಇಂಜತ್. ಈ ದಂಡ್ ಸಂತಾನತ್‌ರ ರಾಜಂಗ ಒರೇ ಕುಟುಂಬತ್‌ರನ್ನೆ ಇಂಜಾನುಂಡ್ ಚೆಂಗಾಳ್ವರಸಂಗಡ ತೆರಿಕೂ, ಮೈಸೂರ್‌ಕೂ ಕೂಡ್‌ನ ತೆರಿ ಪೆರಿಯಾಪಟ್ಟಣ್ ತಾಲ್ಲೂಕ್ ಕಟ್ಟೆ ಮಳಲವಾಡಿ ಪಕ್ಕ ಉದ್ದೂರ ಕೊಡಗರಳ್ಳಿ ಎಣ್ಣುವಲ್ಲಿ ಕೊಡಗರ ಗುರ್‌ತ್‌ಕಲ್‌ನ ನೆಟ್ಟಿತಿಂಜತ್.

ಈ ನೇರತ್ ಮೈಸೂರ್‌ರ ರಾಜ ಕಂಠೀರವ ನರಸರಾಜ ಒಡೆಯ ಪೇರ್ತ್ ಪರಾಕ್ರಮಿ ಆಯಿತಿಂಜತ್. ಇಂವ ಸಿಂಹಾಸನಕ್ ಬಂದನ್ನೆ ತಾಂಡ ರಾಜ್ಯತ್‌ರ ಸುತ್ತು ಮುತ್ತು ಸೀಮೆನ ಗೆಲ್ಲುವಕ್ ನೋಟಚಿ. ಅಕ್ಕ ಪೆರಿಯಾಪಟ್ಟಣ್ ನಂಜುಂಡ ರಾಜ ಇಂಜತ್. ಅವಂಗ್ ಬಯತ್ ಆಯಿತಿಂಜತ್. ಮೈಸೂರ್ ದೊರೆ ಪೆರಿಯಾ ಪಟ್ಟಣ್‌ನ ಪುಡ್‌ಚಂಡಾನ ರಾಜೇಂದ್ರ ನಾಮಲ್ ವಿವರಣೆ ಕೊಡತಿತ್.

ಪೆರಿಯಾಪಟ್ಟಣ್‌ರ ನಂಜುಂಡ ರಾಜಂಡ ಕಡೆಕಾರಡ ಪಿತೂರಿಸುಂಡ್ ಇಕ್ಕ ನಿಂಗಡ ಸೈನ್ಯತ್‌ನ ಅಯೆಚಿತಂದಕ ಈ ಕೋಟೆನ ನಿಂಗಡ ಪುಡ್‌ತಕ್ ತಪ್ಪಾಂಡ್ ಮೈಸೂರ್ ರಾಜಂಗಕ್ ಒಪ್ಪಂದ ಆಯಿತ್ ಎಣ್ಣಿತ್ ಅಯೆಚಾಂಗ್, ಚಿಕ್ಕದೇವರಾಜ ಒಡೆಯ ಪೆರಿಯಾಪಟ್ಟಣ್‌ರ ಕೋಟೆ ಆ ಸೀಮೆನ ಸಹ ಪುಡ್‌ತಕ್ ಎಡ್‌ತವಂಡೂಂಡ್ ಒಪ್ಪಂದ ನಡತಿಯಂಡ್ ಇಂಜತ್. ಇಂವ ಸೈನ್ಯ ತಯಾರಿ ಮಾಡಿಯಂಡುಳ್ಳ ಮಾಡ್‌ಚಿಡುವ ರಾಜಂಗ್ ಗೊತ್ತಾಯಿತ್ ಪೆರಿಯಾಪಟ್ಟಣ್‌ರ ಕೋಟೆಲ್ ತಂಗಡ ಮೋಂವ ವೀರರಾಜ ತಂಗ ಸೈನ್ಯ ಎಡ್‌ತಂಡ್ ಪೋಪಾಂಡ ಮೀದ ಮಡಿಕೇರಿಕ್ ಬಂದಿತ್ ಈ ಸುದ್ದಿನ ದೊಡ್ಡ ವೀರಪ್ಪ ಒಡೆಯಂಗ್ ಅರಿಚಿಟ್ಟಲ್ಲಿ, ಅವು ತಂಗಡ ಕೊಡಗರಳ್ಳ ಕೂಟಿಯಂಡ್ ಎಕ್ಕೋಲು ತಯಾರಾಯಿತ್ ಇಂಜತ್.

ಈ ಪೋಲೆ ನಂಜುಂಡ ಅರಸ ಸೈನ್ಯ ಎಡ್ತಂಡ್ ಬಪ್ಪಕ್ ಕೊಡಗ್ ಪೋಯಿತ್. ಅನ್ನನೆ ಅವು ಇಲ್ಲಿಕ್ ಬಾತೇಂಗಿ ತಾಕತ್ ಜಾಸ್ತಿಯಾಪ. ಇಲ್ಲೇಂಗಿ ಕೋಟೆ ನಿಂಗಡ ಪುಡ್ತಕ್ ಕೊಟ್ಟವಕ್ ಕಷ್ಟ. ಆನಗುಂಡ್ ಆ ಸೈನ್ಯ ಬಪ್ಪಾಂಗ್ ಮುಪ್ಪಡೆ ನಿಂಗಡ ಸೈನ್ಯ ಬಂದಕ ಸುಲಭತ್ ಕೋಟೆ ನಿಂಗಡ ಪುಡ್ತಕ್ ಕೊಟ್ಟವನ್ನೆಕೆ ಮಾಡೊಲುಂಡ್ ಪೆರಿಯಾಪಟ್ಟಿತ್ ಇಂಜ ಪಿತೂರಿಕಾರ ಮೈಸೂರ್ ದೊರೆಯಕ್ ಎಣ್ಣಿತ್ ಅಯೆಚತ್.

ಈ ಸುದ್ದಿನ ಕೇಟನ್ನೆಕೆ ಚಿಕ್ಕದೇವರಾಜ ಇರ್ಲೂ, ಪೊವ್ಲೂ ಸೈನ್ಯ ಅಯೆಚಿತ್ ಪೆರಿಯಾಪಟ್ಟಿತ್ ಕೋಟೆಕ್ ಮುತ್ತಿಗೆ ಇಡ್ಚಿಟ್ಟಿತ್ ಜಗಳ ಮಾಡಿಯಂಡ್ ಇಂಜತ್. ದೊಡ್ಡ ವೀರಪ್ಪ ಒಡೆಯ ತಂಗಡ ಜನಳೆಲ್ಲ ಕೂಟಿಯಂಡ್ ಸಿದ್ವೇಶ್ವರಂಡ ಕುಂದ್‌ಕ್ ಎತ್ತಣೆ ಆ ಪಿತೂರಿ ಜನಡ ಸಹಾಯತ್ ಪೆರಿಯಾಪಟ್ಟಿ ಕೋಟೆನ ಆಕ್ರಮಣ ಮಾಡಿತ್ ಮೈಸೂರ್‌ಕಾರ ಎಡ್ತಂಡತ್.

ಅಕ್ಕ ಅಲ್ಲಿ ಇಂಜ ವೀರರಾಜ ತಂಗಡ ಇನಾಂ ಪಿಳ್ಳಾ ಪೆದತಾರ ಮೀದ ಕಣ್ಣ್ ಬೆಚ್ಚಂಡ್ ತಂಗಡ ಕುಟುಂಬತಾರ ಮಕ್ಕಳ ಕೊಂದಿತ್ ಅವು ಅಲ್ಲಿಯೇ ಜಗಳ ಮಾಡಿಯಂಡ್ ಜಿಂವ ಬುಟ್ಟಿತ್‌ಂದ್ ದೊಡ್ಡವೀರಪ್ಪ ಒಡೆಯಂಗ್ ವರ್ತಮಾನ ಬಾತ್.

ಆ ಕೋಟೆನ ಮೈಸೂರ್‌ಕಾರ ಎಡ್ತಂಡ್, ತಂಗಡ ಮಿಳ್ಳಾತ ಉದ್ದೇಶಕಾಯಿತ್ ಬದಲ್ ಮಾಡಿಯಂಡತ್. ಇಳ್ಳಿ ನಂಗ ಅಲ್ಲಿಕ್ ಪೋನಕ ಪ್ರಯೋಜನ ಎಂತ? ಇಳ್ಳಿ ಮೈಸೂರ್‌ಕಾಲೆ ಕೊಡಗರ ತೆರಿರ ಒಳ್ಳಾಕ್ ನುಗ್ಗಿ ಬಕ್ಕುಂಡ್ ತಂಗಡ ಮನಸ್ಸಲ್ ಗೇನ ಮಾಡ್ಚಿ. ಕೊಡಗರ ತೆರಿ ಸಿದ್ವೇಶ್ವರ ಕುಂದ್‌ರ ಪಕ್ಕ ಬಂದನ್ನೆಕೆ ಅಲ್ಲಿ ಬೋಂಡಿಯಾನ ಜನಳ ಬೆಚ್ಚತ್. ಅಲ್ಲಿಂಜ ಮಡಿಕೇರಿಕ್ ಪುನಾದಿಯ ಬಂದಿತ್ ಪೆರಿಯಾಪಟ್ಟಿತ್ ನಡ್‌ಂದ ವಿಷಯತ್‌ನೆಲ್ಲ ನಂಜುಂಡ ರಾಜಂಗ್ ಎಣ್ಣುವಕ ಅವು ಬೇರಪಟ್ಟಂಡ್, "ನಿಂಗಡ ಮೋನೆಯ ಚಿತ್‌ಪೋಯಿತ್ತೂ ಸಹ ಆ ಮೈಸೂರ್‌ಕಾರ ಮಾಡ್‌ನಾಂಗ್ ಪ್ರತಿ ಜವಾಬ್ ಕೊಡ್‌ಪಾಂಡ ಮೀದ ನಿಂಗಡ ಅಣ್ಣಂಡ ಮೋಂವ ಆಯಿತ್ ನಂಗ ಇಲ್ಲಿ ಉಂಡ್. ಇದ್‌ಂಡ ಮೀದ ನಂಗಡ ಅರಮನೆಲ್ ಉಳ್ಳ ಬೋಜಪ್ಪ ಪಿಳ್ಳಾ ಪೆರಿಯವು ತಂಗಡ ಮಕ್ಕಡ ಕೂಡೆ ಉಂಡ್. ಆನಗುಂಡ್ ನಿಂಗ ವರೀಸ್ ಪಡೆತೆ ಇರಿ"ಂದ್ ಸಮಧಾನ ಮಾಡ್‌ಚಿ.

ಅಕ್ಕ ಆ ನಂಜುಂಡ ರಾಜ ಕೊಡ್‌ತ ವಿವರ ಇನ್ನನೆ ಉಂಡ್. "ನಂಗಕ್ ಬಯತ್ ಆನಗುಂಡ್ ನಂಗಡ ಮೋಂವಂಗ್ ಪೆರಿಯಾಪಟ್ಟಿತ್ ಪಕ್ಕೆ ನಿಂಗಡ ಕಡೆಕಾರಳ ಅಳ್‌ಪಾಚಿಟ್ಟಿತ್ ಈ ಲೋಕತಾರ ಆಸೆ ಬುಟ್ಟಿತ್ ಶಿವಧ್ಯಾನ ಮಾಡಿಯಂಡ್ ಇಂಜತ್. ಇನ್ನತ ಬಯತ್‌ಲ್ ನೋಟುವಕ್ ಆಗತನ್ನತ ಸ್ಥಿತಿನ ಪರಮಾತ್ಮ ಕಾಂಬ್‌ಚಿಟ್ಟಿತ್. ನಂಗಡ ಕೈಬುಟ್ಟ್ ಪೋಪ ಸೀಮೆನ ನಿಂಗ ಪಡ್‌ಂದಿತೆ ಪಡ್‌ಂದವಂಡು. ನಂಗಡ ಆಯುಷ್ಯ

ತೇರುವಾಂಗ್ ಮುಪ್ಪಡೆ ಓರ್ ಮನೆ ಪಿಳ್ಳಾ ನಂಗಡ ಮನೆದೇವ ವೀರಭದ್ರಂಗ್ ಓರ್ ತಿರಿಕೆ ಕೆಟ್ಟಿ ತರೊಂಡು. ಅಲ್ಲತೆ ನಂಗಡ ಪೆದತ್ ಓರ್ ಲಿಂಗ ಪ್ರತಿಷ್ಠೆ ಮಾಡೊಂಡುಂದ್ ನಂಗಡ ಮನಸ್ಸಲ್ ಉಂಡ್. ಈಂಡ ಮೀದ ಕಾವೇರಿ ಪೊಳೆ ಕರೆಲ್ ಓರ್ ತಿರಿಕೆನ ಕೆಟ್ಟಚಿಟ್ಟಿತ್ ಅದತ್ ನಂಗಡ ಪೆದತ್ ಲಿಂಗ ಪ್ರತಿಷ್ಠೆ ಮಾಡ್ಚಿಟ್ಟಿತ್ ನಂಗಡ ಆಯುಷ್ಯ ತೇಂದಪಿಳ್ಳಾ ಆ ತಿರಿಕೆರ ಎದಿಕೆ ಓರ್ ಸಮಾಧಿ ಕೆಟ್ಟಚಿಟ್ಟಿತ್, ಅದೊಂಡ ಮೀದ ಕಲ್ಲ್ ಮಂಟಪ ಕೆಟ್ಟಚಿಟ್ಟಿತ್ ಅದೊಂಡ ಒಳ್ಳಲ್ ಬಸವೇಶ್ವರ ದೇವಡ ಪ್ರತಿಷ್ಠೆ ಮಾಡೊಂಡೂ"ಂದ್ ಎಣ್ಣಾನಾಂಗ್ ಅದೆಪೋಲೆ ಕಾವೇರಿ ಪೊಳೆಕರೆರ ಹೊಳಸಾಲಳ್ಳಿಲ್ ಅಯಿಂಗಕ್ ಕುಶಿಯಾನ ಜಾಗತ್ ದೊಡ್ಡವೀರಪ್ಪುಡೆಯ ಓರ್ ಅರಮನೆ ಕೆಟ್ಟಚಿಟ್ಟಿತ್ ಅದೊಂಡ ಸುತ್ತೂ ಕುಂಡ್ ಎಡ್ಪಾಚಿಟ್ಟಿತ್ ಆ ಜಾಗಕ್ 'ನಂಜರಾಯಪಟ್ಟಿ' ಎಣ್ಣುವ ಪೆದ ಬೆಚ್ಚತ್. ಅನ್ನನೆ ಅಲ್ಲಿ ಇಂಜ ಜನಡ ಎಚ್ಚರ ಎಡ್ತವಕ್ ಸುಮಾರ್ 700 ಜನ ಕೊಡವಳ ಅಲ್ಲಿಯೆ ಆಕಿತ್, ವೀರಭದ್ರ ತಿರಿಕೆನೊ ಕೆಟ್ಟಚಿಟ್ಟಿತ್ ಅದತ್ ವೀರಭದ್ರ ದೇವಡ ಪ್ರತಿಷ್ಠೆ ಮಾಡಿತ್ ಅದೊಂಗ್ 'ನಂಜುಂಡೇಶ್ವರ' ಎಣ್ಣುವ ಪೆದ ಇಟ್ಟಿತ್.

ಇದಾಯಿತ್ ಚೆನ್ನಂಗ್ ದಿನತ್ ಆ ನಂಜುಂಡ ಅರಸ ಚತ್ಪೋಚಿ. ಅವು ಎಣ್ಣಾನಪೋಲೆ ದೊಡ್ಡ ವೀರಪ್ಪ ಒಡೆಯ ತಿರಿಕೆರ ಎದಿಕೆ ಸಮಾಧಿ ಕೆಟ್ಟಚಿಟ್ಟಿತ್ ಅದೊಂಡ ಮೀದ ಕಲ್ಲರ ಮಂಟಪ ಕೆಟ್ಟಚಿಟ್ಟಿತ್, ಅದೊಂಡ ಒಳ್ಳಲ್ ಬಲ್ಯ ಓರ್ ಬಸವೇಶ್ವರ ದೇವಡ ಪ್ರತಿಷ್ಠೆ ಮಾಡ್ಚಿ. ಅನ್ನನೆ ಆ ತಿರಿಕೆರ ಸುತ್ತು ಚೆನ್ನಂಗ್ ಭೂಮಿನ ಉದಾರ ಆಯಿತ್ ಬುಟ್ಟ್ ಕೊಡ್ತತ್.

ರಾಚೇಂದ್ರ ನಾಮಲ್ ಉಳ್ಳ ಈ ವಿಷಯ ಕೊಡಗರ ದೊಡ್ಡ ವೀರಪ್ಪ ಒಡೆಯ ಪಿಳ್ಳಾ ಮೈಸೂರ್ ಚಿಕ್ಕ ದೇವರಾಯ ಒಡೆಯಂಡ ಪೆದತ್ ಎಳ್ಳಿತ್. ಆಚೇಂಗಿ, ಚಾರಿತ್ರಿಕವಾಯಿತ್ ರಾಚೇಂದ್ರನಾಮಲ್ ಉಳ್ಳದ್ ಉಳ್ಳದ್ ಸೆರಿಂದ್ ಕಾಂಬುಲೆ. ಎನ್ನಂಗಣ್ಣಕ ಶಾಸನತ್ ಮೀದ ಪೆರಿಯಾಪಟ್ಟಿತ್ ವೀರರಾಜ ಚತ್ತಿಯೆ 1644ತ್. ಈ ನೇರತ್ ಕೊಡಗಲ್ ದೊಡ್ಡವೀರಪ್ಪ, ಮೈಸೂರ್ ಚಿಕ್ಕದೇವರಾಯ ಒಡೆಯ ಪಟ್ಟಿಕ್ ಬಂದಿತಿಂಚ್ಲೆ. ಮಡಿಕೇರಿ ಸ್ಥಾಪನೆ ಆಯಿತಿಂಚ್ಲೆ. ಆನಗುಂಡ್ ಆ ಕಾಲತ್ ದಂದೂ ಸಂಸ್ಥಾನತ್ ಆಳಿಯಂಡ್ ಇಂಜ ರಾಜಂಗಡ ಪೆದ ಮೈಸೂರ್ ರಣಧೀರ ಕಂಠೀರವ ನರಸರಾಜ ಪಿಳ್ಳಾ ಕೊಡಗರ ಮುದ್ದುರಾಜನೆ ಆಯಿತಿರೊಂಡು. ಅದ್ ಮಡಿಕೇರಿ ಅಲ್ಲತೆ ಹಾಲೇರಿ ಆಯಿತಿರೊಂಡು.

## ಅಂಜಿಗೇರಿ ನಾಡ್‌ರ ಅಚ್ಚುನಾಯಕ

ಕ್ರಿ.ಶ. 16ನೆ ಶತಮಾನತರ್ ಆಖೀರಕ್ ಕ್‌ಗ್ಗಟ್ವನಾಡ್‌ರ ಅಂಜಿಗೇರಿ ನಾಡ್‌ಲ್ ಕಟ್ಟೆಮನೆ ಚಿಟ್ಟಪ್ಪನಾಯಕ ಆಳಿಯಂಡ್ ಇಂಜತ್. ಪತ್ತ ಕಟ್ಟ ನಾಡ್‌ಲ್

ಮಾಚಿಂಗಳ ನಾಯಕ, ಮತ್ತೂರ್ ಮುಕ್ಕಾಟಿ ನಾಯಕ ಅಧಿಕಾರ ನಡೆತುವ ಇಂಜತ್. ಈ ನಾಯಕಂಗಡ ಒಳೀಯೆ ಗೆಡಿ ಗೆಡಿ ಚೆರ್, ಚೆರಿಯ ಜಗಳ ಬಕ್ಕಣ ನಡೆಪ ಇಂಜತ್. ಅಂಜಿಗೇರಿ ನಾಡ್‌ರ ಚಿಟ್ಟಪ್ಪನಾಯಕಂಡ ಕೊಂಬ್‌ಕೂ, ಮತ್ತೂರ್ ಮುಕ್ಕಾಟಿ ನಾಯಕಂಡ ನಾಡ್‌ಕೂ ನಡುಲ್ ಓರ್ ಬಲ್ಯ ಕಾಡ್ ಇಂಜತ್.

ಈ ಕಾಡ್‌ಲ್ ಒಮ್ಮೆತೆ ಓರ್ ಬಲ್ಯ ನರಿ ಕೂಡಿಯಂಡ್ ಊರ್‌ಕಾರಡ ಅತ್ತ, ಕಡೆಚಿನ ತಿಂಬ ಕೂಡ್‌ಚಿ. ಅನ್ನನೆ ಕಾಡ್‌ರ ಬರಿಲ್ ಇಪ್ಪ ಮನೆರ ಪಕ್ಕ ಓಡಿ ಕಳಿಪಕ್ ಸುರು ಮಾಡ್‌ಚಿ. ಈನಗುಂಡ್ ಮತ್ತೂರ್‌ರ ಜನ ಬೊತ್ತಿತ್ "ಆ ನರಿನ ಕೊಂದಿತ್‌ಡಿ ಇಲ್ಲೇಂಗಿ ಜಿಂವತೋಡೆ ಪುಡ್‌ಚಿತ್ ನಂಗಳ ಈ ಪೋಡಿನುಂಡ್ ಕಾಪಾಡುವಕ್, ನಾಯಕ ನರಿಮಂಗಲ ಕೈಚಂಡ್ ವೀರಂದ್ ಕಾಕ್‌ಚಿಟ್ಟವಂಡೂ"ಂದ್ ತಂಗಡ ಒಡೆಯ ಮುಕ್ಕಾಟಿ ನಾಯಕನ ಕೇಟಂಡತ್.

ಕೂಡೆನ್ನೆ ಮುಕ್ಕಾಟಿ ನಾಯಕ ತಾಂಡ ಜನಕ್ ಬೋಟೆಕ್ ಪೋಪಕ್ ತಯಾರಿ ಮಾಡಿಯವಕ್ ಎಣ್ಣೆಚಿ. ಅನ್ನನೆ ಬೋಟೆರ ದಿನತ್‌ನೊ ನಿರ್ಕ್ ಮಾಡ್‌ಚಿ. ನರಿ ಬೋಟೆರ ವರ್ತಮಾನ ಚಿಟ್ಟಪ್ಪ ನಾಯಕಂಡ ಜನಕೂ ಗೊತ್ತಾಚಿ. ಅವು ಆ ಕಾಡ್ ತಂಗಡ ನಾಯಕಂಗ್ ಸೇರ್‌ನದ್. ಆನಗುಂಡ್ ತಂಗಡ ನಾಯಕ ನರಿ ಕೊಂದಿತ್ ಪೆದ ಎಡ್‌ಕೊಂಡೂಂದ್ ಚಿಟ್ಟಪ್ಪ ನಾಯಕಂಗ್ ಎಣ್ಣೆಚಿ.

ಚಿಟ್ಟಪ್ಪ ನಾಯಕ ಬೋಟೆರ ತಯಾರಿ ಮಾಡಿಯಂಡ್ ಮುಕ್ಕಾಟಿ ನಾಯಕ ನರಿಬೋಟೆಕ್ ಗೊತ್ತ್ ಮಾಡ್‌ನ ದಿನತೆ ಬೋಟೆಕ್ ತಾಂಡ ಬೋಟೆಕಾರಡ ಕೂಡೆ ಕಾಡ್‌ಕ್ ಬಾತ್. ಈ ದಂಡ್ ಬೋಟೆಕಾರಡ ತಂಡ ಪಿಳ್ಳಾ ಬೋಟೆನಾಯಿಯಡ ಸದ್ವಾನುಂಡ್ ನರಿ ಗಾಬರಿ ಆಯಿತ್ ಮುಕ್ಕಾಟಿ ನಾಯಕಂಡ ಜನಡ ಬರಿಯ ಓಡಿರ್‌ತ್. ಅಕ್ಕ ಚಿಟ್ಟಪ್ಪ ನಾಯಕ ಒರೇ ಬೋಡಿಕ್ ನರಿನ ನೆಲಕ್ ಬೂಕ್‌ಚಿ. ಅಲ್ಲಿಯೆ ಒದ್ದಾಡಿತ್ ಚತ್ತ ನರಿನ ಓರ್ ಕೊಂಬೆಕ್ ಕೆಟ್ಟಿಯಂಡ್ ಚಿಟ್ಟಪ್ಪ ನಾಯಕಂಡ ಕಡೆಕಾರ ಪೇರ್ತ್ ಕುಶಿಲ್ ತಂಗಡ ನಾಯಕಂಡ ಮನೆಕ್ ನರಿನ ಪೊರ್‌ತಂಡ್ ಪೋಚಿ.

ಚಿಟ್ಟಪ್ಪನಾಯಕ ನರಿನ ಕೊಂದಿತ್ ಪೆದ ಪಡ್‌ಂದಂಡದ್ ಮುಕ್ಕಾಟಿ ನಾಯಕಂಗ್ ಸಹಿಸುವ ಕಯ್ಯತಾಚಿ. ತಾಂಗ್ ಬರಂಡಿಯ ಗೌರವತ್‌ನ ತಪ್ಪೆಚಿಟ್ಟಾಂಗ್, ಅದ್‌ಂಗ್

ಕಾರಣಕರ್ತನಾನ ಚಿಟ್ಟಪ್ಪ ನಾಯಕನ ಎನ್ನೇಂಗಿ ನಾಶ ಪಡ್ತೊಂಡೂಂದ್ ಮುಕ್ಕಾಟಿ ನಾಯಕ ತೀರ್ಮಾನ ಮಾಡ್ಚಿ. ಆಚೇಂಗಿ, ಚಿಟ್ಟಪ್ಪ ನಾಯಕ ಮುಕ್ಕಾಟಿ ನಾಯಕಗ್ಂಜ ಶೂರ ಆಯಿತಿಂಜಾಂಗ್ ಅವಂಗ್ ಚಿಟ್ಟಪ್ಪ ನಾಯಕನ ಚೋಪ್ಚಿಡುವ ಕೈಂಜಾಲೆ.

ಆನಗುಂಡ್ ಮುಕ್ಕಾಟಿ ನಾಯಕ ತಾಂಡ ನೆರೆನಾಡ್‌ರ ಮಾಚಂಗಳ ನಾಯಕಂಡ ಪಕ್ಕ ಪೋಯಿತ್ ಅವಂಡ ಸಲಹೆ ಕೇಟತ್. ಮಾಚಂಗಳ ನಾಯಕ ಪೋಡಿತ್ತೂರಿ ಆನಗುಂಡ್ ಮಿಳ್ಳಾಂಜೆ ಅವಂಗ್ ಚಿಟ್ಟಪ್ಪ ನಾಯಕನ ಕಂಡಕ ಆಪ ಇಂಜಾಲೆ. ಇಕ್ಕ ಮುಕ್ಕಾಟಿನಾಯಕ, ಮಾಚಂಗಳ ನಾಯಕಂಡ ಪಕ್ಕ ಚಿಟ್ಟಪ್ಪನಾಯಕನ ನಾಶ ಮಾಡುವ ಉದ್ದೇಶತ್ ಪೋನದ್ 'ಒಟ್ಟಿ ಜಾರಿತ್ ನೆಯ್ಯಲ್ ಬುದ್ದನ್ನಕೆ' ಆಚಿ.

ಮುಕ್ಕಾಟಿ ನಾಯಕ ವೀರ ಆನಗುಂಡ್ ದಂಡಾಳೂ ಕೂಡಿತ್ ಚಿಟ್ಟಪನಾಯಕಂಡ ಬಲ್ಮಮನೆಕ್ ಮುತ್ತಿಗೆ ಇಟ್ಟಿತ್ ಪಡೆ ಪೊತ್ತಿತ್ ಅವನ ನಾಶ ಮಾಡೊಂಡೂಂದ್ ಸಲಹೆ ಮಾಡ್ಚಿ. ಆಚೇಂಗಿ, ಪೋಡಿತ್ತೂರಿ ಮಾಚಂಗಳ ನಾಯಕ ದಂಡ್ ಕಡೆಕಾರ ಕೂಡಿತ್ ಅವಂಡ ಮನೆಕ್ ಬೈಟ್ ತಿತ್ ಇಡುವನ್ನಕೆ ಸಲಹೆ ಮಾಡ್ಚಿ. ಮುಕ್ಕಾಟಿ ನಾಯಕಂಗ್ ಮನಸ್ಸಿಲ್ಲೇಂಗೂ ಮಾಚಂಗಳ ನಾಯಕಂಡ ತಕ್ಕಕ್ ಒತ್ತವಂಡಿಯಾಚಿ.

ಈ ನಾಯಕಂಗಡ ತೀರ್ಮಾನತರ ಪೋಲೆ ಪಿತ್ತಾಂದ್ ನಡ್‌ಪಾದ್ರೆಕ್ ಈ ನಾಯಕಂಗಡ ಇರ್‌ನೂರ್ ಬಲ್ಮ ತಡಿರ ಸೈನಿಕಂಗ ತಂಗಡ ಆಯುಧತೋಡೆ ಚಿಟ್ಟಪ್ಪ ನಾಯಕಂಡ ಮನೆಕ್ ಬಾತ್. ಚಿಟ್ಟಪ್ಪ ನಾಯಕಂಗಾಡ್, ಅವಂಡ ಜನಕೆ ಆಡ್ ಈ ವಿರೋಧಿ ನಾಯಕಂಗಡ ಕೆಣಿ ಗೊತ್ತಾಯಿಲೆ.

ಚಿಟ್ಟಪ್ಪ ನಾಯಕಂಡ ಮನೆರ ಪೊರ್‌ಮೆ ಎಣ್ಣಕ ಕಯ್ಯಾಲೆಲ್ ಪಾರಕಾರ ಆರಾಮ್‌ಲ್ ವರಿಯಂಡ್ ಇಂಜತ್. ವಿರೋಧಿ ನಾಯಕಂಗಡ ಜನ ಓರಿಚ್ಚಿಕೂ ಸದ್ ಮಾಡತೆ ಬಂದಿತ್ ಬುದ್ದಂಡಿತಿಂಜ ಪಾರಕಾರಡ ಮಂಡೆನ ತಂಗಡ ಚೂಪಾನ ಕತ್ತಿನುಂಡ್ ಒರೇ ಕೆತ್ತಕ್ ತುಂಡ್‌ಮಾಡಿತ್ ಇಟ್ಪರ್‌ತ್. ಅಕ್ಕಣೆಕ್ ಬಾಕಿ ಇಂಜ ಜನ ಮನೆರ ಸುತ್ತೂ ನಿಂದರ್‌ತ್. ಅದತ್ ಚೆನ್ನಂಗಾಳ್ ಮನೆಕ್ ತಿತ್‌ಬೆಚ್ಚತ್. ನಾಯಕಂಡ ಮನೆ ಪಿಲ್ಲ ಆನಗುಂಡ್ ಒರೇ ಪೋಲೆ ತಿತ್ ಇಡೀಯ ಪಬ್ಬಿಚಿ. ಅಕ್ಕಣೆಕ್ ಒಳ್‌ಲ್ ವರಿಯಂಡ್ ಇಂಜವು "ತಿತ್, ತಿತ್, ಶುತ್ತುವ, ಶತ್ತುವಾ"ಂದ್ ಕೂತ್‌ಟ್ಟಿತ್. ಚೆನ್ನಂಗಾಳ್ ಪಡಿಕಾಲ್ ಓಡಿಯಂಡ್ ಬಪ್ಪಕ ಅಲ್ಲಿ ಕತ್ತಿ ಪುಡ್‌ಚಂಡ್ ನಿಂದವು ಮಂಡೆನ ಕೆತ್ತಿತ್‌ಟ್ಟಿತ್. ಇಚ್ಚೆಲ್ಲ ಆಕಣೆ ಚಿಟ್ಟಪ್ಪನಾಯಕ ಎದ್ದಿತ್ ತಾಂಡ ಕತ್ತಿನ ಪುಡ್‌ಚಂಡ್ ತಾಂಡ ಕಡೆಕಾರಲೆಲ್ಲ ಕಾಕಿಯಂಡ್ ಎದಿಕೆ ಬಂದ ಶತ್ತುವಳ ಕತ್ತಿಯಂಡ್ ಪಡಿರ ಪಕ್ಕ ಬಾತ್.

ಆಚೇಂಗಿ, ಅಲ್ಲಿ ಇರಾಟತ್ ಒಬ್ಬಂಗೊಬ್ಬ ಕತ್ತಿಲ್ ಕೆತ್ತಿಯಂಡ್ ಇಂಜ ರಭಸತ್ ದಾಡದೊ ಕತ್ತಿರ ಪೊಯ್ ಪಟ್ಟಿತ್ ಚಿಟ್ಟಿಪ್ಪ ನೆಲಕ್ ಬುದ್ಧಿತ್ ಚಿತ್ತ್ ಪೋಚಿ. ಅಕ್ಕಣೆಕ್ ಮನೆರ ನಾಲೂ ಬರಿಯ ತಿತ್ತ ಪೆಬ್ಬಿಯಂಡ್ ಪೊಣ್ಣಾಳ, ಮಕ್ಕ ಪೊರಮೆ ಬಪ್ಪ ಕಯ್ಯತೆ ಅಲ್ಲಿಯೆ ಗೋಳ್ ಬುದ್ಧತ್.

ಆಚೇಂಗಿ, ಅಯಿಂಗಡ ಎಡಲ್ ಮೇದವಾಡ ಅಯ್ಯವ್ವ ಎಣ್ಣವ ನಾಯಕಂಡ ಮನೆರ ಕೆಲಸತಾರ ಪೊಣ್ಣಾಳ ಮಾತ್ರ ಓರ್ ಬಟ್ಟೆಲ್ ಕಣ್ಣಕುಣ್ಣಿನ ಸುತ್ತಿಯಂಡ್, ಕೈಲ್ ದೊಣ್ಣೆ ಪುಡ್ಚಂಡ್ ಬೆಂಬರಿ ಪಡಿಂಜ ಪೊರಮೆ ಬಾತ್. ಅವ ಇನ್ನತ ಓರ್ ಕಪ್ಪ ಕಾಲತ್ ಚಿಟ್ಟಿಪ್ಪಂಡ ಕಣ್ಣ ಕುಣ್ಣಿನ ಆಚೇಂಗೂ ರಕ್ಷಣೆ ಮಾಡೊಂಡೊಂದ್ ಧೈರ್ಯತ್ ಮನೆಂಜ ಪೊರಮೆ ಬಾತ್. ಅವಳ ಮುಕ್ಕಾಟಿ ನಾಯಕಂಡ ಜನ ತಡ್ತತ್.

ಅಕ್ಕ ಅವ "ಅಣ್ಣಂಗಳೆ, ಎನ್ನನೆಯೂ ಈ ಮನೆನೆ ಇಲ್ಲತನ್ನೆಕೆ ಮಾಡಿತುಳ್ಳಿರ. ಇಣ್ಣಿ ಅಯಿಂಗಡ ಮನೆರ ಕೆಲಸಕರ್ತಿ ಆನ ನಾಡ ಮೀದ ಎನ್ನಂಗ್ ಪಗೆ ತೇತವಿರ? ನಾನ್ ನಾಡ ಕುಣ್ಣಿನ ಕೆಟ್ಟಿಯಂಡ್ ನಿಂಗಡನ್ನತಯಿಂಗಡ ಕಾಲ್ ಪುಡ್ಚಿತ್ ಎನ್ನನೇಂಗಿ ಬದ್‌ಕ್ ನಡ್ತುವಿ. ನನ್ನ ಬುಟ್ಟಾರಿ"ಂದ್ ಬೋಡಿಯಂಡತ್.

ಅಕ್ಕ ವಿರೋಧಿ ಜನಡಾತ್ ಒಬ್ಬ "ಅವು ನಂಗಡ ನಾಯಕಂಡ ಕೂಲಿನಾಲಿ ಮಾಡಿಯಂಡ್ ಬದ್‌ಕಿಯವಡ್ "ಎಣ್ಣೆಯಂಡ್ ಈ ಪೊಣ್ಣಾಳಕ್ "ನೋಟ, ನೀನ್ ಸೀದ ನಂಗಡ ನಾಯಕಂಗಡ ನಾಡ್‌ಕ್ ಪೋ. ಬೋರೆ ಎಲ್ಲಿಕೇಂಗಿ ಪೋನಕ ಪುಡ್ಚಿತ್ ಚಾಟಿ ಪೊಯ್ ಪೊಯ್‌ಚಿಡುವಾ"ಂದ್ ಎಚ್ಚರಿಕೆ ಕೊಡ್‌ತಿತ್ ಅವಳ ಬುಟ್ಟತ್.

ಅವ ಮುಕ್ಕಾಟಿ ನಾಯಕಂಡ ನಾಡ್‌ರ ಬರಿಯ ಚೆನ್ನಂಗ್ ದೂರ ಪೋಯಿತ್ ಅಲ್ಲಿಂಜ ಪಕ್ಕತೆ ಇಂಜ ಮೂಕಚಂಡ ಅಮ್ಮ ಕೊಡವಡ ಮನೆಕ್ ಪೋಚಿ. ಮೂಕಚಂಡವು ಇವಳ ಗೋಳಾರ ಕತೆನ ಕೇಟಿತ್, ಕನಿಕರ ಪಟ್ಟತ್. ನಾಯಕಂಡ ಚೆಡಿಕ್ ತಂಗ ಬಲಿಯಾಪ ಎಣ್ಣವ ಪೋಡಿಲ್ ಪಿತ್ಯಾಂದ್ ಪೊಲಾಕ ನೇರ್ತ ಅವು ಈ ಪೊಣ್ಣಾಳ ಪಿಣ್ಣ ಕುಣ್ಣಿನ ಚೆಂಗಾಳ್ವರಸಂಗ ಇಂಜ ಪೆರಿಯಾಪಟ್ಟಕ್ ಅಯೆಚಿರ್‌ತ್.

ಈ ಊರ್‌ಲ್ ಅಯ್ಯವ್ವ ದಾಡೊ ಪಣಕಾರಡ ಮನೆಲ್ ಕೆಲಸ ಮಾಡಿಯರಂಡ್ ಚಿಟ್ಟಿಪ್ಪ ನಾಯಕಂಡ ಕುಣ್ಣಿನ ಚಾಕಿತ್ ತಾಂಡ ಬದ್‌ಕ್ ನಡ್‌ತ್‌ಚಿ. ಇನ್ನನೆ ಅಂಜಿ ಕಾಲ ಕೈಂಜತ್. ಅಯ್ಯವ್ವ ಕುಣ್ಣಿನ ಕಟ್ಟಿಮನೆರ ಆ ತಿತ್ತರ ಅಪಾಯತಾಂಜ ಎಡ್‌ತಂಡ್ ಪೊರಮೆ ಬಪ್ಪಕ ಆ ಕುಣ್ಣಿಕ್ ದಂಡ್ ಬಯತ್ ಇಕ್ಕು. ಆನಗುಂಡ್ ಈ ನೇರತ್ ಅವಂಗ್ ಏಳ್ ಬಯತಾಚಿ. ಅವನ ಅಯ್ಯವ್ವ "ಅಚ್ಚು"ಂದ್ ಕಾಕುವ ಇಂಜತ್.

ಇನ್ನನಿಪ್ಪಕ ಆ ಕಾಲತ್ ಉಗಾದಿ ನಮ್ಮೆಲ್ ನಂಜುಂಡರಸ ಪಟ್ಟಣಕ್ ಅರಮನೆಂಜ

ಪೊಲಾಕ ತಾಂಡ ಪರಿವಾರತ್ ಕೂಡೆ ಮೆರವಣಿಗೆಲ್ ಬಾತ್. ಅಕ್ಕ ಅಂವ ರೋಡಲ್ ಮಕ್ಕಡ ಎಡಲ್ ಅಯ್ಯವ್ವಂಡ ಚಾಕ್ಮೋಂವ ಅಚ್ಚುನ ಕಂಡತ್.

ಅಚ್ಚು ಚಾಯಿಕಾರ, ನಲ್ಲ ಲಕ್ಷಣ, ನಲ್ಲ ತಡಿಕಾರ. ನಂಬುಂಡರಸಂಗ್ ಈ ಕುಳ್ಳಿ ದಾರ್ಂದ್ ಅರಾಂಜವ ಅಲಾಂಬಲ್ ಆಚಿ. ಅಕ್ಕ ಅಂವ ತಾಂಡ ಪರಿವಾರತ್ ಒಬ್ಬಂಡ ಕೂಡೆ ಈ ಕ್ಕಣ್ಣ ದಾರ್ಂದ್ ಅರಾಂಜಿತ್, ಅಂವಂಡ ಸಮ್ಮಂಧಿಯಳ ಬೈಟಾಪಕ ಅರಮನೆಕ್ ಕೂಟಿಯಂಡ್ ಬಪ್ಪನ್ನಕೆ ಅಪ್ಪಣೆ ಮಾಡ್ಚಿ.

ರಾಜಂಡ ಅಪ್ಪಣೆಪೋಲೆ ಅಯ್ಯವ್ವ, ಅಚ್ಚುನ ಕೂಟಿಯಂಡ್ ಬೈಟಾಪಕ ಅರಮನೆಕ್ ಪೋಚಿ. ಚಾಯಿಕಾರ ಕುಳ್ಳಿನ ಓರ್ ಕೆಲಸಕರ್ತಿ ಪೊಣ್ಣಾಳ್ ಕೂಟಿಯಂಡ್ ಬಂದಾನ ಕಂಡಿತ್ ರಾಜಂಗ್ ಆಶ್ವರ್ಯ ಆಚಿ. ರಾಜ, ಆ ಪೊಣ್ಣಾಳ್ನುಂಡ್ ಕುಳ್ಳಿರ ಅಪ್ಪ, ಅವ್ವಂಡ ವಿಷಯತ್ನೆಲ್ಲ ಕೇಟಿತ್ ಅರಿವಕ ಅಯಿಂಗಡ ಮೀದ ದುಂಬ ಕನಿಕರ ಬಾತ್. ಅಂದಾಂಜೆ ರಾಜ ಅಯ್ಯವ್ವ ಪಿಳ್ಳಾ ಕುಳ್ಳಿ ಅಚ್ಚುನ ತಾಂಡ ಅರಮನೆಲ್ ಆಕಿಯಂಡತ್. ಅಚ್ಚು ಬೋರೆ ರಾಜಕುಮಾರಂಗಡ ಕೂಡೆ ಗುರಿ ತಪ್ಪತೆ ಬಾಣ ಬುಡುವಕೂ, ತೋಕ್ಲಲ್ ಗುರಿಕ್ ಸರಿಯಾಯಿತ್ ಬೊಡಿ ಬೆಪ್ಪಕೂ ಪಡ್ಚಿತ್. ಅನ್ನನೆ ಕುದರೆ ಸವಾರಿ, ಕತ್ತಿ, ಶೂಲ ಪಡೆಲೂ ಪೇರ್ತ್ ಹುಷಾರಾಚಿ.

ಅಚ್ಚು ತಾಂಡ ಚಾಕವ್ವ ಅಯ್ಯವ್ವನುಂಡ್ ಕೊಡಗರ ಪಿಳ್ಳಾ ತಾಂಡ ನಾಡ್ಕಾರ ವಿಚಾರತ್ನೊ, ತಾಂಡ ಅಪ್ಪವ್ವ ಪಿಳ್ಳಾ ಪೆರಿಯ ವ್ಯಕ್ತಿಯಡ ಮೀದ ಕೇಟಂಡ್ ವಿಷಯತ್ನೆಲ್ಲ ಅರಾಂಜಂಡತ್. ಅಂವಂಗ್ ವಾಪಾಸ್ ತಾಂಡ ನಾಡ್ಕೆ ಪೊಂಡೊಂದ್ ಆಸೆ ಆಪ ಕೂಡ್ಚಿ.

ಈ ನೇರತ್ ಅಚ್ಚು ಒಮ್ಮತೆ ನಂಬುಂಡರಸ ಒಬ್ಬನೆ ಅರಮನೆಲ್ ಅಳ್ತತಿಪ್ಪಕ ರಾಜಂಡ ಕೂಡೆ ತಾಂಡ ಅಪ್ಪವ್ವಂಡ ಚಾಗತ್ನ ತಾನ್ ಪಡ್ಂದವಕ್ ಸಹಾಯ ಮಾಡೊಂಡೊಂದ್ ಕೇಟಂಡತ್. ನಂಬುಂಡರಸ ಅಚ್ಚು ಕೇಟಂಡ ಪೋಲೆ ಚೆನ್ನಂಗ ದಿನತ್ ಅಚ್ಚುರ ಕೂಡೆ ತಾಂಡ ಓರ್ ಸೈನ್ಯತ್ನ ಅಯೆಚಿಕೊಡ್ತತ್.

ಅಚ್ಚು ಪೆರಿಯಾ ಪಟ್ಟಿತ್ನಾಂಜ ಸೈನ್ಯ ಕೂಟಿಯಂಡ್ ಅಂಜಿಗೇರಿ ನಾಡ್ಕಾರ ಬರಿಯ ಬಂದಂಡ್ ಉಳ್ಳಾನ ಕಂಡ ಮಾಚಂಗಳ ನಾಯಕ ಪಿಳ್ಳಾ ಮುಕ್ಕಾಟಿ ನಾಯಕ, ಅಚ್ಚುರ ಕೂಡೆ ತಂಗಡ ಕಳಿ ನಡುಪುಲೆಂದ್ ಬೊತ್ತಿಯಂಡ್ ನಾಡ್ ಬುಟ್ಟಿತ್ ದಕ್ಷಿಣತ್ ವೈನಾಡ್ಕ ಓಡಿ ಪೋಚಿ.

ಇತ್ತಟಿ ಅಂಜಿಗೇರಿ ನಾಡ್ಕ ಸೈನ್ಯತೋಡೆ ಬಂದ ತಂಗಡ ಪಂಡೇತ ನಾಯಕ ಚಿಟ್ಟಪ್ಪ ದಂಪತಿಯಡ ಮೋಂವ ಅಚ್ಚು ಎಣ್ಣುಪಾನ ಅರಾಂಜ ನಾಡ್ಕ ಜನ ಅಚ್ಚುನ ದುಂಬ



ಗೌರವತ್, ಕುಶಿಲ್ ತಕ್ಕಾರ ಬಯಂದತ್. ಅನ್ನನೆ ಅಚ್ಚುನ ತಂಗಡ ನಾಯಕ ಆಯಿತ್ ಮಾಡಿಯಂಡತ್. ಅಂದೊಂಜ ಅಚ್ಚು, 'ಅಚ್ಚು ನಾಯಕ'ಂದ್ ಕೇಳಿ ಪಡೊಂದತ್.

ಮಾಚಿಂಗಳ ಪಿಳ್ಳಾ ಮುಕ್ಕಾಟಿನಾಯಕಂಗಡ ನಾಡ್ ಅಚ್ಚುನಾಯಕಂಡ ಆಳ್ವಿಕೆ ಕೆಟ್ಟಾಚಿ. ಅಚ್ಚುನಾಯಕ ಅಂಜಿಗೇರಿ ನಾಡಾರ ಚಿಕ್ಕಮಂಡೂರ್‌ಲ್ ಓರ್ ಅರಮನೆ ಕೆಟ್ಟಾಚಿಟ್ಟಿತ್. ಅದೊಂಡ ಸುತ್ತೂ ಕೋಟೆ ಕೆಟ್ಟಿತ್, ಕೋಟೆರ ಪೊರಮೆ ಆಳವಾನ ಕುಂಡೊನ ಎಡ್‌ಪಾಚಿಟ್ಟಿತ್.

ಇಂವ ಅರಮನೆರ ಪಕ್ಕತೆ ಓರ್ ಕೈಮಡತೊನ ಕೆಟ್ಟಾಚಿಟ್ಟಿತ್, ಅಲ್ಲಿ ತಾಂಡ ಪಿಳ್ಳಾ ತಾಂಗ್ ಪೆರಿಯಾಪಟ್ಟಿತ್ ನೆಲೆ ತಂದಿತ್, ಚಾಕಿತ್ ತಾಂಡ ನಾಡೊನ ತಾಂಗ್ ವಾಪಾಸ್ ಪಡೊಂದವಕ್ ಸಹಾಯ ಮಾಡೊನ ನಂಜುಂಡರಸಂಡ ಕಲ್ಲಾರ ಬಿಂಬತ್‌ನ ಮಾಡೊಚಿಟ್ಟಿತ್. ಕೈಮಡತಾರ ಎದಿಕೆ ಓರ್ ಕೆರೆ ಎಡ್‌ಪಾಚಿಟ್ಟಿತ್. ಅಚ್ಚುನಾಯಕ ಪೆರಿಯಾಪಟ್ಟಿತ್ ನಂಜುಂಡರಸಂಡ ನೆಲೆಲ್ ಬೊಳೊಂದಿತ್ ಬಯ್ಯ ಕೊಡಗುಕ್ ಬಪ್ಪಕ ಕೊಡಗುಲ್ ಹಾಲೇರಿ ಸಂತಾನತಾರ ಮೂಂದನೆ ರಾಜನಾನ ಮುದ್ದುರಾಜ ಆಳಿಯಂಡ್ ಇಂಜತ್. ಅವಂಡ ಕಾಲತ್ ಅಚ್ಚುನಾಯಕ ಅವಂಗ್ ಕಪ್ಪ ಕಾಣಿಕೆ ಕೊಡೊತಂಡ್ ಇಂಜನ್ನೆ ತೋಂದುವ. ಆಚೀಂಗಿ, ಅವಂಡ ಕಾಲ ಕೈಂಜಪಿಳ್ಳಾ ದೊಡ್ಡ ವೀರಪ್ಪಂಡ ಕಾಲತ್ ಅಚ್ಚುನಾಯಕ ರಾಜಂಡ ಅಧಿಕಾರತೊನ ವಿರೋಧ ಮಾಡೊನನ್ನೆ ಕಾಂಬ.

### ಸಿರಿಬಾಯಿ ದೊಡ್ಡವೀರಪ್ಪ ಪಿಳ್ಳಾ ಪಾಲ್ಪರೆ ಪಡೆ

ದೊಡ್ಡವೀರಪ್ಪಂಡ ಅಪ್ಪ ಮುದ್ದುರಾಜಂಗ್ ಅಪ್ಪಾಜಿ ರಾಜ ಪಿಳ್ಳಾ ನಂದರಾಜ ಅರಸು ಎಣ್ಣುವ ದಂಡ್ ಮೋನೆಯ ಇಂಜತ್. ಮುದ್ದುರಾಜ 1681ತ್ ಮಡಿಕೇರಿನ ಕೆಟ್ಟೊನಪಿಳ್ಳಾ ದೊಡ್ಡವೀರಪ್ಪಂಗ್ ಯುವರಾಜ ಪಟ್ಟಿ ಕೆಟ್ಟಿತ್ ಅವನ ಮಡಿಕೇರಿಲೆ ಆಕೊಚಿ.

ದಂಡನೆ ಮೋಂವ ಅಪ್ಪಾಜಿ ರಾಜನ ಹಾಲೇರಿ ಅರಮನೆಲ್ ಆಕಿತ್ ಆ ನಾಡೊನ ಅವಂಗ್ ಜಹಗೀರಾಯಿತ್ ಕೊಡೊತತ್.

ಮೂಂದನೆ ಮೋಂವ ನಂದರಾಜ ಅರಸುಕ್ ಪೊರ ಮಲೆನಾಡುಲ್ ಅರಮನೆ ಕೆಟ್ಟಾಚಿಟ್ಟಿತ್ ಆ ನಾಡೊನ ಜಹಗೀರಾಯಿತ್ ಕೊಡೊತಿತ್ ಅಲ್ಲಿಯೆ ಆಕೊಚಿ.

ಇನ್ನನ ಮುದ್ದುರಾಜ ಚಾವಾಂಗ್ ಮುಪ್ಪಡೆ ತಾಂಡ ಮೂಂದ್ ಮೋನೆಯಳೂ ಕ್ರಮ ಆಯಿತ್ ಮಡಿಕೇರಿ, ಹಾಲೇರಿ ಪಿಳ್ಳಾ ಪೊರಮಲೆಲ್ ನೆಲೆ ನಿಂದಿತಿಂಜತ್. ಮುದ್ದುರಾಜ 54 ಕಾಲತ್ ದೀರ್ಘವಾನ ಆಡಳಿತ ಕೈಂಜಿತ್ ಆಖೀರಕ್ ಕಲಿ ಸಂವತ್ಸರತ್ 4385ನೆ ಕ್ಷಯ ಸಂವತ್ಸರತ್ ಎಣ್ಣಕ ಕ್ರಿ.ಶ. 1687ತ್ ಸ್ವರ್ಗವಾಸಿಯಾಚಿ.

ಮುದ್ದುರಾಜ ತಾಂಡ ಆಳ್ವಿಕೆರ ಆಖೀರಕ್ ಚೆನ್ನಂಗ್ ಕಾಲತ್ ರಾಜ್ಯಭಾರತ್ ದೊಡ್ಡ ವೀರಪ್ಪಂಗ್ ಕೊಡ್ತನ್ನಕೆ ಕಾಂಬ. ದೊಡ್ಡವೀರಪ್ಪ ತಾಂಡ ಅಪ್ಪಂಡ ಆಖೀರಿಕಾಲತೂ ತಾನೆ ಖುದ್ ರಾಜ್ಯಭಾರ ನಡೆತುವಕ್ ಸುರು ಮಾಡ್ತನಪಿಳ್ಳಾ ರಾಜ್ಯತ್ ಒಳ್ಳಲ್ ಪಿಳ್ಳಾ ಪೊರಮೆ ಸುಮಾರ್ ಶತ್ರುಪಡ ಕೂಡೆ ಪೋರಾಡಂಡಿಯಾಚಿ. ಇನ್ನನೆ ಅವ ಎದಾರ್ ಚಿಟ್ಟಿ ಆದ್ಯತ ಶತ್ರು ಮೈಸೂರ್ ರಾಜ ಚಿಕ್ಕದೇವರಾಜ ಒಡೆಯ.

ಚಿಕ್ಕದೇವರಾಜ ಒಡೆಯ ಮೈಸೂರ್ 1672ತ್ 1704ಕ್ ತನ ಆಳ್ವಾಚಿ. ಇಂವ ರಣಧೀರ ಕಂಠೀರವ ನರಸ ರಾಜಂಡನ್ನಕೆ ಭಾರಿ ಶೂರ. ಇಂವ ಪಟ್ಟಕ್ ಬಂದನ್ನಕೆ ತಾಂಡ ರಾಜ್ಯತ್ ಸುತ್ತು ಮುತ್ತು ಉಳ್ಳ ರಾಜ್ಯತ್ ನೆಲ್ಲ ಗೆದ್ದಂಡ್ ತಾಂಡ ರಾಜ್ಯತ್ ವಿಸ್ತಾರ ಮಾಡ್ತಾಚಿ. ಆದ್ಯ ಕೊಯಮತ್ತೂರ್ ಸೀಮೆ, ಮೈಸೂರ್ ಉತ್ತರ ಬಯಲ್ ಸೀಮೆ ಗೆದ್ದದು ಕೊಡಗನ ತಾಂಡ ಪುಡ್ತತ್ ಬೆಚ್ಚವಕ್ ತಾಂಡ ಸೈನ್ಯತ್ ಅಧಿಕಾರಿಯಡ ಕೂಡೆ ಅಯೆಚತ್. ಈ ಸೈನ್ಯ ಕೊಡಗ್ ಆಗ್ನೇಯ ಬಂಜ ನುಗ್ಗಿತ್ ಬಾಳೆಕಾಲೆ ಪೋಯಿತ್ ಅಂಜಿ ಮೈಲ್ ಸೈನ್ಯಬರಿಲ್ ಉಳ್ಳ ಪಾಲ್ವರೆ ಪರಂಬಲ್ ನಿಂದತ್. ಪಾಲ್ವರೆಲ್ ನಿಂದಾನ ಅರಾಂಜ ದೊಡ್ಡವೀರಪ್ಪ ಬಲ್ಯ ಸೈನ್ಯತ್ ಇರ್ಕಿರ್ಲೆ ಅದೊಂಡ ಪಕ್ಕತ ನಾಡ್ ಕೂಟಿಯಂಡ್ ಪೋಯಿತ್, ಪೊಲಣೆಕ್ ಮೈಸೂರ್ ಸೈನ್ಯತ್ ಮೀದ ಪಡೆಕ್ ತಿರಿತ್ ಬುದ್ಧತ್.

ಕೊಡಗರ ಸೈನ್ಯ ಅನಿರೀಕ್ಷಿತ ಆಯಿತ್ ಪೊಲಾಕಲೆ ತಂಗಡ ಮೇಲೆ ಬೂವಕ ಮೈಸೂರ್ ಸೈನ್ಯ ಪಡೆಕ್ ತಯಾರಿ ಆಕತೆ ಇಂಜಾನುಂಡ್ ಚೋತ್ ಪೋಚಿ. ಈ ಪಡೆಲ್ ಮೈಸೂರ್ ಸುಮಾರ್ 1,500 ಜನ ಚತ್ತತ್. ಕೊಡಗ್ ರಾಜಂಡ ಸೈನಿಕಂಗ ಮೈಸೂರ್ ಸೈನಿಕಂಗಳೆ, ಅಧಿಕಾರಿಯಳ ಹೆಗ್ಗಡೆ ದೇವನ ಕೋಟೆರ ಹಂಪಾಪುರಕೆತ್ತನೆ ದೊಪ್ತಿಯಂಡ್ ಪೋಚಿ.

ಪಾಲ್ವರೆ ಪಡೆಲ್ ಪಿಳ್ಳಾ ಹಂಪಾಪುರತ್ ಚೆರಿಯ ಪಡೆಲೂ ಸುಮಾರ್ ಸೈನಿಕಂಗ ಚತ್ತದೆ ಅಲ್ಲತೆ, ಪಲ್ವಕ್ಕಿಲ್ ಅಳತಂಡ್ ಪೋಪ ಮರ್ಯಾದಿರ ಹಕ್ಕನೊ ಮೈಸೂರಾಜನುಂಡ್ ಪಡೊಂದ ಸುಮಾರ್ 360 ಜನ ಮೈಸೂರ್ ಸರದಾರಂಗಳೆ ಕೊಂದತ್.

ಈ ಗೆಲುರ ಕುಶಿಕಾಯಿತ್ ದೊಡ್ಡವೀರಪ್ಪ ಸನ್ಯಾಸಿಯಕೂ, ಜಂಗಮಂಗಳೂ ದುಂಬಾ

ದುದ್ದಾನ ವಾಸ ಆಯಿತ್ ಕೊಡತತ್. ಹಂಪಾಪುರಕ್ ಪೂರ್ವ ಬರಿಯತ ಚೆನ್ನಂಗ್ ದೂರತ್ ವೀರಂಗಡ ಬಿಂಬತನ ಚಿರಾಜನೆ ಕಲ್ಲಲ್ ಕೆತ್ತಚಿಟ್ಟಿತ್ ಅಲ್ಲಿಯೆ ಬೆಚ್ಚತ್. ಈ ಕಲ್ಲ ಗೆಲು ಪಿಳ್ಳಾ ದೊಡ್ಡ ವೀರಪ್ಪಂಡ ರಾಜ್ಯತ್ ತೆರಿನ ಗುರತ್ ಮಾಡುಪಕಾಯಿತೂ ನೆಟ್ಟದ್.

1800ನ ಇಸವಿಲ್ ಹಿಂದೂಸ್ಥಾನತ್ ಗರ್ವನರ್ ಜನರಲ್ ಲಾರ್ಡ್ ವೆಲ್ಲಿಸ್ಸಿರ ಅಪ್ಪಣೆಪೋಲೆ ಟಿಪ್ಪು ಸುಲ್ತಾನ ಚೆತ್ತಪಿಳ್ಳಾ ಬ್ರಿಟಿಷಡ ಪುಡಾತಕ್ ಬಂದ ತೆರಿನ ಐತಿಹಾಸಿಕ, ಆರ್ಥಿಕ ಪಿಳ್ಳಾ ಬೋರೆ ವಿಷಯತನ ಅರಾಂಜಂಡ್ ಪೋಷಾಂಗ್ ಮೈಸೂರ್, ಮಲಬಾರ್, ದಕ್ಷಿಣ ಪಿಳ್ಳಾ ಉ.ಕನ್ನಡ ಸೀಮೆಲ್ ಸುತ್ತಿ ಕಳಚ ದಾ. ಬುಕೇನನ್ ಎಣ್ಣುಪ ಪಂಡಿತ ಪಂಪಾಪುರತಾರ ಚರಿತ್ರನ ಅಂಜಿಕೂಟಿತ್ ಎಳ್ಳಿತ್.

ಮೈಸೂರ್ ಚಿಕ್ಕದೇವರಾಜ ಒಡೆಯಂಡ ಸೈನ್ಯ ಪೂರ್ವ ಬರಿಲ್ ಕೊಡಗ್ ನುಗ್ಗಿಯಂಡ್ ಇಪ್ಪಕೆ ಕೊಡಗರ ನೈಋತ್ಯತ್ ಮಲಯಾಳತ್ ಇಂಜ ಕೋಟಂಗಡಿ ವೀರವರ್ಮ ಅರಸ, ಬೆಪ್ಪುನಾಡ್ ಉತ್ತನಾಯಕಂಡ ಚೆದಿನುಂಡ್ ಪುರಾಡ್ ಪಡಂದಿತ್, ಕೊಡಗ್ ಪಶ ಪಡಾತಿಯವಕ್ ನಾಲಂಜಿ ಆಯಿರ ನಾಯಮಾರಡ ಸೈನ್ಯತನ ಎಡತಂಡ್ ಪೆಗ್ಗಳಕಾಲೆ ಕುಂದ್ ಪತ್ತಿತ್ ಕೊಡಗರ ಬೆಪ್ಪುನಾಡ್ ತೋಮರ ಎಣ್ಣುಪ ಚಾಗಕ್ ಬಾತ್. ಅಲ್ಲಿ ಮರತಾರ ಪಾರ್ ಪಿಳ್ಳಾ ತೋಲ್ಮನುಂಡ್ ಓರ್ ಕೋಟೆ ಕೆಟ್ಟಿತ್ ಉತ್ತನಾಯಕಂಡ ಜನ ತಂಗಡ ಕೂಡೆ ಬಪ್ಪಾನ ಪಾರ ಕಾತಂಡ್ ಕೋಟಂಗಡಿ ವೀರವರ್ಮ ಚೆನ್ನಂಗ್ ದಿನ ಇಂಜತ್.

### ದೊಡ್ಡ ವೀರಪ್ಪ ಉತ್ತನ ಚಾಕಿತ್ ನಾಯಕ ಮೂಡ್‌ನದ್

ಒದೇ ರಾಜ್ಯ/ರಾಜವಂಶತಾರ ಇತಿಹಾಸತಾರ ಶಾಸನ ಆಯಾಯ ಕಾಲತ್ ನಡಂದೆ ಚಾಂತ್ರಿಕ ಘಟನೆ ಆ ಕಾಲತೆ ಎಳ್ಳಿಬೆಚ್ಚಿ ಚರಿತ್ರೆ, ಕಾವ್ಯ, ಕತೆ ಇನ್ನತಾನ ಏರ ಮಟ್ಟಿಕೆ ಆಧಾರ ಆಯಿತ್ ಎಡತವ. ಆಚೀಂಗಿ, ಚೆನ್ನಂಗ್‌ಮಟ್ಟಿಕೆ ಇದೆಲ್ಲ ಎಳ್ತಲ್ ಇಲ್ಲತೆ, ಜನಡ ಬಾಯಿಂಜ ಬಾಯಿಕ್ ಪಂಶ ಪಾರಂಪರ್ಯ (tradition) ಆಯಿತ್ ಬಂದಾನ ನಂಗ ಎಡತವದೂ ಉಂಡ್.

ಹಿಂದೂಸ್ಥಾನತ್ ಪಂಡ್ ಕಾಲತ ಜನಡಾತ್ ದೇಶತಾರ ಚರಿತ್ರೆ / ಓರ್ ವಂಶತಾರ ಚರಿತ್ರನ ಎಳ್ಳಿಬೆಪ್ಪ ಮನಸ್ಸು ಲಿಕ್ಕ ಇಂಚಾಲೆ. ಅನಗುಂಡ್ ಪಂಡ್ ಕಾಲತ್ ನಡಂದೆ

ಘಟನೆ ಬಾಯಿಂಜ ಬಾಯಿಕ್ ಎಣ್ಣೆಯಂಡ್ ಬಂದದ್.

ಇನ್ನನೆ ಎಣ್ಣೆಯಂಡ್ ಬಪ್ಪಕ ಮೂಲವಸ್ತು ಚೆನ್ನಂಗ್ ಬದಲಾನಕೊ, ವಸ್ತುನ ಸಂಶೋಧನೆ ಮಾಡ್‌ನಕ ಚರಿತ್ರರ ನೇರಾನ ರೂಪ ಅದತ್ ಕೊಟ್ಟುಪ. ಆನಗುಂಡ್ ಪಂಡೇತ ಸಂಗತಿ ಎಲ್ಲ ಬೊರಿ ಕೆಟ್ಟಾಕತೆಂದ್ ನಂಗ ಉದಾಸೀನ ಮಾಡುವದ್ ಸರಿಯಲ್ಲ. ಈ ಹೇಳಿಕೆರ ಸತ್ಯ ಉತ್ತುನಾಯಕಂಡ ಕತೆಂಜ, ಅನನ್ನೆ ಆಯಾಯ ಚಾರಿತ್ರಿಕ ಘಟನೆಕ್ ಸಮ್ಮಂಧಪಟ್ಟ ಕತೆನುಂಡ್ ಅರ್‌ಂಜವಲು. ಈ ವಿವರಣೆನ ಮನಸ್ಸಲ್ ಬೆಚ್ಚುಂಡ್ ಇಲ್ಲಿ ಕಾಟಿತುಳ್ಳ ಉತ್ತುನಾಯಕಂಡ ಕತೆಂಜ ಕೊಡಗರ ಚರಿತ್ರನ ಅರ್‌ಂಜವಂಡಿಯಾಪ.

ದೊಡ್ಡವೀರಪ್ಪ ಒಡೆಯಂಡ ಅಪ್ಪ ಮುದ್ದುರಾಜಂಡ ಕಾಲ. ಅಕ್ಕ ಬೆಪ್ಪುನಾಡ್‌ಲ್ ಬುಡುವಂಡ ಮನೆಕಾರ ದೇಶತಕ್ಕಂಗ ಎಣ್ಣೆ ಕೊಡವಡ ಆಚಾರ, ಪದ್ಧತಿನ ವಿಚಾರಣೆ ಮಾಡಿತ್ ಸರಿಯಾನ ವಿಷಯತನ ಅರ್‌ಚಿಡುವಕ್ ಪಂಡ್ ರಾಜಂಗಳುಂಡ್ ಅಧಿಕಾರ ಪಡೊಂದವು ಆಯಿತಿಂಜತ್. ಕೊಡಗಲ್ ರಾಜಂಗಡ ಕಾಲತ್ ನಿರ್ಕ್ ಪಡೊತನ ನಾಡ್‌ರ ಸಂಖ್ಯೆ, ದೇಶತಕ್ಕಂಗಡ ನೇಮಕಾತಿರ ಮೀದ ಮಿಳ್ಳಾಕ್ ನೋಟಂಗ.

ಬುಡುವಂಡ ಒಕ್ಕಕಾರ ಅರಮೇರಿ ಊರ್‌ಕಾರ. ಈ ಊರ್‌ಲ್ ಓರ್ ಗರೀಬ ಕುಟುಂಬತ್ ಮುದ್ದುರಾಜಂಡ ಕಾಲತ್ 'ಉತ್ತ' ಎಣ್ಣುವ ಓರ್ ಬಾಲೆಕಾರ ಇಂಜತ್. ಇಂವಂಡ ಪೆದ ಉತ್ತಯ್ಯಂಡ್ ಇಂಜಕೋ ಊರ್‌ಕಾರ ಎಲ್ಲ ಉತ್ತಂದೆ ಕಾಕುವ ಇಂಜತ್. ಉತ್ತ, ಬಡುವಂಡ ಮನೆಕಾರಡ ಅತ್ತಕಡ್‌ಚಿಯಳ ಬೇಲ್‌ಪಣಿ ಆನದು ನೋಟಿಯವ ಇಂಜತ್. ಬೋರೆ ನೇರತ್ ಅಯಿಂಗಡ ಮನೆಲೆ ಚಿರ್, ಚೆರಿಯ ಕೆಲಸ ಮಾಡಿಯಂಡ್ ಇಪ್ಪ ಇಂಜತ್.

ರಾಜಂಡ ಕಾಲತ್ ಪ್ರತಿಯೋರ್ ನಾಡ್‌ಲೂ ಎಟ್ಟೆಟ್ಟ್ ದಿನಕೊಮ್ಮೆತೆ ತರಕಾರಿ, ಪಣ್ಣ್ ಫಲತನ ಅರಮನೆಕ್ ಆಯಾಯ ನಾಡ್‌ಕಾರ ಅಯೆಪ ಪದ್ಧತಿ ಇಂಜತ್. ಪುಳ್‌ಗೋಡ್, ಪಣ್ ಪುಳಿ ಇನ್ನತಾನ ಆಯಾಯ ನೇರಕ್ ಸರಿಕ್ ಅರಮನೆಕ್ ಎತ್ತಿಚಿಟ್ಟಾರೊಂಡು.

ಇನ್ನನಿಪ್ಪಕ ಒಮ್ಮೆತೆ ಬೆಪ್ಪುನಾಡ್‌ರ ಜನ ಅರಮನೆಕ್ ಸಾಮಾನ್‌ನ ಅಯೆಚಂಡ್ ಇಪ್ಪಕ ಉತ್ತ ಬೋರೆ ಜನಡ ಕೂಡೆ ತಾಂಡ ಸಾಮಾನ್‌ನ ಪೊರ್‌ತಂಡ್ ಹಾಲೇರಿ ಅರಮನೆಕ್ ಪೋಚಿ. ಅರಮನೆಲ್ ಇನ್ನನೆ ಸಾಮಾನ್‌ನ ಪೊರ್‌ತಂಡ್ ಬಂದಯಿಂಗಕ್ ಕೂಳ್‌ಟ್ಟ್ ಕೊಡಪ ಇಂಜತ್. ಎಲ್ಲರೂ ಒಕ್ಕಚೆ ಊಟ ತಯಾರ್ ಮಾಡುವಾಂಗ್ 'ತೊಂಬಾರ ಊಟ'ಂದ್ ಪೆದ. ಉತ್ತ ಪಿಳ್ಳಾ ಬೋರೆಯವು ತೊಂಬಾರ ಊಟ ಉಂಡಿತ್ ಚಾವಡಿಲ್ ಪೊರ್‌ಮೆ ಬುದ್ದಂಡತ್. ದೂರತ ಊರ್‌ಂಜ ಸಾಮಾನ್ ಪೊರ್‌ತ್

ಬಂದಾಂಗ್ ಅಯಿಂಗಕ್ ದುಂಬಾ ಸುಸ್ತ್ ಆಯಿತಿಂಜತ್. ಆನಗುಂಡ್ ಅಯಿಂಗಕ್ ವರ್ಕ್ ಬಂದ್‌ರ್‌ತ್.

ಹಾಲೇರಿ ಅರಮನೆಲ್ ಎಕ್ಸೋಲು ಸೂರ್ಯೋದಯಕ್ ಮುಪ್ಪಡೆ ಓರ್ ಜ್ಯೋತಿಷಿ ಬಂದಿತ್ ಅಂದೇತ ರಾಹುಕಾಲ, ಗುಳಿಗಕಾಲ ಪಿಳ್ಳಾ ನಲ್ಲ ಮೂರ್ತತ್‌ನ ಎಳ್ಳಿ ಬೆಚ್ಚಿತ್ ಪೋಪ ಓರ್ ಕ್ರಮ ಇಂಜತ್. ಈಂಡ್ ಪೋಲೆ ನರಸಯ್ಯ ಎಣ್ಣುವ ಓರ್ ಪಂಡಿತ ಉತ್ತ ಅರಮನೆಕ್ ಬಂದ ಪಿತ್ಯಾಂದ್ ಚಾವಡಿಕ್ ಬಾತ್. ಉತ್ತ ಚಾವಡಿರ ಓರ್ ಬರಿಲ್ ಬುದ್ದಂಡಿತಿಂಜತ್.

ನರಸಯ್ಯ ಪಂಡಿತ ಚಾವಡಿಕ್ ಬಪ್ಪಕ ಅವಂಡ ಕಣ್ಣ್ ಬುದ್ದಂಡಿಂಜ ಉತ್ತಂಡ ಬರಿಯ ಪೋಚಿ. ಉತ್ತ ನಲ್ಲ ಗೆಟ್ಟಿ ಮುಟ್ವಾರ ತಡಿಕಾರ, ಚಾಯಿಕಾರ. ಅವನ ನೋಟಿಯಂಡ್ ಇಂಜ ನರಸಯ್ಯಂಗ್ ಉತ್ತಂಡ ಬಲತೆ ಕಾಲ್‌ರ ಮೊಟ್ಟಾಬೆರತ್ ತಾವರೆನ್ನೆಕೆ ಉಳ್ಳ ಗೆರೆ ಕಂಡತ್. ನರಸಯ್ಯಂಗ್ ಸಾಮುದ್ರಿಕ ಶಾಸ್ತ್ರ ಚಾಯಿತೆ ಗೊತ್ತಿಂಜತ್. ಬುದ್ದಂಡ್ ವರಿಯಂಡ್ ಇಂಜ ಉತ್ತನ ನೋಟಿಯಂಡ್ ಇಂಜನ್ನೆಕೆ ನರಸಯ್ಯಂಗ್ ಈ ಬಾಲೆಕಾರ ಎಲ್ಲ ಬಾಲೆಕಾರಂಡನ್ನೆಕೆ ಅಲ್ಲ. ಇಂವಂಡಲ್ಲಿ ಎಂತೊ ಓರ್ ವಿಶೇಷತೆ ಉಂಡ್. ಅರಿಯೊಂಡುಂದ್ ಗೇನ ಮಾಡ್‌ಚಿ. ಉತ್ತ ಬುದ್ದಂಡಿಂಜ ಜಾಗತ್‌ನ ನೋಟಿಯಂಡ್ ಎಕ್ಸೋಲುತ್‌ರನ್ನೆಕೆ ಅರಮನೆರ ಎದಿಕೆ ಉಳ್ಳ ಕೋಂಬರೆಕ್ ಪೋಯಿತ್ ತಾಂಡ ಎಳ್ಳುಕುತ್‌ರ ಕೆಲಸ ಮಾಡಿತ್ ರಾಜಂಡ ಪಕ್ಕ ಪೋಚಿ.

ರಾಜ, ನರಸಯ್ಯನ "ಎಂತ ವಿಶೇಷ?"ಂದ್ ಕೇಟತ್.

ಅಕ್ಕ ನರಸಯ್ಯ ಚಾವಡಿಲ್ ಬುದ್ದಂಡಿತಿಂಜ ನಲ್ಲ ಚಾಯಿಕಾರ, ಲಕ್ಷಣ ಉಳ್ಳ ಬಾಲೆಕಾರ ಉತ್ತಂಡ ವಿಷಯತ್‌ನ ಎಣ್ಣಿತ್ ಅವನ ಅಂದ್ ಅರಮನೆಲೆ ಆಕಿಯವನ್ನೆಕೆ ಎಣ್ಣಿತ್, ತಾನ್ ಬೆರಿಯ ವಾಪಾಸ್ ಬಪ್ಪಿಂಜ್ ನರಸಯ್ಯ ತಾಂಡ ಮನೆಕ್ ಪೋಚಿ.

ಅಂದ್ ಸುಮಾರ್ ಪನ್ನಂದ್ ಗಂಟೆಕ್ ನರಸಯ್ಯ ಪಂಡಿತ ರಾಜಸಭೆಕ್ ಬಾತ್. ಅಕ್ಕ ರಾಜ ತಾಂಡ ಚಾವಡಿಕಾರಡ ಕೂಡೆ ಉತ್ತನ ಆ ಸಭೆಕ್ ಕೂಟಿಯಂಡ್ ಬಪ್ಪನ್ನೆಕೆ ಎಣ್ಣಿತ್ ಅಯೆಚೆತ್. ರಾಜ ತನ್ನ ಬಪ್ಪಕ್ ಎಣ್ಣಾನಾ ಕೇಟ ಉತ್ತ ತಾಂಗ್ ಎಂತ ಅಪಾಯ ಉಂಡೋಂದ್ ಬೊತ್ತಿಯಂಡತ್.

"ನಾನ್ ಏದೇ ತಪ್ಪು ಮಾಡಿತ್ತಿಲ್ಲೆ. ಆನಗುಂಡ್ ನನ್ನ ರಾಜಂಡ ಪಕ್ಕ ಕೂಟಿಯಂಡ್ ಪೋಕತಿ"ಂದ್ ಚಾವಡಿಕಾರಳ ಬೋಡಿಯಂಡತ್.

ಅಕ್ಕ ಚಾವಡಿಹಾರ ಅಂವಂಗ್ ಸಮಧಾನ ಮಾಡಿತ್ ರಾಜಸಭೆಕ್ ಕೂಟಿಯಂಡ್ ಪೋಚಿ. ರಾಜಸಭೆಲ್ ರಾಜ, ಒಂದ್ ದಂಡ್ ದಿವಾನಂಗ, ಕರಣಿಕಂಗ, ಸೈನ್ಯತರ ಕಾರ್ಯಕಾರಂಗ ಇಂಜತ್. ರಾಜ ಸಭೆನ ಎತ್ತನದೆ ಉತ್ತ ನೆಲತ್ ದೀರ್ಘದಂಡ ನಮಸ್ಕಾರ ಮಾಡಿತ್ ತಾನ್ ತಪ್ಪು ಮಾಡಿತ್ತಿಲ್ಲೆ. ತಾಂಗ್ ಶಿಕ್ಷೆ ತಪ್ಪಕಯ್ಯಂದ್ ಬೋಡ್ಚಿ.

ಅಕ್ಕ ರಾಜ "ನೀಕ್ ಒಂದೂ ಮಾಡುಲೆ. ಬೊತ್ತತೆ"ಂದ್ ಎಣ್ಣೆತ್ "ನೀನ್ ದಾರ್, ಏದ್ ನಾಡ್‌ಂಜ, ಏದ್ ಊರ್‌ಂಜ ಬಂದಿಯೆ?"ಂದ್ ಕೇಟತ್. ಅಲ್ಲಿಂಜ ನರಸಯ್ಯ ಪಂಡಿತಂಡ ಕೂಡೆ ಉತ್ತಂಡ ಕೈ, ಕಾಲ್‌ರ ಗೆರೆನೆಲ್ಲ ಪರೀಕ್ಷೆ ಮಾಡುವಕ್ ಎಣ್ಣೆಚಿ.

ನರಸಯ್ಯ ಪಂಡಿತ ಉತ್ತನ ಒಳ್‌ಲ್ ಉಳ್ಳ ಓರ್ ಕೋಂಬರೆಕ್ ಕೂಟಿಯಂಡ್ ಪೋಚಿ. ಅಲ್ಲಿ ಉತ್ತನ ಅಳಪಕ್ ಎಣ್ಣೆತ್ ಅಂವಂಡ ಕೈ, ಕಾಲ್‌ಲ್ ಉಳ್ಳ ಗೆರೆನೆಲ್ಲ ಪರೀಕ್ಷೆ ಮಾಡಿತ್ ತಾಳೆಗರಿಲ್ ಗುರ್‌ತ್ ಮಾಡ್‌ಚಿ.

ಅಲ್ಲಿಂಜ ಉತ್ತನ ಪೊರಮೆ ನಿಪ್ಪನ್ನಕೆ ಎಣ್ಣೆತ್ ರಾಜಂಡ ಪಕ್ಕ ಬಾತ್.

"ಮಹಾಸ್ವಾಮಿ, ಇಂವಂಡ ಕೈ, ಕಾಲ್‌ರ ಗೆರೆನ ಗುರ್‌ತ್ ಮಾಡಿಯಂಡಿಯೆ. ಲಕ್ಷಣತನೆಲ್ಲ ನಾಳೆ ಎಣ್ಣುವಿ. ಸಾಮುದ್ರಿಕ ಶಾಸ್ತ್ರತನ ವಿವರೋಡೆ ಎಳ್ಳನ ಪುಸ್ತಕ ಮನೆಲ್ ಉಂಡ್. ಅದ್‌ನ ಚೆನ್ನಂಗ್ ಓದೊಂಡು. ಅಕ್ಕಣೆಕ್ ಈ ಕ್ಕಣ್ಣ ಅರಮನೆರ ಚಾವಡಿಲೆ ಇರಡ್"ಂದ್ ಎಣ್ಣೆಚಿ. ರಾಜ ಇದ್‌ಂಗ್ ಒತ್ತಂಡತ್.

ಪಿತ್ಯಾಂದ್ ಪೊಲಾಕ ನರಸಯ್ಯ ರಾಜಂಡ ಪಕ್ಕ ಬಾತ್. ರಾಜ, ಉತ್ತಂಡ ಮೀದ ಅರಿವಕ್ ಅಲಂಬಲ್‌ಲ್ ಇಂಜತ್. ಅಕ್ಕಣೆ ನರಸಯ್ಯ "ಅದ್ ಗುಟ್ಟರ ಸಂಗತಿ. ಬಯ್ಯ ಎಣ್ಣುವಿ"ಂದ್ ಎಣ್ಣೆಚಿ. ಅಕ್ಕಣೆಕ್ ಅಲ್ಲಿ ಇಂಜವು "ಇದೆಂತಪ್ಪ ಈ ಪಟ್ಟಿಂಗ್ ರಾಜಂಡ ಕೂಡೆ ಗುಟ್ಟರ ತಕ್ಕ"ಂದ್ ತಂಗ ತಂಗಡೊಳ್‌ಲೆ ಎಣ್ಣೆಯಂಡತ್.

ರಾಜಂಡ ಕೂಡೆ ಅಂವಂಡ ಖಾಸಾಮಹಲ್‌ಕ್ ಪೋನ ನರಸಯ್ಯ ಪಂಡಿತ ಉತ್ತಂಡ ವಿಷಯತನೆಲ್ಲ ಎಣ್ಣೆಚಿ.

"ಮಹಾಸ್ವಾಮೀ...ಈ ಕ್ಕಣ್ಣಂಗ್ ಮಿಳ್ಳಾಕ್ ಬಲ್ಯ ಪದವಿಕ್ ಪೋಪ ಯೋಗ್ಯತೆ ಉಂಡ್. ರಾಜ ಆಚೀಂಗೂ ಆಚಿ. ಆಚೀಂಗಿ, ಅಂವಂಡ ಕೈ ಪಿಳ್ಳಾ ಕಾಲ್‌ರ ಗೆರೆ ಆದಿಲ್ ಸ್ಪಷ್ಟ ಆಯಿತ್ ಇಂಜಕೊ ಬಯ್ಯ ಮಬ್ಬಾಯಿತ್ ಪಿಳ್ಳಾ ಕೈಲುಳ್ಳ ಗೆರೆರ ನಡುಲ್ ಅಡ್ಡ ಆಯಿತ್ ಇಣ್ಣೋರ್ ಗೆರೆ, ಈ ಗೆರೆನ ತಡ್‌ತನ್ನಕೆ ಉಂಡ್. ಈನಗುಂಡ್ ನಾಕ್ ಗೊತ್ತಾನ ವಿಷಯ ಎಣ್ಣಕ ಇದ್ ಚೆನ್ನಂಗ್ ಸಮಯಕೆತ್ತನೆ ಮಾತ್ರ. ಅಲ್ಲಿಂಜ ಈ ಅಧಿಕಾರ ಕಮ್ಮಿ ಆಯಿತ್ ಒಮ್ಮಕೆ ಇಲ್ಲತಾಕು. ಎಣ್ಣಕ ಇಂವಂಡ ಶತ್ರುವಳುಂಡೆ ಚಾವ, ಇಲ್ಲೇಂಗಿ

ದೇಶತ್ವಂಜ ಓಡಾಚಿಡುವ.ನಾಕ್ ಅರಂಜಚ್ಚಕ್ ಎಣ್ಣೆಯೆ. ಮಾಪ್ಪು ಮಾಡೊಂಡು"

ಮುದ್ದುರಾಜ, ನರಸಯ್ಯ ಪಂಡಿತ ಎಣ್ಣೆನ ತಕ್ಕ ಕೇಟಿತ್ ವರೀಸ್‌ಲ ಮುಳ್ಳಾಚಿ. ಹಾಲೇರಿ ವಂಶ ಕೊಡಗಲ್ ಸ್ಥಾಪನೆ ಆಯಿತ್ ಇಣ್ಣೊ ಮೂಂದ್ ಮಂಡೆ ಕೈಂಜಿತಿಂಚ್‌ಲೆ. ಅಕ್ಕಲೆ ತಂಗಡ ವಂಶಕ್ ಕೇಡ್‌ಗಾಲ ಬಂದ್‌ರುವಂದ್ ಬೇರಪ್ಪಿತ್.

ಅಕ್ಕ ಅವ ತಿರಿತ್ ಪಂಡಿತನ "ಪಂಡಿತಂಗಳೆ, ಇಕ್ಕ ನಂಗಡ ರಾಜವಂಶಕ್ ಕುತ್ ಬಪ್ಪನ್ನಕೆ ಅಚಲ್ಲ. ಈ ದುರ್ದೆಸೆನ ಪರಿಹಾರ ಮಾಡುವಕ್ ವಿದೂ ಉಪಾಯ ಇಲ್ಲಿಯ? ಇಕ್ಕಲೆ ಈ ಕಣ್ಣಿನ ಕೊಂದಿತ್‌ಟ್ಟುಕ ಅಪುಲಿಯ ಎನ್ನನೆ? ಅಕ್ಕ ನಂಗಡ ಬಟ್ಟೆಲ್ ಉಳ್ಳ ಕಂಟಕ ನೀಂಗುವಲ್ಲ?"ಂದ್ ಕೇಟಿತ್.

ಅದ್‌ಂಗ್ ಪಂಡಿತ "ಮಹಾಸ್ವಾಮಿ ನಿಂಗ ಅಚ್ಚಕೊಂದೂ ಬೊತ್ತುವ ಅವತ್ಯಕತೆ ಇಲ್ಲೆ. ಈ ಬಾಲೆಕಾರ ಬಲ್ಯಂವ ಆನಪಿಣ್ಣ ಅಂವಂಗ್ ಅಧಿಕಾರ ಕೊಟ್ಟನಕೊ ಏರ ಸಮಯ ಇಪ್ಪನ್ನಕೆ ಕಾಂಬುಲೆ. ಆನಗುಂಡ್ ನಿಂಗಕಾಡ್, ನಿಂಗಡ ಪೆರಿಯ ರಾಜಕುಮಾರಂಗೆ ಆಡ್ ಏದೇ ಕೇಡಾಪುಲೆ. ಎನ್ನಂಗೆಣ್ಣಕ ದೊಡ್ಡ ವೀರಪ್ಪ ರಾಜಕುಮಾರಂಡ ಜಾದ್‌ಗತ್ ಅವು ತಂಗಡ ಶತ್ರುವೆಲ್ಲ ಪುಡ್‌ತತ್ ಬೆಚ್ಚೆಂಡ್ ದುಂಬಾ ಸಮಯಕೆತ್ತನೆ ಗೌಜಿಲ್ ಆಳುವನ್ನಕೆ ಉಂಡ್‌ಂದ್ ಎಣ್ಣೆಯೆ. ಇಕ್ಕಾಕಣೆ ಅಯಿಂಗಡ ಜಾದ್‌ಗತ್ ಎಳ್ಳನದ್ ಪೊಟ್ಟಾಯಿಲೆ. ಮಿಣ್ಣಾಕೂ ಪೊಟ್ಟಾಪುಲೆ. ಇಚ್ಚಕೆ ಅಲ್ಲ, ಈ ಕಣ್ಣಿನಿಂಗಡ ವಂಶಕ್ ವಿರೋಧಿಯಾಪೊ, ಸಹಾಯ ಆಪೊ ಎಣ್ಣುವಾನ ಇಕ್ಕಲೆ ಎಣ್ಣುವ ಕಯ್ಯುಲೆ. ಸಹಾಯ ಮಾಡ್‌ನಕ ನಿಂಗಡ ರಾಜ್ಯತ್‌ನ ವಿಸ್ತಾರ ಮಾಡುವಕ್ ಅನುಕೂಲ. ಆನಗುಂಡ್ ಅಂವನ ಕೊಲ್ಚಿಡುವದ್ ಸೆರಿಯಲ್ಲ"ಂದ್ ಎಣ್ಣೆಚಿ.

ಅಕ್ಕ ಮುದ್ದುರಾಜ "ಅಂದಕ ಪಂಡಿತಂಗಳೆ ಇಕ್ಕ ಎಂತ ಮಾಡನೆ?"ಂದ್ ಕೇಟಿತ್.

ಅದ್‌ಂಗ್ ನರಸಯ್ಯ "ಇಕ್ಕ ಈ ಬಾಲೆಕಾರಂಗ್ ಅಂವಂಡ ಬಪ್ಪಸಾರ ಯೋಗ್ಯತೆರ ಮೀದ ಎಣ್ಣುವದ್ ಬೋಂಡ. ಅಂವನ ನಿಂಗ ಅರಮನೆಲೆ ಆಕಿಯಂಡ್, ಚಾಕಿತ್ ಅಂವಂಗ್ ಎಲ್ಲಾ ತರತರ ವಿದ್ಯೆನ ಪಡ್‌ಪಾಚಿಡುವ ವ್ಯವಸ್ಥೆ ಮಾಡಿ. ಮಿಣ್ಣಾಕ್ ಅಂವಂಡ ಸ್ವಭಾವ ಎನ್ನನೆ ಬದಲಾಪ ಎಣ್ಣುವಾನ ನೋಟಿತ್ ಪರಿಸ್ಥಿತಿಕ್ ಸೆರಿ ಆಪನ್ನಕೆ ನೋಟಿಯವಲು"ಂದ್ ಎಣ್ಣೆಚಿ.

ಮುದ್ದುರಾಜ, ನರಸಯ್ಯ ಪಂಡಿತಂಡ ಸಲಹೆಕ್ ಒತ್ತಂಡ್ ಅಂದ್‌ಂಜ ಉತ್ತನ ತಾಂಡ ಅರಮನೆಲ್ ಆಕಿಯಂಡ್ ಚಾಕುವ ಕೂಡ್‌ಚಿ. ಚೆನ್ನಂಗ್ ಕಾಲತ್ ಉತ್ತ ಕುದರೆ ಸವಾರಿಲೂ, ಯುದ್ಧ ವಿದ್ಯೆಲೂ ಹುಷಾರಾಚಿ. ತೋಕ್‌ಂಜ ಗುರಿ ತಪ್ಪತನ್ನಕೆ ಬೊಡಿ ಬೆಪ್ಪಾತೂ ತಾಂಡ ಹುಷಾರತ್‌ನ ಕಾಟುವ ಇಂಜತ್. ಮುದ್ದುರಾಜ, ಉತ್ತಂಡ

ಪರಾಕ್ರಮತ್‌ನ ಮೆಚ್ಚುಚಿ. ಉತ್ತ, ರಾಜಂಡ ಕೂಡೆ ಚಾಯಿತೆ ಗೌರವತ್ ನಡ್‌ಂದವ ಇಂಜತ್. ಆಚೀಂಗಿ, ತಾಂಡ ಬಯತ್‌ಕಾರಡ ಕೂಡೆ ಉತ್ತ ಅಹಂಕಾರ ಕಾಟುವ ಇಂಜತ್.

ಹಳ್ಳಿರ ಗರೀಬ ಕಣ್ಣಿ ಆಯಿತಿಂಜ ಉತ್ತುಕ್ ಇಕ್ಕ ಅರಮನೆರ ಗೌಜಿರ ಬದ್‌ಕ್ ಮಂಡೆ ಕೆಡ್‌ತುವನ್ನೆಕೆ ಮಾಡಿತಿಂಜತ್. ಈನಗುಂಡ್ ಮುದ್ದುರಾಜಂಡ ಪೆರಿಯ ಮೋಂವ ದೊಡ್ಡ ವೀರಪ್ಪಂಗೂ, ಉತ್ತಂಗೂ ಸರಿ ಬೂವ ಇಂಜ್‌ಲೆ. ದೊಡ್ಡವೀರಪ್ಪ ಶೂರ, ಬುದ್ದಿವಂತ. ಮುದ್ದುರಾಜ, ಉತ್ತನ ತಾಂಡ ಮಕ್ಕಡನ್ನೆಕೆ ನೋಟಿಯಂಡ್ ಕೊದಿಲ್ ಕಾಂಬ ಇಂಜಾಂಗ್ ವೀರಪ್ಪ, ಉತ್ತನ ತಾಂಗ್ ಬುಡ್‌ಂಜನ್ನೆಕೆ ಕಾಟಿಯವತೆ ಮುಂಡತೆ ಕೂಡ್‌ಚಿ.

ಉತ್ತಂಗ್ 25 ಬಯತ್ ಆನನ್ನೆಕೆ ಮುದ್ದುರಾಜ ತಾಂಡ ಮೋವ ನೀಲಮ್ಮಾಜಿನ ಲಿಂವಂಗ್ ಕೊಡ್‌ತಿತ್ ಮಂಗಲ ಕೈಚತ್. ಉತ್ತ ಅರಮನೆಲ್ ಲಿಂಗಾಯತ ಆಯಿತೆ ಬೊಳ್‌ಂದಿತಿಂಜತ್. ನೀಲಮ್ಮಾಜಿನ ಮಂಗಲ ಕೈಂಜಪಿಳ್ಳಾ ಮುದ್ದುರಾಜ, ಉತ್ತನ ಬೆಪ್ಪುನಾಡ್‌ಲ್ ರಾಜಂಡ ಅಧೀನ ನಾಯಕ ಆಯಿತ್ ಆಳುವ ಅಧಿಕಾರ ಕೊಡ್‌ತ್ ಅಯೆಚತ್. ಅಂದ್‌ಂಜ ಜನ ಉತ್ತನ ಉತ್ತನಾಯಕಂದ್ ಕಾಕ್‌ಚಿ. ಇಂವ ಅರಮೇರಿಲ್ ಓರ್ ಬಲ್ಯ ಮನೆನ ಕೆಟ್ಟಾಚಿಟ್ಟಿತ್ ತಾಂಡ ನಾಡ್‌ನ ಆಳುವ ಕೂಡ್‌ಚಿ.

ಉತ್ತನಾಯಕ ನಾಯಕ ಆನಕೊ ಅರಮೇರಿಲ್ ಪುಟ್ಟಿ ಬೊಳ್‌ಂದವ. ಗರೀಬತನತ್ ಇಂಜಂವ. ತಂಗಡ ಕಣ್ಣ್‌ರ ಎದಿಕೆ ಅತ್ತಳ ನೋಟಿಯಂಡ್ ಇಂಜಂವ. ಅಂವ ನಾಯಕ ಆನದ್ ತಂಗಡ ನಾಡ್‌ಲೆ ಆನಗುಂಡ್ ಬೆಪ್ಪು ನಾಡ್‌ಕಾರಕ್ ಲಿಂವಂಡ ಅಧಿಕಾರತ್‌ನ ಒತ್ತವಕ್ ಮನಸ್ಸು ಒತ್ತಲೆ. "ನಂಗಡ ಕಣ್ಣ್‌ರೆದಿಕೆ ಪುಟ್ಟಿ ಬೊಳ್‌ಂದ ಈ ಕಣ್ಣಿಂಗ್ ನಂಗ ಮಂಡೆ ಕುಂಬುಡೊಂಡುವಲ್ಲ"ಂದ್ ಅವು ಗೊಣ್‌ಂಗುವ ಕೂಡ್‌ಚಿ.

ಅದತೂ ಬುಡುವಂಡ ಮನೆಕಾರ "ನಂಗ ದೇಶತಕ್ಕಂಗ. ನಂಗ ಈ ಉತ್ತಂಡ ತಕ್ಕ ಕೇಕೊಂಡು ಎಣ್ಣಕ ಎಂತ?"ಂದ್ ಬಹಿರಂಗ ಆಯಿತ್ ವಿರೋಧ ಕಾಟಿತ್, ಲಿಂವಂಗ್ ಕೊಡ್‌ಕಂಡಿಂಜ ಕಂದಾಯ, ಕಾಣಿಕೆನ ಕೊಡ್‌ಕತೆ ಕೂಡ್‌ಚಿ. ಅನ್ನನೆ ಬೋರೆ ಮನೆಕಾರಳೂ ಇಂವಂಗ್ ವಿರೋಧ ನಿಂದತ್.

ಉತ್ತನಾಯಕ ಸ್ವಭಾವತ್ ಅಹಂಕಾರಿ ಆಯಿತಿಂಜತ್. ತಾಂಡ ನಾಡ್‌ರ ಜನ ತಾಂಡ ಅಧಿಕಾರತ್‌ನ ಕೂಟಾಕತೆ ಇಪ್ಪಕ ಲಿಂವಂಗ್ ಚೆಡಿ ಬಾತ್. ಲಿಂವಂಗ್ ತಾನ್ ಮುದ್ದು ರಾಜಂಡ ಕೊದಿರ ಮೈಂಮ ಎಣ್ಣುವಕ್ ಓರ್ ಬರಿ ಕುಶಿ. ಅನ್ನನೆ ತಾಂಡ ಅಧಿಕಾರತ್‌ನ ಬೆಪ್ಪು ನಾಡ್‌ಕಾರ ಒತ್ತವುಲೆ ಎಣ್ಣುವ ಚೆಡಿ ಇಇಳ್ಳೋರ್ ಬರಿ. ಈ ಚೆಡಿಲ್ ಲಿಂವ ತಾಂಡ ನಾಡ್‌ಲ್ ತಾಂಗ್ ವಿರೋಧ ನಿಂದ ಜನಳ ಪುಡ್‌ಪ್‌ಚಿಟ್ಟಿತ್ ಜೈಲ್‌ಲ್‌ಟ್ಟಿತ್.



ಚೆನ್ನಂಗಾಳನ ಕೊಲ್ಲ್ ಚಿಟ್ಟತ್. ಇಚ್ಚೆಕೆ ಅಲ್ಲತೆ ಈ ನೇರತ್ ತಾಂಗ್ ವಿರೋಧ ಆಯಿತಿಂಜ ಐಚೆಟ್ಟಿರ, ಬಾಚೆಟ್ಟಿರ ಒಕ್ಕಕಾರಡ ಬಲ್ಮಮನೆನೆ ಚುಟ್ಟಿತ್‌ಚ್ಚಿತ್. ಇನ್ನನೆ ಚುಟ್ಟಿಪೋನ ಒಕ್ಕಡಾತ್ ದೇವಡ ದಯೆಲ್ ಎನ್ನನೆಯೊ ಚಾವತೆ ಬದ್‌ಕಾನ ಒಂದ್, ದಂಡಾಳೆ ಆ ಒಕ್ಕತಾರ ಮೂಲಪುರುಷಂಗಳಾಚಿ. ಬಾಚೆಟ್ಟಿರ ಮನೆ ಚುಟ್ಟಿಲ್ಲಿ ಅಲ್ಲಿಯತ ಪೊಣ್ಣಾಳಡಾತ್ ಒಬ್ಬ ನಾಲಂಜಿ ತಿಂಗತಾರ ಕೆಲಕರ್ತಿ ಮಾತ್ರ ಚುಟ್ಟಿಪೋನಕೊ ಚಾವತೆ ಇಂಜತ್! ಮಿಳ್ಳಾಕ್ ಅವಕ್ ಪುಟ್ಟಾನ ಕುಳ್ಳಿಯೆ ಬಾಚೆಟ್ಟಿರ ಒಕ್ಕತಾರ ಮೂಲಪುರುಷ ಎಣ್ಣುವ ಕತೆ ಉಂಡ್.

### ಬೆಪ್ಪುನಾಡ್‌ರ ಉತ್ತನಾಯಕ ಐಚೆಟ್ಟಿರ ಮನೆನ ಚುಟ್ಟಿದ್

ಐಚೆಟ್ಟಿರ ಮನೆಕಾರಡ ಬಲ್ಮಮನೆ ಬೆಪ್ಪುನಾಡ್‌ರ ಮೈತಾಡಿ ಊರ್‌ಲ್ ಇಂಜತ್. ಇಕ್ಕಲೂ ಅಲ್ಲಿಯೆ ಉಂಡ್. ಆಚೇಂಗಿ, ಉತ್ತ ನಾಯಕಂಡ ಕಾಲತ್ ಚುಟ್ಟಿಪೋನ ಬಲ್ಮಮನೆ ಇಕ್ಕ ಉಳ್ಳ ಬಲ್ಮಮನೆರ ನೈಋತ್ಯತ್ ಚೆನ್ನಂಗ್ ಕೊಡಿ ಬರಿಲ್ ಇಂಜತ್. ಉತ್ತನಾಯಕ ಐಚೆಟ್ಟಿರ ಮನೆಕಾರ ತಾಂಗ್ ವಿರೋಧಿಯ ಆನಾಂಗ್ ಅಯಿಂಗಳ ಮನಾರ ನಾಶ ಮಾಡೊಂಡೂಂದ್ ಗೇನ ಮಾಡಿತ್ ಅಯಿಂಗಡ ಬಲ್ಮಮನೆನ ಚುಡುವಕ್ ಗೇನ ಮಾಡ್‌ಚಿ.

ಈ ಪೋಲೆ ಬೇನಿಲ್ ಕೃಷ್ಣಪಕ್ಷತಾರ ಒನ್ನಾಂದ್ ಬೈಟ್ ತಾಂಡ ಜನಳ ಅಯೆಚತ್. ಈ ಜನ ಬಲ್ಮಮನೆರ ಸುತ್ತೂ ಕೂಡಿಯಂಡ್ ಆದ್ ಪೊರ್‌ಮೆಂಜ ಪಡಿರ ಚಿಲಕತ್‌ನೆಲ್ಲ ಕೊಡಿಯತ ಕೊಂಡಿಕ್ ಚಿಕ್ಕಚಿಟ್ಟಿತ್, ಮನೆರ ಕೊಡಿಬರಿಯ ತಿತ್ತ ಕೊಡ್‌ತತ್. ಆ ಕಾಲತ್ ಸುಮಾರ್‌ಕ್ ಕೊಡಗರ ಮನೆ ಎಲ್ಲ ಪಿಲ್ಲಾಮನೆ ಆಯಿತಿಂಜತ್. ಒಣ್ಣಾಕ್ ಪಿಲ್ಲ ಆನಗುಂಡ್ ತಿತ್ತ ಬೆರಿಯ ಪುಡ್‌ಚಿರ್‌ತ್. ಮನೆರ ಒಳ್‌ಲ್ ಬುದ್ದಂಡ್ ಇಂಜವೆಲ್ಲ ಚಾಯಿತೆ ವರಿಯಂಡ್ ಇಂಜತ್. ಮನೆ ಕತ್ತುವಕ್ ಸುರುವಾಪಕ ಪೊಣ್ಣಾಳೆ, ಆಣಾಳೆ, ಮಕ್ಕ ಎಚ್ಚರ ಆಯಿತ್ ಜಿಂವತಾರ ಪೋಡಿಲ್ ಜೋರ್‌ತೆ ಕಿರ್‌ಚುವ ಕೊಡ್‌ಚಿ. ಮನೆಂಜ ಪೊರ್‌ಮೆ ಪೋಪ ಕಯ್ಯತನ್ನಕೆ ಉತ್ತ ನಾಯಕಂಡ ಜನ ಚಿಲಕ ಚಿಕ್ಕಚಿಟ್ಟಿತಿಂಜತ್!

ಈ ನೇರತ್ ಐಚೆಟ್ಟಿರ ಮನೆಲ್ 18 ತೊಟ್ಟ ಕುಳ್ಳಿಯೆ ಇಂಜತ್. ತಿತ್ತ ಪಕ್ಕ ಪಕ್ಕ ಬಂದನ್ನಕೆ ಮನೆರ ಆಣಾಳೆ, ಪೊಣ್ಣಾಳೆ ತಂಗಳಂತೂ ಉಳಿವುಲೆ. ಮಕ್ಕಳಾಚೇಂಗೂ

ಉಳಿಚೆಡೊಂಡು. ಎನ್ನನೆ ಅಯಿಂಗಳ ಕಾಪಾಡುವಂದ್ ಮೊರಾಚುವ ಇಂಜತ್. ಅಕ್ಕ ಓರ್ ಕೋಂಬರಲ್ ಇಂಜ ದಂಡ್ ಪೊಣ್ಣಾಳ ತಿತ್ತರ ಬೊಳಿಲ್ ಚೆನ್ನಂಗ್ ದೂರತ್ ಕಾಂಬ ಇಂಜ ದಂಡ್ ಕೆಲಸಕರ್ತಿಯಳ ಎನ್ನನೆಯೊ ಕೈ ಸನ್ನೆ ಮಾಡಿತ್ ಕಾಕ್ಚಿ. ಅಪ್ಪ ಕಿಟಕೆರ ಪಕ್ಕ ಬಪ್ಪಕ ತೊಟ್ಟಲ್ ತಿತ್ತರ ಸೆಕೆಕ್ ಎಚ್ಚರ ಆಯಿತ್ ಮೊರಾಟಂಡ್ ಇಂಜ ಕುಳ್ಳಿಯಳ ಪೊಗೆ ಪೋಪಕ್ ಇಂಜ ಪಂಡೇತ ಚೆರಿಯ ಕಿಟಕೆಲ್ ಪೊರಾಮೆ ಕನಾಚತ್. ಆ ಕೆಲಸಕರ್ತಿಯ ದಂಡ್ ಕುಳ್ಳಿಯಳ ಎಡ್ತಂಡ್ ಕೂಡೆನ್ನೆ ಆ ಜಾಗತ್‌ಂಜ ಪೊರಾಟ್ ಪೋಚಿ. ಇದಾಯಿತ್ ಚೆನ್ನಂಗಿ ನೇರತ್ ಇಡೀ ಮನೆ ಚುಟ್ಟಿತ್ ಅಂಡ ಒಳ್ಳಲ್ ಇಂಜ ಜನ ಎಲ್ಲ ಬೆಂಜಿತ್, ಬೂದಿಯಾಯಿ ಪೋಚಿ!

ಇತ್ತಟಿ ಕುಳ್ಳಿಯಳ ಎಡ್ತಂಡ್ ಪೋನ ಕೆಲಸಕರ್ತಿಯ ಅಂದ್ ಬೈಟ್ ದಾರಾಕೂ ಗೊತ್ತಾಕತನ್ನೆ ಕಡಂಗಮೂರೂ ಊರ್ಲ್ ಇಂಜ ಬಲ್ಲಚಂಡ ಮನೆಕ್ ಎಡ್ತಂಡ್ ಪೋಚಿ. ಅಲ್ಲಿ ಆ ಮನೆಕಾರಕ್ ಐಚೆಟ್ಟಿರ ಮನೆಕಾರ ಎಲ್ಲ ಉತ್ತನಾಯಕನುಂಡ್ ಬೆಂಜಿತ್ ಬೂದಿಯಾನ ಕತೆನ ಎಣ್ಣಿತ್ ತಂಗ ಕೊಂಡಬಂದ ಕುಳ್ಳಿಯಳ ಅಯಿಂಗಳ ಒಪ್ಪೆಚಿಟ್ಟಿತ್.

ಬಲ್ಲಚಂಡ ಮನೆಕಾರ ಐಚೆಟ್ಟಿರ ಒಕ್ಕಕ್ ಆನ ದುರಂತ ಕತೆನ ಕೇಟಿತ್ ದುಃಖ ಪಟ್ಟಿತ್. ಆ ದಂಡ್ ಕಣ್ಣ ಕುಳ್ಳಿಯಳ ಚಾಕಿತ್ ಅಪ್ಪಯ್ಯ ಪಿಳ್ಳಾ ಪೂವಣ್ಣ ಎಣ್ಣುವ ಪೆದ ಇಟ್ಟಿತ್. ಈ ಕುಳ್ಳಿಯ ಬಲ್ಲವು ಆನಪಿಳ್ಳಾ ತಂಗಡ ಪಂಡೇತ ಆಸ್ತಿನ ತಿರಿತ್ ಪಡ್‌ಂದಂಡ್ ಅಲ್ಲಿಕ್ ಪೋಯಿತ್ ನೆಲೆ ನಿಂದತ್. ಇಯಂಗಡಾತ್ ಅಪ್ಪಯ್ಯ ಮಿಳ್ಳಾಕ್ ರಾಜಂಡ ದಿವಾನ ಆಚಿ.

ಬಲ್ಲಚಂಡ ಮನೆಕಾರ ಅನಾಥ ಆಯಿತಿಂಜ ಐಚೆಟ್ಟಿರ ಕುಳ್ಳಿಯಳ ಚಾಕ್‌ನಾಂಗ್ ಇಂದೇಕೂ ಅಪ್ಪ ಒರೇ ಒಕ್ಕಕಾರಡನ್ನೆ ನಡ್‌ಂದವ. ಆನಗುಂಡ್ ಐಚೆಟ್ಟಿರವು, ಬಲ್ಲಚಂಡವು ಅಪ್ಪರಿಪ್ಪರ ಮಂಗಲ ಕೈಚವುಲೆ.

ಇನ್ನತ ಓರ್ ಆತ್ಮೀಯ ಭಾವನೆ ಸುಮಾರ್ 160 ಕಾಲ ಬೊಳ್‌ಂದ್ ಬರೊಂಡುವೇಂಗಿ ಉತ್ತನಾಯಕಂಡ ಕತಲ್ ಚಾರಿತ್ರಿಕ ಅಂಶ ಇಂಚಿತೇ ಇರೊಂಡು. ಇಕ್ಕ ಉಳ್ಳ ಐಚೆಟ್ಟಿರ ಒಕ್ಕಕಾರಡಲ್ಲಿ ಅಪ್ಪಯ್ಯ ಪಿಳ್ಳಾ ಪೂವಣ್ಣ ಇಯಂಗಡ ನಾಲನೆ ತಲೆಮಾರ್‌ಂಜ ಆರನೆ ತಲೆಮಾರ್ ಸಂತಾನಕೆತ್ತನೆ ಉಂಡ್.

## ಉತ್ತನಾಯಕ ದೊಡ್ಡ ವೀರಪ್ಪಂಡ ಮೀದತ ಪಗೆಲ್ ಕೋಟಂಗಡಿ ವೀರವರ್ಮಂಗ್ ಕೊಡಗ್ಗನ ಪುಡ್ತತ್ ಬೆಪ್ಪಕ್ ಪುರ್ಡ್ ಕಾಟ್‌ನದ್

ಉತ್ತನಾಯಕಂಗ್ ಅವಂಡ ನಾಡ್‌ಲ್ ಅದೆಚ್ಚಕೊ ವಿರೋಧಿಯ ಇಂಜತ್. ಇದ್‌ಂಗ್ ಅವ ಜನಕ್ ಕೊಡ್ತ ಹಿಂಸೆ ಪಿಳ್ಳಾ ಕಠಿಣ ವರ್ತನೆಂಜ ಅವಂಡ ವಿರೋಧಿಯ ತಗ್ಗುವಂಡ ಬದ್‌ಲ್ ಅಧಿಯಾಚಿ.

ಆಖೀರಕ್ ಉತ್ತನಾಯಕಂಡ ಉಪದ್ರತ್‌ನ ಬುಡುವಂಡ ಮನೆಕಾರ ದೊಡ್ಡ ವೀರಪ್ಪಂಡ ಪಕ್ಕ ಪುಕಾರ್ ಮಾಡ್‌ಚಿ. ಅದ್‌ಂಗ್ ದೊಡ್ಡ ವೀರಪ್ಪ, ಉತ್ತನಾಯಕ ತಾಂಡ ನಾಡ್‌ರ ಜನಳ ಪಲತರತ್ ಹಿಂಸೆ ಪಡ್‌ತಿಯಂಡ್ ಉಳ್ಳಾನ ತಾಂಡ ಗೂಢಚಾರಂಗ ಪಿಳ್ಳಾ ಬುಡುವಂಡ ಮನೆಕಾರಳುಂಡ್ ಅರ್‌ಂಜಿತ್ ಉತ್ತನಾಯಕಂಗ್ ಚಾಯಿತೆ ಇಪ್ಪನ್ನಕೆ ಎಣ್ಣಿತ್ ಅಯೆಚತ್. ಇದ್‌ನುಂಡ್ ಉತ್ತ ನಾಯಕಂಗ್ ದೊಡ್ಡ ವೀರಪ್ಪಂಡ ಮೀದ ಪಗೆ ಸುರುಪಾಚಿ. ಆನಗುಂಡ್ ದೊಡ್ಡ ವೀರಪ್ಪನ ಎನ್ನನಾಚೆಂಗೊ ಮಾಡಿತ್ ರಾಜ ಪದವಿಂಜ ಎಡ್‌ತ್ ಕನಿಕೊಂಡೊಂದ್ ಪಾರ ಕಾತಂಡ್ ಇಂಜತ್.

ಈಂಡೆಡೆಲ್ ತಾನ್ ದೇವಡ ದಯತ್‌ನೊ ಸಂಪಾದನೆ ಮಾಡೊಂಡೊಂದ್ ಉತ್ತನಾಯಕ ಬೈತೂರ್ ತಿರಿಕೆಕ್ ಪೋಯಿತ್ ಅಲ್ಲಿ ಪರಿಕೆ, ಕಾಣಿಕೆನ ಒಪ್ಪಚಿಟ್ಟತ್. ಅಲ್ಲಿಯತ ತಿರಿಕರ ಎದಿಕೆ ಚೊರಸ ಆಕಾರತ್ ಕೆತ್ತನ ಕಲ್ಲಾಕಂಬ ಪಿಳ್ಳಾ ಕಲ್ಲರ ಪಾರ್‌ಲ್ ಓರ್ ಪೂ ಪೊಗತ್‌ನ ಕೆಟ್ಟಾಚಿಟ್ಟತ್. ಇದ್ 1918ನೆ ಇಸವಿಕೆತ್ತನೆ ಇಂಜತ್‌ಂದೂ, ಅದೇ ಕಾಲ ಇಞ್ಚೋರ್ ಕಟ್ಟಡತ್‌ನ ಕೆಟ್ಟಾಚಿಡುವಕಾಯಿತ್ ಬೂಕ್‌ಚೀಂದೂ ಎಣ್ಣುವ. ಅವ ವಾಪಾಸ್ ಬಪ್ಪಕ ಚೆನ್ನಂಗ್ ದೇವತೆಯಡ ಮೂರ್ತಿನ ಅಲ್ಲಿಂಜ ಎಡ್‌ತಂಡ್ ಬಂದಿತ್ ತಾಂಡ ಮನೆರ ಎದಿಕೆ ಓರ್ ಜಾಗತ್ ಪ್ರತಿಷ್ಠಾಪನೆ ಮಾಡ್‌ಚಿ. ಈ ಮೂರ್ತಿಯಕ್ ಅವಂಡ ಒಕ್ಕಕಾರಳಾನ ಇಕ್ಕತ ನಾಯಕಂಡ ಮನೆಕಾರ ಇಕ್ಕಲೂ ಕಾಲಕೊಮ್ಮೆತ ಮೀದಿ ಬೆಪ್ಪ.

ಉತ್ತನಾಯಕ ಬೈತೂರ್‌ಂಜ ಬಂದಪಿಳ್ಳಾ ಅರಮೇರಿ ನಾಡ್‌ರ ತಿರಿಕೆ ಎದಿಕೆ ಬೈತೂರ್‌ಲ್ ಕೆಟ್ಟಾಚಿಟ್ಟ ಆಕಾರತ ಕಲ್ಲರ ಓರ್ ಪೂಮೊಗತ್‌ನ ಕೆಟ್ಟಾಚಿಟ್ಟತ್. ಈ ಪೂಮೊಗ ಇಕ್ಕಲೂ ಅನ್ನನೆ ಉಂಡ್. ಪೂಮೊಗ ಕೆಟ್ಟಾಚಿಡುವಕ್ ಕೆಟ್ಟಾಚಿಟ್ಟಲ್ಲಿ ಜಾಸ್ತಿಯಾನ ಓರ್ ಕಲ್ಲರ ಕಂಬ ಇಕ್ಕಲೂ ನಾಯಕಂಡ ಒಕ್ಕತರ ಮನೆರ ಎದಿಕೆ ಉಳ್ಳ ಕೆರರ ಏರಿರ ಕೊಡಿಲ್ ಅನ್ನನೆ ಬುದ್ಧಿತ್. ಉತ್ತನಾಯಕ ತಿರಿಕರ ಮಿಳ್ಳಾ ಕಲ್ಲಾಕಂಬತ್ ಪೂಮೊಗ ಕೆಟ್ಟಾಚಿಟ್ಟದೆ



ಅಲ್ಲತೆ ಅರಮೇರಿರ ಹರಿಜನಡ ತಿರಿಕೆಕ್ ಓರ್ ಕತ್ತಿ, ಓರ್ ಪೊನ್ನಾರ ಚಪ್ಪೆ ಪೊವಾನ ಕಾಣಿಕೆ ಆಯಿತ್ ಒಪ್ಪಿಚಿಟ್ಟಿತ್.

ಆಚೀಂಗಿ, ಈ ಎಲ್ಲಾ ಕಾರ್ಬಾರ್‌ನುಂಡ್ ಉತ್ತ ನಾಯಕಂಗ್ ತಾಂಡ ಜನಡ ಮನಸ್ಸಿನ ಗೆಲ್ಲುವಕ್ ಆಯಿಲೆ. ದೊಡ್ಡವೀರಪ್ಪಂಗೂ, ಇಂವಂಗ್ ಇಂಜ ಪಗೆ ಅನ್ನನೆ ಇಂಜತ್. ಆನಗುಂಡ್ ಅಂವ ತಾಂಡ ನಾಡಾರ ನೈಯತ್ತತ್ ಮಲಯಾಳತಾರ ತೆರಿಕಾಲೆ ರಾಜನಾಯಿತಿಂಜ ಕೋಟಂಗಡಿ ವೀರವರ್ಮಂಡ ಸಿನೇತಿಗೆ ಮಾಡ್‌ಚಿ. ಅನ್ನನೆ ತಾನ್ ಅಂವಂಗ್ ಸಹಾಯ ಮಾಡುವನ್ನೆಗೆ ಭರವಸೆರ ತಕ್ಕ ಕೊಡ್‌ತಿತ್, ದೊಡ್ಡವೀರಪ್ಪನುಂಡ್ ಕೊಡಗುನ ಗೆಲ್ಲುವನ್ನೆಗೆ ಪುರಡ್ ಕಾಟ್‌ಚಿ. ಆನಗುಂಡ್ ಕೋಟಂಗಡಿ ವೀರವರ್ಮ ಕೊಡಗುನ ತಾಂಡ ಪುಡ್‌ತತ್ ಬೆಚ್ಚಿವಕ್ ಸೆರಿಯಾನ ನೇರತಾನ ಪಾರ ಕಾತಂಡ್ ಅಳ್‌ತತ್.

ಕೋಟಂಗಡಿ ವೀರವರ್ಮ ಕಾತಂಡಿಂಜ ನೇರ ಬೆರಿಯ ಬಂದೆತ್ತಿರ್‌ತ್. ಈಂಗ್ ಮುಪ್ಪಡೆ ನೋಟಾನನ್ನೆಗೆ ಮೈಸೂರ್ ರಾಜ ಚಿಕ್ಕದೇವರಾಯ ಒಡೆಯ ಕೊಡಗುನ ಗೆದ್ದವಕ್ ಬಾಳಲೆಕಾಲೆ ತಾಂಡ ಸೈನ್ಯತನ ಅಯೆಪಕ ಆ ಸೈನ್ಯ ಪಾಲ್ಕುರಲ್ ಚೋತಿತ್ ಪೋಯಿತಿಂಜತ್. ಮೈಸೂರ್ ಸೈನ್ಯ ಕೊಡಗುನ ನುಗ್ಗಿಯಂಡ್ ಇಂಜನ್ನೆಗೆ ಉತ್ತನಾಯಕ, ಕೋಟಂಗಡಿ ರಾಜಂಡ ಪಕ್ಕ ಪೋಯಿತ್ ಇನ್ನನೆ ಎಣ್ಣೆಚಿ.

"ಆದ್ಲ ಮೈಸೂರ್‌ಕಾರ ಕೊಡಗುಕ್ ಸೇರ್‌ನ ಪೆರಿಯಾ ಪಟ್ಟತಾರ ಕೋಟೆನ ಎಡ್‌ತಂಡ್ ಇಕ್ಕ ಕೊಡಗುರ ಸೀಮೆನ ಕಟ್ಟಿಯವಂಡೂಂದ್ ಸೈನ್ಯ ಎಡ್‌ತಂಡ್ ಬಂದಿತ್. ಆನಗುಂಡ್ ದೊಡ್ಡವೀರಪ್ಪ ಒಡೆಯರ್ ತಾಂಡ ತೆರಿನ ಬಂದೋ ಬಸ್ತ ಮಾಡಿಯಂಡ್ ತಯಾರಾಯಿತೆ ಉಂಡ್. ಸೀಮೆರ ಜನ ಎಲ್ಲ ಬೊತ್ತಿಯಂಡಿತ್. ಈ ನೇರತ್ ನಿಂಗ ನಾಯಮಾರಳ ಕೂಟಿಯಂಡ್ ಕೊಡಗುರ ತೆರಿನ ಪಡ್‌ಂದವಕ್ ಕುಂದ್ ಪತ್ತಿತ್ ಬಂದಕ ನಾನ್ ಚೆನ್ನಂಗ್ ಕೊಡವಳ ನಿಂಗಡ ಸಹಾಯಕ್ ಅಯೆಚಿತಪ್ಪಿ"ಂದ್ ಎಣ್ಣೆಚಿ.

ಈ ತಕ್ಕನ ನಂಬಿಯಂಡ್ ರಾಜ ನಾಲಂಜಿ ಆಯಿರ ನಾಯಮಾರಳ ಕೂಟಿಯಂಡ್ ಬಂದಿತ್ ಕುಂದಾರ ಕೊಡಿಯ ತೋಮರ ಎಣ್ಣುವ ಜಾಗಕ್ ಬಾತ್. ಅಲ್ಲಿ ಓರ್ ಕೋಟೆನ ಕೆಟ್ಟಿಯಂಡ್ ತಂಗಡ ಸೈನ್ಯತನೆಲ್ಲ ಆಕ್‌ಚಿ. "ನಂಗಡ ಕುಮ್ಮಕ್ಕುಕ್ ಕೊಡವಳ ಅಯೆಚಿತ್ ತಪ್ಪಿಂದ್ ಎಣ್ಣೆರ. ಕೊಡವಳಲ್ಲಿ?"ಂದ್ ಕೋಟೆ ಅರಸ ಕೇಪಕ, ಅವು ದೊಡ್ಡ ವೀರಪ್ಪ ಒಡೆಯಂಡ ಕೂಡೆ ಮೈಸೂರ್ ಸೈನ್ಯತಾರ ಮೀದ ಜಗಳ ಮಾಡುವಕ್ ಪೋಯಿತ್. ಇಕ್ಕ ಅಯಿಂಗಳ ಕಾಕ್‌ಚಿಡುವಕ್ ಕಯ್ಯಲೆ. ಮೈಸೂರ್‌ಕಾರ ಕೊಡಗುರ ತೆರಿರ ಒಳ್‌ಕ್ ಬಂದ್‌ಟಕ ಜನ ಎಲ್ಲ ಚೆಲ್ಲಾ ಪಿಲ್ಲಿ ಆಯಿತ್ ಸೀಮೆಕ್ ಬಂದ್‌ರುವ. ಅಕ್ಕ ನಾಕ್ ಬೋಂಡಿಯಾನ ಜನಳ ಕಾಕ್‌ನಕ ಬಪ್ಪ. ಅಲ್ಲಿಂಜ ಚೆನ್ನಂಗ್ ಕೊಡಗುರ ಜಾಗತನ

ನಂಗಡ ಪುಡಾತಕ್ ಎಡಾತವಲು"ಂದ್ ಎಣ್ಣಾನಾಂಗ್ ಆ ತಕ್ಕನ ನಂಬಿಯಂಡ್ ಕೋಟೆರಾಜ ಪಿಳ್ಳಾ ಅವಂಡ ಕೂಡೆ ಆ ಕೋಟೆಲ್ ಇಂಜ ಜನಳೂ ನಂಬಾಚಿ.

"ಇಕ್ಕ ಮೈಸೂರ್‌ಂಜ ಬಂದ ಸೈನ್ಯತಾನ್ ಮಾದೇವಡ ಕೃಪೆಲ್ ನಂಗ ಗೆದ್ದಕ ಆ ನಾಲಂಜಿ ಆಯಿರ ನಾಯಮಾರಳ ಎದರ್‌ಚಿಡುವದ್ ಬಲ್ಲ ಸಂಗತಿ ಅಲ್ಲ. ಸದ್ಯಕ್ ಆಯಿರತ ಅಗ್ಲೂರ್ ಕೊಡವ ಪೋಯಿತ್ ಆ ತೋಮರತ್ ಕೋಟೆಕ್ ಮುತ್ತಿಗೆ ಇಟ್ಟಿತ್ ಕೋಟಂಗಡಿ ಅರಸ ಪಿಳ್ಳಾ ಅವಿಂಡ ಜನಳ ಮಲಯಾಳಕ್ ಪೋಕತನ್ನೆಕೆ ಬಟ್ಟೆನೆಲ್ಲ ಬಂದ್ ಮಾಡಿ"ಂದ್ ಅಪ್ಪಣೆ ಕೊಡ್‌ತಿತ್ ಅಯೆಚಲ್ಲಿ ಕೊಡವ ಅದೇ ಪೋಲೆ ಬಂದಿತ್ ಕೋಟೆಕ್ ಮುತ್ತಿಗೆ ಇಟ್ಟಿತ್.

ಅಕ್ಕ ವೀರವರ್ಮಂಗ್ ಉಣ್ ತೀನಿಕುಳ್ಳ ಸಾಮಾನ್ ಬಪ್ಪಕ್ ತಡೆಯಾಚಿ. ಉತ್ತ ನಾಯಕಂಡ ಜನ ಅವಂಡ ಸಹಾಯಕ್ ಬಂದ್‌ಲೆ. ಅವ ವಾಸ ಇಂಜ ಮರತ್ ಕೋಟೆ ಭದ್ರ ಇಂಚ್‌ಲೆ. ಅಕ್ಕಣೆಕ್ ದೊಡ್ಡ ವೀರಪ್ಪ ಮೈಸೂರ್‌ರ ಸೈನ್ಯತಾನ್ ದೊಪ್ಪುತಿಯಂಡ್ ತೋಮರಕ್ ಬಾತ್. ವೀರವರ್ಮ ದೊಡ್ಡ ವೀರಪ್ಪಂಡ ಕೂಡೆ ರಾಜಿ ಮಾಡುವಕ್ ಪ್ರಯತ್ನ ಪಟ್ಟಿತ್. ಆಚೇಂಗಿ, ದೊಡ್ಡವೀರಪ್ಪ ಇದ್‌ಂಗ್ ಒತ್ತವತೆ ಪಡೆಪೊತ್ತತ್. ಪಡೆಲ್ ವೀರವರ್ಮ ಅವಂಡ ಸೈನಿಕಂಗ ಚತ್ತತ್. ಉತ್ತನಾಯಕ ಮಾತ್ರ ಕಾಡ್‌ಲ್ ಒಳಚಂಡ್ ಅಂಜಿಗೇರಿ ಅಚ್ಚುನಾಯಕಂಡಲ್ಲಿಕ್ ಓಡಪೋಚಿ.

ದೊಡ್ಡವೀರಪ್ಪಂಗ್ ಈ ಸಮಾಚಾರ ಕ್‌ಟ್ಪಿನದೆ ಉತ್ತನಾಯಕನ ಪುಡಿಪಕ್ ತಾಂಡ ಸೈನ್ಯತಾನ್ ಅಲ್ಲಿಕ್ ಅಯೆಚತ್. ಆಚೇಂಗಿ, ಅಕ್ಕಣೆಕ್ ಉತ್ತನಾಯಕ ಕೊಡಗ್ ಬುಟ್ಟಿತ್ ವೈತೂರ್‌ಕ್ ಓಡಿರ್‌ತ್. ಅವಂಡ ಕೂಡೆ ಇಂಜ ಕುಟುಂಬಕಾರಳೂ, ಉತ್ತ ನಾಯಕಂಡ ಕೂಡೆ ಅಲ್ಲಿಯೆ ಚತ್ತತ್.

ಅಲ್ಲಿಂಜ ಇಂವಂಡ ಸಂತಾನಕಾರ ಎಚ್ಚೆಕೋ ಕಾಲ ಕೈಂಜಪಿಳ್ಳಾ ಕೊಡಗ್‌ಕ್ ಬಂದಿತ್ ತಂಗಡ ಪಂಡೇತ ಆಸ್ತಿಲ್ ಚೆನ್ನಂಗಾನ ಪಡ್‌ಂದಂಡ್ ನೆಲೆ ನಿಂದತ್. ಇವು ನಾಯಕಂಡ ಸಂತಾನ ಆನಗುಂಡ್ ಅಯಂಗಡ ಒಕ್ಕಕ್ 'ನಾಯಕಂಡ' ಎಣ್ಣಾವ ಪೆದ ಬಾತ್. ಇಕ್ಕಲೂ ಬೆಪ್ಪುನಾಡ್‌ರ ಅರಮೇರಿ ಊರ್‌ಲ್ ನಾಯಕಂಡ ಮನೆಕಾರ ಉಂಡ್.

ಉತ್ತನಾಯಕಂಡ ಕತೆ ಬಾಯಿಂಜ ಬಾಯಿಕ್ ಬಂದ ಕತೆ ಆನಕೊ, ಉತ್ತನಾಯಕ ಬೆಪ್ಪು ನಾಡ್‌ಲ್ ಇಂಜತ್‌ಂದೂ, ಅವ ದೊಡ್ಡವೀರಪ್ಪಂಗ್ ವಿರೋಧ ಆಯಿತ್, ಕೋಟಂಗಡಿ ವೀರವರ್ಮ ರಾಜನ ಕೊಡಗ್‌ನ ಪಡ್‌ಂದಪನ್ನೆಕೆ ಎಣ್ಣಾಚಿಂದೂ ದೊಡ್ಡವೀರ ರಾಜೇಂದ್ರ ಒಡೆಯ ಎಳ್ಳಾಚಿಟ್ಟಿ ರಾಜೇಂದ್ರನಾಮಲ್ ಉಂಡ್. ಅವ ಐಚೆಟ್ಟಿರ, ಬಾಚೆಟ್ಟಿರ ಒಕ್ಕಕಾರಡ ಮನೆನ ಚುಟ್ಟಿತ್ ಇಟ್ಟಿತ್‌ಂದೂ, ಬಲ್ಲಚಂಡ ಮನೆಕಾರ ಐಚೆಟ್ಟಿರ

ಮಕ್ಕಳ ಚಾಕ್‌ನದ್....ಈನಗುಂಡ್ ಈ ದಂಡ್ ಒಕ್ಕಕಾರ ಓರ್ ಒಕ್ಕತರನ್ನಕೆ ಆತ್ತಿಯತಲ್ ಉಳ್ಳದ್ ಈ ಒಕ್ಕತ್ ಇಂದೇಕೂ ಬಾಯಿಂಜ ಬಾಯಿಕ್ ಎಣ್ಣನ ಕತೆ ಆಯಿತ್ ಉಂಡ್.

ಉತ್ತನಾಯಕಂಡ ಪೊಣ್ಣ್ ನೀಲಮ್ಮಾಜಿರ ಪೆದತ್ ಇಂದೇಕೂ ಅಯಿಂಗಡ ಮನೆರ ವದಿಕೆ ಅಂಬಲತ್ ಕಾಲಕೊಮ್ಮತೆ ನಾಯಕಂಡ ಮನೆಕಾರ ಒಬ್ಬ ಕುಳ್‌ಚಿತ್, ಒನ್ನಾಂದ್‌ಕ್ ಮುಪ್ಪಡೆ ಬೈಟ್ ಬಾಳೆಪಣ್ಣ್, ಪೊರಿ, ಪಾಲ್‌ನ ಮಾತ್ರ ಎಡ್‌ತಂಡ್, ಬಾಳೆಪಣ್ಣ್, ಪೊರಿ, ಪಾಲ್‌ನ ಮಾತ್ರ ಮೀದಿ ಬೆಕ್ಕೊಂಡು. ಇನ್ನನೆ ಮೀದಿ ಬೆಪ್ಪಕ ಆ ವೈಕ್ತಿ ಪಂಚೆ ಇಟ್ಟವಂಡು. ಸುಮಾರ್ ಐಂಬದ್ ಕಾಲಕ್ ಬಯ್ಯ ಲಿಂಗಾಯತಂಗಳೆ ಬಂದಿತ್ ಪೊಜೆ ಮಾಡಿತ್ ಮೀದಿ ಬೆಪ್ಪ ಇಂಜತ್‌ಂದ್, ಬಯ್ಯಂಜ ಲಿಂಗಾಯತಂಗ ಊರ್‌ಲ್ ಇಲ್ಲತಾನಗುಂಡ್ ನಾಯಕಂಡ ಮನೆಕಾರಳೆ ಲಿಂಗಾಯತಂಗಡ ಕ್ರಮತೆ ಮೀದಿ ಬೆಪ್ಪ ಪದ್ವತಿ ಬಾತ್‌ಂದ್ ನಾಯಕಂಡ ಒಕ್ಕಡ ಪೆರಿಯವು ಎಣ್ಣವ್, ನೀಲಮ್ಮಾಜಿ, ಉತ್ತನಾಯಕ, ವೀರವರ್ಮಂಡ ಕೂಡ ಪೋಪಾಂಗ್ ಮುಪ್ಪಡೆ ಚಿತ್ತ್ ಪೋಯಿತಿಕ್ಕು. ಅಕ್ಕಾಕಣೆಕ್ ಉತ್ತನಾಯಕ ಲಿಂಗಾಯತ ಆಯಿತೆ ಇಂಜಿತಿಕ್ಕು.

ನಾಯಕಂಡ ಮನೆರ ಎಡ್‌ತೆ ಬರಿಯತ ಪಳೆಯ ಕಳತ್ ಇಂದೇಕೂ ಚೆರಿಯ ಕಲ್ಲಾರ ಆನೆನ ಕತ್ತಿಲ್ ಕೆತ್ತಿತ್, ಓರ್ ಎತ್ತರತರ ಕಲ್ಲ ಬೋಟಿಲ್ ಪೂತ್ ಬೆಚ್ಚದ್ ಇಕ್ಕಲೂ ನಿಂದಿತುಂಡ್.

## ದೊಡ್ಡ ವೀರಪ್ಪ ತಾಂಡ ಕಾರ್ಯಕಾರ ಪೊನ್ನಪ್ಪಂಡ

### ಸಹಾಯತ್ ಶತ್ರುಗಳ ನಾಶ ಮಾಡ್‌ನದ್

ದೊಡ್ಡ ವೀರಪ್ಪ ಕಾನ್ ಪಟ್ಟಿಕ್ ಬಂದಿತ್ ಚೆನ್ನಂಗ್ ಕಾಲತರ ಒಳ್‌ಲೇ ರಾಜ್ಯತರ ಪೊರಾಮೆ ಪಿಳ್ಣ ಒಳ್‌ಲ್ ಎಚ್ಚಕೊ ಶತ್ರುಗಳ ಎದ್‌ರಚೆಡಂಡಿಯಾಚಿ. ರಾಜ್ಯತರ ಒಳ್‌ಲ್ ಉಳ್ಳ ಶತ್ರುವಡಾತ್ ಬೆಪ್ಪನಾಡ್‌ರ ಉತ್ತನಾಯಕ ಅಲ್ಲತೆ ಅಂಜಿಗೇರಿ ನಾಡ್‌ರ ಅಚ್ಚನಾಯಕ, ಕಡಿಯತ್ತಾಡ್‌ರ ಕೊಳ್ಳಕೊಂಗಿ ನಾಯಕನೂ ಇಂಜತ್.

ಈ ನಾಯಕಂಗಡಾತ್ ಪೆರಿಯವು ಹಾಲೇರಿರ ಒಂದನೆ ರಾಜಂಗ್ ತಂಗಡ ನಾಡ್‌ರ ಕಂದಾಯತರ ನಾಲ್‌ಭಾಗತ್ ಓರ್ ಭಾಗತ್‌ನ ಕಪ್ಪ ಕೊಡ್‌ಪ ಒಪ್ಪಂದ ಮಾಡಿತಿಂಜಕೊ ಬಯ್ಯ ಬಂದ ನಾಯಕಂಗ, ದೊಡ್ಡ ವೀರಪ್ಪ ಪಟ್ಟಿಕ್ ಬಂದನ್ನಕೆ ಕಪ್ಪ ಕೊಡ್‌ಪಾನೆ

ಸಿಪ್ಪಾಚಿಟ್ಟನ್ನೆ ಕೆ ಕಾಂಬ. ದೊಡ್ಡವೀರಪ್ಪಂಡ ಮೀದ ಮೈಸೂರ ಚಿಕ್ಕದೇವರಾಜ ಒಡೆಯ ಪಿಳ್ಳಾ ಮಲಯಾಳತರ ವೀರಮರ್ವ ಅರಸ ಪಡೆಪೊತ್ತಿತ್ ಬಂದ ಸಂದರ್ಭತಾನ ನೋಟಿತ್ ಇವು, ದೊಡ್ಡವೀರಪ್ಪಂಗ್ ಕಪ್ಪ ಕೊಡ್ಕತೆ ಸ್ವತಂತ್ರ ಆಯಿತ್ ತಂಗ, ತಂಗಡ ನಾಡ್ನ ಆಳುವಕೂಡ್ಚಿ. ಅಚ್ಚುನಾಯಕ, ದೊಡ್ಡವೀರಪ್ಪಂಗ್ ವಿರೋಧ ಆಯಿತ್ ಉಳ್ಳಾನ ಬೆಪ್ಪುನಾಡ್ನ ಉತ್ತನಾಯಕ ಅರ್ಂಬಿತಿಂಜತ್. ಆನಗುಂಡ್ ಕೋಟಂಗಡಿ ವೀರಪರ್ಮ ಸೈನ್ಯತೋಡ ತೋಮರತ್ ಪಡೆಲ್ ದೊಡ್ಡವೀರಪ್ಪಂಡ ಪಡೆಕಾರಳುಂಡ್ ಚೋತಿತ್, ಚತ್ಪೋಪ ಸಂದರ್ಭ ಅರ್ಂಬಂಡ್, ಕಾಡ್ಲ್ ಒಳಚಂಡ್ ಅಲ್ಲಿಂಜ ಅಚ್ಚು ನಾಯಕಂಡ ಪಕ್ಕ ಓಡಿ ಪೋಚಿ.

ಈ ನೇರತ್ ಎಣ್ಣಕ ಕಲಿಸಂದ 4819ನೆ ಖರ ಸಂವತ್ಸರತ್ ಎಣ್ಣಕ 1718ನೆ ಇಸವಿಲ್ ನಾಲ್ವಾಡ್ ನಾಲಡಿ ಊರರ ಪರದಂಡ ಪೊನ್ನಪ್ಪ, ದೊಡ್ಡವೀರಪ್ಪಂಡ ಮುಖ್ಯ ಕಾರ್ಯಕಾರ ಎಣ್ಣಕ ಸೈನ್ಯಾಧಿಪತಿ ಆಯಿತಿಂಜತ್. ದೊಡ್ಡವೀರಪ್ಪ, ಪೊನ್ನಪ್ಪನ ಕಾಕಿತ್, "ಪೊನ್ನಪ್ಪ ಕ್ಕೆಗ್ಗಟ್ಟಾನಾಡ್ಲ್ ಅಚ್ಚುನಾಯಕ, ಕಡಿಯತ್ತಾಡ್ಲ್ ಕೊಳ್ಳಕೊಂಗಿ ನಾಯಕ ನಂಗಕ್ ಕಪ್ಪ ತರತೆ ನಂಗಕ್ ತಿರಿತ್ ನಿಂದಿತ್. ಇಕ್ಕ ಬೆಪ್ಪುನಾಡ್ನ ಉತ್ತನಾಯಕ, ಅಚ್ಚು ನಾಯಕಂಡ ಪಕ್ಕ ಓಡಿ ಪೋಯಿತ್ಂದ್ ಸುದ್ದಿ ಉಂಡ್. ಆನಗುಂಡ್ ನಂಗಕ್ ಪೈರಿಯಳಾನ ಈ ನಾಯಕಂಗಳ ಅಡ್ಕಿತ್, ಅಯಿಂಗಡ ನಾಡ್ನ ಸಂಗ ಪಡ್ಂದವಂಡು. ಇದ್ಂಗೆ ದಾರ್ನ ಅಯೆಕನ?"ಂದ್ ಕೇಟಿತ್.

ಅದ್ಂಗೆ ಪೊನ್ನಪ್ಪ, "ನಿಂಗ ಅಪ್ಪಣೆ ತಂದಕ ನಾನೆ ಅಯಿಂಗಳ ಚೋಪ್ಚಿಟ್ಟಿತ್ ನಿಂಗಡ ಕಾಲ್ರ ಮೊರ್ದ್ಕ್ ಅಯಿಂಗಳ ಬೂಕುವಿ. ಆಚೇಂಗಿ, ನಾಡ ಕೂಡೆ ನೂರ್ ಚಾವಡಿಕಾರಂಗಳ ಅಯೆಚಿತಾರಿ. ನಾನ್ ಅಯಿಂಗಳ ಚೋಪ್ಚಿಡುವಕ್ ಕಯ್ಯತೆ ಪೋನಕ ಪಡೆಲ್ ಪ್ರಾಣ ಬುಡುವಿ. ಪಡೆಲ್ ಗೆದ್ದಿತ್ ಬರತೆ ನಿಂಗಕ್ ನಾಡ ಮೂಡ್ನ ಕಾಟುಲೆ"ಂದ್ ಎಣ್ಣಪ.

ಅಕ್ಕ ದೊಡ್ಡವೀರಪ್ಪ, "ಶಹಭಾಷ್ ಪೊನ್ನಪ್ಪ, ನೀಡ ಪರಾಕ್ರಮಕ್ ಒತ್ತನ್ನೆ ತಕ್ಕ ಪರ್ಂದಿಯ. ನೀಡ ಇಷ್ಟತರನ್ನೆ ಇಂದೇ ನೂರಾಳ್ ಚಾವಡಿಕಾರಳ ಕೂಟಿಯಂಡ್ ಪೊರ್ದ್"ಂದ್ ಅಪ್ಪಣೆ ಕೊಡ್ಪ.

ಈ ಪೋಲೆ ಪೊನ್ನಪ್ಪ ಧೈರ್ಯಶಾಲಿಯಳಾನ ನೂರಾಳ್ ಚಾವಡಿಕಾರಳ ಕೂಟಿಯಂಡ್ ದಾರ್ಕೂ ಗೊತ್ತಾಕತನ್ನೆ ಬೈಟೆ ಪೊರ್ದ್ರು. ಪೊಲಣೆಕ್ ಕಡಿಯತ್ತಾಡ್ನ ಕೊಣಂಜಗೇರಿ ಊರನ ಎತ್ತಿರುವ. ಅಲ್ಲಿ ಇಕ್ಕ ಬುದ್ಧಿಪೋನ ಮನೆ ಇಂಜ ಚಾಗತೆ ಕೋಚಮಂಡ ಮನೆ ಇಂಜತ್ಂದ್ ಕತೆ ಉಂಡ್. ಈ ಮನೆರ ಪಕ್ಕತೆ ಭಗವತಿ ತಿರಿಕೆ.



ಈ ತಿರಿಕೆರ ನಮ್ಮರ ನೇರತ್ ಕೊಳ್ಳಕೊಂಗಿ ನಾಯಕ ಭಗವತಿ ದೇವಿರ ವಿಗ್ರಹತ್‌ನ ಒರಾತತ್ ತಾಂಡ ಊರಾನ ಕೊಂದಾಡ್‌ರ ಭಗವತಿ ತಿರಿಕೆಕ್ ಎಡ್‌ತಂಡ್ ಪೋಯಿತಿಂಜತ್. ಈನಗುಂಡ್ ಕೊಣಂಜಗೇರಿ ಪಿಳ್ಳಾ ಕೊಂದಾಡ್ ಊರಾರ ಕೊಳ್ಳ ಕೊಂಗಿನಾಯಕಂಡ ಜನಕೂ ಗೆಡಿ ಗೆಡಿ ಜಗಳ, ಪೊಯ್ತಕಳಿ ಆಪ ಇಂಜತ್. ಕೊಣಂಜಗೇರಿ ಊರಾರ ಕೋಚಮಂಡ ಮನೆಕಾರ ಮುಖ್ಯಸ್ಥಂಗ ಆನಾನಗುಂಡ್ ಪೊನ್ನಪ್ಪ ತಾಂಡ ಜನಳ ಅಯಿಂಗಡ ಮನೆಕ್ ಕೂಟಿಯಂಡ್ ಪೋಚಿ. ಅಲ್ಲಿ ಅಯಿಂಗಕ್ ಕೋಚಮಂಡ ಒಕ್ಕತ್ ಚಾಯಿತೆ ತಕ್ಕಾರ ಮಾಡಿತ್ ಉಂಬ್‌ಚಿಟ್ಟಿತ್. ಅಂದ್ ಬೈಟ್ ಪೊನ್ನಪ್ಪ ಪಿಳ್ಳಾ ಕೂಟ್‌ಕಾರ ಅಲ್ಲಿಯೆ ವರ್‌ಚಿ.

ಪಿತ್ಯಾಂದ್ ಪೊಲಾಕ ನೇರ್ತ್ ಪೊನ್ನಪ್ಪ ತಾಂಡ ಜನಳ ಕೂಟಿಯಂಡ್ ಕೊಳ್ಳಕೊಂಗಿ ನಾಯಕ ಇಂಜ ಕೊಂದಾಡ್‌ಕ್ ಪೋಚಿ. ಅಲ್ಲಿ ಇಕ್ಕ 'ಕೈಕಾಡ್'ಂದ್ ಕಾಕುವ ಊರಾರ ಓರ್ ಭಾಗತ್ ಕೊಳ್ಳಕೊಂಗಿ ನಾಯಕ ಮಣ್ಣಲ್ ಕೆಟ್ಟಾನ ನಾಲ್‌ಸುತ್ತುರ ಮನೆ ಇಂಜತ್. ಮನೆರ ಸುತ್ತೂ ಎತ್ತರತ ಮಣ್ಣರ ದಾಟ್ಲೆ. ದಾಟ್ಲೆರ ಪೊರಮೆ ಆಳವಾನ ಕಡಂಗ ಇಂಜತ್.

ಕೊಳ್ಳ ಕೊಂಗಿ ನಾಯಕ, ದೊಡ್ಡವೀರಪ್ಪ ತಾಂಡ ಪೊರಮೆತ ವೈರಿಯಳ ಚೋಪ್‌ಚಿಟ್ಟಪಿಳ್ಳಾ ಆಪಚ್ಚಕ್ ಬೆರಿಯ ತಾಂಡ ಮೀದ ಜನಡ ಅಯೆಕೊಂದ್ ಗೇನ ಮಾಡಿತಿಂಜಾಲೆ. ಈನಗುಂಡ್ ಅವಂಡ ಮನೆರ ಸುತ್ತೂ ಪಾರಕಾರ ಇಂಜಾಲೆ. ಮನೆಲ್ ಮಾತ್ರ ಚೆನ್ನಂಗ್ ಪಾರಕಾರ ಇಂಜತ್. ಪೊರಮೆತ ಪಾರಕಾರ ಪಕ್ಕತೆ ಇಂಜ ತಂಗಡ ಮನೆಕ್ ಪೋಯಿತಿಂಜತ್.

ಪೊನ್ನಪ್ಪ ಪೊಲಣೆಕ್ ಮುಪ್ಪಡೆ ತಾಂಡ ಇರುವತ್ತಂಜಿ ಜನಳ ಕೂಟಿಯಂಡ್ ನಾಯಕಂಡ ಮನೆರ ಬಲ್ಯಪಡಿರ ಪಕ್ಕ ಪೋಚಿ. ಅಕ್ಕ ಬೋರೆ ಚಾವಡಿಕಾರ ಪಕ್ಕತೆ ಇಂಜ ಮಲೆನಾಡಲ್ ಸದ್ ಮಾಡತೆ ಅಳತಂಡತ್. ಪೊನ್ನಪ್ಪ ಪೋಯಿತ್ ಬಲ್ಯಪಡಿನ ಮೆಲ್ಲೆ ತಟ್ಟಿಚಿ. ಅಕ್ಕ ಒಳ್‌ಲ್ ಪಾರ ಇಂಜಯಿಂಗಡ ವರ್‌ಕ್ ಇಳ್ಳಾ ಬುಟ್ಟಿತಿಂಜಾಲೆ. ಪಡಿ ತಟ್ಟುವ ಸದ್‌ಕ್ ಅವು ಎಚ್ಚರ ಆಯಿತ್ "ಇದ್ ದಾರಪ್ಪ, ಇಚ್ಚಕ್ ಪೊಲಾಕಲೆ ಪಡಿ ತಟ್ಟಿಯಂಡ್ ಉಳ್ಳ?"ಂದ್ ಗೊಣ್‌ಗಿಯಂಡ್ ಪಡಿ ತೊರಂದತ್.

ಅವು ಸೊಪನತೂ ಶತ್ರುವ ತಂಗಡ ನಾಯಕಂಡ ಮನೆಕ್ ಮುತ್ತಿಗೆ ಇಡುವಾಂದ್ ಗೇನ ಮಾಡಿತಿಂಜಾಲೆ. ಆನಗುಂಡ್ ಅವು ತಂಗಡ ಕೈಲ್ ಎದೇ ಓರ್ ಆಯುಧ ಸಹ ಇಲ್ಲತೆ ಪಡಿ ತೊರಂದತ್. ಪಡಿ ತೊರಂದನ್ನಕೆ ಪೊನ್ನಪ್ಪ ಪಿಳ್ಳಾ ಇರುವತ್ತಂಜಿ ಚಾವಡಿಕಾರ ಒಳ್‌ಕ್ ನುಗ್ಗಿತ್ ಪಾರಕಾರಳ ಪುಡ್‌ಚಂಡ್ ಅಂಜಿ ಮಿನಿಟ್‌ಲೆ ಕಂಬಕ್ ಕೆಟ್ಟಿತ್‌ಟ್ಟಿತ್. ಅಕ್ಕಣೆಕ್ ಒಳ್‌ಲ್ ಇಂಜ ನಾಯಕಂಡ ಮನೆರ ಪೊಣ್ಣಾಳ ಸದ್ ಕೇಟಿತ್



"ದಾರೋ ಶತ್ರುವ ಬಂದಿತ್"ಂದ್ ಜೋರಾತ ಕೂತ್ ಕೊಡತತ್. ಅಕ್ಕ ಕೊಳ್ಳಕೊಂಗಿ ನಾಯಕ ಒಡಿಕತ್ತಿ ಪುಡಾಚಂಡ್ ಬಪ್ಪಕ ಅಂವಂಡ ಕೂಡ ಇಂಜ ಸೇವಕಂಗ ಪಿಳ್ಳಾ ಚೆನ್ನ ಬೆಂದ್‌ಕಳೂ ಪೊರ್‌ಮೆ ಬಾತ್.

ಅಲ್ಲಿ ಪೊನ್ನಪ್ಪ ಪಿಳ್ಳಾ ಕೊಳ್ಳಕೊಂಗಿರ ಕಡೆಕಾರಕ್ ಪಡೆ ಆಚಿ. ಪೊನ್ನಪ್ಪ ಪಿಳ್ಳಾ ಕೂಟಾಕಾರ ನಾಯಕಂಗಳ ಚೋಪಾಚಿಟ್ಟತ್. ನಾಯಕ ಪಿಳ್ಳಾ ಅಂವಂಡ ಸೋದರಂಗ ಶೌರ್ಯತ್ ಪೋರಾಡಿತ್ ಚತ್ತತ್. ಪೊನ್ನಪ್ಪಂಡ ಚಾವಡಿಕಾರಡಾತ್ ಮುಂದಾಳ್‌ಕ್ ಮಾತ್ರ ಬಲಪಾನ ಗಾಯ ಆಚಿ. ಅಲ್ಲಿಂಜ ಪೊನ್ನಪ್ಪ ಬಾಕಿ ಇಂಜ ಚಾವಡಿಕಾರಳ ಅಲ್ಲಿ ಗಾಯ ಆನಯಿಂಗಡ ಆರೈಕೆ ಮಾಡುವಕೂ ಪಿಳ್ಳಾ ಮನೆಪಾರಕೂ ಬುಟ್ಟಿತ್ ಬೊರಿ ಅಂಜಾಳ್‌ನ ಮಾತ್ರ ಗುಟ್ಟಾಯಿತ್ ಎಲ್ಲಿಕೊ ಕೂಟಿಯಂಡ್ ಪೋಚಿ.

ಇದಾಯಿತ್ ದಂಡ್ ದಿನತ್ ಅಂಜಿಗೇರಿ ನಾಡ್‌ರ ಅಚ್ಚು ನಾಯಕಂಡ ಮನೆರ ಪಕ್ಕ ಓರ್ ಭಿಕ್ಷೆಕಾರ ತಿರ್‌ಗಾಡಿಯಂಡ್ ಇಂಜತ್. ಅವ ಅಂದ್ ಅಲ್ಲಿಯೆ ಇಂಜಿತ್ ಅಚ್ಚುನಾಯಕಂಡ ಪಾರಕಾರಡ ಸಿನೇತಿಕೆ ಮಾಡಿಯಂಡತ್.

ಅಕ್ಕ ಫಸಲ್ ಬಂದ ಕಾಲ ಆನಾನಗುಂಡ್ ಕ್‌ಗ್ಗಟ್ವಾನಾಡ್‌ಲ್ ಭಿಕ್ಷೆಕಾರಕ್ ಕೊರು ಇಂಜಾಲೆ. ಆಚೀಂಗಿ, ಈ ಭಿಕ್ಷೆಕಾರ ಬೋರೆಯಯಿಂಗಡನ್ನೆ ಕಂಡಾಲೆ. ಮಜ್ಜಣ ಪಿಳ್ಳಾ ಬೈಟಾಪಕ ಪಾರಕಾರ ಮನೆರ ಒಳ್‌ಲೇ ಇಪ್ಪಕ ಇಂವ ಅಚ್ಚುನಾಯಕಂಡ ಮರತ್‌ರ ಕೋಟೆರ ಸುತ್ತೂ ಪೋಯಿತ್ ಪರೀಕ್ಷೆ ಮಾಡುವ ಇಂಜತ್. ಅಚ್ಚು ನಾಯಕಂಡ ಪಾರಕಾರಳುಂಡ್ ತಾಂಗ್ ಬೋಂಡಿಯಾನ ಸಂಗತಿನೆಲ್ಲ ಅರ್‌ಂಜಂಡತ್. ಇಂವಂಡಲ್ಲಿ ಓರ್ ವಿಶೇಷತೆ ಇಂಜತ್. ಎಕ್ಕೋಲು ಬೈಟ್ ಎಲ್ಲರೂ ಬುದ್ದೆಂಡಪಿಳ್ಳಾ ಇಂವ ಮಾತ್ರ ಅಚ್ಚುನಾಯಕಂಡ ಮನೆಂಜ ಎಲ್ಲಿಕೊ ಪೋಯಿತ್ ಪೊಲಾಕ ಆಪಕ ವಾಪಾಸ್ ಬಪ್ಪ ಇಂಜತ್.

ಓರಮ್ಮತೆ ಇಂವಂಡನ್ನೆ ಇಂಜ ಇಇಶ್ಲೋರ್ ಭಿಕ್ಷೆಕಾರ ಇಂವಂಡ ಕೂಡೆ ಇಪ್ಪ, ದಂಡಾಳೆ ಭಿಕ್ಷೆಕ್ ನಾಡ್‌ರ ಬರಿಯ ಪೋಪ, ಬಪ್ಪದ್ ಕಂಡ್ ಬಪ್ಪ ಇಂಜತ್. ಪೊನ್ನಪ್ಪ ಅಂವಂಡ ಕೂಡೆ ಪೊರ್‌ಟ ಅಂಜಾಳ್ ಭಿಕ್ಷೆಕಾರಡ ವೇಷ ಮಾತಿತ್ ಕ್‌ರಂದಾಡ್‌ಂಜ ಅಂಜಿಗೇರಿ ನಾಡ್‌ಕೆತ್ತನೆ ಇಂಜ ಬೋರೆ ಬೋರೆ ನಾಡ್‌ಲ್ ತಿರಿಯಂಡ್ ಬೈಟ್ ನೇರತ್ ಒಬ್ಬನುಂಡ್ ಇಇಶ್ಲೋಬ್ಬ ಸುದ್ದಿ ಅರ್‌ಂಜಂಡ್, ಅಂಜಿಗೇರಿಲ್ ಇಂಜ ಅಚ್ಚುನಾಯಕಂಡ ಮನೆರ ಪಕ್ಕತೆ ಪೊನ್ನಪ್ಪಂಗೂ, ಕ್‌ರಂದಾಡ್‌ಲ್ ಇಂಜ ಚಾವಡಿಕಾರಕೂ ಸಮ್ಮಂಧ ಬೆಚ್ಚಂಡಿತಿಂಜತ್. ಇನ್ನನಾಯಿತ್ ಪೊನ್ನಪ್ಪಂಗ್ ತಾಂಗ್ ಬೋಂಡಿಯಾಪಾಕ ತಾಂಡ ಬರಿಯತ ಜನಳ ಕಾಕಿಯವಕ್ ಕಯ್ಯವ ಇಂಜತ್.

ಅಚ್ಚುನಾಯಕ ತಾಂಡ ಗೂಢಚಾರಡ ಮೂಲಕ ಪೊನ್ನಪ್ಪ ನೂರ್ ಚಾವಡಿಕಾರಡ



ಕೂಡೆ ಮಡಿಕೇರಿಂಜ ಪೊರಾಟತ್ ಕಾರಂದಾಡಲ್ ಕೊಳ್ಳಕೊಂಗಿ ನಾಯಕನ ಕೊಂದಿತ್ ಅಂವಂಡ ಮನೆ ಪಿಳ್ಳಾ ಭೂಮಿನ ತಾಂಡ ಪುಡಾತಕ್ ಎಡಾತಂಡಾನ ಅರಾಂಜತ್. ದೊಡ್ಡವೀರಪ್ಪ ತಾಂಡ ನಾಡ್‌ನ ಪಡ್‌ಂದವಕ್ ಕಾರ್ಯಕಾರ ಪಿಳ್ಳಾ ಜನಳ ಅಯೆಕು ಎಣ್ಣುವ ಪೋಡಿ ಅಚ್ಚುನಾಯಕಂಗೆ ಇಂಜಾನುಂಡ್ ಅಂವ ತಾಂಡ ನಾಡ್‌ರ ಜನಳೆಲ್ಲ ಕಾಕಿತ್ ತಾಂಡ ನಾಡ್ ಪಿಳ್ಳಾ ಮನೆನ ಶತ್ರುವಳುಂಡ್ ಕಾಪಾಡಿಯವಕ್ ಬೋಂಡಿಯಾನ ಏರ್ಪಾಡ್ ಮಾಡ್‌ಚಿಟ್ಟತ್. ತಾಂಡ ಮನೆರ ಸುತ್ತೂ ಇಂಜ ಮರತಾರ ಕೋಟೆರ ಪೊರಾಮೆ ಪಿಳ್ಳಾ ನಾಡ್‌ರ ಬಟ್ಟೆಲ್ ಇಂಜ ಕಡಂಗ್‌ನ ಇಳ್ಳೂ ಆಳೆ ಮಾಡ್‌ಚಿಟ್ಟಿತ್ ಬರಿಯತ ದಾಟ್ಚೆನೆಲ್ಲ ಎತ್ತರ ಮಾಡ್‌ಚಿಟ್ಟತ್. ರಾಜಮಾರ್ಗತ್ ಪಾರಕಾರಳ ನೇಮಕ ಮಾಡ್‌ಚಿ.

ಆಚೇಂಗಿ, ಇನ್ನನೆ ಎಲ್ಲ ರೆಡಿ ಆಯಿತ್ ಪತ್ತ ಪದಾನಂಜಿ ದಿನ ಕೈಂಜಕೊ ದೊಡ್ಡವೀರಪ್ಪಂಡ ಜನ ಕಡಿಯತ್ತಾಡ್‌ಂಡೆ ಆಡ್, ಮಡಿಕೇರಿಂಜೆ ಆಡ್ ಕಗ್ಗಟ್ಟ್ ನಾಡ್‌ರ ಬರಿಯ ಬಂದ ಸುದ್ದಿಯೆ ಬಂದಾಲೆ. ಆನಗುಂಡ್ ಅಚ್ಚು ನಾಯಕಂಡ ಮನೆರ ಪಾರ ಚೆನ್ನ ಸಡಾಲ ಆಚಿ. ಜನಳೂ ಉದಾಸೀನ ಕಾಟ್‌ಚಿ. ಈಂಡೆಡೆಲ್ ಪೊನ್ನಪ್ಪ ಪಿಳ್ಳಾ ಓರ್ ಚಾವಡಿಕಾರ ಭಿಕ್ಷುಕಾರಂಡ ವೇಷತ್ ಅಯಿಂಗಡ ಕೂಡೆ ಓಡಿ ಕಳಚಿತ್ ಅಚ್ಚು ನಾಯಕಂಗಡ ಸೈನ್ಯತಾರ ತಾಕತ್ತನ ಅರಾಂಜಿತಿಂಜತ್!

ಪಿತ್ತಾಂದ್ ಪೊಲಾಕ ಕಾಪಿ ಕುಡ್‌ಚಿತ್ ಆನಪಿಳ್ಳಾ ಅಚ್ಚು ನಾಯಕ ತಾಂಡ ಕೂಡೆ ಇಂಜ ನಾಪದ್ ಜನ ಪಿಳ್ಳಾ ನಾಯಿಯಳ ಕೂಟಿಯುಂಡ್ ಬೋಚೆಕುಂಡ್ ಪತ್ತಕೆಟ್ಟ್ ನಾಡ್‌ಕ್ ಪೋಚಿ. ಅಂವಂಡ ಮನೆ ಪಿಳ್ಳಾ ಕೋಟೆರ ಪಾರಕ್ ಪತ್ತಾಳನ ಮಾತ್ರ ಆಕಚಿ.

ಒಯ್‌ಪತ್ ಸುಮಾರ್ ಏಳು ಗಂಟೆರ ನೇರ. ಅಚ್ಚನೇರಕ್ ಪೊನ್ನಪ್ಪಂಡ ಅಂಜಾಳ ಅಚ್ಚು ನಾಯಕಂಡ ಕೋಟೆರ ಪಕ್ಕ ಬಾತ್. ಅಯಿಂಗಳ ಚೆನ್ನಂಗ್ ದೂರತ ಕಾಡ್‌ರ ಪಕ್ಕ ಕಾತಂಡ್ ಇಂಜ ಪೊನ್ನಪ್ಪ, ಅವು ಬಂದನ್ನಕೆ ಕೋಟೆರ ಸುತ್ತ ಮರಕಾಡಲ್ ಅಳಾಪ್‌ಚಿಟ್ಟಿತ್ ಅದತ್ ಇರುವದಾಳನ ಮಾತ್ರ ಕೂಟಿಯುಂಡ್ ಕೋಟೆರ ಬೆಂಬರಿಕ್ ಪೋಚಿ. ಅಲ್ಲಿ ಸಾಧಾರಣ ಆಯಿತ್ ಪಾರಕಾರ ದಾರೂ ಇಪ್ಪ ಇಂಚಾಲೆ.

ಪೊನ್ನಪ್ಪ ಪುಂಡತಾರ ದಂಡ್ ಉದ್ದ ಏಣಿ ಬೋಂಡಿಯಾಪಾಂದ್ ಕಾಡಲ್ ಒಳಾಪ್‌ಚಿಟ್ಟಿತಿಂಜತ್. ಈ ಏಣಿನ ಕೊಂಡಬಪ್ಪಚಿಟ್ಟ ಪೊನ್ನಪ್ಪ ಒಂದಾನ ಆ ಮರತಾರ ಕೋಟೆರ ಕೆಂವಕ್ ತಾಕಿಬೆಚ್ಚಿತ್ ಕೊಡಿಕ್ ಪತ್ತಚಿ. ಕೆಂವತಾರ ಕೋಟಿಯ ಪತ್ತನ ಪೊನ್ನಪ್ಪ ಅಲ್ಲಿಂಜ ಓರ್ ಬಲ್ಯ ಕೇರನ ಕೋಟೆರ ಒಳಾಕ್ ಬುಟ್ಟಿತ್, ಇಳ್ಳೋರ್ ತುದಿನ ಪೊರಾಮೆ ಕನ್‌ಚಿತ್ ತಾಂಡ ಕಡೆಕಾರಕ್ ಅದ್‌ನ ಪುಡಾಚಂಡ್ ಬಲಿಪಕ್ ಎಣ್ಣಾಚಿ. ಅಲ್ಲಿಂಜ ಅಂವ ಆ ಕೇರರ ಮೂಲಕ ಕೋಟೆರ ಒಳಾಕ್ ಇಳಾಂಜತ್.

ಅಖೀರಕ್ ದಂಡ್ ಜನ ಮಾತ್ರ ಪೂರ್ವಮೆ ಇಂಜಂಡ್, ಅಚ್ಚುನಾಯಕ ಪಿಳ್ಳಾ ಕೂಟಾಕಾರ ಬೋಟೆಕ್ ಪೋಯಿತ್ ಬಪ್ಪಾನ ಅರ್ಚಿಡುವಕ್ ಎಣ್ಣೆಚಿ. ಕೋಟೆರ ಒಳಾಕ್ ಇಳಾಂಜ ಪೊನ್ನಪ್ಪ ಪಿಳ್ಳಾ ಕೂಟಾಕಾರ ಒರಿಚ್ಚಿಕೂ ಸದ್ವ್ ಮಾಡತೆ ಅಚ್ಚುನಾಯಕಂಡ ಮನೆರ ಎದಿಕೆ ಪೋಚಿ.

ಅಕ್ಕ ಅಲ್ಲಿ ಇಂಜ ಪಾರಕಾರ ಚೆನ್ನಂಗಾಳ್ ವರಿಯಂಡ್ ಇಂಜತ್. ವರತೆ ಇಂಜ ದಂಡಾಳ್ ಇಯಂಗಳ ಕಂಡಿತ್ ಬೊತ್ತಿತ್ ಬಾಕಿ ಉಳ್ಳಯಿಂಗಳ ಏವಕ್ ಎಣ್ಣೆಚಿ. ಆಚೇಂಗಿ, ಅವು ವರಾಕತಾಂಜ ಎದ್ವಿತ್ ತಂಗಡ ಕತ್ತಿನ ಎಡ್ಪಾಂಗೆ ಮುಪ್ಪಡೆ ಪೊನ್ನಪ್ಪಂಡ ಜನ ಅಯಿಂಗಡ ಕತ್ತಿನ ಬಲಾಚಂಡ್ ಅಯಿಂಗಳ ಕೊಂದಿತ್‌ಟ್ಟತ್. ಇದೆಲ್ಲ ಅರೆ ಗಂಟಲ್ ನಡಾಂದ್‌ಪೋಚಿ.

ಇಚ್ಚಕಾಕಣ್, ತಂಗಕ್ ಆಕತವು ದಾರೊ ಕೋಟೆರ ಒಳಾಕ್ ನುಗ್ಗಿತ್ ತಂಗಡ ಪಾರಕಾರಳ ಕೊಂದಿತ್ ಇಟ್ಟಿತ್, ಕೋಟೆನ ಪುಡಾತಕ್ ಎಡ್‌ತಂಡಿತ್‌ಂದ್ ಅಚ್ಚುನಾಯಕಂಡ ಪೊಣ್ಣಾಳಕ್ ಗೊತ್ತಾಚಿ. ಅವು ಬೊತ್ತಿಯಂಡ್ ತಂಗಡ ಮನೆರ ಪಡಿರ ಚಿಲಕತ್‌ನ ಒಳಾಂಜೆ ಇಟ್ಟುಂಡ್ ಅಚ್ಚುನಾಯಕ ಪಿಳ್ಳಾ ಕೂಟಾಕಾರ ಎಕ್ಕ ಬಪ್ಪಾಂದ್ ಪಾರ ಕಾತಂಡ್ ಇಂಜತ್.

ಪೊನ್ನಪ್ಪ ಕೋಟೆರ ಪಡಿ ತೊರಾಂದಿತ್ ಚೆನ್ನಂಗ್ ಚಾವಡಿಕಾರಳ ಒಳಾಕ್ ಕಾಕಿಯಂಡ್ ಅಲ್ಲಿ ಪಾರ ಇಪ್ಪಕ್ ಎಣ್ಣೆಚಿ. ಅಯಿಂಗಳ್ ಎಚ್ಚರಿಕೆ ಕೊಡ್‌ತಿತ್ ಪುನಾದಿಯ ಕೋಟೆರ ಬಲ್ಲ ಪಡಿನ ಮುಚ್ಚಾಚಿಟ್ಟತ್. ಬೈಟ್ ಸುಮಾರ್ ಒಯಿಂಬದ್ ಗಂಟೆರ ನೇರಕ್ ಜನ ತೂಡ್ ಪುಡಾಚಂಡ್ ಅಚ್ಚುನಾಯಕನ ಮಿಳ್ಳಾಲ್ ಆಕಿಯಂಡ್ ಕೋಟೆರ ಎದಿಕೆ ಬಾತ್. ಬೋಟೆಲ್ ಕೊಂದ ಕಡ್‌ಮ, ಕೇಮ... ಇನ್ನತ ಜಾತಿಯಳೆಲ್ಲ ಗಳೆಕ್ ಕೆಟ್ಟಿತ್ ಜನ ನೇತಿಯಂಡ್ ಇಂಜತ್. ಪೊವ್‌ಲೆಲ್ಲ ಕಾಡ್ ಸುತ್ತಿ, ಬೋಟೆಯಾಡ್‌ನಾಂಗ್ ಬೋಟೆಕ್ ಪೋನ ಜನ ಎಲ್ಲ ಸುಸ್ತಾಯಿತಿಂಜತ್. ಅವು ಅಚ್ಚು ನಾಯಕಂಡ ಮನೆಕ್ ಬೋಟೆಯಾಡಿತ್ ಬಪ್ಪಕ್ ಅಚ್ಚಕ್ ನೇರ ಆಯಿತಿಂಜತ್. ಅವು ಬಪ್ಪ ವರ್ತಮಾನತ್‌ನ ತಾಂಡ ಜನಳುಂಡ್ ಅರ್‌ಂಜ ಪೊನ್ನಪ್ಪ ಬಲ್ಲಪಡಿನ ತೊರ್‌ಪಾಚಿಟ್ಟತ್. ಪಡಿ ತೊರಾಂದನ್ನೆಕೆ ಕಾಡ್ ಜಾತಿಯಳ ನೇತಿಯಂಡ್ ಇಂಜ ಜನ ಒಳಾಕ್ ನುಗ್ಗಿಚಿ.

ಅಲ್ಲಿಂಜ ಅಚ್ಚುನಾಯಕ ಕೋಟೆರ ಒಳಾಕ್ ಪೋಚಿ. ಕೂಡೆನ್ನೆ ಪೊನ್ನಪ್ಪ ಕೋಟೆರ ಪಡಿನ ದಡಾರಾಂದ್ ಬೋರ್‌ತೆ ಇಡ್‌ಚಿಟ್ಟತ್. ತಾನ್ ಕೋಟೆರ ಒಳಾಕ್ ನುಗ್ಗ್‌ನದೆ ಪಡಿ ಮುಚ್ಚಾನಾ ಕಂಡಿತ್ ಅಚ್ಚು ನಾಯಕಂಗ್ ಒಮ್ಮೆಕೆ ಆಶ್ಚರ್ಯ ಪಿಳ್ಳಾ ಚೆಡಿ ಬಾತ್. ಅವ ಪಾರಕಾರಳ ನೋಟಾಚಿ. ಕೂಡೆನ್ನೆ ಅಯಿಂಗಡ ಪೊರ್‌ಪಾಡ್, ಮೂಡ್ ಪುದಿಯದಾಯಿತ್ ಕಂಡಿತ್ ತಾನ್ ಕೋಟೆಲ್ ಇಲ್ಲತಿಪ್ಪಕ ಎಂತೊ ಸಂಗತಿ ನಡಾಂದಿತ್‌ಂದ್ ಗೊತ್ತಾಚಿ.

ಅಕ್ಕಣೆಕ್ ಅಂವಂಗ್ ಮನೆರ ಒಳ್ಳಂಬ ಪೊಣ್ಣಾಳ "ವೈರಿಯ ಮನೆರ ಒಳ್ಳಲ್ ಉಂಡ್"ಂದ್ ಚೋರಾತೆ ಎಣ್ಣಿಯಂಡ್ ಮೊರಟಂಡ್ ಉಳ್ಳ ಸದ್ವ್ ಕೇಟತ್. ಅಂವ ಕೂಡೆನ್ನೆ ತಾಂಡ ನಡುಕ್ ಚಿಕ್ಕಚಿಟ್ಟಿತಿಂಬ ಒಡಿಕತ್ತಿನ ಎಡ್ತಂಡ್ ಪೊನ್ನಪ್ಪನ ಕೊಲ್ಲುವಕ್ ನೇತಚಿ. ಅಕ್ಕ ಪೊನ್ನಪ್ಪ ತಾಂಡ ಗುರಾಣಿಂಬ ಪೊಯ್ತನ ತಡ್ತತ್ "ಅಚ್ಚು ನಾಯಕ, ನೀನಿಕ್ಕ ದೊಡ್ಡವೀರಪ್ಪ ಒಡೆಯಂಡ ಸೆರೆಯಾಳ್" ಎಣ್ಣೆಚಿ.

ಅಕ್ಕ ಅಚ್ಚುನಾಯಕ "ನಾಡ ಕೋಟೆಲ್ ನನ್ನ ಸೆರೆ ಪುಡಿಪ ದೈರ್ಯ ದಾರ್ಕ್ ಉಂಡ್ ನೋಟುವಿ"ಂದ್ ಇಣ್ಣೊಮ್ಮೆ ತೆ ಪೊಯ್ಯುವಕ್ ಕತ್ತಿ ಎಡ್ತತ್.

ಕೂಡೆನ್ನೆ ಅಚ್ಚುನಾಯಕ ಪಿಣ್ಣಾ ಅಂವಂಡ ಕೂಡೆ ಇಂಬ ದಂಡಾಳ್ ಪೊನ್ನಪ್ಪ ಪಿಣ್ಣಾ ಅಂವಂಡ ಜನಡ ನಡುಲ್ ಚೆನ್ನಂಗ್ ನೇರ ಕತ್ತಿಲ್ ಕೆತ್ತಂಗಳಿ ನಡ್ಂದತ್. ಅಚ್ಚುನಾಯಕ, ಪೊನ್ನಪ್ಪಂಡ ಮಂಡೆಕ್ ಪೊಜ್ಜ ಪೊಯ್ತ ನಿಪುಣ್ ಪಟ್ಟಿತ್ ಗಾಯ ಆಚಿ. ಕೂಡೆನ್ನೆ ನೊಂಬಲತರ ಚೆಡಿಲ್ ಪೊನ್ನಪ್ಪ ಅಚ್ಚು ನಾಯಕಂಗ್ ಪೊಜ್ಜದ್ ಅಂವಂಡ ಮಂಡೆಲ್ ಬಲ್ಯ ಗಾಯ ಆಯಿತ್ ಕೇದಕ್ ಬುದ್ಧತ್.

ಕೂಡೆನ್ನೆ ಪೊನ್ನಪ್ಪಂಡ ಕಡೆಕಾರ ಅಚ್ಚುನಾಯಕಂಡ ಗುರಾಣಿ, ಕತ್ತಿನೆಲ್ಲ ಬಲೆಚಂಡ್ ಅಂವನ ನೇತಿಯಂಡ್ ಪೋಯಿತ್ ಮನೆರ ಪೊರಮೆತ ಕಯ್ಯಾಲೆಲ್ ಬುದ್ಧವಕಾಚಿ. ಅಕ್ಕಣೆಕ್ ಅಚ್ಚುನಾಯಕಂಡ ಕೂಡೆ ಇಂಬ ಚೆನ್ನಂಗಾಳ್ ಚೆತ್ತಿತಿಂಬತ್. ಪೊರಮೆ ಇಂಬ ಅಚ್ಚುನಾಯಕಂಡ ಜನಳ ಪೊನ್ನಪ್ಪ ಪೊರಮೆ ಕಾಡಲ್ ಇಪ್ಪಕ್ ಎಣ್ಣೆತಿಂಬ ಜನ ಬಂದಿತ್ ಪೊಜ್ಜಿತ್ ಓಡ್ಚಿಟ್ತಾರತ್.

ಅಚ್ಚುನಾಯಕನ ಚೋಪ್ಚಿಟ್ಟಿಪಿಣ್ಣಾ ಪೊನ್ನಪ್ಪ ಅಂವಂಡ ಮನೆಲ್ ಪದಾನಂಬಿ ದಿನ ಇಂಜಿತ್ ತಾಂಡ ಗಾಯತನೆಲ್ಲ ವಾಸಿ ಮಾಡಿಯಂಡತ್. ಅಕ್ಕಣೆಕ್ ಅಚ್ಚು ನಾಯಕಂಡ ಮಂಡೆ ಒಡ್ಂದದ್ ವಾಸಿ ಆಚಿ. ಅಚ್ಚುನಾಯಕನ ಸೆರೆ ಆಳಾಯಿತ್ ತಾಂಡ ಜನಡ ಕೂಡೆ ಕೂಟಿಯಂಡ್ ಪೊನ್ನಪ್ಪ ಮಡಿಕೇರಿಕ್ ಪೊರಟತ್. ತಂಗಡ ನಾಯಕ ಚೋತ್ಪೋನಪಿಣ್ಣಾ ಅಂಜಿಗೇರಿ ನಾಡ್ಕಾರ ದೊಡ್ಡ ವೀರಪ್ಪಂಡ ಆಳ್ವಿಕೆನ ಒತ್ತಂಡತ್.

ಪೊನ್ನಪ್ಪ, ಅಚ್ಚುನಾಯಕನ ಸೆರೆಯಾಳಾಯಿತ್ ಕೂಟಿಯಂಡ್ ಮಡಿಕೇರಿಕ್ ಎತ್ತುವಕ್ ದೊಡ್ಡ ವೀರಪ್ಪ ಒಡೆಯ, ಪೊನ್ನಪ್ಪ ಪಿಣ್ಣಾ ಚಾವಡಿಕಾರಳ ಪೇರ್ತ್ ಕುಶಿಲ್ ತಕ್ಕಾರ ಮಾಡ್ಚಿ. ಚಾವಡಿಕಾರಕ್ ಬಟ್ಟೆ, ಬಿಲ್ಲೆನ ಇನಾಂ ಆಯಿತ್ ಕೊಡ್ತತ್. ಅನ್ನನೆ ಪೊನ್ನಪ್ಪನ ತಾಂಡ ದಿವಾನ ಆಯಿತ್ ನೇಮಕ ಮಾಡ್ಚಿ. ಇಚ್ಚೆಗೆ ಅಲ್ಲ ತೆ ಪೊನ್ನಪ್ಪಂಗ್ ಬೋಂಡಿಯಾನ ಭೂಮಿನ ಕೇಟವನ್ನೆಗೆ ಅಪ್ಪಣೆ ಮಾಡ್ಚಿ.

ಅಕ್ಕ ಪೊನ್ನಪ್ಪ, "ಒಡೆಯ, ಬೆಪ್ಪುನಾಡ್ ಕುಂಜಿಲಗೇರಿಲ್ ಕೊಳ್ಳಕೊಂಗಿ ನಾಯಕಂಡ ಅಘ್ಲೂರ್ ಬಟ್ಟಿ ಭೂಮಿ ಪಿಞ್ಣ ಸಂತಾನೆ ನಾಶ ಆಯಿಪೋನ ನಾಡ್, ತಕ್ಕ ಮುಕ್ಕಾಟಿರ ಕುಳ್ಳಕ್ ಸೇದ್‌ನ ಆಯಿರ ಬಟ್ಟಿ ಭೂಮಿ ಪಡ್ ಬುದ್ವಿತ್. ಅದ್‌ನ ತಾರಿ"ಂದ್ ಕೇಟಂದತ್.

ದೊಡ್ಡವೀರಪ್ಪ ವೀರ ಆಯಿತಿಂಬನ್ನಕೆ ಉದಾರಿಯೂ ಆಯಿತಿಂಬತ್. ಅವ ಪೊನ್ನಪ್ಪ ಕೇಟ ಬಟ್ಟು 1,500 ಬಟ್ಟಿ ಭೂಮಿನ ಕೊಡ್‌ತದೆ ಅಲ್ಲತೆ ಈ ಭೂಮಿನ ಸಾಗುವಳಿ ಮಾಡುವಕ್ ಪತ್ತ್ ಒಕ್ಕ ಜಮ್ಮಪೊಲೆಯಳ ಪಿಞ್ಣ ನೂರ್ ವರಹ ಕಂಠೀರಾಯ ಪಣತ್‌ನ ಸದ ಕೊಡ್‌ತತ್. ರಾಜನುಂಡ್ ಈ ಇನಾಂ ಪಡ್‌ಂದಪಿಞ್ಣ ಪೊನ್ನಪ್ಪ ತಾಂಡ ಪೊಣ್ಣ್, ಮಕ್ಕಡ ಕೂಡೆ ನಾಲಡಿಂಬ ಪೊರ್‌ಟಿತ್ ಕುಂಜಿಲಗೇರಿಕ್ ಬಾತ್.

ಕುಂಜಿಲಗೇರಿ ಮುಕ್ಕಾಟಿರ ಒಕ್ಕತರ ಭೂಮಿನ ಪಡ್‌ಂದಂಡ್ ಅಲ್ಲಿಯೆ ನೆಲೆ ಸಿಂದಪಿಞ್ಣ ಪೊನ್ನಪ್ಪಂಡ ಮನೆಕಾರಕ್ 'ಮುಕ್ಕಾಟಿರ' ಮನೆಕಾರ ಎಣ್ಣುವ ಪೆದ ಬಾತ್. ಆಚೇಂಗಿ, ಇಂದೇಕೂ ಅವು ಪಂಡ್ ಪರದಂಡ ಮನೆಕಾರ ಆಯಿತಿಂಬತ್ ಎಣ್ಣುವಾಂಗ್, ಕಾಲಕ್ ಒಮ್ಮ ನಡ್‌ಪ ಪುತ್ತರಿ ನಮ್ಮೆಲ್ ಪಾಡಿ ನಾಲ್ಕಡ್‌ಲ್ ಪರದಂಡ ಮನೆರ ಪೆದತ್‌ನ ಸುರೂಲ್ ತಂಗಡ ಪಾಟ್‌ಲ್ ಪಾಡಿತ್ ನಮ್ಮೆರ ಕೆಲಸ ಮಾಡುವ.

ದೊಡ್ಡವೀರಪ್ಪ ತಾಂಡ ಸೆರೆಯಾಳಾನ ಅಚ್ಚುನಾಯಕನ ಮಡಿಕೇರಿ ಜೈಲ್‌ಲ್ ಇಟ್ಟನ್ನಕೆ ಕಾಂಬ. ಇಂವ ಅಲ್ಲಿಯೆ ಚತ್ತ್ ಪೋಯಿತಿಕ್ಕು. ಇಂವಂಡ ಪೆರಿಯ ಮೋಂವ ಮಲಯಾಳಕ್ ಪೋಯಿತ್ ಮಂತ್ರ, ತಂತ್ರ ಪಡ್‌ಚತ್. ಅಕ್ಕತ ಕಾಲತ್ ಮಂತ್ರ, ತಂತ್ರ ಪಡ್‌ಚಯಿಂಗಕ್ ಬೋರೆ ಜನ ಬೊತ್ತುವ ಇಂಬತ್. ಇಂವ ಕೊಡಗ್‌ಕ್ ವಾಪಾಸ್ ಬಂದಪಿಞ್ಣ ಗೃಹಸ್ಥನಾಯಿತ್ ಇಕ್ಕತ ಅಜ್ಜಿಕುಟ್ಟಿರ ಒಕ್ಕತರ ಮೂಲಪುರುಷ ಆಚಿಂಡ್ ಆ ಒಕ್ಕಕಾರ ಎಣ್ಣುವ. ಇಂದೇಕೂ ಅಂವನ ಅಜ್ಜಿಕುಟ್ಟಿರ ಮನೆಕಾರ ತಂಗಡ ಕುಟುಂಬತರ ಕಾರಣ / ಮೂಲಪುರುಷಂದ್ ಪೂಜುವ.

ಪೊನ್ನಪ್ಪ ದಿವಾನಂಡ ಕುಟುಂಬಕಾರ 1930ನೆ ಇಸವಿಲ್ ಒಕ್ಕಚಿ ಕೂಟಿತ್ ತಯಾರ್ ಮಾಡ್‌ನ ಅಯಿಂಗಡ ವಂಶಾವಳಿ ಪಟ್ಟಿಲ್ ಖರ ಸಂವತ್ಸರತರ ಚೇಷ್ಟ ಮಾಸ ಶುದ್ಧ ದಶಮಿ ತಿಂಗಳಾಚೆ ಪೊಲಾಕ ಪತ್ತ್ ಗಂಟೆ ಎಣ್ಣಕ 5-3-1718ಲ್ ಕೊಡಗ್‌ರ ರಾಜ ದೊಡ್ಡವೀರಪ್ಪ ಒಡೆಯಂಡ ಕಾರ್ಯಕಾರ ಪೊನ್ನಪ್ಪಂಗ್ ಅಂಜಿಗೇರಿ ನಾಡ್‌ರ ಅಚ್ಚು ನಾಯಕನ ಸೆರೆ ಪುಡ್‌ಚಿತ್ ಅಂವನುಂಡ್ ಕಂದಾಯತ್‌ನ ವಸೂಲ್ ಮಾಡಿಯಂಡ್ ಬಪ್ಪನ್ನಕೆ ಅಪ್ಪಣೆ ಮಾಡಿತ್‌ಂದ್ ಎಳ್ವಿತ್.

ದಿವಾನ್ ಪೊನ್ನಪ್ಪ ಚತ್ತಪಿಞ್ಣ ಒಂದನೆ ಲಿಂಗರಾಜೇಂದ್ರ ಒಡೆಯಂಡ ಕಾಲತ್



ದಿವಾನ್ ಪೊನ್ನಪ್ಪಂಡ ಕಾರ್‌ಮಕ್ಕ ಕರುಂಬಯ್ಯ ಪಿಳ್ಳಾ ಮೇದಯ್ಯ ಲಿಂಗರಾಜಒಡೆಯಂಗ್ ಮಾಟ ಮಾಡ್‌ಚಿಂದ್ ಆ ರಾಜ ಇಯಂಗ್‌ಳ ಚಾವ್‌ಚಿಟ್ವಾರ್‌ತ್. ಅಕ್ಕ ರಾಜ, ದಿವಾನ್ ಪೊನ್ನಪ್ಪಂಡ ಪೆರಿಯ ಮೋಂವ ಅಣ್ಣಯ್ಯ ರಾಜದ್ರೋಹಿಂದ್ ಅಗ್ಗೇನ ಪಡುವಕ, ತಾನ್ ರಾಜದ್ರೋಹಿ ಅಲ್ಲಾಂದ್ ರಾಜಂಗ್ ಅರ್ಭ ಮಾಡಿಕೊಡ್‌ಪಕ್ ರಾಜಂಡ ಎದಿಕೆ ಇಂಜ ಕೊದಿಪ ನೆಯ್ಯರ ಪಾತ್ರೇಕ್ ಇಟ್ಟಿತ್, ರಾಜಂಡ ಮೊಯಿರತ್‌ನ ತಾಂಡ ಕೈಯಿಂಚೆ ಎಡ್‌ತ್ ಪ್ರಮಾಣ ಮಾಡ್‌ಚಿ ಎಣ್ಣುವ. ಅಕ್ಕ ರಾಜಂಗ್ ಅಂವಂಡ ಮೀದ ಇಂಜ ಅಗ್ಗೇನ ಪೋಯಿತ್ ಅಂವಂಗ್ ಭೂಮಿನ ಉಂಬಳಿ ಆಯಿತ್ ಕೊಡ್‌ತತ್‌ಂದ್ ಆ ಒಕ್ಕತರ ಕತಲ್ ಉಂಡ್.

ಕೊಡಿಲ್ ಎಣ್ಣಾನ ಮಂಡೆ ಕೆತ್ತ್‌ಚಿಟ್ಟ ಕರುಂಬಯ್ಯಂಡ ಮೋಂವ, ಕುಟ್ಟಿಪ್ಪಂಡ ಮಕ್ಕ, ಮೂಡಿಮಕ್ಕ ಅಕ್ಕವ್ವ ಪಿಳ್ಳಾ ಅಮ್ಮವ್ವನ ಒಂದನೆ ಲಿಂಗರಾಜೇಂದ್ರಂಡ ಮೋಂವ ದಂಡನೆ ಲಿಂಗರಾಜೇಂದ್ರ 1814ತ್ ತಾಂಡ ಅಂತಃಪುರಕ್ ಕೂಟಿಯಂಡ್ ಮಂಗಲ ಕೈಚಿಂದತ್‌ಂದ್ ಆ ಒಕ್ಕತರ ಪಂಶಾವಳಿ ಪಟ್ಟಿಲ್ ಉಂಡ್.

ಕೊಳ್ಳಕೊಂಗಿ ನಾಯಕಂಡ ಸಂತಾನ ಕಡಿಯತ್ತಾಡ್‌ರ ಇಕ್ಕತ ನಾಯಕಂಡ ಮನೆಕಾರ ಎಣ್ಣುವ. ನಾಯಕಂಡ ಸಂತಾನಕಾರ ಆನಾಂಗ್ ಇಯಂಗ್‌ಕ್ ನಾಯಕಂಡ ಪೆದ ಬಾತ್. ಅನ್ನನೆ ಬೆಪ್ಪುನಾಡ್‌ರ ಉತ್ತನಾಯಕಂಡ ಸಂತಾನಕಾರ ಅರಮೇರಿಲ್ ನಾಯಕಂಡ ಮನೆಕಾರ. ಈ ದಂಡ್ ಮನೆಕಾರಡ ಪೆದ ಒಂದೇ ಆನಕೋ ಇವು ಬೋರೆ ಬೋರೆ ಕುಟುಂಬಕಾರ.

## ದೊಡ್ಡವೀರಪ್ಪ ಒಡೆಯ ರಾಜ್ಯತ್‌ರ ತೆರಿನ ಭದ್ರ ಪಡ್‌ತನದ್ ಪಿಳ್ಳಾ ನಾಡ್‌ನ ಬೋರೆ ಮಾಡಿತ್ ದೇಶ ತಕ್ಕಂಡ ವ್ಯವಸ್ಥೆ ಮಾಡ್‌ನದ್

ಇಕ್ಕಾಕಣೆ ನಂಗ ದೊಡ್ಡವೀರಪ್ಪ ಒಡೆಯ ತಾಂಡ ರಾಜ್ಯತ್‌ರ ಪೂರ್‌ಮ ಪಿಳ್ಳಾ ಒಳ್‌ಲ್ ಇಂಜ ಶತ್ರುವಡ ಮೀದ ಪೋರಾಡ್‌ನಾನ ಓದಿತ್. ಈ ಶತ್ರುವಡ ಎಡೆಲೂ ದೊಡ್ಡವೀರಪ್ಪ ತಾಂಡ ರಾಜ್ಯತ್‌ರ ತೆರಿನ ಭದ್ರಪಡ್‌ತಿಯವಕ್ ಮರೊಂದ್‌ಲೆ. ಹಾಲೇರಿ

ರಾಜಂಗಡ ಆಡಳಿತಕ್ಕೆ ಮುಪ್ಪಡೆ, ಅಲ್ಲಿಂಜ ಚೆನ್ನಂಗ್ ಸಮಯ, ಕೊಡಗಲ್ ಅಲ್ಲಿ ನಾಯಕಂಗ ಇಂಜತ್. ಈ ನಾಯಕಂಗಡ ನಾಡ್‌ಕ್ ಪ್ರತಿಯೊಂದಾಂಗೂ ತೆರಿ ಆಯಿತ್ ಆಳವಾನ ಕಡಂಗ್ ಪಿಳ್ಳಾ ಅದೊಂಡ ದಂಡ್ ಬರಿಲೂ ಎತ್ತರತರ ದಣ್ಣೆ ಇಂಜತ್. ಈ ನಾಯಕಂಗಳ ನಾಶ ಮಾಡ್‌ನಪಿಳ್ಳಾ ದೊಡ್ಡವೀರಪ್ಪ ಕೊಡವ ಪಾಟ್‌ಲ್ ಎಣ್ಣೊನ್ನಕ್ಕೆ ನಾಡ್‌ನ ವಿಂಗಡಣೆ ಮಾಡಿತ್ ಅದೊಂಡ ತೆರಿಲ್ ಜನಸಂಚಾರಕ್ ಚೆನ್ನಂಗ್ ಜಾಗತ್ ಬಕ್ಕ ಪಡಿ ಎಣ್ಣೊಕ, ಕುಂಡ್ ಪಿಳ್ಳಾ ದಿಣ್ಣೆರ ನಡುಲ್ ಉಳ್ಳ ಅಗಲವಾನ ಚೆರಿಯ ಬಟ್ಟೆನ ಮಾಡ್‌ಚಿಟ್ಟಿತ್ ಅಲ್ಲಿ ಚಾವಡಿಕಾರಳ ಪಾರಕ್ ಆಕ್‌ಚಿ.

ಈ ನೇರತ್ ಕೊಡವ ಕ್ಕೊಟ್ಟ ನಾಡ್‌ಂಜ ತಾವುನಾಡ್‌ಕೆತ್ತನೆ ಇಂಜ ಸೀಮೆಲೂ, ಇಕ್ಕತ ಕುಯ್ಯಂಗೇರಿ ಮೂಂದ್‌ನಾಡ್‌ಲೂ ವಾಸ ಇಂಜತ್‌ಂದ್ ಕಾಂಬ. ಎನ್ನಂಗೇಣ್ಣ ಕ ಹಾಲೇರಿ ರಾಜಂಗಡ ಚರಿತ್ರೆಲ್ ಪೆದ ಉಳ್ಳ ಪಿಳ್ಳಾ ಇಕ್ಕಾಕಣೆ ಎಳ್ಳೆಕಾರಂಗ್ ಕೊಟ್ಟನ ಒಕ್ಕದ ಕತೆಲ್ ಎಣ್ಣೊನ ಕೊಡವ ಒಕ್ಕ ಎಲ್ಲ ಕೊಡಿಯತ ನಾಡ್‌ಕ್ ಸಮ್ಪಂಧಪಟ್ಟದೆ ಆಯಿತುಂಡ್. ಇದೊಂಗ್ ಸಮರ್ಥನೆ ಆಯಿತ್ ರಾಜಂಡ ಕಾಲತ್ ಎಣ್ಣೊಕ ದೊಡ್ಡವೀರಪ್ಪಂಡ ಕಾಲತ್ ಕೊಡವದ ಆಚಾರ ವಿಚಾರ, ಜಾತಿ ಪದ್ಧತಿರ ವಿಚಾರಕ್ ರಾಜಂಗಳುಂಡೆ ನೇಮಕ ಆನ ತಕ್ಕಂಗ ಎಣ್ಣೊವ ಗೌರವ ಪಡೊಂದವು ಕ್ಕೊಟ್ಟ ನಾಡ್‌ಂಜ ನಾಲ್‌ನಾಡ್, ತಾವುನಾಡ್‌ಕಾರಳ ಆಯಿತಿಂಜತ್. ಸುರೂಲ್ 28 ನಾಡ್ ಮಾಡಿತ್ ತಕ್ಕಂಗಳ ನೇಮಕ ಮಾಡ್‌ನನ್ನಕ್ಕೆ ತೋಂದುವ. ಬಯ್ಯ ಈ 28 ನಾಡ್‌ಕ್ ತಕ್ಕ ಮಡಿಕೇರಿಂಜ ಉತ್ತರತರ ಸೂರ್ಲಬ್ಬಿ, ಏಳ್ ನಾಡ್‌ನ ಕೊಟ್‌ನನ್ನಕ್ಕೆ ಕಾಂಬ. ಈ ಏಳ್‌ನಾಡ್‌ಲ್ ಸುರೂಲ್ ಕೊಡವ ಇಂಜಾಲೆ ಎಣ್ಣೊವಾಂಗ್ ಆ ನಾಡ್‌ಕ್ ತಕ್ಕಂಗಳ ನೇಮಕ ಮಾಡಿತಿಂಜಾಲೆ ಎಣ್ಣೊವ ಸಮರ್ಥನೆ ತಪ್ಪ. ನಾನ್ ಎಣ್ಣೊಯಂದುಳ್ಳ ವಿಷಯ ಈ ಕೇದತ ನಾಡ್‌ಕೆಟ್ಟ ಪಾಟ್‌ನುಂಡ್ ಗೊತ್ತಾಪ.



## ದೇಶ ಕೆಟ್ಟ ಪಾಟ್

ಬಾಳೋ ಬಾಳೋ ನಂಗಡ  
 ದೇವ ಬಾಳೋ ಮಾದೇವ  
 ಪಟ್ಟಿ ಬಾಳೋ ಸೂರಿಯ  
 ಕೂಡೆ ಬಾಳೋ ಚಣ್ಣೂರ  
 ಭೂಮಿ ಬಾಳೋ ಜಬ್ಬೂಮಿ  
 ಈ ಭೂಮಿರ ಮೀದಲ್  
 ಚಪ್ಪನಾರ್ ದೇಶಕ್  
 ಏದ್ ದೇಶ ಚೊಲ್ಲಳ್ಳ  
 ಪಾಡಿ ನೋಟಿ ಕಾಂಬಕ  
 ಪೊಮ್ಮಾಲೆ ಕೊಡವಾಪ  
 ಪೊಮ್ಮಾಲೆ ಕೊಡವುಲ್  
 ಎಚ್ಚಕುಳ್ಳ ಕೊಂಬಾಪ  
 ಎನ್ನತಾಂಡ ಕೊಂಬಾಪ  
 ಕೈ ಬೈರಿ ಕೊಂಬಲ್ಲ  
 ಪಾಪಲಚಿ ಕೊಂಬಲ್ಲ  
 ಕೆಂಗಡಮ ಕೊಂಬಲ್ಲ  
 ಪೆಗ್ಗಾಟಿರ ಕೊಂಬಲ್ಲ  
 ಅಂದ್ ಬಾವೊಡವೊಂಡ  
 ಪಲ್ಲಕ್ಕಿರ ಕೊಂಬಲ್ಲ  
 ಪಾಲೇರಿ ಒಡೆಯಂಡ  
 ಕಚ್ಚಿ ಕೊಂಬ್ ನಲ್ಲಾಲ್  
 ಕೊಡುಮಲೆಕ್ಕೊರ್ ತೊರ  
 ಜಾಮಕೊಂಬುರ್ಪಾನ್



ಎನ್ನನೆಂದ್ ಅರಿವಿರಾ  
 ಪಾಲೇರಿ ಒಡೆಯಂಡ  
 ಪೊಂದೇವಡಿ ಪಟ್ಟಿಲ್  
 ಪೊಂಬೋಲೆ ಪೊಲುವಕ  
 ಪಾಲೇರಿ ಒಡೆಯಂಡ  
 ಕಚ್ಚಿಕೊಂಬ್ ನಲ್ಲಾನ  
 ಪಾಂಗರ್ಂಜಿ ಪುಡ್ಚಿತ್  
 ಧಮ್ ಕೆಟ್ಟಿ ಉರ್ಪ್ಪನ  
 ಕೊಂಬ್ಕೂತ್ ಕೇಟಲ್ಲಿ  
 ಕೊಂಬ್ಡಣ್ಣ ಒಂದಾಚಿ  
 ಅಲ್ಲಿ ಪೋಯಿ ನಿಂದಿತ್  
 ಜಾಮಕೊಂಬ್ ಉರ್ಪ್ಪಣೆ  
 ಕೊಂಬ್ಡಣ್ಣ ದಂಡಾಚಿ  
 ಅನ್ನಪೋಲೆ ನೋಟುವಕ  
 ಪೊಮ್ಮಾಲೆ ಕೊಡವಡ  
 ಪನ್ನೆರಂಡ್ ಕೊಂಬಾಚಿ.  
 ಪೊಮ್ಮಾಲೆ ಕೊಡವುಲ್  
 ಎಚ್ಚಕುಳ್ಳ ನಾಡಾಪ  
 ನುಪ್ಪತ್ತಂಜಿ ನಾಡ್ಂದ್  
 ಎನ್ನನೆ ಪವುತದೊ  
 ಅಲ್ಲತೊಂದೂ ಅಲ್ಲಲಾ  
 ಮೂಲಕನ್ನಿ ಕಾವೇರಿ  
 ಕಾವೇರಮ್ಮ ತಾಯಿರ  
 ನೀಲಕೊಡಿ ತೇರ್ತ  
 ಮಮ್ಮಾಯತ್ ಪುಟ್ಟಿತ್



ಕೇಕ್ ಬುದ್ಧಿ ತೊಕ್ಕಿತ್  
 ಕೊಡಗ್ಗನ ಪವುತತ್  
 ಚೋರಂಗಿ ಮುರ್ಚಿತ್  
 ಕೀತ್ ದಂಡ್ ಬಿಜ್ಜೋಲೆ  
 ಸೀಮೆನ ಪವುತತ್  
 ಕಾವೇರಿ ಕೊಂಡಾಕರೆ  
 ಕಾರೋಟ್ ನೆಡಿಪೋಲೆ  
 ಗುದ್ದನ ಕಲಪೋಲೆ  
 ಗುದ್ದ ಗುದ್ದ ನಾಡೋನ್  
 ಕೆಂಗಳಮೆ ಕ್ಗಟ್ತ್  
 ಕ್ಗಟ್ತ್ ಪದಿನಾಲ್  
 ಕಾವೇರಿ ಕೊಂಡೀಕರೆ  
 ಬೊಳ್ಳೋಟೆ ನೆಡಿಪೋಲೆ  
 ಪಾಬೊಳಿಯ ಮೇಂದಲೆ  
 ಮೇಂದಲೆ ಪದಿನಾಲ್  
 ದಂಡ್ ನಾಡ್ ಕೂಡಣೆ  
 ನಾಡಿರುವತ್ತೆಟ್ಟಾನ  
 ನುಪ್ಪತ್ತಂಜಿ ನಾಡ್ಕ್  
 ನಾಡ್ ಪೋರಾಂದೆಣ್ಣಿತ್  
 ಪಟ್ಟಿಪೊಳಿಕಾವೋರ  
 ಅಣ್ಣೆ ಪೊಳಿಕೀವೋರ  
 ಏಳುನಾಡ್ ಸೂರ್ಲಬ್ಬಿ  
 ಮೂಂದ್ನಾಡ್ ಕೂಡಣೆ  
 ನುಪ್ಪತ್ತಂಜಿ ನಾಡಾಚಿ.  
 ನುಪ್ಪತ್ತಂಜಿ ನಾಡ್ಕ್

ಸೀಮೆ ತಕ್ಕಂಗೆಚ್ಚಕ್  
 ಒಕ್ಕಡ ಪೆದಲೆನ್ನ  
 ಕೇಳಿ ಕೇಳಿ ಬೆಂದುವೆ  
 ನೇರ ಬಂದುದಿಪಲ್ಲಿ  
 ಕೆಂಗಳಮೆ ಕ್ಕೊಟ್ಟ  
 ತಾಳೆ ಪೂ ತಾಳೇರಿ  
 ಆ ನಾಡ್ ನಡುವುಲ್  
 ಕಾಜುಮಾಲೆ ಕಳ್ಳೆಯು  
 ಬೀರಕಟ್ಟೆ ಬೊಳ್ಳೆಯು  
 ಚೋಡೆರಂಡ್ ತಕ್ಕಂಗ  
 ನೇರ ಮಜ್ಜಣಾಪಲ್ಲಿ  
 ಆನೆ ಬೆಪ್ಪುನಾಡಲ್  
 ಮಾತನು ಬುಡುವನು  
 ಚೋಡೆರಂಡ್ ತಕ್ಕಂಗ  
 ನೇರ ಒಯಿಪತಾಪಲ್ಲಿ  
 ನಾಲಾಯಿರ ನಾಡಲ್  
 ಪಾಡಿಯು ಪರದನು  
 ಚೋಡೆರಂಡ್ ತಕ್ಕಂಗ  
 ನೇರ ಪೋಯಿತಾವಲ್ಲಿ  
 ಉದ್ದಕ್ಕೋಡೆ ತಾವುಲ್  
 ಪೋರೆಯು ಪರುವನು  
 ಚೋಡೆರಂಡ್ ತಕ್ಕಂಗ  
 ಸೀಮೆತಕ್ಕಂಗೆಟ್ಟಾಚಿ  
 ನುಪ್ಪತ್ತಂಜಿ ನಾಡಲ್  
 ಕೂಟ್ ಇಾಯ ತೇಪಕ್



ಎಚ್ಚಕುಳ್ಳ ಪಟ್ಟಿಯಾಪ  
 ಚೆಂಡೋಲೆ ಕಡಿಯೋಂಡ  
 ಪೊಂಬಾವಲಿಪಟ್ಟೊಂದ್  
 ಕುಯ್ಯಂಗೇರಿ ನಾಡೊಂಡ  
 ಕಟ್ಟುರುಪ್ ಕಾರುಂದ  
 ಕಾರುಂದತ್ ಪಟ್ಟೊಂದ್  
 ಉದ್ದಕೊಡೆ ತಾವುಲ್  
 ಪಚ್ಚೆ ಕೊಡೆ ಪಾಂಡತ್  
 ಪಾಂಡತುಳ್ಳ ಪಟ್ಟೊಂದ್  
 ಈನಗುಂಡ್ ಪೋರಾಂದ್  
 ಉಕ್ಕಂಬ್ ಮಡಿಕೇರಿ  
 ಅಂದ್ ಬಾವೊಡೆವೋಂಡ  
 ಪೊಂದೇವಡಿ ಪಟ್ಟೊಂದ್  
 ನುಪ್ಪತ್ತಂಜಿ ನಾಡ್‌ಲ್  
 ನಾಲ್ ಪಟ್ಟಿಡಾಚೀಲಾ  
 ನುಪ್ಪತ್ತಂಜಿ ನಾಡ್‌ಲ್  
 ತಕ್ಕ ಪೋಯಳ್‌ಪಕ್  
 ನುಪ್ಪತ್ತಂಜಿ ಅಂಬಾಲ  
 ದೇಬುವ ಕುಳಿಪಕ್  
 ನುಪ್ಪತ್ತಂಜಿ ಪಾಕೆರೆ  
 ಚಿಕ್ಕಿ ಬಂದ ಚೋಮಂಗ್  
 ನೀಕುಡಿ ಕುಡಿಪಕ್  
 ನುಪ್ಪತ್ತಂಜಿ ನೀಕೆರೆ  
 ನಾಡ್‌ಕೋರ್ ಮಾದೇವ  
 ಊರ್‌ಕೋರ್ ಪೊವ್ವದಿ

ಕೇರಿಕೋರ್ ಅಯ್ಯಪ್ಪ  
ಒಣಿಕೋರ್ ನಾಥನ್  
ಒಕ್ಕೋರ್ ಪೂದನ್  
ಅನ್ನತ ಸಲೆಯಾಪ  
ಎಂದೆಣ್ಣಿತ್ ಮಾಡುವ  
ಈ ಪಾಟ್‌ನ ಬೆಪ್ಪಿನ್  
ಬೆಪ್ಪಕೊಮ್ಮಡ್‌ಪಕ  
ಆದಿಮೂಲ ಲೆಲ್ಲೇಲೋ.

'ದೇಶಕಟ್ಟಾ' ಪಾಟ್‌ನುಂಡ್ ಕೊಡಗಲ್ 12 ಕೊಂಬರ ಜಾಗ, 35 ನಾಡ್, ಸೀಮೆತಕ್ಕ / ದೇಶ ತಕ್ಕಂಗಡ ಸ್ಥಾನ ಎನ್ನನೆ ಸುರುವಾಚಿಂದ್ ಗೊತ್ತಾಪ. ಇಚ್ಚಕೆ ಅಲ್ಲತ ಜನ ಕೂಡುವ ಇಂಜ ಬಲ್ಯ ಪರಂಬ್, ತಕ್ಕಂಗ ಕೂಡುವ ಅಂಬಲ, ಊರರ ಕೆರೆ, ದೇವ ದೈವ ನೆಲೆ ಎನ್ನನೆ ಸುರುವಾಚಿ ಎಣ್ಣುವದೂ ಗೊತ್ತಾಕಟ್ಟುವ.

ಏದ್ ದೇಶ ಹೊಗಳುವನ್ನಕೆ ಉಂಡ್ ಎಣ್ಣಕ ಅದ್ ಪೊನ್ನರ ಮಾಲೆರನ್ನಕೆ ಉಳ್ಳ ಕೊಡಗ್ ಆಯಿತುಂಡ್. ಈ ದೇಶತ್ 12 ಕೊಂಬು, (ಕೊಂಬರ ಕೂತಳಾತರ ಜಾಗ) ಎನ್ನನೆ ಆಚೀಂದ್ ಎಣ್ಣಕ... ಹಾಲೇರಿ ಒಡೆಯಂಡ ಪೊನ್ನರನ್ನಕೆ ಚಾಯಿ ಇಂಜ ಎದಿಕೆ ಪಟ್ಟಿಲ್ ಪೊಲಾಕ ನೇರತ ಕಚ್ಚಿರ ಕೊಂಬುನ ಜೋರಾತೆ ಉರ್‌ಪುವಕ ಆ ಸೊರ ಎಲ್ಲಿಕೆತ್ತನೆ ಎತ್ತಾಚೊ ಆ ಸೀಮೆ ಎಲ್ಲ ಓರ್ ಕೊಂಬು ಆಚಿ. ಅಲ್ಲಿ ಕೊಂಬು ಉರ್‌ಪಿತ್ ಆ ಸೊರ ಮಿಳ್ಳಾಕ್ ಎಲ್ಲಿ ನಿಂದತೋ ಅದ್ ಇಣ್ಣೋರ್ ಕೊಂಬು. ಇನ್ನನೆ ಅಕ್ಕತ ಕೊಡಗ್ ದೇಶತ್ 12 ಕೊಂಬು ಆಚಿ.

ಅಲ್ಲಿಂಜ ಕಾವೇರಿ ಪೊಳೆ ಕೊಡಗರ ನಡುಕಾಲೆ ಒಕ್ಕುವಾನ ಕಂಡಿತ್ ಕಾವೇರಿ ಪೊಳೆರ ಎಡ್‌ತೆ ಬರಿ/ಉತ್ತರ ಭಾಗತ್‌ನ ಕ್ಕಟ್ಟ್ ಪಿಳ್ಳಾ ಮೇಂದಲೆ ಎಣ್ಣುವ ದಂಡ್ ಭಾಗ ಮಾಡ್‌ಚಿ. ಕ್ಕಟ್ಟ್ ನಾಡಲ್ 14 ನಾಡ್, ಮೇಂದಲೆ ನಾಡಲ್ 14 ನಾಡ್ ಮಾಡ್‌ಚಿ. ಅಲ್ಲಿಂಜ ಈ 28 ನಾಡ್ ಪೋರಾಂದ್ ಕಾವೇರಿ ಪೊಳೆಂಜ ಸುವಾರ್ ಸೋಮವಾರಪೇಟೆಕೆತ್ತನೆ 7 ನಾಡ್ ಮಾಡ್‌ಚಿ. ಕೊಡಿಯತ ದೇಶಕಟ್ಟಾ ಪಾಟ್‌ಲ್ ಪಟ್ಟಿ ಪೊಳೆಂಜ ಅಣ್ಣೆ ಪೊಳೆ (ಹೇಮಾವತಿ)ಕೆತ್ತನೆ 7 ನಾಡ್‌ಂದ್ ಎಣ್ಣಾನಕೊ ಆ ಹೇಳಿಕೆ ಚರಿತ್ರೆಕ್ ಸರಿಯಾಪುಲೆ. ಮೇಂದಲೆನಾಡ್ ಕಾವೇರಿ ಪೊಳೆರ ಬಲಾತೆಬರಿಕ್ ಪಬ್ಬುಲೆ

ಪಿಳ್ಳಾ ಸೋಮವಾರ ಪೇಟೆಂಜ ಉತ್ತರತರ ಜಾಗ ಈ ನಾಡ್ ಪಾಲಾಡುವ ನೇರತ್/ ಬಯ್ಯ ದೊಡ್ಡವೀರಪ್ಪಂಡ ಪುಡಾತಕ್ ಬೇಲೂರ್ ನಾಯಕಂಗಳುಂಡ್ ಬಂದದ್. ಕ್ಕಗ್ಗಟ್ಟಾನಾಡ್ಂಜ ಸುರುವಾಯಿತ್ ತಾವುನಾಡ್ಕೆತ್ತನೆ ಸೀಮೆತಕ್ಕಂಗ ಈ ಪೋಲೆ ನೇಮಕ ಆಚಿ.

ಸೂರ್ಯ ಉದಿಪಲ್ಲಿಂಜ ಎಣ್ಣಕ ಕೊಡಗುರ ಪೂರ್ವ ಭಾಗವಾನ ಚೋಂದ ನೆಲ್ಲ್ ಬೊಳ್ತುವ ಕ್ಕಗ್ಗಟ್ಟಾನಾಡ್ಲ ಬೊಳ್ಳೆರ ಮನೆಕಾರ, ಮಜ್ಜಣ ಆಪಕ ಎಣ್ಣಕ ಬೊಳ್ತ ನೆಲ್ಲ್ ಬೊಳ್ತುವ ಆನೆಬೆಪ್ಪುನಾಡ್ಲ ಮಾತಂಡ ಮನೆಕಾರ, ಬುಡುವಂಡ ಮನೆಕಾರ, ಒಯಿಪತ್ ಎಣ್ಣಕ ನಾಲ್ನಾಡ್ಲ ಪಾಂಡಿರ ಮನೆಕಾರ, ಪರದಂಡ ಮನೆಕಾರ, ನೇರ ತಾವಕ ಎಣ್ಣಕ ಪಡಿಗಾರ್ಲ ತಾವುನಾಡ್ಲ ಪೋರೆಯಂಡ ಮನೆಕಾರ, ಪರುವಂಡ ಮನೆಕಾರ ...ಇನ್ನನೆ 8 ಸೀಮೆತಕ್ಕಂಗ 35 ನಾಡ್ಲ ನ್ಯಾಯ ತೇಪಕ್ ನೇಮಕ ಆಚಿ. ಅಕ್ಕ ನ್ಯಾಯ ತೇಪಕ್ ನಾಲ್ ಮುಖ್ಯಪಟ್ಟ ಜಾಗ.

ಪ್ರತಿಯೋರ್ ನಾಡ್ಲ ಜನಬಂದಿತ್ ಕೊಡುವ ಅಂಬಲತರ ವ್ಯವಸ್ಥೆ ಇಂಜತ್. ಇನ್ನನೆ ಈ ನಾಡ್ಲ 'ದೇವ ಕುಳಿಪಕ್' ಎಣ್ಣಕ ನಮ್ಮೆರ ನೇರತ್ ದೇವಡ ವಿಗ್ರಹತ್ನ ಪೊರ್ತವು ಕುಳಿಪಕ್ ಪಿಳ್ಳಾ ಕೆಲಸ ಮಾಡಿತ್ ಚೋತಿತ್ ಬಂದ ಅತ್ತಕ್ ನೀರ್ ಕುಡಿಪಕ್ ನಾಲ್ ಕೆರೆ ಪಿಳ್ಳಾ ನೀರ್ ಕೆರೆ ಇಂಜತ್. ಈ ನೇರತ್ ನಾಡ್ಕೋರ್ ಮಾದೇವಡ (ಈಶ್ವರ) ತಿರಿಕೆ, ಊರ್ಕೋರ್ ಪೊವ್ವದಿ (ಭಗವತಿ) ದೇವಿರ ಸ್ಥಾನ, ಕೇರಿಕೋರ್ (ಊರ್ಕರ ಒಳ್ಳಲ್) ಅಯ್ಯಪ್ಪದೇವಡ ತಿರಿಕೆ, ಓಣಿಕೋರ್ ನಾಥ (ಚೆರಿಯ ದೇವತೆರ ಸ್ಥಾನ) ಒಕ್ಕಕೋರ್ ಭೂತಂಡ ಸ್ಥಾನತರ ವ್ಯವಸ್ಥೆ ಇಂಜತ್.

ಈ ಪಾಟಾನುಂಡ್ ಕೊಡವಡ ಸಂಸ್ಕೃತಿ, ಆಚಾರ ವಿಚಾರ, ದೇವ-ದೈವತರ ವ್ಯವಸ್ಥೆ ಹಾಲೇರಿ ರಾಜಂಗಡ ಸುರೂವೆತ ನಾಲ್ ರಾಜಂಗಡ ಕಾಲತ್ಂದ್ ಗೊತ್ತಾಪ. ಕೊಡವಕ್ ಮಲಬಾರ್ ವ್ಯವಹಾರ ಏರ ಇಂಜಾನುಂಡ್ ಅಲ್ಲಿಯತ ದೇವ-ದೈವಳ ಕೊಡಗುಕ್ ಕೊಂಡಬಂದಿತ್ ಪೂಜೆ ಮಾಡುವಕ್ ಕೊಡ್ಚೆಂದ್ ಗೊತ್ತ್ಕೊಟ್ಟುವ. ಈ ದೇವ ಕಾವೇರಿ ಪೊಳೆರ ಎಡ್ತೆಬರಿಯ ನಾಡ್ಲ ಮಾತ್ರ ಇಂಜಿತ್ ನಾಡ್ತಕ್ಕಂಗ ಆ ನಾಡ್ಕಾರಳೆ ಆನಗುಂಡ್ ಅಕ್ಕ ಕೊಡವ ಕಾವೇರಿ ಪೊಳೆರ ಎಡ್ತೆ ಬರಿಯತ 28 ನಾಡ್ಲ ಮಾತ್ರ ಇಂಜತ್ಂದ್ ತೋಂದುವ. ಮಿಳ್ಳಾಕ್ ಕೊಡವ ಬಾಕಿ ಇಂಜ ಏಳ್ನಾಡ್ಲ ನೆಲೆನಿಕ್ಕೊಂದ್ ಸೀಮೆತಕ್ಕಂಗಡ ಅಧಿಕಾರತ್ನ ಬಾಕಿ ಏಳ್ನಾಡ್ಲಕ್ ವಿಸ್ತಾರ ಮಾಡಿತಿಂಜತ್. ಮಾದೇವ, ಪೊವ್ವದಿ, ನಾಥ ಪಿಳ್ಳಾ ಪೂದ ಎಣ್ಣುವ ಪೆದ ಉ.ಕೊಡಗುಲ್ ಬಳಕೆ ಇಲ್ಲತ ಶಬ್ದ ಆಯಿತುಂಡ್.

ದೇಶ ಕೆಟ್ಟ ಪಾಟ್‌ಲ್ ಎಣ್ಣೆನ ಎಟ್ಟ್ ಸೀಮೆತಕ್ಕ / ದೇಶ ತಕ್ಕಂಗಡ ಒಕ್ಕಕಾರಡಾತ್  
ಇಕ್ಕ ಬೆಪ್ಪುನಾಡ್‌ರ ಬುಡುವಂಡ ಒಕ್ಕಕಾರ ನಿರ್ವಂಶ ಆನನ್ನಕೆ ತೋಂದುವ. ಇಯಂಗಡ  
ಭೂಮಿಲ್ ಕಂಡ್ರತಂಡ ಒಕ್ಕಕಾರ ನೆಲೆ ನಿಂದತ್. ಬುಡುವಂಡ ಮನೆಲ್ ಬಾಕಿ ಇಂಜ  
ಒಬ್ಬ ಕಂಡ್ರತಂಡ ಒಕ್ಕತಾರ ಮೂಲ ಪುರುಷ ಎಣ್ಣುವ ಹೇಳಿಕೆ ಉಂಡ್.

ಸೀಮೆತಕ್ಕಂಗಕ್ ಆ ಕಾಲತ್ ಆಚಾರ ವಿಚಾರತ್ ತಪ್ಪನ ತಂಗಡ ನಾಡ್‌ರ ಕೊಡವಕ್  
ಶಿಕ್ಷೆ ಕೊಡ್‌ಪ ಅಧಿಕಾರ ಇಂಜತ್ ಕಾಂಬ. ಒಮ್ಮೆತೆ ಬುಡುವಂಡ ದೇಶತಕ್ಕಂಗೂ,  
ಬಾಚಿರ ಮನೆಕಾರಂಗೂ ಏದೋ ವಿಷಯಕ್ ಚರ್ಚೆ ಆಯಿತ್, ಆ ದೇಶತಕ್ಕ ಅರಮೇರಿ  
ನಾಡ್‌ರ ತಿರಿಕೆರ ಪೂರಾಮೆ ಬಾಚಿರ ಮನೆಕಾರಂಡ ಮಂಡೆನ ಕೆತ್ತಿರ್‌ತ್. ಆಚೇಂಗಿ, ಬಯ್ಯ  
ದೇಶತಕ್ಕ ತಾನ್ ಚೆಡಿಲ್ ದುಡ್‌ಕಿತ್ ಮಾಡ್‌ನ ಕೆಲಸಕ್ ಬೇಜಾರ ಪಟ್ಟಿತ್ ಚತ್ತವಂಡ  
ಗೇನತ್ ತಿರಿಕೆರ ಪೂರಾಮೆ ಉತ್ತರ ಬರಿಕ್ ಓರ್ ಕೈಮಡ ಕೆಟ್ಟಾಚಿಡುವಕ್ ಜಾಗ  
ಕೊಡ್‌ತತ್. ಆ ಜಾಗತ್ ಕೆಟ್ಟನ ಕೈಮಡ ಕಾಲ ಕೈಂಜನ್ನಕೆ ಪಾಳ್‌ಬುದ್ಧಿತ್ ನೆಲ ಸಮ  
ಆಚಿ. ಆಚೇಂಗಿ, ಅದ್‌ಂಡ ಕೆಂಪ ಪಿಳ್ಳಾ ಕಲ್ಲ ತಿರಿಕೆರ ಉತ್ತರ ಬರಿಲ್ ಇಕ್ಕಲೂ  
ಕಾಂಬಕೊಟ್ಟುವ.

## ದೊಡ್ಡವೀರಪ್ಪ ಒಡೆಯ ಬೇಲೂರ್ ನಾಯಕಂಡ ಏಳಾಯಿರ ಸೀಮೆ ಪಿಳ್ಳಾ ಬೋರೆ ಮೂಂದ್ ಊರ್‌ನ ತಾಂಡ ಪುಡ್‌ತಕ್ ಎಡ್‌ತಂಡದ್

ದೊಡ್ಡವೀರಪ್ಪ ಒಡೆಯ ಕೊಡಗ್‌ನ ಆಳಿಯಂಡ್ ಇಂಜ ನೇರತ್ ಮೈಸೂರ್ ದೊರೆ  
ಚಿಕ್ಕದೇವರಾಜ ಒಡೆಯ ಬೇಲೂರ್ ನಾಯಕಂಗಡ ಸೀಮೆನ ಗಲ್ಲೊಂಡೂಂದ್ ಆ  
ಸೀಮೆಕ್ ತಾಂಡ ಬಲ್ಯ ಸೈನ್ಯತ್‌ರ ಕೂಡೆ ಪೋಚಿ. ಈ ಸುದ್ದಿನ ಕೇಟ ದೊಡ್ಡವೀರಪ್ಪ  
ಸಹ ತಾಂಡ ರಾಜ್ಯತ್‌ರ ಉತ್ತರ ಪಿಳ್ಳಾ ಈಶಾನ್ಯ ತೆರಿರ ಆ ಬರಿಲಿಂಜ ಬೇಲೂರ್  
ನಾಯಕಂಡ ಸೀಮೆರ ಚೆನ್ನಂಗ್ ಜಾಗತ್‌ನ ತಾಂಡ ಪುಡತಕ್ ಎಡ್‌ತವ ಮನಸ್ಸು ಮಾಡಿತ್  
ತಾಂಡ ಸೈನ್ಯತ್‌ನ ಅಯೆಚತ್. ಈ ಸೈನ್ಯ ಅಕ್ಕ ದೊಡ್ಡವೀರಪ್ಪಂಡ ರಾಜ್ಯತ್‌ರ ತೆರಿಕ್  
ಮುಟ್ಟಿತಿಂಜ ಬೇಲೂರ್ ನಾಯಕಂಡ ಏಳಾಯಿರ ಸೀಮೆ (ಇಕ್ಕತ ಶನಿವಾರಸಂತೆ) ಪಿಳ್ಳಾ  
ಅದ್‌ಂಗ್ ಮುಟ್ಟಿತಿಂಜ ಮಲ್ಲಿಪಟ್ಟಣ, ಬೆಮ್ಮತ್ತಿ ಪಿಳ್ಳಾ ಹೊಸೂರ್ ಎಣ್ಣುವ ಮೂಂದ್  
ಊರ್‌ನ ಗೆದ್ದಂಡ್ ಕೊಡಗ್ ಸೀಮೆಕ್ ಕೂಟಾಚಿ. ಬೇಲೂರ್ ನಾಯಕಂಡ ಕೊಡಗ್‌ರ

ಸೀಮೆರ ಉತ್ತರ ಭಾಗತನ ಚಿಕ್ಕದೇವರಾಯ ಪುಡ್ತಕ್ ಎಡ್ತಂಡ್ ತಾಂಡ ರಾಜ್ಯಕ್ ಕೂಟಿಯಂಡತ್. ಬೇಲೂರ್ ನಾಯಕಂಗ ಅಕ್ಕ ಕಾಡ್ ಜಾಗ ಆಯಿತಿಂಜ ಐಗೂರ್ನ ಕೂಟಿತ್ ಭದ್ರಪಡ್ತಿಯಂಡ್ ಅಲ್ಲಿಯೆ ಇಂಜತ್.

ದೊಡ್ಡವೀರಪ್ಪ ಏಳಾಯಿರ ಸೀಮೆನ ಎಡ್ತಂಡ್ ಚೆನ್ನಂಗ್ ದಿನ ಕೈಂಜಪಿಳ್ಳಾ ಮೈಸೂರ್ ರಾಜಂಗೂ ಏಳಾಯಿರ ಸೀಮೆರ ಒಡೆತನಕಾಯಿತ್ ಜಗಳ ಆಚಿ. ಈ ಜಗಳತನ ರಾಜಂಗಡ ಕಾಲತರ ತಕ್ಕಾಲೆ ನೋಟೊಲು.

"ಬೇಲೂರ್ ಸಂಸ್ಥಾನ ನಂಗ ಕೆಟ್ಟಿಯಂಡದ್. ಅದ್‌ಂಗ್ ಕೂಡ್‌ನ ಏಳಾಯಿರ ಸೀಮೆ ನಂಗಕೆ ಕೂಡುವಾಂದ್ ನಿಂಗ ಎನ್ನನೆ ಕೆಟ್ಟಿಯಂಡಿರ, ಬುಟ್ಟಿ ತಾರಿ"ಂದ್ ದೊಡ್ಡವೀರಪ್ಪ ರಾಜ ಕೇಟಾಂಗ್ ಇಯಂಗಡ ಜವಾಬ್.

"ಬೇಲೂರ್ ಸಂಸ್ಥಾನ ಪ್ರತ್ಯೇಕ ವೆಂಕಟಾದ್ರಿ ನಾಯಕಂಗ ಆಳಿಯಂಡ್ ಇಂಜದೆ ಅಲ್ಲತೆ ಮೈಸೂರ್ ಸ್ಥಾನಕೂ, ಕೊಡಗುರ ಸಂಸ್ಥಾನಕೂ ಸೇರ್‌ನದಲ್ಲ. ನಿಂಗ ಬೇಲೂರ್‌ಕಾರಡ ಮೀದ ಜಗಳ ಮಾಡಿತ್ ಆ ರಾಜ್ಯತನ ಕೆಟ್ಟಿಯಂಡಿರ. ನಿಂಗಡನ್ನಕೆ ನಂಗ ಜಗಳ ಮಾಡಿತ್ ಏಳಾಯಿರ ಸೀಮೆನ ಬುಡುಲೆ"ಂದ್ ಎಣ್ಣುವಕ, ಆ ಮೈಸೂರ್‌ಕಾರಕೂ, ಇಲ್ಲಿಯತ ದೊರೆಯಕೂ ಜಗಳ ಆಯಿತ್ ಮೈಸೂರ್‌ಕಾರ ಸದರಿ ಸೀಮೆರ ಒಳ್‌ಕ್ ಬಂದಲ್ಲಿ ಅಲ್ಲಿ ಒಳ್‌ಕ್ ನುಗ್ಗುವಕ್ ಬುಡತೆ ಪೂಜ್ಜತ್.

ಅಕ್ಕ ಅವು ಒಳ್‌ಕ್ ನುಗ್ಗುವಕ್ ಕಯ್ಯತೆ ಅದ್‌ನ ಬುಟ್ಟಿತ್ ಆ ಸೀಮೆಕ್ ಸೇರ್‌ನ ಮಲ್ಲಿಪಟ್ಟಣ, ಬೆಮ್ಮತ್ತಿ, ಹೊಸೂರ್ ಈ ಮೂಂದ್ ಊರ್‌ನ ತಂಗಡ ಬರಿಕ್ ಮಾಡಿಯಂಡ್ ಅಲ್ಲಿ ಲಕ್ಕಡಿ ಕೋಟೆ ಕೆಟ್ಟಿಯಂಡ್ ಇಂಜತ್. ಮೈಸೂರ್‌ಕಾರ ಪೋನಲ್ಲಿ ಕೊಡಗುರ ಜನ ಪೋಯಿತ್ ರೈತಗಳ ನಿಪ್ಪಕ್ ಬುಡತೆ ಲೂಟಿ ಮಾಡಿತ್ ಇಂಜಲ್ಲಿ ದೊಡ್ಡವೀರಪ್ಪ ಒಡೆಯಂಗ್ ಚಿಕ್ಕದೇವರಾಜ ಒಡೆಯ ಎಳ್ಳಿತ್ ಅಯೆಚೆ ಕಾಗದತರ ವಿವರ.

"ನಂಗ, ನಿಂಗ ಜಗಳ ಮಾಡಿಯಂಡ್ ಸೀಮೆ ಪಾಳಾಪನ್ನಕೆ ಮಾಡ್‌ನಕ ದಂಡ್ ಕಡೆಕಾರಕೂ ನಪ್ಪ ಆಪ. ಈಂಡ ಮೀದ ನಿಂಗ ಕೆಟ್ಟಿಯಂಡಿತುಳ್ಳ ಏಳಾಯಿರ ಸೀಮೆರ ಚೆನ್ನಂಗ್ ಜಾಗತನ ನಂಗ ಕೆಟ್ಟಿಯಂಡ್ ಉಳ್ಳಾನ ನಿಂಗಡ ಬರಿಕ್ ಮಾಡಿಯಂಡ್, ಅದತ್ ವಸೂಲಾನ ಪಣತನ ನಂಗಕ್ ತಾರಿ"ಂದ್ ಎಳ್ಳಿಚಿಟ್ಟಿಂಡ್ ಅಯೆಚೆತ್.

ಆ ತಕ್ಕುಕ್ ಒತ್ತಂಡ್ ಆ ಹೋಬಳಿರ ಏಳಾಯಿರ ಸೀಮೆನ ಕೂಟಿಯಂಡ್, ವಸೂಲಾನ ಪಣತನ ಏಳಾಯಿರ ಸೀಮೆ ಪಾರ್‌ಪತ್ಯಗಾರ ದೊಡ್ಡ ವೀರಪ್ಪ ಒಡೆಯಂಡ ಲಪ್ಪಣೆಪೋಲೆ ಮೈಸೂರ್‌ಕಾರಕ್ ಕೊಡ್‌ತಂಡ್ ಇಂಜತ್. ಆನಗುಂಡ್ ಆ ಏಳಾಯಿರ



ಸೀಮೆಕ್ 'ಇತ್ತರಿಗೆ ಸೀಮೆ' ಎಣ್ಣುವ ಪೆದ ಬಾತ್.

ಇತ್ತರಿಗೆ ಸೀಮೆ ಎಣ್ಣುಕ ದಂಡ್ ಕಡೆಕಾರಕ್ ತೆರಿಗೆ ಕೊಡ್ಪ ಸೀಮೆಂದ್ ಅರ್ಥ.  
ಏಳಾಯಿರ ಸೀಮೆ ಎಣ್ಣುಕ ಆಯಿರ ವರಹ ಉತ್ಪತ್ತಿರ ಸೀಮೆಂದ್ ಕಾಂಬ.

**ದೊಡ್ಡ ವೀರಪ್ಪ ಮಲಬಾರ್ ಚರಕಲ್ ವೀರವರ್ಮ  
ಅರಸಂಗ್ ತೊಣೆಯಾಯಿತ್ ತಾನ್ ಇಕ್ಕೇರಿ ಸೋಮಶೇಖರ  
ನಾಯಕಂಗ್ ಪಣ ಕೊಡ್ಕಂಡಿಯ ಬಂದದ್,  
ದೊಡ್ಡ ವೀರಪ್ಪಂಡ ಆಖೀರಿ ದಿನ**

ದೊಡ್ಡ ವೀರಪ್ಪ ಕೊಡಗ್ನ ಆಳಿಯಂಡ್ ಇಪ್ಪಕ ದ. ಕನ್ನಡ ಬಿಲ್ಲೆರ ಇಕ್ಕೇರಿ ನಾಯಕಡ  
ಆಳ್ವಿಕೆ ಶಿವಮೊಗ್ಗತರ ಇಕ್ಕೇರಿಂಜ ಪಡಿಗಾರ್ ಮಲೆರ ಮಲೆನಾಡ್ ಪಿಳ್ಳಾ ಕರಾವಳಿ  
ಪ್ರದೇಶಕತ್ತನೆ, ದ. ಕನ್ನಡತರ ನೀಲೇಶ್ವರಕತ್ತನೆ ಕ್ರಿ.ಶ. 1645ತಾಂಜ 1660ಕತ್ತನೆ  
ಆಳ್ವಾನ್ ಶಿವಪ್ಪನಾಯಕಂಡ ಕಾಲತ್ ಪಬ್ಬಿತಿಂಜತ್. ಅಲ್ಲಿಂಜ 1714ತಾಂಜ  
1739ಕತ್ತನೆ ಇಕ್ಕೇರಿಲ್ ಆಳ್ವಾನ್ ದಂಡನೆ ಸೋಮಶೇಖರ ನಾಯಕ ತಾಂಡ ರಾಜ್ಯತಾನ  
ದಕ್ಷಿಣತ್ ಇಂಗ್ಲಿಚ್ಚ ಕೂ ವಿಸ್ತಾರ ಮಾಡೊಂಡೊಂದ್ 1730ತ್ ಬಲ್ಯ ಓರ್ ಸೈನ್ಯತಾನ  
ಕೂಟಿಯಂಡ್ ನೀಲೇಶ್ವರಕ್ ಪೋಚಿ. ಅಂವಂಗ್ ಅಕ್ಕತ ಮಲಬಾರ್ ಉತ್ತರ ಭಾಗತ್  
ಇಂಜ ಚರಕಲ್ ರಾಜ್ಯತಾನ ಪಡ್ಂದವಂಡೊಂದಾಚಿ. ಚರಕಲ್ ರಾಜಂಡ ಸೀಮೆ ನೆಲ್ಲ್,  
ತೆಂಗಿ, ನೆಲ್ಲಮಳುಕ್ ಕೇಳಿಪಡ್ಂದ ಜಾಗ. ಇನ್ನತ ಚಾಯುಳ್ಳ ಜಾಗತಾನ ತಾನ್  
ಪಡ್ಂದವಕ್ ಸೋಮಶೇಖರ್ ನಾಯಕ ನೀಲೇಶ್ವರತಾಂಜ ಬಲ್ಯ ಸೈನ್ಯ ಎಡ್ತಂಡ್  
ಬಂದಿತ್ ಚರಕಲ್ ವೀರವರ್ಮಂಡ ಪಾದಿ ರಾಜ್ಯತಾನ ಬಲ್ಚೆಂಡತ್. ಈ ಸೀಮೆನ  
ತಾಂಡ ಪುಡ್ತತ್ ಬೆಚ್ಚಂಡ್ ಮಿಳ್ಳಾಕ್ ಪೋಚಿ.

ವೀರವರ್ಮಂಡ ರಾಜ್ಯ ಚೆರಿಯದಾಯಿತಿಂಜತ್. ಅಂವಂಡ ಸೈನ್ಯ ಬಲ್ಚನೆ  
ಇಂಜಾಲೆ. ಅಂವಂಗ್ ಸೋಮಶೇಖರ ನಾಯಕನ ಎದ್ ರೊಡುವಚ್ಚಕ್ ಸೈನ್ಯಬಲ,  
ಪಣಬಲ ಇಂಜಾಲೆ. ಇಕ್ಕಾಕಲೆ ಅಂವಂಡ ಪಾದಿ ರಾಜ್ಯ ಶತ್ರುಪಡ ಪಾಲಾಯಿತಿಂಜತ್.  
ಇಂಗ್ಲಿ ಬಾಕಿ ಇಂಜ ಪಾದಿ ರಾಜ್ಯ ಸಹ ಪೋಪನ್ನಕೆ ಇಂಜತ್. ಅಕ್ಕ ವೀರವರ್ಮ ರಾಜ  
ದುಂಬ ಬೇರತ್ ಆಖೀರಕ್ ಕೊಡಗ್ ದೊಡ್ಡ ವೀರಪ್ಪ, ಇಕ್ಕೇರಿ ಸೋಮಶೇಖರ

ನಾಯಕಂಡ ಬೆಂದ್‌ಕಂದ್ ಅರ್‌ಂಜಂಡ್ ಕನಿಕರತ್ ದೊಡ್ಡ ವೀರಪ್ಪಂಗ್ ಇನ್ನನೆ ಓರ ಕಾಗದ ಎಳ್ಳಿತ್ ಅಯೆಚತ್.

"ಇಕ್ಕೇರಿ ಸಂಸ್ಥಾನತರ್ ಸೋಮಶೇಖರ ಬಲ್ಯ ಸೈನ್ಯತೋಡೆ ನಂಗಡಲ್ಲಿಕ್ ಬಂದಿತ್ ಅರೆವಾಸಿ ಸೀಮೆನ ಕೆಟ್ಟಿಯಂಡ್ ಅಲ್ಲಲ್ಲಿ ಲಕ್ಕಡಿ ಕೋಟಿನ ಇಟ್ಟಿತ್. ನಂಗಡ ಕೂಡೆ ಪಡೆಪೊಪ್ಪಕ್ ಅವು ಮಿಳ್ಳಾ ಮಿಳ್ಳಾ ಬಂದಂಡ್ ಉಂಡ್. ಆಚೇಂಗಿ, ಅಯಿಂಗಡ ಕೂಡೆ ಜಗಳ ಮಾಡುವಕ್ ನಂಗಕ್ ಮನಸ್ ಬಂದಂಡಿಲ್ಲೆ. ನಿಂಗ ಅಯಿಂಗಕ್ ಬೆಂದು ಆನಾನುಂಡ್ ಸೋಮಶೇಖರ ನಾಯಕ ನಂಗಡ ಸೀಮೆನ ಬುಟ್ಟಿತಂದಿತ್ ಅಯಿಂಗಡ ಸೈನ್ಯತೋಡೆ ಇಕ್ಕೇರಿಕ್ ಪೋಪನ್ನಕೆ ತಂಗ ಉಪಕಾರ ಮಾಡೊಂಡು"

ಈ ಕಾಗದತನ ಓದ್‌ನ ದೊಡ್ಡವೀರಪ್ಪ, ವೀರವರ್ಮ ರಾಜಂಡ ಮೀದ ಕನಿಕರಪಟ್ಟಿಂಡ್ ಅವಂಗ್, "ಇಕ್ಕ ನಂಗಳುಂಡ್ ಕಯ್ಯುವ ಪ್ರಯತ್ನ ಮಾಡಿತ್. ಆಂಡ ಮೀದ ದೇವಡ ಇಷ್ಟ. ನಿಂಗ ಎಚ್ಚರತ್ ಇರೊಂಡು"ಂದ್ ಉತ್ತರ ಎಳ್ಳಿತ್ ಅಯೆಚತ್.

ವೀರವರ್ಮಂಡ ಪರವಾಯಿತ್ ಸೋಮಶೇಖರ ನಾಯಕ ಪಡೆ ನಿಷ್ಪಾಚಿಡೊಂಡುಂದ್, ವೀರವರ್ಮ ರಾಜನುಂಡ್ ಗೆದ್ದ ರಾಜ್ಯತನ ಬುಟ್ಟಿತಪ್ಪನ್ನಕೆ ಕೇಟಂಡಲ್ಲಿ ಸೋಮಶೇಖರ ನಾಯಕ, ದೊಡ್ಡವೀರಪ್ಪಂಗ್ ಇನ್ನನೆ ಮರ್‌ಜವಾಬ್ ಕೊಡ್‌ತತ್.

"ನಂಗ ಬಲ್ಯ ಸೈನ್ಯತೋಡೆ ಬಂದಿತ್ ಚರಕಲ್ ರಾಜಂಡ ಕೂಡೆ ಪಡೆಪೊತ್ತಿತ್ ಅಯಿಂಗಡ ನಾಯಮಾರಳ ಚೋಪ್‌ಚಿಟ್ಟಿತ್ ಅಯಿಂಗಡ ಪಾದಿ ರಾಜ್ಯತನ ಪಡ್‌ಂದಂಡಿತ್. ಈ ಪಡೆಲ್ ನಂಗಡ ಜನ ದುಂಬ ಚತ್ತ್ ಪೋಚಿ. ಕೂಟ್‌ಕ್ ಸೈನ್ಯತರ್ ಖರ್ಚಿ ದುಂಬಾ ಉಂಡ್. ಆನಗುಂಡ್ ನಂಗ ಅಯಿಂಗಡ ರಾಜ್ಯತನ ಬುಟ್ಟ್ ಕೊಡ್‌ಪುಲೆ".

ದೊಡ್ಡವೀರಪ್ಪ ಈ ಕಾಗದತರ್ ವಿವರತನ ಚರಕಲ್ ರಾಜಂಗ್ ಎಣ್ಣುವಕ್ "ಆ ರಾಜ ಆಣೆ ಮಾಡಿತ್ ಸೋಮಶೇಖರ ನಾಯಕ ಸೈನ್ಯತರ್ ಖರ್ಚಿಕ್ 18 ಲಕ್ಷ ಉರ್‌ಪಿಯ ತಪ್ಪಿಂದ್ ಎಣ್ಣಿತ್. ಆ ತಕ್ಕಕ್ ದೊಡ್ಡವೀರಪ್ಪ ಜವಾಬ್ದಾರಿ ಆಂಡು"ಂದ್ ಕೇಟಂಡತ್.

ಈ ಸುದ್ದಿನ ಕೇಟ ಸೋಮಶೇಖರ, ದೊಡ್ಡವೀರಪ್ಪ ಒಡೆಯಂಗ್ "ಮಲಯಾಳತರ್ ರಾಜಂಗ ಮೋಸಗಾರಂಗ. ಪರ್‌ಂದ ತಕ್ಕರನ್ನಕೆ ನಡ್‌ಂದವವು ಅಲ್ಲ. ಅಯಿಂಗಡ ತಕ್ಕ ಕೇಟಿತ್ ಈ ಪಣಕ್ ನಿಂಗ ಜವಾಬ್ದಾರಂಗಳಾಕತಿ"ಂದ್ ಎಚ್ಚರ ಕೊಡ್‌ತತ್.

ಆಚೇಂಗಿ, ದೊಡ್ಡವೀರಪ್ಪ ಒಡೆಯ, ಚರಕಲ್ ರಾಜಂಡ ಆಣೆತಕ್ಕನ ನಂಬಿತ್ ಅವಂಡ ಕಷ್ಟಕ್ ಮರ್‌ಳಾಯಿತ್, ಅವ ಇಕ್ಕೇರಿ ನಾಯಕಂಗ್ ಕೊಡ್‌ಕಂಡಿಂಜ ಪಣಕ್ ತಾನೆ ಜವಾಬ್ದಾರಂದ್ ಎಳ್ಳಿ ಕೊಡ್‌ತತ್.

ಸೋಮಶೇಖರ ನಾಯಕ ದೊಡ್ಡವೀರಪ್ಪಂಡ ತಕ್ಕಾಕ್ ಬೆಲೆ ಕೊಡ್ತೀತೆ ತಾಂಡ ಸೈನ್ಯತನ ಚರಕಲ್ ರಾಜ್ಯತಂಜ ವಾಪಾಸ್ ಕಾಕಿತ್ ತಾಂಡ ರಾಜ್ಯಕ್ ಅಯಚೆತ್. ಅನ್ನನೆ ತಾಂಡ ರಾಜ್ಯಕ್ ಪೋಪಕ ದೊಡ್ಡವೀರಪ್ಪ ಒಡೆಯನ ಕಾಂಬಕ್ ದ.ಕನ್ನಡ ಜಿಲ್ಲೆರ ಸುಬ್ರಹ್ಮಣ್ಯಕ್ ಬಾತ್. ಅಲ್ಲಿಕ್ ದೊಡ್ಡವೀರಪ್ಪ ಒಡೆಯ ಪೋಯಿತ್ ದಂಡ್ ರಾಜಂಗಳೂ ತಂಗಡ ಸಿನೇತಿಕೆನ ಬಲ ಪಡ್ತೆಚಿ. ಅಲ್ಲಿಂಜ ಈ ರಾಜಂಗ ತಂಗ ತಂಗಡ ರಾಜ್ಯಕ್ ವಾಪಾಸಾಚಿ.

ಇದಾಯಿತ್ ಚೆನ್ನಂಗ್ ದಿನ ಕೈಂಜಪಿಳ್ಳಾ ದೊಡ್ಡವೀರಪ್ಪ ಒಡೆಯ ಚರಕಲ್ ರಾಜ ತಪ್ಪಕ್ ಒತ್ತಂಡ ಪಣತನ ಕೇಟಂಡ್ ಬಪ್ಪಕ್ ತಾಂಡ ಚೆನ್ನಂಗ್ ಕಾರ್ಯಕಾರ, ಪರಿಕಾರಳ ಚರಕಲ್ ರಾಜಂಡಲ್ಲಿಕ್ ಅಯೆಚೆತ್. ಅಕ್ಕ ಚರಕಲ್ ರಾಜ ಪಣತನ ನಾಲಂಜಿ ಕಂತ್ಲಾ ತೇಪಿಂದ್ ಎಣ್ಣೆತ್ ಕೊಡಗಂಜ ಪೋನ ಜನಳ ಆಕಿಯಂಡ್ ದಂಡ್, ಮೂಂದ್ ಕಂತ್ಲಾ ಪಾದಿ ಪಣ ಕೊಡ್ತತ್. ಬಾಕಿ ಪಾದಿ ಪಣತನ ಕೊಡ್ಪಕ್ ಒತ್ತವತೆ ಕೊಡಗರ ಜನಳ ವಾಪಾಸ್ ಅಯೆಚೆತ್. ಇದ್ನ ಕೇಟಿತ್ ದೊಡ್ಡವೀರಪ್ಪಂಗ್ ಚೆಡಿ ಬಾತ್.

ಕೂಡೆನ್ನೆ ತಾಂಡ ದಳವಾಯಿ ಬೋನಿರ ಮುತ್ತಣ್ಣ ಪಿಳ್ಳಾ ಅಂಜಾಯಿರ ಕೊಡಗರ ಜನಳ ಸೈನ್ಯತೋಡೆ ಮಲಯಾಳಕ್ ಅಯೆಚೆತ್. ಅಕ್ಕಲೂ ಸಹ ಚರಕಲ್ ರಾಜ ಇಕ್ಕ ತಪ್ಪಿ, ಬಯ್ ತಪ್ಪಿಂದ್ ಸತಾಯಿಚಿಟ್ಟಂಡ್ ತಾಂಡ ಸೈನ್ಯತನ ಬಲಪಡ್ತಿಯಂಡ್ ಇಂಜತ್.

ಈ ಸುದ್ದಿ ಕಣ್ಣಾನೂರ್ ರಾಜಂಗ್ ಗೊತ್ತಾಚಿ. ಅವ ದೊಡ್ಡವೀರಪ್ಪಂಡ ಸಿನೇತ. ಆನಗುಂಡ್ ಇಂವ ತಾಂಡ ಚೆನ್ನಂಗ್ ಮಾಪಳೆಯಳ ಬೋನಿರ ಮುತ್ತಣ್ಣಂಡ ಪಕ್ಕ ಅಯೆಚೆತ್. ಚರಕಲ್ ರಾಜಂಡ ಚೆನ್ನಂಗ್ ಕೆಣಿನ ಬೋನಿರ ಮುತ್ತಣ್ಣಂಗ್ ಅರಿಚಿಟ್ಟತ್. ಅಂದೇ ಬೈಟ್ ಮುತ್ತಣ್ಣ ಪಿಳ್ಳಾ ಸೈನ್ಯ ಚರಕಲ್ ರಾಜಂಡ ಸೈನ್ಯತನ ಬಟ್ಟೆಲೆ ಚೋಪ್ಚಿಟ್ಟಿತ್ ಕಣ್ಣಾನೂರ್ಕ್ ಎತ್ತ್ತಚಿ. ಕೂಡೆನ್ನೆ ಚರಕಲ್ ರಾಜ ತಾಂಡ ಸೈನಿಕಂಗಳ ಅಯೆಚೆತ್ ಮಲಯಾಳತಂಜ ಕೊಡಗಕ್ ಪೋಪ ಬಟ್ಟೆಲೆಲ್ಲ ಪಾರ ಆಕ್ಚಿ. ಇದ್ನ ನೋಟಿತ್ ಕಣ್ಣಾನೂರ್ ರಾಜ ಕೊಡಗರ ಸೈನ್ಯತನ ಸಮುದ್ರಮಾರ್ಗಕಾಲೆ ಇಕ್ಕೇರಿ ಸಂಸ್ಥಾನಕ್ ಸೇರಾನ ಕುಂಬಳೆ ತಾಲೂಕ್‌ಲ್ ಉಳ್ಳಪ್ಪಾಚಿ. ಅಲ್ಲಿಂಜ ಬೋನಿರ ಮುತ್ತಣ್ಣ ತುಳುನಾಡ್‌ಕಾಲೆ ಕೊಡಗಕ್ ಬಾತ್.

ಇಚ್ಚಕೆಲ್ಲ ಆಕಣೆ ಸೋಮಶೇಖರ ನಾಯಕಂಗ್ ಚರಕಲ್ ರಾಜನುಂಡ್ ಬರಂಡಿಂಜ ಪಾದಿ ಪಣ ಬಂದಿತಿಂಜತ್. ಬಾಕಿ ಪಣ ತರತೆ ಚರಕಲ್ ರಾಜ ಮೋಸ ಮಾಡಿತಿಂಜಕೊ

ದೊಡ್ಡವೀರಪ್ಪ, ಸೋಮಶೇಖರ ನಾಯಕಂಗ್ ತಾನ್ ಜವಾಬ್ದಾರ ಆಯಿತಿಂಜಾನುಂಡ್ ತಾಂಡ ಖಜಾನೆಂಜ ಬಾಕಿ ಪಣತ್ 9 ಲಕ್ಷ ಉರ್‌ಪಿಯತ್‌ನ ಅಯೆಚಿ ಕೊಡ್‌ತತ್.

ಚರಕಲ್ ರಾಜ ಮಾಡ್‌ನ ಮೋಸತ್‌ನುಂಡ್ ಸೋಮಶೇಖರ ನಾಯಕಂಗ್ ಪೇರ್ತ್ ಬೇಜಾರ ಆಚಿ. ಅಕ್ಚ ಅವ ದೊಡ್ಡವೀರಪ್ಪನ ಇಕ್ವೇರಿಕ್ ಕಾಕ್‌ಚಿಟ್ಲೆಂಡ್ "ಮಲಯಾಳತ್‌ರ ರಾಜಂಗ್ ಮೋಸಗಾರಂಗ. ಅಯಿಂಗಡ ತಕ್ಕ್‌ನ ನಂಬುವಕಾಗಾಂಡ್ ನಂಗ ಮಿಳ್ಳಾಲೆ ಎಣ್ಣೆಚಿ. ಆಚೇಂಗಿ, ನಿಂಗ ನಂಗಳ ನಂಬತೆ ಅಯಿಂಗಡ ತಕ್ಕ್‌ನ ನಂಬಿಯಂಡ್ ನಂಗ ಸೀಮೆನ ಅಯಿಂಗಕ್ ಒಟ್ಟ್ ಕೊಡ್‌ತಿತ್, ಅಯಿಂಗಡ ಬರಿಂಜ ಬಪ್ಪಕುಳ್ಳ ಪಣತ್‌ನೊ ನಿಂಗಡ ಕೈಯಿಂಜೆ ಕೊಡ್‌ತಿರಲ್ಲ"ಂದ್ ದುಂಬಾ ಬೇಜಾರತ್, "ನಿಂಗ ನಂಗಡವೆ ಅಲ್ಲತೆ ಬೋರೆ ಅಲ್ಲ"ಂದ್ ದೊಡ್ಡವೀರಪ್ಪಂಡ ಪ್ರಾಮಾಣಿಕತೆನಕ್ ಪ್ರತಿಯಾಯಿತ್ ತುಳುನಾಡ್‌ಕೊತ್ತ ಮಾಗಣೆಂಜ ಕುಂದಾರ ತೆರಿಕ್ ಮುಟ್ವಾನನ್ನಕೆ ಇಂಜ ಚೆನ್ನಂಗ್ ಗ್ರಾಮತ್‌ನ ಪಾಲ್ ಇಟ್ಟತ್.

ದೊಡ್ಡ ವೀರಪ್ಪ ಒಡೆಯಂಗ್ ಪಾಲ್, ಮೋರ್‌ಕ್ ಕೊಡ್‌ತಿತಿಂಜ ಊರ್‌ಕ್ 'ಅಮರಮಾಗಣೆ'ಂದ್ ಪುದಿಯದಾಯಿತ್ ಪೆದ ಬೆಚ್ಚಿತ್ ದೊಡ್ಡವೀರಪ್ಪ ಒಡೆಯಂಗ್ ಬಣ್ಣೆ ಆಯಿತ್ ಕೊಡ್‌ತತ್. ಅಲ್ಲಿಂಜ ದೊಡ್ಡವೀರಪ್ಪ ಕಾವೇರಮ್ಮೆರ ಪೂಜೆಕ್ ಕೊಡಗಲ್ ತೆಂಗರ ಫಲ ಇಲ್ಲತಿಂಜಾನುಂಡ್ ತೆಂಗಕಾಯಿತ್ ಭಾಗಮಂಡಲಕ್ ಪಕ್ಕತೆ ಉಳ್ಳ ಸುಳ್ಳ ಮಾಗಣೆನ ಕ್ರಯಕ್ ತರೊಂಡೊಂದ್ ಸೋಮಶೇಖರ ನಾಯಕನ ಕೇಟತ್. ಅದ್‌ಂಗ್ ಸೋಮಶೇಖರ ನಾಯಕ ಒತ್ತಂಡ್ ದೊಡ್ಡವೀರಪ್ಪ, ಕಾವೇರಮ್ಮೆರ ತಿರಿಕೆರ ಭಂಡಾರತ್‌ಂಜ ಅದ್‌ಂಗ್ ಆಪ ಪಣತ್‌ನ ಕೊಡ್‌ತಿತ್ ಅದ್‌ನ ಕೊಡಗಕ್ ಕೂಟಿಯಂಡತ್. ಇನ್ನನೆ ಕೊಡಗ್ ಸೀಮೆಕ್ ಇಕ್ವೇರಿ ಸಂಸ್ಥಾನಕ್ ಕೊಡ್‌ನ ಅಮರ, ಸುಳ್ಳ ಮಾಗಣೆ ಕೊಡ್‌ಚಿ.

ದ.ಕನ್ನಡ ಜಿಲ್ಲೆರ ಅಮರಮಾಗಣೆ ದೊಡ್ಡವೀರಪ್ಪ ಒಡೆಯಂಗ್ ಸೋಮಶೇಖರ ನಾಯಕನುಂಡ್ ಕೊಡ್‌ತ ಕತೆ ರಾಜೇಂದ್ರನಾಮೆಲ್ ಉಂಡ್. ಆಚೇಂಗಿ, ಪಂಡ್ ದೊಡ್ಡ ವೀರಪ್ಪಂಡ ಅಪ್ಪ ಮುದ್ದುರಾಜಂಡ ಚರಿತ್ರನ ಎಳ್ಳುವಕ, 'ಮುದ್ದು ರಾಜಂಗ್ ಇಕ್ವೇರಿರ ಶಿವಪ್ಪನಾಯಕ ಕೆಳದಿ ರಾಮೇಶ್ವರಂಡ ಪ್ರಾರ್ಥನೆ ಮಾಡಿತ್ ದೇವಕ್ ಪೊನ್ನಾರ ಬೊಳ್‌ಚತನ ಒಪ್ಪಾಚಿಟ್ಟಿತ್ ಅದ್‌ನ ಒರಾಂಡ್ ಕೆಡ್‌ತತೆ ಕತ್ತಚಿಡುವನ್ನಕೆ ಎಣ್ಣೆನ ಫಲವಾಯಿತ್ ಪುಟ್ವನ ಕುಳ್ಳಿಕ್ ಇನಾಂ ಆಯಿತ್ ಇಕ್ವೇರಿ ನಾಯಕ ಅಮರಮಾಗಣೆನ ಕೊಡ್‌ತತ್'ಂದ್ ಉಂಡ್.

ಈ ಕತೆ ಕೆಳದಿರಾಜಂಡ ಚರಿತ್ರಲ್ ಉಂಡ್. ರಾಜೇಂದ್ರ ನಾಮೆಲ್ ಪಿಳ್ಳಾ ಕೆಳದಿ

ರಾಜಂಡ ಚರಿತ್ರಲ್ ಎಳ್ವೊನ ಕತೆಲ್ ಕೆಳದಿ ರಾಜಂಡ ಚರಿತ್ರಲ್ ಎಳ್ವೊನ ಕತೆ ನೇರಂದ್ ತೋಂದುವ. ಎನ್ನಂಗೇಣ್ಣ ಕ ತಾನ್ ಬೋಡಿಯಂಡನ್ನ ಕೆ ಮುದ್ದು ರಾಜಂಗ್ ಕ್ಕಣ್ಣ ಕುಳ್ಳಿ ಪುಟ್ಟನ ಕುಶಿಲ್ ತಾಂಡ ಬಲ್ಮ ಸಾಮ್ರಾಜ್ಯತ್ ಕೆ ಚೆನ್ನಂಗ್ ಉರಾನ ಶಿವಪ್ಪನಾಯಕ ಮುದ್ದು ರಾಜಂಗ್ ಕೊಡ್ತದ್ ನಂಬುವನ್ನತದ್. ಬೋರ

ಓರ್ ರಾಜಂಗ್ ಮೋಸ ಮಾಡಿತ್ ಅವಂಗ್ ಕೊಡ್ಕಂಡಿಯ ಪಣತ್ ನ ದೊಡ್ಡ ವೀರಪ್ಪ ತಾಂಗ್ ಕೊಡ್ತಾಂಗ್ ಸೋಮಶೇಖರ ಬೇಜಾರಪಟ್ಟಂಡ್ ದೊಡ್ಡ ವೀರಪ್ಪಂಗ್ ಅಮರ ಮಾಗಣೆನ ಕೊಡ್ತತಂದ್ ಎಣ್ಣುವ ಕೊಡಿಯತ ಕತೆ ಅಚ್ಚಿಕ್ ವಾಸ್ತವ ಆಪುಲೆ. ಆನಗುಂಡ್ ಶಿವಪ್ಪ ನಾಯಕ ಮುದ್ದು ರಾಜಂಗ್ ತಾಂಡ ಬೋಡಿಕೆರಪೋಲೆ ಕ್ಕಣ್ಣ ಕುಳ್ಳಿ ಪುಟ್ಟನಾಂಗ್ ಆ ಕುಳ್ಳಿಕ್ ಇನಾಂ ಆಯಿತ್ ಅಮರ ಮಾಗಣೆನ ಕೊಡ್ತತ ಎಣ್ಣುವಾನ ಚಾರಿತ್ರಿಕ ಸತ್ಯಂದ್ ಎಡ್ತವಲು.

ದೊಡ್ಡ ವೀರಪ್ಪ ಒಡೆಯ ಪಂಡ್ ಎಣ್ಣೊನಪೋಲೆ ತಾಂಡ 52 ಕಾಲತ್ ರ ದೀರ್ಘ ರಾಜ್ಯಭಾರತ್ ತಾಂಡ ರಾಜ್ಯತ್ ರ ಪೊರಮೆ ಪಿಳ್ಳಾ ಒಳ್ಳೆಲುಳ್ಳ ವೈರಿಯಳ ಪುಡ್ತತತ್ ಬೆಚ್ಚಂಡ್ ತಾಂಡ ಅಧಿರಾಜ ಇಕ್ಕೇರಿ ಸೋಮಶೇಖರನಾಯಕಂಡ ಕೂಡೆ ಸಿನೇತಿಕೆಲ್ ಇಂಜತ್. ಇಂವ ತಾಂಡ ಪ್ರಜೆಯಕ್ ಬೋಂಡಿಯಾನ ವ್ಯಕ್ತಿ ಆನಾಂಗ್ ವೈರಿಯಳ ಚೋಪ್ಚಿಡುವಕ್ ಅವಂಗ್ ದುಂಬ ಸಪೋರ್ಟ್ ಕೊಟ್ಚಿ.

ದೊಡ್ಡ ವೀರಪ್ಪಂಗ್ ಅಪ್ಪಾಜಿ ರಾಜ ಎಣ್ಣುವ ಮೋಂವ ಇಂಜತ್. ತಾಂಗ್ ಓರ್ ಪಟ್ಟತ್ ರ ರಾಣಿ ಇಂಜಕೊ ಇಳ್ಳೊಣ್ಣೊ ಪೊಣ್ಣೊನ ಬೆಚ್ಚಂಡ್, ಅವಡ ತಕ್ಕ ಕೇಟಿತ್ ತಾಂಡ ಪಟ್ಟತ್ ರ ರಾಣಿಕ್ ಕಿರ್ಕುಳ ಕೊಡ್ಪ ಕೂಡ್ಚಿ. ಇದ್ ಅಧಿಯಾಯಂಡ್ ಬಂದನ್ನ ಕೆ ರಾಣಿ ಸಹಿಸುವಕಯ್ಯತೆ ಒನ್ನಂದ್ ಕಣತರೆಕ್ ಬುದ್ಧಿತ್ ಚೆತ್ತಪೋಚಿ. ಈ ಸುದ್ದಿನ ಕೇಟಿ ಅಪ್ಪ ದೊಡ್ಡ ವೀರಪ್ಪರಾಜ ತಾಂಡ ಮೋಂವ ಅಪ್ಪಾಜಿರಾಜಂಡ ಮೀದ ಚೆಡ್ಂಜಂಡ್ ಅವನೊ, ಅವಂಡ ಪಟ್ಟತ್ ರ ಪೊಣ್ಣೊರ ಗರ್ಭತ್ ಪುಟ್ಟನ ರಾಜಕುಮಾರ ಚಿಕ್ಕವೀರಪ್ಪ ಒಡೆಯನೊ ಜೈಲ್ಲ್ ಇಟ್ಟತ್.

ಅಪ್ಪಾಜಿರಾಜ 12 ಕಾಲ ಜೈಲ್ಲ್ ಇಂಜಿತ್ ತಾಂಡ ಅಪ್ಪ ಜಿಂವತ್ ಇಪ್ಪಕೆ ಚೆತ್ತಪೋಚಿ. ಆ ನೇರತ್ ದೊಡ್ಡ ವೀರಪ್ಪಂಗ್ ಆಪ್ತಂಗಲಾಯಿತ್ ಇಂಜ ಚೆನ್ನಂಗಾಳ್ ಕೊಡವ ಇನ್ನನೆ ಕೇಟಂಡತ್.

"ಅಪ್ಪಾಜಿ ರಾಜ ತಪ್ಪು ಮಾಡಿತ್ ಜೈಲ್ಕ್ ಪೋಯಿತ್ ಚೆತ್ತಪೋಚಿ. ಅಯಿಂಗಡ ಮೋಂವ ನಿರಪರಾಧಿ ಆಯಿತ್ ಜೈಲ್ಲ್ ಉಂಡ್. ನಿಂಗಕೂ ಬಯತಾಚಿ. ಮಿಳ್ಳಾಕ್ ಈ ರಾಜ್ಯಭಾರ ಮಾಡಿಯಂಡ್ ನಂಗಳೆಲ್ಲ ರಕ್ಷಣೆ ಮಾಡುವವು ದಾರ್? ಈಂಡ ಮೀದ



ನಿಂಗ ಗೇನ ಮಾಡೊಂದು. ಆನಗುಂಡ್ ಜೈಲ್ಲ್ ಉಳ್ಳ ರಾಜಕುಮಾರನ ಬುಡ್ತಿತ್ ನಿಂಗಡ ದೊರೆತನತ್ ನಿಪ್ಪಾಚಿಡೊಂದು"

ತಾಂಡ ಆಪ್ತಂಗ ಎಣ್ಣಾನಪೋಲೆ ಜೈಲ್ಲ್ ಇಂಜ ತಾಂಡ ಕೊರ್ಮೋಂವನ ಬುಡ್ತಿತ್ ಕಲಿ ಸಂದ 4832ನೆ ಸಾಧಾರಣ ಸಂವತ್ಸರತ್ ಎಣ್ಣಕ 1730ತ್ ಯುವರಾಜಂಡ ಪಟ್ಟಾಭಿಷೇಕ ಮಾಡ್ಚಿ. ಇದಾನಪಿಣ್ಣ ಕಲಿಸಂದ 4837ನೆ ಆನಂದ ಸಂವತ್ಸರತ್ ಎಣ್ಣಕ 1736ತ್ ದೊಡ್ಡವೀರಪ್ಪ ಒಡೆಯ ಸ್ವರ್ಗವಾಸಿಯಾಚಿ. ಇಂವಂಡ ಕೂಡೆ ಇಂವಂಡ ಮಹಾರಾಣಿಯ ದಂಡಾಳೂ ಸಹಗಮನ ಮಾಡ್ಚಿ. ಇಲ್ಲಿಕ್ ವೀರಪ್ಪ ಒಡೆಯಂಡ ಆಡಳಿತ ತೇಂದತ್.

## 16. ಚಿಕ್ಕವೀರಪ್ಪ ಒಡೆಯ 1736-1766

ಮೈಸೂರ್ ಹೈದರಾಲಿರ ಸೈನ್ಯಾಧಿಕಾರಿ ಚೋತದ್, ಪಡೆ ಕೈಂಜದು ಒಪ್ಪಂದ

ಚಿಕ್ಕವೀರಪ್ಪ ಒಡೆಯ ಚರ್ಪತ್ಂಜೆ ಜೈಲ್ಲ್ ಇಂಜಾನುಂಡ್ ಕಾಯಿಲಕಾರನಾಯಿತೂ, ಪೋಡಿ ಪುಕ್ಕಲ ಆಯಿತಿಂಜತ್. ಈನಗುಂಡ್ ಇಂವಂಡ ಅಳ್ಳಿಕೆ ಅಚ್ಚಕೋರ್ ಚಾಯಿಂಚಾಲೆ. ಇಂವ ಕೊಡಗ್ನ ಆಳಿಯಂಡ್ ಇಪ್ಪಕ ಮೈಸೂರ್ಲ್ ಹೈದರಾಲಿ ನಾಯಕ ಎಣ್ಣುವಂವ ಸುರೂಲ್ ರಾಜಂಡ ಸೈನಿಕನಾಯಿತ್ ಕೂಟಿಯಂಡ್ ಬಯ್ಯಂಜ ಅಕ್ಕತ ಕಾಲತ್ ಪಡೆಲ್ ತಾಂಡ ಪರಾಕ್ರಮ ಕಾಟಿಯಂಡ್ ಬಲ್ಮ ಸೈನ್ಯಾಧಿಕಾರಿ ಆಚಿ. ಇದಾಯಿತ್ ಚಿನ್ನಂಗ್ ಸಮಯತೆ ಶ್ರೀರಂಗಪಟ್ಟಣ್ ಕೋಟೆನ ತಾಂಡ ಪುಡ್ತಕ್ ಎಡ್ತಂಡ್ ಅಕ್ಕ ಮೈಸೂರ್ ರಾಜ ಆಯಿತಿಂಜ ಚಿಕ್ಕಕೃಷ್ಣರಾಜ ಒಡೆಯನ ಅಯಿಂಗಡ ಕುಟುಂಬಕಾರಡ ಸಮೇತ ಅರಮನೆಲ್ ಪಾರ ಬೆಚ್ಚಿತ್, ತಾನೆ ನವಾಬ ಹೈದರಾಲಿಖಾನ್ ಬಹಾದೂರ್‌ಂದ್ ಪೆದ ಬೆಚ್ಚಂಡ್ 1761ಂಡ ಜೂನ್ ತಿಂಗತ್ ಮೈಸೂರ್‌ರ ಸರ್ವಾಧಿಕಾರಿಯಾಚಿ.

ಹೈದರಾಲಿ ಮೈಸೂರ್ ನವಾಬ ಆನಪಿಣ್ಣ ಮೈಸೂರ್‌ರ ಸುತ್ತಮುತ್ತ ಪಾಳೆಯಗಾರಳೆ ಚೋಪ್‌ಚಿಟ್ಟಿತ್ ಅಯಿಂಗಡ ಸಂಸ್ಥಾನತ್ ಮೈಸೂರ್ ರಾಜಂಗಡ ರಾಜ್ಯಕ್ ಕೂಟಿತ್ ಅದ್‌ನ ವಿಸ್ತಾರ ಮಾಡ್ಚಿ. ಅನ್ನನೆ ಹೈದರಾಲಿ ಗೆದ್ದ ರಾಜ್ಯತ್ ಮುಖ್ಯವಾನದ್ ಇಕ್ಕೇರಿ

/ಬಿದನೂರ್ ಸಂಸ್ಥಾನ. ಹೈದರಾಲಿ ಇಕ್ಕೇರಿ / ಬಿದನೂರ್ ಸಂಸ್ಥಾನತನ 1761ತ್ ತಾಂಡ ಪುಡ್ತತ್ ಎಡ್ತಂಡತ್. ಅಕ್ಕ ಇಕ್ಕೇರಿ ಸಂಸ್ಥಾನತರ ಆಶ್ರಿತ ಆಯಿತಿಂಜ ಕೊಡಗರ ರಾಜಂಗಳ ತಾನ್ ಇಕ್ಕೇರಿ ಸಂಸ್ಥಾನತನ ಗೆದ್ದಾಂಗ್ ತಾಂಡ ಆಶ್ರಿತಂಗ ಆಯಿತ್ ಇಪ್ಪನ್ನಕೆ ಹೈದರ್ ತಾಂಡ ಅಧಿಕಾರತನ ಕೊಡಗರ ರಾಜಂಗಡ ಮೀದ ನಡ್ತನನ್ನಕೆ ಕಾಂಬ. ಇಂವ ಇಕ್ಕೇರಿ ಸಂಸ್ಥಾನಕ್ ಕೂಡ್ತನ ದ.ಕನ್ನಡ ಜಿಲ್ಲೆರ ಅಮರ ಪಿಳ್ಳಾ ಸುಳ್ಳಮಾಗಣೆ ಇಕ್ಕೇರಿ ನಾಯಕಂಗಳುಂಡ್ ಪಂಡ್ ಕೊಡಗರ ರಾಜಂಗಕ್ ಕೊಡ್ತಿತಿಂಜತ್ ಎಣ್ಣುವಾನ ಅರ್ಂಬಿತ್, ಆ ಮಾಗಣೆನ ಕೊಡಗರ ರಾಜಂಡ ಪುಡ್ತತೆ ಬುಟ್ಟತ್.

ಆಚೇಂಗಿ, ಹೈದರಾಲಿ ಮೂನಾಲ್ ಕಾಲ ಕೈಂಜಪಿಳ್ಳಾ ಕೊಡಗ್ ಪಿಳ್ಳಾ ಮೈಸೂರ್ ರಾಜಂಗ ದಂಡಾಳೂ ತೆರಿಗೆ ಕೆಟ್ಟುವ ಇಂಜ ಏಳಾಯಿರ ಸೀಮೆರ ಮೀದ ತಾಂಡ ಕಣ್ಣ್ ಬೆಚ್ಚತ್. ಅಂವ ಅಕ್ಕ ಕೊಡಗರ ಚಿಕ್ಕವೀರಪ್ಪ ಒಡೆಯಂಗ್ ಇನ್ನನೆ ಓರ್ ಕಾಗದ ಎಳ್ತಚಿ.

"ಏಳಾಯಿರ ಸೀಮೆ ಕೊಡಗರ ಸಂಸ್ಥಾನಕೂ, ಮೈಸೂರ್ ಸಂಸ್ಥಾನಕೂ ಇತ್ತೆರಿಗೆ ಆಯಿತ್ ಉಂಡಲ್ಲ? ಅದತ್ ಚೆನ್ನಂಗ್ ಮೈಸೂರ್ಕಾರಕ್ ತಂಗ ಕೊಡ್ತ ಪಣತನ ನಂಗ ಎಡ್ತವುಲೆ. ನಂಗಕ್ ಕೂಡಂಡಿಯ ಜಾಗತನ ಬುಟ್ಟ್ತಾರಿ. ನಂಗ ಬಂದೋಬಸ್ತ್ ಮಾಡಿಯವ"

ಇದ್ಲಿಂಚ್ ಚಿಕ್ಕವೀರಪ್ಪ ಒಡೆಯ ಆ ಏಳಾಯಿರ ಸೀಮೆಲ್ ಅಯಿಂಗಕ್ ಕೂಡ್ತನ ಬೆಮ್ಮತ್ತಿ, ಮಲ್ಲಿಪಟ್ಟಣ, ಹೊಸೂರ್ ಎಣ್ಣುವ ಹೋಬಳಿನ ಬೋರೆ ಮಾಡಿತ್ ಕೊಡ್ತಲ್ಲಿ, ಮಲ್ಲಿಪಟ್ಟಣತ್ ಹೈದರಾಲಿ ಓರ್ ಕೋಟೆ ಕಟ್ಟಿತ್ ಅಮಲುದಾರನ ಆಕಿತ್ ಬಂದೋ ಬಸ್ತ್ ಮಾಡಿಯಂಡತ್. ಈ ಬರಿ ತೆರಿನ ಕೊಡಗರ ರಾಜಂಗ ಬಂದೋಬಸ್ತ್ ಮಾಡಿಯಂಡತ್.

ಆಚೇಂಗಿ, ಹೈದರಾಲಿ ಖಾನ್‌ಕ್ ಇಚ್ಚಕಾತ್ ತೃಪ್ತಿ ಆಯಿಲೆ. ಅಂವ ಕೊಡಗರ ರಾಜನುಂಡ್ ಪಣ ಪಡ್ಂದಿತೆ ಪಡ್ಂದವಂಡೂಂದ್ ಮುಂಡತೆ ಜಗಳಕ್ ಘೊಳಿ ಇಟ್ಟನ್ನಕೆ ಕಾಂಬ. ಅಂವ ಇತ್ತೆರಿ ಸೀಮೆಂಜ ತಾನ್ ಎಡ್ತಂಡ ಹೋಬಳಿರ ತೆರಿನ ಭದ್ರ ಪಡ್ತಿತ್ ಚೆನ್ನಂಗ್ ದಿನ ಕೈಂಜದು ತಾಂಡ ಸೈನ್ಯಾಧಿಕಾರಿ ಫಜರುಲ್ಲಾ ಖಾನ್‌ರ ಕೂಡೆ ಸೈನ್ಯ ಕೂಟಿಯಂಡ್ ಕೊಡಗ್ ಸಂಸ್ಥಾನತರ ಮೀದ ಜಗಳಕ್ ಬಾತ್.

ಫಜರುಲ್ಲಾಖಾನ್ ಕಲಿಸಂದ 4867ನೆ ಪಾರ್ಥಿವ ಸಂವತ್ಸರತ್ ಎಣ್ಣಕ ಕ್ರಿ.ಶ. 1765ತ್ ಕೊಡಗರ ಉಬ್ಬಲ್ ಗಂಡಿಮಾಳತ್ ಬಂದಿತ್ ಇಳ್ತಂಜತ್. ಅಲ್ಲಿ ಅಂವಂಗೂ, ಕೊಡಗರ ಸಂಸ್ಥಾನಕಾರಕೂ ಚೆರಿಯ ಚೆರಿಯ ಜಗಳ ಬಕ್ಕಣ ನಡ್ಂದತ್.

ಅಕ್ಕ ಫಜರುಲ್ಲಾ ಖಾನ್ ಚೋತಿತ್ ಕೊಡಗ್ಗರ ಉತ್ತರತ್ ಉಳ್ಳ ಐಗೂರ್ ಸೀಮೆಕ್ ಪೋಚಿ. ಅಲ್ಲಿಂಜ ನವಾಬ ಹೈದರಾಲಿ ಖಾನ್, ಫಜರುಲ್ಲಾ ಖಾನ್‌ರ ಕೂಡೆ ಇನ್ನನೆ ಎಣ್ಣೆತ್ ಅಯೆಚತ್.

"ಮಹಾರಾಜಂಡ ದುರ್ಗ ತಾಲೋಕ್‌ಂಜ ಉಚ್ಚಂಗಿರನ್ನತ ಸೀಮೆ ನಿಂಗಡ ತೆರಿಕ್ ಮುಟ್ಟಿತ್ ಉಳ್ಳಾಂಗ್ ಬೋರೆ ಮಾಡಿತ್ ನಿಂಗಡ ಸಂಸ್ಥಾನಕ್ ಬುಟ್ಟ್ ತಂದಂಡ್ ಉಂಡ್. ಫಜರುಲ್ಲಾ ಖಾನ್‌ರ ಸೈನ್ಯತ್‌ರ ಖರ್ಚ್ ದುಂಬಾ ಉಂಡ್. ಈಂಡ ಮಾರೀಪತ್ 3 ಲಕ್ಷ ವರಹ ತರೊಂಡು. ಆನಗುಂಡ್ ನಂಗಡ ಸಿನೇತಿಕೆ ದುಂಬಾ ಕಾಲ ಶಾಶ್ವತ ಆಯಿತ್ ಇಪ್ಪ"ಂದ್ ಎಣ್ಣೆತ್ ಅಯೆಚಾಂಗ್ ಕೊಡಗ್ಗರ ಸಂಸ್ಥಾನತ್‌ರ ಚಿಕ್ಕವೀರಪ್ಪ ಒಡೆಯ ಜವಾಬ್ ಕೊಡ್‌ತ ವಿವರ.

"ನಿಂಗ ಎಣ್ಣೆನಪೋಲೆ ಸದರಿ ಸೀಮೆ ಈ ಬರಿಕ್ ಬುಟ್ಟಿತ್ ತಪ್ಪದ್, ಎಕ್ ತಪ್ಪಿರಾ?"ಂದ್ ಕೇಟಾಂಗ್ ಈ 3 ಲಕ್ಷ ವರಹತ್ ಕಾಲ್ ಭಾಗ ಪಣತ್‌ನ ನಿಂಗ ತಂದಿತ್, ಬಾಕಿ ಪಣಕ್ ನಿಂಗಡ ದಳವಾಯಿನ ಹೊಣೆ ಮಾಡ್‌ನಕ ಈ ಸೀಮೆನ ವಿಂಗಡಣೆ ಮಾಡಿತ್ ತಪ್ಪ. ಪಿಳ್ಳಾ ನಿಂಗ ಅಲ್ಲಿ ರಾಣ್ಯ ಬೆಚ್ಚೋಳಿ"ಂದ್ ಎಣ್ಣೆನಾಂಗ್ ದಂಡ್ ಕಡೆಕಾರಳುಂಡ್ ಒಪ್ಪಿಗೆ, ತಕ್ಕ್ ಎಡ್‌ತಂಡ್ ಕರಾರ್ ಎಳ್ಳೆಚಿಟ್ಟಂಡತ್.

ಇದೇಪೋಲೆ ಕೊಡಗ್ಗರ ಸಂಸ್ಥಾನತ್‌ಂಜ ಕಾಲ್‌ಭಾಗ ಪಣ, ಬಾಕಿ ಪಣಕ್ ದಳವಾಯಿರ ತಮ್ಮಣ ಬೋನಿರ ಚರ್ಮಣ ಎಣ್ಣುವ ವ್ಯಕ್ತಿನ್, ಫಜರುಲ್ಲಾ ಖಾನ್‌ರ ಪಕ್ಕ ಅಯೆಚಿತ್, "ನಿಂಗ ಕರಾರ್‌ಪೋಲೆ ಸೀಮೆನ ಬುಟ್ಟಿತ್ ತಾರಿ"ಂದ್ ಕೇಟಲ್ಲಿ, ಈ ವಿವರಕ್ ಅರ್ಜಿ ಎಳ್ಳಿತ್ ಆಂಡ ಮೀದ ಪಣತ್‌ನ ಚರ್ಮಣಂಡ ನವಾಬ ಹೈದರಾಲಿ ಖಾನ್‌ರ ಪಕ್ಕ ಫಜರುಲ್ಲಾ ಖಾನ್ ಅಯೆಚಿ ಕೊಡ್‌ತತ್.

## ಚಿಕ್ಕವೀರಪ್ಪ ಒಡೆಯ ಶ್ರೀ ಶೃಂಗೇರಿ ಗುರುಪೀಠಕ್ ಭೂಮಿ ದಾನ ಮಾಡ್‌ನದ್

ಚಿಕ್ಕವೀರಪ್ಪ ಒಡೆಯ ತಾನ್ ವೀರಶೈವ ಪಂಥಕಾರ ಆನಕೊ ವೈದಿಕ ಸಂಪ್ರದಾಯತ್‌ರ ದೇವತೆಯಡ ಮೀದ ಭಕ್ತಿ ಉಳ್ಳವ ಆಯಿತಿಂಜತ್. ಪಟ್ಟಿಮಡ ಮೀದ ಗೌರವ ಬೆಚ್ಚಿತಿಂಜದ್ ಅವಂಡ ಓರ್ ದಾನಶಾಸನತ್ ಗೊತ್ತಾಪ. ಅವ ತಾಂಡ ರಾಜ್ಯಭಾರ



ಕಾಲತ್ ಶಾಲಿವಾಹನ ಶಕ 1678ಂದ ಧಾತು ಸಂವತ್ಸರತ್ ಎಣ್ಣಿಕ ಕ್ರಿ.ಶ. 1756ನೆ ಇಸವಿಲ್ ಶೃಂಗೇರಿ ಜಗದ್ಗುರುವಕ್ ತಾಂಡ ರಾಜ್ಯತ್ ಓರ್ ಊರ್‌ನ ದಾನ ಆಯಿತ್ ಕೊಡ್‌ತ ದಾನಶಾಸನ ಪತ್ರ ಶೃಂಗೇರಿ ಮಠತ್ ಉಂಡ್. ಅದ್ ಈ ಕೇದತಾರನ್ನಕೆ ಉಂಡ್.

ಶ್ರೀ ವಿದ್ಯಾಶಂಕರ ಶಾರದಾಂಬಾ ಚಂದ್ರಮೌಳೀಶ್ವರ ರತ್ನಗರ್ಭ ವಿನಾಯಕ ಸ್ವಾಮಿಯ ಪಾದಕ್ಕೆ | ನಮಸ್ತೆ ಲೋಕ ಪೂಜ್ಯಾಯ ಸರ್ವ ಕರ್ಮಸುಸಾಕ್ಷಿಣೇ ಫಲದಾಯ ನಮೋ ನಿತ್ಯ ಕೇಶವಾಯ ಶಿವಾಯ ಚ ನಮಸ್ತುಂಗ ಶಿರಸ್ತುಂಬಿ ಚಂದ್ರ ಚಾಮರಚಾರವೇ ತ್ರೈಲೋಕ್ಯ ನಗರಾರಂಭ ಮೂಲ ಸ್ತಂಭಾಯ ಶಂಭವೇ | ಸ್ವಸ್ತಿ ಶ್ರೀಜಯಾಭ್ಯು ದಯ ಶಾಲಿವಾಹನ ಶ | ಕವರುಶ ೧೬೭೮ನೆಯ ಸಂದ ವರ್ತಮಾನ ಧಾತು ಸಂವತ್ಸರದ ಚಯಿತ್ರ ಬ | ಶ್ರೀಚಂದ್ರವಾರದಲ್ಲೂ ಶ್ರೀಮತ್ಪರಮಹಂಸ | ಪರಿ ವ್ರಾಜಕಾಚಾರ್ಯವರ್ಯ ಪದ ವಾಕ್ಯ ಪ್ರಮಾಣ ಪಾರಾವಾರ ಪಾರೀಣ ಯಮನಿಯಮಾಸನ ಪ್ರಾಣಾಯಾಮಪ್ರತ್ಯಾಹಾರ ಧ್ಯಾನಧಾರಣ ಸಮಾಧ್ಯಷ್ಟಾಂಗ ಯೋಗಾನುಷ್ಠಾನ ನಿಷ್ಕ ತಪಷ್ಟ್ರ ಋತ್ಯುನಾಧ್ಯವಿಭಿಂನ ಗುರುಪರಂಪರಾ ಪ್ರಾಪ್ತ ಪಡ್ವರ್ತನಾಸ್ಥಾ | ಪನಾಚಾರ್ಯ ವ್ಯಾಖ್ಯಾನ ಸಿಂಹಾಸನಾಧೀಶ್ವರ ಸಕಲ ನಿಗಮಾಗಮಸಾರ ಹೃದಯ ಸಾಂಖ್ಯತ್ರಯ ಪ್ರತಿಪಾದಕವೈದಿಕ | ಮಾರ್ಗ ಪ್ರವರ್ತಕ ಸರ್ವತಂತ್ರ ಸ್ವತಂತ್ರ ಆದಿ ರಾಜಧಾನಿ ವಿದ್ಯಾನಗರ ಮಹಾರಾಜಧಾನಿ ಕರ್ನಾಟಕ ಸಿಂಹಾಸನ | ಪ್ರತಿಷ್ಠಾಪನಾಚಾರ್ಯ ಶ್ರೀಮದ್ರಾಜಾಧಿರಾಜಗುರು ಭೂಮಂಡಲಚಾರ್ಯ ರುಶ್ಯ ಶ್ರುಂಗ ಪುರವರಾಧೀಶ್ವರ ತುಂಗ | ಭದ್ರಾ ತೀರವಾಸ ಶ್ರೀ ಸಚ್ಚಿದಾನಂದ ಭಾರತಿ ಸ್ವಾಮಿಗಳೈಯ್ಯನವರ ಕರಕಮಲ ಸಂಚಾತರಾದ ಶ್ರುಂಗೇರಿ ಶ್ರೀಮದಭಿ | ನವ ಸಚ್ಚಿದಾನಂದ ಭಾರತಿ ಸ್ವಾಮಿಯವರ ಮಠದ ಶ್ರೀವಿದ್ಯಾಶಂಕರ ಸ್ವಾಮಿ ಶಾರದಾಂಬಿಕೆ ಅಮ್ಮನವರು ಶ್ರೀಚಂದ್ರ | ಮೌಳೀಶ್ವರ ಸ್ವಾಮಿಯವರ ಸನ್ನಿಧಿಯಲ್ಲೂ ಆಶ್ವೀಜ ಶು ೧೦ ದಿವಸ ನಡೆ | ಉವ ಪೂಜೆ ಬ್ರಾಹ್ಮಣ ಸಂತರ್ಪಣೆ ದೀಪಾ | ರಾಧನೆ ಅಂಗರಂಗ ವೈಭವೋತ್ಸಹ ಮುಂತಾದ ಸೇವೆ ಬಗ್ಗೆ ಕಾಶ್ಯಪ ಗೋತ್ರದ ಕೊಡಗಿನ ಹಾಲೇರಿ ವೀರಪ್ಪೋಡೇರೂ ಸ | ಮರ್ಪಿಸಿದ ಸ್ಥಳದ ಧರ್ಮ ಶಾಸನದ ಕ್ರಮವೆಂತೆಂದರೆ ನಮ್ಮ ಸ್ಥಳಕ್ಕೆ ನಡೆದುಬರುವ ಕೊಡಲಿ ಮಂದೆ ಸ್ಥಳ ಒಂದಕ್ಕೆ ಹುಟ್ಟುವಳಿ ಸಿಪ್ಪು ಗ ೩೦೦ ವರಹ ಇದಕ್ಕೆ ಕೂಡಿದ ಉಪಗ್ರಾಮ ಕೆರೆಗು ಸಹಾ ಶ್ರುಂಗೇರಿ ಮಠದ ಶ್ರೀ ವಿದ್ಯಾಶಂಕರ ಸ್ವಾಮಿ ಶಾರದಾಂಬಿಕೆ ಅಮ್ಮನವರು ಚಂದ್ರಮೌಳೀಶ್ವರ ಸ್ವಾಮಿಯವರ ಸನ್ನಿಧಿಯಲ್ಲೂ ವಿಜಯದಶಮಿ ದಿವಸದಲ್ಲೂ ನಡೆವ ಸೇವೆ ಬಗ್ಗೆ ಹಾಲೇರಿ ವೀರಪ್ಪೋಡೇರೂ ನಮ್ಮ ಮಾತಾಪಿತೃಗಳಿಗೆ | ಗೆ ಪುಣ್ಯಲೋಕ ಪ್ರಾಪ್ತಿಯಾಗಿ ಸಂಸ್ಥಾನಾಭಿವೃದ್ಧಿ ಯಾಗಬೇಕೆಂದು ಈ ಶುಭ ದಿವಸದಲ್ಲೂ ಸಹಿರಣ್ಣೋದಕ | ದಾನ ಧಾರಾಪೂರ್ವಕವಾಗಿ ಸರ್ವ ಮಾನ್ಯವಾಗಿ ಕೊಟ್ಟೆವಾಗಿ ಈ ಕೊಡಲಿ

ಮಂದೆ ಸ್ಥಳವನ್ನು ಶೃಂಗೇರಿ ಮಠದ |ಶ್ರೀ ವಿದ್ಯಾಶಂಕರ ಸ್ವಾಮಿ ಶ್ರೀ ಶಾರದಾಂಬನವರು  
ಶ್ರೀ ಚಂದ್ರಮೌಳೀಶ್ವರ ಸ್ವಾಮಿಯವರ ಸನ್ನಿಧಿಯಲ್ಲೂ ಕಾಲಂ |ಪ್ರತಿಯಲ್ಲೂ ಆಶ್ವೀಜ  
ಶು ೧೦ರಲ್ಲೂ ನಡೆವ ಪೂಜೋತ್ಸವದ ಬಗ್ಗೆ ಆ ಚಂದ್ರಾರ್ಕಸ್ಥಾಯಿಯಾಗಿ ಸುಖದಿಂ  
ಅನುಭವಿಸಿಕೊಂಡು ಬರಬೇಕೆಂದು ಹಾಲೇರಿ ವೀರಪ್ಪೋಡೇರೂ ಸಮರ್ಪಿಸಿದ ಕೊಡಲಿ  
ಸ್ಥಳಧರ್ಮಶಾಸನ ಆದಿತ್ಯ ಚಂದ್ರಾವನಿಲೋನಲಶ್ಚ ದ್ವೈಭೂಮಿರಾಪೋ  
ಹೃದಯಂಯಮಶ್ಚ ಅಹಶ್ಚರಾತ್ರಶ್ಚ ಉಭೇಚಸಂಧ್ಯಾ ಧರ್ಮನ್ಯಜಾನಾತಿ ನರಸ್ಯ ಉತ್ತಂ |  
ದಾನಪಾಲನಂಯೋರ್ಮಧ್ಯೇ ದಾನಾಭ್ರೇಯೋನುಪಾಲನಂ | ದಾನಾತ್ಸ್ವರ್ಗಮವಾಪ್ನೋತಿ  
ಪಾಲನಾದಚ್ಛತಂ ಪದಂ || ಶ್ರೀ ವೀರಭದ್ರ

ಕೊಡಿಯತ ದಾನ ಶಾಸನತನುಂಡ್ ಕೊಡಗರ ರಾಜ ಚಿಕ್ಕವೀರಪ್ಪ ಒಡೆಯ 1756ನೇ  
ಇಸವಿ ಏಪ್ರಿಲ್ 19ಂಗೆ ಶೃಂಗೇರಿ ಮಠತರ ಗುರುಕ್ ವಿಜಯದಶಮಿ ದಿನತ್ ಶೃಂಗೇರಿರ  
ವಿದ್ಯಾಶಂಕರ, ಶಾರದಾಂಬಿಕೆ ಪಿಳ್ಳಾ ಚಂದ್ರ ಮೌಳೀಶ್ವರ ತಿರಿಕೆಲ್ ನಡಪ ಪೂಜೆ,  
ಕೊಳ್‌ದಾನ, ದೀಪಾರಾಧನೆ, ದೀಪಾಲಂಕಾರ ಇನ್ನತ ನಮ್ಮ ನಡತುವಕ್ 'ಕೊಡಲಿಮಂದೆ'  
ಎಣ್ಣುವ ಮುನ್ನೂರ್ ವರಹ ಸರ್ಕಾರಕ್ ತೆರಿಗೆ ಉತ್ಪತ್ತಿ ಇಂಜ ಜಾಗತನ ಸರ್ವಮಾನ್ಯ  
ಆಯಿತ್ ಕೊಡತತಂದ್ ಗೊತ್ತಾಪ. ಈ ಜಾಗ ಅರಕಲಗೂಡ್‌ಕ್ ಪಕ್ಕತೆ ಇಂಜತ್.  
ಇದ್‌ಂಗ್ ಕೊಡಲಿಪುರ ಎಣ್ಣುವ ಪೆದ ಇಂಜತ್.

ಆಚೀಂಗಿ, 1760-61ತ್ ಹೈದರಾಲಿ ಖಾನ್ ಏಳಾಯಿರ ಸೀಮೆಂಜ ಮೈಸೂರ್  
ರಾಜ್ಯಕ್ ಕೊಡಂಡಿಯ ಹೋಬಳಿನ ಪಾಲ್‌ಟಿಪಿಳ್ಳಾ ಶೃಂಗೇರಿ ಮಠಕ್ ಚಿಕ್ಕವೀರಪ್ಪ  
ಒಡೆಯ ದಾನ ಆಯಿತ್ ಕೊಡತ ಕೊಡಲಿಪುರತ್ ಪಾದಿಭಾಗ ಮೈಸೂರ್ ರಾಜ್ಯಕ್  
ಸೇರ್‌ಚಿ. ಅಕ್ಕ ಕೊಡಲಿಪುರತರ ಮೈಸೂರ್ ರಾಜ್ಯತರ ಭಾಗತನ ಮೈಸೂರ್ ರಾಜಂಗ  
ಶೃಂಗೇರಿ ಮಠಕ್ ಸರ್ವಮಾನ್ಯ ಆಯಿತ್ ಕೊಡತತ. ಅವು ಈ ಸಮ್ಮಂಧ್ ಎಳ್ಳೊಚಿಟ್ಟಿ  
ನಿರೂಪತ್ ಕೊಡಲಿ ಪುರತರ ಪಾದಿ ಭಾಗ ಕೊಡಗ್ ರಾಜಂಗಕ್ ಕೊಡನದಂದ್  
ಕಾಟಿತ್. ಆ ನಿರೂಪ ಇನ್ನನೆ ಉಂಡ್.

### 37 ನಿರೂಪ. ವಿಕ್ರಮ ಕ್ರಿ.ಶ. 1760-61

ವಿಕ್ರಮ ಸಂವತ್ಸರದ ಭಾದ್ರಪದ ಬ 10ರಲ್ಲು ಶ್ರೀಮತು ಮೈಸೂರ್ ನಗರದ ಹೋಬಳಿ  
ಸೀಮೆ ವಿಚಾರದ ಲಕ್ಷ್ಮಿಕಾಂತಯ್ಯನಿಗೆ ಬರೆಸಿ ಕಳುಹಿಸಿದ ನಿರೂಪ ಅದಾಗಿ

ನಿನ್ನ ಹವಾಲು ಮೈಸೂರ್ ನಗರದ ಹೋಬಳಿ ವಿಚಾರದ ಚಾವಡಿ ವಿಳಿತದ  
ಅರಕಲಗೂಡು ಸ್ಥಳದ ಕೊಡಲಿಪುರದ ಗ್ರಾಮವು ಮೊದಲಿಗೆ ರಾಯದತ್ತವಾಗಿ ಶೃಂಗೇರಿ  
ಶ್ರೀಮಠದ ಹವಾಲಿಗೆ ಶಾಸನ ಪ್ರಕಾರಕ್ಕೆ ನಡೆದು ಬರುತ್ತಾ ಇದ್ದುದು, ಈಚೆಗೆ ಅರಕಲಗೂಡು

ಗಡಿಯು, ಅರಮನೆ ಹವಾಲಾದ ಅರಬ್ಬ, ಶ್ರೀಮಠದ ಹವಾಲಿಗೆ ಈ ಗ್ರಾಮವು ನಡೆಯದೆ ಇದ್ದುದ್ದರಿಂದ ತರುವಾಯ ಈ ಕೊಡಲಿ ಗ್ರಾಮದಲ್ಲಿ ಅರವಾಸಿ ಗ್ರಾಮವು ಕೊಡಗರ ಹವಾಲಿಗೆ ಸೇರಿದ್ದ ಆ ಬಗ್ಗೆ ಅರ್ಧ ಗ್ರಾಮವನ್ನು ಶ್ರೀಮಠದ ಹವಾಲಿಗೆ ಧಾರಯನ್ನರೆದು ಕೊಟ್ಟ ಕಾರಣ, ಅರಮನೆ ಹವಾಲಿಗೆ ಸೇರಿದ ಅರ್ಧ ಗ್ರಾಮವನ್ನು ಮಠದ ಹವಾಲಿಗೆ ಕೊಡಿಸಿ ನಿರುಪಾಧಿಕ ಸರ್ವ ಮಾನ್ಯವಾಗಿ ನಡೆಸಿಕೊಂಡು ಬರುವ ಹಾಗೆ ಕಟ್ಟೆ ಮಾಡಿಸಿ ಇದ್ದೀತು. ಆ ಪ್ರಕಾರಕ್ಕೆ ಅರಕಲಗೂಡು ಸ್ಥಳದ ಕೊಡಲಿಪುರದ ಗ್ರಾಮವನ್ನು ಮಠದ ಹವಾಲಿಗೆ ಕೊಡಿಸಿ ಸರ್ವ ಮಾನ್ಯವಾಗಿ ಶಾಶ್ವತವಾಗಿ ದಾನ ಸಾಧನ ಪ್ರಚಾರಕ್ಕೆ ನಡೆಸಿಕೊಂಡು ಬರುವುದು. ಈ ನಿರೂಪವನ್ನು ಚಾವಡಿ ಕರಣೀಕರ ಕಡಿತಕ್ಕೆ ಬರೆಸಿ ತಿರುಗಿ ಕೊಡುವುದು. ಶ್ರೀ ಮುದ್ರೆ.

ಈ ನಿರೂಪತಾಂಜ ಪಂಡ್ ವಿಜಯನಗರ ರಾಜಂಡ ವೈಭವತಾರ ಕಾಲತ್ ಕೊಡಲಿಪುರ ವಿಜಯ ನಗರತಾರ ರಾಜಂಗಳುಂಡ್ ಶೃಂಗೇರಿ ಮಠಕ್ ಸರ್ವಮಾನ್ಯ ಆಯಿತ್ ಕೊಡ್ತತಂದ್ ಗೊತ್ತಾಪ. ಅಲ್ಲಿಂಜ ಈ ಸೀಮೆ ಸುರೂಲ್ ಕೊಡಗೂರ ರಾಜಂಗಡ ಅಧೀನಕ್ ಬಪ್ಪಕ ಚಿಕ್ಕವೀರಪ್ಪ ಕೊಡಲಿಪುರತಾನ ಮರಾಚಿ ಶೃಂಗೇರಿ ಮಠಕ್ ದಾನ ಆಯಿತ್ ಕೊಡ್ತತ. ಇತ್ತರಿಗೆ ಸೀಮೆ ಮೈಸೂರ್ ಭಾಗ ಆ ದೊರೆಯಕ್ ಬುಟ್ಟ್ ಕೊಡ್ತತಿಂಜ ಪೋಲೆ ಅಯಿಂಗಡ ಭಾಗತ್ ಇಂಜ ಕೊಡಲಿಪುರ ಗ್ರಾಮತಾನ ಅವು ಶೃಂಗೇರಿ ಮಠಕ್ ಮರಾಚಿ ಸರ್ವ ಮಾನ್ಯ ಆಯಿತ್ ಕೊಡ್ತತ.

ಕೈಂಜ ಶತಮಾನತ್ ಕೊಡಗೂರ ಚರಿತ್ರೆ ಪಿಳ್ಳಾ ಬೋರೆ ವಿಚಾರತಾನ ಎಳ್ಳನ ಐರೋಪ್ಯ ಗ್ರಂಥಕರ್ತಂಗ ಕೊಡಗೂರ ರಾಜಂಗ ಲಿಂಗಾಯತಂಗ ಆನಗುಂಡ್ ಅಯಿಂಗಕ್ ಪಟ್ಟಮಡ ಮೀದ ನಂಬಿಕೆ ಇಂಚ್ಲೆಂದ್ ಎಳ್ಳಿತ್. ಆಚೀಂಗಿ, ಸತ್ಯ ವಿಚಾರ ಅದಲ್ಲ್ಯಂದ್ ಚಿಕ್ಕವೀರಪ್ಪಂಡ ಭೂಮಿರ ದಾನಶಾಸನತಾಂಜ ಗೊತ್ತಾಪ. ಚಿಕ್ಕವೀರಪ್ಪ ಆನಪಿಳ್ಳಾ ಆಳ್ವಾನ ರಾಜಂಗಡ ಕರಣಿಕಂಗ ಪಿಳ್ಳಾ ಆಪ್ತಂಗ ಪಟ್ಟಮಳೆ ಆಯಿತಿಂಜತ್ ಎಣ್ಣುವದ್ ರಾಜೇಂದ್ರನಾಮಲ್ ಗೊತ್ತಾಪ.

ಚಿಕ್ಕವೀರಪ್ಪ ಚರ್ಪತಾಂಜೆ ಕಾಯಿಲಕಾರ. ಇಂವ ಕಲಿ ಸಂದ 4868ನೆ ವ್ಯಯ ಸಂವತ್ಸರತ್ ಎಣ್ಣುಕ 1776ನೆ ಇಸವಿಲ್ ಸ್ವರ್ಗ ವಾಸಿಯಾಚಿ. ಅಕ್ಕ ಹೈದರಾಲಿ ಖಾನ್ ಕೊಡಗೂರ ರಾಜನುಂಡ್ ಪಣ ಎಡ್ತಂಡ್ ಮಹಾರಾಜ ದುರ್ಗತಾರ ಉಚ್ಚಂಗಿ ಸೀಮೆನ ಆ ರಾಜಂಗ್ ಬುಟ್ಟ್ ಕೊಡ್ಪಿಂದ್ ಎಣ್ಣಾನ ತಕ್ಕಾರಪೋಲೆ ನಡ್ಂದಾಲೆ. ಹೈದರಂಗೂ, ಚಿಕ್ಕವೀರಪ್ಪ ಒಡೆಯಂಗೂ ಈ ಸಮ್ಮಂಧ ಪತ್ರ ವ್ಯವಹಾರ ನಡ್ಂದಂಡ್ ಇಪ್ಪಕೆ ಚಿಕ್ಕವೀರಪ್ಪ ಚತ್ತಪೋಚಿ. ಇಂವಂಗ್ ಮಕ್ಕಳೂ ಇಂಚ್ಲೆ. ಆನಗುಂಡ್ ಮುದ್ದು ರಾಜಂಡ ಮೂಂದ್ ಕಣ್ಣ ಮಕ್ಕಡಾತ್ ಪರಿಯಂವನಾನ ದೊಡ್ಡವೀರಪ್ಪ ಒಡೆಯಂಡ

ಸಂತಾನ ಅವಂಡ ಕರ್ಮೋವ ಚಿಕ್ಕವೀರಪ್ಪ ಒಡೆಯಂಡ ಕಾಲ ಕೈಂಜನ್ನಕೆ ಆಖೀರಿಯಾಚಿ.

## ಮೈಸೂರ್ ಹೈದರಾಲಿರ ಸೈನ್ಯ ಚೋಪ್‌ಚಿಟ್ಟಿದ್, ಕನ್ನಂಡ ದೊಡ್ಡಯ್ಯಂಡ ವೀರಮರಣ, ಅವಂಡ ಪೆದತ್ ಇಕ್ಕಲೂ ಪೂಜೆ

ಚಿಕ್ಕವೀರಪ್ಪ ಒಡೆಯ ಚಿತ್ತಪಿಳ್ಳಾ ದೊಡ್ಡವೀರಪ್ಪ ಒಡೆಯಂಡ ದಂಡ್ ಚೆರಿಯ ತಮ್ಮಣಂಗ ಹಾಲೇರಿ ಮುದ್ದುರಾಜ ಪಿಳ್ಳಾ ಹೊರಮಲೆರ ನಂದ ರಾಜಂಡ ಮೋನೆಯಳಾನ ಹಾಲೇರಿರ ಅಪ್ಪಾಜಿರಾಜ ಪಿಳ್ಳಾ ಹೊರಮಲೆ ಮುದ್ದಯ್ಯ ರಾಜ ಇವು ದಂಡಾಳು ಅಪ್ಪರಿಪ್ಪರ ದುಂಬ ಚಾಯಿತೆ 1766ತ್‌ಂಜ 1770ಕೆತ್ತನೆ ರಾಜ್ಯಭಾರ ಮಾಡ್‌ಚಿ. ದಾಯಾದಿಯ ಚಾಯಿತೆ ಇಂಜಂಡ್ ಓರ್ ರಾಜ್ಯತ್‌ನ ಆಳನ ಉದಾಹರಣೆ ಚರಿತ್ರೆಲ್ ಇದೊಂದೆ ನಂಗಕ್ ಗೊತ್ತ್‌ಕೊಟ್ಟುವ!

ಈ ದಂಡ್ ರಾಜಂಗ ಕೊಡಗರ ಪಟ್ಟಿಕ್ ಬಂದನ್ನಕೆ ಹೈದರಾಲಿಖಾನ್ ಕೊಡಗ್ ರಾಜಂಗ್ ಬುಟ್ಟ್‌ಕೊಡ್‌ಪಕ್ ಒತ್ತಂಡ ಉಚ್ಚಂಗಿಸೀಮೆನ ವಾಪಾಸ್ ಕೇಟತ್. ಆ ಸಮ್ಮಂದ ಅವು ಫಜರುಲ್ಲ ಖಾನ್‌ರ ಕೂಡೆ ಇನ್ನನೆ ಕೇಟತ್.

"ಗೊತ್ತಪಡ್‌ತನ ಪೋಲೆ ನಂಗಡ ಸಂಸ್ಥಾನತ್‌ಂಜ ಕಾಲೋದಿ ಪಣ ಕೊಡ್‌ತಂಡ್ ಬಾಕಿ ಪಣಕ್ ನಂಗಡ ದಳವಾಯಿ ತಮ್ಮಣನ ಜವಾಬ್ದಾರಂದ್ ಎಣ್ಣಿತ್. ಕರಾರ್‌ಪೋಲೆ ಇಣ್ಣಾ ಸೀಮೆನ ಎನ್ನಂಗ್ ನಂಗಕ್ ಬುಟ್ಟಿತ್ ತಂದಂಡಿಲ್ಲೆ"ಂದ್ ಕೇಟಿಲ್ಲಿ ನವಾಬ್ ಹೈದರಾಲಿ ಖಾನ್ ಫಜರುಲ್ಲಾ ಖಾನ್‌ನ ಇನ್ನನೆ ಕೇಟತ್.

"ಇಕ್ಕಾಕಣೆ ತಕ್ಕಬಾಕ್ ನಡ್‌ತನ ಚಿಕ್ಕವೀರಪ್ಪ ಒಡೆಯ ಚಿತ್ತಪೋಯಿತ್. ಇಕ್ಕ ಬೋರೆ ರಾಜ ಆನಗುಂಡ್ ನಿಂಗ ಪಣ ತಂದಕ ಸೀಮೆ ಬುಟ್ಟ್ ತಪ್ಪಿಂದ್ ಎಣ್ಣಿತ್ ಇಕ್ಕ ಪಣ ತರತೆ ಸೀಮೆ ತಪ್ಪಿಂದ್ ಎಣ್ಣುವದಾ? ಇಣ್ಣಿ ನಂಗ ಬಾಕಿ ಪಣ ತಂದಕ ಅದ್‌ನ ಎಡ್‌ತಂಡ್ ಆಖೀರಕ್ ಸೀಮೆನ ತರತೆ ಮೋಸ ಮಾಡುವನ್ನಕೆ ಕಾಂಬ. ನಂಗ ನಿರ್ಕಪಡ್‌ತನ ಪೋಲೆ ಪಣ ತಂದಿತ್ ಇಣ್ಣಿ ನಂಗಡ ಸೀಮೆ ತಾರಿ, ಬಾಕಿ ಪಣ ತಪ್ಪಿಂದ್ ಎಣ್ಣುವಕ, ಅದ್ ಕಯ್ಯಲೆ. ದುಡ್ಡ್ ತಾರಿಂದ್ ಕೇಟಿತ್. ಇವು ಸೀಮೆ ತಾರಿಂದ್

ಕೇಟಿತ್"

ಈ ಪೋಲೆ ತಕ್ಕ ತಕ್ಕಾಯಿ ಅದೇ ವ್ಯಯ ಸಂವತ್ಸರತ್ ಸಲ್ಲಾಮುರುದು ಹಾಲೇರಿ ಅರಮನೆಲ್ ಇಂಜ ಮುದ್ದು ರಾಜಂಡ ತಮ್ಮಂಗಲಾನ ಲಿಂಗ ರಾಜೇಂದ್ರ ಒಡೆಯಂಗೂ, ಫಜುರುಲ್ಲಾಖಾನ್‌ಕೂ ಏಳಾಯಿರ ಸೀಮೆರ ಪಕ್ಕ ಜಗಳ ಆಚಿ. ಈ ಜಗಳತ್ ಫಜುರುಲ್ಲಾಖಾನ್‌ರ ಸೈನ್ಯಕ್ ದುಂಬ ಪೊಯ್ಯಾಚಿ.

ಈ ಜಗಳತ್ ಮುದ್ದುರಾಜ ಪಿಳ್ಳಾ ಮುದ್ದಯ್ಯ ರಾಜಂಡ ದಳವಾಯಿ ಆನ ಕನ್ನಂಡ ದೊಡ್ಡಯ್ಯ ಪಿಳ್ಳಾ ಅಕ್ಕತ ಕಾಲತ್ ಇಞ್ಜೋರ್ ಕೊಡವವೀರ ಅಪ್ಪಚ್ಚಿರ ಮಂದಣ್ಣ ಕೂಡಿಯಾಡ್‌ಚಿ. ಈ ಪಡೆಲ್ ಫಜುರುಲ್ಲಾಖಾನ್ ಚೋತ್ ಪೋಯಿತ್ ಬಿಸಲೆಘಟ್ಟ ಇಞ್‌ಂಜಿ ಪೋಯಂಡಿಪ್ಪಕ, ಲಿಂಗರಾಜೇಂದ್ರ ಒಡೆಯ ತಾಂಡ ಜನಳ ಕೂಟಿಯಂಡ್ ಪೋಯಿತ್ ಬಿಸಲೆ ಘಟ್ಟತ್ ತಡ್‌ತಿತ್ ಜಗಳ ಮಾಡ್‌ಚಿ. ಈ ಪಡೆಲ್ ಫಜುರುಲ್ಲಾ ಖಾನ್ ಚೋತ್‌ಪೋನಕೊ ಕೊಡಗ್ಗರ ರಾಜಂಡ ದಳವಾಯಿ ಕನ್ನಂಡ ದೊಡ್ಡಯ್ಯ, ಅಪ್ಪಚ್ಚಿರ ಮಂದಣ್ಣ ಪೋರಾಡಿತ್ ಚಿತ್ತತ್.

ಈ ಪಡೆಲ್ ಕನ್ನಂಡ ದೊಡ್ಡಯ್ಯಂಗ್ ತಾನ್ ಚಿತ್ತ ಪೋಪಿಂದ್ ಅವಂಡ ಮನಸ್ಸಲ್ ತೋಂದನ್ನಕೆ ಇಂಜತ್. ಎನ್ನಂಗಣ್ಣಕ ಈ ಪಡೆಕ್ ಪೊರ್ಡುವಾಂಗ್ ಮುಪ್ಪಡೆ ಕನ್ನಂಡ ದೊಡ್ಡಯ್ಯ ಮುದ್ದು ರಾಜಂಡ ಕೂಡೆ "ದಂಡ್ ಕುರಿ ನಾನ್ ಮಹಮ್ಮದೀಯಡ ಸೈನ್ಯತನ ಚೋಪ್‌ಚಿಟ್ಟಿತ್ ರಾಜಂಗ್ ನಾಡ ಭಕ್ತಿನ ಒಪ್ಪಾಚಿಟ್ಟಿಯೆ. ಆಚೇಂಗಿ, ಈ ಕುರಿ ನಾನ್ ಪಡೆಂಜ ವಾಪಾಸ್ ಬಪ್ಪುಲೆ"ಂದ್ ಎಣ್ಣೆತಿಂಜ ತಕ್ಕ ನೇರಾಯಿತಿಂಜತ್.

1

ಅಂವ ಚಿತ್ತ ಜಾಗ ಉತ್ತರ ಕೊಡಗ್ಗರ ಶನಿವಾರಸಂತೆ ಹೋಬಳಿರ ಕಾಜೂರ್‌ಲ್ 1767ನೆ ಇಸವಿಲ್. ಇಂವಂಡ ಗೇನಕ್ ಕನ್ನಂಡ ಒಕ್ಕಕಾರ ಕಲ್ಲಲ್ ಇಂವಂಡ ಬಿಂಬತನ ಮಾಡಿತ್ ಮಡಿಕೇರಿಲ್ ಕನ್ನಂಡಬಾಣೆಲ್ ಬೆಚ್ಚಿತ್. ರಾಜಂಡ ಕಾಲತ್ ದುಂಬ ಮಳೆ ಪೊಜ್ಜಂಡ್ ಇಪ್ಪಕ ಇಕ್ಕ ಬಾಣೆ, ಪರಂಬ್ ಆಯಿತುಳ್ಳ ಜಾಗ ಎಲ್ಲ ಅಕ್ಕ ಬೇಲ್ ಆಯಿತಿಂಜತ್. ಇಕ್ಕಲೂ ಅಲ್ಲಿ ಬೇಲ್‌ಕ್ ಏರಿ ಇಟ್ಟಿತುಳ್ಳದ್ ಕಂಡ್ ಬಪ್ಪ.

ಚೆನ್ನಂಗ್ ಕಾಲಕ್ ಬಯ್ಯ ದೊಡ್ಡಯ್ಯಂಡ ಬಿಂಬ ಬೆಚ್ಚಿ ಜಾಗತ್ ಕನ್ನಂಡ ಒಕ್ಕಕಾರ ಓರ್ ಕೈಮಡ ಕೆಟ್ಟಿತ್. ಈ ಕೈಮಡತರ್ ಎದಿಕೆ ಕಾಲೋದಿ ಬಿದ್ದಂಡ ಒಕ್ಕಕಾರ ನಮ್ಮ ಕಯಿಪ. ಅಕ್ಕ ದೊಡ್ಡಯ್ಯಂಡ ತೆರೆ ಎಣ್ಣಕ ಅಕ್ಕತ ರೂಪತನ, ಬೋರೆ ಉಪದೇವತೆಯಡ ರೂಪತನ ಮಲಿಯಂಗ ಇಡುವ. ಎಳಿಯವು ಈ ದೇವತೆಯಡ ಆಶೀರ್ವಾದ ಪಡ್‌ಂದವ.

ಕಾಜೂರ್ ಪಡಿರ ಪಡೆಲ್ ಕನ್ನಂಡ ದೊಡ್ಡಯ್ಯ ಪಿಳ್ಳಾ ಬೋರೆ ವೀರಂಗ ಪೋರಾಡಿತ್



ಚತ್ತಕೊ ಫಜುರುಲ್ಲಾಖಾನ್ ಚೋತಿತ್ ಬಿಸಲೆಫಟ್ಟಕಾಲೆ ಇಳ್ಳಾಂಜಿ ಪೋಂದೂಂದ್ ಪೋರಟತ್. ಅಕ್ಕ ಲಿಂಗರಾಚೇಂದ್ರ ಒಡೆಯ ಸೈನ್ಯತೋಡೆ ಪೋಯಿತ್ ಬಿಸಲೆಫಟ್ಟತ್ ಫಜುರುಲ್ಲಾಖಾನ್ ಅಡ್ಡಕೆಟ್ಟಿತ್ ಪಡೆಪೊತ್ತತ್. ಈ ಪಡೆಲ್ ಫಜುರುಲ್ಲಾಖಾನ್ ಪಾದಿ ಸೈನ್ಯತನ ಕೊಂದ್‌ಟಾಂಗ್ ಫಜುರುಲ್ಲಾಖಾನ್ ತಾಂಡ ಸೈನ್ಯತರ ಸಾಮಾನ್ ಸಾಹಿತ್ಯ, ಫಿರಂಗಿ ಇನ್ನತಾನೆಲ್ಲ ಆ ಫಟ್ಟಿತೆ ಬುಟ್ಟಿತ್ ಬಾಕಿ ಸೈನ್ಯತನ ಎಡ್‌ತಂಡ್ ಹೈದರಾಲಿ ಖಾನ್‌ರ ಸೀಮೆಕ್ ಪೋಚಿ. ಅವ ಬುಟ್ಟಿತ್ ಪೋನ ಸಾಮಾನ್ ಸಾಹಿತ್ಯತನೆಲ್ಲ ಕೊಡಗ್ಗರ ಸಂಸ್ಥಾನಕಾರ ಎಡ್‌ತಂಡತ್.

ಇಚ್ಚಕಾಕಣೆ ಕೊಡಗ್ಗರ ಸಂಸ್ಥಾನತಾಂಜ ಚಿಕ್ಕವೀರಪ್ಪ ಒಡೆಯ ಹೈದರಾಲಿಖಾನ್‌ಕ್ ಉಚ್ಚಂಗಿ ಸೀಮೆಕ್ ಕಾಲ್ ಪಾಲ್ ಪಣ ಕೊಡ್‌ತಿತ್ ಬಾಕಿ ಪಣಕ್ ಜವಾಬ್ದಾರನಾಯಿತ್ ಹೈದರಾಲಿರಲ್ಲಿಕ್ ಅಯೆಚಿತಿಂಜ ಬೋನಿರ ಚರಮಣ್ಣ ಶ್ರೀರಂಗ ಪಟ್ಟಿತ್ ಸೀತಾಳಿ ಆಯಿತ್ ಚತ್ತ್ ಪೋಚಿ. ಹೈದರಾಲಿಖಾನ್, ಫಜುರುಲ್ಲಾಖಾನ್ ಲಿಂಗ ರಾಚೇಂದ್ರ ಒಡೆಯನುಂಡ್ ಚೋತಿತ್ ಓಡಿಪೋನ ಸುದ್ದಿ ಕೇಟಿತ್ ಕೊಡಗ್ಗ ಸಂಸ್ಥಾನಕಾರಕೂ, ನಂಗಕೂ ಮಿಳ್ಳಾಕ್ ಜಗಳ ಬಕ್ಕಣ ಇಲ್ಲತೆ ಸಿನೇತಿಕೆಲ್ ಇರೊಂಡುಂದ್ ತೀರ್ಮಾನೆ ಮಾಡಿತ್ ನಗರತರ ರಾಜಂಗ ಅಮರಸುಳ್ಳತನ ಕೊಡಗ್ಗರ ಸಂಸ್ಥಾನಕ್ ಕೂಟಿತ್ ಇಂಜತಚ್ಚಕೆ.

ಇಕ್ಕ ನಂಗ ಅದ್‌ಂಡ ಪಕ್ಕತೆ ಉಳ್ಳ ಪಂಜ, ಬೆಳ್ಳಾರೆ ಎಣ್ಣುವ ದಂಡ್ ಮಾಗಣೆನ ಬುಟ್ಟಿತಪ್ಪ. ಇಇಳ್ಳಿಮಿಳ್ಳಾಕ್ ನಿಂಗ ನಂಗ ಸಿನೇತಿಕೆಲ್ ಇರೊಂಡುಂದ್ ಕಾಗದ ಎಳ್ಳಾಚಿಟ್ಟಿತ್ ಅಯೆಚತ್. ಅದೇ ಪೋಲೆ ಪಂಜ ಪಿಳ್ಳಾ ಬೆಳ್ಳಾರೆ ಎಣ್ಣುವ ದಂಡ್ ಮಾಗಣೆನ ನಗರ ಸೀಮೆಂಜ ಬೋರೆ ಮಾಡಿತ್ ಕೊಡಗ್ಗರ ಸಂಸ್ಥಾನಕ್ ಕೂಟಿತ್ ಸರ್ವೆಪೊಳೆರ ಪಕ್ಕ ತೋರಣ ಕೆಟ್ಟಾಚಿಟ್ಟಿತ್ ಕಲಿ ಸಂದ 4872ನೆ ವಿಕೃತ್ ಸಂವತ್ಸರತ್ ಬುಟ್ಟ್ ಕೊಡ್‌ತತ್. ಅಲ್ಲಿಂಜ ದಂಡ್ ಕಡೆಕಾರಳೊ ಸಿನೇತಿಕೆಲ್ ಇಂಜತ್.

## 17. ದೇವಪ್ಪ ರಾಜ 1770-1774

ರಾಜಮನೆತನತ್ ಬಿರ್‌ಕ್ ಲಿಂಗರಾಜೇಂದ್ರ ಪಟ್ಟಿಕ್ ಬಪ್ಪಕ್  
ಹೈದರಾಲಿರ ಸಹಾಯ, ದೇವಪ್ಪರಾಜಂಡ ದುರಂತ, ಪೊರಮಲೆ  
ರಾಜಕುಟಂಬತ್‌ರ ಅಂತ್ಯ

1766ತ್‌ಂಜ 1770ಕೆತ್ತನೆ ಆಳ್‌ನ ಹಾಲೇರಿ ಮುದ್ದುರಾಜ ಪಿಳ್ಳಾ ಪೊರಮಲೆ  
ಮುದ್ದಯ್ಯರಾಜ ಚೆನ್ನ ಮಿಳ್ಳಾಬಯ್ಯ ಆಯಿತ್ ಚೆತ್ತ್ ಪೋಚಿ.

ಮುದ್ದುರಾಜ ಪಿಳ್ಳಾ ಮುದ್ದಯ್ಯರಾಜ ಚೆತ್ತಪಿಳ್ಳಾ ಕೊಡಗುರ ಸಿಂಹಾಸನಕ್ ಅಯಿಂಗ  
ದಂಡಾಳ್‌ರ ಉತ್ತರಾಧಿಕಾರಿಯಡ ಒಳ್‌ಲೆ ಜಗಳ ಆಚಿ. ಹಾಲೇರಿ ಮುದ್ದುರಾಜಂಡ  
ತಮ್ಮಣ ಲಿಂಗರಾಜೇಂದ್ರ ಒಡೆಯ ಕೊಡಗುರ ಪಟ್ಟ ತಾಂಡ ಅಣ್ಣಂಡ ಮೋಂವಂಗಿ  
ಅಂಡೂಂದ್, ಪೊರಮಲೆ ಮುದ್ದಯ್ಯರಾಜಂಡ ಮೋಂವ ಮಲ್ಲಯ್ಯ ರಾಜ ತಾಂಡ  
ಮೋಂವಂಗಿ ಅಂಡೂಂದ್ ಜಗಳ ಮಾಡ್‌ಚಿ. ಈ ದಂಡ್ ದಾಯಾದಿಯಡಾತ್  
ಪೊರಮಲೆರ ಮಲ್ಲಯ್ಯ ರಾಜಂಗ್ ಜನಡ ಸಪೋರ್ಟ್ ಏರ ಇಂಜಾಂಗ್ ಅವಂಡ  
ಮೋಂವ ದೇವಪ್ಪ ರಾಜಂಗ್ ಮಲ್ಲಯ್ಯ ರಾಜ ಮಡಿಕ್ಕೇರಿಲ್ ಕೊಡಗುರ ರಾಜನಾಯಿತ್  
ಪಟ್ಟ ಕೆಟ್ಟ್‌ಚಿ.

ಇನ್ನನೆ ಪೊರಮಲೆ ರಾಜ ದೇವಪ್ಪರಾಜ ಕಲಿಸಂದ 4872ನೆ ಏಕೈತು ಸಂವತ್ಸರತ್  
ಎಣ್ಣಿಕ ಕ್ರಿ.ಶ. 1770ತ್ ಕೊಡಗುರ ಸಿಂಹಾಸನ ಪತ್ತ್‌ಚಿ. ಆಚೇಂಗಿ, ಅವ ಕೊಡಗುರ  
ರಾಜಪಟ್ಟಿಕ್ ತಾಂಡ ಪ್ರತಿಸ್ಪರ್ಧಿ ಆಯಿತಿಂಜ ಹಾಲೇರಿ ರಾಜಮನೆತನತ್‌ರ ಅಪ್ಪಾಜಿ  
ರಾಜನ ತರ್ಪಬೆಚ್ಚಿತ್ ಪಟ್ಟಿಕ್ ಬಂದಾಂಗ್ ಅಚ್ಚಕ್ ಕಾಲಕೆತ್ತನೆ ದಂಡ್ ಮನೆಕಾರಡ  
ನಡುಲ್ ಇಂಜ ಪ್ರೀತಿ ಪ್ರೇಮ, ಆತ್ಮೀಯತೆ, ವಿಶ್ವಾಸ ಎಲ್ಲ ದೂರ ಆಯಿತ್ ಅಪ್ಪರಿಪ್ಪರ  
ಪಗೆ, ಕೇಡ್‌ಕ್ ಮೊಳಿಯಾಚಿ.

ಹಾಲೇರಿ ಲಿಂಗರಾಜೇಂದ್ರ ಒಡೆಯಪಿಳ್ಳಾ ಅವಂಡ ಮಕ್ಕಕ್ ದೇವಪ್ಪರಾಜ ಪಿಳ್ಳಾ  
ಆಪ್ತಂಗ ದುಂಬ ಇಡ್‌ಕೆಟ್ಟ್ ಇಟ್ಟಾನುಂಡ್ ಈ ತೊಂದರೆಂಜ ತಪ್ಪಿಚಿಟ್ಟವಕ್  
ಲಿಂಗರಾಜೇಂದ್ರ ಒಡೆಯ ತಾಂಡ ಮೋಂವ ವೀರರಾಜೇಂದ್ರ ಒಡೆಯ, ತಾಂಡ ಅಣ್ಣಂಡ  
ಮೋಂವ ಅಪ್ಪಾಜಿರಾಜ ಪಿಳ್ಳಾ ಇಂವಂಡ ದಂಡ್ ಮಕ್ಕಳ ಕೂಟಿಯಂಡ್ ಕೊಡಗುರ  
ಉತ್ತರ ತೆರಿರ ಪಕ್ಕ ಇಂಜ ಐಗೂರ್ ಸ್ಲೇಮಿಕ್ ಪೋಚಿ. ಅವ ಅಲ್ಲಿ ಇಪ್ಪಕ ಕೊಡಗುರ  
ದೊರೆರ ಕೂಡ ಚಾಯಿತೆ ಇರೊಂಡೂಂದ್ ಹೈಸೂರ್‌ರ ಹೈದರಾಲಿಖಾನ್  
ಬಿಸಲೆಘಟ್ಟತ್‌ರ ಕೇದಲ್ ಪಂಜ ಪಿಳ್ಳಾ ಬೆಳ್ಳಾರ ಮಾಗಣೆನ ಕೊಡಗುರ ಹಾಲೇರಿ



ರಾಜಂಗಡ ಆಳ್ವಿಕೆಗೆ ಬುಟ್ಟ್ ಕೊಡತಾನುಂಡ್, ಇಕ್ಕ ಪೊರಮಲೆಕಾರ ತಂಗಳುಂಡ್ ರಾಜ್ಯ ಬಲೆಚಂಡ ವಿವರತನ ಹೈದರಾಲಿ ಖಾನ್‌ಕ್ ಎಣ್ಣಾನಕ ತಾಂಗ್ ಕೊಡಗ್ಗನ ಪಡ್‌ಂದವಕ್ ಸಹಾಯ ಮಾಡೂಂದ್ ಗೇನ ಮಾಡಿತ್ ಈ ಎಲ್ಲ ವಿವರತನ ಕಾಗದತ್ ಎಳ್ವಿತ್ ಮುತ್ತಿನಹಳ್ಳಿ ಬಸವ ಎಣ್ಣುವ ವ್ಯಕ್ತಿರ ಕೈಲ್ ಹೈದರಾಲಿಕ್ ಅಯೆಚತ್.

ಹೈದರಾಲಿ ಖಾನ್‌ಕ್ ಕೊಡಗ್ಗರ ರಾಜಮನೆತನತರ ಜಗಳತ್ ಕೈ ಇಡುವಕ್ ಇನ್ನತ ಓರ್ ಸಂದರ್ಭ ಕಾಟ್ವನದ್ ಪೇರ್ತ್ ಕುಶಿಯಾಚಿ. ಪಂಡ್ ಕೊಡಗ್ಗರ ಜನತರ ಕೂಡ ಪಡೆಪೊತ್ತಾ ತಾನ್ ಚೋತಾಂಗ್ ಇಕ್ಕ ಉಪಾಯತ್ ಪಡ್‌ಂದವಲೂಂದ್ ಅವ ಗೇನ ಮಾಡ್‌ಚಿ. ಕಾಗದ ಕೊಂಡಪೋನ ವ್ಯಕ್ತಿರ ಕೂಡ "ಲಿಂಗ ರಾಜೇಂದ್ರಂಗ್ ಬೋಂಡಿಯಾನ ಸಹಾಯ ಮಾಡಿತ್ ಅವಂಡ ಆಸೆಕೊತ್ತ ನಡ್‌ಪಿ" ಎಣ್ಣುವ ಭರವಸೆನ ತಾಂಡ ಕಾಗದತ್ ಎಳ್ವಿತ್ ಅಯೆಚತ್. ಅಕ್ಕ ಲಿಂಗರಾಜೇಂದ್ರ ತಾಂಡ ಮಕ್ಕಡ ಕೂಡ ಶ್ರೀರಂಗ ಪಟ್ಟಿಕ್ ಪೋಯಿತ್ ಹೈದರಾಲಿರ ಆಶ್ರಯ ಪಡ್‌ಂದತ್. ಹೈದರಾಲಿ ಲಿಂಗರಾಜೇಂದ್ರನುಂಡ್ ಹಾಲೇರಿ ಪೊರಮಲೆ ರಾಜಮಕ್ಕಡ ವಿವಾದತನ ಅರ್‌ಂಜಂಡ್ "ಆಂಡ ಮೀದ ವರೀಸ್ ಪಡುವಕುಳ್ಳ ಎಂತ. ನಿಂಗಡ ದೇಶತನ ನಂಗ ಬುಡ್‌ತಿ ತಪ್ಪ"ಂದ್ ತಕ್ಕ ಕೊಡ್‌ತಿತ್ ಲಿಂಗರಾಜೇಂದ್ರನ ತಾಂಡ ಬೆಂದು ಆಯಿತ್ ಆಕಿಯಂಡತ್.

ಆಚೇಂಗಿ, ಈ ನೇರತೆ ಮಹಾರಾಷ್ಟ್ರತ್‌ಂಜ ಪೇಶ್ವರ ಮಾಂವ ತ್ರಿಯಂಬಕ ತಾಂಡ ಸೈನ್ಯತೋಡೆ ಬಂದಿತ್ ಹೈದರಾಲಿರ ಸೀಮೆನ ಪಡ್‌ಂದವಡೂಂದ್ ಬಾತ್. ಹೈದರಾಲಿ ಅವಂಡ ಕೂಡ ಪಡೆ ಪೊತ್ತಲ್ಲಿ ಚೋತತ್. ಬೋಂಡಿಯಾನ ಪಣ ಕೊಡ್‌ತಿತ್ ಶಾಂತಿ ಒಪ್ಪಂದ ಮಾಡಂಡಿಯಾಚಿ. ತ್ರಿಯಂಬಕ, ಹೈದರಾಲಿ ನವಾಬಂಡ ರಾಜ್ಯತ್ 2 ಕಾಲ ಲೂಟಿ ಮಾಡ್‌ನಾಂಗ್ ರೈತಂಗಡ ಪಕ್ಕ ಇಂಜ ಅಕ್ಕಿ,ನೆಲ್ಲ ಇಲ್ಲತಾಚಿ. ಬೇಲ್ ಪಣಿ ನಿಂದ್‌ಪೋಯಿತ್ ರೈತಂಗಕೂ, ಸೈನ್ಯತರ ಜನಕೂ ತಿಂಬಕ್ ಒಂದೂ ಇಲ್ಲತೆ ಚಾವಕಾಚಿ. ಇನ್ನನೆ ಮೈಸೂರ್ ಸೀಮೆರ ಜನ ಬಲ್ಯ ಕಣಕ್‌ಲ್ ಚತ್ತಂಡಿಪ್ಪಕ ಶ್ರೀರಂಗಪಟ್ಟಿತ್ ಇಂಜ ಲಿಂಗರಾಜೇಂದ್ರ ಒಡೆಯ ಹೈದರಾಲಿಕ್ ಈ ಪೋಲೆ ಸಲಹೆ ಕೊಡ್‌ತತ್.

"ತ್ರಿಯಂಬಕ ಮಾಂವಂಡ ಅತಂತ್ರತ್ ತಂಗಡ ಸೀಮೆ ಎಲ್ಲ ಪಾಳಾಯಿತ್. ಏರ ಕಣಕರ ಜನ ಕೂಳಿಲ್ಲತೆ ಚತ್ತಂಡ್ ಉಂಡ್. ಈ ನೇರತ್ ನಂಗ ಕೊಡಗ್ಗರ ಸೀಮೆಕ್ ಸೈನ್ಯ ಎಡ್‌ತಂಡ್ ಪೋನಕ ಆ ಸೀಮೆಲ್ ಬೋಂಡಿಯಾನ ಅಕ್ಕಿ, ನೆಲ್ಲ ಕಾಟ್ಟುವ. ನಿಂಗಡ ಸೀಮೆರ ಜನಕ್ ಕೂಳಾಪ. ಆನಗುಂಡ್ ಬರಗಾಲ ಕೈಂಜಿಪೋಪ"

ಲಿಂಗರಾಜೇಂದ್ರ ತಾಂಡ ದಾಯಾದಿ ಮನೆತನತರ ವಿವಾದ ತೇಪಕ್ ಹೈದರಾಲಿ ನವಾಬಂಡ ಸಹಾಯತನ ಕೇಟಕೊ ಅವಂಗ್ ಕೊಡಗ್ಗಕ್ ಸೈನ್ಯತೋಡೆ ಬಪ್ಪಕ್



ಎಣ್ಣೆನಕೊ, ಭಾರತತ್ ಎನ್ನಂಗ್, ಪ್ರಪಂಚತೆ ತಂಗಡ ಸ್ವಾರ್ಥ ಉದ್ದೇಶಕಾಯಿತ್ ಎಚ್ಚಿಕೊ ರಾಜಂಗ ರಾಜಪದವಿರ ಆಸೆಕ್ ಪೊರದೇಶಕಾರಳ ನಂಗಡ ದೇಶಕ್ ಅಳುವಕ್ ಕಾಕ್‌ನದ್ ಗೇನ ಬಪ್ಪ.

ಕನೋಚ್‌ರ ರಾಜಪುತ್ರ ಜಯಚಂದ್ರ ತಾಂಡ ಮೈಮ ಡೆಲ್ಲಿರ ರಾಜ ಪೃಥ್ವಿರಾಜನ ಚೋಪ್‌ಚಿಡುವಕ್ ಘೋರಿ ಮಹಮ್ಮದ್‌ನ ಕಾಕ್‌ನದೂ, ದಕ್ಷಿಣತರ ಮುಸ್ಲಿಮ್ ರಾಜಂಗ ಹಿಂದೂಸ್ಥಾನತ್ ವ್ಯಾಪಾರಕ್ ಬಂದಿತ್ ಮೊಟ್ಟೂರ್‌ನ ಇಂಗ್ಲೀಷ್‌ಕಾರ, ಪುಂಚ್‌ಕಾರಳ ತಂಗ ತಂಗಡ ಜಗಳ ತೇಪಕ್ ಕಾಕ್‌ನದ್ ಇನ್ನತ ಘಟನೆಲ್ ಚೆನ್ನಂಗ್. ತಂಗಡ ಉದ್ದೇಶತನ ಸಾಧನೆ ಮಾಡುವಕ್ ತಂಗಡ ದೇಶತರ, ಧರ್ಮತರ ಹಿತ ಚಿಂತನೆನ ಸುರೂಂಚೆ ಕಮ್ಮಿ ಆಯಿತ್ ಕಂಡವು ಏರ ಜನ. ಆನ್ನನೆ ಲಿಂಗರಾಜೇಂದ್ರ ಒಡೆಯ, ಹೈದರಾಲಿನ ತಾಂಡ ಸಹಾಯಕ್ ಕಾಕ್‌ನದ್ ವಿಶೇಷ ಒಂದೂ ಅಲ್ಲ. ಆಚೇಂಗಿ, ಇದ್‌ಂಡ ಪರಿಣಾಮ ಪಾಳಾಚಿ.

ಹೈದರಾಲಿ ಖಾನ್, ಲಿಂಗರಾಜೇಂದ್ರಂಡ ಈ ಸಲಹೆಕ್ ಒತ್ತಂಡ್ ತಾಂಡ ಸೈನ್ಯತನ ಕೂಟಿಯಂಡ್ ಲಿಂಗರಾಜೇಂದ್ರನ ಕಾಕಿಯಂಡ್ ಕಲಿಸಂದ 4875ನೆ ವಿಜಯ ಸಂವತ್ಸರತ್ ಎಣ್ಣೆಕ ಕ್ರಿ.ಶ. 1773ನೆ ಇಸವಿರ ಅಖೀರಕ್ ಅರಕಲಗೂಡ್‌ಕಾಲೆ ಕುಂದ್ ಬಟ್ಟೆಕಾತೆ ಕೊಡಗ್ ಸೀಮೆನ ನುಗ್ಗಿಚಿ. ಉ.ಕೊಡಗ್‌ರ ಎಡವ ನಾಡ್‌ಲ್ ಹೈದರಾಲಿರ ಸೈನ್ಯಕೂ, ಕೊಡಗ್ ರಾಜಂಡ ಸೈನ್ಯಕೂ ಪಡೆ ಆಯಿತ್, ಹೈದರಾಲಿರ ಸೈನ್ಯ ಚೋತಿತ್ ವಾಪಾಸ್ ಪೋಯಿತ್ ಅರಕಲಗೂಡ್ ಪಕ್ಕತೆ ಇಂಜತ್.

ಅಕ್ಕ ಹೈದರಾಲಿ ನವಾಬ ಲಿಂಗರಾಜೇಂದ್ರಂಡ ಕೂಡೆ "ನಂಗಡ ಸೈನ್ಯ ಬಳಕ್ ನುಗ್ಗುವಕ್ ಕೊಡವ ಅವಕಾಶ ತಂದ್‌ಲೆ. ನಿಂಗಡ ಸೀಮೆರ ಬಟ್ಟೆ ಪೇರ್ತ್ ಇಕ್ಕಟ್. ಮಿಳ್ಳಾಕ್ ಎಂತ ಉಪಾಯ?"ಂದ್ ಕೇಟತ್.

ಅದ್‌ಂಗ್ ಲಿಂಗರಾಜೇಂದ್ರ "ನಂಗಡ ಕೊಡಗ್‌ರ ಸೀಮೆಲ್ ಪೇರ್ತ್ ಜನ ಕೊಡವಳ ನಾಕ್ ಪರಿಚಯ ಉಂಡ್. ಅಯಿಂಗಕೆಲ್ಲ ನಂಗ ವಿಷಯತ್‌ನೆಲ್ಲ ಎಳ್ಳಿತ್ ಅರಿಚಿಟ್ಟಕ ಚೆನ್ನಂಗಾಳ್ ನಂಗಳ ಸಹಾಯಕ್ ಬಪ್ಪ. ದುಂಬ ಗಲಾಟೆ ಆಕತೆ ಸುಲಭ ಬಟ್ಟೆಲ್ ಕೊಡಗ್‌ರ ಸೀಮೆಕ್ ಸೈನ್ಯ ಎಡ್‌ತಂಡ್ ಪೋಲೂ"ಂದ್ ಹೈದರಾಲಿ ನವಾಬಂಡ ಕೂಡೆ ಎಣ್ಣೆಚಿ. ಅನ್ನನೆ ಮಾಡುವಕ್ ಒಪ್ಪಿಗೆ ಪಡ್‌ಂದತ್.

ಆಚೇಂಗಿ, ಕರ್ನಲ್ ಮಾರ್ಕ್‌ವಿಲ್ಕ್ 1810ಲ್ ಎಳ್ಳಿನ 'ಮೈಸೂರ್ ಚರಿತ್ರೆ'ಲ್ 1773ನೆ ಇಸವಿ ನವೆಂಬರ್‌ಲ್ ಹೈದರಾಲಿ ಮಲಬಾರ್‌ಲ್ ಗಲಾಟೆ ಮಾಡ್‌ನ ತುಂಡರಸನ ಅಡ್‌ಕಿತ್, ವಾಪಾಸ್ ಎಡ್‌ತವಕ್ ಅಲ್ಲಿಕ್ ಪೋಪಾಂಗ್ ಕೊಡಗ್‌ರ ಬಟ್ಟೆ ಪಕ್ಕ ಬಟ್ಟೆಂದ್ ಸೈನ್ಯ ಎಡ್‌ತಂಡ್ ಕೊಡಗ್‌ಕ್ ಬಾತ್‌ಂದ್ ಎಳ್ಳಿತುಂಡ್.



ಅಕ್ಕ ಕೊಡಗುರ ಜನ ಅವ ಬಪ್ಪ ಬಟ್ಟೆಲ್ ಪಡೆಕ್ ತಯಾರಿ ಇಲ್ಲ ತೆ ಓರ್ ಮರಕಾಡ್ ಇಂಜ ಕುಂದ್‌ಲ್ ತಂಗಡ ರಕ್ಷಣೆಕಾಯಿತ್ ಒಂದ್‌ಕೂಡ್‌ಚಿ. ಅದ್‌ನ ಅರಾಂಜಿತ್ ಹೈದರಾಲಿ ಆ ಕುಂದ್‌ರ ಸುತ್ತು ತಾಂಡ ಸೈನ್ಯತ್‌ನ ನಿಪ್ಪಾಚಿಟ್ಟಿತ್, ಅವಂಡ ಸೈನಿಕಂಗ ಕೊಡಗುಕಾರಳ ಕೊಂದಿತ್ ಕೊಂಡ ಬಪ್ಪ ಪ್ರತಿಯೋರ್ ಮಂಡೆಕೂ ಅಂಜಿ ಉರ್‌ಪಿಯ ಇನಾಂ ಆಯಿತ್ ತಪ್ಪನ್ನೆಕೆ ಸಾರ್‌ಚಿ. ಅಕ್ಕ ಅವಂಡ ಸೈನಿಕಂಗ ಅವ ಇನಾಂ ಆಯಿತ್ ತಪ್ಪಕ್ ಪಣತಾರ ಚೀಲತಾರ ಕೂಡೆ ಅಳ್‌ತಲ್ಲಿಕ್ ಬಂದಿತ್, ತಂಗ ಕೆತ್ತನ ಕೊಡಗುಕಾರಡ ಮಂಡೆನ ಒಂದೊಂದಾಯಿತೆ ಅವಂಡ ಎದಿಕೆ ಬೆಚ್ಚಿತ್ ಇನಾಂ ಪಡ್‌ಂದತ್. ಇನ್ನನೆ ಸುಮಾರ್ 700 ಮಂಡೆನ ಅವಂಡ ಎದಿಕೆ ಬೆಚ್ಚಿತ್! ಅಕ್ಕ ಓರ್ ಸೈನಿಕ ದುಂಬಾ ಚಾಯಿ ಉಳ್ಳ ಮೂಡ್‌ರ ದಂಡ್ ಮಂಡೆನ ಹೈದರಾಲಿರ ಎದಿಕೆ ಬೆಚ್ಚಿತ್. ಆ ಮಂಡೆನ ನೋಟನನ್ನೆಕೆ ಹೈದರಾಲಿಕ್ ತಾನ್ ಕೊಡವಡ ಮಂಡೆ ಕೆತ್ತುವಕ್ ಅಪ್ಪಣೆ ಮಾಡ್‌ನಾಂಗ್ ಬೇಚಾರ ಪಟ್ಟಿತ್.

ಅವ ಆ ಸೈನಿಕಂಡ ಕೂಡೆ "ಈ ಮನುಷ್ಯಂಗಡ ಮಂಡೆನ ಕೆತ್ತುವಕ ನೀಡ ಹೈದಯ ನೀಡಲ್ಲಿಯೆ ಕತ್ತಲಿಯ?"ಂದ್ ಕೇಟಿತ್ ಕೂಡೆನ್ನೆ ಕೊಡವಳ ಕೊಲ್ಲು ಧಾನ ನಿಪ್ಪಾಚಿಟ್ಟಿತ್. ಬಾಕಿ ಉಳ್ಳಯಿಂಗಳ ತಂಗಡ ಸೆರೆ ಆಳಾಯಿತ್ ಮಾಡ್‌ಚಿ. ಅಕ್ಕಣೆಕ್ ಮಡಿಕೇರಿನ ಆಳಿಯಂಡ್ ಇಂಜ ದೇವಪ್ಪರಾಜ ಮಲಯಾಳಕ್ ಓಡಿ ಪೋಯಿತಿಂಜತ್. ಹೈದರಾಲಿ ತಾಂಡ ಶಿಬಿರ ಕೆಟ್ಟಿತಿಂಜ ಜಾಗತ್‌ಂಜ ಮಡಿಕೇರಿಕ್ ಬಂದಿತ್ ಅಲ್ಲಿ ಓರ್ ಕೋಟೆನ ಕೆಟ್ಟಾಚಿಟ್ಟಿತ್. ಭೂಮಾಲೀಕಂಗಡ ಕಂದಾಯತ್‌ನ ಚೆನ್ನಂಗ್ ಪೊಂದ್‌ಚಿಟ್ಟಿತ್ ಅಯಿಂಗಳ ಅಯಿಂಗಡ ಭೂಮಿಲೆ ಆಕ್‌ಚಿ. ಅಲ್ಲಿಂಜ ಅವ ಮಲಬಾರ್‌ಕ್ ಸೈನ್ಯಾಧಿಕಾರಿಯಳ ಅಯೆಚಿತ್ ತಾನ್ ಶ್ರೀರಂಗಪಟ್ಟಿಕ್ ವಾಪಾಸ್ ಪೋಚಿ. ಇದ್ ವಿಲ್ಕ್ಲೊ ಎಳ್ಳೊನದ್.

ವೀರರಾಜೇಂದ್ರ ಎಳ್ಳೊಚಿಟ್ಟಿ ರಾಜೇಂದ್ರನಾಮಲ್ ತಾಂಗಾನ ಸೋಲ್, ನಪ್ಪತ್‌ನ ಉದ್ದೇಶ ಪೂರ್ವಕವಾಯಿತೆ ಎಳ್ಳೊಚಿಟ್ಟಾಲೆಂದ್ ತೋಂದುವ. ಅಂತೂ ದೇವಪ್ಪರಾಜಂಡ ಆಬೀರಿ ದಂಡ್ ಚರಿತ್ರಲೂ ಉಂಡ್. ಅಲ್ಲಿಂಜ ಲಿಂಗರಾಜೇಂದ್ರ ತಾಂಡ ಆಪ್ತಂಗಳಾನ ಕೊಡವಕ್ "ನಂಗ, ನಂಗಡ ಮನೆ ಚೂರಾಯಿತ್ ಅಣ್ಣ ತಮ್ಮಣಂಗ ಜಗಳ ಮಾಡಿಯಂಡ್ ನಂಗ ನವಾಬ ಹೈದರಾಲಿ ಖಾನ್‌ರ ಪಕ್ಕ ಪೋಯಿತ್ ಎಣ್ಣೊನಲ್ಲಿ ನಿಂಗಡ ಅಣ್ಣ ತಮ್ಮಣಂಗಡ ನ್ಯಾಯ ತೇತಿತ್ ನಿಂಗಡ ರಾಜ್ಯ ನಿಂಗಕ್ ದಾಯಾದಿಯಡ ಕೈಯಿಂಜ ಬುಡ್‌ತಿ ತಪ್ಪಾಂದ್ ಎಣ್ಣೆತ್ ಬಲ್ಮ ಸೈನ್ಯ ಎಡ್‌ತಂಡ್ ಬಂದಿತ್. ಆನಗುಂಡ್ ನಂಗಡ ದಾಯಾದಿಯಡ ತಕ್ಕುರ ಮೀದ ನಿಂಗ ನಂಗಡ ಕೂಡೆ ಜಗಳ ಮಾಡಿತಿಂಜಕ ನಿಂಗಕ್ ಬಾರಿ ಸುಸ್ತ ಆಯಿತಿಕ್ಕು"ಂದ್ ಚೆನ್ನಂಗ್ ಬೊರಚಲಾರ ಕಾಗದ ಅಯೆಚಿತ್.

ಅಕ್ಕ ಲಿಂಗರಾಜೇಂದ್ರ ಒಡೆಯಂಗ್ ಆಪ್ತಂಗಳಾನ ಚೆನ್ನಂಗ್ ಕೊಡವ "ನಿಂಗ ಬಾಳಲೆಕಾಲೆ ಬಂದಕ ನಂಗ ಜಗಳ ಮಾಡಿತ್ ನಿಂಗಡ ಕೂಡ ಒಪ್ಪ"ಂದ್ ಜವಾಬ್ ಅಯೆಚತ್. ಅವ ಎಳ್ಳನ್ನೆನ್ನೆಗೆ ಲಿಂಗ ರಾಜೇಂದ್ರ ಒಡೆಯ ಬಾಳಲೆಕಾಲೆ ಸೈನ್ಯ ಕೂಟಿಯಂಡ್ ಬಪ್ಪಕ ಅಲ್ಲಿ ಇಂಜ ಕೊಡವ, ಲಿಂಗರಾಜಂಡ ಆಪ್ತಂಗ, ಜಗಳ ಮಾಡಿತ್ ಆಖೀರಕ್ ಅವಂಡ ಕೂಡ ಬಂದ ಸೈನ್ಯತನ ಒಳ್ಳೆಕ್ ಬುಟ್ಟಿತ್.

ಲಿಂಗರಾಜೇಂದ್ರಂಡ ಕೂಡ ಬಂದ ಮೈಸೂರ್ ಸೈನ್ಯತರ ಕೂಡ ಇಲ್ಲಿಯತ ಕೊಡವ ಕೂಟಿಯಂಡಾಂಗ್ ದೇವಪ್ಪರಾಜ ಆ ಸೈನ್ಯತನ ಎದ್‌ರಾಚಿಡುವಕ್ ಕಯ್ಯತೆ ಘಟ್ಟಿ ಇಳ್ಳಂಜಿತ್ ಮಲಯಾಳಕ್ ಪೋಚಿ. ಅಲ್ಲಿಂಜ ಹೈದರಾಲಿರ ಸೈನ್ಯಾಧಿಕಾರಿಯ, ದೇವಪ್ಪರಾಜಂಡ ಕುಟುಂಬ, ಮಕ್ಕ ಪಿಳ್ಳಾ ಅಯಿಂಗಡ ಸಂತಾನಕಾರಳ ಪುಡ್‌ಚಂಡ್ ಶ್ರೀರಂಗಪಟ್ಟಿಕ್ ಪೋಯಿತ್ ಜೈಲ್‌ಲ್‌ಟ್ಟಿತ್.

ಇತ್ತಟಿ ಮಲಯಾಳಕ್ ಪೋನ ದೇವಪ್ಪರಾಜ ಕೋಟೆ ರಾಜಂಡಲ್ಲಿ ಆಶ್ರಯ ಕೇಪಕ್ ಪೋನಲ್ಲಿ ಆ ರಾಜ "ನಿಂಗಡ ದೊಡ್ಡವೀರಪ್ಪ ಒಡೆಯ ನಂಗಡ ಕಾರಣನ ತೋಮರತ್ ಕಲ್ ಪೊಜ್ಜಿತ್ ಚಾವ್‌ಚಿಟ್ಟಿತ್. ಅದ್‌ಂಡ ಬದ್‌ಲ್‌ಕ್ ನಿಂಗಡ ಮಂಡೆನ ತಾರಿ. ಇಲ್ಲೇಂಗಿ ಮಂಡೆಕುಳ್ಳ ಕ್ರಯ ತಾರಿ"ಂದ್ ಕೇಟತ್.

ದೇವಪ್ಪರಾಜಂಗ್ ಕೋಟೆರಾಜಂಡ ತಕ್ಕ ಕೇಟಿತ್ ಸುಸ್ತಾಯಿರತ್. ತಾಂಡ ಜಿಂವ ಉಳತಿವಕಾಯಿತ್ ತಾಂಡ ಕೈಲಿಂಜ 40 ಆಯಿರ ಪಣತನ ಅಂಪಂಗ್ ತಾಂಡ ಮಂಡೆರ ಕ್ರಯ ಆಯಿತ್ ಕೊಡ್‌ತತ್! ಇಳ್ಳೊ ತಾನ್ ಅಲ್ಲಿಯೆ ಇಂಜಕ ತಾಂಗ್ ಅಪಾಯಂದ್ ದೇವಪ್ಪರಾಜ ತಾಂಡ ಕೂಡ ನಾಲಾಳನ ಮಾತ್ರ ಕೂಟಿಯಂಡ್ ಬಾಕಿ ಉಳ್ಳಯಿಂಗಳ ಅಲ್ಲಿಯೆ ಬುಟ್ಟಿತ್ ವೇಷ ಮಾತಿತ್ ಅಲ್ಲಿಂಜ ಪೊರ್‌ಟತ್.

ದ.ಕನ್ನಡ ಬಿಲ್ಲೆ ಪಿಳ್ಳಾ ಮೈಸೂರ್ ಸೀಮೆ ಎಲ್ಲ ಹೈದರಾಲಿರ ಆತಳಿತತ್ ಇಂಜತ್. ಆನಗುಂಡ್ ದೇವಪ್ಪರಾಜ ತಾಂಡ ಮಂಡೆ ಉಳತಿಯವಕ್ ಮರಾರಂಗಡ ಸೀಮೆಕ್ ಓಡಿ ಪೋಯಂಡಿಪ್ಪಕ ಬಟ್ಟೆಲ್ ಚಿತ್ರದುರ್ಗ ಪಿಳ್ಳಾ ಧಾರವಾಡ ಜಿಲ್ಲೆರ ತೆರಿಲ್ ತುಂಗಭದ್ರಾ ಪೊಳೆರ ಬಲೆತೆ ಬರಿಕ್ ಪಕ್ಕ ಇಂಜ ಹರಿಹರ ಪಟ್ಟಣಿತ್ ಹೈದರಾಲಿಖಾನ್‌ರ ಕಡೆಕಾರಳುಂಡ್ ಸೆರೆ ಆಯಿತ್ ಶ್ರೀರಂಗಪಟ್ಟಿಕ್ ಅಯೆಚತ್. ಹೈದರಾಲಿ, ದೇವಪ್ಪ ರಾಜ, ಅವಂಡ ಕುಟುಂಬ, ಮಕ್ಕ ಪಿಳ್ಳಾ ಎಲ್ಲಾರ್‌ನೊ ಕಲಿಸಂದ 4876ನೆ ಜಯಸಂವತ್ಸರತ್ ಎಣ್ಣಕ ಕ್ರಿ.ಶ. 1774ತ್ ಕೊಲ್ಲ್‌ಚಿಟ್ಟಿತ್. ಇಲ್ಲಿಕ್ ದೊಡ್ಡವೀರಪ್ಪ ಒಡೆಯಂಡ ದಂಡನೆ ತಮ್ಮ ಪೊರಮಲೆರ ನಂದರಾಜಂಡ ಸಂತಾನ ಆಖೀರಿಯಾಚಿ.

ಪೊರಮಲೆ ರಾಜವಂಶ ನಾಶ ಆನಪಿಳ್ಳಾ ಸುಮಾರ್ 200 ಕಾಲ ಆನಕೊ ಇಕ್ಕಲೂ

ಪೊರಮಲೆ ನಾಡ್‌ರ ಗಾಳಿಬೀಡ್ ಊರ್‌ಲ್ ಈ ರಾಜವಂಶತ್‌ರ ಅರಮನೆರ ಪಳೇಯ ಚೂರ್ ಪಾರ್ ಉಂಡ್ ಎಣ್ಣುವದ್ ಆಶ್ಚರ್ಯ. ಮಡಿಕೇರಿಂಜ ಸುಮಾರ್ 5 ಮೈಲ್ ದೂರತ ಗಾಳಿಬೀಡ್ ಊರ್‌ಕಾರಳಾನ ನೆಲ್ಲಪಟ್ಟಿರ ಒಕ್ಕತ್‌ರ ಓರ್ ವ್ಯಕ್ತಿಕ್ ಕೂಡ್‌ನ ಮೂಂದ್ ಏಕ್ರೆ ಜಾಗತ್ ಪೊರಮಲೆ ರಾಜವಂಶತ್‌ರ ಅರಮನೆರ ಪಾಳು ಬುದ್ದ ಚೆನ್ನಂಗ್ ಕೆಂವ ಇಂದೇಕೂ ಕಾಂಬಕ್‌ಟ್ಟುವ.

ಫೌಂಡೇಶನ್‌ಕ್ ಇಟ್ಟ ಕೆತ್ತಕಲ್ಲ್ ಚೆನ್ನಂಗ್ ಅಲ್ಲಲ್ಲಿ ಬುದ್ದಿತ್. ಅರಮನೆರ ಪಳೇಯ ಚೂರ್‌ಪಾರ್ ಇಂಜ ದಾಟ್ತ್ ಉಂಡ್. ಅರಮನೆ ವಲಯತ್‌ರ ಸುತ್ತೂ ಆಳವಾನ ಕಡ್‌ಂಗ ಉಂಡ್. ಎದಿಕೆ ಅರಮನೆಂಜ ಸುಮಾರ್ 400 ಗಜ ದೂರತ್ ಉಳ್ಳ ತಗ್ಗ್ ಭೂಮಿಕ್ ಬಪ್ಪಕ್ ಅಗಲ ಕಮ್ಮಿ ಉಳ್ಳ ದಂಡ್ ಬರಿಯೊ ಎತ್ತರತ್‌ರ ಬಟ್ಟೆ ಉಂಡ್. ಅರಮನೆ ಕುಂದ್‌ರ ಕೇದಕ್ ಪಡಿಞ್ಞಾರ್‌ಲ್ ಓರ್ ಕೆರೆ ಉಂಡ್. ಅದೊಂಡ ದಂಡ್ ಬರಿ ಕೆತ್ತ ಕಲ್ಲ್‌ಲ್ ಕೆಟ್ಟನದ್. ಈ ಕೆರೆಕ್ ಅರಮನೆರ ಆನೆಯ ನೀರ್ ಕುಡಿಪಕ್ ಬಪ್ಪ ಇಂಜತ್‌ಂದ್ ಕಾಂಬ. ಅರಮನೆರ ಪೊರ್‌ವೆತ ಪಡಿಂಜ ಈ ಕೆರೆಕ್ ಪೋಪ ಬಟ್ಟೆಲ್ ಹಾಸಿತುಳ್ಳ ಅಗಲವಾನ ಕಲ್ಲ್‌ಚಿಪ್ಪಡಿಕ್ ಇಕ್ಕಲೂ ಚೆನ್ನಂಗ್ ಮಣ್ಣ್ ಮುಚ್ಚಿನದ್ ಕಾಂಬ. ಅರಮನೆ ಇಂಜ ಜಾಗ ಪಿಣ್ಣಾ ಅದೊಂಡ ಪೊರ್‌ಮೆತ ಕಳ ಎಲ್ಲ ಇಕ್ಕ ಯಾಲತೋಟ ಆಯಿತ್. ಯಾಲಗ್‌ಡತ್‌ರ ನಡುಲ್ ಅರಮನೆರ ಪಾಳುಬುದ್ದ ಕೆಂವ ನಿಂದಿತ್.

ಈ ಅರಮನೆರ ಚೂರ್‌ಪಾರ್ ಉಳ್ಳ ಊರ್ ಗಾಳಿಬೀಡ್. ಇಲ್ಲಿಂಜ ಸುಮಾರ್ ದಂಡ್ ಮೈಲ್ ಒಳ್ಳಕ್ ಈ ರಾಜಮನೆತನಕಾರ ಕೆಟ್ಟಚಿಟ್ಟ ದಂಡ್ ತಿರಿಕೆ ಸುಮಾರ್ ಅರೆ ಮೈಲ್‌ರ ವ್ಯತ್ಯಾಸತ್ ಉಂಡ್. ಇಲ್ಲಿ ಓರ್ ಕುಂದ್‌ರ ಕೊಡಿಲ್ ಈಶ್ವರ ತಿರಿಕೆ ಉಂಡ್. ಈ ತಿರಿಕೆ ಬೋರೆ ಊರ್‌ರ ತಿರಿಕೆರನ್ನೆ ಕೆಟ್ಟಿತುಂಡ್. ಗರ್ಭ ಗುಡಿರ ಎದಿಕೆ ಪೌಳಿ ಇಂಜಿತ್ ಜನಕ್ ಅಳ್ಳಪಕ್ ಒಳ್ಳಲ್ ಎತ್ತರವಾನ ಕಯ್ಯಾಲೆ ಉಂಡ್. ಈಂದ ಮೂಂದ್ ಬರಿಲ್ ಪಂಡೆತ ಪೌಳಿ ಇಂಜ ಲಕ್ಷಣ ಉಂಡ್. ಇಲ್ಲಿ ಪಟ್ಟಮನುಂಡ್ ಎಕ್ಕೋಲು ಪೂಜೆ ನಡಪ್. ಕಾಲಕೊಮ್ಮೆ ನಮ್ಮೆ ಆಪ.

ಈಶ್ವರ ತಿರಿಕೆಂಜ ಸುಮಾರ್ ಅರೆಮೈಲ್ ತಗ್ಗಲ್ ಬೇಲ್ ಬಾಣೆ ಪಿಣ್ಣಾ ಮರಕಾಡ್‌ರ ನಡುಲ್ ಚಿಚ್ಚಾಕಾರತ್‌ರ ಚೆರಿಯ ಓರ್ ಭದ್ರಕಾಳಿರ ಗುಡಿ ಉಂಡ್. ಈ ಗುಡಿ ರಾಜ ಮನೆತನಕಾರಳುಂಡ್ ಮನಾರ ಕಲ್ಲ್‌ಲ್ ಕೆಟ್ಟಿತ್ ನೋಟುವಕ್ ಚಾಯಿ ಉಂಡ್. ಗುಡಿರ ಅಡಿಪಾಯ, ಬರಿಯತ ಕೆಂವತ್‌ರ ಮೂಲೆ ಕಂಬ, ಚೆರಿಯ ಗೋಪುರಾಕಾರ ಎಲ್ಲ ಕೆತ್ತನ ಕಲ್ಲ್ ಪಿಣ್ಣಾ ಪಾರ್‌ನುಂಡ್ ಮಾಡ್‌ನದ್. ಗುಡಿರ ಕಂಬತ್‌ರ ಕೊಡಿಲ್ ಬಳ್ಳಿ, ಆ ಬಳ್ಳಿಲ್ ಚೆರಿಯ ಎಲೆನ ಕೆತ್ತಿತ್. ಗುಡಿರ ಕೇದಕ್ ಓರ್ ಚೆರಿಯ ಪರಂಬ್‌ಂಜ ಗುಡಿಕ್ ಪೋಪಕ್ ಸುಮಾರ್ 150 ಗಜತ್‌ರ ಅಗಲ ಕಮ್ಮಿ ಉಳ್ಳ ಬಟ್ಟೆ ಉಂಡ್. ಈ ಬಟ್ಟೆರ

ಆಖೀರಕ್ ಗುಡಿಕ್ ನುಗ್ಗುವಲ್ಲಿ ದಂಡ್ ಎತ್ತರವಾನ ಕಲ್ಲರ ಕಂಬ ಉಂಡ್. ಕಂಬತ್ ಕೊಡಿಲ್ ಎಲೆ, ಬಳ್ಳಿನ ಕೆತ್ತಿತ್.

ಈ ಗುಡಿರ ಕೇದತ್ ಚೆರಿಯ ಪರಂಬಾರ ಓರ್ ಬರಿಲ್ ಕಲ್ಲರ ಕಂಬ ಸಾಲಾಯಿತ್ ನೆಟ್ಟಿತುಂಡ್. ಪಂಡ್ ಕಾಲತ್ ದೇವಡ ಕಾಲತ್ ನಮ್ಮೆರ ನೇರತ್ ಭದ್ರಕಾಳಿಕ್ ಪೋರಿಯಳ ಆರ ಕೊಡ್ಪ ಇಂಜತ್ಲೊ. ಅಕ್ಕ ಆರ ಕೊಡ್ಪಕ್ ಕೊಂಡಬಂದ ಪೋರಿಯಳ ಈ ಕಲ್ಲರ ಕಂಬಕ್ ಕೇರ್ಲ್ ಕೆಟ್ಟುವ ಇಂಜತ್ಲೊ. ಇಕ್ಕ ಪೋರಿಯಳ ಆರ ಕೊಡ್ಪುಲೆ. ಈ ಗುಡಿಲ್ ಪಟ್ಟಮಳುಂಡ್ ಪೂಜೆ ಇಲ್ಲೆ. ಊರ್ಲ್ ಉಳ್ಳ ಐರಿ ಜನಾಂಗಕಾರ ವಾರಕೊಮ್ಮ ಚೊವ್ವಾಚೆ ಇಲ್ಲೇಂಗಿ ಬೊಳ್ಳಾಚೆ ಈ ಗುಡಿರ ಪಡಿ ತೊಂದಿತ್ ದೇವಡ ವಿಗ್ರಹಕ್ ಪೂ ಬೆಪ್ಪ.

ಚಂಗ್ರಾದಿರಂದ್ ದೇವತೆಯಳ ಪೂಜುವ. ಅಲ್ಲತೆ ದಂಡ ಕಾಲಕ್ ಒಮ್ಮತೆ ಈ ಗುಡಿಲ್ ಊರ್ಕಾರ ಪೇರ್ತ್ ಗೌಜಿಲ್ ನಮ್ಮೆ ಕೈಪ. ನಮ್ಮೆಲ್ ಊರ್ಕಾರ ಕೈ ಇಲ್ಲತ ಕುಪ್ಪ ಇಟ್ಟುಂಡ್ ಪಲತರ ಆಟ್ ಪಾಟ್ ಪ್ರದರ್ಶನ ಮಾಡುವ. ಈ ನಮ್ಮೆ ಮೀನ್ಯಾರ್ ತಿಂಗತ್ ನಡಪ.

ಪೊರಮಲೆ ರಾಜವಂಶಕಾರ ತಂಗಡ ಕಷ್ಟಕಾಲತ್ ಭದ್ರಕಾಳಿರ ಅನುಗ್ರಹ ಪಡೆವಕ್ ಈ ಗುಡಿನ ಒರೇ ದಿನತ್ ಕೆಟ್ಟಾಚಿಟ್ಟತ್ ಎಣ್ಣುವ ಕತೆನ ಈ ಊರ್ಕಾರ ಎಣ್ಣುವ. ಆಚೇಂಗಿ, ಈ ಗುಡಿನ ಪೇರ್ತ್ ಕಮ್ಮಿ ಅವಧಿಲ್ ಕೆಟ್ಟಿತ್ಂದೇ ಎಣ್ಣೊಲು. ಈ ಗುಡಿ ಕೊಡಗರ ಇತಿಹಾಸತ್ ಆಸಕ್ತಿ ಉಳ್ಳಯಿಂಗಕ್ ಹೊರಮಲೆ ರಾಜವಂಶಕಾರಡ ಅಲ್ಲಕಾಲತ್ ವೈಭವತ್ ಗೇನ ಬಪ್ಪಾಚಿಡುವನ್ನಕೆ ಉಂಡ್.

## 18. ಒಂದನೆ ಲಿಂಗ ರಾಜೇಂದ್ರ ಒಡೆಯ 1775-1780

ದೇವಪ್ಪ ರಾಜ, ಹೈದರಾಲಿನುಂಡ್ ಕೊಲೆ ಆನಪಿಳ್ಳಾ ಹಾಲೇರಿರ ಲಿಂಗ ರಾಜೇಂದ್ರ ಒಡೆಯ ಕೊಡಗರ ಸಿಂಹಾಸನಕ್ ಒಬ್ಬನೆ ಒಬ್ಬ ಹಕ್ಕದಾರನಾಚಿ. ಆಚೇಂಗಿ, ಅವ ಮೈಸೂರರ ನವಾಬ ಹೈದರಾಲಿರ ಸಹಾಯತ್ ಕೊಡಗ್ನ ಪಡೊಂದಾಂಗ್ ಪೂರ್ತಿ ಆಯಿತ್ ಸ್ವತಂತ್ರ ರಾಜನಾಯಿಲೆ. ಹೈದರಾಲಿರ ಅಧೀನ ಆಯಿತೆ ಇರಂಡಿಯಾಚಿ.

ದೇವಪುರಾಜಂಡ ವಂಶ ನಿರ್ವಂಶ ಆನದೆ ಹೈದರಾಲಿ ಲಿಂಗರಾಜೇಂದ್ರ ಒಡೆಯಂಡ ಕೂಡ "ನಿಂಗಡ ಸೀಮೆ ನಿಂಗಡ ದಾಯಾದಿಯಡ ಕೈಯಿಂಜ ತಪ್ಪಾಚಿ. ನಿಂಗಡ ದಾಯಾದಿ ದೇವಪುರಾಜ ನಂಗಡ ಕೈಕ್ ಕೊಟ್ಟಾಚಿ. ಸೀಮೆ ಬುಡ್ತಿವಕ್ ಸೈನ್ಯತೋಡೆ ಬಂದಾಂಗ್ ದುಂಬ ಜನ ಚಿತ್ತಪೋಚಿ. ಈ ಸೈನ್ಯತರ ಖರ್ಚಿ ದುಂಬ ಉಂಡ್. ಕರಾರ್ ಪೋಲೆ ನಿಂಗಡ ಸೀಮೆನ ನಿಂಗ ವಶ ಪಡ್ತಿಯಂಡ್ ಈಂಡ ಮೀದ ಆನ ಖರ್ಚಿನ ನಂಗಕ್ ತರೊಂಡು"ಂದ್ ಎಣ್ಣಾಚಿ.

ಅಕ್ಕ ಲಿಂಗರಾಜೇಂದ್ರ ಒಡೆಯ "ಕೊಡಗರ ಅರಮನೆ ಖಜಾನೆಲ್ ಇಂಜ ಪಣತನೆಲ್ಲ ದೇವಪುರಾಜ ಎಡ್ತಂಡ್ ಪೋನಾಂಗ್ ತಾಂಡ ಪಕ್ಕ ಹೈದರಾಲಿಕ್ ಕೊಡ್ಪಕುಳ್ಳ ಪಣ ಇಲ್ಲೇ"ಂದ್ ಜವಾಬ್ ಕೊಡ್ತತ್.

ಇದಾಂಗ್ ಹೈದರಾಲಿ "ನಿಂಗಡ ಸೀಮೆನ ನಿಂಗಕ್ ಬುಟ್ಟ್ ತಂದಂಡ್ ಉಂಡ್. ನಂಗಡ ಸೈನ್ಯತರ ಖರ್ಚಿರ ಮಾರೀಪತ್ ನಂಗಕ್ 24 ಆಯಿರ ಬರೊಂಡು"ಂದ್ ಎಣ್ಣಾಚಿ.

"ನಂಗಡ ಸಂಸ್ಥಾನಕ್ ಕಲ್ಪಾತಿ, ವೈನಾಡ್ ಸೀಮೆಕ್ ಕೂಡಿತಿಂಜತ್. ಇಕ್ಕ ಚೆನ್ನಂಗ್ ದಿನತಾಂಜ ಅದಾನ ಕೋಟಿ ರಾಜಂಗ ಆಕ್ರಮಣ ಮಾಡಿತ್. ಅಯಿಂಗಡ ಕೈಯಿಂಜ ಬುಡ್ತಿತ್ ನಂಗಕ್ ತಂದಕ್, ನಿಂಗ ಎಣ್ಣಾನನ್ನೆ ಪಣತಾನ ಕಾಲೋದಿ ನಿಂಗಡ ಸರ್ಕಾರಕ್ ಸಂದಾಯ ಮಾಡುವ. ನಂಗ ಕುಶಿಲ್ ನಂಗಡ ಸೀಮೆಲ್ ಇಪ್ಪ"ಂದ್ ಲಿಂಗ ರಾಜೇಂದ್ರ ಎಣ್ಣಾಚಿ.

ಅಕ್ಕ ಹೈದರಾಲಿ, ಮಡಿಕೇರಿಲ್ ತಾನ್ ಅಪ್ಪಾಜಿರಾಜಂಗ್ ಅಧಿಕಾರ ವಹಿಸಿತ್ ಶ್ರೀರಂಗಪಟ್ಟಕ್ ಬರೊಂಡು, ತಾನ್ ವೈನಾಡ್ಂಜ ಕಲ್ಪಾತಿಕ್ತನೆ ಉಳ್ಳ ಸೀಮೆ ದಾರ್ಕ್ ನ್ಯಾಯ ಆಯಿತ್ ಸೇರೊಂಡೊಂದ್ ವಿಚಾರಣೆ ಮಾಡುವಕ್ ಕಲ್ಪಾತಿ ಪಕ್ಕತ್ ಉಳ್ಳ ಪೆರಿಯಯಿಂಗಳ ಶ್ರೀರಂಗಪಟ್ಟಕ್ ಕಾಕ್‌ಚಿಡುವಿ"ಂದ್ ಎಣ್ಣಾಚಿ.

ಅನ್ನನೆ ಅಪ್ಪಾಜಿರಾಜಂಗ್ ಮಡಿಕೇರಿಲ್ ಅಧಿಕಾರ ವಹಿಸಿತ್ ಲಿಂಗರಾಜೇಂದ್ರ ಒಡೆಯ ಶ್ರೀರಂಗಪಟ್ಟಕ್ ಪೋಚಿ. ಅಲ್ಲಿಕ್ ಕಲ್ಪಾತಿರ ಬಯತಾನ ವ್ಯಕ್ತಿಯಳ ಕಾಕಿತ್ ವಿಚಾರಣೆ ಮಾಡ್‌ಚಿ. ಅಕ್ಕ ಅವು ಕಲ್ಪಾತಿಕ್ತನರ ಸೀಮೆ ಪಂಡ್ ಕೊಡಗ್ ರಾಜಂಗ್ ಕೂಡ್‌ನದ್" ಎಣ್ಣಾಚಿ.

ಅಕ್ಕ ಹೈದರಾಲಿ, ಲಿಂಗ ರಾಜೇಂದ್ರಂಗ್ ವೈನಾಡ್‌ಲ್ ಕಲ್ಪಾತಿಕ್ತನೆ ಸೀಮೆನ ಪುಡ್‌ತಕ್ ಎಡ್ತಂಡ್ ಅಲ್ಲಿ ಬಲವಾನ ಸೈನ್ಯ ಬೆಪ್ಪಕ್ ಎಣ್ಣಾಚಿ. ಲಿಂಗರಾಜೇಂದ್ರ ಕೊಡಗ್‌ಕ್ ಬಂದಿತ್ ಮೂಂದಾಯಿರ ಜನಳ ಕೂಟಿಯಂಡ್ ಪೋಯಿತ್ ಕಲ್ಪಾತಿಕ್ತನೆ

ವಶಪಡ್ತಿಯಿಂದ ಕಲ್ಪಾತಿ ತೆರಿಲ್ ಮರತ್ತರ ಕೋಟೆನ ಕೆಟ್ಟಾಚಿಟ್ಟಿತ್ ಓರ್ ಕಾಲ ಅಲ್ಲಿಯೆ ಇಂಜತ್. ಅಲ್ಲಿಂಜ ಈ ಕೋಟೆಲ್ ಕಗ್ಗೋಡ್‌ನಾಡ್‌ರ ಅಣ್ಣಪ್ಪ ಅಪ್ಪಯ್ಯ ಎಣ್ಣುವ ಸರದಾರಂಡ ಪುಡ್‌ತತ್ ದಂಡಾಯಿರ ಕೊಡವ ಸೈನಿಕಂಗಳ ತೆರಿ ಕಾಪಕ್ ಆಕಿತ್, ಆ ಕೋಟೆಕ್ ಕಿಲ್ಲೆದಾರಿಕೆ ಎಣ್ಣಕ ಯಜಮಾನಿಕೆನ ಎಡೆನಾಲ್ವಾಡ್‌ರ ಮಂಜುಡ ಅಪ್ಪಯ್ಯಂಗ್ ಕೊಡ್‌ತಿತ್ ಬಾಕಿ ಓರಾಯಿರ ಜನಳ ಕೂಟಿಯಂಡ್ ಲಿಂಗರಾಜೇಂದ್ರ ಒಡೆಯ ಕೊಡಗ್‌ಕ್ ಬಾತ್. ಆ ನೇರತ್ ಮಡಿಕೇರಿಲ್ ಅಧಿಕಾರ ನಡ್‌ತಿಯಂಡ್ ಇಂಜ ಅಪ್ಪಾಜಿ ರಾಜ ಚತ್‌ಪೋನಾಂಗ್ ಲಿಂಗ ರಾಜೇಂದ್ರ ಒಡೆಯ ಕೊಡಗ್‌ರ ಮನಾರ ರಾಜ್ಯಭಾರತ್‌ನ ತಾನೆ ವಹಿಸಿಯಂಡತ್.

ಕಲ್ಪಾತಿಮರತ್ತರ ಕೋಟೆಲ್ ಇಂಜ ಕೊಡಗ್‌ರ ಸೈನಿಕಂಗಳ ತಂಗಡ ಸೈನ್ಯಾಧಿಕಾರಿ ಪಿಳ್ಳಾ ಕೋಟೆರ ಅಧಿಕಾರಿ ಸಮೇತ ಕಲಿಸಂದ 4876ನೆ ಜಯ ಸಂವತ್ಸರತ್‌ಂಜ ಎಣ್ಣಕ ಕ್ರಿ.ಶ. 1775ತ್‌ಂಜ ಕಲಿಸಂದ 4880ನೆ ವಿಳಂಬಿ ಸಂವತ್ಸರಕ್ಕೆತ್ತನೆ ಎಣ್ಣಕ 1779ಂಗೆತ್ತನೆ ಅಂಜಿ ಕಾಲ ಬಯಲ್‌ನಾಡ್‌ರ ಆ ಸೀಮೆನ ತಂಗಡ ಪುಡ್‌ತತ್ ಬೆಚ್ಚಂಡತ್. ಆಚೇಂಗಿ, ಆ ನೇರತ್‌ರ ಆಖೀರಕ್ ಕೋಟೆಲ್ ಇಂಜ ತಿಂಬಕುಳ್ಳ ಸಾಮಾನ್ ತೇಂದ್ ಪೋನಾಂಗ್ ಪೋರಮೆಂಜ ತಿಂಬಕುಳ್ಳ ಪಿಳ್ಳಾ ಬೋರೆ ಅಪಶ್ಯುಪಟ್ಟಿ ಸಾಮಾನ್ ಕೋಟೆಕ್ ಎತ್ತುವಕ್ ಕೋಟೆ ಅರಸ ತಡೆ ಮಾಡ್‌ನಾಂಗ್ ಈ ಕೋಟೆರ ಕಿಲ್ಲೆದಾರ, ಸೈನಿಕಂಗಳ ಸರದಾರ ಅಲ್ಲಿಯತ ಬಿಡಾರತ್‌ನ ಒಪ್ಪಿಯಂಡ್ ಕಲಿಸಂದ 4881ನೆ ವಿಕಾರಿ ಸಂವತ್ಸರತ್‌ರ ಚೈತ್ರಮಾಸತ್ ಕೊಡಗ್‌ಕ್ ಬಂದಿತ್ ಲಿಂಗ ರಾಜೇಂದ್ರ ಒಡೆಯಂಗ್ ಬಂದ ಕಷ್ಟತ್‌ನ ಎಣ್ಣಿಯಂಡತ್.

ಲಿಂಗರಾಜೇಂದ್ರ ಒಡೆಯ ಅಕ್ಕ ತಿರಿತ್ ಬಯಲ್‌ನಾಡ್ ಸೀಮೆನ ಕಲ್ಪಾತಿಕ್ಕೆತ್ತನೆ ಪಡ್‌ಂದವಕ್ ತಾಂಡ ಅಣ್ಣಂಡ ಮೋವ ಚತ್‌ಪೋನ ಅಪ್ಪಾಜಿರಾಜಂಡ ಒಕ್ಕ ದಂಡ್ ರಾಜಕುಮಾರಂಗಡ ಕೂಡೆ ದಂಡಾಯಿರ ಕೊಡವಳ ಬಯಲ್ ನಾಡ್‌ಕ್ ಆಯೆಚತ್. ಆಚೇಂಗಿ, ಕೋಟೆ ಅರಸ ಕೊಡಗ್‌ರ ಸೈನ್ಯ ಪೋಪ ಇಕ್ಕಟ್ಟಾನ ಬಟ್ಟೆಲ್ ತಾಂಡ ಸೈನಿಕಂಗಳ ಆಕಿತ್ ಬಟ್ಟೆಲ್ ಮರ ಬೂಕಿತ್, ಅಡ್ಡಕೆಟ್ಟಿತ್ ಬೈಟ್ ನೇರತ್ ಕೊಡಗ್‌ರ ಸೈನ್ಯತ್‌ರ ಮೀದ ಬುದ್ದಿತ್ ಓರ್ ರಾಜಕುಮಾರ ಪಿಳ್ಳಾ ಕೊಡಗ್ ಸೈನಿಕಂಗಳೆಲ್ಲ ಕೆತ್ತಿತ್‌ಟ್ಟಿತ್. ಇಞ್ಚೋರ್ ರಾಜಕುಮಾರನ ಕೈಸೆರೆ ಆಯಿತ್ ಪುಡ್‌ಚಂಡ್ ಪೋಯಿತ್ ಕದನೂರ್ ಕೂಲಾ ಎಣ್ಣುವಲ್ಲಿ ಆಕಿತ್ ಚೆನ್ನಂಗ್ ದಿನತ್ ಅವನೊ ಕೊಲ್ಚೆಟ್ಟಿತ್. ಇನ್ನನೆ ಕಲ್ಪಾತಿಕ್ಕೆತ್ತನೆ ಸೀಮೆನ ಪುನಾದಿಯ ಪಡ್‌ಂದವ ಲಿಂಗರಾಜೇಂದ್ರಂಡ ಪ್ರಯತ್ನ ವಿಫಲ ಆಯಿತ್ ಆ ಸೀಮೆ ಕೊಡಗ್ ರಾಜಂಡ ಕೈಯಿಂಜ ತಪ್ಪಿ ಪೋಚಿ.

ಅದೆ ಕಾಲ ಮಾಘ ಬಹುಳ ದಶಮಿರ ಪದ್‌ನಾಚಿ ಎಣ್ಣಕ ಕ್ರಿ.ಶ. 1780ನೆ ಫೆಬ್ರವರಿ



ತಿಂಗತ್ ಲಿಂಗರಾಜೇಂದ್ರ ಒಡೆಯ ಮಹಾದೇವಪುರತ್ ಚತ್ಪೋಚಿ. ಅಂವಂಡಿಷ್ಟಪೋಲೆ ಅಂವಂಡ ಪೆರಿಯ ಮೋಂವ ವೀರರಾಜೇಂದ್ರ ಒಡೆಯ, ಲಿಂಗರಾಜೇಂದ್ರ ಒಡೆಯಂಡ ಚಾವುನ ಮಹಾದೇವ ಪುರತ್ ಪೋಲೆ ಬಲತಬರಿಲ್ ಓರ್ ಎತ್ತರತ ಜಾಗತ್ ಸಮಾಧಿ ಮಾಡ್ಚಿ. ಆ ಜಾಗತೆ ಓರ್ ಗದ್ದಿಗೆನೆ ಕೆಟ್ಟಾಚಿಟ್ಟಿತ್ ಅದೊಂಡ ಒಳ್ಳಲ್ ಬಸವೇಶ್ವರ ಮೂರ್ತಿ ಪ್ರತಿಷ್ಠಾಪನೆ ಮಾಡ್ಚಿ. ಆಚೇಂಗಿ, ಈ ಗದ್ದಿಗೆ ಕೆಲಸ ಪೂರ್ತಿ ಆಪಾಂಗ್ ಮುಪ್ಪಡೆ ಹೈದರಾಲಿ ನವಾಬ ಕೊಡಗುರ ರಾಜಕುಮಾರಂಗಳ ಕೊಡಗುರ ಪೊರಮೆ ಎಡ್ತಂಡ್ ಪೋಯಿತ್ ಆಕನಾಂಗ್ ಆ ಕೆಲಸತನ ಒಂದ್ ದಂಡ್ ಕಾಲತ್ ಅಲ್ಲಿಯತ ಮಠತ್ ಚರಮೂರ್ತಿ ಸಿದ್ಧಲಿಂಗಪ್ಪ ಪೂರ್ತಿ ಮಾಡ್ಚಿ. ಇದೊನ ಎಳ್ಳೊನ ತಗಡ್ ಶಾಸನ ಆ ಗದ್ದಿಗೆರ ಪಡಿರ ಕೊಡಿಲ್ ಬೆಚ್ಚಿತ್. ಅದ್ ಇನ್ನನೆ ಉಂಡ್.

ಲಿಂಗರಾಜೇಂದ್ರ ಒಡೆಯರು ವಿ ಕೊಡಲಿ ಚರ ಮೂರ್ತಿಗಳಾದ ಶಿವಲಿಂಗಪ್ಪನವರು ಶಾರ್ವರಿ| ಸಂ ಕಾರ್ತಿಕ ಶುದ ೧೩ಯು ಮಂದವಾರದಲ್ಲು ಜೀರ್ಣೋದ್ಧಾರ ಮಡ್ಚಿ| ಶ್ರೀಮದ್ರಾಜಾಧಿರಾಜ ರಾಜಪರಮೇಶ್ವರ ಪ್ರಹಡಪ್ರತಾಪ ಅಪ್ರತಿಮವೀರ ನರಪತಿ ಕೊಡಗುರ ಸಂಸ್ಥಾನತರ ಶ್ರೀರತ್ನ ಸಿಂಹಾಸನಾರೂಢರಾಗಿ ಪೃಥ್ವಿ ಸಾಮ್ರಾಜ್ಯಾಂಗೈಯುತ್ತಿರ ಭಾರದ್ವಾಜ ಗೋತ್ರದ ಆಶ್ವಾಸನ ಸುತ್ರದರುಕ್ಖಾನುಕಾಢ್ಯಾಯ ವೀರಶೈವ ಮತಸ್ತರಾದ ಅಪಾಚೇಂದ್ರ ಒಡೆಯರವರ ಪುತ್ರರಾದ ಲಿಂಗರಾಜೇಂದ್ರ ಒಡೆಯರು ನಮಸ್ತುಂಗ ಶಿರಚುಂಬಿ ಚಂದ್ರ ಚಾಮರ (ಚಾಮರ) ಚಾರವೇ ತ್ರೈಲೋಕ್ಯ ನಗರಾಂಭ ಮೂಲಸ್ತಂಭಾಯ ಶಂಭವೆ! ಸ್ವಸ್ತಿ ಶ್ರೀ ವಿಜಯಾಭ್ಯುದಯ ಕಲಿಸಂದ 4881ನೆ ವರ್ತಮಾನಕೆ ಸಲುವ ವಿಕಾರಿ ಸಂವತ್ಸರದ ಮಾಘ ಬ ೧೦ಯು ಬುಧವಾರ ದಿವಿ ಗಳಿಗೆ 27<sup>1/2</sup>ಗೆ ಶಿವಾಧೀನವಾದ್ದು ಈ ಶಿವಾಧೀನವಾಗುವ ತತ್ಕಾಲದಲ್ಲು ಈ ಮಹಾರಾಜರ ಗರ್ಭಬ್ಬಿ ಸುಧಾಕರಾಯಮಾನರಾದ ವೀರರಾಜೇಂದ್ರ ಒಡೆಯರು ಸನ್ನಿಧಾನದಲ್ಲು ಇದ್ದು ಸತ್ಕರ್ಮವನು| ವಿರಚಿತಿ ಅಪ್ಪಣೆ ಪ್ರಕಾರ(ರ)ಕ್ಕೆ ಮಹಾದೇವಪುರದಲ್ಲು ಕ್ರಿಯಾಸಮಾಧಿಯನು ಮಾಡಿಸಿ ದೇವಸ್ಥಾನವನು ರಚಿಸಿ ಆ ಸಮಾಧಿಮೇಲೆ ಬಸವೇಶ್ವರ ಪ್ರತಿಷ್ಠೆಯನು ಮಾಡಿಸಿ ಮುರಿವಿ ಸಂಪ್ರದಾಯದ ಮಠವನು ಕಟ್ಟಿಸಿ ಸದಾಕಾಲದಲ್ಲು ಗಣಾರಾಧನೆ ಯಿ ದೇವತಾರಾಧನೆ ಉದಿಶ್ಯ ಯಿ ಮಾದೇವ|ಪುರದ ಬುಮಿ ಚಿಕಹ(ರ)ದ ಗ್ರಾಮ ಜಂಬೂರು ಗ್ರಾಮ ಬೇಲೂರು ಬಸವನ ಹಳಿ ಗ್ರಾಮಕ್ಕೆ ಸಹ ಲಿಂಗಮುದ್ರೆ ಶಿಲಾ ಪ್ರತಿಷ್ಠೆಯನು ಮಾಡಿಸಿ ನಳಿ ಸಂವತ್ಸರದ ಚೈತ್ರ ಶು ೧ ಉ ಭಾನವಾರದಲ್ಲು ಒಪ್ಪಿಸಿ ದಾನ ಶಾಸನವನು ಬರೆದು ಕೊಟ್ಟಿದೆಯಾಗಿ ಜೀರ್ಣೋದ್ಧಾರ ಅದು ಶಾರ್ವರಿ ಸಂಕಾರ್ತಿಕ ಶು ೧೩ ದಿವಸ ಪ್ರಾರಂಭ ಶುಭ ಕೃಸಂ ವೈಶಾಖ ಶು ೧೦ ಯು ಗುರುವಾರಕ್ಕೆ ಆಖೀರು ಆಗಿದೆ.

ಈ ಶಾಸನತ್ ಮುರಿಕ್ ಸಂಪ್ರದಾಯ ಮಠತ್ ಸ್ವಾಮಿಕ್ ನಳ ಸಂವತ್ಸರತ್



ಗಣಾರಾಧನೆ ಪಿಳ್ಳಾ ದೇವತಾರಾಧನೆಕ್ ಚೆನ್ನಂಗ್ ಊರಾನ ದಾನಶಾಸನ ಆಯಿತ್ ಕೊಡ್ತಾನ ಎಳ್ಳಿತುಳ್ಳಾಂಗ್ ಈ ಶಾಸನತನ ವೀರರಾಜೇಂದ್ರ ಒಡೆಯ ಕ್ರಿ.ಶ. 1796ತ್ ಬೆಪ್ಪ್‌ಚಿಟ್ಟುತ್‌ಂದ್ ಗೊತ್ ಕಟ್ಟುವ. ಶಾಲಿವಾಹನ ಶಕ 1718ಂಡ ನಳ ಸಂವತ್ಸರ ಕ್ರಿ.ಶ. 1796ಕ್ ಸೆರಿಯಾಪ.

ಲಿಂಗರಾಜೇಂದ್ರ ಒಡೆಯ ಕ್ರಿ.ಶ. 1780ತ್ ಮಹಾ ದೇವಪುರತ್ ಶಿವಾಧೀನ ಆನಪಿಳ್ಳಾ ಅಂವಂಡ ಮಕ್ಕ ಚೆರಿಯವು ಆಯಿತಿಂಜಾನುಂಡ್ ಕೊಡಗ್‌ನ ಸೀದ ತಾಂಡ ಪುಡ್‌ತಕ್ ಕೊಂಡ ಬಪ್ಪಕ್ ಇದೇ ಓರ್ ಸಂದರ್ಭಾಂದ್ ನವಾಬ ಹೈದರಾಲಿ ಗೇನ ಮಾಡ್‌ಚಿ. ಅಕ್ಕ ಅಂವ ಲಿಂಗರಾಜೇಂದ್ರ ಒಡೆಯಂಡ ಮಕ್ಕಡ ಕೂಡ "ಈ ಸೀಮೆನ ಬಂದೋಬಸ್ತ್ ಮಾಡುವಾಂಡ ಮೀದ ನಿಂಗ ಇಳ್ಳಾ ಚೆರಿಯಯಿಂಗ. ನಿಂಗಳುಂಡ್ ಕಯ್ಯಲೆ. ನಿಂಗ ಬಲ್ಯದಾನಪಿಳ್ಳಾ ನಿಂಗಡ ರಾಜ್ಯತ್‌ನ ನಿಂಗಕೆ ತಪ್ಪಿ"ಂದ್ ಎಣ್ಣೆಚಿ.

ಅಲ್ಲಿಂಜ ಕೊಡಗ್‌ನ ತಾಂಡ ಪುಡ್‌ತಕ್ ಎಡ್‌ತಂಡ ರಾಜ್ಯತ್‌ರ ಚೆನ್ನಂಗ್ ಭಾಗತ್ ತಾಂಡ ಚೆನ್ನಂಗ್ ಸೈನಿಕಂಗಳ ಆಕ್‌ಚಿ. ಕೊಡಗ್‌ರ ಆಡಳಿತ ನಡ್‌ತುವಣ್ ಪಂಡ್ ಕೊಡಗ್ ರಾಜಂಡ ಆಳ್ವಿಕೆರ ಕಾಲತ್ ಕರಣಿಕ / ರಾಜ್ಯ ಪಣಕಾಸಾರ ಇಲಾಖೆರ ಮುಖ್ಯ ಅಧಿಕಾರಿ ಆಯಿತಿಂಜ ಸುಬ್ಬರಸಯ್ಯ ಎಣ್ಣುವಂವ ಪಟ್ಟಮಳ ಅಮಲ್‌ದಾರ ಆಯಿತ್ ನೇಮಕ ಮಾಡ್‌ಚಿ.

ಇನ್ನನೆ ಸುಮಾರ್ ಕ್ರಿ.ಶ. 1600ತ್‌ಂಜ ಲಿಂಗಾಯತ ರಾಜಂಗಳುಂಡ್ ಆಳ್‌ನ ಕೊಡಗ್ ಪೊರಮಲೆ ಹಾಲೇರಿ ರಾಜಮನತನತ್‌ರ ದಾಯಾದಿಯಡ ಪಗೆನುಂಡ್ ಪರಕೀಯನಾನ ಹೈದರಾಲಿ ನವಾಬಂಡ ಸ್ವಾಧೀನ ಆಚಿ.

ಒಂದನೆ ಲಿಂಗರಾಜೇಂದ್ರ ಒಡೆಯಂಡ ಕಾಲತ್ ಕೊಡಗ್‌ರ ಚರಿತ್ರನ ವಿವರಾಚಿಡುವ ಈ ನೇರತ್ ಅಕ್ಕತ ಕಾಲತ್‌ರ ಮಹಾದೇವಪುರ (ಮಾದಾಪುರ) ವೈಭವತ್‌ರ ಮೀದ ಚೆನ್ನಂಗ್ ಎಣ್ಣಂಡಿಯಾಪ. ಆ ಕಾಲತ್ ಕೊಡಗ್‌ರ ಉತ್ತರ ಭಾಗಕ್ ಮಡಿಕೇರಿಂಜೆ ಆಡ್, ಹಾಲೇರಿಂಜೆ ಆಡ್ ಪೋಂಡುವೇಂಗಿ ಮಹಾ ದೇವಪುರ ಬಟ್ಟೆಕಾಲೆ ಪೋಕಂಡಿಂಜತ್.

ರಾಜ್ಯತ್ ಸಂಚಾರಕ್ ಚೆನ್ನಂಗ್ ಅಡ್ಡಬಟ್ಟೆ ಇಂಜತ್. ಇದತ್ ಅಲ್ಲಲ್ಲಿ ಪಾರಕಾರಡ ಉಕ್ಕಡ ಇಂಜತ್. ಮಹಾದೇವಪುರ ಮಡಿಕೇರಿ ಸೋಮವಾರಪೇಟೆಕ್ ಸಮ ದೂರತ್ ಇಂಜಾನುಂಡ್ ನಡ್‌ಂದಂಡ್ ಪೋಪಕ ಆ ಕಾಲತ್‌ರ ಪ್ರಯಾಣಿಕಂಗಳ್ ಬಟ್ಟೆಲ್ ಅಡಿಗೆ ಮಾಡಿಯಂಡ್ ಬೈಟ್ ನೇರ ಕಯಿಪಕ್ ಈ ಊರ್ ಅನುಕೂಲ ಆಯಿತಿಂಜತ್. ಕೊಡಗ್‌ರ ರಾಜಂಗ ದೀವಾವಳಿ ನಮ್ಮನ ಇಲ್ಲಿಯೆ ಕೈಪ ಇಂಜತ್ ಎಣ್ಣುವ. ರಾಜಂಗ ಆನೆರ ಕೊಡಿಯ ಅಳತಂಡ್ ಪೊಳಿಕರೆಂಜ ಚಿಕ್ಕ ಹರಗತ್‌ರ ಪೂರ್ವ ಬರಿಕಿತ್ತನೆ ಮೆರವಣಿಗೆ

ಪೋಯಿತ್ ಬಪ್ಪ ಇಂಜತ್. ಇನ್ನತ ಮೆರವಣಿಗೆನ 'ಜಂಬೂಸವಾರಿ'ಂದ್ ಕಾಕುವ ಇಂಜತ್. ರಾಜಂಗ ಜಂಬೂ ಸವಾರಿ ಮಾಡುವ ಇಂಜ ಈ ಊರ್‌ಕ್ 'ಜಂಬೂರು' ಎಣ್ಣುವ ಪೆದ ಬಾತ್.

ರಾಜಂಗ ಕೈಪ ಇಂಜ ದೀಪಾವಳಿ ನಮ್ಮೆಲ್ ಕೂಡ್‌ನ ಜನಕೆಲ್ಲ ಅರಮನೆರ ಖರ್ಚೆಲೆ ಊಟೋಪಚಾರ ನಡಪ ಇಂಜತ್. ಅಕ್ಕ ಬೇವ್‌ಚಿಡುವ ಇಂಜ ಕೂರ್‌ರ ಕಂಜಿನ ಬಾಕುವ ತಗ್ಗ ಜಾಗಕ್ 'ಗಂಜಿಕೆರೆ' ಎಣ್ಣುವ ಪೆದ ಬಾತ್. ಮಹಾದೇವಪುರ ಆ ಕಾಲತ್ ಇನ್ನನೆ ರಾಜಂಗಕ್ ಮುಖ್ಯಪಟ್ಟ ಓರ್ ಜಾಗ ಆನಗುಂಡ್ ಲಿಂಗರಾಜೇಂದ್ರ ಚೆತ್ತಪಿಳ್ಳಾ ಅಲ್ಲಿಯೇ ಅಂವಂಡ ತಡಿನ ಸಮಾಧಿ ಮಾಡ್‌ಚಿ. ಅದ್‌ಂಡ ಕೊಡಿಲ್ ಬಸವೇಶ್ವರಂಡ ತಿರಿಕೆ ಕೆಟ್ವಚಿ. ಈ ಪೂಜೆಕ್, ಮುರಿಕ್, ಸಂಪ್ರದಾಯತ್‌ರ ಮಠಕ್ ಸುತ್ತ ಮುತ್ತ ಇಂಜ ನಾಡ್ ಎಲ್ಲ ದಾನ ಆಯಿತ್ ಕೆಟ್ವಚಿ. ಲಿಂಗ ರಾಜೇಂದ್ರಂಡ ಸಮಾಧಿ ಪಿಳ್ಳಾ ಬಸವೇಶ್ವರಂಡ ಮೂರ್ತಿ ಉಳ್ಳ ಈ ತಿರಿಕೆ ಚಿರಿಯದಾಯಿತ್ ದುಂಬ ಚಾಯಿತೆ ಕೆಟ್ವನದಾಯಿತುಂಡ್.

ಪೊರಮಲೆ ರಾಜವಂಶ ನಿರ್ವಂಶ ಆನಪಿಳ್ಳಾ ಲಿಂಗ ರಾಜೇಂದ್ರ ಆ ರಾಜವಂಶಕ್ ಸೇರಾನ್ ಭೂಮಿ, ಮನೆ ಇನ್ನತಾನ ಅಂವಂಡ ಸರದಾರ ಅಣ್ಣಪ್ಪನ ಅಪ್ಪಯ್ಯಂಗ್ ಕೊಡ್‌ತನ್ನಕೆ ಕಾಂಬ. ಎನ್ನಂಗೇಣ್ಣಕ ಅಣ್ಣಪ್ಪನ ಅಪ್ಪಯ್ಯಂಡ ಆಸ್ತಿರ ಉತ್ತರಾಧಿಕಾರಿಯಳೆ ಕೈಂಜ ಶತಮಾನತ್ ಎಣ್ಣಕ ಸುಮಾರ್ 1861ತ್ ಗಾಳಿಬೀಡ್ ಊರ್‌ಲ್ ಪೊರಮಲೆ ರಾಜಂಡ ಅರಮನೆ ಇಂಜ ಜಾಗ ಪಿಳ್ಳಾ ಚೆನ್ನಂಗ್ ಬೇಲ್‌ನ ನೆಲ್ಲಪಟ್ಟಿರ ಒಕ್ಕಕಾರಕ್ ಮಾರ್‌ನನ್ನಕೆ ಕಂಡ್‌ಬಪ್ಪ. ಈಂಡ ನೆರೆಊರಾನ ಮೊಣ್ಣಂಗೇರಿಲ್ ಅಣ್ಣಪ್ಪನ ಅಪ್ಪಯ್ಯಂಡ ಆಸ್ತಿರ ಉತ್ತರಾಧಿಕಾರಿಯ ಇಂದೇಕೂ ಉಂಡ್. ಇವು ಬಂಟಂಗ. ದ. ಕನ್ನಡ ಜಿಲ್ಲೆರ ಪದ್ವತಿನ ಇವು ನಡ್‌ತುವ. ಮೊಣ್ಣಂಗೇರಿಲ್ ಉಳ್ಳ ಇಯಂಗಡ ಮನೆರ ಬೆಂಬರಿ ಕಯ್ಯಾಲೆಲ್, ಪೊರಮಲೆರ ಎದಿಕೆ ಕಯ್ಯಾಲೆಲ್ ಬಲ್ಪಪಡಿರ ಓರ್ ಬರಿಲ್ ಅಳ್‌ತವಕ್ ಮಾಡಿತುಳ್ಳ ವ್ಯವಸ್ಥೆನ ಇಂದೂ ಕಾಂಗೊಲು. ಈ ಕುಟುಂಬಕಾರಡಾತ್ ಕೊಡಗ್ ರಾಜಂಗಡ 'ವಿ' ಅಚ್ಚ ಉಳ್ಳ ಓರ್ ಕಚ್ಚಿರ ಪಾತ್ರ ಉಂಡ್. ಇಯಂಗಡ ಪೆರಿಯಂವನೊಬ್ಬ 1837ನೆ ಅಮರಸುಳ್ಳತ್‌ರ ಕಾಟಕಾಯಿಲ್ ಬ್ರಿಟಿಷಡ ಪರ ಪಡೆಪೊತ್ತಿತ್ ಕೊಡಗ್‌ರ ಬ್ರಿಟಿಷ್ ಅಧಿಕಾರಿಯಳುಂಡ್ ಭೂಮಿನ ಉಂಬಳಿ ಆಯಿತ್ ಪಡ್‌ಂದಿತಿಂಜತ್.

## ಕೊಡಗಲ್ ಹೈದರಾಲಿರ ಅಧಿಕಾರ

ಕೊಡಗರ ರಾಜ 1ನೆ ಲಿಂಗರಾಜೇಂದ್ರ ಒಡೆಯ ಕ್ರಿ.ಶ. 1780ಂಡ ಫೆಬ್ರವರಿಲ್ ಚತ್ ಪೋನನ್ನಕೆ ಅಂವಂಡ ಮಕ್ಕ ಚೆರಿಯವು ಎಣ್ಣುವ ನೆಂವನತ್ ಹೈದರಾಲಿ ಕೊಡಗನ ಸೀದ ತಾಂಡ ಪುಡಾತಕ್ ಎಡಾತಂಡ್ ಅಲ್ಲಿಯತ ಅಮಲ್ದಾರಿಕೆ ಎಣ್ಣಕ ಆಡಳಿತ ಅಧಿಕಾರತನ ಪಂಡ್ ಕರಣಿಕ ಆಯಿತಿಂಜ ಸುಬ್ಬರಸಯ್ಯಂಗ್ ವಹಿಸಿತಿಂಜತ್. ಇದ್‌ಂಗ್ ಮುಪ್ಪಡೆ ಲಿಂಗರಾಜೇಂದ್ರ, ಹೈದರಾಲಿರ ಹೇಳಿಕೆಪೋಲೆ ಬಯಲ್‌ನಾಡ್‌ರ ಕಲ್ಪಾತಿಕೆತ್ತನೆ ಜಾಗತನ ತಾಂಡ ಪುಡಾತತ್ ಬೆಚ್ಚಂಡ್ ಚೆನ್ನಂಗ್ ತಿಂಗತೆ ಹೈದರಾಲಿ, ಲಿಂಗರಾಜೇಂದ್ರಂಗ್ ಸೀಮೆ ಜಾಸ್ತಿಯಾಚಿಂದ್ ಕೇಡಲ್ ಅಂವನ ಒರಾತ ಮಾಡಿತ್ ಘಟ್ಟಿತ್‌ರ ಕೇದತ ಅಮರಸುಳ್ಳ, ಪಂಜ, ಬೆಳ್ಳಾರೆ ಮಾಗಣೆನ ಉ. ಕೊಡಗರ ಏಳಾಯಿರ ಸೀಮೆನ ತಾನೆ ಎಡಾತಂಡತ್. ಇಕ್ಕ ಹಾಲೇರಿ ರಾಜಂಗಡ ಬಾಕಿಯಾನ ರಾಜ್ಯ ಹೈದರಾಲಿರ ನೇರ ಆಳ್ವಿಕೆಲ್ ಇಂಜತ್.

ಹೈದರಾಲಿ ಇನ್ನನೆ ಚದಿಲ್ ಕೊಡಗನ ತಾಂಡ ಪುಡಾತತ್ ಬೆಚ್ಚಂಡ್ ಹಾಲೇರಿ ರಾಜಕುಮಾರ ವೀರರಾಜೇಂದ್ರ ಒಡೆಯ ಇಪ್ಪಕೆ ಅಂವನ ತೆರ್ಪ ಬೆಚ್ಚಿತ್, ಪಟ್ಟಮ ಸುಬ್ಬರಸಯ್ಯನ ಅಮಲ್ದಾರ ಆಯಿತ್ ಮಾಡ್‌ನದ್ ಕೊಡಗರ ಜನಕ್ ಹೈದರಾಲಿರ ಮೀದ ಅಸಮಧಾನಕ್ ಎಡೆಯಾಚಿ.

ಆನಗುಂಡ್ ಅವು ರಾಜಕುಮಾರಂಗ ಇಂಜನ್ನಕೆ ಪಟ್ಟಮ ಸುಬ್ಬರಸಯ್ಯಂಡ ಅಡಿಯಾಳಾಯಿತ್ ಇಪ್ಪದ್ ಸೆರಿಯಲ್ಲಂದ್ ಅಮಲ್ದಾರ ಪಿಳ್ಳಾ ಹೈದರಂಡ ಸೈನಿಕಂಗಂಡ ಮೀದ ತಿರಿತ್ ಬುದ್ದತ್. ಇಚ್ಚಕೆ ಅಲ್ಲತೆ ಅವು ಮಡಿಕೇರಿಕ್ ಮುತ್ತಿಗೆ ಇಟ್ಟಿತ್ ಪೊರ್‌ಮೆಂಜ ತಿಂಬಕುಳ್ಳ ಸಾಮಾನ್ ಬರತನ್ನಕೆ ತಡಾತತ್. ಕೂಟ್‌ಕ್ ತಂಗಳುಂಡ್ ಭೂಮಿ ಕಂದಾಯ ವಸೂಲಿ ಮಾಡುವ ಅಧಿಕಾರಿಯಳ ಓಡಾಚಿಟ್ಟಿತ್ ಕಂದಾಯ ಕೊಡಾಕತೆ ಕೊಡಾಚಿ.

ಮಲಯಾಳಕ್ ಸೈನ್ಯತೋಡೆ ಪೊರ್‌ಟ ಹೈದರಾಲಿ ಈ ಸುದ್ದಿನ ಕೇಟಿತ್ ಕೊಡಗಕ್ ಬಾತ್. ಅಂವ ಕೊಡಗಕ್ ನುಗ್ಗನದೆ ತಾಂಡ ಸೈನಿಕಂಗಳ ಕೊಡಗರ ಮೂಲೆ ಮೂಲೆಕ್ ಅಯೆಚಿತ್ ಕೈಕ್ ಕಾಟ್ಕಾನ ಜನಳ ಪುಡಾಚಂಡ್ ಬಪ್ಪನ್ನಕೆ ಆಜ್ಞೆ ಮಾಡಾಚಿ. ಅದತ್ ಮುಖ್ಯಪಟ್ಟಿಯಿಂಗಳ ತೂಕಾಚಿ. ಜನಳ ಪುಡಾತತ್ ಬೆಚ್ಚವಕ್ ಪಾರಕಾರಡ ಮನೆ ಮಾಡಾಚಿ. ಇನ್ನನೆ ಅಂವ ಅಕ್ಕ ಕೊಡಗಾಕಾರಡ ಗಲಾಟೆನ ನಿಪ್ಪಾಚಿಟ್ಟಿತ್. ಆಖೀರಕ್ ರಾಜಕುಮಾರಂಗ ಪಿಳ್ಳಾ ರಾಜ ಮನೆತನಕಾರಳ ಹಾಸನ ಜಿಲ್ಲೆರ ಮಹಾರಾಜದುರ್ಗತ್‌ರ ಗೊರೂರಾರ ಕೋಟೆಲ್ ಆಕುವನ್ನಕೆ ಅಮಲ್ದಾರಂಗ್ ಆಜ್ಞೆ ಮಾಡಿತ್ ಶ್ರೀರಂಗಪಟ್ಟಕ್ ಪೋಚಿ.

ಇಚ್ಛಾಕಾಣೆ ಚೆನ್ನೇಲ್ ಇಂಜ ಈಸ್ತ್ ಇಂಡಿಯಾ ಕಂಪೆನಿರ ಇಂಗ್ಲೀಷ್ ಅಧಿಕಾರಿಯಕೂ, ಹೈದರಾಲಿಕೂ ದಂಡನೆ ಕುರಿ ಪಡೆ ಸುರುಬಾಚಿ. ಹೈದರಾಲಿ ಇಂಗ್ಲೀಷ್‌ಕಾರಳ ಎದಾರ್‌ಡುವಕ್ ಬಲ್ಯ ಸೈನ್ಯತನ ಕೂಟಿಯಂಡ್ ಆರ್ಕಾಟ್‌ಕ್ ಪೋಚಿ.

ಕೊಡಗಲ್ ತಂಗಡ ಜನಳ ಹೈದರಾಲಿ ಕೊಲ್ಚಿಟ್ಟಾಂಗ್, ಕೊಡಗರ ರಾಜ ಕುಟುಂಬತನ ಗೊರೂರ್‌ಕ್ ಕಡ್‌ತನಾಂಗ್, ಕೊಡಗಂಜ ಅಂವಂಡ ಸೈನಿಕಂಗಳೆಲ್ಲ ಓಡ್‌ಚಿಟ್ಟಿತ್ ಕೊಡಗಲ್ ಹೈದರಾಲಿರ ಆಳ್ವಿಕೆನ ನಿರ್ನಾಮ ಮಾಡೊಂಡು ಎಣ್ಣುವ ಹಠ ಬಾತ್. ಪರಂಬ್ ಪಡೆಲ್ ಹೈದರಾಲಿರ ಸೈನಿಕಂಗಳ ಚೋಪ್‌ಚಿಡುವಕ್ ಸುಲಭ ಇಂಜಾಲೆ. ಆನಗುಂಡ್ ಹೈದರಾಲಿ ತಾಂಡ ಸೈನ್ಯತೋಡೆ ಆರ್ಕಾಟ್‌ಕ್ ಪೋವ ನೇರತ್ ಕೊಡಗರ ಜನ ಎಲ್ಲ ಕೂಡಿತ್, ಕೊಡಗಲ್ ಇಂಜ ಹೈದರಾಲಿರ ಸೈನಿಕಂಗಡ ಡೇರೆಕ್ ಮುತ್ತಿಗೆ ಇಟ್ಟಿತ್. ಅಯಿಂಗಕ್ ತಿಂಬಕುಳ್ಳ ಸಾಮಾನ್ ಬರತನ್ನಕೆ ತಡ್‌ತಿತ್ ಆ ಸೈನಿಕಂಗಳ ಕೊಡಗ್ ಬುಟ್ಟಿತ್ ಪೊರ್‌ಡುವನ್ನಕೆ ಮಾಡ್‌ಚಿ. ಅಲ್ಲಿಂಜ ಆ ಡೇರೆನೆಲ್ಲ ತಂಗಡ ಪುಡ್‌ತಕ್ ಎಡ್‌ತಂಡತ್.

ಇದ್ ನಡ್‌ಂದಿಯೆ 1782ನೆ ಇಸವಿಲ್. ಅದೇ ಕಾಲ ನವಾಬ ಹೈದರಾಲಿರ ಬೆನ್ನಲ್ ಕರ್‌ಪುಣ್ಣ್ ಎದ್ವಿತ್ ಅದೇ ಏತುಲ್ ಆರ್ಕಾಟ್‌ಲ್ ಚತ್ತ್ ಪೋಚಿ. ಈ ನೇರತ್ ಇಂಗ್ಲೀಷ್‌ಕಾರಡ ಕೂಡೆ ಇಞ್ಚ್ ಪಡೆ ನಡ್‌ಂದಂಡ್ ಇಂಜಾನುಂಡ್ ಟಿಪ್ಪು ಸುಲ್ತಾನಂಗ್ ಕೂಡೆನ್ನೆ ಕೊಡಗ್‌ಕ್ ವಾಪಾಸ್ ಬಪ್ಪ ಕೈಂಜಾಲೆ. ಈನಗುಂಡ್ ಕೊಡಗರ ಜನಕ್ ಒಂದ್ ದಂಡ್ ಕಾಲ ಪಡೆ ಇಂಜಾಲೆ. ಆಚೇಂಗಿ, ಇನ್ನೆ ಕೊಟ್ವನ ಸ್ವಾತಂತ್ರ್ಯ ಕೊಡಗರ ಜನಕ್ ಏರ ಕಾಲ ಇಂಜಾಲೆ.

### ಟಿಪ್ಪು ಸುಲ್ತಾನ ಪುನಾದಿಯ ಕೊಡಗನ ಗೆದ್ದ ದ್

ಕೊಡಗ್‌ಕ್ ಸೈನ್ಯತೋಡೆ ಬಪ್ಪಾಂಗ್ ಮುಪ್ಪಡೆ ಹೈದರಾಲಿ ಅದ್‌ಂಡ ಸುತ್ತು ಇಂಜ ರಾಜ್ಯತನೆಲ್ಲ ಗೆದ್ದಿತಿಂಜತ್. ಆಚೇಂಗಿ, ಕೊಡಗ್ ಕುಂದ್ ಕಾಡ್‌ರ ಸೀಮೆ ಆಯಿತಿಂಜಾನುಂಡ್ ಕೆರಿಯ ಕಾಡ್‌ನುಂಡ್ ದುಂಬಿ ಪೋಯಿತಿಂಜತ್. ಲಿಂಗರಾಜೇಂದ್ರ ಒಡೆಯ ಸಹಾಯ ಕೇಪಾಂಗ್ ಮುಪ್ಪಡೆ ಅಂವಂಗ್ ಗೆಲ್ಲುವಕ್ ಕೈಂಜಾಲೆ. ಹೈದರಾಲಿಕ್ ಕೊಡಗ್ ಬೋಂಡಿಯಾಯೆ ತಾಂಡ ರಾಜ್ಯ ವಿಸ್ತರಣೆ ಮಾಡುವಕಲ್ಲ. ಕೊಡಗ್, ದ.ಕನ್ನಡ, ಮಲಯಾಳ ಪಿಞ್ಣ ಮೈಸೂರ್‌ರ ನಡುಲ್ ಉಳಳ ಕುಂದ್‌ರ ಕೊಡಿಯತ ಕಾಡ್‌ಸೀಮೆನ

ಪುಡ್ತಾತಕ್ ಎಡ್ತಂಡ್ ಅಲ್ಲಿ ತಾಂಡ ಸೈನ್ಯತನ ಆಕಿಯಂಡಕ ಅದ್ಂಡ ಸುತ್ತು ಸೀಮೆನ ತಾಂಡ ಪುಡ್ತಾತಕ್ ಬೆಚ್ಚವಕ್ ಸುಲಭ ಆಪಾಂದ್ ಅವ ಗೇನ ಮಾಡ್ಚಿ. ಆನಗುಂಡ್ ಕೊಡಗರ ರಾಜ ಮನೆತನಕಾರಡ ಜಗಳತನುಂಡ್ ಸುಲಭ ಆಯಿತ್ ತಾಂಡ ಅಧಿಕಾರಕ್ ಒಳಪಟ್ಟಿಂಜ ಕೊಡಗನ ನವಾಬ ಹೈದರಾಲಿ ತಾನ್ ಜಿಂವತ್ ಇಪ್ಪಕ ಕೊಡಗರ ರಾಜಕುಮಾರ ವೀರರಾಜೇಂದ್ರ ಒಡೆಯಂಗ್ ಬುಟ್ಟಾಕೊಡ್ಪಕ್ ಇಷ್ಟ ಇಂಜಾಲೆ.

ಅನ್ನನೆ ನವಾಬ ಹೈದರಾಲಿ ಚತ್ತಪಿಳ್ಳಾ ಅವಂಡ ಮೋಂವ ಪಿಳ್ಳಾ ಅವಂಡ ರಾಜ್ಯತರ ಉತ್ತರಾಧಿಕಾರಿ ಟಿಪ್ಪು ಸುಲ್ತಾನ ಕೊಡಗನ ತಾಂಡೊಟ್ಟಾಕೆ ಬುಡುವಕ್ ತಯಾರಿಂಜಾಲೆ. ಅವಂಗೂ ಕೊಡಗರ ಜಾಗ, ಸನ್ನಿವೇಶತರ ಪ್ರಾಮುಖ್ಯತೆ ಗೊತ್ತಿಂಜಾನಗುಂಡ್ ಅವ ಪುನಾದಿಯ ಕೊಡಗನ ಗೆಲ್ಲುವಕ್ ಮನಸ್ಸು ಮಾಡ್ಚಿ.

ಆಚೇಂಗಿ, ಇಂಗ್ಲೀಷ್ಕಾರಡ ಕೂಡೆ ನಡ್ಂದಂಡ್ ಇಂಜ ಪಡೆ ಇಳ್ಳಾ ತೇರತೆ ಇಂಜಾನಗುಂಡ್ ಅವಂಗ್ ತಾನ್ ಪಟ್ಟಿಕ್ ಬಂದನ್ನಕೆ ಕೊಡಗನ ಗೆಲ್ಲುವಕ್ ಕೈಂಜಾಲೆ. ಆ ನೇರತ್ ಎಣ್ಣಕ 1783ತ್ ಟಿಪ್ಪು, ಹಾಸನತರ ಗೊರೂರ್ ಕೋಟೆಲ್ ಆಕಿಂಜ ಕೊಡಗರ ರಾಜ ಮನೆತನಕಾರಲೆಲ್ಲ ಪೆರಿಯಾಪಟ್ಟತರ ಕೋಟೆಕ್ ಕೂಟಿಯಂಡ್ ಬಂದಿತ್ ಆಕ್ಚಿ. ಆ ಕೋಟೆರ ಒಳ್ಳಲ್ ಪಿಳ್ಳಾ ಪೂರ್ಮಲ್ ಅವು ತಪ್ಪಚಿಟ್ಟಂಡ್ ಪೋಕತನ್ನಕೆ ಪಾರಕಾರಳ ಆಕ್ಚಿ. ರಾಜಕುಟುಂಬತರ ಖರ್ಚಿಕ್ ಕಾಲಕ್ 300 ಪಗೋಡ ಎಣ್ಣಕ 1,200 ಉರ್ಪಿಯ ಕೊಡ್ಪ ಇಂಜತ್.

ಪೆರಿಯಾಪಟ್ಟ ಕೋಟೆರ ಒಳ್ಳಕ್ ಕೊಡಗರ ರಾಜ ಕುಟುಂಬಕಾರಕ್ ವಾಸಕ್ ಕೊಡ್ತ ಮನೆ ಸಾಮಾನ್ಯ ಕಟ್ಟಡ ಆಯಿತಿಂಜತ್. ಪೆರಿಯಾಪಟ್ಟ ಕೋಟೆಲ್ ಉಂಬ,ತಿಂಬಕ್ ಸೆರಿಕ್ ಕಟ್ಟತೆ ಪಿಳ್ಳಾ ರಾಜಕುಟುಂಬತ್ ಮೂರಪನಿ ಪಬ್ಬಿತ್ ವೀರರಾಜೇಂದ್ರ ಪಿಳ್ಳಾ ಅವಂಡ ತಮ್ಮಣಂಗಡ ಅವ್ವ ದೇವಾಂಬಿಕೆ ಅಮ್ಮ ಪಿಳ್ಳಾ ಬೋರೆ ಜನ ಅಲ್ಲಿಕ್ ಪೋಯಿತ್ ಚೆನ್ನಂಗಿ ಸಮಯತ್ ಚೆತ್ತಪೋಚಿ.

ಟಿಪ್ಪುಸುಲ್ತಾನ ಮಂಗಳೂರ್ಂಜ ಶ್ರೀರಂಗಪಟ್ಟಕ್ ವಾಪಾಸ್ ಪೋಪಕ ಕೊಡಗಾಕ್ ಬಾತ್. ಅಲ್ಲಿ ಅವ ಕೊಡಗರ ಮುಕ್ರಿಯಳ ಕಾಕಿತ್, ಮಿಳ್ಳಾಕ್ ಅವು ಟಿಪ್ಪುರ ಮೀದ ಬುದ್ದಕ ಆಯಿಂಗಳೆಲ್ಲ ಮತಾಂತರ ಮಾಡುವಿಂದ್ ಬೊತ್ತಚಿಟ್ಟತ್.

ಚರಿತ್ರೆಕಾರನಾನ ವಿಲ್ಕ್ಸ್ ಎಳ್ವನನ್ನಕೆ ಟಿಪ್ಪು ಸುಲ್ತಾನ ಕೊಡಗರ ಮುಕ್ರಿಯಡ ಕೂಡೆ ಇನ್ನನೆ ಎಣ್ಣಚಿ.

"ನಂಗಡ ಅಪ್ಪ ಈ ದೇಶತನ ಗೆದ್ದಲ್ಲಿಂಜ ನಿಂಗ ಏಳ್ ಕುರಿ ಪಡೆಪೊತ್ತಿತುಳ್ಳಿರ. ನಂಗಡ ಸೈನಿಕಂಗಡ ಆಯಿರಾರ್ ಕಣಕಾರ ಚಾವುಕ್ ಮೊಳಿ ಆಯಿತುಳ್ಳಿರ. ನಾನ್ ನಿಂಗಳ

ಇನ್ನೊಮ್ಮೆ ಮಾಪು ಮಾಡುವಿ. ಆಚೇಂಗಿ, ನಿಂಗ ತಿರಿತ್ ನಿಂದಕ ಈ ದೇಶತರ ಪ್ರತಿಯೋರ್ ಮನುಷ್ಯನೂ ಮುಸ್ಲಿಂ ಧರ್ಮಕ್ಕೆ ಮತಾಂತರ ಆಪಾಂದ್ ದೇವಕ್ ಪರಿಕೆ ಮಾಡಿಯಂಡಿಯೆ. ನಿಂಗಲ ದೂರತ ಸೀಮೆಲ್ ನೆಲೆ ನಿಪ್ಪನ್ನಕೆ ಮಾಡಿತ್ ನಿಂಗಡ ಮನೆ ಮರತ್‌ಂಜ ದೂರ ಮಾಡುವಿ. ನಿಂಗಡ ಪೊಣ್ಣಾಳಕ್ ಬಹುಪತಿತ್ವ ಉಂಡ್‌ಂದ್ ಕೇಪಿ. ನಿಂಗಡ ಮತಾಂತರ ಆನಪಿಳ್ ಬೋರೆ ಸೀಮೆಕ್ ಅಯೆಚಕ ಒರೆ ಕುರಿಕ್ ಜಗಳತ್‌ನೊ, ಪೊಣ್ಣಾಳಡ ಬಹುಪತಿತ್ವತ್‌ನ ಅಡ್‌ಕನನ್ನಕೆ ಆಪ"

ಕೊಡಗರ ಪೊಣ್ಣಾಳಡ ಬಹುಪತಿತ್ವತರ ಮೀದ ಸುಲ್ತಾನಂಡ ಅಭಿಪ್ರಾಯ ತಪ್ಪುಂದ್ ಬಯ್ಯ ಬಂದ ಬ್ರಿಟಿಷ್ ಚರಿತ್ರಕಾರಂಗ ಎಳ್ಳಿತ್.

ಟಿಪ್ಪು ಕೊಡಗಕ್ ಬಂದ ಈ ನೇರತೆ ಮಡಿಕ್ಕೇರಿಲ್ ಮಣ್ಣ್‌ಂಜ ಕೆಟ್ಟಿತಿಂಜ ಕೋಟೆರ ಕೆಂವತ್‌ನೆಲ್ಲ ಎಡ್‌ಪ್‌ಚಿಟ್ಟಿತ್ ಕಲ್ಲರ ಕೋಟೆನ ಕೆಟ್ಟಿಚಿಟ್ಟಿತ್. ಈ ಕೋಟೆರ ಒಳ್ಳಕ್ ತಾಂಡ ಸೈನಿಕಂಗಡ ಓರ್ ರಾಣೆನ ಆಕಿತ್ ಅದ್‌ಂಡ ಕಿಲ್ಲೆದಾರನಾಯಿತ್ ಚಾಫರ್ ಕುಲಿಬೇಗ್ ಎಣ್ಣುವ ಓರ್ ಸರ್ದಾರನ ನೇಮಕ ಮಾಡ್‌ಚಿ. ಆ ಸರ್ದಾರಂಡ ಪೆದತ್‌ನೆ ಮಡಿಕ್ಕೇರಿಕ್ ಇಟ್ಟಿತ್ ಅದ್‌ನ 'ಚಾಫರ್ ಬಾದ್'ಂದ್ ಕಾಕ್‌ಚಿ. ಬಾಕಿ ಇಂಜ ಸೈನಿಕಂಗಡಾತ್ ಚೆನ್ನಂಗಾಳನ ಕುಶಾಲನಗರ, ಬೆಪ್ಪುನಾಡ್‌ರ ಅರಮನೆಗೇರಿ ಪಿಳ್ಳಾ ಭಾಗಮಂಡಲಕ್ ಅಯೆಚಿತ್ ಅಲ್ಲಿ ಕೋಟೆನ ಕೆಟ್ಟಿತ್ ರಾಜ್ಯ ತಾಂಡ ಕೈ ತಪ್ಪತನ್ನಕೆ ನೋಟಿಯವಕ್ ಆಜ್ಞೆ ಮಾಡ್‌ಚಿ.

ಇನ್ನನೆ ಕೊಡಗಲ್ ಆ ಕಾಲ ಮಡಿಕ್ಕೇರಿರ ಮಣ್ಣ್‌ರ ಕೋಟೆ ಕಲ್ಲನುಂಡ್ ಕೆಟ್ಟನದೆ ಅಲ್ಲತೆ ಬೆಪ್ಪುನಾಡ್‌ರ ಅರಮನೆಗೇರಿ, ಕುಶಾಲನಗರ ಪಿಳ್ಳಾ ಭಾಗಮಂಡಲತ್ ಕೋಟೆ ಕೆಟ್ಟಿಚಿ. ನಾಲ್ ಕೋಟೆಲೂ ಟಿಪ್ಪುರ ಸೈನ್ಯತರ ತುಕಡ ಇಂಜತ್. ಭಾಗಮಂಡಲತ್ ಇಕ್ಕ ಭಗಂಡೇಶ್ವರ ಪಿಳ್ಳಾ ಬೋರೆ ತಿರಿಕೆ ಉಳ್ಳ ಆವರಣ ಎಲ್ಲ ಟಿಪ್ಪುರ ಸೈನಿಕಂಗಡ ರಾಣ್ಯ ಆಯಿತ್ ಮಾರ್ಪಾಡ್ ಆಚಿ.

ತಿರಿಕೆರ ಸುತ್ತ ಇಂಜ ಕೆಂವ ಕೋಟೆರ ಕೆಂವ ಆಚಿ. ಟಿಪ್ಪು ಈ ಊರರ ದಂಡ್ ಬರಿಲ್ ಕಾವೇರಿ, ಕನಿಕೆ ಪೊಳೆ ಒಕ್ಕಿಯಂಡ್ ಉಳ್ಳಾನ ಅರಂಜಿತ್ ಅದ್‌ಂಗ್ 'ಅಬ್ಬಾಲಾಬಾದ್' ಎಣ್ಣುವ ಪೆದ ಇಟ್ಟಿತ್. ಟಿಪ್ಪುರ ಸೈನಿಕಂಗ ಭಾಗಮಂಡಲ ತಿರಿಕೆರ ಎದಿಕೆ ಜಾಗತ್‌ನ ಆಕ್ರಮಣ ಮಾಡುವಾಂಗ್ ಮುಪ್ಪಡೆ ಆ ಊರರ ಪಟ್ಟಮ ತಿರಿಕೆಲ್ ಇಂಜ ದೇವಡ ಲಿಂಗ ಪಿಳ್ಳಾ ಪ್ರತಿಮೆನೆಲ್ಲ ಕುಂದ್‌ರ ಕೊಡಿಲ್ ಚಾಯಿ ಉಳ್ಳ ಜಾಗತ್ ಎಡ್‌ತಂಡ್ ಪೋಯಿತ್ ಪೂಜೆ ನಡ್‌ತುವ ಇಂಜತ್.

ಸುಲ್ತಾನ ಇನ್ನನೆ ಕೊಡಗರ ನಾಲ್ ಮುಖ್ಯಪಟ್ಟಿ ಜಾಗತ್ ಕೋಟೆ ಕೆಟ್ಟಿತ್ ಸೈನ್ಯತನ

ಆಕನದೆ ಅಲ್ಲತ ಇಡೀ ಕೊಡಗರ ಆಡಳಿತಾಧಿಕಾರಿ ಆಯಿತ್ ತಾಂಡ ಆಪ್ತ ಚಾಕ್ರಿಕಾರ ಜೈನುಲ್ಲಾಬ್ಬೀನ್ ಸೂಸ್ತಿ ಎಣ್ಣುವಂವನ ನೇಮಕ ಮಾಡ್‌ಚಿ. ಶತ್ರುಪಳ ದೇಶ್‌ತ್‌ಂಜ ಓಡ್‌ಚಿಡುವಕ್ ಪಿಳ್ಳಾ ಬೋರೆ ತರತ್ ಶಿಕ್ಷೆ ಕೊಡ್‌ಪಕ್ ಅವಂಂಗ್ ಕಟ್ಟಾಚ್ಚೆನ ಕೊಡ್‌ತಿತ್ ಮಳೆಗಾಲಕ್ ಮುಪ್ಪಡೆ ತಾಂಡ ರಾಜಧಾನಿಯಾನ ಶ್ರೀರಂಗಪಟ್ಟಣ್ ವಾಪಾಸಾಚಿ.

ಕುಶಾಲನಗರತ್ ಟಿಪ್ಪು ಸುಲ್ತಾನ ಕೋಟೆ ಕೆಟ್ಟ್‌ಚಿಟ್ಟಿ ನೇರತ್ ಕುಶಾಲನಗರತ್‌ರ ಸ್ಥಾಪನೆರ ಮೀದ ದಂಡ್ ತಕ್ಕ್ ಎಣ್ಣಂಡಿಯಾಪ.

ಹೈದರಾಲಿ, ಲಿಂಗರಾಜೇಂದ್ರ ಚತ್ತಪಿಳ್ಳಾ ಕೊಡಗನ ತಾಂಡ ಪುಡ್‌ತತ್ ಬೆಚ್ಚವಕ್ ಅಲ್ಲಲ್ಲಿ ತಾಂಡ ಸೈನ್ಯತ್‌ರ ರಾಣ್ಯತ್‌ನ ಸ್ಥಾಪನೆ ಮಾಡ್‌ಚಿ. ಇನ್ನತ ಓರ್ ರಾಣ್ಯ ಇಕ್ಕ ಕುಶಾಲನಗರ ಉಳ್ಳ ಜಾಗತ್ ಇಂಜನ್ನೆ ಕಾಂಬ. ಈ ಜಾಗಕ್ ಕುಶಾಲನಗರ ಎಣ್ಣುವ ಪೆದ ಇಡುವಾಂಗ್ ಮುಪ್ಪಡೆ ಆ ಜಾಗ ಮುಳ್ಳುಸೋಗೆ ಊರ್‌ಕ್ ಅಡ್‌ಂಗಿತಿಂಜತ್. ಈ ಜಾಗ ಕಾವೇರಿ ಪೊಳೆರ ಪಕ್ಕ ಇಂಜಂಡ್ ಪೆರಿಯಾಪಟ್ಟಣ್‌ರ ಬರಿಂಜ ಕೊಡಗ್‌ಕ್ ಪೆರಿಯಪಟ್ಟಣ್‌ರ ಬಟ್ಟೆಕಾಲೆ ಕೊಡಗ್‌ಕ್ ಸೈನ್ಯ ಪಿಳ್ಳಾ ಬೋರೆ ಸಾಮಾನ್ ಸಾಹಿತ್ಯ ಅಯೆಪಕ್ ಅನುಕೂಲ ಆಯಿತಿಂಜತ್. ಹೈದರಾಲಿ ಇಲ್ಲಿ ಇಂಜ ನೇರತ್ ಅವಂಂಡ ಪೆರಿಯ ಮೋಂವ ಟಿಪ್ಪು ಶತ್ರುಪಡ ಮೀದ ಗೆಲು ಪಡ್‌ಂದ ವರ್ತಮಾನ ಎತ್ತನಾಂಗ್ ಆ ಕುಶಿರ ಗೇನಕ್ ಈ ಊರ್‌ಕ್ 'ಕುಶಾಲನಗರ ಕುಶಿರ ನಗರ' ಎಣ್ಣುವ ಪೆದ ಇಟ್ಟಿನ್ನೆ ಕಾಂಬ.

ರೈಸ್ ಸಾಹೇಬ ಎಳ್ಡೆನ 'ಕೊಡಗರ ಚರಿತ್ರೆ'ಲ್ ಹೈದರಾಲಿ ತಾಂಡ ಮೋಂವ ಟಿಪ್ಪು ಪುಟ್ನನ ಸುದ್ದಿ ಈ ಜಾಗತ್ ಇಪ್ಪಕ ಕೇಟಾನುಂಡ್ ಕುಶಾಲನಗರ ಎಣ್ಣುವ ಪೆದ ಬಾತ್‌ಂದ್ ಎಳ್ಳಿತ್. ಆಚೀಂಗಿ, ಈ ಸಂಗತಿ ಚಾರಿತ್ರಿಕವಾಯಿತ್ ವಸ್ತು ಸ್ಥಿತಿಕ್ ಸೆರಿಯಿಲ್ಲೆ. ಟಿಪ್ಪು ಪುಟ್ಟಯೆ ಕ್ರಿ.ಶ. 1750ನೆ ಇಸವಿಲ್. ಈ ನೇರತ್ ಹೈದರಾಲಿ ಮೈಸೂರ್ ಸೈನ್ಯತ್ ಓರ್ ಚೆರಿಯ ನಾಯಕ ಆಯಿತಿಂಜತ್. 1763ತ್ ಬಿದನೂರ್‌ನ ಗೆದ್ದಪಿಳ್ಳಾ ಮೈಸೂರ್‌ರ ಹಿಂದೂ ರಾಜಂಗಳ ಪೆದಕ್ ಮಾತ್ರ ಬೆಚ್ಚಂಡ್ ತಾನೆ ಮೈಸೂರ್‌ರ ಸರ್ವಾಧಿಕಾರಿ ಆಚಿ. ಬಿದನೂರ್‌ನ ಗೆದ್ದಪಿಳ್ಳಾ ಕೊಡಗ್ ಬಿದನೂರ್ ನಾಯಕಂಗಳ ಆಶ್ರಿತ ಸಂಸ್ಥಾನ ಆಯಿತಿಂಜತ್‌ಂದೂ ಎಣ್ಣೆಯಂಡ್ ಹೈದರಾಲಿ ಕೊಡಗರ ಮೀದ ತಾಂಡ ಅಧಿಕಾರತ್‌ನ ಸ್ಥಾಪನೆ ಮಾಡ್‌ಚಿ. ಕೊಡಗಲ್ ಹೈದರಾಲಿ ಸುರೂಲ್ ರಾಣ್ಯ ಸ್ಥಾಪನೆ ಮಾಡ್‌ನದ್, 1780ತ್ ಲಿಂಗರಾಜೇಂದ್ರ ಒಡೆಯ ಚತ್ತಪಿಳ್ಳಾ ಆ ನೇರತ್ ಮುಳ್ಳು ಸೋಗೆಲ್ ಮರತ್‌ರ ಕೋಟೆ ಕೆಟ್ಟ್‌ಚಿಟ್ಟಿತ್ ತಾಂಡ ರಾಣ್ಯ ಬೆಪ್ಪಕ ಈ ಊರ್‌ನ ಕುಶಾಲನಗರಾಂದ್ ಕಾಕ್‌ನ ಸಂದರ್ಭ ಉಂಡ್.

## ಕೊಡಗಲ್ ಟಿಪ್ಪು ಸುಲ್ತಾನಂಡ ಆಳ್ವಿಕೆಕ್ ವಿರೋಧ

ಟಿಪ್ಪು ಸುಲ್ತಾನ್ ಕೊಡಗ್‌ನ ತಾಂಡ ಪುಡಾತತ್ ಬೆಚ್ಚವಕ್ ಎಚ್ಚಕ್ ಏರ್ಪಾಡ್ ಮಾಡ್‌ನಕೊ ಜನ ಅಂವಂಡ ಅಧಿಕಾರತಾನ್ ಒತ್ತಂಡಾಲೆ. ಆ ಕಾಲ ಎಣ್ಣೆಕ 1785ನೆ ಇಸವಿರ ಮಳೆಗಾಲತ್ ಕೊಡಗ್‌ರ ಜನ ಟಿಪ್ಪುರ ಠಾಣ್ಯಕ್ ಮುತ್ತಿಗೆ ಇಟ್ಟಿತ್ ಅಲ್ಲಿ ಇಂಜ ಜನಕ್ ಊಣ್ ತೀನಿ ಕೊಟ್ಟತನ್ನಕೆ ಮಾಡ್‌ಚಿ. ಪರ್‌ಂಬ್, ಬಾಣ್ ಚಾಗತ್‌ನೆಲ್ಲ ಬುಟ್ಟಿತ್ ಕುಂದ್ ಕಾಡ್‌ನ ಸೇರ್‌ಚಿ. ಕೊಡಗ್‌ರ ಕುಂದ್ ಕಾಡ್‌ರ ಪರಿಚಯ ಇಲ್ಲತ ಸುಲ್ತಾನಂಡ ಸೈನಿಕಂಗಕ್ ಕಾಡ್‌ಲ್ ವಾಸ ಇಂಜಂಡ್ ತಂಗಡ ಮೀದ ಇಂಜಕಿಂಜನ್ನಕೆ ಬುದ್ಧಿತ್, ಪಡೆಕ್ ತಯಾರಾಪ ನೇರಕ್ ಪುನಾದಿಯ ಕಾಡ್ ಸೇರ್‌ನ ಕೊಡಗ್‌ರ ಜನಳ ಎದ್‌ರಾಚಿದುವಕ್ ಕಯ್ಯತಾಚಿ. ಕೂಟಾಕ್ ಟಿಪ್ಪುರ ಸೈನಿಕಂಗಕ್ ಕೊಡಗ್‌ರ ಮಳೆ, ಕೋಟತನ ಸಹಿಸುವ ಕಯ್ಯತಾಚಿ.

ಆ ನೇರತ್ ಬ್ರಿಟಿಷ್‌ಕಾರ ಕೊಡಗ್‌ನ ಪುಡ್‌ಚಂಡ್ ಚೆನ್ನಂಗ್ ಕಾಲ ಕೈಂಜಪಿಳ್ಳಾ ಐರೋಪ್ಯಂಗ ಇಲ್ಲಿ ಕಾಫಿತ್ತೋಟತನ ಮಾಡುವಲ್ಲಿಕೆತ್ತನೆ ಕೊಡಗ್ ರೈತಂಗಡ ಮನೆ, ಬೇಲ್, ಹೊಲ ಪಿಳ್ಳಾ ಮನೆರ ಬೆಂಬರಿ ಜಾಗ ಬುಟ್ಟಕ ಬಾಕಿ ಎಲ್ಲ ಬಲ್ಯ ಕಾಡ್‌ಂಜ ದುಂಬಿ ಪೋಯಿತಿಂಜತ್. ಕಾಡ್‌ಲ್ ಆನೆ, ನರಿ, ಕಾಡೆಮ್ಮೆ, ಜಿಂಕೆ, ಕಡ್‌ಮ, ಕಾಡ್‌ಕೊರಿರನ್ನತ ಜಾತಿಯ ಏರ ಕಣಕ್‌ಲ್ ಇಂಜತ್.

ಊರ್‌ಂಜ ಊರ್‌ಕ್, ನಾಡ್‌ಂಜ ನಾಡ್‌ಕ್ ಪೋಪಕ್ ಆನೆರ ಕೊಡಿಲ್ ಅಳಾತಂಡ್ ಪೋಪ. ಪಲ್ಲಕ್ಕಿಲ್ ಅಳಾತಂಡ್ ಬೋಯಿಯಳುಂಡ್ ಪೊರ್‌ಪ್‌ಚಿಟ್ಟಂಡ್ ಪೋಪಕ್ ಮದಿಯಾಪಚ್ಚಕ್ ಮಾತ್ರ ಅಗಲವಾನ, ದೊಟ್ಟೆ ಮೊಟ್ಟ್‌ಂಜ ಕೂಡ್‌ನ ಬಟ್ಟೆ ಇಂಜತ್. ಬೇನಿಲ್ ಪೊಳೆರ ಆಳ ಇಲ್ಲತ ಜಾಗತನ ಅಳಾಂದಂಡ್, ಮಳೆಗಾಲತ್ ದೋಣಿರ ಮೂಲಕ ದಾಟೊಂಡಿಂಜತ್.

ನಾಡ್‌ರ ನಡೂಲ್ ದಂಡ್ ಬರಿಲ್ ಎತ್ತರತರ ದೊಟ್ಟೆ. ಈಂಡ ನಡುಲ್ ಸುಮಾರ್ 25 ಅಡಿ ಆಳವಾನ ಅಗಲವಾನ ಚೆರಿಯ ಕಡಂಗ ಇಂಜತ್. ಈ ಕಡಂಗ್‌ರ ನಡುಲ್ ಜನಕ್ ಓಡಿಕಳಿಪಕ್ ಚೆರಿಯ ಬಟ್ಟೆ ಇಂಜತ್. ಇದ್‌ಂಗ್ 'ಬಕ್ಕ'ಂದ್ ಕಾಕುವ. ಈ ಬಕ್ಕತ್ ರಾಜಂಡ ಪಾರಕಾರ ಇಪ್ಪ ಇಂಜತ್. ಜನಕ್ ಓರ್ ನಾಡ್‌ಂಜ ಇಞ್ಞೋರ್ ನಾಡ್‌ಕ್ ಪೋಪಕ್ ತೊಂದರೆ ಆಪ ಇಂಜಾಲೆ. ಕೊಡಗ್‌ಂಜ ಪೊರ್‌ಮೆ ಮಲಯಾಳಕ್, ಮೈಸೂರ್‌ಕ್ ಪೋಯಿತ್ ಸಾಮಾನ್ ಕೊಂಡ ಬಪ್ಪಕ್, ಅಕ್ಕಿ ಮಾರುವಕ್ ಪೋಪಕ್ ತಾಲುಕ್ ಸುಬೇದಾರನುಂಡ್ ಪಾಸ್ ಎಡ್‌ತಂಡ್ ಪೋಂಡಿಂಜತ್. ಏಳಾಯಿರ ಸೀಮೆ



ಪಿಳ್ಳಾ ನಂಜರಾಯಪಟ್ಟತರ ನಾಡ್ ಮಾತ್ರ ಕೊಡಗುರ ಪೂರ್ವತ್ ಇಂಜ ಬಾಣೆಬಾಗ ಆಯಿತಿಂಜತ್. ಆ ಜಾಗತ್ ಕಾಡ್ ಕಮ್ಮಿ. ಕಡಂಗ್ ಕೊಡಗುರ ನಡುಲ್ ಪಿಳ್ಳಾ ಪಶ್ಚಿಮ ಭಾಗತ್ ಇಂಚ್ಲೆ. ಇನ್ನನೆ ಕೊಡಗುರ ಏರ ಭಾಗ ಓರ್ ಕೋಟೆರನ್ನಕೆ ಇಂಜತ್. ಇದ್ 1785ತ್ಂಜ 1789ಕೆತ್ತನೆರ ಕಾಲ. 30 ಕಾಲ ಕೈಂಜಪಿಳ್ಳಾ ಕೊಡಗುರ ಭೂ ಸ್ವರೂಪ, ಹವಾಮಾನ, ಜಾತಿಯ, ಬೊಳೆ ಇನ್ನತಾಂಡ ವಿವರತ್ ಸಂಗ್ರಹ ಮಾಡುವಕ್ ಕೊಡಗುಕ್ ಬಂದಿತಿಂಜ ಲೆ. ಕೆನ್ನರ್ ಎಣ್ಣುವ ಬ್ರಿಟಿಷ್ ಅಧಿಕಾರಿಯ ಕೊಡಗುರ ಮೀದ ಇನ್ನನೆ ಎಳ್ಳಿತ್.

"The aspect of Codagu presents an entire forest, the long and narrow cultivated valleys enclosed within it serves best to render those vast woods more striking"

ಆ ಕಾಲತ್ ಕೊಡಗುಲ್ ಏರ ಜಾಗ ಕಾಡ್ ಆಯಿತಿಂಜಾನುಂಡ್ ಮಳೆಗಾಲತ್ ನಂಗಡ ಕಾಲತ್ಂಜ ಏರ ಮಳೆ ಕೆರೀಯ ಬೂವ ಇಂಜತ್. ಕುಳ್‌ರ್‌ಗಾಲತ್ ಪೊಲಾಕ ಪತ್ತ್ ಗಂಟೆಕೆತ್ತನೆ ಮಂಜ್ ಮುಚ್ಚಿತಿಪ್ಪ ಇಂಜತ್. ಕೋಟ ತಡ್‌ಪಕ್ಕಿಂಚ್ಲೆ. ಇನ್ನತ ವಾತಾವರಣತ್ ಕೊಡಗುಲ್ ಇಂಜ ಸೈನಿಕಂಗ ತಂಗಡ ಕೋಟಲ್ ಬೈದಿಯದನ್ನಕೆ ಇಂಜತ್. ಕೊಡವ ಬೋರೆ ಜಾಗತ್ ನುಗ್ಗಿಯಂಡ್ ಸುಲ್ತಾನಂಡ ಸೈನಿಕಂಗಕ್ ಉಪದ್ರ ಕೊಡಪ ಇಂಜತ್.

ಜನ ತಾಂಡ ವಿರುದ್ಧ ಆಯಿತ್ ಕೊಡಗುನೆಲ್ಲ ತಂಗಡದಾಯಿತ್ ಮಾಡಿಯಂಡ್, ತಾಂಡ ಸೈನಿಕಂಗಕ್ ತೊಂದರೆ ಕೊಡತಂಡ್ ಉಳ್ಳಾನ ಅರ್ಂಜ ಟಿಪ್ಪು, ಕೊಡಗುಲೆ ಪುನಾದಿಯ ತಾಂಡ ಅಧಿಕಾರ ಸ್ಥಾಪನೆ ಮಾಡುವಕ್ ಗೇನ ಮಾಡ್‌ಚಿ. ಈ ನಾಟ್ಲ್ ತಾಂಡ ಸೈನ್ಯಾಧಿಕಾರಿ ಜೈನುಲ್ಲಾಬ್ಬೀನ್ ಸೂಸ್ತ್ರಿನ ಪದಿನಂಜಿ ಆಯಿರ ಸೈನಿಕಂಗಡ ಕೂಡೆ ಕೊಡಗುಕ್ ಆಯೆಚತ್. ಈ ಸೈನ್ಯ ಕೊಡಗುನ ಪೂರ್ವ ದಿಕ್ಕುಂಜ ನುಗ್ಗಿತ್ ಉಲುಗುಲು ಸಂತೆಮಾಳಕ್ ಎತ್ತ್‌ಚಿ.

ಈ ಜಾಗ ಇಕ್ಕತ ಸುಂಟಿಕೊಪ್ಪ ಟೌನ್. ಇಲ್ಲಿ ವಾರಕೊಮ್ಮೆ ತೆ ಓರ್ ಚೆತ್ತ ಆಪ ಇಂಜತ್. ಇಲ್ಲಿ ಒಳ್ಂಜ ಮೈಸೂರ್‌ರ ಸೈನಿಕಂಗಡ ತಾಣ್ಯತನ ನಾಲಾಯಿರ ಕೊಡವ ಪೋಯಿತ್ ಮುತ್ತಿಗೆ ಇಟ್ಟಿತ್ ಆಯಿಂಗಡ ಕೂಡೆ ಪಡೆ ಪೊತ್ತಿತ್ ಏರ ಜನಳ ಕೆತ್ತಿತ್ ಇಟ್ಟಿತ್. ಇನ್ನನೆ ತಾಂಡ ಏರ ಜನ ಚೆತ್ತಕೊ ಸೂಸ್ತ್ರಿ ಬಾಕಿ ಇಂಜ ಸೈನಿಕಂಗಳ ಕೂಟಿಯಂಡ್ ಮಡಿಕೇರಿ ಕೋಟೆಕೆತ್ತನೆ ಬಾತ್. ಅಲ್ಲಿ ಅವನ ಕೊಡಗುಕಾರ ಎದ್‌ರಾಟ್ಟಿತ್.

ತಾಂಡಲ್ಲಿ ಇಂಜ ಊಣ್ ತೀನಿರ ಸಾಮಾನ್ ಪಿಳ್ಳಾ ಜನ ಕಮ್ಮಿ ಆನಾನಗುಂಡ್

ತಾಕತ್ ಕಳಂದಂಡನ್ನಕೆ ಆಚಿ. ಬೆಟ್ಟದಪುರಕ್ ಪೋಪಾಂಗ್ ಮುಪ್ಪಡೆ ವಾಪಾಸಾಚಿ. ಪೋಪ ಬಟ್ಟೆಲ್ ಉಲುಗುಲಿ ಸಂತೆಮಾಳತ್ ಇಂಜ ನೇರತ್ ಕೊಡಗುಕಾರ ಪುನಾದಿಯ ಅಂವಂಡ ಸೈನ್ಯತನ ಸುತ್ತಟ್ಟಿತ್ ಸುಮಾರ್ ಜನಳ ಕೊಂದಿತ್‌ಟ್ಟಿತ್. ಅಕ್ಕ ಸೂಸ್ತಿ ದುಂಬ ಸಾಮಾನ್ ಸಾಹಿತ್ಯತನ ಅಲ್ಲಿಯೆ ಬುಟ್ಟಿತ್ ಬಾಕಿ ಸೈನ್ಯತನ ಕೂಟಿಯಂಡ್ ಬೆಟ್ಟದಪುರಕ್ ಪೋಯಿತ್ ಅಲ್ಲಿ ಒಳಂಜತ್. ಅಲ್ಲಿಂಜ ಟಿಪ್ಪುಕ್ ತಾಂಗ್ ಕೊಡಗಲ್ ಆನ ಸೋಲಾನ್ ಅರಿಚಿಟ್ಟಿತ್ ಏರ ಸೈನ್ಯತರ ಸಹಾಯ ಕೇಟತ್.

ಇಕ್ಕ ಟಿಪ್ಪು ತಾನೇ ಬಲ್ಯ ಸೈನ್ಯತನ ಎಡ್‌ತಂಡ್ ಕೊಡಗುಕ್ ಪೊರ್‌ಟತ್. ಕುಶಾಲನಗರತ್‌ರ ಉತ್ತರಕ್ ಕೊಡಗುರ ತೆರಿಕ್ ಪಕ್ಕ ಬಂದನ್ನಕೆ ಬಟ್ಟೆಲ್ ಬಲ್ಯ ಬಲ್ಯ ಮರ ಬೂಕಿತ್, ಮುಳ್ಳ, ತೊಪ್ಪಂಜ ಬಟ್ಟೆನ ಮುಚ್ಚಾನಾನ್ ಕಂಡತ್. ಆ ಬಟ್ಟೆರ ಪೊರಮೆ ಒರ್ ಬಲ್ಯ ಕಡಂಗ್ ಇಂಜತ್. ಕೊಡಗಲ್ ದಂಡ್ ಕಡೆ ಎತ್ತರವಾನ್ ಕೆಂವತ್‌ರನ್ನಕೆ ಇಂಜ ದ್‌ಟ್ಟಿ ಇಂಜತ್. ಇಲ್ಲಿಂಜ ಕೊಡಗುರ ಜನ ತೋಕ್‌ಲ್ ಬೊಡಿ ಬೆಚ್ಚಿತ್ ಪಿಳ್ಳಾ ಬಾಣ ಬುಟ್ಟಿತ್ ಸುಲ್ತಾನಂಡ ಸೈನ್ಯತರ ದಂಡ್ ತುಕಡಿನ ಬಯ್ಯಕ್ ಅಯೆಚತ್. ಅಕ್ಕ ಸುಲ್ತಾನ ತಾಂಡ ಸೈನ್ಯತ್ ದುಂಬ ಪರಾಕ್ರಮಿ ಆನ ಚೆನ್ನಂಗ್ ಪ್ರೆಂಚ್ ಸೈನಿಕಂಗಳ ಕೊಡಗುಕ್ ನುಗ್ಗುವಕ್ ಅಯೆಚತ್. ಇವು ಕಷ್ಟಪಟ್ಟಿತ್ ಕೊಡಗುಕಾರಳ ಚೋಪ್‌ಚಿಟ್ಟಿತ್ ಏರ ಜನಳ ಕೊಂದಿತ್‌ಟ್ಟಿತ್.

ಅಲ್ಲಿಂಜ ಸುಲ್ತಾನ ತಾಂಡ ಸೈನ್ಯತೋಡೆ ತೆರಿ ದಾಟಿತ್ ಉಲುಗುಲಿ ಸಂತೆಮಾಳಕ್ ಬಾತ್. ಅಲ್ಲಿ ಪದಿನಂಜಿ ದಿನ ಇಂಜತ್. ಈ ನೇರತ್ ಅಂವ ಸುತ್ತು ಮುತ್ತು ಉಳ್ಳ ಕೊಡವಡ ಮುಕ್ರಿಯಳ ಕಾಕ್‌ಚಿಟ್ಟಿತ್ ಅಯಿಂಗಳ ಚಾಯಿತೆ ನೋಟಿಯಪಿಂದ್ ತಕ್ಕ ಕೊಡತತ್. ಅನ್ನನೆ ಕೊಡಗುಕಾರ ಸುಲ್ತಾನಂಗ್ ವಿರೋಧ ಆಯಿತ್ ನಡ್‌ಂದವುಲೆಂದ್ ಒಪ್ಪಂದ ಮಾಡಿಯಂಡತ್.

ಈ ನೇರತ್ ಬೆಟ್ಟದಪುರಕ್ ಪೋಯಿತಿಂಜ ಜೈನುಲ್ಲಾಬ್ಬೀನ್ ಸೂಸ್ತಿ ತಾಂಡ ಸೈನ್ಯತನ ಎಡ್‌ತಂಡ್ ಬಟ್ಟೆಲ್ ಕುಶಾಲನಗರತನ ಲೂಟಿ ಮಾಡಿತ್ ಚುಟ್ಟಿತ್‌ಟ್ಟಿತ್. ಅಲ್ಲಿ ಇಂಜ ಆಣಾಳ, ಪೊಣ್ಣಾಳ ಪಿಳ್ಳಾ ಮಕ್ಕಳ ಪುಡ್‌ಚೆಂಡ್ ಶಿಬಿರಕ್ ಕೂಟಿಯಂಡ್ ಬಾತ್. ಅಲ್ಲಿ ನಾಲೆ ತುಕಡಿ ಸೈನ್ಯ ಪಿಳ್ಳಾ ಏರ ಮದ್ನ್, ಊಣ್ ತೀನಿರ ಸಾಮಾನ್‌ನ ಎಡ್‌ತಂಡ್ ಮಡಿಕೇರಿಕ್ ಪೋಪನ್ನಕೆ ಆರ್ಡರ್ ಮಾಡ್‌ಚಿ.

ಟಿಪ್ಪು

ಉಲುಗುಲಿ ಸಂತೆಮಾಳತ್ ಆಶ್ವೀಜ ತಿಂಗತ್‌ರ ಕಾರ್ತಿಕ ಶುದ್ಧ ಶವ್ದಾನಂಜಾಂಗತ್ತನೆ ಎಣ್ಣಕ 1795ನೆ ಇಸವಿ ಅಕ್ಟೋಬರ್ ಮೂಂದನೆ ವಾರತ್‌ಂಜ ನವೆಂಬರ್ ಸುರೂವೆತ ಪಾರಕೆತ್ತನೆ ಇಂಜತ್. ಕಾರ್ತಿಕ ಶುದ್ಧ ಪದಿನಂಜಾಂಗ್ ಅಂವ ಮಡಿಕೇರಿಕ್ ಪೋಚಿ. ಅಲ್ಲಿಕ್ ಪೋಪಾಂಗ್ ಮುಪ್ಪಡೆ ಬಟ್ಟೆಲ್ ಕೆಟ್ಟನ ಕಾಡ್‌ನೆಲ್ಲ ಕೆತ್ತ್‌ಚಿಟ್ಟಿತ್. ಮಡಿಕೇರಿಕ್

ಎತ್ತನಪಿಳ್ಳಾ ಕೋಟೆರ ಪೂರ್ವ ಭಾಗತ್ ಎತ್ತರತರ ಜಾಗತ್ ತಾಂಡ ಟೆಂಟ್ ಇಟ್ಟತ್. ಅಲ್ಲಿ 15 ದಿನ ಇಂಜತ್. ಈ ನೇರತ್ ಟಿಪ್ಪು ತಾಂಡ ಪಕ್ಕ ಬಂದ ಕೊಡಗ್ಗರ ಮುಕ್ರಿಯಳುಂಡ್ ತಾಂಗ್ ವಿರೋಧ ಆಯಿತ್ ಒಂದಾನೊ ಮಾಡುಲೆಂದ್ ತಕ್ಕ ಎಡ್ತಂಡತ್.

ಆಚೇಂಗಿ, ಟಿಪ್ಪು ಉಲುಗುಲ್ಲಿ ಸಂತೆಮಾಳತ್ಂಜ ಮಡಿಕೇರಿಕ್ ಎತ್ತುವಾಂಗ್ ಮುಪ್ಪಡೆ ಮಡಿಕೇರಿ ಪಕ್ಕತರ ಪಿಳ್ಳಾ ಸುತ್ತು ಮುತ್ತು ನಾಡ್ಕಾರ ಟಿಪ್ಪು ಸುಲ್ತಾನಂಡ ಕೈಕ್ ಕೊಟ್ಟಾನಕ ಬಜಾವ್ ಆಪುಲೆಂದ್ ಬೊತ್ತಿಯಂಡ್ ಕುಂದ್ಕಾಡ್ಕಾರ ಜಾಗ ಸೇರಿಯಂಡತ್.

ಈನಗುಂಡ್ ಚೆಡ್ಂಜಂಡ ಟಿಪ್ಪು ಕುಂದ್ಕಾಡ್ ಕೂಡಿಯಂಡ ಜನಳ ಪುಡ್ಚಂಡ್ ಬಪ್ಪಕ್ ಬೋರೆ ಬೋರೆ ಬರಿಂಜ ತಾಂಡ ಸೈನ್ಯಾಧಿಕಾರಿಯಳ ಆಯೆಚತ್. ಪ್ರೆಂಚ್ ಅಧಿಕಾರಿ ಲಾಲ್ಲಿ ಪಶ್ಚಿಮ ಪಿಳ್ಳಾ ದಕ್ಷಿಣತರ ಯಾಲ ಮಲೆನಾಡ್, ಹುಸೇನ್ ಆಲಿಖಾನ್ ಬಕ್ಸಿ ಉತ್ತರ ಕೊಡಗ್, ಮೀರ್ ಅಹಮ್ಮದ್ ಭಾಗಮಂಡಲ ನಾಡ್ ಪಿಳ್ಳಾ ಇಮಾಮ್ ಖಾನ್ ಕುಶಾಲನಗರತರ ಬರಿಯ ಆಯೆಚತ್. ಅವು ಪುಡ್ಚಂಡ್ ಬಂದ ಜನಳ ತಾಂಡ ಮಿಳ್ಳಾತ ಪಾಳಿಕ್ ಕೂಟಿಯಂಡ್ ಬರೊಂಡೂಂದ್ ಅಪ್ಪಣೆ ಮಾಡ್ನ ಟಿಪ್ಪು, ಮಾರ್ಗಶಿರ ಶುದ್ಧ ಪಾಡ್ಯತರ ದಿನ ಎಣ್ಣಕ ನವೆಂಬರ್ ಆಖೀರಕ್ ಮಡಿಕೇರಿಂಜ ಪೊರ್ಟಿತ್ ದಂಡ್ ದಿನತ್ ಭಾಗಮಂಡಲಕ್ ಪೋಚಿ.

ಅಲ್ಲಿ ತಾಂಡ ಸೈನಿಕಂಗಳ ನೋಟಿಯಂಡ್ ಅಯ್ಯಂಗೇರಿ ಊರಲ್ ಉಳ್ಳ ದೇವಟ್ಪರಂಬ್ ಎಣ್ಣವ ಬಲ್ಯ ಪರಂಬ್ಲ್ ಸೈನ್ಯತೋಡೆ ಶಿಬಿರ ಇಟ್ಟತ್. ಅಕ್ಕ ಕಣ್ಣಾನೂರ ರಾಣಿ ಬಲ್ಲಿಯಾ ಭಾನು ಸುಲ್ತಾನಂಗ್ ಕಪ್ಪ ಆಯಿತ್ ಆನೆ, ಕುದರೆ, ಕ್ರಯ ಉಳ್ಳ ಸಾಮಾನ್‌ನಲ್ಲ ಒಪ್ಪಾಚಿಟ್ಟಿತ್ ತಾಂಡ ಗೌರವ ಕಾಟ್ಚಿ. ಟಿಪ್ಪು ಅವಕ್ ನಲ್ಲ ಕ್ರಯತರ ಬಟ್ಟೆ ಕೊಡ್ತ ಆಯೆಚತ್.

ಟಿಪ್ಪುರ ಕೂಡೆ ಇಂಜ ಅಧಿಕಾರಿಯಕೂ, ಮುನ್ಸಿಯಕೂ ಕೊಡಗ್ಗರ ಕಾಡ್, ಮಳೆ, ಕುಳ್ಳಾರ್‌ನ ನೋಟಿತ್, ಅನುಭವಿಚಿಟ್ಟಿತ್ ಆಶ್ಚರ್ಯ ಆಚಿ, ತಡ್ಪ ಕಯ್ಯತೆ ಕಷ್ಟ ಆಚಿ. ಟಿಪ್ಪುರ ಕೂಡೆ ಇಂಜ ಚರಿತ್ರೆಕಾರಂಗ ಆ ನೇರತ್ ಕೊಡಗ್ಗರ ವಿಷಯತರ ಮೀದ ಇನ್ನನೆ ಎಳ್ಳಿತ್.

"ಈ ಆಶ್ಚರ್ಯಕರವಾನ ಕಾಡ್‌ಸೀಮೆರ ಮೀದ ನಾನ್ ಎಂತಾನ ಎಣ್ಣವ ಕಯ್ಯವ? ಅದ್ಂಡ ಪೆದ ಎಣ್ಣವಕಲೇ ಪೆನ್ನ ಗಾಡ್‌ಪ! ಅದ್ಂಡ ಪುಂಡ್ತಾರ ಗರಿ ಕೊರಿರ ಉಣ್ಣೆ ತಲ್ಮಿರನ್ನಕೆ ನುಗ್ಗುವಕ್ ಕಯ್ಯತದ್. ಬಲ್ಯ ಬಟ್ಟೆ, ಚೆರಿಯ ಬಟ್ಟೆ ಆಕಾಶತ್



ನಕ್ಷತ್ರತಾರ ನಡುಲ್ ನುಗ್ಗನನ್ನೆ ಉಂಡ್. ಈ ದೇಶತಾರ ಕುಂದ್, ತೋಡ್ನ ಕಡ್ಂದ್ ಪೋಪಕೆ ಕಯ್ಯಲೆ, ತಗ್ಗ್ ಭೂಮಿಲ್ ನೆಲ್ಲ್ ಬೊಳೆ ಎದೆರೆತ್ತರಕ್ ಎದ್ಲ್ ನಿಂದಿತಿಪ್ಪ. ಸೂರ್ಯ ಸ್ವತಃ ಶಾಖ ಉಳ್ಳಂವನಾನಕೊ ಇಲ್ಲಿ ಕೋಟಕ್ ಬೊತ್ತಿತ್ ಎಕ್ಕೋಲು ಮೋಡತ್ ತನ್ನ ಮುಚ್ಚಿಯಂಡ್ ಇಲ್ಲಿಂಜ ಅಲಂಬಲ್ ಪೋಯಿರುವ! ಎಕ್ಕೋಲು ಬೈಟ್ ಚುರ್ಕಾಯಿತ್ ಪ್ರಯಾಣ ಮಾಡುವ ಚಣ್ಣೂರ ಆಕಾಶತಾರ ನೀಲಿ ರಂಗಲ್ ತಾಂಡ ಮೂಡ್ನ ಮುಚ್ಚಿಯವ. ಬೇನಿಲ್ ಇನ್ನನಾನಕ ಮಳೆಗಾಲತ್ ದೇವಳೆ ನಂಗಳ ಕಾಪಾಡೊಂಡು. ಮಳೆಗಾಲತಾರ ಆರ್ ತಿಂಗ ಈ ದೇಶತ್ ಮಳೆ ಪೊಜ್ಜಿತ್ ದುಃಖಿತ್ ಉಳ್ಳಯಿಂಗಳ ಕಣ್ಣಲ್ ನೀರ್ ದುಂಬಿಯಂಡನ್ನೆ ಭೂಮಿಯೆಲ್ಲ ನೀರ್ನುಂಡ್ ದುಂಬಿಪೋಯಿತಿಪ್ಪ! ಒಯಿಪತ್ ಸೂರ್ಯ ಉದ್ಚಿತ್ ದಂಡ್ ಗಂಟೆಕೆತ್ತನೆ ಮಂಜ್ ಕುಂದ್ ತೋಡ್ನ ಮುಚ್ಚಿರ್ತಿಪ್ಪ. ಎಚ್ಚಕೊ ಬಾಲೆಕಾರ ನಲ್ಲ ಗೆಟ್ಟಿ ಮುಟ್ಟಾನ ತಡಿ ಉಳ್ಳವು ಕುಳರ್ಲ್ ತಂಗಡ ಮೇಲ್ನ ಬಿಸಿಲ್ ಕಾಚಿಯಂಡ್, ಬೈಟ್ ನೇರತ್ ತಂಗಡ ನೆರ್ಕೆಲ್ ಕಾಲ್ಕ್ ಎದೆ ಮುಟ್ಟುವನ್ನೆ ಬಿಲ್ಲರನ್ನೆ ತಂಗಡ ತಡಿನ ತುರ್ಚಿತ್ ಬುದ್ದವ. ಆರ್ ತಿಂಗಕೆತ್ತನೆ ರೈತಂಗ ಮಂಡೆಂಜ ಕಾಲ್ಕೆತ್ತನೆ ಪಳೆಯ ಕಂಬುಳಿ ಇಲ್ಲೇಂಗಿ ಪೈಲೇತ ಬಟ್ಟೆಲ್ ಮುಚ್ಚಿಯಂಡ್ 9-10 ಗಂಟೆ ಕೆಲಸ ಮಾಡಿಯಂಡ್ ಇಪ್ಪ. ಈ ನೇರತ್ ಮರತಾರ ಎಲೆ ಪಿಳ್ಳಾ ಕೊಂಬಲ್ ಇಪ್ಪ ಉಂಬುಳು ಮನುಷ್ಯ ಪಿಳ್ಳಾ ಅಯಿಂಗಡ ಅತ್ತ ಕಡ್ಚಿಯಳ ಕಡ್ಚಿತ್ ತಂಗಕ್ ಬೋಂಡಿಯಾನ ಚೋರೆನ ಊತಿಯಂಡಪಿಳ್ಳಾ ಅಯಿಂಗಡ ತಡಿನ ಬುದುವ. ಇಲ್ಲಿಯತ ಕೋಟಿತ್ನ ವಿವರ್ಚಿಡುವಕ್ ಮುಪ್ಪಡೆ ಪೆನ್ನ ಪುಡ್ಚ ಕೈ ಐಸ್ ಕೆಟ್ಟಿತುಳ್ಳ ಸಮುದ್ರತಾರ ಒಳ್ಳಕ್ ಕೈನ ಮುಳ್ಳಕ್ನಕ ಎನ್ನನೆ ಆಪೋ ಅನ್ನನೆ ಮರಕೆಟ್ಟುವ! ಈ ಹವಾಮಾನತನ ವಿವರ್ಚಿಡುವ ನಾವು ಕಿರಿರ ಒಳಿಯ ಮುಚ್ಚಿಯಂಡ್ ಇಂಜಕೊ ಪೋಡಿಲ್, ಆಶ್ಚರ್ಯತ್ ಐಸ್ ಕೆಟ್ಟನನ್ನೆ ಗೆಟ್ಟಿ ಆಯಿತಿಪ್ಪ!

ಟಿಪ್ಪು ತಾಂಡ ಪರಿವಾರತೋಡೆ ದೇವಟ್ಪರಂಬಲ್ ಶಿಬಿರ ನಡತ್ಚಿಂದ್ ಮಿಳ್ಳಾಲೆ ಎಣ್ಣೆಯೆ. ಅವ ಇಲ್ಲಿ ನೆಲೆ ನಿಂದಪಿಳ್ಳಾ ಸುತ್ತು ಮುತ್ತು ಇಂಜ ಕೊಡವಳೆಲ್ಲ ಕಾಕಿತ್ ಅಯಿಂಗಳ ಚಾಯಿತೆ ನೋಟಿಯವನ್ನೆ ತಕ್ಕ ಕೊಡತ್. ಆಚೇಂಗಿ, ಅವಂಡ ತಕ್ಕೆಲ್ಲ ಮೋಸತಾರ ತಕ್ಕಾಯಿತಿಂಜತ್. ಅವಂಡಲ್ಲಿಕ್ ಜನ ಜಾಸ್ತಿಯೊಂದೂ ಬಂದಾಲೆ. ಆಚೇಂಗಿ, ಸುಲ್ತಾನ ಅಲ್ಲಿ ಶಿಬಿರ ಇಟ್ಟಪಿಳ್ಳಾ 15-20 ದಿನತಾರ ಒಳ್ಳಲ್ ಕಾಡ್ ಸೇರಿತಿಂಜ ಜನ ಪಿಳ್ಳಾ ಅಯಿಂಗಡ ಮಕ್ಕಳ ಪುಡ್ಚಂಡ್ ಬಪ್ಪಕ್ ಅಯೆಚಿತಿಂಜ ಸೈನ್ಯಾಧಿಕಾರಿಯ ದುಂಬ ಪ್ರಯತ್ನಪಟ್ಟಿತ್ ಆಯಿರ ಕಣಕ್ಲ್ ಜನಳ ಪುಡ್ಚಂಡ್ ಬಾತ್. ಅವಂಡ ಪ್ರೆಂಚ್ ಸೈನ್ಯಾಧಿಕಾರಿ ಲಾಲಿ, ಯಾಲ ಮಲೆಂಜ ಸಾಮಾನ್ಯ ಜನಳ ಮಾತ್ರ ಅಲ್ಲತೆ ಚೆನ್ನಂಗ್ ಜನಡ ಮುಕ್ರಿಯಳ ಪುಡ್ಚಂಡ್ ಬಾತ್. ಇನ್ನೆ

ಮಾರ್ಗಶಿರ ಬಹುಳ ಪಂಚಮಿರ ದಿನಕೆತ್ತನೆ ಎಣ್ಣಕ ಕ್ರಿ.ಶ. 1785 ಡಿಸೆಂಬರ್ 10-15ಂಡ ಒಳ್ಳಲ್ ಅಲ್ಲಿ ಸುಮಾರ್ 80 ಆಯಿರ ಜನಳ ಪುಡ್‌ಚತ್‌ಂದ್ ಸುಲ್ತಾನಂಡ ಆಸ್ಥಾನತಾರ ಚರಿತ್ರಕಾರ ಮೀರ್ ಹುಸೇನ್ ಆಲಿಕಿರ್ಮಾನಿ ಎಳ್ಳಿತ್.

ಸುಲ್ತಾನನುಂಡ್ ಪುಡ್‌ಪ್‌ಚಿಟ್ಟುಂಡ್ ಬಂದ ಜನಳೆಲ್ಲ ತಾಂಡ ಸೈನಿಕಂಗಡ ಕೂಡೆ ಶ್ರೀರಂಗಪಟ್ಟಕ ಆಯೆಚತ್. ಅಲ್ಲಿಂಜ ಕೊಡಗಲ್ ಇಂಜ ಕೋಟೆಲೆಲ್ಲ ತಾಂಡ ಸೈನಿಕಂಗಡ ರಾಣ್ಯತನ ಬಲಕೂಟಿತ್ ತಾನೂ ಶ್ರೀರಂಗಪಟ್ಟಕ ಸಿದ್ಧಾಪುರಕಾಲೆ ವಾಪಾಸಾಚಿ.

ಅಲ್ಲಿ ಟಿಪ್ಪು ಕೊಡಗ್‌ಂಜ ಪುಡ್‌ಚಂಡ್ ಬಂದ ಜನಳೆಲ್ಲ ಮುಸಲ್ಮಾನಂಗಡ ಮತಾಂತರ ಮಾಡಿತ್ ತಾಂಡ ರಾಜ್ಯತಾರ ಬೋರೆ ಬೋರೆ ತೆರಿ ಸೀಮೆಲ್ ವಾಸ ಮಾಡುವನ್ನಕೆ ಅಯಿಂಗಳ ಗುಂಪ್ ಗುಂಪಾಯಿತ್ ಹಂಚಿತ್ ಆಯೆಚತ್. ಇನ್ನನೆ ಮತಾಂತರ ಆನ ಕೊಡವಳ ಅಹಮ್ಮದಿಯಂದ್ ಕಾಕುವಕಾಚಿ.

ಮತಾಂತರ ಆನ ಈ ಜನಡಾತ್ ನಲ್ಲ ಗೆಟ್ಟಿಮುಟ್ಟಾನ ತಡಿಕಾರಳ ತಾನ್ ಶ್ರೀರಂಗಪಟ್ಟಕೆ ಆಕಿಯಂಡ್ ಅಯಿಂಗಳುಂಡ್ ಎಟ್ತ್ ಸೈನಿಕ ತುಕಡಿನ ರಚನೆ ಮಾಡ್‌ಚಿ. ಪುದಿಯದಾಯಿತ್ ಸೈನ್ಯಕ್ ಸೇರಾನ್ ಈ ಜನಳ ಪಡೆ ವಿದ್ಯೆಲ್ ಟ್ರೈನಿಂಗ್ ಕೊಡ್‌ಪಕ್, ಅಯಿಂಗಳಕ್ ಶಿಸ್ತಾರ ಬದ್‌ಕಾನ್ ಪಡ್‌ಪ್‌ಚಿಡುವಕ್ ತಾಂಡ ಸೈನ್ಯತ್ ಪಳಂಗ್‌ನ ಪಿಳ್ಳಾ ಪರಿಯ ಅಧಿಕಾರಿಯಳ ನೇಮಕ ಮಾಡ್‌ಚಿ. ಈ ಅಧಿಕಾರಿಯ ದುಂಬ ಅಲೆ ಇಲ್ಲತೆ ಚೆನ್ನಂಗ ಸಮಯತ್ ಶತ್ರುವಳ ಎದ್‌ರಾಚಿಡುವಕ್ ತಯಾರ್ ಮಾಡ್‌ಚಿ. ಈ ಸೈನ್ಯಾಧಿಕಾರಿಯಕ್ ಸುಲ್ತಾನ್ ಪೊನ್ನ, ಬೊಳ್ಳಿ ಪಿಳ್ಳಾ ಬೋರೆ ಮಾಲ್‌ನುಂಡ್ ಮಾಡ್‌ನ ಬೋಳೆಪಟ್ಟಿ ಮಾಡಿತ್ ಸೈನ್ಯತಾರ ಯೂನಿಫಾರ್ಮ್ ಪೊಲ್ಲ್‌ಚಿಟ್ಟಿತ್ ಮರ್ಯಾದೆ ಮಾಡ್‌ಚಿ. ಈ ಅಹಮ್ಮದೀಯ ಸೈನಿಕಂಗಕ್ ನರಿ ರಂಗ್‌ರ ಬಟ್ಟೆನ ಪುದಿಯದಾಯಿತ್ ಮಾಡ್‌ಚಿಟ್ಟಿತ್ ಅದತ್ ಯೂನಿಫಾರ್ಮ್ ಮಾಡಿತ್ ಇಟ್ತ್ ಕೊಡ್‌ತತ್. ಈಂಗ್ ಮುಪ್ಪಡೆ ಕೊಡಗ್‌ಂಜ ಪುಡ್‌ಚಂಡ್ ಬಂದ ಸುಮಾರ್ 85 ಆಯಿರ ಜನಳ ಒರಾತತ್ ಇಸ್ಲಾಮ್ ಮತಕ್ ಕೂಟಾನ್ ದಿನತೆ ಸುಲ್ತಾನ, ತಾನ್ 'ಬಾದ್‌ಷಾ' ಎಣ್ಣುವ ಬಿರ್‌ದ್ ಇಟ್ಟಂಡತ್. ಡೆಲ್ಲಿರ ಮೊಗಲ್ ಬಾದ್‌ಷಾಂಡ ಅಧಿಕಾರತಂಜ ತಾನ್ ಸ್ವತಂತ್ರಂದ್ ಕಾಕ್‌ಚಿಟ್ಟಂಡತ್.

ಬ್ರಿಟಿಷ್‌ಕಾರ ಹಿಂದೂಸ್ಥಾನತಾನೆಲ್ಲ ತಂಗಡ ಪುಡ್‌ತಕ್ ಬೆಚ್ಚವಾಂಗ್ ಮುಪ್ಪಡೆ ಹಿಂದೂಸ್ಥಾನತಾರ ಏರ ಭಾಗ ಎಣ್ಣಕ ಇಕ್ಕತ ಪಾಕಿಸ್ಥಾನ, ಭಾರತತಾರ ಮೈಸೂರ್‌ರ ದಕ್ಷಿಣ ಭಾಗ ತಮಿಳ್‌ನಾಡ್‌ರ ಆರ್ಕಾಟ್‌ಕೆತ್ತನೆ ಇಂಜತ್. ಆ ಕಾಲತ್ ಮೊಗಲ್ ಚಕ್ರವರ್ತಿಯಡ ಅಧೀನತ್ ಇಂಜ ಪಿಳ್ಳಾ ಇಲ್ಲತೆ ಹಿಂದೂಸ್ಥಾನತಾರ ರಾಜಂಗ ಎಲ್ಲ



ಮೊಗಲ್ ಚಕ್ರವರ್ತಿಯು ಗೌರವ ಕಾಟುವ ಇಂಜತ್. ಅನ್ನನೆ ಅಯಿಂಗಲುಂಡ್ ಬಿರ್‌ದನ್ ಪಾರ ಕಾಪ ಇಂಜತ್. 19ನೆ ಶತಮಾನತ್‌ರ ನಡುಕೆತ್ತನೆ ಬ್ರಿಟಿಷ್ ಗವರ್ನರ್ ಜನರಲ್‌ನ ಸಹ ಮೊಗಲ್ ಕೊಡ್‌ತಿಂಜ ನವಾಬ್, ಮಾಲಿಲುಲ್, ಅಲ್ಪಾಬ್, ಕುರ್ಶಿದ್, ಜನಾಬ್, ಉಮ್ಮರ್... ಇನ್ನತ ಬಿರ್‌ದನ್ ತಂಗಡ ಚಾಕ್ರಿರ ಬೆಂಬರತ್ ಇಟ್ಟವ ಇಂಜತ್.

ಈ ಕಾರಣತ್‌ನಗುಂಡ್ ಹಿಂದೂಸ್ಥಾನತ್‌ರ ಬೋರೆ ರಾಜಂಗ, ಬ್ರಿಟಿಷ್‌ಕಾರ ಮೊಗಲ್ ಚಕ್ರವರ್ತಿಯಡ ಆಶ್ರಿತಂಗಾಂಡ್ ಗೇನ ಮಾಡಿಂಜತ್. ಮೈಸೂರ್‌ರ ಹಿಂದೂ ರಾಜಂಗ ಮೊಗಲ್ ಚಕ್ರವರ್ತಿಯು ಕೊದಿಮೊದ ಅಯೆಚಿತ್, ಬಿರ್‌ದ್ ಪಡ್‌ಂದಿಂಜತ್. ಕೊಡಿಲ್ ಎಣ್ಣೆನ ಘಟನೆರ ದಿನಕೆತ್ತನೆ ಟಿಪ್ಪು ಈ ಕಾರಣತೆ ಮೊಗಲ್ ಬಾದ್‌ಷಾಂಗ್ ಪದತ್‌ರ ಮಟ್ಟಿಗೆ ಅಧೀನಂದ್ ಬೋರೆ ರಾಜಂಗಡನ್ನೆ ಗೇನ ಮಾಡ್‌ಚಿ. ಆಚೀಂಗಿ, ಕೊಡವಳ ಮತಾಂತರ ಮಾಡ್‌ನಪಿಳ್ಳಾ ಸುಲ್ತಾನ ತಾನೆ ಬಾದ್‌ಷಾಂಡಚ್ಚೆ ಕೇಳಿ ಪಡ್‌ಂದವಂದ್ ಸಾರಿಯಂಡತ್.

ಟಿಪ್ಪು ಸುಲ್ತಾನ ಕೊಡಗ್‌ಂಜ ಸುಮಾರ್ 85 ಆಯಿರ ಜನಳ ಪುಡ್‌ಚಂಡ್ ಪೋನಪಿಳ್ಳಾ ಅಯಿಂಗಡ ಭೂಮಿನ ಕೃಷಿ ಮಾಡಿತ್ ಅನುಭವಿಚಿಡುವಕ್ ತಾಂಡ ಮೈಸೂರ್ ರಾಜ್ಯತ್‌ಂಜ ಶೇಕ್, ಸೈಯದ್, ಮೊಗಲ್, ಪಠಾಣ ಎಣ್ಣುಪ ನಾಲ್ ವರ್ಗತ್‌ರ ಮುಸ್ಲಿಮ್‌ಳ ಕೊಡಗ್‌ಕ್ ಅಯೆಚಿತ್ ಕೊಡಗ್‌ರ ಜನಡ ಭೂಮಿ ಪಿಳ್ಳಾ ಮನೆನ ಅಯಿಂಗಕ್ ಜಹಗೀರ್ ಆಯಿತ್ ಕೊಡ್‌ತತ್. ಆ ಭೂಮಿ ಪಣಿಕ್ ಪಂಡ್ ಕೊಡಗ್‌ರ ಭೂಮಿ ಮಾಡುವ ಇಂಜ ಪೊಲೆಯಂಗಳ ಕೊಡ್‌ತತ್. ಕೊಡವ ಇಪ್ಪಕ ಪೊಲೆಯಳೂ ಕೂಡಿತ್ ಭೂಮಿ ಮಾಡುವ ಇಂಜತ್. ಪೂರ್‌ಮೆಂಜ ಬಂದ ಮುಸಲ್ಮಾನಂಗಕ್ ಭೂಮಿ ಪಣಿ ಗೊತ್ತೂ ಇಂಜ್‌ಲೆ. ಕಯ್ಯುವದೂ ಇಂಜ್‌ಲೆ.

ಇನ್ನನಾಯಿತ್ ಕೊಡಗ್‌ಲ್ ಭೂಮಿನ ಕೃಷಿ ಮಾಡುವಕ್ ಪೋರತೆ ಇಂಜ ಜನಳ ದುಂಬ್‌ಚಿಟ್ಟವಕ್ ಸುಲ್ತಾನ ಬಳ್ಳಾರಿ ಜಿಲ್ಲೆರ ಅದವಾನಿ ಸೀಮೆಂಜ ರೈತಡ ಪುಡ್‌ಚಂಡ್ ಬಂದಿತ್ ಭೂಮಿ ನಡ್‌ಪಕ್ ಬುಟ್ಟತ್. ಕೊಡಗ್‌ಕ್ ಅಯೆಚ ಮುಸಲ್ಮಾನ ಜಹಗೀರ್‌ದಾರಂಗಕ್ "ಈ ದೇಶತ್‌ನ ನಿಂಗಕ್ ಜಹಗೀರ್ ಆಯಿತ್ ತಂದಿಯೆ. ಇದ್‌ನ ಅಭಿವೃದ್ಧಿ ಮಾಡಿತ್ ಸುಖತ್ ಇರಿ. ಈ ಕುಂದ್‌ಸೀಮೆರ ಜನಳ ನಾಶ ಮಾಡುವಕ್ ತೀರ್ಮಾನ ಮಾಡಿತುಳ್ಳಾನಗುಂಡ್ ನಿಂಗ ರಾಜಂಡ ಅಪ್ಪಣೆಪೋಲೆ ದಾರ್ ನಂಗಡ ಕೈಯಿಂಜ ತಪ್ಪ್‌ಚಿಟ್ಟಂಡ್ ಪೋಯಿತೂ ಅನ್ನತ ಜನಳ ತೇಡಿತ್ ಪುಡ್‌ಚಂಡ್ ಬಂದಿತ್ ಕೊಲ್ಲುವದ್ ನಿಂಗಡ ಕರ್ತವ್ಯಂದ್ ಅರ್‌ಂಜವಂಡೂ"ಂದ್ ಕಣ್ಣಾಚ್ಚೆ ಮಾಡ್‌ಚಿ.

ಇತ್ತೆಟಿ ಪುದಿಯದಾಯಿತ್ ಕೊಡಗ್‌ಕ್ ಭೂಮಿ ಮಾಡುವಕ್ ಅಯೆಚ ರೈತಂಗಡ

ತತ್ಕಾಲ ಖರ್ಚಿಕ್ ಪಣ ಪಿಳ್ಳಾ ನೆಲ್ವನ ಕೊಡ್ತಿತ್ ಅವು ಇಲ್ಲಿಯೆ ನೆಲೆ ನಿಪ್ಪನ್ನಕೆ ಮಾಡುವಕ್ ಹೈದರಾಲಿರ ಕಾಲತ್ ಅಮಲುದಾರ ಆಯಿತಿಂಜ ಸುಬ್ಬರಸಯ್ಯಂಡ ತಮ್ಮಣ ನಾಗಪ್ಪ ಎಣ್ಣುವಂವನ ನೇಮಕ ಮಾಡ್ಚಿ. ಆಚೇಂಗಿ, ನಾಗಪ್ಪ ಆ ರೈತಂಗಕ್ ಬರಂಡಿಂಜ ದುಡ್ಡ್ ಪಿಳ್ಳಾ ನೆಲ್ವಲ್ ಚೆನ್ನಂಗಾನ ಅಯಿಂಗಕ್ ಕೊಡ್ತೆ ಮೋಸ ಮಾಡ್ಚಿ. ಕೂಟಕ್ ಚೆನ್ನಂಗ್ ರೈತಂಗಡ ಕೈಯಿಂಜ ಪಣ ಎಡ್ತಂಡ್ ಅಯಿಂಗಳ ದೇಶತ್ಂಜ ಪೊರಮೆ ಪೋಪಕ್ ಬುಡುವ ಇಂಜತ್.

ಇನ್ನನೆ ಮೈಸೂರ್ ಕೊಡಗಂಜ ಪೊರಮೆ ತಪ್ಪಿಚಿಟ್ಟಂಡ್ ಪೋಪ ಇಂಜ ಅದವಾನಿ ರೈತಂಗಡಾತ್ ಚೆನ್ನಂಗಾಳ್ ಮೈಸೂರ್ ತೆರಿರ ಪಾರಕಾರಕ್ ಕಾಟ್ಟಿಬುದ್ದತ್. ಇನ್ನತಯಿಂಗಳ ಪಾರಕಾರ ಟಿಪ್ಪುರ ಪಕ್ಕ ಅಯೆಚತ್.

ಅಕ್ಕ ಟಿಪ್ಪು ಈ ಜನಳುಂಡ್ ನಾಗಪ್ಪಯ್ಯ ರೈತಂಗಕ್ ಮಾಡಿಯಂಡ್ ಉಳ್ಳ ಮೋಸತಾರ ಮೀದ ಅರಾಂಜತ್. ಕೂಡೆನ್ನ ನಾಗಪ್ಪಯ್ಯನ ಪುಡ್ಚಿತ್ ತೂಕೊಂಡೂಂಡ್ ತಾಂಡ ಸೈನ್ಯಾಧಿಕಾರಿಯಕ್ ಆಜ್ಞೆ ಮಾಡ್ಚಿ. ಅಕ್ಕಣೆಕ್ ನಾಗಪ್ಪಯ್ಯ ತಾಂಡ ಗೂಢಚಾರಂಗಳುಂಡ್ ಟಿಪ್ಪು ತನ್ನ ತೂಕುವಾಂಡ್ ಅರಾಂಜಂಡ್ ಕೂಡೆನ್ನ ಕೊಡಗನ ಬುಟ್ಟಿತ್ ಮಲಯಾಳಕ್ ಪೋಯಿತ್ ಕೋಟೆ ರಾಜಂಡ ಆಶ್ರಯ ಪಡ್ಂದತ್. ಕೋಟೆ ರಾಜ ಪಯ್ಯೋಟು ಚಂದು ಎಣ್ಣುವಂವಂಡ ಅಧೀನತ್ ಐಂಬದ್ ಜನ ನಾಯಮ್ಮಾರಳ ನಾಗಪ್ಪಯ್ಯಂಡ ಸಹಾಯಕ್ ಕೊಡ್ತತ್.

ನಾಗಪ್ಪಯ್ಯ ಇಯಂಗಳೆಲ್ಲ ಕೂಟಿಯಂಡ್ ಕೊಡಗಕ್ ಬರಣೆ ಅಲ್ಲಿ ಕಾಡ್ ಸೇರಿತಿಂಜ ಕೊಡಗರ ಜನ ಪಿಳ್ಳಾ ರಾಜಂಡ ಸ್ವಂತ ಭೂಮಿಯಾನ ಪಣ್ಯತಾರ ಪೊಲೆಯಳೂ ನಾಗಪ್ಪಯ್ಯಂಡ ಜನಳ ಸೇರಿಯಂಡತ್. ಇನ್ನನೆ ಇವೆಲ್ಲ ಒಕಚೆ ಕೊಡುವಕ್ ನೂರಾಳ್ ಆಚಿ. ನಾಗಪ್ಪಯ್ಯ ಈ ಜನಳೆಲ್ಲ ಕೂಟಿಯಂಡ್ ಕಾಡಲ್ ಇಂಜಂಡ್, ಈ ಸೀಮೆಲ್ ಇಳ್ಳಾ ಭೂಮಿ ಸಾಗುವಳಿ ಮಾಡಿಯಂಡ್ ಇಂಜನ್ನಕೆ ಅದವಾನಿ ರೈತಂಡ ಮನೆ ಮಾರಾನ ಲೂಟಿ ಮಾಡಿಯಂಡ್ ತಾಂಗ್ ವಿರೋಧ ಮಾಡ್ತಾನ ಜನಳ ಪೊಜ್ಜಿ ದೊವ್ತಚಿ.

ಕೊಡಗಲ್ ಇನ್ನನೆ ಅನಾಯಕತ್ವ ಚೆನ್ನಂಗ್ ಕಾಲಕೆತ್ತನೆ ಮುಂದರಾಂಜತ್. ಟಿಪ್ಪುರ ಅಧಿಕಾರಿಯಡ ಕೈಕ್ ಕಾಟ್ಟಿತ್ ಬಲ್ಯ ಬಲ್ಯ ಕಾಡ್ ಸೇರಿತಿಂಜ ಆಯಿರ ಕಣಕಾರ ಕೊಡಗರ ಜನ ಸುಲ್ತಾನಂಡ ಸೈನಿಕಂಗ ಇಂಜ ಕೋಟೆಂಜ ದೂರತ್ ಭೂಮಿನ ಕೃಷಿ ಮಾಡಿಯಂಡ್, ಕಾಡ್ಚಾತಿಯಳ ಬೋಟೆಯಾಡಿತ್ ಕಷ್ಟತ್ ಬದ್ಕುವ ಇಂಜತ್. ಕೊಡಗಲ್ ಭೂಮಿರ ಒಡತನ ಪಡ್ಂದಂಡ್ ಇಲ್ಲಿಯೆ ನೆಲೆ ನಿಪ್ಪಕ್ ಸುಲ್ತಾನನುಂಡ್ ಅಯೆಚ ಮುಸ್ಲಿಮ್ನ

ಇಲ್ಲಿಯತ ಮಳೆ, ಕುಳ್ಳಾರ್‌ನ ಸಹಿಸುವ ಕಯ್ಯತೆ ಎಚ್ಚಿಕೊ ಜನ ಚತ್ವಪೋಚಿ. ಚೆನ್ನಂಗಾಳ್ ರಾಜ್ಯ ಬುಟ್ಟಿತ್ ಓಡಿಪೋಚಿ. ಇಞ್ಚಿ ಚೆನ್ನಂಗಾಳ್ ಮಾತ್ರ ಇಲ್ಲಿಯೆ ಕೂಡ್‌ಚಿ. ಸುಲ್ತಾನ ಕೆಟ್ಟ್‌ಚಿಟ್ಟಿ ಕೋಟೆಲ್ ಇಂಜ ಸೈನಿಕಂಗಡ ಅಧಿಕಾರ ಕೋಟೆರ ಸುತ್ತು ಚೆನ್ನಂಗ್ ಮೈಲ್‌ಕೆತ್ತನೆ ಮಾತ್ರ ಪಬ್ಬಿತಿಂಜತ್. ಕೊಡಗುರ ಸ್ಥಿತಿ ಇನ್ನನಿಪ್ಪಕ ಕೊಡಗುರ ಚೆನ್ನಂಗ್ ಮುಕ್ರಿಯ ಪಿರಿಯಾಪಟ್ಟಿತ್‌ರ ಕೋಟೆರ ಒಳ್ಳಲ್ ಕೂಟಿತಿಂಜ ಕೊಡಗುರ ರಾಜಕುಮಾರಂಗಳ ಅಲ್ಲಿಂಜ ಬುಡ್‌ತಿಯಂಡ್ ಬರೊಂಡೂ, ಅದತ್ ಪೆರಿಯಂವನಾನ ವೀರ ರಾಜೇಂದ್ರಂಡ ನಾಯಕತ್ವತ್ ಸುಲ್ತಾನಂಡ ಸೈನಿಕಂಗಳ ದೇಶತ್‌ಂಜ ಓಡ್‌ಚಿಟ್ಟಿತ್ ದೇಶತ್‌ನ ಸುಲ್ತಾನಂಡ ಆಳ್ವಿಕೆಂಜ ಸ್ವತಂತ್ರ ಮಾಡೊಂಡೂಂಡ್ ನಿರ್ಧಾರ ಮಾಡ್‌ಚಿ. ಇನ್ನನೆ ನಿರ್ಧಾರ ಮಾಡಿಯಂಡವು ಕೊಡಗುರ ಪನ್ನೆರಂಡ್ ಮುಕ್ರಿಯ. ಇದತ್ ಕಡಿಯತ್ತಾಡ್‌ರ ಚೇಲಾವರ ಊರ್‌ರ ಪಟ್ಟಿಚೆರುವನ ಮನೆರ ಬೋಳುಕ ಪಿಞ್ಚಿ ಕರ್‌ಂದಾಡ್ ಊರ್‌ರ ಅಪ್ಪನೆರವನ ಮನೆರ ಅಚ್ಚಯ್ಯ ಇಂಜತ್‌ಂದ್ ತೋಂದುವ.

## 19. ವೀರರಾಜೇಂದ್ರ ಒಡೆಯ

ವೀರರಾಜೇಂದ್ರ ಒಡೆಯ ಪೆರಿಯಾಪಟ್ಟಿತ್‌ರ ಕೋಟೆಂಜ ತಪ್ಪ್‌ಚಿಟ್ಟಿಂಡ್ ಕೊಡಗುಕ್ ಬಂದದ್.

1589ತ್ ಪೆರಿಯಾ ಪಟ್ಟಿ ಕೋಟೆನ ನಂಜರಾಯ ಪಟ್ಟಿತ್‌ರ ಚೆಂಗಾಳ್ವರಸಂಡ ಪೆರಿಯ ರಾಜ ರುದ್ರಗಣ ಕೆಟ್ಟ್‌ಚಿಟ್ಟಿತ್. ಆ ನೇರತ್ ಪೇಟೆ ಕೋಟೆರ ಒಳ್ಳಲ್ ಇಂಜತ್. ಪೇಟೆರ ಸುತ್ತು ದಂಡ್ ಸುತ್ತರ್ ಕೋಟೆ ಇಂಜತ್. ಪೊರ ಸುತ್ತರ್ ಕೋಟೆ ಸುಮಾರ್ ನಾಲ್ ಫರಾಂಗ್ ಉದ್ವ ಪಿಞ್ಚಿ ಮೂಂಡ್ ಫರಾಂಗ್ ಅಗಲ ಚೌಕಾಕಾರತ್ ಇಂಜತ್. ಇದ್‌ಂಗ್ ಎದಿಕೆ ಬಲ್ವ ಪಡಿ ಪಿಞ್ಚಿ ಪೂರ್ವ ದಿಕ್ಕ್‌ಲ್ ಒರ್ ಚೆರಿಯ ಪಡಿ. ಇನ್ನನೆ ದಂಡ್ ಪಡಿ ಇಂಜತ್. ಇಕ್ಕಲೂ ಈ ದಂಡ್ ಪಡಿ ಉಂಡ್. ಪೊರಕೋಟೆರ ಕೆಂವತ್‌ರ ಪೊರಮೆ ಆಳವಾನ ಕುಂಡ್ ಇಂಜತ್. ಒಳ್ಳಲ್ ಸುಮಾರ್ 150 ಗಜ ಅಗಲತ್‌ರ ಸಮತಟ್ಟ್ ಜಾಗ.

ಅಕ್ಕ ಓಣಿರ ದಂಡ್ ಬರಿಲೂ ಮನೆ ಇಂಜನ್ನಕೆ ಕಾಂಬ. ಇಕ್ಕಲೂ ಪೊರ ಕೋಟೆ ಇಂಜ ಜಾಗತ್‌ರ ಉತ್ತರ ಬರಿಲ್ ಪಿಞ್ಚಿ ಪಶ್ಚಿಮ ಬರಿಲ್ ಮನೆ ಇಂಜಿತ್ ಅದತ್



ಜನ ವಾಸ ಉಂಡ್. ಎದಿಕೆ ಮನೆರ ಬೆಂಬರಿಲ್ ಇಳ್ಳೋರ್ ಕುಂಡ್ ಉಂಡ್. ಅದೊಂಡ ಒಳ್ ಬರಿ ಒಳಿಯತ ಕೋಟೆರ ಕೆಂವ ಉಂಡ್. ಈ ಕೆಂವ ಇಕ್ಕ ಪಾಳಾಯಿತ್ ನಾಲ್ ಮೂಲೆಲ್ ಮಾತ್ರ ಎತ್ತರತಾರ ದಾಟ್ಲೆ ಕಾಂಬ. ಈ ನಾಲ್ ದಾಟ್ಲೆರ ಕೊಡಿಲ್ ಪಂಡ್ ಪಾರಕಾರ ಫಿರಂಗಿನ ಬೆಚ್ಚಂಡ್ ಪಾರ ಕಾಪ ಇಂಜತ್. ಚೆಂಗಾಳ್ವಂಗಡ ಅರಮನೆ ಇಂಜ ಜಾಗತ್ ಜನ ಇಕ್ಕಲೂ ಕಾಟುವ. ಚೆಂಗಾಳ್ವರಸ ಪಿಳ್ಳಾ ಪಂಡೇತ ಮೈಸೂರ್ ಒಡೆಯಂಡ ಕಾಲ ಕೈಂಜಪಿಳ್ಳಾ ಮೈಸೂರ್ ರಾಜ್ಯ ಹೈದರಾಲಿ ಪಿಳ್ಳಾ ಟಿಪ್ಪುರ ಪುಡಾತತ್ ಇಪ್ಪಕ ಪೆರಿಯಾಪಟ್ಟತ್ ಓರ್ ಕಿಲ್ಲೆದಾರ ನೇಮಕ ಆಚಿ. ಅವ ಕೋಟೆರ ಒಳ್ಲ್ ಅರಮನೆಲ್ ವಾಸ ಇಂಜತ್.

ಒಳಿಯತ ಪಿಳ್ಳಾ ಪೊರ್ಮತ ಕೋಟೆರ ನಡುಲ್ ವ್ಯಾಪಾರಿಯ ಪಿಳ್ಳಾ ಬೋರೆ ಜನ ವಾಸ ಇಂಜತ್. ಕೋಟೆರ ಒಳ್ಲ್ ಓಣಿ ಇಂಜತ್. ಇಲ್ಲಿ ಪಶ್ಚಿಮ ದಿಕ್ಕರ ಓರ್ ಮೂಲೆಲ್ ಕೊಡಗರ ರಾಜಕುಮಾರಂಗ ಓರ್ ಸಾಮಾನ್ಯ ಮನೆಲ್ ಬಂಧಿ ಆಯಿತಿಂಜತ್. ಪೆರಿಯಾಪಟ್ಟ ಕೋಟೆರ ಒಳ್ಕ್ ಕಡಾತನ ಚೆನ್ನಂಗ್ ಸಮಯತ ವೀರರಾಜೇಂದ್ರ ಒಡೆಯಂಡ ಅವ್ವ ದೇವಾಂಬಿಕೆ ಅಮ್ಮ ಪಿಳ್ಳಾ ಬೋರೆ ರಾಜಮನೆತನಕಾರ ಮಾರಪನಿನ್ನುಂಡ್ ಚತ್ಪೋಚಿ.

ವೀರರಾಜೇಂದ್ರ ಪೆರಿಯಾಪಟ್ಟತಾರ ಕೋಟೆಲ್ ಇಪ್ಪಕ ಮುಸಲ್ಮಾನ ಧರ್ಮ್ಕ ಮತಾಂತರ ಮಾಡ್ಚೇಂದ್ ಚೆನ್ನಂಗ್ ಐರೋಪ್ಯ ಚರಿತ್ರಕಾರಂಗ ಎಳ್ಳಿತ್. ಕೊಡಗರ ರಾಜ ಮನೆತನಕಾರ ಪೆರಿಯಾಪಟ್ಟ ಕೋಟೆಲ್ ಇಪ್ಪಕ ಟಿಪ್ಪು ವೀರರಾಜೇಂದ್ರ ಒಡೆಯಂಡ ಬಲ್ಯಪ್ಪ ಅಪ್ಪಾಚಿರಾಜಂಡ ಓರ್ ಮೋವ ದೇವಮ್ಮಾಜಿ ಪಿಳ್ಳಾ ಅವಂಡ ತಂಗಿ ನೀಲಮ್ಮಾಜಿನ ತಾಂಡ ಜನಾಂಗಕ್ ಕೂಟಿತಿಂಜತ್. ಈ ಎಲ್ಲ ಕಾರಣತನಗುಂಡ್ ವೀರರಾಜೇಂದ್ರ ಒಡೆಯ ಪೆರಿಯಾಪಟ್ಟತ್ ನೆಮ್ಮದಿಲ್ ಇಂಜಾಲೆ. ಆನಗುಂಡ್ ಅವ ಅಲ್ಲಿಂಜ ತಪ್ಪಾಚಿಟ್ಟುಂಡ್ ಕೊಡಗ್ಕ್ ಬರೊಂಡೂಂದ್ ಪಾರ ಕಾತಂಡ್ ಇಂಜತ್.

ಈಂಡೆಡೆಲ್ ಕೊಡಗಲ್ ಇಂಜ ಸುಲ್ತಾನಂಡ ಸೈನಿಕಂಗಡ ಹಿಂಸೆನ ತಡ್ಪಕಯ್ಯತೆ ಕಾಡ್ ಕೂಡಿತಿಂಜ ಕೊಡವಳ ವೀರರಾಜೇಂದ್ರ ಒಡೆಯಂಡ ಆಪ್ತಂಗ, ವೀರರಾಜೇಂದ್ರನ ಎನ್ನನಾಚೇಂಗೂ ಮಾಡಿತ್ ಪೆರಿಯಾಪಟ್ಟ ಕೋಟೆಂಜ ಬುಡ್ತಿಯಂಡ್ ಕೊಡಗ್ಕ್ ಕೂಟಿಯಂಡ್ ಬರೊಂಡೂಂದ್ ತೀರ್ಮಾನ ಮಾಡಿತಿಂಜತ್. ಇನ್ನನೆ ತೀರ್ಮಾನ ಮಾಡಿಯಂಡಾತ್ ಪಟ್ಟಚಿರವನ ಬೋಳುಕ ಪಿಳ್ಳಾ ಅಪ್ಪನೆರವನ ಅಚ್ಚಯ್ಯ ಇಂಜತ್. ಇವು ವೀರರಾಜೇಂದ್ರಂಡ ಬೋರೆ ಸಿನೇತಂಗ ಕೂಡಿತ್ ಪೆರಿಯಾಪಟ್ಟತಾರ ಕೋಟೆಂಜ ಬುಡ್ತಿಯಂಡ್ ಕೊಡಗ್ಕ್ ಕೂಟಿಯಂಡ್ ಬಂದ ಓರ್ ಸಾಸ ಕತೆ ಉಂಡ್. ಈ ಕತೆ ಇದೊಂಗ್ ಸಮ್ಮಂಧಪಟ್ಟ ಒಕ್ಕತಾರ ಪೆರಿಯಯಿಂಗಳುಂಡ್ ಎಚ್ಚಕೊ ಕಾಲಕ್ ಬಯ್ಯ

ಕೇಟ ವಿಷಯತ್‌ರ ಮೀದ ಆಯಿತುಂಡ್.

ಆ ನೇರತ್ ಪೆರಿಯಾಪಟ್ಟಿ ಬಲ್ಲ ವ್ಯಾಪಾರ ಕೇಂದ್ರ. ಮಲಯಾಳಿಕಾರ, ಕೊಡಗ್‌ಕಾರ ತಂಗಡಲ್ಲಿ ಮಾರುವಕುಳ್ಳ ಸಾಮಾನ್‌ನೆಲ್ಲ ಪೆರಿಯಾಪಟ್ಟಿಕ್ ಕೊಂಡಪೋಯಿತ್ ಮಾರುವ ಇಂಜತ್. ಇದಾನ ಅರ್‌ಂಜಂಡ್ ಪಟ್ಟಿಚಿರುವನ ಬೋಳುಕ, ಅಂಪಂಡ ಒಂದ್ ದಂಡ್ ಆಪ್ತಂಗ ತೆಂಗಣ್ಣೆ ಪಿಳ್ಳಾ ಬೋರೆ ಅಣ್ಣೆನ ಮಾರುವ ಕಣ್ಣಂಗಡನ್ನೆಕೆ ವೇಷ ಇಟ್ಟುಂಡ್, ಬಲ್ಯ ತಪ್ಪಲೆಲ್ ಅಣ್ಣೆನ ಮಂಡೆಲ್ ಬೆಚ್ಚುಂಡ್ ಪೆರಿಯಾಪಟ್ಟಿ ಕೋಟೆರ ಓಣಿಲ್ ಮಾರುವಕೂಡ್‌ಚಿ.

ಇನ್ನನೆ ಮಾರಿಯಂಡ್ ಇಪ್ಪಕ ಒಂದ್ ದಂಡ್ ದಿನತ್ ವೀರರಾಜೇಂದ್ರ ಇಂಜ ಮನೆನ ಕಂಡ್‌ಪುಡ್‌ಚಿತ್ ಅಲ್ಲಿ ಅಣ್ಣೆ ಮಾರುವನ್ನೆಕೆ ನಾಟಕ ಮಾಡತ್ ಅಳೊತಂಡ್ ಬೋರೆ ಜನಕ್ ಗೊತ್ತಾಕತನ್ನೆಕೆ ವೀರ ರಾಜೇಂದ್ರಂಗ್ ತಂಗ ಅಂಪನ ಬುಡ್‌ತಿಯಂಡ್ ಪೋಪಕ್ ಬಂದ ವಿಷಯ ಅರಿಚಿಡುವಕ ಅಂವಂಗ್ ಪೇರ್ತ್ ಕುಶಿ ಆಯಿರ್‌ತ್. ಅಯಿಂಗಡ ಕೂಡೆ ಚೆನ್ನ ತಕ್ ಪರ್‌ಂದ ವೀರರಾಜೇಂದ್ರ ಪಿತ್ತಾಂದ್ ಒಯಿಪತ್ ನೇರಕ್ ಆ ಜಾಗಕ್ ಬಪ್ಪಕ್ ಎಣ್ಣೆಚಿ.

ಈ ನೇರತ್ ಸುಲ್ತಾನಂಡ ರಾಜ್ಯತ್ ಎಲ್ಲಿಯೂ ಸಹ ಪಡೆ ಇಲ್ಲತೆ ಇಂಜಾನುಂಡ್ ಪೆರಿಯಾ ಪಟ್ಟಿ ಸುತ್ತು ಸೀಮೆ ಅಂವಂಡ ಪುಡ್‌ತತ್ ಇಂಜಕೊ ಕೋಟೆ ಅಚ್ಚಕ್ ಭದ್ರ ಆಯಿತ್ ಇಂಜಾಲೆ. ಒಳಿಯತ ಕೋಟೆಕ್ ಬಲ್ಯ ಅಧಿಕಾರಿಯಳ ಬುಟ್ಟಕ ಬೋರೆ ಜನಕ್ ಪ್ರವೇಶ ಇಂಜಾಲೆ. ಆಚೇಂಗಿ, ಪೂರ್‌ಮತ ಕೋಟೆರ ಒಳಿಯತ ಬೀದಿ ವ್ಯಾಪಾರಿಯಕ್ ಪಿಳ್ಳಾ ರೈತಂಗಕ್ ತಿರಿಕಳಿಪಕ್ ತೊಂದರೆ ಇಂಜಾಲೆ. ಬೋಳುಕ ಪಿಳ್ಳಾ ಅಚ್ಚಯ್ಯಂಡ ಕೂಡೆ ಬಂದಿತಿಂಜ ಬಾಕಿ ಪತ್ತಾಳೂ ಅಲ್ಲಿಯತ ವ್ಯಾಪಾರಿಯ ಪಿಳ್ಳಾ ರೈತಂಡನ್ನೆಕೆ ವೇಷ ಇಟ್ಟುಂಡ್ ರಾಜಮನೆತನಕಾರಳ ಅಲ್ಲಿಂಜ ಬುಡ್‌ತಿಯಂಡ್ ಪೋಪಾಂಡ ಮೀದ ಚರ್ಚೆ ಮಾಡುವ ಕೂಡ್‌ಚಿ.

ವೀರರಾಜೇಂದ್ರಂಡ ನಲ್ಲ ಅದೃಷ್ಟಕ್ ಪೆರಿಯಾಪಟ್ಟಿತ್‌ರ ಕೋಟೆರ ಒಳಲ್ ಇಂಜ ಚೆನ್ನಂಗಾಳಡಾತ್ ಅಂವಂಡ ಆಪ್ತ ಸಿನೇತಂಗಳೂ, ಚಿಂತಕಂಗಳೂ ಆಯಿತಿಂಜತ್. ಇದತ್ ಒಕ್ಕಲಿಗರ ಹೊಂಬಾಳೆ ನಾಯಕ ಪಿಳ್ಳಾ ಮುಸಲ್ಮಾನ ಇಸ್ಲಾಮಿಲ್ ಖಾನ್ ಮುಖ್ಯ ಪಟ್ಟಿಪು. ಹೊಂಬಾಳೆ ನಾಯಕ ಮೈಸೂರ್‌ಕ್ ಸುಮಾರ್ 30 ಮೈಲ್ ದೂರತ ಇರುವನಹಳ್ಳಿ ಊರ್‌ಕಾರ. ಇಂವಂಗ್ ಚರ್ಪತ ಪಡೆವಿದ್ಯೆಲ್ ದುಂಬ ಆಸಕ್ತಿ ಇಂಜತ್. ಇಂವ ತಾಂಡ ಊರ್‌ಲ್ ಉಳ್ಳ ಬಾಲೆಕಾರಳೆಲ್ಲ ಕೂಟತ್ ಅಯಿಂಗಕ್ ಮೂಪ ಆಯಿತಿಂಜತ್. ನವಾಬ ಹೈದರಾಲಿ ಖಾನ್ ಇಂವಂಡ ವೀರತ್ವ ಅರ್‌ಂಜಿತ್ ಅಂಪನ

ಕಾಕಿತ್ ತಾಂಡ ಸೈನ್ಯತ್ ಓರ್ ಚೆರಿಯ ಚಾಕ್ರಿ ಕೊಡ್ತಿತ್ತಿಂಜತ್.

ಕೊಡಗುರ ರಾಜ ಕುಟುಂಬಕಾರಳ ಹೈದರಾಲಿ ಹಾಸನತ್‌ರ ಗೊರೂರ್‌ಕ್ ಕಡ್‌ತುವಕ್ ಅಂವ ಹೊಂಬಾಳೆ ನಾಯಕನ ರಾಜ ಮನೆತನತ್‌ನ ನೋಟಿಯವಕ್ ಎಣ್ಣೆತ್ತಿಂಜತ್. ಟಿಪ್ಪು ರಾಜ ಮನೆತನಕಾರಳ ಗೊರೂರ್‌ಕ್ ವರ್ಗ ಮಾಡುವಕ್ ಹೊಂಬಾಳೆ ಗೊರೂರ್‌ಕ್ ಬಾತ್. ಅಕ್ಕಣೆಕ್ ಒರೇ ಬಯತ್‌ಕಾರಳಾನ ವೀರರಾಜೇಂದ್ರ ಪಿಳ್ಳಾ ಹೊಂಬಾಳೆಕ್ ಸಿನೇತಿಕೆ ಆಯಿರ್‌ತ್. ಹೊಂಬಾಳೆಕ್ ಟಿಪ್ಪು, ವೀರರಾಜೇಂದ್ರನ ಮತಾಂತರ ಮಾಡ್‌ನಾಂಗ್ ದುಂಬ ಚೆಡಿ ಇಂಜತ್. ವೀರರಾಜೇಂದ್ರಂಡ ಮೀದ ಕನಿಕರ ಇಂಜಾನುಂಡ್ ಅಂವನ ಬುಡ್‌ತುವಕ್ ಸಹಾಯ ಮಾಡುವ ಗೇನ ಇಂಜತ್. ಆಚೇಂಗಿ, ಕೊಡಗುರ ಸ್ಥಿತಿಗಿತ್ತಿನ ಅಂವ ಅರಿಯತಾನಗುಂಡ್ ಒಂದೂ ಮಾಡುವ ಕೈಂಜಾಲೆ.

ವೀರರಾಜೇಂದ್ರ ಪಿಳ್ಳಾ ಹೊಂಬಾಳೆ ನಾಯಕಂಡ ಇಣ್ಣೋರ್ ಆಪ್ತ ಸಿನೇತ ಕೋಟೆರ ಪೊರಮೆ ಪಶ್ಚಿಮ ದಿಕ್ಕುರ ಉಕ್ಕಡತ್‌ರ ಪಾರಕಾರ ಇಸ್ಮಾಯಿಲ್ ಖಾನ್. ಇಂವಂಗೂ, ಕೋಟೆರ ಕಿಲ್ಲೆದಾರಂಗೂ ವಿರೋಧ ಇಂಜತ್.

ಕಿಲ್ಲೆದಾರ ಸುಲ್ತಾನಂಗ್ ಇಸ್ಮಾಯಿಲ್ ಖಾನ್‌ರ ವಿರೋಧ ಆಯಿತ್ ಕಾಗದ ಎಳ್ವಿತ್, ಅಂವನ ಪಾರಕಾರದ ಮುಕ್ತಿರ ಚಾಕ್ರಿಂಜ ಎಡ್‌ಪಾಚಿಟ್ಟಿತ್ ಇಣ್ಣೋರ್ ದೂರತ ಊರ್‌ಕ್ ಅಯಿಕ್ಕೊಂಡೊಂಡ್ ಇಂಜತ್. ಈನಗುಂಡ್ ಇಸ್ಮಾಯಿಲ್ ಖಾನ್‌ಕ್ ಸುಲ್ತಾನ ಪಿಳ್ಳಾ ಪೆರಿಯಾಪಟ್ಟ ಕಿಲ್ಲೆದಾರಂಡ ಮೀದ ಪಗೆ ಸುರುವಾಚಿ. ಅವು ಅಧಿಕಾರತ್‌ಂಜ ಬುಡ್‌ಗಡೆ ಆಪಾನೆ ಪಾರಕಾತಂಡ್ ಇಂಜತ್. ಇಸ್ಮಾಯಿಲ್ ಖಾನ್‌ರ ಮನಸ್ಸಲ್ ಉಳ್ಳದ್ ಹೊಂಬಾಳೆ ನಾಯಕಂಗ್ ಗೊತ್ತಾಚಿ.

ಈ ನೇರತ್ ಕೊಡಗುಂಜ ಪನ್ನೆರಂಡಾಳ್ ವೀರರಾಜೇಂದ್ರಂಡ ಆಪ್ತಂಗ ಅಂವನ ಜೈಲ್‌ಂಜ ಬುಡ್‌ತಿಯಂಡ್ ಪೋಪಕ್ ಬಂದದ್ ಹೊಂಬಾಳೆ ನಾಯಕ ಪಿಳ್ಳಾ ಇಸ್ಮಾಯಿಲ್‌ಖಾನ್‌ರ ಆಸೆಕ್ ಪುರ್‌ಡ್ ಕಾಟ್‌ನನ್ನೆ ಆಚಿ. ಆನಗುಂಡ್ ಕೊಡಗುರ ಜನ ವೇಷ ಮಾತಿತ್ ಪೆರಿಯಾಪಟ್ಟಕ್ ಬಂದದ್ ಗೊತ್ತಾನನ್ನೆ, ಹೊಂಬಾಳೆ ನಾಯಕ ಪಿಳ್ಳಾ ಇಸ್ಮಾಯಿಲ್ ಖಾನ್ ವೀರರಾಜೇಂದ್ರ ಪಿಳ್ಳಾ ಕೊಡಗುರ ಅಂವಂಡ ಆಪ್ತಂಗಡ ಕೂಡೆ ಗುಟ್ಟಲ್ ವೀರರಾಜೇಂದ್ರಂಡ ಬುಡ್‌ಗಡೆರ ಮೀದ ಪಿಳ್ಳಾ ತಂಗಡ ಬವ್ವಸಾರ ಮೀದ ತಕ್ಕ ಬಾಕ್ ನಡ್‌ತಿತ್ ಓರ್ ತೀರ್ಮಾನಕ್ ಬಾತ್. ವೀರರಾಜೇಂದ್ರ, ಅಂವಂಡ ಪೊಣ್ಣ್, ಮೋವ ಪಿಳ್ಳಾ ದಂಡ್ ತಮ್ಮಣಿಂಗಳ ಕೋಟೆರ ಪೊರಮೆ ಕಡ್‌ತುವ ವಿಷಯತ್ ಒಮ್ಮತಕ್ ಬಾತ್.

ವೀರರಾಜೇಂದ್ರಂಡ ಕೊಡಗುರ ಆಪ್ತಂಗ ಪೆರಿಯಾಪಟ್ಟಕ್ ಬಂದಿಯೆ ಕ್ರಿ.ಶ. 1788ನೆ

ಇಸವಿ ಡಿಸೆಂಬರ್ ತಿಂಗಳ್ ತರ ಆದ್ಯ ವಾರತ್. ಡಿಸೆಂಬರ್‌ಲ್ ಕೋಟ ಇಪ್ಪ. ಪೆರಿಯಾಪಟ್ಟಿತ್ತರ ಸುತ್ತ ಕಾಡ್ ಇಂಜಾನಗುಂಡ್ ಅಲ್ಲಿಯೂ ಕೋಟ. ಜನ ಬೈಟ್ ಬೆರಿಯ ಬುದ್ದಂಡ್ ವರುವ ಇಂಜತ್. ಪೆರಿಯಾಪಟ್ಟಿತ್ತಂಜ ರಾಜ ಮನೆತನಕಾರಡ ಬುಡ್‌ಗಡೆಕ್ ಡಿಸೆಂಬರ್ ತಿಂಗ ಎಲ್ಲಾ ತಿಂಗಳ್‌ಂಜ ಅನುಕೂಲಂದ್ ಅವು ಗೇನ ಮಾಡ್‌ಚಿ. ಅಯಿಂಗಕ್ ಹೊಂಬಾಳೆ ನಾಯಕ ಪಿಳ್ಳಾ ಇಸ್ಮಾಯಿಲ್ ಖಾನ್ ಸಪೋರ್ಟ್ ಕಾಟ್‌ಚಿ. ಅಪೆಲ್ಲ ಡಿಸೆಂಬರ್ ತಿಂಗಳ್‌ರ ಒಂದನೆ ವಾರ ಎಣ್ಣೆಕ ಮಾರ್ಗಶಿರ ತಿಂಗಳ್‌ರ ಕೃಷ್ಣ ಪಕ್ಷ್‌ತರ ಆದ್ಯತ ಬೈಟ್ ರಾಜ ಮನೆತನಕಾರಳ ಕೋಟೆಂಜ ಪೊರ್‌ಮ ಕಡ್‌ತುವ ರೀತಿ ಪಿಳ್ಳಾ ದಿನತ್‌ನ ನಿರ್ಕ್ ಮಾಡಿಯಂಡತ್.

ಕಲಿಸಂದ 4890ನೆ ಕೀಲಕ ಸಂವತ್ಸರ ಮಾರ್ಗಶಿರ ಬಹುಳ ಸಪ್ತಮಿ ಬೇಳಾಚೆರ ನಡಪಾದ್ರೆ ಎಣ್ಣೆಕ ಕ್ರಿ.ಶ. 1788ನೆ ಡಿಸೆಂಬರ್ ತಿಂಗಳ್‌ರ 14ಂಗ್ ಹೊಂಬಾಳೆ ನಾಯಕ ವೀರ ರಾಜೇಂದ್ರಂಡ ಮನೆಲ್ ಓರ್ ವಿಶೇಷಪಟ್ಟ ಉಪಚಾರ ಮಾಡ್‌ಚಿಟ್ಟಿತ್ ಅಲ್ಲಿ ಪಾರ ಇಂಜ ಒಂದ್ ದಂಡ್ ಸಿಪಾಯಿಯಕ್ ಅಮಲಾಪ ಪದಾರ್ಥತ್‌ನ ಕಳ್ಳಲ್ ಇಟ್ಟಿತ್, ಉಂಬಕಾಪಕ ದುಂಬ ಕಳ್ಳನ್ ಕುಡ್‌ಪ್‌ಚಿಟ್ಟಿತ್. ಅವು ಉಂಡಿತ್ ಚಿನ್ನಂಗ್ ನೇರತೆ ಅಮಲಾಯಿತ್ ತಂಗಡ ಪಲಂಬಾರ ಮೀದ ಚತ್ತನ್ನಕೆ ಬುದ್ದಂಡತ್! ಇಚ್ಚಕೆ ಅಲ್ಲತೆ ಹೊಂಬಾಳೆ ನಾಯಕ ಆ ನೇರತ್ ಕರ್ತನೂಲ್‌ಲ್ ಮಾಡ್‌ನ ಗೆಟ್ಟಿಯಾನ ಕೇರಾರ ವಗಿರ ಓರ್ ತುದಿನ ಕೋಟೆರ ಪಶ್ಚಿಮ ದಿಕ್ಕರ ಕೆಂವತ್‌ರ ಒಳ್ ಬರಿಲ್ ಕೋಡಕ್ ಓರ್ ಬಲವಾನ ಗೂಟ ನೆಟ್ಟಿತ್ ಅದ್‌ಂಗ್ ಚಿಕ್ಕಚಿಟ್ಟಿತಿಂಜತ್. ಅದ್‌ಂಡ ಇಇಸ್ಲೋರ್ ತುದಿನ ಕೆಂವತ್‌ರ ಪೊರ್‌ಮ ಬರಿಯತ ಕುಂಡ್‌ಲ್ ಓರ್ ಬಂಡೆಕಲ್‌ಕ್ ಮುರ್‌ಕಿ ಕೆಟ್ಟುವನ್ನಕೆ ಕೊಡಗ್‌ಕಾರಕ್ ಎಣ್ಣೆತಿಂಜತ್. ಕೊಡಗ್‌ಂಜ ಬಂದ ಪನ್ನೆರಂಡ್ ಜನಡಾತ್ ಅಣ್ಣೆ ಮಾರುವಯಿಂಗಡ ವೇಷತ್ ಇಂಜ ನಾಲಂಜಾಳ್‌ಕ್ ಅಣ್ಣೆ ತವ್ವಲೆನ ಬೆಚ್ಚಿತ್ ಪೊರ್‌ಪಕ್‌ಂದ್ ಮಾಡ್‌ಚಿಟ್ಟಿತಿಂಜ ಅಗಲ ಬಾಯಿರ ಬಲ್ಯ ಕುಕ್ಕಿನ ಬೆಚ್ಚಿತ್ ಕುಂಡ್‌ರ ಪಕ್ಕತ ಕಾಡ್‌ಲ್ ಪಾರಕಾಪಕ್ ಎಣ್ಣೆತಿಂಜತ್. ಇಸ್ಮಾಯಿಲ್ ಖಾನ್‌ಕೂ ಅಂದ್ ಬೈಟ್ ಉಕ್ಕಡತ್‌ರ ಪಾರಕಾರಕೂ ಅಮಲ್ ಬಪ್ಪ ವಸ್ತುನ ಕಳ್ಳಕ್ ಕೂಟಿತ್ ಕುಡ್‌ಪ್‌ಚಿಟ್ಟಾಂಗ್ ಅವು ಸೊಯ ತಪ್ಪಿತ್ ನಲ್ಲ ವರ್‌ಕ್‌ಲ್ ಇಪ್ಪನ್ನಕೆ ನೋಟಿಯವಂಡೂಂದ್ ಎಣ್ಣೆತಿಂಜತ್.

ಇತ್ತಟಿ ಕೋಟೆರ ಒಳ್‌ಲ್ ವೀರರಾಜೇಂದ್ರ, ಅಂವಂಡ ಕುಟುಂಬಕಾರ, ಪಕ್ಕತ್ ಉಳ್ಳಯಿಂಗಕ್ ಗೊತ್ತಾಕತನ್ನಕೆ ಪೊರ್‌ಡುವ ತಯಾರಿ ಮಾಡಿಯಂಡ್ ಇಂಜತ್. ವೀರರಾಜೇಂದ್ರಂಡ ಕುಟುಂಬ ಎಣ್ಣೆಕ ಅಂವಂಡ ಪೊಣ್ಣ್ ನಂಜಮ್ಮಾಜಿ, ಎಟ್ವೆ ತಿಂಗಳ್‌ರ ಮೂಡಿ ಕುಳ್ಳಿ ರಾಜಮ್ಮಾಜಿ ಪಿಳ್ಳಾ ಅಂವಂಡ ತಮ್ಮಣಂಗ ಅಪ್ಪಾಜಿರಾಜ ಪಿಳ್ಳಾ ಲಿಂಗರಾಜ.

ಸೆರಿ ನಡಪಾದ್ರೆ. ಎಲ್ಲಿ ನೋಟನಕೊ ಕುಯ್ನಿರಾಟ್. ಕೋಟ ಇಂಜಾನುಂಜ್ ದಾರೂ ತಂಗಡ ಮನೆ ಬುಟ್ಟಿತ್ ಪೊರಾಮೆ ಓಡಿ ಕಳಚಂಡ್ ಇಲ್ಲೆ. ಆ ನೇರತ್ ವೀರರಾಜ ಪಿಳ್ಳಾ ಅಂವಂಡ ಪರಿವಾರ ಓರಿಚ್ಚಿಕೊ ಸದ್ವಾಮಾಡತೆ ಹೊಂಬಾಳೆ ನಾಯಕಂಡ ಬಯ್ಯೆ ಕೋಟೆರ ಪಶ್ಚಿಮ ದಿಕ್ಕಾರ ಕೆಂವತಾರ ಅಡಿ ಬರಿಕ್ ಬಾತ್. ಆ ಜಾಗತ್ ಏರ ಮನೆ ಇಂಚಾಲೆ. ಕೋಟೆರ ಕೆಂವ ಅನ್ನತಾ ಎತ್ತರ, ಪೈಲ್ ಇಂಚಾಲೆ. ಅಲ್ಲಿ ಗೂಟಕ್ ಕೆಟ್ಟಿತಿಂಜ ಕರ್ತ ವಣೆನ ಪತ್ತಿಯಂಡ್ ವೀರರಾಜೇಂದ್ರ ಕೋಟೆರ ಕೆಂವ ಪತ್ತಿತ್ ಕೊಡಿಕ್ ಬಾತ್. ಅಂವ ನಲ್ಲ ತಾಕತ್ತಾಕಾರ. ತಾಂಡ ಬೆನ್ನರ ಮೀದ ಪೊಣ್ಣಾನ ಪೊರತಂಡ್ ಕೋಟೆರ ಕೊಡಿಕ್ ಬಾತ್. ಅಂವಂಡ ತಮ್ಮಣ ಅಪ್ಪಾಜಿ ಚೆರಿಯ ಕುಳ್ಳಿನ ಎಡ್ತಂಡ್ ಅಂವಂಡ ಬಯ್ಯೆ ಬಾತ್. ಲಿಂಗರಾಜ ಪತ್ತ ಬಯತ್ ಕಣ್ಣ ಆನಾನಗುಂಡ್ ಹೊಂಬಾಳೆನಾಯಕ ತಾಂಡ ಬೆನ್ನರ ಕೊಡಿಲ್ ಅಳಪ್ಪಾಚಿಟ್ಟಂಡ್ ಕೆಂವ ಪತ್ತಚಿ. ಕೊಡಿಲ್ ಓರ್ ಗೆಳಿಗೆ ಸುಸ್ತನ ಕಮ್ಮಿ ಮಾಡಿಯಂಡ್ ಅನ್ನನೆ ಕೇದತ್ ಇಂಜ ಕುಂಡ್ ಕ್ ಇಳಂಜತ್. ಕೂಡೆನ್ನೆ ಅಲ್ಲಿ ಇಯಂಗಳೆ ಪಾರಕಾತಂಡ್ ಇಂಜ ಕೊಡಗಾಕಾರ ವೀರರಾಜ, ಅಂವಂಡ ಪೊಣ್ಣಾ, ಲಿಂಗರಾಜನ ಕುಕ್ಕೇಲ್ ಅಳಪ್ಪಾಚಿಟ್ಟಂಡ್ ರಭಸತ್ ಕೊಡಗಾರ ಬರಿಯ ನಡಂದತ್. ಅಕ್ಕ ಅಪ್ಪಾಜಿರ ಕೈಲ್ ಕುಳ್ಳಿ ಇಂಜತ್.

ಕೋಟೆಂಜ ಚೆನ್ನಂಗ ದೂರತ್ ಪಾರಕಾರಡ ಉಕ್ಕಡ ಇಂಜತ್. ಅದೊಂಡ ಪಕ್ಕ ಪೋಪಕ ಅಪ್ಪಾಜಿರ ಕೈಲ್ ಇಂಜ ಕುಳ್ಳಿ ಎಚ್ಚರ ಆಯಿತ್ ಮೊರಾಡುವ ಕೂಡಚಿ. ಆ ಪರಿಸ್ಥಿತಿ ಪೇರ್ತ್ ಕಷ್ಟ ಆಯಿತಿಂಜತ್. ಎನ್ನಂಗಣ್ಣಕ ವೀರರಾಜೇಂದ್ರಂಡ ಪೊಣ್ಣಾ ಕುಕ್ಕೇಂಜ ಇಳಂಜಿತ್ ಕುಳ್ಳಿನ ಸಮಧಾನ ಮಾಡುವನ್ನೆ ಇಂಚಾಲೆ. ಕುಳ್ಳಿರ ಮೊರೆ ಅಕಸ್ಮಾತ್ ಉಕ್ಕಡತ್ ಉಳ್ಳ ಪಾರಕಾರಕ್ ಕೇಟ್ಪೋನಕ ತಂಗಡ ಪ್ರಯತ್ನ ಎಲ್ಲ ಮಣ್ಣಾಯಿಪೋಪ ಎಣ್ಣುವ ಪೋಡಿ ಸುರುವಾಚಿ! ಅಕ್ಕ ಇಸ್ಮಾಯಿಲ್ ಖಾನ್, ಹೊಂಬಾಳೆ ನಾಯಕ ಅಲ್ಲಿಯೆ ಇಂಜತ್. ವೀರರಾಜೇಂದ್ರಂಗ್ ಆ ಕಷ್ಟ ಪರಿಸ್ಥಿತಿಂಜ ತಪ್ಪಾಚಿಟ್ಟವಕ್ ಬೋರೆ ಬಟ್ಟೆ ಕಾಂಗತೆ ಆ ಕುಳ್ಳಿನ ಕತ್ತಿಲ್ ಕೆತ್ತಿತ್ ಇಡುವನ್ನೆ ಎಣ್ಣಚಿ.

ಅಕ್ಕ ಹೊಂಬಾಳೆ ನಾಯಕ, ಇಸ್ಮಾಯಿಲ್ ಖಾನ್ ಪಕ್ಕ ಪೋಯಿತ್ ಅಂವಂಡ ಕೆಮಿಕ್ ಎಂತೊ ಎಣ್ಣಚಿ. ಇಸ್ಮಾಯಿಲ್ ಖಾನ್ ಕುಶಿ ಆನನ್ನೆ ಕಂಡ್ ಬಾತ್. ಕೂಡೆನ್ನೆ ಅಂವ ರಾಜಂಡ ಕುಳ್ಳಿನ ಅಪ್ಪಾಜಿರ ಕೈಯಿಂಜ ಎಡ್ತಂಡ್, ತಾನೆ ಎಡ್ತಂಡ್ ತಾನ್ ಪೊಲಾತಂಡಿಂಜ ಚೆಕ್ಕೇರ ಬಟ್ಟೆಲ್ ಕುಳ್ಳಿನ ಸುತ್ತಿ ಪುಡಚಂಡತ್.

ಈಂಡೆಡೆಲ್ ರಾಜಪರಿವಾರ ದುಂಬ ಸ್ವೀಡಲ್ ಪೋಯಿತ್ ಮೈಸೂರ್ ತೆರಿ ದಾಟಿಯಂಡ್ ಕೊಡಗಾಕ್ ಎತ್ತುವನ್ನೆ ಎಣ್ಣಚಿ. ಅಕ್ಕ ಅಯಿಂಗಳ ಪೊರತಂಡ್ ಇಂಜ ಹೊಂಬಾಳೆ ನಾಯಕ ಸ್ವೀಡಲ್ ನಡಂದತ್. ಅಂದ್ ಬೈಟ್ ಅಯಿಂಗಳ್ ಓರ್ ಕುರುಬ

ಬಟ್ಟೆ ಕಾಟಿ ಕೊಡತಂಡ್ ಇಂಜತ್. ಇಸ್ಮಾಯಿಲ್ ಖಾನ್‌ಕ್ ಅಫೀಮ್ ತಿಂಬ ಅಭ್ಯಾಸ ಇಂಜತ್. ರಾಜ ಪರಿವಾರಕಾರ ಮಿಞ್ಲಾ ಪೋನನ್ನೆಕೆ ಅವ ತಾಂಡ ಎಂಜಿಲ್ ಚೆನ್ನಂಗ್ ಅಫೀಮ್‌ನ ತೈಚಿತ್ ಆ ಕುಞ್ಲಿಕ್ ನಕ್ಕಚಿಟ್ಟತ್. ಅಕ್ಕ ಕುಞ್ಲಿ ಮೊರ್‌ಡುವಾನ ನಿಪ್ಪಚಿಟ್ಟತ್ ಓರ್ ಗೆಳೆಗಲ್ ವರುವಕೂಡಚಿ! ಅಲ್ಲಿಂಜ ಖಾನ್ ಕುಞ್ಲಿ ನ ಬಟ್ಟೆಲ್ ತುರಟಿತ್ ತಾಂಡ ಬೆನ್ನಕ್ ಕೆಟ್ಟಿಯಂಡ್ ರಭಸತ್ ನಡಪಕೂಡಚಿ.

ಉಕ್ಕಡತರ ಪಾರಕಾರ ಎಲ್ಲ ನಲ್ಲ ವರ್‌ಕ್‌ಲ್ ಇಂಜಾನುಂಡ್ ರಾಜಪರಿವಾರಕ್ ಕಷ್ಟ ಆಯಿಲೆ. ಅವು ಕೊಡಗಕ್ ಪೋಪ ಪಶ್ಚಿಮ ದಿಕ್ಕರ ನೇರೆ ಬಟ್ಟೆಲ್ ಪೋಕತೆ ದಕ್ಷಿಣ ದಿಕ್ಕರ ದುಂಬ ಕಾಡ್ ಉಳ್ಳ ಬಟ್ಟೆಕಾಲೆ ಮಿಞ್ಲಾಕ್ ನಡಂದತ್. ಇನ್ನನೆ ನಡಂದ್ ಪೊಲಾಕ ಆಕಣೆ ಕೊಡಗರ ತೆರಿ ಎತ್ತಚಿ. ಅಲ್ಲಿ ಬೋಯಿಯ ಪಲ್ಲಕ್ಕಿನ ಬೆಚ್ಚಂಡ್ ಪಾರಕಾತಂಡ್ ಅಳಾತಿಂಜತ್.

ಆಚೇಂಗಿ, ಇಲ್ಲಿಕ್ ಎತ್ತಣೆ ರಾಣಿ ನಂಜಮ್ಮಾಜಿಕ್ ಓರ್ ಬೈಟ್ ವರ್‌ಕ್ ಇಲ್ಲತೆ ಪ್ರಯಾಣ ಮಾಡ್‌ನ ಸುಸ್ತ, ಇಞ್ಲೋರ್ ಬರಿಲ್ ತಾಂಡ ಕುಞ್ಲಿ ಇಲ್ಲತಾಚೆಲ್ಲಂದ್ ಎಣ್ಣುವ ವ್ಯಸನತ್ ಪನಿ ಬಾತ್. ಕುಞ್ಲಿಕ್ ಪಾಲ್ ಕುಡ್‌ಪಾಚಿಡತೆ ಇಂಜಾಂಗ್ ಅವಡ ಎದೆಲ್ ಪಾಲ್ ದುಂಬಿಯಂಡ್ ಪೇರ್ತ್ ಸಂಗಟ ಆಚಿ. ಅಕ್ಕ ಅವ ವಡಿಯಂಡ ಕೂಡೆ "ನಾಡ ಕುಞ್ಲಿ ನ ಕೊಲ್ಚಿಟ್ಟಿರಲ್ಲ. ಅದ್ ಪೋನಪಿಞ್ಲಾ ನಾಕೂ ಈ ಬದ್‌ಕ್ ಬೋಂಡ. ನಾನ್ ವಿಷ ಎಡ್‌ತಂಡ್ ಚೆತ್‌ಪೋಪಿ. ಆಚೇಂಗಿ, ನಾನ್ ಚಾವಾಂಗ್ ಮುಪ್ಪಡೆ ನಾಡ ಕುಞ್ಲಿರ ಚಾವುನೇಂಗಿ ನಾಕ್ ಕಾಟಿ"ಂದ್ ಗೋಳಾಡ್‌ಚಿ.

ಪೊಣ್ಣರ ತಕ್ಕ ಕೇಟಿತ್ ವೀರರಾಜೇಂದ್ರಂಡ ಕಣ್ಣೊಲೂ ನೀರ್ ದುಂಬ್‌ಚಿ. ಅವ ಹೊಂಬಾಳೆ ನಾಯಕ ಪಿಞ್ಲಾ ಇಸ್ಮಾಯಿಲ್ ಖಾನ್‌ನ ಕಾಕಿತ್ ಕುಞ್ಲಿ ನ ಎಲ್ಲಿ ಕೆತ್ತಿತ್ ಇಟ್ಟಿರಂದ್ ಕೇಟತ್.

ಹೊಂಬಾಳೆ ನಾಯಕ : ಒಡೆಯರೆ ನಂಗಳ ಮಾಪ್ ಮಾಡೊಂಡು. ನಂಗ ನಿಂಗ ಎಣ್ಣನ್ನೆಕೆ ಮಾಡ್‌ಲೆ.

ವೀರರಾಜೇಂದ್ರ : (ಆಶ್ಚರ್ಯತ್) ಎಂತ ಕುಞ್ಲಿ ನ ಕೊಂದ್‌ಲಿಯ? ಅಂದಕ ಕುಞ್ಲಿ ನ ಎಂತ ಮಾಡಿರ?

ಇಸ್ಮಾಯಿಲ್ ಖಾನ್ : ಒಡೆಯರೆ ಸಮಧಾನ ಮಾಡಿಯೋಳಿ. ನಾನೂ, ಹೊಂಬಾಳೆ ನಾಯಕ ಗೇನ ಮಾಡಿತ್ ಕುಞ್ಲಿಕ್ ಚೆನ್ನಂಗ್ ಅಫೀಮ್ ಕೊಡತಿತ್ ವರ್‌ಕೂಟಾಚಿ. ಅದ್ ಇಕ್ಕಲೂ ವರಿಯಂಡೆ ಉಂಡ್.

ವೀರರಾಜೇಂದ್ರ : ಎಂತ ಕುಳ್ಳಿ ಇಲ್ಲಿಯೆ ಉಂಡಾ?ಂದ್ ಕೇಕಣೆ ರಾಣಿ ನಂಜಮ್ಮಾಜಿ ಉದ್ದೇಗತ್ ನಾಯಕರೆ, ನಾಡ ಮೋವಳ ನಾನ್ ನೋಟೊಂಡು. ಎಡ್ತಂಡ್ ಬಾರಿ. ಖಾನ್ ಸಾಹೇಬರೆ ಕುಳ್ಳಿನ ತಾರಿಂದ್ ಗೆಟ್ಟಿ ಆಯಿತ್ ಕೂತ್‌ಟ್ಟತ್.

ಅಕ್ಕ ಇಸ್ಮಾಯಿಲ್ ಖಾನ್ ಬಟ್ಟೆಲ್ ಬೆಕ್ಕೆಲ್ ತುರ್‌ಟಿತಿಂಜ ಕುಳ್ಳಿನ ರಾಜಂಡ ಕೈಕ್ ಕೊಡ್‌ತತ್. ಆ ಕುಳ್ಳಿಕ್ ಇಘ್ಲಾ ಅಫೀಮ್‌ರ ಮಂಕ್ ಮನಾರ ಆಯಿತ್ ಬುಟ್ಟಿತಿಂಜ್‌ಲೆ. ರಾಜಂಡ ಕೈಕ್ ಕುಳ್ಳಿ ಬಂದನ್ನೆಕೆ ರಾಣಿ ಅಲಾಂಬಲ್‌ಲ್ ಅದ್‌ನ ಎಡ್‌ತಂಡ್, ಪಲ್ಲಕ್ಕಿಲ್ ಅಳಾತಂಡ್ ಪಾಲ್ ಕುಡ್‌ಪಾಚಿಡುವ ಕೂಡ್‌ಚಿ. ಕುಳ್ಳಿ ಆರಾಮ್‌ಲ್ ಪಾಲ್ ಕುಡ್‌ಚಿತ್ ಚೆನ್ನಂಗ್ ನೇರತ್ ಮೊರ್‌ಡುವ ಕೂಡ್‌ಚಿ. ಅಕ್ಕ ಅಲ್ಲಿ ಇಂಜಯಿಂಗಕೆಲ್ಲ ದುಂಬ ಕುಶಿ ಆಚಿ.

ಈ ಕುಶಿರ ನೇರತ್ ರಾಣಿ, ವೀರರಾಜೇಂದ್ರಂಡ ಕೂಡೆ "ನೋಟಿ ಅಣ್ಣ ಇಸ್ಮಾಯಿಲ್ ಖಾನ್ ಪಿಘ್ಲಾ ಹೊಂಬಾಳೆ ನಾಯಕಂಡ ಉಪಕಾರತ್‌ನ ನಂಗ ಜಿಂವತ್ ಇಕ್ಕಣೆ ಮರ್‌ಪನ್ನೆಕೆ ಇಲ್ಲೆ. ಆನಗುಂಡ್ ನಿಂಗಡ ರಾಜ್ಯತ್‌ನ ನಿಂಗ ಗೆದ್ದಪಿಘ್ಲಾ ಇಯಂಗ ದಂಡಾಳೊಕೂ ಬಲ್ಯ ಅಧಿಕಾರ ಕೊಡ್‌ಕೊಂಡು ಪಿಘ್ಲಾ ಭೂಮಿನ ಜಹಗೀರಾಯಿತ್ ಕೊಡ್‌ಕೊಂಡೂ"ಂದ್ ಎಣ್ಣೆಚಿ.

ಅಕ್ಕ ವೀರರಾಜೇಂದ್ರ "ಇವು ದಂಡಾಳೊ ನಾಡ ಒಡಹುಟ್ಟ್ ಇಂಜನ್ನೆಕೆ. ಇಯಂಗಕ್ ಎಂತ ಕೊಡ್‌ತಕೊ ಇವು ನಂಗಕ್ ಮಾಡ್‌ನ ಉಪಕಾರಕ್ ಅದ್ ಚೆನ್ನಂಗ್. ನಾನ್ ನಾಡ ರಾಜ್ಯತ್‌ನ ಸುಲ್ತಾನಂಡ ಅಧಿಕಾರತ್‌ಂಜ ಬಲ್‌ಚೆಂಡಪಿಘ್ಲಾ ಇಯಂಗಕ್ ಅಧಿಕಾರ ಸ್ಥಾನ ಪಿಘ್ಲಾ ಜಹಗೀರ್ ಭೂಮಿನ ಕೊಡ್‌ಪಿ"ಂದ್ ಪೊಣ್ಣಾರ ಕೂಡೆ ಎಣ್ಣೆಚಿ.

ವೀರರಾಜೇಂದ್ರ ಪಿಘ್ಲಾ ಅವಂಡ ಪರಿವಾರ ಬಾಣಾವಾರ, ಪತ್ತೆಗಟ್ಟ್, ನಗರ, ಪೊಳೆ, ಕಾಡ್ ದಾಟಿತ್ ಅಂದ್ ಒಯಿಪತ್ ಕೊಡಗಲ್ ಹಾಲೇರಿ ರಾಜಂಡ ಸ್ವಂತ ಭೂಮಿ / ಪನ್ನತ್ ದಕ್ಷಿಣತ್ ಆಖೀರಿಯಾನ ಶ್ರೀಮಂಗಲ ನಾಡ್‌ರ ಕುರ್ಚಿ ಪನ್ನಕ್ ಎತ್ತ್‌ಚಿ. ಆನಗುಂಡ್ ಪಾರ ಪರಿವಾರಕ್ ಇಲ್ಲಿ ಶತ್ರುವಳುಂಡ್ ಒಮ್ಮೆ ತೊಂದರೆ ಆಪ ಎಣ್ಣುವ ಪೋಡಿ ಇಂಜ್‌ಲೆ. ಬ್ರಹ್ಮಕುಂದ್‌ರ ಮೊರ್‌ಡಲ್ ಓರ್ ಸಾಧಾರಣ ಅರಮನೆಲ್ ವೀರ ರಾಜೇಂದ್ರ, ಅವಂಡ ಪೊಣ್ಣ್ ಪಿಘ್ಲಾ ಕುಟುಂಬಕಾರ ಚೆನ್ನಂಗ್ ಸಮಯ ಇಂಜತ್.

ಹೊಂಬಾಳೆ ನಾಯಕ, ಇಸ್ಮಾಯಿಲ್ ಖಾನ್ ಪೆರಿಯಾಪಟ್ಟತ್‌ಂಜ ತಾನ್ ಪಿಘ್ಲಾ ತಾಂಡ ಪರಿವಾರ ತಪ್ಪಾಚಿಟ್ಟಿಂಡ್ ಬಪ್ಪಕ್ ಸಹಾಯ ಮಾಡ್‌ನಾಂಗ್ ಪಿಘ್ಲಾ ತಾಂಡ ಕುಳ್ಳಿನ ಕೊಲ್ಲತೆ ಉಳ್‌ಚಿಟ್ಟಾಂಗ್, ವೀರರಾಜೇಂದ್ರ ತಾನ್ ಟಿಪ್ಪುಸುಲ್ತಾನಂಡ

ಪುಡ್ತತ್‌ಂಜ ಕೊಡಗುನ ಬುಡ್‌ತಿಯಂಡ್ ರಾಜ್ಯತ್‌ನ ತಾಂಡ ಪುಡ್‌ತಕ್ ಎಡ್‌ತಂಡಪಿಳ್ಳಾ ಅಯಿಂಗಕ್ ಭೂಮಿನ ಜಹಗೀರಾಯಿತ್ ಕೊಡ್‌ತತ್.

ಹೊಂಬಾಳೆ ನಾಯಕಂಗ್ ಕಾಂತೂರ್ ಮೂರ್ನಾಡ್‌ಲ್ ಬೋನಿರ ಮುತ್ತಣ್ಣಂಡ ಸಂತಾನ ನಿರ್ವಂಶ ಆನಪಿಳ್ಳಾ ಪಾಳ್ ಬುದ್ಧಿತಿಂಜ ದಂಡಾಯಿರ ಬಟ್ಟಿ ಭೂಮಿನ ಜಹಗೀರ್ ಆಯಿತ್ ಕೊಡ್‌ತತ್. ಅನ್ನನೆ ತಾಂಡ ಓರ್ ದಿವಾನ ಆಯಿತ್ ನೇಮಕ ಮಾಡ್‌ಚಿ. ಈ ಭೂಮಿ ಅಂವಂಗ್ ಪುತ್ರ ಪೌತ್ರ ಪಾರಂಪರ್ಯ ಆಯಿತ್ ಕೊಡ್‌ತದ್ ಇಂದೇಕೂ ಹೊಂಬಾಳೆ ನಾಯಕಂಡ ಆರನೆ ಸಂತಾನಕಾರ ಅದ್‌ನ ಅನುಭವಿಚಿಟ್ಟಿಂಡ್ ಬಂದಂಡ್ ಉಂಡ್.

ರಾಜ ಇಸ್ತಾಯಿಲ್ ಖಾನ್‌ಕ್ ಬೊಟ್ಟಿಯತ್ತಾಡ್ ಕುಂದತ್ ಆಯಿರ ಬಟ್ಟಿ ಭೂಮಿನ ಪುತ್ರ ಪೌತ್ರ ಪಾರಂಪರ್ಯ ಆಯಿತ್ ಜಹಗೀರ್ ಕೊಡ್‌ತತ್. ಕಾಲಕ್ ನೂರ್ ಕಂಠೀರಾಯಿ ಪಣತ್‌ನ ದಿವಾನ್ ಕಚೇರಿಂಜ ಪಡ್‌ಂದವನ್ನೆಕೆ ಮಾಡ್‌ಚಿ. ಈ ಕುಟುಂಬಕಾರಕ್ ಕಾರಣಾಂತರತ್ ಕಂಠೀರಾಯಿ ಪಣ ಖಜಾನೆಂಜ ಬಪ್ಪದ್ ನಿಂದ್ ಪೋನಕೊ ಜಹಗೀರ್ ಭೂಮಿ ಆ ಒಕ್ಕಕಾರಡ ಅನುಭವತ್ ಇಕ್ಕಲೂ ಉಂಡ್. ಇಕ್ಕ ಇಸ್ತಾಯಿಲ್ ಖಾನ್‌ರ ಆರನೆ ಸಂತಾನಕಾರ ಉಂಡ್.

ವೀರರಾಜೇಂದ್ರ ಕುರ್ಚಿ ಪನ್ನ ಎತ್ತನಪಿಳ್ಳಾ ಅಲ್ಲಿ ಇಂಜ ಓರ್ ಬಲ್ಮಮನೆಲ್ ಚೆನ್ನಂಗ್ ಕಾಲ ವಾಸ ಇಂಜತ್. ತಂಗಡ ರಾಜ ಜೈಲ್‌ಂಜ ತಪ್ಪುಚಿಟ್ಟಿಂಡ್ ಬಂದ ಸುದ್ದಿನ ಕೇಟಿತ್, ಕುಂದ್ ಕಾಡ್ ಕೂಡಿತ್ ಕಪ್ಪತ್ ಬದ್‌ಕ್ ನಡ್‌ತಿಯಂಡ್ ಇಂಜ ಕೊಡಗುರ ಜನ ಕುರ್ಚಿ ಅರಮನೆಕ್ ಬಂದಿತ್ ತಂಗಡ ರಾಜಂಗ್ ಸಹಾಯ ಮಾಡುವಕ್ ಸುರುಮಾಡ್‌ಚಿ.

ಈ ನೇರತ್ ಕೊಡಗುಕ್ ದಕ್ಷಿಣಕ್ ತಾಂಗಿಯಂಡನ್ನೆಕೆ ಉಳ್ಳ ವೈನಾಡ್ ತಿರ್‌ನೆಲ್ಲಿಲ್ ಪೆರ್‌ಮಾಳ್ ದೇವಡ ತಿರಿಕೆರ ಮುಖ್ಯಸ್ಥಂಗ, ಆಡಳಿತ ಮಂಡಳಿಕಾರ ಆಯಿತ್ ಓರ್ ಕುಟುಂಬಕ್ ಸೇರ್‌ನ ದಂಡ್ ಮನೆರ ಯಜಮಾನ ಇಂಜತ್. ಈ ದಂಡ್ ಮನೆಕಾರಕ್ ಯಜಮಾನಿಕೆ ಇಂಜಂಡ್ ಅವು ಪ್ರಭಾವಿ ಜಮೀನ್ದಾರಂಗ ಆಯಿತಿಂಜತ್. ಈ ದಂಡ್ ಯಜಮಾನಂಗಕ್ ಅಯಿಂಗಡ ಮನೆರ ಎದಿಕೆ ಇಂಜ ದಿಕ್ಕುಕೊತ್ತಿತ್ ಬಡಗ ಮೂತಣ್ಣ ಪಿಳ್ಳಾ ತೆಂಕಮೂತಣ್ಣಂದ್ ಕಾಕುವ ಇಂಜತ್. ಮಲಯಾಳತ್ ಮೂತಣ್ಣ ಎಣ್ಣೆಕ ಬಲ್ಮಂವ, ಪೆರಿಯ ಅಣ್ಣಂದ್ ಅರ್ಥ. ದಾಯಾದಿಯ ಆಯಿತಿಂಜ ಈ ದಂಡ್ ಮನೆಲ್ ಅಪ್ಪರಿಪ್ಪರ ಪಗೆ ಇಂಜತ್.

ಶ್ರೀಮಂಗಲ ನಾಡ್‌ರ ಜನ ಪೆರ್ಮಾಳ್ ದೇವಡ ತಿರಿಕೆಕ್ ಕಾಲತಾರ ನಮ್ಮೆರ ನೇರತ್



ಪೂಜೆ ಮಾಡ್‌ಚಿಡುವ. ಮಲಯಾಳತರ ಪೆರ್ಮಾಳ್ ಸಂಸ್ಕೃತ ತಕ್ಕಾಲ್ ಪುರುಷೋತ್ತಮ ಎಣ್ಣುವ ಅರ್ಥ ತಪ್ಪ. ಕೊಡವ ಪೆರ್ಮಾಳ್ ಎಣ್ಣುವಾನ 'ಪೆಮ್ಮಯ್ಯ'ಂದ್ ಕೊಡವ ತಕ್ಕಾಲ್ ಕಾಕುವ.

ಕೊಡವ ಕೆಟ್ಟಕತೆರ ಪೋಲೆ ತಿರ್‌ನೆಲ್ಲಿ ಪೆರ್ಮಾಳ್ / ಪೆಮ್ಮಯ್ಯ, ಕೊಡವ ಪೂಜೆ ಮಾಡುವ ಬೈತೂರಪ್ಪ, ಇಗ್ಗುತ್ತಪ್ಪ, ಪಾಲೂರಪ್ಪ ದೇವಡ ಸೋದರ ದೇವ ಆನಗುಂಡ್ ತಿರ್‌ನೆಲ್ಲಿಕ್ ಪಕ್ಕತೆ ಉಳ್ಳ ಕೊಡಗ್ಗರ ಜನ ಈ ದೇವಕ್ ತಂಗಡ ಪೂಜೆ ಪರಿಕೆನ ಒಪ್ಪಿಚಿಡುವ. ಇನ್ನನೆ ತಿರ್‌ನೆಲ್ಲಿಕ್ ಎರ ಕಣಕ್‌ಲ್ ಶ್ರೀಮಂಗಲ ನಾಡ್‌ಂಜ ಜನ ಬಂದಂಡ್ ಇಂಜಾನುಂಡ್ ಅಲ್ಲಿಯತ ತಿರಿಕೆರ ಮುಕ್ರಿಯಳಾನ ದಂಡ್ ಮನೆರ ಮೂತಣ್ಣಂಡ ಪ್ರಭಾವ ಶ್ರೀಮಂಗಲ ನಾಡ್‌ಕಾರಡ ಮೀದ ವೀರರಾಜೇಂದ್ರಂಡ ಕಾಲತ್ ಇಂಜತ್.

ಆನಗುಂಡ್ ವೀರರಾಜೇಂದ್ರ ಒಡೆಯ ತಾಂಡ ಸ್ವಾತಂತ್ರ್ಯತನ ಕಾಪಾಡಿಯವಕ್, ತಾಂಡ ರಾಜ್ಯತನ ಸುಲ್ತಾನನುಂಡ್ ಗೆದ್ದವಕ್ ತಿರ್‌ನೆಲ್ಲಿ ಮೂತಣ್ಣ ದಾಯಾದಿಯಡ ಸಹಾಯ ಬಯಂದತ್. ಇಯಂಗಡಾತ್ ಬಡಗ ಮೂತಣ್ಣಂಡ ಪಕ್ಕ ಎರ ಕಣಕ್‌ಲ್ ಮುಳ್ಳ ಕುರುಬಂಗ ಇಂಜತ್. ಅನ್ನನೆ ಕೊಡಗ್ಗರ ಜನಳೂ ಇಂಜತ್. ತೆಂಕ ಮೂತಣ್ಣಂಡ ಜನಕಿಂಜ ಬಡಗ ಮೂತಣ್ಣಂಡ ಪಕ್ಕ ಎರ ಜನ ಇಂಜಾನುಂಡ್ ವೀರರಾಜೇಂದ್ರ ಆದ್ಯ ಬಡಗ ಮೂತಣ್ಣಂಡ ಸಹಾಯ ಕೇಟತ್.

ಅಕ್ಕ ಬಡಗ ಮೂತಣ್ಣ ವೀರರಾಜೇಂದ್ರಂಡ ಬೋಡಿಕೆಕ್ ಮನ್ನಣೆ ಕೊಡ್‌ತಿತ್ ತಾಂಡ ಮುಳ್ಳ ಕುರುಬದ ಸೈನ್ಯತನ ಅರಮನೆ ಪಾರಕ್‌ಂದ್ ಕುರ್ಚಿ ಪನ್ಯಕ್ ಅಯೆಚತ್. ತೆಂಕ ಮೂತಣ್ಣ ವೀರರಾಜೇಂದ್ರ ತನ್ನ ಕಮ್ಮಿ ತರತ್ ಕಂಡತ್, ತಾಂಡ ಸಹಾಯ ಕೇಟಲೇಂದ್ ಚೆಡ್‌ಂಜಂಡ್ ವೀರರಾಜೇಂದ್ರಂಡ ವಿರುದ್ಧ ಪಡೆ ಪೊತ್ತತ್. ಸುಲ್ತಾನಂಡ ಪುಡ್‌ತತ್ ಇಲ್ಲತ ದ. ಕೊಡಗ್ಗರ ನಾಡ್‌ನ ವಶ ಪಡ್‌ತಿಯವನ್ನಕೆ ಮಲಬಾರ್ ಕೋಟೆ ವೀರವರ್ಮ ರಾಜಂಡ ಕೂಡೆ ಒಳಿಯ ಕೇತರೆ ಮಾಡ್‌ಚಿ. ಕೋಟೆ ವೀರವರ್ಮ ರಾಜಂಗ್ ಈ ಸೂಚನೆ ದುಂಬ ನಲ್ಲದಾಯಿತ್ ಕಂಡತ್.

ನಾಗಪ್ಪಯ್ಯ, ಟಿಪ್ಪುಸುಲ್ತಾನ ಕೊಡಗ್ಗಲ್ ನೆಲೆ ನಿಪ್ಪಕ್ ಅಯೆಚ ಅದವಾನಿ ರೈತಂಗಡ ವಿರ್ಚಿಕ್ ಕೊಡ್‌ತ ಪಣತ್‌ನ ತಾನೆ ಬೆಚ್ಚಂಡ್ ಸುಲ್ತಾನಂಡ ಚಡಿಕ್ ಗುರು ಆಯಿತ್ ದೇಶ ಬುಟ್ಟಿತ್ ಕೋಟೆ ರಾಜಂಡ ಪಕ್ಕ ಪೋಯಿತಿಂಜತ್. ಕೋಟೆರಾಜ ಇಂವಂಡ ಸಹಾಯಕ್ ಕೊಡ್‌ತ ನಾಯಮ್ಮಾರ್ ಪಿಳ್ಳಾ ರಾಜಂಡ ಪನ್ಯತರ ಪೊಲೆಯಂಗ ಇಯಂಗಳ ಕೂಟಿಯಂಡ್ ತಿರಿತ್ ಕೊಡಗ್ಗಕ್ ಬಂದಿತ್ ಅದವಾನಿ ರೈತಡ ಮನೆಮಾರ್‌ನ ಸುಲಿಗೆ

ಮಾಡಿಯಂಡ್ ತಾಂಗ್ ವಿರೋಧ ಮಾಡ್‌ನಯಿಂಗಳ ಪೊಜ್ಜಿತ್ ಹಿಂಸೆ ಪಡ್‌ತನದ್ ಗೊತ್ತುಂಡ್. ಕೋಟೆ ವೀರವರ್ಮ, ರಾಜ ನಾಗಪ್ಪಯ್ಯನುಂಡ್ ವೀರ ರಾಜೇಂದ್ರ ಜೈಲ್‌ಂಜ ತಪ್ಪಾಚಿಟ್ಟಂಡ್ ಕೊಡಗ್ ಬಂದ ಸುದ್ದಿನ ಅರ್‌ಂಜಡತ್. ಅಕ್ಕ ಅಂವ ನಾಗಪ್ಪಯ್ಯಂಡ ಮೂಲಕ ವೀರರಾಜೇಂದ್ರನ ಪೂಸಿ ಮಾಡಿತ್ ಅಂವನ ತಾಂಡ ಸೀಮೆಕ್ ಬಪ್ಪಾಚಿಡೊಂಡೊಂದ್ ಅಲ್ಲಿ ಅಂವಂಡ ಮೀದ ಒರಾತ ಕೊಂಡ ಬಂದಿತ್ ಅಂವನುಂಡ್ ಕೊಡಗರ ಚೆನ್ನಂಗ್ ನಾಡ್‌ನ ತಾಂಡದಾಕಿಯವಂಡೊಂದ್ ಗೇನ ಮಾಡ್‌ಚಿ. ಇದ್‌ಂಗಾಯಿತ್ ವೀರರಾಜೇಂದ್ರನ ತಾಂಡ ಸೀಮೆಕ್ ಕೊಟಿಯಂಡ್ ಬಪ್ಪಕ್ ನಾಗಪ್ಪಯ್ಯಂಡ ಕೂಡೆ ಎಣ್ಣೆತ್ ಅಯೆಚತ್.

ನಾಗಪ್ಪಯ್ಯ ದುಂಬ ಬುದ್ದಿವಂತಿಕೆ ಉಳ್ಳಂವ. ಕೆಣಿಯ. ಅಂವ ವೀರರಾಜೇಂದ್ರಂಡ ಪಕ್ಕ ಬಂದಿತ್ "ನಿಂಗ ನಂಗಡ ರಾಜ್ಯಕ್ ಬಂದ ಸುದ್ದಿನ ಕೋಟೆ ರಾಜಂಗ ಕೇಟಿತ್ ದುಂಬ ಕುಶಿ ಪಟ್ಟಿತ್. ನಿಂಗಳ ಕಾಂಬಕ್ ಆಯಿಂಗ ಪಾರ ಕಾತಂಡ್ ಉಂಡ್. ಕೋಟೆ ರಾಜ ವೀರರಾಜೇಂದ್ರಂಗ್ ಸೈನ್ಯ ಸಹಾಯ ಮಾಡೊಲೊ"ಂದ್ ಎಣ್ಣೆಚಿ. ವೀರರಾಜೇಂದ್ರ ಇಣ್ಣೊ ಚೆರಿಯಂವ ಆಯಿತಿಂಜತ್. ಅಂವಂಗ್ ನಾಗಪ್ಪಯ್ಯಂಡ ಪೋಸ ಗೊತ್ತಾಯಿಲೆ. ಆನಗುಂಡ್ ನಾಗಪ್ಪಂಡ ತಕ್ಕನ ನಂಬಿತ್ ವೀರರಾಜೇಂದ್ರ ಅಂವಂಡ ಕೂಡೆ ತಾಂಡ ಆಪ್ತಂಗಳ ಮಾತ್ರ ಕೊಟಿಯಂಡ್ ಕುಂದ್ ಇಳ್‌ಂಜಿತ್ ಕೋಟೆ ರಾಜಂಡ ಸೀಮೆಕ್ ಪೋಚಿ. ನಾಗಪ್ಪಯ್ಯ ವೀರರಾಜೇಂದ್ರನ ಕೋಟೆರಾಜಂಡ ಸೀಮೆರ ಅರಳ ಎಣ್ಣೊವ ಊರ್‌ಕ್ ಬಂದಿತ್ ಓರ್ ಮನೆಲ್ ಇಪ್ಪನ್ನಕೆ ಎಣ್ಣೆತ್ ವೀರರಾಜೇಂದ್ರ ಅರಳಕ್ ಬಂದ ಸುದ್ದಿನ ಅರ್‌ಚಿಡುವಕ್ ಕೋಟೆ ರಾಜ ಇಂಜ ಪಾಲೆ ಎಣ್ಣೊವಲ್ಲಿಕ್ ಪೋಚಿ.

ಕೋಟೆರಾಜಂಗ್ ವೀರರಾಜೇಂದ್ರ ತಾಂಡ ಬಲೆಕ್ ಬುದ್ದದ್ ಗೊತ್ತಾಯಿತ್ ಪೇರ್ತ್ ಕುಶಿ ಆಚಿ. ವೀರರಾಜ ಅರಳತ್‌ಂಜ ತಪ್ಪಾಚಿಟ್ಟಂಡ್ ಪೋಕತನ್ನಕೆ ಪಾರ ಇಂಜತ್. ಆಚೇಂಗಿ, ಕಾಂಬನ್ನಕೆ ವೀರರಾಜೇಂದ್ರಂಡ ಸಪೋರ್ಟ್‌ಕ್ ನಿಂದಿತ್ ತಾಂಡ ನಾಯರ್ ಸೈನಿಕಂಗಡಾತ್ ಐಂಬದ್ ಜನಳ ವೀರರಾಜೇಂದ್ರ ಇಂಜ ಅರಳ ಊರ್‌ರ ಸುತ್ತು ಪಾರ ನಿಪ್ಪಾಚಿಟ್ಟಿತ್.

ಅರಳ ಊರ್‌ಲ್ ವೀರರಾಜೇಂದ್ರ, ಕೋಟೆ ರಾಜನ ಕಾಂಬಕ್ ಬಪ್ಪಿ, ಎಕ್ಕ ಬರಡ್‌ಂದ್ ಎಣ್ಣೆತ್ ಅಯೆಚಕೊ ಕೋಟೆ ರಾಜನುಂಡ್ ಜವಾಬ್ ಬಂದ್‌ಲೆ. ವೀರರಾಜೇಂದ್ರಂಗ್ ತಾನ್ ವಾಸ ಉಳ್ಳ ಜಾಗತ್‌ನ ಬುಟ್ಟಪೋಪ ಸ್ವಾತಂತ್ರ್ಯ ಇಂಚ್‌ಲೆ. ನಾಗಪ್ಪಯ್ಯನೆ ವೀರರಾಜೇಂದ್ರನುಂಡ್ ಕೋಟೆ ರಾಜಂಗೂ, ಅಂವನುಂಡ್ ವೀರ ರಾಜೇಂದ್ರಂಗೂ ಸುದ್ದಿ ಅಯೆಕೊಂಡಿಂಜತ್. ನಾಗಪ್ಪಯ್ಯ ಒಂದಾನಪಿಣ್ಣ ಇಣ್ಣೋರ್ ನೆಂವನ ಎಣ್ಣೆಯಂಡ್ ಖುದ್ ಕಾಂಬ ದಿನತ್‌ನ ಮಿಣ್ಣಕ್ ತೆರ್‌ಕಿಯಂಡೆ ಇಂಜತ್. ವೀರ

ರಾಜೇಂದ್ರಂಗ್ ತಾನ್ ಮೋಸತ್ ಕೆಣ್ಂಜಿ ಬುದ್ದಂದ್ ಚಾಯಿತೆ ಅರ್ಥ ಆಚಿ.

ಇಚ್ಚಕ್ ಆಕಣೆ ವೀರ ರಾಜೇಂದ್ರ ಅರಳಕ್ ಬಂದಲ್ಲಿಂಜ ಪದಿನಂಜಿ ದಿನ ಕೈಂಜಿ ಪೋಯಿತಿಂಜತ್. ಈ ನೇರತ್ ಆಖೀರತ್ ಕುರ್ಚಿಲ್ ರಾಜ ಕುಟುಂಬತ್ ಪಾರಕ್ ಇಂಜ ಕೊಡಗುರ ಜನ ವೀರ ರಾಜೇಂದ್ರಂಗ್ ಬಂದಿತ್ "ಟಿಪ್ಪು ಸುಲ್ತಾನ ವೀರರಾಜೇಂದ್ರನ ತೇಡಿತ್ ಪುಡಿಪಾಂಡ ಮೀದ ತಾಂಡ ಸೈನಿಕಂಗಳ ಕೊಡಗುಕ್ ಅಯೆಚತ್" ಎಣ್ಣುವ ಓರ್ ವರ್ತಮಾನತ್‌ನ ಎಣ್ಣಚಿ. ಅಕ್ಕ ವೀರರಾಜೇಂದ್ರ ಕೋಟೆ ರಾಜಂಗ್ "ನಂಗಳ ತೇಡಿ ಪುಡಿಪಕ್ ಟಿಪ್ಪುರ ಸೈನ್ಯ ಬಂದಂಡ್ ಉಂಡ್. ನಂಗ ಇಲ್ಲಿಕ್ ಬಂದಿತ್ 20 ದಿನ ಆಚಿ. ಇಕ್ಕ ನಂಗಳ ಬುಟ್ಟಕ ನಂಗ ನಂಗಡ ಮಕ್ಕಡ ಪಕ್ಕ ಪೋಯಿತ್ ಅಯಿಂಗಳ ನಲ್ಲ ಜಾಗತ್ ಆಕಿತ್ ಪುನಾದಿಯ ಇಲ್ಲಿಕ್ ನಿಂಗಡ ಪಕ್ಕ ಬಪ್ಪ"ಂದ್ ಎಣ್ಣಿತ್ ಅಯೆಚತ್.

ಇದ್‌ಂಗ್ ಜವಾಬ್ ಆಯಿತ್ ಕೋಟೆ ಅರಸ, ನಾಗಪ್ಪಯ್ಯಂಡ ಕೂಡ "ನಿಂಗಡ ಪೆರಿಯ ಅಜ್ಜನಾನ ದೊಡ್ಡ ವೀರಪ್ಪ ಒಡೆಯ ನಂಗಡ ಪೆರಿಯ ಕಾರಣಂಗಡಾತ್ ಒಬ್ಬನ ಕೊಂದಿತ್‌ಟ್ಟಿತ್. ಇದ್‌ಂಗ್ ನಿಂಗ ಮಂಡೆಕ್ ಮಂಡೆ ಕೊಡ್ತದೆ ಅಲ್ಲತೆ ನಿಂಗಳ ಮುದ್ದಾ ಕಂಡಾಲೆ"ಂದ್ ಎಣ್ಣಿತ್ ಅಯೆಚತ್.

ಈ ತಕ್ಕಕ್ ವೀರರಾಜೇಂದ್ರ "ಇಕ್ಕ ನೂರ್ ಕಾಲಕ್ ಮುಪ್ಪಡೆ ನಿಂಗಡ ಪೆರಿಯವು ನಂಗಡ ಪೆರಿಯಯಿಂಗಡ ಕೂಡ ಜಗಳ ಮಾಡಿತ್ ತೋಮರತ್ ಚತ್ ಪೋಚಿ. ಅದ್‌ಂಗ್ ಬದಲಾಯಿತ್ ಮಂಡೆ ತರೊಂಡು ಎಣ್ಣಕ ಎಂತ ಮಾಡುವ? ನಂಗ ನಿಂಗಡ ತಕ್ಕನ ನಂಬಿತ್ ಬಂದಿತ್ ಇಕ್ಕ ಕೆಣ್ಂಜಿತ್. ತಂಗ ಪಾಪ, ಪುಣ್ಯತ್‌ನ ಅರೊಂಜವು ಅಲ್ಲ"ಂದ್ ನಾಗಪ್ಪಯ್ಯಂಡ ಕೂಡ ಎಣ್ಣಿತ್ ಅಯೆಚತ್.

ನಾಗಪ್ಪಯ್ಯ ಪಿತ್ಯಾಂದ್ ತಾನ್ ವೀರರಾಜೇಂದ್ರ ಪಿಳ್ಳಾ ಕೋಟೆ ರಾಜನ ಕಂಡಿತ್ ತಕ್ಕ ಪರಾಚಿಡುವಿಂದ್ ತಕ್ಕ ಕೊಡ್ತತ್. ಪಿತ್ಯಾಂದ್ ನಾಗಪ್ಪಯ್ಯ ವೀರರಾಜೇಂದ್ರಂಡ ಪಕ್ಕ ಬಂದಿತ್ ಕೋಟೆ ಅರಸನ ಕಾಂಬ ನೇರತ್ ವೀರರಾಜೇಂದ್ರ ಸೈನ್ ಮಾಡಿತಪ್ಪಕ್ ಓರ್ ಕಾಗದ ತಪ್ಪಾಂದೂ, ವೀರರಾಜೇಂದ್ರ ಅದ್‌ಂಗ್ ಸೈನ್ ಇಡೊಂಡೊಂದೂ, ಇಲ್ಲೇಂಗಿ ವೀರರಾಜ ಕೊಡಗುಕ್ ವಾಪಾಸ್ ಪೋಪದ್ ಕಷ್ಟಂದ್ ಎಚ್ಚರಿಕೆ ಕೊಡ್ತತ್.

ವೀರರಾಜೇಂದ್ರ ತಾನ್ ಇಕ ಕೋಟೆ ಅರಸಂಡ ತಕ್ಕಕ್ ಒತ್ತವತೆ ಪೋನಕ ತಾಂಡ ಬುಡುಗಡೆ ಆಪುಲೆಂದ್ ತಾನ್ ತಾಂಡ ರಾಜ್ಯಕ್ ಪೋನಪಿಳ್ಳಾ ಎನ್ನನೆ ಬೋಂಡುವೇಂಗಿಯೂ ಮಾಡೊಲುಂದ್ ಗೇನ ಮಾಡಿತ್ ಆ ಕರಾರ್ ಪತ್ರಕ್ ಸೈನ್ ಇಟ್ಟಿತ್ ಕೊಡ್ತತ್. ಅಲ್ಲಿಂಜ ನಾಗಪ್ಪಯ್ಯ ಕೋಟೆ ಅರಸಂಡ ಅಪ್ಪಣೆಪೋಲೆ ಆ ಕರಾರ್

ಪತ್ರತನ ವೀರ ರಾಜೇಂದ್ರಂಗ್ ಓದಿತ್ ಅರಿಚಿಟ್ಟತ್. ಅದೊಂದ ವಿವರ ಇನ್ನನೆ ಇಂಜತ್.

"ಕೀಲಕ ಸಂವತ್ಸರದ ಪುಷ್ಯ ಮಾಸದಲ್ಲು ಪಾಲೆ ವೀರವರ್ಮರಾಜರಿಗೆ ಕೊಡಗಿನ ಸಂಸ್ಥಾನದ ಹಾಲೇರಿ ವೀರಪ್ಪ ಒಡೆಯರು ಬರೆಸಿ ಕೊಟ್ಟ ಕಾಗದದ ಕ್ರಮವೆಂತೆಂದರೆ ಪ್ರಾಕು ನಿಮ ಕಾರಣವರನ್ನು ನಮ ಕಾರಣವರು ಕೊಂದ ಪಾಪ ಪರಿಹಾರ ಉದ್ದಿಶ್ಯ ಪರಮಾಳು ಭಗವತಿಗೆ ನಾವು ಬಿಟ್ಟುಕೊಟ್ಟಿದ್ದು, ಕಿಗ್ಗಟ್ಟು ಹತ್ತುನಾಡು, ಅಮುತ್ತಿ ನಾಡು, ಯಡೆ ನಾಲ್ಕು ನಾಡು ನಿಮ ಕಾರಣವರು ಬಿದ್ದು ಹೋದ ತೋಮರದಲ್ಲಿ ವಂದು ಕೋಟಿಗೆ ಸ್ಥಾನ ಕೊಡುತ್ತ ಇದ್ದೇವೆ. ಈ ದಿವಸ ನಿಮ ಕುಡುಪಿ ತೀರಿತು. ಇನ್ನೂ ಮುಂದೆ ನಮಗೆ ನಿಮಗೆ ಅನ್ನೋನ್ಯವೆ ಸರಿ"ಂದ್ ಎಳ್ಳಿತಿಂಜತ್.

ಅಲ್ಲಿಂಜ ವೀರರಾಜೇಂದ್ರ ಕೋಟೆ ರಾಜಂಡ ಪುಡ್ತತ್‌ಂಜ ಬುಡ್‌ಗಡೆ ಆಯಿತ್ ತಾಂಡ ಪೊಣ್ಣ್, ಮಕ್ಕ ಇಂಜ ಕುರ್ಚಿಕ್ ಬಾತ್. ಈ ನೇರತ್ ಕುರ್ಚಿಲ್ ಇಂಜ ರಾಜ ಮನೆತನಕಾರದ ಬದ್‌ಕ್‌ಕ್ ಬೋಂಡಿಯಾನದ್ ಕೊಟ್ಟೆ ಪೇರ್ತ್ ಕಷ್ಟ ಆಯಿತಿಂಜತ್. ವೀರರಾಜೇಂದ್ರ ಪಿರಿಯಾಪಟ್ಟತ್ ಜೈಲ್‌ಲ್ ಇಪ್ಪಕ ಕೊಡಗರ ಕಾಡ್ ಸೇರಿತಿಂಜ ಅವಂಡ ಕುಟುಂಬಕಾರ ಇಕ್ಕ ಕುರ್ಚಿಕ್ ಬಂದಿತ್ ಅವಂಡ ಪರಿವಾರತನ ಕೂಡಿಯಂಡತ್. ವೀರರಾಜೇಂದ್ರ, ಕೋಟೆ ರಾಜನುಂಡ್ ತಪ್ಪಾಚಿಟ್ಟಂಡ್ ಬಂದಪಿಳ್ಳಾ ತಾಂಡ ಕುಟುಂಬತರ ಚೆನ್ನಂಗಾಳನ ಬರಪೊಳೆರ ಪಕ್ಕ ಓರ್ ಅರಮನೆಲ್ ಆಕ್‌ಚಿ.

ವೀರರಾಜೇಂದ್ರ ಕೋಟೆರಾಜಂಡ ಸೀಮೆಂಜ ಕೊಡಗ್‌ಕ್ ಬಂದಿತ್ ಪದ್‌ನಂಜಿ ದಿನ ಆಪಾಂಡ ಒಳ್‌ಲ್ ಕೋಟೆ ಅರಸ ಮುನ್ನೂರ್ ನಾಯಮಳ ತಾಂಡ ಕೂಡೆ ಕೂಟಿಯಂಡ್ ಕುಂದ್ ಪತ್ತಿ ಕೊಟ್ಟಾನಾಡ್‌ರ ಮರೆನಾಡ್‌ಕ್ ಬಂದಿತ್ ಅಲ್ಲಿ ಒಳ್‌ಂಜತ್. ಈ ಸಮಚಾರತನ ವೀರರಾಜೇಂದ್ರ ಕೇಟಿತ್ ತಾಂಡ ಸಹಾಯಕ್ ಆಯುಧ ಹತ್ಯಾರ್ ಸಮೇತ ಕೊಡಗರ ಎಲ್ಲಾ ಜನಳ ಕಾಕಿಯಂಡ್ ಬರೊಂಡೊಂದ್ ತಾಂಡ ಆಪ್ತ ಕಡಿಯತ್ ಮೂರ್ನಾಡ್‌ರ ಅಪ್ಪನೇರವನ ಅಚ್ಚಯ್ಯ ಪಿಳ್ಳಾ ಪಟ್ಟಿಚೆರವನ ಬೋಳುಕಂಗೆ ಎಣ್ಣೆತ್ ಅಯೆಚಿತ್.

ಅವು ಜನಳ ಕೂಟಿಯಂಡ್ ಬರಪೊಳೆ ಪಕ್ಕತ ಅರಮನೆಕ್ ಪೋಚಿ. ಈ ಜನ ಪಿಳ್ಳಾ ಅಲ್ಲಿಯೆ ಇಂಜ ಜನ ಒಟ್ಟು ಅಳ್ಳೂರ್ ಜನಳ ಕೂಟಿಯಂಡ್ ವೀರ ರಾಜೇಂದ್ರ ಒಡೆಯ ಮರೆನಾಡ್‌ಲ್ ಕೋಟೆರಾಜ ಇಂಜಲ್ಲಿಕ್ ಪೋಚಿ. ಅಕ್ಕ ಈ ದಂಡ್ ರಾಜಂಗಡ ಒಳ್‌ಲ್ ವಕೀಲಂಡ ಮೂಲಕ ಇನ್ನನೆ ತಕ್ಕಬಾಕ್ ನಡೊಂದತ್.

ವೀರರಾಜೇಂದ್ರ : ನಂಗಡ ಅಪ್ಪಣೆ ಇಲ್ಲತೆ ನಿಂಗ ಜನಳ ಕೂಟಿಯಂಡ್ ಕೊಡಗರ ಕುಂದ್ ಪತ್ತಿತ್ ನಂಗಡ ತೆರಿಕ್ ಬಪ್ಪಕ್ ಎನ್ನ ಕಾರಣ?

**ಕೋಟೆರಾಜ :** ನಂಗಡ ಪೆರಿಯಯಿಂಗಳ ನಿಂಗಡ ಪೆರಿಯವು ಕೊಂದಿತುಟ್ಟ ಉದ್ದೇಶತಾನ ಎಳ್ಳುಚಿಟ್ಟ ಈ ನಾಡ್‌ನ ವಿಚಾರಣೆ ಮಾಡುವಕಾಯಿತ್ ಬಾತ್.

**ವೀರರಾಜೇಂದ್ರ :** ಅಂದಕ ವೈನಾಡ್‌ಲ್ ನಂಗಡ ಅಣ್ಣ ತಮ್ಮಣಂಗಳಾನ ದೊರೆ ಮಕ್ಕ ದಂಡಾಳನ ನಿಂಗ ಪುಡ್‌ಚಿತ್ ಕೊಂದಿತುಳ್ಳಿರ. ಈ ದಂಡ್ ಮಂಡೆ ಎಡ್‌ತದ್ ಪೋರತೆ ನಿಂಗ ಇಕ್ಕಲೂ ನಂಗಡ ಮೀದ ಪಗೆ ಕಾಟಿಯಂಡ್ ಉಳ್ಳಿರಲ್ಲ?

**ಕೋಟೆರಾಜ :** ನಿಂಗ ಪಾಲೆಕ್ ಬಂದಿತಿಪ್ಪಕ ನಂಗಡ ಪೆರಿಯಯಿಂಗಳ ನಿಂಗಡ ಪೆರಿಯವು ಕೊಂದ ತಕ್ಕನ ನಂಗ ತೇತಂಡತ್. ಅಕ್ಕಲೆ ನಿಂಗಲೂ ತೇತವಂಡಿಂಜತ್ ಅಲ್ಲತೆ ಇಕ್ಕ ಎನ್ನಂಗ್ ಕೇಪಿರ?

**ವೀರರಾಜೇಂದ್ರ :** ಪಂಡ್ ನೂರ್ ಕಾಲಕ್ ಬಯ್ಯ ನಿಂಗಡ ಪೆರಿಯವು ಜಗಳ ಮಾಡಿತ್ ಬುದ್ ಪೋನಾನ ಇಕ್ಕಲೂ ನಂಗಡ ಸಂಸ್ಥಾನತಾರ ದೊರೆ ಮಕ್ಕಡ ಕೂಡ ಕೂಟಿಯವತೆ ಇಕ್ಕ ನಂಗಕ್ ನಂಬಿಕೆ ತಂದಿತ್ ಪಾಲೆಕ್ ಕಾಟಿಯಂಡ್ ಮಂಡೆರ ಬೆಲೆ ತಾರಿಂದ್ ನಿಂಗಕ್ ಒತ್ತನ್ನಕೆ ಎಳ್ಳಿಯಂಡ್, ನಂಗಡ ಸೈನ್ ಇಡ್‌ಚಿಟ್ಟವಕ್ ಕಾರಣ ಎನ್ನ?

**ಕೋಟೆರಾಜ :** ಇಚ್ಚಕ್ ದಿನ ನಂಗಕ್ ನೇರ ಕಾಟ್ವಲೆ. ನಂಗಕ್ ನೇರ ಕಾಟ್ಟುವಕ ತೇತಂಡತ್.

**ವೀರರಾಜೇಂದ್ರ :** ನೂರ್ ಕಾಲಕ್ ಬಯ್ಯ ಪರಂದ ತಕ್ಕನ ಇಂದ್ ಎಣ್ಣಿಯಂಡ್ ಉಳ್ಳಿರ. ನಂಗ ನಿಂಗಡ ಕೈಕ್ ಪಾಲೆಲ್ ಕೆಣ್‌ಂಜಿತಿಪ್ಪಕ ಇನ್ನತ ತಕ್ಕನ ಎಣ್ಣುವಕ ನಂಗಕ್ ನಿಂಗ ಮೋಸ ಮಾಡ್‌ನನ್ನಕೆಂದ್ ನಿಂಗ ಸೀಮೆ ಬುಟ್ಟಿತ್ ನಂಗಡ ಸೀಮೆಕ್ ಬಂದಪಿಳ್ಳಾ ಎಣ್ಣಿಯವಲೊಂದ್ ನಂಗ ಪದ್‌ನಂಜಿ ದಿನ ಕಾತತ್. ಈಂಡ ಮೀದ ನಿಂಗ ನಂಗಡ ಜಾಗಕ್ ಬಂದಿತುಳ್ಳಿರ. ಇಕ್ಕ ನಂಗಡ ತಕ್ಕನ ನಡ್‌ತಿತಾರಿ. ಇಲ್ಲೇಂಗಿ ನಿಂಗಡ ಕಾರಣಂಗಡ ಮಂಡೆ ಪೊನ್ನ ಆನಕ, ನಂಗಡ ಸಂಸ್ಥಾನತಾರ ದೊರೆಮಕ್ಕಡ ಮಂಡೆ ಮಣ್ಣಾರ ಅಲ್ಲ ಅಚ್ಚಕೆ.

**ವೀರರಾಜೇಂದ್ರ :** ಇನ್ನತ ತಕ್ಕಕ್ ಕೋಟೆರಾಜಂಗ್ ಏದೇ ಜವಾಬ್ ಕೊಡ್‌ಪ ಕಯ್ಯತಾಚಿ. ಅಕ್ಕ ವೀರರಾಜೇಂದ್ರ ತಿರಿತ್ ಕೋಟೆರಾಜಂಗ್ ಇನ್ನನೆ ಎಣ್ಣಾಚಿ.

"ವೈನಾಡ್‌ಲ್ ಬುದ್ ಪೋನ ನಂಗಡ ಸಂಸ್ಥಾನತಾರ ದೊರೆ ಮಕ್ಕಡ ಮಂಡೆ ದಂಡಾತ್ ಒಂದ್ ನಿಂಗಡ ಕಾರಣಂಡ ಮಂಡೆ ಸಮ ಆಚಿ. ಇಇಸ್ಕೋರ ಮಂಡೆಕ್ ಕ್ರಯ ತಾರಿ"



ಕೋಟೆರಾಜ : ನಿಂಗ ಎಣ್ಣಾನನ್ನಕೆ ನಂಗಡ ಕಾರಣಂಡ ಮಂಡೆ ಒಂದಾಂಗ್ ನಿಂಗಡ ಸಂಸ್ಥಾನತರ್ ಓರ್ ದೊರೆ ಮೋಂವಂಡ ಮಂಡೆ ಸಮ ಆಚಿ. ಇಇಸ್ಕೋರ್ ದೊರೆ ಮೋಂವಂಡ ಮಂಡೆಕ್ ವೈನಾಡ್ ಕಲ್ಪಾತಿ ಪರಿಯಂತ್ರ ನಂಗಡ, ನಿಂಗಡಂದ್ ವಿವಾದತ್ ಉಂಡಲ್ಲ. ಅದ್‌ಂಗ್ ನಂಗ ಇಇಸ್ಕೊಮಿಳ್ಳಾ ವಾದ ಮಾಡುಲೆ.

ವೀರರಾಜೇಂದ್ರ : ನಿಂಗ ಈ ತಕ್ಕನ ಬಾಯಿಲ್ ಎಣ್ಣೆಟಕ ತೀವುಲೆ. ಎಳ್ಳಿತ್ ತಾರಿ.

ಈ ತಕ್ಕನ ಕೋಟೆರಾಜ ಕೇಟಿತ್ ತಾನ್ ಇಕ್ಕ ವೀರ ರಾಜೇಂದ್ರಂಡ ಅಭಿಪ್ರಾಯತರ್ ಪೋಲೆ ಕರಾರ್ ಎಳ್ಳಿಕೊಡ್‌ಕತೆ ಪೋನಕ ತಾಂಡ ಬುಡ್‌ಗಡೆ ಆಪುಲೆಂದ್ ಬೊತ್ತಿತ್ ಕಾಗದ ಎಳ್ಳಿ ಕೊಡ್‌ತತ್.

ಆ ಕರಾರ್‌ಕ್ ಕೋಟೆರಾಜ ತಾಂಡ ಸೈನ್‌ಟ್ವಿತ್ ಅದ್‌ನ ಕೊಡಗರ ರಾಜ ವೀರರಾಜೇಂದ್ರ ಒಡೆಯಂಗ್ ಕೊಡ್‌ತತ್. ವೀರರಾಜೇಂದ್ರ ಒಡೆಯ ಅದ್‌ನ ಎಡ್‌ತಂಡ್ ತಾಂಡ ಬಿಡಾರಕ್ ಬಂದಿತ್ ಅದ್‌ನ ಭದ್ರ ಆಯಿತ್ ಬೆಚ್ಚತ್. ಕೋಟೆ ವೀರವರ್ಮ ರಾಜ ಅಂದ್ ನಡ್‌ಪಾದ್ರಲ್ ವೀರ ರಾಜೇಂದ್ರಂಗ್ ಗೊತ್ತಾಕತನ್ನಕೆ ತಾಂಡ ನಾಯಮಾರ ಜನಳ ಕೂಟಿಯಂಡ್ ಕುಂದ್ ಇಳಂಜಿತ್ ಕೊಡಗರ ತೆರಿ ದಾಟಿತ್ ತಾಂಡ ಸೀಮೆಕ್ ಓಡಿಪೋಚಿ.

ಪಿತ್ಯಾಂದ್ ವೀರರಾಜೇಂದ್ರ ಈ ಸುದ್ದಿನ ಕೇಟಿತ್ ಕೊಡಗರ ಜನಳ ಕೂಟಿಯಂಡ್, ಕೋಟೆ ಅರಸ ಕೊಡಗರ ತೆರಿರ ಪಕ್ಕ ಇಕ್ಕುವಾಂದ್ ನೋಟುವಕ್ ತಾಂಡ ಜನಳ ಅಯೆಚತ್. ಇಯಂಗಕ್ ಕೋಟೆ ರಾಜ ಕೊಟ್ಟತೆ ಪೋನಕೊ ನಾಗಪ್ಪಯ್ಯ ನಡುಬಟ್ಟೆಲೆ ಕೊಟ್ಟಚಿ.

ಅಂವನ ಪುಡ್‌ಚಂಡ್ ಕೂಟಿಯಂಡ್ ಬಂದಿತ್ ರಾಜಂಗ್ ಒಪ್ಪಾಚಿಟ್ಟತ್. ವೀರರಾಜೇಂದ್ರ ಆದ್ಯ ಕುರ್ಚಿ ಅರಮನೆಕ್ ಬಂದಿತ್ ಅಲ್ಲಿಂಜ ಬರಪೊಳೆರ ಅರಮನೆಕ್ ಪೋಚಿ. ಅಲ್ಲಿ ವಾಸ ಇಂಜ ತಾಂಡ ಪೊಣ್ಣ್ ಪಿಳ್ಳಾ ಮೋವ ದೇವಮ್ಮಾಜಿ ಪಿಳ್ಳಾ ಪರಿವಾರತನ ಕೂಟಿಯಂಡ್ ಒಂದ್, ದಂಡ್ ದಿನತೆ ಪಾಡಿ ನಾಲ್ಕಾಡ್‌ರ ಯವಕಪಾಡಿ ಊರ್‌ಕ್ ಬಂದಿತ್ ಅಲ್ಲಿ ಕೇಟೋಳಿ ಮನೆಲ್ ಒಳಂಜತ್. ಕೋಟೆರಾಜಂಡ ಕೂಡೆ ಉಪಾಯ ಮಾಡಿತ್ ತಾಂಗ್ ಕೇಡ್ ಗೇನ ಮಾಡ್‌ನ ನಾಗಪ್ಪಯ್ಯನ ಜೈಲಾಕೊಟ್ಟತ್. ವೀರರಾಜೇಂದ್ರ ಬಯ್ಯ ಅಲ್ಲಲ್ಲಿ ಸುಲ್ತಾನಂಡ ಸೈನಿಕಂಗಳುಂಡ್ ಒಳಚಂಡ ಕೊಡಗರ ಜನಳಿಲ್ಲ ಕೂಟಿತ್ ತಾಂಡ ರಾಜ್ಯತನ ಸುಲ್ತಾನನುಂಡ್ ಪಡ್‌ಂದವ ಪ್ರಯತ್ನತ್ ಇಂಜತ್.

ವೀರರಾಜೇಂದ್ರ ಒಡೆಯ ಬರಪೊಳೆ ಪಕ್ಕತ ಅರಮನೆರ ತಾಂಡ ಕುಟುಂಬಕಾರಳ ಯವಕಪಾಡಿಕ್ ಕೂಟಿಯಂಡ್ ಪೋನಲ್ಲಿ ಕುರ್ಚಿ ಅರಮನೆಲ್ ಅವಂಡ ದಂಡ್ ರಾಣಿಯ ಪಿಳ್ಳಾ ಚಿಕ್ಕವ್ವಂಡ ಮೋಂವ ಪರಿವಾರತೋಡೆ ಇಂಜತ್. ವೀರರಾಜೇಂದ್ರ ಯವಕಪಾಡಿಲ್ ತಾಂಡ ಕುಟುಂಬತರ ಚೆನ್ನಂಗಾಳನ ಅಲ್ಲಿ ಆಕಿತ್, ತಾಂಡ ಸೈನಿಕಂಗಡ ಕೂಡೆ, ಸುಲ್ತಾನನಂಡ ಸೈನಿಕಂಗಡ ಕೂಡೆ ಪಡಪೊಪ್ಪಕ್ ಮೈಸೂರ್ ತೆರಿಕ್ ಪೋಯಿಂಜತ್.

ವೀರರಾಜೇಂದ್ರ ಕುರ್ಚಿ ಅರಮನೆಂಜ ದೂರ ಆಯಿತಿಂಜ ಈ ನೇರತನ ನೋಟಿಯಂಡ್, "ಕುರ್ಚಿ ಅರಮನೆಲ್ ಬೋಂಡಿಯಾನ ಪೊನ್ನಾರ ಮಾಲ್ಮಟ ಉಂಡ್. ಅಲ್ಲಿ ಇಕ್ಕ ಪಾರಕಾರ ಚೆನ್ನಂಗಿ ಉಳ್ಳ. ಆನಗುಂಡ್ ಅರಮನೆಕ್ ಮುತ್ತಿಗೆ ಇಟ್ಟಿತ್ ಅದತ್ ಉಳ್ಳ ಪಣತನ ಕಟ್ಟಂಡ್ ಪೋಪಕ್ ಇದೇ ನಲ್ಲ ನೇರ"ಂದ್ ವೀರರಾಜೇಂದ್ರಂಗ್ ಮಿಳ್ಳಾಂಜೆ ವಿರೋಧಿ ಆಯಿಜ ತೆಂಕಮುತ್ತಣ್ಣ ಕೋಟೆ ಅರಸಂಗ್ ಅರಿಚಿಟ್ಟತ್.

ಕೋಟೆ ಅರಸ ಇದ್ನ ಕೇಟಿತ್ ತಂಗಡ ಕಡೆ ನಾಯಮಾರ ಪಿಳ್ಳಾ ಮುಳ್ಳ ಕುರುಬಂಗಳ ಕೂಟಿತ್ ಇನ್ನೂರ್ ಜನಳ ತೆಂಕ ಮುತ್ತಣ್ಣಂಡ ಕೂಡೆ ಅಯೆಚತ್.

"ಬೈಟ್ ನೇರತ್ ಕುರ್ಚಿಲ್ ಉಳ್ಳ ಕೊಡಗರ ರಾಜಂಡ ಮಕ್ಕಳ ಕೆತ್ತಿತ್, ಅರಮನೆಲ್ ಉಳ್ಳ ಎಲ್ಲಾನೋ ಲೂಟಿಮಾಡಿಯಂಡ್ ಬಾರಿ"ಂದ್ ಎಣ್ಣೆಚಿ.

ಈ ಪೋಲೆ ತೆಂಕ ಮುತ್ತಣ್ಣ ಇನ್ನೂರ್ ಜನಳ ಕೂಟಿಯಂಡ್ ಅಂದೇ ಬೈಟ್ ಕುರ್ಚಿ ಊರ್ಕ್ ಬಂದಿತ್ ಅರಮನೆ ಕುಟುಂಬ ಇಂಜ ಮನೆನ ಲೂಟಿ ಮಾಡಿತ್ ದಂಡ್ ರಾಣಿಯ ಪಿಳ್ಳಾ ವೀರರಾಜೇಂದ್ರಂಡ ಚಿಕ್ಕವ್ವಂಡ ಮೋಂವನ, ದಂಡ್ ಅರಮನೆ ಸೇವಕಿಯಳ ಬಿಲ್ಲಾ ಬುಟ್ಟಿತ್. ಅನ್ನೆ ಅಲ್ಲಿ ಇಂಜ ಇರುವದ್ ಕೊಡವಳ ಕೆತ್ತಿತ್‌ಟ್ಟಿತ್. ಇಚ್ಚೆ ಅಲ್ಲತೆ ಆ ಅರಮನೆಲ್ ಇಂಜ ನಲ್ಲ ನಲ್ಲ ಮಾಲ್ಮಟ, ದುಡ್ಡ್ ಕಾಸನೆಲ್ಲ ಎಡ್ತಂಡ್ ಅರಮನೆಕ್ ತಿತ್ತಟ್ಟಿತ್ ಚುಟ್ಟಿತ್. ಅಂದೇ ಬೈಟ್ ತಾಂಡ ಜನಳ ಕೂಟಿಯಂಡ್ ಕೋಟೆ ಅರಸಂಡ ಪಕ್ಕ ಪೋಚಿ. ಅಲ್ಲಿ ಏರ ಕ್ರಯ ಉಳ್ಳ ಚೆನ್ನಂಗ್ ಮಾಲ್ಮನೆಲ್ಲ ತಾನ್ ಎಡ್ತಂಡ್ ಬಾಕಿ ಇಂಜಾನೆಲ್ಲ ಕೋಟೆ ಅರಸಂಗ್ ಕೊಡ್ತತ್.

ಕುರ್ಚಿ ಊರ್ಲ್ ತಾಂಡ ಕುಟುಂಬಕಾರಳ ಕೊಂದಿತ್ ಅರಮನೆನ ಲೂಟಿ ಮಾಡಿತ್ ಚುಟ್ಟಿತ್‌ಟ್ಟಿ ಸಮಚಾರ ಕೇಟಿತ್ ವೀರರಾಜೇಂದ್ರ ಕುರ್ಚಿಕ್ ಬಾತ್. ಅಲ್ಲಿ ನೋಟುವಕೆ ಆಗತನ್ನತಾನ ತಾಂಡ ಕಣ್ಣಾರೆ ನೋಟಿತ್ 'ಈ ಕೋಟೆ ಅರಸ ಮಾಡ್ನ ಮಹಾದೋಷಕ್ ಮಾದೇವನೆ ಶಿಕ್ಷೆ ಕೊಡ್ಕಡ್'ಂದ್ ಮನಸ್ಸಲ್ ಗೇನ ಮಾಡಿಯಂಡ್ ವ್ಯಂಗ್ಯ ಆಯಿತ್ "ಕೋಟೆ ಅರಸ ಎಚ್ಚೆಕೋ ಕಾಲ ಮರ್ಪ ಕಯ್ಯತನ್ನತ ಉಪಕಾರ ಮಾಡಿತ್. ಇದ್ಂಗ್ ಪ್ರತಿ ಉಪಕಾರ ಮಾಡುವಕ್ ನಂಗಕ್ ಇಲ್ಲಿಕೆತ್ತನೆ ಆಯಿಲೆ. ಇಳ್ಳಾ ಮಿಳ್ಳಾಕ್

ಮಾದೇವಂಡ ಕಟಾಕ್ಷ ಒಲಂಜಿಬಂದಕ ನಂಗ ಪ್ರತ್ಯುಪಕಾರ ಮಾಡೋಲು"ಂದ್ ತಾಂಡ ಆಪ್ತಂಗಡ ಕೂಡೆ ಎಣ್ಣೆಯಂಡ್ ವಾಪಾಸ್ ನಾಲ್ವಾಡ್‌ಕ್ ಬಾತ್.

## ವೀರರಾಜೇಂದ್ರ ನಾಲ್ವಾಡ್‌ಲ್ ಅರಮನೆ ಕೆಟ್ಟನದ್

ಕೋಟೆ ಅರಸ ತಾಂಡ ಸೀಮೆಕ್ ಓದಿಪೋನಪಿಳ್ಳಾ ವೀರರಾಜೇಂದ್ರ ಒಡೆಯ ಬರಪೋಳೆ ಪಕ್ಕತ ಅರಮನೆಂಜ ತಾಂಡ ಮನೆಕಾರಳ ಕೂಟಿಯಂಡ್ ಪಾಡಿ ನಾಲ್ವಾಡ್‌ರ ಯವಕಪಾಡಿ ಊರ್‌ರ ಕೇಟೋಳಿ ಮನೆಕ್ ಬಂದಿತ್ ಅಲ್ಲಿ ಬಿಡಾರ ಇಟ್ಟಿತಿಂಜತ್.

ಈ ನೇರತ್ ವೀರರಾಜೇಂದ್ರಂಗ್ ಟಿಪ್ಪುಸುಲ್ತಾನಂಡ ಪುಡ್‌ತತ್ ಇಂಜ ತಾಂಡ ರಾಜ್ಯತ್‌ನ ಪಡೆಪೊತ್ತಿತ್ ಗೆದ್ದಿತ್ ವಾಪಾಸ್ ಪಡ್‌ಂದವಂಡಿಂಜತ್. ಇನ್ನನೆ ತಾಂಡ ಸೈನಿಕಂಗಳ ಕೂಟಿಯಂಡ್ ಶತ್ರುವಡ ಕೂಡೆ ಪೋರಾಡುವಕ ತಾಂಡ ಪೊಣ್ಣ್, ಮಕ್ಕಳ ಶತ್ರುವಳುಂಡ್ ದೂರ ಆನ ಓರ್ ಭದ್ರ ಜಾಗತ್ ಆಕೊಂಡಿಂಜತ್. ಕೊಡಗಲ್ ಅಕ್ಕತ ಪರಿಸ್ಥಿತಿಲ್ ಅನ್ನತ ಜಾಗ ಎದ್‌ಂದ್ ವಿಚಾರಣೆ ಮಾಡುವಕ ರಾಜಂಡ ಆಪ್ತ ಕಾರ್ಯಕಾರಡಾತ್ ಒಬ್ಬನಾನ ಕೇಟೋಳಿ ಅಚ್ಚುಣ "ಯವಕಪಾಡಿ ಊರ್‌ಲ್ ಓರ್ ಅರಮನೆ ಕೆಟ್ಟೋಲು"ಂದ್ ಸಲಹೆ ಕೊಡ್‌ತತ್. ಇನ್ನನೆ ಅರಮನೆ ಕೆಟ್ಟುಪಲ್ಲಿ ಕೆತ್ತನೆ ರಾಜ ಕುಟುಂಬಕಾರಡ ವಾಸಕ್ ತಾಂಡ ಮನೆಲ್ ಜಾಗ ಮಾಡಿ ಕೊಡ್‌ತತ್.

ಕೇಟೋಳಿ ಅಚ್ಚುವಣ್ಣ ಅರಮನೆ ಕೆಟ್ಟುವಕ್ ತಾಂಡ ಮನೆರ ಕೊಡಿಯತ ಓರ್ ಕುಂದ್‌ರ ಬರಿಲ್ ಸಮತಟ್ಟಾನ ಜಾಗತ್‌ನ ಕಾಟಿ ಕೊಡ್‌ತತ್. ಆ ಜಾಗ ಪಡಿಇಗಾರ್ ಕುಂದ್‌ರ ನಡುವೆತ ಬರಿಲ್ ಇಂಜಿತ್ ಬಾಕಿ ಮೂಂದ್ ದಿಕ್ಕೊಂಜ ಕಾಡ್‌ನುಂಡ್ ಕೂಡ್‌ನ ಇಳಿಜಾರ್ ಭೂಮಿರ ಕೊಡಿಲ್ ಇಂಜತ್. ಸುತ್ತೂ ಇಂಜ ಕಾಡ್‌ರ ನಡುಲ್ ಅಲ್ಲಲ್ಲಿ ಚೆರಿಯ ಕುಂದ್, ಕುಂದ್‌ರ ನಡುಲ್ ಆಳವಾನ ಎಕ್ಕೋಲು ನೀರ್ ದುಂಬ್‌ನ ಕೊಲ್ಲಿ...ಅರಮನೆ ಕೆಟ್ಟುವಕ್ ಪ್ರಕೃತಿ ಮಾಡ್‌ನ ಕುಂಡ್‌ರನ್ನೆ ಕಾಂಬ ಇಂಜತ್. ಈ ಕಾಡ್ ಪಿಳ್ಳಾ ಕುಂದ್ ಸುತ್ತೂ ಎಚ್ಚಿಕೊ ಮೈಲಾಕೆತ್ತನೆ ಪಬ್ಬಿತ್ ಇದ್‌ಂಡ ತೋಡ್‌ಲ್ ಚೆರಿಯ ಪೊಳೆ ಒಕ್ಕುವ ಇಂಜತ್. ತೋಡ್‌ರ ಬರಿಯತ ಬೇಲ್‌ರ ಕರಲ್ ರೈತಂಗಡ ಮನೆ ಇಂಜತ್. ಕುಂದ್‌ಕಾಡ್‌ರ ನಡುಲ್ ಒಳಬಟ್ಟೆ ಇಂಜತ್. ಇನ್ನನೆ ಕೇಟೋಳಿ ಅಚ್ಚುಣ ಅರಮನೆ ಕೆಟ್ಟುವಕ್ ಕಾಟನ್ ಜಾಗ ಶತ್ರುವಕ್ ಕಷ್ಟತ್‌ರ ಬಟ್ಟೆ ಆಯಿತಿಂಜತ್.

ಕೊಡಗಲ್ ಇಂಜ ಸುಲ್ತಾನಂಡ ಸೈನಿಕ ತಾಣ್ಕೂ ದೂರ ಇಂಜತ್. ದೂರತ್



ಕಾಂಬ ಇಂಜ ನೀಲ ರಂಗ್ ಕುಂದ್ ಸಾಲ್, ಅದೊಂಡ ಕೂಡೆ ಕೋದತ ತಗ್ಗ್ ಭೂಮಿರ ಪಚ್ಚೆ ರಂಗ್ ನೋಟುವಯಿಂಗಡ ಮನಸ್ಸಾಕ್ ಕುಶಿ ತಪ್ಪ ಇಂಜತ್.

ಆ ಜಾಗ ಪಿಳ್ಳಾ ಅದೊಂಡ ಸುತ್ತು ಇಂಜ ಕಾಡ್, ಬಾಣೆ ಜಾಗ ಪುಲಿಯಂಡ ಒಕ್ಕಕಾರಕ್ ಸೇರಾನದ್. ಇಕ್ಕಲೂ ಅರಮನೆರ ಕೋದತ ಓರ್ ಒಳಬಟ್ಟೆಕ್ 'ಪುಲಿಯಂಡ ವಾಡೆ'ಂದ್ ಎಣ್ಣುವ. ವೀರ ರಾಜೇಂದ್ರ ಒಡೆಯ ಪುಲಿಯಂಡ ಒಕ್ಕ ಪಟ್ಟಿದಾರ ಪಿಳ್ಳಾ ಪೆರಿಯಂವ ಆಯಿತಿಂಜ ಪೊನ್ನಪ್ಪನ ಕೂಟಿಯಂಡ್ ಆ ಜಾಗತ್ ಅರಮನೆ ಕೆಟ್ಟುವಕಾಯಿತ್ ಬುಟ್ಟಿತರೊಂಡೂಂದ್, ಅಂವಂಡ ಒಕ್ಕಕಾರಕ್ ಯವಕಪಾಡಿರ ಆಸ್ತಿಕ್ ಬದಲಾಯಿತ್ ಎಡೆ ನಾಲ್ಕಾಡ್ ಮಗ್ಗುಲ ಊರ್ಲಾ ಭೂಮಿನ ತಪ್ಪಿಂದ್ ಎಣ್ಣೆಚಿ.

ರಾಜಂಡ ತಕ್ಕಾಕ್ ಪೊನ್ನಪ್ಪ ವಿರೋಧ ಮಾಡುವನ್ನೆ ಇಂಜಾಲೆ. ರಾಜಾಚ್ಲೆ ಮೀರುವ ಕಯ್ಯ. ಮೀರಾನಕ ತಂಗಕ್ ಕೇಡ್ ಗ್ಯಾರೆಂಟಿಂದ್ ಬೊತ್ತಿಯಂಡ್ ಪೊನ್ನಪ್ಪ ನಾಲ್ಕಾಡ್ ಯವಕಪಾಡಿಲ್ ಇಂಜ ತಾಂಡ ಒಕ್ಕಡ ಆಸ್ತಿನ ವೀರರಾಜೇಂದ್ರಂಗ್ ಬುಟ್ಟ್ ಕೊಡತತ್. ಅಕ್ಕ ವೀರರಾಜೇಂದ್ರ ಚೆನ್ನಂಗ್ ತಿಂಗತ್ ಎಡೆ ನಾಲ್ಕಾಡ್ ಇಂಜ ಶತ್ರುವಳ ಓಡ್ಚಿಟ್ಟಿತ್ ಮಗ್ಗುಲ ಊರ್ಲಾ ಪುಲಿಯಂಡ ಮನೆಕಾರಕ್ ಭೂಮಿನ ಕೊಡತತ್. ಅಂದೊಂಜ ಪುಲಿಯಂಡ ಒಕ್ಕಕಾರ ಮಗ್ಗುಲ ಊರ್ಲಾ ಆಸ್ತಿ, ಮನೆ ಮಾರ್ ಆಯಿತ್ ಉಂಡ್.

ಆಚೇಂಗಿ, ಪುಲಿಯಂಡ ಮನೆಕಾರಡಾತ್ ಒಬ್ಬಂಗ್ ಮಾತ್ರ ತಂಗಡ ಪೆರಿಯವು ಮಾಡಿಬೆಚ್ಚ ಭೂಮಿ, ಮನೆನ ಯವಕಪಾಡಿಂಜ ಬುಟ್ಟಿತ್ ಪೋಪಕ್ ಮನಸ್ಸ ಬಂದಾಲೆ. ಅಂವ ಪೊನ್ನಪ್ಪಂಡ ತಮ್ಮ ಕಾರ್ಯಪ್ಪ. ಇಂವನ ಚರ್ಪತ್ ಅಂಜೆ ಕಾರಿಚ್ಚಿಂದ್ ಕಾಕುವ ಇಂಜತ್. ಕಾರಿಚ್ಚಂಗ್ ರಾಜ ತಂಗಡ ಪೆರಿಯವು ಮಾಡಿಬೆಚ್ಚ ಮಣ್ಣ್, ಮನೆಂಜ ಬುಟ್ಟಿತ್ ಮಗ್ಗುಲಕ್ ಅಯೆಚೆಂಡ್ ಉಂಡಲ್ಲ ಎಣ್ಣುವ ಬೇರ ಪಿಳ್ಳಾ ಚೆಡಿ ಇಂಜಿತ್. ಆನಗುಂಡ್ ಅಂವ ತಾಂಡ ಒಕ್ಕಕಾರ ಎಲ್ಲ ನಾಲ್ಕಾಡ್ ಬುಟ್ಟಿತ್ ಪೋನಕೊ ತಾನ್ ಮಾತ್ರ ಅಲ್ಲಿಂಜ ಪೊರ್ಲಾಡಾಲೆ.

ಈ ನೇರತ್ ಅರಮನೆರ ಕೆಲಸ ಸುರು ಆಯಿತಿಂಜತ್. ಕಾರಿಚ್ಚ ಆನಗುಂಡ್ ಪೊರ್ಲಾ ನೇರತ್ ಕಾಡಲ್ ಒಳಚಂಡ್ ಬೈಟ್ ಪೊರ್ಲಾ ಬಪ್ಪ ಇಂಜತ್. ಬೈಟ್ ತಾಂಡ ಆಪ್ತಂಗಡ ಮನೆಲ್ ಊಟ ತೇತಂಡ್ ಸುಮಾರ್ ನಡಪಾದರೆ ನೇರಕ್ ಸೆರಿಯಾಯಿತ್ ಅರಮನೆ ಕಟ್ಟಡತರ ಎದಿಕೆ ಬಪ್ಪ ಇಂಜತ್. ಅರಮನೆ ಕಟ್ಟಡತರ ಎದಿಕೆ ಓರ್ ಬಲ್ಯ ಮಾಂಗಿ ಮರ ಇಂಜತ್. ಇದತ್ ಬಲ್ಯ ಬಲ್ಯ ಕೊಂಬೆ ಇಂಜತ್. ಈಂಡ ಪಕ್ಕತೆ ಒಂದ್, ದಂಡ್ ಚೆರಿಯ ಮರ ಬೊಳ್ಳಂದಿತ್ ಅದೊಂಡ ತುದಿ ಮಾಂಗಿ ಮರತರ ಚೆನ್ನಂಗ್ ಕೊಂಬೆಕ್ ಮುಟ್ಟುವನ್ನೆ ಇಂಜತ್. ಕಾರಿಚ್ಚ ನಡಪಾದ್ರೆಕ್ ಈ ಮಾಂಗಿ ಮರ ಪತ್ತಿತ್



ಓರ್ ಎತ್ತರತರ ಕೊಂಬೆಲ್ ಅಳತಂಡ್ ಜೋರಾತೆ ಕಿರ್ಚುವ ಇಂಜತ್.

"ಈ ಪಾಳ್ ರಾಜ ನಂಗಡ ಪೆರಿಯಯಿಂದ ಭೂಮಿ, ಮನೆಂಜ ನಂಗಳ ಓಡ್‌ಚಿಟ್ಟಿತ್ತಲ್. ಅಂವಂಗ್ ನಲ್ಲದ್ ಆಕತೇ ಆಡ್. ಅಂವಂಡ ಕುಟುಂಬ ಉದ್ಬಾರ ಆಕತೆ ಪೋಡ್"ಂದ್ ಬಯ್ಯುವ ಇಂಜತ್. ಇನ್ನನೆ ಕಾರಿಚ್ಚ ಎಚ್ಚಕೊ ದಿನ ಬಜ್ಜಂಡ್ ಇಂಜತ್. ಸುರು ಸುರೂಲ್ ಅರಮನೆ ಕಟ್ಟಿದತರ ಕೆಲಸಕಾರಕ್ ಕಾರಿಚ್ಚ ನಡಪಾದ್ರೆಲ್ ಬಯ್ಯುವದ್ ಗೊತ್ತಾಪ ಇಂಜಾಲೆ.

ಚೆನ್ನಂಗ್ ದಿನ ಕೈಂಜದು ಕೆಲಸಕಾರಕ್ ಗೊತ್ತಾನಕೊ ದಾರೊ ಪುಚ್ಚಂಡ್ ಅವು ಮುಂಡತೆ ಕೂಡ್‌ಚಿ! ಇನ್ನನೆ ಜನ ಮುಂಡತೆ ಕೂಡುವಕ ಕಾರಿಚ್ಚ ಬಯ್ಯುವದ್ ಇಞ್ಚೊ ಜಾಸ್ತಿ ಆಚಿ. ಈಂಡೆಡೆಲ್ ವೀರರಾಚೇಂದ್ರ, ಮೈಸೂರ್ ದೇಶತರ ತೆರಿಲ್ ಪಡೆ ಪೊತ್ತಂಡ್ ಇಂಜ ಜಾಗತಾಂಜ ನಾಲ್ಕಾಡ್‌ಕ್ ಬಪ್ಪಕ ಅರಮನೆ ಕೆಲಸಕಾರ, "ದಾರೋ ನಡಪಾದ್ರೆಕ್ ಮಾಂಗಿ ಮರತ್ ಅಳತಂಡ್ ರಾಜನ ಬಯ್ಯುವಾ"ಂದ್ ಎಣ್ಣೆ ಚಿ.

ವೀರರಾಚೇಂದ್ರ, ಕೆಲಸಕಾರಡ ಕೂಡೆ ಬಜ್ಜಂಡ್ ಉಳ್ಳ ಆ ಮನುಷ್ಯನ ಪುಡ್‌ಚೆಂಡ್ ಜೈಲ್‌ಲ್ ಇಡೊಂಡೊಂದ್, ತಾನ್ ಮೈಸೂರ್ ತೆರಿಂಜ ಇಞ್ಚೊ ಮ್ಮತೆ ಕೊಡಗುಕ್ ಬಪ್ಪಕ ಅಂವನ ವಿಚಾರಣೆ ಮಾಡಿತ್ ಶಿಕ್ಷೆ ಕೊಡ್‌ಪಿಂದ್ ಎಣ್ಣೆತ್, ಮೈಸೂರ್ ತೆರಿಲ್ ಸುಲ್ತಾನಂಡ ಸೈನಿಕಂಗಕ್ ಮೈಸೂರ್ ಸೀಮೆಂಜ ಬಂದಂಡ್ ಇಂಜ ಉಂಬ, ತಿಂಬಕುಳ್ಳ ಸಾಮಾನುನೆಲ್ಲ ತಡ್‌ಪಕ್ ನೋಟುಚಿ.

ಅಂದಾಂಜೇ ಅರಮನೆ ಕೆಲಸಕಾರ ಕಾರಿಚ್ಚನ ಪುಡಿಪಕ್ ಪ್ರಯತ್ನ ಮಾಡ್‌ಚಿ. ಬೈಟಾನನ್ನಕೆ ಕೆಲಸಗಾರಡಾತ್ ದಂಡ್ ಧೈರ್ಯಶಾಲಿಯ ಆ ಮರತರ ಮೊರ್‌ಡಾಲೆ ಅಳತಂಡ್, ಮರತರ ಕೊಡಿಂಜ ಬಯ್ಯುವ ಮನುಷ್ಯನ ಅಂವ ಮರ ಪತ್ತುವ ನೇರತೆ ಪುಡಿಕೊಂಡೊಂದ್ ಪಾರ ಕಾತತ್. ಆಚೇಂಗಿ, ಅನ್ನತ ಬೈಟ್ ಕಾರಿಚ್ಚ ಮರತರ ಪಕ್ಕೆ ಬಪ್ಪ ಇಂಜಾಲೆ. ಚೆನ್ನಂಗ್ ಬೈಟ್ ಪಾರಕಾರ ದುಂಬ ನೇರ ಪಾರ ಕಾತಿತ್ ಇಞ್ಚೊ ಆ ಮನುಷ್ಯ ಬಪ್ಪಲೆಂದ್ ಎಣ್ಣೆಯಿಂದ್ ತಂಗಡ ನೆರ್‌ಕೆಕ್ ಪೋಯಿತ್ ಬುದ್ಧವಕಾಪಕ ಕಾರಿಚ್ಚ ಮರಪತ್ತಿತ್ ಮಾಮೂಲಾರನ್ನಕೆ ರಾಜನ ಬಯ್ಯುವ ಇಂಜತ್!

ಅನ್ನನೆ ಇಂವ ಏದ್ ನೇರಕ್ ಮರ ಇಳಾಂಜಿತ್ ಪೋಪ ಎಣ್ಣುವದೊ ದಾರ್‌ಕೊ ಗೊತ್ತಾಪ ಇಂಜಾಲೆ. ಕಾರಿಚ್ಚ ಮರ ಇಳಾಂಜಿತ್ ತಂಗಡ ಕೈಕ್ ಕೊಟ್ಟೆ ಎಲ್ಲಿಕ್ ತಪ್ಪಿಚಿಟ್ಟಂಡ್ ಪೋಪಾಂದ್ ಮರತರ ಮೊರ್‌ಡಾಲೆ ಅಳಪ ಇಂಜ ಜನಕ್ ಅಂವ ಪೊಲಾಕ ನೇರ್ತೆ ಮರತಾಂಜ ಇಳಿವಕಾಪಕ ಮರತರ ಬೋರೆ ಕೊಂಬಿಕಾಲೆ ದಾಟಿಯಿಂದ್ ಪೋಯಿರುವ ಇಂಜತ್.

ಇನ್ನನೆ ಎಚ್ಚಕೋ ದಿನ ಕೈಂಜತ್. ಒನ್ನಾಂದ್ ವೀರ ರಾಜೇಂದ್ರಒಡೆಯ ಮೈಸೂರ್ ಕೊಡಗರ ತೆರಿ ಜಾಗತ್ಂಜ ನಾಲ್ವಾಡ್ ಯವಕಪಾಡಿರ ತಾಂಡ ಕುಟುಂಬಕಾರ ಇಂಜ ಕೇಟೋಳಿ ಮನೆಕ್ ಬಾತ್. ಅಕ್ಕ ಕೆಲಸಕಾರ ನಡಪಾದ್ರೆಲ್ ಮಾಂಗ್ ಮರತ್ ಅಳಾತಂಡ್ ರಾಜನ ಬಯ್ಯುವ ಮನುಷ್ಯನ ತಂಗ ಮರತ್ರ ಮೊರ್ಡಾಲೆ ಅಳಾತಂಡ್ ಎಚ್ಚಕ್ ಪಾರಕಾತಕೊ ಪುಡಿಪ ಕೈಂಜಾಲೆಂದ್ ರಾಜಂಗ್ ಅರಿವಿಕೆ ಕೊಡಾತತ್.

ಅಕ್ಕ ವೀರರಾಜೇಂದ್ರ ತಾಂಡ ಕೂಡೆ ಇಂಜ ಕಾರ್ಯಕಾರಳ ನೋಟಿತ್ "ಆ ಮನುಷ್ಯನ ಎನ್ನನಾಚೇಂಗೊ ಪುಡಿಕೊಂಡುವಲ್ಲ. ಎಂತ ಉಪಾಯ?"ಂದ್ ಕೇಟಿತ್.

ಅಕ್ಕ ಓರ್ ಆಪ್ತ ಕಾರ್ಯಕರ್ತ "ಮಹಾಸ್ವಾಮಿ ಅದೊಂದು ಕಷ್ಟತ್ರ ಕೆಲಸ ಅಲ್ಲ. ಇಕ್ಕ ಪುದಿಯದಾಯಿತ್ ಇಲ್ಲಿಕ್ ಕಾಪಾಳಂಗ ಎಣ್ಣುವ ಜನ ಮಲಯಾಳತ್ಂಜ ಬಂದಿತ್. ಅವು ಎನ್ನತಾ ಮರ ಆನಕೊ ಸುಲಭತೆ ಪತ್ತಿರುವ. ಅಯಿಂಗಕ್ ಈ ಕೆಲಸತ್ನ ಒಪ್ಪಚಿಟ್ಟಕ ಆ ಕೆಟ್ಟ ಮನುಷ್ಯನ ದಂಡ್ ದಿನತೆ ಪುಡಾಚಿತ್ ನಿಂಗಡ ಕಾಲಕ್ ಬೂಕುವ"ಂದ್ ಎಣ್ಣಿಚಿ.

ವೀರರಾಜೇಂದ್ರ : ಅವು ಎಲ್ಲಿ ಉಂಡ್?

ಕಾರ್ಯಕಾರ : ಅವು ನಾಲಡಿ ಪರದಂಡ ಮನೆರ ಪಕ್ಕ ಉಂಡ್. ಅವು ಮಲಯಾಳತ್ಂಜ ಬಂದಿತ್ ಓರ್ ತಿಂಗ ಕೈಂಜತ್.

ವೀರರಾಜೇಂದ್ರ : ಅಂದಕ ಆ ಕಾಪಾಳಂಗಳ ಕಾಕಿತ್ ಬೆರಿಯ ಈ ಮನುಷ್ಯನ ಪುಡಿಕೊಂಡುಂದ್ ಎಣ್ಣಿತ್ ಆ ಕಾರ್ಯಕಾರಂಗ್ ಪರದಂಡ ಮನೆರ ಪಕ್ಕತ್ ಇಂಜ ಕಾಪಾಳಂಗಳ ಕಾಕುವಕ್ ಆಜ್ಜೆ ಮಾಡ್ಚಿ.

ಈ ಪೋಲೆ ದಂಡ್ ಕಾಪಾಳಂಗ ಅಂದ್ ಬೈಟ್ ಒಯಿಪತ್ ನೇರತ್ ರಾಜಂಡಲ್ಲಿಕ್ ಬಾತ್. ರಾಜ ಅಯಿಂಗಕ್ ಕಾರಿಚ್ಚಿನ ಪುಡಾಚಂಡ್ ಬಪ್ಪನ್ನಕೆ ಆಜ್ಜೆ ಮಾಡ್ಚಿ. ಅವು ಮಾಂಗಮರ ಪಿಳ್ಳಾ ಅದೊಂಡ ಸುತ್ತು ಮುತ್ತು ಇಂಜ ಚೆರಿಯ ಮರತ್ನ ನೋಟಿಯಂಡ್ ಬಾತ್. ಅಲ್ಲಿಂಜ ರಾಜಂಡ ಕೂಡೆ ತಂಗಕ್ ದಂಡ್ ಕರ್ತ ಕಂಬುಳಿನ ತರೊಂಡೂಂದ್ ಕೇಟಿತ್. ರಾಜ ಅನ್ನನೆ ಅಯಿಂಗಕ್ ದಂಡ್ ಕರ್ತ ಕಂಬುಳಿನ ಕೊಡಾಪ್ಪಚಿಟ್ಟತ್.

### ಕಾರಿಚ್ಚಿನ ಪುಡಾಚಿ ಕೂಟಾನ್ದ

ಅಂದ್ ಬೈಟ್ ಕಾಪಾಳ ಕರ್ತ ಕಂಬುಳಿನ ತಾಂಡ ಮೇಲ್ ದುಂಬ ಪೋಲಾತಂಡ್ ಆ ಮಾಂಗ ಮರತ್ರ ಪಕ್ಕತೆ ಇಂಜ ಓರ್ ಜಿಗ್ಗಲ್ ಒಳಾಚಂಡತ್. ಆಚೇಂಗಿ, ಅಂದ್



ಬೈಟ್ ಕಾರಿಚ್ಚು ಏದೋ ಕಾರಣತ್ ಬಂದ್‌ಲೆ. ಪಿತ್ಯಾಂದ್ ನಲ್ಲ ಕುಯ್ನಿರ್‌ಟ್. ಎಲ್ಲಿ ನೋಟ್‌ನಕೊ ಇರ್‌ಟ್. ಬೈಟ್ ಪತ್ತ್ ಗಂಟೆರ ನೇರಕ್ ಓರ್ ಕಾಪಾಳ ಕರ್ತ ಕಂಬುಳಿನ ಪೊಲೆತಂಡ್, ಪ್ರಾಣಿರನ್ನೆ ಕೆ ಕಾಲ್, ಕೈರ ಸಹಾಯತ್ ನಡೆಂದಂಡ್ ಮಾಂಗಿ ಮರತ್‌ರ ಪಕ್ಕ ಇಂಜ ಜಿಗ್ಗರ ಪಕ್ಕಪೋಯಿತ್ ಅಳೆತತ್.

ಸುಮಾರ್ ಅರೆ ಗಂಟೆ ಕೈಂಜಪಿಳ್ಳಾ ಇಳ್ಳಾಶ್ಚೊಬ್ಬನೂ ಅನ್ನನೆ ಮಾಡಿತ್ ಓರ್ ಚಿರಿಯ ಮರತ್‌ರ ಮೊರ್‌ಡ್‌ಲ್ ಸದ್ವ್ ಮಾಡತೆ ಅಳೆತತ್. ಒಂದರೆ ಗಂಟೆ ಕೈಂಜಪಿಳ್ಳಾ ಎಣ್ಣೆಕ ನಡಪಾದ್ರೆರ ನೇರಕ್ ಕಾರಿಚ್ಚು ಮೆಲ್ಲೆ ಮಾಂಗಿ ಮರತ್‌ರ ಮೊರ್‌ಡ್‌ಕ್ ಬಂದಿತ್ ಮೆಲ್ಲೆ ಪತ್ತುವಕೂಡ್‌ಚಿ. ಅಂಜಾರ್ ಅಡಿ ಪತ್ತಿತಿಕ್ಕು. ಅಕ್ಕಣೆಕ್ ದಾರೊ ದಂಡಾಳ್ ಓಡಿ ಬಪ್ಪ ಸದ್ವ್ ಕೇಟತ್. ಕೂಡೆನ್ನೆ ಕಾರಿಚ್ಚು ತಪ್ಪಾಚಿಟ್ಟಿಂದ್ ಓಡೊಂಡೊಂದ್ ಪಾರಣೆಕ್ ಓರ್ ಕಾಪಾಳ ಕಾರಿಚ್ಚಂಡ ಬಲೆತೆ ಕಾಲೆನ ಬಲವಾಯಿತ್ ಪುಡ್‌ಚಿರ್‌ತ್. ಅಕ್ಕ ಕಾರಿಚ್ಚು ಕೇದಕ್ ಬುದ್ಧಿರ್‌ತ್. ಕೂಡೆನ್ನೆ ಇಳ್ಳಾಶ್ಚೊರ್ ಕಾಪಾಳ ಕಾರಿಚ್ಚಂಡ ಮೇಲೆ ಓರ್ ಕರ್ತ ಕಂಬುಳಿನ ಇಟ್ಟಿತ್ ಬಲವಾಯಿತ್ ಪುಡ್‌ಚಿರ್‌ತ್.

ಅಲ್ಲಿಂಜ ದಂಡಾಳೂ ಕೂಡಿಯಂಡ್ ಕಾರಿಚ್ಚಿನ ಕಂಬುಳಿ ಮುಚ್ಚಿಯಂಡ್ ಇಂಜನ್ನೆ ಕೇರ್‌ಲ್ ಮುರ್‌ಕ ಕೆಟ್ವೆಚಿ. ಇದಾನದು ಕಾರಿಚ್ಚಿನ ನೇತಿಯಂಡ್ ಅರಮನೆ ಕಟ್ಟಿದತ್‌ರ ಓರ್ ಇರ್‌ಟ್ ಕೋಂಬರೆಲ್ ಕೂಡಿತ್‌ಟ್ಟಿತ್ ಪಡಿ ಇಟ್ಟಿತ್. ಕಾಪಾಳಂಗ ಕೋಂಬರೆರ ಪೊರಮೆ ಬುದ್ಧಂಡತ್. ಕಾರಿಚ್ಚಂಗ್ ಕಂಬುಳಿರ ಒಳ್‌ಲ್ ಉಸಿರ್ ಕೆಟ್ವೆನನ್ನೆ ಆಚಿ. 'ತಾನ್ ಇಚ್ಚಕ್ ದಿನ ರಾಜಂಡ ಕೆಲಸಕಾರಕ್ ಕಾಟ್ವೆ ಇಂದ್ ಕೆಣ್‌ಂಜಿಟಲ್ಲ! ಇಳ್ಳಾ ನಾಕ್ ಚಾವು ತಪ್ಪನದಲ್ಲ. ಚಾಯುವಕೊ ರಾಜನ ಚಾಯಿತ್ ಬಜ್ಜಿತಿ ಚಾವೊಂಡೊ'ಂದ್ ಮನಸ್ಸೆಲ್ ಗೇನ ಮಾಡ್‌ಚಿ.

ಪಿತ್ಯಾಂದ್ ಪೊಲಾಕ ಆಚಿ. ಕಾರಿಚ್ಚಿನ ಪುಡ್‌ಚಿ ಸುದ್ದಿ ರಾಜಂಗೂ, ಅಂಪಂಡ ಕಾರ್ಯಕಾರಂಗಕೂ, ಪರಿವಾರಕೂ ಗೊತ್ತಾಚಿ. ರಾಜ ಪೊಲಾಕ ಪತ್ತ್ ಗಂಟೆಕ್ ತಾಂಡ ದಿವಾನ ಪಿಳ್ಳಾ ಕಾರ್ಯಕಾರಂಗಡ ಕೂಡೆ ಅರಮನೆರ ಪಕ್ಕತ ಪರಂಬ್‌ಲ್ ದರ್ಬಾರ್ ನಡೆತಿಯಂಡ್ ಇಪ್ಪಕ ಕಾರಿಚ್ಚಿನ ಪುಡ್‌ಚಿಬಪ್ಪಕ್ ಕಾಪಾಳಂಗಕ್ ಆಜ್ಞೆ ಮಾಡ್‌ಚಿ. ಅವು ಕಾರಿಚ್ಚಿನ ಕೆಟ್ವೆನನ್ನೆ ಈತಂಡ್ ಬಾತ್.

ರಾಜ, ಕಾರಿಚ್ಚಿನ ಚೆಡಿಲ್ ನೋಟಿತ್ "ಎಂತರಾ...ನಂಗಳ ಬಯ್ಯುವಕ್ ನೀಕ್ ಎಚ್ಚಕ್ ಧೈರ್ಯ ನಂಗ ದಾರ್‌ಂದ್ ನೀಕ್ ಗೊತ್ತುಂಡ್?"ಂದ್ ಕೇಟತ್.

ಅಕ್ಕ ಕಾರಿಚ್ಚು, ರಾಜ ತಾಂಡ ಒಕ್ಕಕಾರಳ ಇಲ್ಲಿಯತ ಮನೆ ಮಾರ್‌ಂಜ ಓಡ್‌ಚಿಟ್ಟಾನ ಎಣ್ಣೆಯಂಡೆ ಪಾಲೇರಿ ಒಡೆಯಂಡ ಕುತ್ತಿ ನಾಶ ಆಯಿಪೋಡ್, ಇಲ್ಲಿ ಅಂಬೆ ದುಂಬೆ

ಬೊಳಿಯಡ್ಂದ್ ಎಣ್ಣೆಚಿ.

ಇದ್ನ ಕೇಟ ರಾಜಂಗ್ ದುಂಬ ಚಿಡಿ ಬಂದ್ಂದ್. ಕೂಡನ್ನೆ ಕಾರಿಚ್ಚನ ಆನೆರ ಕಾಲ್ಕಕ್ ಕೆಟ್ಟಿತ್ ಅರಮನೆರ ಸುತ್ತೂ ಮೂಂದ್ ಕುರಿ ಈತಂಡ್ ಬಪ್ಪನ್ನೆಕೆ ಚಾವಡಿಕಾರಕ್ ಅಪ್ಪಣೆ ಮಾಡ್ಚಿ. ಅವು ಅನ್ನನೆ ಕಾರಿಚ್ಚನ ಆನೆರ ಕಾಲ್ಕಕ್ ಕೆಟ್ಟಿತ್ ಅರಮನೆರ ಸುತ್ತೂ ಬಲ್ಪಪ್ಪಚಿಟ್ಟಿತ್. ಅಕ್ಕ ಸಹ ಕಾರಿಚ್ಚ ರಾಜನ ಬಜ್ಜಂಡೆ ಇಂಜತ್. ಆನೆ ಅರಮನೆರ ದಂಡ್ ಸುತ್ ಬಂದಿತ್, ಮೂಂದನೆ ಸುತ್ ಸುರು ಮಾಡಣೆ ಕಾರಿಚ್ಚಂಡ ಜಿಂವ ಪೋಚಿ.

ಕಾರಿಚ್ಚಂಗ್ ಆನೆ ಈ ಮರಣದಂಡನೆನುಂಡ್ ಇಳ್ಳಿ ದಾರೂ ನಾಡ ವಿರುದ್ಧ ಸೊರ ಉತ್ತುಲೆಂದ್ ರಾಜ ಅಂದ್ಂಜ ನಿಶ್ಚಿಂತಲ್ ಇಂಜತ್.

ಅರಮನೆರ ಕೆಲಸ 1791ನೆ ಡಿಸೆಂಬರ್ಲಾ ತ್ಂದತ್. ಈಂಡ ಸುತ್ತೂ ಆಳವಾನ ಕುಂಡ್, ಕಡಂಗ್, ಪೊರ ಭಾಗತ್ ಎತ್ತರವಾನ ಮಣ್ಣರ ದ್ವೇಷಿನ ಮಾಡ್ಚಿಟ್ಟಿತ್.

ಕಾರಿಚ್ಚ ದುರ್ಮರಣ ಆನಪಿಳ್ಳಾ ಅಲ್ಲಿಯತ ಜನ ಕಾರಿಚ್ಚ ಕೂಳಿ ಆಯಿತ್ ಅರಮನೆರ ಸುತ್ತೂ ಬೈಟ್ ನೇರತ್ ತಿರಿ ಕಳಚಂಡ್ ಉಂಡ್ಂದ್ ಗೇನ ಮಾಡ್ಚಿ. ಆನಗುಂಡ್ ಜನ ಬೈಟಾಪಕ ಅರಮನೆರ ಪಕ್ಕ ಪೋಪದೆ ಇಂಜಾಲೆ. ಕೂಟ್ಕ ಚೊಪ್ಪಾಚಿ ಪಿಳ್ಳಾ ಬೊಳ್ಳಾಚಿರ ಮಜ್ಜಣತ್ ನೇರ ಆ ಬರಿ ಪೋಪಕೆ ಬೊತ್ತುವ ಇಂಜತ್. ಮಜ್ಜಣ ನೇರತ್ ಅಲ್ಲಿಕ್ ಪೋನಕ ಕಾರಿಚ್ಚಂಡ ಗಾಳಿ ತ್ಂದಿಯವ ಎಣ್ಣುವ ನಂಬಿಕೆ ಆಯಿಂಗಕ್ ಇಂಜತ್. ಇದ್ನ ಜನ ಎಚ್ಚಕರ ಮಟ್ಟಿಕೆ ನಂಬುವ ಇಂಜತ್ ಎಣ್ಣುಕ ಕಾರಿಚ್ಚಂಡ ಗಾಳಿ ತ್ಂದಿಪೋನಕ ಅವು ಬದ್ಕುಲೆಂದ್ ನಂಬಿತಿಂಜತ್!

ಪುಲಿಯಂಡ ಪೊನ್ನಪ್ಪ ವೀರರಾಜೇಂದ್ರನ ತಾನಾಯಿತೆ ತಾಂಗ್ ಮಗ್ಗುಲತ್ ನಾಲ್ಕಾಡ್ ಭೂಮಿರ ಬದ್ಲಾ ಭೂಮಿ ತಪ್ಪಾಚಿಡೊಂಡುಂಡ್ ಕೇಟತ್ಂದೂ, ಮಗ್ಗುಲ ಊರ್ ಚೋಕಂಡ ಮನೆರ ಪೊಣ್ಣಾಳೊಬ್ಬ ಪುಲಿಯಂಡ ಒಕ್ಕಕ್ ಮಂಗಲ ಆಯಿತ್ ಬಂದಿತಿಂಜತ್ಂದೂ, ಅವಡ ಪಿಳ್ಳಾ ಅವಡ ತಾಮನೆಕಾರಡ ತಕ್ಕಪೋಲೆ ಇನ್ನನೆ ಮಗ್ಗುಲ ಊರ್ಲಾ ಪೊನ್ನಪ್ಪಂಗ್ ಭೂಮಿನ ಕೇಪಕ್ ಮೊಳಿ ಆಚೀಂದೂ ಅರಿವಿಕೆ ತಂದಿತ್. ಕಾರಿಚ್ಚ ಬೈಟ್ ಮರ ಪತ್ತುವಕ ಅವಂಡ ಕೈಲ್ ಮದ್ದಾ ದುಂಬನ ತೋಕ್ ಇಪ್ಪ ಇಂಜತ್ಂದೂ, ಆನಗುಂಡ್ ಅವಂಡ ಪಕ್ಕ ಪೋಪಕ್ ಪಾರಕಾರ ಬೊತ್ತುವ ಇಂಜತ್ಂದೂ ಪುಲಿಯಂಡ ಮುತ್ತಪ್ಪ ಅವು ಅರಿಚಿಟ್ಟಿತ್.

## ವೀರರಾಜೇಂದ್ರ ಒಡೆಯ ಪಿಳ್ಳಾ ಟಿಪ್ಪುರ ಸೈನ್ಯಾಧಿಕಾರಿಯದ ಪದ

ವೀರರಾಜೇಂದ್ರ ಒಡೆಯ ಪಿರಿಯಾಪಟ್ಟ ಕೋಟೆಂಜ ತಪ್ಪಾಚಿಟ್ಟಂಡ್ ಬಪ್ಪಕ ಕೊಡಗಲ್ ಟಿಪ್ಪುರ ಅಧಿಕಾರಿಯ ಮಡಿಕೇರಿ, ಕುಶಾಲನಗರ, ಭಾಗಮಂಡಲ ಪಿಳ್ಳಾ ಬೆಪ್ಪುನಾಡ್‌ರ ಅರಮೇರಿಲ್ ಕೋಟೆ ಕೆಟ್ಟಿಯಂಡ್ ಅದತ್ ತಂಗಡ ಸೈನಿಕಂಗಡ ಠಾಣ್ತಾನ ಬೆಚ್ಚಿತಿಂಜತ್. ಕೊಗ್ಗಟ್ಟನಾಡ್‌ರ ಬಾಳೆಲೆಲ್ ಟಿಪ್ಪುರ ಆಶ್ರಿತ ಆಯಿತಿಂಜ ತಾಡಮರಿ ಮಲ್ಲಪ್ಪ ನಾಯಕಂಡ ಅಧಿಕಾರತ್ ಓರ್ ಚೆರಿಯ ಮರತ್‌ರ ಕೋಟೆ ಇಂಜತ್. ಸುಲ್ತಾನ ಮಡಿಕೇರಿ ಕೋಟೆನ ಜಾಫರ್‌ಕುಲಿಬೇಗ್ ಎಣ್ಣುವ ಖಿಲ್ಜಿದಾರಂಡ ಪುಡತತ್ ಕೊಡ್‌ತಿತ್, ಮಡಿಕೇರಿಕ್ ಜಾಫರಾಬಾದ್ ಎಣ್ಣುವ ಪೆದ ಕೊಡ್‌ತನ್ನೆಕ್ ಭಾಗಮಂಡಲಕೂ ಅಬ್ಬಲಾಬಾದ್ ಎಣ್ಣುವ ಪೆದ ಇಟ್ಟತ್.

ವೀರರಾಜೇಂದ್ರ ಒಡೆಯ ಜೈಲ್‌ಂಜ ತಪ್ಪಾಚಿಟ್ಟಂಡ್ ತಾಂಡ ರಾಜ್ಯಕ್ ಬಂದನ್ನೆಕ್ ಮಾಡುವಕ್ ದಂಡ್ ಕಾರ್ಬಾರ್ ಇಂಜತ್. ಅಂವ ತಾಂಡ ರಾಜ್ಯತ್‌ನ ಶತ್ರುವಳುಂಡ್ ಬುಡ್‌ತಿಯವದ್ ಪಿಳ್ಳಾ ತಾಂಡ ಪ್ರಜೆಯಡ ಭೂಮಿ, ಮನೆನ ಸುಲ್ತಾನಂಡ ಆಜ್ಞೆಪೋಲೆ ತಾಂಡ ಪುಡ್‌ತಕ್ ಎಡ್‌ತಂಡ್ ಅದ್‌ನ ಅನುಭವಿಚಿಟ್ಟಂಡ್ ಬಪ್ಪ ಇಂಜ ಮುಸಲ್ಮಾನ ಭೂ ಮಾಲೀಕಂಗಳುಂಡ್, ಆದವಾನಿ ರೈತಂಗಳುಂಡ್ ಬುಡ್‌ತಿಯಂಡ್ ಅದ್‌ನ ಪುನಾದಿಯ ತಾಂಡ ಪರಿವಾರಕ್ ಕೊಡ್‌ಪ್‌ಚಿಡುವ ಪಿಳ್ಳಾ ಅಯಿಂಗಕ್ ಭೂಮಿ ಕೃಷಿಕ್ ಅವಶ್ಯಪಟ್ಟ ಸಾಮಾನ್‌ನ ಕೊಡ್‌ಪ್‌ಚಿಡುವ.

ಈ ದಂಡ್ ಕಾರ್ಬಾರ್‌ನೊ ರಾಜ ಒರೇ ನೇರಕ್ ಮಾಡೊಂಡಿಂಜತ್. ಆನಗುಂಡ್ ಅಂವ ತಾಂಡ ಸಹಾಯಕ್ ಏರ ಕಣಕ್‌ಲ್ ಕುಂದ್ ಕಾಡ್‌ಲ್ ಒಳ್‌ಚಂಡ್ ಇಂಜ ಕೊಡಗರ ಜನ ತಾಂಡ ಪಕ್ಕ ಬಂದನ್ನೆಕ್, ಸುಲ್ತಾನಂಡ ಸೈನಿಕಂಗಡ ಠಾಣ್ತಂಜ ದೂರ ಆಯಿತಿಂಜ ಭೂಮಿಲ್ ಇಂಜ ಮುಸಲ್ಮಾನ ಭೂಮಾಲೀಕಂಗಳ ಆ ಭೂಮಿಂಜ ಓಡ್‌ಚಿಟ್ಟತ್. ಅನ್ನನೆ ತನ್ನ ಬೊತ್ತ್‌ಚಿಟ್ಟಿಯಿಂಗಳ ಕೊಂದಿತ್ ಇಟ್ಟತ್. ಆದವಾನಿ ರೈತಂಗಳ್ ಅಯಿಂಗಡ ಬಟ್ಟೆ ಖರ್ಚ್ ಚೆನ್ನಂಗ್ ಪಣ ಕೊಡ್‌ತಿತ್ ಅಯಿಂಗಡ ಸೀಮೆಕ್ ಲಯೆಚತ್. ಆ ಭೂಮಿ, ಮನೆನ ತಾಂಡ ಆಶ್ರಿತ ಕೊಡಗ್ ಜನಕ್ ಹಂಚಿತಿಟ್ಟತ್. ಇಚ್ಚೆಕೆ ಅಲ್ಲತೆ ಆ ಜನಕ್ ಮಿಳ್ಳಾತ ಭೂಮಾಲೀಕಂಗ ಬುಟ್ಟ್‌ಪೋನ ನೆಲ್ಲ, ಅತ್ತ ಕಡ್‌ಚಿ, ಪಾತ್ರ ಪದಾರ್ಥ್‌ನ ಹಂಚಿತ್ "ಇಳ್ಳಾ ಮಿಳ್ಳಾಕ್ ಧೈರ್ಯತ್ ನಿಂಗ ನಿಂಗಡ ಮನೆಲ್ ಚಾಯಿತೆ ಬದ್‌ಕೊಲು"ಂದ್ ತಕ್ಕ್ ಕೊಡ್‌ತತ್.

ಆಚೇಂಗಿ, ಈ ನೆಲ್ಲ, ಅತ್ತಕಡ್‌ಚಿಯ ಏರ ಇಲ್ಲತಾನಗುಂಡ್ ಅದ್‌ನ ಸುಲ್ತಾನ

ಮೈಸೂರ್ ಸೀಮೆಂಜ ಸುಲಿಗೆ ಮಾಡಿಯಂಡ್ ಬಪ್ಪಕೂ, ಸುಲ್ತಾನಂಡ ಕೊಡಗ್ಗರ ಸೈನಿಕ ಠಾಣ್ಯಕ್ ಮೈಸೂರ್ಂಜ ಬಂದಂಡಿಂಜ ಉಣ್ಣತೀನಿರ ಸಾಮಗ್ರಿ ಪಿಳ್ಳಾ ಬೊಡಿ ಮದ್ದಾನ ತಾಂಡ ಪುಡ್ತಕಕ್ ಎಡ್ತವಕೂ, ವೀರರಾಜೇಂದ್ರ ತಾಂಡ ಜನಳ ಕೂಟಿಯಂಡ್ ಕೊಡಗ್ಗ ಸೀಮೆರ ತೆರಿಲ್ ಇಂಜ ಸಿದ್ವೇಶ್ವರಂಡ ಕುಂದ್ ತಾಂಡ ಪಾಳೆಯತ್ ಬುಟ್ಟತ್.

ಅಲ್ಲಿ ಇಂಜಂಡ್ ವೀರರಾಜೇಂದ್ರ ಮೈಸೂರ್ ಸೀಮೆ ತೆರಿಕ್ ಬಂದನ್ನಕೆ ಬಿಸಲೆ ಘಟ್ಟತಂಜ ವೈನಾಡ್ ತೆರಿಕಾಲೆ ತಿರಿಯಂಡ್ ಪೊವ್ವಲ್ ಕೊಡಗ್ಗರ ತೆರಿರ ಒಳ್ಳಲ್ ಇಂಜ ಮುಸಲ್ಮಾನಂಗಡ ಕೂಡ ಪಡೆ ಪೊತ್ತಿತ್ ಕೊಡಗ್ಗರ ಪೂರ್ವೆ ಓಡ್ಚಿಟ್ಟಂಡ್ ಬೈಟ್ ನೇರತ್ ಮೈಸೂರ್ ಸೀಮೆಕ್ ಪೋಯಿತ್ ನೆಲ್ಲ್ರನ್ನತಾನ ಲೂಟಿ ಮಾಡಿತ್ ತಾಂಡ ಜನಕ್ ಕೊಡ್ತಿತ್ ಚೆನ್ನಂಗ್ ತಿಂಗ ಕೈಚತ್. ಈ ನೇರತ್ ಕೊಡಗ್ಗರ ಸ್ಥಿತಿ ಪಿಳ್ಳಾ ರಾಜಂಡ ಚಟುವಟಿಕೆನ ಅರ್ಥ ಆಪನ್ನಕೆ ಟಿಪ್ಪು ಸುಲ್ತಾನಂಡ ಕಾಲತ್ ಚರಿತ್ರನ ಎಳ್ವ್ವಿನ ವಿಲ್ಲ್ವ ನಿರೂಪಣೆ ಮಾಡಿತ್.

ವೀರರಾಜೇಂದ್ರ ಒಡೆಯ ಮೈಸೂರ್ ಕೊಡಗ್ಗ ತೆರಿಲ್ ಇಂಜಂಡ್ ಕೊಡಗ್ಗಲ್ ಇಂಜ ಮುಸಲ್ಮಾನ ಭೂಮಾಲೀಕಂಗಳ ಕೊಡಗ್ಗಂಜ ಪೊಜ್ಜಿ ದೊವ್ವತಿಯಂಡ್ ಉಳ್ಳ ಸುದ್ದಿನ ಕೊಡಗ್ಗಂಜ ಓಡಿ ಬಂದ ಮುಸಲ್ಮಾನಂಗ ಟಿಪ್ಪುಕ್ ಅರಿಚಿಟ್ಟತ್. ಅಕ್ಕ ಟಿಪ್ಪು, ವೀರರಾಜೇಂದ್ರನ ಅಕ್ಕಲೆ ಅಡ್ಕತ ಪೋಚೇಂಗಿ ಮಿಳ್ಳಾಕ್ ಕೊಡಗ್ಗ ರಾಜ್ಯ ತಾಂಡ ಕೈಬುಟ್ಟ್ ಪೋಪ ಎಣ್ಣುವ ಪೋಡಿಲ್ ಬಕ್ಸಿ ಗುಲಾಮ್, ಗಾಜಿಖಾನ್ ಪಿಳ್ಳಾ ದಿಲೇರ್ ದಿಲಾಖಾನ್ ಕೂಡ ಬಲ್ಯ ಕಾಲಾಳುವಡ ಪಿಳ್ಳಾ ಕುದರೆ ಸವಾರಿಯಡ ಸೈನ್ಯತಾನ ಕೊಡಗ್ಗಕ್ ಅಯೆಚತ್.

ಬಕ್ಸಿಗುಲಾಮಲ್ಲಿ ಸಿದ್ವೇಶ್ವರಂಡ ಗದ್ದಿಗೆಕಾಲೆ ಕೊಡಗ್ಗಕ್ ನುಗ್ಗಚಿ. ತೆರಿಲ್ ಅವಂಡ ಸೈನಿಕಂಗಕೂ, ಕೊಡಗ್ಗರ ಸೈನಿಕಂಗಕೂ ಚೆರಿಯ ಪಡೆ ನಡ್ಂದತ್. ಕೊಡಗ್ಗರ ಸೈನಿಕಂಗಡ ಪಕ್ಕ ಇಂಜ ತೋಕ್ ಮದ್ದ್ ಬೆರಿಯ ತೇಂದ್ ಪೋನಾಂಗ್ ಅವು ಪಡೆಲ್ ಬೆಮ್ಮರಿಯಂಡಿಯಾಚಿ.

ಈ ನೇರತ್ ಬಕ್ಸಿ ಗುಲಾಮಲ್ಲಿ ಕೊಡಗ್ಗರ ಒಳ್ಳಕ್ ನುಗ್ಗಿತ್ ಇಲ್ಲಿಂಜ ರೈತಂಗಡ ನೆಲ್ಲ್, ಅಕ್ಕಿ ಪಿಳ್ಳಾ ಅತ್ತ ಕಡ್ಚಿಯಳ ಸೂರೆ ಮಾಡ್ಚಿ. ಕಾಡ್ ಸೇರಿತಿಂಜ ಕೊಡಗ್ಗ ಜನಡ ಕುಟುಂಬತ್ ಮಕ್ಕಳ ಪುಡ್ಚಂಡ್ ಕುಂದ್ಕಾಡ್ಕ್ ಬಟ್ಟೆ ಕಾಟುವನ್ನಕೆ ಇಲ್ಲಿ ಜೀಶಕ್ ಪೊಲೆಯಳ ಪುಡ್ಚಂಡ್ ಚೆರಿಯ ತುಕ್ಕಡಿ ಮಾಡಿತ್ ಅಯಿಂಗಡ ಕೂಡ ಮಲೆಕಾಡ್ಕ್ ಅಯೆಚತ್.

ಈ ನೇರತ್ ಮಲಬಾರ್ ಚರಕಲ್ ರಾಜ ಕಾಡ್ ಕೂಡಿತ್ ಇಂಜ ಕೊಡಗ್ಗರ

ಜನದ ಮಕ್ಕಳ ಪುಡ್‌ಚಂಡ್ ಬಪ್ಪಕ್ ಗುಲಾಮಲ್ಲಿರ ಸಹಾಯಕ್ ತಾಂಡ ಚೆನ್ನಂಗ್ ನಾಯಮ್ಮಾರ, ತಾಂಡ ಕಾರ್ಯಕಾರಡ ಕೂಡೆ ಕೊಡಗಲ್ ಇಂಜ ಗುಲಾಮಲ್ಲಿರ ಪಾಳೆಯಕ್ ಅಯೆಚತ್. "ಗುಲಾಮಲ್ಲಿ ನಂಗಡ ಬರಿಂಜ ಚೆನ್ನಂಗ್ ಸೈನ್ಯ ತಪ್ಪ. ಅಯಿಂಗಡ ಕೂಡೆ ನಿಂಗಲೂ ಕೂಡಿಯಂಡ್ ಕಾಡಲ್ ಉಳ್ಳ ಕೊಡಗರ ಜನದ ಮಕ್ಕಳ ಪುಡ್‌ಚಂಡ್ ಬರೊಂಡೂ"ಂದ್ ಚರಕಲ್ ನಾಯಮ್ಮಾರ್‌ಕೂ, ಅಯಿಂಗಡ ಕಾರ್ಯಕಾರಿಯಕೂ ಎಣ್ಣೆತ್ ಕೊಡಗರ ಒಳ್‌ಕ್ ಅಯೆಚತ್.

ಕೊಡಗರ ಜನಳ ತೇಡಿಯಂಡ್ ನಾಯಮ್ಮಾರ ಪಿಳ್ಳಾ ಗುಲಾಮಲ್ಲಿಯ ಸೈನಿಕಂಗ ಪಾಡಿ ನಾಲ್ಕಾಡ್‌ರ ತಿರಿಕೆರ ಪಕ್ಕ ಬಾತ್. ಆಚೀಂಗಿ, ಅಲ್ಲಿ ಇಂಜ ಕೊಡವ ತಂಗಳ ತೇಡಿಯಂಡ್ ಬಂದ ನಾಯಮ್ಮಾರಳ ಪೊಜ್ಜೆತ್ ದೊವ್‌ತ್‌ಚಿ. ನಾಯಮ್ಮಾರ ಪೋಪಕ ಆ ತಿರಿಕೆಕ್ ತಿತ್ತಟ್ಟಿತ್ ಮಲಯಾಳಕ್ ಓಡಿಪೋಚಿ. ಗುಲಾಮಲ್ಲಿರ ಚೆನ್ನಂಗ್ ಜನ ಕೊಡಗರ ಜನಳ ತೇಡಿಯಂಡ್ ಪೋಪಕ ಅವು ಚೆರಿಯ ಬಟ್ಟೆನ ತಡೆ ಮಾಡಿಯಂಡ್, ಮದ್ಲ್ ತೇರಣೆಕೂ ಅಯಿಂಗಕ್ ಬೊಡಿ ಬೆಚ್ಚಿತ್, ಮದ್ಲ್ ತೇಂದಪಿಳ್ಳಾ ಕತ್ತಿ ಎಡ್‌ತಂಡ್ ಅಯಿಂಗಡ ಮೀದ ಬುದ್ದಂಡ್ ಕೆತ್ತಿತ್ ಇಡುವ ಇಂಜತ್. ಇನ್ನನೆ ಓರಂದ್ ದಿನತ್ ಎಕ್ಕೋಲು ಐಂಬದ್ ಅರುವದಾಳ್ ಚಾವಾನ ಅರೊಂಜ ಗುಲಾಮಲ್ಲಿ ಆ ಊರೊಂಜ ತಾಂಡ ಜನಳ ವಾಪಾಸ್ ಕಾಕಿತ್, ನಾಡ್‌ಸೀಮೆಲ್ ಪರಂಬ್‌ರ ಜಾಗತ್ ಇಂಜ ರೈತಂಗಡ ಮನೆಮಾರ್‌ನ ಲೂಟಿ ಮಾಡಿಯಂಡ್, ತಿತ್ತ ಇಡ್‌ಚಿಟ್ಟಿಂಡ್ ಇಂಜತ್.

### ವೀರರಾಜೇಂದ್ರ ಒಡೆಯನುಂಡ್ ಕುಶಾಲನಗರ ಕೋಟೆರ ವಶ

ಈಂಡೆಡಲ್ ವೀರರಾಜೇಂದ್ರ ಒಡೆಯ, ಬುರಾನುದ್ದೀನ್ ಉಣ್ ತೀನಿರ ಸಾಮಾನ್ ಎಡ್‌ತಂಡ್ ಕೊಡಗಕ್ ಸೈನ್ಯತೋಡೆ ಬಪ್ಪ ಸುದ್ದಿನ ಅರೊಂಜಂಡ್, ಅಂಪ ಕೊಡಗನ್ ಎತ್ತುವಾಂಗ್ ಮುಪ್ಪಡೆ ಮಳೆಗಾಲತ್‌ರ ಒಳ್‌ಲ್ ಸುಲ್ತಾನಂಡ ಅಧಿಕಾರಿಯಡ ಪುಡ್‌ತತ್ ಇಂಜ ನಾಲ್ ಕೋಟೆನ ತಾನ್ ಮುತ್ತಿಗೆ ಇಟ್ಟಿತ್ ಪುಡ್‌ಚವಂಡೂಂದ್ ತೀರ್ಮಾನ ಮಾಡ್‌ಚಿ.

ಸುಲ್ತಾನಂಡ ಸೈನ್ಯ ಠಾಣ್ಣಾತ್ ಇಂಜ ನಾಲ್ ಕೋಟೆಲ್ ಕುಶಾಲನಗರತ್‌ರ ಕೋಟೆ ಕೊಡಗ್ ಮೈಸೂರ್ ತೆರಿಲ್ ಇಂಜಂಡ್ ಸಾಮಾನ್ ಸಮೇತ ಬುರಾನುದ್ದೀನ್ ಎತ್ತುವ ಮುಪ್ಪಡೆ ಕೋಟೆ ಆಯಿತಿಂಜತ್. ಸುಲ್ತಾನಂಡ ಸೈನಿಕಂಗ ಈ ಕೋಟೆರ ಕೆಂವತ್‌ನ ಬಲ



ಪಡ್ತಿಯುಂಡ್ ಇಂಜತ್. ಆನಗುಂಡ್ ಬುರಾನುದ್ದೀನ್ ಕುಶಾಲನಗರ ಕೋಟೆನ ಎತ್ತುವಾಂಗ್ ಮುಪ್ಪಡೆ ಆ ಕೋಟೆನ ತಾನ್ ಪುಡ್‌ಚವಂಡೂಂದ್ ತೀರ್ಮಾನ ಮಾಡ್‌ಚಿ.

ಇದ್‌ಂಗಾಯಿತ್ ವೀರರಾಜೇಂದ್ರ ಒಡೆಯ ಚೇಷ್ಟ ಶುದ್ಧ ದಶಮಿರ ದಿನ ಎಣ್ಣಿಕ 1789ನೆ ಜೂನ್ ತಿಂಗತ್ 1500 ಕೊಡಗರ ಜನಳ ಕೂಟಿಯುಂಡ್ ನಂಜರಾಯಪಟ್ಟತಾರ ತಿರಿಕೆಲ್ ಇಳೊಂಜುಂಡ್, ಅಲ್ಲಿ ನಾಲಂಜಿ ದಿನ ಇಂಜಿತ್ ಕುಶಾಲನಗರ ಕೋಟೆನ ಪುಡ್‌ಚವಕ್ ಸೆರಿಯಾನ ತಯಾರಿ ಮಾಡಿಯುಂಡ್ ಇಂಜತ್. ಈಂಡೆಡೆಲ್ ಅವ ಕುಶಾಲನಗರ ಕೋಟೆಲ್ ಪಡೆ ಪೊಪ್ಪ ಜನ ಎಚ್ಚಕ್ ಉಂಡ್. ಆ ಕೋಟೆ ಎಚ್ಚಕ್ ಬಲ್‌ಜನೆ ಉಂಡ್. ಸೈನಿಕಂಗ ಕೋಟೆರ ಪಕ್ಕ ಬಂದಿತ್ ಎಲ್ಲಿ ನಿಂದವಲು, ನಂಗ ಆ ಕೋಟೆರ ಪಕ್ಕ ಪೋನಕ ಅದ್‌ಂಡ ಒಳ್‌ಲ್ ಉಳ್ಳ ಜನ ಕಂಡಿತ್ ಜಗಳಕ್ ಬಂದ್‌ರಾವ, ಬೊತ್ತಿಯುಂಡ್ ಬೊಡಿ ಬೆಕ್ಕೂಂದ್ ತಾಂಡ ಗೂಢಚಾರಂಗಳುಂಡ್ ವಿಷಯ ಅರಂಜವ ಇಂಜತ್.

ವೀರರಾಜೇಂದ್ರ ಒಡೆಯ ಇನ್ನನೆ ನಂಜರಾಯಪಟ್ಟ ತಿರಿಕೆಲ್ ನಾಲ್ ದಿನ ಇಂಜಿತ್ ನಾಲನೆ ದಿನ ಮಜ್ಜಣತಾರ ಮೀದ ಅಲ್ಲಿಂಜ ಪೊರ್‌ಟಿತ್ ಒಯಿಪತ್ ನೇರಕ್ ಮುಪ್ಪಡೆ ಮಡಿಕೇರಿ ಕುಶಾಲನಗರ ಬಟ್ಟೆಲ್ ಸುಮಾರ್ ಓರ್ ಮೈಲ್ ಒಳ್‌ಕ್ ಉಳ್ಳ ಬೈಚನಪ್ಪ ಕೆರೆರ ಕೊಡಿಲ್ ಇಂಜ ಪರಂಬ್‌ಲ್ ತಾಂಡ ಜನಡ ಕೂಡೆ ನೆಲೆ ನಿಂದತ್. ಅಂದ್ ಒಯಿಪತ್ ನೇರತ್ ಅವ ಕೋಟೆರ ಭದ್ರತೆನ, ಕೋಟೆರ ಒಳ್‌ಲ್ ಜನಡ ತಾಕತ್ತನ ಅರಂಜವಕ್ ತಾಂಡ ಕಡೆರ ಚೆನ್ನಂಗ್ ಜನಳ ಕೋಟೆರ ಪಕ್ಕ ಅಯಿಚತ್.

ಕುಶಾಲನಗರ ಕೋಟೆರ ಮುಳ್ಳುಸೋಗೆ ಊರ್‌ಲ್ ಕಾವೇರಿ ಪೊಳೆರ ಎಡ್‌ತೆಬರಿಲ್ ಸುಮಾರ್ ಒಂದರೆ ಫರ್ಲಾಂಗ್ ದೂರತ್ ಎತ್ತರ ಆಯಿತ್ ಸಮತಟ್ಟ್ ಜಾಗತ್‌ರ ಪರಂಬ್‌ಲ್ ಕೆಟ್ಟನದಾಯಿತಿಂಜತ್. ಇದ್‌ಂಡ ಪೊರ್‌ಮೆ ಓರ್ ಕುಂಡ್, ಅದ್‌ಂಡ ಪೊರ್‌ಮೆ ಸುತ್ತೂ ಎತ್ತರ ದ್‌ಟ್ಟೆ ಇಂಜತ್. ಈ ದ್‌ಟ್ಟೆ ನಡುಕೆತ್ತನೆ ಬಲ್ಯಬಲ್ಯ ಕಲ್ವಾನುಂಡ್ ಕೆಟ್ಟಿತಿಂಜತ್. ಈ ಕೋಟೆಕ್ ಪೂರ್ವ ದಿಕ್ಕಲ್ ಓರ್ ಬಲ್ಯ ಪಡಿ ಇಂಜತ್. ಅದ್‌ಂಡ ಎಡ್‌ತೆ ಬರಿ ಒಂದರೆ ಫರ್ಲಾಂಗ್‌ಲ್ ಕಾವೇರಿ ಪೊಳೆ ಪರಿವ ಇಂಜತ್. ಬೇನಿಲ್ ಈ ಪೊಳೆಕ್ ಇಳೊಂಜಿತ್ ದಾಟೊಲಿಂಜತ್.

ವೀರರಾಜೇಂದ್ರ ಒಡೆಯ ಕೋಟೆರ ಪಕ್ಕ ಅಯಿಚ ಚೆನ್ನಂಗ್ ಜನ ಬಲ್ಯ ಪಡಿರ ಎದಿಕೆ ಪರಂಬ್‌ನ ಎತ್ತನನ್ನೆ ಇವು ಚೆನ್ನ ಜನಾಂದ್ ಅರಂಜಿತ್ ಕೋಟೆರ ಒಳ್‌ಂಜ ಇನ್ನೂರ್ ಜನ ಪೊರ್‌ಮೆ ಬಂದಿತ್ ಇಯಂಗಡ ಮೀದ ಬೊಡಿ ಬೆಚ್ಚಿತ್ ಇಯಂಗಳ ಬಯ್ಯಕ್ ಓಡ್‌ಚಿಟ್ಟತ್. ಇವು ವಾಪಾಸ್ ಓಡಿಬಂದಂಡ್ ಉಳ್ಳಾನ ಕಂಡ ವೀರರಾಜೇಂದ್ರ

ಇವು ಪುಕ್ಕಲಂಗಾಂದ್ ಛೀಮಾರಿ ಇಟ್ಟಿತ್ ಅಯಿಂಗಡ ಸಹಾಯಕ್ ತಾಂಡ ಕೂಡೆ ಇಂಜ ಜನಳೆಲ್ಲ ಅಯೆಚತ್. ಇಯಂಗಡ ಮೇಲಧಿಕಾರಿ ಆಯಿತ್ ಕಾರ್ಯಕಾರ ಕುಲ್ಲೇಟಿ ಪೊನ್ನಣ್ಣನ ಅಯೆಚತ್.

ಕಾರ್ಯಕಾರ ಕುಲ್ಲೇಟಿ ಪೊನ್ನಣ್ಣ, ವೀರರಾಜೇಂದ್ರ ಒಡೆಯಂಡ ಆಪ್ತ ಕಾರ್ಯಕಾರಡಾತ್ ಒಬ್ಬ. ಇಂವಂಡ ಅಣ್ಣ ಮಾಣಿಚ್ಚ ದುಂಬಾ ಧೈರ್ಯಶಾಲಿ, ಶೂರ. ಇವು ವೀರರಾಜೇಂದ್ರ ಒಡೆಯ ಪಿರಿಯಾಪಟ್ಟಿತ್ ಜೈಲ್‌ಲ್ ಇಪ್ಪಕ ಕೊಡಗಲ್ ಸುಲ್ತಾನಂಡ ಆಳ್ವಿಕೆರ ವಿರುದ್ಧ ಜನಳ ಕೂಟಿಯಂಡ್ ಗೆಡಿಗಡಿ ಜಗಳಕ್ ಬಪ್ಪ ಇಂಜತ್. ಆನಗುಂಡ್ ಸುಲ್ತಾನಂಡ ಸೈನಿಕಂಗ ನೂರಂಬಡತ್ ಕುಲ್ಲೇಟಿ ಮನೆನ, ನೆರೆಕರ ರೈತಂಗಡ ಮನೆನ ಚುಟ್ಟಿತ್‌ಟ್ಟಿತ್. ವೀರರಾಜೇಂದ್ರ ಒಡೆಯ ಕೋಟೆರಾಜಂಡ ಬಲೆಂಜ ತಪ್ಪಾಚಿಟ್ಟಂಡ್ ಬಂದಪಿಳ್ಳಾ ಕೋಟೆರಾಜ ಮರೆನಾಡ್‌ಕ್ ಬಂದಿತ್ ವಾಪಾಸ್ ಓಡಿಪೋಪಕ ಅವನ ಪಿತ್ತಾಂಡ್ ಪುಡಿಪಕ್ ಪೋನ ಮುಕ್ರಿಯಡಾತ್ ಕುಲ್ಲೇಟಿ ಪೊನ್ನಣ್ಣನೂ ಒಬ್ಬ. ಕೋಟೆ ರಾಜನ ಪುಡಿಪಕ್ ಕಯ್ಯತೆ ಪೋನಕ ಅವ ಬೋರೆ ಜನಡ ಕೂಡೆ ಪಿಳ್ಳಾ ತಾಂಡ ಜನಡ ಕೂಡೆ ಪೋಯಂಡಿಂಜ ನಾಗಪ್ಪಯ್ಯನ ಪುಡ್‌ಚಂಡ್ ಬಾತ್.

ಈಂಗಾಯಿತ್ ವೀರ ರಾಜೇಂದ್ರ ಒಡೆಯ ಪೊನ್ನಣ್ಣನ ತಾಂಡ ಓರ್ ಕಾರ್ಯಕಾರನಾಯಿತ್ ಎಣ್ಣಕ ಸೈನ್ಯಾಧಿಕಾರಿ ಆಯಿತ್ ಮಾಡ್‌ಚಿ. ಇಂವನ ಅಣ್ಣ ಮಾಣಿಚ್ಚ ಇಂವನ ಪಾಡಿ ನಾಲ್ಕಾಡ್‌ಲ್ ಗುಲಾಮಲ್ಲಿರ ಸೈನಿಕಂಗಡ ಸಾಸತ್ ಪೋರಾಡಿತ್ ಅಯಿಂಗಳ ಚೋಪ್‌ಚಿಟ್ಟಿತ್. ತಿರಿತ್ ಗುಲಾಮಲ್ಲಿ ಬಲ್ಯ ಸೈನ್ಯತನ ಎಡ್‌ತಂಡ್ ಪೆಗ್ಗಳಕಾಲೆ ಮಲಯಾಳಕ್ ಪೋಯಂಡಿಪ್ಪಕ ವೀರರಾಜೇಂದ್ರಂಡ ನಾಯಕತ್ವತ್ ಆ ಸೈನ್ಯತನ ತಡ್‌ತಿತ್ ಚೋಪ್‌ಚಿಡುವಾತ್ ಪೊನ್ನಣ್ಣ ಏರ ಸಾಸ ಕಾಟ್‌ಚಿ. ಇನ್ನೆತ ವೀರನ ಇಕ್ಕ ವೀರರಾಜೇಂದ್ರ ಒಡೆಯ ಕುಶಾಲನಗರ ಕೋಟೆನ ಪುಡ್‌ತತ್ ಬೆಚ್ಚವಕ್ ತಾಂಡ ಜನಡ ನಾಯಕ ಆಯಿತ್ ಅಯೆಚತ್.

ದಂಡನೆ ಕುರಿ ಕೋಟೆರ ಬಲ್ಯ ಪಡಿರ ಎದಿಕೆ ಆದ್ ಚೆನ್ನಂಗ್ ಕೊಡಗರ ಜನ ಪೋಚಿ. ಇದ್‌ಂಡ ಮೀದ ಬೊಡಿ ಬೆಚ್ಚಂಡ್ ಜನಳ ಓಡ್‌ಚಿಟ್ಟು ಪುರ್‌ಡ್‌ಲ್, ಕೋಟೆರ ಒಳ್‌ಲ್ ಇಂಜ ಜನ ಏರ ಕಣಕ್‌ಲ್ ಪೊರ್‌ಮೆ ಬಂದಿತ್ ಇಯಂಗಡ ಮೀದ ಬೊಡಿ ಪಾರ್‌ಚಿಟ್ಟಿತ್. ಅಕ್ಕ ಪೊನ್ನಣ್ಣ, ಅವಂಡ ಕೂಡೆ ಇಂಜ ಬಾಕಿ ಜನಳೂ ಇಯಂಗಡ ಮೀದ ಒಮ್ಮತೆ ಬೊಡಿ ಪಾರ್‌ಚಿಟ್ಟಿತ್. ಇಯಂಗಡ ಕಣಕ್ ಏರ ಇಂಜಾನುಂಡ್ ಕೋಟೆರ ಜನ ಇಯಂಗಳ ಓಡ್‌ಚಿಟ್ಟಂಡ್, ತಂಗಳೂ ಕೋಟೆರ ಒಳ್‌ಕ್ ನುಗ್ಗಿತ್ ಅಲ್ಲಿ ಇಯಂಗಡ ಮೀದ ಬುದ್ದತ್. ಅಕ್ಕ ಕೋಟೆರ ಒಳ್‌ಲ್ ಇಂಜ ಏಳ್‌ನೂರ್ ಜನ ಪಿಳ್ಳಾ ಪಾರಕಾರ ನೆಲ್ವಿರ ಆ ಬೊಳಿಲ್ ಬೈಟ್ ಕೋಟೆ ಬುಟ್ಟಿತ್ ಕಾವೇರಿ ಪೊಳೆನ ದಾಟಿತ್

ಬೆಟ್ಟದಪುರಕಾಲೆ ಓಡುವಕ್ ನೋಟಾಚಿ. ಓಡಿಯಂಡುಳ್ಳ ಈ ಜನಳ ಕೊಡಗುರ ಜನ ದೊರ್ವತಿಯಂಡ್ ತಂಗಳೂ ಪೋಪಕ ಸುಮಾರ್ ಮುನ್ನೂರ್ ಜನಳ ಕೆತ್ತಿತ್‌ಚ್ಚಿತ್. ಅಲ್ಲಿಂಜ ಪೊಳೆ ದಾಟಿತ್ ದಂಡ್ ಮೈಲ್‌ರ ದೂರತ್ ಅಟ್ಟಿಯಂಡ್ ಪೋಯಿತ್ ಇನ್ನೂರ್ ಜನಳ ಕೊಂಡತ್. ಆ ಜನಡ ಮಧ್ಯ ಅಲ್ಲಿ ಇಂಜ ಕುಶಾಲನಗರ ಕೋಟೆರ ಕಿಲ್ಲೆದಾರಂಡ ಮಂಡೆನ ಕುಲ್ಲೇಟಿ ಪೊನ್ನಣ್ಣಂಡ ಶೌರ್ಯತ್‌ನ ಮೆಚ್ಚಿತ್ ಅವಂಗ್ ಎಚ್ಚಕೊ ಇನಾಂ ಕೊಡ್‌ತತ್. ಬೈಚನಳ್ಳಿ ಕೆರೆರ ಬರಿಯತ ಪರಂಬ್‌ಲ್ ವೀರ ರಾಜೇಂದ್ರಂಡ ಡೇರೆರ ಎದಿಕೆ ಪೊನ್ನಣ್ಣ ಕುಶಾಲನಗರ ಕೋಟೆರ ಕಿಲ್ಲೆದಾರಂಡ ಮಂಡೆನ ಕೊಂಡ ಬಂದ ಜಾಗತ್ ವೀರರಾಜೇಂದ್ರ, ಒಡೆಯ ಓರ್ ಕಲ್ಲಾನ ನೆಟ್ಟಿತ್ ಅದ್‌ಂಗ್ ಕುಲ್ಲೇಟಿ ಪೊನ್ನಣ್ಣಂಡ ಕಲ್ಲಾ ಎಣ್ಣುವ ಪೆದ ಬೆಚ್ಚಿತ್ ಎಣ್ಣುವ ಕೆಟ್ಟಾಕತೆ ಉಂಡ್.

ವೀರರಾಜೇಂದ್ರ ಒಡೆಯ ಪಿತ್ಯಾಂದ್ ಪೊಲಾಕ ಆ ಕೋಟೆರ ಒಳ್‌ಹ್ ನುಗ್ಗಿತ್ ಅಂದ್ ಅಲ್ಲಿಯೆ ಇಂಜತ್. ಪಿತ್ಯಾಂದ್ ಪೊಲಾಕ ಕೋಟೆರ ಒಳ್‌ಲ್ ಕೆಟ್ಟಾನ ಸಾಮಾನ್‌ಲ್ ಅರಮನೆರ ಮದ್ಲಾ, ಬೊಡಿ, ತೋಕ್ ಇನ್ನತ ಪಡೆರ ಸಾಮಾನ್‌ನೆಲ್ಲ ನಾಲ್‌ನಾಡ್ ಅರಮನೆಕ್ ಅಯೆಚಿತ್, ಬಾಕಿ ಇಂಜ ಬಟ್ಟೆ ಬರಹೆ, ನೆಲ್ಲಾ, ಪಂಚಲೋಹ, ಅತ್ತ ಕಡ್‌ಚಿ ಇನ್ನತಾನ ತಾಂಡ ಜನಕ್ ಹಂಚಿ ಕೊಡ್‌ತತ್. ಅಲ್ಲಿಂಜ ಕೋಟೆರ ಎದಿಕೆ ಶತ್ರುವಡ ಉಪಯೋಗಕ್ ಬರತನ್ನಕೆ ಗೇನ ಮಾಡಿತ್ ಕೋಟೆರ ಒಳ್‌ಂಜ ಮರತ್‌ರ ಕಟ್ಟಡಕ್ ತಿತ್ ಕೊಡ್‌ತಿತ್ ಚುಟ್ಟಿತ್. ಇನ್ನನೆ ಕುಶಾಲನಗರತ್‌ರ ಕೋಟೆನ ಪುಡ್‌ಚೆಂಡ್ ಅಲ್ಲಿಂಜ ಸುಲ್ತಾನಂಜ ಜನಳ ನಾಶ ಮಾಡ್‌ನಪಿಳ್ಳಾ ವೀರರಾಜೇಂದ್ರ ಒಡೆಯನ ತಾಂಡ ಜನಡ ಕೂಡೆ ನಾಲ್ಕಾಡ್ ಅರಮನೆಕ್ ಬಾತ್. ಇಚ್ಚ ಕಾಕಣೆ ಮಳೆಗಾಲ ಸುರು ಆಪನ್ನಕೆ ಇಂಜತ್.

ಕುಶಾಲನಗರ ಕೋಟೆರ ಅವಶೇಷತ್‌ನ ಕುಶಾಲನಗರತ್‌ರ ಗಣಪತಿ ತಿರಿಕೆಂಜ ಕಾವೇರಿ ಪೊಳೆಕ್ ಅಡ್ಲ ಆಯಿತ್ ಕೆಟ್ಟಾನ ಸೇತುವೆಕ್ ಪೋಪ ಬಟ್ಟೆರ ಎಡ್‌ತೆ ಬರಿ ಎತ್ತರತ್‌ರ ಜಾಗತ್ ಇಂದೇಕೂ ಕಾಂಗೊಲು. ಆಚೀಂಗಿ, ಈ ಕೋಟೆ ಕೆಂವತ್‌ರ ಬಲ್ಯ ಬಲ್ಯ ಕಲ್ಲಾನ ಇದ್‌ಂಡ ಪಕ್ಕ 1846-48ತ್ ಕೆಟ್ಟಾನ ಕಾವೇರಿ ಪೊಳೆರ ಅಡ್ಲ ಆಯಿತ್ ಬಲ್ಯ ಸೇತುವೆನ ಕೆಟ್ಟುವಕ್ ಬಳ್‌ಸಾನಾಂಗ್ ಕೋಟೆರ ಮನಾರ ಗುರ್‌ತ್ ಇಕ್ಕ್ ಕೆಟ್ಟಲೆ. ಆಚೀಂಗಿಯೂ ಕೋಟೆರ ಚೆನ್ನಂಗ್ ಇಟ್ಟಿಗೆ ಕೆಂವ, ಅದ್‌ಂಡ ಪೊರ್‌ಮೆತ ಕುಂಡ್ ಇಕ್ಕ್‌ಲೂ ಕಾಂಬ ಕೆಟ್ಟುವ.



## ವೀರರಾಜೇಂದ್ರ ಒಡೆಯನುಂಡ್ ಬೆಪ್ಪುನಾಡ್ ಕೋಟೆರ ವಶ

ವೀರರಾಜೇಂದ್ರ ಒಡೆಯ ಕುಶಾಲನಗರ ಕೋಟೆನ ತಾಂಡ ಪುಡ್ತಕ್ ಎಡ್ತಂಡ್ ದಂಡ್ ತಿಂಗ ಮಳೆಗಾಲತ್‌ನ ನಾಲ್ಕಾಡ್‌ಲೆ ಕೈಚತ್. ಅಲ್ಲಿಂಜ ಅದೇ ಕಾಲ ಎಣ್ಣಕ 1789ನೆ ಆಗಸ್ಟ್ ತಿಂಗತ್ ತಾಂಡ ಜನಳ ಕೂಟಿಯಂಡ್ ಬೆಪ್ಪುನಾಡ್‌ರ ಮರತ್‌ರ ಕೋಟೆಕ್ ಮುತ್ತಿಗೆ ಇಟ್ಟತ್. ಅಲ್ಲಿ ಅನಂತಪುರ ಜಿಲ್ಲೆರ ರಾಯದುರ್ಗತ್‌ರ ಜನ ಪಾರಕಾರ. ಅಪು ವೀರರಾಜೇಂದ್ರ ಒಡೆಯಂಡ ಜನಡ ಎದಿಕೆ ನಿಪ್ಪಕಯ್ಯತೆ ಶರಣಾಗತಂಗಳಾಚಿ. ಅಕ್ಕ ವೀರರಾಜೇಂದ್ರ ಒಡೆಯ ಆ ಕಿಲ್ಲೆದಾರಂಗೂ, ಪಾರಕಾರಕೂ ಅಯಿಂಗಡ ಸ್ವಂತ ಸಾಮಾನ್ ಸಾಹಿತ್ಯತ್‌ನ ಎಡ್ತಂಡ್ ಕೊಡಗ್‌ಂಜ ಪೊರ್‌ಮೆ ಪೋಪಕ್ ಬುಟ್ಟತ್. ಅಲ್ಲಿಂಜ ಕೋಟೆರ ಒಳ್‌ಕ್ ಪೋನ ರಾಜ ಪಡೆರ ಉಪಕರಣತ್‌ನೆಲ್ಲ ನಾಲ್ಕಾಡ್ ಅರಮನೆಕ್ ಕಡ್‌ತ್‌ಚಿಟ್ಟತ್, ಅಕ್ಕಿ ನೆಲ್ಲ, ಅತ್ತ ಕಡ್‌ಚಿಯಳ ಕೊಡಗ್‌ರ ಜನಕೆ ಹಂಚಿತ್ ಕೊಡ್‌ತತ್. ಅಲ್ಲಿಂಜ ಆ ಮರತ್‌ರ ಕೋಟೆನ ತಿತ್‌ಟ್ಟಿತ್ ಚುಟ್ವಾರ್‌ತ್. ನಾಲ್ಕಾಡ್ ಅರಮನೆಕ್ ಪೋಯಿತ್ ಮಿಳ್ಳಾಕ್ ಸುಲ್ತಾನಂಡ ಸೈನಿಕಂಗಳ ಎದ್‌ರ್‌ಚಿಡುವಕೂ, ಭಾಗಮಂಡಲ ಕೋಟೆರ ಮೀದ ಪುಡ್‌ತ ಬೆಚ್ಚುವಕೂ ತಯಾರಿ ಮಾಡ್‌ಚಿ.

ಬೆಪ್ಪುನಾಡ್‌ರ ಅರಮನೆಕೇರಿರ ಮರತ್‌ರ ಕೋಟೆನ ಚುಟ್ಟಿತ್‌ಟ್ಟಿತ್, ತಂಗಳ ಅಲ್ಲಿಂಜ ಅಯೆಚ ಸುದ್ದಿನ ಕೋಟೆರ ಕಿಲ್ಲೆದಾರ, ಶ್ರೀರಂಗಪಟ್ಟಿತ್ ಇಂಜ ಬುರಾನುದ್ದೀನ್‌ರ ಕೂಡೆ ಎಣ್ಣಚಿ. ಅಕ್ಕ ಬುರಾನುದ್ದೀನ್ "ಇಣ್ಣಿ ಕೊಡಗ್‌ಕ್ ಪೋಪಕ್ ತಡ ಮಾಡ್‌ನಕ ಕೊಡಗ್ ಮನಾರ ತಂಗಡ ಕೈ ತಪ್ಪಿ ಪೋಪ" ಎಣ್ಣವ ಪೋಡಿಲ್ ತಾಂಡ ಕೂಡೆ ಸೈದಾಹಮಿದ್ ಸಿಫಾದಾರ್, ಹಜರತ್ ಖಾನ್ ಗೋರಿ ಸಿಫಾದಾರ್, ಅಕ್ಕರ್ ಮನವರಿ ಸಿಫಾದಾರ್ ಪಿಣ್ಣ ಹಾಫಿಜ್ ಮುರುತ್ವ ಶಪಾದಾರ್‌ನ ಕೂಟಿಯಂಡ್ ಬಲ್ಯ ಸೈನ್ಯತೋಡ್ ಕೊಡಗ್‌ಲ್ ತಂಗಡ ಸ್ವಾಧೀನತ್ ಉಳ್ಳ ದಂಡ್ ಕೋಟೆಕ್ ಬೋಂಡಿಯಾನ ಸಾಮಾನ್ ಎಡ್‌ತಂಡ್ ಪೊರ್‌ಟತ್.

ಆಚೇಂಗಿ, ಕೊಡಗ್‌ರ ತೆರಿನ ಎತ್ತುವಾಂಗ್ ಮುಪ್ಪಡೆ ಬುರಾನುದ್ದೀನ್ ತಾಂಡ ಬಲ್ಯ ಸೈನ್ಯತ್‌ನ ತುಕಡಿ ಆಯಿತ್ ಮಾಡಿತ್, ಒಂದಾನ ಸೈದ್ ಹಮೀದ್ ಸಿಫಾದಾರ್‌ರ ಅಧೀನತ್ ಅರಕಲಗೂಡ್ ಬಟ್ಟೆಕಾಲೆ ಯಡವನಾಡ್‌ಕ್ ಅಯೆಚತ್. ಇಣ್ಣೋರ್ ತುಕಡಿನ ತಾಂಡ ಕೂಡೆ ಇಂಜ ಶೇಕ್ ಅನ್ನರ್ ಸಿಫಾದಾರ್‌ರ ಕೂಡೆ ಕ್‌ಗ್ಗಟ್ ನಾಡ್‌ರ ಬಾಳೆಲೆ ಊರ್‌ಕಾಲೆ ಕೊಡಗ್‌ಕ್ ಅಯೆಚತ್. ಅಲ್ಲಿಂಜ ಬಾಕಿ ಇಂಜ ತುಕಡಿರ ಕೂಡೆ ಸಾಮಾನ್‌ನ ಕಡ್‌ತಿಯಂಡ್ ಬುರಾನುದ್ದೀನ್ ಸಿದ್ವೇಶ್ವರ ಕುಂದ್‌ಕಾಲೆ ಬಂದಿತ್ ಅಮ್ಮತ್ತಿಲ್ ಇಣ್‌ಂಜತ್. ಆ ನೇರತೆ ಸೈದ್‌ಹಮೀದ್ ಶೇಕ್ ಅನ್ನರ್ ಯಡವನಾಡ್‌ಲೂ,

ಅಮ್ಮತ್ತಿನಾಡ್‌ರ ಕಾವಾಡಿಲೂ ತಂಗಡ ಜನಡ ಕೂಡೆ ಬಂದಿತ್ ಇಳ್‌ಂಜತ್.

ಸುಲ್ತಾನಂಡ ಸೈನ್ಯಾಧಿಕಾರಿಯ ಸೈನ್ಯತೋಡೆ ಕೊಡಗರ ಬೋರೆ ಬೋರೆ ಭಾಗತ್ ಬಂದಿತ್ ಇಳ್‌ಂಜಾನ ವೀರರಾಜೇಂದ್ರ ಒಡೆಯ ಕೇಟಿತ್, ಸೈದ್ ಹಮೀದ್‌ರ ಕೂಡೆ ಪೋರಾಡುವಕ್ ತಾಂಡ ಆಪ್ತನಾನ ಹೊಂಬಾಳೆ ನಾಯಕಂಡ ಕೂಡೆ ಬೋಂಡಿಯಾನ ಜನಳ ಯಡವ ನಾಡ್‌ಕ್ ಅಯೆಚಿತ್.

ಬುರಾನುದ್ದೀನ್‌ರ ಕೂಡೆ ಪೋರಾಡುವಕ್ ಏರ ಜನಳ ಕೂಟಿಯಂಡ್ ತಾನ್ ನಾಲ್ಕಾಡ್‌ಂಜ ಅಮ್ಮತ್ತಿ ಊರಾರ ಬರಿಯ ಪೊರಾಟತ್. ಅನ್ನನೆ ಪೋಪಕ ಬಟ್ಟೆಲ್ ಕಾವಾಡಿಲ್ ಇಂಜ ಶೇಕ್ ಅನ್ನರಾರ ಜನ ಮೇಲೆ ಬುದ್ದಿತ್ ಸುಮಾರ್ ಅಳ್ಳಾರಾಳ್‌ಕ್ ಚಾವು, ನೊಂಬಲ ಆಚಿ. ಅಕ್ಕ ಶೇಕ್ ಅನ್ನರಾರ ಜನ ಕಮ್ಮಿ ಆನಾಂಗ್ ಅಂವಂಗ್ ಪೋರಾಟ ನಡ್‌ತುವಕ್ ಕಯ್ಯತೆ ಬಾಕಿ ಇಂಜ ಜನಳ ಕೂಟಿಯಂಡ್ ಅಮ್ಮತ್ತಿಲ್ ಇಂಜ ಬುರಾನುದ್ದೀನ್‌ರ ಸೈನ್ಯತನ ಕೂಡಿಯಂಡತ್.

ಈಂಡ ಪಿತ್ಯಾಂಡ್ ಬುರಾನುದ್ದೀನ್ ತಾಂಡ ಸೈನ್ಯತೋಡೆ ಸಾಮಾನ್ ಕಡ್‌ತಿಯಂಡ್ ಭಾಗಮಂಡಲಕ್ ಎತ್ತುವಕ್ ಕಡಿಯತ್ನಾಡ್‌ಕಾಲೆ ಪೊರಾಟತ್. ಅನ್ನನೆ ಪೋಪಕ ಕೊಡಗರ ಜನ ಅಂವಂಡ ಮೀದ ಬುದ್ದಿತ್ ಚೆನ್ನಂಗ್ ನಷ್ಟ ಮಾಡ್‌ಚಿ. ಆಚೇಂಗಿಯೂ ಬುರಾನುದ್ದೀನ್ ಕೂಟಾಕತೆ ಮಿಳ್ಳಾಕ್ ಪಾಡಿನಾಲ್ಕಾಡ್‌ರ ಸೂಮಾರಂಭ ಪರಂಬಾಲ್ ಇಳ್‌ಂಜತ್.

ಈ ನೇರತ್ ವೀರರಾಜೇಂದ್ರ ಒಡೆಯ ತಾಂಡ ಜನಳ ಕೂಟಿಯಂಡ್ ಬುರಾನುದ್ದೀನ್ ತಾಂಡ ಸೈನ್ಯತೋಡೆ ಭಾಗಮಂಡಲಕ್ ಪೋಪ ಬಟ್ಟೆಲ್ ಮಾವಟ್ಟಿ ಎಣ್ಣುವ ಇಕ್ಕಟ್ಟಾರ ಜಾಗತ್ ಬುರಾನುದ್ದೀನ್ ಜನಡ ಮೀದ ಪಾರಿ ಬೂವಕ್ ಕಾತಂಡ್ ಇಂಜತ್. ಶೇಕ್ ಅನ್ನರ ಸೈನ್ಯತೋಡೆ ಮಾವಟ್ಟಿಕ್ ಎತ್ತುವಕ್ ವೀರರಾಜೇಂದ್ರ ಒಡೆಯ ತಾಂಡ ಜನಳ ಕೂಟಿಯಂಡ್ ಪಾರಿ ಬುದ್ದತ್. ಆ ಪೋರಾಟತ್ ಬುರಾನುದ್ದೀನ್‌ರ ಎಚ್ಚಕೋ ಜನ ಚಿತ್ತತ್. ಅಂವ ಕೊಂಡಬಂದ ಸಾಮಾನ್‌ಲ್ ಚೆನ್ನಂಗಾನ ವೀರರಾಜೇಂದ್ರ ಎಡ್‌ತಂಡತ್. ಬಾಕಿ ಇಂಜಾನ ಬುರಾನುದ್ದೀನ್ ಎಡ್‌ತಂಡ್ ಅಂದೇ ಒಯಿಪತ್ ನೇರಕ್ ಭಾಗಮಂಡಲ ಕೋಟೆ ಎತ್ತ್‌ಚಿ.

ಆಚೇಂಗಿ, ಅಂವ ಕಡ್‌ತಿಯಂಡ್ ಬಂದ ತೀನಿರ ಸಾಮಾನ್ ಆ ಕೋಟೆಲ್ ಇಂಜ ಸೈನಿಕಂಗಕ್ ಪೋರತಾಚಿ. ಪಿರಿಯಾಪಟ್ಟಿತ್‌ಂಜ ಪುನಾದಿಯ ಕೊಂಡಂಡ್ ಬಪ್ಪದ್ ಕಷ್ಟಂದ್ ಅರ್‌ಂಜ ಬುರಾನುದ್ದೀನ್, ಮೆಣಸಿನಘಟ್ಟಕಾಲೆ ಪೋಯಿತ್ ತುಳುನಾಡ್‌ಂಜ ಸಾಮಾನ್‌ನ ಕೊಂಡ ಬಪ್ಪಕ್ ಸೈನ್ಯತೋಡೆ ಪೊರಾಟತ್ ಪಟ್ಟಿ ಎಣ್ಣುವ ಜಾಗಕ್

ಬಂದಿತ್ತೆಚಿ.

ಅಕ್ಕಣೆಕ್ ಅಲ್ಲಿ ಕೊಡಗರ ಜನ ಪೋಯಿತ್ ಇಯಂಗಡ ಮೀದ ಪಾರಿಬುದ್ಧಿತ್ ಸುಮಾರ್ ಅಳ್ಳೂರ್ ಜನಕ್ ಚಾವು, ನೊಂಬಲ ಆಚಿ. ಇದಾನೆಲ್ಲ ಕೂಟಾಕತೆ ಬುರಾನುದ್ದೀನ್ ತಾಂಡ ಬಾಕಿ ಇಂಜ ಜನಳ ಕೂಟಿಯಂಡ್ ತುಳುನಾಡ್ ಪೋಯಿತ್ ಬೊಂಡಿಯಾನ ಸಾಮಾನ್‌ನೆಲ್ಲ ಎಡ್‌ತಂಡ್ ಅದೇ ಬಟ್ಟೆಕಾಲೆ ವಾಪಾಸ್ ಬಾತ್.

ಅಕ್ಕಲೂ ಕೊಡಗಕಾರ ಬುರಾನುದ್ದೀನ್‌ನ ತಡ್‌ತಿತ್ ಪೋರಾಡ್‌ಚಿ. ಆನಗುಂಡ್ ಚೆನ್ನಂಗ್ ಸಾಮಾನ್‌ನ ಅಲ್ಲಿಯೆ ಬುಟ್ಟಿತ್ ಬುರಾನುದ್ದೀನ್ ಪಾದಿ ಭಾಗತನ ಮಾತ್ರ ಎಡ್‌ತಂಡ್ ಭಾಗಮಂಡಲ ಕೋಟೆಕ್ ಬಾತ್. ನಾಲ್‌ದಿನ ಈ ಕೋಟೆಲೆ ಇಂಜಂವಂಗ್ ಉಂಬತಿಂಬಕುಳ್ಳ ಸಾಮಾನ್ ಪೋರತಾನದ್ ಗೊತ್ತಾಚಿ.

ಈನಗುಂಡ್ ದಂಡನೆ ಕುರಿ ತುಳುನಾಡ್ ಪೊರ್‌ಟ ಬುರಾನುದ್ದೀನ್‌ನ ಕೊಡಗರ ಜನ ತಡ್‌ತತ್. ಅಕ್ಕ ಅವ ತಾಂಡ ಜನಳ ಕೂಟಿಯಂಡ್ ಭಾಗಮಂಡಲಕ್ ಬಂದ ಬಟ್ಟೆಲೆ ಬೆಪ್ಪುನಾಡ್‌ಕ್ ಬಂದಿತ್ ಅಲ್ಲಿ ಅಂದ್ ಬೈಟ್ ಒಳ್‌ಂಜತ್. ಪಿತ್ಯಾಂದ್ ಅಲ್ಲಿಂಜ ಪೊರ್‌ಟಿತ್ ಮಲಯಾಳತ್ ಉಳ್ಳ ಟಿಪ್ಪು ಸುಲ್ತಾನಂಡ ಸೈನ್ಯತನ ಕೂಡಿಯವಕಾಯಿತ್ ಪೆಗ್ಗಳಕ್ ಬಂದಿತ್ ಕುಂದ್ ಇಳ್‌ಂಜಂಡ್ ಇಂಜತ್. ಅಲ್ಲಿಯೂ ಜನ ತಡ್‌ತಿತ್ ಮಿಳ್ಳಾಕ್ ನಡ್‌ಪಕ್ ಬುಟ್ಟಾಲೆ. ತಾಂಡ ಸುಮಾರ್ ಸೈನಿಕಂಗ ಚೆತ್ತಪಿಳ್ಳಾ ಬುರಾನುದ್ದೀನ್ ಸಿದ್ವೇಶ್ವರ ಕುಂದ್‌ಕಾಲೆ ಶ್ರೀರಂಗಪಟ್ಟಕ್ ಪೋಚಿ. ಭಾಗಮಂಡಲ ಪಿಳ್ಳಾ ಬೊರೆ ಬರಿಲ್ ಇಂವಂಡ ಸೈನ್ಯಕ್ ಆನ ಸೋಲ್‌ನ ಯಡವನಾಡ್‌ಲ್ ಹೊಂಬಾಳೆ ನಾಯಕಂಡ ಕೂಡೆ ಪಡೆ ಪೊತ್ತಂಡ್ ಇಂಜ ಸೈದ್ ಹಮೀದ್ ಕೇಟಿತ್ ಬೊತ್ತಿತ್ ಶ್ರೀರಂಗಪಟ್ಟಕ್ ಪೋಯಿತ್ ಬುರಾನುದ್ದೀನ್‌ರ ಸೈನ್ಯತನ ಕೂಡಿಯಂಡತ್.

ಅನ್ನನೆ ಸೈದ್‌ಹಮೀದ್, ಶೇಕ್‌ಅನ್ಸರ್, ಬುರಾನುದ್ದೀನ್ ಈ ಮೂಂದ್ ಸುಲ್ತಾನಂಡ ಸರದಾರಂಗ ಸೈನ್ಯತೋಡೆ ಗೆಜ್ಜಲಹಟ್ಟಿ ಕುಂದ್‌ಕಾಲೆ ಇಳ್‌ಂಜಿತ್ ಟಿಪ್ಪುರ ಸೈನ್ಯತನ ಕೂಡಿಯಂಡತ್. ಇದಾಯಿತ್ ಮೂಂದ್ ತಿಂಗ ಕೈಂಜದು ಪ್ರಪ್ಪ ತಿಂಗತ್ ಗೋವಿಂದರಾವ್ ಪಿಳ್ಳಾ ಮಲ್ಲಪ್ಪನಾಯಕ ಇಯಂಗಡ ನಾಯಕತ್ವತ್ ಓರ್ ಚೆರಿಯ ಸೈನ್ಯ ಮಡಿಕೇರಿ ಕೋಟೆಕ್ ಉಣ್‌ತೀನಿರ ಸಾಮಾನ್‌ನ ಎತ್ತೆಚಿದುವ ಇಂಜತ್.

ವೀರರಾಜೇಂದ್ರ ಒಡೆಯ ತಾಂಡ ಜನಡ ಕೂಡೆ ಹೊರೂರ್ ನಾಲ್ಕಾಡ್‌ರ ನಗದಾಳತ್ ಅಯಿಂಗಡ ಬಟ್ಟೆ ತಡ್‌ತಿತ್ ಓಡ್‌ಚಿಟ್ಟತ್. ಅವು ಕೊಂಡಬಂದಿತಿಂಜ ಸಾಮಾನ್, ಅತ್ತಕಡ್‌ಚಿಯ, ಆಯುಧ ಇನ್ನತಾನ ಎಡ್‌ತಂಡ್ ಕೊಡಗರ ಜನಕ್ ಹಂಚಿತ್ ಕೊಡ್‌ತತ್. ವೀರ ರಾಜೇಂದ್ರ ಶತ್ರುಸೈನ್ಯತನ ಚೋಪ್‌ಚಿಟ್ಟಿತ್ ವಾಪಾಸ್ ಬಪ್ಪಾಂಡ

ಒಳ್ಳೆ ಸುರೂಲೆ ಎಣ್ಣೆನನ್ನೆ ಕೋಟೆರಾಜ ತೆಂಕ ಮುತ್ತಣ್ಣನ ಮುಳ್ಳು ಕುರುಬಂಡ ಕೂಡೆ ಕುರ್ಚಿ ಅರಮನೆಕ್ ಅಯೆಚಿತ್ ಅಲ್ಲಿ ಇಂಜ ರಾಜ ಕುಟುಂಬಕಾರಳ ಕೊಲ್ಚಿಚಿಟ್ಟತ್. ಅನ್ನನೆ ಅರಮನೆನ ಸುಲಿಗೆ ಮಾಡಿತ್ ಚುಟ್ಟಿತ್‌ಚುಟ್ಟಿತ್. ವೀರರಾಜೇಂದ್ರ ಕುರ್ಚಿಕ್ ಪೋಯಿತ್ ಆನ ದುರ್ಘಟನೆನ ನೋಟಿತ್ ಬೇಜಾರ ಪಟ್ಟಿಂಡ್ ನಾಲ್ವಾಡ್ ಅರಮನೆಕ್ ಪೋಚಿ. ಅಲ್ಲಿ ಒಂದರೆ ತಿಂಗ ಇಂಜಿತ್ ಮಿಳ್ಳಾಕ್ ಮಳೆಗಾಲತರ ಒಳ್ಳೆಲ್ ಭಾಗಮಂಡಲ ಕೋಟೆನ ಪುಡ್‌ತಕ್ ಎಡ್‌ತಪಕ್ ತಯಾರಿ ಮಾಡಿಯಂಡ್ ಇಂಜತ್.

### ವೀರರಾಜೇಂದ್ರ ಒಡೆಯ ಭಾಗಮಂಡಲ ಕೋಟೆನ ವಶ ಪಡ್‌ತನದ್

ಭಾಗಮಂಡಲ ಕೋಟೆ ಇಕ್ಕ ಅಲ್ಲಿ ಉಳ್ಳ ಭಗಂಡೇಶ್ವರ ಪಿಳ್ಳಾ ಬೋರೆ ತಿರಿಕೆರ ಸುತ್ತೂ ಬಲ್ಯ ಬಲ್ಯ ಮರತರ ಕುಟ್ಟಿನುಂಡ್ ಕೆಟ್ಟಾನ ಕೋಟೆ ಆಯಿತಿಂಜತ್. ಈ ಕೋಟೆರ ಆಗ್ನೇಯ ಪಿಳ್ಳಾ ಈಶಾನ್ಯ ಬರಿಲ್ ಕಾವೇರಿ ಪಿಳ್ಳಾ ಕನಿಕೆ ಪೊಳೆ ಪರಿವ ಇಂಜತ್. ಇಕ್ಕ ಉಳ್ಳ ತಿರಿಕೆ ಎಲ್ಲ ಅಕ್ಕಲೂ ಇಂಜತ್. ಆಚೇಂಗಿ, ಸುಲ್ತಾನ ಅಲ್ಲಿ ತಾಂಡ ಸೈನ್ಯತನ ಸ್ಥಾಪನೆ ಮಾಡುವಾಂಗ್ ಮುಪ್ಪಡೆ ಅಲ್ಲಿ ಇಂಜ ಪಟ್ಟಿಮ ಸ್ಥಳೀಯ ಜನಡ ಕೂಡೆ ಆ ತಿರಿಕೆಲ್ ಇಂಜ ಲಿಂಗ ಪಿಳ್ಳಾ ವಿಗ್ರಹತನ ಎಡ್‌ತಂಡ್ ಶತ್ರುವ ಪೋಪ ಕಯ್ಯತನ್ನತ ಸುರಕ್ಷಿತ ಜಾಗಕ್ ಪೋನನ್ನೆ ಕಾಂಬ. ಹಿಂದೂ ದೇಶತರ ಇತಿಹಾಸತ್ ಪರ ಧರ್ಮೀಯ ಶತ್ರುವ ಪಡೆ ಪೊತ್ತಂಡ್ ಬಪ್ಪಕ ಆಯಾಯ ಜಾಗತರ ಜನಳ ಅಲ್ಲಿಯತ ತಿರಿಕೆರ ಲಿಂಗ ಪಿಳ್ಳಾ ವಿಗ್ರಹತನ ಕಣತರಕ್ ಇಡುವ ಇಲ್ಲೇಂಗಿ ಭದ್ರವಾನ ಜಾಗಕ್ ಎಡ್‌ತಂಡ್ ಪೋನದ್ ಇಲ್ಲಿ ಗೊತ್ತ್ ಕೊಟ್ಟುವ.

ವೀರರಾಜೇಂದ್ರ ಒಡೆಯ ನಾಲ್ವಾಡ್ ಅರಮನೆಲ್ ಭಾಗಮಂಡಲ ಕೋಟೆನ ತಾಂಡ ಪುಡ್‌ತತ್ ಬೆಚ್ಚವಕ್ ತಯಾರಿ ಮಾಡಿಯಂಡ್ ಸೌಮ್ಯ ಸಂವತ್ಸರತರ ಮಾಘಮಾಸತ್ ಎಣ್ಣೆಕ 1790ನೆ ಫೆಬ್ರವರಿ ತಿಂಗತ್ ತಾಂಡ ಸೈನ್ಯ ಪಿಳ್ಳಾ ಪಡೆರ ಉಪಕರಣತನ ಎಡ್‌ತಂಡ್ ಬಂದಿತ್ ಭಾಗಮಂಡಲ ಕೋಟೆಕ್ ಮುತ್ತಿಗೆ ಇಟ್ಟತ್. ಆ ಕೋಟೆರ ಪಕ್ಕತ್ ಪರಂಜಂಡುಳ್ಳ ಕಾವೇರಿ ಪೊಳೆರ ಬಲೆತೆಬರಿ ಉಳ್ಳ ಮುಂಬಾರತು ಕುಂದಾರ ಕೊಡಿಲ್ ತಾಂಡ ಫಿರಂಗಿನ ಬೆಪ್ಪಿಚಿಟ್ಟತ್. ಅಲ್ಲಿ ಫಿರಂಗಿಕ್ ಮದ್ದ್ ದುಂಬ್‌ಚಿಡುವವು ಮದ್ದ್ ದುಂಬ್‌ಚಿಟ್ಟ್ ಕೊಡ್‌ತನ್ನೆ ವೀರರಾಜೇಂದ್ರ ಒಡೆಯ ತಾನೆ ಗುರಿ ಬೆಚ್ಚಿತ್ ಕೋಟೆಕ್ ಬೊಡಿ ಪಾರ್‌ಚಿಡುವ ಇಂಜತ್.

ಕೋಟೆರ ಒಳ್ಳೆಲ್ ಇಂಜ ಸುಲ್ತಾನಂಡ ಜನ ರಾಜಂಡ ಮೀದ ಫಿರಂಗಿಲ್ ಬೊಡಿ ಪಾರ್ಚಿಡುವ ಇಂಜತ್. ಇನ್ನನೆ ಅಂಜಿ ದಿನಕೆತ್ತನೆ ಬೊಡಿ ಪಾರ್ಚಿಟ್ಟಿಪಿಳ್ಳಾ ಭಾಗಮಂಡಲ ಕೋಟೆ ವೀರರಾಜೇಂದ್ರಂಡ ಪುಡ್ತಕ್ ಬಾತ್. ಆ ಕೋಟೆರ ಒಳ್ಳೆಲ್ ಇಂಜ ಫಿರಂಗಿ ಮದ್ದ್, ಚಿಲ್ಲ್ ಇನ್ನತಾನ ರಾಜ ನಾಲ್ವಾಡ್ ಅರಮನೆಕ್ ಕಡ್ತಚಿಟ್ಟತ್. ವೀರರಾಜೇಂದ್ರ ಫಿರಂಗಿ ಪಾರ್ಚಿಡುವಕ ಭಗಂಡೇಶ್ವರ ತಿರಿಕೆರ ಮಾಡಿಕ್ ಪೊದ್ಪಾಚಿಟ್ಟಿ ತಾಮ್ರತ್‌ರ ತಗಡ್‌ಲ್ ಎದಿಕೆತ ಮೂಂದ್ ತಗಡ್ ತುಂಡಾಚಿ. ಆನಗುಂಡ್ ರಾಜ ತಾಮ್ರತ್‌ರ ಬದಲ್ ಬೊಳ್ಳಿರ ತಗಡ್‌ನ ಪೊದ್ಪಾಚಿಟ್ಟತ್. ಅದ್ ಇಕ್ಕಲೂ ಉಂಡ್. ಅಂದ್‌ಂಜ ಭಾಗಮಂಡಲ ತಿರಿಕೆಲ್ ಪುನಾದಿಯ ಲಿಂಗ ಪಿಳ್ಳಾ ವಿಗ್ರಹತ್‌ರ ಪ್ರತಿಷ್ಠಾಪನೆ ಆಯಿತ್ ನಿತ್ಯ ಪೂಜೆ ಸುರುವಾಚಿ.

ಸುಲ್ತಾನ ಭಾಗಮಂಡಲಕ್ ಬಂದಿತಿಪ್ಪಕ ಆ ಜಾಗಕ್ ಅಬ್ಬಲಾಬಾದ್‌ಂದ್ ಪೆದ ಇಟ್ಟಿತಿಂಜತ್. ತಿರಿಕೆರ ಪೊರಮೆ ನೆಟ್ಟಿತುಳ್ಳ ಸುಮಾರ್ 11ನೆ ಶತಮಾನತ್‌ರ ತಮಿಳ್ ಶಾಸನತ್‌ರ ಕಲ್ಲ್‌ನ ಸುಲ್ತಾನಂಡ ಸೈನಿಕಂಗ ಕತ್ತಿಂಜ ಕೆತ್ತಿತ್ ಬಿರ್‌ಕ್ ಮಾಡಿತುಂದ್ ಪಂಡುಂಜೆ ಬಂದ ಹೇಳಿಕೆ ಉಂಡ್.

ವೀರರಾಜೇಂದ್ರ ಒಡೆಯ ಭಾಗಮಂಡಲ ಕೋಟೆನ ತಾಂಡ ಪುಡ್ತಕ್‌ಎಡ್‌ತಂದಪಿಳ್ಳಾ ಕೊಡಗ್‌ಕ್ ಮುಟ್ಟಿಯಂಡಿತಿಂಜ ಸುಲ್ತಾನಂಗ್ ಸೇರ್‌ನ ತುಳುನಾಡ್ ಸೀಮೆ, ಅರಕಲಗೂಡ್, ಕೊಣನೂರ್ ಸೀಮೆನ ತಾನೆ ಪಡ್‌ಂದವಂಡೂಂದ್ ಗೇನ ಮಾಡ್‌ಚಿ. ಈಂಗಾಯಿತ್ ವೀರರಾಜೇಂದ್ರ ಹೊಂಬಾಳೆ ನಾಯಕಂಡ ಕೂಡೆ ಕೊಡಗರ ಚೆನ್ನಂಗ್ ಜನಳ ಮೆಣಸಿನ ಘಟ್ಟಕಾಲೆ ತುಳುನಾಡ್‌ಕ್ ಅಯೆಚಿತ್. ಹೊಂಬಾಳೆ ನಾಯಕ ತುಳುನಾಡ್‌ಲ್ ಇಂಜ ಸುಲ್ತಾನಂಡ ಸೈನಿಕಂಗಡ ಕೂಡೆ ಪೋರಾಡಿತ್ ಅಮರಸುಳ್ಳ ಮಾಗಣೆರ ಬರಿ ಮಂಗಳೂರ್ ತಾಲೋಕರ ಪಕ್ಕ ಇಂಜ ಸೀಮೆನ ವಶ ಪಡ್‌ತಚಿ. ಅಲ್ಲಿಂಜ ಮೊಗರ್ನಾಡ್ ಪೊಳೆರ ಪಕ್ಕ ಓರ್ ಮಣ್ಣಾರ ಕೋಟೆನ ಕೆಟ್ಟಿತ್ ಅಲ್ಲಿ ಚೆನ್ನಂಗ್ ಕೊಡಗರ ಜನಳ ಆ ಸೀಮೆರ ಎಚ್ಚರಕ್ ಆಕಿತ್ ಈ ವಿವರತ್‌ನ ರಾಜಂಗ್ ಬಿನ್ನವತ್ತಳೆರ ಮೂಲಕ ಅರಿಚಿಟ್ಟತ್.

ಅಕ್ಕ ರಾಜ ಹೊಂಬಾಳೆ ನಾಯಕ ಗೆದ್ದ ಸೀಮೆಕ್ ಅಮಲ್ಕಾರ ಆಯಿತ್ ನೇಮಕ ಮಾಡ್. ಹೊಂಬಾಳೆ ನಾಯಕಂಡ ಪುಡ್ತತ್ ಇಂಜ ಕೊಡಗರ ಜನ ಆ ಸೀಮೆಲ್ ಅಲ್ಲಲ್ಲಿ ಬೆಕ್ಕಂಡಿಯ ಠಾಣ್ಯಕ್ ಅವಶ್ಯ ಉಳ್ಳಚ್ಚಕ್ ಜನಳ ಬುಟ್ಟಿತ್ ಬಾಕಿ ಉಳ್ಳಯಿಂಗಳ ವಾಪಾಸ್ ಕೊಡಗ್‌ಕ್ ಕಾಕ್‌ಚಿಟ್ಟಂಡತ್. ಈ ವಿಷಯ ಕಲಿಸಂದ 4892ನೆ ಸಾಧಾರಣ ಸಂವತ್ಸರ ಚೈತ್ರಮಾಸತ್ ಎಣ್ಣಕ 1791ನೆ ಇಸವಿ ಏಪ್ರಿಲ್ ತಿಂಗತ್ ನಡುಂದತ್.



ಅಲ್ಲಿಂಜ ಮಡಿಕೇರಿ ಕೋಟೆ ಮಾತ್ರ ಸುಲ್ತಾನಂಡ ಸೈನಿಕಂಗಡ ಪುಡ್ತತ್ ಇಂಜತ್. ಅಕ್ಕ ವೀರರಾಜೇಂದ್ರ ಒಡೆಯ ಮಂಡೇಪಂಡ ಅಪ್ಪಯ್ಯ ಪಿಳ್ಳಾ ನಗರಹಳ್ಳಿ ಪುಟ್ಟೇಗೌಡಂಗ್ ಇನ್ನನೆ ಅಪ್ಪಣೆ ಮಾಡ್ಚಿ.

ಮಾದೇವಂಡ ಕೃಪಲ್ ಮಡಿಕೇರಿ ಕೋಟೆ ಬುಟ್ಟಕ ಬಾಕಿ ಎಲ್ಲ ಇಕ್ಕ ನಂಗಡ ಪುಡ್ತತ್ ಉಂಡ್. ಅಲ್ಲತೆ ತುಳುರಾಜ್ಯತರ ಸೀಮೆನ ಪುದಿಯದಾಯಿತ್ ನಂಗ ಪಡ್ಂದತ್. ಮಡಿಕೇರಿ ಕೋಟೆ ನಂಗಡ ಸಂಸ್ಥಾನತರ ಜಾಗತ್ ಉಂಡ್. ಅಲ್ಲಿ ಜಾಫರಕುಲಿ ಬೇಗು ಕಿಲ್ಲೆದಾರ ಸೈನ್ಯತೋಡೆ ಉಂಡ್. ನಿಂಗ ಜನಳ ಕೂಟಿಯಂಡ್ ಪೋಯಿತ್ ಮಡಿಕೇರಿ ಕೋಟೆನ ಟಿಪ್ಪುನುಂಡ್ ಪಡ್ಂದೋಳಿ.

ಈ ಪೋಲೆ ಆ ದಂಡ್ ನಾಯಕಂಗ ಜನಳ ಕೂಟಿಯಂಡ್ ಮಡಿಕೇರಿ ಕೋಟೆಕ್ ಸಾಮಾನ್ ಬಪ್ಪ ಬಟ್ಟೆನೆಲ್ಲ ತಡ್ತಿತ್, ಅಲ್ಲಿ ಜನಳ ನಿಪ್ಪೆಚಿಟ್ಟಿಂಡ್ ತಡ್ತಿತ್. ಬಾಕಿ ಇಂಜ ಜನಳ ಕೂಟಿಯಂಡ್ ಅರಕಲಗೂಡ್, ಕೋಣನೂರ್ ಸೀಮೆನ ಲೂಟಿ ಮಾಡಿಯಂಡ್ ಇಂಜತ್. ಅಕ್ಕ ಆ ದಂಡ್ ತಾಲೋಕ್ ರೈತಂಗ ಪೇರ್ತ್ ಸಂಗಟ ಪಟ್ಟಿತ್.

"ನಂಗ ರೈತಂಗ. ನಂಗಕ್ ಕಷ್ಟ ತರತಿ. ನಂಗ ಟಿಪ್ಪು ಸುಲ್ತಾನಂಗ್ ಓರ್ ಉರ್ಪಿಯ ಕೊಡ್ತಕ, ನಿಂಗಕ್ ದಂಡ್ ಉರ್ಪಿಯ ತಪ್ಪ. ಈ ಪೋಲೆ ನಂಗಡ ದಂಡ್ ತಾಲೋಕ್ ಇಂಜ ಟಿಪ್ಪುಕ್ ಕೊಡ್ತಂಡ್ ಇಂಜ ದಂಡ್ ರಟ್ಟಿ ಪಣತ್ ನ ನಿಂಗಕ್ ತಪ್ಪ"ಂದ್ ರಾಜಂಡ ಕೂಡೆ ಎಣ್ಣೆಚಿ.

ಆನಗುಂಡ್ ಆ ಜಾಗತ್ ನಡ್ಂದಂಡ್ ಇಂಜ ಸುಲಿಗೆನ ನಿಪ್ಪೆಚಿಟ್ಟಿತ್ ಮಂಡೇಪಂಡ ಅಪ್ಪಯ್ಯ ಪಿಳ್ಳಾ ನಗರಹಳ್ಳಿ ಪುಟ್ಟೇಗೌಡ ತಂಗಡ ಜನಳ ಅಲ್ಲಿಂಜ ಕೂಟಿಯಂಡ್ ಐಗೂರ್ ಸೀಮೆಕ್ ಪೋಚಿ. ಅಲ್ಲಿ ಡೇರೆ ಇಟ್ಟಂಡಿತಿಂಜ ಟಿಪ್ಪುರ ಸೈನಿಕಂಗಳ ಪೊಜ್ಜಿ ದೊವ್ವತಿತ್ ಮಂಜರಾಬಾದ್ ತಾಲೋಕ್ ರ ಚೆನ್ನಂಗ್ ಸೀಮೆನ ಎಡ್ತಂಡತ್. ಮಂಜರಾಬಾದ್ ಪಕ್ಕತ ಅರೆಕೇಲ್ ಮಣ್ಣರ ಕೋಟೆನ ಕೆಟ್ಟಿಯಂಡ್ ಅಲ್ಲಿ ಸೈನಿಕಂಗಳ ಆಕಿತ್ ಆ ಜಾಗತರ ಸರದಾರ ಆಯಿತ್ ನಗರಹಳ್ಳಿ ಪುಟ್ಟೇಗೌಡ ಇಂಜತ್. ಮಂಡೇಪಂಡ ಅಪ್ಪಯ್ಯ ಆ ಸೀಮೆರ ಎಚ್ಚರ ಎಡ್ತಂಡ್ ತೆರಿನ ಭದ್ರ ಪಡ್ತಿಯಂಡ್ ಇಂಜತ್.

## ಪಟ್ಟಮಾಡ ಒಕ್ಕ

ಸುಲ್ತಾನಂದ ಸೈನ್ಯ ರಾಣ್ಯ ಭಾಗಮಂಡಲ ಕೋಟೆಲ್ ಇಪ್ಪಕ ಭಾಗಮಂಡಲತ್‌ರ ತಿರಿಕೆಲ್ ದೇವಡ ವಿಗ್ರಹ ಇಂಜಾಲೆ. ಆ ನೇರತ್ ತಲಕಾವೇರಿ ತಿರಿಕೆಲ್ ಅಲ್ಲಿ ಇಂಜ ಪಟ್ಟಮಳುಂಡ್ ಪೂಜೆ ನಡ್‌ಂದಂಡ್ ಇಂಜತ್‌ಂದ್ ಕಾಂಬ. ಅಲ್ಲಿ ಕಲ್ಲ್‌ರ ಶಿವಲಿಂಗ ಇಂಜಿತ್ ಕಾಲತ್‌ರ ಏರ ನೇರತ್ ಆ ಜಾಗತ್ ಮಳೆ ಪಿಳ್ಳಾ ಶೀತ ಗಾಳಿನುಂಡ್ ಭಾಗಮಂಡಲತ್ ಆ ಕಾಲತ್ ಕಾಡ್‌ರ ನಡುಲ್ ಕಲ್ಲ್ ಇಂಜ ಬಟ್ಟೆಕಾಯಿತ್ ಕುಂಡ್ ಪತ್ತಿತ್ ತಲಕಾವೇರಿಕ್ ಪೋಪಾನಗುಂಡ್ ಸುಲ್ತಾನಂದ ಸೈನಿಕಂಗಕ್ ಆ ಜಾಗತ್‌ರ ಮೀದೆ ಆಡ್, ತಿರಿಕರ ಮೀದೆ ಆಡ್ ಅಚ್ಚಕ್ ಮನಸ್ಸಿಂಚ್‌ಲೆ.

ಆಚೇಂಗಿ, ಬುರಾನುದ್ದೀನ್ ಭಾಗಮಂಡಲಕ್ ಬಲ್ಯ ಸೈನ್ಯ ಎಡ್‌ತಂಡ್ ಪೋನ ನೇರತ್ ತಲಕಾವೇರಿಲ್ ಇಂಜ ಪಟ್ಟಮ ಆ ಜಾಗತ್‌ನ ಬುಟ್ಟಿತ್ ಪೋನನ್ನೆಕೆ ಕಾಂಬ. ಎನ್ನಂಗೇಣ್ಣಕ ಆ ನೇರತ್ ಪಟ್ಟಮಾಡ ಒಕ್ಕಕಾರ ಪೂಜೆ ನಡ್‌ತ್‌ಚಿ ಎಣ್ಣುವದ್ ಆ ಒಕ್ಕತ್‌ರ ಕತನುಂಡ್ ಗೊತ್ತ್‌ಕೊಟ್ಟುವ. ಅಕ್ಕ ಪಟ್ಟಮಾಡ ಒಕ್ಕಕಾರ ಪುಲಿಕೋಟ್ ಊರ್‌ರ ಶ್ರೀಮಂಗಲತ್ ವಾಸ ಇಂಜತ್. ಶತ್ರು ಸೈನ್ಯತ್‌ರ ಬರುಂಜ ತಲಕಾವೇರಿಲ್ ಪಟ್ಟಮ ಇಲ್ಲತೆ ಅಲ್ಲಿ ದೇವಡ ಪೂಜೆ ನಿಂದ್‌ಪೋಪ ಸಂದರ್ಭತ್‌ನ ಕಂಡಿತ್ ಪಟ್ಟಮಾಡ ಒಕ್ಕಕಾರ ಎನ್ನನೇಂಗಿ ಮಾಡಿತ್ ಅಲ್ಲಿ ಪೂಜೆ ನಡ್‌ತಿತೆ ನಡ್‌ತೊಂಡುಂಡ್ ತೀರ್ಮಾನ ಮಾಡ್‌ಚಿ.

ಇದ್‌ಂಗಾಯಿತ್ ಪಟ್ಟಮಾಡ ಮನೆರ ಬಾಲೆಕಾರ, ಅದತೂ ಮುನ್ಚಿ ಆಯಿತ್ ಚೆಟ್ಟಿಚಿ ಎಕ್ಕೋಲು ಪೊಲಾಕ ನೇರ್ತೆ ತಂಗಡ ಮನೆರ ಪಕ್ಕತ ಓರ್ ಚೆರಿಯ ಪಟ್ಟಮಡ ಕ್ಕಣ್ಣುಂಡ್ ದೇವಡ ಪೂಜೆ ಮಾಡ್‌ಚಿಟ್ಟಿತ್ ವಾಪಾಸಾಪ ಇಂಜತ್.

ವೀರರಾಜೇಂದ್ರ ಒಡೆಯ ಭಾಗಮಂಡಲತ್‌ನ ಶತ್ರುವಳುಂಡ್ ಎಡ್‌ತಂಡಪಿಳ್ಳಾ ಭಾಗಮಂಡಲ ಪಿಳ್ಳಾ ತಲಕಾವೇರಿರ ತಿರಿಕೆಲ್ ದೇವಡ ಪೂಜೆ ಪಿಳ್ಳಾ ನಡ್‌ಪನ್ನೆಕೆ ನಡ್‌ಪಕಾಚಿ. ಅಂದ್‌ಂಬ ಪಟ್ಟಮಾಡ ಒಕ್ಕಕಾರ ತಲಕಾವೇರಿ ತಿರಿಕೆಲ್ ದೇವಡ ನೈವೇದ್ಯಕ್‌ಂದ್ ದಿನಕ್ ಅರೆ ಸೇರ್ ಅಕ್ಕಿ ಕೊಡ್‌ಪಕ್ ಸುರು ಮಾಡ್‌ಚಿ. ಇನ್ನೆ ಅಕ್ಕಿ ಕೊಡ್‌ಪ ನೇಮ ಸುಮಾರ್ ಕಾಲಕೆತ್ತನೆ ನಡ್‌ದಂಡ್ ಬಂದದ್ ಇಕ್ಕ ಚೆನ್ನಂಗ್ ಕಾಲತಿಂಬ ಆಂಡ ಓರ್ ಮೊತ್ತತ್‌ರ ಪಣತ್‌ನ ಕೊಡಗರ ಮುಜರಾಯಿ ಇಲಾಖೆಕ್ ಅವು ಕೊಡ್‌ತಿತ್.

ವೀರರಾಜೇಂದ್ರ ಒಡೆಯ ಭಾಗಮಂಡಲ ಪಿಳ್ಳಾ ಆಂಡ ಸುತ್ತು ಮುತ್ತು ಪೋರಾಡ್‌ನ ಪಡೆಲ್ ಚತ್‌ಪೋನ ರಾಜಂಡ ಕಡೆರ ಜನಡಾತ್ ಪಟ್ಟಮಾಡ ಒಕ್ಕತ್‌ರ ಅಪ್ಪಣ್ಣ ಎಣ್ಣುವ ಪ್ಪಕ್ಕಿ ಒಬ್ಬ ಎಣ್ಣುವ ಹೇಳಿಕೆ ಉಂಡ್. ಪಡೆರ ನೇರತ್ ಪಿಳ್ಳಾ ಬೋರೆ ನೇರತ್ ನಂಬಿಕೆಲ್ ಸಹಾಯ ಮಾಡ್‌ನ ಜನಕ್ ವೀರರಾಜೇಂದ್ರ ಭೂಮಿನ ಉಂಬಳಿ ಆಯಿತ್ ಕೊಡ್‌ಪ

ಇಂಜತ್ ಪಿಳ್ಳಾ ಅಯಿಂಗಕ್ ತಾಂಡ ಸರ್ಕಾರತ್ ಚಾಕ್ರಿ ಕೊಡ್ಪ ಇಂಜತ್.

ಪಟ್ಟಿಮಾಡ ಚೆಟ್ಟಿಚಿ ರಾಜಂಡ ದಿವಾನಡಾತ್ ಒಬ್ಬ ಆಯಿತಿಂಜತ್‌ಂದ್ ಅಯಿಂಗಡ ವಂಶಾವಳಿ ಪಟ್ಟಿನುಂಡ್ ಗೊತ್ತ್ ಕಟ್ಟುವ. ಆ ಒಕ್ಕಕಾರಕ್ ರಾಜ ಪುಲಿಕೋಟ್ ಶ್ರೀಮಂಗಲತ್ ಇಂಜ ಭೂಮಿರ ಕೂಟ್‌ಕ್ ಬೇಂಗ್‌ನಾಡಾರ ಬೇಂಗೂರ್‌ಲ್ ಭೂಮಿನ ಸುರೂಲ್ ಜಮ್ಮ ಆಯಿತ್ ಕೊಡ್‌ತಿತ್ ಬಯ್ಯಂಜ ಅದ್‌ನ ಉಂಬಳಿ ಆಯಿತ್ ಪರಿವರ್ತನೆ ಮಾಡಿಕೊಡ್‌ತತ್. ಬೇಂಗೂರ್‌ಲ್ ಈ ಒಕ್ಕಕ ಕೊಡ್‌ಪಾಂಗ್ ಮುಪ್ಪಡೆ ಬಾಚೆಟ್ಟಿ ಪಿಳ್ಳಾ ಮಾಳೇಟಿ ಎಣ್ಣುವ ದಂಡ್ ಒಕ್ಕಕಾರಕ್ ಕೂಡ್‌ನದ್ ಆಯಿತಿಂಜತ್. ಟಿಪ್ಪು ಭಾಗಮಂಡಲಕ್ ಸೈನ್ಯತೋಡೆ ಬಪ್ಪಕ ಈ ಕುಟುಂಬಕಾರಳ ಪುಡ್‌ಚಿತ್ ಬೋರೆ ಕೊಡಗುರ ಜನಡ ಕೂಡೆ ಶ್ರೀರಂಗಪಟ್ಟಣ್ ಕೂಟಿಯುಂಡ್ ಪೋಚಿಂದ್ ಕಾಂಬ. ಎನ್ನಂಗ್‌ಣ್ಣಕ ವೀರ ರಾಜೇಂದ್ರ ಒಡೆಯ ಭಾಗಮಂಡಲತ್ ಪಡೆಪೊಪ್ಪಕ ಈ ಒಕ್ಕಕಾರ ಇಂಜಾಲೆ. ವೀರರಾಜೇಂದ್ರ ಒಡೆಯ ಬ್ರಿಟಿಷ್‌ಕಾರಕ್ ಸುಲ್ತಾನಂಡ ವಿರುದ್ಧ ಪಡೆಪೊಪ್ಪಕ್ ಸಹಾಯ ಮಾಡಿಯುಂಡ್ ಇಂಜಂಡ್ ಸುಲ್ತಾನ ಚಿತ್ತಪಿಳ್ಳಾ ರಾಜ್ಯತ್ ನೆಮ್ಮದಿ, ಶಾಂತಿ ನೆಲೆಯಾನದು ತಾಂಡ ಪ್ರಜೆಯಕ್ ಕೊಡ್‌ತ ಭೂಮಿಕ್ ನಿರೂಪ ಕೊಡ್‌ತತ್. ಅನ್ನನೆ ರಾಜ ತಾಂಡ ಜನಕ್ ಭೂಮಿನ ಉಂಬಳಿ ಆಯಿತ್ ಕೊಡ್‌ತ ನಿರೂಪತ್ ಪಟ್ಟಿಮಾಡ ಒಕ್ಕಕಾರಕ್ ಭೂಮಿ ಕೊಡತದ್ ಉಂಡ್.

4905ನೆ ಆಪ್ತೀಜ 1ನೆ ನಾಳಂಕೆ ಎಣ್ಣಕ ಕ್ರಿ.ಶ. 1803ನೆ ಇಸವಿ ಅಕ್ಟೋಬರ್ ತಿಂಗತ್ ಓರ್ ದಿನ. ಇಕ್ಕ ಉಳ್ಳ ಪಟ್ಟಿಮಾಡ ಮನೆಕಾರ ಅಪ್ಪಣ್ಣನುಂಡ್ 5,6 ಪಿಳ್ಳಾ 7ನೆ ತಲೆಮಾರ್‌ಕಾರ.

ಪಟ್ಟಿಮಾಡ ಒಕ್ಕಕಾರ ಮೇದಯ್ಯಂಡ ಮೀದ ಅಂವಂಡ ಶತ್ರುವ ವೀರರಾಜೇಂದ್ರ ಒಡೆಯಂಗ್ ಅವ ರಾಜದ್ರೋಹ ಮಾಡುವಾಂದ್ ಚಾಡಿ ಎಣ್ಣಾನಾಂಗ್ ರಾಜ ಅಂವಂಡ ಮೀದ ಚಿಡ್‌ಂಜಂಡ್ ಶಿಕ್ಷೆ ಕೊಡ್‌ಪನ್ನಕೆ ಇಂಜತ್. ಇದ್‌ನ ಅರ್‌ಂಜ ಮೇದಯ್ಯ ರಾಜದ್ರೋಹ ಮಾಡುಲೆಂದ್ ರಾಜಂಗ್ ಎಣ್ಣಚಿಂದ್ ಕತೆ ಉಂಡ್. ಮೇದಯ್ಯ ತಾನ್ ತಪ್ಪಿತಸ್ಥನಲ್ಲಂದ್ ಎಣ್ಣುವಕ ರಾಜ ಕೊದಿಪ ಅಣ್ಣರ ಬಾಂಡ್ಲಿಲ್ ಉಳ್ಳ ಪೊನ್ನಾರ ಮೊಯಿರತ್‌ನ ಎಡ್‌ಪಕ್ ಎಣ್ಣಚಿಲೊ.

ಅಕ್ಕ ಮೇದಯ್ಯ ತಾಂಡ ಕುಲದೇವಿ ಕಾವೇರಮ್ಮನ ತುದ್‌ಚಂಡ್ ಬಾಂಡ್ಲಿಕ್ ಕೈ ಇಡುವಕೆ ಮೊಯಿರ ತಾನಾಯಿತೆ ಅಣ್ಣರ ಕೊಡಿಕ್ ತೇಲಿಯುಂಡ್ ಬಾತ್‌ಂದ್ ಎಣ್ಣುವ! ಇದತ್ ಎಂತೊ ಮೋಸ ಉಂಡ್‌ಂದ್ ಗೇನಮಾಡ್‌ನ ರಾಜ, ಮೂಂದ್ ಕುರಿ

ಮೊಯಿರತನ ಎಡ್‌ಪಕ್ ಎಣ್ಣೆಚಿಲೊ. ಮೂಂದ್‌ಕುರಿಯೊ ಮೇದಯ್ಯ ಬಾಂಡ್ಲಿಕ್ ಕೈ ಇಡುವಕ ಮೊಯಿರ ಕೊಡಿಕ್ ಬಾತ್‌ಂದ್ ಎಣ್ಣುವ. ಈನಗುಂಡ್ ರಾಜಂಗ್ ಮೇದಯ್ಯಂಡ ಪ್ರಾಮಾಣಿಕತೆ ಅರ್‌ಂಜಂಡ್ ತಾಂಡ ಸರ್ಕಾರತ್ ಚಾಕ್ರಿ ಕೊಡ್‌ತಲೊ.

ಪಟ್ಟಮಾಡ ಒಕ್ಕಕಾರಕ್ ಮಾಳೇಟಿ ಒಕ್ಕಡ ಭೂಮಿನ ಕೊಡ್‌ತಾಂಗ್ ಪ್ರತ್ಯೇಕ ನಿರೂಪ ಕಟ್ಟಿತ್ತಲ್ಲೆ. ಆಚೇಂಗೂ, ಆ ಒಕ್ಕಕಾರಕ್ ಬಾಚೆಟ್ಟಿ ಪಿಳ್ಳಾ ಮಾಳೇಟಿ ಭೂಮಿ ಕಾಟ್ವಾನಾಂಗ್ ಅಯಿಂಗಕ್ ಆ ಊರ್‌ಲ್ ದಂಡ್ ತಿರಿಕೆರ ತಕ್ಕಾಮೆ ಕಾಟ್ವಾಚಿ. ಓರ್ ತಿರಿಕೆಲ್ ತೇಲಪಂಡ ಪಿಳ್ಳಾ ಕಲ್ಮಾಡಂಡ ಒಕ್ಕಕಾರಕ್ ತಕ್ಕಾಮೆ ಉಂಡ್. ಆಚೇಂಗಿ, ಪಟ್ಟಮಾಡ ಒಕ್ಕಕಾರಕ್ ದಂಡ್ ತಿರಿಕೆಲ್ ತಕ್ಕಾಮೆ ಉಂಡ್.

### ಕೊಡಗ್ ರಾಜಂಡ ಸೈನ್ಯ, ಕಾರ್ಯಕಾರಡ ವ್ಯವಸ್ಥೆ ಪಿಳ್ಳಾ ಕೂಟ್‌ಪಡೆ

ಈ ಸಂದರ್ಭತ್ ಕೊಡಗ್‌ರ ಜನ ಪಡೆ ವಿದ್ಯೆಲ್ ಎಚ್ಚಕರ ಮಟ್ಟಿಕ್ ಹುಷಾರಿಂಜತ್, ವೀರರಾಜೇಂದ್ರ ಒಡೆಯ ಶತ್ರುವಳ ಏದ್‌ಪೋಲೆ ಎದ್‌ರಾಚಿಡುವ ಇಂಜತ್‌ಂದ್ ಅರ್‌ಂಜವದ್ ನೇರಾಯಿತೂ ಓರ್ ಸಾಹಸ.

ಕೊಡಗಲ್ ರಾಜಂಗಡ ಕಾಲತ್ ಇಕ್ಕತ ಕಾಲತ್ ಉಳ್ಳನ್ನೆಕೆ ತಿಂಗ ಸಂಬಳ ಪಡ್‌ಂದವ, ಎಕ್ಕೋಲು ಟ್ರೈನಿಂಗ್ ಪಡ್‌ಂದವ ಸೈನ್ಯ ಇಂಜಾಲೆ. ಪ್ರತಿಯೋರ್ ರೈತ ತೋಕ್, ಕತ್ತಿ ಇಂಜವು ಆಯಿತ್ ರಾಜ ಕಾಕುವಕ ಶತ್ರುವಡ ಕೂಡೆ ಪೋರಾಡುವಕ್ ತಯಾರಾಯಿತ್ ಬರೊಂಡಿಂಜತ್. ಇಯಂಗಕ್ ರಾಜ ತಾನ್ ಕಾಕುವಕ ಅರಮನೆ ಚಾಕ್ರಿಕ್ ಆ ಕೂಡೆನ್ನೆ ಬರೊಂಡೂಂದ್ ಆದೇಶ ಮಾಡಿತ್ ಭೂಮಿನ ಜಮ್ಮಹಕ್ಕಲ್ ಕೊಡ್‌ತಿತಿಂಜತ್.

ರಾಜಂಡ ಅಧೀನತ್ ಏದೇ ಓರ್ ತರತ್ ಅವು ಸೇವೆಲ್ ಇಪ್ಪಕ ಅಯಿಂಗಕ್ ಅರಮನೆ ಖರ್ಚಲ್ ಊಟ ಪಿಳ್ಳಾ ಬಟ್ಟೆನ ಕೊಡ್‌ಪ ಇಂಜತ್. ಪಡೆರ ನೇರತ್ ಶತ್ರುವಳುಂಡ್ ಪಡ್‌ಂದಂಡ ಸಾಮಾನ್‌ಲ್ ಪಡೆಕ್ ಸಮ್ಮಂಧ ಪಟ್ಟಿ ಸಾಮಾನ್‌ನ ಎಡ್‌ತಂಡ್, ಬಾಕಿ ಇಂಜಾನ ತಾಂಡ ಜನಕ್ ಹಂಚುವ ಇಂಜತ್. ಈನಗುಂಡ್ ರಾಜಂಡ ಸೈನಿಕಂಗ ಶತ್ರುಸೈನ್ಯತರ ಸಾಮಾನ್ ಸಾಹಿತ್ಯತನ ತಡ್‌ತಂಡ್ ಸುಲಿಗೆ ಮಾಡುವಕ್ ಶತ್ರು ಸೈನಿಕಂಗಳ

ಪುಡಿಪಾಂಗ್‌ಂಜ ಏರ ಪುರಣಡಲ್ ಇಪ್ಪ ಇಂಜತ್! ರಾಜನಾಚೇಂಗೂ ಶತ್ರು ಸೈನಿಕಂಗಳ ಪುಡ್‌ಚಕ ಆಯಿಂಗಳ ಜೈಲ್‌ಲ್ ಇಡುವಕ್ ಜೈಲ್ ಕೋಂಬರೆ ಕೊಡ್‌ಕೊಂಡು, ಊಣ್‌ತೀನಿ ಕೊಡ್‌ಕೊಂಡು ಎಣ್ಣುವ ತೊಂದರೆನುಂಡ್ ಶತ್ರು ಸೈನಿಕಂಗಳ ಆಯಿಂಗಡ ಸೀಮೆಕ್ ಆಯೆಚಿರುವ ಇಂಜತ್.

ದೇಶತ್ ಏರಕಣಕ್‌ಲ್ ಕೊಡವಳೆ ಇಂಜಾನುಂಡ್ ರಾಜಂಡ ಸೈನ್ಯತ್ ಕೊಡವ ಸೈನಿಕಂಗಳ ಏರ ಇಂಜತ್. ಆಚೇಂಗಿ, ಗೌಡಂಗ ಪಿಳ್ಳಾ ಕೊಡವೇತರಂಗಡಾತ್ ಚೆನ್ನಂಗಾಳ್ ಸೈನಿಕಂಗ ಇಂಜತ್. ಚಿಕ್ಕವೀರ ರಾಜಂಡ ಕಾಲತ್ ಮುಸ್ಲಿಮ್‌ನೂ ರಾಜಂಡ ಸೈನ್ಯತ್ ಇಂಜತ್. ರಾಜಂಡ ಸೈನ್ಯಾಧಿಕಾರಿಯಡಾತ್ ನಾಲ್ ವರ್ಗಕಾರ ಇಂಜತ್. ಇವು ಸರ್ವಕಾರ್ಯಕಾರ, ಕಾರ್ಯಕಾರ, ಸುಬೆದಾರ ಪಿಳ್ಳಾ ಜಮೇದಾರ.

ಸರ್ವಕಾರ್ಯಕಾರ ನಲ್ಲ ವರ್ಗತ್ ಅಧಿಕಾರಿ. ಇಂವಂಡ ಅಧೀನತ್ ನೂರಾಂಗ್‌ಂಜ ಏರ ಕಣಕ್‌ಲ್ ಸೈನಿಕಂಗ ಇರೊಲಿಂಜತ್. ಕಾರ್ಯಕಾರಂಗ್‌ನೂರಾಂಗೂ ಏರ ಸೈನಿಕಂಗಡ ನಾಯಕಂಗಳಾಯಿತಿಪ್ಪ ಇಂಜತ್. ಆಚೇಂಗಿ, ಸರ್ವಕಾರ್ಯಕಾರನ ಅಧೀನತ್ ಇಂಜಾಂಗ್‌ಂಜ ಕಮ್ಮಿ ಕಣಕ್‌ರ ಸೈನಿಕಂಗ ಇಯಂಗಡ ಅಧೀನತ್ ಇಪ್ಪ ಇಂಜತ್. ಸರ್ವಕಾರ್ಯಕಾರ ಪಿಳ್ಳಾ ಕಾರ್ಯಕಾರಂಗಡ ಸುತ್ತೂ ಪೊನ್ನಾರ ಪಟ್ಟಿ ಇಟ್ಟು ಚೋಪು ಪಟ್ನ್ (ರೇಷ್)ಲ್ ಮಾಡ್‌ನ ಕೊಂಬ್ ತೊಪ್ಪಿಯತ್‌ನ ಇಟ್ಟವ ಗೌರವತ್‌ನ ಪಡ್‌ಂದಿತಿಂಜತ್. ಅಕ್ಕ ರಾಜನುಂಡ್ ಕೊಡ್‌ತ ಕೊಂಬ್‌ರ ತೊಪ್ಪ ಇಕ್ಕಲೂ ಚೆನ್ನಂಗ್ ಕೊಡವಡ ಮನೆಲ್ ಉಂಡ್. ಈ ತೊಪ್ಪತ್‌ರ ಎದಿಕೆಲ್ ಚೆರಿಯ ದಂಡ್ ಕೊಂಬ್ ಇಂಜಾನುಂಡ್ ಇದ್‌ಂಗ್ ಕೊಂಬ್‌ತೊಪ್ಪ ಎಣ್ಣುವ ಪೆದ ಬಾತ್.

ಸರ್ವಕಾರ್ಯಕಾರ ಪಿಳ್ಳಾ ಕಾರ್ಯಕಾರಡ ಅಧೀನತ್ ಇಚ್ಚಕೆ ಕಣಕ್‌ರ ಸೈನಿಕಂಗ ಇರೊಂಡು ಎಣ್ಣುವ ನಿರ್ಕ್ ಇಂಜಾಲೆ. ಆಚೇಂಗಿ, ಸುಬೆದಾರಂಡ ಅಧೀನತ್ ನೂರ್, ಜಮೇದಾರಂಡ ಅಧೀನತ್ ಪತ್ ಸೈನಿಕಂಗ ಇರೊಂಡು ಎಣ್ಣುವ ನೇಮ ಇಂಜತ್. ಕಾರ್ಯಕಾರಂಗ್ ಸರ್ವ ಕಾರ್ಯಕಾರನುಂಡ್ ಅಪ್ಪಣೆ ಪಡ್‌ಂದವಂಡು ಎಣ್ಣುವ ನೇಮ ಇಂಜನ್ನಕೆ ಕಂಡ್ ಬಪ್ಪುಲೆ. ರಾಜನೆ ಕಾರ್ಯಕಾರಳ ಸೈನಿಕಂಗಡ ಕೂಡ ಕೊಡಗರ ಬೋರೆ ಬೋರೆ ಜಾಗಕ್ ಶತ್ರುವಡ ಕೂಡ ಪಡೆಕ್ ಆಯೆಚೆನ್ನಕೆ ಕಂಡ್‌ಬಪ್ಪ.

ದೊಡ್ಡ ವೀರರಾಜೇಂದ್ರ ಒಡೆಯಂಡ ಕಾಲತ್ ಬಿದ್ದಂಡ ಬೋಪು ಸರ್ವ ಕಾರ್ಯಕಾರ ಆಯಿತಿಂಜತ್. ವೀರರಾಜೇಂದ್ರ ಒಡೆಯ ಇಯಂಗಡ ಕಾಲತ್ ಬೋಪುರ ಮೋಂವ ಸೋಮಯ್ಯ ಸರ್ವ ಕಾರ್ಯಕಾರ ಆಯಿತಿಂಜತ್. ಕಾರ್ಯಕಾರಡಾತ್ ಏರ ಕೊಡವ ಇಂಜಕೊ ಗೌಡ, ಒಕ್ಕಲಿಗಂಗ, ಪಟ್ಟಮ...ಕೊಡಗ್ ಸೈನಿಕಂಗಡ ನಾಯಕಂಗಳಾಯಿತ್ ಸುಲ್ತಾನಂಡ ಸೈನಿಕಂಡ ಕೂಡ ಪೋರಾಡ್‌ನ ಉಲ್ಲೇಖ ರಾಜೇಂದ್ರನಾಮಲ್ ಬಪ್ಪ.



ಕೊಡಗ್ ರಾಜಂಡ ಸೈನಿಕಂಗ ಇಕ್ಕತನ್ನಕೆ ಟ್ರೈನಿಂಗ್ ಪಡ್ಂದ ಶಿಸ್ತರ ಯೋಧಂಗ ಆಯಿತಿಂಜಾಲೆ. ಅಯಿಂಗಡಲ್ಲಿ ಆ ಕಾಲತ್ ಮದ್, ಚಿಲ್, ತೋಕ್, ಫಿರಂಗಿ ಬೋಂಡಿಯಾನದ್ ಇಂಜಾಲೆ. ಸುಲ್ತಾನಂಡ ಸೈನಿಕಂಗಳುಂಡ್ ಬಲಾಚಂಡ ಪಡೆರ ಸಾಮಾನ್ ಅವು ತಿರಿತ್ ಶತ್ರುಪಡ ಮೀದ ಪ್ರಯೋಗ ಮಾಡೊಂಡಿಂಜತ್. ಈನಗುಂಡ್ ರಾಜಂಡ ಸೈನಿಕಂಗ ಸುಲ್ತಾನಂಡ ಸೈನ್ಯತ್ ಕೂಡೆ ಪರಂಬಲ್ ಎದಿಕೆ ನಿಂದಿತ್ ಪಡೆಪೊಪ್ಪ ಇಂಜಾಲೆ. ಅವು ಸುಲ್ತಾನಂಡ ಸೈನಿಕಂಗ ಕೊಡಗ್ ಕುಂದ್ಕಾಡ್ ಇಳಿಜಾರಲ್, ಕಾಡ್ ನಡುಲ್, ಇಕ್ಕಟ್ಟಾನ ಜಾಗತ್ ದಾಟುವಕ ಮರ ಬೂಕಿತ್ ಬಟ್ಟೆಕೆಟ್ಟಿತ್ ಬರಿಂಜ ಬೊಡಿರ ಮಳೆನ ಪೂಯ್ಕಿಡುವ ಇಂಜತ್. ಉಣ್ತೀನಿರ ಸಾಮಾನ್ ತಡ್ಪ ಇಂಜತ್.

ಚೆರಿಯ ಚೆರಿಯ ಗುಂಪ್ ಮೀದ ಇಂಜಕಿಂಜನ್ನಕೆ ಬಂದಿತ್ ಬೂವ ಇಂಜತ್. ಕೊಡಗ್ ಕುಂದ್ ಕಾಡ್ ಸೀಮೆ ಆಯಿತಿಂಜಾನುಂಡ್ ಕೊಡಗ್ ಸೈನಿಕಂಗ ಈ ಪೋಲೆತ ಕೂಟ್ಪಡೆ ಶತ್ರುಸೈನ್ಯಕ್ ದುಂಬ ಅಪಾಯಕಾರಿ ಆಯಿತಿಂಜತ್. ಚುಟ್ಕಾಯಿತ್ ಎಣ್ಣುವೇಂಗಿ ಕೊಡಗ್ ಸೈನಿಕಂಗ ತಂಗಳಾಯಿತ್ ಶತ್ರುಪಡ ಮೀದ ಬುದ್ಧಿತ್ ಅಯಿಂಗಳ ಚೋಪ್ಪಿಡುವಕ್ ತಾಕತ್ತಿಂಜಾಲೆ. ಆಚೇಂಗಿ, ತಂಗಡ ಮೀದ ಬುದ್ಧಿ ಶತ್ರುಪಡ ಕೂಟ್ಪಡೆಲ್ ದೊವ್ತುವಚ್ಚಕ್ರ ಮಟ್ಟಿಕೆ ಇಂಜತ್. ಅವು ತಂಗ ಪುಡಾಚಿ ಕೆಲಸತ್ನ ಚುರ್ಕಾಯಿತ್, ಹರ ಪಿಳ್ ಪುರಾಡಲ್ ಮಾಡುವ ಇಂಜತ್. ರಾಜಂಡ ಮೀದ ದುಂಬ ಭಕ್ತಿನ ಬೆಚ್ಚಂಡಿತಿಂಜತ್.

ಲಿಂಗರಾಜೇಂದ್ರಂಡ ಕಾಲತ್ ಎಣ್ಣುಕ 1817ತ್ ಪಿಳ್ ಅದ್ಂಡ ಬಯ್ಯತ ಕಾಲತ್ ಕೊಡಗ್ ವಿವರಣೆನ ಎಳ್ವನ ಲೆ.ಕೊನ್ನರ್ ಇನ್ನನೆ ಎಳ್ವಪ.

The body of the people forming the military force, its character is drawn in theirs ; inefficient as an army they are quite undirected by those forms of discipline which constitute the strength and permanency of military bodies, but their model of life training them to a kind of concert is an excellent school in which to educate an irregular soldiery and well calculated to call forth the exercise of those qualities adapted to the sphere in which alone they are likely to be called on to display them. These mountaineers have a considerable share of intrepidity and perseverance : stratagem enters largely into their predatory habits and their neighbours accuse them on those occa-

sions of adding cruelty to pillage. Like the modern guerilla though they are unable to contend openly with regular troops they intercept their supplies, cut off their communications. and harass them by surprises, a species of warfare admirably adopted to second the natural difficulties that a hilly country must present. As intimate knowledge of it, s strict obedience, and a singular devotion to their chief, accompanied by a remarkable attachment to their wilds, and an equal gallantry in defending them may in some measure perhaps compensate the want of military skill.

## ವೀರರಾಜೇಂದ್ರ ಒಡೆಯ ಪಿಳ್ಳಾ ತಲಚೇರಿಲ್ ಇಂಜ ಈಸ್ಟ್ ಇಂಡಿಯಾ ಕಂಪೆನಿ ಚಾಕ್ರಿಕಾರಡ ಪರಿಚಯ

ವೀರರಾಜೇಂದ್ರ ಒಡೆಯಂಗ್ ಕೊಡಗೂಲ್ ಮಡಿಕೇರಿ ಕೋಟೆ ಬುಟ್ಟಕ ಬಾಕಿ ಎಲ್ಲಾ ಜಾಗ 1791 ಏಪ್ರಿಲ್‌ಕೆತ್ತನೆ ತಾಂಡ ಪುಡಾತತೆ ಇಂಜತ್. ಮಡಿಕೇರಿ ಕೋಟೆನ ಪಡಾಂದವಾಂಗ್ ಮುಪ್ಪಡೆ ಮಲಯಾಳ ತಲಚೇರಿಂಜ ಚೆನ್ನಂಗ್ ಸಾಮಾನ್, ನಲ್ಲ ಓರ್ ಕುದರೆನೆ ಕ್ರಯಕ್ ಕೊಡಾತಿತ್ ಎಡಾಕಂಡಿಯಾಚಿ. ಅಂಗಾಯಿತ್ ರಾಜ ತಾಂಡ ಅಧಿಕಾರಿ ಆಯಿತಿಂಜ ಮುತ್ತುಭಟ್ಟಂಡ ಕೈಯಿಂಜ ಎಡಾಕಂಡಿಯ ಸಾಮಾನ್‌ರ ಪಟ್ಟಿನ ಕೊಡಾತಿತ್ ಪರಿವಾರ ಜನಡ ಕೂಡೆ ತಲಚೇರಿಕ್ ಅಯೆಚತ್. ಮುತ್ತು ಭಟ್ಟ ತಲಚೇರಿಕ್ ಪೋಯಿತ್ ಎಡಾಕಂಡಿಯ ಸಾಮಾನ್‌ನೆಲ್ಲ ಪೇಟೆಲ್ ವಿಚಾರ್‌ಚಿಟ್ಟಂಡ್ ಇಪ್ಪಕ ಇಂವ ಕೊಡಗುಂಜ ಬಂದ ಸುದ್ದಿನ ತಲಚೇರಿ ಕೋಟೆರ ಮುಖ್ಯಾಧಿಕಾರಿ ರಾಬರ್ಟ್ ಟೈಲರ್, ಮುತ್ತುಭಟ್ಟನ ತಾಂಡಲ್ಲಿಕ್ ಕಾಕ್‌ಚಿಟ್ಟತ್. ಅಂವನುಂಡ್ ಕೊಡಗೂರ ರಾಜ ವೀರರಾಜೇಂದ್ರ ಒಡೆಯಂಗೂ, ಟಿಪ್ಪು ಸುಲ್ತಾನಂಗೂ ಆನ ಪಡೆ ಪಿಳ್ಳಾ ಅಯಿಂಗಡ ಒಳಲ್ ಇದ್ದ ಪಗೆನ ಚಾಯೋಡೆ ಅರೊಂಜಂಡತ್. ಅಲ್ಲಿಂಜ ಅಂವ ಕುಶಿಲ್ "ಈ ಪೋಲೆ ಟಿಪ್ಪು ಸುಲ್ತಾನ ಕೊಡಗೂರ ದೊರೆಕ್ ಶತ್ರು ಆಯಿತುಂಡ್. ಅದೇಪೋಲೆ ಅವು ಇಂಗ್ಲಿಷ್ ಕಂಪೆನಿ ಸರ್ಕಾರಕ್ ಶತ್ರು ಆಯಿತ್. ಆನಗುಂಡ್ ಕೊಡಗೂರ ರಾಜಂಗೂ,



ಇಂಗ್ಲೀಷ್ ಬಹಾದ್ದೂರ್ ಕಂಪೆನಿ ಸರ್ಕಾರಕ್ಕೂ ಸಿನೇತಿಗೆ, ಪ್ರೀತಿ ಬೆಚ್ಚಿತ್ ನಡೆಕೊಂಡು ಎಣ್ಣುವ ಆಸೆ ನಂಗಕ್ಕೂ ಉಂಡ್. ಆನಗುಂಡ್ ಅಯಿಂಗಕ್ ಬೋಂಡಿಯಾನ ಸಾಮಾನ್, ಸಾಹಿತ್ಯ, ಕುದರೆನ ಕೊಂಡಬಪ್ಪಚಿಟ್ಟಿತ್ ತಪ್ಪ. ನಂಗಡಲ್ಲಿ ಫಿರಂಗಿ ಗಾಡಿ ಬಲಿಪಾಂಡ ಮೀದ ಮಲಯಾಳತ್ ಬಲ್ಯ ಅತ್ತ ಕಟ್ಟುಲೆ. ಅಲ್ಲಿ ಬಲ್ಯ ಅತ್ತಳ ವಿಚಾರ್‌ಚಿಟ್ಟಿತ್ ಕಂಪೆನಿ ಸರ್ಕಾರಕ್ ಅಯಿಚಿಕೊಡ್ತಕ ಉಪಕಾರ ಆಪ"ಂದ್ ಮುತ್ತು ಭಟ್ಟಂಡ ಕೂಡೆ ಎಣ್ಣಿತ್ ವೀರರಾಜೇಂದ್ರ ಒಡೆಯಂಗ್ ಅವಂಡ ಕೂಡೆ ಓರ್ ಸಿನೇತಿಕೆರ ಕಾಗದತ್‌ನ 4892ನೆ ಸಾಧಾರಣ ಸಂವತ್ಸರತ್‌ರ ಚೈತ್ರ ತಿಂಗತ್ ಅಯಿಚತ್.

ವೀರರಾಜೇಂದ್ರ ಒಡೆಯ ಈ ಕಾಗದ ನೋಟಿತ್ ಪಿಳ್ಳಾ ಮುತ್ತು ಭಟ್ಟನುಂಡ್ ರಾಬರ್ಟ್ ಟೈಲರ್ ಎಣ್ಣಾನ ಕೇಟಿತ್ "ಕುಂಪಣಿ ಸರ್ಕಾರಕ್ಕೂ, ತಾಂಗೂ ಸಿನೇತಿಗೆ ಆಯಿತ್ ತಾಂಗ್ ಇಷ್ಟ ಉಂಡ್‌ಂದ್, ಅದ್‌ಂಗ್ ಕುಂಪಣಿ ಸರ್ಕಾರತ್‌ರ ಒಪ್ಪಿಗೆ ಇಂಜಕ ದಂಡಾಳೂ ಕೂಡಿತ್ ಸೂರ್ಯ, ಚಣ್ಣೂರ ಉಳ್ಳಲ್ಲಿಕೆತ್ತನೆ ತಂಗಡ ಸಿನೇತಿಗೆ ಶಾಶ್ವೀತ ಆಯಿತ್ ಇರೊಂಡುಂದ್ ದಂಡ್ ಬರಿಲೂ ಬೆಕ್ಕೊಂಡು"ಂದ್ ಮುತ್ತು ಭಟ್ಟಂಗ್ ಕಾಗದ ಎಳ್ಳಿತ್ ರಾಬರ್ಟ್ ಟೈಲರ್‌ರ ಕೈಲ್ ಅಯಿಚತ್.

ಟೈಲರ್ ಈ ಕಾಗದ ಓದಿತ್ ರಾಜಂಡ ಆಸೆನ ಮುಂಬೈ ಸಂಸ್ಥಾನತ್‌ರ ಗವರ್ನರ್ ಮೇ. ಜ.ರಾಬರ್ಟ್ ಅಬರ್ ಕ್ರಾಂಬಿ ಸಾಹೇಬ್ ಬಹಾದ್ದೂರ್‌ಕ್ ಅರಿಚಿಡೊಂಡೊಂದ್ ಮುಂಬೈಂಜ ರಾಜಂಗ್ ಬೋಂಡಿಯಾನ ಕುದರೆನ ಸಹ ಕೊಂಡ ಬಪ್ಪಚಿಡೊಲೊಂದ್ ರಾಜ ಅಕ್ಕ ತಂಗಕ್ ಅಗತ್ಯವಾಯಿತ್ ಬೋಂಡಿಚಾನ ಫಿರಂಗಿ ಗಾಡಿ ಬಲಿಪ ಬಲ್ಯ ಅತ್ತಳ ನೋಟಿತ್ ಆ ವಿವರತ್‌ನ ಎಳ್ಳಿತ್ ಅಯಿಚಕ ಕೊಂಡಬಪ್ಪಚಿಡುವಂದ್ ಜವಾಬ್ ಅಯಿಚತ್.

ವೀರರಾಜೇಂದ್ರಂಗ್ ಈ ಕಾಗದತ್ ಇಂಜ ಸಂಗತಿನ ನೋಟಿತ್ ಕುಶಿ ಆಯಿತ್ ರಾಬರ್ಟ್ ಟೈಲರ್‌ಕ್ ಅವಶ್ಯ ಇಂಜ ದಂಡ್ ಅತ್ತ ಕೊಡಗಲ್ ಇಲ್ಲತಾನುಂಡ್ ಟಿಪ್ಪುರ ರಾಜ್ಯತ್ ಬಲ್ಯ ಅತ್ತ ಉಳ್ಳ ಚಾಗತ್‌ನ ಗೊತ್ತ್ ಮಾಡಿತ್, ಪ್ರಯತ್ನಪಟ್ಟಿತ್ 800 ಅತ್ತಳ ಕೊಂಡಬಪ್ಪಚಿಟ್ಟಿತ್. ಇದತ್ ಫಿರಂಗಿ ಬಲಿಪ ತಾಕತ್ ಉಳ್ಳ ಸುಮಾರ್ 550 ಅತ್ತಳ ಬೋರೆ ಆಯಿತ್ ಆಕಿತ್ ಬಾಕಿ ಉಳ್ಳಾನ ತಾಂಡ ಜನಕ್ ಹಂಚಿ ಕೊಡ್ತತ್. ಅಲ್ಲಿಂಜ ಅತ್ತಳ ಆಕ್‌ನ ವಿಷಯತ್‌ನ ಟೈಲರ್ ಸಾಹೇಬಂಗ್ ಎಳ್ಳಿತ್ ಅಯಿಚತ್. ಅಕ್ಕಣೆಕ್ ಅವಂಗ್ ಮುಂಬೈ ಗವರ್ನರ್‌ನುಂಡ್ ಕಂಪೆನಿ ಸರ್ಕಾರತ್‌ರ ಪರವಾಯಿತ್ ಅವ ವೀರರಾಜೇಂದ್ರ ಒಡೆಯಂಡ ಕೂಡೆ ಸಿನೇತಿಗೆ ಪಿಳ್ಳಾ ಸಹಾಯತ್‌ರ ಒಪ್ಪಂದ ಮಾಡಿಯವಂಡು ಎಣ್ಣುವ ಆದೇಶ ಬಂದಿತಿಂಜತ್.



ಈಸ್ಟ್ ಇಂಡಿಯಾ ಕಂಪೆನಿ ಸರ್ಕಾರ ಕೊಡಗುರ ರಾಜಂಡ ಕೂಡೆ ಸಿನೇತಿಕೆರ ಒಪ್ಪಂದ ಮಾಡಿಯವಕ್ ಈ ನೇರತ್ ಎನ್ನಂಗ್ ಇಚ್ಚಕ್ ಆತುರತ್ ಇಂಜತ್ ಎಣ್ಣುವಾನ ಅರಿಯಂಡು.

ಟಿಪ್ಪು ತಾನ್ ಪಟ್ಟಕ್ ಬಂದಲ್ಲಿಂಜೆ ಇಂಗ್ಲೀಷ್‌ಕಾರಕ್ ವಿರೋಧ ಇಂಜತ್. ಅವ ಪೈಂಚಡ ಕೂಡೆ ಸಿನೇತಿಕೆ ಬೊಳತಿತ್ ಬ್ರಿಟಿಷಡ ವಿರೋಧ ಪಡೆಪೊಪ್ಪಕ್ ಅಯಿಂಗಡ ಸೈನ್ಯ ಸಹಾಯತ್‌ನ ಪಡೊಂದತ್. ಅವ ದುಂಬ ಆಸೆಕಾರ ಆನಾನುಂಡ್ ತಾಂಡ ರಾಜ್ಯ ವಿಸ್ತಾರ ಮಾಡೊಂಡೊಂದ್ ಇಂಜತ್. ಇದೊಂಗ್ ಅವಂಗ್ ಬ್ರಿಟಿಷ್‌ಕಾರಳೆ ವಿರೋಧ ಆಯಿತಿಂಜತ್. ಅವ ದಕ್ಷಿಣತ್‌ರ ತಿರುವಾಂಕೂರ್‌ರ ರಾಜ ಉತ್ತರ ಮಲಯಾಳತ್‌ರ ರಾಜಂಗಕ್ ಆಶ್ರಯ ಕೊಡೊತಂಡ್ ಉಂಡ್ ಎಣ್ಣುವ ಕಾರಣತ್ ಅವಂಡ ಮೀದ ಪಡೆಪೊತ್ತಿ ಪೋಚಿ. ಅಕ್ಕ ತಿರುವಾಂಕೂರ್ ರಾಜ ಬ್ರಿಟಿಷಡ ಸಹಾಯ ಕೇಟತ್.

ಟಿಪ್ಪು ತಾಂಡ ಮೀದ ಪಡೆಕ್ ತಯಾರಿ ಆಯಂಡ್ ಉಂಡೊಂದ್ ಬ್ರಿಟಿಷ ಅರ್‌ಂಜಂಡ್ ಅವ ಪ್ರಬಲ ಆಪಾಂಗ್ ಮುಪ್ಪಡೆ ಅವನ ತಾತೊಂಡೊಂದ್ ತೀರ್ಮಾನ ಮಾಡೊಚಿ. ಈನಗುಂಡ್ ಸುಲ್ತಾನಂಗ್ ವಿರೋಧ ಇಂಜ ಮರಾಠ ಪಿಳ್ಳಾ ಹೈದ್ರಾಬಾದ್‌ರ ನಿಜಾಮಂಡ ಕೂಡೆ ಸಿನೇತಿಕೆರ ಒಪ್ಪಂದ ಮಾಡಿಯಂಡತ್. ಈ ನೇರತ್ ಕೊಡಗು ಚೆರ್‌ಜನೆ ಇಂಜಿತ್, ಅಲ್ಲಿ ಸೈನ್ಯತ್‌ರ ತಾಕತ್ ಇಲ್ಲತೆ ಪೋನಕೊ ತಾಂಡ ಉದ್ದೇಶ ಸಾಧೊಚಿಡುವಕಾಯಿತ್ ಕೊಡಗುರ ರಾಜಂಡ ಕೂಡೆ ಮೈತ್ರಿ ಒಪ್ಪಂದ ಮಾಡಿಯವಕ್ ಬಯಂದತ್.

ಮೈಸೂರ್‌ಸೀಮೆಲ್ ಸುಲ್ತಾನಂಡ ಕೂಡೆ ಪಡೆಪೊಪ್ಪಕ್ ಬ್ರಿಟಿಷಡ ಸೈನ್ಯ ಮುಂಬೈ ಪಿಳ್ಳಾ ಕೊಲ್ಕತ್ತಾತ್‌ಂಜ ಬರೊಂಡಿಂಜತ್. ಮುಂಬೈ ಸೈನ್ಯ ಹಡಗುಲ್ ತಲಚೇರಿಕ್ ಎತ್ತೊಚಿ. ಅಲ್ಲಿಂಜ ಕೊಡಗುಕಾಲೆ ಮೈಸೂರ್ ತೆರಿಕ್ ಪೊಂಡಿಂಜತ್. ಕೊಡಗುನ ಬುಟ್ಟಿತ್ ಬಾಕಿ ಎಲ್ಲಾ ಸೀಮೆ ಸುಲ್ತಾನಂಡ ಪುಡೊತೆ ಇಂಜತ್. ಆನಗುಂಡ್ ಮುಂಬೈಂಜ ಬಂದ ಬ್ರಿಟಿಷ್ ಸೈನ್ಯ ಕೊಡಗುಕಾಲೆ ಮೈಸೂರ್ ಸೀಮೆಕ್ ಪೋಪದೆ ಸುಲಭ ಇಂಜತ್. ಈನಗುಂಡ್ ಸುಲ್ತಾನಂಡ ಮೀದ ತಂಗಡ ಪಡೆರ ಕಾರ್ಯಾಚರಣೆಲ್ ತಂಗಕ್ ಸಹಾಯ ಆಂಡೊಂದ್ ಬ್ರಿಟಿಷ, ವೀರರಾಜೇಂದ್ರ ಒಡೆಯಂಡ ಕೂಡೆ ಒಪ್ಪಂದ ಮಾಡಿಯವಕ್ ಬಯಂದತ್.

ರಾಬರ್ಟ್ ಟೈಲರ್, ವೀರರಾಜೇಂದ್ರನ ತಲಚೇರಿಕ್ ಗೌರವತ್ ಕೂಟಿಯಂಡ್ ಬಪ್ಪಕ್ ಓರ್ ಕಂಪೆನಿ ಸಿಪಾಯಿನ ಬ್ರಿಟಿಷಡ ಧ್ವಜತೋಡೆ ಕ್ಯಾಪ್ಟನ್ ಬ್ರೌನ್ ಪಿಳ್ಳಾ

ಅಂವಂಡ ಸಿಪಾಯಿಯಡ ಕೂಡೆ ಸಾಧಾರಣ ಸಂವತ್ಸರ ಆಶ್ವಿಜ ಶುದ್ಧ ದಶಮಿರಂದ್ ಕೊಡಗುಂಜ ಪೊರ್ಟಿತ್ ತಲಚೇರಿಕ್ ಎತ್ತ್ಚಿ. ತಲಚೇರಿ ಕೋಟಲ್ ಕೊಡಗುರ ರಾಜಂಗೂ, ಬ್ರಿಟಿಷ್ ಅಧಿಕಾರಿಯಕೂ ಸಿನೇತಿಕೆರ ಒಪ್ಪಂದ ವಿಚಾರ ವಿನಿಮಯ ಆಯಿತ್ ಒರ್ ಒಪ್ಪಂದ ಪತ್ರ ಎಳ್ಳಿಚಿ.

ಈ ಪೋಲೆ ದಂಡ್ ಬರಿಂಜ ಒಪ್ಪಂದತ್ ರಾಗದ ಎಳ್ಳಿಚಿಟ್ಟಿತ್ ಅದ್‌ಂಗ್ ದಂಡೂ ಕಡೆಕಾರಡ ಸೀಲ್ ಇಟ್ಟಿತ್ ಒಂದಾನ ತಲಚೇರಿಲ್ ಬೆಚ್ಚತ್. ಇನ್ನೊಂದಾನ ವೀರರಾಜೇಂದ್ರ ಒಡೆಯಂಡ ಕೈಲ್ ಕೊಡ್‌ತಿತ್ ರಾ.ಟೈಲರ್ ಸಾಹೇಬ ಮುಂಬೈ ಗವರ್ನರ್ ಸರ್ ರಾಬರ್ಟ್ ಅಬರ್ ಕ್ರಾಂಬಿ, ವೀರರಾಜೇಂದ್ರಂಗ್ ಇನಾಂ ಆಯಿತ್ ಕೊಡ್‌ತ ಕುದುರೆನ ಕೊಡ್‌ತತ್.

ಅಲ್ಲಿಂಜ ಅಪ್ಪರಿಪ್ಪರ ಇನಾಂ ಕೊಡ್‌ಪ, ಉಟೋಪಚಾರ ಎಲ್ಲ ನಡ್‌ಂದತ್. ವೀರರಾಜೇಂದ್ರ ತಲಚೇರಿಂಜ ಪೊರ್‌ಡುವಕ ಮಿಳ್ಳಾತ್‌ರನ್ನೆ ಕ್ಯಾ.ಬ್ರೌನ್ ಒರ್ ಕಂಪೆನಿ ಸಿಪಾಯಿರ ಕೂಡೆ ರಾಜಂಡ ಕೂಡೆ ಕೊಡಗ್ ರಾಜ್ಯಕ್ ಬಂದಿತ್ ನಾಲ್‌ನಾಡ್ ಅರಮನೆಲ್ ಅಂವನ ಬುಟ್ಟಾಕೊಡ್‌ತತ್. ಇನ್ನೆ ಅಯಿಪಕ ವೀರರಾಜೇಂದ್ರ ಕ್ಯಾ. ಬ್ರೌನ್ ಕೂಡೆ ರಾಬರ್ಟ್ ಟೈಲರ್‌ಕ್ ತಾಂಡ ಕ್ಷೇಮ ಸಮಚಾರತ್‌ರ ಕಾಗದ ಎಳ್ಳಿ ಅಯಿಚತ್. ಇನ್ನೆ ವೀರ ರಾಜೇಂದ್ರ ಒಡೆಯಂಗೂ, ಈಸ್ಟ್ ಇಂಡಿಯಾ ಕಂಪೆನಿ ಸರ್ಕಾರಕೂ ಸಿನೇತಿಕೆ ಸುರುವಾಚಿ. ಈ ಸಿನೇತಿಕೆರ ಒಪ್ಪಂದಕ್ 1790ನೆ ಇಸವಿ ಅಕ್ಟೋಬರ್ 15ಂಗ್ ದಂಡ್ ಕಡೆಕಾರಳುಂಡ್ ಸೈನ್ ಇಡ್‌ಚಿಟ್ಟತ್.

## ಖಾದರ್‌ಖಾನ್ ಕೈಸಗಿ ಪಿಳ್ಳಾ ವೀರರಾಜೇಂದ್ರ ಒಡೆಯಂಡ ಸೈನ್ಯಕ್ ಬಟ್ಟೆಲ್ ನಡ್‌ಂದ ಪಡೆ

ಈಂಡೆಡಲ್ ವೀರರಾಜೇಂದ್ರ ಒಡೆಯ ಮಡಿಕೇರಿ ಕೋಟೆಕ್ ಉಣ್‌ತೀನಿರ ಸಾಮಾನ್ ಬಪ್ಪಾನ ತಡ್‌ತಾಂಗ್ ಮಡಿಕೇರಿ ಕೋಟೆಲ್ ತೊಂದರೆ ಆಚಿ. ಅಲ್ಲಿ ಇಂಜ ಜನಕ್ ಬದ್‌ಕ್ ನಡ್‌ತುವಕ್ ಕಷ್ಟ ಆಚಿ. ಅಕ್ಕ ಮಡಿಕೇರಿ ಕೋಟೆರ ಕಿಲ್ಲೆದಾರ ಜಾಫರ್‌ಕುಲಿಬೇಗ

ಕೋಟಲ್ ಊಣತೀನಿರ ಸಾಮಾನ್ ತೇಂದ್‌ಪೋನಾನ ಗುಟ್ಟಾಯಿತ್ ತಾಂಡ ಗೂಡಚಾರಂಗಳುಂಡ್ ಕಳ್ಳ ಬಟ್ಟಲ್ ಟಿಪ್ಪುರ ಪಕ್ಕ ಅಯೆಚಿತ್. ಅಕ್ಕ ಸುಲ್ತಾನ ತಾನೋರ್ ಬಲ್ಯ ಸೈನ್ಯಾಧಿಕಾರಿ ಖಾದರ್ ಖಾನ್ ಕೈಸಗಿರ ಕೂಡೆ ಬಲ್ಯ ಸೈನ್ಯತಾನ ಕೂಟಿತ್ ಸಾಮಾನ್ ಸಾಹಿತ್ಯತರ ಕೂಡೆ ಮಡಿಕ್ಕೇರಿಕ್ ಅಯೆಚಿತ್. ಖಾದರ್‌ಖಾನ್‌ರ ಕೂಡೆ ಮಂಗಳೂರಾರ ಸೈನಿಕ ನತ್ತಡ್ ಖಾನ್ ಪಿಳ್ಳಾ ಇಳ್ಳಾಸ್ಲೋರ್ ಸರ್ದಾರ್ ಮಹಮದ್ ಹುಸೇನ್ ಬಿಂತೂರಿ ಸಹ ಇಂಜತ್. ಖಾದರ್‌ಖಾನ್ ಕೈಸಗಿ ತಾಂಡ ಸೈನ್ಯ ಪಿಳ್ಳಾ ಸಾಮಾನ್‌ರ ಕೂಡೆ ಕೊಡಗರ ತೆರಿಕ್ ಬಂದಿತ್ ಮುಳ್ಳು ಸೋಗೇಲ್ ಕಾವೇರಿ ಪೊಳೆನ ದಾಟಿತ್ ಇತ್ತೆಟಿ ತಾಂಡ ಪಾಳೆಯತ್ ಬುಟ್ಟಿತ್.

ವೀರರಾಜೇಂದ್ರ ಈ ಸುದ್ದಿನ ಕೇಟಿತ್ ತಾಂಡ ಕೊಡಗರ ಜನಳ ಕೂಟಿಯಂಡ್ ಬಟ್ಟಲ್ ಬೂದಿಚಾವಡಿ ಎಣ್ಣುವಲ್ಲಿ ತಡ್‌ತಿತ್ ಅಯಿಂಗಳ ಎದರ್‌ಚಿಡುವಕ್ ಪಾರ ಕಾತಂಡ್ ಇಂಜತ್. ಖಾದರ್‌ಖಾನ್ ಪಿತ್ಯಾಂಡ್ ತಾಂಡ ಸೈನ್ಯ ಪಿಳ್ಳಾ ಸಾಮಾನ್‌ನ ಕಡ್‌ತಿಯಂಡ್ ಬೂದಿಚಾವಡಿಕ್ ಎತ್ತ್‌ಚಿ. ಅಕ್ಕ ವೀರರಾಜೇಂದ್ರಂಡ ಜನಕೂ, ಖಾದರ್‌ಖಾನ್‌ರ ಜನಕೂ ಚೆನ್ನಂಗ್ ನೇರ ಬೊಡಿರ ಪಡೆ ನಡ್‌ಂದತ್. ಅಲ್ಲಿಂಜ ಕತ್ತಿಲೆ ಚೆನ್ನಂಗ್ ನೇರ ಪಡೆ ನಡ್‌ಂದತ್.

ಈ ನೇರತ್ ಖಾದರ್‌ರ ಮುಖ್ಯ ಸೈನ್ಯ ಎತ್ತಿತ್‌ಂಜ್‌ಲೆಂದ್ ಕಾಂಬ. ವೀರರಾಜೇಂದ್ರಂಡ ಜನಡ ಕೂಡೆ ಪೋರಾಡ್‌ನ ಶತ್ರುವಡಾತ್ ಅಳ್ಳಾರಾಳ ಚೆತ್‌ಪೋಚಿ. ಇನ್ನೂರಾಳಕ್ ದುಂಬ ಗಾಯ ಆಚಿ. ಬಾಕಿ ಇಂಜ ಸೈನಿಕಂಗ ಓಡಿ ಪೋಯಿತ್ ಖಾದರ್‌ಖಾನ್‌ರ ಕೂಡೆ ಇಂಜ ಜನಳ ಕೂಡಿಯಂಡತ್. ಓಡಿ ಬಂದಯಿಂಗಕ್ ಧೈರ್ಯ ಕೊಡ್‌ತಿತ್ ಎಲ್ಲಾರ್‌ನೂ ಒಕ್ಕಚೆ ಕೂಟ್‌ಚಿ. ಅಲ್ಲಿಂಜ ಪಕ್ಕತುಳ್ಳ ಚೆರಿಯೋರ್ ಕುಂದ್‌ನ ಪತ್ತಿತ್ ಅಲ್ಲಿ ಡೇರೆ ಇಟ್ಟಿತ್. ಆಂಡ ಸುತ್ತೂ ಸಾಮಾನ್ ದುಂಬ್‌ಚಿಟ್ಟಿ ಗೋಣಿ ಚೀಲತನ ಕೋಟೆ ಕೆಟ್ಟ್‌ನನ್ನಕೆ ಜೋಡ್‌ಚಿಟ್ಟಿತ್.

ಆ ಕೋಟೆರ ಒಳ್‌ಲ್ ಕೂಡಿಯಂಡ ಸುಲ್ತಾನಂಡ ಸೈನಿಕಂಗ ಆಂಡ ಒಳ್‌ಂಜೆ ಕೊಡಗರ ಜನಡ ಮೀದ ಬೊಡಿ ಪಾರ್‌ಚಿಟ್ಟಂಡ್ ಇಂಜತ್. ವೀರ ರಾಜೇಂದ್ರ ಆ ಕುಂದ್‌ರ ಕೊಡಿಲ್ ಆಶ್ರಯ ಪಡ್‌ಂದ ಶತ್ರುವ ಓಡಿ ಪೋಕತನ್ನಕೆ ತಡ್‌ಪಕ್ ತಾಂಡ ಜನಳ ಗುಡ್ಡತರ ಚೀಲತರ ಕೋಟೆರ ಸುತ್ತೂ ನಿಪ್ಪ್‌ಚಿಟ್ಟಿತ್. ಅಕ್ಕ ರಾಜಂಡ ಸೈನಿಕಂಗಡಾತ್ ಚೆನ್ನಂಗಾಳ ರಾಜಂಡ ಪಕ್ಕ ಬಂದಿತ್ "ನಂಗಕ್ ಅಪ್ಪಣೆ ತಂದಕ ಇಂದ್ ಬೈಟೇಂಜ ಪೊಲಂಜತಿತ್ತನೆ ಅಯಿಂಗಡ ಸೈನ್ಯತರ ಮೀದ ಬುದ್ದಿತ್ ಓರಂದ್ ತೋಕ್‌ಲೆ ಬೊಡಿ ಬೆಚ್ಚಂಡ್ ಅಯಿಂಗಳ ಕತ್ತಿಲ್ ಕೆತ್ತಿತ್ ತೇತರುವ. ಅಯಿಂಗಡ ಕೂಡೆ ಸಾಮಾನ್ ಸಾಹಿತ್ಯ ಉಂಡೇಂಗಿಯೂ, ಪಡೆ ಪೊಪ್ಪ ಜನಕ್ ನಿಂಗ ಮಾಪು ಮಾಡೊಂಡು"ಂದ್

ಎಣ್ಣೆ ಚಿ.

ಅದೊಂಗೆ ರಾಜ "ನಂಗ ಟಿಪ್ಪುರ ಇಲಾಖೆ ಪಿರಿಯಾಪಟ್ಟಿತ್ ಇಪ್ಪಕ ಒನ್ನಾಂದ್ ನಂಜರಾಯ ಪಟ್ಟಿಕ್ ಬೋಟೆಕ್ ಪೋಯಿತ್ ಒಯಿಪತ್ ಪುನಾದಿಯ ಪೋಪಕ್ ಕಯ್ಯತೆ ಒಳ್ಂಜಿತ್ ಇಪ್ಪಕ ಖಾದರ್‌ಖಾನ್ ಕೈಸಗಿ ನಂಗ ಪಕ್ಕ ಬಂದಿತ್ ನಂಗಳ ಕೂಟಿಯಂಡ್ ಕುಶಾಲನಗರಕ್ ಪೋಯಿತ್ ಪೋಲಾಕ ಪಿಳ್ಳಾ ಒಯಿಪತ್ ದಂಡ್ ನೇರಕ್ ಅಡಿಗೆ ತಂದಿತ್. ಇನ್ನತ ನೇರತ್ ನಂಗ ಅವಂಡ ಪ್ರಾಣ ಉಳ್ತುವಕ್ ನಿಂಗ ಎಣ್ಣೆನನ್ನೆಕೆ ಪೋಲಾಕ ನೇರ್ತೆ ಟಿಪ್ಪುರ ಸೈನ್ಯತರ ಮೀದ ಬುದ್ದಿತ್ ಆ ಖಾದರ್ ಖಾನ್ ಕೈಸಗಿ ಎಣ್ಣುವ ಸರದಾರಂಡ ಪ್ರಾಣ ಉಳ್ತಿತ್ ನಂಗಕ್ ತಂದಕ ಆ ಸೈನ್ಯತ್ ಇಂಜ ಸಾಮಾನ್ ಎಂದಿಕೂ ನಿಂಗಕ್ ಮಾಘ್ ತಪ್ಪು"ಂದ್ ಅಯಿಂಗಕ್ ಎಣ್ಣೆ ಚಿ.

ಖಾದರ್‌ಖಾನ್ ಕೈಸಗಿ ವೀರರಾಜೇಂದ್ರ ಒಡೆಯಂಡ ಕೃತಜ್ಞತೆಕ್ ಎಡೆಯಾಂಡುವೇಂಗಿ ಅವ ವೀರರಾಜೇಂದ್ರಂಗ್ ಮಾಡ್‌ನ ಬೆಂದು ತಕ್ಕಾರಕ್‌ಂಜ ಮುಖ್ಯಪಟ್ಟಿ ಕಾರಣ ಬೋರೆ ಇಂಜತ್.

ವೀರರಾಜೇಂದ್ರಂಡ ಕುಟುಂಬತನ ಟಿಪ್ಪು ಹಾಸನತರ ಗೊರೂರ್ ಕೋಟೆಂಜ ಪಿರಿಯಾಪಟ್ಟಿಕ್ ವರ್ಗ ಮಾಡ್‌ನಲ್ಲಿ ವೀರರಾಜೇಂದ್ರಂಡ ಕುಟುಂಬತ್ ಇಂಜ ಅವಂಡ ದಂಡ್ ಮಲತಂಗೈಯ ಪಿಳ್ಳಾ ಸ್ವಂತ ತಂಗೈಯಡಾತ್ ದಂಡಾಳ್‌ನ ಒರಾತತ್ ಟಿಪ್ಪು, ಶ್ರೀರಂಗ ಪಟ್ಟಿತ್‌ರ ತಾಂಡ ಅಂತಃಪುರಕ್ ಕೂಟಿರ್‌ತ್. ತಾನ್ ಕೂಟಿಯವತ ಓರ್ ತಂಗಿನ ತಾಂಡ ಆಪ್ತ ಖಾದರ್‌ಖಾನ್ ಕೈಸಗಿಕ್ ಓರ್ ವಿಶೇಷ ಇನಾಂ ಕೊಡ್‌ತತ್. ಆಚೀಂಗಿ, ಖಾದರ್ ಖಾನ್ ಆ ರಾಜಕುಮಾರಿನ ಗೌರವತ್‌ಂಜ ಕಂಡಿತ್ ಅವಳ ಬೋರೆ ಮನೆಲ್ ಆಕೆಚಿ ಪಿಳ್ಳಾ ಅವಡ ಸೇವೆಕ್ ಅವಡದೆ ಜಾತಿಕರ್ತಿನ ನೇಮಕ ಮಾಡ್‌ಚಿ. ಅಲ್ಲತೆ ಅವಳ ವೀರ ರಾಜೇಂದ್ರ ಒಡೆಯ ಪಿರಿಯಾ ಪಟ್ಟಿತ್‌ರ ಜೈಲಂಜ ತಪ್ಪಿಚಿಟ್ಟಿಂಡ್ ಕೊಡಗ್‌ಕ್ ಬಂದಪಿಳ್ಳಾ ತಾಂಡ ಪ್ರಭು ಸುಲ್ತಾನಂಗ್ ಅಗ್ಗೇನ ಬರತನ್ನೆಕೆ ಸುರೂವೆತ ಅವಕಾಶತನ ನೋಟಿತ್ ಗುಟ್ಟಾಯಿತ್ ಅವಡ ಅಣ್ಣಂಡ ರಕ್ಷಣೆಕ್ ಅಯೆಚತ್. ಖಾದರ್ ಖಾನ್ ಇನ್ನನೆ ತಾಂಡ ತಂಗರ ಮಾನ ರಕ್ಷಣೆ ಮಾಡಿತ್, ಅವಳ ಅಯೆಚ ಉಪಕಾರತನ ಗೇನ ಮಾಡಿಯಂಡ್ ವೀರರಾಜೇಂದ್ರ ಅವಂಡ ಪ್ರಾಣ ಉಳ್ತೊಂಡುಂದ್ ಗೇನ ಮಾಡ್‌ಚಿ.

ಆಚೀಂಗಿ, ಟಿಪ್ಪು ಸುಲ್ತಾನ ತಾಂಡ ತಂಗೈಯಳ ಶ್ರೀರಂಗಪಟ್ಟಿಕ್ ಕಾಕ್‌ಚಿಟ್ಟಿಂಡ್ ತಾನ್ ಬಯಂದಯಿಂಗಳ ತಾಂಡ ಅಂತಃಪುರಕ್ ಅಯೆಚಂದ್ ತಾನ್ ಬಹಿರಂಗ ಆಯಿತ್ ಒತ್ತಂಡಕ ಅದ್ ತಾಂಡ ಪೆದಕ್ ಸರಿ ಆಪುಲೆಂದ್ ವೀರರಾಜೇಂದ್ರ ಒಡೆಯ ತಾನ್

ಎಳ್ಳಚಿಟ್ಟು ರಾಜೇಂದ್ರ ನಾಮಲ್ ಆ ವಿಷಯ ಕಂಡ್ಲೆ. ಈ ವಿಚಾರ ಟಿಪ್ಪುರ ಕಾಲ ಕೈಂಜಪಿಳ್ಳಾ ಅವಂಡ ಚರಿತ್ರೆ ಎಳ್ಳದನ ಲೆ.ಕ.ಮಾರ್ಕ್ಸ್ ವಿಲ್ಹರ ಗ್ರಂಥತ್ ಪ್ರಸ್ತಾಪ ಆಯಿತ್.

ರಾಜಂಡ ಆ ಮೂಂದ್ ತಂಗಯಳಾನ ರಾಜಕುಮಾರಿಯಡ ಪೆದ ದೇವಮ್ಮಾಜಿ ಪಿಳ್ಳಾ ನೀಲಮ್ಮಾಜಿ. ದೇವಮ್ಮಾಜಿ, ವೀರ ರಾಜೇಂದ್ರಂಡ ತಂಗಿ . ಟಿಪ್ಪು ಇವಳ ತಾಂಡ ಜನಾಂಗಕ್ ಕೂಟನಪಿಳ್ಳಾ ಅವಕ್ ಮೆಹ್ತಾಬ್‌ಂದ್ ಪೆದ ಇಟ್ಟಿತ್. ಮೆಹ್ತಾಬ್ ಎಣ್ಣಕ ಪಾದಿ ಚಂದ್ರಂದ್ ಅರ್ಥ. ನೀಲಮ್ಮಾಜಿ ವೀರರಾಜೇಂದ್ರಂಡ ಮಲತಂಗಿ. ಅವಕ್ ಅಫ್ತಾಬ್‌ಂದ್ ಪೆದ ಬೆಚ್ಚಿತ್. ಅಫ್ತಾಬ್ ಎಣ್ಣಕ ಸೂರ್ಯ.

ಟಿಪ್ಪು ಚತ್ತಪಿಳ್ಳಾ ಬ್ರಿಟಿಷ ಈ ರಾಜಕುಮಾರಿಯಳ ಕೊಡಗುಕ್ ವೀರರಾಜೇಂದ್ರಂಡ ರಕ್ಷಣೆಕ್ ಅಯೆಚಿತ್. ಅಯಿಂಗಳ ನಾಲ್ವಾಡ್ ಅರಮನೆಲ್ ಆಕ್‌ಚಿ. ಬ್ರಿಟಿಷ ಕೊಡಗುನ ತಂಗ ಪುಡ್‌ತತ್ ಬೆಚ್ಚಂಡಪಿಳ್ಳಾ ಆ ರಾಜಕುಮಾರಿಯಕ್ ಅವು ಚಾವಣೆಕ್ ರಾಜಕೀಯ ವೇತನ ಕೊಡ್‌ಪ ಇಂಜತ್. ದೇವಮ್ಮಾಜಿ 1852ತ್, ನೀಲಮ್ಮಾಜಿ 1865ತ್ ಚಿತ್‌ಪೋಚಿ. ನಾಲ್ವಾಡ್ ಅರಮನೆರ ಬೆಂಬರಿ ತೋಟತ್ ಇಯಂಗ ದಂಡಾಳ್‌ರ ಚಾವುನ ಮುಸ್ಲಿಂ ಧರ್ಮತ್‌ರ ಪೋಲೆ ಪೂತತ್.

ಅನ್ನನಾಯಿತ್ ವೀರರಾಜೇಂದ್ರ ಒಡೆಯ, ಖಾದರ್‌ಖಾನ್‌ರ ಜಿಂವ ಎಡ್‌ಪಕ್ ಬಯಂದ್ಲೆ. ಅವಂಡ ತಕ್ಕ್ ಕೇಟಿ ರಾಜಂಡ ಕಾರ್ಯಕರ್ತಂಗ "ನಂಗ ಇರಾಟ್ ನೇರತ್ ಅಯಿಂಗಡ ಸೈನ್ಯತ್‌ರ ಮೀದ ಬುದ್ದಿತ್ ಕೆತ್ತುವಕ ಅಯಿಂಗಡ ಕೂಡೆ ಖಾದರ್‌ಖಾನ್ ಕೈಸಗಿ ಇಪ್ಪ ಕಾಂಗತ ಮೋಸಪೋನಕ ಪೋಚಿ. ಜಿಂವಸಹಿತ ಈ ಬರಿ ಜನಡ ಕೈಕ್ ಕೊಟ್ವನಕ ನಿಂಗಕ್ ಅಯಿಂಗಳ ಒಪ್ಪಾಚಿಡುವ"ಂದ್ ರಾಜಂಡ ಕೂಡೆ ಎಣ್ಣೆಯಂಡತ್.

ಈ ತಕ್ಕ್‌ಕ್ ರಾಜ ಒತ್ತವತೆ "ಅಂದಕ ನಂಗ ಮೂಂದ್ ಕುರಿ ಖಾದರ್‌ಖಾನ್‌ರ ಪೆದ ಪುಡ್‌ಚಿತ್ ಕಾಕುವ. ಅವಂಡ ಅದೃಷ್ಟ ಚಾಯಿಂಜಿತ್ ಬಂದಕ ಸರಿ. ಇಲ್ಲೇಂಗಿ ನಿಂಗ ಎಣ್ಣಾನಪೋಲೆ ನಂಗ ಒತ್ತವ"ಂದ್ ಎಣ್ಣವಕ ರಾಜ "ಅಂದಕ ಅನ್ನನೆ ಮಾಡಿ"ಂದ್ ಅಪ್ಪಣೆ ಕೊಡ್‌ತತ್. ಅಲ್ಲಿಂಜ ತಾಂಡ ಕೂಡೆ ಇಂಜ ದಂಡಾಳ್‌ನ ಖಾದರ್‌ಖಾನ್ ಇಂಜ ಶಿಬಿರಕ್ ಅಯೆಚಿತ್ ಈ ಪೋಲೆ ಜೋರ್‌ತೆ ಎಣ್ಣಾಚಿಟ್ಟಿತ್.

"ದೊರೆಕ್ ನಿಂಗ ಉಪಕಾರ ಮಾಡಿತುಳ್ಳಿರ. ಆನಗುಂಡ್ ನಿಂಗಡ ಪ್ರಾಣತ್‌ನ ಕಾಪಾಡೊಂಡೊಂದ್ ನಂಗಡ ದೊರೆಕ್ ಆಸೆ ಉಂಡ್. ಇನ್ನತ ನೇರತ್ ನಿಂಗ ಶರಣಾಗತಿ ಆಯಿತ್ ದೊರೆರ ಪಕ್ಕ ಬಾತೇಂಗಿ ಕ್ಷೇಮ. ಇಲ್ಲೇಂಗಿ ದಂಡ್ ಮಿನಿಟ್‌ಲ್ ನಿಂಗಡ ಪ್ರಾಣ ಪೋಪ"

ರಾಜಂಡ ಬರಿರ ಜನಡ ಈ ತಕ್ಕನ ಕೇಟನ್ನೆ ಖಾದರ್ ಖಾನ್ ಕೈಸಗಿ, ನತ್ರಡ್‌ಖಾನ್, ಮಹಮ್ಮದ್ ಹುಸೇನ್ ಪಿಞ್ಣಾ ಅಮಲ್ಪಾರ್ ರಜಬಲ್ಲಿ ಈ ನಾಲಾಳ್ ಸರದಾರಂಗ ತಂಗಡ ಸೈನ್ಯತೋಡೆ ಪೊರ್‌ಟಿತ್ ಬಂದಿತ್ ರಾಜಂಗ್ ಶರಣಾಗತಂಗಲಾಚಿ.

ಅಕ್ಕ ವೀರರಾಜೇಂದ್ರ ಒಡೆಯ ಖಾದರ್‌ರ ಕೂಡೆ "ಅಂದ್ ನೀನ್ ನಂಗಕ್ ಉಪಕಾರ ಮಾಡಿಯ. ಆನಗುಂಡ್ ನಂಗಲೂ ನೀಕೂ, ನೀಡ ಬೆಂದ್‌ಕಕೂ ಪ್ರಾಣ ಬಚಾವ್ ಮಾಡಿತ್ ಅಯೆಚಂಡ್ ಉಂಡ್. ಟಿಪ್ಪುರ ಸೈನ್ಯತಾರ ಮೀದ ಪುಡ್‌ತ ಬೆಚ್ಚಂಡ್ ಊಣ್ ತೀನಿರ ಸಾಮಾನ್‌ನ ನಂಗಡ ಜನಕ್ ಎತ್ತ್‌ಚಿಡುವನ್ನೆ ಮಾಡುವ"ಂದ್ ಎಣ್ಣೆಚಿ.

ಅಕ್ಕ ಖಾದರ್‌ಖಾನ್ "ಅಂದಕ ನಂಗ ಎನ್ನಂಗ್ ಟಿಪ್ಪುರ ಪಕ್ಕ ಪೋಂಡು? ಇಲ್ಲಿಂಜ ನಂಗಡ ಜಿಂವತ್ ಪೋನಕ ನಂಗಡ ಕುಟುಂಬ, ಮಕ್ಕಡ ಜಿಂವ ಇಪ್ಪಕಿಲ್ಲೆ. ಆನಗುಂಡ್ ಈ ಸಾಮಾನ್ ಪಿಞ್ಣಾ ಸೈನ್ಯತೋಡೆ ಪೋಪಕ್ ಅವಕಾಶ ತಂದಕ ಮಡಿಕೇರಿ ಕೋಟೆಕ್ ಇದ್‌ನೆಲ್ಲ ಇಟ್ಟಿತ್ ಪುನಾದಿಯ ಸೈನ್ಯತೋಡೆ ಪಟ್ಟಣಕ್ ಪೋಲು. ಈ ಮಾನ, ಪ್ರಾಣ ಉಳ್ಳಾತ್‌ನ ಉಪಕಾರತ್‌ನ ನಾನ್ ನಾಡ ಜಿಂವ ಇರಣೆಕ್ ಮರ್‌ಪನ್ನೆ ಇಲ್ಲೆ"ಂದ್ ಬೋಡಿಯಂಡತ್.

ರಾಜ, ಖಾದರ್‌ರ ತಕ್ಕಕ್ ಮನ್ನಣೆ ಕೊಡ್‌ತಿತ್ ತಾಂಡ ಕಾರ್ಯಕಾರ ಕಾಂಗೆರ ಐಯ್ಯಣ್ಣಂಗ್ ಇನ್ನನೆ ಅಪ್ಪಣೆ ಕೊಡ್‌ತತ್.

"ನೀನ್ ಈ ಸೈನ್ಯತಾರ ಕೂಡೆ ಮಡಿಕೇರಿ ಬಟ್ಟೆಕಾಲೆ ಪೋಪಕ ಅಲ್ಲಿ ಉಳ್ಳ ಪಾರಕಾರ ಎನ್ನೇಂಗಿ ತೊಂದರೆ ಮಾಡ್‌ತನ್ನೆ ಇಪ್ಪಕ್ ತಾಕೀತ್ ಮಾಡಿಯಂಡ್ ಪೋ. ಕಿಲ್ಲೆದಾರ ಜಾಫರ್‌ಕುಲಿ ಬೇಗಂ ನಂಗಡ ಕೂಡೆ ಜಗಳ ಮಾಡುವಕಿಲ್ಲಿಯ? ಅದೆಲ್ಲ ಇಲ್ಲತೆ ಮಾಡಿಯಂಡ್ ಕೋಟೆ ಬುಟ್ಟಿತ್ ಈ ಸೈನ್ಯತಾರ ಕೂಡೆ ಪೋಪದ ಎಣ್ಣೆವಾನ ಅಂವಂಡ ಕೂಡೆ ಕೇಟಿತ್ ಅಲ್ಲಿಂಜ ಈ ಸೈನ್ಯತಾನ್ ನಂಗಡ ತೆರಿ ಮುಳ್ಳಾಸೋಗೆ ಪೊಳೆರ ಬರಿರ ಅಪ್ಪರ ದಾಟ್‌ಚಿಟ್ಟಿತ್ ಆಂಡ ವಿಪರ ಎಣ್ಣೆಕೊಡ್"ಂದ್ ಅಪ್ಪಣೆ ಕೊಡ್‌ತತ್.

ಈ ಪೋಲೆ ಕಾರ್ಯಕಾರ ಕಾಂಗೆರ ಐಯ್ಯಣ್ಣ ಸೈನ್ಯತಾರ ಕೂಡೆ ಖಾದರ್ ಖಾನ್ ಪಿಞ್ಣಾ ಸಾಮಾನ್ ಸಾಹಿತ್ಯತ್‌ನ ಮಡಿಕೇರಿ ಕೋಟೆಕ್ ಎತ್ತ್‌ಚಿಟ್ಟಿತ್ ರಾಜ ಎಣ್ಣೆನ್ ತಕ್ಕನ ಜಾಫರ್‌ಕುಲಿ ಬೇಗ್‌ಕ್ ಅರಿಚಿಟ್ಟಿತ್.

ಆ ತಕ್ಕ ಕೇಟಿತ್ ಜಾಫರ್ ಕುಲಿಬೇಗ್ ರಾಜಂಗ್ ಈ ಪೋಲೆ ಎಣ್ಣೆಚಿ.

"ಕೋಟೆಲ್ ಉಳ್ಳ ಸಾಮಾನೆಲ್ಲ ಎಕ್ಕೋ ತೇಂದ್ ಪೋಯಿತ್. ಇಂದ್, ನಾಳೆ ಕೋಟೆನ ಒಪ್ಪಿಚಿಟ್ಟಿತ್ ಪೋಂಡೂಂದ್ ಗೇನ ಮಾಡಿತಿಂಜತ್. ಅಕ್ಕಣೆಕ್ ದೊರೆ

ಖಾದರ್‌ಖಾನ್‌ರ ಮೀದ ಕನಿಕರತ್ ಸಾಮಾನ್‌ನೆಲ್ಲ ಮಡಿಕೇರಿ ಕೋಟೆಕ್ ಎತ್ತ್‌ಚಿಟ್ಟಿತ್. ಈ ಪೋಲೆ ಸಾಮಾನ್ ಉಳ್ಳನ್ನೆ ಕೋಟೆ ಒಪ್ಪಾಚಿಟ್ಟಿತ್, ನಂಗ ಟಿಪ್ಪುರ ಪಕ್ಕ ಪೋನಕ ನಂಗಡ ಕುಟುಂಬ, ಮಕ್ಕಡ ಪ್ರಾಣ ಉಳಿಯುಲೆ. ಆನಗುಂಡ್ ನಿಂಗ ಅಪ್ಪಣೆ ತಂದಕ ಈ ಸಾಮಾನ್ ತೋರಣೆಕ್ ನಂಗ ಇಪ್ಪ. ಅಲ್ಲಿಂಜ ಕೋಟೆನ ಒಪ್ಪಾಚಿಟ್ಟಿತ್ ಅಪ್ಪಣೆ ಪಡ್‌ಂದಂಡ್ ನಂಗ ರಾಜಂಡ ಪಕ್ಕ ಪೋಪ. ಆನಗುಂಡ್ ನಂಗಡ ಮಾನ ಪಿಳ್ಳಾ ಪ್ರಾಣ ಉಳಿಯುವ"ಂದ್ ಎಣ್ಣೆಚಿ.

ಈ ತಕ್ಕನೆಲ್ಲ ಕೇಟ ಕೊಂಗಿರ ಐಯ್ಯಣ್ಣ, ಖಾದರ್‌ ಖಾನ್‌ರ ಸೈನ್ಯತ್‌ನ ವಾಪಾಸ್ ಕಾಕ್‌ಚಿಟ್ಟಂಡ್ ತೆರಿರ ಪಕ್ಕ ಉಳ್ಳ ಮುಳ್ಳುಸೋಗಿರ ಕಾವೇರಿ ಪೊಳೆ ದಾಟ್‌ಚಿಟ್ಟಿತ್ ಅಲ್ಲಿಂಜ ವೀರರಾಜೇಂದ್ರ ಒಡೆಯಂಡ ಪಕ್ಕ ಬಂದಿತ್ ಎಲ್ಲಾ ವಿವರತ್‌ನ ಅರ್ಥ ಮಾಡಿಯಂಡತ್.

ಇದಾಯಿತ್ ಚೆನ್ನಂಗ್ ತಿಂಗತ್ ಮಡಿಕೇರಿ ಕೋಟೆಲ್ ಇಂಜ ಜನಕ್ ಖಾದರ್‌ಖಾನ್ ಕೊಂಡಬಂದ ತಿಂಬಕುಳ್ಳ ಸಾಮಾನೆಲ್ಲ ತೇಂದ್‌ಪೋಚಿ. ಅಲ್ಲಿ ಇಂಜ ಜನಡ ಕಷ್ಟ ಸ್ಥಿತಿನ ನೋಟಿತ್ ಕಿಲ್ಲೇದಾರ ಜಾಫರ್ ಕಲಿಂಬೇಗ ವೀರರಾಜೇಂದ್ರ ಒಡೆಯಂಡ ಕೂಡೆ ತಂಗ ಕೋಟೆನ ರಾಜಂಗ್ ಒಪ್ಪಾಚಿಟ್ಟಿತ್ ಪೊರಾಟ್ ಪೋಪಂದ್ ಎಣ್ಣೆಚಿ.

ಅಕ್ಕ ಓರ್ ಬೊಳ್‌ತ ಬಾವುಟತೋಡೆ ನಾಲ್ ಜನಳ ರಾಜ ಇಂಜ ನಾಲ್ವಾಡ್ ಅರಮನೆಕ್ ಅಯೆಚಿತ್. ರಾಜ ಈ ಜನಳುಂಡ್ ವಿವರ ಅರಾಂಜಂಡ್ ಅಲ್ಲಿಂಜ ಪೊರಾಟಿತ್ ಮಡಿಕೇರಿಕ್ ಬಂದಿತ್ ಇಲ್ಲಿ ಪಳೆಯ ಕೋಟೆಲ್ ಇಂಜತ್.

ಪಳೆಯ ಕೋಟೆ ಇಕ್ಕತ ದೇಚೂರ್‌ಲ್ ಇಂಜನ್ನೆ ಕಾಂಬ. ರಾಜ ಆ ಕೋಟೆಲ್ ಇಪ್ಪಕೆ ಜಾಫರ್ ಕುಲಿಬೇಗ್ ಕಿಲ್ಲೇದಾರನ ಕಾಕ್‌ಚಿಟ್ಟಿತ್ ಅಂವ ಕೋಟೆರ ಒಳ್‌ಲ್ ಉಳ್ಳ ಸುಲ್ತಾನಂಡ ಸರ್ಕಾರತ್‌ರ ಸಾಮಾನ್‌ಲ್ ಏದ್‌ಂಗೂ ಮೋಸ ಮಾಡತೆ ತಾಂಗ್ ಒಪ್ಪಾಚಿಟ್ಟಿತ್ ಅಂವನ ಪಿಳ್ಳಾ ಅಂವಂಡ ಸ್ವಂತ ಮನೆ, ಸಾಮಾನ್ ಏದೇಂಗಿ ಇಂಜಕ ಅದ್‌ನ ತಂಗ ಕೋಟೆ ಬುಟ್ಟ್ ಪೋಪಕ ಎಡ್‌ತಂಡ್ ಪೋಲೂಂದ್ ಅಪ್ಪಣೆ ಮಾಡ್‌ಚಿ.

ಅದ್‌ಂಗ್ ಕಿಲ್ಲೇದಾರ ಒತ್ತಂಡ್ ಅಘ್ನೂರ್ ಜನ ಕೊಡಗ್‌ಕಾರಳ ಕೂಟಿಯಂಡ್ ಪೋಯಿತ್ ಕೋಟೆರ ಒಳ್‌ಲ್ ಇಂಜ ತಾಂಡ ಸೈನ್ಯತ್‌ರ ಜನಳ ಪೊರಾಂವೆ ಉಳ್‌ಪಿತ್ ಅದ್‌ಂಡ ಬದ್‌ಲ್‌ಕ್ ಕೊಡಗ್ ಜನಳ ನಿಪ್ಪಾಚಿಟ್ಟಿತ್. ವೀರರಾಜೇಂದ್ರ ಒಡೆಯಂಡ ಬಾವುಟತ್‌ನ ಕೋಟೆರ ಕೊಡಿಲ್ ನಿಪ್ಪಾಚಿಟ್ಟಿತ್ ಕೋಟೆರ ಪಡಿ, ಬೀಗಮುದ್ರೆ, ಖಜಾನೆ, ಫಿರಂಗಿ, ಮದ್ದ್, ತೋಟ ಇನ್ನತಾನ ಟಿಪ್ಪುರ ಸರ್ಕಾರ ರಾಜಂಗ್ ಒಪ್ಪಾಚಿಟ್ಟಿತ್.

ಪಿತ್ಯಾಂದ್ ಪೊಲಾಕ ರಾಜ ತಾನ್ ಇಂಜ ಪಳೆಯ ಕೋಟೆಂಜ ಪೊರಾಟಿತ್ ಟಿಪ್ಪು



ಕೆಪ್ಪಾಚಿಟ್ಟ ಕೋಟೆರ ಪಕ್ಕ ಬಾತ್. ಅಕ್ಕ ರಾಜ ಬಪ್ಪ ಬಟ್ಟೆರ ದಂಡೂ ಬರಿಲ್ ಟಿಪ್ಪುರ ಜನ ಎಲ್ಲ ಭಯ ಭಕ್ತಿಲ್ ನಿಂದಂಡ್, "ನಂಗಕ್ ಮೂಂದ್ ತಿಂಗತ್‌ಂಜ ಟಿಪ್ಪುರ ಸರ್ಕಾರತ್‌ಂಜ ಸಂಬಳ ಕ್ಕಟ್ಟಿತ್ತಿಲ್ಲೆ. ನಂಗಡ ಸಂಸಾರ, ಮಕ್ಕ ದುಡ್ಡಿಲ್ಲತೆ ಪೇರ್ತ್ ಕಷ್ಟ್ ಉಂಡ್. ತಂಗಡ ಸಂವಿಧಾನತ್‌ಂಜ ಖರ್ಚ್ ದುಡ್ಡ್ ತಂದಿತ್ ನಂಗಳೆಲ್ಲ ಕಾಪಾಡೊಂಡು"ಂದ್ ಕೇಟಂಡತ್.

ಅಕ್ಕ ರಾಜ, "ನಿಂಗಡ ಕಿಲ್ಲೆದಾರನ ಅಯೆಚಕ ನಿಂಗಡ ಖರ್ಚ್ ದುಡ್ಡ್ ತರೊಲು"ಂದ್ ಎಣ್ಣಿತ್ ಕೋಟೆರ ಒಳ್ಳೆ ಪೋನಪಿಳ್ಳಾ ಕಿಲ್ಲೆದಾರಂಡ ಕೂಡೆ "ನೀಡ ಕಡೆರ ಜನ ಖರ್ಚ್ ದುಡ್ಡಿಲ್ಲತೆ ಪೇರ್ತ್ ಕಷ್ಟ ಪಟ್ಟಂಡ್ ಉಂಡ್. ಆನಗುಂಡ್ ಒರಾಯಿರ ಉರ್‌ಪಿಯ ಇನಾಂ ತಪ್ಪ. ಇದ್‌ನ ಹಂಚಿಯಂಡ್, ನಿಂಗಡ ಕೂಡೆ ಪಾರಕ್‌ಂದ್ ಕೊಡಗರ ತೆರಿ ಮುಳ್ಳುಸೋಗೆತ್ತನೆ ನಂಗಡ ಚೆನ್ನಂಗ್ ಜನಳ ಅಯೆಚಿ ತಪ್ಪ"ಂದ್ ಎಣ್ಣಿಚಿ.

ಈ ಪೋಲೆ ರಾಜ ಅವಂಗ್ ದುಡ್ಡ್ ಕೊಡ್‌ತದು ಕಿಲ್ಲೆದಾರ ಆ ಪಣತ್‌ನ ಎಡ್‌ತಂಡ್ ತಾಂಡ ಜನಕ್ ಹಂಚಿತ್ ಶ್ರೀರಂಗ ಪಟ್ಟಣಕ್ ಪೊರ್‌ಟತ್. ಅಲ್ಲಿಂಜ ವೀರರಾಜೇಂದ್ರ ಒಡೆಯ ಮಡಿಕೇರಿ ಕೋಟಿನ ಭದ್ರ ಪಡ್‌ತಿಯಂಡ್ ನಾಲ್ಕಾಡ್ ಅರಮನೆಕ್ ಪೋಯಿತ್ ಅಲ್ಲಿ ಇಂಜತ್.

### ಕಣ್ಣಾನೂರ್ ಬೀಬಿ ರಾಣಿಮುಂಡ್ ಬ್ರಿಟಿಷ್‌ಕ್ ವಿರೋಧ

ವೀರರಾಜೇಂದ್ರ ಒಡೆಯಂಗೂ, ತಲಚೇರಿಲ್ ಇಂಜ ಕಂಪೆನಿ ಅಧಿಕಾರಿಯಕೂ ಸಿನೇತಿಕೆರ ಒಪ್ಪಂದ ಆಯಿತ್ ಚೆನ್ನಂಗ್ ತಿಂಗತ್ ಕಂಪೆನಿ ಸರ್ಕಾರಕೂ, ಟಿಪ್ಪು ಸುಲ್ತಾನಕೂ ಪಡೆ ಘೋಷಣೆ ಆಚಿ. ಚೆನ್ನೆರ ಬರಿಂಜ ಇಂಡಿಯಾ ಕಂಪೆನಿರ ಗವರ್ನರ್ ಜನರಲ್ ಲಾರ್ಡ್ ಕಾರ್ನ್‌ವಾಲಿಸ್ ಸೈನ್ಯ ಎಡ್‌ತಂಡ್ ಮೈಸೂರ್ ಸೀಮೆಕ್ ಬಾತ್. ಮುಂಬೈ ಸೈನ್ಯತ್‌ನ ಕೂಟಿಯಂಡ್ ಜ.ಸರ್ ರಾಬರ್ಟ್ ಅಬರಾಕ್ರಾಂಬಿ ಸಮುದ್ರ ಬಟ್ಟೆಕಾಲೆ ಬಂದಿತ್ ತಲಚೇರಿಲ್ ಇಳ್‌ಂಜತ್. ಅವ ಕೊಡಗ್‌ಕಾಲೆ ಶ್ರೀರಂಗಪಟ್ಟಣಕ್ ಪೋಪಾಂಗ್ ಮುಪ್ಪಡೆ ಕಣ್ಣಾನೂರ್‌ರ ಬೀಬಿ ರಾಣಿಮುಂಡ್ ಅವಡ ಚೆರಿಯ ರಾಜ್ಯತ್‌ನ ಬಲೆಚಂಡ್, ಅವಳ ಪಿಳ್ಳಾ ಅವಡ ಮೋಂವನ ಮುಂಬೈಕ್ ಅಯೆಚಿತ್ ಅಲ್ಲಿ ಅಯಿಂಗಳ ಕಂಪೆನಿ



ಸರ್ಕಾರತರ ಎಚ್ಚರಿಕೆಲ್ ಆಕೊಂಡೂಂದ್ ತೀರ್ಮಾನ ಮಾಡಿತಿಂಬತ್. ಅದ್‌ಂಗ್ ಕಾರಣ ಇನ್ನನೆ ಇಂಬತ್.

ಈ ನೇರಕ್ ಚೆನ್ನಂಗ್ ತಿಂಗತರ ಬಯ್ಯ ತಲಚೇರಿ ಪಕ್ಕತ ರಾಬರ್ಟ್ ಟೈಲರ್ ಸೈನ್ಯಕೂ, ಟಿಪ್ಪುರ ಸೈನ್ಯಕೂ ಜಗಳ ಆಯಿತ್ ರಾಬರ್ಟ್‌ರ ಸೈನ್ಯ ಸುಲ್ತಾನಂಡ ಜನಳ ಕದನೂರಲ್ ಚೋಪ್‌ಚಿಟ್ಟಿತ್ ಆ ಜಾಗತನ ಪುಡ್‌ಚಂಡತ್. ಈ ನೇರತ್ ಕಣ್ಣಾನೂರ ಬಲಿಯಾಬಾನು ರಾಣಿ ತಾಂಡ ನಾಲಾಯಿರ ಮಾಪಳೆಯಳ ಕೂಡಿಯಂಡ್ ಟಿಪ್ಪುರ ಸೈನ್ಯಾಧಿಕಾರಿ ಫಜಲ್ ಖಾನ್‌ರ ಸೈನ್ಯತನ ಕೂಡಿಯಂಡತ್. ಇವಡ ಮೋವಳ ಟಿಪ್ಪುರ ಓರ್ ಮೋವಂಗ್ ಕೊಡ್‌ತಿತ್ ಮಂಗಲ ಆಯಿತಿಂಬತ್.

ಬೀಬಿ ರಾಣಿ ಸುಲ್ತಾನರ ಸೈನ್ಯ ಕೂಡಿಯವಕ ರಾಬರ್ಟ್ ಟೈಲರ್ ಅವಳ ಅವ ಸುಲ್ತಾನಂಡ ಬರಿಯ ಕೂಡಿಯಂಡ್ ಜಗಳ ಮಾಡುವ / ಟಿಪ್ಪುರ ಸಿನೇತಿಕೆ ಬುಟ್ಟಿತ್ ಇಂಗ್ಲೀಷ್‌ಕಾರಡ ಕಂಪೆನಿರ ಕೂಡೆ ನಿಪ್ಪ ಎಣ್ಣುವಾನ ಅರಿಯೊಂಡೂಂದ್ ಎಣ್ಣಿತ್ ಅಯೆಚತ್.

ಅಕ್ಕ ಈ ಬೀಬಿ ರಾಣಿ ಟಿಪ್ಪುರ ಸೈನ್ಯಾಧಿಕಾರಿಯಡ ಕೂಡೆ ತಕ್ಕ ಪರಂದಿತ್ ಒಳೀಯ ಕೆಣಿ ಮಾಡ್‌ಚಿ. ಸುಲ್ತಾನಂಡ ಸೈನ್ಯ ಬೀಬಿರಾಣಿರ ಒರಾತತನುಂಡ್ ಕಣ್ಣಾನೂರ ಕೋಟೆನ ಬುಟ್ಟಿತ್ ಮಂಗಳೂರಕ್ ಪೋಚಿಂದ್ ಸುದ್ದಿ ಮಾಡಿತ್ ಕೋಟೆಂಬ ಪೊರ್‌ಟಿತ್ ಅಲ್ಲೆ ಪಕ್ಕತ್ ಇಂಬ ಕವ್ವಾಯಿ ಎಣ್ಣುವ ಜಾಗತ್ ಇರೊಂಡು. ಈ ನೇರತ್ ಬೀಬಿರಾಣಿ ತಲಚೇರಿಲ್ ಉಳ್ಳ ಬ್ರಿಟಿಷ್ ಸೈನ್ಯ ಕಣ್ಣಾನೂರ ಕೋಟೆನ ನುಗ್ಗಿತ್ ಅಯಿಂಗಡ ಬಾವುಟತನ ಕೋಟೆರ ಕೂಡಿಯ ಪಾರುವನ್ನಕೆ ನೋಟಿಯವಂಡು. ಕಂಪೆನಿ ಸಿಪಾಯಿಯ ತಂಗಡ ಸರದಾರ ಅಲ್ಲಿಕ್ ಬಪ್ಪಕ ಅಯಿಂಗಳ ಆದ್ಯ ಕೋಟೆರ ಪೊರ್‌ಮೆತ ಪರಂಬುಲ್ ಉಳ್ಳಪೊಂಡು. ಅಂದ್ ಬೈಟ್ ಮೂಂದನೆ ನೇರತ್ ಕವ್ವಾಯಿಲ್ ಇಂಬ ಸೈನಿಕಂಗ ಬೀಬಿರಾಣಿರ ಮಾಪಳೆಯ ಒಕ್ಕಚಿ ಕೂಡಿಯಂಡ್ ಕಣ್ಣಾನೂರಕ್ ಬಂದಿತ್ ಸುಲ್ತಾನ ಬ್ರಿಟಿಷಡ ಸೈನ್ಯತರ ಮೀದ ಬುದ್ದಿತ್ ಅಯಿಂಗಕ್ ಚಾವು, ನೊಂಬಲ ಆಂಡುಂದ್ ಉಪಾಯ ಮಾಡಿತ್ ಬೀಬಿರಾಣಿ, ಸುಲ್ತಾನಂಡ ಸೈನ್ಯತನ ಕಣ್ಣಾನೂರ ಕೋಟೆಂಬ ಪೊರ್‌ಮೆ ಅಯೆಚಿತ್, ತಲಚೇರಿಲ್ ಇಂಬ ಬ್ರಿಟಿಷಡ ಸೈನ್ಯ ಕಣ್ಣಾನೂರ ಕೋಟೆನ ನುಗ್ಗಿತ್ ಅದೊಂಡ ಬಾವುಟತನ ಪಾರ್‌ಚಿಡೊಲುಂದ್ ತಲಚೇರಿ ಕೋಟೆರ ಅಧಿಕಾರಿ ರಾಬರ್ಟ್ ಟೈಲರ್‌ಕ್ ಎಣ್ಣಿತ್ ಅಯೆಚತ್.

ಅವಡ ತಕ್ಕನ ನಂಬಿತ್ ರಾಬರ್ಟ್ ಟೈಲರ್ ಮೇ. ಡ್ ಎಣ್ಣುವ ಸೈನ್ಯಾಧಿಕಾರಿರ ಕೂಡೆ ಚೆನ್ನಂಗ್ ಸೈನಿಕಂಗಳ ಕಣ್ಣಾನೂರಕ್ ಅಯೆಚತ್. ಮೇ. ಡ್ ಸೈನ್ಯ ಎಡ್‌ತಂಡ್



ಬಂದ ದಿನ ರಾಣಿರ ಆಸೆರನ್ನಕೆ ಕೋಟೆರ ಪಕ್ಕತ ಪರಂಬಲ್ ತಾಂಡ ಸೈನಿಕಂಗಡ ಕೂಡೆ ದೇರೆ ಇಟ್ಟಿತ್.

ಅಂದ್ ಬೈಟ್ ರಾಣಿರ ಕೆಣಿರನ್ನಕೆ ಸುಲ್ತಾನಂಡ ಸೈನ್ಯಾಧಿಕಾರಿ ಫಾಜಲ್‌ಖಾನ್ ಬೀಬಿರಾಣಿರ ಮಾಪಳೆಯಳ ಕೂಟಿಯಂಡ್ ಡೊರ ಸೈನ್ಯತಾರ ಮೀದ ಬುದ್ದತ್. ಸುರೂಲ್ ತಲಚೇರಿ ಸೈನ್ಯತಾರ ಚೆನ್ನಂಗ್ ಸಿಪಾಯಿಯ ಚಿತ್ತತ್. ಬಾಕಿ ಉಳ್ಳವು ಅಕ್ಕಣೆಕ್ ಎಚ್ಚರ ಆಯಿತ್ ಶತ್ರುವಡ ಮೀದ ಬುದ್ದತ್. ಸುಲ್ತಾನಂಡ ಸೈನಿಕಂಗ ಮಾಪಳೆಯ ಪೊಯ್ತ್ ಸಹಿಸುವ ಕಯ್ಯತೆ ಕಣ್ಣಾನೂರ್ ಕೋಟೆರ ಒಳ್ಳಕ್ ನುಗ್ಗಿತ್ ತಂಗಡ ರಕ್ಷಣೆ ಮಾಡಿಯಂಡತ್. ಕೋಟೆನ ವಶ ಪಡ್‌ತಿಯವಚ್ಚಕ್ ಮೇ. ಡೊರಲ್ಲಿ ಸೈನ್ಯ ಪಿಳ್ಳಾ ಪಡೆರ ಆಯುಧ ಇಲ್ಲತಾನಗುಂಡ್ ಅವ ತಾಂಡ ಜನಳ ಕಾಕಿಯಂಡ್ ತಲಚೇರಿಕ್ ಪೋಚಿ. ಅಲ್ಲಿ ರಾಬರ್ಟ್ ಟೈಲರ್, ಡೊನುಂಡ್ ಎಲ್ಲ ವಿಚಾರ ಅರ್‌ಂಬಂಡ್ ಅವನ ಮುಂಬೈ ಗವರ್ನರ್ ಕ್ರಾಂಬಿರ ಪಕ್ಕ ಎಳ್ವಿತ್ ಆಯಚಿತ್. ಅಬರ್ ಕ್ರಾಂಬಿ ತಾನ್ ಟಿಪ್ಪುರ ಕೂಡೆ ಪಡೆಪೊಪ್ಪಕ್ ಸೈನ್ಯತಾನ ತಲಚೇರಿಕ್ ಚೆನ್ನಂಗ್ ದಿನತ್ ಕೊಂಡಬಪ್ಪಿದೂ ಅಕ್ಕ ಕಣ್ಣಾನೂರ ಬೀಬಿ ರಾಣಿಕ್ ಸೆರಿಯಾನ ಶಿಕ್ಷೆ ಮಾಡೊಂಡೂಂದ್ ಜವಾಬ್ ಆಯೆಚಿತ್.

ಈ ಪೋಲೆ ಸರ್ ಕ್ರಾಂಬಿ ತಲಚೇರಿಲ್ ಸೈನ್ಯತೋಡೆ ಬಂದಿತ್ ಇಳಿವಕ ಕಣ್ಣಾನೂರ್ ಕೋಟೆನ ಪುಡ್‌ತತ್ ಎಡ್‌ತವಕ್ ಓರ್ ಬಲ್ಯ ಸೈನ್ಯ ಕಣ್ಣಾನೂರ್ಕ್ ಪೋಯಿತ್ ಸುಲ್ತಾನಂಡ ಸೈನಿಕಂಗಳ ಚೋಪ್‌ಚಿಟ್ಟಿತ್. ಅಕ್ಕ ಸುಲ್ತಾನಂಡ ಸೈನ್ಯಾಧಿಕಾರಿ, ಬೀಬಿರಾಣಿ ಅಬರ್ ಕ್ರಾಂಬಿರ ಕೂಡೆ ಸಮಧಾನತಾರ ಒಪ್ಪಂದ ಮಾಡಿಯವಂಡೂಂದ್ ತಂಗಡ ವಕೀಲಂಗಳ ಆಯೆಚಿತ್. ಅಕ್ಕ ಕ್ರಾಂಬಿ ಸುಲ್ತಾನಂಡ ಕೂಡೆ ಇಘ್ಲಾ ಬಹಿರಂಗ ಆಯಿತ್ ಪಡೆ ಸುರು ಮಾಡತೆ ಇಂಜಾನುಂಡ್ ಅವಂಡ ಸೈನ್ಯಾಧಿಕಾರಿನ ಸೈನ್ಯತೋಡೆ ಕಣ್ಣಾನೂರ್ ಕೋಟೆ ಬುಟ್ಟಿತ್ ಪೋಪಕ್ ಬುಟ್ಟಿತ್. ಆಚೇಂಗಿ, ಬೀಬಿರಾಣಿ ಮಾತ್ರ "ಅವಳೂ, ಮಾಪಳೆಯಳೂ ತಂಗಡ ಸೈನ್ಯಕ್ ದ್ರೋಹ ಮಾಡ್‌ನಾಂಗ್ ಅವಡ ಕೂಡೆ ಒಪ್ಪಂದ ಮಾಡಿಯವುಲೆಂದ್ ಅವಳ ರಾಜ್ಯವ್ರಷ್ಟಕಾಯಿತ್ ಮಾಡಿತ್ ಮುಂಬೈಕ್ ಆಯೆಪಕ್ ತೀರ್ಮಾನ ಮಾಡಿಯೆ"ಂದ್ ಎಣ್ಣಿತ್ ಆಯೆಚಿತ್.

ಈ ನೇರತ್ ಅಬರ್ ಕ್ರಾಂಬಿ ಕೊಡಗ್ಗರ ವೀರರಾಜೇಂದ್ರ ಒಡೆಯನ ಕಾಂಗೊಂಡೂಂದ್ ಬಯಂದಿತ್ ಅವನ ಕೂಟಿಯಂಡ್ ಬಪ್ಪಕ್ ಓರ್ ಕಂಪೆನಿ ಸಿಪಾಯಿರ ಕೂಡೆ ಓರ್ ಸರದಾರನ ಕೊಡಗ್ಗಕ್ ಆಯೆಚಿತ್. ಅವ ಕೊಡಗ್ಗಕ್ ಬಂದಿತ್ ವೀರರಾಜೇಂದ್ರಂಡ ಕೂಡೆ ಕ್ರಾಂಬಿರ ಅಭಿಪ್ರಾಯ ಎಣ್ಣುವಕ, ವೀರರಾಜೇಂದ್ರ ಅವಂಡ ಕೂಡೆ ಪೊರಟಿತ್ ತಲಚೇರಿಕ್ ಬಾತ್. ತಲಚೇರಿಕ್ ವೀರರಾಜೇಂದ್ರ ಒಡೆಯ ಬಂದೆತ್ತನ ಸುದ್ದಿನ ಕೇಟ ಬೀಬಿರಾಣಿ ಇನ್ನನೆ ಗೇನ ಮಾಡ್‌ಚಿ.

ಸುಲ್ತಾನಂದ ಜನ ಇಂಗ್ಲೀಷ್‌ಕಾರಡ ಕೂಡ ಒಪ್ಪಂದ ಮಾಡಿಯಂಡ್ ಕೋಟೆಂಜ ಇಳ್ಳಂಜಿತ್ ಪಟ್ಟಣಕ್ ಪೋಪ. ನಂಗಡ ಮಾಪಳೆಯಳ ಬದ್‌ಕುವಕ್ ಬುಡುಲೆ. ಮಲಯಾಳತ್ ಉಳ್ಳ ರಾಜಂಗ ನಾಯಮಾರ ಶತ್ರುವ. ಕೊಡಗ್ಗರ ದೊರೆ ಇಕ್ಕ ತಲಚೇರಿಕ್ ಬಂದಿತ್. ಅಯಿಂಗಡ ಪೆರಿಯಯಿಂಡ ಕಾಲತ್ ಅಯಿಂಗಡ ಬರಿ ದಳವಾಯಿಕ್ ನಂಗ ಉಪಕಾರ ಮಾಡಿತ್. ಈ ನೇರತ್ ನಂಗ ಕೇಟಂಡಕ ನಂಗಳ ಉಳ್ಳತಿಯವ ಮೀದ ಅಯಿಂಗಳುಂಡ್ ಆಪಚ್ಚಕ್ ಉಪಕಾರ ಆಕುಂದ್ ಗೇನ ಮಾಡ್‌ಚಿ.

ಆನಗುಂಡ್ ರಾಣಿ ತಾಂಡ ಮೋವನ ಕಾರ್ಯಕಾರ ಕುಳ್ಳಿಪಕ್ಕಿರ ಕೂಡ ದೋಣಿ ಪತ್‌ಚಿಟ್ಟಿತ್ ಕಳ್ಳ ಬಟ್ಟೆಲ್ ಗುಟ್ಟಾಯಿತ್ ತಲಚೇರಿಲ್ ವೀರ ರಾಜೇಂದ್ರಂಡ ಪಕ್ಕ ಅಯೆಚತ್. ಕಾರ್ಯಕಾರ ಕುಳ್ಳಿಪಕ್ಕಿ, ಬೀಬಿ ರಾಣಿರ ಮೋಂವನ ಕೂಟಿಯಂಡ್ ತಲಚೇರಿಕ್ ಬಂದಿತ್ ಅಲ್ಲಿ ಮುಸೆಬ್ಬಾರಿ ಎಣ್ಣುವಂವನ ತಂಗಡ ಕೂಡ ಕೂಟಿಯಂಡ್ ವೀರ ರಾಜೇಂದ್ರ ಇಂಜ ಹಯಾಜ್ ಎಣ್ಣುವ ವ್ಯಕ್ತಿರ ಮನೆಕ್ ಬಾತ್.

ಅಲ್ಲಿ ಅವ ರಾಣಿರ ಮೋಂವನ ವೀರರಾಜೇಂದ್ರಂಗ್ ಒಪ್ಪೆಚಿಟ್ಟಿತ್ ಅವ ಎಣ್ಣೊನ್ನಕ್ಕೆ, "ಇಚ್ಚಕ್ ದಿನ ನಂಗಡ ಮೋಂವ ಆಯಿತ್ ಇಂಜತ್. ಇಕ್ಕ ನಿಂಗಡ ಮಡ್‌ಕ್ ಇಟ್ಟಿತ್. ನಿಂಗ ಆರೈಕೆ ಮಾಡಿಯಂಡಕ ಕೇಳಿ ಕೀರ್ತಿ ಎಲ್ಲ ನಿಂಗಕೆ"ಂದ್ ಎಣ್ಣೊಚಿ.

ಬೀಬಿರಾಣಿ ಎಣ್ಣಿತ್ ಅಯೆಚ ಎಲ್ಲ ತಕ್ಕನ ವೀರ ರಾಜೇಂದ್ರಂಡ ಪಕ್ಕ ಎಣ್ಣಿತ್ ನಂಗಡ ಪೆರಿಯಯಿಂಡ ಕಾಲತ್ ದಳವಾಯಿಕ್ ಇವು ಉಪಕಾರ ಮಾಡಿತ್‌ಂದ್ ಗೇನ ಮಾಡಿತ್ ಅದ್‌ಂಗ್ ನಂಗಳೂ ಉಪಕಾರ ಮಾಡೊಂಡೊಂದ್ ತೀರ್ಮಾನ ಮಾಡ್‌ಚಿ. ಈ ಪೋಲೆ ಪಿತ್ಯಾಂದ್ ಪೊಲಾಕ ಬೀಬಿ ರಾಣಿರ ಮೋಂವನ ಕೂಟಿಯಂಡ್ ರಾಬರ್ಟ್ ಟೈಲರ್ ತಾನೂ ಬೀಬಿರಾಣಿರ ಪರವಾಯಿತ್ ಜ.ಅಬರ್ ಕ್ರಾಂಬಿರ ಕೂಡ ತಕ್ಕ ಪರೆಯುವಕ್ ಕಯ್ಯುಲೆಂದ್ ಅವ ಇಂಗ್ಲೀಷ್‌ಕಾರಕ್ ನಂಬ್‌ಚಿಟ್ಟಿತ್ ಮೋಸ ಮಾಡಿತ್‌ಂದ್ ವೀರ ರಾಜೇಂದ್ರಂಡ ಕೂಡ ಎಣ್ಣೊಚಿ.

ಅಕ್ಕ ವೀರರಾಜೇಂದ್ರ "ಅಂದಕ ನಂಗ ಈ ರಾಣಿರ ಮೋಂವನ ಕೂಟಿಯಂಡ್ ಜನರಲ್ ಸಾಹೇಬನ ಕಾಂಬಕ್ ಪೋಪ. ನಂಗಡ ಕೂಡ ನಿಂಗಳೂ ಬರೊಂಡು"ಂದ್ ರಾಬರ್ಟ್ ಟೈಲರ್‌ಕ್ ಎಣ್ಣೊಚಿ. ಈ ತಕ್ಕಕ್ ಒತ್ತಂಡ ಟೈಲರ್, ಬೀಬಿರಾಣಿರ ಮೋಂವನ ಕೂಟಿಯಂಡ್ ತಲಚೇರಿಂಜ ಪೊರಾಟಿತ್ ಪತ್ತೆಮಾರಿಕಾಲೆ ಇಂಗ್ಲೀಷ್ ಸೈನ್ಯ ಉಳ್ಳಲ್ಲಿಕ್ ಪೋಯಿತ್ ಜ. ಅಬರ್ ಕ್ರಾಂಬಿನ ಕಂಡತ್.

ಅಲ್ಲಿ ವೀರರಾಜೇಂದ್ರ, ರಾಣಿರ ಮೋಂವಂಡ ಕೈನ ಅಬರ್ ಕ್ರಾಂಬಿರ ಕೈಕ್‌ಟ್ಟಿತ್



"ನಂಗಡ ಮೀದ ಕನಿಕರ ಬೆಚ್ಚಂಡ್ ಈ ಕುಳ್ಳಾರ ಮಾನ ಪಿಳ್ಳಾ ಜಿಂವ ಕಾಪಾಡೊಂಡು"ಂದ್ ಕೇಟಂಡತ್.

ಕೂಡೆನ್ನೆ ಕ್ರಾಂಬಿ, ಈ ಕ್ಕಣ್ಣುಕುಳ್ಳಾ ದಾಡ ಮೋಂವಂದ್ ಅರಿಯತೆ ಆಕುಂದ್ ಒತ್ತಾರ್ತ. ಅಲ್ಲಿಂಜ ರಾಬರ್ಟ್ ಟೈಲರ್ ಕೂಡೆ "ಈ ಕುಳ್ಳಾ ದಾಡ ಮೋಂವ"ಂದ್ ಕೇಟತ್.

"ಈ ಕುಳ್ಳಾ ಕಣ್ಣೂರ್ ಬೀಬಿರಾಣೆರ ಮೋಂವ. ಬೈಟ್ ದಾರ್ಕೂ ಗೊತ್ತಾಕತನ್ನೆಕೆ ದೋಣಿ ಪತ್ತೆಚಿಟ್ಟಿತ್ ಮಹಾರಾಜಂಡ ಪಕ್ಕ ಅಯೆಚಿತ್"ಂದ್ ಜವಾಬ್ ಕೊಡ್ತತ್.

ಅಕ್ಕ ಕ್ರಾಂಬಿ ತಾಂಡ ಮನಸ್ಸಲೆ ಪಗೆ ಬೆಚ್ಚಂಡ್ "ವೀರರಾಜೇಂದ್ರಂಡ ಕೂಡೆ ಕಣ್ಣೂರ್ಕಾರ ಕಂಪೆನಿ ಸರ್ಕಾರತ್ ಸಾಹೇಬಂಗ್ ಮೋಸ ಮಾಡಿತ್. ಅದ್‌ಂಗ್ ಸೆರಿಯಾನ ಶಿಕ್ಷೆ ಕೊಡ್‌ಕೊಂಡೊಂದ್ ಆಯಿತ್. ಇನ್ನತ ದುಷ್ಟ ಜನಡ ಮೀದ ಕರುಣೆ ಕಾಟುವಕಯ್ಯ"ಂದ್ ಎಣ್ಣೊಚಿ.

ಅದ್‌ಂಗ್ ವೀರರಾಜೇಂದ್ರ "ಇದೊಮ್ಮೆ ನಂಗಡ ಮೀದ ಸಿನೇತಿಕೆರ ದೃಷ್ಟಿಲ್, ದಯಬೆಚ್ಚಿತ್ ಈ ಕುಳ್ಳಾನ ಕಣ್ಣೂರ್ ಜಾಗತ್ ನಿಪ್ಪೆಚಿಡೊಂಡು. ಇದ್ ನಿಂಗ ನಂಗಕ್ ಮಾಡ್‌ನ ಉಪಕಾರತ್‌ರನ್ನೆಕೆ ಆಪಾ"ಂದ್ ದುಂಬ ಕೇಟಂಡತ್.

ಅಕ್ಕ ಜನರಲ್ ಸಾಹೇಬ "ಕಣ್ಣೂರ್ ಬೀಬಿ ತಾಂಡ ಮೋಂವನ ನಿಂಗಡ ಕೈಕ್ ತಂದಾಂಗ್ ನಿಂಗ ಆ ಕುಳ್ಳಾನ ನಂಗಕ್ ತಂದಿರಚ್ಚೆಕೆ. ಆನಗುಂಡ್ ನಂಗ ಪುನಾದಿಯ ಈ ಕುಳ್ಳಾನ ನಿಂಗಡ ಕೈಕೆ ತಪ್ಪ. ಆ ಪೋಲೆ ನಿಂಗ ಕಣ್ಣೂರ್ ಕೋಟೆಕ್ ಪೋಯಿತ್ ಈ ಕುಳ್ಳಾನ ಬೀಬಿರ ಕೈಕ್ ಕೊಡ್‌ತಿತ್, ನೀನ್ ಮಾಡ್‌ನ ದ್ರೋಹತ್‌ನ ಇಂಗ್ಲೀಷ್ ಕಂಪೆನಿ ಸರ್ಕಾರ ಮಾಪು ಮಾಡಿತ್. ಇಳ್ಳಾ ಮಿಳ್ಳಾಕ್ ಇನ್ನತ ಅನ್ಯಾಯ ಮಾಡ್‌ನಕ ಮಾಪು ಮಾಡುಲೆ. ಆಂಡ ಬದಲ್ ಸೆರಿಕ್ ಶಿಕ್ಷೆ ಆಪಾಂದೆ ಎಣ್ಣೊಂಡೊ"ಂದ್ ವೀರರಾಜೇಂದ್ರ ಒಡೆಯಂಡ ಕೂಡೆ ಎಣ್ಣೊಚಿ. ರಾಜಂಡ ಕೂಡೆ ರಾಬರ್ಟ್ ಟೈಲರ್, ಸ್ಟಾಂಡಿಫರ್ಡ್, ಸ್ಯಾಮ್ಯುಲೆ ವಿಲ್ಸನ್ ಇನ್ನತ ಇಂಗ್ಲೀಷ್ ಅಧಿಕಾರಿಯಳ ಬ್ರಿಟಿಷ್ ಬಾವುಟತ್‌ರ ಕೂಡೆ ಕಣ್ಣಾನೂರ್ ಕೋಟೆಕ್ ಅಯೆಚಿತ್.

ವೀರರಾಜೇಂದ್ರ ಪಿಳ್ಳಾ ಈ ಅಧಿಕಾರಿಯ ಕಣ್ಣಾನೂರ್ ಕೋಟೆಕ್ ಪೋಯಿತ್ ಕಂಪೆನಿ ಸರ್ಕಾರತ್ ಬಾವುಟತ್‌ನ ಕೋಟೆರ ಕೊಡಿಯ ಪಾರ್‌ಚಿಟ್ಟಿತ್. ಅಲ್ಲಿಂಜ ಅವು ಬೀಬಿಕ್ ಅವಡ ಮೋಂವನ ಕೊಡ್‌ತಿತ್ ಜನರಲ್‌ಎಣ್ಣೊನ ಎಚ್ಚರಿಕೆರ ತಕ್ಕನ ಎಣ್ಣೊಚಿ. ಅನ್ನನೆ ಇಳ್ಳಾ ಮಿಳ್ಳಾಕ್ ಚಾಯಿತೆ ನಡ್‌ಂದವನ್ನೆಕೆ ಬುದ್ಧಿ ತಕ್ಕ ಎಣ್ಣೆತ್ ವಾಪಾಸ್ ಜನರಲ್‌ರ

ಪಕ್ಕ ಬಾತ್.

ಜನರಲ್, ಕಣ್ಣಾನೂರ್ ಕೋಟೆಲ್ ವೀರರಾಜೇಂದ್ರ ಪಿಳ್ಳಾ ಅಧಿಕಾರಿಯ ಮಾಡ್‌ನ ಕಾರ್ಬಾರ್‌ರ ಮೀದ ಕೇಟಿತ್ ಕುಶಿ ಪಟ್ಟಿತ್ "ನಿಂಗ ನಲ್ಲ ಕಾರ್ಬಾರ್ ಮಾಡಿರ"ಂದ್ ಎಣ್ಣೆಚಿ.

ಅಲ್ಲಿಂಜ ವೀರರಾಜೇಂದ್ರಂಡ ಕೂಡೆ ಬೋರೆ ಆಯಿತ್ "ಇಳ್ಳಾ ಮಿಳ್ಳಾಕ್ ನಿಂಗಕೂ, ನಂಗಕೂ ಬಲ್ಯ ಶತ್ರು ಆಯಿತುಳ್ಳ ಟಿಪ್ಪುನ ಚೋಪ್‌ಚಿಡುವಕ್ ನಂಗಲ್ಲ ತಯಾರಾಂಡು. ಇಕ್ಕ ಇಂಗ್ಲೀಷ್ ಸೈನ್ಯ ಶ್ರೀರಂಗಪಟ್ಟಿಕ್ ಪೋಪ ಬಟ್ಟೆ ಟಿಪ್ಪುರ ತಾಲೋಕ್‌ರ ಒಳ್‌ಲೆ ಉಂಡ್. ಆ ಬಟ್ಟೆಲ್ ದುಂಬ ಜನಳ ಆಕಿತ್ ಅವು ಬಂದೋಬಸ್ತ್ ಮಾಡಿತ್. ಆನಗುಂಡ್ ಇಂಗ್ಲೀಷ್ ಸೈನ್ಯ ಕೊಡಗ್ ಸೀಮೆಕಾಲೆ ಪೋಪಕ್ ಏದ್ ಬಟ್ಟೆ ಸೆರಿ ಉಂಡ್‌ಂದ್ ಅರ್‌ಂಜವಕ್ ಸರದಾರಂಗಳ ಚೆನ್ನಂಗ್ ದಿನತ್ ನಿಂಗಡ ಪಕ್ಕ ಅಯೆಪ. ಆ ಪೋಲೆ ನಂಗಡ ಸೈನ್ಯ ಬಪ್ಪಕ್ ಸೆರಿಯಾನ ಬಟ್ಟೆನ ಮಾಡೊಂಡು"ಂದ್ ಎಣ್ಣೆಚಿ.

ಈ ತಕ್ಕಾಕ್ ಒತ್ತಂಡ್ ವೀರರಾಜೇಂದ್ರ ಕೊಡಗ್‌ಕ್ ವಾಪಾಸ್ ಪೋಚಿ.

## ಸರ್ ರಾಬರ್ಟ್ ಅಬರ್ ಕ್ರಾಂಬಿ ಕೊಡಗ್‌ಕ್ ಬಂದದ್

ವೀರರಾಜೇಂದ್ರ ಒಡೆಯ ತಲಚೇರಿಲ್ ಜ.ಅಬರ್ ಕ್ರಾಂಬಿನ ಕಂಡಿತ್ ಕೊಡಗ್‌ಕ್ ಬಂದಪಿಳ್ಳಾ ಅಬರ್ ಕ್ರಾಂಬಿ ಸೈನ್ಯಕ್ ಬೋಂಡಿಯಾನ ಸಾಮಾನ್ ಸಾಹಿತ್ಯತ್‌ನ ಕೂಟುವಕ್ ಸುರು ಮಾಡ್‌ಚಿ. ಕ್ರಾಂಬಿ ಎಣ್ಣೆನನ್ನೆಕೆ ಚೆನ್ನಂಗ್ ದಿನತ್ ಅವ ಅಯೆಚಿ ಕ್ಯಾಪ್ಟನ್ ರೆನ್ನೆಲ್ ಎಣ್ಣುವ ಸೈನ್ಯಾಧಿಕಾರಿ ವೀರರಾಜೇಂದ್ರಂಡ ಪಕ್ಕ ಬಂದಿತ್ ತಲಚೇರಿಲ್ ಇಂಜ ಸೈನ್ಯ ಕುಂದ್ ಪತ್ತಿ ಬಪ್ಪಕ್ ಬಟ್ಟೆನ ಸೆರಿ ಮಾಡ್‌ಚಿಟ್ಪ್ ತರೊಂಡೊಂದ್ ಕೇಟಂಡತ್.

ಆ ಪೋಲೆ ವೀರರಾಜೇಂದ್ರ ಬಟ್ಟೆನ ಸೆರಿ ಮಾಡಿತ್ ಜ.ಅಬರ್‌ಕ್ರಾಂಬಿನ ಸೈನ್ಯತೋಡೆ ಕೂಟಿಯಂಡ್ ಬಪ್ಪಕ್ ಕ್ಯಾ. ರೆನ್ನೆಲನ ತಲಚೇರಿಕ್ ಅಯೆಚತ್. ಸೈನ್ಯಕ್ ಬೋಂಡಿಯಾನ ಫಿರಂಗಿ ಬಲಿಪ ಅತ್ತ ಪಿಳ್ಳಾ ಬೋರೆ ಸಾಮಾನ್ ತಾಂಡ ರಾಜ್ಯತ್ ಇಲ್ಲತಾನಗುಂಡ್

ತಾಂಡ ಗೂಡಚಾರತ್‌ಂಜ ಟಿಪ್ಪುರ ಸೀಮೆಲ್ ಅತ್ತ ಪಿಳ್ಳಾ ಬೋರೆ ಸಾಮಾನ್ ಕ್ಕಟ್ಟುವಾಂದ್ ಕಂಡ್ ಪುಡ್‌ಚಿತ್ ತಾಂಡ ಜನಳ ಅಲ್ಲಿಕ್ ಅಯೆಚಿತ್ ಅತ್ತ ಪಿಳ್ಳಾ ಸಾಮಾನ್‌ನೆಲ್ಲ ಲೂಟಿ ಮಾಡಿತ್ ಕೊಂಡ ಬಪ್ಪಾಚಿಟ್ಟಿತ್.

ತಾನ್ ಈ ನೇರತ್ ಬ್ರಿಟಿಷ್ ಸೈನ್ಯಕ್ ಸಹಾಯ ಮಾಡತ ಪೋಚೇಂಗಿ ತಾಂಡ ಪಿಳ್ಳಾ ಕಂಪೆನಿ ಸರ್ಕಾರತ್‌ರ ಸಿನೇತಿಕಿರ ಕರಾರ್‌ಕ್ ಬೆಲೆ ಇಪ್ಪುಲೆಂದ್ ರಾಜ ಗೇನ ಮಾಡಿತ್ ಸುಲ್ತಾನಂಡ ಸೀಮೆಂಜ ತಾಂಡ ರಾಜ್ಯತ್ ಇಲ್ಲತ ಸಾಮಾನ್‌ನ ತಲಚೇರಿಕ್ ಕೊಂಡ ಬಪ್ಪಾಚಿಟ್ಟಿವಲೂಂದ್ ಎಳ್ವೆಚಿ.

ಅಕ್ಕ ರಾಬರ್ಟ್ ಟೈಲರ್‌ಕ್ ಊಣ್ ತೀನಿರ ಸಾಮಾನ್‌ನ ತಂಗಡ ಸೈನ್ಯಕ್ ತಪ್ಪನ್ನಕೆ ಎಳ್ವಿತ್ ಫಿರಂಗಿ ಬಲಿಪ ಅತ್ತಳ ಮಾತ್ರ ಅಯೆಪಕ್ ಚೆನ್ನಂಗ್ ಜನಳ ಕೊಡಗುಕ್ ಅಯೆಚಿತ್. ವೀರರಾಜೇಂದ್ರ ಈ ಜನಡ ಕೂಡೆ ತಾನ್ ಮೈಸೂರ್ ಸೀಮೆನ ಲೂಟಿ ಮಾಡ್‌ಚಿಟ್ಟಿತ್ ಕೊಂಡ ಬಪ್ಪಾಚಿಟ್ಟಿ ಅತ್ತಡಾತ್ ನೋಟಿತ್ ಆಂಜಂಡ್ ಗೆಟ್ಟಿ ಮುಟ್ಟಾನ 1,111 ಅತ್ತಳ ತಲಚೇರಿಕ್ ಅಯೆಚಿತ್.

ಇದಾಯಿತ್ ಚೆನ್ನಂಗ್ ದಿನತ್ ಜ.ಸರ್ ಕ್ರಾಂಬಿ ಸೈನ್ಯತೋಡೆ ತಲಚೇರಿಂಜ ಪೊರಟಿತ್ ಪೆಗ್ಗಳಕಾಲೆ ಕುಂದ್ ಪತ್ತಿತ್ ಬೋಟೋಳಿ, ಮಗ್ಗುಲ ಊರ್ ಕೂಡುವ ಪರಂಬಲ್ ಇಳೊಂಜತ್. ಜನರಲ್ ಕೊಡಗುಕ್ ಬಂದ ಸುದ್ದಿನ ಕಾಗದತ್‌ರ ಮೂಲಕ ನಾಲ್ಕಾದ್ ಅರಮನೆಲ್ ಇಂಜ ವೀರರಾಜೇಂದ್ರ ಅರೊಂಜನ್ನಕೆ, ಜನರಲ್ ಇಂಜ ಜಾಗಕ್ ಬಾತ್. ಇದ್ 1791ನೆ ಇಸವಿ ಏಪ್ರಿಲ್, ಮೇ ತಿಂಗ. ಪಿತ್ಯ ಕಾಲ ಎಣ್ಣೆಕ 1792ತ್ ಈ ಜಾಗತ್ ತಂಗ ಮುದ್ದ್ ಕಂಡಿತ್ ತಕ್ಕ ಪರೊಂದ ಜಾಗತ್‌ರ ಗೇನಕಾಯಿತ್ ವೀರರಾಜೇಂದ್ರ ಒಡೆಯ ತಾಂಡ ಪೆದತ್ ವೀರರಾಜೇಂದ್ರ ಪೇಟೆ ಪಟ್ಟಣತನ ಕೆಟ್ಟುವಕ್ ಗೇನ ಮಾಡ್‌ಚಿ.

ಈ ಪೇಟೆ ಚೆನ್ನಂಗ್ ಕಾಲತ್‌ಂಜ ಇಪ್ಪರ ವೀರಾಜ ಪೇಟೆಂದ್ ಕಾಕ್‌ಚಿಟ್ಟಿಂಡ್ ಉಂಡ್. ಅಬರ್ ಕ್ರಾಂಬಿನ ಕಂಡ ರಾಜ ಅಂವಂಡ ಸೈನ್ಯಕಾಯಿತ್ ತಾನ್ ಕೊಡಗುಲ್ ಕೂಟಿ ಬೆಚ್ಚಿತಿಂಜ ಊಣ್‌ತೀನಿರ ಸಾಮಗ್ರಿರ ಕೂಟ್‌ಕ್, ಸುಲ್ತಾನಂಡ ಸೀಮೆಂಜ ಲೂಟಿ ಮಾಡ್‌ನ ಆಡ್, ಕೊರಿ ಪಿಳ್ಳಾ ಬೋರೆ ಸಾಮಾನ್‌ತನೆಲ್ಲ ಕೊಡ್‌ತತ್.

ಇದೇ ನೇರತ್ ವೀರ ರಾಜೇಂದ್ರ ಒಡೆಯ ಅಬರ್ ಕ್ರಾಂಬಿರ ಕೂಡೆ ತಕ್ಕ ಪರೊಂದಿತ್ ತಾನ್ ವಿಶ್ವಾಸಪಾತ್ರನೊ, ವಿಶ್ವಾಸ ಘಾತುಕನೊ ಎಣ್ಣುವ ಅಗ್ಗೇನಕ್ ಪರಿಹಾರ ಪಡ್‌ಂದತ್. ಅಬರ್ ಕ್ರಾಂಬಿರ ಅಗ್ಗೇನಕ್ ಚೆನ್ನಂಗ್ ಕಾರಣ ಇಂಜತ್.

ವೀರರಾಜೇಂದ್ರ ಒಡೆಯಂಗೂ, ತಲಚೇರಿಲ್ ಇಂಜ ಬ್ರಿಟಿಷ್ ಅಧಿಕಾರಿಯಕೂ ಮೈತ್ರಿ

ಒಪ್ಪಂದ ಆನಪಿಳ್ಳಾ ಅಲ್ಲಿಯತ ಬ್ರಿಟಿಷ್ ಅಧಿಕಾರಿಯ ವೀರರಾಜೇಂದ್ರ ಒಡೆಯಂಗ್ ಸುಲ್ತಾನಂಡ ಸೈನಿಕಂಗಡ ಪುಡ್ತತ್ ಇಂಜ ಮಡಿಕೇರಿ ಕೋಟೆನ ವಶ ಪಡ್ತಿಯವಕ್ ಸಹಾಯ ಮಾಡುವನ್ನಕೆ ಎಣ್ಣೆತಿಂಜತ್. ಅಕ್ಕ ರಾಜ ತಾಂಡ ಸೈನ್ಯ ಸಹಾಯತೆ ಮಡಿಕೇರಿ ಕೋಟೆನ ತಾಂಡ ಪುಡ್ತತ್ ಎಡ್ತವಿಂದ್ ಅಯಿಂಗಕ್ ಎಣ್ಣೆಚಿ. ಇದಾನದು ಖಾದರ್ ಖಾನ್ ರಾಜಂಡ ಒಪ್ಪಿಗೆ ಪೋಲೆ ಮಡಿಕೇರಿ ಕೋಟೆಕ್ ಸಾಮಾನ್ ಇಟ್ಟಿತ್ ವಾಪಾಸ್ ಪೋನ ಸುದ್ದಿ, ಇದಾಯಿತ್ ಒಂದ್, ದಂಡ್ ತಿಂಗತ್ ಮಡಿಕೇರಿ ಕೋಟೆಲ್ ಸಾಮಾನ್ ತ್ತೆಂದ್ ಪೋನಪಿಳ್ಳಾ ರಾಜಂಗ್ ಕೋಟೆಲ್ ಇಂಜ ಚಿಲ್ಲ್, ಮದ್ದನ್ ಒಪ್ಪೆಚಿಟ್ಟಿತ್ ತಾಂಡ ಜನಡ ಕೂಡೆ ಜಾಫರ್ ಕುಲಿಬೇಗ್ ರಾಜಂಡ ಅಪ್ಪಣೆ ಪಡ್ಂದಿತ್ ಶ್ರೀರಂಗಪಟ್ಟಕ್ ಪೋನ ಸುದ್ದಿ ಬ್ರಿಟಿಷ್ ಅಧಿಕಾರಿಯಕ್ ಎತ್ತಿತಿಂಜತ್.

ಜಾಫರ್ ಕುಲಿಬೇಗ್ ಮಡಿಕೇರಿ ಕೋಟೆನ ರಾಜಂಗ್ ಒಪ್ಪೆಚಿಟ್ಟಿತ್ ಪೋನದ್ ವೀರ ರಾಜೇಂದ್ರ ಒಡೆಯ ತಲಚೇರಿಲ್ ಜ.ಅಬರ್ ಕ್ರಾಂಬಿನ ಕಂಡಿತ್ ಬಂದಪಿಳ್ಳಾ. ಇನ್ನನೆ ವೀರ ರಾಜೇಂದ್ರ ಒಡೆಯ ಸುರೂಲ್ ಖಾದರ್ ಖಾನ್ ಕ್ ಕಾಟನ್ ಗೌರವ, ಅಲ್ಲಿಂಜ ಜಾಫರ್ ಕುಲಿಬೇಗ್ ರ ಖರ್ಚ್ ಪಣ ಕೊಡ್ತಿತ್ ಶ್ರೀರಂಗಪಟ್ಟಕ್ ಅಯಚದ್ ಬ್ರಿಟಿಷ್ ಅಧಿಕಾರಿಯಕ್ ವೀರರಾಜೇಂದ್ರ ತಂಗಡ ಕೂಡೆ ಮೈತ್ರಿ ಒಪ್ಪಂದ ಮಾಡಿಯಂಡಕ್ ಗುಟ್ಟಾಯಿತ್ ಟಿಪ್ಪುರ ಬರಿ ಕೂಡಿರುವ ಎಣ್ಣುವ ಅಗ್ಗೇನಕ್ ಎಡೆ ಮಾಡಿತಿಂಜತ್.

ಆನಗುಂಡ್ ಜ.ಅ. ಕ್ರಾಂಬಿ ಪೆಗ್ಗಳ ಕುಂದ್ಕಾಲೆ ತಾಂಡ ಸೈನ್ಯತಾನ ಬುಡುವಕ್ ಅಂವ ವೀರರಾಜೇಂದ್ರನ ಚೋದ್ಯ ಮಾಡಿತಿಂಜತ್. ಅಕ್ಕ ವೀರ ರಾಜೇಂದ್ರ ತಾಂಡ ತಂಗೇರ ಮಾನ ಕಾಪಾಡ್ನ ಉಪಕಾರಕಾಯಿತ್ ತಾನ್ ಖಾದರ್ ಖಾನ್ ಕ್ ಉಪಕಾರ ಮಾಡ್ನಾಂದ್, ಅದೇ ಕಾರಣಕ್ ಜಾಫರ್ ಕುಲಿ ಬೇಗ್ ನ ಏದೇ ಓರ್ ತೊಂದರೆ ಇಲ್ಲತೆ ಶ್ರೀರಂಗಪಟ್ಟಕ್ ಪೋಪಕ್ ಬುಟ್ಟಿಂದ್ ಅಬರ್ ಕ್ರಾಂಬಿಕ್ ತಾಂಡ ಉದಾರನೀತಿರ ಮೀದ ವಿಶ್ವಾಸ ಬಪ್ಪನ್ನಕೆ ವಿವರಣೆ ಕೊಡ್ತತ್.

ಅಬರ್ ಕ್ರಾಂಬಿ ಪಡೆರ ತಂತ್ರತ್ ರಾಜ ಶತ್ರುವಕ್ ಕಾಟನ್ ಔದಾರ್ಯ ಸೆರಿ ಇಲ್ಲೆಂದ್ ಎಣ್ಣೆನಕೊ ಅಂವಂಡ ವಿಚಿತ್ರ ನಡುವಳಿಕೆ ಪಿಳ್ಳಾ ಅಂವಂಗ್ ಕಂಪೆನಿ ಸರ್ಕಾರತ್ ಮೀದ ಇಂಜ ನಿಷ್ಠೆನ ಮೆಚ್ಚೆಚಿ.

ಜ.ಅಬರ್ ಕ್ರಾಂಬಿ ಕೊಡಗ್ ಬಂದ ನೇರತ್ ಚೆನ್ನೆ ಬರಿಂಜ ಸೈನ್ಯ ಎಡ್ತಂಡ್ ಬಂದ ಲಾರ್ಡ್ ಕಾರ್ನವಾಲೀಸ್ ಬೆಂಗಳೂರ್ ಬಂದಿತ್ ಅಲ್ಲಿಯತ ಕೋಟೆಕ್ ಮುತ್ತಿಗೆ ಇಟ್ಟತ್. ಲಾರ್ಡ್ ಕಾರ್ನ ವಾಲೀಸ್ ರ ಸೈನ್ಯತರ ಕೂಡೆ ದಿಂಡುಗಲೊಂಜ ಸೈನ್ಯ ಎಡ್ತಂಡ್ ಬಂದ ಜನರಲ್ ಮಡೋಸ್ ಕೂಡಿಯಂಡತ್. ಟಿಪ್ಪು ಸುಲ್ತಾನ

ಬೆಂಗಳೂರ್ ಕೋಟೆ ಬ್ರಿಟಿಷರ ಪುಡ್ತಾತಕ್ ಬಂದಪಿಳ್ಳಾ ಶ್ರೀರಂಗಪಟ್ಟಣ್ ಬಂದಿತ್ ಅಲ್ಲಿ ಬ್ರಿಟಿಷರ ಎದ್‌ರಾಚಿಡುವಕ್ ಕೋಟೆನ ಭದ್ರ ಪಡ್ತಿಯಂಡ್ ಇಂಜತ್. ಟಿಪ್ಪುರ ಬಯ್ಯತ್ತಿಯಂಡ್ ಕಾರ್ನವಾಲೀಸ್ ತಾಂಡ ಸೈನ್ಯತನ ಶ್ರೀರಂಗಪಟ್ಟಣ್ ಪಕ್ಕ ಕೊಂಡ ಬಂದಿತ್ ನಿಪ್ಪಾಚಿಟ್ಟಿತ್.

ಇತ್ತಟಿ ಜ.ಅಬರ್ ಕ್ರಾಂಬಿ ಮುಂಬೈ ಸೈನ್ಯ ಎಡ್‌ತಂಡ್ ಪಿರಿಯಾಪಟ್ಟಣ್ ಬರಿ ಪೂರ್‌ಟತ್. ವೀರರಾಜೇಂದ್ರಂಗ್ ಪಿರಿಯಾಪಟ್ಟಣ್ ಜಾಗ ಗೊತ್ತಿಂಜಾನಗುಂಡ್ ಬ್ರಿಟಿಷರ ಸೈನ್ಯಕ್ ಬಟ್ಟೆ ಕಾಟುವಕ್ ಅವ ಕ್ರಾಂಬಿರ ಕೂಡೆ ಪಿರಿಯಾಪಟ್ಟಣ್ ಬರಿ ಪೂರ್‌ಟತ್.

ಮುಂಬೈ ಸೈನ್ಯ ಕೊಡಗುಂಜ ಪಿರಿಯಾಪಟ್ಟಣ್ ಬರಿ ಬಪ್ಪಾನ ಅರ್‌ಂಜ ಟಿಪ್ಪು ಆ ಸೈನ್ಯ ಬಪ್ಪಾಂಗ್ ಮುಪ್ಪಡೆ ಪಿರಿಯಾಪಟ್ಟಣ್ ಕೋಟೆನ ಬೂಕೊಂಡೊಂದ್ ಅಪ್ಪಣೆ ಮಾಡಿತ್ ತಾಂಡ ಬರಿ ಜನಳ ಪಿರಿಯಾಪಟ್ಟಣ್ ಅಯೆಚತ್. ಈ ಜನ ಪಿರಿಯಾಪಟ್ಟಣ್ ಕೋಟೆಲ್ ಸುರಂಗ ಎಡ್‌ಪಾಚಿಟ್ಟಿತ್, ಮದ್ದ್ ದುಂಬಾಚಿಟ್ಟಿತ್ ಪೂರ್ತಿ ಕೋಟೆನ ಒಡ್‌ಪಾಂಗ್ ಮುಪ್ಪಡೆ ಕ್ರಾಂಬಿ ತಾಂಡ ಸೈನ್ಯತರ ದಂಡ್ ತುಕಡಿನ ಅಲ್ಲಿಕೆ ಅಯೆಚಿತ್ ಕೋಟೆರ ಒಳ್‌ಲ್ ಆಕಾಚಿ. ಅಕ್ಕ ಸುಲ್ತಾನಂಡ ಬರಿಯತ ಸರದಾರ ತಾಂಡ ಜನಳ ಕೂಟಿಯಂಡ್ ಶ್ರೀರಂಗಪಟ್ಟಣ್ ಪೋಚಿ. ಜ. ಕ್ರಾಂಬಿ ಪಿಳ್ಳಾ ವೀರರಾಜೇಂದ್ರ ಒಡೆಯ ಬಾಕಿ ಇಂಜ ಸೈನ್ಯತನ ಬ್ರಿಟಿಷ್ ಸೈನ್ಯತರ ತುಕಡಿರ ಕೂಡೆ ಮುತ್ತೂರ್ ಊರ್ ಪಕ್ಕತ್ ಇಂಜ ಶ್ರೀರಂಗಪಟ್ಟಣ್ ಪಳೆಯ ಕೋಟೆರ ಪಕ್ಕ ಒಳ್‌ಂಜತ್.

ಈ ನೇರತ್ ಟಿಪ್ಪುರ ಸೈನಿಕಂಗಕೂ, ಲಾರ್ಡ್ ಕಾರ್ನ ವಾಲೀಸ್‌ರ ಸೈನಿಕಂಗಕೂ ಕರಿಘಟ್ಟಣ್ ಪಕ್ಕ ಪಡೆ ನಡ್‌ಂದಿತ್ ಸುಲ್ತಾನಂಡ ಸೈನಿಕಂಗ ಚೋತಿತ್ ಬಯ್ಯಕ್ ಒಡಿ ಬಂದಿತ್ ಶ್ರೀರಂಗಪಟ್ಟಣ್ ಕೋಟೆನ ಕೂಡಿಯಂಡತ್. ಅಲ್ಲಿಂಜ ಲಾರ್ಡ್ ಕಾರ್ನ ವಾಲೀಸ್‌ರ ಸೈನ್ಯ ಹಿರೋಡೆ (ಇಕ್ಕತ ಪಾಂಡವಪುರ) ಕುಂದ್ ಪಕ್ಕ ಇಂಜತ್. ಕ್ರಾಂಬಿರ ಪುಡ್ತಾತಕ್ ಮುಂಬೈ ಸೈನ್ಯ ಶ್ರೀರಂಗಪಟ್ಟಣ್ ಪಕ್ಕ ಬಪ್ಪದ್ ಕಾಂಬ ಇಂಜತ್. ಆಚೇಂಗಿ, ಅಕ್ಕಣೆ ಆ ಕಾಲ ಮಳೆಗಾಲ ಬೆರಿಯ ಸುರು ಆನಾನಗುಂಡ್ ಪಡೆರ ಕಾರ್ಯ ಮಿಳ್ಳಾಕ್ ತೆರಂಗ್‌ಚಿ. ಈನಗುಂಡ್ ಲಾರ್ಡ್ ಕಾರ್ನ ವಾಲೀಸ್ ತಾಂಡ ಸೈನ್ಯತನ ಬೆಂಗಳೂರ್‌ಕ್ ಎಡ್‌ತಂಡ್ ಪೋಯಿತ್ ಅಲ್ಲಿ ಇಂಜತ್.

ಇತ್ತಟಿ ಪಿರಿಯಾಪಟ್ಟಣ್ ಪಕ್ಕತ್ ಇಂಜ ಸೈನ್ಯ ಪಿಳ್ಳಾ ಕೊಡಗು ವೀರರಾಜೇಂದ್ರ ಒಡೆಯ ಸಹ ತಾಂಡ ಕೂಡೆ ಆಕಿಯಂಡಿಂಜ ಜ.ಕ್ರಾಂಬಿನ ಕೂಟಿಯಂಡ್ ವಾಪಾಸ್ ಪೋಯಿತ್ ಕೊಡಗು ಪೆಗ್ಗಳ ಕುಂದಲ್ ಒಳ್‌ಂಜತ್. ಅಲ್ಲಿಂಜ ಅವ ಸೈನ್ಯ



ಎಡ್ತಂಡ್ ತಲಚೇರಿಕ್ ಪೋಪಕ ವೀರ ರಾಜೇಂದ್ರಂಡ ಕೂಡೆ "ನಂಗ ಇಲ್ಲಿಂಜ ತಲಚೇರಿಕ್ ಪೋಯಿತ್ ಇಂಗ್ಲೀಷ್ ಬಹಾದ್ದೂರ್ ಸರ್ಕಾರತ್ ಸೈನ್ಯತ್ ಅಲ್ಲಿ ಆಕಿತ್ ಮುಂಬೈಕ್ ಪೋಪ. ಅಲ್ಲಿಂಜ ಅವಲ್ ಮಾಸಮಾಕ್ ಬಪ್ಪ. ಇಕ್ಕ ಚೆನ್ನಂಗ್ ಸಾಮಾನ್, ಫಿರಂಗಿ, ತೋಕ್ ಮದ್ದಾನೆಲ್ಲ ನಿಂಗಕ್ ತಪ್ಪ. ಆರ್ ತಿಂಗಕೆತ್ತನೆ ನಾಲ್ ಬರಿಂಜ ಸಾಮಾನ್ ಕೊಂಡಬಂದಿತ್ ಬೆಚ್ಚವಂಡು. ಅಲ್ಲತೆ ಚೆನ್ನಂಗ್ ರೈತ ವರ್ತಕಂಗ ಸಾಮಾನ್ ಟಿಪ್ಪುರ ಸೈನ್ಯಕ್ ಕಡ್ತುವ. ಅಯಿಂಗಳ ಈ ಬರಿಕ್ ತಿರ್ಕಿಯಂಡ್ ಅವು ಟಿಪ್ಪುರ ಸೈನ್ಯತ್ ಮಾರುವ ಜಿನಸಿರ ಕ್ರಯಕ್ಂಜ ಏರ ಕ್ರಯ ಕೊಡ್ತಿತ್ ಸಾಮಾನ್ ಎಡ್ತವಂಡು. ಈಂಗ್ ಬೋಂಡಿಯಾನ ಪಣತ್ ಕಂಪೆನಿ ಸರ್ಕಾರತ್ಂಜ ತಪ್ಪಚಿಡುವ"ಂದ್ ಎಣ್ಣೆಚಿ.

ಅದ್ಂಗೆ ವೀರರಾಜೇಂದ್ರ ಒಡೆಯ "ನಿಂಗ ಎಣ್ಣೆನನ್ನಕೆ ನಂಗಡ ಕೈಲಾಪಚ್ಚಕ್ ಸಾಮಾನ್ ನಂಗ ಅಡ್ಕಿತ್ ಬೆಪ್ಪ. ಇದ್ಂಗೆ ದುಡ್ಡ್ ಪೋರತೆ ಆನಕ ನಿಂಗಕ್ ಕಾಗದ ಎಳ್ಳಿತ್ ಪಣ ಕೊಂಡ ಬಪ್ಪಚಿಟ್ಟಿತ್ ಸಾಮಾನ್ ಎಡ್ಪ"ಂದ್ ಜವಾಬ್ ಕೊಡ್ತತ್.

ಅಲ್ಲಿಂಜ ಜ.ಅ. ಕ್ರಾಂಬಿ ಮದ್ದ್, ತೋಕ್, ನೆಲ್ಲ್, ಅಕ್ಕಿ ಇನ್ನತ ಸಾಮಾನ್ನೆಲ್ಲ ಜೋಪಾನ ಆಯಿತ್ ಬೆಪ್ಪಕ್ ವೀರರಾಜೇಂದ್ರಂಗ್ ವಹಿಸಿತ್ ತಾಂಡ ಸೈನ್ಯತೋಡೆ ಕಲಿಸಂದ 4893ನೆ ವಿರೋಧಿಕ್ತು ಸಂವತ್ಸರ ಚೇಷ್ಠ ಮಾಸ ಎಣ್ಣೆಕ 1791ನೆ ಜೂನ್‌ಲ್ ಕುಂದ್ ಇಳ್ಂಜಿತ್ ತಲಚೇರಿಕ್ ಪೋಯಿತ್ ಅಲ್ಲಿ ತಾಂಡ ಸೈನ್ಯತ್ ಬುಟ್ಟಿತ್ ಮುಂಬೈಕ್ ಪೋಚಿ.

ಜ.ಅ.ಕ್ರಾಂಬಿ ಕೊಡಗ್ಂಜ ಪೊರ್ಟ್ ಪೋನಪಿಳ್ಳಾ ವೀರರಾಜೇಂದ್ರ ತಾಂಡ ರೈತಂಗ ಪಿಳ್ಳಾ ಟಿಪ್ಪುಕ್ ಸಾಮಾನ್ ಕೊಡ್ಪ ಇಂಜ ರೈತಂಗಡ ಪಕ್ಕ ಇಂಜ ಸಾಮಾನ್ನೆಲ್ಲ ಕ್ರಯಕ್ ಎಡ್ತಿತ್ ಕೂಟಿಬೆಚ್ಚತ್. ಅಯಿಂಗಡಲ್ಲಿ ಕ್ಕಟ್ಟತ ಸಾಮಾನ್ ಸುಲ್ತಾನಂಡ ಸೀಮೆಂಜ ಸುಲಿಗೆ ಮಾಡಿತ್ ಕೊಂಡಬಾತ್. ಜ.ಅ.ಕ್ರಾಂಬಿ ಮಳೆಗಾಲ ಕೈಂಜನ್ನಕೆ ಅದೆ ಕಾಲ ಮಾರ್ಗಶಿರ ಮಾಸತ್ ಎಣ್ಣೆಕ ನವೆಂಬರ್‌ಲ್ ತಲಚೇರಿಕ್ ಮುಂಬೈಂಜ ಪಡೆಸಾಮಾನ್ ಎಡ್ತಂಡ್ ಬಂದಿತ್ ಅಲ್ಲಿ ಸೈನ್ಯತೋಡೆ ಪೆಗ್ಗಳ ಕುಂದ್ ಪತ್ತಿತ್ ಪರಂಬಾಲ್ ಇಳ್ಂಜತ್. ಈ ಜಾಗಕ್ ನಾಲ್ವಾಡ್ ಅರಮನೆಂಜ ವೀರರಾಜೇಂದ್ರ ಬಂದಿತ್ ಕ್ರಾಂಬಿನ ಕಂಡಿತ್ ಅಂವಂಡ ಪ್ರಡ್ತತ್ ಇಂಜ ಸಾಮಾನ್ ಪಿಳ್ಳಾ ಕೂಟಿಬೆಚ್ಚ ಊಣ್‌ತೀನಿರ ಸಾಮಾನ್ನೆಲ್ಲ ಕೊಡ್ತತ್. ಅಕ್ಕ ಜ.ಕ್ರಾಂಬಿ, ರಾಜಂಡ ಕೂಡೆ "ದಂಡ್ ತಿಂಗ ಇಲ್ಲೆ ಪಡ್ ಬೂವ. ಆನಗುಂಡ್ ನಿಂಗಡ ಬರಿಂಜ ಅಂಜಿ ಲಕ್ಷ ಡಂಗಾಳಿ (ಓರ್ ಡಂಗಾಳಿ ಎಣ್ಣೆಕ ದಂಡ್ ಅಳತೆ ಸೇರ್) ಅಕ್ಕಿ ತರೊಂಡು"ಂದ್ ಕೇಟಂಡತ್.

ಆನಗುಂಡ್ ವೀರರಾಜೇಂದ್ರ ನಾಲ್ ಬರಿಯತ ಸೀಮೆಂಜ ಆಡ್, ಕೊರಿ, ಜಿನಸಿ

ಸಾಮಾನ್ಯನ ಕೊಂಡ ಬಪ್ಪಾಚಿಟ್ಟಿತ್ ಸೈನ್ಯಕ್ ಕೊಡತದೆ ಅಲ್ಲತೆ, ಕಂಪೆನಿ ಸೈನ್ಯಕ್ ಬೋಂಡಿಯಾನ ಅಂಜಿ ಲಕ್ಷ ದಂಗಳಿ ಅಕ್ಕಿನ ಕೊಡಪಾಚಿಟ್ಟಿತ್ ಪೊನ್ನಂಪೇಟೆ ಮೋದಿಖಾನೆಲ್ ಕಾಗ್ಗಟ್ವಾನಾಡ್ ಅಮಿಲ್ದಾರ್ ಕೇಟೋಳಿ ಅಚ್ಚುವಣ್ಣಂಡ ಸ್ವಾಧೀನತ್ ಅದೆಲ್ಲಾನೊ ಬೆಚ್ಚತ್.

### ಟಿಪ್ಪು, ವೀರರಾಜೇಂದ್ರನ ತಾಂಡ ಬರಿಕ್ ಬಲಿಪಕ್ ಮಾಡ್‌ನ ಪ್ರಯತ್ನ

ಜ.ಅ.ಕ್ರಾಂಬಿ ಕೊಡಗಕ್ ದಂಡನೆ ಕುರಿ ಬಂದಲ್ಲಿ ಟಿಪ್ಪು ಕೊಡಗರ ರಾಜನುಂಡ್ ಬ್ರಿಟಿಷಡ ಸಿನೇತಿಕೆನ ತಪ್ಪಾಚಿಟ್ಟಂಡ್ ತಾಂಡ ಬರಿಕ್ ಬಲಿಪಕ್ ದುಂಬ ಪ್ರಯತ್ನ ಪಟ್ಟತ್. ಮುಂಬೈ ಸೈನ್ಯ ಶ್ರೀರಂಗಪಟ್ಟಕ್ ಬರೊಂಡುವೇಂಗಿ ಕೊಡಗ್‌ಕಾಲೆ ಬರೊಂಡು. ಕೊಡಗರ ರಾಜ ಆ ಸೈನ್ಯಕ್ ಬಟ್ಟೆ ಕೊಡ್‌ಕತೆ ಇಂಜಕ ಪಿಳ್ಳಾ ಸಾಮಾನ್ ಎತ್ತಾಚಿಡತೆ ಇಂಜಕ ಆ ಸೈನ್ಯ ತಾಂಡ ರಾಜ್ಯಕ್ ಅಚ್ಚಕ್ ಸುಲಭ ಆಯಿತ್ ಬಪ್ಪುಲೆಂದ್ ಸುಲ್ತಾನಂಗ್ ಗೊತ್ತಿಂಜತ್. ಆನಗುಂಡ್ ಕೊಡಗರ ವೀರರಾಜೇಂದ್ರನ ತಾಂಡ ಬರಿಕ್ ಬಲಿಪಕ್ ಖಾದರ್‌ಖಾನನ ಕಾಕಿತ್ ಇನ್ನನೆ ಎಣ್ಣೆಚಿ.

"ನೀಡ ಮೀದ ಕೊಡಗರ ರಾಜಂಗ್ ದುಂಬ ಕನಿಕರ ಉಂಡ್. ನೀನ್ ಅಯಿಂಗಡ ಕೈಕ್ ಕಟ್ಟಿತ್ ಕೆಣ್‌ಂಜಕೊ ನೀಡ ಪ್ರಾಣ ಉಳ್‌ತಿತ್ ನಿನ್ನ ನೀಡ ಜಾಗಕ್ ಅಯೆಚಿತ್. ಆನಗುಂಡ್ ನೀನಿಕ್ಕ ಅಯಿಂಗಡ ಕೂಡೆ ಸಿನೇತಿಕೆಲ್ ಇರೊಂಡು. ನಂಗಳೊ ಸಿನೇತಿಕೆಲ್ ಇಪ್ಪಕ ಟಿಪ್ಪುರ ಚೆನ್ನಂಗ್ ಆಪ್ತಂಗಳ ಕೂಟಿಯಂಡ್ ಬಾ"ಂದ್ ಟಿಪ್ಪುರ ಪಕ್ಕ ಅಯೆಚಿತ್.

ಅಕ್ಕ ಟಿಪ್ಪು ಆ ಜನಡಾತ್ ಖಾದರ್‌ಖಾನಂಗ್ ದುಂಬ ಆಪ್ತ ಆಯಿತುಳ್ಳ ಒಬ್ಬಂಡ ಕೂಡೆ ತಾನೆ ಸೈನ್ ಇಟ್ಟ ಓರ್ ಕಾಗದ, ಮಂತ್ರಿಯಳಾನ ಮೀರ್‌ಸಾಧ್‌ಕ, ಪೂರ್ಣಯ್ಯ...ಇನ್ನನೆ ಮೂಂದ್ ಕಾಗದ ಅಯೆಚಿತ್ ವೀರರಾಜೇಂದ್ರಂಡ ಸಿನೇತಿಕೆ ಬಯಂದಿತ್ ಕಾಗದ ಅಯೆಚಿತ್.

ಖಾದರ್‌ಖಾನರ ಆಪ್ತಂಡ ಕೂಡೆ ನಾಲಾಳ್ ಇಂಜತ್. ಈ ಅಂಜಾಳ್ ಕೊಡಗರ ತೆರಿಕ್ ಬಪ್ಪಕ ಅಲ್ಲಿ ಇಂಜ ಪಾರಕಾರ ಆ ಕಾಗದತಾರ ಕೂಡೆ ಜನಳ ಕೂಟಿಯಂಡ್ ರಾಜಂಡ ಪಕ್ಕ ಬಾತ್.

ಅಕ್ಕ ಜನನಾಯಕ ತಾನ್ ಕೊಂಡಬಂದ ಕಾಗದತ್‌ನ ವೀರರಾಜೇಂದ್ರ ಒಡೆಯಂಗ್ ಒಪ್ಪಾಚಿಟ್ಟಿತ್ ಆ ಕಾಗದತ್ ಇಂಜ ವಿಷಯತ್‌ನೆಲ್ಲ ಎಣ್ಣೊಚಿ.

ಅಲ್ಲಿಂಜ ವೀರರಾಜೇಂದ್ರ ಒಡೆಯ ಆ ಕಾಗದತ್‌ನೆಲ್ಲ ಎಡ್‌ತಂಡ್ ಜ.ಕ್ರಾಂಬಿಕ್ ಕೊಡ್‌ತಿತ್ ವಿಷಯಎಣ್ಣೊಚಿ. ಎಲ್ಲಾನೋ ಕೇಟ ಕ್ರಾಂಬಿ ರಾಜಂಡ ಕೂಡೆ "ಟಿಪ್ಪುರ ತಕ್ಕರ ಮೀದ ನಿಂಗ ನಂಗಕ್ ಮೋಸ ಮಾಡುಲೆ. ನಂಗ ದಂಡಾಳ್‌ರ ನಡುಲ್ ಭಿನ್ನ ಭೇದ ಇಲ್ಲೆಂದ್ ನಂಗ ನಂಬಿಯಂಡ್ ಇಲ್ಲಿಕ್ ಬಂದಿತ್. ನಂಗ, ನಿಂಗಡ ಕಪ್ಪು ಸುಖ ಒಂದೇ"ಂದ್ ಎಣ್ಣೊಚಿ.

ಅಲ್ಲಿಂಜ ವೀರರಾಜೇಂದ್ರ, ಕ್ರಾಂಬಿರ ಕೂಡೆ ತಕ್ಕ ಬಾಕ್ ನಡ್‌ತಿತ್, ಆಖೀರಕ್ ತಾಂಡ ತೀರ್ಮಾನತ್‌ನ ಕಾಗದತ್‌ನ ಜವಾಬ್‌ರ ಮೂಲಕ ಖಾದರ್ ಖಾನ್‌ರ ಕೈಲ್ ಅಯೆಚತ್.

ಇನ್ನನೆ ಟಿಪ್ಪು, ವೀರರಾಜೇಂದ್ರಂಡ ಕೂಡೆ ಸಿನೇತಿಕೆ ಮಾಡಿಯವ ಒಪ್ಪಂದ ವಿಫಲ ಆಚಿ.

ಮಿಞ್ಲಾಕ್ 1799ನ ಇಸವಿಲ್ ಕಂಪೆನಿ ಸರ್ಕಾರತ್‌ರ ಸೈನ್ಯತ್‌ರ ಕೂಡೆ ನಡ್‌ಂದ ಪಡೆಲ್ ಟಿಪ್ಪು ಸುಲ್ತಾನ್ ಚತ್ತತ್. ಟಿಪ್ಪು ಚತ್ತದು ಅವಂಡ ಅಧೀನತ್ ಇಂಜ ಸುಮಾರ್ ಮುಸಲ್ಮಾನ ಅಧಿಕಾರಿಯ ಮೈಸೂರ್ ರಾಜ್ಯತ್ ಇಪ್ಪಕ್ ಇಷ್ಟಪಟ್ಟ್ಲೆ. ಖಾದರ್ ಖಾನ್ ಕೈಸಗಿಯೂ ಇಪ್ಪಕ್ ಬಯಂದ್‌ಲೆಂದ್ ಕಾಂಬ. ಆಚೇಂಗಿ, ಈ ವಿಷಯ ಸ್ಪಷ್ಟ ಆಯಿತ್ ಚರಿತ್ರಲ್ ಪ್ರಸ್ತಾಪ ಆಯಿತಿಲ್ಲೆ. ಆಚೇಂಗಿ, ಸುಲ್ತಾನ ಚತ್ತಪಿಞ್ಲಾ ವೀರರಾಜೇಂದ್ರ ಒಡೆಯ ಖಾದರ್‌ಖಾನ್ ಕೈಸಗಿನ ಕೊಡಗ್‌ಕ್ ಬಂದಿತ್ ನೆಲೆ ನಿಪ್ಪಕ್ ಕಾಕಿಂಜತ್‌ಂದ್ ಚರಿತ್ರಲ್ ಪ್ರಸ್ತಾಪ ಆಯಿತ್.

ವೀರರಾಜೇಂದ್ರ, ಖಾದರ್‌ಖಾನ್ ಕೈಸಗಿನ ಕೊಡಗ್‌ಕ್ ಕಾಕ್‌ಚಿಟ್ಟಂಡಪಿಞ್ಲಾ ಅವಂಗ್ ಅಮ್ಮತ್ತಿನಾಡ್‌ರ ಬಿಳುಗುಂದ ಊರ್‌ಲ್ 2,500 ಬಟ್ಟಿ ಭೂಮಿ, ಅದ್‌ಂಡ ವ್ಯವಸಾಯಕ್ ಜಮ್ಮತಾಳ್, ಅತ್ತ ಕಡ್‌ಚಿಯಳ, ಸಾಮಾನ್‌ನೆಲ್ಲ ಕೊಡ್‌ತತ್‌ಂದ್ ಲೆ.ಕ.ಮಾರ್ಕ್ಸ್‌ ವಿಲ್ಕ್ಯ ಮೈಸೂರ್ ಚರಿತ್ರಲ್ ಎಳ್ಳಿತ್. ಅನ್ನನೆ ವೀರ ರಾಜೇಂದ್ರ ಒಡೆಯ, ಖಾದರ್‌ಕ್ ಬಿಳುಗುಂದತ್ ಭೂಮಿ ಪಿಞ್ಲಾ ತಿಂಗಕ್ ಅಞ್ಲೂರ್ ಉರ್‌ಪಿಯ ಕೊಡ್‌ತ ಓರ್ ನಿರೂಪ ಉಂಡ್.

ಈ ನಿರೂಪ ಕೊಡ್‌ತ ನೇರ ಎಣ್ಣೊಕ 1805ನೇ ಮೇ ತಿಂಗತ್ ಖಾದರ್‌ಖಾನ್ ಕೈಸಗಿ ಬಿಳುಗುಂದತ್ ಚತ್ತಪೋಚಿ. ಕೈಸಗಿ ಪಿಞ್ಲಾ ಅವಂಡ ಮೋಂವಂಗ್ ತಿಂಗಕ್

ಅಞ್ಣಾರ್ ಉರ್‌ಪಿಯ ಕೊಡತದೆ ಅಲ್ಲತೆ ಕುದರೆ ಬೆಚ್ಚವಕ್ ತಿಂಗಕ್ ಉ.120 ಕೊಡಪ ಇಂಜತಂದ್ ಬಯ್ಯಂಜಿ ಗೊತ್ತ್ ಕಟ್ಟಿತ್. ಈ ದುಡ್ಡ್ 1921ನೆ ಇಸವಿಕೆತ್ತನೆ ಕೈಸಗಿ ಕುಟುಂಬಕಾರಕ್ ಕಟ್ಟಿಯಂಡ್ ಇಂಜತ್.

## ಮೂಂದನೆ ಮೈಸೂರ್ ಪಡೆ

ಜ.ಅಬರ್ ಕ್ರಾಂಬಿ 1791ನೆ ಇಸವಿ ನವೆಂಬರ್ ತಿಂಗತ್ ಮುಂಬೈ ಸೈನ್ಯತನ ಕೂಟಿಯಂಡ್ ಬಂದಿತ್ ಪೆಗ್ಗಳ ಪರಂಬಲ್ ಇಂಜಂವ, ಪುನಾದಿಯ 1792ನೆ ಫೆಬ್ರವರಿಲ್ ಚೆನ್ನಂಗ್ ಫಿರಂಗಿ, ಊಣ್‌ತೀನಿರ ಸಾಮಾನ್‌ನೆಲ್ಲ ಎಡ್‌ತಂಡ್ ಸೈನ್ಯತರ ಕೂಡೆ ಬಾತ್. ಪೆಗ್ಗಳತ್ ಜಾಸ್ತಿ ಇಂಜ ಫಿರಂಗಿ ಪಿಳ್ಳಾ ಮದ್ದಾನ ಎಚ್ಚರ ಮಾಡಿಯವಕ್ ಕ. ಫಿಂಚ್ ಎಣ್ಣುವ ಸೈನ್ಯಾಧಿಕಾರಿನ ಓರ್ ತುಕಡಿ ಸೈನ್ಯತರ ಕೂಡೆ ಆಕ್‌ಚಿ. ಕ.ಫಿಂಚ್ ತಲಚೇರಿಂಜ ಬಪ್ಪ ಸಾಮಾನ್ ಪಿಳ್ಳಾ ಕೂಡಗರ ರಾಜ ತಪ್ಪ ಸಾಮಾನ್‌ನೆಲ್ಲ ಭದ್ರ ಆಯಿತ್ ಬೆಚ್ಚಿತ್ ಅಬರ್‌ಕ್ರಾಂಬಿರ ಸೈನ್ಯಕ್ ಅವಶ್ಯ ಉಳ್ಳನ್ನೆಕೆ ಅಯೆಕೊಂಡಿಂಜತ್.

ಜ.ಅಬರ್ ಕ್ರಾಂಬಿ ಸಿದ್ಧಾಪುರತ್ ಇಂಜ ಚೆನ್ನಂಗ್ ದಿನತ್ ಟಿಪ್ಪುರ ಕೂಡೆ ಮಳೆಗಾಲತ್ ನಿಪ್ಪಾಚಿಟ್ಟಿತಿಂಜ ಪಡೆನ ಪುನಾದಿಯ ಸುರು ಮಾಡುವಕ್ ಬೆಂಗಳೂರ್ ಬರಿಂಜ ಗ.ಜ.ಲಾರ್ಡ್ ಕಾರ್ನ್ ವಾಲೀಸ್, ಚೆನ್ನೈ ಸೈನ್ಯತರ ಜನರಲ್ ಮಡೋಸ್ ತಂಗಡ ಸೈನ್ಯತೋಡೆ ಬಂದಿತ್ ಶ್ರೀರಂಗ ಪಟ್ಟತರ ಪಕ್ಕ ಇಳಾಂಜತ್. ಇಯಂಗಡ ಸಹಾಯಕ್ ಅಪ್ಪರಿಪ್ಪರ ಒಪ್ಪಂದತರ ಪೋಲೆ ಹೈದರಾಬಾದ್‌ರ ನಿಜಾಮಂಡ ಸೈನ್ಯ, ಪೇಶ್ವರ ಸೈನ್ಯ ಬಂದಿತ್ ಕಂಪೆನಿ ಸೈನ್ಯ ನಿಂದಿತಿಂಜ ಜಾಗತರ ಪಕ್ಕ ನಿಂದತ್. ಇಕ್ಕ ಜ. ಕ್ರಾಂಬಿ ಸೈನ್ಯ ಆಯಿತ್ ಶ್ರೀರಂಗಪಟ್ಟಕ್ ಪೊರ್‌ಡುವಕ್ ತಯಾರಿ ಮಾಡ್‌ಚಿ. ಅಲ್ಲಿಕ್ ಪೊರ್‌ಡುವಾಂಗ್ ಮುಪ್ಪಡೆ ವೀರರಾಜೇಂದ್ರಂಡ ಪಕ್ಕ ಕ್ರಾಂಬಿ ತಾಂಡ ಓರ್ ಕ್ಯಾಪ್ಟನ್‌ನ ಕ್‌ಗ್ಗಟ್‌ನಾಡ್ ಮೋದಿಖಾನೆಲ್ ಬೆಚ್ಚಿತಿಂಜ ಅಕ್ಕಿನ ಕೊಂಡ ಬಪ್ಪಾಚಿಡುವಕ್ ಅಯೆಚತ್.

ಕ್ಯಾಪ್ಟನ್ ತಲಚೇರಿರ ಹಯಾಜಂಡ ಬರಿ ವೆಂಕಟ ನಾಯಕಂಡ ಕೂಡೆ ಅತ್ತ, ಆಳಳ ಕೂಟಿಯಂಡ್ ಪೋಯಿತ್ ಆ ಮೋದಿಖಾನೆಲ್ ಇಂಜ ಅಂಜಿ ಲಕ್ಷ ದಂಗಾಳಿ ಅಕ್ಕಿಲ್ ಅರೆವಾಸಿ ಅಕ್ಕಿನ ತಂದಿತ್ ಸಿದ್ಧಾಪುರತ್ ಇಂಜ ಸೈನ್ಯಕ್ ಕೊಡತತ್. ಕ್‌ಗ್ಗಟ್‌ನಾಡ್

ಮೋದಿಯಾನೆ ಕೇಟೋಳಿ ಅಚ್ಚುವಣ್ಣಂಡ ಸ್ವಾಧೀನತ್ ಇಂಜತ್. ಜ.ಅಬರ್ ಕ್ರಾಂಬಿ ಅಲ್ಲಿಂಜ ಸಿದ್ಧಾಪುರತ್‌ಂಜ ಪೊರ್‌ಟಿತ್ ಶ್ರೀರಂಗಪಟ್ಟಿತ್ ಬಟ್ಟೆಲ್ ಉಳ್ಳ ಗುಂಡಿಪಟ್ಟಿತ್ ಒಳ್‌ಂಜತ್.

ಅಂದೇ ಬೈಟ್ ಲಾರ್ಡ್ ಕಾರ್ನವಾಲೀಸ್‌ರ ಸೈನ್ಯತ್‌ರ ದಂಡ್ ರೆಜಿಮೆಂಟ್ ಕಿರಗೂರ್‌ಂಜ ಚಂದಗಾಲ್‌ಕೆತ್ತನೆ, ಪಾಲಹಳ್ಳಿಂಜ ಗಂಜಾಮ್‌ಕೆತ್ತನೆ ಇಇಸ್ಕೋರ್ ಬರಿಂಜ ಸುಲ್ತಾನಂಡ ಸೈನ್ಯತ್‌ರ ಮೀದ ಬುದ್ದಿತ್ ಅದ್‌ನ ಚೋಪ್‌ಚಿಟ್ಟಿತ್. ಸುಲ್ತಾನಂಡ ಸೈನಿಕಂಗ ಚಲ್ಲಾಪಿಲ್ಲಿ ಆಯಿತ್ ಚದರಿತ್ ಆಖೀರಕ್ ದಂಡ್, ಮೂಂದ್ ದಿನತ್ ಕೋಟೆರ ಒಳ್‌ಲೆ ಆಶ್ರಯ ಪಡ್‌ಂದತ್.

ಟಿಪ್ಪುಸುಲ್ತಾನ್ 1785ನೆ ಇಸವಿಲ್ ಕೊಡಗುಂಜ 80 ಆಯಿರ ಆಣಾಳ, ಪೊಣ್ಣಾಳ ಪಿಳ್ಳಾ ಮಕ್ಕಳ ಪುಡ್‌ಚಂಡ್ ಶ್ರೀರಂಗಪಟ್ಟಿಕ್ ಕೂಟಿಯಂಡ್ ಪೋಯಿತ್ ಅಲ್ಲಿ ಮತಾಂತರ ಮಾಡಿತ್ ತಾಂಡ ರಾಜ್ಯತ್‌ರ ಬೋರೆ ಬೋರೆ ತೆರಿ ಜಾಗಕ್ ಅಯೆಚದ್, ಇದತ್ ತಡಿಲ್ ನಲ್ಲ ತಾಕತ್‌ಇಂಜ ಆಣಾಳಳ ಶ್ರೀರಂಗಪಟ್ಟಿತ್ ಆಕಿಯಂಡ್ ಅಯಿಂಗಕ್ ಸೈನಿಕ ತರಬೇತಿನ ತಾಂಡ ದಕ್ಕ ಅಧಿಕಾರಿಯಳುಂಡ್ ಕೊಡ್‌ಪ್‌ಚಿಟ್ಟಾನ ಮಿಳ್ಳಾಲೆ ಅರ್‌ಂಜಿತ್. ಇನ್ನನೆ ತರಬೇತಿ ಪಡ್‌ಂದಯಿಂಗಕ್ ಸುಲ್ತಾನ 'ಅಹಮದಿ' ಎಣ್ಣುವ ಪೆದ ಇಟ್ಟಿತ್. ಮತಾಂತರ ಆನ ಕೊಡಗುಕಾರಡ ರೆಜಿಮೆಂಟ್‌ಕ್ 'ಅಹಮದಿ ರಿಸಾಲ' ಎಣ್ಣುವ ಪೆದ ಇಂಜತ್. ಈ ರಿಸಾಲನ ಇಂಗ್ಲೀಷ್‌ಕಾರಡ ವಿರುದ್ಧ ತಾಂಡ ಬರಿಂಜ ಪಡೆಪೊಪ್ಪಕ್ ಸುಲ್ತಾನ ಅಯೆಚಿತಿಂಜತ್.

ಇನ್ನನೆ ಸುಲ್ತಾನಂಡ ಬರಿಯ ಪಡೆಪೊತ್ತಂಡಿಂಜ ಕೊಡಗುಕಾರ, ಇಂಗ್ಲೀಷ್‌ಕಾರಡ ಕೈಕ್ ಕಾಟ್‌ನಕ ಇಲ್ಲೇಂಗಿ ಆ ಜನ ತಂಗಲಾಯಿತೆ ಸುಲ್ತಾನಂಡ ಸೈನ್ಯತ್‌ಂಜ ಓಡಿಪೋಯಿತ್ ಇಂಗ್ಲೀಷ್‌ಕಾರಡ ಪಕ್ಕ ಪೋನಕ ಅಯಿಂಗಳ ಇಂಗ್ಲೀಷ್‌ಕಾರ ಎನ್ನನೆ ನೋಟಿಯವಂಡೂಂದ್ ವೀರರಾಜೇಂದ್ರ ಒಡೆಯ ಇಂಗ್ಲೀಷ್‌ಕಾರಕ್ ಎಳ್ಳಾನ ಕಾಗದತ್‌ಂಜ, ಅವ ತಾಂಡ ರಾಜ್ಯತ್‌ರ ಜನಳ ಎಚ್ಚಕ್ ಪ್ರೇಮತ್ ಕಾಂಬ ಇಂಜತ್‌ಂದ್ ಗೊತ್ತಾಪ.

ಲಾರ್ಡ್ ಕಾರ್ನವಾಲೀಸ್ ಆದ್ಕ ಅಯೆಚ ದಂಡ್ ರೆಜಿಮೆಂಟ್‌ರ ಕೂಡೆ ಬೋರೆ ಸೈನ್ಯ ಬಂದಿತ್ ಶ್ರೀರಂಗಪಟ್ಟಿ ದ್ವೀಪತ್‌ರ ಪೊರ್‌ಮೆ ಉತ್ತರ ದಿಕ್‌ಲ್ ಇಳ್‌ಂಜತ್. 1792ನೆ ಇಸವಿ ಮೇ 6ಂಡ ಬೈಟ್ ಈ ಸೈನ್ಯತ್‌ರ ಅಧಿಕಾರಿ ಆಯಿತಿಂಜ ಕ.ಸ್ಮೂವರ್ತ್ ಕಾವೇರಿ ಪೊಳೆ ದಾಟಿತ್ ಗಂಜಾಮ್‌ಪೇಟೆರ ಬಟ್ಟೆಲ್ ಇಂಜ ಲಾಲ್‌ಬಾಗ್ ಪೂ ತೋಟತ್‌ರ ಎದಿಕೆ ಇಳ್‌ಂಜತ್.

ಅಂದ್ ಒಯಿಪತ್ ನೇರತ್ ಟಿಪ್ಪು, ಶ್ರೀರಂಗಪಟ್ಟ ದ್ವೀಪತರ ಪೊರಮೆ ತಾಂಡ ಸೈನ್ಯತರ ಕೂಡೆ ಇಂಜತ್. ಇಂಗ್ಲೀಷಡ ಸೈನ್ಯ, ಟಿಪ್ಪುರ ಸೈನ್ಯತನ ಚೋಪ್‌ಚಿಟ್ಟಿತ್, ಪೊಳೆ ದಾಟಿತ್ ಶ್ರೀರಂಗಪಟ್ಟ ದ್ವೀಪಕ್ ನುಗ್ಗಚಿಂದ್ ಎಣ್ಣುವ ಸುದ್ದಿನ ತಾಂಡ ಸೈನಿಕಂಗಳುಂಡ್ ಟಿಪ್ಪು ಅರಾಂಜತ್. ಕೂಡೆನ್ನ ಅಲಾಂಬಲ್‌ಲ್ ಪೊರಾಟಿತ್, ಪೊಳೆದಾಟಿತ್ ಶ್ರೀರಂಗಪಟ್ಟ ಕೋಟೆರ ಓರ್ ಬರಿಲ್ ಅಂದ್ ಬೈಟೂಡಿ ಇಂಜಿತ್ ತಾಂಡ ಅಧಿಕಾರಿಯಕ್ ಅಪ್ಪಣೆ ಕೊಡ್‌ತಂಡ್ ಇಂಜತ್. ಅಂದೇ ಬೈಟ್ ಕ. ಸ್ಕೂವರ್‌ಟ್ ತಾಂಡ ಬಲ್ಯ ಸೈನ್ಯತರ ಕೂಡೆ ಪೊಳೆ ದಾಟಿ ದ್ವೀಪಕ್ ಬಂದಿತಿಂಜತ್.

ಇಂಗ್ಲೀಷ್‌ಕಾರಡ ಸೈನ್ಯ ದ್ವೀಪತರ ಒಳ್‌ಕ್ ಬಂದನ್ನಕೆ ಸುಲ್ತಾನಂಡ ಸೈನಿಕಂಗೆ ಚದಾರಿಯಂಡ್ ಅಲ್ಲಲ್ಲಿ ಓಡುವ ಕೂಡ್‌ಚಿ. ಓರ್ ಭಾಗತ್ ದಿವಾನ್ ಪಿಞ್ಲಾ ಖಜಾಂಚಿ ಪೂರ್ಣಯ್ಯ, ಸುಲ್ತಾನಂಡ ಸೈನಿಕಂಗಳ್ ತಿಂಗತರ ಖರ್ಚ್ ಕೊಡ್‌ಪಕ್‌ಂದ್ ಕೋಟೆರ ಪೊರಮೆ ಎಡ್‌ತಂಡ್ ಪೋಯಿತಿಂಜ ದುಡ್ಡ್‌ನ ಕೋಟೆರ ಒಳ್‌ಲ್ ನಲ್ಲ ಭದ್ರ ಉಳ್ಳ ಜಾಗಕ್ ಕಡ್‌ತುವ ಪ್ರಯತ್ನತ್ ಇಂಜತ್. ಇನ್ನನಾಯಿತ್ ಅಂದ್ ಬೈಟ್ ಕೋಟೆರ ಪೊರಮೆಯಾಡ್, ಒಳ್‌ಲಾಡ್ ಸೆರಿಯಾನ ಪಾರಕಾರ ಇಂಜಾಲೆ. ಅವ್ಯವಸ್ಥೆ ಎದ್ಲ್ ಕಾಂಬ ಇಂಜತ್. ಇದ್‌ನ ಬಳ್‌ಸಿಯಂಡ್ ಶ್ರೀರಂಗಪಟ್ಟತ್ ಮತಾಂತರ ಆನ ಸುಮಾರ್ ಅಂಜಾಯಿರ ಕೊಡಗಾರ ಆಣಾಳ ತಂಗಡ ಕುಟುಂಬ, ಮಕ್ಕಾಂದ್ ಎಣ್ಣೆಯಂಡ್ ಒಟ್ಟು ವನ್ನೆರಂಡಾಯಿರ ಜನ ಅಲ್ಲಿಂಜ ಪೊರಾಟಿತ್ ತಂಗಡ ಮೂಲಸ್ಥಳ ಕೊಡಗಾಕ್ ಓಡಿಬಾತ್.

ಅಕ್ಕಣೆ ಗುಂಡಿಪಟ್ಟಣತ್ ಮುಂಬೈ ಸೈನ್ಯತರ ಕೂಡೆ ಜ.ಕ್ರಾಂಬಿ, ವೀರರಾಜೇಂದ್ರನ ತಾಂಡ ಪಕ್ಕ ಕಾಕ್‌ಚಿಟ್ಟಿಂಡತ್. "ನಂಗ ಇಕ್ಕ ಸೈನ್ಯತೋಡೆ ಇರುವದ್ ದಿನಕುಳ್ಳ ಸಾಮಾನ್‌ನೆಲ್ಲ ಎಡ್‌ತಂಡ್ ಪಟ್ಟಣಕ್ ಪೋಪ. ಇದ್ ತೇಂದನ್ನಕೆ ನಂಗ ನಿಂಗಡ ಪಕ್ಕ ಬಪ್ಪ. ಆನಗುಂಡ್ ನಿಂಗ ಇಕ್ಕ ಅರಮನೆಕ್ ಪೋಯಿತ್ ಅಲ್ಲಿ ಉಳ್ಳ ಸಾಮಾನ್‌ರ ಕೂಟ್‌ಕ್ ನಾಲ್ ಬರಿಂಜ ಸಾಮಾನ್‌ನ ಕೂಟಿತ್, ಅಲ್ಲಿ ಕ. ಫಿಂಚ್‌ಕ್ ಎಲ್ಲಾನೊ ಕೊಡ್‌ತಿತ್ ಅದ್‌ಂಗ್ ಸೆರಿಯಾನ ರಸೀತಿ ಪಡ್‌ಂದವಂಡು. ಅಲ್ಲತೆ ಟಿಪ್ಪುರ ಸೈನ್ಯಕ್ ಸಾಮಾನ್ ಪೋಪ ಬಟ್ಟೆನ ಇಂಗ್ಲೀಷ್‌ಕಾರ ಬಂದ್ ಮಾಡಿತ್. ಟಾನ್‌ರ ಬರಿಯತ ಸೀಮೆಂಜ ಟಿಪ್ಪುರ ಪಕ್ಕ ಸಾಮಾನ್ ಪೋಯಂಡ್ ಉಂಡ್. ಆನಗುಂಡ್ ನಿಂಗಡ ಜನಳ ಅಯೆಚಿತ್ ಅದ್‌ನೆಲ್ಲ ಪುಡ್‌ತಕ್ ಎಡ್‌ತಂಡ್ ಕ.ಫಿಂಚ್‌ಕ್ ಕೊಡ್‌ಕೊಂಡೂ"ಂದ್ ಎಣ್ಣೊಚಿ.

ಅಲ್ಲಿಂಜ ಕ್ರಾಂಬಿ ಮೇ 16ಂಗ್ ಕಾವೇರಿ ಪೊಳೆ ದಾಟಿತ್ ಶ್ರೀರಂಗಪಟ್ಟಣತರ ಪೊರಮೆ ಪೋಚಿ. 19ಂಗ್ ತಾಂಡ ಸೈನ್ಯತನ ಪೊಳೆ ದಾಟ್‌ಚಿಟ್ಟಿತ್ ಕೋಟೆರ ನೈಋತ್ಯ ಬರಿಲ್ ಆಕ್‌ಚಿ. ಇನ್ನೆ ಶ್ರೀರಂಗಪಟ್ಟಣತರ ಕೋಟೆರ ಸುತ್ತೂ ಬ್ರಿಟಿಷ್ ಪಿಞ್ಲಾ

ಅಯಿಂಗಡ ಸಿನೇತಂಗಡ ಸೈನ್ಯ ಬಂದಿತ್ ಇಳಿವಕ ಟಿಪ್ಪು ತಾಂಡ ಗೆಲುರ ಆಸೆನ ಬುಟ್ಟಿತ್ ಅಯಿಂಗಡ ಕೂಡೆ ಸಿನೇತಿಕೆರ ಒಪ್ಪಂದ ಮಾಡಿಯವಕ್ ಗೇನ ಮಾಡ್‌ಚಿ.

ಈಂಡೆಡಲ್ ವೀರರಾಜೇಂದ್ರ ಒಡೆಯ, ಅಬರ್‌ಕ್ರಾಂಬಿನ ಕಂಡಿತ್ ಬಂದನ್ನಕೆ ಸೀಮೆರ ಪಾರುಪತ್ಯದಾರಂಗಳೆಲ್ಲ ಕಾಕ್‌ಚಿ.

ಶ್ರೀರಂಗಪಟ್ಟಣತ್‌ಂಜ ತಂಗಡ ಕುಟುಂಬತೋಡೆ ಬಂದ ಕೊಡಗ್ಗರ ಜನಕ್ ದಂಡ್ ತಿಂಗಕ್ ಅಪಚ್ಚಕ್ ಉಣ್ಣಾತೀನಿರ ಸಾಮಾನ್‌ನ ಅರಮನೆಂಜ ಕೊಡ್‌ಕೊಂಡು. ಅನ್ನನೆ ಅವು ಇಂಜ ನಾಡ್‌ಲ್ ಮನೆ ಕೆಟ್ಟ್‌ಚಿಟ್ಟಿತ್ ಅಯಿಂಗಲ ಆರೈಕೆ ಮಾಡೊಂಡು. ಇಕ್ಕ ನಗರತಾರ ಬರಿಂಜ ಸಾಮಾನ್ ಟಿಪ್ಪುರ ಸೈನ್ಯಕ್ ಪೋಯಂಡ್ ಉಂಡ್. ನಂಗ ಕೊಡಗ್ಗರಳ ಕೂಟಿಯಂಡ್ ಅಲ್ಲಿಕ್ ಪೋಯಿತ್ ಆ ಕುಂದ್ ಬಟ್ಟೆನ ತಡ್‌ತಿತ್, ಸಾಮಾನ್ ಎಡ್‌ತಂಡ್ ಟಿಪ್ಪುರ ಸೀಮೆಕ್ ಪೋಂಡು. ಅಲ್ಲಿ ಉಳ್ಳ ಅತ್ತ ಕಡ್‌ಚಿ, ಸಾಮಾನ್‌ನೆಲ್ಲ ಎಡ್‌ತಂಡ್ ಇಕ್ಕ ಬಂದಿತುಳ್ಳ ಕೊಡಗ್ಗರ ಜನಕ್ ಅದ್‌ನ ಕೊಡ್‌ತಿತ್, ಬಾಕಿ ಉಳ್ಳಾನ ಇಂಗ್ಲೀಷ್ ಸರ್ಕಾರಕ್ ಕೊಡ್‌ಕೊಲು"ಂದ್ ಅಪ್ಪಣೆ ಮಾಡ್‌ಚಿ.

ಅಲ್ಲಿಂಜ ಏರ ಕಣಕ್‌ಲ್ ಜನಳ ಕೂಟಿಯಂಡ್ ಐಗೂರ್‌ಸೀಮೆ ತಾಲೋಕ್‌ರ ಅರಕೆರ ಎಣ್ಣುವ ಉರ್‌ಕ್ ಬಾತ್. ಅಲ್ಲಿಂಜ ಅಂಜಾಯಿರ ಕೊಡವಳ ಸಾಮಾನ್ ಬಪ್ಪ ಬಟ್ಟೆರ ಬರಿಯ ಅಯೆಚತ್. ಅವು ಅಲ್ಲಿಕ್ ಬಪ್ಪ ಇಂಜಯಿಂಗಲ ತಡ್‌ತಿತ್ ಅಯಿಂಗಲ ಪಕ್ಕ ಇಂಜ ಸಾಮಾನ್, ಪಣ ಎಡ್‌ತಂಡ್, ಕೂಡೆ ಇಂಜ ಲಂಬಾಣಿಯಳ ತಂಗಡ ಪುಡ್‌ತಕ್ ಎಡ್‌ತಂಡತ್.

ಅವು ವಾಪಾಸ್ ಬಪ್ಪಕ ಅಸ್ತಾರೆ ಸೀಮೆನ ಸಹ ಲೂಟಿ ಮಾಡಿತ್ ಸಾಮಾನ್, ಅತ್ತ ಕಡ್‌ಚಿಯಳ ಪುಡ್‌ಚಂಡ್ ತಂಗಡ ರಾಜಂಡಲ್ಲಿಕ್ ಅಯೆಚತ್. ಅನ್ನನೆ ರಾಜಂಡ ಅಪ್ಪಣೆಪೋಲೆ ಅಸ್ತಾರೆ ಸೀಮೆಲೆ ಇಂಜಂಡ್ ಸಾಮಾನ್‌ನ ಗುಡ್ಡೆ ಕೂಟುವ ಕೂಡ್‌ಚಿ. ವೀರ ರಾಜೇಂದ್ರ ಒಡೆಯ ಅವು ಅಯೆಚ ಸಾಮಾನ್‌ಲ್ ಅಬರ್ ಕ್ರಾಂಬಿ ಸೈನ್ಯಕ್ ಬೋಂಡಿಯಾನ ವಸ್ತುನ ಅಂಜಂಡ್ ಕ.ಫಿಂಚ್‌ರ ಪಕ್ಕ ಅಯೆಚತ್. ಬಾಕಿ ಇಂಜ ನೆಲ್ಲ್, ಅಕ್ಕಿ, ಅತ್ತ ಕಡ್‌ಚಿ, ಇರಾಂಬು ಸಾಮಾನ್‌ನ ನಾಡ್‌ರ ಪಾರುಪತ್ಯದಾರಂಗಳ್ ಕೊಡ್‌ತಿತ್ ಶ್ರೀರಂಗಪಟ್ಟಣತ್‌ಂಜ ತಪ್ಪಾಚಿಟ್ಟಿಂಡ್ ಕೊಡಗ್ಗರ ಬಂದ ಮತಾಂತರ ಆನ ಕೊಡಗ್ಗರ ರೈತಂಗಕ್ ಅಯಿಂಗಡಯಿಂಗಡ ಅರ್ಹತೆ ಅರಾಂಜಂಡ್ ಹಂಚುವ ಕೂಡ್‌ಚಿ.

## ಜಮ್ಮ ಮಾಪಳೆಯ

ಶ್ರೀರಂಗಪಟ್ಟಣಂಜ ಮೂಂದನೆ ಮೈಸೂರ್ ಪಡೆರ ನೇರತ್ ಕೊಡಗ್ಗ್ ಬಂದ ಮಹಮ್ಮದಿ ಮತಾಂತರಕ್ ಒಳಪಟ್ಟ ಕೊಡಗ್ಗರ ಜನಳ ವೀರರಾಜೇಂದ್ರ ಒಡೆಯ ಅಕ್ಕ ದಾರೂ ಹಕ್ಕದಾರಂಗ ಇಲ್ಲತೆ ಪಡ್ ಬುದ್ದಿತಿಂಜ ಭೂಮಿಲ್ ನೆಲೆ ನಿಪ್ಪಚಿಟ್ಟತ್. ಆ ಕಾಲತ್ ಮತಾಂತರ ಆನ ಜನಳ ವಾಪಾಸ್ ತಂಗಡ ಮತಕ್ ಕೂಟಿಯವ ಸಂಪ್ರದಾಯ ಹಿಂದೂ ಜನಾಂಗತ್ ಇಲ್ಲತಾನಗುಂಡ್ ಈ ಜನ ಮುಸಲ್ಮಾನಂಗಳಾಯಿತೆ ಇರೊಂಡಿಯಾಚಿ.

ಆ ಕಾಲತ್ ಬ್ರಿಟಿಷ್, ಕೊಡಗ್ಗ್ ಬಂದಪಿಳ್ಳಾ ಚೆನ್ನಂಗ್ ಕಾಲಕೆತ್ತನೆ ಕೊಡಗ್ಗಲ್ ಅವಿಭಕ್ತ ಕುಟುಂಬ ಪದ್ಧತಿ ಇಂಜಾನುಂಡ್ ವೀರರಾಜೇಂದ್ರಒಡೆಯ ಮತಾಂತರ ಆನ ಕೊಡಗ್ಗಕಾರಳೆಲ್ಲ ಅದತೂ, ಕೊಡವಳ ಅಯಿಂಗಡ ಪಂಡೇತ ಭೂಮಿಲೆ ನೆಲೆ ನಿಪ್ಪಚಿಟ್ಟಕ, ಕೊಡವ ಅವಿಭಕ್ತ ಕುಟುಂಬ ಪದ್ಧತಿಕ್ ತೊಂದರೆ ಆಕೂಂದ್ ಮತಾಂತರ ಆನ ಕೊಡವಳ / ಬೋರೆ ಕೊಡಗ್ಗಕಾರ ಒಕ್ಕಚೆ ಇಂಜಕ ಅಯಿಂಗಡ ಪುದಿಯ ಮತ ಅನುಸರಣೆ ಮಾಡುವಕ್ ಅನುಕೂಲ ಆಪಾಂದ್ ಅಯಿಂಗಕ್ ಕೊಡಗ್ಗರ ಬೋರೆ ಬೋರೆ ಜಾಗತ್ ಪಡ್ ಬುದ್ದ ಭೂಮಿನ ಕೊಡ್ತಿತ್ ಆಕ್ಚಿ. ಟಿಪ್ಪು ಕೊಡಗ್ಗಂಜ ಕೂಟಿಯಂಡ್ ಪೋಯಿತಿಂಜ ಸುಮಾರ್ 80 ಆಯಿರ ಜನಡಾತ್ ಬೋರಿ 12 ಆಯಿರ ಜನ ಕೊಡಗ್ಗ್ ವಾಪಾಸ್ ಬಂದಾಂಗ್ ಇಲ್ಲಿ ಹಕ್ಕದಾರಂಗ ಇಲ್ಲತೆ ವ್ಯವಸಾಯ ಭೂಮಿ ದುಂಬ ಇಂಜತ್. ಆನಗುಂಡ್ ವೀರ ರಾಜೇಂದ್ರ ಒಡೆಯ ಮತಾಂತರ ಆನ ಕೊಡಗ್ಗರ ಜನಳ ಕೊಡಗ್ಗರ ಬೋರೆ ಜಾಗತ್ ಆಕ್ಚಿ.

ಈ ಜನಕ್ ರಾಜಂಡ ಭೂಮಿನ ಜನ್ಮ ಹಕ್ಕ ಎಣ್ಣಕ ಜಮ್ಮ ಆಯಿತ್ ಕೊಡ್ತತ್. ಇವು ಮೈಸೂರ್ ಸೀಮೆಲ್ ಇಂಜ ಚೆನ್ನಂಗ್ ಸಮಯತ್ ಉರ್ದ್ ತಕ್ಕ ಪಡ್ಚಾಲೆ. ಆನಗುಂಡ್ ಇವು ಕೊಡಗ್ಗ್ ಬಂದಪಿಳ್ಳಾ ತಂಗಡ ಮಹಮ್ಮದೀ ಮತತ್ ಪೋಲೆ ವ್ಯಾಪಾರಕಾಯಿತ್ ಈಂಗ್ ಮುಪ್ಪಡೆ ಸಂಪರ್ಕ ಮಾಡಿತಿಂಜ ಮಲಬಾರ್ ಮಾಪಳೆಯಡ ಸಹಾಯ ಪಡ್ಂದತ್. ಆನಗುಂಡ್ ಇಯಂಗಳ ಕೊಡಗ್ಗರ ಜನ 'ಜಮ್ಮ ಮಾಪಳೆಯ'ಂದ್ ಕಾಕ್ಚಿ.

ಜಮ್ಮ ಮಾಪಳೆಯಳಾಯಿತ್ ಮತಾಂತರ ಆನ ಕೊಡಗ್ಗರ ಜನ ಕಾವೇರಿ ಪೊಳೆರ ದಕ್ಷಿಣ ನಾಡ್ ಜನಳ ಆನಾನಗುಂಡ್ ಅವು ಕೊಡಗ್ಗ್ ವಾಪಾಸ್ ಬಂದಪಿಳ್ಳಾ ಆ ನಾಡ್ ನೆಲೆ ನಿಂದನ್ನೆಗೆ ಗೊತ್ತ್ ಕೊಟ್ಟವ. ಅದ್ ನಾಲ್ಕಾಡ್ ನೆಲಜಿ, ಎಮ್ಮೆಮಾಡ್,



ಕುಂಜಿಲ, ಕೊಳಕೇರಿ, ಕಡಿಯತ್ತಾಡ್, ಬೆಪ್ಪುನಾಡ್, ನರಿಯಂದಡತ್ ಎಡಪಾಲ, ಕೊಟ್ಟೋಳಿಲ್ ಗುಂಡಿಕೆರೆ, ಮೈತಾಡಿಲ್ ಚಾಮಿಯಾಲ, ಎಡೆನಾಲ್ಕಾಡ್‌ಲ್ ಐಮಂಗಲ, ಹಾಲುಗುಂದತ್ ಕೊಂಡಂಗೇರಿ, ಅಮ್ಮತ್ತಿನಾಡ್‌ರ ನಲ್ವತೋಕ್ಲ್ ಊರ್‌ರ ಚೋಕಂಡಾಳಿ ಪಿಳ್ಳಾ ಶ್ರೀಮಂಗಲ ನಾಡ್ ಬೇಗೂರ್‌ರ ಚೇನಿವಾಡ.

ಇದತ್ ಏರ ಕಣಕರ್ ಜನ ಕೊಡವಳೆ ಆಯಿತಿಂಜತ್ ಎಣ್ಣುವಾಂಗ್ ಇಂದೇಕೊ ಅಯಿಂಗಡ ಕೊಡವಮನೆ ಪೆದ ಸಾಕ್ಷಿ. ಅಯಿಂಗಡ ಮನೆಪೆದ ಇನ್ನನೆ ಇಂಜತ್.

ಎಮ್ಮೆಮಾಡ್‌ಲ್ ಚೆಂಬಾರಂಡ, ಚಕ್ಕರ, ಸಣ್ಣ ಚೆಂಬಾರಂಡ, ಕಾಳೆರ, ಪುಲುಮಾಡಂಡ, ಬಲ್ಪಾಚಿಕರಂಡ.

ಕುಂಜಿಲತ್ ಕುಂಡಂಡ, ಕೊಳಕೇರಿಲ್ ಚೆರುಮನಿಕರಂಡ, ನರಿಯಂದಡತ್ ಕುಪ್ಪೊದಂಡ, ಎರಟಿಯಂಡ, ಕೊಟ್ಟೋಳಿಲ್ ಕೂವೆಂಡ; ಮೈತಾಡಿಲ್ ಕುವಲೆರ, ಪುಡಿಯಂಡ, ಐಮಂಗಲತ್ ಕೋಳುಮಂಡ, ನಲ್ವತೋಕ್ಲ್‌ಲ್ ದುದ್ಯಂಡ, ಪುಡಿಯಂಡ, ಕನ್ನಡಿರ, ಕೊಂಡಂಗೇರಿಲ್ ಕಪ್ಪಂದಿರ, ಕಂಡಂಗಾಲತ್ ಮಂದಮಾಡ ಪಿಳ್ಳಾ ಚೇನಿವಾಡತ್ ಒಕ್ಕ ಮೂಲ ಪುರುಷ ಆಲಿ ಅಯಿಂಗಡ ಪೆದತ್ ಆಲಿರ.

ಈ ಜಮ್ಮ ಮಾಪಳೆಯಳ ಕೊಡವ ಮರ್ಚಿ ತಂಗಡ ಜಾತಿಕ್ ಕೂಟಿಯವ ಕಯ್ಯತೆ ಇಂಜಕೊ ಊರ್‌ರ ಸಾರ್ವಜನಿಕ ಬದ್‌ಕ್‌ಲ್ ಅಯಿಂಗಡ ಕೂಡೆ ಒರೇ ಒಕ್ಕಕಾರಡನ್ನಕೆ ಕೂಡಿಯಾಡುವ ಇಂಜತ್. ಅಚ್ಚಕೆ ಅಲ್ಲತೆ ಕೊಡವ, ಮತಾಂತರ ಆನ ತಂಗಡ ಪಳ್ಳಿ ಕೆಟ್ಟುವಕ್ ಸಹಾಯ ಮಾಡ್‌ನಾಂಡ ಕೂಟ್‌ಕ್ ಪಳ್ಳಿರ ಕಾಲತ್‌ರ ನಮ್ಮೆ ಪಿಳ್ಳಾ ಬೋರೆ ಕಾರ್ಬಾರ್‌ಲ್ ತಕ್ಕಾಮೆ ನಡ್‌ತುವ ಇಂಜತ್.

ಎಮ್ಮೆಮಾಡ್‌ಲ್ ಮಣವಟ್ಟಿರ ಒಕ್ಕ, ಕೊಳಕೇರಿಲ್ ಕಾಂಡಂಡ ಪಿಳ್ಳಾ ಕುಂಡ್ಲೋಳಂಡ, ಕುಂಜಿಲತ್ ಉದಿಯಂಡ ಒಕ್ಕಕಾರ ಆಯಾಯ ಊರ್‌ರ ಪಳ್ಳಿ / ಮಸೀದಿಲ್ ತಕ್ಕಾಮೆ ನಡ್‌ತುವ ಇಂಜತ್‌ಂದ್ ಹೇಳಿಕೆ ಉಂಡ್. ಆಯಾಯ ಊರ್‌ಲ್ ನೆಲೆ ನಿಂದಿತಿಂಜ ಈ ಜಮ್ಮ ಮಾಪಳೆಯ ಪುತ್ತರಿನಮ್ಮೆರ ನೇರತ್ ನಾಡ್ ಮಂದ್‌ಲ್ ಕೋಲಾಟ ನಡಪ ಇಂಜ ದಿನ ತಂಗಲೂ ಕುವ್ವ ಚೇಲೆ ಇಟ್ಟಿತ್, ದುಡಿಕೊಟ್ ಪಾಟಾಯಿ ನಾಡ್ ಮಂದ್‌ಕ್ ಬಪ್ಪ ಇಂಜತ್. ಇನ್ನನೆ ಬಪ್ಪ ಇಂಜ ತಂಗಡ ಊರ್‌ರ ಜಮ್ಮ ಮಾಪಳೆಯಕ್ ಅಲ್ಲಿಯತ ಕೊಡವ ಕಾಲ್ ಕತ್ತುವಕ್ ನೀರ್ ಕೊಡ್‌ತಿತ್, ಪಲಾಂಬ್ ಬಿರ್‌ಚಿತ್, ಅಯಿಂಗಲ ಅಳಪ್‌ಚಿಟ್ಟಿತ್ ತಕ್ಕಾರ ಮಾಡುವ ಇಂಜತ್.

ಇನ್ನನೆ ನಾಲ್ಕಾಡ್‌ರ ನಾಡ್ ಮಂದ್, ಕಡಿಯತ್ತಾಡ್‌ರ ಬೇಲಿಯಾಣೆ ಮಂದ್ ಪಿಳ್ಳಾ ಬೆಪ್ಪುನಾಡ್‌ರ ಮಾದಪಟ್ಟಾ ನಾಡ್‌ಮಂದ್‌ಕ್ ಜಮ್ಮಾ ಮಾಪಳೆಯ ಬಪ್ಪ ಇಂಜಾನೆ

ಆಯಾಯ ನಾಡುರ ಬಯತ್ ಪಟ್ಟವು ಇಕ್ಕಲೂ ಗೇನ ಮಾಡಿಯವ. ಆಚೇಂಗಿ, ಈ ತಕ್ಕಾಮೆ, ನಾಡುಮಂದ್‌ಕ್ ಜಮ್ಮಾ ಮಾಪಳೆ ಒಕ್ಕಚೆ ಆಯಿತ್ ಪೋಪ ಸಂಪ್ರದಾಯ ಇಕ್ಕ ಸುಮಾರ್ 50 ಕಾಲತರ ಬಯ್ಯ ನಿಂದ್ ಪೋಚೇಂದ್ ಅರ್ಂಜವು ಎಣ್ಣುವ. ಆಚೇಂಗಿ, ಎಮ್ಮೆಮಾಡಲ್ ಮಾತ್ರ ಅಲ್ಲಿಯತ ಕಾಲತರ ನಮ್ಮೆರ ನೇರತ್ ಮಣವಟ್ಟಿರ ಒಕ್ಕಕಾರಕ್ ಇಂದೇಕೂ ಓರ್ ಗೌರವಪಟ್ಟ ಸ್ಥಾನ ಉಂಡ್.

ಜಮ್ಮಾ ಮಾಪಳೆಯಂಡ ಮಂಗಲತ್ ಧಾರ್ಮಿಕ ವಿಧಿ ಮುಸಲ್ಮಾನ ಧರ್ಮತರ ಪೋಲೆ ಇಂಜಕೊ, ಸಾಮಾಜಿಕ ಪದ್ಧತಿ ಇಕ್ಕಲೂ ಕೊಡವಡ ಮಂಗಲ ಪದ್ಧತಿರನ್ನಕೆ ಉಂಡ್. ಕೊಡವ ಇಂದೇಕೂ ಮೂರ್ತತರಂದ್ ಕಣ್ಣ, ಮೂಡಿರ ಸ್ವಂತಕಾರಳುಂಡ್ ಮಂಟಪತ್ ಆಶೀರ್ವಾದ ಪಡಂದವನ್ನಕೆ, ಜಮ್ಮಾ ಮಾಪಳೆಯಳೂ ನಿಖಾತರ ಸುರೂವೆತ ದಿನ ತಂಗಡ ಸ್ವಂತಕಾರಳ ಕಾಕ್‌ಚಿಟ್ಟಿತ್ ವಿಶೇಷಪಟ್ಟ ಊಟ ಕೊಡ್‌ಪ. ಅಂದ್ ಕೊಡವಡ ಮಂಗಲತರನ್ನಕೆ ಜಮ್ಮಾ ಮಾಪಳೆಯ ಮಂಗಲತ್ ಪಣ ಕೆಟ್ಟುವ, ಇನಾಂ ಕೊಡ್‌ಪ. ಒಯಿಪತ್ ನೇರತ್ ಕೊಡವ ಪದ್ಧತಿರನ್ನಕೆ ಕಣ್ಣ, ಮೂಡಿನ ಕೂಟಿಯಂಡ್ ಬಪ್ಪಕ್ ಪೋಪ.

ಇದಾನಪಿಳ್ಳಾ ಪದ್ಧತಿ ಬೋರೆ ಬೋರೆ ಆಯಿತ್ ಮುಸಲ್ಮಾನ ಪದ್ಧತಿರನ್ನಕೆ ನಡ್‌ಪ. ಎಣ್ಣಕ ಪಿತ್ಯಾಂದ್ ನಿರ್ಕ್ ಪಡ್‌ತನ ನೇರತ್ ಖಾಜಿ ಕೂಡ್‌ನ ಬೆಂದ್‌ಕಡ ಎದಿಕೆ ಮುರಾನ್ ಗ್ರಂಥತಂಜ ಮಂಗಲತರ ಆಶೀರ್ವಾದ ವಚನ ಓದಿತ್ ಮಂಗಲ ಕೈಪ.

ಜಮ್ಮಾ ಮಾಪಳೆಯ ಈ ಶತಮಾನತರ ಸುರೂಕೆತ್ತನೆ ಮಂಗಲತ್ ಕೊಡವಡನ್ನಕೆ ಕುಪ್ಪ ಚೇಲೆ ಇಡುವ ಇಂಜತಂದ್ ಪೆರಿಯವು ಇಕ್ಕಲೂ ಎಣ್ಣುವ.

### ಶ್ರೀರಂಗಪಟ್ಟ ಮುತ್ತಿಗೆ, ಸುಲ್ತಾನಂಡ ಸೈನ್ಯಕ್ ಸೋಲ್, ಶ್ರೀರಂಗಪಟ್ಟಣ ಒಪ್ಪಂದ

ಶ್ರೀರಂಗಪಟ್ಟಣ ಕೋಟೆರ ಸುತ್ತೂ ಇಂಗ್ಲೀಷ್ ಪಿಳ್ಳಾ ಅಯಿಂಗಡ ಸಿನೇತಂಗಲಾನ ನಿಜಾಮ ಪಿಳ್ಳಾ ಪೇಶ್ವರ ಸೈನ್ಯ ನೆಲೆ ನಿಂದಿತ್ ಸುಲ್ತಾನಂಡ ಸೈನಿಕಂಗಳ ಪೊಜ್ಜಿತ್ ಕೋಟೆರ ಒಳ್‌ಕ್ ಓಡ್‌ಚಿಟ್ಟಿಂಜತ್. ಶ್ರೀರಂಗ ಪಟ್ಟಣ ಪಕ್ಕತೆ ಲಾರ್ಡ್ ಕಾರ್ನ್ ವಾಲೀಸ್

ಸೈನ್ಯತೋಡೆ ಬಂದನ್ನಕೆ ಟಿಪ್ಪು ಅಂವಂಡ ಕೂಡೆ ಒಪ್ಪಂದ ಮಾಡಿಯವಕ್ ನೋಟ್‌ಚಿ. ಆಚೇಂಗಿ, ಸುಲ್ತಾನ ಅಯೆಚ ಕಾಗದತ್ ಲಾರ್ಡ್ ಕಾರ್ನ್ ವಾಲೀಸ್ ಒತ್ತಂಡ ಏದೇ ವಿಷಯ ಇಲ್ಲತಾನಗುಂಡ್ ಒಪ್ಪಂದತರ ತಕ್ಕ್ ಪೊಳ್‌ಂಜಿಬುದ್ದತ್. ಶ್ರೀರಂಗಪಟ್ಟ ಮುತ್ತಿಗೆರ ತಯಾರಿ ರಭಸತ್ ನಡಂದತ್.

ಮುಂಬೈ ಸೈನ್ಯತೋಡೆ ಜ.ಅಬರ್ ಕ್ರಾಂಬಿ ಕಾವೇರಿ ಪೊಳೆನ ದಾಟಿತ್ ಫೆಬ್ರವರಿ ತಿಂಗ ನಾಳಂಕೆ 19ತ್ ಶ್ರೀರಂಗಪಟ್ಟ ಕೋಟೆರ ನೈಋತ್ಯ ಬರಿತ್ ನೆಲೆ ನಿಂದತ್. ನಾಳಂಕೆ 22ಂಗ್ ಟಿಪ್ಪು, ಜ.ಅ. ಕ್ರಾಂಬಿನ ಚೋಪಾಚಿಡುವಕ್ ಪ್ರಯತ್ನಪಟ್ಟಿತ್ ತಾನೆ ಚೋತ್ ಪೋಚಿ. ಆಂಡ ಒಳ್‌ಲ್ ಫಿರಂಗಿನ ಕೋಟೆರ ಪಕ್ಕ ಕೊಂಡಬಂದಿತ್ ಕೋಟೆ ಕೆಂವತರ ಕೊಡಿಯ ಪಾರ್‌ಚಿಡುವಕ್ ಬ್ರಿಟಿಷಡ ಸೈನ್ಯ ರೆಡಿ ಇಂಜತ್. ಶ್ರೀರಂಗಪಟ್ಟ ದ್ವೀಪತರ ಒಳ್‌ಕ್ ಬ್ರಿಟಿಷಡ ಸೈನ್ಯ ನುಗ್ಗನದೆ ಫೆಬ್ರವರಿ 14ತ್ ಟಿಪ್ಪು, ಪುನಾದಿಯ ಲಾರ್ಡ್‌ಕಾರ್ನ್ ವಾಲೀಸ್, ಪೇಶ್ವೆ ಪಿಳ್ಳಾ ನಿಜಾಮಮಲ್ಲಿರ ಕೂಡೆ ಶಾಂತಿ ಒಪ್ಪಂದ ಮಾಡಿಯವಕ್ ಆಯಿಂಗಡ ಪಕ್ಕ ಲಾಯರ್ದಳ ಅಯೆಚತ್. ಅದತ್ ಅಲಿರೇಜಾ ಪಿಳ್ಳಾ ಗುಲಾಮ್ ಆಲಿ ಮುಖ್ಯಸ್ಥಂಗ. ಇಯಂಗಕೂ ಬ್ರಿಟಿಷಡ, ಪೇಶ್ವೆರ ಪಿಳ್ಳಾ ನಿಜಾಮಂಡ ಪ್ರತಿನಿಧಿಯಕ್ ಒಪ್ಪಂದತರ ಇಡ್‌ಕೆಟ್ವನ ಸುಲ್ತಾನಂಡ ಎದಿಕೆ ಬೆಚ್ಚತ್.

ಆ ಇಡ್‌ಕೆಟ್ವ ಇನ್ನನೆ ಇಂಜತ್.

- 1). ಸುಲ್ತಾನ ಪಡೆ ಸುರು ಆಪಾಂಗ್ ಮುಪ್ಪಡೆ ಪಡ್‌ಂದಿತಿಂಜ ರಾಜ್ಯತ್ ಪಾದಿರಾಜ್ಯತನ ವಿರೋಧಪಕ್ಷತರ ರಾಜ್ಯಕ್ ಪಕ್ಕತುಳ್ಳ ಜಾಗಕ್ ಬುಟ್ವಕೊಡ್‌ಕೊಂಡು.
- 2). ವಿರೋಧಪಕ್ಷಕಾರಕ್ ಅವು ಮಾಡ್‌ನ ಪಡೆರ ಖರ್ಚಿಕಾಯಿತ್ ಮೂಂದ್ ಕೋಟಿ ನುಪ್ಪದ್ ಲಕ್ಷ ಉರ್‌ಪಿಯ ಕೊಡ್‌ಕೊಂಡು. ಆ ಪಣತ್ ಪಾದಿಪಣತನ ಅಕ್ಕೆನ್ನೆ ಕೊಡ್‌ಕೊಂಡು.
- 3). ಹೈದರಾಲಿರ ಕಾಲತಂಜ ಸೆರೆಯಾಳಾನ ವಿರೋಧಿ ರಾಜ್ಯತರ ಜನಳ, ಸುಲ್ತಾನಂಡ ಜನಳ ಏದೇ ಓರ್ ಇಡ್‌ಕೆಟ್ವ ಇಲ್ಲತೆ ಅಪ್ಪರಿಪ್ಪರ ಪಕ್ಷಕಾರ್ ಬುಡ್‌ಗಡೆ ಮಾಡೊಂಡು.
- 4). ಕೊಡಿಯತ ಇಡ್‌ಕೆಟ್ವನ ಸುಲ್ತಾನ ಪಾಲನೆ ಮಾಡುವ ಎಣ್ಣುವ ನಂಬಿಕೆಯಿತ್, ಅದ್‌ನ ಪಾಲನೆ ಮಾಡುವಲ್ಲಿಕೆತ್ತನೆ ಸುಲ್ತಾನ ತಾಂಡ ತಂಡ್ ಮಕ್ಕಳ ಕಾರ್ನ್‌ವಾಲೀಸ್‌ಕ್ ಒಪ್ಪಾಚಿಡೊಂಡು.
- 5). ಈ ನಾಲ್ ಇಡ್‌ಕೆಟ್ವನ ಸುಲ್ತಾನ, ವಿರೋಧಿ ರಾಜ್ಯಕಾರ ನಡತಿ ತಂದದು ಪಡೆ

ನಿಕ್ಕೊಂಡು. ಒಪ್ಪಂದತರ ಕರಾರ್‌ನಾಮೆನ ಎಳ್ಳಿತ್ ಅದ್‌ಂಗ್ ಸಮ್ಮಂಧ ಪಟ್ಟಪು ಸೈನ್ ಮಾಡಿತ್ ರಾಜಮುದ್ರೆ ಒತ್ತಿತ್ ತಂಗ, ತಂಗಡ ಸಂಸ್ಥಾನತ್ ಬೆಕ್ಕೊಂಡು.

ಸುಲ್ತಾನಂಗ್ ಈ ಇಡ್‌ಕೆಟ್‌ನೆಲ್ಲ ಒಪ್ಪಾಚಿಟ್ಟ ದಿನತರ ಪಿತ್ಯಾಂದ್ ಎಣ್ಣಕ ಫೆಬ್ರವರಿ 25ನೆ ದಿನ ಅವ ಶ್ರೀರಂಗಪಟ್ಟಣ್ ಬಲ್ಯ ಮಸೀದಿಲ್ ತಾಂಡ ಸೈನ್ಯತರ ಎಲ್ಲಾ ಅಧಿಕಾರಿಯಳ ಕಾಕ್‌ಚಿಟ್ಟತ್. ಅಲ್ಲಿ ಅಯಿಂಗಡ ಎದಿಕೆ ಖುರಾನ್ ಗ್ರಂಥ ಬೆಚ್ಚಿತ್ ಅದ್‌ಂಡ ಪಾವಿತ್ರ್ಯತರ ಮೀದ ತಾನ್ ಕೇಪ ವಿಷಯತ್ ಅವು ತಂಗಡ ಮನಸ್ಸಾಕ್ಸಿಕ್ ಸೆರಿಯಾಯಿತ್ ತಂಗಡ ಅಭಿಪ್ರಾಯ ತರೊಂಡೊಂದ್ ಕೇಟತ್. ಅಲ್ಲಿಂಜ ತಾಂಡ ವಿರೋಧ ರಾಷ್ಟ್ರ ತಾಂಗ್ ಅಯೆಚ ಒಪ್ಪಂದತರ ಇಡ್‌ಕೆಟ್‌ನ ಅಯಿಂಗಕ್ ಅರಿಚಿಟ್ಟತ್. ಅಯಿಂಗಡ ಕೂಡ ತಾನ್ ಶಾಂತಿ ಒಪ್ಪಂದತನ ಮಾಡಿಯವದಾ ಇಲ್ಲೆ ಪಡೆ ಸುರು ಮಾಡುವದಾಂದ್ ಕೇಟತ್.

ಅಕ್ಕ ಅಧಿಕಾರಿಯ ಎಲ್ಲ ಒಕ್ಕಚೆ ಒರೇ ತಕ್ಕ್‌ಲ್ "ಸುಲ್ತಾನಂಡ ರಾಜಧಾನಿರ ರಕ್ಷಣೆಲ್ ನಂಗಲ್ಲ ನಂಗಡ ಜಿಂವ ಕೊಡ್‌ಪಕ್ ರೆಡಿ ಉಂಡ್"ಂದ್ ಎಣ್ಣಚಿ. ಆಚೇಂಗಿ, ಅದೇ ಅಭಿಪ್ರಾಯತ್ "ತಂಗಡ ಸೈನ್ಯ ಧೈರ್ಯ ಕಳೊಂದಂಡಿತ್. ಆಂಡ ಮೀದ ನಂಬಿಕೆ ಬೆಚ್ಚಪಕ್ ಸಾಧ್ಯ ಇಲ್ಲೆ"ಂದ್ ಎಣ್ಣಚಿ.

ಈ ತಕ್ಕ್‌ನ ಕೇಟತ್ ಸುಲ್ತಾನ ಪೇರ್ತ್ ನೊಂಬಲತ್ ಒಪ್ಪಂದತರ ಕರಾರ್ ಪತ್ರಕ್ ಸೈನ್‌ಚಿಟ್ಟತ್, ತಾಂಡ ರಾಜಮುದ್ರೆನ ಒತ್ತಿತ್ ಅಂದೇ ಲಾರ್ಡ್ ಕಾರ್ನ್ ವಾಲೀಸ್‌ಕ್ ಅಯೆಚಿಕ್ಕೊಡ್‌ತತ್. ಪಿತ್ಯಾಂದ್ ಕಾರ್ನ್‌ವಾಲೀಸ್ ಪಡೆರ ಕಾರ್ಯಾಚರಣೆ ನಿಪ್ಪಾಚಿಡೊಂಡೊಂದ್ ತಾಂಡ ಸೈನ್ಯಕ್ ಅಪ್ಪಣೆ ಮಾಡ್‌ಚಿ. ಇದ್‌ಂಡ ಪಿತ್ಯಾಂದ್ ಸುಲ್ತಾನ್ ತಾಂಡ ದಂಡ್ ಮಕ್ಕಳಾನ ಮಾಯುಜುದ್ದೀನ್ ಸುಲ್ತಾನ್ ಪಿಳ್ಳಾ ಅಬ್ದುಲ್ ಖಾಲಿಖ್ ಸುಲ್ತಾನ್‌ನ ಅಯಿಂಗಡ ಪರಿವಾರತರ ಕೂಡ ಕಾರ್ನ್ ವಾಲೀಸ್‌ರ ಶಿಬಿರಕ್ ಅಯೆಚತ್. ಅಲ್ಲಿ ವಾಲೀಸ್ ಇಯಂಗಳ ಪೇರ್ತ್ ಗೌರವತ್ ತಕ್ಕಾರ ಮಾಡ್‌ಚಿ.

ಟಿಪ್ಪು, ಕಾರ್ನ್‌ವಾಲೀಸ್ ಪಿಳ್ಳಾ ಅವಂಡ ಸಹಾಯಕ ರಾಜ್ಯತರ ಅಧಿಕಾರಿಯಕ್ ಆನ ಒಪ್ಪಂದತರ ಕರಾರ್‌ಲ್ ಕೊಡಗು ಪ್ರಸ್ತಾಪ ಬಂದದೆ ಇಲ್ಲೆ. ಇದ್‌ನ ಅರಾಂಜ ಜ.ಅ.ಕ್ರಾಂಬಿ ಕಾರ್ನ್ ವಾಲೀಸ್‌ರ ಪಕ್ಕ ಪೋಯಿತ್ ಇನ್ನನೆ ಎಣ್ಣಚಿ.

"ಟಿಪ್ಪುರ ಸರ್ಕಾರಕೂ, ಇಂಗ್ಲೀಷ್‌ರ ಸರ್ಕಾರಕೂ ಪಿಳ್ಳಾ ಕೂಡೆ ಉಳ್ಳ ಸರ್ಕಾರಕೂ ನಂಬಿಕೆ ತಕ್ಕ್‌ಲ್ ಒಪ್ಪಂದ ಆಯಿತ್, ಟಿಪ್ಪುರ ಕೈಯಿಂಜ ಚೆನ್ನಂಗ್ ಪಣತನ ಎಡ್‌ತಂಡ್ ಬಾಕಿ ಬಪ್ಪಕುಳ್ಳ ಪಣಕ್ ಅಯಿಂಗಳ ಮಕ್ಕಳ ಎಡ್‌ತಂಡ್, ಬಾಕಿ ಪಣ ತಂದಪಿಳ್ಳಾ ಅವಂಡ ಮಕ್ಕಳ ಅಯೆಚಿತ್ತಪ್ಪಾಂದ್ ಎಣ್ಣತ್ ಚೆನ್ನಂಗ್ ಸೀಮೆನ ಎಡ್‌ತಂಡ್ ನಿಂಗ

ಬಂಗಾಳಿಕ್ ಪೋಯಂಡ್ ಉಳ್ಳಿರ. ನಂಗ, ನಂಗಡ ಸೈನ್ಯತೋಡೆ ಮುಂಬೈಕ್ ಕೊಡಗಾಕಾಲೆ ಪೋಪ. ಆಚೇಂಗೂ ಸುರೂಲ್ ಟಿಪ್ಪುರ ಮೀದ ಜಗಳ ಸುರು ಆಪಾಂಗ್ ಮುಪ್ಪಡೆ, ನಂಗಳ ತಲಚೇರಿಕ್ ಕಾಕ್‌ಚಿಟ್ಟಿತ್ ಕೊಡಗರ ಸಂಸ್ಥಾನಕೂ, ಇಂಗ್ಲೀಷ್ ಸರ್ಕಾರಕೂ, ಸೂರ್ಯ, ಚಣ್ಣೂರ ಇರಣೆ ಸಿನೇತಿಕೆ ಇರೊಂಡು ಅಲ್ಲತೆ ಟಿಪ್ಪು, ಇಂಗ್ಲೀಷ್ ಸರ್ಕಾರಕೂ, ಕೊಡಗರ ಸಂಸ್ಥಾನಕೂ ಬಲ್ಯ ಶತ್ರು ಆಯಿತುಂಡ್. ಟಿಪ್ಪುರ ಕೂಡೆ ಜಗಳಕ್ ಇಂಗ್ಲೀಷ್ ಸರ್ಕಾರತರ್ ಸೈನ್ಯ ಪೋಪಕ್ ಕೊಡಗಾಕಾಲೆ ಬಟ್ಟೆ ಮಾಡಿಕೊಡ್‌ಕೊಂಡು. ಟಿಪ್ಪುರ ಸಿನೇತಿಕೆ ಬೆಚ್ಚವಕಯ್ಯ. ದಂಡ್ ಬರಿಂಜ ಆ ಸುಲ್ತಾನಂಡ ಮೀದ ಜಗಳ ಮಾಡೊಂಡು. ಓರ್ ಸಮಯ ಇಂಗ್ಲೀಷ್ ಸರ್ಕಾರಕೂ, ಟಿಪ್ಪುರ ಸರ್ಕಾರಕೂ ಸೆರಿ ಬಂದ್‌ಲೇಂಗಿ, ಆದ್ಯ ಕೊಡಗರ ಸಂಸ್ಥಾನತನ ಸೆರಿ ಮಾಡಿತ್ ಅಲ್ಲಿಂಜ ಇಂಗ್ಲೀಷ್ ಸರ್ಕಾರತನ ಸೆರಿ ಮಾಡುವಾಂದ್ ದಂಡ್ ಬರಿಂಜ ಕರಾರ್ ಆಯಿತ್. ಅದ್‌ನ ನಂಬಿತ್ ನಂಗ ನಿಂಗಡ ಸೈನ್ಯ ಮುಂಬೈಕ್ ಪೋಪಕ್ ಬಟ್ಟೆ ಮಾಡಿ ತಂದಿತ್ ಬೋಂಡಿಯಾನ ಸಾಮಾನ್, ಸಹಕಾರ ತಂದಿತ್, ಇಂಗ್ಲೀಷ್ ಸರ್ಕಾರಕ್ ಗೆಲು ಕ್‌ಟ್ಪಡ್‌ಂದ್ ಬಯಂದಿತಿಂಜತ್. ಅದೇಪೋಲೆ ಇಂಗ್ಲೀಷ್ ಸರ್ಕಾರತರ್ ಸೈನ್ಯ ಶ್ರೀರಂಗ ಪಟ್ಟಣಕ್ ಪೋಯಿತ್ ಟಿಪ್ಪುರ ಕೂಡೆ ಜಗಳ ಮಾಡ್‌ನಲ್ಲಿ ಅಪು ಚೋತಿತ್ ನಂಗಡ ಕೈಯಿಂಜ ಬೋಂಡಿಯಾನ ದುಡ್ಡ್ ಪಿಳ್ಳಾ ಚೆನ್ನಂಗ್ ಸೀಮೆನೊ ಎಡ್‌ತಂಡ್ ಈ ಪೋಲೆ ಟಿಪ್ಪುರ ಕೂಡೆ ನಿಂಗ ಸಿನೇತಿಕೆ ಬೊಳ್‌ತಿಯಂಡ್ ಪೋಯಂಡ್ ಉಳ್ಳಿರ. ನಂಗ ಟಿಪ್ಪುರ ಬರಿಂಜ ಸಿನೇತಿಕೆರ ತಕ್ಕ ಕೇಟಿತ್ ಇಂಗ್ಲೀಷ್ ಸರ್ಕಾರ ಅದ್‌ಂಗ್ ಒತ್ತವತಾಂಗ್ ಆಯಿಂಗಕ್ ವೈರಿಯಳಾಯಿತ್. ಇನ್ನನಿಪ್ಪಕ ನಿಂಗ ಟಿಪ್ಪುರ ಕೂಡೆ ಸಿನೇತಿಕೆ ಮಾಡಿಯಂಡ್, ನಂಗಕೂ, ಟಿಪ್ಪುಕೂ ಉಳ್ಳ ಸಿನೇತಿಕೆಕ್ ವಿರೋಧ ಮಾಡಿಯಂಡ್ ನಿಂಗಡ ಜಾಗಕ್ ಪೋಪಿರ. ಇಂಗ್ಲೀಷ್ ಸರ್ಕಾರತರ್ ಸತ್ಯಧರ್ಮ ಇನ್ನನೆ ಉಳ್ಳದ? ಇದ್‌ಂಗ್ ಕೊಡಗರ ಮಹಾರಾಜ ಜವಾಬ್ ತರೊಂಡೂ"ಂದ್ ಎಣ್ಣೆಚಿ.

ಜ.ಅ.ಕ್ರಾಂಬಿ ಕೊಡಗರ ರಾಜಂಡ ಪರವಾಯಿತ್ ಪರ್‌ಂದ ತಕ್ಕನ ಮನಸ್ಸಕ್ ಎಡ್‌ತಂಡ್ "ಕಾರ್ನ್‌ವಾಲೀಸ್ ಕೊಡಗರ ಮಹಾರಾಜಂಗ್ ಕಂಪೆನಿ ಇಂಗ್ಲೀಷ್ ಸರ್ಕಾರತಂಜ ಕರಾರ್ ನಾಮೆ ಎಳ್ಳೆನನ್ನಕೆ ಮಾಡಿ ಕೊಡ್‌ಕೊಂಡು. ಅದ್ ನ್ಯಾಯಾ"ಂದ್ ಎಣ್ಣೆಚಿ.

ಕೂಡೆನ್ನೆ "ಕಾರ್ನ್‌ವಾಲೀಸ್ ಆದ್ಯ ಕೊಡಗರ ರಾಜಂಡ ಬರಿಂಜ ಸಿನೇತಿಕೆನ ಬೆಚ್ಚಂಡ್, ಶಾಶ್ವತ ಆಯಿತ್ ಇಪ್ಪನ್ನಕೆ ನೋಟಿಯವಂಡೂಂದ್ ಎಳ್ಳಿಚಿಟ್ಟದ್ ಕಂಪೆನಿ ಸರ್ಕಾರತ್ ಉಂಡ್. ಆನಗುಂಡ್ ಕಂಪೆನಿ ಇಂಗ್ಲೀಷ್ ಸರ್ಕಾರತರ್ ಮೀದ ನಿಂಗ ಏದ್ ಪೋಲೆ ಸಿನೇತಿಕೆಲ್ ಉಳ್ಳಿರ, ಅದೇಪೋಲೆ ಕೊಡಗರ ಮಹಾರಾಜಂಡ ಕೂಡೆ ಸಿನೇತಿಕೆ ಬೆಚ್ಚವಂಡು



ಅಲ್ಲತೆ ಅಯಿಂಗಡ ವಿರೋಧ ಕಯ್ಯ "ಂದ್ ಎಳ್ವಿತ್ ಕಾಗದತನ ಟಿಪ್ಪುಕ್ ಅಯೆಚತ್.

ಲಾರ್ಡ್‌ಕಾರ್ನ್‌ ವಾಲೀಸ್ ಕೊಡಗರ ರಾಜಂಡ ಕೂಡೆ ಸಿನೇತಿಕೆಲ್ ಇರೊಂಡೂಂದ್ ಟಿಪ್ಪುಕ್ ಎಳ್ವೊನಾಂಗ್ ಅಂವ ಚೆಡಿಲ್ ಪುಚ್ಚಂಡನ್ನೆ ಆಚಿ. "ಕೊಡಗ್ ಇಂಗ್ಲೀಷ್‌ಕಾರಡೆ ಏದ್ ಸೀಮೆಕ್ ಎತ್ತಿತ್ ಉಳ್ಳೆ? ಅವು ಎನ್ನಂಗ್ ಶ್ರೀರಂಗಪಟ್ಟ ಕೋಟೆರ ಬೀಗತಾರ ಕೀನ ಕೇಪುಲೆ? ಅನ್ನತ ರಾಜ್ಯತನ ಅಯಿಂಗಕ್ ಬುಟ್ಟ್ ಕೊಡಪಕ್ ಒತ್ತವಾಂಗ್ ಇಳ್ವೊ ನಾನ್ ಕೋಟೆರ ಮುತ್ತಿಗೆರ ಪಡೆಲ್ ಚಾವಕಿಂಜ. ಅಯಿಂಗಕ್ ಗೊತ್ತುಂಡ್. ಆನಗುಂಡೆ ಅವು ಅಯಿಂಗಡ ಪುಡಾತಕ್ ನಾಡ ಮಕ್ಕ ಪಿಳ್ವಾ ಪಣತನ ಮೋಸತ್ ಎಡ್‌ತವಾಂಗ್ ಮುಪ್ಪಡೆ ಕೊಡಗರ ತಕ್ಯನ ಪ್ರಸ್ತಾವ ಮಾಡುವಕ್ ಧೈರ್ಯ ಮಾಡ್‌ಲೆ"ಂದ್ ಕೂತ್ ಕೊಡತತ್.

ಅಲ್ಲಿಂಜ ಟಿಪ್ಪು, "ಕಾರ್ನ್‌ವಾಲೀಸ್‌ಕ್ ಕೊಡಗರ ದೊರೆರ ಕೂಡೆ ಸಿನೇತಿಕೆ ಬೆಚ್ಚವಂಡೂಂದ್ ಎಳ್ವಿತುಳ್ಳಿರ. ಅದೇಪೋಲೆ ನಿಂಗ ಇಕ್ಕ ನಂಬಿಕೆರ ತಕ್ಯತಂದಿತ್ ನಂಗಡ ಸರ್ಕಾರತಾರ ಸಿನೇತಿಕೆ ಬೆಚ್ಚವಿರ. ಇನ್ನನಿಪ್ಪಕ ಇಂಗ್ಲೀಷ್ ಸರ್ಕಾರಕೂ ಪಿಳ್ವಾ ನಂಗಕೂ ಸಿನೇತಿಕೆ ಬೆಚ್ಚವಿರ. ದಂಡೂ ಬರಿಕ್ ನಿಂಗ ಸಹಾಯ ಮಾಡುವಕಯ್ಯ. ಕೊಡಗರ ದೊರೆಯಳ ನಂಗ, ಅಯಿಂಗಡ ನಿಪ್ಪುರ ತಾಕತ್‌ಪೋಲೆ ನೋಟಿಯವ"ಂದ್ ಎಳ್ವಿತ್ ಅಯೆಚತ್.

ಟಿಪ್ಪುರ ಕಾಗದ ನೋಟಿತ್ ಚೆಡ್‌ಂಜಂಡ ಕಾರ್ನ್‌ವಾಲೀಸ್, "ಟಿಪ್ಪುಕ್ ಕೊಡಗರ ರಾಜಂಡ ಕೂಡೆ ಸಿನೇತಿಕೆ ಮಾಡುವಕ್ ಮನಸ್ಸಿಲ್ಲೆ. ಆನಗುಂಡ್ ಇಕ್ಕ ಕಂಪೆನಿ ಸರ್ಕಾರತಾರ ಕೂಡೆ ಅನ್ನನೆ ಇಪ್ಪದ್ ಸೆರಿಯಲ್ಲ. ಆನಗುಂಡ್ ಇಳ್ವೊ ಟಿಪ್ಪುರ ಕೂಡೆ ಪಡೆ ಪೊಕ್ಕತೆ ಬೋರೆ ಬಟ್ಟೆ ಇಲ್ಲೆ"ಂದ್ ಸುಲ್ತಾನಂಡ ವಕೀಲಂಡ ಕೂಡೆ ಎಣ್ಣೆತ್ ಅಯೆಚತ್. ಅನ್ನನೆ ಶ್ರೀರಂಗಪಟ್ಟ ಕೋಟೆರ ಮುತ್ತಿಗೆನ ಮುಂದರ್‌ಚಿಡುವಕ್, ತಾಂಡ ಸೈನ್ಯತಾರ ಫಿರಂಗಿನ ಕೊಡಿಕ್ ವಿತುವಕ್ ಸೈನ್ಯಾಧಿಕಾರಿಯಕ್ ಅಪ್ಪಣೆ ಕೊಡತತ್.

ಕಾರ್ನ್‌ವಾಲೀಸ್‌ರ ಪಡೆರ ತಯಾರಿನ ನೋಟಿತ್ ಟಿಪ್ಪುರ ವಕೀಲ ಅಂವಂಡಲ್ಲಿಕ್ ಬಂದಿತ್ "ಕೊಡಗರ ಮಹಾರಾಜಂಡ ಕೂಡೆ ಸಿನೇತಿಕೆ ಬೆಚ್ಚಂಡಕ ಮಿಳ್ವಾಕ್ ಎಲ್ಲಾ ಜನಕೂ ಸುಖ ನೆಮ್ಮದಿ ಕಟ್ಟುವ"ಂದ್ ಎಣ್ಣೆಚಿ.

ಅಕ್ಕ ಟಿಪ್ಪು ಈ ತಕ್ಯನ ಮನಸ್ಸಕ್ ಎಡ್‌ತಂಡ್ "ನಂಗ ಇಂಗ್ಲೀಷ್ ಕಂಪೆನಿ ಸರ್ಕಾರತಾರ ಕೂಡೆ ವಿರೋಧ ಬುಟ್ಟಿತ್ ಸಿನೇತಿಕೆಲ್ ಇಪ್ಪದ್ ನಲ್ಲದ್. ಇಳ್ವೊ ಮಿಳ್ವಾಕ್ ಕೊಡಗರ ದೊರೆರ ಮೀದೇ ಆಡ್, ತೆರಿರ ಮೀದೇ ಆಡ್, ಅಯಿಂಗಡ ರೈತಂಗಡ ಮೀದೇ ಆಡ್ ವಿರೋಧ ಕಳ್‌ಚಕ ಸರ್ಕಾರತಾರ ಕೂಡೆ ವಿರೋಧ ಮಾಡ್‌ನನ್ನೆ. ಎಲ್ಲಾ ತರತೂ

ಅಯಿಂಗ್‌ಕೂ, ನಂಗಕೂ ಸಿನೇತಿಗೆ ಅಲ್ಲತೆ ಬೋರೆ ತರ ಗೇನ ಮಾಡುವಕಯ್ಯ. ನಂಗಡ ಸರ್ಕಾರಕ್ 24 ಆಯಿರ ತಪ್ಪ ಇಂಜತ್. ಅದ್‌ನ ಇಂಗ್ಲೀಷ್ ಸರ್ಕಾರಕ್ ಎಡ್‌ತವಂಡು"ಂದ್ ಎಳ್ಳಿತ್ ಅದ್‌ಂಗ್ ಸೈನ್‌ಟಿಕ್ ರಾಜಮುದ್ರೆ ಎತ್ತಿತ್ ಕಾರ್ನ್ ವಾಲೀಸ್‌ಕ್ ಅಯೆಚತ್.

ವೀರರಾಜೇಂದ್ರ ಒಡೆಯ, "ಟಿಪ್ಪುಕ್ ಏದ್ ಪಣ ಕೊಡ್‌ಪ ಇಂಚ್‌ಲೆ. ಆಚೇಂಗಿ, ಟಿಪ್ಪು ಕೊಡಗ್ ರಾಜಂಡ ಮೀದೇತ ಪಗೆನುಂಡ್ ತಾಂಗ್ ಏದ್ ಪಣ ಕೊಡಗ್ ರಾಜನುಂಡ್ ಬರತೆ ಇಂಜಕೊ ಬಪ್ಪ"ಂದ್ ಎಣ್ಣೆಯಂಡ್ ಅವ ಅಚ್ಚಕ್ ಪಣತನ ಕಂಪೆನಿ ಸರ್ಕಾರಕ್ ಕಾಲೋದಿ ಕೊಡ್‌ಕಡ್. ಇಲ್ಲೇಂಗಿ ಕಂಪೆನಿ ಸರ್ಕಾರತ್‌ಂಜ ಆ ಕಾರಣಕ್ ವಿರೋಧ್ ಮಾಡಿತ್ ತಾಂಡ ಬರಿಕ್ ಬರಡ್‌ಂದ್ ಗೇನ ಮಾಡಿತ್ ಈ ಇಡ್‌ಕೆಟ್‌ನ ತಾಂಡ ಕಾಗದತ್ ಕೂಟಿತ್‌ಂದ್ ಕಾಂಬ. ಅಧಿಕಾರ ಪಿಳ್ಳಾ ಪಣತನ ಬಯಂದಂಡ್ ಇಂಜ ಬ್ರಿಟಿಷ್ ಅಧಿಕಾರಿಯಕ್ ಈ ಇಡ್‌ಕೆಟ್ ಪೇರ್ತ್ ಪತ್ಯ ಆಯಿರ್‌ತ್. ಅಲ್ಲಿಂಜ ಲಾರ್ಡ್‌ಕಾರ್ನ್ ವಾಲೀಸ್, ಟಿಪ್ಪು ಕೊಡಗ್ಗರ ಸುದ್ದಿಕ್ ಬಪ್ಪಲೆಂದ್ ಒಪ್ಪಿತ್ ಎಳ್ಳಿ ತಂದ ಕರಾರ್‌ನಾಮೆನ ಜ.ಅ. ಕ್ರಾಂಬಿಕೂ, ಕ.ಹ್ಯಾಟ್ಟಿಕೂ ಅರ್‌ಚಿಟ್ಪಿತ್. ಅನ್ನನೆ ಕೊಡಿಕ್ ಏತಿತಿಂಜ ಫಿರಂಗಿನ ಕೇದಕ್ ಉಳ್‌ಪಾಚಿ.

ಇದಾನಪಿಳ್ಳಾ ಬೋರೆ ಬೋರೆ ಬರಿಂಜ ಬಂದಿತಿಂಜ ಬ್ರಿಟಿಷ್ ಸೈನ್ಯಾಧಿಕಾರಿಯ ತಂಗ, ತಂಗಡ ಸೈನ್ಯತನ ಎಡ್‌ತಂಡ್ ತಂಗಡ ಜಾಗಕ್ ಪೊರ್‌ಟತ್. ಜ.ಅ.ಕ್ರಾಂಬಿ ತಾನ್ ಶ್ರೀರಂಗ ಪಟ್ಟತಂಜ ಪೊರ್‌ಡುವಕ ವೀರ ರಾಜೇಂದ್ರ ಒಡೆಯಂಗ್ ಟಿಪ್ಪುಕೂ, ಇಂಗ್ಲೀಷ್ ಸರ್ಕಾರಕೂ ಪಡೆ ಎಣ್ಣುವ ತಿತ್ ಕತ್ತುವನ್ನಕೆ ಇಂಜದ್ ಇಕ್ಕ ಕಮ್ಮಿ ಆಯಿತ್. ಆನಗುಂಡ್ ಟಿಪ್ಪು ತಂಗಡ ಮೀದ ಪಗೆ ಕಾಟಲೆ. ತಂಗಡ ಜನಡ ಕೂಡೆ ಕೊಡಗ್‌ಸೀಮೆಕ್ ನಂಗ ಸೈನ್ಯತೋಡೆ ಪೊರ್‌ಟಿತ್ ಮುಂಬೈಕ್ ಪೋಪಕ ಬಪ್ಪ. ಅಲ್ಲಿಂಜ ನಂಗ ಕಂಡಕ ಕರಾರ್ ನಿರ್ಕ್ ಆನ ವಿವರತನ ನಿಂಗಕ್ ಅರಿಚಿಡುವಂದ್ ಕಾಗದ ಎಳ್ಳಿಚಿಟ್ಪಿತ್ ವೀರರಾಜೇಂದ್ರ ಒಡೆಯ ಅಕ್ಕ ಇಂಜ ಐಗೂರ್ ಸೀಮೆರ ಮೂಲಕ ಅರಕೆರೆಕ್ ಅಯೆಚತ್.

ಅಲ್ಲಿಂಜ ವೀರರಾಜೇಂದ್ರ ರಾಣ್ಯತ್ ಇಂಜ ನಗರಹಳ್ಳಿ ಪುಟ್ಟಿಗೌಡ, ಮಂಡೇಪಂಡ ಅಪ್ಪಯ್ಯನ ಅಲ್ಲಿಯೆ ಆಕಿತ್, ತಾನ್ ಕೂಟಿಯಂಡ್ ಬಂದಿತಿಂಜ ಕೊಡಗ್ಗರ ಜನಳ ಕಾಕಿಯಂಡ್ ಕೊಡಗ್‌ಕ್ ಬಂದಿತ್ ನಾಲ್ವಾಡ್ ಅರಮನೆಕ್ ಪೋಯಿತ್ ಅಲ್ಲಿಯೆ ಇಂಜತ್.

## ವೀರರಾಜೇಂದ್ರ ಒಡೆಯಂಗ್ ಮೈಸೂರ್ ಪಡೆರ ಆಖೀರಕ್ ಅಸಮಧಾನ

ಜ.ಸರ್ ರಾಬರ್ಟ್ ಅಬರ್ ಕ್ರಾಂಬಿ ಶ್ರೀರಂಗಪಟ್ಟಣ್ಣತರ ಒಪ್ಪಂದ ಪೂರ್ತಿ ತೀರ್ಮಾನ ಆನಪಿಳ್ಳಾ ಅಲ್ಲಿಂಜ ಪೂರ್ತಿ 1792ನೆ ಇಸವಿ ಏಪ್ರಿಲ್ ತಿಂಗತ್ ಕೊಡಗಕ್ ಬಂದಿತ್ ಪೆಗ್ಗಳ ಪರಂಬಾಲ್ ಇಳಾಂಜತ್. ಈ ಸುದ್ದಿನ ಅರ್ಂಬ ವೀರರಾಜೇಂದ್ರ ನಾಲ್ವಾಡ್ ಅರಮನೆಂಜ ಪೂರ್ತಿ ಬಂದಿತ್ ಕ್ರಾಂಬಿನ ಕಂಡತ್. ಅಕ್ಕ ಕ್ರಾಂಬಿ, "ಟಿಪ್ಪು ತಂಗಡ ಮೀದ ವಿರೋಧ ಕಾಟುವಕಿಲ್ಲೆ. ಆನಗುಂಡ್ ನಿಂಗಳೂ ಅಯಿಂಗಡ ಕೂಡ ವಿರೋಧ ಕಾಟುವಕಯ್ಯ. ಇಕ್ಕ ಟಿಪ್ಪುರ ಚೆನ್ನಂಗ್ ಸೀಮೆನ ನಿಂಗ ಕೂಟಿಯಂಡ್ ಉಳ್ಳಾನ ಬುಟ್ಟ್ ಕೊಡ್ತಿತ್, ತೆರಿನ ಬಂದೋಬಸ್ತ್ ಮಾಡಿಯಂಡ್, ಟಿಪ್ಪುಕ್ ಕೊಡ್ಪ ಇಂಜ 24 ಆಯಿರ ಉರ್ಪಿಯತ್ ಕಾಲೋದಿ ಇಂಗ್ಲೀಷ್ ಕಂಪೆನಿ ಸರ್ಕಾರಕ್ ಕೊಡ್ಕೊಂಡು"ಂದ್ ಎಣ್ಣೆಚಿ.

ಇದಾಂಗ್ ವೀರರಾಜೇಂದ್ರ "ಟಿಪ್ಪು ಈ ಪಣತ್ ನಂಗಡ ಬರಿಂಜ ಎಡ್ತಂಡಿತ್ತಿಲ್ಲೆ. ಅಯಿಂಗಡ ತಕ್ಕಾರ ಪೋಲೆ ಈ ಪಣ ಕಂಪೆನಿ ಸರ್ಕಾರಕ್ ಕೊಡ್ಪಕೂ ಇಲ್ಲೆ. ಇಕ್ಕ ನಂಗ ಕೆಟ್ಟಿಯಂಡ ಸೀಮೆನ ಟಿಪ್ಪುಕ್ ಬುಟ್ಟ್ ಕೊಡ್ಪಕೂ ಇಲ್ಲೆ"ಂದ್ ಜ.ಅ.ಕ್ರಾಂಬಿಕ್ ಎಣ್ಣೆಚಿ.

ಈ ತಕ್ಕನ ಕೇಟ ಕ್ರಾಂಬಿ ಬೇಜಾರಪಟ್ಟಂಡತ್. ಅಲ್ಲಿಂಜ ಚೆನ್ನಂಗ್ ದಿನತ್ ಎಣ್ಣೆಕ 1792ನೆ ಇಸವಿ ಏಪ್ರಿಲ್ ತಿಂಗತ್ ಜ.ಅ.ಕ್ರಾಂಬಿ ತಾಂಡ ಸೈನ್ಯತೋಡೆ ತಲಚೇರಿಕ್ ಪೋಚಿ.

ಅಲ್ಲಿಂಜ ವೀರರಾಜೇಂದ್ರ ಐಗೂರ್ ಸೀಮೆಲ್ ಇಂಜ ತಾಂಡ ಠಾಣ್ಯತರ ಜನಳ ವಾಪಾಸ್ ಕಾಕ್ ಚಿಟ್ಟಂಡ್ ಆ ಸೀಮೆನ ಸುಲ್ತಾನಂಗೆ ಬುಟ್ಟ್ ಕೊಡ್ತತ್. ಆ ಭಾಗತರ ತೆರಿಲ್ ಪಾರಕಾರಳ ಆಕಿತ್ ಭದ್ರ ಪಡ್ತಿತ್. ಈಂಡೆಡೆಲ್ ಅವ ನಾಲ್ವಾಡ್ ಅರಮನೆಕ್ ಬಾತ್.

ಅದೇ ಕಾಲ ಜೂನ್ ತಿಂಗತ್ ಟಿಪ್ಪುರ ಶಿಪಾದಾರ ಲಂಗಡಾ ದಾಡಿ ಸೇಖಾಯಿಮಾಮು ಎಣ್ಣೆವಂವ ದ.ಕನ್ನಡ ಜಿಲ್ಲೆಲ್ ಸುಲ್ತಾನಂಡ ಸೀಮೆತೆರಿಲ್ ಸೈನ್ಯ ಬೆಚ್ಚಂಡ್, ಭದ್ರ ಪಡ್ತಿಯಂಡ್ "ಪಂಜ, ಬೆಳ್ಳಾರೆ, ಮಾಗಣೆ ನಾಡ್ ಖಾವಂದರ್ ಟಿಪ್ಪುರ ಸೀಮೆಕ್ ಕೊಡ್ನದ್. ಆನಗುಂಡ್ ಬುಟ್ಟ್ ಕೊಡ್ಕೊಂಡೂ"ಂದ್ ಕೊಡಗರ ರಾಜಂಗ್ ಎಣ್ಣೆತ್ ಅಯೆಚಿತ್.



ಅದ್ವಾಂಗ್ ವೀರರಾಜೇಂದ್ರ, "ಟಿಪ್ಪುರ ಅಪ್ಪ ನವಾಬ್ ಹೈದರಲ್ಲಿ ಖಾನ್‌ರ ಸಿನೇತಿಕೆನುಂಡ್ ತೋರಣ ಕೆಟ್ಟಿತ್ ಕೊಡಗರ ರಾಜಂಗಕೆತ್ತನೆ ಬುಟ್ಟಿತ್. ಅಯಿಂಗಡ ಮೋಂವ ಟಿಪ್ಪು ಸುಲ್ತಾನ ಇಕ್ಕ ಕೇಪದ್ ಸೆರಿಯಲ್ಲ"ಂದ್ ಜವಾಬ್ ಎಣ್ಣಿತ್ ಅಯೆಚತ್.

ಈ ತಕ್ಕಕ್ ಸೇಖ್ ಯಿಮಾಮನಾಬ "ಹೈದರಲ್ಲಿ ಖಾನ್‌ಕ್ ಕೊಡಗರ ದೊರೆಯ ಸಿನೇತಂಗ. ಆಚೇಂಗಿ, ಇಕ್ಕ ಟಿಪ್ಪು ಸುಲ್ತಾನಂಗ್ ಶತ್ರು ಆಯಿಟಿತ್. ಇನ್ನನಿಪ್ಪಕ ಈ ಸೀಮೆನ ನಿಂಗಕ್ ಬುಟ್ಟ್ ಕೊಡಪಾನಗುಂಡ್ ಎಂತ ಪ್ರಯೋಜನ?"ಂದ್ ಕೇಟಿತ್.

ಇದ್ವಾಂಗ್ ವೀರರಾಜೇಂದ್ರ, "ಹೈದರಾಲಿ ಖಾನ್ ಕೊಡತಾನ ಅವಂಡ ಮೋಂವ ಟಿಪ್ಪು ಕೇಟಕ ಬುಟ್ಟ್ ಕೊಡಪದ್ ನೇರ್"ಂದ್ ಅರ್ಂಜಿತ್ ಆ ಪಂಜ, ಬೆಳ್ಳಾರೆ, ಮಾಗಣೆನ ಸುಲ್ತಾನಂಡ ಅಧಿಕಾರಿಯಕ್ ಬುಟ್ಟ್ ಕೊಡತಿತ್ ಅಲ್ಲಿ ಇಂಜ ತಾಣ್ತಾತ್ ಜನಳ ವಾಪಾಸ್ ಕಾಕ್‌ಚಿಟ್ಟಂಡತ್.

ಆಚೇಂಗಿ, ಈ ಮಾಗಣೆನ ಬುಟ್ಟ್ ಕೊಡತಾನಗುಂಡ್ ಸುಲ್ತಾನಂಗ್ ಆಡ್, ಅಧಿಕಾರಿಯಕೆ ಆಡ್ ತೃಪ್ತಿ ಆಯಿಲೆ. "ಈ ಮಾಗಣೆ ಕೊಟ್ಟನನ್ನಕೆ ಸೇಖ್‌ಯಿಮಾಮ ಅದತ್ ತಾಂಡ ಸೈನ್ಯ ತಾಣ್ತಾನ್ ಬೆಚ್ಚಂಡ್ ಭದ್ರಪಡ್ತಿಯಂಡ್ ತಿರಿತ್ ಅಮರಸುಳ್ಳ ಮಾಗಣೆ ನಂಗಕ್ ಬರೊಂಡು. ಅದ್ವಾಂಗ್ ಬುಟ್ಟಿ ತಾರಿ"ಂದ್ ವೀರರಾಜೇಂದ್ರನ ಕಾಗದ ಎಣ್ಣಿತ್ ಕೇಟಿತ್.

ಅಕ್ಕ ಒಡೆಯ "ಈ ದಂಡ್ ಮಾಗಣೆ ನಂಗಡ ಕೊಡಗರ ಸಂಸ್ಥಾನಕ್ ಕೊಡ್‌ನದ್. ನಿಂಗಕ್ ಕೊಡುಲೆ. ಈಂಡ ಸುದ್ದಿಕ್ ಬರತಿ. ಇದ್ ನಿಂಗಕ್ ಸೆರಿಯಾಪುಲೆ"ಂದ್ ಮಾಗಣೆ ಅಮಲ್ದಾರಂಡ ಮೂಲಕ ಶೇಖ್‌ಯಿಮಾಮಂಗ್ ಎಣ್ಣಿತ್ ಅಯೆಚತ್.

ಇಚ್ಚಕೆ ಅಲ್ಲತೆ ಟಿಪ್ಪುನುಂಡ್ ಪಂಡ್ ಪಡೆಲ್ ಪಡ್‌ಂದ ಮಲಯಾಳ ರಾಜ್ಯತ್‌ರ ಕಮಿಷನ್‌ರ್ ವಿಲಿಯಂ ಪಾಮರ್ ಪಿಞ್ನ ಸೈನ್ಯಾಧಿಕಾರಿ ಮೇ. ಅಲೆಕ್ಸಾಂಡರ್ ಡೋ ಸಾಹೇಬಂಗ್ "ಟಿಪ್ಪು ಸುಲ್ತಾನಂಡ ಚೆನ್ನಂಗ್ ಸೀಮೆನ ನಂಗಡ ಪುಡ್‌ತತ್ ಬೆಚ್ಚಂಡ್ ಉಳ್ಳಾನ ಅಯಿಂಗಕೆ ಬುಟ್ಟ್ ಕೊಡತಿತ್ ನಿಂಗಡ ತೆರಿನ ಭದ್ರ ಪಡ್‌ತಿಯೋಳಿ"ಂದ್ ಜ. ಕ್ರಾಂಬಿ ಅಂದೇ ಎಣ್ಣಿನಾಂಗ್ ಅದೇ ಪೋಲೆ ನಂಗ ಇಕ್ಕ ಬೆಚ್ಚಂಡ ಅಯಿಂಗಡ ಸೀಮೆನ ಅಯಿಂಗಕೆ ಬುಟ್ಟ್ ಕೊಡತಿತ್ ನಂಗಡ ತೆರಿನ ಭದ್ರ ಪಡ್‌ತಿಯಂಡ್ ಉಂಡ್. ಇನ್ನನಿಪ್ಪಕ ಇಕ್ಕೇರಿ ಕಾಲತ್‌ಂಜ ನಂಗಡ ಸಂಸ್ಥಾನಕ್ ಸೇರ್‌ನ ಅಮರ ಸುಳ್ಳ ಮಾಗಣೆ ನಂಗಕೆ ಕೊಡುವ. ಇದ್ವಾಂಗ್ ಬುಟ್ಟಿ ತರೊಂಡೊಂದ್ ಟಿಪ್ಪು ಇಕ್ಕ ಕೇಟಂಡ್ ಉಂಡ್. ನಂಗ ಬುಡುಲೆ. ಇದ್ ನಂಗಡದೆ ಎಣ್ಣಿವಾಂಗ್ ತಲಚೇರಿಲ್ ದುಂಬ ದಿನ ಬಾಳಿ ಬದ್‌ಕಾನ್ ಬಯತ್‌ಪಟ್ಟಿಪು ಉಂಡ್. ಅನ್ನತಯಿಂಗಳ ಕೇಟಕ ಸತ್ಯ ಗೊತ್ತಾಪ"ಂದ್

1792ಲ್ ಎಳ್ವಿತ್ ಅಯೆಚತ್.

ಈಂಡೆಡಲ್ ಸೇಖ್ ಯಿಮಾಮ, ವೀರರಾಜೇಂದ್ರ ತಾಂಡ ಅಮಲ್ವಾರಂಡ ಕೂಡೆ ಅಮರ ಸುಳ್ಳು ಮಾಗಣೆ ಸುಲ್ತಾನಂಗ್ ಸೇರ್‌ನದಲ್ಲಂದ್ ಅಂವಂಗ್ ಎಣ್ಣೆತ್ ಅಯೆಚಕೋ ಅದ್‌ನ ಕೇಕತ ತಾಂಡ ಸೈನ್ಯ ಎಡ್‌ತಂಡ್ ಅತಿಕ್ರಮಣೆ ಮಾಡಿಯಂಡ್ ಬಂದಿತ್ ಅಮರಸುಳ್ಳು ಮಾಗಣೆರ ತೆರಿಲ್ ರಾಣ್ಯ ಇಟ್ಟುಂಡಿತಿಂಜ ಕೊಡಗುರ ರಾಜಂಡ ಜನಳ ಪೊಜ್ಜಿತ್ ಆ ಮಾಗಣೆರ ಒಳ್‌ಕ್ ನುಗ್ಗಿತ್ ಲೂಟಿ ಮಾಡಿಯಂಡ್ ರೈತಂಗಳ ಪುಡ್‌ಚಿತ್ ತಂಗಕ್ ವಿರೋಧ ಮಾಡ್‌ನಯಿಂಗಡಾತ್ ಚೆನ್ನಂಗ್ ಜನಡ ಕೈ, ಕಾಲ್‌ನ ಕೆತ್ತಿತ್, ಚೆನ್ನಂಗಾಳಾನ್ ತೂಕಿತ್ ಹಿಂಸೆ ಕೊಡ್‌ತಂಡ್ ಇಂಜತ್.

ಇನ್ನನೆ ವೀರರಾಜೇಂದ್ರ ಸೇಕ್‌ಯಿಮಾಮ ಅಮರ ಸುಳ್ಳುತ್‌ರ ತಾಂಡ ಪ್ರಜೆಯಡ ಮೀದ ನಡ್‌ತುವ ಇಂಜ ಹಿಂಸೆನ ಅರ್‌ಂಜಿತ್ ತಾಂಡ ಅಮಲ್ವಾರಕ್ ಅಲ್ಲಿ ಉಳ್ಳ ರೈತಂಗಳೂ, ರಾಣ್ಯಕಾರಕೂ ಏದೇ ಓರ್ ತೊಂದರೆ ಆಕತನ್ನೆ ನೋಟಿಯೋಳಿಂದ್ ಅಪ್ಪಣೆ ಕೊಡ್‌ತತ್.

ಅಕ್ಕಣೆಕ್ ಬಂಗಾಳತ್‌ಂಜ ಲಾರ್ಡ್‌ಕಾರ್ನ್‌ ವಾಲೀಸ್, ವೀರರಾಜೇಂದ್ರ ಒಡೆಯಂಗ್ ಅಂವಂಗ್, ಟಿಪ್ಪುಕ್ ಇಂಜ ಸೀಮೆ ತೆರಿರ ಮೀದ ಇಂಜ ವಿವಾದತ್‌ರ ಮೀದ ಎಳ್ವೆಚಿ.

"ಟಿಪ್ಪು ಸುಲ್ತಾನಂಡ ವಕೀಲಂಗ ನಂಗಡ ಕೂಡೆ ಇಪ್ಪು. ಅವು ಎಣ್ಣೆನಪೋಲೆ ನಿಂಗಡ ತಾಲೋಕ್‌ಕೂ, ಟಿಪ್ಪುರ ತಾಲೋಕ್‌ಕೂ ತೆರಿ ಉಂಡ್. ಇಲ್ಲಿ ನಿಂಗಡ ತಾಲೋಕ್‌ರ ಜನ ತೆರಿಲ್ ಇಂಜಂಡ್ ಟಿಪ್ಪುರ ಸೀಮೆಕ್ ನುಗ್ಗಿತ್ ಲೂಟಿ ಮಾಡೊಂಡೊಂದ್ ಉಂಡ್. ಇದ್‌ನ ಕೇಟಿತ್ ನಂಗಡ ಮನಸ್ಸಲ್, ನಿಂಗಡ ಬರಿಂಜ ಲೂಟಿ ಮಾಡುವಕ್ ಬುಡುಲೆಂದ್ ಉಂಡ್. ಆನಕೊ ನಿಂಗಡ ಅರಿವಿಕೆಕ್ ನಂಗ ಓರ್ ಅರ್ಜಿನ ಅಯೆಚಿತ್. ಇಕ್ಕ ಟಿಪ್ಪುಕೂ, ಕಂಪೆನಿ ಸರ್ಕಾರಕೂ ಸಿನೇತಿಕೆರ ಒಪ್ಪಂದ ಆಯಿತ್. ಇನ್ನನಿಪ್ಪಕ ಲೂಟಿ ಮಾಡುವದ್ ಸೆರಿಯಲ್ಲ. ಆನಗುಂಡ್ ಪುದಿಯ ಜಗಳಕ್ ಮೊಳಿ ಆಕತನ್ನೆ ನೋಟಿಯವಂಡು. ಜನಕ್ ಈಂಡ ಮೀದ ಅರಿವಿಕೆ ಕೊಡ್‌ತಿತ್ ಮಿಞ್ಲಾಕ್ ಜಗಳ ಆಕತನ್ನೆ ನೋಟಿಯವಂಡೂ"ಂದ್ ಇಂಜತ್. ಇನ್ನತ ಅರ್ಜಿನ ಪಿರಿಯಾಪಟ್ಟಿ, ತೆರಕಣಾಂಬಿ ಬೇಲೂರ್ ಪಿಞ್ಲಾ ಮಂಜರಾಬಾದ್‌ರ ಅಮಲ್ವಾರಂಗ ಟಿಪ್ಪುಕ್ ಎಳ್ವಿತಿಂಜತ್.

ಲಾರ್ಡ್‌ಕಾರ್ನ್‌ ವಾಲೀಸ್, ಟಿಪ್ಪುರ ವಕೀಲಂಗ ಕೊಡಗುರ ರಾಜಂಡ ಮೀದ ಕೊಡ್‌ತ ದೂರ್‌ರ ಪೋಲೆ ವೀರರಾಜೇಂದ್ರ ಎಳ್ವೆನ ಕಾಗದಕ್ ಜವಾಬ್ ಅಯೆಚತ್.

ಅದತ್ "ಟಿಪ್ಪು ಸುಲ್ತಾನ ನಂಗಡ ರಾಜ್ಯಕ್ ಪೇರ್ತ್ ತೊಂದರೆ ತಂದದೆ ಅಲ್ಲತೆ ನಂಗಡ ರಾಜ್ಯತ್‌ಂಜ ಓರ್ ಲಕ್ಷ ಪನ್ನಂದ್ ಆಯಿರ ರೈತಂಗಳ ಪುಡ್‌ಚೆಂಡ್ ಪೋಯಿತ್ ದುಂಬಾ ಉಪದ್ರ ಮಾಡಿತ್. ಆನಗುಂಡ್ ನಂಗಳೂ ಅಯಿಂಗಕ್ ತೊಂದರೆ ಕೊಡ್‌ಪ

ಕೊಡುಚಿ. ಅಕ್ಕಣೆ ಇಂಗ್ಲೀಷ್ ಸರ್ಕಾರಕೂ, ಟಿಪ್ಪುರ ಸರ್ಕಾರಕೂ ಸಿನೇತಿಕೆರ ಒಪ್ಪಂದ ಆಯಿತ್ ಗ.ಮೇ.ಜ.ರಾಬರ್ಟ್ ಕ್ರಾಂಬಿ ಮುಂಬೈಕ್ ಪೋಪಕ ಕೊಡಗುಕ್ ಬಾತ್. ಅಕ್ಕ ಅಪ್ಪ ಇಂಗ್ಲಿಷ್ ಮಿಂಗ್ಲಿಕ್ ಟಿಪ್ಪು ನಿಂಗಡ ತೊಂದರೆಕ್ ಬಪ್ಪುಲೆ. ಆನಗುಂಡ್ ನಿಂಗಲೊ ಅಯಿಂಗಡ ಸುದ್ದಿಕ್ ಪೋಕತಿ. ಅಯಿಂಗಡ ಜಾಗತನ ಬುಟ್ಟ್ ಕೊಡುತಿತ್ ಅಲ್ಲಿ ಉಳ್ಳ ಜನಳ ನಿಂಗಡ ಜಾಗಕ್ ಕೂಟಿಯಂಡ್ ಬಂದಿತ್ ಆಕಿಯವಂಡೂಂದ್ ಎಣ್ಣೊನಾಂಗ್ ಆ ಪೋಲೆ ನಂಗ ಇಂದಿಕ್ಕ ಐಗೂರ್ ಸೀಮೆನ ಬುಟ್ಟ್ ಕೊಡುತಿತ್ ನಂಗಡ ಜಾಗಕ್ ಬಂದಿತ್ ನೆಲೆ ನಿಂದಿತ್. ಆಚೇಂಗಿ, ಇಕ್ಕ ಟಿಪ್ಪುರ ಕಡೆಕಾರ ಅಯಿಂಗಡ ತೆರಿ ಕಡೊಂದಿತ್ ಅಮರಸುಳ್ಳ ಮಾಗಣೆನ ಅಯಿಂಗಕ್ ಬುಟ್ಟ್ ಕೊಡುಕೊಂಡೂಂದ್ ಕೇಟಂಡ್ ಉಂಡ್. ಇದೊಂಗ್ ನಂಗ ಒತ್ತವತಾಂಗ್ ಅಪ್ಪ ನಂಗಡ ಜನಕ್ ಪೊಜ್ಜಿತ್, ಪುಡುಚಿತ್, ಚೆನ್ನಂಗಾಳುರ ಕೈ, ಕಾಲನ ಕೆತ್ತನದೆ ಅಲ್ಲತೆ ತೂಕಿತ್ ಹಿಂಸೆ ಕೊಡುತಿತ್.

ಆನಗುಂಡ್ ನಾಳೆಕ್ ಇಂಗ್ಲೀಷ್ ಸರ್ಕಾರ ವಿಚಾರಣೆ ಮಾಡುವಕ, ಅಪ್ಪ ತೆರಿ ದಾಟಿತ್ ಬಂದಿತುಳ್ಳಾಂಗ್ ನಿಂಗ ಅಯಿಂಗಕ್ ತೊಂದರೆ ಮಾಡತಿ. ಅಪ್ಪ ಬಂದನ್ನೆಗೆ ನಿಂಗ ಚೆನ್ನಂಗ್ ಸಮಯ ಮುಂಡತೆ ಇರಿಂದ್ ಎಣ್ಣೊನಾಂಗ್ ನಂಗ ಅನ್ನನೆ ಇಂಜತ್. ಕ್ರಮೇಣ ಅಪ್ಪ ಅದ್ ನಂಗಕ್ ಕೂಡುನದೊಂದ್ ಎಣ್ಣೆಯಂಡ್ ಉಂಡ್. ಇದ್ ಏದ್ ನ್ಯಾಯ? ಅಮರಸುಳ್ಳ ಮಾಗಣೆ ಇಕ್ಕೇರಿಕ್ ಕೂಡುನದಾ ಕೊಡಗುಕ್ ಕೂಡುನದೊಂದ್ ಚರ್ಚೆ ಆನಲ್ಲಿ ಕೊಡಗುಕ್ ಕೂಡುನದೊಂದ್ ತೀರ್ಮಾನ ಆಯಿತ್. ಆಚೇಂಗೂ ಟಿಪ್ಪು ತಕರಾರ್ ಮಾಡಿಯಂಡ್ ಉಂಡ್. ಆನಗುಂಡ್ ಈ ವಿಚಾರತನ ನಿಂಗ ಪರಿಹಾರ ಮಾಡಿತಂದಕ ನಿಂಗಕ್ ಪೇರ್ತ್ ಉಪಕಾರ ಆಕುಂದ್ ವೀರರಾಜೇಂದ್ರ, ಲಾರ್ಡ್ ಕಾರ್ನವಾಲೀಸ್‌ಕ್ ಕಾಗದ ಎಳ್ಳಿತ್ ಅಯೆಚಾನ ಮುಂಬೈ ಗರ್ವನರ್ ಜನರಲ್ ಅಬರ್ ಕ್ರಾಂಬಿಕೂ ಅಯೆಚತ್.

ಈ ದಂಡ್ ಕಾಗದೆ ಅಲ್ಲತೆ ಅಮರಸುಳ್ಳ ಮಾಗಣೆಕ್ ಟಿಪ್ಪುರ ಕಡೆಕಾರ ನುಗ್ಗಿಯಂಡ್ ಗಲಾಟೆ ಮಾಡುವಾಂದ್ ಮಲಬಾರ್ ಕಮಿಷನರ್ ವಿಲಿಯಂ ಪಾಮರ್ ಪಿಲ್ಲಾ ಮೇಜರ್ ಅಲೆಗ್ಸಾಂಡರ್ ಡೋಕೂ ಅಯೆಚತ್.

ಈ ಕಾಗದಕ್ ಮಲಬಾರ್ ಆ ದಂಡ್ ಕಂಪೆನಿ ಸರ್ಕಾರತರ್ ಚಾಕ್ರಿಕಾರ ಜವಾಬ್ ಅಯೆಚಪೋಲೆ ವೀರರಾಜೇಂದ್ರ ಒಡೆಯ, ಅಮರಸುಳ್ಳ ಮಾಗಣೆರ ತೆರಿನ ಭದ್ರ ಪಡುತಿಯಂಡ್ ಇಂಜತ್.

## ವೀರರಾಜೇಂದ್ರ ಪೇಟೆರ ಸ್ಥಾಪನೆ

1791ನೆ ಇಸವಿ ಮೇ ತಿಂಗಳ್ ವೀರರಾಜೇಂದ್ರ ಒಡೆಯ, ಜ.ಸರ್ ರಾಬರ್ಟ್ ಅಬರ್ ಕ್ರಾಂಬಿನ ಕೊಡಗಲ್ ಆದ್ಯ ಕುರಿ ಕಂಡ ಜಾಗತ್ ಓರ್ ಪಟ್ಟಣ ಕಟ್ಟೊಂಡೊಂದ್ ತೀರ್ಮಾನ ಮಾಡಿತಿಂಜತ್. ಸುಲ್ತಾನಂಡ ಕೂಡೆ ಬ್ರಿಟಿಷ ಪೋರಾಡ್‌ನ ಪಡೆ ತ್ತೇಂದನ್ನಕೆ ಇದ್‌ನ ಕಾರ್ಯ ರೂಪಕ್ ಕೊಂಡ ಬಾತ್.

ರಾಜ, ಕ್ರಾಂಬಿನ ಕಂಡಿತ್ ತಕ್ಕ್ ಪರಂದಪಿಳ್ಳಾ ಬೋಟೋಳಿ, ಮಗ್ಗುಲ ಊರಾರ ಎತ್ತರತರ ಪರಂಬಲ್ ರಾಜ ಏರ ಕ್ರಯತರ ಕಿನಕಾಪ್‌ರ ಬಟ್ಟೆಲ್ ಮಾಡ್‌ನ ಬಟ್ಟೆಲ್ ಡೇರೆ ಇಟ್ಟಿತಿಂಜತ್. ಇದ್‌ಂಡ ಒಳ್‌ಲ್ ರಾಜ ಪಿಳ್ಳಾ ಕ್ರಾಂಬಿ ಅಳ್‌ತಂಡ್ ತಂಗಡ ಒಳ್‌ಲ್ ಆನ ಒಪ್ಪಂದತರ ಮೀದ ಚರ್ಚೆ ಮಾಡ್‌ಚಿ. ಆ ಜಾಗತೆ ಪೇಟೆ ಕಟ್ಟುವಾಂಡ ಆದ್ಯತ ಗುರತಾಯಿತ್ ಅರಮನೆ ಪಿಳ್ಳಾ ಅದ್‌ಂಡ ಸುತ್ತೂ ಕೋಟೆ ಕಟ್ಟುವಕ್ ಪರಿಧಾವಿ ಸಂವತ್ಸರ ವೈಶಾಖ ಮಾಸತ್ ಎಣ್ಣಕ 1792ನೆ ಇಸವಿ ಮೇ ತಿಂಗಳ್ ಅಪ್ಪಣೆ ಮಾಡ್‌ಚಿ.

ವೀರರಾಜೇಂದ್ರ ಅರಮನೆ ಕೆಟ್ಟಚಿಟ್ಟಿ ಜಾಗ ಇಕ್ಕ ಪ್ರವಾಸಿ ಮಂದಿರ ಉಳ್ಳ ಜಾಗ ಆಯಿತಿಂಜತ್. ಪ್ರವಾಸಿ ಮಂದಿರತರ ಬೆಂಬರಿಲ್ ಉಳ್ಳ ಚೆನ್ನಂಗ್ ಎತ್ತರತರ ಸಮತಟ್ಟ್ ಜಾಗತ್ ಅರಮನೆ ಇಂಜತ್‌ಂದ್ ಕಾಂಬ. ರಾಜಂಡ ಈ ಅರಮನೆಯ ಎದಿಕೆ ಓರ್ ಚೆರಿಯ ಪಡಿ ಪಿಳ್ಳಾ ಸುತ್ತೂ ಇಟ್ಟಿಗಿಂಜ ಕೋಟೆರ ಕೆಂವ ಕೆಟ್ಟಚಿಟ್ಟಿತ್. ಈ ಕೋಟೆ ಕೆಂವ ಮಡಿಕೇರಿ ಅರಮನೆ ಸುತ್ತೂ ಉಳ್ಳ ಕೆಂವತರಚ್ಚಕ್ ಎತ್ತರ, ಪೈಲ್ ಇಂಜಲ್. ಈ ಅರಮನೆಯ ಎದಿಕೆತ ಪಡಿ ಇಕ್ಕಲೂ ಉಂಡ್. ಆಚೇಂಗಿ ಬರಿಲ್ ಪಂಡೇತ ಕಾಲತ್ ಚಾವಡಿಕಾರಂಗ ತೋಕ್ ಪುಡ್‌ಚಂಡ್ ನಿಂದಂಡ್ ಪಾರ ಕಾಪ ಇಂಜ ಉರ್ಟ್ ಆಕಾರತರ, ಕೊಡಿಲ್ ಮುಚ್ಚಿತುಳ್ಳ ಇಟ್ಟಿಗೆ ಗಾರೆನುಂಡ್ ಮಾಡ್‌ನ ಗೂಡ್‌ನ ಚೆನ್ನಂಗ್ ಕಾಲಕ್ ಬಯ್ಯ ಮುಚ್ಚಿತ್. ಕೋಟೆ ಕೆಂವತರ ಚೆನ್ನಂಗ್ ಭಾಗ ಇಕ್ಕಲೂ ಅಲ್ಲಿ ಕಂಡ್‌ಬಪ್ಪ. ಈ ಅರಮನೆಯ ಬೆಂಬರಿಲ್ ಚೆನ್ನಂಗ್ ಕಾಲಕ್ ಬಯ್ಯಕೆತ್ತನೆ ತೋಕ್ ಪಿಳ್ಳಾ ಫಿರಂಗಿಕ್ ದುಂಬ್‌ಚಿಡುವ ಮದ್ದಾನ ಬೆಪ್ಪ ಓರ್ ಭದ್ರವಾನ ಚೆರಿಯ ಕಟ್ಟಡ ಇಂಜತ್.

ಈ ಅರಮನೆ ಕುಂದ್‌ರ ಎಡ್‌ತೆ ಬರಿಯ ತಗ್ಗಲ್ ಎಣ್ಣಕ ಮೂರ್ನಾಡ್ ಮಡಿಕೇರಿ ರಸ್ತೆರ ಬಲತ ಬರಿಯತ ತಗ್ಗಲ್ ಅರಮನೆಕ್ ಸೆರಿಯಾಯಿತ್ ಕ್ಕೇದಕ್ ವೀರರಾಜೇಂದ್ರ ಓರ್ ಚೆರಿಯ ಕೂವ, ಕಣತರೆನ ಎಡ್‌ಪ್‌ಚಿಟ್ಟಿತ್ ಅದ್‌ನ ಕೆತ್ತನ ಕಲ್ಲಲ್ ಸುತ್ತೂ ಕೆಟ್ಟಚಿಟ್ಟಿತ್.

ವೀರರಾಜೇಂದ್ರ ಕೆಟ್ಟಚಿಟ್ಟಿ ಅರಮನೆಯ ಎದಿಕೆ ಎಕ್ಕ ಬೂಕ್‌ಚಿ ಪಿಳ್ಳಾ ಎನ್ನಂಗ್ ಬೂಕ್‌ಚಿ ಎಣ್ಣವಾಂಗ್ ಪಳೆಯ ದಾಖಲೆ ಏದೂ ಕಂಡ್ ಬಪ್ಪಲೆ. ಆಚೇಂಗಿ, ಈ

ಅರಮನೆನ ರಿಪೇರಿ ಮಾಡುವಕ್ 1837ನೆ ಫೆಬ್ರವರಿ ತಿಂಗಳ್ ಬೆಂಗಳೂರ್‌ಲ್ ಇಂಜ ಕೊಡಗುರ ಕಮಿಷನರ್ 150 ಉರ್‌ಪಿಯತನ ಮಂಜೂರ್ ಮಾಡಿತುಳ್ಳದ್ ಈ ಕೇದತ ಕಾಗದತೆಂಜ ಗೊತ್ತ್ ಕೊಟ್ಟವ.

No.23 Coorg Commissioner's Office

To,

Captain C.T. Le Hardy

Superintendent of Coorg

MERCARA

Sir,

I have the honour to acknowledge your letter 70 of 20th instant with copy of an urgee from the Subedar of Veerarajendrapett relative to repairs required to the palace at that place and I am desired by the Commissioner to convey to you his sanction to the requisite outlay to the extent of Rs.150 for the object referred to,

I have the honour to be Sir.

Your most obedient servant

Bangalore M.Clarke

24th February 1837 Office Secretary

ವೀರರಾಜೇಂದ್ರ ಒಡೆಯ, ವೀರರಾಜೇಂದ್ರ ಪೇಟೆಲ್ ಕೆಟ್ಟಾಚಿಟ್ಟ ಅರಮನೆಲ್ ಕುಟುಂಬ ಸಮೇತ ವಾಸ ಇಂಜನ್ನೆ ಕಾಂಬುಲೆ. ದ.ಕೊಡಗುಕ್ ಬಂದಕ ಮಾತ್ರ ಅಲ್ಲಿ ಓರಮ್ಮತೆ ಒಳಂಜನ್ನೆ ಕಾಂಬ. ಇದೇ ನೇರತ್ ರಾಜ ಅರಮನೆರ ದಕ್ಷಿಣ ಬರಿಲ್ ಚೆನ್ನಂಗ್ ದೂರತಾರ ತಗ್ಗಲ್ ಅರಮನೆರ ಆನೆ, ಕುದರೆಯಕ್ ನೀರ್ ಕುಡಿಪಕ್ ಓರ್ ಕೆರೆ ಎಡ್‌ಪಾಚಿಟ್ಟತ್.

ವೀರರಾಜೇಂದ್ರ ಒಡೆಯ ತಾಂಡ ಪೆದತ್ ಓರ್ ಪಟ್ಟಣ ಕೆಟ್ಟಾಚಿಡುವಕ್ ಬಯಂದಿತ್ ಅಲ್ಲಿ ಜನಳ ನೆಲೆ ನಿಪ್ಪನ್ನೆ ಮಾಡುವದ್ ಅಕ್ಕತ ಕಾಲತ್ ಕಷ್ಟತಾರ ಕೆಲಸ

ಆಯಿತಿಂಜತ್. ಟಿಪ್ಪು ಈಂಗ್ ಮುಪ್ಪಡೆ ಕೊಡಗುಂಜ ಎರ ಕಣಕ್‌ಲ್ ಜನಳ ಪುಡ್‌ಚಂಡ್ ಶ್ರೀರಂಗಪಟ್ಟಣ್ ಕೂಟಿಯಂಡ್ ಪೋನಾನುಂಡ್, ಅಲ್ಲಿಂಜ ವೀರರಾಜೇಂದ್ರ ಸುಲ್ತಾನಂಡ ಸೈನ್ಯಾಧಿಕಾರಿಯಡ ಕೂಡೆ ಕೊಡಗುಲ್ ಮಾಡ್‌ನ ಪಡೆಲ್ ಕೊಡಗುರ ಜನ ಎರ ಕಣಕ್‌ಲ್ ಚತ್ತಾನುಂಡ್ ಕೊಡಗುಲ್ ಜನಸಂಖ್ಯೆ ಪೇರ್ತ್ ಕಮ್ಮಿ ಇಂಜತ್. ಆನಗುಂಡ್ ವ್ಯವಸಾಯ ಮಾಡತೆ ಎಚ್ಚಕೋ ಭೂಮಿ ಪಡ್ ಬುದ್ಧಿತಿಂಜತ್. ಇಚ್ಚಕೆ ಅಲ್ಲತೆ ಆ ಕಾಲತ್ ಊರ್‌ಲ್ ಇಂಜ ಚೆನ್ನಂಗಿ ಜನ ತಂಗಡ ಭೂಮಿ, ಮನೆ ಬುಟ್ಟಿತ್ ಬಂದಿತ್ ಪಟ್ಟಣತ್ ವಾಸ ಮಾಡುವಕ್ ಇಷ್ಟ ಪಡುವ ಇಂಚಲೆ.

ಆಚೇಂಗಿ, ಈ ನೇರತ್ ವೀರರಾಜೇಂದ್ರ ಪಟ್ಟಣತ್‌ನ ದುಂಬ್‌ಚಿಡುವ ಯೋಜನೆಕ್ ಟಿಪ್ಪುರ ದಬ್ಬಾಳಿಕೆ ನೀತಿ ಸಹಾಯ ಆಚಿ. ಮೂಂದನೆ ಮೈಸೂರ್ ಪಡೆಲ್ ಸರ್ ರಾಬರ್ಟ್ ಅಬರ್ ಕ್ರಾಂಬರ ಸೈನ್ಯ ಪಿರಿಯಾಪಟ್ಟಣ್‌ರ ಪಕ್ಕ ಬಪ್ಪ ಎಣ್ಣುವ ಸುದ್ದಿನ ಕೇಟನ್ನೆಕೆ ಟಿಪ್ಪು ಪಿರಿಯಾಪಟ್ಟಣ್‌ರ ಒಳ್‌ಲ್ ಇಂಜ 500 ಪಿಳ್ಳಾ ಕೋಟೆರ ಎದಿಕೆ ಪೊರಚಾಗತ್ ಇಂಜ ಆಯಿರ ಮನೆನ ಬೂಕ್‌ಚಿಟ್ಟಿತ್. ಕೋಟೆರ ಒಳ್‌ಲ್ ಮನೆಲ್ ಇಂಜ ಪಟ್ಟಮ ಅಲ್ಲಿಯತ ಸುತ್ತ ಮುತ್ತ ಇಂಜ ಜಾಗಕ್ ಪೋಚಿ. ಕೋಟೆರ ಪೊರ ಮನೆಲ್ ಲಿಂಗಾಯತ ವ್ಯಾಪಾರಿಯ ಪಿಳ್ಳಾ ಬೋರೆ ಹಿಂದೂ ವ್ಯಾಪಾರಿಯ ಪೇಟೆಕ್ ಬಂದಿತ್ ನೆಲೆ ನಿಂದತ್. ಲಿಂಗಾಯತ ವರ್ತಕಂಗ ಇಕ್ಕತ ಜೈನ ಬೀದಿಲ್ ಪಿಳ್ಳಾ ಅಲ್ಲಿಂಜ ಸುಮಾರ್ ಮೂರ್ನಾಡ್‌ಕ್ ಪೇಟೆರ ಮುಖ್ಯ ರಸ್ತೆಂಜ ತಿರುವ ರಸ್ತೆಕೆತ್ತನೆ ನೆಲೆ ನಿಂದನ್ನಕೆ ಕಾಂಬ. ಎನ್ನಂಗೇಣ್ಣಕ ಇಕ್ಕ ಸುಮಾರ್ 50 ಕಾಲಕ್ ಬಯ್ಯ ಬಸವೇಶ್ವರ ಗುಡರ ಪಕ್ಕ ಚೆನ್ನಂಗ್ ಮನೆ ಆಯಿತ್, ಮೂರ್ನಾಡ್ ರಸ್ತೆಕೆತ್ತನೆ ಉಳ್ಳ ಮನೆ ಲಿಂಗಾಯತಂಗಡ ಒಡತನತ್ ಇಂಜದ್ ಇಕ್ಕಲೂ ಬಯತಾನವು ಎಣ್ಣುವ. ಲಿಂಗಾಯತಂಗ ಎರ ಕಣಕ್‌ಲ್ ಈ ಬರಿಯ ಇಂಜಾನುಂಡ್ ಅವು ಬಸವೇಶ್ವರ ತಿರಿಕೆನ ಕೆಟ್ಟಾಚಿಟ್ಟಿತ್. ವೀರರಾಜೇಂದ್ರ ಈ ಪೇಟೆರ ಕೂಟಾಕ್ ಓರ್ ಜಂಗಮ ಮಠ ಕೆಟ್ಟಾಚಿಟ್ಟಿತ್ ಅದ್‌ಂಗ್ ಭೂಮಿನ ಜಹಗೀರಾಯಿತ್ ಕೊಡ್‌ತತ್. ಇದೇ ನೇರತ್ ಬಸವೇಶ್ವರ ತಿರಿಕೆನ ಜೋಡಿ ಕಂದಾಯತ್‌ರ ಭೂಮಿನೊ ಕೊಡ್‌ತತ್. ವೀರರಾಜೇಂದ್ರಂಡ ಕಾಲ ಕೈಂಜದು ಲಿಂಗಾಯತ ವ್ಯಾಪಾರ ಪಿಳ್ಳಾ ಸರ್ಕಾರಿ ಚಾಕ್ರಿಲ್ ತಂಗಡ ಬದ್‌ಕ್ ನಡ್‌ತಿಯಂಡ್ ಇಂಜತ್.

ಈ ನೇರತ್ ಇಕ್ಕ ತೆಲ್‌ಗೊಡ ಬೀದಿಲ್ ಉಳ್ಳ ಶೆಟ್ಟಿಯ ವೀರ ರಾಜೇಂದ್ರ ಪೇಟೆಕ್ ಬಂದಿತ್ ನೆಲೆ ನಿಂದತ್‌ಂದ್ ಎಣ್ಣುವ. ಓರ್ ಕಾಲತ್ ಈ ಶೆಟ್ಟಿಯ ಕೊಯಮತ್ತೂರ್‌ಕಾರಳಾಯಿತ್ ಬಯ್ಯ ಮೈಸೂರ್ ಸೀಮೆಲ್ ನೆಲೆ ನಿಂದವು. ಟಿಪ್ಪುರ ಕಾಲತ್ ಇವು ಕೊಡಗುಕ್ ಓಡಿಬಾತ್. ಇದತ್ ಚೆನ್ನಂಗಾಳ್ ಹೊಸೂರ್‌ಲ್, ಚೆನ್ನಯನ ಕೋಟೆಲ್ ನೆಲೆ ನಿಂದಿತ್ ಎಣ್ಣುವ. ವೀರ ರಾಜೇಂದ್ರ ಪೇಟೆಲ್ ನೆಲೆ ನಿಪ್ಪಕ್

ಮುಖ್ಯವಾಯಿತ್ ವ್ಯಾಪಾರಿಯ ಅವು ತಂಗ ಇಕ್ಕ ಉಳ್ಳ ಜಾಗತ್ ಇಂಜ ಕಾಡ್‌ನೆಲ್ಲ ಕೆತ್ತಿತ್ ಮನೆ ಕೆಟ್ಟಿಯಂಡತ್. ಆ ಬೀದಿಕ್ ಅಕ್ಕ 'ತೆಲ್‌ಗಾಡ ಬೀದಿ'ಂದ್ ಪೆದ ಆನದ್ ಇಂದೇಕೂ ಅನ್ನನೆ ಉಂಡ್. ತೆಲ್‌ಗ್ ಶೆಟ್ಟಿಯಡ ಮನೆತಕ್ಕ ತಮಿಳ್ ಆಯಿತಿಂಜಕೊ, ಅಯಿಂಗಕ್ ತೆಲ್‌ಗ್ ಶೆಟ್ಟಿಯಂದ್ ಎನ್ನನೆ ಪೆದ ಬಾತೊ ಗೊತ್ತಿಲ್ಲೆ.

ವೀರರಾಜೇಂದ್ರ ಪೇಟೆಲ್ ಅದ್‌ನ ಕೆಟ್ಟಿನ ಆದ್ಯತ್ ನೆಲೆ ನಿಂದ ಇಞ್ಚೋರ್ ಮುಖ್ಯ ಜನ ಎಣ್ಣೆಕ ದಕ್ಕಿಣ ಕನ್ನಡ ಜಿಲ್ಲೆರ ಕೊಂಕಣಿ ತಕ್ಕ ಪರೆಯುವ ಕ್ಯಾಥೋಲಿಕ್ ಕ್ರೈಸ್ತ ಜನಾಂಗ. ಟಿಪ್ಪು ಕೊಡಗುಂಜ ಆಯಿರಾರ್ ಜನಳ ಶ್ರೀರಂಗಪಟ್ಟಣ್ ಪುಡ್‌ಚೆಂಡ್ ಪೋನನ್ನಕೆ ದ.ಕನ್ನಡ ಜಿಲ್ಲೆಂಜ ಆಯಿರಾರ್ ಕೊಂಕಣಿಯಳೊ ಪುಡ್‌ಚೆಂಡ್ ಪೋಯಿತಿಂಜತ್. ಇವು ಶ್ರೀರಂಗಪಟ್ಟಣ್ ಮಹಮ್ಮದಿಯ ಮತಕ್ ಮತಾಂತರ ಆಯಿತ್ ಸುಲ್ತಾನಂಡ ರಾಜ್ಯತ್‌ರ ಬೋರೆ ಬೋರೆ ಭಾಗತ್ ಹಂಚಿ ಪೋಯಿತಿಂಜತ್. 1792ನೆ ಮೂಂದನೆ ಮೈಸೂರ್ ಪಡೆರ ನೇರತ್ ಮತಾಂತರ ಆನ ಕೊಡಗ್ ಜನ ಶ್ರೀರಂಗಪಟ್ಟಣ್‌ತಂಜ ತಂಗಡ ಸೀಮೆಕ್ ಓಡಿಬಂದನ್ನಕೆ ಶ್ರೀರಂಗಪಟ್ಟಣ್ ಪಿಳ್ಳಾ ಆಂಡ ಸುತ್ತು ಮುತ್ತು ಇಂಜ ಕೊಂಕಣಿ ಕ್ರೈಸ್ತಂಗಳೊ ತಪ್ಪಿಚಿಟ್ಟಿಂಡ್ ಬಾತ್. ಅದತ್ ಚೆನ್ನಂಗಾಳ್ ಆಗುಂಬಿಕಾಲೆ ದ.ಕನ್ನಡಕ್ ಪೋಚಿ. ಚೆನ್ನಂಗಾಳ್ ಕೊಡಗ್‌ಕಾಲೆ ದ.ಕನ್ನಡ ಜಿಲ್ಲೆಕ್ ಪೋಪಕ್ ಕೊಡಗ್‌ಕ್ ಬಾತ್. ಇವು ಕೈಪಿಲೊ, ವ್ಯಾಪಾರತೊ, ಕೈಗಾರಿಕೆಲೊ ದುಂಬ ಮಿಳ್ಳಾತ್ ಇಂಜವು. ಆನಗುಂಡ್ ವೀರರಾಜೇಂದ್ರ ಒಡೆಯ ವ್ಯಾಪಾರಿಯಳ ತಾಂಡ ಪುದಿಯ ನಗರತ್ ನೆಲೆ ನಿಪ್ಪನ್ನಕೆ , ರೈತಂಗಳ ಪೇಟೆರ ಪಕ್ಕತೆ ಊರ್‌ಲ್ ನೆಲೆ ನಿಪ್ಪನ್ನಕೆ ಅಯಿಂಗಕ್ ಅನುಕೂಲ ಮಾಡಿ ಕೊಡ್‌ತತ್. ಇವು ಶ್ರೀರಂಗಪಟ್ಟಣ್ ಮುಸ್ಲಿಂ ಧರ್ಮಕ್ ಮತಾಂತರ ಆಯಿತಿಂಜಕೊ ವಾಪಾಸ್ ಬಂದಪಿಳ್ಳಾ ತಂಗಡ ಮಿಳ್ಳಾತ್ ಕ್ರೈಸ್ತ ಧರ್ಮತ್‌ನೆ ಅನುಸರಣೆ ಮಾಡ್‌ಚಿ.

ವೀರರಾಜೇಂದ್ರ ಇಯಂಗಳ ಪೇಟೆ ಪಿಳ್ಳಾ ಸುತ್ತುಮುತ್ತು ಉಳ್ಳ ಜಾಗತ್ ನೆಲೆ ನಿಂದಿತ್, ಅಯಿಂಗಡ ಧರ್ಮತ್‌ನ ಪಾಲನೆ ಮಾಡುವಕ್ ಅನುಕೂಲ ಆಪನ್ನಕೆ ಅಯಿಂಗಕ್ ಪೋರ್ಚುಗೀಸಡ ಪ್ರಾಂತ್ಯ ಆಯಿತಿಂಜ ಗೋವಾತ್‌ಂಜ ಜಾನ್ ಡಿಕೋಸ್ಟ್ ಎಣ್ಣುವ ಗುರುನ ಕಾಕೆಚಿಟ್ಟತ್. ಅವ ಕೊಡಗ್‌ಕ್ ಬಂದಪಿಳ್ಳಾ ಇಲ್ಲಿಯೆ ನೆಲೆ ನಿಂದ ಕೊಂಕಣಿ ಕ್ರೈಸ್ತಂಗಳ ಓರ್ ಸಾಗುವಳಿ ನಿರೂಪ ಕೊಡ್‌ತತ್.

ಇದತ್ ಎಣ್ಣೆನಪೋಲೆ ವೀರರಾಜೇಂದ್ರ ಒಡೆಯ ಪೇಟೆಲ್ ಕ್ರೈಸ್ತಂಗಳ ಓರ್ ಚೆರಿಯ ಗುಡಿ ಕೆಟ್ಟಿಚಿಟ್ಟತ್. ಅದ್ ಇಕ್ಕ ರೋಮನ್ ಕ್ಯಾಥೋಲಿಕ್ ಚರ್ಚ್ ಆಯಿತುಂಡ್. ಈ ಜಾಗತ್ ಬಲ್ಯದಾಯಿತ್ ದಂಡ್ ಕುರಿ ಗುಡಿ ಕೆಟ್ಟಿಚಿ. ಈ ಗುಡೆರ ಪಾದ್ರಿ ಪಿಳ್ಳಾ ಅವಂಡ ಕೂಟಕಾರಕ್ ಊಟ ಖರ್ಚ್‌ಂದ್ ಕಾಲಕ್ 84 ಬಟ್ಟಿ ನೆಲ್ಲ ಪಿಳ್ಳಾ



ಗುಡಿರ ಪೂಜೆಕ್, ಬೊಳಚೆತ್ ಅಣ್ಣೆ ಪಿಳ್ಳಾ ಮೇಣತ್ ಬತ್ತಿನ ಅರಮನೆಂಜ ಕೊಡಪ ಏರ್ಪಾಡ್ ಮಾಡ್ಚಿ. ಇಚ್ಚೆಗೆ ಅಲ್ಲತೆ ವೀರರಾಜೇಂದ್ರ ಆ ಗುಡಿಕ್ ಓರ್ ಕಚ್ಚಿರ ದೇವಡ ಬೊಳಚ ಪಿಳ್ಳಾ ಚೊಂಬುರ ಚೆರಿಯ ಪೊಟ್ಟಿನ ಏಸು ಕ್ರಿಸ್ತಂಡ ಬಿಂಬಕ್ ಇಡುವಕ್ ಓರ್ ಪೊನ್ನರ ಕಿರೀಟತ್‌ನೊ ಕೊಡತತ್. ಈ ಕಿರೀಟ ಇಕ್ಕ ಗುಡಿಲ್ ಇಲ್ಲೆ. ಬೊಳಚ ಪಿಳ್ಳಾ ಚೊಂಬುರ ಪೊಟ್ಟಿ ಉಂಡ್.

ವೀರರಾಜೇಂದ್ರ ಪೇಟೆಲ್ ಈ ನೇರತ್ ನೆಲೆ ನಿಂದ ಇಇತ್ತೋರ್ ವರ್ಗತ್ ಜನ ಕಣ್ಣಾನೂರಂಜ ಬಂದ ಮುಸಲ್ಮಾನಂಗಂದ್ ಎಣ್ಣುವ. ಇವು ಬಂಗಾಳತ್‌ಂಜ ದಕ್ಷಿಣಕ್ ಬಂದಿತ್ ನೆಲೆ ನಿಂದಯಿಂಗಡ ಸಂತಾನಕಾರಾಂದ್ ಎಣ್ಣುವ. ಕ್ರಿ.ಶ. 1757ತ್ ಬಂಗಾಳತ್‌ರ ನವಾಬ ಆಯಿತಿಂಜ ಸಿರಾಜುದ್ದೌಲ ಪ್ಲಾಸಿ ಪಡೆಲ್ ಚೋತಿತ್ ಬಂಗಾಳ ಬ್ರಿಟಿಷಡ ಆಶ್ರಿತ ಆಯಿತಿಂಜ ಮೀರ್ಜಾಫರಂಡ ಪುಡತಕ್ ಬಪ್ಪಕ ಅಲ್ಲಿ ಇಂಜ ಮುಸಲ್ಮಾನಗಳೆ ಪೂರಟಿತ್ ದಕ್ಷಿಣ ಹಿಂದೂಸ್ಥಾನಕ್ ವಲಸೆ ಬಾತ್. ಇನ್ನನೆ ಬಪ್ಪಕ ಆದ್ಲ ಅವು ಪಶ್ಚಿಮ ಕರಾವಳಿರ ಕೊಚ್ಚಿಲ್ ಒಳಂಜತ್. ಅಲ್ಲಿಂಜ ಚೆನ್ನಂಗಾಳ್ ಕಣ್ಣಾನೂರಕ್ ಬಂದಿತ್ ಅಲ್ಲಿ ಇಂಜ ಮುಸಲ್ಮಾನ ಅರಕಲ್ ರಾಜಂಡ ಆಶ್ರಯತ್ ನಿಂದತ್.

ಅರಕಲ್ ರಾಜಂಗೂ, ವೀರರಾಜೇಂದ್ರಂಗೂ ಮಿಳ್ಳಾಲೆ ಸಿನೇತಿಕೆ ಇಂಜತ್. ಈನಗುಂಡ್ ವೀರರಾಜೇಂದ್ರ ತಾಂಡ ಪೆದತ್ ಕೆಟ್ಟಾಚಿಟ್ಟ ಜಾಗತ್ ಕಣ್ಣಾನೂರಲ್ ನೆಲೆ ನಿಂದ ಬಂಗಾಳತ್‌ರ ಮುಸ್ಲಿಮ್‌ರಾತ್ ಚೆನ್ನಂಗ್ ಜನ ಪೂರಟಿತ್ ವೀರರಾಜೇಂದ್ರ ಪೇಟೆಲ್ ನೆಲೆ ನಿಂದತ್. ಕಣ್ಣಾನೂರಲ್ ಇವು ಇಂಜ ಬೀದಿಕ್ ಬಂಗಾಳಿ ಬೀದಿಂದ್ ಪೆದ ಇಂಜತ್ ಎಣ್ಣುವ. ಅನ್ನನೆ ಅವು ವೀರರಾಜೇಂದ್ರ ಪೇಟೆಲ್ ಕಾಡ್ ಕೆತ್ತಿತ್ ಮನೆ ಕೆಟ್ಟಿಯಂಡ್ ನಿಂದ ಜಾಗಕ್ 'ಬಂಗಾಳಿ ಬೀದಿ'ಂದ್ ಪೆದ ಇಟ್ಟಂಡತ್.

ಇನ್ನನೆ ವೀರರಾಜೇಂದ್ರ ಒಡೆಯ ತಾಂಡ ಪೆದತ್ ಕೆಟ್ಟಾಚಿಟ್ಟ ವೀರರಾಜೇಂದ್ರ ಪೇಟೆರ ಪೂರಮೆ ಬೋರೆ ಬೋರೆ ಜನಾಂಗ, ಧರ್ಮಕಾರ ನೆಲೆ ನಿಂದಂಡ್ ಪೇಟೆರ ಬೊಳಚೆಕ್ ಕಾರಣಕರ್ತಂಗಳಾಚಿ.



## ವೀರರಾಜೇಂದ್ರ ಒಡೆಯ ಪಿಳ್ಳಾ ಇಂಗ್ಲೀಷ್‌ಕಾರಕ್ ಆನ ದಂಡನೆ ಒಪ್ಪಂದ

ಪಂಡ್ ವೀರರಾಜೇಂದ್ರ ಒಡೆಯ, ಸರ್ ರಾಬರ್ಟ್ ಅಬರ್ ಕ್ರಾಂಬಿ ಪಿಳ್ಳಾ ಮಲಬಾರ್ ಇಂಗ್ಲೀಷ್ ಅಧಿಕಾರಿಯಕ್ ಸುಲ್ತಾನಂಡ ಅಧಿಕಾರಿಯ ತಾಂಡ ಸೀಮೆಯಾನ ಅಮರಸುಳ್ಳ ಮಾಗಣೆರ ಒಳಿಯ ಒರಾತತ್ ನುಗ್ಗಿ ಬಂದಂಡ್ ಉಂಡ್‌ಂದ್ ಎಲ್ಲಿತಿಂಜತ್. ಈ ಕಾಗದತರ್ ಪೋಲೆ ರಾಬರ್ಟ್ ಕ್ರಾಂಬಿ, ಸುಲ್ತಾನ ಪಿಳ್ಳಾ ವೀರ ರಾಜೇಂದ್ರಂಡ ಸೀಮೆರ ತೆರಿನ ನಿರ್ಕ್ ಪಡ್‌ತಿತ್ ಬಂದೋಬಸ್ತ್ ಮಾಡುವಕ್ ಎಮ್ಮೆಟ್ ಎಣ್ಣುವ ಇಂಜಿನಿಯರ್‌ನ ಓರ್ ಕಾಗದತರ್ ಕೂಡೆ ಕೊಡಗ್ ರಾಜಂಡ ಪಕ್ಕ ಅಯೆಚತ್. ಈ ಪೋಲೆ ಇಂಜಿನಿಯರ್ ಎಮ್ಮೆಟ್ ಕೊಡಗ್ ಸೀಮೆಕ್ ಬಂದಿತ್ ಅಮರಸುಳ್ಳ, ವಿಳಾಯಿರ ಸೀಮೆರ ತೆರಿನ ವಿಚಾರಣೆ ಮಾಡಿತ್, ಕಂಡ್‌ಪುಡ್‌ಚಿತ್ ಕಲ್ಲ್‌ನ ನೆಟ್ಟಿತ್ ಅದ್‌ಂದ ವಿವರತನೆಲ್ಲ ತಾಂಡ ಪುಸ್ತಕತ್ ಎಲ್ಲಿಯಂಡ್ 1793ನೆ ಏಪ್ರಿಲ್ ತಿಂಗತ್ ಕಣ್ಣಾನೂರ್‌ಕ್ ಪೋಚಿ.

ಅಕ್ಕಣೆಕ್ ಸರ್ ರಾಬರ್ಟ್ ಅಬರ್ ಕ್ರಾಂಬಿಕ್ ಹಿಂದೂ ಸ್ಥಾನತರ್ ಬ್ರಿಟಿಷ್ ಸೈನ್ಯತರ್ ಮಹಾ ದಂಡನಾಯಕ ಆಯಿತ್ ಬಡ್ತಿ ಪಡ್‌ಂದಿತ್ ಮುಂಬೈಂಜ ಕಣ್ಣಾನೂರ್‌ಕಾಲೆ ಬಂಗಾಳಕ್ ಪೊರ್‌ಟತ್. ಅನ್ನನೆ ಪೋಪಕ ಅವ ಕಣ್ಣಾನೂರ್‌ಲ್ ವೀರ ರಾಜೇಂದ್ರ ಒಡೆಯನ ಕಂಡಿತ್ ತಕ್ ಪರೆಯೊಂಡೂಂದ್ ಬಯಂದಿತ್, ಕೊಡಗ್‌ಂಜ ರಾಜನ ಕೂಟಿಯಂಡ್ ಬಪ್ಪಕ್ ಮೇಸನ್ ಎಣ್ಣುವ ಓರ್ ಸೈನ್ಯಾಧಿಕಾರಿನ ಓರ್ ಕಂಪೆನಿ ಸಿಪಾಯಿಯಡ ಕೂಡೆ ಕಣ್ಣಾನೂರ್‌ಕ್ ಅಯೆಚಿತ್ ಅಲ್ಲಿ ಸರ್ ರಾಬರ್ಟ್ ಅಬರ್ ಕ್ರಾಂಬಿರ ಕೂಡೆ ಎಳೆಟ್ವ ದಿನ ಇಂಜಿತ್ ಕಂಪೆನಿ ಸರ್ಕಾರಕೂ, ತಾಂಡ ರಾಜ್ಯಕೂ ಮಿಳ್ಳಾಕ್ ಇರಂಡಿಯ ಸಿನೇತಿಕೆರ ಮೀದ ಸಮಾಲೋಚನೆ ನಡತ್‌ಚಿ.

ಈ ನೇರತ್ ಸರ್ ರಾಬರ್ಟ್ ಅಬರ್ ಕ್ರಾಂಬಿ ವೀರರಾಜೇಂದ್ರಂಡ ಕೂಡೆ ತಕರಾರ್‌ಲ್ ಇಂಜ 24 ಆಯಿರ ಉರ್‌ಪಿಯತ್‌ನ ಇನಾಂ ಆಯಿತ್ ಕಂಪೆನಿ ಸರ್ಕಾರಕ್ ಕೊಡ್‌ಕೊಂಡೂಂದ್ ಕೇಟಂಡತ್.

ಇದ್‌ಂಗ್ ರಾಜಂಗೂ ಪಿಳ್ಳಾ ಜನರಲ್ ಸಾಹೇಬಂಗೂ ಅಪ್ಪರಿಪ್ಪರ ಪತ್ರ ವ್ಯವಹಾರ ಆಯಿತ್ ಆಖೀರಕ್ ವೀರರಾಜೇಂದ್ರ ಒಡೆಯಂಗೂ, ಈಸ್ಟ್ ಇಂಡಿಯಾ ಕಂಪೆನಿ ಸರ್ಕಾರಕೂ ದಂಡನೆ ಕುರಿ ಸಿನೇತಿಕೆರ ಒಪ್ಪಂದ ಆಯಿತ್ ಅದ್‌ಂದ ಇಡ್‌ಕೆಟ್ವನ ಬೋರೆ ಬೋರೆ ಕಲಂಲ್ ಎಲ್ಲಿತ್ ದಂಡ್ ಕಡೆಕಾರಳೂ ಓರಂದ್ ಕಾಪಿನ ತಂಗಡ ಪಕ್ಕ ಬೆಚ್ಚಂಡತ್.



ಈ ಪೋಲೆ ವೀರರಾಜೇಂದ್ರ ಒಡೆಯ ತಾಂಗ್ ತಂದ ಕರಾರ್ ನಾಮನ ಎಡ್ತಂಡ್ ಕೊಡಗ್ಗರ್ ಬಂದಿತ್ ಅಂದ್‌ಂಜ ಕರಾರ್‌ಲ್ ಎಳ್ವ್‌ನನ್ನೆ ಕಾಲೋದಿ ಕಂಪೆನಿ ಸರ್ಕಾರತ್‌ರ ಕೂಡೆ ಸಿನೇತಿಕೆಲ್ ಇಪ್ಪಕ್ 24 ಆಯಿರ ಉರ್‌ಪಿಯ ಕೊಡ್‌ತಂಡ್ ಇಂಜತ್.

ಇನ್ನನೆ ಕಂಪೆನಿ ಸರ್ಕಾರಕೂ, ವೀರರಾಜೇಂದ್ರಕೂ ಆನ ಒಪ್ಪಂದ ದಂಡ್ ಕಡೆಕಾರಡಲ್ಲಿ ಸಿನೇತಿಕೆನ ಬೊಳ್‌ತಿವಯಕ್‌ಂದ್ ಎಳ್ವಿತಿಂಜಕೊ, ನೇರಾಯಿತೂ ಕಂಪೆನಿ ಸರ್ಕಾರತ್‌ರ ಪುಡ್‌ತತನ ಕೊಡಗ್ಗರ ಮೀದ ಪೊರ್‌ಪಾಚಿಡುವ ಗುರಿಸಾಧನೆ ಮಾಡ್‌ಚಿ. ಈ ಪೋಲೆ ಬ್ರಿಟಿಷ್ ಕುತಂತ್ರತ್ ಹಿಂದೂ ಸ್ಥಾನತ್‌ರ ಮೀದ ತಂಗಡ ಅಧಿಕಾರತ್‌ನ ಸ್ಥಾಪನೆ ಮಾಡ್‌ಚಿಂದ್ ಭಾರತತ್‌ರ ಇತಿಹಾಸತ್‌ನ ಆಳ ಆಯಿತ್ ನೋಟಾನಯಿಂಗ್‌ ಚಾಯೋಡೆ ಅರ್ಥ ಆಪ ಸಂಗತಿ ಆಯಿತುಂಡ್.

### ಟಿಪ್ಪು ಸುಲ್ತಾನ, ವೀರರಾಜೇಂದ್ರ ಒಡೆಯನ ಚಾವ್‌ಚಿಡುವಕ್ ನೋಟ್‌ನ ಕೆಣಿ

ಬ್ರಿಟಿಷಕೂ, ವೀರರಾಜೇಂದ್ರಂಗೂ ಸಿನೇತಿಕೆರ ಒಪ್ಪಂದ ಆಯಿತ್ ಮೂಂದ್ ಕಾಲ ಕೈಂಜಪಿಳ್ಳಾ ಟಿಪ್ಪು, ಲಾರ್ಡ್ ಕಾರ್ನ್ ವಾಲೀಸ್‌ರ ಕೂಡೆ ಮಾಡಿಯಂಡ ಒಪ್ಪಂದತ್‌ನ ಪೊಳಿಪ ಪ್ರಯತ್ನತ್ ಉಂಡ್ ಎಣ್ಣುವ ಸುದ್ದಿ ವೀರರಾಜೇಂದ್ರಂಗ್ ಎತ್ತ್‌ಚಿ. ಅಕ್ಕ ವೀರರಾಜೇಂದ್ರ ತಾಂಡ ದಂಡ್ ಗೂಢಚಾರಿಯಳ ಶ್ರೀರಂಗಪಟ್ಟಕ್ ಅಯೆಚಿತ್ ತಾಂಗ್ ಗೊತ್ತ್ ಕೊಟ್ಪನ ಸುದ್ದಿನ, ಮಲಬಾರ್‌ಲ್ ಕಮಿಷನರ್‌ ಆಯಿತಿಂಜ ಜೇಮ್ಸ್ ಸ್ಪೀವನ್ಸ್ ಸಾಹೇಬಂಗ್ ಎಳ್ವಿತ್ ಅಯೆಚತ್.

ಈಂಡೆಡೆಲ್ ಟಿಪ್ಪು ಸುಲ್ತಾನ ಮಿಳ್ಳಾಕ್ ತಾಂಗೂ, ಇಂಗ್ಲೀಷ್‌ಕಾರಕೂ ಪಡೆ ನಡ್‌ಪದ್ ಗ್ಯಾರೆಂಟಿಂದ್ ಅರ್‌ಂಜಂಡ್, ಆ ಪಡೆಲ್ ತಾಂಗ್ ವಿರೋಧ ಆಯಿತ್ ನಿಪ್ಪ ಶಕ್ತಿಯಳ ಅಡ್‌ಕುವಕೂಡ್‌ಚಿ. ಕೊಡಗ್ಗರ ರಾಜ ತಾಂಗ್ ವಿರೋಧಿ ಆಯಿತ್ ಇಂಗ್ಲೀಷ್‌ಕಾರಕ್ ಮಿಳ್ಳಾತ ಪಡೆಲ್ ಸಹಾಯ ಮಾಡುವದ್ ನೇರ್. ಆನಗುಂಡ್ ರಾಜನ ಚಾವ್‌ಚಿಡೊಂಡೊಂದ್ ಕೆಣಿ ಮಾಡ್‌ಚಿ. ಇದ್‌ಂಗಾಯಿತ್ ಟಿಪ್ಪು, ವೀರರಾಜೇಂದ್ರಂಡ ಬೆಂದು ಚಾಚೆಯಡಾತ್ ಒಬ್ಬನಾನ ಲಿಂಗರಾಜಂಗ್ ಪಣತ್‌ರ ಆಸೆ ಕಾಟಿತ್ ತಾಂಡ

ಆಪ್ತನಾಯಿತ್ ಮಾಡಿಯಂಡತ್.

ಲಿಂಗರಾಜಂಗ್ ವೀರರಾಜೇಂದ್ರ ಓರ್ ನಾಡ್‌ನ ಜಹಗೀರ್ ಆಯಿತ್ ಕೊಡ್‌ತತ್. ಆಚೇಂಗೂ ಅಂವ ಸುಲ್ತಾನನುಂಡ್ ಕ್‌ಟ್ಟುವ ಪಣ, ಪದವಿರ ಆಸೆಲ್ ಸುಲ್ತಾನಂಡ ಕೆಣಿಲ್ ಪಾಲ್‌ದಾರನಾಚಿ. ಸುಲ್ತಾನ, ಲಿಂಗರಾಜಂಡಲ್ಲಿಕ್ ದಂಡ್ ಮುಸ್ಲಿಮ್‌ಗಳ ಅಯೆಚಿತ್ "ಕೊಡಗರ ರಾಜ ಇಂಗ್ಲೀಷ್‌ಕಾರಡ ಕೂಡೆ ದುಂಬ ಸಿನೇತಿಕೆಲ್ ಉಂಡ್. ಅವು ದಂಡಾಳೂ ಕೂಡಿಯಂಡ್ ನಂಗಡ ದಾಲತ್, ಮಾನತ್‌ನ ಪಾಳ್ ಮಾಡ್‌ಚಿ. ಮಿಳ್ಳಾಕ್ ಜನಳೆಲ್ಲ ಕೂಟಿತ್ ನಂಗಳ ಮುಳ್‌ಕಿರು. ಕೊಡಗರ ರಾಜಂಗ ನಂಗಕ್ ಬಲ್ಯ ಶತ್ರುವಳಾಯಿತ್ ಶ್ರೀರಂಗಪಟ್ಟತರ ಪಕ್ಕತ್ ಉಂಡ್. ಅಯಿಂಗಳ ಎಲ್ಲ ತರತೂ ನಂಗಡ ಸರ್ಕಾರ ದುಷ್ಟಂಗಾಂದೆ ಅರ್‌ಂಜವಂಡೂ"ಂದ್ ಆ ಮುಸಲ್ಮಾನಂಡ ಕೂಡೆ ಎಣ್ಣಿತ್ ಅಯೆಚತ್.

ಅದಾಂಗ್ ಲಿಂಗ ರಾಜ ಒಪ್ಪಿತ್ ಸುಲ್ತಾನಂಗ್ ಕಾಗದ ಎಳ್ಳಿತ್ "ನಾನ್ ನಿಂಗಡ ಸರ್ಕಾರತರ ಪರ ಉಳ್ಳ. ಇಂಗ್ಲೀಷ್‌ಕಾರಡ ಸಿನೇತಿಕೆ ಬೆಚ್ಚವುಲೆ. ವೀರರಾಜೇಂದ್ರ ಒಡೆಯನ ಎನ್ನನೆ ಆಚೇಂಗೂ ಪೊಯ್ಯುವಿ"ಂದ್ ನಂಬಿಕೆ ಕಾಟಿತ್ ಅಯೆಚತ್.

ಅಲ್ಲಿಂಜ ಕೊಡಗರ ಜನಡ ಕೂಡೆ ವೀರರಾಜೇಂದ್ರ ಒಡೆಯಂಗ್ ವಿರೋಧಿಯಾಕಾನ ಚೆನ್ನಂಗ್ ಕೊಡವಳ ತಾಂಡ ಕೂಡೆ ಕೂಟಿಯಂಡ್ ಅಯಿಂಗಳ್ ಟಿಪ್ಪುನುಂಡ್ ಬೋಂಡಿಯಾನ ಪಣ ತಪ್ಪಾಚಿಡುವಿಂದ್ ತಕ್ಕ ಕೊಡ್‌ತತ್. ಅಚ್ಚಕೆ ಅಲ್ಲತೆ ವೀರರಾಜೇಂದ್ರ ನಾಲ್ಕಾಡ್‌ಂಜ ಮಡಿಕೇಲಕ್ ಪೋಪಕ ಇಕ್ಕಟ್ಟಾನ ಕಾಡ್ ಬಟ್ಟೆಲ್ ನಿಂದಿತ್ ಬೊಡಿ ಬೆಪ್ಪನ್ನಕೆ ಎಣ್ಣೆಚಿ.

ಇನ್ನನೆ ಕೊಡಗರ ಜನ ಲಿಂಗರಾಜಂಡ ತಕ್ಕಕ್ ಒತ್ತಂಡ್ ವೀರರಾಜೇಂದ್ರನ ಕೊಲ್ಲುವಕ್ ಪಾರ ಕಾತಂಡ್ ಇಂಜತ್. ಆಚೇಂಗಿ, ವೀರರಾಜೇಂದ್ರಂಗ್ ಈಂಡೆಡೆಲ್ ಚೆನ್ನಂಗ್ ಕೊಡವ ತನ್ನ ಕೊಲ್ಲುವಕ್ ಪಾರ ಕಾತಂಡ್ ಉಂಡ್‌ಂದ್ ಗೊತ್ತಾನದೆ ಅಯಿಂಗಳೆಲ್ಲ ಪುಡ್‌ಪ್‌ಚಿಟ್ಟಿತ್ ಚಾವ್‌ಚಿಟ್ಟಿತ್. ಅಕ್ಕ ಅಂವಂಗ್ ಟಿಪ್ಪು, ತಾಂಡ ಬೆಂದು ಲಿಂಗ ರಾಜಂಡ ಕೂಡೆ ತನ್ನ ಕೊಲ್ಲುವಕ್ ಕೆಣಿ ಮಾಡಿತಿಂಜತ್ ಎಣ್ಣುವದೂ ಗೊತ್ತಿಂಚ್‌ಲೆ.

ಇದಾಯಿತ್ ಚೆನ್ನಂಗ್ ಸಮಯ ಕೈಂಜಪಿಳ್ಳಾ ಟಿಪ್ಪು, ಲಿಂಗರಾಜಂಡ ಕೂಡೆ ನಂಗ ಗೇನ ಮಾಡ್‌ನನ್ನಕೆ ನಡ್‌ಂದ್‌ಲೆ. ಮಿಳ್ಳಾಕ್ ಎನ್ನನೆ ಮೋಸ ಮಾಡುವಂದ್ ಕೇಟಿತ್ ಕಾಗದ ಎಳ್ಳಿತ್ ತಾಂಡ ಗೂಢಚಾರಿಯಳ ಅಯೆಚತ್.

ಇದಾಂಗ್ ಲಿಂಗರಾಜ, ಟಿಪ್ಪುರ ಕೂಡೆ ತಾಂಡಲ್ಲಿಕ್ ಚೆನ್ನಂಗ್ ಸೈನ್ಯತನ ಬೈಟ್

ನೇರತ್ ಎತ್ತುವನ್ನೆ ಅಯೆಕೊಂಡೂಂದ್, ತಾನ್ ಅಂದೇ ಬೈಟ್ ವೀರ ರಾಜೇಂದ್ರನ ಕೊಲ್ಲುವಿಂದ್ ಜವಾಬ್ ಅಯೆಚತ್.

ಸುಲ್ತಾನ ತಾಂಡ ಸೈನ್ಯ ಅಯೆಚಕ ಇಂಗ್ಲೀಷ್‌ಕಾರ ರಾಜಂಡ ಸಹಾಯಕ್ ಬಪ್ಪಾಂದ್ ಗೇನ ಮಾಡಿತ್ ತಾಂಡ ಸೈನ್ಯತನ ಅಯೆಪಕ್ ಒತ್ತಂಡ್‌ಲೆ. ಅದ್‌ಂಗ್ ಬದ್‌ಲಾಯಿತ್ ಲಿಂಗರಾಜ ತಾಂಡ ಕೆಣಿಲ್ ರಾಜನ ಚಾಪ್‌ಚಿಡುವ ಕೆಲಸ ಆಂಡೂಂದ್ ಎಳ್ಳೆಚಿ.

ಅದ್‌ಂಗ್ ಲಿಂಗರಾಜ, "ನಂಗಡ ಸೈನ್ಯತ್ ನಲ್ಲ ಶಿಸ್ತರ ಜನ ಇಲ್ಲೆ. ಆನಗುಂಡ್ ನಿಂಗಡ ಬರಿಂಜ ನಾಲಾಳನ ನಲ್ಲ ತೋಕ್, ಮದ್ನ್ ಕೊಡ್‌ತಿತ್ ಅಯೆಚಿತಂದಕ, ರಾಜ ಸವಾರಿ ಪೋಪ ನೇರತ್ ನಲ್ಲ ಜಾಗ ನೋಟಿಯಂಡ್ ಬೊಡಿ ಬೆಪ್ಪಾಚಿಟ್ಟಿತ್ ಕೊಲ್ಲೊಲು. ಅದೂ ಸೆರಿಯಾಕತೆ ಪೋನಕ ಅವು ಬೋಟೆಕ್ ಪೋನಲ್ಲಿ ಕೊಲ್ಲೊಲು. ಈ ದಂಡ್ ಸಂದರ್ಭ ಸೆರಿಯಾಕತೆ ಪೋನಕ ಶಿವಪಾದರೆರ ದಿನ ಮಾದಾಪುರತ್ ಜನ ಎಲ್ಲ ಗೌಜಿಲ್ ಇಪ್ಪಕ ಜನಡ ವೇಷ ಬದ್‌ಲ್ ಮಾಡಿತ್, ಎನ್ನನೇಂಗಿ ಕೊಲ್ಲೊಲು"ಂದ್ ಸುಲ್ತಾನಂಗ ಎಳ್ಳಿತ್ ಅಯೆಚತ್.

ಈ ಕಾಗದ ನೋಟಿತ್ ಪೇರ್ತ್ ಕುಶಿಪಟ್ಟಿ ಟಿಪ್ಪು, ತಾಂಡ ದಂಡ್ ನಲ್ಲ ವೀರ ಸೈನಿಕಂಗಳ ಕಾಕಿತ್ ಬೋಂಡಿಯಾನ ತೋಕ್, ಮದ್ನ್, ಚಾಕ್‌ನೆಲ್ಲ ಕೊಡ್‌ತಿತ್ ಪಿತ್ತೂರಿಗಾರ ಲಿಂಗರಾಜಂಡ ಪಕ್ಕ ಅಯೆಚತ್. ಅವು ಬೈಟ್ ನೇರತ್ ಕೊಡಗರ ತೆರಿಕಾಲೆ ಪಾರಕಾರಡ ಕಣ್ಣ್ ತಪ್ಪಾಚಿಟ್ಟಂಡ್ ಕಳ್ಳ ಬಟ್ಟೆಕಾಲೆ ಕೊಡಗಕ್ ಬಂದಿತ್ ಲಿಂಗರಾಜನ ಕಂಡತ್.

ಇಯಂಗಡ ಕೂಡೆ ತಕ್ಕ್ ಬಾಕ್ ನಡ್‌ತನ ಲಿಂಗರಾಜ, ವೀರರಾಜೇಂದ್ರನ ಕೊಲ್ಲುವಕ್ ನೇರ ನೋಟಿಯಂಡೆ ಇಂಜತ್.

ಅಕ್ಕಣೆ ಸುಲ್ತಾನ ಅಯೆಚ ಆ ನಾಲ್ ಜನಡಾತ್ ಇಂಜ ಒಬ್ಬ ಮುಸ್ಲಿಂ ಬಾಲೆಕಾರ, ಅಯಿಂಗಳ ಬುಟ್ಟಿತ್ ವೀರರಾಜೇಂದ್ರಂಡ ಪಕ್ಕ ಬಂದಿತ್ "ಟಿಪ್ಪು ಪಿಳ್ಳಾ ಲಿಂಗರಾಜ ಕಾಗದ ಪತ್ರತರ ಮೂಲಕ ಮನಸ್ಸು ಮಾಡಿತ್ ನಿಂಗಳ ಕೊಲ್ಲುವಕ್ ತೀರ್ಮಾನ ಮಾಡಿತ್. ಆನಗುಂಡ್ ಶಿವಪಾದರೆರ ದಿನ ನಿಂಗಳ ಕೊಲ್ಲುವಿಂದ್ ಲಿಂಗರಾಜ, ಟಿಪ್ಪುಕ್ ತಕ್ಕ್ ಕೊಡ್‌ತಿತ್. ನಾನ್ ಕೈಂಜ ಓರ್ ಕಾಲತಂಜ ಅಯಿಂಗಡ ಕೂಡೆ ಉಳ್ಳ. ದೇವ ಈ ವಿಷಯತನ ನಿಂಗಡ ಕೂಡೆ ಎಣ್ಣುವಕ್ ನಾಕ್ ಮನಸ್ಸು ತಂದಾಂಗ್ ಎಣ್ಣಿಯಂಡ್ ಉಳ್ಳ"ಂದ್‌ಎಣ್ಣೆಚಿ.

"ನೀನ್ ಎಣ್ಣಿಯಂಡುಳ್ಳ ವಿಷಯ ನೇರಾ, ಪೊಟ್ಟಾ?"ಂದ್ ವೀರರಾಜೇಂದ್ರ ಆ

ಬಾಲೆಕಾರನ ತಿರೀತ್ ಕೇಟತ್.

"ನಿಂಗಳೆ ಅದ್‌ನ ಪರೀಕ್ಷೆ ಮಾಡೋಲು. ಎನ್ನನೆ ಎಣ್ಣೆಕ ನಿಂಗ ಮೂಂದ್ ದಿನ ಪಾರ ಇರೊಂಡು. ಅವು ಅಲ್ಲಿಕ್ ಬರತೆ ಪೋನಕ ನಾಡ ತಕ್ಕ ಪೊಟ್ವೊಂದ್ ಒತ್ತೋಳಿ. ನಾಕ್ ಶಿಕ್ಷೆ ತಾರಿ"ಂದ್ ಜವಾಬ್ ಕೊಡೊತತ್.

ಈ ಪೋಲೆ ವೀರ ರಾಜೇಂದ್ರ, ಪಿತೂರಿಕಾರ ಲಿಂಗರಾಜಂಡ ಮನೆಕ್ 30 ಜನಳ, ಲಿಂಗ ರಾಜಂಡ ಆಪ್ತ ಸೇವಕಂಡ ಮನೆಕ್ 24 ಜನಳ ಬೈಟ್ ದಂಡರೆ ಗಂಟೆರ ಮೀದ ಪಾರಕಾಪನ್ನಕೆ ಪೊಲಾಕ ಆಪಾಂಡ ಒಳೀಯ ಇರ್‌ಕಿರಾಲೆ ಗುಟ್ಟಾಯಿತ್ ಲಿಂಗರಾಜಂಡ ಮನೆರ ಪಕ್ಕ ಅಯೆಚತ್.

ಇನ್ನನೆ ಇವು ಪಾರ ಕಾತಂಡ್ ಇಂಜ ಮೂಂದನೆ ಬೈಟ್ ಸುಲ್ತಾನಂಡ ನಾಲಾಳ್ ಲಿಂಗ ರಾಜಂಡ ಆಪ್ತಸೇವಕಂಡ ಮನೆಕ್ ಬಾತ್. ಅಕ್ಕ ವೀರರಾಜೇಂದ್ರಂಡ ಪಾರಕಾರ ಒಬ್ಬನ ಪುಡೊಚತ್. ಅವ ಜೋರೊತೆ ಕಿರ್‌ಚಿಯವಕ ಇಣ್ಣೊಬ್ಬ ಗುರಿಕಾರ, ಬಟ್ಟೆ ಕಾಟುವ ಓರ್ ಮುಸ್ಲಿಂ ಕಾಡ್‌ಕ್ ಓಡಿಪೋಚಿ. ಆಚೇಂಗಿ, ರಾಜಂಡ ಜನ ಅಯಿಂಗಳ ದೊವ್‌ತಿಯಂಡ್ ಪೋಯಿತ್ ಆ ಗುರಿಕಾರಂಗ್ ಕತ್ತಿಂಜ ಪೊಜ್ಜಿತ್ ಗಾಯ ಮಾಡಿತ್ ಅವನ ಪುಡೊಚಿತ್ ಕೆಟ್ಟಿತ್‌ಟ್ಟತ್. ಇಣ್ಣೊರ್ ಬರಿ ಓಡಿಪೋಯಂಡ್ ಇಂಜ ದಂಡನೆ ವ್ಯಕ್ತಿನ, ರಾಜಂಡ ಜನ ದೊವ್‌ತಿಯಂಡ್ ಪೊಜ್ಜಿತ್ ಕೆಟ್ಟಿತ್‌ಟ್ಟತ್.

ಇಚ್ಚಕ್ ಆಕಣೆ ಅಲ್ಲಿಯತ ಗಲಾಟೆ ಕೂತ್‌ನ ಕೇಟಿತ್ ಪಕ್ಕತ್ ಮನೆಲ್ ಇಂಜ ಲಿಂಗರಾಜ ಎಂತೋ ಮೋಸ ಆಯಿತ್‌ಂದ್ ಅರ್‌ಂಜಿತ್ ತಾಂಡ ಬರಿ ನಾಲಾಳ್‌ನ ಕೂಟಿಯಂಡ್ ಸುಲ್ತಾನಂಡ ಜನಳ ಬುಡ್‌ತುವಕ್ ಪೊರ್‌ಟತ್. ಅಕ್ಕ ಅವಂಡ ಮನೆರ ಸುತ್ತೂ ಪಾರಕಾತಂಡ್ ಇಂಜ ಅರಮನೆರ ಸಿಪಾಯಿಯ ಅವಂಡ ದಂಡ್ ಕೂಟಾಳಿಯಳ ಪುಡೊಚಿ ಕೆಟ್‌ಚಿ.

ಇದ್‌ನ ನೋಟಿತ್ ಲಿಂಗರಾಜ ಆ ದಂಡಾಳಾಕ್ ಕತ್ತಿಲ್ ಪೊಜ್ಜಿತ್ ಬೂಕ್‌ಚಿ. ಅಕ್ಕ ಬಾಕಿ ಪಾರಕಾರ ಇಂವಂಡ ಪಿಣ್ಣಾ ಇಂವಂಡ ಜನಡ ಮೀದ ಬುದ್ಧಿತ್, ಕೂಡೆ ಇಂಜ ಓರ್ ಕೊಡವನ ಕತ್ತಿಲ್ ಪೊಜ್ಜಿ ಕೊಂದತ್. ಇನ್ನನೆ ಸುಲ್ತಾನ ವೀರರಾಜೇಂದ್ರನ ಕೊಲ್ಲುವಕ್ ಮಾಡಿತಿಂಜ ಕೆಣಿ ಪ್ರಯೋಜನ ಆಯಿಲೆ.

ಈ ವಿಷಯತ್‌ನ ವೀರರಾಜೇಂದ್ರ ತಲಚೇರಿಲ್ ಇಂಜ ಕಂಪೆನಿ ಸರ್ಕಾರತ್‌ರ ಅಧಿಕಾರಿ ಜ.ಹಾರ್ಟ್‌ಸ ಸಾಹೇಬಂಗ್ ಅರಿಚಿಟ್ಟತ್.

ಈ ಘಟನೆ ನಡೊಂದಿತ್ ಚೆನ್ನಂಗ್ ಸಮಯ ಕೈಂಜಪಿಣ್ಣಾ ಬಂಗಾಳ ಗವರ್ನರ್ ಜ.ಸರ್



ಜಾನ್ ಫೋರ್ ವೀರ ರಾಜೇಂದ್ರಂಗ್ ಜವಾಬ್ ಮಾಡ್‌ಚಿ. "ಟಿಪ್ಪುರ ಕಡೆರ ಜನ ನಿಂಗಳ ಕೊಲ್ಲುವಕ್ ಪೊರ್‌ಟ ವಿಷಯ ಓದಿತ್ ನಂಗಕ್ ದುಂಬ ಬೇಜಾರ ಆಚಿ. ದೇವ ಬಲ್ಮಂವ. ನಿಂಗಳ ಕಾಪಾಡ್‌ಚಿ. ನಿಂಗ ಎಕ್ಕೋಲು ಕಂಪೆನಿ ಸರ್ಕಾರತ್‌ರ ನಲ್ಲಾಮೆನ ಬಯಂದವು. ಆನಗುಂಡ್ ಎಕ್ಕೋಲು ನಿಂಗಕ್ ದೇವಡ ಆಶೀರ್ವಾದ ಇಂಜಿತ ಇಪ್ಪ"

ಇದೇ ವಿಷಯತ್ ರಾಬರ್ಟ್ ಕ್ರಾಂಬಿ, ವೀರರಾಜೇಂದ್ರಂಗ್ ಓರ್ ಅಭಿನಂದನೆರ ಕಾಗದ ಅಯೆಚಿತ್. ಅನ್ನನೆ ಮುಂಬೈಂಜ ಗ.ಡನ್ಯನ್ ಸಾಹೇಬ ರಾಜಂಗ್ ಕಾಗದ ಅಯೆಚಿತಿಂಜತ್.

ವೀರರಾಜೇಂದ್ರ ಇಂಗ್ಲೆಂಡ್‌ಲ್ ಇಂಜ ಈಸ್ಟ್ ಇಂಡಿಯಾ ಕಂಪೆನಿರ ನಿರ್ದೇಶಕಂಗಕ್ ಟಿಪ್ಪು ತನ್ನ ಕೊಲ್ಲುವಕ್ ಪೊರ್‌ಟ ವಿಚಾರತ್‌ನ ಅರಿಚಿಟ್ಟಿತಿಂಜತ್. ಆನಗುಂಡ್ ಅವು ಸಹ ವೀರರಾಜೇಂದ್ರಂಗ್ ಕುಶಿಲ್ ತಂಗಡ ಅಭಿನಂದನೆನ ಕಾಟಿತಿಂಜತ್.

## ನಾಲ್ಕಾಡ್ ಅರಮನೆಲ್ ವೀರರಾಜೇಂದ್ರ ಒಡೆಯಂಡ ಪಟ್ಟಾಭಿಷೇಕ ಪಿಳ್ಳಾ ರಾಣಿ ಮಹಾದೇವಮ್ಮಾಚಿರ ಮಂಗಲ

ವೀರರಾಜೇಂದ್ರ ಒಡೆಯ ಪಿರಿಯಾಪಟ್ಟ ಕೋಟೆಂಜ ತಪ್ಪಾಚಿಟ್ಟಿಂಡ್ ಕೊಡಗ್‌ಕ್ ಬಂದಿತ್ ಅದ್‌ನ ತಾಂಡ ಪುಡ್‌ತಕ್ ಎಡ್‌ತಂಡಪಿಳ್ಳಾ ನಾಲ್ಕಾಡ್ ಯವಕಪಾಡಿಲ್ ಓರ್ ಅರಮನೆ ಕೆಟ್ಟಾಚಿಡುವಕ್ ಸುರು ಮಾಡ್‌ಚಿ. ಈಂಡ ಪಣಿ ಕಲಿಸಂದ 4887ನೆ ರಾಕ್ಸ ಸಂವತ್ಸರ ಎಣ್ಣಕ ಕ್ರಿ.ಶ. 1795ತ್ ತಾಂಡತ್. ಅದೇ ಕಾಲ ವೈಶಾಖ 6ನೆ ಬೊಳ್ಳಾಚಿ ಎಣ್ಣಕ ಏಪ್ರಿಲ್ ತಿಂಗತ್‌ರ ಕನ್ಯಾ ಲಗ್ನತ್ ವೀರರಾಜೇಂದ್ರ ಒಡೆಯ ಶಾಸ್ತ್ರಪೋಲೆ ಅರಮನೆ ಪ್ರವೇಶ ಮಾಡ್‌ಚಿ.

ಇದಾಯಿತ್ ಸುಮಾರ್ ಒಂದರೆ ಕಾಲ ಕೈಂಜಪಿಳ್ಳಾ ವೀರರಾಜೇಂದ್ರ ಅದೇ ಅರಮನೆಲ್ ರಾಜಪಟ್ಟಾಭಿಷೇಕ ಮಾಡಿಯವಕ್ ತಾಂಡ ಸುರೂವೆತ ಪೊಣ್ಣ್‌ಕ್ ಕೊಣ್ಣ ಮಕ್ಕ ಇಲ್ಲತಾನಗುಂಡ್ ದಂಡನೆ ಮಂಗಲ ಕಯ್ಯುವಕ್ ತೀರ್ಮಾನ ಮಾಡ್‌ಚಿ. ಈ ಕಾರ್ಬಾರ್‌ಕ್ ರಾಜ ಸರ್ ರಾಬರ್ಟ್ ಅಮರ್ ಕ್ರಾಂಬಿ, ಮುಂಬೈ ಗ.ಗಜನ್ ಪರಜಂಗ್ ಮುಮ್ಮಾಜ್ ಉದ್ದಾಲ ಡನ್ಯನ್ ಸಾಹೇಬ, ಮಲಬಾರ್ ಕಮಿಷನರ್ ಮುಖ್ಯಸ್ಥ ವಿಲ್ಲನ್

ಸಾಹೇಬ ಪಿಳ್ಳಾ ಚೆನ್ನಂಗ್ ಇಂಗ್ಲೀಷ್ ಸರ್ದಾರಂಗಕ್ ಅಹ್ವಾನ ಪತ್ರಿಕೆ ಅಯೆಚತ್.

ನಾಲ್ಕಾಡ್ ಅರಮನೆರ ಎದಿಕೆ ಪಟ್ಟಿರ ಎಡ್ತೆ ಬರಿಲ್ ತಾಂಡ ರಾಜ ಪಟ್ಟಾಭಿಷೇಕಕೂ, ಮಂಗಲಕೂ ಸ್ಟೇಜ್‌ನ ಪೇರ್ತ್ ಚಾಯಿತೆ ಮಾಡ್‌ಚಿಟ್ಟತ್. ಅಕ್ಕ ಮಾಡ್‌ಚಿಟ್ಟ ಸ್ಟೇಜ್ ಇಂದೇಕೂ ನಾಲ್ಕಾಡ್ ಅರಮನೆರ ಎದಿಕೆ ಪಟ್ಟಿಲ್ ಉಂಡ್.

ವೀರರಾಜೇಂದ್ರಂಡ ಕಾರ್ಬಾರ್ಕ್ ತಲಚೇರಿಂಜ ಇಂಗ್ಲೀಷ್ ಸರ್ದಾರಂಗ್, ಸಿಪಾಯಿಯ ಸರ್ಕಾರತರ ಗುರ್ತಾರ ಬಾವುಟತ್ ನಾಲ್ಕಾಡ್ ಅರಮನೆಕ್ ಬಂದಲ್ಲಿ ರಾಜ ಅಯಿಂಗಳೆಲ್ಲ ದುಂಬ ಕುಶಿಲ್ ತಕ್ಕಾರ ಮಾಡಿಯಂಡತ್. ಅಯಿಂಗಳ್ ಗೌರವ ಕಾಟುವಕ್ ಸಲಾಮ್ ಫಿರಂಗಿನ ಪಾರ್‌ಚಿಟ್ಟತ್. ಅಯಿಂಗಳ್ ಏರ್ಪಾಡ್ ಮಾಡ್‌ನ ಬಿಡಾರತ್ ಅಯಿಂಗಳೆಲ್ಲ ಆಕ್‌ಚಿ. ಅರಮನೆಲ್ ನಡಪ ನಲ್ಲ ಕಾರ್ಬಾರ್ಕ್ ಬಪ್ಪ ಎಲ್ಲ ಜನಳ ತೊಂದರೆ ಪಡ್‌ತತೆ ಒಳ್ಳೆಕ್ ಬುಡುವನ್ನೆ ತಾಂಡ ಉಕ್ಕಡ ಪಾರಕಾರಕ್ ಅಪ್ಪಣೆ ಮಾಡ್‌ಚಿ.

ಆನಗುಂಡ್ ದೇಶತರ ಬೋರೆ ಬೋರೆ ಜಾಗತ್‌ಂಜ ಜನ ಕುಶಿ, ಕುಶಿಲ್ ನಾಲ್ಕಾಡ್ ಅರಮನೆಕ್ ಬಂದಿತ್ ಎತ್ತ್‌ಚಿ. ಬಂದಯಿಂಗಳೆಲ್ಲ ರಾಜ ಅಯಿಂಡಯಿಂಡ ಜಾತಿ, ಅಂತಸ್ತ್ ಒತ್ತನ್ನೆ ತಾಂಡ ಬಿಡಾರತ್ ಆಕ್‌ಚಿ.

ಇನ್ನನೆ ರಾಜ ಪಟ್ಟಾಭಿಷೇಕ ಪಿಳ್ಳಾ ಬೋರೆ ಕಾರ್ಬಾರ್ಕ್ ಬಂದ ಜನಳೆಲ್ಲ ರಾಜ ಕುಶಿಲ್ ಕಂಡಿತ್ 1796ನೆ ಫೆಬ್ರವರಿ ನಾರಾಚಿ ಪೊಲಾಕ ಅಂಜಿ ಗಂಟೆಕ್ ರಾಜ ಪಟ್ಟಾಭಿಷೇಕ ಮಾಡ್‌ಚಿಟ್ಟಂಡತ್. ಬಂದ್ ಕೂಡ್‌ನ ಜನಳೆಲ್ಲ ರಾಜಂಡ ಮಂಡೆಕ್ ಅಕ್ಕಿ ಇಟ್ಟಿತ್, ಕೊದಿ ಮೊದ ಕೊಡ್‌ತ್ ನಲ್ಲಾಮೆ ಬಯಂದಂಡತ್.

ತಾಂಡ ಸುರೂವತ ಪೊಣ್ಣ್‌ಕ್ ಕ್ಕಣ್ಣುಕುಳ್ಳಿ ಇಲ್ಲತಾಂಗ್ ರಾಜ, ಅಂದೇ ಬೈಟ್ ಮಹಾದೇವಮ್ಮಾಜಿನ ಮಂಗಲ ಆಚಿ. ಮಹಾದೇವರಾಣಿರ ಕೆಲತ್ ಪುಟ್ಟುವ ಕ್ಕಣ್ಣುಕುಳ್ಳಿಯ ವೀರರಾಜೇಂದ್ರಂಡ ಪೆದಕೂ, ಗತ್ತ್‌ಕೂ, ರಾಜಪಟ್ಟಕೂ ಹಕ್ಕದಾರಂಗಂದ್ ಎಲ್ಲಾರ್‌ಕೂ ಗೊತ್ತಾಪನ್ನೆ ರಾಜ ಎಳ್ಳಿಚಿಟ್ಟತ್.

ಈ ನೇರತ್ ಟಿಪ್ಪುರ ಜೈಲಂಜ ತಪ್ಪಾಚಿಟ್ಟಂಡ್ ಬಂದ ಬ್ರಿಟಿಷ್ ಸೈನ್ಯಾಧಿಕಾರಿ ನಾಲ್ಕಾಡ್ ಅರಮನೆಕ್ ಬಂದಿತಿಂಜತ್. ಅವ ವೀರರಾಜೇಂದ್ರ ಒಡೆಯನ "A young man buckishly dressed in nankeen pantaloons European boots and a shirt made in the English fashion"ಂದ್ ವರ್ಣನೆ ಮಾಡಿತ್.

**ಟಿಪ್ಪುಸುಲ್ತಾನ, ವೀರ ರಾಜೇಂದ್ರಂಜ ಅಮರಸುಳ್ಳ  
ತಾಂಡದಂದ್ ವಾದ ಮಾಡ್‌ನಲ್ಲಿ ಕಂಪೆನಿ ಸರ್ಕಾರತರ  
ಅಧಿಕಾರಿಯಡ ತೀರ್ಮಾನ**

ಈಂಡೆಡಲ್ ಮಂಗಳೂರ್‌ಲ್ ಇಂಜ ಟಿಪ್ಪು ಸುಲ್ತಾನಂಡ ಅಧಿಕಾರಿ ಅಸಫ್‌ಶೇಖ್ ಶಾಬುದ್ದೀನ್ ತಲಚೇರಿ ಕೋಟೆ ಕಮೀಷನರ್‌ಕ್ ಓರ್ ಕಾಗದ ಎಳ್ಳಿತ್ ಅದತ್ ಕಾಂತಮಂಗಲ, ಕೊಲ್ಲೂರ್ ಬಾಚಿ, ಸುಳ್ಳ ಅಮರಸೀಮೆ ಸುಲ್ತಾನಂಗ್ ಕೂಡಂಡಿಯದ್. ಸುಲ್ತಾನಂಗೂ, ಬ್ರಿಟಿಷಕೂ ವಿರೋಧ ಆನ ನೇರತ್ ಕೊಡಗುರ ರಾಜ ಆ ಸೀಮೆನ ತಾನ್ ಆಕ್ರಮಣ ಮಾಡಿಯಂಡ್ ಉಂಡಂದ್, ಇಕ್ಕ್ ಕಂಪೆನಿ ಸರ್ಕಾರ ಕೊಡಗುರ ರಾಜನುಂಡ್ ಆ ಸೀಮೆನ ಬುಡ್‌ತಿತ್ ತಂಗಕ್ ಕೊಡ್‌ಪ್‌ಚಿಡೊಂಡು. ಇಲ್ಲೇಂಗಿ ತಂಗ ಆ ಸೀಮೆಕ್ ನುಗ್ಗಿತ್ ಕೋಟೆ ಕೆಟ್ಟಿಯವಾಂದ್ ಅರಿಚಿಟ್ಟತ್.

ಇದಂಗ್ ಮಲಬಾರ್ ಕಮೀಷನರ್ ಜಾನ್ ಸ್ಪೆನ್ಸರ್ ಜವಾಬ್ ಅಯೆಚಿತ್ ಚೆನ್ನಂಗ್ ಸಮಯತ್ ಎಣ್ಣಕ 1797ನೆ ಮೇ ತಿಂಗತ್ ಕ್ಯಾಪ್ಟನ್ ಮೆಹೂನಿನ ವೀರರಾಜೇಂದ್ರಂಜ ಪಕ್ಕ್ ಅಯೆಚತ್. ಅವ ಸುಳ್ಳ ಸೀಮೆರ ತೆರಿರ ಮೀದ ಕೊಡಗುರ ಸಂಸ್ಥಾನತರ ಪ್ರತಿನಿಧಿ ಆಯಿತ್ ಆ ಸಂಸ್ಥಾನತರ ಕರಣಿಕ ಸುಬ್ಬಯ್ಯನ ಕೂಟಿಯಂಡ್ ಪೋಯಿತ್ ಅಮರಸುಳ್ಳ ತೆರಿಲ್ ಇಳಾಂಜತ್. ಅಲ್ಲಿ ಸುಲ್ತಾನಂಡ ಅಧಿಕಾರಿ ಮೀರ್ ಅಸಫ್ ಸೇರ್ ಖಾನ್‌ಕ್ ತಾನ್ ಅಲ್ಲಿಕ್ ಬಂದ ಉದ್ದೇಶತನ ಎಳ್ಳಿತ್ ಅಯೆಚತ್. ಅದಂಗ್ ಸೇರ್‌ಖಾನ್ ನಂಗಡ ಬರಿಂಜ ಓರ್ ವಕೀಲನ ಅಯೆಚಿ ತಪ್ಪಿಂದ್ ಎಳ್ಳಿಚಿ.

ಆಚೇಂಗಿ, ಅಕ್ಟೋಬರ್ ಮಂಗಳೂರ್‌ಕ್ ಚೆನ್ನಂಗ್ ಫ್ರೆಂಚ್ ಸರ್ದಾರಂಗ ಬಂದಾನುಂಡ್ ಸೇರ್‌ಖಾನ್‌ಕ್ ಎಂತಾಚೊ, ಇಕ್ಕ್ ಮಳೆಗಾಲ ಪಕ್ಕ್ ಬಾತ್. ಆನಗುಂಡ್ ತೆರಿರ ತಕರಾರ್‌ನ ಮಿಷನ್‌ಕ್ ಕಾರ್ತಿಕ ಮಾಸತ್ ನೋಟಿಯವನಾಂದ್ ದಂಡನೆ ಕುರಿ ಕ್ಯಾ.ಮೆಹೂನಿಕ್ ಎಳ್ಳಿತ್ ಅಯೆಚತ್. ಅಲ್ಲಿಂಜ ಅವ ತಾಂಡ ಸೈನ್ಯತರ ಕೂಡೆ ಜಮಾಲಾಬಾದ್ ಕೋಟೆಕ್ ಪೋಚಿ.

ಅಲ್ಲಿಂಜ ಕ್ಯಾ.ಮೆಹೂನಿ ವೀರರಾಜೇಂದ್ರಂಜ ಪಕ್ಕ್ ಬಂದಿತ್ ನಾಲ್ಕಾಡ್ ಅರಮನೆಲ್ ಮಳೆಗಾಲತರ ದಂಡ್ ತಿಂಗ ಇಂಜತ್. ಕ್ಯಾಲಿಕಟ್ ಪೋಯಿತ್ ಮಲಬಾರ್ ಕಮೀಷನರ್‌ರ ಪಕ್ಕ್ ಪೋಚಿ.

ಕ್ಯಾಲಿಕಟ್‌ಲ್ ಕ್ಯಾ. ಮೆಹೂನಿ ಇಪ್ಪಕ, ಯೂರೋಪ್ ಆಫ್ರಿಕ ಖಂಡತರ ನಡುವೆತ



ಭೂಮಧ್ಯ ಸಮುದ್ರತರ ಟ್ರಫಾಲ್ಗರ್ ಎಣ್ಣುವಲ್ಲಿ ಬ್ರಿಟಿಷ್ ನೌಕಾನಾಯಕ ನೆಲ್ಸನ್ ಎಣ್ಣುವಂವ ಪ್ರೆಂಚಡ ಓರ್ ಬಲ್ಯ ನೌಕಾಪಡೆನ ಚೋಪಾಚಿಟ್ಟಿ ಪರ್ತಮಾನ ಮಲಬಾರ್ ಕಮಿಷನರ್‌ಕ್ ಎತ್ತ್‌ಚಿ. ಇದ್‌ನ ಕ್ಯಾ.ಮೆಹೋನಿ ವೀರರಾಜೇಂದ್ರಂಗ್ ತಂಗಡ ಸರ್ಕಾರತ್ ಭಿನ್ನಭೇದ ಇಲ್ಲತಾಂಗ್ ನಂಗಡ ಮನಸ್ಸಲ್ ಉಳ್ಳ ಕುಶಿನ ನಿಂಗಕ್ ಅರಿಚಿಡುವಕಾಯಿತ್ ಜ. ಹಾರ್ಟ್ಲಿ ಸಾಹೇಬ್ ಬಹಾದ್ದೂರ್‌ರ ಅಪ್ಪಣೆಪೋಲೆ ಎಳ್ಳಿಯೆಂದ್ ಎಳ್ಳಿತ್ ಅಯೆಚತ್.

ಇದ್‌ಂಗ್ ತಾಂಡ ಕುಶಿ ಕಾಟ್‌ನ ವೀರರಾಜೇಂದ್ರ ಒಡೆಯ ತಾನ್ 21 ಕುರಿ ಫಿರಂಗಿನ ಪಾರ್‌ಚಿಟ್ಟಿ ವಿಷಯತ್‌ನ ಮಲಬಾರ್ ಕಮಿಷನರ್‌ಕ್ ಅರಿಚಿಟ್ಟಿತ್.

ಇದೇ ಕಾಲ ಆಶ್ವೀಜ ಮಾಸತ್ ಮಲಬಾರ್ ಕಮಿಷನರ್ ಸೈನ್ಸರ್ ಸಾಹೇಬ ಅಮರಸುಳ್ಳ ಪಿಳ್ಳಾ ಏಳಾಯಿರ ಸೀಮೆ ತೆರಿರ ತೀರ್ಮಾನತರ ಮೀದ ಜೋಸಯ್ಯ ಯೂಟಾಫ್ ಪಿಳ್ಳಾ ಕ್ಯಾ.ಮೆಹೋನಿ ಎಣ್ಣುವ ದಂಡ್ ಅಧಿಕಾರಿಯಳ ವೀರರಾಜೇಂದ್ರಂಡ ಪಕ್ಕ ಅಯೆಚತ್. ಕೊಡಗಲ್ ಅಮರಸುಳ್ಳ, ಏಳಾಯಿರ ಸೀಮೆರ ತೆರಿನ ಅರ್‌ಂಜ ಜನಳ ಅಧಿಕಾರಿಯಡ ಪಕ್ಕ ಅಯೆಕೊಂಡೂಂದ್ ಎಳ್ಳಿತಿಂಜತ್. ಈ ಪೋಲೆ ವೀರರಾಜೇಂದ್ರ ಬಯತಾನ ದಂಡ್ ವ್ಯಕ್ತಿಯಳ ಕರಣಿಕ ಸುಬ್ಬಯ್ಯಂಡ ಕೂಡ ಈ ಬ್ರಿಟಿಷ್ ಅಧಿಕಾರಿಯಡ ಪಕ್ಕ ಅಯೆಚತ್. ಈ ನೇರತ್ ಟಿಪ್ಪು ತಾಂಡ ಬರಿ ವಕೀಲಂಗಳಾನ ಶೇಕ್ ಶ್ಯಾಬುದ್ದೀನ್ ಪಿಳ್ಳಾ ಮೀರ್ ಮಹಮ್ಮದ್ ಆಲಿನ ಅಮರಸುಳ್ಳಕ್ ಅಯೆಚತ್. ಕರಣಿಕ ಸುಬ್ಬಯ್ಯ ತಾಂಡ ಬರಿಯತ ಜನಡ ಕೂಡ ಸುಳ್ಳ ಮಾಗಣೆರ ಸೋಣಂಗೇರಿಲ್ ಒಳ್‌ಂಜತ್. ಪಿತ್ಯಾಂದ್ ಕಂಪೆನಿ ಸರ್ಕಾರತರ ಅಧಿಕಾರಿಯ, ಸುಲ್ತಾನಂಡ ವಕೀಲಂಗ ಕೊಡಗ್‌ರ ರಾಜಂಡ ವಕೀಲಂಗ ಎಲ್ಲ ಕೂಡಿತ್ ಸುಲ್ತಾನಂಡ ಸೀಮೆರ ಒಳ್‌ಲ್ ಇಂಜ ಐವರ್ನಾಡ್ ಎಣ್ಣುವ ಊರ್‌ಲ್ ತಂಗ, ತಂಗಡ ವಾದತ್‌ನ ಮಿಳ್ಳಾಲ್‌ಟ್ಟಿತ್.

ಕೊಡಗ್ ರಾಜಂಡ ವಕೀಲಂಗ ಅಮರಸುಳ್ಳಮಾಗಣೆಲ್ ಅಮರಮಾಗಣೆನ ಇಕ್ಕೇರಿ ಸಂಸ್ಥಾನತರ ಸೋಮಶೇಖರ ನಾಯಕ, ವೀರರಾಜೇಂದ್ರಂಡ ಪೆರಿಯಂಪನಾನ ದೊಡ್ಡವೀರಪ್ಪ ಒಡೆಯಂಗ್ ಪಾಲ್, ನೆಯ್ಯಂದ್ ಬಣ್ಣ ಕೊಡ್‌ತತ್. ಇನ್ನನೆ ಅಮೃತಕ್‌ಂದ್ ಕೊಡ್‌ತ ಮಾಗಣೆರ ಪೆದ ಅಮೃತತ್ ಅಮರ ಆಚಿ, ಅದೇ ನೇರತ್ ತಲಕಾವೇರಿಲ್ ಕಾವೇರಿ ತಾಯಿಕ್ ಪೂಜೆಕ್‌ಂದ್ ತೆಂಗೆ ಕೊಡ್‌ಪಕ್ ಆ ದೇವಡ ಭಂಡಾರತ್‌ಂಜ ಪಣ ಕೊಡ್‌ತಿತ್ ಸುಳ್ಳಮಾಗಣೆನ ದೊಡ್ಡವೀರಪ್ಪ ಒಡೆಯ ಸೋಮಶೇಖರ ನಾಯಕನುಂಡ್ ಎಡ್‌ತಂಡತ್. ಆನಗುಂಡ್ ಈ ದಂಡ್ ಮಾಗಣೆ ಪಂಡ್‌ಂಜೆ ಕೊಡಗ್ ರಾಜಂಗ್ ಕೂಡ್‌ನದ್‌ಂದ್ ವಾದ ಮಾಡ್‌ಚಿ.

ಇದ್ದಾಂಗ್ ಪ್ರತಿ ಆಯಿತ್ ಸುಲ್ತಾನಂಡ ವಕೀಲಂಗ ಕೊಡಗರ ಸಂಸ್ಥಾನತ್‌ಂಜ ದಂಡಾಯಿರ ಜನ ಇಕ್ಕೇರಿ ಸಂಸ್ಥಾನತ್ ಕೆಲಸ ಮಾಡಿಯಂಡ್ ಇಂಜತ್. ಅಯಿಂಗಡ ಸಂಬಳತ್‌ನ ಇಕ್ಕೇರಿ ಸೋಮಶೇಖರ ನಾಯಕ ದೊಡ್ಡ ವೀರವ್ವಂಗ್ ಕೊಡ್‌ತದ್ ಲೆಕ್ಕತೂ ಉಂಡ್ ನೋಟಿಂದ್ ಲೆಕ್ಕತರ ಫೈಲಾನ್ ಕಂಪೆನಿ ಸರ್ಕಾರತ್‌ರ ಅಧಿಕಾರಿಯಕ್ ಕೊಡ್‌ತತ್.

ಕೊಡಗ್ ರಾಜಂಡ ಕಡೆಕಾರ ಈ ಕಾಗದತ್‌ರ ಮಧ್ಯತ್ "ಕೊಡಗ್ ಸಂಸ್ಥಾನತ್‌ರ ದಂಡಾಯಿರ ಜನಡ ಸಂಬಳತ್‌ನ ಇಕ್ಕೇರಿ ಸಂಸ್ಥಾನತ್‌ಂಜ ಬುಟ್ಟ್ ಕೊಡ್‌ತದ್"ಂದ್ ಮೂಂದ್ ಗೆರೆ ತಿಕ್ಕಿತ್ ಎಳ್ವಾನಾನ್ ಕಂಡ್ ಪುಡ್‌ಚಿತ್ "ಈ ಲೆಕ್ಕಪತ್ರತ್‌ನ ತಂಗ ಒತ್ತಪುಲೆ"ಂದ್ ಕಂಪೆನಿ ಸರ್ಕಾರತ್‌ರ ಅಧಿಕಾರಿಯಕ್ ಎಣ್ಣೆಚಿ. ಅಕ್ಕ ಇಂಗ್ಲೀಷ್ ಅಧಿಕಾರಿಯ ಕರಣಿಕ ಸುಬ್ಬಯ್ಯಂಡ ಕೂಡ "ಸುಲ್ತಾನಂಡ ವಕೀಲಂಗ ಎಣ್ಣೆನ್ ತಕ್ಕಲ್ ಸತ್ಯ ಉಂಡ್"ಂದ್ ವೀರ ರಾಜೇಂದ್ರಂಗ್ ಅರಿಚಿಡೊಂಡೊಂದ್ ಎಣ್ಣೆಚಿ.

ಈ ಪೋಲೆ ಕರಣಿಕ, ರಾಜಂಗ್ ಕಾಗದ ಎಳ್ವಾನಾಂಗ್ ವೀರರಾಜೇಂದ್ರ ಜವಾಬ್ ಅಯೆಚತ್.

ಆ ಕಾಗದತ್‌ರ ವಿವರತ್‌ನ ಕರಣಿಕ ಸುಬ್ಬಯ್ಯ ಕಂಪೆನಿ ಸರ್ಕಾರತ್‌ರ ಅಧಿಕಾರಿಯಕ್ ಅರಿಚಿಟ್ಟಿತ್. ಅಕ್ಕ ಅಧಿಕಾರಿಯ ಸುಬ್ಬಯ್ಯನ ಕೂಟಿಯಂಡ್, ಸುಲ್ತಾನಂಡ ಜನ ಇಂಜ ಐವರ್ನಾಡ್‌ಕ್ ಅಂದ್ ಪೊಲಾಕೆ ಪೋಚಿ. ಅಲ್ಲಿ ಅವು ಸುಲ್ತಾನಂಡ ವಕೀಲಂಡ ಕೂಡ ವೀರರಾಜೇಂದ್ರ ಒಡೆಯ ತಾಂಡ ಕಾಗದತ್ ಪ್ರಸ್ತಾಪ ಮಾಡ್‌ನಾನೆ ಕೇಟಿತ್ ಅಯಿಂಗಡ ಸಮಜಾಯಿಸಿಕೆನ ಕೇಟಿತ್.

ಅದ್ದಾಂಗ್ ಇಯಂಗಡ ಬರಿ ದಂಡಾಯಿರ ಜನಕ್ ಸಂಬಳತ್‌ನ ಇಕ್ಕೇರಿಲೆ ಕೊಡ್‌ಪ ಇಂಜತ್. ಸಿನೇತಿಕೆರ ಉದ್ದೇಶತ್ ಕೊಡಗರ ರಾಜಂಗ್ ಅಮರ ಮಾಗಣೆನ ಬುಟ್ಟ್ ಕೊಡ್‌ತತ್.

ಇದ್ದಾಂಗ್ ಯುಟಾಪು ಸಾಹೇಬ ಪಿಳ್ಳಾ ಮೆಹೋನಿ ಸಾಹೇಬ "ಇಕ್ಕೇರಿಕಾರಡ ಪಕ್ಕ ದಂಡಾಯಿರ ಜನ ಚಾಕ್ರಿಲ್ ಇಂಜಾಂಗ್ ಅವು ಸಂಬಳತ್‌ನ ಅಲ್ಲಿಯೆ ಕೊಡ್‌ಪ ಇಂಜತ್. ಇಕ್ಕ ರಾಜಂಡ ಕಡೆ ಜನ ಚಾಕ್ರಿಲ್ ಇಲ್ಲೆ. ಆನಗುಂಡ್ ಸಂಬಳ ಇಲ್ಲೆ. ಸಿನೇತಿಕೆಯಿತ್ ಬುಟ್ಟ್ ಕೊಡ್‌ತ ಜಾಗ ಅಮರಮಾಗಣೆ ನಂಗಕೆ ಕೂಡೊಂಡುಂದ್ ಕೇಪಕ್ ಕಾರಣ ಎನ್ನ್? ನವಾಬ ಹೈದರಾಲಿ ಖಾನ್ ಇಕ್ಕೇರಿ ಸಂಸ್ಥಾನ ಎಡ್‌ತಂಡಪಿಳ್ಳಾ ಚಿತ್ರಭಾಸು ಸಂವತ್ಸರತ್‌ಂಜ ಕೊಡಗರ ಸಂಸ್ಥಾನಕ್ ಸೇರ್‌ನ ಅಮರಸುಳ್ಳ ನಿಂಗಕ್ ಬರೊಂಡೊಂದ್ ವ್ಯಾಜ್ಯ ಪುಡ್‌ಚಿತ್ ಮೊನಿಯಾಂದ್ ಜನಡ ಸಂಬಳತ್‌ರ ಉದ್ದೇಶ ಬುಟ್ಟದೊಂದ್

ಇಕ್ಕ ಕೇಪಕ ಸಂಬಳ ಇಕ್ಕೇರಿಂಜ ಕೊಡ್ತಂಡ್ ಇಂಜತ್ ಎಣ್ಣು  
ಓರಂದ್ ತರ ಪರಂದಂಡ್ ಎಲ್ಲಿಯೊ ತಪ್ಪಿಯಂಡ್ ಉಳ್ಳನ್ನೆ

ಂಗ್ ಟಿಪ್ಪುರ ಕಡೆಕಾರ ಜವಾಬ್ ಕೊಡ್ತಾಲೆ.

ಂಜ "ವಿಳಾಯಿರ ಸೀಮೆರ ತಕ್ರಾರ್ ಎಂತ?"ಂದ್ ಕಂಪೆನಿ  
ಯ ಟಿಪ್ಪುರ ಕಡೆಕಾರಳ ಕೇಟತ್. "ಈ ವಿಷಯತ್ ನಂಗಕ್ ವಿವರ ಗಿ

ಟಾಪು ಪಿಳ್ಳಾ ಮೆಹೋನಿ ಸಾಹೇಬ ನಾಲ್ವಾಡ್ ಅರಮನೆಕ್ ಬ  
ದ್ರ ಒಡೆಯನ ಕಂಡಿತ್ ತೆರಿರ ಮೀದ ನಡಂದ ತಕ್ಕ್ ಬಾಕ್ನೆಲ್ಲ

9ನೆ ಜನವರಿಲ್ ನಂಜರಾಯಪಟ್ಟಕ್ ವೀರ ರಾಜೇಂದ್ರ ಪಿಳ್ಳಾ  
ಕ್ ಪೋಯಿತ್ ಬಾತ್. ಮೆಹೋನಿ ತಡಿಕ್ ಸೌಖ್ಯ ಇಲ್ಲತಾಂಗ  
ಪೇಟೆಲ್ ಇಂಜತ್.

ರಾಜೇಂದ್ರ ಒಡೆಯ ಟಿಪ್ಪು ಸುಲ್ತಾನಂಡ ವಿರುದ್ಧ ಪಡೆ

ಮಾರ್ ಆಂಡೂಂದ್ ಹಿಂದೂಸ್ಥಾನ ಗವರ್ನರ್ ಜನ

ಲಾರ್ಡ್ ಮಾರ್ನಿಂಗ್ಟನ್ ಕಾಗದ ಎಳ್ಳೆನದ್

ರಾಜೇಂದ್ರ ಒಡೆಯ ಯುಟಾಪು ಸಾಹೇಬಂಡ ಕೂಡೆ ನಂಜರ

ಕ್ ಪೋಯಿತಿಪ್ಪಕ ಹಿಂದೂಸ್ಥಾನ ಗ.ಜ.ಲಾರ್ಡ್ ಮಾರ್ನಿಂಗ್ಟನ್ ಎ

ಲ್ಲಿಂಜ ತಾಂಡ ಸರ್ಕಾರತ್‌ಂಜ ಪಣ ಕೊಡತಿತ್ ರೈತಂಗಳುಂಡ್ ಪೇ  
ತಬಪ್ಪಚಿಟ್ಟಿತ್ ಅಲ್ಲಿ ತಾನ್ ಕೆಟ್ಟಚಿಟ್ಟಿ ಗೋಡೌನ್‌ಲ್ ಎಲ್ಲಾನೊ ಕೂ  
ಕಂಡೆಡೆಲ್ ಮುಂಬೈ ಗ. ಡಂಕನ್ ಸಾಹೇಬ ಸೈನ್ಯಕ್ ಬೋಂಡಿಯ  
ತಾನ್ ಕೂಟಿತ್ ಬೆಕ್ಕೊಂಡೂಂದ್ ವೀರ ರಾಜೇಂದ್ರಂಗ್ ಕಾಗದ ಎಳ  
ಪುರ ಕೂಡೆ ಬ್ರಿಟಿಷ್, ಅಯಿಂಗಡ ಸಿನೇತಂಗಳಾನ ಮಹಾರಾಷ್ಟ್ರತರ್  
ಬಾದಾರ ನಿಜಾಮಂಗ ಕೂಡಿತ್ ಪಡೆ ಪೊಕ್ಕೊಂಡೂಂದ್ ತಿ  
ತನಪೋಲೆ ಕೊಡಗರ ರಾಜಂಗ್ ತಂಗಡ ಸೈನ್ಯಕ್ ಬೋಂಡಿಯಾನ  
ತೈ ಎತ್ತಚಿಡೊಂಡೂಂದ್ ಕೇಟಂಡ್ ಕಂಪೆನಿ ಅಧಿಕಾರಿಯ ಮೇ  
ರ ಎಳ್ಳಚಿ.

ಲ್ಲಿಂಜ ಮಲಬಾರ್‌ಕಾಲೆ ಶ್ರೀರಂಗಪಟ್ಟಕ್ ಪೊರ್‌ಟ ಸೈನ್ಯತರ್ ಅಧಿಪ  
ವರ್ಲ್ಡ್ ಸಾಹೇಬ ಇಂಜತ್. ಇಂವ ಮಲಬಾರ್‌ಕ್ ತಾಂಡ ಸೈನ್ಯತೋಡೆ  
ರಾಜೇಂದ್ರಂಗ್ ತಾನ್ ಮುಂಬೈ ಸೈನ್ಯಾಧಿಪತಿ ಆಯಿತ್ ಕೊಡಗ್‌ಕ್  
ರ ಕಾಂಬಿಂದೂ, ತಾಂಡ ಸೈನ್ಯಕ್ ಬೋಂಡಿಯಾನ ಸಾಮಾನ್‌ರ ಕೂಟ  
ತೊ ತರೊಂಡೂಂದ್ ಕೇಟಂಡ್ ಕಾಗದ ಅಯೆಚತ್.

ಲ್ಲಿಂಜ ವೀರರಾಜೇಂದ್ರ ಮಲಬಾರ್‌ಂಜ ಬಪ್ಪ ಕಂಪೆನಿ ಸೈನ್ಯ-ಒಳ್ಳಂಜ  
ಕ್ ಕೊಡಪ ಅಕ್ಕಿ ಪಿಳ್ಳಾ ಬೋರೆ ಸಾಮಾನ್‌ನ ಕೂಟಿತ್ ಬೆಪ್ಪಕ್ ಮನೆ  
ನಿ ಸರ್ಕಾರತ್‌ರ ಇಂಜಿನಿಯರ್ ಕ್ಯಾ. ಜಾನ್ಸನ್ ಸಾಹೇಬಂಗ್ ಸುಮಾರ್  
ಅಯೆಚತ್. ಅನ್ನನೆ ಅಂಜಿ ಆನೆಯಳ ಜ. ಸ್ಪೂವರ್ಲ್ಡರ ಪಕ್ಕ ಅಯೆಚ

ಈ ನೇರತ್ ವೀರರಾಜೇಂದ್ರ ಕಂಪೆನಿ ಸೈನ್ಯಕ್ ಕೂಟಿ ಬೆಪ್ಪ ಸಾ  
ಡಬಂದಿತ್, ತಂಗಡ ಪುಡ್‌ತತ್ ಚಿಚ್ಚಂಡ್ ರಶೀತಿ ಕೊಡಪಕ್ ಪಿಳ್ಳ  
ಕತೆನ ರಾಜಂಗ್ ಅರಿಚಿಡುವಕ್ ಅವಂಡ ರಾಜ್ಯತ್ ಕಂಪೆನಿ ಸರ್ಕಾರ  
ನ ಬೆಕ್ಕೊಂಡೂಂದ್ ಹಿಂದೂಸ್ಥಾನ ಗವರ್ನರ್ ಜನರಲ್‌ರ ಆದ  
ಮಾರ್‌ರ ಕಮಿಷನರ್ ಸೈನ್ಯರ್ ಸಾಹೇಬ ವೀರರಾಜೇಂದ್ರ, ಸಿನೇತ ಕ್ಯಾ.ವೆ

## ಬ್ರಿಟಿಷ್ ಸೈನ್ಯ ಮೈಸೂರ್‌ಗೆ ಪೋಷಕ ಕೊಡಗು ಬಂದದ್ದು

ಕ್ಯಾ. ಮೆಹೋನಿ ಕೊಡಗುಲ್ ಕಂಪೆನಿ ಸರ್ಕಾರದ ವಕೀಲ ಆಯಿತ್ ನಿಂದ ಚೆನ್ನಂಗ್ ದಿನತ್ ಸ್ಕೂವರ್ತ್ ಜನರಲ್ ಹಾರ್ಟ್ ಕಂಪೆನಿ ಸರ್ಕಾರದ ಸೈನ್ಯ ಎಡ್‌ತಂಡ್ ತಲಚೇರಿಂಜ ಪೊರಾಟಿತ್ ಪೆಗ್ಗಲಕ್ ಎತ್ತಚಿ. ವೀರರಾಜೇಂದ್ರ ಇಲ್ಲಿ ಇಂಗ್ಲೀಷ್ ಸೈನ್ಯಾಧಿಕಾರಿಯಳ ಕಂಡಿತ್ ತಕ್ ಪರಂದತ್. ಇಂಗ್ಲೀಷ್ ಸೈನ್ಯಾಧಿಕಾರಿಯ ವೀರ ರಾಜೇಂದ್ರಂಡ ಗೌರವಕ್ ಸಲಾಂ ಫಿರಂಗಿನ ಪಾರ್‌ಚಿಟ್ಟಿತ್. ಅಲ್ಲಿಂಜ ಕಂಪೆನಿ ಸರ್ಕಾರದ ಸೈನ್ಯ ವೀರರಾಜೇಂದ್ರ ಪೇಟೆಕ್ ಬಾತ್.

ಅಲ್ಲಿ ಕಂಪೆನಿ ಸರ್ಕಾರಕ್ ಕೊಡಪಕ್ ಗೋಡಾನ್‌ಲ್ ಕೂಟಿ ಬೆಚ್ಚಿತಿಂಜ ನಾವದ್‌ಆಯಿರ ಬಟ್ಟಿ ಅಕ್ಕಿನ ಜ. ಸ್ಕೂವರ್ತ್ ನೋಟಿತ್ "ನಂಗ ಎಣ್ಣಾನಾಂಗಂಜ ಪತ್ತ ಪಾಲ್ ಏರ ಅಕ್ಕಿನ ಕೂಟಿ ಬೆಚ್ಚಿತ್ತುಳ್ಳಿರ. ಇಚ್ಚಕ್ ಬಲ್ಮ ಉಪಕಾರ ಮಾಡುವಿರಾಂದ್ ನಂಗ ಸೊಪನತೂ ಗೇನ ಮಾಡಿತಿಂಜಲೆ. ಈ ಕೆಲಸ ಬೋರೆ ದಾರ್‌ಸುಂಡೂ ಆಪಕಿಂಜಲೆ. ನಿಂಗಲುಂಡ್ ನಂಗಕ್ ಬಲ್ಮ ಉಪಕಾರ ಆಚಿ"ಂದ್ ರಾಜಂಗ್ ಎಣ್ಣಚಿ.

ಅಲ್ಲಿಂಜ "ಇಂಗ್ಲೀಷ್ ಸೈನ್ಯದ ಸಾಮಾನ್‌ಲ್ಲ ಮಲಯಾಳಕಾರ ಕುಂದ್ ಕಾದಲ್ ಉಳ್ಳ ಪೊಳೆರ ಪಕ್ಕ ಇಟ್ಟಿತ್. ಅದ್‌ನ ಪೆಗ್ಗಲದ್ ಗೋಡಾನ್‌ಕ್ ಆಪಚ್ಚಕ್ ಬೆರಿಯ ಕೊಂಡಬಂದಿತ್ ಇಡುವಕ್ ಆಳ ಪಿಳ್ಳಾ ಅತ್ತಳ ಕೊಡಗಂಜ ಅಯೆಚಿ ತರೊಂಡೂ"ಂದ್ ಕೇಟಂಡತ್.

ಅನ್ನನೆ ರಾಜ ತಾಂಡ ಪಕ್ಕ ಇಂಜ ಆಳ ಪಿಳ್ಳಾ ಅತ್ತಳ ಅಯೆಚಿ ಕೊಡತತ್.

ಆಚೇಂಗಿ, ಜ. ಸ್ಕೂವರ್ತ್‌ರ ಬೋಡಿಕೆ ಇಲ್ಲಿಕೆ ತೇಂದ್‌ಲೆ. "ನಾಡ ಪಕ್ಕ ಉಳ್ಳ ಅತ್ತ ದುಂಬ ಲಾಚಾರ್ ಆನಾಂಗ್ ಫಿರಂಗಿ ಗಾಡಿನ ಬಲಿಪಕ್ ಕಷ್ಟ ಆಯಿತ್. ಆನಗುಂಡ್ ನಿಂಗಡ್‌ ನಲ್ಲ ತಾಕತ್ತ ಉಳ್ಳ ಅತ್ತಳ ಅಯೆಚಿತಾರಿ"ಂದ್ ಕೇಟತ್.

ರಾಜ ತಾಂಡ ಕೈಲಾಪ ಸಹಾಯ ಮಾಡ್‌ನಪಿಳ್ಳಾ ಜ. ಸ್ಕೂವರ್ತ್‌ರ ಸೈನ್ಯ ಕರಡಿಗೋಡ್ ಮಾಳಕ್ ಎತ್ತಚಿ. ರಾಜನೂ ಅಯಿಂಗಡ ಕೂಡೆ ಈ ನೇರತ್ ಪೋಯಿತಿಂಜತ್.

ಈಂಡೆಡೆಯ ಮಲಬಾರ್ ಕೊಡಗುರ್ ತೆರಿ ಕಲ್ಲ್ ಪೊಳೆರ ಪಕ್ಕ ಬೆಚ್ಚಿತಿಂಜ ಕಂಪೆನಿ ಸೈನ್ಯದ ಸಾಮಾನ್‌ಲ್ಲ ಪಾರ ಇಂಜ ಜನಡ ಮೀದ ಮಲಯಾಳಕಾರ ಬರಿಂಜ ಬಂದ ಮಾಪಳೆಯ ಬೋಡಿ ಬೆಚ್ಚಿತ್ ಚೆನ್ನಂಗ್ ಸಾಮಾನ್‌ನ ಒರಾತತ್ ಎಡ್‌ತಂಡ್ ಪೋಚಿ.

ಈ ಸುದ್ದಿ ಕೊಡಗುಲ್ ಇಂಜ ಜ. ಸ್ಕೂವರ್ತ್‌ಕ್ ಗೊತ್ತಾನದೆ, ವೀರರಾಜೇಂದ್ರಂಗ್



"ಜನಳ ಅಯೆಚಿತ್ ಸಾಮಾನ್ ಕಡ್ತುವಕ್ ಸಹಾಯ ಮಾಡೊಂಡೂ"ಂದ್ ಕೇಟಂಡತ್.

ಅಕ್ಕ ರಾಜ ಮುನ್ನೂರ್ ಜನ ಕೊಡಗುಕಾರಳ ಅಲ್ಲಿಕ್ ಸಾಮಾನ್ ಕಡ್ತುವಕ್ ಅಯೆಚಿತ್. ಅಲ್ಲಿ ಗಲಾಟೆ ಮಾಡ್ತನ ಮಾಪಳಿಯಳ ಓಡ್ಚಿಟ್ಟಿದೆ ಕೊಡಗುರ ಜನ ಸಾಮಾನ್ನೆಲ್ಲ ಕಡ್ತುಚಿ.

ಜ.ಸ್ಕೂವರ್ತ್ ಕೇಟಂಡಪೋಲೆ ಕಾಯಿಲಕಾರಳ ಆಕುವಕ್ ಓರ್ ಮನೆ ಕೆಟ್ಟುಚಿಟ್ಟಿ ವೀರರಾಜೇಂದ್ರ ಆ ಜನಕ್ ಬೋಂಡಿಯಾನ ಸಾಮಾನ್ ಕೊಡ್ತಿತ್ ಆರೈಕ್ ಮಾಡುವಕ್ ಪೇಟೆರ ಸುಬೇದಾರಂಗ್ ಅಪ್ಪಣೆ ಮಾಡ್ಚಿ.

ಅಕ್ಕಣೆಕ್ ಟಿಪ್ಪು, ಮಲಯಾಳತರ ಕೋಟೆ ರಾಜಂಗ್ ಚೆನ್ನಂಗ್ ಜನಳ ಕೂಟಿಯಂಡ್ ಕುಟ್ಟಿಕಾಲೆ ಕೊಡಗುಕ್ ನುಗ್ಗುವನ್ನಕೆ, ಐಗೂರ್ ಕೃಷ್ಣಪ್ಪ ನಾಯಕಂಗ್ ಮಂಜರಾಬಾದ್ಂಜ ಪೊರಟಿತ್ ಉತ್ತರ ದಿಕ್ಕುಂಜ ಕೊಡಗುಕ್ ನುಗ್ಗುವನ್ನಕೆ ಅಪ್ಪಣೆ ಕೊಡ್ತತ್. ಇದ್ನರಂಜ ಜ. ಸ್ಕೂವರ್ತ್, ವೀರರಾಜೇಂದ್ರ ಒಡೆಯಂಗ್ ತಾಂಡ ಸೈನ್ಯತರ ಕೂಡ ರಾಜಂಡ ಸೈನ್ಯ ಬಪ್ಪದ್ ಬೋಂಡಾಂದ್, ಅವ ತಾಂಡ ಜನಳ ಕೊಡಗುರ ಎಲ್ಲಾ ಬರಿಲ್ಲಾ ಆಕಿತ್ ತೆರಿನ ಭದ್ರ ಪಡ್ತೊಂಡೂಂದ್ ಎಣ್ಣೆಚಿ. ಈ ಪೋಲೆ ರಾಜ ಕೋಟೆರಾಜ ನುಗ್ಗುವಕ್ ಗೇನ ಮಾಡ್ತನ ಕುಟ್ಟಿ ಪಿಳ್ಳಾ ಯಡವನಾಡ್ಲಾ ಚೆನ್ನಂಗ್ ಜನಳ ಆಕಿತ್ ತೆರಿನ ಭದ್ರ ಪಡ್ತುಚಿ.

ಈ ನೇರ ಎಣ್ಣಕ 1799ನೆ ಇಸವಿ ಮಾರ್ಚಿ ತಿಂಗತ್ ಹಿಂದೂಸ್ಥಾನತರ ಗವರ್ನರ್ ಜ.ಲಾರ್ಡ್ ಮಾರ್ನಿಂಗ್ಸನ್ ವೀರರಾಜೇಂದ್ರಂಗ್ ಇಸ್ತಿಹಾರ್ ನಾಮೆನ ಅಯೆಚಿತ್.

ಟಿಪ್ಪು ಎದಿಕೆ ಕಾಂಬಕ ಬ್ರಿಟಿಷ್ ಸರ್ಕಾರತರ ಕೂಡೆ ಸಿನೇತಂಡನ್ನಕೆ ಇಂಜಂಡ್ ಒಳೀಯ ವಿರೋಧಿ ಆಯಂಡ್ ಪ್ರೆಂಚಡ ಕೂಡೆ ಸಿನೇತಿಕೆಲ್ ಇಂಜಂಡ್ ತಾಂಡ ಸೈನ್ಯತನ ಬಲ ಪಡ್ತಿಯಂಡ್ ಉಂಡ್. ಆನಗುಂಡ್ ತಾನ್ ಎಳ್ಳೊನ ಕಾಗದಕ್ ಜವಾಬ್ ತರತೆ ನೆಂವನ ಎಣ್ಣೆಯಂಡ್ ಉಂಡ್ಂದ್ 1799ನೆ ಫೆಬ್ರವರಿಲ್ ಕಾಟಿತಿಂಜತ್.

## ಕಂಪೆನಿ ಸರ್ಕಾರ ಮಿತ್ರ ರಾಷ್ಟ್ರಕಾರಳ ಕೂಟಿಯಂಡ್ ಟಿಪ್ಪುರ ಕೂಡೆ ಪಡೆ ಪೊಪ್ಪುಕ್ ಮೊಳಿ

ಶ್ರೀರಂಗಪಟ್ಟ ಒಪ್ಪಂದ ಪರಿಣಾಮ ಟಿಪ್ಪು ತಾಂಡ ರಾಜ್ಯತರ ಚೆನ್ನಂಗ್ ಭಾಗತನ ಇಂಗ್ಲೀಷ್‌ಕಾರಕೂ, ಅಯಿಂಗಡ ಮಿತ್ರ ರಾಷ್ಟ್ರಕೂ ಬುಟ್ಟ್ ಕೊಡ್‌ಕಂಡಿಯದೆ ಅಲ್ಲತೆ ಅಯಿಂಗಡ ಪಡೆರ ಖರ್ಚಿಕ್ ಮೂಂದರೆ ಕೋಟಿ ಉರ್‌ಪಿಯತ್‌ನ ಕೊಡ್‌ಕಂಡಿಯಾಚಿ. ಇಚ್ಚೆಕೆ ಅಲ್ಲತೆ ಆ ಪಣ ಇಂಗ್ಲೀಷ್‌ಕಾರಕ್ ಪೂರ್ತಿ ಕ್ಲೆಪ್ಪಣೆಕ್ ಸುಲ್ತಾನ ತಾಂಡ ದಂಡ್ ಮಕ್ಕಳ ಕಂಪೆನಿ ಸರ್ಕಾರಕ್ ಜವಾಬ್ದಾರಂಗಲಾಯಿತ್ ಅಯೆಕಂಡಿಯಾಚಿ. ಈ ಒಪ್ಪಂದತಂಜ ದುಂಬ ನಷ್ಟ ಪಿಳ್ಳಾ ಅವಮಾನಕ್ ಎಡೆಯಾನ ಸುಲ್ತಾನ ಅಂದಾಂಜೆ ಇಂಗ್ಲೀಷ್‌ಕಾರಡ ಮೀದ ಏರ ಪಗೆ ಬೆಪ್ಪಕೂಡ್‌ಚಿ. ಇಂಗ್ಲೀಷ್‌ಕಾರಡ ಪುಡ್‌ತ ತಪ್ಪಿಚಿಟ್ಟವಕ್ ಅಯಿಂಗಕ್ ಕೊಡ್‌ಕಂಡಿಯ ಪಣತನ 1794ತ್ ಕೊಡ್‌ತಿತ್ ತಾಂಡ ಮಕ್ಕಳ ಬಯ್ಯಕ್ ಪಡ್‌ಂದತ್.

ಇದಾನಪಿಳ್ಳಾ ಸುಲ್ತಾನ ಇಂಗ್ಲೀಷ್‌ಕಾರಳ ಹಿಂದೂ ಸ್ಥಾನಂಜ ಪೊರ್‌ಮೆ ಇಡುವಕ್ ಬೋರೆ ರಾಷ್ಟ್ರಕಾರಡ ಕೂಡೆ ಮೈತ್ರಿ ಒಪ್ಪಂದ ಮಾಡಿಯಂಡ್ ಅಯಿಂಗಡ ಸಹಾಯ ಪಡ್‌ಂದವಕ್ ನೋಟಾಚಿ. ಈ ಸಮ್ಮಂಧ ತುರ್ಕಿ ಸುಲ್ತಾನ ಪಿಳ್ಳಾ ಕಾಬೂಲ್‌ರ ಅಮೀರಂಡ ಆಸ್ಥಾನಕ್ ತಾಂಡ ರಾಯಭಾರಿಯಳ ಅಯೆಚತ್. ಅರೇಬಿಯ, ಪರ್ಶಿಯ, ಮಸ್ಕಟ್ ರಾಜ್ಯತರ ರಾಜಂಗ್ ಕಾಗದ ಅಯೆಚತ್. ಡೆಲ್ಲಿ, ಲಕ್ನೋ, ಹೈದ್ರಾಬಾದ್, ಪೂನಾತ್ ತಾಂಡ ವಕೀಲಂಗಳ ನೇಮಕ ಮಾಡ್‌ಚಿ. ಫ್ರೆಂಚಡ ಸಹಾಯ ಕೇಟತ್. ಫ್ರೆಂಚಕ್ ಕೂಡ್‌ನ ಹಿಂದೂಸಾಗರತ್ ಉಳ್ಳ ಮೋರಿಷಿಯಸ್ ದ್ವೀಪತ್ ಸುಲ್ತಾನಂಡ ಸಹಾಯಕ್ ಓರ್ ಸೈನ್ಯ ತಯಾರ್ ಆಯಿತುಂಡ್ ಎಣ್ಣುವ ವರ್ತಮಾನ ಕೇಟಿತ್ ಅಲ್ಲಿಕ್ ಸುಲ್ತಾನ ತಾಂಡ ದಂಡ್ ವಕೀಲಂಗಳ ಅಯೆಚತ್.

1798ನೆ ಜನವರಿಲ್ ಆ ದ್ವೀಪಕ್ ಎತ್ತನ ಸುಲ್ತಾನಂಡ ವಕೀಲಂಗಳ ಅಲ್ಲಿಯತ ಗವರ್ನರ್ ಮಲ್ಲಾರ್‌ಚಿಕ್ಕ ಗೌರವತ್ ತಕ್ಕಾರ ಮಾಡ್‌ಚಿ. ತಾಂಡ ಜನಕ್ ಸುಲ್ತಾನಂಡ ರಾಜ್ಯಕ್ ಪೋಯಿತ್ ಅವಂಗ್ ಸಹಾಯ ಮಾಡುವನ್ನೆಕೆ ಓರ್ ಬಹಿರಂಗ ಘೋಷಣೆ ಪೊರ್‌ಡ್‌ಚಿಟ್ಟತ್. ಆಚೀಂಗಿ, ಸುಲ್ತಾನಂಡ ವಕೀಲ ಗೇನ ಮಾಡ್‌ನನ್ನೆಕೆ ಅಲ್ಲಿ ತರಬೇತಿ ಪಡ್‌ಂದ ಸೈನ್ಯ ಇಂಜಾಲೆ. ಅವು ಶ್ರೀರಂಗಪಟ್ಟಕ್ ವಾಪಾಸ್ ಬಪ್ಪಕ ಅಯಿಂಗಡ ಕೂಡೆ ದಂಡ್ ಫ್ರೆಂಚ್ ಅಧಿಕಾರಿಯ 94 ಜನ ಫ್ರೆಂಚ್ ಪಿಳ್ಳಾ ದ್ವೀಪವಾಸಿಯ ಮಾತ್ರ ಶ್ರೀರಂಗಪಟ್ಟಕ್ ಬಾತ್. ಅಲ್ಲಿಕ್ ಬಂದ ಫ್ರೆಂಚ್ ಅಧಿಕಾರಿಯ ರಾಜಂಗಳ ಎಡ್‌ತಿತ್ ಜನಡ ಅಳ್ವಿಕೆನ ಸ್ಥಾಪನೆ ಮಾಡುವ ಉದ್ದೇಶತ್ ಫ್ರಾನ್ಸ್‌ಲ್ ಆದ್ಯ ಸ್ಥಾಪನೆ ಆನ

ಜಾಕೋಬಿನ್ ಕ್ಲಬ್‌ರನ್ನು ಓರ್ ಸಂಸ್ಥೆನ ಶ್ರೀರಂಗಪಟ್ಟಣ ಸ್ಥಾಪನೆ ಮಾಡ್‌ಚಿ.

ರಾಜಂಗಳ ಉಳ್ಳಪುವ ಚಳುವಳಿ ಇಂಗ್ಲೀಷ್‌ಕಾರಕ್ ವಿರೋಧ ಆಯಿತ್ ಮಾತ್ರ ಆನದೊಂದ್ ಗೇನ ಮಾಡ್‌ನ ಸುಲ್ತಾನ ತಾನ್ ನಾಗರಿಕ ಟಿಪ್ಪು ಸುಲ್ತಾನ ಆಯಿತ್ ಆ ಸಂಸ್ಥೆರ ಸದಸ್ಯ ಆಚಿ. ಅದೇ ಕಾಲ ಸುಲ್ತಾನ, ಫ್ರೆಂಚ್ ಅಧಿಕಾರಿ ದುಬಕ್‌ರ ಕೂಡೆ ತಾಂಡ ದಂಡ್ ರಾಯಭಾರಿಯಳ ಫ್ರಾನ್ಸ್‌ರ ರಾಜ್ಯಾಡಳಿತ ಮಂಡಳಿಕ್ ಅಯೆಚತ್. ಫ್ರೆಂಚ್‌ರ ಸೈನ್ಯಾಧಿಕಾರಿ ನೆಪೋಲಿಯನ್ ಬೊನಾಪಾರ್ಟ್‌ನ ಈಜಿಪ್ಟ್‌ಕ್ ತಾಂಡ ಸೈನ್ಯತ್‌ನ ಎಡ್‌ತಂಡ್ ಬಂದಿತಿಂಜತ್.

ಹಿಂದೂಸ್ಥಾನತ್‌ರ ಗ.ಜನರಲ್‌ಕ್ ಟಿಪ್ಪು ತಂಗಡ ವಿರೋಧ ಮಾಡಿಯಂಡ್ ಇಂಜ ಪಡೆರ ಸಿದ್ಧತೆ ಫ್ರೆಂಚ್‌ರ ಕೂಡೆ ನಡೆತುವ ಇಂಜ ಮೈತ್ರಿ ಸಂಧಾನ ಅರ್‌ಂಜಂಡ್ ಕೂಡೆನ್ನೆ ಅವ ತಂಗಡ ರಾಜಂಗಳ್ ಎಳ್ವೆಚಿ. ಅದೇ ಕಾಲ ನವೆಂಬರ್ 1798ಲ್ ಗ.ಜ.ಟಿಪ್ಪು ಮಾಡಿಯಂಡ್ ಇಂಜ ಪಡೆರ ತಯಾರಿಕ್ ಬೇಜಾರ ಮಾಡಿಯಂಡ್ ತಾಂಡ ಪಳಿಯ ಒಪ್ಪಂದತ್‌ನ ಸೆರಿ ಮಾಡಿಯವಕ್ ಮೇ.ಡಾಟನ್‌ನ ಸುಲ್ತಾನಂಡ ಪಕ್ಕ ಅಯೆಪಿಂದ್, ಸುಲ್ತಾನ ಎಕ್ಕ ಅವನ ತಕ್ಕರಿಚಿಡುವ ಎಣ್ಣುವಾನ ತಾಂಗ್ ಅರಿಚಿಡೆಂಡೊಂದ್ ಸುಲ್ತಾನಂಗ್ ಕಾಗದ ಎಳ್ವಿತ್ ಅಯೆಚತ್.

ಇದೊಂಗ್ ಟಿಪ್ಪು "ಸುರೂಲ್ ಮಾಡಿಯಂಡ ಒಪ್ಪಂದ ಬೋಂಡಿಯಾನ ಭದ್ರತ್ ಉಂಡ್. ಆನಗುಂಡ್ ಏರ ನಿರ್ಧಾರತ್‌ರ ಅವಶ್ಯಕತೆ ಇಲ್ಲೆ"ಂದ್ ಜವಾಬ್ ಕೊಡ್‌ತತ್.

ಲಾರ್ಡ್ ಮಾರ್ನಿಂಗ್ಸನ್ ಪುನಾದಿಯ ಡಿಸೆಂಬರ್ 10ತ್ ಸುಲ್ತಾನಂಗ್ ಕಾಗದ ಎಳ್ವಿತ್ ಮೊರಿಶೀಯಸ್ ದ್ವೀಪಕ್ ಅಯೆಚ ವಕೀಲಂಗಳ ಅಯೆಚಿತ್ ಫ್ರೆಂಚ್ ಜನಳ ಶ್ರೀರಂಗಪಟ್ಟಣಕ್ ಕಾಕಿಯಂಡಾನ ಪ್ರಸ್ತಾಪ ಮಾಡಿತಿಂಜತ್. ಅದತ್ ತಾನ್ ಆ ತಿಂಗ ಆಖೀರಕ್ ಚೆನ್ನೈಕ್ ಎತ್ತುವೀಂದ್, ಅಲ್ಲಿ ತಾಂಗ್ ಕೊಟ್ಟುವನ್ನೆ ಜವಾಬ್ ತರೊಂಡೊಂದ್ ಎಳ್ವಿತಿಂಜತ್.

ಅನ್ನನೆ ಡಿಸೆಂಬರ್ ಆಖೀರಕ್ ಚೆನ್ನೈ ಎತ್ತುವಕ ಸುಲ್ತಾನ ಎಳ್ವಿನ ಕಾಗದ ಕೊಟ್ಟೆಚಿ. ಅದತ್ ಸುಲ್ತಾನ ನೈಲ್‌ಪೊಳೆರ ನೌಕಾ ಪಡಲ್ ಇಂಗ್ಲೀಷ್‌ಕಾರ, ಫ್ರೆಂಚ್‌ರ ಮೀದ ಗೆಲುವಡೊಂದೊಂಗ್ ತಾಂಡ ಕುಶಿನ ಕಾಟ್‌ಚಿ. ಮೊರಿಶೀಯಸ್ ದ್ವೀಪಕ್ ವ್ಯಾಪಾರಕಾಯಿತ್ ತಾಂಡ ರಾಜ್ಯತ್‌ರ ವರ್ತಕಂಗೆ ಪೋಯಿತಿಂಜವು ವಾಪಾಸ್ ಬಪ್ಪಕ ಸುಮಾರ್ ನಾಪದ್ ಫ್ರೆಂಚ್ ಪಿಳ್ಳಾ ಬೋರೆ ದ್ವೀಪವಾಸಿಯಳ ಕೂಟಿಯಂಡ್ ಬಾತ್‌ಂದ್ ಎಣ್ಣೆಚಿ.



ಇದ್ದಾಂಗ್ ಗ.ಜ. ಮೊರೀಶಿಯಸ್‌ರ ಗವರ್ನರ್ ಟಿಪ್ಪುಕ್ ಇಂಗ್ಲೀಷ್‌ಕಾರಡ ವಿರೋಧ ಆಯಿತ್ ಸಹಾಯ ಮಾಡುವಂದ್ ಪೊರ್ಡ್‌ಚಿಟ್ಟು ಘೋಷಣೆನ ಉಲ್ಲೇಖಮಾಡಿತ್ ಅಂವ ಎಳ್ಳೊನಾತ್ ಸತ್ಯಾಂಶ ಇಲ್ಲೆಂದ್ ಕಾಗದ ಎಳ್ಳೊಚಿ.

ಈಂಡೆಡೆಲ್ ಸುಲ್ತಾನ ಫ್ರೆಂಚಿಳುಂಡ್ ಏರ ಸೈನ್ಯತರ ಸಹಾಯ ಕ್‌ಟ್ಟೊಂದ್ ಗೇನ ಮಾಡಿತಿಂಜತ್. ಅದೇ ಕಾಲ ಫೆಬ್ರವರಿಲ್ ಈಜಿಪ್ಟ್‌ನುಂಡ್ ಜ. ಬೊನೋಪಾರ್ಟ್ ತಾನ್ ಸುಲ್ತಾನನ ಇಂಗ್ಲೀಷ್‌ಕಾರಡ ಬಂಧನತ್‌ಂಜ ಬುಡ್‌ತೊಂಡೊಂದ್ ಉಳ್ಳ, ಆಂಗ್ ವಿಚಾರ ಮಿನಿಮಯ ಮಾಡುವಕ್ ಸುಲ್ತಾನಂಡ ಓರ್ ಆಪ್ತ ರಾಯಭಾರಿನ ಗುಟ್ಟಾಯಿತ್ ಕೈರೊಟೊನ್‌ಲ್ ಕಾಂಗೊಂಡೊಂದ್ ಎಳ್ಳಿತಿಂಜತ್.

ಟಿಪ್ಪು ತಂಗಕ್ ವಿರೋಧ ಆಯಿತ್ ಪಡೆರ ತಯಾರಿ ಮಾಡಿಯಂಡ್ ಉಂಡ್‌ಂದ್ ಮಿಳ್ಳಾಲೆ ಅರ್‌ಂಜ ಗ.ಜನರಲ್ ಚೆನ್ನೈ ಬರಿಂಜ ಜ.ಹ್ಯಾರಿಸ್‌ರ ಪುಡ್‌ತತ್ ಸೈನ್ಯ, ಸುಲ್ತಾನಂಡ ರಾಜ್ಯತರ ತೆರಿಕ್ ಪೋಯಿತ್ ಒಳಿಯುವನ್ನಕೆ ಅಪ್ಪಣೆ ಮಾಡ್‌ಚಿ. ಆ ಪೋಲೆ ಸ್ಪೂವರ್ತರ ಸೈನ್ಯ ಮಲಬಾರ್‌ಂಜ ಕೊಡಗ್‌ಕ್ ಬಂದಿತ್ ಕರಡಿಗೋಡ್ ಮಾಳತ್ ಇಂಜತ್. ಅಕ್ಕ ಟಿಪ್ಪುರ ಕಾಗದ ಲಾರ್ಡ್‌ಮಾರ್ನಿಂಗ್ಟನ್‌ಕ್ ಕ್‌ಟ್ಟಿತ್ ಅಂವ ಸುಲ್ತಾನಂಡ ವಿರುದ್ಧ ಪಡೆನ ಘೋಷಣೆ ಮಾಡ್‌ಚಿ.

### ಟಿಪ್ಪು ಸುಲ್ತಾನಂಡ ಕೂಡೆ ಸಿದ್ಧೇಶ್ವರ ಕುಂದ್‌ಲ್ ಪಡೆ

ವೀರರಾಜೇಂದ್ರ ಒಡೆಯ ಜನರಲ್ ಸ್ಪೂವರ್ತರ ಕೂಡೆ ಕರಡಿಗೋಡ್ ಮಾಳಕ್ ಪೋಯಿತಿಂಜತ್. ರಾಜ ಅಲ್ಲಿ ಇಪ್ಪಕ ಹಿಂದೂಸ್ಥಾನತರ ಗವರ್ನರ್ ಜನರಲ್ ಟಿಪ್ಪುಕ್ ಎಳ್ಳೊನ ಕಾಗದತರ ಕಾಪಿ ಪಿಳ್ಳಾ ಇಂಗ್ಲೀಷ್‌ಕಾರ ಪಡೆ ಘೋಷಣೆರ ಕಾಪಿನ ಜ. ಸ್ಪೂವರ್ತರ ಪಿಳ್ಳಾ ಕ್ಯಾ. ಮೆಹೋನಿ ಕೊಡ್‌ತತ್. ಅಲ್ಲಿಂಜ ರಾಜ, ಕ್ಯಾ. ಮೆಹೋನಿ ದಂಡ್, ಮೂಂದ್ ಜನ ಇಂಗ್ಲೀಷ್ ಸರ್ದಾರಂಗ ಕಾಲಯುಕ್ತಿ ಮಾಘ ಬಹುಳ 30 ಚೊವ್ವಾಚೆ ಎಣ್ಣಕ 1799ನೆ ಇಸವಿ ಮಾರ್ಚಿ ಸುರೂಲ್ ಸಿದ್ಧೇಶ್ವರ ಗದ್ದಿಗೆರ ಪಕ್ಕ ಪೋಯಿತಿಂಜತ್. ಈ ನೇರತ್ ಟಿಪ್ಪು ಮುಂಬೈಸೈನ್ಯ ಎದ್‌ರ್‌ಚಿಡುವಕ್ ತಾಂಡ ಸೈನ್ಯತನ ಕೂಟಿಯಂಡ್ ಬಂದಂಡ್ ಉಂಡ್ ಎಣ್ಣುವ ವರ್ತಮಾನ ಇಂಗ್ಲೀಷ್ ಸೈನ್ಯಾಧಿಕಾರಿಯಕ್ ತಂಗಡ ಗೂಢಚಾರಂಗಳುಂಡ್ ಅರ್‌ಂಜತ್. ಚೆನ್ನಂಗ್ ಸಮಯತ್ ವೀರರಾಜೇಂದ್ರ, ಟಿಪ್ಪುರ

ಸೈನ್ಯ ಬಪ್ಪಾನ ಗೊತ್ತಮಾಡಿಯವಹ್ ಸಿದ್ವೇಶ್ವರ ಕುಂದ್ ಪತ್ತಿತ್ ಅಲ್ಲಿಂಜ ದುರ್ಬೀನ್ ಪುಡ್‌ಚಂಡ್ ಪಿರಿಯಾಪಟ್ಟಿತ್‌ಂಜ ಬಪ್ಪ ಬಟ್ಟೆನ ನೋಟಿಯಂಡ್ ಇಂಜತ್.

ಅವು ಕುಂದ್‌ರ ಕೊಡಿಂಜ ನೋಟುವಹ ಚೆನ್ನಂಗ್ ಸಮಯ ಒಂದೂ ಕಂಡ್‌ಲೆ. ಕ್ರಮೇಣ ಜನ ಗುಂಪ್ ಗುಂಪಾಯಿತ್ ಬಪ್ಪ ಕೂಡ್‌ಚಿ. ಈ ನೇರತ್ ವೀರ ರಾಜೇಂದ್ರ ಒಡೆಯ ಬಾಳೆಲೆಲ್ ಸುಮಾರ್ ಅಂಜಾಯಿರ ಜನಳ ಆಕ್‌ಚಿ. ತಾಂಡ ಪಕ್ಕ 150 ಕೊಡಗ್‌ಕಾರಳ ಆಕಿಯಂಡ್ ತೆರಿ ಜಾಗತ್‌ನ ಭದ್ರ ಪಡ್‌ತ್‌ಚಿ.

ಟಿಪ್ಪುರ ಸೈನ್ಯತ್‌ರ ಕೂಡೆ ಟಿಪ್ಪು ಇಂಜತ್. ಆ ಪರಂಬ್‌ಲ್ ಇಟ್ಟ ಪಚ್ಚಿ ಡೇರೆಲ್ ಸುಲ್ತಾನ ಇಂಜಕ, ಚೋಂದ ಡೇರೆಲ್ ಸೈನ್ಯಾಧಿಕಾರಿಯ ಇಂಜತ್.

ಪಿತ್ಯಾಂದ್ ಸಿದ್ವೇಶ್ವರ ಕುಂದ್ ಪತ್ತಿತ್ ಸುಲ್ತಾನಂಡ ಸೈನ್ಯತ್‌ರ ಚಟುವಟಿಕೆನ ದುರ್ಬೀನ್‌ರ ಮೂಲಕ ನೋಟುವಕಾಯಿತ್ ಜ.ಹಾರ್ಟ್ ಕುಂದ್ ಪತ್‌ಚಿ. ಅಂದೆ ಪೊಲಾಕ ಟಿಪ್ಪು ತಾನ್ ಕೂಟಿಯಂಡ್ ಬಂದಿತಿಂಜ ಸೈನ್ಯತ್‌ನ ಸಿದ್ವೇಶ್ವರ ಗದ್ದಿಗೆಕಾಲೆ ಕೂಟಿಯಂಡ್ ಪೋಪಕ ಇಂಗ್ಲೀಷ್‌ಕಾರಡ ಸೈನ್ಯತ್‌ನ ಎದ್‌ರ್‌ಚಿಟ್ಟತ್.

ಈ ಪಡೆ ಸುಮಾರ್ ಮೂಂದೆ ಮುಕ್ಕಾಲ್ ಗೆಳೆಗೆ ನಡ್‌ಂದಿತ್ ಟಿಪ್ಪುರ ಕಡೆಕಾರ ಚೋತಿತ್ ಪಿರಿಯಾಪಟ್ಟಿಕ್ ಓಡಿಪೋಚಿ.

ಆಚೇಂಗೂ, ಸುಲ್ತಾನಂಡ ಚರಿತ್ರಕಾರ ಹುಸೇನ್ ಆಲಿ ಕಿರ್ಮಾನಿ ಸಿದ್ವೇಶ್ವರ ಕುಂದ್‌ರ ಪಡೆಲ್ ಸುಲ್ತಾನನೆ ಗೆದ್ದತ್‌ಂದ್ ಎಳ್ಳಿತ್. ಎನ್ನಂಗಣ್ಣಕ ಅಂವಂಗ್ ಸುಲ್ತಾನಂಗ್ ಅವಮಾನ ಮಾಡುವದ್ ಇಷ್ಟ ಇಂಜ್‌ಲೆ.

## ವೀರರಾಜೇಂದ್ರ ಒಡೆಯ ತಾಂಡ ರಾಜ್ಯತ್ ಆಯಕೆಟ್‌ರ ಜಾಗತ್ ಭದ್ರ ಪಡ್‌ತ್‌ನದ್.

ಸಿದ್ವೇಶ್ವರ ಕುಂದ್‌ರ ಪಕ್ಕ ಪಡೆ ನಡ್‌ಂದಪಿಳ್ಳಾ ಕಂಪೆನಿ ಸೈನ್ಯತ್‌ರ ಅಧಿಕಾರಿಯ ವೀರರಾಜೇಂದ್ರಂಡ ಕೂಡೆ "ಕಂಪೆನಿ ಸರ್ಕಾರಕೂ, ಟಿಪ್ಪು ಸುಲ್ತಾನಂಗೂ ಪಡೆ ನಡ್‌ಂದಿತಾಚಿ. ಆನಗುಂಡ್ ಇಕ್ಕ ನಿಂಗ ಜನಳ ಅಯೆಚಿತ್ ಟಿಪ್ಪುರ ಕೂಡೆ ಪುನಾದಿಯ ಪಡೆ ಪೊಪ್ಪನ್ನಕೆ ಮಾಡೊಂಡೂ"ಂದ್ ಎಣ್ಣ್‌ಚಿ.

ಅದೊಂಗ್ ವೀರರಾಜೇಂದ್ರ ತಾಂಡ ಜನಳ ಕೊಡಗುರ ತೆರಿ ಭದ್ರ ಪಡಾತುವಕ್ ಅಯೆಪಾನಗುಂಡ್ ಸುಲ್ತಾನಂಡ ಸೀಮೆಕ್ ಅಯೆಪಕ್ ಕಯ್ಯಲೆಂದ್ ಜವಾಬ್ ಕೊಡ್ತಿತ್ ನಾಲ್ಕಾಡ್ ಅರಮನೆಕ್ ಪೋಚಿ.

ಈಂಡೆಡೆಲ್ ಎಣ್ಣಕ ಸಿದ್ವೇಶ್ವರ ಕುಂದಾರ ಪಕ್ಕ ಪಡೆರ ಮೂಂದನೆ ದಿನ ಸುಲ್ತಾನ ತಾಂಡ ಸೈನ್ಯತೋಡೆ ಪಿರಿಯಾಪಟ್ಟತ್ ಇಪ್ಪಕ ಕೊಡಗುರಾಜಂಡ ಜನ ಕೊಡಗ್ ನಾಡಾರ ಬಂದೋಬಸ್ತ್ ಮಾಡಿಯಂಡ್ ಇಂಜತ್. ಇದೊನ ಅರಾಂಜಂಡ್ ಅರಕಲಗೂಡಲ್ ಇಂಜ ಸೂರ್ಯನಾರಾಯಣ ಎಣ್ಣವ ಓರ್ ಸುಲ್ತಾನಂಡ ಅಧೀನತ್ ಇಂಜ ಪಟ್ಟ ಅಧಿಕಾರಿ ಅರಕಲಗೂಡ್, ಕಣನೂರ್ ಪಿಳ್ಳಾ ಬಸವಪಟ್ಟತ್ ತೆರಿಲ್ ಇಂಜ ಜನಳ ಕೂಟಿಯಂಡ್ ಕೊಡಗುರ ಸೀಮೆರ ಒಳಿಯ ನುಗ್ಗಿಯಂಡ್ ನಂಜರಾಯಪಟ್ಟ ತಾಲೋಕಾರ ತೊರೆನೂರ್, ಹೆಬ್ಬಾಳ್, ಶಿರಂಗಾಲ ಇನ್ನತ ಊರಾರ ರೈತಂಗಡ ಆಸ್ತಿ-ಪಾಸ್ತಿನ ಲೂಟಿ ಮಾಡಿಯಂಡ್ ಅಲ್ಲಿ ಇಂಜ ರೈತಂಗಳ ಕೆತ್ತಿತ್, ಕೈಕ್ ಕಾಟ್ವನ ಗಾಡ ರೈತಂಗಡ ಕಾಲ್, ಕೈ ಕೆಟ್ಟಿತ್ ಪೊಳೆಕ್ ಇಟ್ಟಿತ್ ಅಯಿಂಗಡ ಪೊಣ್ಣ್, ಮಕ್ಕಳ ಪುಡ್ಚೆಂಡ್ ಆ ಊರಾರ್ ಇಂಜ ಮನೆ ಮಾರ್ಕೆಲ್ಲ ತಿತ್ ಬೆಚ್ಚಿತ್, ಚುಟ್ಟಿತ್ ಪೋಚಿ.

ಕ್ಯಾ.ಮೆಹೋನಿ ಸಿದ್ವೇಶ್ವರ ಕುಂದಾರ ಪಕ್ಕ ನಡಂದ ಪಡೆರ ಅಂಜನೆ ದಿನ ನಾಲ್ಕಾಡಲ್ ಇಂಜ ವೀರರಾಜೇಂದ್ರ ಒಡೆಯಂಗ್ ಕಾಗದ ಎಳ್ಳುವಕ ರಾಜ ಇಂಗ್ಲೀಷ್‌ಕಾರಡ ಸೈನ್ಯ ಇಂಜ ಕರಡಿಗೋಡ್‌ಮಾಳಕ್ ಪೋಯಿತಿಂಜತ್. ರಾಜ ಅಲ್ಲಿ ಇಪ್ಪಕ ಬ್ರಿಟಿಷಡ ಚಾಕ್ರಿ ಮಾಡಿಯಂಡ್ ನಂಜರಾಯ ಪಟ್ಟತ್ ಇಂಜ ರೈತಂಗ ದೊರೆರ ಪಕ್ಕ ಬಂದಿತ್ ಟಿಪ್ಪುರ ಕಡೆಕಾರ ತಂಗಡ ಆಸ್ತಿಪಾಸ್ತಿ ಲೂಟಿ ಮಾಡಿತ್, ತಿತ್ ಬೆಚ್ಚಿತ್, ಚುಟ್ಟಿತ್ ಪೋನಾನ ಎಣ್ಣಿಯಂಡತ್.

ಅಕ್ಕ ವೀರರಾಜೇಂದ್ರ ಈ ಜನಳೆಲ್ಲ ಕೂಟಿಯಂಡ್ ಇಂಗ್ಲೀಷ್ ಸೈನ್ಯತಾರ ಜ. ಸ್ಕೂವರ್ತ್, ಹಾಟ್ಲಿರ ಪಕ್ಕ ಬಂದಿತ್ ರೈತಂಗಡ ಕಷ್ಟತಾನ ಎಣ್ಣಿಚಿ.

ಅದೊಂಗ್ ಸೈನ್ಯಾಧಿಕಾರಿಯ ನಂಗ ಮುಂಡತೆ ಕೂಡಿಯಂಡಕ ಆಪುಲೆಂದ್ ಎಣ್ಣುವಕ ವೀರರಾಜೇಂದ್ರ ತಾಂಡ ಸೈನ್ಯತ್ ದಂಡ್ ತುಕಡಿನ ತಯಾರ್ ಮಾಡ್ಚಿ. ಒಂದಾತ್ ಕರಣಿಕ ಸುಬ್ಬಯ್ಯನ ಕಾರ್ಯಕಾರ ಬಿದ್ದಂಡ ಬೋಪುರ ಕೂಡೆ ಅಯೆಚತ್. ಇನ್ನೊಂದಾತ್ ಈಶ್ವರಯ್ಯನ ಹೆಗ್ಗಡೆದೇವನ ಕೋಟೆಕ್ ಅಯೆಚಲ್ಲಿ ಅಲ್ಲಿ ಪಡೆ ನಡಂದತ್.

ಈ ನೇರತ್ ಹಿಂದೂ ಸ್ಥಾನತಾರ ಗ.ಜ.ಲಾರ್ಡ್ ಮಾರ್ನಿಂಗ್ಸನ್ ವೀರ ರಾಜೇಂದ್ರಂಗ್ ಎಳ್ಳಿನ ಕಾಗದಕ್ ಜವಾಬ್ ಅಯೆಚತ್. ಇದತ್ ಕ್ಯಾ.ಮೆಹೋನಿ ತಾನ್ ಇಂಗ್ಲೀಷ್

ಸೈನ್ಯಕ್ ಮಾಡ್‌ನ ಎಲ್ಲಾ ಸಹಾಯತ್‌ನ ಎಣ್ಣೆ ತಿಕ್ಕೊಂದ್, ತಾನ್ ಪಿಳ್ಳಾ ಕ್ಯಾ.ಮೆಹೋನಿ ಚಾಯಿತ್ ಉಂಡ್‌ಂದ್ ಅರಿಚಿಡುವಾಂಡ ಕೂಟ್‌ಕ್ ಸಿದ್ವೇಶ್ವರ ಗದ್ದಿಗೇಲ್ ಟಿಪ್ಪುರ ಜನ ಬಂದಿತ್ ಇಂಗ್ಲೀಷ್‌ಕಾರಡ ಕೂಡೆ ಪಡೆ ನಡ್‌ಂದಲ್ಲಿ ಚೋತಿತ್ ಪೋನ ವಿಷಯತ್‌ನೊ ಕಾಟಿತಿಂಜತ್.

ಇದಾನದು ರಾಜ ಕಂಪೆನಿ ಸೈನ್ಯಕ್ ಬೋಂಡಿಯಾನ ಸಾಮಾನ್‌ನ ಕಡ್‌ತ್‌ಚಿಡುವ ಉದ್ದೇಶತ್ ನಾಲ್ಕಾಡ್ ಅರಮನೆಕ್ ಬಂದಿತ್ ಅಲ್ಲಿಯೆ ಇಂಜತ್.

## ವೀರರಾಜೇಂದ್ರ ಒಡೆಯಂಗ್ ಪಿರಿಯಾಪಟ್ಟಿತ್ ಜ.ಫ್ಲಾಯಡ್ ಸಾಹೇಬನುಂಡ್ ಗೌರವ

ವೀರರಾಜೇಂದ್ರ ಒಡೆಯ ನಾಲ್ಕಾಡ್‌ಲ್ ಇಪ್ಪಕ ಕಂಪೆನಿ ಸರ್ಕಾರ ಪಿಳ್ಳಾ ಅದ್‌ಂದ ಮಿತ್ರ ರಾಷ್ಟ್ರತ್‌ರ ಸುಲ್ತಾನಂಡ ವಿರುದ್ಧ ಪಡೆರ ಕಾರ್ಬಾರ್ ರಭಸತ್ ನಡ್‌ಂದತ್. ಚೆನ್ನೈಂಜ ಬಂಗಾಳತ್‌ರ ಬಲ್ಯ ಸೈನ್ಯ ನಿಜಾಮಲ್ಲಿಖಾನ್‌ರ ಚೆನ್ನಂಗ್ ಸೈನ್ಯತ್‌ನ ಕೂಟಿಯಂಡ್ ಪೂರ್ವ ದಿಕ್ಕೊಂಜ ಶ್ರೀರಂಗಪಟ್ಟಿತ್‌ರ ಬರಿಯ ಬಾತ್. ಅಕ್ಕ ಮುಂಬೈ ಸೈನ್ಯ ಅಚ್ಚಕೋರ್ ತಾಕತ್ತಲ್ ಇಲ್ಲತಾನಗುಂಡ್ ಅದ್‌ಂದ ಕೂಡೆ ಕೂಟಿಯಂಡ್ ಶ್ರೀರಂಗಪಟ್ಟಿಕ್ ಪೋಪಾಂಗ್ ಚೆನ್ನಂಗ್ ತುಕ್ಕಡಿನ ಚೆನ್ನೈರ ಸೈನ್ಯತ್‌ಂಜ ಎಡ್‌ತಂಡ್ ಜ.ಫ್ಲಾಯಡ್ ಎಣ್ಣುವ ಓರ್ ಸೈನ್ಯಾಧಿಕಾರಿ ಪಿರಿಯಾಪಟ್ಟಿಕ್ ಬಾತ್. ಈ ಸುದ್ದಿನ ಜ.ಸ್ಕೂವರ್ತ್ ಪಿಳ್ಳಾ ಹಾಟ್ಲಿ ಅರ್‌ಂಜಿತ್ ತಂಗಡ ಸೈನ್ಯತ್‌ನ ಕರಡಿಗೋಡ್‌ಂಜ ಗುಂಡಿಪಟ್ಟಿತ್‌ರ ಕೆರೆರ ಪಕ್ಕ ಕೂಟಿಯಂಡ್ ಪೋಯಿತ್ ಆಕ್‌ಚಿ.

ಇದ್‌ನ ನಾಲ್ಕಾಡ್ ಅರಮನೆಲ್ ಇಂಜ ವೀರರಾಜೇಂದ್ರ ಕೇಟಿತ್ ಅಲ್ಲಿಂಜ ಪೊರ್‌ಟಿತ್ ಮುಂಬೈ ಸೈನ್ಯ ಇಂಜ ಗುಂಡಿ ಪಟ್ಟಿತ್‌ರ ಪಕ್ಕಪೋಯಿತ್ ಅಲ್ಲಿ ಇಂಜ ಸೈನ್ಯಾಧಿಕಾರಿಯಳ ಕಂಡತ್. ಪಿತ್ಯಾಂದ್ ರಾಜ ಪಿಳ್ಳಾ ದಂಡ್ ಜನರಲ್, ವಕೀಲ ಕ್ಯಾ.ಮೆಹೋನಿ ಒಕ್ಕಚೆ ಪಿರಿಯಾಪಟ್ಟಿಕ್ ಪೋಯಿತ್ ಅಲ್ಲಿ ಜ.ಫ್ಲಾಯಡ್‌ನ ಕಂಡಿತ್ ತಕ್ಕ ಪರ್‌ಂದತ್. ಆ ನೇರತ್ ಜ.ಫ್ಲಾಯಡ್, ವೀರರಾಜೇಂದ್ರಂಡ ಗೌರವಕ್ ಸಲಾಂ ಫಿರಂಗಿನ ಪಾರ್‌ಚಿಟ್ಟಿತ್. ತಾಂಡ ಸೈನ್ಯತ್‌ನ ಕವಾಯತ್ ಕ್ರಮತ್ ನಿಪ್ಪಚಿಟ್ಟಿತ್ ರಾಜನ ಕುಶಿ ಪಡ್‌ತ್‌ಚಿ.

ಅಕ್ಕಣೆ ಟಿಪ್ಪುರ ಚೆನ್ನಂಗ್ ಕುದರೆ ಸವಾರಂಗ ಬಂದಿತ್ ಗುಂಡಿ ಪಟ್ಟತಾರ ಪಕ್ಕ ಇಂಜ ಮುಂಬೈ ಸೈನ್ಯಕೂ, ಪಿರಿಯಾಪಟ್ಟತ ಇಂಜ ಜ.ಫ್ಲಾಯಡ್ ಸೈನ್ಯಕೂ ನಡೂಲ್ ಓರ್ ಬಟ್ಟೆ ಕೆಟ್ಟಚಿ. ಆ ನೇರತ್ ಜ.ಫ್ಲಾಯಿಡ್ ಪಿಳ್ಳಾ ಟಿಪ್ಪುರ ಕುದರೆ ಸವಾರಂಗಕ್ ಚೆರಿಯ ಪಡೆ ನಡಂದತ್. ಇದಾನಪಿಳ್ಳಾ ವೀರರಾಜೇಂದ್ರ ಜ.ಫ್ಲಾಯಿಡ್‌ನ ಕಂಡತ್.

ಅಕ್ಕ ಜ.ಫ್ಲಾಯಿಡ್ ತಾಂಡ ಅರೆಲ್ ಇಂಜ ಓರ್ ಕತ್ತಿನ ಎಡ್ತಿತ್ "ನಂಗ ಸಿನೇತಿಕೆರ ಗುರಾತ್‌ಕ್ ಈ ಕತ್ತಿನ ಬೆಚ್ಚವಂಡೂ"ಂದ್ ಎಣ್ಣಿತ್ ರಾಜಂಡ ಅರೆಕ್ ಚಿಕ್ಕಚಿಟ್ಟತ್. ಕೂಟ್‌ಕ್ ಚೆನ್ನಂಗ್ ಕುದರೆಯಳ ಅಯೆಚಿಕೊಡ್‌ತತ್. ಇದಾನಪಿಳ್ಳಾ ರಾಜ ಗುಂಡಿಪಟ್ಟತ ಇಂಜ ಮುಂಬೈ ಸೈನ್ಯತಾರ ಪಕ್ಕ ಬಾತ್.

ಅಕ್ಕ ಜ.ಸ್ಕೂವರ್ತ್ ರಾಜ ವೀರರಾಜೇಂದ್ರ ತಾಂಡ ಜಾಗಕ್ ಏದೇ ಓರ್ ತೊಂದರೆ ಇಲ್ಲತೆ ಚಾಯಿತೆ ಬಂದಾಂಗ್ ಕುಶಿ ಪಟ್ಟತ್. ಅಲ್ಲಿಂಜ ರಾಜಂಡ ಚೆನ್ನಂಗ್ ಜನಳ ಅಯೆಚಿತ್ ಸಾಮಾನ್ ಕಡ್‌ತುವಕ್ ಸಹಾಯ ಮಾಡೊಂಡೂಂದ್ ಕೇಟಂಡತ್.

ಈ ಪೋಲೆ ರಾಜ ತಾಂಡ ಜನಳ ಅಯೆಚಿತ್ ಓರ್ ದಿನತ್ ಕರಡಿಗೋಳ್ ಮಾಳತ್‌ಂಜ ಸಿದ್ವೇಶ್ವರ ಗದ್ದಿಗೆಕ್ ಸಾಮಾನ್ ಕೊಂಡಬಂದಿತ್ ಇಟ್ಟತ್. ಪಿತ್ಯಾಂದ್ ದಂಡಾಯಿರ ಜನಡ ಮೀದ ಆ ಸಾಮಾನ್‌ನೆಲ್ಲ ಪೊರ್‌ಪ್‌ಚಿಟ್ಟಂಡ್ ವೀರ ರಾಜೇಂದ್ರ ತಾಂಡ ಜನ ಪಿಳ್ಳಾ ಇಂಗ್ಲೀಷ್‌ರ ಸೈನ್ಯತಾರ ಕೂಡೆ ಶ್ರೀರಂಗಪಟ್ಟಕ್ ಪೊಂಡೂಂದ್ ಇಂಜತ್. ಆಚೇಂಗಿ, ರಾಜಂಡ ಕೂಡೆ ಅಚ್ಚಕ್ ಜನ ಬಂದಕ ತಂಗಡ ಪಡೆರ ತಯಾರಿಕ್ ತೊಂದರೆ ಆಕೂಂದ್ ಎಣ್ಣುವನ್ನಕೆ ಜ. ಸ್ಕೂವರ್ತ್ "ಇಕ್ಕ ಸಾಮಾನ್‌ರ ಅವಶ್ಯಕತೆ ಇಲ್ಲೆ. ಶ್ರೀರಂಗಪಟ್ಟ ಎತ್ತನಪಿಳ್ಳಾ ತಾನೆ ಜನ ಪಿಳ್ಳಾ ಅತ್ತಳ ಕೊಡಗ್‌ಕ್ ಅಯೆಚಿತ್ ಸಾಮಾನ್‌ನ ಕೊಂಡ ಬಪ್ಪಚಿಟ್ಟಿವಿ, ಅಕ್ಕಣೆ ರಾಜ ಕೊಡಗ್‌ಕ್ ಪೋಯಿತ್ ಇಳ್ಳಾ ಚೆನ್ನಂಗ್ ಸಾಮಾನ್‌ನ ಸಂಗ್ರಹ ಮಾಡಿಯಂಡ್ ಇರೊಂಡೂ"ಂದ್ ಎಣ್ಣೆಚಿ.

ಆನಗುಂಡ್ ವೀರರಾಜೇಂದ್ರ ವಾಪಾಸ್ ಸಾಮಾನ್‌ನೆಲ್ಲ ಪೇಟೆಕ್ ಕೊಂಡಬಪ್ಪಚಿಟ್ಟತ್, ಜನಕ್ ಇಪ್ಪಕ್ ಸೆರಿಯಾನ ಮನೆ ಮಾಡಿತ್ ರಾಜನೂ ಅಲ್ಲಿಯೆ ಇಂಜತ್.

## ವೀರರಾಜೇಂದ್ರ ಒಡೆಯಂದ ಸೈನ್ಯಕ್ ದ.ಕನ್ನಡ ಪಿಳ್ಳಾ ಹಾಸನತ್ ಶತ್ರುವಡ ಮೀದ ಗೆಲು

ಕೊಡೆಯಾಲ ತಾಲೋಕ್ ಕರಣಿಕ ಸುಬ್ಬಯ್ಯ, ಕಾರ್ಯಕಾರ ಬೋಪುರ ಕೂಡೆ ಅಯಿಚಿತಿಂಜ ರಾಜಂಡ ಕಡೆಕಾರಡ ಕೂಡೆ ಕುಂಬಳೆ ತಾಲೋಕ್ರ ಮಾಪಳೆಯ ಜಗಳ ಮಾಡ್ನಲ್ಲಿ ಚಿನ್ನಂಗನ ಲೂಟಿ ಮಾಡಿತ್ ಎಣ್ಣುವ ಸುದ್ದಿ ರಾಜಂಗ್ ಕೇಟ್‌ಬಾತ್. ಆನಗುಂಡ್ ತಂಗಡ ಜಾಗತ್‌ನೆಲ್ಲ ಆಪಚ್ಚಕ್ ಭದ್ರ ಪಡ್‌ತಿಯೋಳಿಂದ್ ರಾಜ ಅಪ್ಪಣೆ ಮಾಡ್‌ಚಿ.

ವೀರರಾಜೇಂದ್ರಂಡ ಅಧಿಕಾರಿಯ ದ.ಕನ್ನಡ ಜಿಲ್ಲೆಲ್ ಸುಲ್ತಾನಂಡ ಅಧಿಕಾರಿಯಳ ಚೋಪ್‌ಚಿಟ್ಟಿತ್ ಊರ್‌ಕ್ ಬಂದಲ್ಲಿ ಪ್ರತೀ ಊರ್‌ಂಜ ಆಣ್, ಪೊಣ್ಣ್ ಸೇರಿತ್ ಪದ್‌ನಂಜಿ ಜನಳ ಕೊಡಗಲ್ ಬಂದಿತ್ ನೆಲೆ ನಿಪ್ಪೆಚಿಡುವಕ್ ಒರಾತ ಮಾಡಿತಿಂಜತ್. ಈ ಪೋಲೆ ಕುಂಬಳೆ, ಬಂಟವಾಳ, ಕಾವಿಲಕಟ್ಟೆ, ಜಮಾಲಾಬಾದ್ ಪಿಳ್ಳಾ ಅದ್‌ಂದ ಪಕ್ಕತ ಊರ್‌ಂಜ ಸುಮಾರ್ ಜನ ಕೊಡಗಲ್ ನೆಲೆ ನಿಂದತ್. ಅಲ್ಲಿಯತ ಪಾದಿ ಜನ ಬಂಟವಾಳತ್‌ಂಜ ಕೊಡ್‌ಗ್ ಬಾತ್.

ಬಂಟವಾಳತ್‌ಂಜ ಜಮಾಲಾಬಾದ್‌ಕೆತ್ತನೆ ಇಂಜ ಅಗ್ರಹಾರತ್‌ಂಜ ಪಟ್ಟಮ ಕೊಡಗ್ ಬಾತ್. ಇದತ್ ರಾಜಂಡ ಅಧಿಕಾರಿಯ ಗೇನ ಮಾಡ್‌ನಚ್ಚಕ್ ಜನ ಕೊಡಗ್ ಬಪ್ಪಕ್ ಒತ್ತವತಾಂಗ್ ರಾಜಂಡ ಜನ ತಂಗಡ ಕೈಕ್ ಕ್‌ಟ್ಪಿನ ಪಟ್ಟಮಳೆಲ್ಲ ಕೊಡಗ್ ಕೂಟಿಯಂಡ್ ಬಾತ್‌ಂದ್ 1801ತ್ ಮಲಬಾರ್ ದ.ಕನ್ನಡ ಜಿಲ್ಲೆಕ್ ಪೋಯಿತಿಂಜ ಡಾ. ಬುಕೇನನ್ ಎಳ್ಳಿತ್.

ಕೊಡಗಲ್ ಟಿಪ್ಪುರ ಕೂಡೆ ವೀರರಾಜೇಂದ್ರ ಮಾಡ್‌ನ ಪಡೆಲ್ ಏರ ಕೊಡಗ್ ಜನ ಚಿತ್ತಾನುಂಡ್, ಅದ್‌ಂಗ್‌ಂಜ ಟಿಪ್ಪು ಕೊಡಗ್‌ಂಜ ಆಯಿರ ಕಣಕ್‌ಲ್ ಜನಳ ಮೈಸೂರ್‌ಕ್ ಕೂಟಿಯಂಡ್ ಪೋಯಿತ್ ಮತಾಂತರ ಮಾಡ್‌ನಾಂಗ್ ಕೊಡಗ್ ಜನಸಂಖ್ಯೆ ವೀರ ರಾಜೇಂದ್ರಂಡ ಕಾಲತ್ ಕಮ್ಮಿ ಆಯಿತಿಂಜತ್. ಈನಗುಂಡ್ ತಾಂಡ ರಾಜ್ಯತನ ಜನಳುಂಡ್ ದುಂಬ್‌ಚಿಡುವಕ್ ಬೋರೆ ಸೀಮೆಂಜ ಜನಳ ಒರಾತ ಮಾಡಿಯತ್ ಕೂಟಿಯಂಡ್ ಬಪ್ಪಕ್ ಅಪ್ಪಣೆ ಮಾಡಿತಿಂಜತ್. ಆಚೇಂಗಿ, ಅಕ್ಕ ಅನ್ನನೆ ಒರಾತತ್ ಬಂದಿತ್ ಕೊಡಗಲ್ ನೆಲೆ ನಿಂದ ಜನಡಾತ್ ಏರ ಜನ ಇಲ್ಲಿ ಇಂಜನ್ನಕೆ ಕಾಂಬುಲೆ.

ಮಂಗಳೂರ್ ತಾಲೋಕ್ರ ಜಾಗತ್‌ನ ಪುಡ್‌ಚಂಡಪಿಳ್ಳಾ ಕೊಡಗ್ ಜನ ಬೆಳ್ಳಾರೆ

ಕೋಟೆಕ್ ದಂಡ್ ಮೂಂದ್ ದಿನ ಮುತ್ತಿಗೆ ಇಟ್ಟತ್. ಅಲ್ಲಿ ಇಂಜಾನೆಲ್ಲ ಕೊಡಗ್ ಜನ ಲೂಟಿ ಮಾಡ್ಚಿ. ಇದ್ನ ಕೇಟ ಕ್ಯಾ. ಮೆಹೋನಿ ಕುಶಿ ಪಟ್ಟಿತ್ ರಾಜಂಗ್ ಕಾಗದ ಎಳ್ಳಿತಿಂಜತ್.

ದ.ಕನ್ನಡತ್ ರಾಜಂಡ ಜನಕೂ ಪಿಳ್ಳಾ ಟಿಪ್ಪುರ ಜನಕೂ ಪಡೆ ನಡ್ಂದಂಡ್ ಇಪ್ಪಕಾಪಕ ಕೊಡಗ್ಲ ವೀರರಾಜೇಂದ್ರಂಡ ಪಕ್ಕ ಕೊಣನೂರ್, ಅರಕಲಗೂಡ್ ಪಿಳ್ಳಾ ಬಸವಪಟ್ಟಿತ್ ಜನ ಬಂದಿತ್ ತಂಗಡ ಕಷ್ಟ, ನಷ್ಟತ್ನ ಎಣ್ಣಿಯಂಡ್ ಮೊರ್ಟತ್.

ಆನಗುಂಡ್ ಈಶ್ವರಯ್ಯ ಜನಳ ಕೂಟಿಯಂಡ್ ಆ ಜಾಗಕ್ ಪೋಯಿತ್ ಲೂಟಿ ಮಾಡ್ಚಿ. ಅಲ್ಲಿ ರೈತಂಗಡ ಜನಳೆಲ್ಲ ರಕ್ಷಣೆ ಮಾಡಿತ್ ಅಯಿಂಗಕಾನ ನಷ್ಟತ್ನ ಸೆರಿ ಮಾಡಿ ತೆರಿನ ಭದ್ರ ಪಡ್ತಿಯಂಡ್ ಈಶ್ವರಯ್ಯ ಅಲ್ಲಿಯೆ ಇಪ್ಪ ಇಂಜತ್.

### ಮೈಸೂರ್ ಇತಿಹಾಸತ್ ಟಿಪ್ಪುರ ಆಖೀರಿ ದಿನ

ಶ್ರೀರಂಗಪಟ್ಟ ಮುತ್ತಿಗೆಕ್ ಬ್ರಿಟಿಷ್ ಪಿಳ್ಳಾ ಅಯಿಂಗಡ ಮಿತ್ರ ರಾಷ್ಟ್ರತ್ ಸೈನ್ಯ 1799ನ ವಿಪ್ರಿಲ್ ತಿಂಗತ್ ಶ್ರೀರಂಗಪಟ್ಟತ್ ಸುತ್ತು ಇಂಜ ಕಾವೇರಿಪೊಳೆರ ಕರಲ್ ಬಂದ್ ಕೂಡಿತಿಂಜತ್. ಆ ಎಲ್ಲ ಸೈನ್ಯ ಬ್ರಿಟಿಷ್ ಅಧಿಕಾರಿಯಡ ಪುಡ್ತತ್ ಇಂಜತ್. ಅಕ್ಕ ಸುಲ್ತಾನ ತಾಂಗ್ ಸೋಲ್ ಗ್ಯಾರೆಂಟಿಂಡ್ ಅರ್ಂಜಿತ್ ಬ್ರಿಟಿಷಡ ಕೂಡೆ ರಾಜಿ ಮಾಡಿಯವಕ್ ಸೈನ್ಯಾಧಿಕಾ ಜ.ಹ್ಯಾರಿಸ್ ಕಾಗದ ಎಳ್ಳಿಚಿ. ಅನ್ನನೆ ಈ ಸಮ್ಮಂಧ ತಾಂಡ ರಾಯಭಾರಿಯಳ ಅಯೆಪಿಂಡ್ ಎಳ್ಳಿತಿಂಜತ್.

ಈಂಗ್ ಮುಪ್ಪಡೆ ಟಿಪ್ಪು ರಾಜಿರ ವಿಷಯ ಪ್ರಸ್ತಾಪ ಮಾಡಿತಿಂಜತ್. ಇದ್ಂಗ್ ಬ್ರಿಟಿಷ 24 ಗಂಟೆರೊಳ್ ತಂಗಡ ಇಡ್ಕೆಟ್ ಸುಲ್ತಾನ ಒತ್ತಂಡಕ ತಂಗಡ ಒಳ್ಳೆ ರಾಜಿ ಒಪ್ಪಂದ ಆಕೂಂದ್ ಜವಾಬ್ಚಿ.

ಸುಲ್ತಾನಂಡ ರಾಜ್ಯತ್ ಪಾದಿನ ಬ್ರಿಟಿಷಕ್ ಬುಟ್ಟ್ ಕೊಡ್ಪ, ಕಂತಲ್ ದಂಡ್ ಕೋಟಿ ಉರ್ಪಿಯ ತಪ್ಪಲ್ಲಿಕೆತ್ತನೆ ಸುಲ್ತಾನ ತಾಂಡ ನಾಲ್ ಮೋನೆಯಳ, ನಾಲ್ ಮುಖ್ಯ ಅಧಿಕಾರಿಯಡ ಜವಾಬ್ದಾರಿಕೆಲ್ ಬುಡೊಂಡೊಂದ್ ಬ್ರಿಟಿಷ್ಕಾರಡ ಇಡ್ಕೆಟ್ ಆಯಿತಿಂಜತ್.

ಇದ್ ಟಿಪ್ಪುಕ್ ದುಂಬ ಅವಮಾನ ಆಪನ್ನತ ವಿಷಯ ಆನಾನಗುಂಡ್ ಅವ ಬ್ರಿಟಿಷ್ ಒಂದೂ ಜವಾಬ್ ಕೊಡ್ಕತೆ ಮುಂಡತೆ ಇಂಜತ್. ಆನಗುಂಡ್ ಪಿತ್ಯಾಂದೆ ಬ್ರಿಟಿಷ್ ಸೈನ್ಯ ಕೋಟೆರ ಕೆಂವಕ್ ಫಿರಂಗಿ ಪಾರ್ಚಿಡುವಕ್ ಸುರು ಮಾಡ್ಚಿ.

ಪುನಾದಿಯ ಟಿಪ್ಪು ರಾಜಿಕ್ ಕೇಪಕ, ಬ್ರಿಟಿಷ್ಕಾರ ಪಿತ್ಯಾಂದ್ ಮೂಂದ್ ಗಂಟೆರ ಬಳ್ಳಲ್ ಒತ್ತಂಡಕ ಮಾತ್ರ ಕಯ್ಯುವಂದ್ ಎಣ್ಣೆಚಿ.

ಈನಗುಂಡ್ ಸುಲ್ತಾನಂಗ್ ಮಂಕ್ ಪೊದ್ವ್ಚಿ. ಆಚೀಂಗಿ, ಅವಂಡ ಪರಿವಾರತ್ ಅವನ ಹೊಗಳುಂವೆ ಎರ ಇಂಜತ್. ಎಂತ ಮಾಡ್ಚೀಂಗಿಯೂ ಬ್ರಿಟಿಷ್ ಕೋಟೆರ ಕೆಂವ ಒಡ್ತಿತ್ ನುಗ್ಗುವಕ್ ಕಯ್ಯಲೆಂದೇ ಅವು ಎಣ್ಣುವ ಇಂಜತ್. ಟಿಪ್ಪು ಇನ್ನತ ತಕ್ಕನ ನಂಬಿತ್, ಹಿತ್ಯಪಿಯಳ ದೂರ ಮಾಡಿರ್ತಿಂಜತ್.

ಮೇ ತಿಂಗತ್ ದಂಡನೆ ದಿನ ಬ್ರಿಟಿಷ್ ಸೈನ್ಯ ಫಿರಂಗಿನ ಕಾವೇರಿ ಪೊಳೆರ ಆ ಬರಿಂಜ ಕೋಟೆರ ಕೆಂವಕ್ ಪೊಜ್ಜಿತ್ ಒಡ್ಪಕ್ ನೋಟಾಚಿ. ಅಕ್ಕಣೆ ಸುಲ್ತಾನಂಡ ಸೈನಿಕಂಗ ಓಡುವಕ್ ಸುರು ಮಾಡಿರ್ತಿಂಜತ್. ಪಿತ್ಯಾಂದ್ ಆಳ ಇಲ್ಲತ ಕಾವೇರಿ ಪೊಳೆನ ದಾಟಿಯಂಡ್ ಕೋಟೆರ ಕೆಂವತ್ ಪಕ್ಕ ಎತ್ತಿರ್ತ್.

ಚಾಯೋಡೆ ಕೆಂವ ಪೊಳಿಪಕ್ ಎರ್ಪಾಡ್ ಮಾಡಿಯಂಡ ಸೈನ್ಯತ್ ಅಧಿಕಾರತನ ಮೇ.ಜ. ಜೈಯರ್ಡ್ ಕೊಡ್ತಿಂಜತ್. ಅವ ನಾಲ್ ಕಾಲ ಶ್ರೀರಂಗ ಪಟ್ಟಿತ್ ಟಿಪ್ಪುರ ಸೆರೆಯಾಳ್ ಆಯಿತ್ ಕಷ್ಟ ಅನುಭವಿಚಿಟ್ಟಂವ. ಆನಗುಂಡ್ ಇಕ್ಕ ಅವ ಪಗನ ತೇತವಕ್ ಹಟ ಮಾಡಿಂಜತ್.

ಬ್ರಿಟಿಷ್ ಸೈನ್ಯ ಪೊಳೆಕರೆಲ್ ಇಪ್ಪಕ ಟಿಪ್ಪು ಕೋಟೆರ ಕೆಂವತ್ ಕೊಡಿಲ್ ಓರ್ ಡೇರ ಇಟ್ಟಂಡ್ ತಾಂಡ ಸೈನ್ಯಾಧಿಕಾರಿಯಕ್ ಆಜ್ಞೆ ಕೊಡ್ಪ ಇಂಜತ್. ಎಕ್ಕ ಅವು ಪೊಳೆ ದಾಟ್ಚೊ ಅಕ್ಕ ಟಿಪ್ಪು ತಾಂಡ ಶಿಬಿರತನ ಅಪಾಯ ಇಲ್ಲತ ಜಾಗಕ್ ಮಾತ್ಚಿ. ಮೇ ಮೂಂದಾಂಗ್ ಸುಲ್ತಾನಂಡ ಸೈನ್ಯತ್ ಮುಖ್ಯಪಟ್ಟ ಭಾಗ ಸೈಯದ್ ಸಾಹೇಬ್ ಪಿಳ್ಳಾ ಸೈಯದ್ ಗಫೂರ್ ಸಾಹೇಬ್ ಪುಡ್ತತ್ ಇಂಜತ್. ಫ್ರೆಂಚ್ ಸರ್ದಾರ ಚಾಪಿನ್, ಸುಲ್ತಾನಂಡ ಪೆರಿಯ ಮೋಂವ, ಪೂರ್ಣಯ್ಯ ಪಿಳ್ಳಾ ಸುಲ್ತಾನಂಡ ದಂಡನೆ ಮೋಂವ ಕೋಟೆರ ಬೋರೆ ಬೋರೆ ಬರಿಲ್ ಪಡಿನ ಪಾರ ಕಾತಂಡ್ ಇಂಜತ್.

ಬ್ರಿಟಿಷ್ ಸೈನ್ಯ ಕೋಟೆ ಕೆಂವತ್ ಪೂರ್ಮೆ ಬತ್ತರಿ ಕೆಟ್ಟಿಯಂಡ್ ತಂಗಡ ಫಿರಂಗಿನ ಅದ್ಂಡ ಕೊಡಿಲ್ ಏತುವಕ ಟಿಪ್ಪು ಬೋರೆ ಒಂದೂ ಮಾಡುವ ಕಯ್ಯತೆ ಪೂಜೆ ಮಾಡುವ ಕೂಡ್ಚಿ. ಚನ್ನಪಟ್ಟಿತ್ ಒರ್ ಪಟ್ಟಿನ ಕಾಕ್ಚಿಟ್ಟಿತ್ ದುಂಬ ಖರ್ಚಿರ ಪೂಜೆ



ಮಾಡ್‌ಚಿಟ್ಟತ್. ಈ ಪಟ್ಟ ಪಿಳ್ಳಾ ಕೂಟ್‌ಕಾರ "ಮೇ ನಾಲನೆ ನಾಳಂಕೆ ದುಂಬ ಅಪಾಯ ಆನ ದಿನಾಂದ್ ಎಣ್ಣೆತ್, ಅದ್‌ನ ತಪ್ಪಾಚಿಡುವಕ್ ಹೋಮ ಮಾಡ್‌ಚಿಡೊಂಡು" ಎಣ್ಣೆ ಚಿ.

ಆನಗುಂಡ್ ಸುಲ್ತಾನ ಅರಮನೆಕ್ ಪೋಯಿತ್ ಕುಳ್‌ಚಿತ್ ಪೂಜೆ, ಹೋಮ ಆನಪಿಳ್ಳಾ ಕೋಟೆರ ಪಕ್ಕ ಬಾತ್.

ಬ್ರಿಟಿಷ್ ಕೋಟೆ ಪತ್ತುವಕ್ ಏಣಿ ಕೊಂಡ ಬಂದಿತಿಂಜತ್. ಸೈಯದ್ ಗಫೂರ್ ಶತ್ರುವ ಮಜ್ಜಣ ನೇರತ್ ಕೋಟೆರ ಕೆಂವ ಪೊಳಿಪಾಂದ್ ಎಣ್ಣಾನಕೊ, ಟಿಪ್ಪುರ ಹೊಗಳ್ ಭಟ್ಟಂಗ "ಗಫೂರ್ ಬೊತ್ತಿಯಂಡ್ ಅನ್ನನೆ ಎಣ್ಣೆಯಂಡ್ ಉಳ್ಳ"ಂದ್ ಎಣ್ಣೆ ಚಿ. ಮಜ್ಜಣ ನೇರತೆ ಕೋಟೆರ ಕಿಲ್ಲೆದಾರ ನೆಡೀಮ ಚೆನ್ನಂಗ್ ಸೈನ್ಯಕ್ ಸಂಬಳ ಕೊಡ್‌ಪಕ್ ಪೊರ್‌ಟಾನಗುಂಡ್ ಆ ಸೈನಿಕಂಗ ಶತ್ರುವ ನುಗ್ಗುವ ನೇರತ್ ಎದ್‌ರಾಚಿಡುವಕ್ ಇಲ್ಲತಾಚಿ.

ಸುಲ್ತಾನಂಡ ಸೈನ್ಯ ಮಜ್ಜಣ ಚೆನ್ನಂಗ್ ರೆಸ್ಪ್ ಎಡ್‌ತವಕ ಕೋಟೆರ ಒಳಕ್ ನುಗ್ಗುವಕ್ ನಲ್ಲ ನೇರಾಂದ್ ಬ್ರಿಟಿಷ್ ಸೈನ್ಯಾಧಿಕಾರಿ ಗೇನ ಮಾಡ್‌ಚಿ. ಆ ನೇರತ್ ಸುಲ್ತಾನಂಡ ಪ್ರಾಮಾಣಿಕ ಅಧಿಕಾರಿ ಆಯಿತಿಂಜ ಸೈಯದ್ ಗಫೂರ್ ಮಾತ್ರ "ನಾನಿಕ್ಕಲೆ ಪೋಯಿತ್ ಸುಲ್ತಾನನ ಕಾಕಿತ್ ಶತ್ರುವ ಕೋಟೆರ ಕೆಂವ ಪೊಳಿಪಾನ ಕಾಟಿ ಕೊಡ್‌ಪಿ. ಅಂವಂಡ ಸುತ್ತೂ ಎಂತಾ ನೀಚಂಗ ಉಂಡ್‌ಂದ್ ಕಾಟುವಿ"ಂದ್ ಟಿಪ್ಪುರ ಪಕ್ಕ ಪೋಚಿ.

ಆಚೇಂಗಿ, ಬಟ್ಟೆಲ್ ಅವ ತಾಂಡ ಜನಕ್ ಶತ್ರುವ ಅಡ್ಡ ತಡ್‌ಪಕ್ ಎಣ್ಣೆಯಂಡ್ ಇಂಜನ್ನೆಕೆ ಶತ್ರು ಸೈನ್ಯತರ್ ಓರ್ ಫಿರಂಗಿ ಬೊಡಿ ಅಂವಂಗ್ ಪಟ್ಟಿತ್ ಅವ ಅಲ್ಲಿಯೆ ಚತ್ ಬುದ್ಧಾರ್‌ತ್.

ಟಿಪ್ಪು ಅರಮನೆಲ್ ಪೂಜೆ, ಹೋಮ ತೇತಿತ್ ಕೋಟೆ ಕೆಂವತರ್ ಕೊಡಿಲ್ ಇಂಜ ತಾಂಡ ಶಿಬಿರಕ್ ಮಜ್ಜಣಕ್ ಊಟ ಕೊಂಡ ಬಪ್ಪಾಚಿಟ್ಟತ್. ಅಕ್ಕಣಕ್ ಸೈಯದ್ ಗಫೂರ್ ಫಿರಂಗಿ ಬೊಡಿ ಪಟ್ಟಿತ್ ಚತ್ತ ಸುದ್ದಿ ಕೇಟಿತ್ ಸುಲ್ತಾನಂಗ್ ಬೇಚಾರ ಆಚಿ.

ಸೈಯದ್ ಚಾವಕ್ ಎಂದೂ ಬೊತ್ತಾನಂವನಲ್ಲಂದ್ ಎಣ್ಣೆಯಂಡ್ ಅಂವಂಡ ಜಾಗಕ್ ಇಣ್ಣೊಬ್ಬನ ನೇಮಕ ಮಾಡ್‌ಚಿ. ಸುಲ್ತಾನ ಅಲಾಂಬಲ್‌ಲ್ ಊಟ ತೇಕಣೆ ಬ್ರಿಟಿಷ್ ಸೈನ್ಯ ಕೋಟೆರ ಕೆಂವ ಒಡ್‌ತಿತ್ ಒಳಕ್ ಬಾತ್ ಎಣ್ಣುವ ವರ್ತಮಾನ ಕೊಟ್ಟಿಚಿ.

ಜ.ಬೈಯರ್ಡ್ ಮಜ್ಜಣ ಓರ್ ಗಂಟೆಕ್ ಸೆರಿಯಾಯಿತ್ ತಾಂಡ ಜನಡ ಕೂಡ ತಾಂಡ ಪಡೆಕತ್ತಿನ ಅರೆಂಜ ಬಲಾಚಿತ್ ಪೊರ್‌ಮೆ ಬಂದಿತ್, ಏಳು ಮಿನಿಟರ್ ಒಳಲ್ ಕೋಟೆರ

ಕೆಂವ ಒಡ್ತಿತ್ ಆ ಜಾಗಕಾಲೆ ಕೊಡಿಕ್ ಪತ್ತಿತ್ ಬ್ರಿಟಿಷ್ ಬಾವುಟತ್‌ನ ಪಾರ್‌ಚಿಟ್ಟಿತ್. ಅಕ್ಕ ಸುಲ್ತಾನಂಡ ಸೈನಿಕಂಗ ಪೇರ್ತ್ ಕಠಿಣ ಆಯಿತ್ ಪೋರಾಡ್‌ಚಿ. ದಂಡ್ ಕಡೆ ದುಂಬ ಚಾವು, ನೊಂಬಲ ಆಚಿ. ಈ ನೇರತ್ ಬ್ರಿಟಿಷ್ ಸೈನ್ಯತ್‌ರ ಬೋರೆ ಅಧಿಕಾರಿಯ ತಂಗ, ತಂಗಡ ತುಕ್ಕಡಿರ ಕೂಡೆ ಕೋಟೆರ ಸುತ್ತೂ ಬಲ್ಯ ಪಡಿನ ಪಾರ ಕಾಪ ಇಂಜತ್. ತಾಂಡ ಸೈನಿಕಳ ಕೂಟಿಯಂಡ್ ಜ.ಬೈಯರ್ಡ್ ದಂಡ್ ಗಂಟೆರ ಒಳ್‌ಲಾ ಕೋಟೆರ ಕೇಕ್ ಬರಿಯತ ಬಲ್ಯ ಪಡಿರ ಪಕ್ಕ ಬಾತ್.

ಸುಲ್ತಾನ ಜ.ಬೈಯರ್ಡ್ ಕೋಟೆರ ಪೊರಾಮೆ ಕೆಂವ ಪತ್ತಿತ್ ಒಳ್‌ಲಾ ಬಂದಾನ ಅರಾಂಜಿತ್ ಉತ್ತರ ದಿಕ್ಕಾರ ಕೋಟೆ ಕೆಂವತ್‌ರ ಪಕ್ಕ ಪೋಚಿ. ಅಲ್ಲಿ ತಾಂಡ ಪರಿವಾರತ್‌ರ ಕೂಡೆ ಕೆಂವತ್‌ರ ಕೊಡಿಕ್ ಪತ್ತಿತ್ 200 ಗಜ ದೂರತ್ ನಿಂದಂಡ್ ಶತ್ರುಪಡೆರ ಮೀದ ತಾಂಡ ಕಯ್ಯಾರೆ ಬೊಡಿ ಬೆಚ್ಚಿತ್. ಅಕ್ಕಣೆ ಬ್ರಿಟಿಷ್ ಸೈನ್ಯ ಎಲ್ಲಾ ಬರಿಂಜ ನುಗ್ಗಿರ್‌ತ್.

ಸುಲ್ತಾನಂಡ ಸೈನಿಕಂಗ ಧೈರ್ಯತ್ ಪೋರಾಡ್‌ನಕೊ, ಬ್ರಿಟಿಷಡ ಐರೋಪ್ಪ ಪಿಳ್ಳಾ ದೇಶೀಯ ಸೈನ್ಯತ್‌ರ ಎದಿಕೆ ನಿಪ್ಪ ಕಯ್ಯತಾಚಿ. ಅವು ಧೈರ್ಯ ಕಳಂದಂಡ್ ಪಡೆಭೂಮಿಂಜ ಓಡುವ ಕೂಡ್‌ಚಿ. ಚೆನ್ನಂಗ್ ಸೈನಿಕಂಗ ಕೋಟೆರ ಒಳ್‌ಲಾ ಓಡುವ ಇಂಜತ್.

ತಾಂಡ ಜನ ಓಡಿಯಂಡ್ ಉಳ್ಳಾನ, ಶತ್ರುವ ಒಳ್‌ಲಾ ಬಂದಂಡ್ ಉಳ್ಳಾನ ಕಂಡ ಸುಲ್ತಾನ ಕೋಟೆರ ಒಳ್‌ಲಾ ಪೋಯಿತ್ ಅಲ್ಲಿ ಇಂಜ ತಾಂಡ ಕೊದಿರ ಕುದರೆನ ಪತ್ತಿಯಂಡ್ ಕೇಕ್ ಬರಿಕ್ ಬಂದಿತ್ ಒಳಿಯತ ಕೋಟೆಕ್ ಪೋಪ ಪಡಿನ ನುಗ್ಗಿಚಿ. ಇದಾಂಗ್ ಮಿಳ್ಳಾಲೆ ಸುಲ್ತಾನಂಗ್ ಓರ್ ಬೊಡಿ ಪಟ್ಟಿತ್. ಆ ಪಡಿಕಾಲೆ ಸುಲ್ತಾನ ಅರಮನೆಕ್ ಎನ್ನಂಗ್ ಪೊರಟಿತ್ ಎಣ್ಣುವದ್ ಅಗ್ಗೇನ ಪಡುವ ಸಂಗತಿ.

ಅಂವ ಚಾವಾಂಗ್ ಮುಪ್ಪಡೆ ಚೆನ್ನಂಗ್ ದಿನಕ್ ಬಯ್ಯ ತಾಂಡ ಆಪ್ತಂಗಡ ಕೂಡೆ ಪರ್‌ಂದ ತಕ್‌ಲ್, ಅಂವ ಅರಮನೆಕ್ ಪೋಯಿತ್ ಚೆನ್ನಂಗ್ ಮುಖ್ಯಪಟ್ಟಿ ಕಾಗದ ಪತ್ರತ್‌ನ ನಾಶ ಪಡ್‌ತಿತ್, ತಾಂಡ ಮಹಾರಾಣಿನ ಕೊಂದಿತ್ ತಾನ್ ಪಡೆಲೆ ಚಾವೊಂಡೂಂದ್ ಗೇನ ಮಾಡಿತಿಕ್ಕೂಂದ್ ಎಣ್ಣುವ. ಎನ್ನಂಗ್‌ಣ್ಣಕ ಸುಲ್ತಾನ ಶತ್ರುಪಳುಂಡ್ ತಪ್ಪಿಚಿಟ್ಟವಕ್ ಪೊಳೆರ ಬರಿ ಪೋಪ ಕೋಟೆರ ಪಡಿಕಾಲೆ ತಪ್ಪಿಚಿಟ್ಟಂಡ್ ಪೋಕಲಿಂಜತ್‌ಂದ್ ಇಂಗ್ಲೀಷ್ ಸೈನ್ಯಾಧಿಕಾರಿಯ ಅಭಿಪ್ರಾಯ ಪಟ್ಟಿತ್.

ಸುಲ್ತಾನ ಕೋಟೆರ ಒಳ್‌ಲಾ ಕುದರೆ ಪತ್ತಿತ್ ಪೋಪಕ್ ಪೊರಟ ಪಡಿಲ್ ಸುಲ್ತಾನಂಡ ಜನ ಇಂಜತ್. ಈ ಜನ ಕೋಟೆರ ಒಳ್‌ಲಾ ಬರತನ್ನೆಕೆ ತಡ್‌ಪಕ್ ಬ್ರಿಟಿಷ್ ಸೈನ್ಯ ಒರೇಪೋಲೆ ಬೊಡಿದ ಮಳೆ ಪೊಯ್ಯಾಚಿಟ್ಟಿತ್. ಅಕ್ಕ ಸುಲ್ತಾನಂಗ್ ದಂಡನೆ ಬೊಡಿ ಪಟ್ಟಿತ್. ಅದಾನ ಸಹಿಸಿಯಂಡೆ ಕುದರೆ ಪತ್ತಿತ್ ಪಡಿ ದಾಟೊಂಡು ಎಣ್ಣುವಕ ಮೂಂದನೆ

ಬೊಡಿ ಪಟ್ಟಾರಾತ್. ಈ ನೇರತ್ ಅಂವಂಡ ಕುದರೆಕೂ ಬೊಡಿ ಆಯಿತ್ ಅದ್ ಕೋದಕ್ ಬುದ್ಧತ್. ಅನ್ನನೆ ಸುಲ್ತಾನಂಡ ಬರಿಲೆ ಇಂಜ ಅಂವಂಡ ಆಪ್ತ ರಾಜಾಖಾನ್‌ಕೂ ಬೊಡಿ ಆಚಿ.

ಅಕ್ಕ ರಾಜಾಖಾನ್ ಅವ ದಾರಾಂದ್ ಕೂತ್ ಕೊಡ್‌ತಿತ್ ಎಣ್ಣೊಂಡೊಂದ್ ಸೂಚನೆ ಕೊಡ್‌ತತ್. ಬ್ರಿಟಿಷ್ ಆ ಜನಡ ಎಡೆಲ್ ಟಿಪ್ಪು ಎಲ್ಲಿ ಉಂಡ್‌ಂದ್ ಗೊತ್ತಾಯಿಲೆ. ಅಕ್ಕ ಸುಲ್ತಾನ "ನೀಕ್ ಪುಚ್ಚಿ ಪುಡ್‌ಚಿತಾ ಮುಂಡತೆ ಇರ್"ಂದ್ ಎಣ್ಣೆಚಿ.

ಅಕ್ಕ ರಾಜಾಖಾನ್ ತಾಂಡ ಯಜಮಾನ ಬುದ್ಧ ಕುದರೆರ ಬೆನ್ನಿನ ಬಲಾಚತ್. ಅಕ್ಕಲೆ ಅವು ದಂಡಾಳೂ ಅಲ್ಲಿ ಚತ್ ಬುದ್ಧಿತಿಂಜ ಪಿಳ್ಳಾ ಬುದ್ಧಂಡೆ ಇಂಜ ಜನಡ ರಾಶಿರ ಮೀದ ಬುದ್ಧತ್. ಆ ನೇರತ್ ಅಲ್ಲಿ ಇಂಜ ಸುಲ್ತಾನಂಡ ಬೊರೆ ಸೇವಕಂಗ ಓರ್ ಪಲ್ಲಕ್ಕಿನ ಕೊಂಡಬಂದಿತ್ ಅದತ್ ಸುಲ್ತಾನನ ಬುದ್ಧಾಕ್‌ಚಿ. ಆಚೇಂಗಿ, ಅಲ್ಲಿ ಬ್ರಿಟಿಷ್ ಸೈನ್ಯತಾರ ಪೊಯ್ತ ತಪ್ಪಾಚಿಟ್ಟಂಡ್ ಓಡಿ ಬಪ್ಪ ಇಂಜ ಜನಡ ಕಣಕ್, ಅನ್ನನೆ ಆ ಸೈನ್ಯತಾರ ಬೊಡಿನುಂಡ್ ಚತ್ತಯಿಂಗಡ ಪಿಳ್ಳಾ ಚತ್ತಂಡ್ ಉಳ್ಳಯಿಂಗಡ ರಾಶಿ ಅಧಿ ಆಯಿತ್ ಉಸಿರ್ ಕಟ್ಟುವನ್ನಕೆ ಇಂಜಾನುಂಡ್ ಸುಲ್ತಾನ ಇಂಜ ಪಲ್ಲಕ್ಕಿನ ಅಲ್ಲಿಂಜ ಪೊರ್‌ಮೆ ಎಡ್‌ತಂಡ್ ಬಪ್ಪಕ್ ಕಯ್ಯತಾಚಿ. ಪಲ್ಲಕ್ಕಿರ ಒಳಲ್ ಇಂಜ ಸುಲ್ತಾನ ಚೆನ್ನಂಗ್ ನೇರತ್ ಪಲ್ಲಕ್ಕಿಂಜ ಪೊರ್‌ಮೆ ಜಾರ್‌ನನ್ನಕೆ ಕಾಂಬ. ಟಿಪ್ಪು ಸುಲ್ತಾನ ತಾಂಡ ಸೊಂಟಕೆತ್ತನೆ ಚತ್ ಬುದ್ಧಿತಿಂಜ ರಾಶಿನುಂಡ್ ಮುಚ್ಚಿಪೋಯಿತಿಪ್ಪಕ ಚೆನ್ನಂಗ್ ಇಂಗ್ಲೀಷ್ ಸೈನಿಕಂಗ ಆ ಕಮಾನ್ ಪಡಿರ ಒಳಕ್ ಬಾತ್. ಅದತ್ ಒಬ್ಬ ಸುಲ್ತಾನಂಡ ನದುಲ್ ಇಂಜ ಪಟ್ಟಾರ ಪಟ್ಟಿಲ್ ಇಂಜ ಪಡೆಕತ್ತಿಲ್ ಚಿಕ್ಕಾಚಿಟ್ಟ ಪೊನ್ನಾರ ಕೊಕ್ಕೆ (gold buckle)ನ ಬಲಾಚವಕ್ ನೋಟ್‌ಚಿ. ಅಕ್ಕ ಸುಲ್ತಾನ ತಾಂಗ್ ಆನ ಗಾಯತ್‌ಂಜ ಸೊಯ ತಪ್ಪಿ ಪೋಪ ಸ್ಥಿತಿಲ್ ಇಂಜಕೊ, ತಾಂಡ ಜಿಂವತಾರ ವರೀಸ್ ಇಲ್ಲತೆ ತಾಂಡ ಪಕ್ಕತೆ ಬುದ್ಧಿತಿಂಜ ಪಡೆರ ಕತ್ತಿನ ಎಡ್‌ತಂಡ್ ಆ ಇಂಗ್ಲೀಷ್ ಸೈನಿಕನ ಕೆತ್ತುವಕ್ ಬೀಚ್‌ಚಿ! ಅಕ್ಕ ಆ ಸೈನಿಕ ಸುಲ್ತಾನಂಡ ನೆತ್ತಿಕ್ ಬೊಡಿ ಬೆಚ್ಚತ್. ಕೂಡೆನ್ನೆ ಸುಲ್ತಾನಂಡ ಪ್ರಾಣಪಕ್ಕಿ ಪಾರಿಪೋಚಿ.

ಇನ್ನನೆ 'ಮೈಸೂರ್ ನರಿ'ಂದ್ ಪೆದ ಎಡ್‌ತ ವೀರ ಟಿಪ್ಪು ಸುಲ್ತಾನ ತಾಂಡ ಆಖೀರಿ ಉಸಿರ್‌ಕೆತ್ತನೆ ತಾಂಡ ಮೈರಿಯಳಾನ ಬ್ರಿಟಿಷಡ ಕೂಡೆ ಪೋರಾಡಿಯಂಡೆ ಚತ್ತತ್.

ಆಚೇಂಗಿ, ತಾನ್ ಕೊಂದದ್ ಟಿಪ್ಪು ಸುಲ್ತಾನ ಎಣ್ಣುವದ್ ಆ ಸೈನಿಕಂಗ್ ಗೊತ್ತಾಯಿಲೆ. ಸುಲ್ತಾನಂಡ ಆಪ್ತ ಸೇವಕಂಗ ಮಿಳ್ಳಾಲೆ ಚತ್ತತ್. ಚೆನ್ನಂಗಾಳ್ ಗಾಯ ಆಯಿತ್ ಅರೆಸೊಯೆಲ್ ಬುದ್ಧತ್. ಸುಲ್ತಾನ ಚಾವಕ ಅಂವಂಗ್ 47 ಬಯತ್. ಅಂವ



ರಾಜ್ಯಾಡಳಿತ ಸುರು ಮಾಡಿಯೆ 17 ಬಯತ್‌ಲಾ!

ಸುಲ್ತಾನ ಕೋಟೆರ ಉತ್ತರ ಬರಿಲ್ ಇಪ್ಪಕ ಅಲ್ಲಿ ಇಂಜ ಸುಲ್ತಾನಂಡ ಸೈನಿಕಂಗ ಶತ್ರು ಸೈನಿಕಂಗಳ ಕಠಿಣವಾಯಿತ್ ಎದ್‌ರಾಚಿಟ್ಟತ್. ಅಲ್ಲಿ ಇಂಜ ಫ್ರೆಂಚ್ ಸೈನಿಕಂಗ ದೇಶೀಯ ಸೈನಿಕಂಗಕ್‌ಂಜ ದುಂಬ ನೇರ ಪೋರಾಡ್‌ಚಿ. ಆಚೇಂಗಿ, ಸುಲ್ತಾನ ಅಲ್ಲಿಂಜ ಕೇಕ್ ಬರಿಕ್ ಪೋನನ್ನಕೆ ಇವು ಮನಾರ ಚೋತತ್. ಅಲ್ಲಿ ಬ್ರಿಟಿಷ್ ಸೈನ್ಯತ್‌ರ ಅಧಿಪತಿ ಮೇ. ಲ್ಯಾಂಬ್‌ರ್ನ್ ಬಯ್ ಕೋಟೆರ ಕೇಕ್ ಬರಿಯತ ಪಡಿರ ಪಕ್ಕತ್ ಇಂಜ ಜ.ಬೈಯರ್ಡ್‌ರ ಪಕ್ಕ ಪೋಚಿ.

ಸುಲ್ತಾನ ಎಲ್ಲಿ ಉಳ್ಳ, ಎನ್ನನೆ ಉಳ್ಳೆಂದ್ ದಾರ್‌ಕೂ ಗೊತ್ತಿಂಚ್‌ಲೆ. ಅವ ಶತ್ರುವಡ ಬೊಡಿಸುಂಡ್ ಚತ್ತಿತ್ ಎಣ್ಣುವ ಸಂಗತಿ ದಾರ್‌ಕೂ ಗೊತ್ತಿಂಚ್‌ಲೆ. ಜ.ಬೈಯರ್ಡ್, ಮೇ. ಆಲನ್ ಪಿಗ್ಲಾ ಬೋರೆ ಸೈನ್ಯಾಧಿಕಾರಿಯ ಸುಲ್ತಾನ ಅರಮನೆಲೆ ಇಕ್ಕೂಂದ್ ಗೇನ ಮಾಡ್‌ಚಿ. ಆನಗುಂಡ್ ಜ.ಬೈಯರ್ಡ್, ಮೇ.ಆಲನ್‌ನ ಚೆನ್ನಂಗ್ ಸೈನಿಕಂಗಡ ಕೂಡೆ ಶಾಂತಿ ಸೂಚಕವಾನ ಬೊಳ್‌ತ ಬಾವುಟತ್‌ರ ಕೂಡೆ ಅರಮನೆಕ್ ಅಯೆಚತ್. ಮೇ. ಎಲ್ಲನ್ ಟಿಪ್ಪು ಪಿಗ್ಲಾ ಅರಮನೆರ ಒಳ್‌ಲ್ ಇಂಜ ಎಲ್ಲಾರ್‌ಕೂ ಎಂದಿಕೂ ಏದೇ ಇಡ್‌ಕೆಟ್ ಇಲ್ಲತೆ, ಆ ಕೂಡೆನ್ನೆ ಶರಣಾಗತಿ ಆನಕ ಅಯಿಂಗಕ್ ರಕ್ಷಣೆ ತಪ್ಪಾಂದ್, ಅನ್ನನೆ ಶರಣಾಗತಿ ಆಕತೆ ವಿರೋಧ ಕಾಟ್‌ನಕ ಅರಮನೆ ಮುತ್ತಿಗೆರ ಕಠಿಣ ಪರಿಣಾಮಕ್ ಎಡೆಯಾಂಡೂಂದ್ ಅರಮನೆಲ್ ಇಂಜಯಿಂಗಕ್ ಎಚ್ಚರಿಕೆ ಕೊಡ್‌ಪಕ್ ಪೋಚಿ.

ಈಂಡೆಡೆಲ್ ಜ.ಬೈಯರ್ಡ್ ಅರಮನೆರ ಎದಿಕೆ ಪಡಿರ ದಂಡೂ ಬರಿಲ್ ತಾಂಡ ಸೈನ್ಯತ್‌ನ ಮುತ್ತಿಗೆ ಇಡುವಕ್ ತಯಾರ್ ಮಾಡಿತ್ ನಿಪ್ಪಾಚಿಟ್ಟತ್. ಮೇ.ಎಲ್ಲನ್ ಅಲ್ಲಿಕ್ ಪೋಪಕ ಅರಮನೆರ ಮಾಡಿಲ್ ಇಂಜ ಸುಲ್ತಾನಂಡ ಪರಿವಾರ ಜಿಂವತ್‌ರ ಪೋಡಿಲ್ ಗೌಡ್‌ಪ ಇಂಜತ್. ಅವ ಅಯಿಂಗಳ ತಾಂಡ ಪಕ್ಕ ಕಾಕಿತ್ ಅಯಿಂಗಡ ಕೂಡೆ ಅರಮನೆರ ಒಳ್‌ಕ್ ಪೋಪಕ್ ಬಯಂದತ್.

ಆಚೇಂಗಿ, ಜನ ಎಲ್ಲನ್‌ನ ಒಳ್‌ಕ್ ಬುಡುವಕ್ ಒತ್ತಂಡ್‌ಲೆ. ತಾನ್ ಸುಲ್ತಾನ ಪಿಗ್ಲಾ ಅವಂಡ ಸಮ್ತಂಧಿಯಕ್ ರಕ್ಷಣೆ ತಪ್ಪಕ್ ಬಂದಿಯೆ, ಇದ್‌ಂಗಾಯಿತೆ ತಾನ್ ಕೈಲ್ ಬೊಳ್‌ತ ಬಾವುಟ ಪುಡ್‌ಚಂಡ್ ಉಳ್ಳೆಂದ್ ಎಣ್ಣಿತ್ ಅಯಿಂಗಕ್ ತಾಂಡ ತಕ್‌ಲ್ ನಂಬಿಕೆ ಬಪ್ಪಾಚಿಡುವಕ್ ತಾಂಡ ಪಡೆಕತ್ತಿನ ಅರೆಂಜ ಬಲ್‌ಚಿತ್ ಕಿಲ್ಲೆದಾರಂಡ ಕೈಕ್ ಕೊಡ್‌ತತ್.

ಇನ್ನನೆ ಇಂಜಕೊ ಅವಂಡ ತಾಳ್ತೆ ಕೆಡುವಚ್ಚಕ್ ಅವನ ಪಾರಕಾಪ್‌ಚಿಟ್ಟಿತ್ ಆಖೀರಿಕ್ ಅವನ ಸುಲ್ತಾನಂಡ ದಂಡ್ ಕಣ್ಣ ಕುಣ್ಣಿಯ ಇಂಜ ಕೋಂಬರೆಕ್



ಕೂಟಿಯಂಡ್ ಪೋಚಿ. ಅದತ್ ಒಬ್ಬಂಗ್ 1792ಂಡ ಪಡೆ ಕೈಂಜಪಿಳ್ಳಾ ಮೇ.ಎಲ್ಲನ್ನಾರ ಪರಿಚಯ ಇಂಜತ್. ಎಲ್ಲನ್ ರಾಜಕುಮಾರ ಪಿಳ್ಳಾ ಅರಮನೆ ವಾಸಿಯಕ್ ರಕ್ಷಣೆರ ತಕ್ಕ್ ಕೊಡ್ತಿತ್, ಅಂಪಂಡ ಅಪ್ಪ ಸುಲ್ತಾನ ಅರಮನೆಂಜ ತಪ್ಪೆಚಿಟ್ಟುಂಡ್ ಪೋಪಕ್ ಸಾಧ್ಯ ಇಲ್ಲೆಂದೂ, ಆನಗುಂಡ್ ಕೂಡೆನ್ನೆ ಶರಣಾಗತಿ ಆನಕ ಮಾತ್ರ ಜಿಂವ ಉಳಿವಾಂದ್ ಎಣ್ಣೆಚಿ.

ಅಕ್ಕ ಮಕ್ಕ ಸುಲ್ತಾನ ಅರಮನೆಲ್ ಇಲ್ಲೆಂದ್ ನಂಬಿಕೆ ಬಪ್ಪನ್ನಕೆ ಎಣ್ಣೆಚಿ. ಆಖೀರಕ್ ಅವು ಒತ್ತವತೆ ಇಪ್ಪಕ ಅರಮನೆರ ಎದಿಕೆ ಪಡಿ ತೊರ್ಂದಿತ್ ಜ.ಬೈಯರ್ಡ್ ಅರಮನೆಕ್ ಬಂದಿತ್ ರಾಜಕುಮಾರಂಗಳ ಕಾಕಿತ್ ಗೌರವಪೂರ್ವಕವಾಯಿತ್ ತಾಂಡ ಸೈನಿಕಂಗಡ ರಕ್ಷಣೆಲ್ ಅಯಿಂಗಳ ಬ್ರಿಟಿಷ್ ಸೇನಾಧಿಪತಿ ಜ. ಹ್ಯಾರೀಸರ್ ಪಕ್ಕ ಅಯೆಚತ್.

ಅಲ್ಲಿಂಜ ಜ.ಬೈಯರ್ಡ್ ಚೆನ್ನಂಗ್ ಅಂಗರಕ್ಷಕಂಗಳ ಕೂಟಿಯಂಡ್ ಅರಮನೆಲ್ ಪೊಣ್ಣಾಳ ಇಂಜ ಕೋಂಬರೆನ ಬುಟ್ಟಿತ್ ಬಾಕಿ ಎಲ್ಲಾ ಭಾಗತ್ನ ಶೋಧನೆ ಮಾಡ್ಚಿ. ಇಚ್ಚೆಕೆಲ್ಲ ಆನಕೊ ಸುಲ್ತಾನಂಡ ಸುದ್ದಿ ಗೊತ್ತಾಯಿಲೆ. ಜ.ಬೈಯರ್ಡ್ ಕಿಲ್ಲೆದಾರನ ಕಾಕಿತ್ ಸುಲ್ತಾನ ಒಳ್ಳೆಚಂಡ ಜಾಗತ್ನ ಎಣ್ಣೆತೆ ಪೋನಕ ಕಠಿಣ ಪರಿಣಾಮ ಆಪಾಂದ್ ಎಚ್ಚರಿಕೆ ಕೊಡ್ತತ್. ಅಕ್ಕ ಕಿಲ್ಲೆದಾರ, ಸುಲ್ತಾನ ಗಾಯ ಆಯಿತ್ ಬುದ್ದ ಜಾಗತ್ನ ಕಾಟಾಚಿ. ಇದ್ ಅಂಪಂಗ್ ಎಕ್ಕ ಗೊತ್ತಾಚಿಂದ್ ಗೊತ್ತಾಪುಲೆ.

ಕಿಲ್ಲೆದಾರಂಡ ತಕ್ಕ್ ಕೇಟಿತ್ ಆ ಕೂಡೆನ್ನೆ ಜ.ಬೈಯರ್ಡ್ ಕಮಾನ್ರ ಪಕ್ಕ ಬಾತ್. ಅಕ್ಕಣೆ ಬೈಟಾಚಿ. ಆ ಪಡಿರ ಒಳ್ಳಲ್ ಪಿಳ್ಳಾ ಎದಿಕೆ ನೋಟುವಯಿಂಗಕ್ ಪೋಡಿ ಆಪನ್ನಕೆ ಚಾವುರ ಗುಡ್ಡೆ ಬುದ್ದಿತಿಂಜತ್.

ಬೈಟಾನಕೊ ಸುಲ್ತಾನ ಅಲ್ಲಿ ಚತ್ತಿತ ಇಲ್ಲೆ ಗಾಯ ಆಯಿತ್ ಬುದ್ದ್ ಪೋಯಿತಾಂದ್ ನೋಟುವನ್ನತ ಓರ್ ಅವಶ್ಯಕತೆ ಬ್ರಿಟಿಷ್ ಅಧಿಕಾರಿಯಡಲ್ಲಿ ಇಂಜತ್. ಆಂಡ ಮೀದ ಬಾಕಿ ಕಾರ್ಯಕ್ರಮ ನಡ್ಕೊಂಡಂಜತ್. ಆನಗುಂಡ್ ದುಂಬ ಬೊಳ್ಳೆಚತ್ನ ಕೊಂಡ ಬಪ್ಪೆಚಿಟ್ಟಿತ್ ಆಂಡ ಬೊಳ್ಳಿಲ್ ಓರಂದೆ ಚಾವುನ ಎಡ್ತಿತ್ ನೋಟುವ ಕೂಡ್ಚಿ.

ಚೆನ್ನಂಗ್ ನೇರತ್ ಚತ್ ಬುದ್ದಿತಿಂಜ ಓರ್ ತಡಿರ ಬರಿಕಾಲೆ ಕೆಣ್ಣಂಜಂಡ ಪಲ್ಲಕ್ಕಿರ ಅಡಿಲ್ ಸುಲ್ತಾನಂಡ ಓರ್ ಆಪ್ತ ಪರಿವಾರತ್ ವ್ಯಕ್ತಿ ಜಿಂವತೋಡೆ ಬುದ್ದಾನ ಕಂಡತ್. ಜ.ಬೈಯರ್ಡ್ ಅಂವನ ಅಲ್ಲಿಂಜ ಒಪ್ಪಿತ್ ಸುಲ್ತಾನಂಡ ವಿಷಯತ್ನ ಕೇಟತ್.

ಅಕ್ಕ ಆ ವ್ಯಕ್ತಿ ಸುಲ್ತಾನ ಬುದ್ದಿತಿಂಜ ಜಾಗತ್ನ ಕಾಟಾಚಿ. ಆ ಜಾಗತ್ಂಜ ಚಾವುನ ಕೊಂಡ ಬಪ್ಪಕ ಕಿಲ್ಲೆದಾರ ಅಲ್ಲಿ ಇಂಜ ಬೋರೆ ಸುಲ್ತಾನಂಡ ಸೇವಕಂಗ ಆ ಚಾವು



ಟಿಪ್ಪು ಸುಲ್ತಾನನಿಂದ ದೆಹಲಿ ಕಂಡುಪಡಿಸಲ್ಪಟ್ಟ. ಅಲ್ಲಿಂದ ಚಾವುನ ಪಲ್ಲಕ್ಕಿ ಬೆಚ್ಚಂಡ್ ಅರಮನೆಗೆ ಕೊಂಡುಬಾತ್. ಅಲ್ಲಿ ಎಲ್ಲರೂ ಆ ತಡಿ ಸುಲ್ತಾನನಿಂದ ತಡಿಂದ ಒಮ್ಮತವಾಗಿ ಎಣಿಸಿ.

ಸುಲ್ತಾನನಿಂದ ದಂಡನೆ ಮೊದಲ ಮೈಸೂರು ಪಡೆರ ಪಕ್ಕ ಪಾರಕಾತಂಡ್ ಇಂಜಿಂವ ತಾಂಡ ಪಾರ್ಕಿ ಸೋಲಾ ಆಯಂಡುಳ್ಳಾನ ಅರಂಜಂಡ್ ಮೇ 4ನೆ ಬೈಟ್ ತಪ್ಪಿಬಿಟ್ಟಿಂಡ್ ಕೋಟೆರ ಪೊರಮೆ ಪೋಯಿತಿಂಜತ್. ಅವ ಪಿತ್ತಾಂಡ್ ಪೊಲಾಕ ಜ.ಹ್ಯಾರಿಸ್ ಪಕ್ಕ ಬಂದಿತ್ ಶರಣಾಗತನಾಗಿ.

ಟಿಪ್ಪು ಚಿತ್ತಪಿಳ್ಳಾ ಅವಂಡ ಮಕ್ಕಳ ತಾಂಡ ಶಿಬಿರತ್ ಬಂಧನತ್ ಆಕುವದ್ ಅವಶ್ಯ ಇಲ್ಲೆಂಡ್ ಜ.ಹ್ಯಾರಿಸ್ ಗೇನ ಮಾಡಿತ್ ಅಯಿಂಗಳ ಅರಮನೆಗೆ ಅಯೆಚಿತ್. ಮಕ್ಕ ತಂಗಡ ಅವುಂಡ ಚಾವುನ ನೋಟಿತ್ ಬೇಜಾರತ್ ಅಂದೇ ಬೈಟ್ ತಡಿರ ದಫನ ಮಾಡೊಂಡೊಂಡ್ ಬಯಂದತ್.

ಈ ಪೋಲೆ ಶ್ರೀರಂಗಪಟ್ಟಣ್ ಕಾಜಿಯ ಮಹಮ್ಮದೀ ಧರ್ಮಪೋಲೆ ಟಿಪ್ಪುರ ಚಾವುನ ಲಾಲ್‌ಬಾಗ್‌ಲ್ ಅವಂಡ ಅವು ಹೈದರಾಲಿರ ಚಾವುನ ಪೂತ ಜಾಗತೆ ಬಲ್ಯ ಗೋರಿಲ್ ಪೂತತ್. ಆ ನೇರತ್ ಬ್ರಿಟಿಷ್ ಸೈನ್ಯದಳ ಸುಲ್ತಾನಂಗ್ ತಂಗಡ ಆಖೀರಿ ಗೌರವತ್ ಸೈನ್ಯಕ್ರಮತೆ ಕಾಟ್‌ಚಿ.

ಟಿಪ್ಪು ಸುಲ್ತಾನನಿಂದ ಚಾವುನ ಮಣ್ಣಲ್ ಪೂತನ್ನೆಗೆ ಆಕಾಶ್‌ತಾಂಜ ಭಯಂಕರವಾನ ತೆಡ್ ಬಡ್‌ಚಿತ್, ಮಿನ್ನಲ್ ಕಂಡತ್. ಅಕ್ಕಾಕಣೆ ಇಲ್ಲತ ಬಿರುಗಾಳಿನುಂಡ್ ಕೂಡ್‌ನ ಜೋರ್ ಮಳೆ ತೊರಂಜತ್.

ಇನ್ನನೆ ಬ್ರಿಟಿಷ್ ತಾಂಡ ಜಿಂವ ಇರಣೆಕೂ ಶತ್ರು ಆಯಿತಿಂಜ ಟಿಪ್ಪು ಸುಲ್ತಾನನಿಂದ ಭೌತಿಕ ಬದ್‌ಕಾರ ಆಖೀರಿಯಾಗಿ.

ಟಿಪ್ಪುರ ಚಾವು ಅವಂಡ ಚೆನ್ನಂಗ್ ಸ್ವಾಮಿ ದ್ರೋಹಿ ಅಧಿಕಾರಿಯಳುಂಡ್ ನಡ್‌ಂದಿಯೆಂಡ್ ಸಾಮಾನ್ಯ ಜನತೆರ ಅಭಿಪ್ರಾಯ ಆಯಿತಿಂಜತ್. ಸುಲ್ತಾನನಿಂದ ಸಮಕಾಲೀನ ಚರಿತ್ರಕಾರ ಹುಸೇನ್ ಆಲಿ ಕಿರ್ಮಾನಿ ದಿವಾನ್‌ಮೀರ್ ಸಾದಕ ತಾಂಡ ಸ್ವಾರ್ಥಕಾಯಿತ್ ಸುಲ್ತಾನಂಗ್ ಸೆರಿಯಲ್ಲತ ವಿಚಾರತ್‌ನ ಎಣ್ಣಿತ್ ಅವನ ತಪ್ಪು ಬಟ್ಟೆಕ್ ಬಲ್‌ಚಿತ್, ಗುಟ್ಟಾಯಿತ್ ಇಂಗ್ಲೀಷ್ ಸೈನ್ಯಾಧಿಕಾರಿಯಡ ಕೂಡೆ ಸಂಚ್ ನಡತ್‌ಚಿ, ತಾಂಡ ಪರಿವಾರತ್‌ರ ಕೂಡೆ ಶತ್ರುಪಳುಂಡ್ ತಪ್ಪಿಬಿಟ್ಟವಂಡೊಂಡ್ ಇಪ್ಪಕ ಪೊರಮೆತ ಪಡಿನ ಮುಚ್ಚಿಬಿಟ್ಟಿತ್. ತಾನ್ ಕೋಟೆರ ಪೊರಮೆ ಓಡಿ ಪೋಪಕ್ ನೋಟ್‌ಚಿಂಡ್ ಎಳ್ಳಿತ್.

ಮೀರ್‌ಸಾಧಕ ಅನ್ನನೆ ಓಡಿಪೋಪಕ ಸುಲ್ತಾನಂಡ ಸ್ವಾಮಿಭಕ್ತ ವ್ಯಕ್ತಿ ಅವನ ಕತ್ತಿಲ್ ಕತ್ತಿತ್ ಬೂಕ್‌ಚೀಂದೂ, ಅಲ್ಲಿ ಇಂಜ ಬೋರೆ ಜನ ಮೀರ್‌ ಸಾಧಕನ ಕೊಂದಿತ್ ಇಟ್ಟುತಂದೂ ಕಿರ್ಮಾನಿ ಎಲ್ಲವ. ಬ್ರಿಟಿಷ್ ಚರಿತ್ರಕಾರ ಮೀರ್‌ಸಾಧಕಂಡ ಸ್ವಾಮಿದ್ರೋಹತರ ಮೀದ ಒಂದೂ ಎಣ್ಣೆತಪೋನಕೊ ಅದತ್ ಒಬ್ಬ ಎಲ್ಲನ್ನ, ಮೀರ್‌ಸಾಧಕ ಪಡೆಂಜ ತಪ್ಪಾಚಿಟ್ಟುಂಡ್ ಓಡುವಕ ಸುಲ್ತಾನಂಡ ಸೈನಿಕಂಗಳುಂಡ್ ಚಿತ್ತತ್‌ಂದ್ ಎಳ್ಳಿತ್.

ಮೀರ್‌ಸಾಧಕಂಡ ಸ್ವಾಮಿದ್ರೋಹತರ ಸತ್ಯಾಂಶ ಎನ್ನನೆ ಇಂಜಕೊ ಅಂದೊಂಜ ಇಂದೇಕೆತ್ತನೆ ಜನ ಮೀರ್‌ ಸಾಧಕಂಡ ಪೆದ ಕೇಟಕ 'ಅಂವ ವಂಚಕ, ಸ್ವಾಮಿದ್ರೋಹಿ ಪಿಳ್ಳಾ ದುಷ್ಟ'ಂದ್ ತಿಕ್ಕಾರತ್ ನೆಲಕೆ ತುಪ್ಪುವ. ಶ್ರೀರಂಗಪಟ್ಟ ದರಿಯಾ ದಾಲತ್ ಅರಮನೆರ ಕೆಂವತ್ ರಂಗಲ್ ಬುಡ್‌ತನ ಚಿತ್ರತ್ ಮೀರ್‌ಸಾಧಕಂಡ ಚಿತ್ರತರ ಕಣ್ಣನ ಕುಕ್ಕಿತ್ ಆ ಚಿತ್ರತನೆ ವಿಕೃತ ಮಾಡ್‌ನದ್ ಇಂದೇಕೂ ಕಂಡ್ ಬಪ್ಪ.

ಮೇ 4ನೆ ಒಯಿಪತ್ 6ನೆ ನಾಳಂಕೆತ್ತನೆ ಬ್ರಿಟಿಷ್ ಸೈನ್ಯ ಶ್ರೀರಂಗಪಟ್ಟತರ ಸಾಧಾರಣ ಎಲ್ಲಾ ಮನೆನೊ ಲೂಟಿ ಮಾಡ್‌ಚಿ. ಎಚ್ಚಕೋ ಮನೆಕ್ ತಿತ್ತ್ ಇಟ್ಟುತ್. ಈ ನೇರಕ್ ಪಟ್ಟಣವಾಸಿಯ ಓಡಿ ಪೋಯಿತಿಂಜತ್. ಪೊಣ್ಣಾಳ ತಂಗಡ ಮಾನರಕ್ಷಣೆಕಾಯಿತ್ ಗುಡ್ಡೆ ಗುಡ್ಡೆ ಆಯಿತ್ ಓಣಿಲೆ ಇಂಜಂಡ್ ಬೈಟ್ ಕೈಚಿತ್. ಆಖೀರಕ್ ಕೋಟೆರ ಸರ್ವಾಧಿಕಾರಿ ಆಯಿತ್ ನೇಮಕ ಆಯಿತಿಂಜ ಕ. ವೆಲ್ಲೆಸ್ಲಿ ಲೂಟಿ ಮಾಡಿತ್, ಓರಚ್ಚಕಾಳನ ತೂಕಿತ್ ಚಾಟಿಲ್ ಪೊಯ್ಚಿಟ್ಟುತ್.

## ಟಿಪ್ಪು ಚತ್ತದು ಮೈಸೂರ್ ಪಡೆಕ್ ಸಹಾಯ ಮಾಡ್‌ನ ವೀರ ರಾಜೇಂದ್ರ ಒಡೆಯಂಗ್ ಬ್ರಿಟಿಷ್ ಸೈನ್ಯಾಧಿಕಾರಿಯಡ ಕಾಗದ

ವೀರರಾಜೇಂದ್ರ ಕೊಡಗುಕ್ ಬಂದಿತ್ ಚೆನ್ನಂಗ್ ದಿನಕೆತ್ತನೆ ಶ್ರೀರಂಗಪಟ್ಟತರ ಬರಿಂಜ ಫಿರಂಗಿ ಸದ್ ಕೇಟ್ ಬಪ್ಪ ಇಂಜತ್. ಈ ಬೊಡಿರ ಸದ್ ಮೇ 4ನೆ 1799ಂಗ್ ನಿಂದ್‌ಪೋಚಿ. ಅಲ್ಲಿಂಜ ಎಟ್ಲಾ ದಿನಕೆತ್ತನೆ ಶ್ರೀರಂಗಪಟ್ಟತರ ಬರಿಂಜ ಏದೇ ಓರ್



ವರ್ತಮಾನ ಕೊಡಗ್ಗಕ್ ಬಂದ್ಲೆ. ಅಲ್ಲಿ ಎಂತಾಚೊಂದ್ ಕೊಡಗ್ಗರ ರಾಜ ಬೇರ್‌ಚಿಟ್ಟಂಡ್ ಇಪ್ಪಕ ವಕೀಲ್ ಕೆಪಿತಾನ್ ಮೊವಿನಿ ಓರ್ ಕಾಗದ ಅಯೆಚತ್.

ಅದತ್ ಜನರಲ್ ಸಾಹೇಬಂಡ ಮುಂಬೈ ಸೈನ್ಯ ಈ ಬರಿಕ್ ಬಂದಂಡ್ ಉಂಡ್. ದುಂಬ ಕಾರ್ಬಾರ್ ಉಳ್ಳಾಂಗ್ ನಿಂಗ ಆಪಚ್ಚಕ್ ಬೆರಿಯ ಬರೊಂಡು. ಬಾಕಿ ನಿಂಗ ಬಂದಪಿಳ್ಳಾಂದ್ ಎಳ್ಳಿತಿಂಜತ್.

ವೀರರಾಜೇಂದ್ರಂಗ್ ಇದ್‌ನ ಓದಿತ್ ಪೇರ್ತ್ ಕುಶಿ ಆಯಿರ್‌ತ್. ಆಂಡ ಮಾರೀಪತ್ ಮಡಿಕೇರಿಲ್ 21 ಫಿರಂಗಿ ಪಾರ್‌ಚಿಟ್ಟತ್. ಪಿತ್ಯಾಂದ್ ಎಣ್ಣಕ ಮೇ 13ಂಗ್ ಪೇಟೆಕ್ ಪೋಯಿತ್ ಕ್ಯಾ.ಮೆಹೋನಿನ ಕಂಡಿತ್ ತಕ್ಕ್ ಪರ್‌ಂದತ್.

ರಾಜಂಡ ಸೈನ್ಯಾಧಿಕಾರಿಯ ತಂಗಡ ಪುಡ್‌ತತ್ ಇಂಜ ಸೀಮೆನೆಲ್ಲ ಭದ್ರ ಪಡ್‌ತಿಯಂಡ್ ಇಂಜತ್.

ಅಕ್ಕಣೆಕ್ ಮುಂಬೈಂಜ ಓರ್ ಐರೋಪ್ಯ ಸೈನ್ಯ ತುಕ್ಕಡಿ, ದಂಡ್ ದೇಶೀಯ ಸೈನಿಕಂಗಡ ತುಕ್ಕಡಿ ಶ್ರೀರಂಗಪಟ್ಟಕ್ ಪೋಪ ಬಟ್ಟೆಲ್ ಕೊಡ್‌ಗ್ ಸೀಮೆರ ಒಳ್‌ಕ್ ಬಂದಿತ್ ಕರಡಿಗೋಡ್‌ಲ್ ಒಳ್‌ಂಜತ್. ಇದೇ ನೇರತ್ ಶ್ರೀರಂಗಪಟ್ಟ ಗೆದ್ದ ಬ್ರಿಟಿಷ್ ಸೈನ್ಯತ್ ಮುಂಬೈ ಸೈನ್ಯತ್‌ರ ಮುಖ್ಯಾಧಿಕಾರಿ ಆಯಿತಿಂಜ ಜ.ಸ್ಕೂವರ್ತ್ ತಾಂಡ ಸೈನ್ಯ ಎಡ್‌ತಂಡ್ ವಾಪಾಸ್ ಪೋಪ ಬಟ್ಟೆಲ್ ಪಿರಿಯಾಪಟ್ಟ ತ್‌ರ ಪಕ್ಕ ಮುತ್ತೂರ್‌ಲ್ ಒಳ್‌ಂಜತ್. ಅಕ್ಕ ಕೊಡಗ್‌ಂಜ ವೀರರಾಜೇಂದ್ರ ಒಡೆಯ ಪಿಳ್ಳಾ ಕ್ಯಾ.ಮೆಹೋನಿ ಮುತ್ತೂರ್‌ಕ್ ಬಂದಿತ್ ಜ.ಸ್ಕೂವರ್ತ್‌ರ ಕೂಡೆ ತಕ್ಕ್ ಪರ್‌ಂದತ್.

ಅಲ್ಲಿಂಜ ಮುಂಬೈಂಜ ಪುದಿಯದಾಯಿತ್ ಬಂದ ಸೈನ್ಯ ಶ್ರೀರಂಗಪಟ್ಟತ್‌ಂಜ ವಾಪಾಸ್‌ಬಂದ ಸೈನ್ಯ ಒಕ್ಕಚೆ ಕೂಡ್‌ನಕ ಬಲ್ಯದಾಯಿತ್ ವಾಪಾಸ್ ಇಳ್‌ಂಜಿ ಪೋಪಕ ಊಣ್ ತೀನಿರ ಸಾಮಾನ್‌ಕ್ ಕೊರು ಆಕೂಂದ್ ಗೇನ ಮಾಡಿತ್ ಜ. ಸ್ಕೂವರ್ತ್ ಮುಂಬೈಂಜ ಪುದಿಯದಾಯಿತ್ ಬಂದ ಸೈನ್ಯತ್‌ನ ಆದ್ಯ ಕಣ್ಣಾನೂರ್‌ಕ್ ಅಯೆಚೆದು ತಾಂಡ ಸೈನ್ಯತ್‌ನ ಎಡ್‌ತಂಡ್ ಕೊಡಗ್‌ಕ್ ಬಾತ್.

ಈಂಡೆಡೆಲ್ ಬಂಗಾಳತ್‌ರ ಬಲ್ಯ ಸೈನ್ಯ ಪಿಳ್ಳಾ ಶ್ರೀರಂಗಪಟ್ಟತ್ ಇಂಜ ಎಲ್ಲಾ ಬ್ರಿಟಿಷ್ ಸೈನ್ಯತ್‌ರ ಸರ್ವಶ್ರೇಷ್ಠ ಅಧಿಕಾರಿ ಆಯಿತಿಂಜ ಜ.ಹ್ಯಾರೀಸ್ ವೀರರಾಜೇಂದ್ರಂಗ್ ಅವಂಡ ಉಪಕಾರತ್‌ನ ಹೊಗಳಿತ್ ಕಾಗದ ಅಯೆಚತ್. ಇದತ್ ಎಳ್ಳಿತಿಂಜ ಟಿಪ್ಪುರ ಸಾಮಾನ್‌ನ ಜ.ಸ್ಕೂವರ್ತ್ ವೀರರಾಜೇಂದ್ರಂಗ್ ಅಯೆಚತ್. ಅಲ್ಲತೆ ಜ.ಸ್ಕೂವರ್ತ್ ತಾಂಡಲ್ಲಿ ಇಂಜ ಟಿಪ್ಪುರ ಕುದರೆ ಪಿಳ್ಳಾ ಜ. ಹಾರ್ಟ್‌ಫೋರ್ಡ್ ಓರ್ ಕುದರೆನ



ವೀರರಾಜೇಂದ್ರಂಗ್ ಕೊಡ್‌ತಿತ್ ಕುಶಿ ಪಡ್‌ತ್‌ಚಿ.

ಇದ್‌ಂಗ್ ವೀರರಾಜೇಂದ್ರ ಜವಾಬ್ ಆಯೆಚಿಲ್ಲಿ "ನಾನ್ ನಿಂಗಕ್ ದುಂಬ ಉಪಕಾರ ಮಾಡಿಯೆಂದ್ ನನ್ನ ಹೊಗಳಿತ್ ಎಳ್ವಿರ. ನಾನ್ ಅಂತಾ ಬಲ್ಯ ಕೆಲಸ ಒಂದೂ ಮಾಡ್‌ಲೆ. ಟಿಪ್ಪು ನಂಗಕ್ ಬಲ್ಯ ಓರ್ ಶತ್ರು ಆಯಿತಿಂಜತ್. ಹಿಂದು ಜನಾಂಗತ್‌ನ ಪಾಳ್ ಮಾಡುವಕ್ ನೋಟ್‌ನಂವ. ಎಚ್ಚಕೋ ಹಿಂದೂವಳ ತಾಂಡ ಜನಾಂಗಕ್ ಒರಾತತ್ ಮತಾಂತರ ಮಾಡ್‌ನಂವ. ಅಂತಹ ವ್ಯಕ್ತಿ ನಾಶ ಮಾಡಿತ್, ಹಿಂದೂ ಧರ್ಮ ರಕ್ಷಣೆ ಮಾಡ್‌ನ ಪುಣ್ಯ ಸೂರ್ಯ, ಚಣ್ಣೂರ ಇರಣೆ ತಂಗಡ ಪೆದ ಇಪ್ಪ. ಕೂಟ್‌ಕ್ ನಾಕ್ ಕುದರೆಯಳ ಆಯೆಚಿತಂದದ್ ದುಂಬ ಕುಶಿ ಆಚಿ"ಂದ್ ಎಳ್ವ್‌ಚಿ.

ಬಂಗಾಳ ಗ.ಜ. ಲಾರ್ಡ್ ಮಾರ್ನಿಂಗ್‌ನ್ ಸುಲ್ತಾನಂಡ ವಿರುದ್ಧ ಬ್ರಿಟಿಷ್ ಮಾಡ್‌ನ ಪಡೆಲ್ ವೀರರಾಜೇಂದ್ರ ಅಯಿಂಗಕ್ ಮಾಡ್‌ನ ಸಹಾಯತ್‌ನ ಹೊಗಳಿತ್ ಕಾಗದ ಎಳ್ವ್‌ಚಿ.

ವೀರರಾಜೇಂದ್ರ ಬ್ರಿಟಿಷ್ ಪಡೆರ ನೇರತ್ ತಾನ್ ಮಾಡ್‌ನ ಸಹಾಯ ಪೇರ್ತ್ ಕಮ್ಮಿಂದ್ ಎಣ್ಣೆಯಂಡಕೊ ಅವಂಡ ರಾಜ್ಯತ್‌ರ ವಿಸ್ತೀರ್ಣ, ಅದ್‌ಂಡ ಉತ್ಪತ್ತಿ, ಅನುಕೂಲತೆರ ದೃಷ್ಟಿಲ್ ಅವ ಬ್ರಿಟಿಷ್ ಸೈನ್ಯಕ್ ಮಾಡ್‌ನ ಸಹಾಯ ಅವಂಡ ತಾಕತ್‌ಕೂ ಮೀತದ್ ಪಿಳ್ಳಾ ಪೇರ್ತ್ ಅಮೂಲ್ಯ ಆಯಿತಿಂಜತ್. ಅವ ಬ್ರಿಟಿಷ್ ಸೈನ್ಯಕ್ ದುಂಬ ಸಾಮಾನ್‌ನ ಎತ್ತ್‌ಚಿಟ್ಟಿದ್ ಮಾತ್ರ ಅಲ್ಲತೆ ಬ್ರಿಟಿಷ್ ಸೈನ್ಯತ್‌ರ ಗಾಯಾಳುವಕ್ ಮದ್ದಾರ ಉಪಚಾರಕ್ ಅಯಿಂಗಳ ಆಸ್ಪತ್ರೆಲ್ ಆಕ್‌ಚಿ. ಬ್ರಿಟಿಷ್ ಸೈನ್ಯಕ್ ಸಾಮಾನ್ ಕಡ್‌ತುವಕ್ ಜನಳ ಪಿಳ್ಳಾ ಅತ್ತಳ ಕೊಡ್‌ತತ್. ಅವ ಇನ್ನೆ ಮಾಡ್‌ನ ಸಹಾಯಕ್ ಏದೇ ಪಣ ಎಡ್‌ತಂಡ್‌ಲೆ. ಆಚೀಂಗಿ, ಈ ಸಹಾಯಕ್ ಪ್ರತಿಫಲ ಆಯಿತ್ ಒಂದ್, ದಂಡ್ ಕಾಲತ್ ಲಾರ್ಡ್ ಮಾರ್ನಿಂಗ್‌ನ್ ಅವಂಗ್ ದ.ಕನ್ನಡ ಜಿಲ್ಲೆಲ್ ಕೊಡಗ್ ರಾಜಂಗ್ ಮಿಳ್ಳಾ ಇಂಜ ಸೀಮೆನ ತಿರಿತ್ ಕೊಡ್‌ತದೆ ಅಲ್ಲತೆ ಅದ್‌ಂಡ ಕೂಟ್‌ಕ್ ಇಳ್ಳಾ ಚೆನ್ನಂಗ್ ಸೀಮೆನ ಕೂಟ್‌ಚಿ.

ವೀರರಾಜೇಂದ್ರಂಗ್ ಇಚ್ಚಕ್ ಸೀಮೆನ ಕೊಡ್‌ತಕೊ ಅವ ಬ್ರಿಟಿಷ್ ಪಡೆರ ನೇರತ್ ಮಾಡ್‌ನ ಸಹಾಯತ್ ಇಚ್ಚಕ್ ಕೊಡ್‌ತದ್ ಪೋರಾಂದ್ ಸುಲ್ತಾನ ಚತ್ತಪಿಳ್ಳಾ ಶ್ರೀರಂಗಪಟ್ಟಣ್ ಕೋಟೆರ ಸರ್ವಾಧಿಕಾರಿ ಆಯಿತ್ ನೇಮಕ ಆನ ಕ.ವೆಲ್ಲೆಸ್ಲಿ ಗ.ಜನರಲ್‌ಕ್ ಕಾಗದ ಎಳ್ವ್‌ಚಿ.



ಟಿಪ್ಪು ಸುಲ್ತಾನ ಚತ್ತದು ವೀರ ರಾಜೇಂದ್ರ ಒಡೆಯ ತಾಂಡ  
ಅಧಿಕಾರಿಯ ವಶ ಪಡ್ತಿಯಂಡ ಜಾಗತ್‌ನ ಸಮ್ಮಂಧಪಟ್ಟ  
ಸರ್ಕಾರಕ್ ಬುಟ್ಟ್‌ಕೊಡ್‌ತದ್ ಪಿಳ್ಳಾ ತಾಂಗ್ ಬರಂದಿಯ  
ಸೀಮೆನ ಬಯಂದದ್.

ಟಿಪ್ಪು ಸುಲ್ತಾನ ಪಡೆಲ್ ಚತ್ತ ನೇರತ್ ತುಳುನಾಡ್‌ಲ್ ಮಂಗಳೂರ್ ಸೀಮೆಕೆತ್ತನೆ  
ಮೈಸೂರ್ ರಾಜ್ಯತ್ ಮಹಾರಾಜ ದುರ್ಗತ್‌ಂಜ ಹೆಗ್ಗಡೆದೇವ ಕೋಟೆಕೆತ್ತನೆ ಸೀಮೆ  
ವೀರರಾಜೇಂದ್ರ ಒಡೆಯಂಡ ಸೈನ್ಯಾಧಿಕಾರಿಯಡ ಪುಡ್‌ತತ್ ಇಂಜತ್. ಟಿಪ್ಪು ಚತ್ತದು  
ಅಂವಂಡ ರಾಜ್ಯತ್‌ರ ಪಡಿಣಾರ್ ಮಲೆರ ಸೀಮೆನ ಕಂಪೆನಿ ಸರ್ಕಾರ ತಾಂಡ ಆಡಳಿತಕ್  
ಒಳಪಡ್‌ತಚಿ. 9 ಜಿಲ್ಲೆ ಇಂಜ ಪಳೇಯ ಮೈಸೂರ್ ರಾಜ್ಯತ್‌ನ ಪಂಡ್ ಹಿಂದೂ  
ರಾಜ ಮನೆತನತ್‌ರ ಓರ್ ರಾಜಕುಮಾರಂಗ್ ಕೊಡ್‌ತಿತ್ ಅಂವನ ತಾಂಡ ಆಶ್ರಿತ ರಾಜ  
ಆಯಿತ್ ಮಾಡಿಯಂಡತ್. ಮೈಸೂರ್ ರಾಜ್ಯತ್‌ರ ಪೂರ್ವ ಪಿಳ್ಳಾ ಈಶಾನ್ಯತ್‌ರ ನಾಲ್  
ಜಿಲ್ಲೆನ ನಿಜಾಮಂಗ್ ಕೊಡ್‌ತತ್. ಉತ್ತರತ್‌ರ ಚೆನ್ನಂಗ್ ಜಿಲ್ಲೆನ ಮಹಾರಾಷ್ಟ್ರತ್‌ರ  
ಪೇಶ್ವಕ್ ಕೊಡ್‌ತತ್. ಆಚೇಂಗಿ, ತಾಂಗ್ ತಂದ ಸೀಮೆ ಕಮ್ಮಿಂದ್ ಎಡ್‌ತವತಾಂಗ್  
ಕಂಪೆನಿ ಸರ್ಕಾರ ಆಳುವಕ್ ಕೂಡ್‌ಚಿ.

ಕೊಡಗ್ ರಾಜನುಂಡ್ ಪಶ್ಚಿಮ ಸೀಮೆನ ತಂಗ ವಹಿಸಿಯವಾಂಗ್ ಜ. ಹ್ಯಾರಿಸ್‌ರ  
ಅಪ್ಪಣೆಪೋಲೆ ಕ.ವೈಸ್ಮೇನ್ ಎಣ್ಣುವ ಅಧಿಕಾರಿ ಸೈನ್ಯತೋಡೆ ಮಂಗಳೂರ್ ತಾಲೋಕ್‌ಕ್  
ಬಾತ್. ಅಕ್ಕ ಬಾರ್ಕೂರ್ ಬಾಗ್ವಾಡಿಕೆತ್ತನೆ ತಂಗಡ ಪುಡ್‌ತತ್ ಭದ್ರ ಪಡ್‌ತಿಯಂಡ್  
ಇಂಜ ಸೀಮೆನ ವೀರರಾಜೇಂದ್ರ ಒಡೆಯಂಡ ಅಪ್ಪಣೆಪೋಲೆ ಕರಣಿಕ ಸುಬ್ಬಯ್ಯ,  
ಕ.ವೈಸ್ಮೇನ್‌ರ ಪುಡ್‌ತಕ್ ಬುಟ್ಟ್‌ಕೊಡ್‌ತಿತ್ ಆ ಸೀಮೆಲ್ ರಾಣ್ಯ ಇಂಜ ತಾಂಡ  
ಜನಳ ಕೂಟಿಯಂಡ್ ಕೊಡಗ್‌ಕ್ ಬಾತ್.

ವೀರರಾಜೇಂದ್ರ ಒಡೆಯಂಗ್ ಪೂರ್ಣಯ್ಯಂಡ ಬರಿಯತ ಅಧಿಕಾರಿಯ ಬಂದಿತ್  
ಈಶ್ವರಯ್ಯಂಡ ಪುಡ್‌ತತ್ ಇಂಜ ಸೀಮೆನ ಬುಟ್ಟಿ ತರೊಂಡೂಂದ್ ಕೇಟದ್ ಸೆರಿ  
ಬಂದ್‌ಲೆ. ಅಂವ ಈ ನೇರತ್ ತಾಂಡ ರಾಜಧಾನಿಲ್ ಇಂಜ ಕ್ಯಾ.ಮೆಹೋನಿರ ಕೂಡೆ  
ತಾಂಡ ಅಸಮಧಾನತ್‌ನ ಎಣ್ಣಿಯಂಡತ್.

ಟಿಪ್ಪು ಚತ್ತಪಿಳ್ಳಾ ಅಂವಂಡ ರಾಜ್ಯತ್‌ನ ಬ್ರಿಟಿಷ್‌ಕಾರಳೆ ಬೆಚ್ಚವ. ತಾಂಡ ರಾಜ್ಯಕ್  
ಪಿರಿಯಾಪಟ್ಟಿ, ಬೆಟ್ಟದಪುರ ಪಿಳ್ಳಾ ಅರಕಲಗೂಡ್ ಸೀಮೆನ ಕೂಟಿಯಂಡ್ ಪುದಿಯ  
ತೆರಿನ ಮಾಡಿಯವಲೂಂದ್ ಗೇನ ಮಾಡಿತಿಂಜತ್. ಅನ್ನನೆ ತುಳು ನಾಡ್‌ಲ್ ಪಂಡ್

ತಾಂಡ ರಾಜ್ಯಕ್ ಸೇರಿತಿಂಜ ಅಮರಸುಳ್ಳಮಾಗಣೆರ ಕೂಟ್‌ಕ್ ಬೆಳ್ಳಾರೆ ಪಿಳ್ಳಾ ಮಂಗಳೂರ್ ತಾಲ್ಲೂಕ್‌ಕೆತ್ತನೆ ಸೀಮೆನ ಬುಟ್ಟ್‌ಕೊಡ್‌ಪಿಂದ್ ಗೇನ ಮಾಡ್‌ಚಿ.

ಆಚೇಂಗಿ, ಅನ್ನನೆ ಆಯಿಲೆ. ಈ ಸಮ್ಮಂಧ ಕಂಪೆನಿ ಸರ್ಕಾರತರ ಗ.ಜ. ಲಾರ್ಡ್ ಮಾರ್ನಿಂಗ್ಸನ್ ರಾಜಂಗ್ ಕಾಗದ ಅಯೆಚತ್.

ವೀರರಾಜೇಂದ್ರ ಒಡೆಯ ಪಿರಿಯಾಪಟ್ಟ ಸೀಮೆ ಪಂಡ್ ತಾಂಡ ದಾಯಾದಿಯಡ ಸೀಮೆ ಆಯಿತಿಂಜಾಂಗ್ ಅದ್ ತಾಂಗ್ ಬರೊಂಡೂಂದ್ ಆಸೆ ಪಟ್ಟಿತಿಂಜತ್. ಮೈಸೂರ್ ರಾಜ ಮನೆತನತರ ಕೂಡೆ ವಿಶ್ವಾಸ ಕಳ್ಂದವಕಾಗಾಂದ್ ಈ ಸೀಮೆನ ಕಂಪೆನಿ ಸರ್ಕಾರಕಾರ ವೀರರಾಜೇಂದ್ರಂಗ್ ಬುಟ್ಟ್ ಕೊಡ್‌ತಲೆ. ಆಚೇಂಗಿ, ಅದ್‌ಂಡ ಬದಲ್ ತುಳುನಾಡಲ್ ಸುಮಾರ್ ಬಂಡವಾಳಕೆತ್ತನೆ ಸೀಮೆನ ಕೊಡಗ್ ರಾಜಂಗ್ ಅವ ಟಿಪ್ಪು ಸುಲ್ತಾನಂಡ ಕೂಡೆ ಮಾಡ್‌ನ ಪಡೆರ ನೇರತ್ ಸಹಾಯ ಮಾಡ್‌ನಾಂಗ್ ಪ್ರತಿಫಲ ಆಯಿತ್ ಕೊಡ್‌ತತ್.

## ಕಂಪೆನಿ ಸರ್ಕಾರ ವೀರರಾಜೇಂದ್ರ ಒಡೆಯಂಡ ಕೂಡೆ ಪುದಿಯ ಮೈತ್ರಿ ಒಪ್ಪಂದ

ಟಿಪ್ಪು ಸುಲ್ತಾನ ಚತ್ತಪಿಳ್ಳಾ ಆಖೀರಿ ಮೈಸೂರ್ ಪಡೆ ತೇಂದಿತ್ ಕಂಪೆನಿ ಸರ್ಕಾರತರ ಸೈನ್ಯ, ಮಿತ್ರ ರಾಜ್ಯ ಅದ್‌ಂಡ ಸ್ವಂತ ಸ್ಥಾನಕ್ ವಾಪಾಸಾಚಿ. ಇದ್‌ನುಂಡ್ ಕಂಪೆನಿ ಸರ್ಕಾರ ಮುಂಬೈಸೈನ್ಯಕ್ ಕೊಡಗ್ ರಾಜ ಉಂಬಕುಳ್ಳ ಸಾಮಾನ್ ಪಿಳ್ಳಾ ಬೋರೆ ಸಾಮಾನ್‌ನ ಎತ್ತ್‌ಚಿಡುವ ಕೆಲಸ ನಿಂದಿತಿಂಜತ್. ಇದ್‌ನ ಕಂಪೆನಿ ಸರ್ಕಾರ ತಾಂಡ ರೆಕಾರ್ಡ್‌ಕ್ ಎಡ್‌ತಂಡ್ ಅದ್‌ನ ಹಂಚುವಕ್ ಕೊಡಗಲ್ ಸಂಪೆನಿ ಸರ್ಕಾರತರ ವಕೀಲನಾಯಿತ್ ನೇಮಕ ಆನ ಕ್ಯಾ.ಮೆಹೋನಿರ ಕಾರ್ಯಾವಧಿಲ್ ತೇಂದತ್. ಅನ್ನನಾಯಿತ್ ಬಂಗಾಳ ಗ.ಜ. ಮಾರ್ನಿಂಗ್ಸನ್ ಸಾಹೇಬ್, ವೀರರಾಜೇಂದ್ರಂಗ್ ಕಾಗದ ಅಯೆಚತ್.

ಕ್ಯಾ.ಮೆಹೋನಿ ತಾಂಡ ಆಸ್ಥಾನ ಬುಟ್ಟಿತ್ ಪೋಪ ವಿಷಯ ವೀರರಾಜೇಂದ್ರಂಗ್

ಬೇಜಾರಕ್ ಎಡೆಯಾಚಿ. ಇವು ದಂಡಾಳೂ ಆಪ್ತ ಸಿನೇತಂಗ ಆಯಿತಿಂಜತ್. ಆನಗುಂಡ್ ಬಂಗಾಳತ್‌ರ ಗ.ಜ.ಕ್ ಜವಾಬ್ ಆಯಿತ್ ರಾಜ, ಕ್ಯಾ.ಮೆಹೋನಿರ ಕೆಲಸ ಕಾರ್ಬಾರ್‌ರ ವಿಷಯತ್‌ನ ಹೊಗಳಿತ್ ಎಲ್ಲಿತಿಂಜತ್.

ಅಲ್ಲಿಂಜ 1799ನೆ ಇಸವಿ ಅಕ್ಟೋಬರ್ ತಿಂಗ ನಾಳಂಕೆ 12ಂಗ್ ಕ್ಯಾ.ಮೆಹೋನಿ, ವೀರರಾಜೇಂದ್ರ ಒಡೆಯಂಗ್ ಪ್ರಶಸ್ತಿಪತ್ರ ಎಲ್ಲಿಕೊಡ್‌ತಿತ್ ರಾಜನ ಬುಟ್ಟಿತ್ ತಲಚೇರಿಕ್ ಪೋಚಿ.

### ಮೈಸೂರ್ ರಾಜ್ಯತ್ ಬ್ರಿಟಿಷ್ ರೆಸಿಡೆಂಟ್ ಕೆ. ಕ್ಲೋಸ್ ಕೊಡಗ್ಗರ ರಾಜಂಡ ಸೈನಿಕಂಗ ಸುಲಿಗೆ ಮಾಡ್‌ಚಿಂದ್ ಎಣ್ಣ್‌ನ ಸಾಮಾನ್‌ನ ವಾಪಾಸ್ ತಪ್ಪಕ್ ಕಾಗದ ಎಳ್ಳೊನಾಂಗ್ ವೀರ ರಾಜೇಂದ್ರಂಡ ಜವಾಬ್

ಕೆ. ಬ್ಯಾರಿಕ್ಲೋಸ್ ಸಾಹೇಬ 1799ನೆ ಅಕ್ಟೋಬರ್ ಆಖೀರಕ್ ಮೈಸೂರ್‌ಕ್ ಬಂದಿತ್ ತಾಂಡ ಪುದಿಯ ಕೆಲಸತ್‌ನ ವಹಿಸಿಯಂಡತ್. ಅಂವಂಗ್ ವೀರರಾಜೇಂದ್ರ ಒಡೆಯಂಡ ಪರಿಚಯ ಇಂಜಾಲೆ. ಈ ರಾಜ ಮೈಸೂರ್ ಪಡೆ ಆಯಂಡಿಪ್ಪಕ ಮುಂಬೈಂಜ ಬಂದ ಸೈನ್ಯಕ್ ತಾಂಡ ಕಷ್ಟ, ನಷ್ಟತ್‌ನ ಕೂಟಾಕೆ ಎಲ್ಲಾ ತರತೂ ಸಹಾಯ ಮಾಡ್‌ನಾಂಡ ಮನಾರ ತಿಳುವಳಿಕೆ ಇಂಜಾಲೆ. ಆನಗುಂಡ್ ಇಂವ ಶ್ರೀರಂಗಪಟ್ಟಿತ್ ಕಂಪೆನಿ ಸರ್ಕಾರತ್‌ರ ರೆಸಿಡೆಂಟ್ ಚಾಕ್ರಿನ ವಹಿಸಿಯಂಡ ಚೆನ್ನಂಗ್ ದಿನತ್ ವೀರರಾಜೇಂದ್ರಂಡ ಮನಸ್ಸಕ್ ನೊಂಬಲ ಆಪನ್ನತ ಓರ್ ಕಾಗದ ಅಯೆಚತ್.

ಆಚೇಂಗಿ, ಕೆ.ಕ್ಲೋಸ್ ಈ ಕಾಗದತ್‌ನ ರಾಜಂಡ ಮನಸ್ಸ ನೊಂಬಲ ಪಡ್‌ತುವ ಉದ್ದೇಶತ್ ಎಲ್ಲಿತಿಂಜಾಲೆ. ಮೈಸೂರ್ ರಾಜಂಡ ಅಧಿಕಾರಿಯ, ಕೊಡಗ್ ರಾಜಂಡ ಸೈನಿಕಂಗಡ ಮೀದ ಮಾಡ್‌ನ ಆಪಾದನೆನ ಅವು ಕನ್ನಡತ್ ಎಲ್ಲಿತ್ ಕೊಡ್‌ತನ್ನಕೆ ತಾನ್ ರಾಜಂಗ್ ಅಯೆಚತ್. ಅದತ್ ಕೊಡಗ್ ರಾಜನ ನಿಂಗಂದ್ ಮರ್ಯಾದಿಲ್ ಕಾಕುವಾಂಡ ಬದಲ್ ನೀನ್‌ಂದ್ ಏಕವಚನತ್ ಸಂಬೋಧನೆ ಮಾಡಿತಿಂಜತ್.

ಶ್ರೀರಂಗಪಟ್ಟಣ 16ನೆ ನವೆಂಬರ್ 1799

ಕ.ಹ್ಯಾರಿಕ್ಲೋಸ್ ಸಾಹೇಬನುಂಡ್,  
ಕೊಡಗುರ ರಾಜಂಗ್.

ಲಾರ್ಡ್ ಮಾರ್ನಿಂಗ್ಸನ್ ನನ್ನ ಮೈಸೂರ್ ರಾಜ್ಯತುರ ಕಮೀಷನ್‌ರ್ ಆಯಿತ್ ನೇಮಕ ಮಾಡಿತ್ ಶ್ರೀರಂಗಪಟ್ಟಣ್ ವರ್ಗ ಮಾಡ್‌ನದ್ ನೀಕ್ ಗೊತ್ತಿಕ್ಕು. ಶ್ರೀರಂಗಪಟ್ಟಣ್ ನಂಗಡ ಪುಡಾತಕ್ ಕೊಟ್ಟಿತ್ ಅಂಜಿ ದಿನ ಕೈಂಜದು ನೀಡ ಜನ ಮಹಾರಾಜದುರ್ಗ ಜಿಲ್ಲೆಕ್ ಪೋಯಿತ್ 17 ಊರ್‌ನ ಸುಲಿಗೆ ಮಾಡಿತ್ ಅತ್ತಕಡ್‌ಚಿಯ, ಪೊಣ್ಣಾಳೆ, ಕುಳ್ಳಿಯ, ಪೊನ್ನ, ಬೊಳ್ಳಿ, ಅಕ್ಕಿ, ನುಚ್ಚಿನೆಲ್ಲ ರೈತಂಗಳುಂಡ್ ಬಲಾಚಂಡ್ ತೆರಿರ ಆ ಬರಿಕ್ ಕಡಾತ್‌ಚಿಂದ್ ಮಂಜರಾಬಾದ್ ತೆರಿಂಜ ನಾಕ್ ವರದಿ ಬಂದಿತ್.

ಈ ಕಾಗದತುರ ಕೂಡೆ ಅವು ಸುಲಿಗೆ ಮಾಡ್‌ನ ಪಟ್ಟಿನೊ ಕೂಟಿಯೆ. ಮೈಸೂರ್ ರಾಜ್ಯತುರ ನಂಗ ಗೆದ್ದಪಿಳ್ಳಾ ಅದ್ ಕಂಪೆನಿ ಸರ್ಕಾರಕ್ ಕೂಡಿರುಂಡ್. ಆನಗುಂಡ್ ಮೈಸೂರ್ ಪಿಳ್ಳಾ ಕಂಪೆನಿ ಸರ್ಕಾರಕ್ ಅಡಂಗ್‌ನ ರಾಜ್ಯಕ್ ಏದೇ ಭೇದ ಇಲ್ಲೆ. ಆಚೇಂಗಿ, ನೀನ್ ಕಂಪೆನಿ ಸರ್ಕಾರತುರ ಸಿನೇತ. ಆನಗುಂಡ್ ನಾನ್ ಪಟ್ಟಿಲ್ ಕಾಟ್‌ನ ಪ್ರತಿಯೋರ್ ಸಾಮಾನ್‌ನ ತಡ ಮಾಡತೆ ವಾಪಾಸ್ ಮಾಡೊಂಡೊಂದ್ ನಿನ್ನ ಕೇಟಂಡ್ ಉಳ್ಳ.

...ಇನ್ನೆನೆ ಎಳ್ಳೆನ ಕಾಗದ ಓದಿತ್ ವೀರರಾಜೇಂದ್ರಂಗ್ ದುಂಬ ಅಸಮಧಾನ ಆಚಿ. ಕೂಡೆನ್ನೆ ಅವ ಕಂಪೆನಿ ಸರ್ಕಾರಕ್ ಕ.ಕ್ಲೋಸ್‌ರ ಕಾಗದತುರ ಮೀದ ಅರಿಚಿಟ್ಟಿತ್. ಆ ಕಾಗದ ಸುಮಾರ್ ಪದ್‌ನಂಜಿ ಬರಿ ಇಂಜತ್. ಇದತ್ ಮುಖ್ಯವಾಯಿತ್ ಮುಂಬೈ ಸೈನ್ಯಕ್ ದಂಡ್ ಕುರಿ ಮಾಡ್‌ನ ಸಹಾಯತುನ ಎಣ್ಣೆತಿಂಜತ್.

ಪೂರ್ಣಯ ಪಟ್ಟಿ. ಅವಂಡ ಪಿಳ್ಳಾ ನಾಡ ಚಾತಿಕಾರ ಅಪ್ಪರಿಪ್ಪರ ಪಗೆಲ್ ಕಾಂಬ. ನಾಡ ಪೆದಕ್ ಕರ್ತ ಕಲೆನ ಇಟ್ಟಿತ್ ನಾಕ್ ಕೆಟ್ಟ ಪೆದ ಕೊಂಡಬಂದಿತ್. ಇಕ್ಕ ರಾಜ್ಯತ್ ಅವನ ಯಜಮಾನ. ಆನಗುಂಡ್ ರಾಜ್ಯತುರ ಬೋರೆ ಜಿಲ್ಲೆಲೂ ಅವ ಬೆಂದು - ಚಾಚೆಯಳ ಅಧಿಕಾರತ್ ಬೆಚ್ಚಂಡಿತ್. ಇಕ್ಕ ಅವ ಜಿಲ್ಲಾಧಿಕಾರಿರ ಮೂಲಕ ನಾಡ ಪೆದ ಕೆಡಾತುವದೆ ಅಲ್ಲತೆ ನಾಡ ಜನ ಸುಲಿಗೆ ಮಾಡ್‌ಚಿಂದ್ ಎಣ್ಣುವ ಸಾಮಾನ್‌ರ ಪಟ್ಟಿನೊ ನಾಕ್ ಅಯೆಚಿತ್. ಇವು ನನ್ನ ಕಂಡಿತೆ ಇಲ್ಲೆ. ನಾಡ ಮೀದ ಅರಂಜವೊ ಅಲ್ಲ. ಅನ್ನನಾಯಿತ್ ಅವು ಓರ್ ಪಟ್ಟಂಡ ಮೂಲಕ ಓರ್ ಗುಲಾಮಂಗ್ ಎಳ್ಳೆನನ್ನೆ ಕಾಗದ ಎಳ್ಳಿತ್. ಆನಗುಂಡ್ ಅವು ಎಳ್ಳೆನ ಕಾಗದತುರ ಓರ್ ಕಾಪಿನ ನಿಂಗಕ್ ಅಯೆಚಂಡ್ ಉಳ್ಳ.

ಇಂಗ್ಲೀಷ್‌ಕಾರಡ ಎಲ್ಲ ಶತ್ರುವ ಚೋತಿತ್ ಅಯಿಂಗಡ ಬಾವುಟ ಲೋಕತುರ ನಾಲ್

ಬರಿಲ್ ಪಾರಿಕಳಿಪಾಂಡ್ ನಾನ್ ಗೇನ ಮಾಡಿಯಂಡ್ ನಿಂಗಡನ್ನತ ಸಿನೇತಂಡ ಕೂಡೆ ವ್ಯವಹಾರ ಮಾಡುವ ಪಿಳ್ಳಾ ನಿಂಗಳುಂಡ್ ಗೌರವತ್ ಕಾಂಬ ಗೇನತ್ ನಾನ್ ಪಡೆರ ಸುರೂಂಜಿ ಕಂಪೆನಿ ಸರ್ಕಾರಕ್ ಸಹಾಯ ಮಾಡಿಯಂಡ್ ಬಂದಿಯೆ. ನಾಡ ಆಸೆರಪೋಲೆ ಶತ್ರುವ ಚೋತಾನುಂಡ್ ನಿಂಗಡ ಅಧಿಕಾರ ಜಾಸ್ತಿ ಆಚಿ. ನಾನ್ ಈನಗುಂಡ್ ಪೇರ್ತ್ ಕುಶಿಪಟ್ಟಿ. ಅನ್ನನೆ ಇಂಗ್ಲೀಷ್ ಅಧಿಕಾರಿಯಡ ದೃಷ್ಟಿಲ್ ನಾಡ ಪ್ರತಿಷ್ಠೆ ಜಾಸ್ತಿ ಆಚಿಂದ್ ಗೇನ ಮಾಡ್ತಾನ. ಆಚೇಂಗಿ, ಪೂರ್ಣಯ್ಯ ನಾನ್ ಕಂಪೆನಿ ಸರ್ಕಾರಕ್ ವಿರೋಧ ಮಾಡ್ತಾನನ್ನಕೆ ನಾಡ ಮೀದ ದೂರಿಯಂಡ್ ಉಂಡ್. ಇನ್ನನೆ ಅವಮಾನ ಪಟ್ಟುಂಡ್ ಇಂಗ್ಲೀಷ್ ಮಿಷನ್ ನಾನ್ ಬದ್ಕುವಕ್ ಇಷ್ಟ ಪಡುಲೆ. ನಿಂಗ ನಾಡ ಎಲ್ಲ ವಿಷಯತ್‌ನ ಅರಾಂಜವು.

...ಇನ್ನನೆ ಸುಮಾರ್ ವಿಷಯತ್‌ನ ವಿವರೋಡೆ ಎಳ್ಳೆನ ಕಾಗದತ್‌ನುಂಡ್ ಬ್ರಿಟಿಷ್ ಅಧಿಕಾರಿಯಕ್ ಕ.ಕೋಸ್ಕರ ಕಾಗದತ್‌ಂಜ ರಾಜ ಎಚ್ಚಕ್ ನೊಂದಡಿತ್ ಎಣ್ಣುವದ್ ಅರಿವಾಚಿ.

ಅಚ್ಚಕೆ ಅಲ್ಲತೆ ವೀರರಾಜೇಂದ್ರ, ಕ.ಕೋಸ್ಕೂ ಓರ್ ಕಾಗದ ಅಯೆಚತ್. ಅದತ್ ಮುಖ್ಯವಾಯಿತ್, "ನಿಂಗ ಪಟ್ಟಿಲ್ ಎಳ್ಳಿತುಳ್ಳ ಏದೇ ಸಾಮಾನ್‌ನ ನಂಗಡ ಜನ ನಾಕ್ ಕೊಂಡ ಬಂದಿತ್ ತಂದಿತ್ತಿಲ್ಲೆ. ತೋಕ್ ಪುಡ್‌ಚಿತ್ ಪಡೆಪೊತ್ತ ನಾಡ ಜನಕಿಂಜ ಜಾಸ್ತಿ ನಂಗಡ ಜನ ಸಮ್ಮಂಧಪಡತ ಸುಲಿಗೆಕಾರಡ ಕೂಡೆ ಮೈಸೂರ್ ತೆರಿಲ್ ಜನಡ ಆಸ್ತಿಪಾಸ್ತಿ ಲೂಟಿ ಮಾಡ್‌ಚಿ. ನಂಗಡ ಜನ ಚೆನ್ನಂಗ್ ಅತ್ತ, ಆಡ್, ಕೊರಿನ ಪುಡ್‌ಚಂಡ್ ಬಾತ್. ಅದ್‌ನೆಲ್ಲ ನಾನ್ ಕಂಪೆನಿ ಸರ್ಕಾರಕ್ ಕೊಡ್‌ತಿಯೆ. ಅನ್ನನೆ ನಂಗಡ ಜನ ಚೆನ್ನಂಗ್ ಜನಳ ಕೂಟಿಯಂಡ್ ಬಂದಿತ್. ಟಿಪ್ಪುರ ಕಾಲತ್ ಆಯಿರಾರ್ ಕಣಕ್‌ಲ್ ಕೊಡಗರ ಜನಳ ಒರಾತತ್ ಕೂಟಿಯಂಡ್ ಪೋಯಿತ್ ಮತಾಂತರ ಮಾಡಿತ್. ಆಚೇಂಗಿ, ಅದತ್ ಚೆನ್ನಂಗಾಳ್ ತಪ್ಪಚಿಟ್ಟುಂಡ್ ಇಲ್ಲಿಕೆ ಬಾತ್. ಬಸವಪಟ್ಟುತರ ಮುತ್ತಿಗೆರ ನೇರತ್ ಸುಮಾರ್ 60 ಪೊಣ್ಣಾಳಳ ಕೊಡಗ್‌ಕ್ ಕೂಟಿಯಂಡ್ ಬಾತ್. ಅದತ್ ಚೆನ್ನಂಗಾಳ್ ಇಲ್ಲಿಯತ್‌ರಯಿಂಗಳ ಮಂಗಲ ಆಯಿತ್ ಸಂಸಾರ ನಡ್‌ತಿಯಂಡ್ ಉಂಡ್. ಇಂಗ್ಲೀಷ್ ಚೆನ್ನಂಗಾಳ್ ನಾಕ್ ಗೊತ್ತಿಲ್ಲತೆ ಓಡಿಪೋಯಿತ್. ಈ ಸಂಗತಿನೆಲ್ಲ ನಾನ್ ಬ್ರಿಟಿಷಡ ಅರಿವಿಕೆಕ್ ಕೊಂಡಬಂದಿಯೆ."

"ನಾಡ ಜನ ಕೊಂಡ ಬಂದ ಸಾಮಾನ್‌ಕ್ ನಾಲಂಜಿ ತಿಂಗ ಸಮಯ ತಂದಕ ಪರಿಹಾರ ಪಣ ಆಯಿತ್ ಚೆನ್ನಂಗಾನ ತಪ್ಪಿ. ಇಕ್ಕ ನಾಡ ಪಕ್ಕ ದುಡ್ಡಿಲ್ಲೆ. ಇಕ್ಕ ಮೈಸೂರ್ ಸೀಮೆರ ಜನ ಮಾಡ್‌ನ ಈ ಪೋಲೆತ ದೂರ್‌ನುಂಡ್ ನಾಕ್ ದುಂಬ ಬೇಜಾರ ಆಯಿತ್. ನಂಗಡ ಮನಸ್ಸಲ್ ಉಳ್ಳಾನ ಎಣ್ಣೆಯವಕ್ ನಿಂಗಡ ಪಕ್ಕ ಕರಣಿಕ ಸುಬ್ಬಯ್ಯನ ಅಯೆಚಿ ತಪ್ಪಿ.

ಅಂವ ಎಣ್ಣುವಾನ ಚಾಯಿತೇ ಕೇಟಿತ್ ವಿಚಾರಣೆ ಮಾಡಿತ್ ನಂಗಕ್ ಜವಾಬ್ ತರೊಂಡೊಂದ್ ಕೇಟಿವಿ"

ಇನ್ನನೆ ಭಾರಿ ಬಲ್ಯ ಕಾಗದತ್‌ನ ನೋಟಾನ್ ಬ್ರಿಟಿಷ್ ಅಧಿಕಾರಿಯ ರಾಜಂಡ ಕಡೆಕಾರ ಸುಲಿಗೆ ಮಾಡ್‌ಚಿಂದ್ ಎಣ್ಣೊನ ಸಾಮಾನ್‌ನ ಮರ್ಚಿ ಕೇಟಾಲೆ. ಇಚ್ಚೆಕೆ ಅಲ್ಲತೆ ವೀರರಾಜೇಂದ್ರ ತಂಗಕ್ ಮಾಡ್‌ನ ಸಹಾಯತ್‌ನ ಮನಸ್ಸಕ್ ಎಡ್‌ತಂಡ್ ತುಳು ನಾಡ್‌ಲ್ ಅಂವಂಗ್ ಇಣ್ಣೊ ಚೆನ್ನಂಗ್ ಸೀಮೆನ ಕೊಟಿತ್ ಕೊಡ್‌ತತ್.

ಕ.ಕ್ಲೋಸ್ ಸಾಹೇಬ ಪಿಣ್ಣಾ ಅಂವಂಡ ಬ್ರಿಟಿಷ್ ಅಧಿಕಾರಿಯಕ್ ಎಣ್ಣೊನ ಪದ್‌ನಂಜಿ ಬರಿರ ಕಾಗದತ್‌ರ ಓರ್ ಕಾಪಿ 1942ತ್ ಮೈಸೂರ್ ರೆಸಿಡೆಂಟ್‌ರ ಕಚೇರಿಂಜ ಮೈಸೂರ್ ಸರ್ಕಾರತ್‌ರ ಕಾರ್ಯದರ್ಶಿ ಕಚೇರಿಕ್ ಕೊಡ್‌ನ ಪಳೆಯ ರೆಕಾರ್ಡ್ ಕಚೇರಿಕ್ ಅಯೆಚ ಪಂಡೇತ ಸರಕಾರಿ ಕಾಗದತ್ ಕೂಡಿಪೋಯಿತಿಂಜತ್. ಇದ್‌ನ ಮೈಸೂರ್ ಪುರಾತನ ವಸ್ತು ಸಂಶೋಧನ ಇಲಾಖೆಕಾರ ಅಲ್ಲಿಂಜ 1943ಲ್ ಪಡ್‌ಂದಂಡ್ ತಾಂಡ ಇಲಾಖೆರ ಕಾಲತ್‌ರ ವರದಿಲ್ ಪ್ರಕಟ ಪಡ್‌ತಿತ್.

## ವೀರರಾಜೇಂದ್ರ ಒಡೆಯಂಡ ಪೆರಿಯ ಮೋವ ರಾಜಮ್ಮಾಜಿ ಗೋವಾ ಸೀಮೆರ ಸ್ವಾದೆ ಸಂಸ್ಥಾನತ್‌ರ ಸವಾಯಿ ಬಸವಲಿಂಗ ರಾಜನ ಮಂಗಲ ಕೈಂಜದ್

ಟಿಪ್ಪುರ ಕೂಡ ಪಡೆ ಸುರು ಆಪಾಂಗ್ ದಂಡ್ ಕಾಲಕ್ ಮುಪ್ಪಡೆ ವೀರರಾಜೇಂದ್ರ ತಾಂಡ ಪೆರಿಯ ಮೋವ ರಾಜಮ್ಮಾಜಿನ ಪೋರ್ಚುಗೀಸಡ ಆಡಳಿತತ್ ಇಂಜ ಸ್ವಾದೆ ಸಂಸ್ಥಾನತ್‌ರ ಸವಾಯಿ ಬಸವಲಿಂಗರಾಜ ಎಣ್ಣೊವ ರಾಜಕುಮಾರಂಗ್ ಮಂಗಲ ಕೈಚಿ ಕೊಡ್‌ಕೊಂಡೊಂದ್ ಗೇನ ಮಾಡಿತಿಂಜತ್. ಆಂಗಾಯಿತ್ ಅಂವ ಅಕ್ಕ ತಾಂಡ ಆಸ್ಥಾನತ್‌ಂಜ ಸಿದ್ಧಲಿಂಗ ದೇವರು ಎಣ್ಣೊವ ಜಂಗಮನ ಸ್ವಾದೆ ಮನೆತನಕಾರ ಇಂಜ ಚೊಂವಾಡಿಕ್ ಅಯೆಚತ್.

ಸ್ವಾದೆ ಬಸವಲಿಂಗರಾಜ ಸಿದ್ಧಲಿಂಗ ದೇವನುಂಡ್ ಕೊಡಗರ ರಾಜಂಡ ಪಿಣ್ಣಾ

ಕೊಡಗ ಸಂಸ್ಥಾನತರ ವಿಷಯ ಅರಾಂಜಿತ್ ದುಂಬ ಕುಶಿಪಟ್ಟಿತ್ ಬೆಂದೂರ್ಥ್ ಮಾಡಿಯವಕ್ ಬಯಂದತ್.

ಅಕ್ಕ ಸಿದ್ಧಲಿಂಗ ದೇವ ಕೊಡಗರ ರಾಜಂಗ್ ವಿವರವಾನ ಕಾಗದ ಅಯೆಚಿತ್. ಅದ್ ಗೋವಾ ಪಿಳ್ಳಾ ಕೊಡಗರ ಸಂಸ್ಥಾನಕ್ ನಡುಲ್ ಉಳ್ಳ ಟಿಪ್ಪು ಸುಲ್ತಾನಂಡ ರಾಜ್ಯತ್ ಅವಂಡ ಅಧಿಕಾರಿಯಡ ಕೈಕ್ ಕಟ್ಟಿತ್ ತೊಂದರೆ ಆಕೊಂದ್ ಗೇನ ಮಾಡಿತ್ ಕಾಗದತನ ಜಂಗಮಡ ಕೈಲ್ ಕೊಡಗಕ್ ಅಯೆಚಿತ್.

ಈ ಕಾಗದತರ ಕೂಡೆ ಸ್ವಾದೆ ರಾಜ, ವೀರರಾಜೇಂದ್ರ ಒಡೆಯಂಗ್ ಕಾಗದ ಅಯೆಚಿತ್ ತಾಂಡ ಒಪ್ಪಿಗೆನ ಕಾಟಿಂಜಿತ್.

ಸ್ವಾದೆ ರಾಜಂಡ ತಂಗಿ ಚೆನ್ನಮಾಜಿ ಕೊಡಗರ ರಾಜಂಗ್ ಎಳ್ಳನ ಕಾಗದತ್ "ಪುದಿಯ ಬೆಂದೂರ್ಥ್ ಆನಪಿಳ್ಳಾ ನಂಗಲ್ಲ ಚಾಯಿತೆ ಪ್ರೀತಿ, ವಿಶ್ವಾಸತ್ ಇರೊಂಡೂ"ಂದ್ ಎಳ್ಳಚಿ.

ಇದಾಂಗಲ್ಲ ವೀರರಾಜೇಂದ್ರ ಒಡೆಯ ತಾಂಡ ಜವಾಬ್‌ಲ್ "ಮಂಗಲಯೋಗ ಎಣ್ಣುವದ್ ಎಲ್ಲ ಆ ಮಾದೇವಂಡ ಅಪ್ಪಣೆಪೋಲೆ ಆಪಾ"ಂದ್ ಎಳ್ಳಿತಿಂಜಿತ್.

ಅಲ್ಲಿಂಜ ಟಿಪ್ಪುರ ಕೂಡೆ ಕಂಪೆನಿ ಸರ್ಕಾರತರ ಪಡೆ, ಮುಂಬೈ ಸೈನ್ಯ ಕೊಡಗಕ್ ಬಂದಿತ್ ಕರಡಿಗೋಡ್ ಮಾಳತ್ ಇಂಜ ನೇರಕ್ ಸರಿಯಾಯಿತ್ ಸ್ವಾದೆ ರಾಜ ಮುಂಬೈ ಸೈನ್ಯತರ ಅಧಿಕಾರಿಯಕ್ ಪಿಳ್ಳಾ ಮುಂಬೈ ಗವರ್ನರ್ ಸಾಹೇಬಂಗ್ ಕಾಗದ ಎಳ್ಳಿತ್ ಅದ್‌ನ ಅಯಿಂಗಕ್ ಎತ್ತಿಚಿಡುವನ್ನಕೆ ವೀರರಾಜೇಂದ್ರ ಒಡೆಯಂಗ್ ಎಳ್ಳಿತ್ ಕಾಗದತನ ಅಯೆಚಿತ್. ಬ್ರಿಟಿಷ್ ಅಧಿಕಾರಿಯ ಈ ಕಾಗದತರ ಅಭಿಪ್ರಾಯ ಅರಾಂಜಂಡ್ ವೀರರಾಜೇಂದ್ರಂಡ ಕೂಡೆ ಈ ಮಂಗಲತರ ಶುಭ ಕಾರ್ಯ ಶ್ರೀರಂಗಪಟ್ಟಿತ್ ಕಿಲ್ಲೆ ಎಡ್‌ತಂಡಪಿಳ್ಳಾ ನಡ್‌ಕಡ್. ನಂಗಕೆಲ್ಲ ಇದ್ ದುಂಬ ಕುಶಿರ ಸಂಗತಿಂದ್ ಎಳ್ಳಿತ್ ಕಾಗದತರ ಕೂಡೆ ಇನಾಂ ಅಯೆಚಿತ್.

ಟಿಪ್ಪು ಪಡೆಲ್ ಚಿತ್ತಪಿಳ್ಳಾ ಅವಂಡ ರಾಜ್ಯ ಎಲ್ಲ ಇಂಗ್ಲೀಷಡ ಸರ್ವಾಧಿಕಾರಕ್ ಒಳಪಟ್ಟಿತ್ ದಂಡ್ ಕಾಲತರ ಒಳ್ಳಲೆ ರಾಜ ಪಿಳ್ಳಾ ಅವಂಡ ತಂಗಿ ಚೆನ್ನಮಾಜಿ ವೀರರಾಜೇಂದ್ರ ಒಡೆಯಂಗ್ ಮಂಗಲಕ್ ಸಮ್ಮಂಧಪಟ್ಟಿ ಕಾಗದ ವ್ಯವಹಾರ ಮಾಡಿತ್ ಲಗ್ನಪತ್ರಿಕೆಕ್ ಬೋಂಡಿಯಾನ ಏರ್ಪಾಡ್ ಮಾಡುವಕೂಡ್‌ಚಿ.

ಅಲ್ಲಿಂಜ ಗೋವಾ ಗವರ್ನರ್, ಇಂಗ್ಲೀಷ್ ಸರ್ದಾರ ಕೆ.ಸರ್ ವಿಲಿಯಂ ಕ್ಲಾರ್ಕ್ ಸಾಹೇಬಂಗ್ ವೀರರಾಜೇಂದ್ರ ಕಾಗದತ್ ಸ್ವಾದೆರಾಜನ ಕೊಡಗಕ್ ಬಪ್ಪಿಚಿಡುವ



ವಿಚಾರತನ ಎಲ್ಲಿತಿಂಬತ್.

ಸ್ವಾದೆ ಬಸವಲಿಂಗರಾಜ ಗೋವಾತ್‌ಂಜ ಪೊರಾಟಿತ್ ಕೊಡಗ್‌ಕ್ ಬಪ್ಪಕ ವೀರರಾಜೇಂದ್ರ ಒಡೆಯ ಕಂಪೆನಿ ಸರ್ಕಾರಕ್ ಎಳ್ವಾನಪೋಲೆ ಅಯಿಂಗಕುಳ್ಳ ವ್ಯವಸ್ಥೆ ಮಾಡಿತ್ ಬಸವಲಿಂಗರಾಜ ಪಿಳ್ಳಾ ಅಂವಂಡ ಪರಿವಾರತನ ಅಯೆಚಿತ್. ಕಂಪೆನಿ ಸರ್ಕಾರ ತಾಂಡ ಪುಡಾತತ್ ಇಂಜ ಅಧಿಕಾರಿಯಕ್ ಸಮ್ಮಂಧ ಕೊಡಾತಿತ್, ಸ್ವಾದೆರಾಜನ ಪೇರ್ತ್ ಗೌರವತ್ ಕೊಡಗ್‌ಕ್ ಅಯೆಚಿ ಕೊಡಾಕೊಂಡೂಂದ್ ಅಪ್ಪಣೆ ಮಾಡಾಚಿ.

ಈ ಪೋಲೆ ಸ್ವಾದೆ ರಾಜ ದುರ್ಮತಿ ಸಂವತ್ಸರತರ ಪುಷ್ಯ ಮಾಸತ್ ಎಣ್ಣಕ 1801ನೆ ಇಸವಿ ಡಿಸೆಂಬರ್ ತಿಂಗತ್ ನಾಲ್ಕಾಡ್ ಅರಮನೆಕ್ ತಾಂಡ ಆಪ್ತಂಗ ಪಿಳ್ಳಾ ಬೆಂದುಪಡ ಕೂಡೆ ಬಾತ್.

ಈ ನೇರತ್ ವೀರರಾಜೇಂದ್ರ ಒಡೆಯ ಅಯಿಂಗಳೆಲ್ಲ ಪೇರ್ತ್ ಚಾಯಿತೆ ತಕ್ಕಾರ ಮಾಡಿತ್ ಅಯಿಂಗಡ ಕೂಡೆ ಇಂಜ ಬೋರೆ ಬೋರೆ ಜನಕ್ ಬೆಂದು ಬಿಡಾರತರ ವ್ಯವಸ್ಥೆ ಮಾಡಿತಿಂಬತ್.

ವೀರರಾಜೇಂದ್ರ ತಾಂಡ ಮೋವಡ ಮಂಗಲಕ್ ಬರೊಂಡೂಂದ್ ಬಂಗಾಳತರ ಗ.ಜನರಲ್ ಪಿಳ್ಳಾ ಬೋರೆ ಬ್ರಿಟಿಷ್ ಅಧಿಕಾರಿಯಕೂ ಮಂಗಲ ಕಾಗದ ಅಯೆಚಿತ್. ಆನಗುಂಡ್ ಕಂಪೆನಿ ಸರ್ಕಾರ ರಾಜಂಡ ಮೋವಡ ಮಂಗಲಕ್ ಶ್ರೀರಂಗ ಪಟ್ಟಿತ್‌ಂಜ ಕ್ಯಾ.ಥಾಮಸ್ ಮೇರಿಯಟ್ ಸಾಹೇಬ, ಮಲಬಾರ್‌ಂಜ ಕ್ಯಾ.ಡೇವಿಡ್ ಫೌಲಿಸ್ ಸಾಹೇಬ ಪಿಳ್ಳಾ ಕ್ಯಾ. ವಿಶ್ ಬೋರ್ನ್ ಸಾಹೇಬನ ಅಯೆಚಿ ಕೊಡಾತತ್.

ವೀರರಾಜೇಂದ್ರಂಡ ಪೆರಿಯ ಮೋವ ರಾಜಮ್ಮಾಜಿರ ಮಂಗಲ ಸ್ವಾದೆ ಬಸವರಾಜಂಡ ಕೂಡೆ ಒಯಿಂಬದ್ ದಿನಕೆತ್ತನೆ ಪೇರ್ತ್ ಗೌಜಿಲ್ ನಡೊಂದತ್.

ಮಂಗಲ ಕೈಂಜಿತ್ ಸ್ವಾದೆ ಅರಸ ಕೊಡಗಲ್ ಮೂಂದ್ ತಿಂಗ ಇಂಜತ್. ಅಲ್ಲಿಂಜ ಅವು "ನಂಗ ಕೊಡಗ್‌ಕ್ ಮಳೆಗಾಲ ಕೈಂಜಪಿಳ್ಳಾ ಪುನಾದಿಯ ಬಪ್ಪಾ"ಂದ್ ಮಾಂವ ವೀರ ರಾಜೇಂದ್ರಂಡ ಕೂಡೆ ಎಣ್ಣಿತ್ ಗೋವಾತರ ಬಾಂದವಾಡಿಕ್ ಪೋಚಿ.

ಮೈಂಮ ಪಿಳ್ಳಾ ಮೋವ ಗೋವಾಕ್ ಪೋನಪಿಳ್ಳಾ ವೀರರಾಜೇಂದ್ರ ಒಡೆಯ ಬಂಗಾಳ ಗ.ಜನರಲ್ ಲಾರ್ಡ್ ಮಾರ್ಕ್‌ವೀಸ್ ವೆಲ್ಲೆಸ್ಲಿ ಸಾಹೇಬ ಪಿಳ್ಳಾ ಕಂಪೆನಿ ಸರ್ಕಾರಕ್ ತಾಂಡ ಮೋವಡ ಮಂಗಲಕ್ ಬಂದಾಂಗ್ ವಂದನೆ ಎಣ್ಣುವಕ್ ಪುನಾದಿಯ ಓರ್ ಕಾಗದ ಎಲ್ಲಿತ್ ಅಯೆಚಿತ್.

ವೀರರಾಜೇಂದ್ರ ಒಡೆಯ ಕಂಪೆನಿ ಸರ್ಕಾರತ್ ರ ವಿರೋಧಿಯಳ  
ಪುಡ್‌ಚಿತ್ ಬ್ರಿಟಿಷ್ ಒಪ್ಪಾಚಿಟ್ಟಿದ್. ಯೂರೋಪ್‌ಲ್ ಬ್ರಿಟಿಷ್  
ಪ್ರೆಂಚಡ ಮೀದ ಗೆಲು ಪಡ್‌ಂದಾಂಗ್ ವೀರರಾಜೇಂದ್ರ ತಾಂಡ  
ಕುಶಿ ಕಾಟ್‌ನದ್.

ಟಿಪ್ಪುರ ಆಖೀರಿ ದಿನ ಪಿಳ್ಳಾ ಅಂವ ಚತ್ತಪಿಳ್ಳಾ ಚೆನ್ನಂಗ್ ರಾಜಂಗ ಕಂಪೆನಿ  
ಸರ್ಕಾರತ್ ರ ಮೀದ ತಿರಿತ್ ಬುದ್ಧತ್. ಅದತ್ ಕೋಟೆ ಪೈಚಿ ರಾಜ ಒಬ್ಬ. 1800ನೆ  
ಇಸವಿಲ್ ಪೈಚಿ ರಾಜಂಡ ಕಾರ್ಯಕಾರ ಕೈದರಿ ಕೊಂಗು ಎಣ್ಣುವಂವ ಕಾಡ್ ಕೂಡಿಯಂಡ್  
ಇಂಗ್ಲೀಷಡ ಜನಕ್ ಹಿಂಸೆ ಕೊಡ್‌ಪ ಇಂಜತ್. ಇಂಗ್ಲೀಷಡ ಸಿಪಾಯಿಯ ಇಂವನ  
ಪುಡಿಪಕ್ ಎಚ್ಚಕ್ ಪ್ರಯತ್ನ ಪಟ್ಟಕೊ ಆಯಿಲೆ.

ಅಕ್ಕ ವೀರರಾಜೇಂದ್ರ "ಕೈದರಿಕೊಂಗು ನಂಗಡ ತೆರಿರ ಒಳ್‌ಕ್ ಬಂದ್‌ಟಕ ಪುಡ್‌ಚಿ  
ತಪ್ಪ"ಂದ್ ಎಣ್ಣೆತ್ ತಾಂಡ ತೆರಿ ಕಾಪ ಜನಕ್ ಅಪ್ಪಣೆ ಮಾಡ್‌ಚಿ.

ಇದ್‌ನೆ ಪಾರ ಕಾತಂಡ್ ಇಂಜ ವೀರರಾಜೇಂದ್ರಂಡ ಪಾರಕಾರ ಕೈದರಿ ಕೊಂಗು  
ಒಳ್‌ಕ್ ನುಗ್ಗ್‌ನದೆ ಪುಡ್‌ಚಿತ್ ರಾಜಂಗ್ ಒಪ್ಪಾಚಿಟ್ಟಿತ್. ಕೂಡೆನ್ನ ರಾಜ ಮಲಬಾರ್‌ರ  
ಕಮಿಷನರ್‌ಕ್ ಈ ವಿಷಯ ಅರಿಚಿಡುವಕ ಕಮಿಷನರ್‌, ಕೈದರಿನ ಕೊಡಗ್‌ಂಜ  
ಕೂಟಿಯಂಡ್ ಬಪ್ಪಕ್ ತಾಂಡ ಸಿಪಾಯಿಯಳ ಅಯೆಚತ್. ಈ ಸಿಪಾಯಿಯಡ ಕೂಡೆ  
ರಾಜ ಕೈದರಿರ ಕಾಲ್‌ಕ್ ಬೇಡಿ ಇಟ್ಟಿತ್ ಮಲಬಾರ್‌ಕ್ ಅಯೆಚತ್.

ಇದಾಯಿತ್ ಮೂಂದ್ ಕಾಲತ್ ಕೋಟೆ ಅರಸಂಡ ಕಾರ್ಯಕಾರ ಕುನ್ಯ ನಂಬಿಯಾರ್  
ಬ್ರಿಟಿಷಡ ಮೀದ ಪಡೆ ಘೋಷಣೆ ಮಾಡಿತ್ ಕಾಡ್ ಕೂಡಿಯಂಡತ್. ಮಲಬಾರ್ ಜನಕ್  
ಹಿಂಸೆ ಕೊಡ್‌ಪಕ್ ಸುರು ಮಾಡ್‌ನದೆ ವೀರರಾಜೇಂದ್ರ ತಾಂಡ ಜನಕ್ ಕುನ್ಯನ ಪುಡಿಪಕ್  
ಎಣ್ಣ್‌ಚಿ.

ಪಾರಕಾರ ಅಂವನ ಪುಡ್‌ಚಿದೆ ವೀರರಾಜೇಂದ್ರ ಕುನ್ಯಂಡ ಕಾಲ್‌ಕ್ ಬೇಡಿ ಇಟ್ಟಿತ್  
ಮಲಬಾರ್‌ಕ್ ಅಯೆಚತ್.

ಇದೇಪೋಲೆ ಚೆನ್ನಂಗ್ ದಿನತ್ ಕಾಡ್ ಕೂಡಿಯಂಡಿತಿಂಜ ಕಾರ್ಯಕಾರ ಕೇಳು  
ನಂಬಿಯಾರ್‌ನೊ ವೀರರಾಜೇಂದ್ರ ಪುಡ್‌ಪಾಚಿಟ್ಟಿತ್ ಕ.ಬೋಲ್‌ರ ಪಕ್ಕ ಅಯೆಚತ್.

ಅಲ್ಲಿಂಜ ಕಲಿಸಂದ 4905ನೆ ರುಧಿರೋದ್ಗಾರಿ ಸಂವತ್ಸರತ್ ಕೋಟೆ ರಾಜಂಡ  
ತಮ್ಮಣಂಡ ಮೋಂವ ರಾಮವರ್ಮ ಕೊಡಗ್‌ಕ್ ಬಂದಿತ್ ತಾಂಡ ವೇಷ ಬದ್‌ಲ್

ವೀರರಾಜೇಂದ್ರ ಈ ಸೀಮೆಲ್ ತಾಂಡ ರಾಜ್ಕುತ್‌ರ ಪೂರ್ವ ತೆರಿಲ್ ಇಂಜ ಸೀಮೆನ

ಇಂಗ್ಲೀಷ್‌ಕಾರ ತಾಂಗ್ ತರೊಂಡಿಂಜತ್‌ಂದ್ ಬಯಂದತ್. ಆಚೇಂಗಿ, ಈ ಆಸೆ ಈಡೇರಾಲೆ. ತಮಿಳ್‌ನಾಡ್‌ಲೆ ಮಾತ್ರ ಇಂಗ್ಲೀಷ್‌ಕಾರ ರಾಜಂಗ್ ಅವಂಡ ಸುರೂವೆತ ರಾಜ್ಯಕ್ ಚೆನ್ನಂಗ್ ಸೀಮೆನ ಕೂಟಿತ್ ಕೊಡ್‌ತತ್. ಇನ್ನನೆ ಆ ಸೀಮೆನ ಕೊಡಗರ ರಾಜಂಗ್ ವಹಿಸಿ ಕೊಡ್‌ಪಾಂಗ್ ಮುಪ್ಪಡೆ ಬಂಗಾಳತ್‌ರ ಗ.ಜ.ಮಾರ್ಕ್ಟ್‌ಸ್ ವೆಲ್ಲೆಸ್ಲಿ 1804ನೆ ಇಸವಿ ಮೇ 23ಂಗ್ ಕ್ಯಾ.ಮೆಹೋನಿರ ಕೂಡೆ ವೀರರಾಜೇಂದ್ರ ಒಡೆಯಂಗ್ ಈಂಡ ಮೀದ ಓರ್ ಕಾಗದ ಎಳ್ವೊಚಿ.

ಇದ್‌ನ ಕ್ಯಾ.ಮೆಹೋನಿ ವೀರರಾಜೇಂದ್ರ ಒಡೆಯಂಗ್ ಕೊಡ್‌ತಿತ್, ಮಂಗಳೂರ್ ಕಲೆಕ್ಟರ್ ಜಾನ್ ರೆವಿನ್‌ಷಾ ಸಾಹೇಬಂಡ ಪಕ್ಕ ತಂಗಡ ಬರಿಂಜ ಓರ್ ಲಾಯರ್‌ನ ಅಯೆಚಿತ್ ಇಂಗ್ಲೀಷ್ ಸರ್ಕಾರತ್‌ಂಜ ಬುಟ್ಟಿತಪ್ಪ ಸೀಮೆರ ಲೆಕ್ಕ ಎಳ್ವಿತ್ ಈ ಸೀಮೆನ ತಂಗಡ ಸಂಸ್ಥಾನಕ್ ಕೂಟಿಯವಂಡೊಂದ್ ಎಣ್ಣಾನಾಂಗ್ ವೀರರಾಜೇಂದ್ರ ವಕಾಲತ್ ನಾಮೆನ ಎಳ್ವೊಚಿಟ್ಟಿತ್.

ಇದ್‌ನ ಎಡ್‌ತಂಡ್ ಕರಣಿಕ ಸುಬ್ಬಯ್ಯ ಮಂಗಳೂರ್ ಕಲೆಕ್ಟರ್ ಜಾನ್‌ರವಿನ್ ಸಾಹೇಬಂಡ ಪಕ್ಕ ಪೋಚಿ. ಅಕ್ಕ ಬಂಗಾಳತ್‌ರ ಲಾರ್ಡ್ ಸಾಹೇಬಂಡ ಹುಕುಂಪೋಲೆ ದೊರೆಯಕ್ ಕೊಡ್‌ಪ ಸೀಮೆರ ಲೆಕ್ಕತ್‌ನ ಕರಣಿಕ ಸುಬ್ಬಯ್ಯಂಗ್ ಎಳ್ವಿಕೊಡ್‌ತಿತ್ ಆ ಸೀಮೆರ ಮುಖ್ಯಸ್ಥ, ಗೌಡಂಗ, ರೈತಂಗ ಪಿಳ್ಳಾ ಸಮಸ್ತ ಜನಕ್ ರವಿನ್ ಶಾ ಎಳ್ವಿತ್ ಅಯೆಚಿ ಇಸ್ತಿಹಾರ್ ನಾಮೆಲ್ ಕಂಪೆನಿ ಸರ್ಕಾರ, ಶ್ರೀರಂಗಪಟ್ಟಣ್‌ನ ಎಡ್‌ತವಾಂಡ ಮೀದ ಪಿಳ್ಳಾ ಕೊಡಗ್‌ಕ್ ಕೂಟಿಯವಾಂಡ ಮೀದ ಎಳ್ವಿತ್ ಅಯೆಚಿತ್.

ಇದ್‌ಂಗ್ 1804ನೆ ಆಗಸ್ಟ್ ತಿಂಗತ್ ಮಂಗಳೂರ್ ಕಲೆಕ್ಟರ್ ಜಾನ್‌ರವಿನ್ ಶಾ ಸಾಹೇಬ ಇಸ್ತಿಹಾರ್‌ನಾಮೆನ ಎಳ್ವೊಚಿಟ್ಟಿತ್ ಕೊಡಗರ ವಕೀಲ ಕರಣಿಕ ಸುಬ್ಬಯ್ಯಂಗ್ ಕೊಡ್‌ತತ್. ಅನ್ನನೆ ಕೊಡಗ್ ರಾಜಂಗ್ ಬುಟ್ಟಿಕ್‌ಕೊಡ್‌ತ ಮಾಗಣೆರ ಮೀದ ಎಳ್ವೊಚಿಟ್ಟಿತ್ ಅದ್‌ನೆಲ್ಲ ಕರಣಿಕ ಸುಬ್ಬಯ್ಯಂಗ್ ವಹಿಸಿ ಕೊಡ್‌ತತ್.

ಅಲ್ಲಿಂಜ ಕೊಡಗ್ ಸಂಸ್ಥಾನತ್‌ರ ರಾಜ ವೀರ ರಾಜೇಂದ್ರ ಒಡೆಯ ತಾಂಡ ಬರಿಂಜ ಓರ್ ಇಸ್ತಿಹಾರ್ ನಾಮೆನ ಎಳ್ವೊಚಿಟ್ಟಿತ್ ತಾಂಗ್ ಕಂಪೆನಿ ಸರ್ಕಾರ ಬುಟ್ಟಿತಂದ ಸೀಮೆರ ಜನಕ್ ಅದ್‌ನ ಕರಣಿಕ ಸುಬ್ಬಯ್ಯಂಡ ಮೂಲಕ ಅಯೆಚಿ ಕೊಡ್‌ತತ್.

ಅದೇ ಕಾಲ ಸೆಪ್ಟೆಂಬರ್‌ಲ್ ವೀರರಾಜೇಂದ್ರ ಒಡೆಯ ಬಂಗಾಳತ್‌ರ ಗ.ಜ. ಮಾರ್ಕ್ಟ್‌ಸ್ ವೆಲ್ಲೆಸ್ಲಿ ಸಾಹೇಬಂಗೂ, ಚೆನ್ನೈರ ಗವರ್ನರ್ ಲಾರ್ಡ್ ವಿಲಿಯಂ ಬೆಂಟಿಂಕ್ ಸಾಹೇಬಂಗೂ ತಾಂಡ ರಾಜ್ಯಕ್ ಪುದಿಯ ಸೀಮೆನ ಕೂಟಿಯವಕ್ ಸಹಕಾರ ಮಾಡ್‌ನಾಂಗ್ ಕೃತಜ್ಞತೆರ ಕಾಗದ ಎಳ್ವೊಚಿ.

ಕೊಡಗ್ ಪಿಳ್ಳಾ ಮೈಸೂರ್ ರಾಜ್ಯಕ್ ಸಿದ್ಧೇಶ್ವರ ಕುಂದಾರ ಬರಿಂಜ ಹೆಗ್ಗಡೆದೇವನಕೋಟೆಕೆತ್ತನೆ ಚೆನ್ನಂಗ್ ಸೀಮೆರ ವಿಷಯತ್ ವಿವಾದ ಇಂಜತ್. ಇಂಗ್ಲೀಷ್‌ಕಾರ ಪೀಲ್ ಎಣ್ಣುವಂವನ ಅಯೆಚಿತ್ ವೀರರಾಜೇಂದ್ರಂಡ ಅಭಿಪ್ರಾಯತ್‌ನೆಲ್ಲ ಅರಾಂಜಂಡ್ ವಿವಾದ ತೇತಿತ್ ದಂಡೂ ಕಡೆಕಾರಕ್ ಒಪ್ಪಿಗೆ ಆಪನ್ನಕೆ ತೆರಿನ ನಿರ್ಕ್ ಮಾಡಿತ್ ಕಲ್ಲ್ ನಡಾಪಕ್ ಏರ್ಪಾಡ್ ಮಾಡ್‌ಚಿ. ಇದೊಂಗೂ ವೀರರಾಜೇಂದ್ರ ಪೀಲ್ ಸಾಹೇಬಂಗ್ ಕೃತಜ್ಞತೆರ ಕಾಗದ ಎಳ್ಳಿತಿಂಜತ್.

## ವೀರರಾಜೇಂದ್ರ ಒಡೆಯ ಪಡೆ ಕೈಂಜದು ತಾಂಡ ರಾಜ್ಯತ್‌ನ ಸುವ್ಯವಸ್ಥೆ ಮಾಡ್‌ನದ್

ವೀರರಾಜೇಂದ್ರ ಒಡೆಯಂಗ್ ತಾನ್ ಪೆರಿಯಾಪಟ್ಟ ಕೋಟೆಂಜ ತಪ್ಪಾಚಿಟ್ಟಂಡ್ ಬಂದದು ಪಿಳ್ಳಾ ಟಿಪ್ಪು ಸುಲ್ತಾನ್ ಚೆತ್ತದೆ ಚೆನ್ನಂಗ್ ಸಮಯಕೆತ್ತನೆ ತಾಂಡ ರಾಜ್ಯತ್‌ನ ಓರ್ ವ್ಯವಸ್ಥೆಕ್ ಕೊಂಡಬಪ್ಪಕ್ ಕೈಂಜಾಲೆ. ತಾನ್ ಪೆರಿಯಾಪಟ್ಟತ್‌ಂಜ ಬಂದಿತ್ ಮೂಂದ್ ಕಾಲ ತಾಂಡ ರಾಜ್ಯತ್‌ನ ತಿರಿತ್ ಪಡೊಂದವಾತ್, ಅಲ್ಲಿಂಜ ಬ್ರಿಟಿಷ್‌ಕ್ ಟಿಪ್ಪುರ ವಿರುದ್ಧ ಪಡೆ ಪೊಪ್ಪಕ್ ಸಹಾಯ ಮಾಡುವಲ್ಲಿ ವೀರರಾಜೇಂದ್ರ ಒಡೆಯ ತಾಂಡ ಸಮಯತ್‌ನ ಪಿಳ್ಳಾ ಜನಳ ಬಳಸಿಯವಂಡಿಯಾಚಿ. ಆ ನೇರತ್ ರಾಜ, ಮಹಾರಾಜ ವೀರರಾಜೇಂದ್ರ ಒಡೆಯರು - ಸಂಸ್ಥಾನ ಕೊಡಗ್ ಪಿಳ್ಳಾ ಮಹಾರಾಜ ವೀರರಾಜೇಂದ್ರ ಒಡೆಯರು - ಸಂಸ್ಥಾನ ಕೊಡಗ್ ಎಣ್ಣುವ ದಂಡ್ ನಿರೂಪ ಪೊರ್‌ಡ್‌ಚಿಟ್ಟತ್.

ಈ ಪೋಲೆ ವೀರರಾಜೇಂದ್ರಂಡ ಕಾಲತ್ ಕೊಡಗ್‌ಲ್ ಸುಳ್ಳ ಸೀಮೆರ ಗೌಡಂಗಕ್ ಭೂಮಿನ ಜಮ್ಮ ಉಂಬಳೆ ಆಯಿತ್ ಕೊಡ್‌ತಿತ್ ಇಲ್ಲಿ ಅಯಿಂಗಳ ನೆಲೆ ನಿಪ್ಪಾಚಿಟ್ಟ ಸಂದರ್ಭ ಎಚ್ಚೆಕೋ ಉಂಡ್.

ವೀರರಾಜೇಂದ್ರ ಒಡೆಯ ತಾಂಡ ಬದ್‌ಕ್‌ಕ್ ಉಳ್ಳ ಭೂಮಿ ಪೋರಾಂದ್ ಕೇಟಂಡಯಿಂಗಳ್ ದುಂಬ ಭೂಮಿನ ಕೊಡ್‌ತತ್. ಅನ್ನನೆ ಚೆನ್ನಂಗ್ ರೈತಂಗ ತಂಗಡ ಭೂಮಿ ಸಾಗುವಳಿಕ್ ತಂಗಡಲ್ಲಿ ಆಳ ಇಲ್ಲತಾನಗುಂಡ್ ಆಳಳ ಜಮ್ಮ ಆಯಿತ್ ಕೊಡ್‌ಕೊಂಡೂಂದ್ ರಾಜನ ಕೇಟಂಡಪೋಲೆ ಅನ್ನತ ರೈತಂಗಕ್ ಆಳಳ ಕೊಡ್‌ತತ್. ಈ ಸಮ್ಮಂಧೊ ದಂಡ್ ನಿರೂಪ ಉಂಡ್.

ಅನ್ನನೆ ಅರಮನೆ / ಸರ್ಕಾರತ್‌ರ ಚಾಕ್ರಿ ಮಾಡಿತ್ ರಾಜನುಂಡ್ ಮೆಚ್ಚುಗೆ ಪಡ್‌ಂದಯಿಂಗಕ್ ಭೂಮಿನ ಉಂಬಳಿ ಆಯಿತ್ ಕೊಡ್‌ತತ್. ಇದ್‌ಂಗ್ ದಂಡ್ ನಿರೂಪ ಉಂಡ್.

ಇನ್ನತ ನಿರೂಪತ್ ಇಂಗ್ಲೀಷ್ ಅಕ್ಸರ ಪಿಳ್ಳಾ ಪಾರ್ಸಿ ಸೀಲ್ ಕೂಡಿತ್ತುಂಡ್.

ವೀರರಾಜೇಂದ್ರ ಒಡೆಯ ತಾಂಡ ರಾಜ್ಯತ್‌ರ ಎಲ್ಲಾ ಭಾಗತ್ ಸ್ವಂತ ಭೂಮಿನ ಪಡ್‌ಂದಿತಿಂಜತ್. ಈ ಭೂಮಿಕ್ 'ಪನ್ನ' ಎಣ್ಣುವ. ಇಕ್ಕಲೂ ಇನ್ನತ ಭೂಮಿನ ಪನ್ನ ಭೂಮಿಂದ್ ಕಾಕುವ.

ಈ ಭೂಮಿ ನಲ್ಲ ಫಸಲ್ ದುಂಬಿತ್ ವಿಸ್ತಾರ ಆಯಿತ್ ಇಂಜತ್. ಇದತ್ ನೆಲ್ಲ, ಕೈಬು, ತರಕಾರಿನ ಬೊಳ್‌ತುವ ಇಂಜತ್. ಇನ್ನತ ಪನ್ನ ಕೊಡಗಲ್ ಒಟ್ಟು 24 ಇಂಜತ್. ಇದ್‌ನ ರಾಜಂಡ ಜಮ್ಮತಾಳ ಸಾಗುವಳಿ ಮಾಡುವ ಇಂಜತ್. ಅಯಿಂಗಡ ಕೂಟ್‌ಕ್ ನಾಟಿಪಣಿ ಪಿಳ್ಳಾ ಕೊಯ್ಪಣಿರ ನೇರತ್ ಆ ಪನ್ನತ್‌ರ ಪಕ್ಕ ರೈತಂಗ ಪನ್ನ ಭೂಮಿರ ಕೆಲಸಕ್ ಕೂಡೊಂಡಿಂಜತ್. ಪ್ರತಿಯೋರ್ ಪನ್ನ ಆ ನಾಡ್‌ರ ಪಾರುಪತ್ಯದಾರಂಡ ಜವಾಬ್ದಾರಿಲ್ ಇಂಜತ್. ಇದತ್ ಬೊಳ್‌ಂದ ನೆಲ್ಲ, ಕೈಬು, ಇಂಜಿ, ಮಂಜ, ತರಕಾರಿನ ಆಯಾಯ ಪನ್ನತ್‌ರ ಗೋಡ್‌ನ್‌ಲ್ ಬೆಕ್ಕೊಂಡಿಂಜತ್. ಅವಶ್ಯ ಬಪ್ಪಕ ರಾಜಂಡ ಅರಮನೆಕ್ ಅಯೆಕೊಂಡಿಂಜತ್. ರಾಜ ತಾಂಡ ಖರ್ಚಿಲೆ ಅರಮನೆರ ಕೆಲಸಕಾರಕ್, ಪಾರಕಾರಕ್, ಸೈನಿಕಂಗಕ್ ಊಟ ಕೊಡ್‌ಪ ಇಂಜತ್. ಇಯಂಗಕೆಲ್ಲ ಒಕ್ಕಚಿ ಆಯಿತ್ ಕೊಡ್‌ಪ ಇಂಜ ಊಟತ್‌ರ ವ್ಯವಸ್ಥೆಕ್ 'ತೊಂಬಾರ' ಎಣ್ಣುವ.

**ಕೊಡಗಲ್ ವೀರಶೈವ ಮಠ ಸ್ಥಾಪನೆ, ತಲಕಾವೇರಿ  
ಭಾಗಮಂಡಲ ತಿರಿಕೆಲ್ ನಂದಾದೀಪ ಬೆಚ್ಚದ್, ಅರಮನೆ ಪಿಳ್ಳಾ  
ನಾಡಲ್ ಪುತ್ತರಿ**

ವೀರರಾಜೇಂದ್ರ ಒಡೆಯ ಕೊಡಗರ ಬೋರೆ ಬೋರೆ ಜಾಗತ್ ಇದೇ ನೇರತ್ 57 ವೀರಶೈವ ಮಠ ಕೆಟ್ಟ್‌ಚಿಟ್ಟಿತ್ ಅದ್‌ಂಗೆಲ್ಲ ಭೂಮಿನ ಜಹಗೀರ್ ಆಯಿತ್ ಕೊಡ್‌ತತ್. ಇದತ್ ಮುಖ್ಯ ಪಟ್ಟದ್...

1. ಬಸವನಳ್ಳಿ ಮಠ - ಎಡವನಾಡ್
2. ಅಬ್ಬಿ ಮಠ - ಎಡವನಾಡ್
3. ಮಾದಾಪುರ ಮಠ - ತೆರಿನಾಡ್
4. ಸಿದ್ಧಾಪುರ ಮಠ ಹೊರೂರ್ -ನೂರೊಕ್ಕನಾಡ್
5. ತಾನಡಿ ಮಠ -ಅಮ್ಮತ್ತಿನಾಡ್
6. ಚಡದರಳ್ಳಿ ಮಠ - ಹೊರೂರ್ ನೂರೊಕ್ಕನಾಡ್
7. ಚಪ್ಪದಕಟ್ಟೆಮಠ -ಎಡೆನಾಲ್ಕಾಡ್
8. ತೊರೆನೂರ್ ಮಠ.

ವೀರರಾಜೇಂದ್ರರ ಕಾಲತ್ ಕೊಡಗ್ಗಲ್ ಸುಮಾರ್ 800 ತಿರಿಕೆ ಇಂಜತ್. ಇದತ್ ತಲಕಾವೇರಿರ ಅಗಸ್ತೇಶ್ವರ, ಭಾಗಮಂಡಲ ಭಗಂಡೇಶ್ವರ, ಪಾಲ್ಕೂರ್ ಮಹಾಲಿಂಗೇಶ್ವರ, ಪಾಡಿ ಸುಬ್ರಹ್ಮಣ್ಯ ಪಿಳ್ಳಾ ಇರ್ಪು ರಾಮೇಶ್ವರ ತಿರಿಕೆ ಮುಖ್ಯ ಆನದ್. ಈ ತಿರಿಕೆಲ್ ಪಟ್ಟಮ ಪೂಜೆ ಮಾಡುವ ಇಂಜತ್. ಟಿಪ್ಪುರ ಸೈನ್ಯ ಕೊಡಗ್ಗಲ್ ಇಂಜ ಕಾಲತ್ ಚೆನ್ನಂಗ್ ತಿರಿಕೆನ ಅಂವಂಡ ಜನಳುಂಡ್ ಬೂಕ್‌ಚಿಟ್ಟತ್. ಅದೆಲ್ಲ ನಂಗಕ್ ಇಕ್ಕಲೂ ಕಾಂಬಕ್ ಕೊಟ್ಟವ.

ವೀರರಾಜೇಂದ್ರ ಒಡೆಯ ಲಿಂಗಾಯತ ಆಯಿತಿಂಜಕೊ ತಲಕಾವೇರಿ ಅಗಸ್ತೇಶ್ವರ ತಿರಿಕೆಲೂ, ಭಾಗಮಂಡಲ ಭಗಂಡೇಶ್ವರ ತಿರಿಕೆಲೂ ತಾಂಡ ಪಿಳ್ಳಾ ತಾಂಡ ಪೆರಿಯ ಮೋವ ರಾಜಮ್ಮಾಜಿ ಪಿಳ್ಳಾ ಮೈಂಮ ಸ್ವಾದೆ ಬಸವಲಿಂಗ ರಾಜಂಡ ಪೆದತ್ ನಂದಾ ದೀಪ (ಎಂದೂ ಕೆಡ್‌ತ ಬೊಳಚೆ) ಕತ್ತುವನ್ನೆಕೆ ವ್ಯವಸ್ಥೆ ಮಾಡಿತಿಂಜತ್.

ವೀರರಾಜೇಂದ್ರ ಕೊಡಗ್ಗರ ಸಾಮಾಜಿಕ ಬದ್‌ಕ್‌ನ ಭದ್ರ ಪಡ್‌ತ್‌ಚಿ. ತಾನ್ ಓರ್ ನಾಡ್‌ಂಜ ಇಇಕ್ಕೋರ್ ನಾಡ್‌ಕ್ ವರ್ಗಮಾಡ್‌ನ ಕೊಡವಕ್ ಭೂಮಿನ ಜಮ್ಮ ಉಂಬಳಿ ಆಯಿತ್ ಕೊಡ್‌ತತ್. ಕೊಡವಡ ಸಾಮಾಜಿಕ ಕಟ್ಟಪಾಡ್‌ನ ಸೆರಿ ಪಡ್‌ತುವಕ್ ತಕ್ಕ ಎಣ್ಣುವ ಜಾತಿರ ಮುಖ್ಯಸ್ಥ ಇಲ್ಲತಿಪ್ಪಕ ಅಲ್ಲಿಕ್ ತಕ್ಕನೆ ಕೊಂಡ ಬಾತ್.

ಇನ್ನನೆ ಮಡಿಕೇರಿರ ಕರ್ಣಂಗೇರಿ, ಕರವಲೆ ಬಾಡಗ ಪಿಳ್ಳಾ ಪೊರ ಮಲೆನಾಡ್‌ಲ್ ತಕ್ಕಂಗ ಇಲ್ಲತಿಪ್ಪಕ, ನಾಲ್ಕಾಡ್‌ರ ಯವಕಪಾಡಿಂಜ ಅಲ್ಲಿ ತಕ್ಕ ಆಯಿತಿಂಜ ಪಾಂಡಿರ ಮನೆಕಾರಳ ಮಡಿಕೇರಿ ನಾಡ್‌ಕ್ ಕೂಟಿಯಂಡ್ ಬಂದಿತ್ ಕೊಡಿಯತ ಊರ್‌ಕ್ ತಕ್ಕಾಮೆ ಕೊಡ್‌ತತ್. ಪುತ್ತರಿ ನಮ್ಮರ ಆಚರಣೆಲೂ ಕೊಡವಕ್ ರಾಜ ಗೌರವ ಕೊಡ್‌ಪ ಇಂಜತ್. ಅಕ್ಕ ಇಂಜ ಚೆನ್ನಂಗ್ ಜನಸಂಖ್ಯೆಲ್ ಕೊಡಗ್ಗರ ನಲ್ಲ ತಡಿಕಾರ ಆಣಾಳಡಾತ್ ಪಾದಿ

ಜನ ಎಕ್ಕೋಲು ತಂಗಡ ನಾಲ್ಕಾಡ್ ಪಿಳ್ಳಾ ಮಡಿಕೇರಿ ಅರಮನೆಲ್ ತೆರಿರ ಪಾರತೂ, ಸೈನ್ಯತೂ ಇರೊಂಡಿಂಜತ್. ಆನಗುಂಡ್ ಪುತ್ತರಿ ನಮ್ಮೆಲ್ ರೋಹಿಣಿ ನಕ್ಷತ್ರತಾರ ದಿನ ಬೈಟ್ ಅರಮನೆರ ಬೇಲ್ಲ್ ಕಡ್ ಎಡ್ಪ ಪಿಳ್ಳಾ ಪಿತ್ಯಾಂಡ್ ಬೈಟ್ ತಂಗ, ತಂಗಡ ಭೂಮಿರ ಬೇಲ್ಲ್ ಕಡ್ ಎಡ್ಪ ಎಣ್ಣುವ ನೇಮತನ ವೀರರಾಜೇಂದ್ರ ಕೊಂಡ ಬಾತ್.

ಈ ನೇಮತಂಜ 'ಅರಮನೆ ಪುತ್ತರಿ ದಿನ' ಪಿಳ್ಳಾ 'ನಾಡ್ ಪುತ್ತರಿ ದಿನಾ'ಂಡ್ ಕಡ್ ಎಡ್ಪ ದಿನತನ ಕಾಕುವ ಕೂಡ್ಚಿ. ಅರಮನೆ ಇಂಜ ನಾಡ್ ಜನ ಅಂದೇ ಕಡ್ ಎಡ್ಪ ಇಂಜತ್. ಇವು ಅರಮನೆರ ಸಿದ್ಧಿಯ. ಬಾಕಿ ಕೊಡವಳ ಪಿತ್ಯಾಂಡ್ ಅಯಿಂಗಡ ಭೂಮಿಲ್ ಕಡ್ ಎಡ್ಪಕ್ ಅಯೆಪ ಇಂಜತ್. ರಾಜ ಪುತ್ತರಿ ನಮ್ಮೆರ ದಿನತ್ ಅರಮನೆಲ್ ತಾಂಡ ಪ್ರಜೆಯಕ್ ಉಟ ಕೊಡ್ಪ ಇಂಜತ್. ಪಿಳ್ಳಾ ಆ ಕೊಡವ ಅರಮನೆರ ಎದಿಕೆ ಪುತ್ತರಿ ನಮ್ಮೆರ ಕೋಲಾಟ್ ಕಳಿಪ ಇಂಜತ್. ರಾಜಂಡ ಕಾಲತ್ ಕಂದಾಯತಾರ ಕೂಟ್ಕ್ ರೈತಂಗಳುಂಡ್ ಎಡ್ಪ ಇಂಜ ನೆಲ್ಲ್ ಪಿಳ್ಳಾ ನೆಯ್ಯರ ತೆರಿಗೆನ ಅರಮನೆಕ್ ಕೋಲಾಟ ಕಳಿಪಕ್ ಬಪ್ಪ ಕೊಡವಡ ಉಟತಾರ ಖರ್ಚಿಕ್ಂದೆ ಎಡ್ತ್ ಬೆಪ್ಪ ಇಂಜತ್.

### ವೀರರಾಜೇಂದ್ರ ಒಡೆಯಂಡ ವಿರುದ್ಧ ಅಪ್ಪಾಜಿ ರಾಜಂಡ ಕೆಣಿ

ವೀರರಾಜೇಂದ್ರ ಒಡೆಯಂಗ್ ಅಪ್ಪಾಜಿ ರಾಜ ಪಿಳ್ಳಾ ಲಿಂಗರಾಜ ಎಣ್ಣುವ ದಂಡ್ ಸೋದರಂಗ ಇಂಜತ್. ಅಪ್ಪಾಜಿ ರಾಜ ಚಿರ್ಪತ್ಂಜಿ ವೀರರಾಜೇಂದ್ರಂಗ್ ಕೇಡ್ ಬಯಂದವ ಇಂಜತ್. ಪಿರಿಯಾಪಟ್ಟ ಕೋಟೆಂಜ ತಪ್ಪಾಚಿಟ್ಟಿಂಡ್ ಬಂದಪಿಳ್ಳಾ ವೀರರಾಜೇಂದ್ರ ಸಿದ್ಧೇಶ್ವರ ಕುಂಡ್ ಪಕ್ಕ ಟಿಪ್ಪರ ಕೂಡೆ ಪಡೆ ಪೊತ್ತಂಡಿಪ್ಪಕ ಇದೇ ಅಪ್ಪಾಜಿರಾಜ ಕಡಿಯತ್ನಾಡ್ ಚೋಮಕುಂದಲ್ ಒಳ್ಚೆಂಡಿಂಜತ್.

ವೀರರಾಜೇಂದ್ರ ಕೊಡಗ್ಗನ ಮನಾರ ತಾಂಡ ಪುಡ್ತತ್ ಬೆಚ್ಚೆಂಡಪಿಳ್ಳಾ ಅಪ್ಪಾಜಿರಾಜನ ಕಡಿಯತ್ನಾಡ್ಂಜ ಕಾಕ್ಚಿಟ್ಟಿತ್ ತೆರಿನಾಡ್ ಪಿಳ್ಳಾ ಹಾರಂಗಿಲ್ ಜಹಗೀರ್ ಕೊಡ್ತಿತ್ ಗರ್ವಾಲೆಲ್ ಅರಮನೆಲ್ ಕೆಟ್ವಚಿ. ಅಪ್ಪಾಜಿ ರಾಜಂಡ ಮಂಗಲ ಕೈಚಿತ್ ಬೋಂಡಿಯಾನಾನೆಲ್ಲ ಅಂವಂಗ್ ಕೊಡ್ತಿತ್ 'ಇಳ್ಳಾ ಮಿಳ್ಳಾಕಾಚೇಂಗೂ ಚಾಯಿತೆ ಇರ್'ಂಡ್ ನಲ್ಲದ್ ಬಯಂದತ್.



ಇಚ್ಛಿಕೆಲ್ಲ ಮಾಡ್‌ಚೇಂಗಿಯೂ ಅಪ್ಪಾಜಿರಾಜ ತಾಂಡ ಸೋದರ ವೀರರಾಜೇಂದ್ರನ ಮರಲ್ ನಿಂದಿತ್ ಬೊಡಿ ಬೆಚ್ಚಿತ್ ಕೊಲ್ಲೊಂಡು ಎಣ್ಣುವ ದುರಾಸೆಲ್ ಇಂಜತ್! ಈಂಗಾಯಿತ್ ಅವ ತಾಂಡ ಅರಮನೆರ ಪಕ್ಕತ್ ಇಂಜ ಗರಡಿಮನೆ ಪಿಳ್ಳಾ ಬೋರೆ ಮನೆಕ್ ತಾಂಡ ಜನಳುಂಡ್ ತಿತ್ ಬೆಪ್ಪಚಿಟ್ಟಿತ್.

ಆಖೀರಕ್ ಇನ್ನತ ಕೆಟ್ಟ ಚಾಲ್‌ನೆಲ್ಲ ಪೊರ್‌ಮೆಂಜ ಬಂದ ಜನ ಮಾಡಿಯೆ, ಅಯಿಂಗಕ್ ಈ ನಾಡ್‌ರ ಜನಳೆ ಸಹಾಯ ಮಾಡಿಯೇಂದೂ ಸುದ್ದಿ ಮಾಡ್‌ಚಿ. ಇನ್ನನೆ ತಾಂಡ ಅರಮನೆರ ಸುತ್ತ ಕೆಟ್ಟ ಜನಳೆ ದುಂಬಿತ್ ಎಣ್ಣುವ ವರ್ತಮಾನ ವೀರರಾಜೇಂದ್ರಂಗ್ ಎತ್ತನಕ ಅವ ತಾಂಡ ಜನಳುಂಡೆ, ವೀರರಾಜೇಂದ್ರ ಮಹದೇವಪುರಕ್ ಪೋಪಕಾಪಕ ಬೊಡಿ ಬೆಚ್ಚಿತ್ ಕೊಲ್ಲೊಚಿಟ್ಟಿತ್ ಆ ಕೆಲಸ ತಾಂಡ ನಾಡ್‌ರ ಈ ದುಷ್ಟಂಗಳುಂಡೆ ಆಯಿತ್‌ಂದ್ ಜನ ನಂಬುವಾಂದ್ ಅಪ್ಪಾಜಿ ರಾಜಂಡ ಗೇನ.

ಈ ಘಟನೆ ಆಯಿತ್ ಚೆನ್ನಂಗ್ ದಿನತ್ ಅಪ್ಪಾಜಿರಾಜ ಮಾಡ್‌ನ ಸ್ವಾಮಿದ್ರೋಹತ್‌ನ ಶೀರುಗೊಡನ ಬೀರೆಗೊಡ ಅರ್‌ಂಜಂಡ್ ಮಹಾರಾಜ ವೀರರಾಜೇಂದ್ರಂಗ್ ಅರಿಚಿಡೊಂಡೊಂದ್ ಮಡಿಕೇರಿಕ್ ಬಾತ್. ಅಕ್ಕಣೆಕ್ ಮಹಾರಾಜ ನಾಲ್ಕಾಡ್ ಅರಮನೆಲ್ ಪೋಯಿತಿಂಜಾಂಗ್. ಸುಬೇದಾರ್ ಮಾದಯ್ಯ ಪಿಳ್ಳಾ ಕಾರ್ಯಕಾರ ಬಿದ್ದಂಡ ಬೋಪುನ ಕಂಡತ್.

ಅವು ರಾಜ ನಾಲ್ಕಾಡ್ ಅರಮನೆಕ್ ಪೋಯಿತ್‌ಂದ್ ಎಣ್ಣುವಕ ಬೀರೇಗೊಡ, "ನಾನ್ ಅಲ್ಲಿಕ್ ಪೋಯಿತ್ ರಾಜನ ಕಾಂಬಿ"ಂದ್ ಎಣ್ಣಿತ್ ಅಂದ್ ಮಡಿಕೇರಿಲೆ ಒಳಂಜತ್.

ಬೀರೇಗೊಡ, ವೀರರಾಜೇಂದ್ರನ ಕಾಂಬಕ್ ಪೋಯಿತ್ ಎಣ್ಣುವ ಸುದ್ದಿ ಅರ್‌ಂಜದೆ ಅಪ್ಪಾಜಿ ರಾಜ ಬೊತ್ತಿಯಂಡತ್. ಆನಗುಂಡ್ ಗೊಡ, ರಾಜನ ಕಾಂಬಾಂಗ್ ಮುಪ್ಪಡೆ ಅವನ ಪುಡ್‌ಚಿತ್ ಎನ್ನನಾಚೇಂಗೂ ಕೊಲ್ಲೊಂಡೊಂದ್ ತೀರ್ಮಾನ ಮಾಡ್‌ಚಿ.

ಈಂಡೆಡೆಲ್ ಅಪ್ಪಾಜಿರಾಜ ತಾಂಡ ಸೇವಕ ಚೋಕನ ಮಂದುರ ಕೂಡೆ, "ಬೀರೇಗೊಡ ಅವಂಡ ಮನೆಕ್ ವಾಪಾಸ್ ಪೋಪಕ ನೀನ್ ಕಾಡ್‌ಲ್ ಒಳಚಂಡ್ ಅವಂಗ್ ಬೊಡಿ ಬೆಚ್ಚಿರ್"ಂದ್ ಎಣ್ಣಿಚಿ.

ಅದ್‌ಂಗ್ ಮಂದು "ನಾಡ ಕೈ ಚೆನ್ನಂಗ್ ಉನ ಉಳ್ಳಾಂಗ್ ಕಯ್ಯಲೆ"ಂದ್ ಎಣ್ಣಿತ್ ತಪ್ಪಾಚಿಟ್ಟಂಡತ್.

ಅಲ್ಲಿಂಜ ಅಪ್ಪಾಜಿರಾಜ ಶಿವಾಚಾರಂಡ ಚೆನ್ನವೀರ ಎಣ್ಣುವ ಕಣ್ಣಂಗ್ ಬೀರೇಗೊಡನ ಕೊಲ್ಲುವ ಕೆಲಸ ಎಣ್ಣುವಕ ಒತ್ತಂಡತ್. ಆನಗುಂಡ್ ಅಪ್ಪಾಜಿರಾಜ ಗರ್ವಾಲೆ

ಅರಮನೆಂಜ ಬೀರೇಗೌಡ ತಾಂಡ ಮನೆಕ್ ಪೋಪ ಬಟ್ಟೆಲ್ ಚೆನ್ನವೀರಂಗ್ ಬೊಡಿಬೆಪ್ಪಕುಳ್ಳ ಜಾಗತ್‌ನ ಮಾಡ್‌ಚಿಟ್ಟತ್.

ಅನ್ನನೆ ಓರ್ ಕ್ಕಣ್ಣಿನ ಮಡಿಕೇರಿಕ್ ಅಯೆಚಿತ್ ಬೀರೇಗೌಡನ ಪಿತ್ಯಾಂದ್ ಮಜ್ಜಣತ್‌ರ ಒಳಿಯ ಬೀರೇಗೌಡನ ಗರ್ವಾಲೆಕ್ ಬಪ್ಪನ್ನಕೆ ಎಣ್ಣೆತ್ ಅಯೆಚಿತ್.

ಈ ಪೋಲೆ ವಾಪಾಸ್ ಬಂದ ಬೀರೇಗೌಡನ ಅಪ್ಪಾಜಿ ರಾಜ ಅಂವಂಡ ಮನೆಕ್ ಪೋಪಕ್ ಎಣ್ಣೆ ಚಿ.

ತಾಂಡ ಮನೆಕ್ ವಾಪಾಸ್ ಪೋಯಂಡ್ ಇಂಜ ಬೀರೇ ಗೌಡಂಗ್ ಅಪ್ಪಾಜಿರಾಜ ಆದ್ಯದಾಯಿತ್ ಎದೆಕ್ ಬೊಡಿ ಬೆಚ್ಚತ್. ಕೂಡೆನ್ನೆ ಕಾಡ್‌ಲ್ ಇಂಜ ಚೆನ್ನವೀರ ಇಣ್ಣೋರ್ ಬೊಡಿ ಬೆಚ್ಚತ್.

ಬೀರೇಗೌಡ ನೆಲಕ್ ಬುದ್ದದೆ ಕೂಡೆ ಇಂಜ ಓರ್ ಕ್ಕಣ್ಣಿ ದಾರೋ ಕಳ್ಳಂಗ ಪಾರ್‌ಪತ್ಯದಾರಂಗ್ ಬೊಡಿ ಬೆಚ್ಚತ್‌ಂದ್ ವಾಪಾಸ್ ಅರಮನೆಕ್ ಓಡಿಬಾತ್. ಬೀರೇ ಗೌಡ ಚಿತ್ ಬುದ್ದದು ಅಪ್ಪಾಜಿ ರಾಜ ಪಿಣ್ಣಾ ಚೆನ್ನವೀರ, ಬೀರೇಗೌಡಂಡ ಕೈಲ್ ಇಂಜ ಪೊನ್ನರ ಬಳೆ, ದಂಡ್ ತೊಡ್‌ಜ್, ಬೊಳ್ಳಿರ ಚೂರಿನೆಲ್ಲ ಎಡ್‌ತಂಡತ್. ಅಲ್ಲಿಂಜ ಅದೇ ಕಾಡ್‌ಲ್ ತಡಿನ ಕೊಕ್ಕಲೆಲ್ ಮುಚ್ಚಿತ್ ಬಂದ್‌ರ್‌ತ್.

ಇಚ್ಚಕೆಲ್ಲ ಆನಪಿಣ್ಣಾ ಸಹ ಅಪ್ಪಾಜಿರಾಜ, "ಬೀರೇಗೌಡ ಅರಮನೆಂಜ ವಾಪಾಸ್ ಅಂವಂಡ ಮನೆಕ್ ಪೋಯಿಂಡಿಪ್ಪಕ ದಾರೋ ಕಳ್ಳಂಗ ಬೊಡಿ ಬೆಚ್ಚತ್, ಅಂವಂಡ ಮಾಲ್ ಮಟತ್‌ನೆಲ್ಲ ಬಲ್‌ಚಂಡ್ ಪೋಯಿತ್. ದಾರ್‌ಂದ್ ಗೊತ್ತಿಲ್ಲೆ, ಇಕ್ಕಿಕ್ಕ ಕಳ್ಳಂಗಡ ಉಪದ್ರ ದುಂಬ ಉಂಡ್"ಂದ್ ವೀರ ರಾಜೇಂದ್ರಂಗ್ ಬಿನ್ನವತ್ತಳೆ ಅಯೆಚಿತ್.

ಆಚೇಂಗಿ, ವೀರರಾಜೇಂದ್ರಂಗ್ ನೇರಾನ ಸಂಗತಿ ಅರ್ಥ ಆಚಿ. ಅಂವ ಕೊಲೆ ಮಾಡ್‌ನಯಿಂಗಳ ಪುಡ್‌ಚಿತ್ ಶಿಕ್ಷೆ ಕೊಡ್‌ತತ್. ಅಪ್ಪಾಜಿರಾಜಂಡ ಮೀದೇತ ತಿರಸ್ಕಾರ ಭಾವನೆಲ್ ಅಂವಂಗ್ ಶಿಕ್ಷೆ ಕೊಡ್‌ಕತೆ ಮುಂಡತೆ ಕೂಡ್‌ಚಿ.

## ಕೊಡಗ್ ಮುಂಬೈಂಜ ಚಿಂಗನ ಕೊಂಡ ಬಪ್ಪಚಿಟ್ಟಿದ್ ಪಿಳ್ಳಾ ಕೊಡಗಲ್ ಬಲ್ಯ ಬೋಟೆ

ಈ ನೇರತ್ ಎಣ್ಣಕ 1805ಂಡ ನಡುಲ್ ಮಡಿಕೇರಿಕ್ ರಾಜ ಪಿಳ್ಳಾ ಅಂವಂಡ ಕುಟುಂಬತ್ ಚಿತ್ರ ಬುಡ್ತುವಕ್ ಮುಂಬೈಂಜ ನೆಸ್ ಸಾಹೇಬ ಬಂದಿತಿಂಜತ್. ಅಂವಂಡ ಕೂಡೆ ವೀರರಾಜೇಂದ್ರ "ನಾಡ ರಾಜ್ಯತ್ ಚಿಂಗ ಇಲ್ಲೆ. ಆನಗುಂಡ್ ನಾಕ್ ಚಿಂಗ ನೋಟೊಂಡು"ಂದ್ ಎಣ್ಣಚಿ.

ಈ ವಿಷಯ ನೆಸ್‌ನುಂಡ್ ಮುಂಬೈ ಬ್ರಿಟಿಷ್ ಪ್ರಾಂತ್ಯತ್‌ರ ಗ.ಡಂಕನ್‌ಕ್ ಗೊತ್ತಾಚಿ. ಅದ್‌ಂಗ್ ಡಂಕನ್ "ನಂಗಡಲ್ಲಿ ಉಳ್ಳ ಚಿಂಗತ್‌ನ ತಪ್ಪ"ಂದ್ ಎಣ್ಣಚಿ.

ಇದಾಯಿತ್ ಚೆನ್ನಂಗ್ ದಿನತ್ ವೀರರಾಜೇಂದ್ರ ಜಮಾದಾರ ಮೊಣ್ಣಯ್ಯ ಪಿಳ್ಳಾ ಶಂಕರಯ್ಯನ ಸರ್ಕಾರಿ ಚಾಕ್ರಿರ ಮೀದ ಮುಂಬೈಕ್ ಅಯೆಚತ್. ಅವು ವಾಪಾಸ್ ಬಪ್ಪಕ ಡಂಕನ್ ಸಾಹೇಬ್ ಅಯಿಂಗಡ ಕೂಡೆ ಓರ್ ಚಿಂಗತ್‌ನ ಕೊಡಗ್ ಅಯೆಚತ್. ಆ ಚಿಂಗ ತಲಕಾವೇರಿ ಪೊಳೆರ ಬೇತರಿಕೆತ್ತನೆ ಚಾಯಿತೆ ಬಾತ್. ಅಲ್ಲಿಂಜ ಚೆನ್ನಂಗ್ ಮಿಳ್ಳಾಕ್ ಪೋಕಣೆ ಸುಸ್ತಾಯಿತ್ ಜಿಂವ ಬುಟ್ಟತ್.

ಈ ವಿಷಯ ಅರ್‌ಂಜ ರಾಜ, "ಚಿಂಗ ಚತ್ತಕೊ ಪರೋಲೆ, ನಾಕ್ ಅದ್‌ನ ನೋಟೊಂಡು. ಆಂಡ ಚಾವುನ ಎಡ್‌ತಂಡ್ ಬಾರಿ"ಂದ್ ತಾಂಡ ಜನಕ್ ಅಪ್ಪಣೆ ಮಾಡ್‌ಚಿ.

ಮಡಿಕೇರಿಕ್ ಕೊಂಡ ಬಂದ ಆ ಚಿಂಗತ್‌ರ ಚಾವುನ ಸರ್ವಜನಕೂ ಕಾಟಿತ್ ರಾಜ "ಈ ಚಿಂಗ ಜಾತಿ ಓರ್ ಅಪರೂಪಾಂಡ್ ಇದ್‌ನ ಚತ್ತಕೊ ಇಲ್ಲಿಕ್ ಕೊಂಡ ಬಪ್ಪಚಿಟ್ಟಿಯೆ. ಈಂಡ ರೂಪ ಪೇರ್ತ್ ಅಪರೂಪ"ಂದ್ ಎಣ್ಣಚಿ. ಅಲ್ಲಿಂಜ ಈಂಡ ತೋಲ್, ಪಲ್ಲ್, ಒಯ್ಯನ ಎಡ್‌ಪ್‌ಚಿಟ್ಟಿತ್ ಅರಮನೆಲ್ ಬೆಪ್ಪಚಿಟ್ಟಿತ್.

ಈ ಕಾಲತ್‌ರ ಆಖೀರಿ ಬೇಳಾಚೆ ವೀರರಾಜೇಂದ್ರಂಡ ಪೆರಿಯ ಮೋವ ಸ್ವಾದೆ ಬಸವಲಿಂಗ ರಾಜಂಡ ಮಹಾರಾಣಿ ರಾಜಮ್ಮಾಜಿಕ್ ಓರ್ ಕಣ್ಣ ಕುಳ್ಳಿ ಪುಟ್ಟಾಚಿ. ಈ ಕುಳ್ಳಿಕ್ ಸದಾಶಿವ ಎಣ್ಣವ ಪೆದ ಇಟ್ಟಿತ್.

ಈ ಸಂದರ್ಭತ್ ಸ್ವಾದೆ ಮನೆತನತ್‌ರ ಚರಿತ್ರನ ಓದುವದ್ ನಲ್ಲದ್. ಈ ರಾಜ ಮನೆತನತ್‌ರ ಮೂಲಪುರುಷ ಅರಸಪ್ಪ ನಾಯಕ. ಇಂವ ವಿಜಯನಗರ ಕೃಷ್ಣ ದೇವರಾಯನುಂಡ್ ಉ.ಕನ್ನಡತ್‌ರ ಸಿರಸಿ ಸುತ್ತಮುತ್ತ ಉಳ್ಳ ರಾಜ್ಯತ್‌ರ ಅಧಿಪತಿ. ಇಂವಂಡ ಸಂತತಿಕಾರ ಆರಾಳ್ 1555ತ್‌ಂಜ 1763ಕೆತ್ತನೆ ಆಳ್‌ಚಿ. 1763ತ್

ಮೈಸೂರ್‌ಲ್ ಹೈದರಾಲಿ ಈ ವಂಶತ್‌ರ ಏಳನೆ ಅರಸ ಇಮ್ಮಡಿ ಸದಾಶಿವರಾಯನ ಬೋಪ್‌ಚಿಟ್ಟಿತ್ ಅಂವಂಡ ರಾಜ್ಯತ್‌ನ ತಾಂಡ ಪುಡ್‌ತಕ್ ಎಡ್‌ತಂಡತ್. ಅಕ್ಕ ಈ ರಾಜ ಗೋವಾತ್‌ರ ಪೋರ್ಚುಗೀಸಡ ಕೂಡೆ ಸಿನೇತಿಕೆಲ್ ಇಂಜಾನುಂಡ್ ಅಲ್ಲಿಯೆ ಬಾಂದೇವಾಡಿಲ್ ನೆಲೆ ನಿಂದತ್. ಅನ್ನನೆ ಅಲ್ಲಿಯೂ ಸ್ವಾದೆ ರಾಜ ಎಣ್ಣುವ ಪೆದ ಉಳಾತಿಯಂಡತ್. ಇಮ್ಮಡಿ ಸದಾಶಿವರಾಯಂಡ ಮೋಂವನೆ, ಕೊಡಗ್ಗರ ವೀರ ರಾಜೇಂದ್ರ ಒಡೆಯಂಡ ಮೋವ ರಾಜಮ್ಮಾಜಿನ ಮಂಗಲ ಆನ ಸವಾಯಿ ಬಸವಲಿಂಗ ರಾಜೇಂದ್ರ. ಇಂವನುಂಡ್ ಏಳನೆ ಸವಾಯಿ ಸದಾಶಿವ ರಾಜೇಂದ್ರ ಇಕ್ಕತ ಸ್ವಾದೆ ರಾಜ. ಬಾಂದೇವಾಡಿಲ್ ಉಳ್ಳ ಸ್ವಾದೆ ಅರಮನೆಲ್ ಆ ಮನೆತನತ್‌ರ ರಾಜಂಡ ಪಂಶಾವಳಿಪಟ್ಟಿ ಉಂಡ್. ಅದತ್ ಈ ರಾಜ ಮನೆತನಕ್ಕೂ, ಕೊಡಗ್ ರಾಜಂಗಡ ಮನೆತನಕ್ಕೂ ನಡ್‌ಂದ ಮಂಗಲ ಸಮ್ಮಂಧತ್‌ನ ಕಾಟಿತ್.

ವೀರರಾಜೇಂದ್ರಂಡ ಮೋವ ಕ್ಣಣ್ಣುಕುಳ್ಳಿನ ಪೆತ್ತಲ್ಲಿ ಅವಡ ವಡಿಯ ಬಸವ ಲಿಂಗರಾಜ ಮಡಿಕೇರಿಲ್ ಇಂಜತ್. ಈ ನೇರತ್ ವೀರರಾಜೇಂದ್ರನ ಕಾಂಬಕ್ ತಲಚೇರಿಂಜ ರಿಚಾರ್ಡ್ ಟೋರಿನ್ ಬೆಲ್, ಲೆ.ಪಾರ್ಸನ್ ಎಣ್ಣುವ ಇಂಗ್ಲೀಷ್ ಸರ್ದಾರಂಗ, ಶ್ರೀರಂಗಪಟ್ಟಿತ್‌ಂಜ ಕ್ಯಾ.ಮೆಕ್ ಡೊವೆಲ್ ಪಿಣ್ಣಾ ಕ್ಯಾ.ಕಿಂಗ್ ಎಣ್ಣುವ ಇಂಗ್ಲೀಷ್ ಸರ್ದಾರಂಗ ಮಡಿಕೇರಿಕ್ ಬಾತ್.

ವೀರರಾಜೇಂದ್ರ ಒಡೆಯ ಮಡಿಕೇರಿಲ್ ಅಯಿಂಗಳೆಲ್ಲ ದುಂಬ ಚಾಯಿತೆ ತಕ್ಕಾರ ಮಾಡ್‌ಚಿ. ಮಡಿಕೇರಿಲ್ ಇಕ್ಕ ಉಳ್ಳ ಸರ್ಕಾರಿ ಪ್ರೌಢಶಾಲೆರ ಸಭಾಂಗಣ ಉಳ್ಳ ಪಳೆಯ ಕಟ್ಟಡ ಉಳ್ಳ ಐರೋಪ್ಯ ಗೃಹಸ್ಥಂಗ ಒಳವಕ್ ದಂಡ್ ಮಾಡಿ ಉಳ್ಳ ಕಟ್ಟಡತ್‌ನ ಕೆಟ್‌ಚಿಟ್ಟಿತ್. ಅಲ್ಲಿ ಅಯಿಂಗಳ್ ಐರೋಪ್ಯರೀತಿರ ಅನುಕೂಲತ್‌ನ ಮಾಡಿ ಕೊಡ್‌ತದೆ ಅಲ್ಲತೆ ಐರೋಪ್ಯಶೈಲಿರ ಅಡಿಗೇ ಮಾಡುವ ಮುಸ್ಲಿಂ ಅಡಿಗೇಕಾರಳೊ ಆಕ್‌ಚಿ. ಕೊಡಗ್‌ಕ್ ಬಪ್ಪ ಐರೋಪ್ಯ ಅಧಿಕಾರಿಯಕ್ ಮಡಿಕೇರಿಲ್ ಒಳಂಜವಕ್ ಈ ಸೌಕರ್ಯ ಇಪ್ಪಾಂಡ ಕೂಟ್‌ಕ್ ಇಲ್ಲಿಯತ ಕಾಡ್‌ಲ್ ಬೋಟೆಕ್ ಪೋಪಕ್ ಬೋಂಡಿಯಾನ ಅವಕಾಶ ಇಂಜತ್. ಇಲ್ಲಿಯತ ರಾಜಂಗಳೆ ಬೋಟೆಕಾರಂಗ ಆಯಿತಿಂಜತ್. ಆನಗುಂಡ್ ಕೊಡಗ್‌ಕ್ ಬ್ರಿಟಿಷ್ ಅಧಿಕಾರಿಯ ಗೆಡಿ ಗೆಡಿ ಬಪ್ಪ ಇಂಜತ್.

## ಬ್ರಿಟಿಷ್ ಟ್ರಿಪ್ಲಾಲ್ ನೌಕಾಪಡೆಲ್ ಪ್ರೆಂಚಳ ಚೋಪ್‌ಚಿಟ್ಟಾಂಗ್ ವೀರರಾಜೇಂದ್ರ ಒಡೆಯ ಗವರ್ನರ್ ಜನರಲ್‌ಕ್ ಅಭಿನಂದನೆ ಅಯೆಚಡ್

ಬಂಗಾಳತ್‌ರ ಗ.ಜ. ಸರ್ ಜಾರ್ಜ್ ಬಾರ್ಲೋ ಸಾಹೇಬ ಯೂರೋಪ್‌ಲ್ ಪ್ರೆಂಚ್ ಹಡಗ್ ಸೈನ್ಯತ್‌ನ ಟ್ರಿಪ್ಲಾಲ್ ವಣ್ಣವಲ್ಲಿ ಬ್ರಿಟಿಷ್ ನೌಕಾಸೈನ್ಯ ಚೋಪ್‌ಚಿಟ್ಟ ಸುದ್ದಿನ ವೀರರಾಜೇಂದ್ರಂಗ್ ಎಳ್ಳಿತ್ ಅಯೆಚಡ್.

ಈ ಕಾಗದ ಓದಿತ್ ದುಂಬ ಕುಶಿಪಟ್ಟ ವೀರರಾಜೇಂದ್ರ ಗ.ಜನರಲ್‌ಕ್ ಅಭಿನಂದನಾ ಕಾಗದ ಅಯೆಚಡ್.

ಈ ನೇರತ್ ಮಲಯಾಳತ್‌ರ ಪೈಚಿ ರಾಜಂಡ ಕಡೆರ ಕಾರ್ಯಕಾರ ಪಿಳ್ಳಾ ಯಮನಾಯಕ ಕಂಪೆನಿ ಸರ್ಕಾರಕ್ ವಿರೋಧಿ ಆಯಿತ್ ಕಾಡ್ ಕೂಡಿಯಂಡ್ ಬ್ರಿಟಿಷ್ ಅಧಿಕಾರಿಯಕ್ ತೊಂದರೆ ಕೊಡ್ತಂಡ್ ಇಂಬತ್. ಕೊಡಗ್ ಸೀಮೆ ಉಕ್ಕಡ ಪಾರಕಾರ ಅಯಿಂಗಳ ಪುಡ್‌ಚಿತ್ ಕೊಡಗ್ ರಾಜಂಗಕ್ ಒಪ್ಪಿಚಿಟ್ಟತ್. ಅಯಿಂಗಳ ಕೊಡಗ್ ರಾಜ ಮಲಬಾರ್ ಕಮಿಷನರ್ ವಾರ್ಡನ್ ಸಾಹೇಬಂಡ ಕಡೆಕ್ ಅಯೆಚಡ್.

## ವೀರರಾಜೇಂದ್ರ ಒಡೆಯ ಎಳ್ಳಿಚಿಟ್ಟ ಹಾಲೇರಿ ಅರಸಂಡ ಚರಿತ್ರೆ ರಾಜೇಂದ್ರನಾಮೆ 1807ಂಗ್ ಆಖೀರಿ ಆನದ್

ಸುಮಾರ್ 1600ತ್‌ಂಬ ಸುರುವಾನ ಹಾಲೇರಿ ಮನೆತನತ್‌ರ ರಾಜಂಡ ಚರಿತ್ರೆಕ್ 1807ಂಗತ್ತನೆ ಮುಖ್ಯಪಟ್ಟ ಆಧಾರ ಗ್ರಂಥ ದೊಡ್ಡ ವೀರರಾಜೇಂದ್ರ ಒಡೆಯ 1807ತ್ ಎಳ್ಳಿಚಿಟ್ಟ ರಾಜೇಂದ್ರ ನಾಮೆ. ಕೊಡಗ್ ಹಾಲೇರಿ ಅರಸಂಗಡ ಮೀದ ಎಳ್ಳಿನ ಐರೋಪ್ಪ ಚರಿತ್ರೆಕಾರಂಗ ರಾಜೇಂದ್ರ ನಾಮೆನ ನಂಬಿತೆ ಎಳ್ಳಿತ್. ಈ ನಾಮೆಲ್ ಈ ರಾಜಂಡ / ಅಯಿಂಗಡ ರಾಜ್ಯಭಾರಕ್ ತೊಂದರೆ ಆಪನ್ನತ ಏದೇ ವಿಷಯ ಇಲ್ಲೆ.

ವೀರರಾಜೇಂದ್ರ ಒಡೆಯ 1807ತ್ ಕನ್ನಡತ್ ಎಳ್ಳಿಚಿಟ್ಟ ರಾಜೇಂದ್ರನಾಮೆಲ್ ಅವ ತಾನ್ ಚಿತ್ತಪಿಳ್ಳಾ ಕೊಡಗ್ ಸಿಂಹಾಸನ ತಾಂಡ ಮೂಡಿಕುಳ್ಳಿಯ ಪಿಳ್ಳಾ

ಅಯಿಂಗಡ ಕ್ಕಣ್ಣುಕುಳ್ಳಿಯಕ್ಕೂ ಹಕ್ಕಾಯಿತ್ ಇರೊಂಡೊಂದ್ ಎಳ್ಳೊಚಿಟ್ಟು ಮರಣಶಾಸನತ್‌ನ ಬಂಗಾಳತ್‌ರ ಗ.ಜ. ಮಾರ್ಕ್ವಿಸ್ ವೆಲ್ಲೆಸ್ಲಿಕ್ ಕ್ಯಾಪ್ಟನ್ ಮಹೋನಿಕ್ ಅಯೆಚ ರೆಕಾರ್ಡ್ ಆಂಗ್ ಮುಪ್ಪಡೆ ಮಾರ್ಕ್ವಿಸ್ ವೆಲ್ಲೆಸ್ಲಿ, ವೀರರಾಜೇಂದ್ರ ಒಡೆಯಂಗ್ ಓರ್ ಕತ್ತಿನ ಇನಾಂ ಅಯೆಚಾಂಡ ವಿಷಯ ಇಂಜತ್. ಆಚೇಂಗಿ, ವೀರರಾಜೇಂದ್ರ ಚತ್ತಪಿಳ್ಳಾ ಆಳ್‌ನ ಅಂವಂಡ ತಮ್ಮಣ ಲಿಂಗರಾಜೇಂದ್ರ ಒಡೆಯಂಡ ಕಾಲತೊ / ಲಿಂಗರಾಜೇಂದ್ರ ಒಡೆಯಂಡ ಮೋಂವ ಚಿಕ್ಕವೀರರಾಜೇಂದ್ರ ಒಡೆಯಂಡ ಕಾಲತೊ ಮಡಿಕೇರಿ ಅರಮನೆಲ್ ಬೆಚ್ಚಿತಿಂಜ ರಾಜೇಂದ್ರನಾಮೆರ ಕನ್ನಡ ಕೈಎಳ್ಳಲ್ ಎಳ್ಳೊನ ಮರಣ ಶಾಸನ ಪಿಳ್ಳಾ ಆ ಸಮ್ಮಂಧತ ಕಾಗದ ಇಲ್ಲತಾನದ್, ಅದ್ ಕಾಂಗತಾನಾಂಡ ಉದ್ದೇಶ ಪೂರ್ವಕ ಆಯಿತೆ ಮಾಡಿತೊ ಗೊತ್ತಿಲ್ಲೆ.

ದೊಡ್ಡ ವೀರರಾಜೇಂದ್ರ ಒಡೆಯ ತಾನ್ ಕನ್ನಡತ್ ಸುರೂಲ್ ಎಳ್ಳೊನ ರಾಜೇಂದ್ರನಾಮೆರ ಇಂಗ್ಲೀಷ್ ತಕ್ಕರ ಪ್ರತಿನ ಪಿತ್ಯ ಕಾಲ ಎಣ್ಣಕ 1808ನೆ ಇಸವಿಲ್ ಲೆ.ರಾಬರ್ಟ್ ಅಬರ್ ಕ್ರಾಂಬಿ ಎಣ್ಣುವ ಸೈನ್ಯಾಧಿಕಾರಿ ವೀರರಾಜೇಂದ್ರ ಒಡೆಯಂಡ ಇಷ್ಟತ್‌ರನ್ನಕೆ ಎಳ್ಳಿ ಕೊಡ್ತತ್. ಆ ಇಂಗ್ಲೀಷ್ ಪ್ರತಿ ದೊಡ್ಡ ವೀರರಾಜೇಂದ್ರ ಒಡೆಯಂಡ ಆಖೀರಿ ದಿನತ್ ಬ್ರಿಟಿಷ್ ಅಧಿಕಾರಿಯಕ್ ಅಯೆಚದ್, ಬ್ರಿಟಿಷ ಕೊಡಗ್‌ನ ತಂಗಡ ಪುಡ್‌ತಕ್ ಎಡ್‌ತಂಡಪಿಳ್ಳಾ ಅದ್ ಬೆಂಗಳೂರ್‌ಲ್ ಇಂಜ ಕೊಡಗರ ಕಮಿಷನರ್ ಕಚೇರಿಲ್ ಇಂಜತ್.

### ದೊಡ್ಡ ವೀರರಾಜೇಂದ್ರ ಒಡೆಯ ಮರಣಶಾಸನ ಎಳ್ಳೊಚಿಟ್ಟದ್

ವೀರರಾಜೇಂದ್ರಂಡ ದುರಾದೃಷ್ಟತ್ ಮಹಾದೇವಮ್ಮಾಜಿಕ್ ಕ್ಕಣ್ಣು ಕುಳ್ಳಿಯ ಅಯಿಲೆ. ತಾಂಗ್ ಕ್ಕಣ್ಣು ಮಕ್ಕ ಇಲ್ಲತಾನಕೊ, ಮೂಡಿ ಕುಳ್ಳಿಯ ತಾಂಡ ಕಾಲ ಕೈಂಜದು ರಾಜ್ಯ ಆಳುವ ಎಣ್ಣುವ ನಂಬಿಕೆ ರಾಜಂಗ್ ಇಂಜತ್. ಆ ನೇರತ್ ವೀರರಾಜೇಂದ್ರ ಒಡೆಯಂಗ್ ಅಂವಂಡ ಮಹಾರಾಣಿಕ್ ದಂಡ್ ಮೂಡಿ ಕುಳ್ಳಿಯ ಇಂಜತ್.

ಆನಗುಂಡ್ ಕ್ಯಾ.ಮಹೋನಿ ಕೊಡಗ್ ಬುಟ್ಟಿತ್ ಪೋಪ ನೇರತ್, ವೀರರಾಜೇಂದ್ರ ತಾಂಗ್ ಕ್ಕಣ್ಣು ಕುಳ್ಳಿಯ ಇಲ್ಲತೆ ಪೋನಕೊ ತಾಂಡ ರಾಣಿಕ್ ಪುಟ್ಟನ ರಾಜಶೇಖರಪ್ಪ, ಶಶಿಶೇಖರಪ್ಪ ಪಿಳ್ಳಾ ಚಂದ್ರಶೇಖರಪ್ಪ...ಇವು ಪಟ್ಟಕ್ ಬಪ್ಪಕ್ ಬಂಗಾಳ ಗ.ಜನರಲ್

ಒಪ್ಪಿಗೆ ತರೊಂಡೂಂದ್ ಎಣ್ಣೆತ್ ಅಯೆಚತ್. 1806ನೆ ಇಸವಿಲ್ ಕ್ಯಾ. ಮಹೋನಿ ಕೊಡಗ್ ಬುಟ್ಟಿತ್ ಬಂಗಾಳಕ್ ಪೋಚಿ. ಅವ ಕೊಡಗ್ಲ ಸುಮಾರ್ ಕಾಲ ಇಂಜಿತ್ ವೀರರಾಜೇಂದ್ರಂಡ ನಲ್ಲ ಓರ್ ಸಿನೇತ ಆಯಿತಿಂಜತ್.

ಈಂಡೆಡಲ್ ರಾಜಂಡ ಕೊದಿರ ಪಿಳ್ಳಾ ಮಹಾರಾಣಿ ಆನ ಮಹಾದೇವಮ್ಮಾಜಿ 1805ತ್ಂಜ ದಂಡ್ ಮೂಡಿ ಕುಳ್ಳಿಯಳ ಪತ್ತಿತ್ 1807ನೆ ಮೇ ತಿಂಗತ್ ಸ್ವರ್ಗವಾಸಿಯಾಚಿ.

ಮಹಾದೇವಮ್ಮಾಜಿ ಕರಣಿಕ ಸುಬ್ಬಯ್ಯಂಡ ತಂಗಿ. ಆಚೇಂಗಿ, ಈ ಕರಣಿಕ ಸುಬ್ಬಯ್ಯ ವೀರರಾಜೇಂದ್ರ ಒಡೆಯಂಡ ವಕೀಲ ಆಯಿತಿಂಜ ಕರಣಿಕ ಸುಬ್ಬಯ್ಯಂಡ ಮನೆತನಕ್ ಕೂಡತೆ ಬೋರೆ ಕುಟುಂಬಕಾರಕ್ ಕೂಡ್‌ನನ್ನೆ ಕಾಂಬ. ಎನ್ನಂಗೇಣ್ಣಕ ವಕೀಲ ಕರಣಿಕ ಸುಬ್ಬಯ್ಯಂಡ ಸಂತಾನಕಾರಳಾನ ಮಡಿಕೇರಿಲ್ ಇಕ್ಕ ಉಳ್ಳ ಅವಂಡ ಕುಟುಂಬತರ ಕತಲ್ ಕರಣಿಕ ಸುಬ್ಬಯ್ಯಂಡ ತಂಗಿ ವೀರರಾಜೇಂದ್ರ ಒಡೆಯಂಡ ಪೊಣ್ಣ್ ಆನ ಕತನ ಎಣ್ಣಲೆ.

ವೀರರಾಜೇಂದ್ರಂಗ್ ತಾಂಡ ಪೊಣ್ಣ್ ಮಹಾ ದೇವಮ್ಮಾಜಿ ಚತ್ತದು ತಾಂಡ ಸಿಂಹಾಸನಕ್ ಕಣ್ಣ್ ಕುಳ್ಳಿಯ ಇಲ್ಲತದ್ ಪೇರ್ತ್ ಬೇಜಾರ ಆಚಿ. ತಾನ್ ಚತ್ತದು ತಾಂಡ ರಾಣಿರ ಕಣ್ಣಮಕ್ಕ ಪಟ್ಟಕ್ ಬಂದಕ ತಾಂಡ ಮಹಾರಾಣಿರ ನಾಲ್ ಮೂಡಿ ಕುಳ್ಳಿಯಕ್ ಅವು ಹಿಂಸೆ ಕೊಡ್‌ಕೂಂದ್ ಗೇನ ಮಾಡಿತ್, ಆ ಮೂಡಿಕುಳ್ಳಿಯಕೂ, ಅಯಿಂಡ ಕಣ್ಣ ಕುಳ್ಳಿಯಕೂ ಕೊಡಗ್ಗರ ರಾಜ್ಯತರ ಹಕ್ಕ್ ಬೋಂಡೂಂದ್ ಓರ್ ಮರಣ ಶಾಸನ ಮಾಡ್‌ಚಿ. ಅದ್‌ಂಡ ಪ್ರತಿನ ಅಕ್ಕ ಹಂಗಾಮಿ ಗ.ಜನರಲ್ ಆಯಿತಿಂಜ ಸರ್ ಜಾರ್ಜ್ ಚಾರ್ಲೋನ್‌ಕ್ 1807ತ್ ಅಯೆಚಿಕೊಡ್‌ತತ್.

ಮಿಳ್ಳಾಕ್ ಗ.ಜ. ಆನ ಲಾರ್ಡ್ ಮಿಂಟೋ ಸಾಹೇಬಂಗ್ ತಾನ್ ಬ್ರಿಟಿಷ್, ಟಿಪ್ಪುರ ಪಡೆರ ನೇರತ್ ಮಾಡ್‌ನ ಸಹಾಯತರ ಮೀದ ಎಣ್ಣೆತ್ ಕೊಡಗ್ ಸಿಂಹಾಸನತರ ಉತ್ತರಾಧಿಕಾರಿರ ವಿಷಯತ್ ತಾಂಡ ಮರಣ ಶಾಸನತರ ಪ್ರತಿನ ಕೊಡ್‌ಪನ್ನೆ ಕೇಟಂಡತ್. ವೀರರಾಜೇಂದ್ರ ಇಚ್ಚಕಾಂಗಿ ತೃಪ್ತಿ ಪಟ್ಟವತೆ ಲಾರ್ಡ್ ಮಿಂಟೋ ಸಾಹೇಬ 1807ನೆ ಆಖೀರಕ್ ಗ.ಜನರಲ್ ಪದವಿನ ಸ್ವೀಕಾರ ಮಾಡ್‌ನನ್ನೆ ತಾಂಡ ಮರಣಶಾಸನತರ ಓರ್ ಪ್ರತಿನ ಅವಂಗ್ ಅಯೆಚಿ ಕೊಡ್‌ಪನ್ನೆ ಕೇಟಂಡತ್.

ವೀರರಾಜೇಂದ್ರಂಡ ಈ ಕಾಗದ ಬಂಗಾಳ ಗವರ್ನರ್‌ಕ್ 1807ನೆ ಅಕ್ಟೋಬರ್ 7ಂಗ್ ಎತ್ತ್‌ಚಿ. ಅಂದ್‌ಂಜ ವೀರರಾಜೇಂದ್ರ ಕಂಪೆನಿ ಸರ್ಕಾರ ತಾಂಡ ಆಸೆ ನಡ್‌ತಿ ತಪ್ಪುಂದ್ ಗ.ಜನರಲ್‌ರ ಜವಾಬ್‌ನೆ ಪಾರ ಕಾತಂಡ್ ಇಂಜತ್.

## ವೀರರಾಜೇಂದ್ರ ಒಡೆಯಂದ ಆಳ್ವಿಕೆರ ಆಖೀರಿ ದಂಡ್ ಕಾಲ

ವೀರರಾಜೇಂದ್ರ ಒಡೆಯಂದ ಆಳ್ವಿಕೆರ ಸಾಸ ಪಿಳ್ಳಾ ಗೌಜಿರ ದಿನ ಅಂವಂಡ ಕೊದಿರ ಮಹಾರಾಣಿ ಮಹಾದೇವಮ್ಮಾಜಿ ಚಾವಕೆ ಎಲ್ಲ ಕೈಂಜಿಪೋಚಿ. ಅಂವ ಚೆರ್ಪತ್‌ಂಜೆ ಬದ್‌ಕಾನ ಕಷ್ಟತ್ ಕಂಡಂವ. ಅಂವಂಗ್ ಒಯಿಂಬದ್ ಬಯತ್ ಆಪಕ ಅಂವಂಡ ಅವ್ವ, ತಂಗೆ ಪಿಳ್ಳಾ ತಮ್ಮಣಂಗ ಮೈಸೂರ್ ಹೈದರಾಲಿ ಟಿಪ್ಪುರ ಕೋಟೆಲ್ ಜೈಲ್‌ಲ್ ಇಂಜತ್. ಆ ನೇರತ್ ಅವ್ವಂಗ್ ಸೀತಾಳಿ ಕಾಯಿಲ ಆಯಿತ್ ಚತ್‌ಪೋಚಿ. ದಂಡ್ ತಂಗೆಯ ಟಿಪ್ಪುರ ಧರ್ಮಕೆ ಕೂಡಿಪೋಚಿ. ಅಂವಂಡ ಕುಟುಂಬತ್‌ರ ಚೆನ್ನಂಗಾಳ್ ಸೆರಿಯಾನ ಊಣ್, ತೀನಿ ಇಲ್ಲತೆ ಚತ್ತಿತಿಂಜತ್. ಅಂವ ಪಿರಿಯಾಪಟ್ಟ ಕೋಟೆಂಜ ತಪ್ಪೆಚಿಟ್ಟಿಂಡ್ ಬಂದಪಿಳ್ಳಾ ಸಹ ಕಾಡಲ್ ಕೂಡಿಯಂಡ್ ಮೊಟ್ಟ್, ಮೊಟ್ಟ್‌ಕೂ ಮೈರಿಯಳ ಎದರ್‌ಚಿಟ್ಟಿಂಡ್, ಅಯಿಂಗಳ ದೊವ್‌ತಿತ್ ತಾಂಡ ರಾಜ್ಯತ್‌ನ ಪಡ್‌ಂದವಂಡಿಯಾಚಿ. ಆ ನೇರತ್ ಅಂವ ಕುರ್ಚಿ ಅರಮನೆಲ್ ಆಕಿತಿಂಜ ಸುರೂವೆತ ಪೊಣ್ಣ್ ಪಿಳ್ಳಾ ಚೆನ್ನಂಗ್ ಕುಟುಂಬಕಾರಳ ಕೋಟೆ ವೀರವರ್ಮ ರಾಜಂಡ ಜನ ಕೊಂದತ್.

ಇನ್ನನೆ ಚೆರ್ಪತ್‌ಂಜೆ ಕಷ್ಟ, ಚಾವು, ನೊಂಬಲ ಕಂಡಿತಿಂಜ ವೀರರಾಜೇಂದ್ರ ಒಡೆಯ ಓರ್ ಕಡ್‌ಪ ಸ್ವಭಾವಕಾರ. ಆಚೇಂಗಿ, ಅಂವಂಡ ಕೊದಿರ ಪೊಣ್ಣ್ ಮಹಾದೇವಮ್ಮಾಜಿ ಅಂವಂಗ್ ನೆಮ್ಮದಿ ಕೊಡ್‌ತಿತ್ ಅಂವಂಡ ಕಡ್‌ಪ ಸ್ವಭಾವತ್‌ನೆಲ್ಲ ಕಮ್ಮಿ ಮಾಡಿತಿಂಜತ್. ಆಚೇಂಗಿ, ಇಕ್ಕ ಅವಳೆ ಇಲ್ಲತಾಚಿ.

ತಾನ್ ಶತ್ರುವಳುಂಡ್ ಕಷ್ಟಪಟ್ಟಿತ್ ಗೆದ್ದ ರಾಜ್ಯತ್‌ನ ತಾಂಡ ಕಾಲ ಕೈಂಜದು ತಾಂಡ ಕ್ಕಣ್ಣಮಕ್ಕಳೆ ಆಳೊಂಡೊಂದ್ ರಾಜ ದುಂಬ ಆಸೆ ಪಟ್ಟಿತಿಂಜತ್. ಅಂವಂಡ ದುರಾದೃಷ್ಟ್ ಕುರ್ಚಿಲ್ ಇಂಜ ಸುರೂವೆತ ಪೊಣ್ಣ್‌ನ ಅರಮನೆಲೆ ವೀರವರ್ಮಂಡ ಜನ ಚಾವ್‌ಚಿಟ್ಟಾಂಗ್, ಅಲ್ಲಿಂಜ ಮಂಗಲ ಆನ ರಾಣಿಕೂ ಕ್ಕಣ್ಣ ಕುಳ್ಳಾ ಆಯಿಲೆ.

ಆನಗುಂಡ್ ತಾಂಡ ಕಾಲ ಕೈಂಜಪಿಳ್ಳಾ ಸಿಂಹಾಸನತ್ ಅಳ್‌ಪಕ್ ಕ್ಕಣ್ಣಕುಳ್ಳಾಯ ಬೋಂದು ಎಣ್ಣವ ಆಸೆಲ್ ವೀರರಾಜೇಂದ್ರ 1795ತ್ ನಾಲ್ಕಾಡ್ ಅರಮನೆಲ್ ಮಹಾದೇವಮ್ಮಾಜಿನ ತಾಂಡ ಮಹಾರಾಣಿ ಆಯಿತ್ ಮಂಗಲ ಕೈಚೆಂಡತ್.

ಆಚೇಂಗಿ, ಅವಳೂ ಸಹ ನಾಲ್ ಮೂಡಿಕುಳ್ಳಾಯಳ ಪೆತ್ತಿತ್ 1807ತ್ ಚತ್‌ಪೋಚಿ. ತಾಂಡ ರಾಣಿ ಚತ್‌ಪೋನದ್ ರಾಜಂಡ ವರೀಸ್‌ಕ್ ಇಳ್ಳಾಚ್ಚೆಕೂ ಮೊಳಿಯಾಚಿ. ಇಳ್ಳಾ ತಾಂಡ ದಂಡ್ ಸೋದರಂಗಡಾತ್ ಅಪ್ಪಾಜಿರಾಜ ಅಹಂಕಾರಿ ಆಯಿತ್ ಅಣ್ಣಂಡ ಬೊಳ್‌ಚೆನ ಸಹಿಸುವ ಕಯ್ಯತೆ ದೂರತೆ ಇಂಜತ್. ಇಳ್ಳೊಬ್ಬ



ತಮ್ಮಣ ಲಿಂಗರಾಜೇಂದ್ರ ಮಂದಬುದ್ಧಿರ ವ್ಯಕ್ತಿ ಆನಕೊ, ವೀರರಾಜೇಂದ್ರಂಡ ಮೂಡಿಕುಳ್ಳಿಯಳ ರಕ್ಷಣೆ ಮಾಡುವ ಎಣ್ಣುವ ನಂಬಿಕೆ ವೀರರಾಜೇಂದ್ರಂಗ್ ಇಂಚ್ಲೆ. ಆನಗುಂಡ್ ವೀರರಾಜೇಂದ್ರಂಗ್ ತಾಂಡ ಕಾಲ ಕೈಂಜದು ತಮ್ಮಣಂಗ, ತಾಂಡ ಕುಳ್ಳಿಯಳ ನೋಟತೆ ತಾಂಡ ಪಣತನೆಲ್ಲ ಬಲಾಚವ ಎಣ್ಣುವ ಅಗ್ಗೇನ ಸುರು ಆಚಿ.

ರಾಜಂಡ ಕೊದಿರಾಣಿ ಮಹಾದೇವಮ್ಮಾಜಿ ಬುದ್ಧಿಶಿವಕ ಅವ ರಾಜಂಡ ಮನಸ್ಸಲ್ ನೆಮ್ಮದಿ ಪಿಳ್ಳಾ ಸಮಧಾನ ಕೊಂಡ ಬಂದಿತಿಂಜತ್. ಅವಳ ಕಂಡಕ ರಾಜಂಗ್ ದುಂಬ ಪ್ರೀತಿ ಇಂಜತ್. ಆನಗುಂಡ್ ಅವ ಚತ್ತದ್ ರಾಜಂಗ್ ತಡ್ಪಕೇ ಕಯ್ಯತಚ್ಚಕ್ ದುಃಖ ಕೊಂಡ ಬಾತ್. ಕ್ರಮೇಣ ರಾಜಂಗ್ ಬುದ್ಧಿಲ್ ಚೆನ್ನ ವ್ಯತ್ಯಾಸ ಆಪಕೂಡ್ಚಿ. ಲೋಕತ್ ತಾಂಡ ಸುಖ, ದುಃಖ ಎಣ್ಣೆಯವಕ್ ತಾಂಡ ಆಪ್ತಂಗಾಂದ್ ಎಣ್ಣುವವು ದಾರೂ ಇಂಚ್ಲೆ. ಅಕ್ಕ ಅಂವಂಡ ಪೆರಿಯ ಮೋವ ದೇವಮ್ಮಾಜಿಕ್ ಎಟ್ ಬಯತ್!

ಕೊಡಗ್ ರಾಜಂಗ ತಂಗಡ ಪ್ರಜೆಯಡ ಕೂಡೆ ಇಂಜ ರೀತಿಯೂ ಅನ್ನನೆ ಇಂಜತ್. ವೀರರಾಜೇಂದ್ರ ತಾಂಡ ದಂಡ್ ತಮ್ಮಣಂಗ, ಮೂಡಿಕುಳ್ಳಿಯ ಪಟ್ಟಿಕ್ ಬಪ್ಪಕ ತೊಂದರೆ ಮಾಡೂಂದ್ ಅಯಿಂಗಕ್ ಜಹಗೀರ್ ಭೂಮಿನ ಕೊಡ್ತಿತ್ ದೂರ ಬೆಚ್ಚಿತಿಂಜತ್. ಅಂವಂಡ ರಕ್ಷಣೆಕ್ ಸಹ ಆಫಿಕಾತ್ಂಜ ಬಂದಿತ್ ಹಿಂದೂಸ್ಥಾನತರ ಪಶ್ಚಿಮ ಕರಾವಳಿಲ್ ನೆಲೆ ನಿಂದ ಸಿದ್ಧಿ ಜನಳ ಆಕೆಯಂಡತ್. ಅಂವಂಡ ರಾಣಿವಾಸತರ ಎಚ್ಚರಕ್ ಮೈಸೂರ್ಂಜ ಬಂದ ಶಿಕಂಡಿಯ, ಅರಮನೆರ ದಾಸಿಯ ಇಂಜತ್. ಪಾರಕಾರಳೂ, ಸ್ವನ್ಯಾಧಿಕಾರಿಯಳೂ, ಚೆನ್ನಂಗ್ ಗೌಡಂಗ, ಒಕ್ಕಲಿಗಂಗ, ಒಂದ್, ದಂಡ್ ಪಟ್ಟಿಮಳ ಬುಟ್ಟಕ ಫರ ಜನ ಕೊಡವಳೆ ಆಯಿತಿಂಜತ್.

ವೀರರಾಜೇಂದ್ರ ತಾನ್ ಕೊಡಗ್ಗರ ರಾಜ ಆನಲ್ಲಿಂಜ ರಾಜದ್ರೋಹಿಯ ಪಿಳ್ಳಾ ತಾಂಗ್ ಆಪ್ತಂಗ ಆಯಿತುಳ್ಳವು ಎಣ್ಣೆ ಕೊಡ್ತ ರಾಜದ್ರೋಹಿಯ ಎಣ್ಣಕ ನೂರಾಳ್ ನ ಚಾವ್ಚಿಟ್ಟಿತ್. ತಾಂಡ ಪೊಣ್ಣ್ ಚತ್ತ ನೇರತ್, ಇನ್ನನೆ ಚಾವ್ಚಿಟ್ಟಿ ರಾಜ ದ್ರೋಹಿಯ ಕೂಳಿ ಆಯಿತ್ ಬಂದಿತ್ ತಾಂಗ್ ಉಪದ್ರ ತಕ್ಕೂಂದ್ ರಾಜಂಗ್ ಪೋಡಿ ಆಚಿ. ಇಚ್ಚಕೆ ಅಲ್ಲತೆ ತಾಂಡ ಕೊದಿ ರಾಣಿಕ್ ತಾಂಗ್ ಆಕತವು ಮಾಟ ಮಂತ್ರಮಾಡಿತ್ ಅಂಡ ಪ್ರಭಾವತ್ ಅವಳ ಚಾವನ್ನಕೆ ಮಾಡಿತಿಕ್ಕೂಂದ್ ಅಗ್ಗೇನ ಆಯಿರ್ತ್.

ವೀರರಾಜೇಂದ್ರ ಮಾಟ, ಮಂತ್ರತರ ಮೀದ ತಾಂಗ್ ಇಂಜ ನಂಬಿಕೆನುಂಡ್ ತಾಂಡ ಕೊದಿ ರಾಣಿನ ಚಾವ್ಚಿಟ್ಟಿಯಿಂಗಳೆ ತನ್ನೋ ಚಾವ್ಚಿಟ್ಟಿರೂಂದ್ ಬೊತ್ತಿಯಂಡತ್. ಈ ಪೋಡಿಕ್ ಚೆನ್ನಂಗ್ ಕಾರಣೊ ಇಂಜತ್.

ಅರಮನೆರ ಉಪಯೋಗಕ್ ಕುಡಿಪ ನೀರ್ ನ ಕೋಟೆರ ಎದಿಕೆ ಇಂಜ ಇಳಿಜಾರ್



ಬಲ್‌ತೆ ಬರಿಯತ ಚೆರಿಯ ಕೆರೆಂಜ ಕೊಂಡ ಬಪ್ಪ ಇಂಜತ್. ರಾಜಂಡ ಪೊಣ್ಣ್ ಚಾವಾಂಗ್ ಮುಪ್ಪಡೆ ಒಮ್ಮತೆ ಆ ಕೆರೆಕ್ ದಾರೋ ವಿಷ ಇಟ್ಟಿತಿಂಜತ್. ರಾಜ ಆ ಕರೆರ ನೀರ್ ಕುಡ್‌ಚಿತ್, ನೀರ್‌ಲ್ ಇಂಜ ವಿಷತ್‌ನುಂಡ್ ಚೆನ್ನಂಗ್ ಸಮಯ ಸಂಗಟ ಪಟ್ಟಿದೂ ಇಂಜತ್.

ಈನಗುಂಡ್ ರಾಜ ತಾಂಡ ಅಧಿಕಾರಿಯ ಪಿಳ್ಳಾ ಪಾರಕಾರ ತಾಂಗ್ ಕೆಟ್ಟಾನೆ ಬಯಂದಂಡ್ ಉಂಡ್‌ಂದ್ ನಂಬಿತ್ ಅಯಿಂಗಡ ಕೂಡೆ ಪೇರ್ತ್ ಕರಿಣ ಆಯಿತ್ ಇಪ್ಪ ಕೂಡ್‌ಚಿ. ಅನ್ನನೆ ದಾಡ ಮೀದೇಂಗಿ ಚೆನ್ನ ಅಗ್ಗೇನ ಬಂದ್‌ಟಕ ಮದಿ, ಅನ್ನತಯಿಂಗಳ ಸಿದ್ವಿಯಳುಂಡ್ ಅಕ್ಕಲೆ ಚಾವ್‌ಚಿಡುವ ಇಂಜತ್. ಅನ್ನನೆ ಏದೇಂಗಿ ವ್ಯಕ್ತಿಯಡ ಮೀದ ಚೆಡಿ ಬಂದಕೋ ತಾನೆ ಅಕ್ಕಲೆ ಬೊಡಿಬೆಚ್ಚಿತ್ ಕೊಲ್ಲುವ ಇಂಜತ್! ಇನ್ನನಾಯಿತ್ ಅರಮನೆರ ಅಧಿಕಾರಿಯಕೂ, ಪಾರಕಾರಕೂ ಏದ್ ನೇರತ್ ತಂಗಡ ಪ್ರಾಣ ಪೋಯಿರು ಎಣ್ಣುವ ಪೋಡಿ ಎಕ್ಕೋಲು ಇಪ್ಪ ಇಂಜತ್.

ವೀರರಾಜೇಂದ್ರ ಒಡೆಯಂಗ್ ಕರಣಿಕ ಸುಬ್ಬಯ್ಯಂಡ ಮೀದ ಅವಿಶ್ವಾಸ. ಅರಮನೆ ಪಾರಕಾರ ರಾಜನ ಕೊಲ್ಲುವಕ್ ಮಾಡ್‌ನ ಕೆಣ ವಿಫಲ ಆನಾಂಗ್ ಸಾಮೂಹಿಕ ಕೊಲೆ ಪಿಳ್ಳಾ ಚೆನ್ನಂಗ್ ಅಧಿಕಾರಿಯಡ ಕೊಲೆ. ಈ ಸಮ್ಮಂಧ ರಾಜ ಬ್ರಿಟಿಷ್ ಅಧಿಕಾರಿಯಕ್ ಕಾಗದ ಎಳ್ಳೊನದ್.

1807ನೆ ಇಸವಿರ ಆಖೀರ ಯಾ 1808ನೆ ಇಸವಿರ ಆದಿಲ್ ವೀರ ರಾಜೇಂದ್ರಂಗ್ ತಾಂಡ ಕರಣಿಕ ಸುಬ್ಬಯ್ಯ ತಾಂಡ ವೀದ ಪಿತೂರಿ ನಡ್‌ತಿಯಂಡ್ ಉಂಡ್. ತನ್ನ ಚಾವ್‌ಚಿಟ್ಟಿತ್ ಅಂವಂಡ ಮೋಂವಂಡ ಕೊಡಗರ ಸಿಂಹಾಸನತ್ ಅಳ್‌ಪ್‌ಚಿಡುವಕ್ ಪ್ರಯತ್ನ ಪಟ್ಟಿಂಡ್ ಉಂಡ್‌ಂದ್ ಅಗ್ಗೇನ ಆಯಿರ್‌ತ್.

ಕರಣಿಕ ಸುಬ್ಬಯ್ಯ, ರಾಜಂಡ ಕೊದಿರಾಣಿ ಮಹದೇವಮ್ಮಾಚಿರ ಅಣ್ಣ. ರಾಣಿ ಬದ್‌ಕಿತಿರಣಿ ರಾಜ, ಸುಬ್ಬಯ್ಯನ ಚಾಯಿತೆ ಕಂಡಂಡ್ ಇಂಜತ್. ಸುಬ್ಬಯ್ಯ ರಾಜ್ಯತ್‌ರ

ಪಣಕಾಸಾರ ಉಸ್ತುವಾರಿ ಅಧಿಕಾರಿ, ಅನ್ನನೆ ರಾಜಂಡ ಆಪ್ತಕಾರ್ಯದರ್ಶಿ. ಅವಂಗ್ ರಾಜಂಡ ಅರಮನೆಲೆ ಆಫೀಸ್ ಇಂಜಕ, ದಿವಾನಂಗಕ್ ಕೋಟೆರ ಎದಿಕೆ ಬೋರೆ ಬೋರೆ ಆಫೀಸ್ ಇಂಜತ್.

ರಾಜ್ಯಾಡಳಿತ ರಾಜಂಡ ಸರ್ವಧಿಕಾರಕ್ ಒಳಪಟ್ಟಿತ್ ದಿವಾನಂಗಡ ಕೈಲ್ ಇಂಜತ್. ದಿವಾನಂಗ ಒಬ್ಬಂಗ್ಂಜ ಏರ ಇಂಜನ್ನಕೆ ಕಾಂಬ. ದೊಡ್ಡ ವೀರರಾಜೇಂದ್ರಂಡ ಕಾಲತ್ ಲಕ್ಷ್ಮಣರಾಯ ಎಣ್ಣುವ ವ್ಯಕ್ತಿ ದಿವಾನ ಆಯಿತಿಂಜತ್ಂದ್ ಅರಮನೆರ ರೆಕಾರ್ಡ್‌ಲ್ ಕಂಡ್ ಬಪ್ಪ.

ವೀರರಾಜೇಂದ್ರ ಒಡೆಯಂಗ್ ಕರಣಿಕ ಸುಬ್ಬಯ್ಯಂಡ ಮೀದ ವಿಶ್ವಾಸ ಪಾಳಾಪಕ್ ಸುಬ್ಬಯ್ಯಂಗ್ ಆಕತವು ಎಣ್ಣಾನ ತಕ್ಕಾರ ಮೊಳಿ ಆಯಿತಿಕ್ಕು. ಈಂಡೆಡೆಲ್ ಕರಣಿಕ ಸುಬ್ಬಯ್ಯ, ರಾಜಂಗ್ ಮೈಸೂರ್ಂಜ ಮದ್ಲ ಕೊಂಡ ಬಪ್ಪಚಿಟ್ಟಿತ್. ಇದತ್ ಸುಬ್ಬಯ್ಯ ವಿಷ ಕೊಟಿಕ್ಕೊಂದ್ ರಾಜ ಅಗ್ಗೇನ ಪಟ್ಟಂಡ್ ಸುಬ್ಬಯ್ಯನ ಜೈಲ್‌ಕ್‌ಟ್ಟಿತ್.

ಆಚೇಂಗಿ, ಸುಬ್ಬಯ್ಯಂಗೂ, ಅವಂಡ ಆಪ್ತ ವರ್ಗಕಾರಕೂ, ಪಾರಕಾರಡ ಮೀದ ಪ್ರಭಾವ ಇಂಜಾಂಗ್ ಅವ ಜೈಲ್‌ಂಜ ತಪ್ಪಚಿಟ್ಟಿಂಡ್ ಪೋಚಿ. ಅಕ್ಕ ರಾಜ ಪಾರಕಾರಡ ಮೀದ ಚೆಡ್‌ಂಜಂಡತ್. ಆನಗುಂಡ್ ಸುಬ್ಬಯ್ಯಂಗೂ, ಬೋರೆ ಅಧಿಕಾರಿಯಕೂ, ಪಾರಕಾರಕೂ, ರಾಜಂಗ್ ಇಪ್ಪಚ್ಚಕ್ ಕಾಲ ತಂಗಡ ಬದ್‌ಕ್ ಗ್ಯಾರೆಂಟಿ ಇಲ್ಲೇಂದ್ ತೋಂದ್‌ಚಿ. ಆನಗುಂಡ್ ಇವು ಎಲ್ಲ ತಂಗಡ ಜಿಂಪರಕ್ಷಣೆಕಾಯಿತ್ ಬೋರೆ ಬಟ್ಟೆ ಕಾಂಗತೆ ರಾಜನೆ ಕೊಲ್ಲುವಕ್ ಕೆಣಿ ಮಾಡ್‌ಚಿ!

ಈ ಪೋಲೆ ಒನ್ನಾಂದ್ ರಾಜ ಬುದ್ದಂಡ ನೇರತ್‌ನ ನೋಟಿಯಂಡ್ ಅವಂಡ ಕೋಂಬರೆಕ್ ನುಗ್ಗಿತ್ ಕಡಿಕೆಲೆ ಅವನ ತುಂಡ್ ಮಾಡಿತ್ ಇಟ್ಪಾರುವನ್ನಕೆ ತೀರ್ಮಾನ ಮಾಡ್‌ಚಿ. ಅರಮನೆರ ಪಿಳ್ಳಾ ಕೋಟೆರ ಪಡಿರ ಪಾರಕಾರ ಎಲ್ಲ ಒರೇ ಮನಸ್ಸಕಾರ ಆನಾನುಂಡ್ ವೀರರಾಜೇಂದ್ರಂಡ ಕೊಲೆ ಗ್ಯಾರೆಂಟಿಂಡ್ ಗೇನ ಮಾಡ್‌ಚಿ. ಅಂದ್ ಈ ಕೊಲೆರ ಏರ್ಪಾಡ್‌ಕ್ ಪಾರಕಾರಳಲ್ಲತ ಅಧಿಕಾರಿಯ ದಾರೂ ಇಂಜಾಲೆ. ಅಧಿಕಾರಿಯ ಈ ನೇರತ್ ಕೋಟೆರ ಒಳಲ್ ಇಂಜಾಲೆ.

ಆಚೇಂಗಿ, ಇಞ್ಚಿ ಚೆನ್ನಂಗ್ ಗೆಳೆಗೆಲ್ ಓರ್ ಸೂಚನೆ ಕ್‌ಟ್ಪಾನನ್ನಕೆ ಚಾವಡಿಹಾರ ಎಲ್ಲ ಒಕ್ಕಚೆ ಅರಮನೆರ ಎದಿಕೆ ಕಲ್ಲ ಹಾಸನ್ ಪಟ್ಟಿಕ್ ಕತ್ತಿ ಪುಡ್‌ಚಂಡ್ ಬರೊಂಡೊಂದ್ ಎಣ್ಣುವಕ ದಾರೋ ಈ ಕೆಣಿರ ವಿಷಯತ್‌ನ ರಾಜಂಗ್ ಅರಿಚಿಟ್ಪಾರತ್! ಕೂಡೆನ್ನೆ ಎದ್ದ ರಾಜ ತಾಂಗ್ ಬಂದ ತೊಂದರೆನ ತಪ್ಪಚಿಟ್ಟಿವಕ್ ಕ್ರಮ ಎಡ್‌ತಂಡತ್.

ಅಂವ ಸುಲ್ತಾನಂಡ ಸೈನಿಕಂಗಡ ಕೂಡೆ ಪಡೆ ಪೊತ್ತಂಡಿಪ್ಪಕ ಆನ ಅಪಾಯ ಸಂದರ್ಭತನ ಎದರ್‌ಟ್ಟನ್ನೆ ಇಕ್ಕಲೂ ವಿಶೇಷವಾನ ಮಾನಸಿಕ ಧೈರ್ಯತ್ ಪೋರಾಡ್‌ಚಿ. ಪಂಡ್ ಮೈಸೂರ್‌ಲ್ ಹೈದರಾಲಿ ಬುದ್ದಂಡಿತಿಪ್ಪಕ ಇದೇ ಪೋಲೆ ಅಂವಂಡ ವಿರೋಧಿಯ ಕೊಲ್ಲುವಕ್ ಮಾಡ್‌ನ ಕೆಣಿ ಹೈದರಾಲಿಕ್ ಗೊತ್ತಾಯಿತ್, ಕಡಿಕೆಲೆ ಹೈದರಾಲಿ ಬುದ್ದಂಡನ್ನೆ ಬಟ್ಟೆರ ಕೆಟ್ಟ್ ಬೆಚ್ಚಿತ್ ಕಂಬುಳಿ ಪೊದ್‌ಪ್‌ಚಿಟ್ಟಿತ್ ತಪ್ಪ್‌ಚಿಟ್ಟಂಡತ್‌ಲೊ! ಅನ್ನನೆ ಈ ನೇರತ್ ವೀರರಾಜೇಂದ್ರ ಸಹ ತಾಂಡ ಕಡಿಕೆಲ್ ತಾನ್ ಬುದ್ದಂಡನ್ನೆ ಬಟ್ಟೆನೆಲ್ಲ ಬೆಚ್ಚಿತ್ ಕಂಬುಳಿ ಪೊದ್‌ಪ್‌ಚಿಟ್ಟಿತ್. ಕೂಡೆನ್ನೆ ತಾಂಡ ಅರಮನೆಲ್ ಇಂಜ ಸಿದ್ಧಿಯಳ ಕೂಟಿಯಂಡ್ ಕೋಟೆರ ಪಡಿನ ಮುಚ್ಚುವಕ್ ಅಪ್ಪಣೆ ಮಾಡ್‌ಚಿ.

ಇಚ್ಚಕಾಕಣೆ ಸುಮಾರ್ ಮುನ್ನೂರ್ ಜನ ಪಾರಕಾರ ಕತ್ತಿ ಪುಡ್‌ಚಂಡ್ ಅರಮನೆರ ಪಟ್ಟಿಕ್ ಓಡಿಯಂಡ್ ಬಂದಿತಿಂಜತ್. ಅದತ್ ಚೆನ್ನಂಗಾಳ್ ರಾಜ ಬುದ್ದವ ಕೋಂಬರೆಕ್ ನುಗ್ಗಿತ್ ಬುದ್ದಂಡಲ್ಲಿಯೆ ಅಂವನ ಕೊಂದ್‌ರೊಂಡೂಂದ್ ಒರೇ ಪೋಲೆ ಕಡಿಕೆರ ಮೀದ ಕತ್ತಿಲ್ ಕೆತ್ತ್‌ಚಿ! ಆಚೇಂಗಿ, ಅಲ್ಲಿ ರಾಜಂಡ ಬದಲ್ ಬಟ್ಟೆರ ಕೆಟ್ಟ್ ತುಂಡ್ ಆನಾನ ಕಂಡಿತ್ ಆಶ್ಚರ್ಯ ಪಟ್ಟಿತ್. ರಾಜಂಗ್ ದಾರೋ ಆಖೀರಿ ಗೆಳೆಗಲ್ ಎಚ್ಚರಿಕೆ ಕೊಡ್‌ತಿತ್. ಆನಗುಂಡ್ ರಾಜ ತಪ್ಪ್‌ಚಿಟ್ಟಂಡ್ ಪೋಯಿತ್‌ಂದ್ ಅಯಿಂಗಕ್ ಗೊತ್ತ್‌ಕೊಟ್ಟಿಚಿ.

ರಾಜಂಡ ಕ್ರೂರತ್ವತನ ಅರ್‌ಂಜ ಅವು ಗೇನ ಮಾಡತೆ ಆಯಿಪೋನ ಇನ್ನತ ಓರ್ ಘಟನೆನುಂಡ್ ಇಞ್ಚಿಕ್ಕೂ ಬೊತ್ತಿಯಂಡತ್.

ವೀರರಾಜೇಂದ್ರ ಒಡೆಯ ಕೋಟೆರ ಪಡಿನ ತಾಂಡ ಸಿದ್ಧಿಯಳುಂಡ್ ಮುಚ್ಚಿಟ್ಟಿತಿಂಜತ್. ಆನಗುಂಡ್ ಕೋಟೆರ ಒಳ್‌ಕ್ ಈ ಪಡಿಕಾಲೆ ಬರೊಂಡಿಂಜತ್. ಅರಮನೆ ಪಿಞ್ಣ ಕೋಟೆರ ಪಾರತ್ ಇಂಜ ಚಾವಡಿಕಾರ ರಾಜ ಬುದ್ದಂಡ ಕೋಂಬರೆಲ್ ಇಲ್ಲತಾನ ಕಂಡಿತ್ ಗಾಬರಿಲ್ ಅರಮನೆರ ಪಟ್ಟಿಕ್ ಓಡಿಯಂಡ್ ಬಾತ್. ಅಕ್ಕಣೆಕ್ ರಾಜ ತಾಂಡ ಸಿದ್ಧಿಯಕ್ ಅಲ್ಲಿ ಇಂಜ ಪಾರಕಾರಳೆಲ್ಲ ಕೆತ್ತಿತ್ ಇಡುವನ್ನೆ ಅಪ್ಪಣೆ ಮಾಡಿತಿಂಜತ್. ರಾಜ ತಾಂಡ ಅರಮನೆರ ಕಿಡಿಕೆರ ಬರಿಲ್ ಅಳ್‌ತಂಡ್ ಬೊತ್ತಿಪೋಯಿತಿಂಜ ಪಾರಕಾರಕ್ ತೋಕೆಂಜ ಬೊಡಿ ಪಾರ್‌ಚಿಟ್ಟಿತ್. ಆಚೇಂಗಿ, ಅದ್ ಅಕ್ಕತ ಅರಮನೆಕಿಂಜ ಚೆರಿಯದ್‌ಂದ್ ಕಾಂಬ. ಅರಮನೆರ ಮಾಡಿರ ಕಿಡೆಕೆಂಜ ವೀರರಾಜೇಂದ್ರ ಒಡೆಯ ಬೊಡಿ ಪಾರ್‌ಚಿಟ್ಟಿತ್ ಅಂದ್ 25 ಜನಳ ಕೊಂದೇಂದ್ ಅಂವನೆ ಎಣ್ಣಿಯಂಡತ್. ಬಾಕಿ ಪಾರಕಾರಳ ಸಿದ್ಧಿ ಜನ ತಂಗಡ ಕತ್ತಿಲ್ ಒರೇ ಓರ್ ವ್ಯಕ್ತಿ ಬಾಕಿ ಆಕತನ್ನೆ ಕೆತ್ತಿತ್ ಇಟ್ಟಿತ್. ಬೊತ್ತಿಯಂಡಿಂಜ ಪಾರಕಾರ ತಂಗಡ ರಕ್ಷಣೆಕ್ ಏದೇ ಓರ್ ಪ್ರಯತ್ನ ಮಾಡತೆ ಕೊರಿಯಡನ್ನೆ ಸಿದ್ಧಿಯಳುಂಡ್ ತಂಗಡ ಬದ್‌ಕನ ಆಖೀರಿ ಮಾಡಿಯಂಡತ್‌ಂದ್ ಚರಿತ್ರಕಾರ ಎಳ್ಳಿತ್.

ದೂರತ್ ಕೋಟೆರ ಕಿನಾರತ್‌ಂಜ ಈ ಭಯಂಕರ ದೃಷ್ಟತ್‌ನ ಕಣ್ಣಾರೆ ಕಂಡ ಓರ್ ಕೊಡವ ಜಮೆದಾರ್ "ಆ ನೇರತ್ ಚೋರ್ ಮಳೆರ ದಿನ ನೀರ್ ದುಂಬ್‌ನಪೋಲೆ ಆ ಕಲ್ಲಾ ಹಾಸನ ಅರಮನೆರ ಪಟ್ಟಿಲ್ ಚತ್ತ್‌ಪೋನ ಪಾರಕಾರಡ ಮೇಲ್‌ಂಜ ಚೋರೆ ಪರ್‌ಂಜತ್‌"ಂದ್ ಎಣ್ಣೆತ್. ಸಿದ್ಧಿಯ ಪಾರಕಾರಳ ಕೊಲ್ಲುವಕ ಅಯಿಂಗಡ ಕಾಲ್‌ರ ಅಂಗಾಲ್ ಮುಳುವನ್ನೆಕೆ ಚೋರೆ ಇಂಜತ್‌ಲೊ! ಇನ್ನನೆ ಅಂದೇತ ದಿನ ಪೊಲಾಕ ಮುನ್ನೂರಾಳ್ ಕೊಡಗ್‌ರ ಪಾರಕಾರ ಅರಮನೆರ ಎದಿಕೆ ಚತ್ತ್ ಬುದ್ಧಿತಿಂಜತ್‌ಂದ್ ಆ ಕೊಡವ ಜಮೆದಾರ ಎಣ್ಣೆತ್.

ಆಚೇಂಗಿ, ಅಲ್ಲಿಂಜ ವೀರರಾಜೇಂದ್ರ ಸುಮಾರ್ 800 ಜನಳ ಈ ಕೆಣೆರ ಮಾರೀಪತ್ ಕೊಲ್ಲಾಚಿಟ್ಟತ್ ಎಣ್ಣುವ ಸುದ್ದಿ ಪಬ್ಬಚಿ. ಇದ್ ನೇರ್. ಎನ್ನಂಗಣ್ಣಕ ವೀರರಾಜೇಂದ್ರ ಅರಮನೆರ ಎದಿಕೆ ಸಾಮೂಹಿಕ ಕೊಲೆ ಆನ ಈ ಪಾರಕಾರಡಾತ್ ದಾಡ ಕೈವಾಡ ಇಕ್ಕೊಂದ್ ತಾಂಡ ಗೂಢಚಾರಳುಂಡ್ ಅರ್‌ಂಜಂಡ್ ಅಯಿಂಗಳೊ, ಅಯಿಂಗಡ ಕುಟುಂಬಕಾರಳೊ ಕೊಲ್ಲಾಚಿಟ್ಟತ್. ಕೈಕ್ ಕಟ್ವನ ಅಯಿಂಗಡ ಮನೆರ ಪೊಣ್ಣಾಳಳ ತಾಂಡ ಸಿದ್ಧಿಯಕ್ ದಂಡನೆ ಪೊಣ್ಣಾಯಿತ್ ಕೊಡ್‌ತತ್. ಈ ನೇರತೆ ಕರಣಿಕ ಸುಬ್ಬಯ್ಯ, ಸುಬೇದಾರ್ ಮಂದಣ್ಣ ಪಿಳ್ಳಾ ಬೋರೆ ಮೂಂದ್ ಅಧಿಕಾರಿಯಳ ವೀರರಾಜೇಂದ್ರ ಕೊಲ್ಲಾಚಿಟ್ಟತ್‌ಂದ್ ಪಳೇಯ ಎಳ್ತರ ದಾಖಲೆಲ್ ಉಂಡ್.

ರಾಜನ ಕೊಲ್ಲುವಕ್ ಕೆಣೆ ಮಾಡ್‌ನವು ರಾಜಂಡ ಮೈಂಮ ಸ್ವಾದೆ ಬಸವಲಿಂಗರಾಜಂಡ ಮನೆಕಾಲೆ ಪೋಯಿತಿಂಜತ್. ಆನಗುಂಡ್ ರಾಜಂಗ್ ಈ ಕೆಣೆಲ್ ತಾಂಡ ಮೈಂಮನೂ ಕೂಡಿತ್‌ಂದ್ ಅಗ್ಗೇನ ಬಾತ್. ತಾಂಡ ಮೈಂಮನೂ ಕೊಲ್ಲಾಚಿಡುವಕ್ ನೋಟ್‌ಚಿ. ಅಕ್ಕಣೆ ರಾಜಂಡ ಓರ್ ದಿವಾನ ಲಕ್ಷ್ಮಣರಾಯ ಸ್ವಾದೆ ಬಸವಲಿಂಗರಾಜ ಪೋರ್ಚುಗೀಸಕ್ ಕೊಡ್‌ನ ಗೋವಾ ಪ್ರಾಂತ್ಯಕಾರ ಆಯಿತ್ ಬೋರೆ ರಾಜ್ಯತ್‌ರ ರಾಜಕುಮಾರಾಂದ್ ಅವ ಕೊಡಗ್‌ಕ್ ಬಂದದ್ ಇಂಗ್ಲೀಷ್‌ಕಾರಳೆ ಪೋರ್ಚುಗೀಸಕ್ ಗೋವಾ ಗವರ್ನರ್‌ಕ್ ಎಳ್ಳಿತ್ ಒಪ್ಪಿಗೆ ಪಡ್‌ಂದಾಂಗ್ ಬಸವಲಿಂಗರಾಜನ ಕೊಂದ್‌ಟಕ ಇಂಗ್ಲೀಷ್‌ಕಾರ ಚೆಡ್‌ಂಜವಾಂದ್ ರಾಜಂಡಲ್ಲಿ ಎಣ್ಣೆಕೊಡ್‌ತತ್. ಈನಗುಂಡ್ ಸ್ವಾದೆ ಬಸವಲಿಂಗರಾಜ ಬದ್‌ಕ್‌ಚಿ. ಆಚೇಂಗೂ, ಚೆನ್ನ ಸಮಯಕ್ಕೆತ್ತನೆ ವೀರರಾಜೇಂದ್ರ ತಾಂಡ ಮೈಂಮನ ದೂರತೆ ಚೆಚ್ಚಿತಿಂಜತ್.

ಕೊಡಿಲ್ ಎಣ್ಣೆನ ಅರಮನೆರ ಎದಿಕೆರ ಸಾಮೂಹಿಕ ಕೊಲೆ 1807ನೆ ಆಖೀರಿ / 1808ಂಡ ಆದಿಲ್ ನಡ್‌ಂದನ್ನೆಕೆ ಕಾಂಬ.ಇದಾಯಿತ್ ರಾಜ ಬಂಗಾಳ ಗ.ಜನರಲ್ ಪಿಳ್ಳಾ ಚೆನ್ನೈ ಗವರ್ನರ್‌ಕ್ ತನ್ನ ಕೊಲ್ಲುವಕ್ ಮಾಡ್‌ನ ಕೆಣೆರ ವಿಷಯತ್‌ನೆಲ್ಲ ಕಾಗದತ್‌ಎಳ್ಳಿತ್ ಅಯೆಚತ್.

ಈ ವಿಷಯತನ ಚೆನ್ನೈ ಗವರ್ನರ್ ಅಚ್ಚಕ್ ನಂಬಾಲೆ. ಎನ್ನಂಗೇಣ್ಣಕ ವೀರರಾಜೇಂದ್ರಂಡ ಚೆಡಿನ ಅವು ಚಾಯಿತೆ ಅರಂಜಿತಿಂಜತ್. ಆನಗುಂಡ್ ರಾಜನೆ ತಾಂಡ ಚೆಡಿಲ್ ಪಾರಕಾರಳ ಕೆತ್ತಿತ್‌ಚ್ಚಿತ್‌ಂದ್ ಗೇನ ಮಾಡ್‌ಚಿ. ಆಚೇಂಗಿ, ಬಂಗಾಳಕಾರ ಮಾತ್ರ ಈ ವಿಷಯತ್ ತಂಗಕ್ ಸೆರಿಯಾನ ವಿವರ ಅರಿಯತಾಂಗ್ ಮುಂಡತೆ ಕೂಡಿರ್‌ತ್.

### ಅಪ್ಪಾಜಿರಾಜಂಡ ಕೊಲೆ, ಲಿಂಗರಾಜೇಂದ್ರ ಬಚಾವ್

1808ನ ಇಸವಿಲ್ ವೀರರಾಜೇಂದ್ರ ಒಡೆಯಂಗ್ ಗೆಡಿ ಗೆಡಿ ಬುದ್ದಿಲ್ ವ್ಯತ್ಯಾಸ ಆಯಂಡಿಂಜತ್. ಅನ್ನನಾಯಿತ್ ಅವಂಡ ಬುದ್ದಿ ಪಾಳಾಪಕ ಸುಮಾರ್ ಜನ ಚತ್ತತ್. ಇದೇ ಕಾಲ ಅಕ್ಟೋಬರ್‌ಲ್ ರಾಜಂಗ್ ತಾನ್ ಬೆರಿಯ ಚತ್ತಪೋಪಿಂದ್ ತೋಂದ್‌ಚಿ.

ಅಕ್ಕ ಅವಂಡ ಮನಸ್ಸಲ್ ಗ.ಜನರಲ್ ತಾನ್ ಅವಂಗ್ ಎಳ್ಳಿತ್ ಅಯೆಚಿ ಸ್ವಂತ ಒಪ್ಪಂದತ್‌ರ ಪೋಲೆ ಪೆರಿಯ ಮೋವ ಸಿಂಹಾಸನತ್‌ರ ಅಧಿಕಾರ ಒತ್ತವಾಂಗ್ ಮುಪ್ಪಡೆ ಚತ್ತ ಪೋನಕ, ಅವಡ ಉತ್ತರಾಧಿಕಾರಕೂ, ಅವಡ ಜಿಂವಕೂ ತೊಂದರೆ ಆಕೂಂದ್ ಬೊತ್ತಿಯಂಡತ್. ಅವಡ ಬೇಚಾರ ದುಂಬ್‌ನ ಮನಸ್ಸನುಂಡ್ ರಾಜಂಗ್ ಚಾವು ಬೆರಿಯಂದ್ ತೋಂದುವಕೂಡ್‌ಚಿ.

ಆನಗುಂಡ್ ರಾಜ ತಾನ್ ಕೊಡಗಲ್ ಜಿಂವತೆ ಉಳ್ಳ. ಎಲ್ಲ ಅಧಿಕಾರ ಉಂಡ್. ಆನಗುಂಡ್ ತಾಂಡ ಕೊದಿರ ಮೋವ ದೇವಮ್ಮಾಜಿ ಪಿಳ್ಳಾ ಅವಡ ತಂಗೆಯಳ ತಾಂಡ ಸೋದರಂಗಳುಂಡ್ ರಕ್ಷಣೆ ಮಾಡೊಂಡೂಂದ್ ತೀರ್ಮಾನ ಮಾಡಿತ್ ಕೊಲೆಗಾರಳ ಕಾಕ್‌ಚಿಟ್ಟಿತ್. ಅದತ್ ಓರ್ ಗುಂಪ್‌ನ ಅಪ್ಪಂಗಳ ಅರಮನೆಕ್, ಇನ್ನೊಂದಾನ ಹಾಲೇರಿ ಅರಮನೆಕ್ ಅಯೆಚಿತ್ ಅಪ್ಪಾಜಿ ರಾಜ ಪಿಳ್ಳಾ ಲಿಂಗರಾಜಂಡ ಮಂಡೆನ ಕೆತ್ತಿತ್ ಕೊಂಡಬಪ್ಪಕ್ ಆಜ್ಜೆ ಮಾಡ್‌ಚಿ.

ಕೊಲೆಗಾರ, ರಾಜಂಡ ಕಾಲ್‌ಕ್ ಬುದ್ದಿತ್, ನಮಸ್ಕಾರ ಮಾಡಿತ್ ತಂಗಕ್ ಒಪ್ಪಿಚಿಟ್ಟಿ ಕೊಲೆ ಕೆಲಸ ಮಾಡುವಕ್ ಪೊರ್‌ಟತ್. ಈ ನೇರತ್ ರಾಜ ತಾಂಡ ಕೋಂಬರೆಲ್ ಒಬ್ಬನೆ ಇಂಜಾನುಂಡ್ ಅವಂಡ ಮನಸ್ಸಲ್ ಪುಚ್ಚಿ ಪುಡ್‌ಚನ್ನಕೆ ಆಯಿತ್ ಏದೇದೋ ಗೇನ ಬಪ್ಪ ಕೂಡ್‌ಚಿ.

ತಮ್ಮಣ ಚತ್ತಪಿಳ್ಳಾ ತಾಂಡ ಪ್ರೀತಿರ ಮಕ್ಕ ಚಾಯಿತೆ ಇಪ್ಪ. ಅಯಿಂಗಕ್ ತೊಂದರೆ ಕೊಡಪಕ್ ದಾರೂ ಜಿಂವತ್ ಇಪ್ಪಲೆ. ಗ. ಜನರಲ್ ಸರ್ಕಾರತರ ನಿಷ್ಠಾವಂತ ಸಿನೇತಂಡ ಆಖೀರಿ ಮರಣ ಶಾಸನಕ್ ಒಪ್ಪಿಗೆ ತಪ್ಪ. ತಾಂಡ ಮೋವ ದೇವಮ್ಮಾಜಿ ಇಕ್ಕೇರಿ ಸಂಸ್ಥಾನತ್ ಪಂಡೇ ರಾಣಿ ಚೆನ್ನಮ್ಮಾಜಿ ಸಿಂಹಾಸನತ್ ಅಳತನ್ನೆ ಕೊಡಗರ ಸಿಂಹಾಸನತ್ ಅಳಪ. ಅವಕ್ ಓರ್ ಕಣ್ಣುಕುಳ್ಳಾ ಪುಟ್ಟುವ. ಅವ ತಾಂಡ ತಾತಂಡ ಪೆದತನ ಬೆಚ್ಚಂಡ್ ಅವಂಡ ಸಂಪತ್ತ್ ಪಿಳ್ಳಾ ಕೇಳಿ ಕೀರ್ತಿಕ್ ಹಕ್ಕಾದಾರ ಆಪ...

ಇನ್ನತ ಗೇನ ಎಲ್ಲ ವೀರರಾಜೇಂದ್ರಂಡ ಮಂಡಲ್ ತಾಂಡ ತಮ್ಮಣಂಗಳ ಚಾವ್ಚಿಡುವಕ್ ಕೊಲೆಗಾರಳ ಅಯೆಚಪಿಳ್ಳಾ ಪಾಂಜತ್. ಆಚೇಂಗಿ, ಕೊಲೆಗಾರಂಗ ಅರಮನೆಂಜ ಪೊರಟ ಓರ್ ಗಂಟೆರ ಒಳ್ಳಲ್ ಅವಂಡ ಮನಸ್ಸರ ಪುಚ್ಚಿ ಇಳಂಜತ್. ಮಾನವೀಯತೆರ ನ್ಯಾಯ ಬುದ್ಧಿ ಅವಂಡ ಮನಸ್ಸಲ್ ದುಂಬ್ಚಿ.

ಕೂಡೆನ್ನೆ ವೀರರಾಜೇಂದ್ರ ತಾಂಡ ತಮ್ಮಣಂಗಳ ಕೊಲ್ಲೊಂಡೂಂದ್ ಮಾಡ್ನ ಆಚ್ಚೆನ ವಾಪಾಸ್ ಎಡ್ತಂಡ್ ಅಯಿಂಗಳ ಕೊಲ್ಲುವಕ್ ಕಯ್ಯಾಂದ್ ಕೊಲೆಗಾರಕ್ ಅರಿಚಿಡುವಕ್ ತಾಂಡ ಜನಳ ಅಪ್ಪಂಗಳ ಪಿಳ್ಳಾ ಹಾಲೇರಿ ಅರಮನೆಕ್ ಓಡ್ಚಿಟ್ಟತ್. ಅವು ತಂಗಡ ಜಿಂವತ್ನ ಕೂಟಾಕತೆ ಓಡಿ ಪೋಯಿತ್ ತಂಗಡ ಕಾರ್ಬಾರ್ ಮಾಡೊಂಡೂಂದ್ ಅಯಿಂಗಕ್ ಅಪ್ಪಣೆ ಮಾಡ್ಚಿ.

ಆಚೇಂಗಿ, ದುರಾದೃಷ್ಟವಶಾತ್ ಅಪ್ಪಂಗಳಕ್ ಓಡಿಪೋನ ಜನಕ್ ಬಟ್ಟೆಲ್ ಕೊಲೆಗಾರ ಅಪ್ಪಾಜಿ ರಾಜಂಡ ಮಂಡೆನ ಓರ್ ತಟ್ಟೆಲ್ ಬೆಚ್ಚಂಡ್ ಬಂದಂದುಳ್ಳದ್ ಕಂಡತ್! ಹಾಲೇರಿ, ಮಡಿಕೇರಿಂಜ ಅಪ್ಪಂಗಳಕಿಂಜ ದೂರ ಆನಾನುಂಡ್, ಕೊಲೆಗಾರ ಹಾಲೇರಿ ಎತ್ತುವಕ್ ಲಿಂಗರಾಜ ಅರಮನೆಲ್ ಇಲ್ಲತಾನುಂಡ್ ಲಿಂಗರಾಜಂಡ ಪ್ರಾಣ ಉಳಂಜತ್.

ಎನ್ನಂಗಣ್ಣ ಕ ಅವನ ಕೊಲೆಗಾರ ಕಂಡ್ಪುಡಿಪಾಂಡ ಒಳ್ಳಲ್ ಅವನ ಕೊಲ್ಲುವಕ್ ಕಯ್ಯಾಂದ್ ಆಚ್ಚೆ ಕೊಂಡ ಬಂದ ಸೇವಕಂಗ ಹಾಲೇರಿ ಎತ್ತಿರ್ತಂಜತ್. ಬಹುಶಃ ವೀರ ರಾಜೇಂದ್ರ ಒಡೆಯ ಕೊಲೆಗಾರನ ಹಾಲೇರಿಕ್ ಅಯೆಪಾಂಗ್ ಮುಪ್ಪಡೆ ಅವ, ಓರ್ ತರಾ ಇಂಜದ್ ಪಿಳ್ಳಾ ಆಂಡ ಮಿಳ್ಳಾತ ಪರಿಣಾಮತ್ನ ಅರ್ಂಜ ಲಿಂಗ ರಾಜಂಡ ಹಿತಚಿಂತಕಂಗ ದಾರೋ ಲಿಂಗರಾಜಂಗ್ ಕೊಲೆಗಾರ ಹಾಲೇರಿಕ್ ಎತ್ತುವಾಂಗ್ ಮುಪ್ಪಡೆ ಎಚ್ಚರಿಕೆ ಕೊಡ್ತಿತ್ತಿಕ್ಕು. ಆನಗುಂಡ್ ಲಿಂಗರಾಜ ಕೊಲೆರ ಆಚ್ಚೆಲ್ ಬಚಾವಾಚಿ.

ಅಪ್ಪಂಗಳಕ್ ಪೋಯಿತಿಂಜ ಕೊಲೆಗಾರಂಗ ಅಪ್ಪಾಜಿರಾಜಂಡ ಮಂಡೆನ ತಟ್ಟೆಲ್ ಬೆಚ್ಚಂಡ್ ಬಂದಿತ್ ವೀರರಾಜೇಂದ್ರಂಡ ಎದಿಕೆ ಬೆಚ್ಚತ್. ಅಯಿಂಗಕ್ ಈಂಡೆಡೆಲ್ ರಾಜ ತಾಂಡ ಮನಸ್ ಬದಲ್ ಮಾಡಿತ್ ಕೊಲೆ ಮಾಡತನ್ನೆ ಎಣ್ಣುವಕ್ ಸೇವಕಂಗಳ



ಅಯೆಚಿಕೊ, ರಾಜಂಡ ಅಪ್ಪಣೆಕ್ ವಿರೋಧ ಆಯಿತ್ ನಡಂದವ ಧೈರ್ಯ ಇಂಜಾಲೆ.

ಅಪ್ಪಾಜಿರಾಜಂಡ ಮಂಡೆನ ತಾಂಡ ಎದಿಕೆ ಬೆಚ್ಚಾನ ಕಂಡಿತ್ ವೀರರಾಜೇಂದ್ರಂಗ್ ತೆತ್ ಬಡ್ಚೆನ್ನೆ ಆಚಿ. ಆಚೇಂಗಿ, ಚತ್ತಂವನ ಬದ್‌ಚೆಡುವ ಕಯ್ಯಲೆಲ್ಲ ?! ಮಾಡ್‌ನ ಕೆಟ್ಟ ಕಾರ್ಬಾರ್‌ನ ಸೆರಿ ಮಾಡುವಕೂ ಕಯ್ಯಲೆ. ಆನಗುಂಡ್ ವೀರರಾಜೇಂದ್ರ ಬೇಜಾರ ಪಟ್ಟಂಡ್, ಅಪ್ಪಾಜಿರಾಜಂಡ ಆಸ್ತಿನ ತಮ್ಮಣ ಲಿಂಗರಾಜಂಗ್ ವಹಿಸಿತ್ ಅಂವಂಡ ಪೊಣ್ಣ್, ಮಕ್ಕಡ ಜವಾಬ್ದಾರಿನೊ ಲಿಂಗರಾಜಂಗ್ ವಹಿಸ್‌ಚಿ.

ಲಿಂಗರಾಜಂಗ್ ಹಾಲೇರಿ ಜಹಗೀರ್‌ಲ್ ಕಾಲಕ್ 200 ಕಂಠೀರಾಯ ವರಹತ್‌ರಚ್ಚಕ್ ಉತ್ಪತ್ತಿ ಇಂಜತ್. ಈಂಡ ಕೂಟ್‌ಕ್ ಅಂವ ಅಪ್ಪಾಜಿ ರಾಜಂಡ 600 ಕಂಠೀರಾಯ ವರಹ ಉತ್ಪತ್ತಿರ ಅಪ್ಪಂಗಳ ಜಹಗೀರ್‌ನೊ ಕೊಡ್‌ತತ್. ಆಚೇಂಗೂ, ಲಿಂಗರಾಜ ಕೈಂಜ ಪತ್ತ್ ಕಾಲತ್ ಹಾಲೇರಿಲ್ ರೈತ ಆಯಿತಿಂಜ ಪಿಳ್ಳಾ ಅಲ್ಲಿಂಜೊ ಅದೇಪೋಲೆ ತಾಂಡ ಜಹಗೀರ್‌ಲೆ ಇಂಜತ್. ಆನಗುಂಡ್ ವೀರರಾಜೇಂದ್ರ ಒಡೆಯ, ಲಿಂಗರಾಜನ ದಡ್ಡ ಪಿಳ್ಳಾ ಪ್ರಯೋಜನಕಿಲ್ಲತ ರೈತಂದ್ ಕಮ್ಮಿ ತರತ್ ಕಾಂಬ ಇಂಜತ್. ಆನಗುಂಡೆ ಲಿಂಗರಾಜಂಡ ಜಿಂವಕ್ ತೊಂದರೆ ಆಯಿಲೆಂದ್ ಎಣ್ಣೊಲು.

1809ನೆ ಇಸವಿರ ಸುರೂಲ್ ಮೈಸೂರ್ ರೆಸಿಡೆಂಟ್ ಆಯಿತಿಂಜ ಕೋಲ್ ಸಾಹೇಬಂಗ್ ವೀರರಾಜೇಂದ್ರ ಒಡೆಯಂಡ ಮಾನಸಿಕ ಸ್ಥಿತಿ ಚೆನ್ನ ಪಾಳಾಯಿತ್, ಅಂವಂಡ ಕಾಯಿಲ ವಾಸಿ ಮಾಡುವಕ್ ಓರ್ ಬ್ರಿಟಿಷ್ ವೈದ್ಯನ ಅಯೆಚಿ ತರೊಂಡುಂದ್ ಮಡಿಕೇರಿಂಜ ಓರ್ ಕಾಗದ ಎತ್ತ್‌ಚಿ.

ಕೂಡೆನ್ನೆ ಸಾಹೇಬ ಡಾ. ಇಂಗಲ್‌ಡ್ಲೊ ಎಣ್ಣುವಂವನ ರಾಜಂಡ ಪಕ್ಕ ಅಯೆಚಿಕೊಡ್‌ತತ್. ಡಾಕ್ಟರ್, ರಾಜ ಪೇರ್ತ್ ಅಪಾಯ ಸ್ಥಿತಿಲ್ ಉಳ್ಳಾನ ಕಂಡತ್. ರಾಜಂಗ್ ಓರಮ್ಮತೆ ಪುಚ್ಚಿ ಪುಡಿಪ ಇಂಜತ್. ಪುಚ್ಚಿ ಇಳ್‌ಂಜಪಿಳ್ಳಾ ಅಂವಂಡ ಮನಸ್ಸಲ್ ಓರ್ ತರಾ ಕಿರಿಕಿರಿ ಆಪ ಇಂಜತ್. ಮಡಿಕೇರಿಕ್ ಡಾಕ್ಟರ್ ಬಂದದ್ ರಾಜಂಗ್ ಚೆನ್ನ ಸಮಧಾನ ಕೊಡ್‌ತತ್. ರಾಜಂಗ್ ತಾಂಡ ಬೆಂದು, ಚೆಜ್ಜಾದಿಯದ ಮೀದ ನಂಬಿಕೆ ಇಂಜಾಲೆ. ಇಕ್ಕ ತಾನ್ ನಂಬುವಕುಳ್ಳ ಬ್ರಿಟಿಷ್ ವೈಕ್ತಿ ಒಬ್ಬ ತಾಂಡ ಪಕ್ಕ ಉಂಡಲ್ಲಂದ್ ಅಂವಂಗ್ ಸಮಧಾನ ಆಚಿ.

ಆಚೇಂಗೂ, ರಾಜಂಗ್ ತಾನ್ ಪತ್ತ್ ಕಾಲಕ್ ಬಯ್ಯ ಪಿಳ್ಳಾ ಅಕ್ಕಾಕಣೆಕ್ ಮಾಡ್‌ನ ಪಿಳ್ಳಾ ಮಾಡ್‌ಚಿಟ್ಟ ಕೆಟ್ಟ ಕಾರ್ಬಾರ್‌ರ ಸುದ್ದಿರ ಮೀದ, ಅಂವಂಡ ರಾಜ್ಯತ್‌ರ ಅಕ್ಕತ ಪರಿಸ್ಥಿತಿ ಡಾಕ್ಟರ್ ಅರ್‌ಂಜಿರುವ ಎಣ್ಣುವ ಪೋಡಿ ಸುರುವಾಪ ಕೊಡ್‌ಚಿ. ರಾಜಂಗ್, ಬ್ರಿಟಿಷಡ ದೃಷ್ಟಿಲ್ ತಾಂಡ ಮೀದೇತ ಗೌರವ ಕಮ್ಮಿ ಆಪ ಕಯ್ಯಾಂದ್ ಇಂಜತ್.



ಇನ್ನನಿಪ್ಪಕ ಡಾ.ಇಂಗಲ್ ಡ್ಯೂ ಕಂಪೆನಿ ಸರ್ಕಾರಕ್ ಕೊಡಗಲ್ ತನ್ನಂಡ್ ನಡಂದ ಕೆಟ್ಟ ಕಾರ್ಬಾರ್ ಸುದ್ದಿನ ಅರಿಚಿಟ್ಟು ಆನಗುಂಡ್ ತಾಂಡ ಗೌರವ ಪಾಳಾಪದೆ ಅಲ್ಲತೆ, ತಾಂಡ ಕೇಳಿ ಕೀರ್ತಿಕ್ ತೊಂದರೆ ಆಯಿ ಪೋಕೊಂದ್ ಬೊತ್ತಿಯಂಡತ್. ಆನಗುಂಡ್ ಡಾಕ್ಟರ್‌ಕ್ ಕೊಡಗಲ್ ನಡಂದ ಘಟನೆರ ಮೀದ ಏದೋರ್ ವಿಷಯ ಗೊತ್ತಾಕತನ್ನಕ್ ಆಪಚ್ಚಕ್ ಎಚ್ಚರತರ ಕ್ರಮ ಎಡ್ತಂಡತ್.

ಆಚೇಂಗಿ, ಆ ಕಾಲ ಎಣ್ಣಕ 1809ನೆ ಇಸವಿ ಫೆಬ್ರವರಿಲ್ ಅವಂಡ ಮಂಡ ಪಾಳಾಯಿರ್‌ತ್. ಅಕ್ಕ ತಾಂಡ ಅಧಿಕಾರಿಯಳ ಅಗ್ಗೇನಪಟ್ಟಂಡತ್.

ಇನ್ನನಿಪ್ಪಕ ಒನ್ನಾಂಡ್ ಅವಂಡ ಅಗ್ಗೇನತರ ಚೆಡಿ ಅವಂಡ ಮುಖ್ಯ ಅಧಿಕಾರಿಯಡಾತ್ ನಾಲ್ ಜನಡ ಮೀದ ಬುದ್ದತ್. ಅಯಿಂಗಳ ಕೊಲೆ ಮಾಡೊಂಡೊಂದ್ ತಾಂಡ ಜನಕ್ ಆಚ್ಚೆ ಮಾಡ್‌ಚಿ. ಕೂಡೆನ್ನೆ ಕೊಲೆಗಾರಂಗ ಪೋಯಿತ್ ಆ ನಾಲಾಳರ ಮಂಡ ಕೆತ್ತ್‌ಚಿ. ಪಿತ್ತಾಂದ್ ರಾಜಂಡ ಪುಚ್ಚಿ ಇಳ್ಳಂಜಪಿಲ್ಲಾ ಆ ನಾಲ್ ಅಧಿಕಾರಿಯಡಾತ್ ಒಬ್ಬನ ತಾಂಡ ಪಕ್ಕ ಬಪ್ಪಕ್ ಎಣ್ಣೆತ್ ಅಯೆಚತ್. ಆಚೇಂಗಿ, ಅಕ್ಕ "ಆ ಅಧಿಕಾರಿ ಚಿತ್ತಪೋಚಿ"ಂದ್ ರಾಜಂಡ ಪರಿಚಾರಕಂಗ ಎಣ್ಣೆಚಿ!

ಅಂದಕ ಬಾಕಿ ಮೂಂದಾಳನ ಕಾಕಿಂದ್ ಎಣ್ಣವಕ, ಪರಿಚಾರಕಂಗ ಬೊತ್ತಿತ್, ಗ್‌ಡ್‌ತಂಡ್ "ಆ ನಾಲ್ ಅಧಿಕಾರಿಯಳೂ ರಾಜಂಡ ಅಪ್ಪಣೆ ಪೋಲೆ ಚಿತ್ತ ಪೋನಪು"ಂದ್ ಎಣ್ಣೆಚಿ. ಈ ತಕ್ಕನ ಕೇಟ ರಾಜಂಗ್ ತಾಂಡ ಮನಸ್ಸಲೆ ಬೇಚಾರ, ನೊಂಬಲ ಕೂಟ್‌ಕ್ ತಾಂಡ ಮೀದ ಬುಡ್‌ಂಜಿ ಪೋನನ್ನೆ ಆಚಿ. ಆ ನೊಂಬಲತನ ಅವ ತಾಂಡ ರಟ್ಟೆನ ಕಡ್‌ಚಂಡ್ ಚೋರೆ ಒಕ್ಕುವನ್ನೆ ಮಾಡಿಯಂಡತ್! ಅನ್ನೆ ತನ್ನ ದಾರೂ ನೋಟುವಕಾಗಂದ್ ಬಯಂದಂಡ್ ಉಂಬಕೂ ಪೋಯಿಲೆ. ತಾನ್ ಇಣ್ಣಿ ಬದ್‌ಕಿತ್ ಇಪ್ಪಕ್ ಯೋಗ್ಯತೆ ಇಲ್ಲೆ, ಚಾವದೇ ನಲ್ಲದ್‌ಂದ್ ತೀರ್ಮಾನ ಮಾಡ್‌ಚಿ.

ಡಾ.ಇಂಗಲ್‌ಡ್ಯೂ ಮಡಿಕೇರಿಕ್ ಬಪ್ಪಾಂಗ್ ಮುಪ್ಪಡೆ ರಾಜ ಬುದ್ದಿತ್ ಅವಂಡ ನಿಪ್ಪು ಕುಟ್ಟ್ ಬುಟ್ಟ್ ಪೋಯಿತಿಂಜತ್. ಅದ್‌ನ ಸೆರಿ ಪಡ್‌ತುವಕ್ ರಾಜಂಡ ಪಕ್ಕ ಇಂಜ ಹಕೀಮ ಪ್ರಯತ್ನ ಪಟ್ಟಕೊ ಸೆರಿ ಆಯಿತಿಂಜಲೆ. ಕೂಟ್‌ಕ್ ಇಕ್ಕ ರಟ್ಟೆನೆ ತಾನ್ ಕಡ್‌ಚಂಡಾಂಗ್ ಆನ ನೊಂಬಲತನುಂಡ್ ರಾಜಂಗ್ ನೆಮ್ಮದಿ ಇಂಜಲೆ. ಅವಂಗ್ ತಾಂಡ ತಡೆರ ನೊಂಬಲಕಂಜ, ತಾನ್ ಮಾಡ್‌ಚಿಟ್ಟ ಕೊಲೆರ ಸುದ್ದಿ ಕಂಪೆನಿ ಸರ್ಕಾರಕ್ ಗೊತ್ತಾಯಿತ್ ತಾಂಗ್ ಗೌರವ ಕಮ್ಮಿ ಆಯಿರುವ ಎಣ್ಣವ ಬೇರ ಅಧಿಯಾಚಿ.

ಕೂಟ್‌ಕ್ ಇಕ್ಕಾಯಿತ್ ಕೊಲ್ಲೆಚಿಟ್ಟ ನಾಲ್ ಅಧಿಕಾರಿಯಡ ವಿಷಯತನ ಡಾ.ಇಂಗಲ್ ಡ್ಯೂ ಎಣ್ಣತೆ ಇಪ್ಪಲೆ. ಅವ ಕಂಪೆನಿ ಸಾಹೇಬಂಗ್ ಎಳ್ಳಿತ್ ಅರಿಚಿಡುವ.



ಕೋಲ್ ಸಾಹೇಬ ಗ.ಜನರಲ್‌ಕ್ ಎಣ್ಣುವ. ಈನಗುಂಡ್ ಕಂಪೆನಿ ಸರ್ಕಾರತ್‌ರ ದೃಷ್ಟಿಲ್ ತಾಂಗ್ ಅವಮಾನ ಆಪದ್ ನೇರ್ ಎಣ್ಣುವ ವರೀಸ್ ದಿನತ್‌ಂಜ ದಿನಕ್ ರಾಜಂಡ ಮಂಡೆನ ತಿಂದಂಡ್ ಇಂಜತ್.

ಇಕ್ಕ ಅಂವಂಗ್ ತಾನ್ ಮಾಡ್‌ಚಿಟ್ಟ ಕೊಲೆ ತಾಂಗ್ ಬುದ್ಧಿ ಪಾಳಾಯಿತಿಪ್ಪಕ ಆನದ್. ತಾಂಗ್ ಬದ್‌ಕ್ ಬುಡ್‌ಂಜಿ ಪೋಯಿತ್‌ಂದ್ ಬ್ರಿಟಿಷ್ ಅಧಿಕಾರಿಯಕ್ ಅರ್ಥ ಆನಕ ಅವು ನಾಕ್ ಕ್ಷಮೆ ತಪ್ಪಂದ್ ಗೇನ ಮಾಡ್‌ಚಿ.

ಇನ್ನತ ಗೇನತ್ ಇಪ್ಪಕ ರಾಜ ಒನ್ನಾಂದ್ ತಾಂಡ ಬೋಳೆನ ಚೌರ ಕತ್ತಿಲ್ ಮುರಚಂಡ್ ಗಾಯ ಮಾಡಿಯಂಡತ್. ಅಕ್ಕಣೆಕ್ ಡಾಕ್ಟರ್ ರಾಜಂಡ ಬೋಳೆಕ್ ಮದ್ದ್ ಇಟ್ಟಿತ್ ಚೋರೆ ಬಪ್ಪಾನ ತಡ್‌ತತ್. ಬೋಳೆರ ಸುತ್ತೂ ಬಟ್ಟೆ ಕೆಟ್‌ಚಿ. ಅನ್ನನೆ ರಾಜನ ಎನ್ನಂಗ್ ಚಾವಕ್ ಪ್ರಯತ್ನ ಪಟ್ಟಿಯೆಂದ್ ಕೇಪಕ, ರಾಜ ತಾಂಡ ಮನಸ್ಸಲ್ ಇಂಜಾನ ಎಣ್ಣಿಯಂಡತ್.

ಅದ್‌ಂಗ್ ಡಾಕ್ಟರ್, ಕಂಪೆನಿ ಸರ್ಕಾರ ನಿಂಗಳ ತಪ್ಪಾಯಿತ್ ಗೇನ ಮಾಡುಲೆ. ನಿಂಗಡ ಮನಸ್ಸ ಪಾಳಾಯಿತಿಪ್ಪಕ ಅನ್ನತ ಕಾರ್ಬಾರ್ ಮಾಡ್‌ಚಿಟ್ಟತ್‌ಂದ್ ಅವು ಅರ್‌ಂಜವಂದ್ ಎಣ್ಣಿತ್ ರಾಜಂಡ ಮನಸ್ಸಲ್ ಧೈರ್ಯ ದುಂಬ್‌ಚಿಡುವ ಪ್ರಯತ್ನ ಮಾಡ್‌ಚಿ.

ಆಚೀಂಗಿ, ರಾಜಂಗ್ ತಾನ್ ಇಕ್ಕಾಕಣೆ ಮಾಡ್‌ಚಿಟ್ಟ ಕೊಲೆನ ಗೇನ ಮಾಡುವಕ ಸಮಧಾನ ಆಪ ಇಂಚ್‌ಲೆ. ಆನಗುಂಡ್ ಅಂವ ತಾಂಡ ಪ್ರಾಣ ಕಳಂದವಕ್ ನೋಟ್‌ಚಿ. ಡಾಕ್ಟರ್ ಗಾಯ ಕತ್ತುವಕ್ ಕೊಡ್‌ತ ಮದ್ದ್‌ನ ನೀರ್‌ಲ್ ಕಲೆಕಿತ್ ಕುಡಿಪಕ್ ನೋಟ್‌ಚಿ. ಅದ್ ವಿಷ ವಸ್ತು. ಅಂವ ತಾಂಡ ಪೆರಿಯ ಮೋವ ದೇವಮ್ಮಾಚಿನ ಕಾಕಿತ್ ಅವಡ ಕೂಡೆ ತಾಂಡ ಜಿಂವ ಕಳಂದವ ಮದ್ದ್ ತಪ್ಪನ್ನಕೆ ಕೇಟತ್.

ಒಯಿಂಬದ್ ಬಯತ್‌ರ ಒಂದೂ ಗೊತ್ತಿಲ್ಲತ ಆ ಮೂಡಿಕುಳ್ಳಾಕ್ ತಾನ್ ಅಪ್ಪಂಗ್ ಕೊಡ್‌ತಂಡ್ ಉಳ್ಳದ್ ವಿಷ ಎಣ್ಣುವದ್ ಎನ್ನನೆ ಗೊತ್ತ್? ರಾಜ ಗಾಯ ಕತ್ತುವ ವಿಷ ನೀರ್‌ನ ಕುಡ್‌ಚಿತ್‌ಂದ್ ಗೊತ್ತಾನದೆ ಡಾಕ್ಟರ್ ವಾಂತಿಯಾಪಕ್ ಮದ್ದ್ ಕೊಡ್‌ತತ್. ಡಾಕ್ಟರ್‌ಕೂ ರಾಜಂಡ ಜಿಂವ ಉಳಿವಾಂದ್ ನಂಬಿಕೆ ಇಂಚ್‌ಲೆ. ಆಚೀಂಗಿ, ಅದೃಷ್ಟತ್ ರಾಜಂಗ್ ಚಾಯಾಚಿ. ಡಾ. ಇಂಗಲೊಡ್ಲು ಎಕ್ಕೋಲು ಮೈಸೂರ್ ರೆಸಿಡೆಂಟ್ ಕೋಲ್ ಸಾಹೇಬಂಗ್ ರಾಜಂಡ ಆರೋಗ್ಯತ್‌ರ ಮೀದ ವರದಿ ಅಯೆಪ ಇಂಜತ್.

ಈ ಪೋಲೆ ಒನ್ನಾಂದ್ ಕೋಲ್ ಸಾಹೇಬ ಮಡಿಕೇರಿಕ್ ರಾಜನ ನೋಟುವಕ್ ಬಾತ್. ಆಚೀಂಗೂ, ವೀರರಾಜೇಂದ್ರ ತಾಂಡ ಮೀದ ಗ.ಜನರಲ್ ಅಸಮಧಾನ ಕಾಟೊಂದ್ ಬೇರತ್ ಇಂಜತ್. ಇದ್‌ನ ಅರ್‌ಂಜ ಕೋಲ್ ಸಾಹೇಬ ರಾಜಂಗ್ ತಾಂಡ ಕರುಣೆ

ಕಾಟಿತ್, ಬ್ರಿಟಿಷ್ ಸರ್ಕಾರತರ ವಿಶ್ವಾಸ ಪಿಳ್ಳಾ ಸಿನೇತಿಕೆಲ್ ನಂಬಿಕೆ ಬೆಪ್ಪನ್ನಕೆ ಕೇಟಂಡತ್. ಅಚ್ಚಕೆ ಅಲ್ಲತೆ ಮನುಷ್ಯ ತಾಂಡ ಮಂಡೆ ಪಾಳಾಪಕ ಮಾಡ್‌ಚಿಟ್ಟ ಕೆಟ್ಟ ಕೆಲಸಕ್ ಶಿಕ್ಷೆ ಆಪುಲೆ. ಕಂಪೆನಿ ಸರ್ಕಾರ ರಾಜಂಗ್ ಗೌರವ ಕೊಡ್‌ಪಾಂಡ ಕೂಟ್‌ಕ್ ರಾಜ ಇಕ್ಕಾಕಣೆ ಮಾಡ್‌ನ ಕೆಟ್ಟ ಕಾರ್ಬಾರ್‌ಕ್ ಕಂಪೆನಿ ಸರ್ಕಾರತಾಂಜ ಕ್ಷಮೆ ತಪ್ಪಾಚಿಡುವಿಂದೂ ತಕ್ಕ್ ಕೊಡ್‌ತತ್.

ಕೋಲ್ ಸಾಹೇಬರ ಈ ಎಲ್ಲ ತಕ್ಕ್‌ನುಂಡ್ ರಾಜಂಡ ಮನಸ್ಸಕ್ ಶಾಂತಿ ಕೊಟ್ಟಿಚಿ. ಮಂಡೆಯೂ ಚೆನ್ನ ಚಾಯಾಚಿ. ಚೆನ್ನೆರ ಗರ್ವನರ್ ಸಹ ರಾಜ ಚಾಯಾನಾಂಗ್ ಓರ್ ಸಿನೇತಿಕೆರ ಕಾಗದ ಎಳ್ಳಿಚಿ. ಅನ್ನನೆ ರಾಜ ತಾಂಡ ಕಾಲ ಕೈಂಜಪಿಳ್ಳಾ ಪೆರಿಯ ಮೋವ ಕೊಡಗರ ಸಿಂಹಾಸನತ್ ಅಳೊಕೊಂಡೂಂಡ್ ಎಳ್ಳಿತಿಂಜ ಕಾಗದಕ್ ಬಂಗಾಳತರ ಗ.ಜನರಲ್, ಎಲ್ಲಾ ಕಂಡೀಷನ್‌ನ ಒತ್ತವಕ್ ಕೈಂಜಾಲೇಂಗೂ, ತಂಗಡ ಸಿನೇತಂಡ ಆಸೆನ ನೆರವೇರೊಚಿಡುವಾಂಡ್ ಎಳ್ಳಿತಿಂಜತ್.

ವೀರರಾಜೇಂದ್ರ ತಾಂಡ ಪೆರಿಯ ಮೋವ ದೇವಮ್ಮಾಜಿರ ಪೆದತ್ ಓರ್ ಬಲ್ಯ ದುಡ್ಡ್‌ನ ಚೆನ್ನೆರ ಕಂಪೆನಿ ಸರ್ಕಾರತರ ಖಜಾನೆಲ್ ರೇವಣಿ ಆಯಿತ್ ಬಡ್ತಿ ಕೊಟ್ಟುಪನ್ನಕೆ ಬೆಕ್ಕೊಂಡೂಂಡ್ ಎಳ್ಳಿನಾಂಗ್ ಗವರ್ನರ್ ಒತ್ತಂಡಿಂಜತ್ ಪಿಳ್ಳಾ ಆ ಪಣತನ ವೀರರಾಜೇಂದ್ರ ಪಡ್‌ಂದವಕ್ ಮೈಸೂರ್ ರೆಸಿಡೆಂಟ್‌ಕ್ ಆದೇಶ ಕೊಡ್‌ತಿತಿಂಜತ್.

ಆಚೇಂಗಿ, ವೀರರಾಜೇಂದ್ರ ಚತ್ತಪಿಳ್ಳಾ ಅವಂಡ ಮೋವ ದೇವಮ್ಮಾಜಿ ಕೊಡಗರ ಸಿಂಹಾಸನತ್ ಅಳೊಕೊಂಡು ಎಣ್ಣುವ ಕೋರಿಕೆನ ಗ.ಜನರಲ್, ಕೋಲ್ ಸಾಹೇಬಂಡ ಕೂಡೆ ತಕ್ಕ್ ಪರಂದಿತ್ ತೇಕೊಲೂಂಡ್ ಎಳ್ಳಿತಿಂಜತ್.

ಅದಾಂಗ್ ಕೊಡಗರ ಸಿಂಹಾಸನಕ್ ಓರ್ ಪೊಣ್ಣಾಳ್ ಉತ್ತರಾಧಿಕಾರಿ ಆಯಿತ್ ಬಪ್ಪಕ್ ಕೊಡಗಲ್ ಆ ನೇರತ್ ಉಳ್ಳ ಕಾನೂನ್, ಪದ್ಧತಿ, ಸಂಪ್ರದಾಯ ಅವಕಾಶ ತಪ್ಪನ್ನಕೆ ಉಂಡಾಂಡ್ ಅರಾಂಜಿತ್ ತಾಂಗ್ ವಿವರ ತರೊಂಡೂಂಡ್ ಗ.ಜನರಲ್ ಅರಿಚಿಟ್ಟತ್.

ಅನ್ನನೆ ಕೋಲ್ ಸಾಹೇಬ, ವೀರರಾಜೇಂದ್ರ ಮಾಡ್‌ನ ಕೆಟ್ಟ ಕೆಲಸತನೆಲ್ಲ ಉದ್ದೇಶಪೂರ್ವಕ ಆಯಿತ್ ಮಾಡತಾಂಗ್ ಕಂಪೆನಿ ಸರ್ಕಾರ ರಾಜಂಗ್ ಕ್ಷಮೆ ಕೊಡ್‌ಪಾಂಡ್ ಎಳ್ಳಿತ್ ಅಯೆಚತ್.

ಇದಾಂಗ್ ರಾಜ ತಾಂಡ ಕೃತಜ್ಞತೆರ ಜವಾಬ್ ಅಯೆಚತ್. ಅನ್ನನೆ ತಾಂಡ ಕಾಲ ಕೈಂಜಪಿಳ್ಳಾ ತಾಂಡ ಮೂಡಿಕುಳ್ಳಾಯಕ್ ಪುಟ್ಟುವ ಕಣ್ಣುಮಕ್ಕಕ್ ಪಟ್ಟ ಕೊಟ್ಟವಕ್

ಮಾಡಾನ ವ್ಯವಸ್ಥೆಗೆ ಒಪ್ಪಿಗೆ ಕಾಟಾನಾಂಗ್ ವಂದನೆ ಎಣ್ಣೆಚಿ.

ವೀರರಾಜೇಂದ್ರ ಅದೇ ಕಾಲತರ ಮಾರ್ಚಿಲ್ ತಾಂಡ ಮೋವ ದೇವಮ್ಮಾಚಿರ ಪೆದತ್ ಕಂಪೆನಿ ಸರ್ಕಾರತರ ಖಜಾನೆಕ್ 186,840 ವರಹತನ ಚೆನ್ನೈ ಖಜಾನೆಕ್ ಅಯೆಚತ್. ಕೋಲ್ ಸಾಹೇಬ ರಾಜಂಗ್ ಸಮಧಾನತರ ತಕ್ಕ ಪರಂದಿತ್ ಮಡಿಕೇರಿಂಜ ಮೈಸೂರ್ಕ್ ಪೊರಡುವಕ, ರಾಜ ತಾಂಡ ಮೋವ ದೇವಮ್ಮಾಚಿ ಪಿಳ್ಳಾ ಅವಡ ತಂಗಿಯಳ ಪರಿಚಯ ಮಾಡಿಕೊಡತತ್. ಅನ್ನನೆ ತಾಂಡ ಮಕ್ಕಳ ಬ್ರಿಟಿಷ್ ಸರ್ಕಾರತರ ರಕ್ಷಣೆಲ್ ಬುಟ್ಟಿತುಳ್ಳಂದ್ ಎಣ್ಣುವನ್ನಕೆ ಕೇಟಂಡತ್. ಅನ್ನನೆ ರಾಜ ತಾಂಡ ನಾಲ್ ಮೋಳಿಯಳ ರಕ್ಷಣೆ ತಪ್ಪನ್ನಕೆ ತಬ್ಬಿಯವಕ್ ಕೇಟಂಡತ್. ಇದ್‌ಂಗ್ ಕೋಲ್ ಸಾಹೇಬ ರಾಜಂಡ ಕೋರಿಕೆರ ಪೋಲೆ ಆ ನಾಲ್ ಮೋಳಿಯಳ ತಬ್ಬಿಯಂಡ್ "ಇಯಂಗಳ ನಂಗ ಚಾಯಿತೆ ನೋಟಿಯವ" ಎಣ್ಣುವನ್ನಕೆ ಜವಾಬ್ ಕೊಡತತ್. ಈ ಪೋಲೆ 1809ನ ಇಸವಿಲ್ ಕೋಲ್ ಸಾಹೇಬ ಮಡಿಕೇರಿಂಜ ಮೈಸೂರ್ಕ್ ವಾಪಾಸಾಚಿ.

ಇದಾಯಿತ್ ಚೆನ್ನಂಗ್ ದಿನತ್ ಡಾ.ಇಂಗಲ್‌ಡ್ವೊ ಸಹ ಮೈಸೂರ್ಕ್ ಪೋಚಿ. ಅಂವಂಡ ಬದ್‌ಲಕ್ ಡಾ. ಕ್ಲಾರ್ಕ್ ಎಣ್ಣುವ ಡಾಕ್ಟರ್‌ನ ಮಡಿಕೇರಿಲ್ ರಾಜಂಡ ಆರೋಗ್ಯ ನೋಟಿಯವನ್ನಕೆ ಮೈಸೂರ್‌ಂಜ ಅಯೆಚತ್. ರಾಜ ಇಕ್ಕ ಚೆನ್ನಂಗ್ ಮಟ್ಟಿಕೆ ಚಾಯಿತೆ ಇಂಜತ್. ಕೂಟ್‌ಕ್ ಕಂಪೆನಿ ಸರ್ಕಾರ ಅಂವಂಡ ಮೀದ ತಾಂಡ ವಿಶ್ವಾಸತನ ಗ್ಯಾರೆಂಟಿ ಮಾಡ್‌ಚಿ.

ಗ.ಜನರಲ್ ತಾಂಡ ಮೋವಡ ಗರ್ಭತ್ ಪುಟ್ಟುವ ಕಣ್ಣುಕುಳ್ಳಿನ ಕೊಡಗರ ಪಟ್ಟತ್ ಅಳಾಪಕ್ ಒಪ್ಪಿಗೆ ತಂದಿತ್‌ಂದ್ ಗೇನ ಮಾಡ್‌ಚಿ. ಈ ಭಾವನೆನುಂಡ್ ರಾಜ ಅಂವಂಡ ಮೋವಡ ಪೆದತ್ ಕಂಪೆನಿ ಸರ್ಕಾರತರ ಪುಡತಕ್ ಕೊಟ್ಟ ಪಣತರ ಕೂಟ್‌ಕ್ ಮುಂಬೈ ಸರ್ಕಾರತರ ಖಜಾನೆಲ್ ಬೆಚ್ಚಿತಿಂಜ ಮೂಂದ್ ಲಕ್ಷ ಉರ್‌ಪಿಯತನ ಸರ್ವೋನ್ನತ ಬಂಗಾಳ ಸರ್ಕಾರತ್ ಒಪ್ಪಿಗೆ ಪಡಂದಿತ್ ಕೂಟ್‌ಚಿ. ಕೋಲ್ ಸಾಹೇಬಂಗ್ ತಾಂಡ ಮೋಳಿಯಳ ರಕ್ಷಣೆರ ಜವಾಬ್ದಾರಿ ವಹಿಸ್‌ನಾಂಗ್ ಕಂಪೆನಿ ಸರ್ಕಾರ ಒತ್ತಂಡಿತ್‌ಂದ್ ಗೇನ ಮಾಡ್‌ಚಿ. ಅಂವಂಡ ಆಸೆ ಎಲ್ಲ ನೆರವೇರನನ್ನಕೆ ಇಂಜತ್. ಪರೀಸ್ ಇಲ್ಲತೆ ಚಾಯಿತೆ ಇರೊಲಿಂಜತ್. ಆಚೇಂಗೊ, ರಾಜಂಗ್ ನೆಮ್ಮದಿ ಕೊಟ್ಲೆ.

ತಾನ್ ಅಗ್ಗೇನ ಪಟ್ಟಂಡ್ ಕೊಲ್ಚಿಟ್ಟ ಎಚ್ಚಿಕೋ ಜನಡ ಗೇನ ಅಂವಂಗ್ ಗೆಡಿ ಗೆಡಿ ಬಂದಂಡ್ ಅಂವಂಗ್ ವಿಪರೀತ ನೊಂಬಲ ಮಾಡುವ ಇಂಜತ್. ತಾಂಗ್ ಆಕತವು ತಾಂಗ್ ಉಂಬಕ ವಿಷ ಇಟ್ಟಿತ್‌ಂದ್ ನಂಬ್‌ಚಿ. ಅಂವಂಡ ತಮ್ಮಣ ಅಪ್ಪಾಚಿರಾಜ ಪಿಳ್ಳಾ ನಂಬಿಕೆರ ಅಧಿಕಾರಿಯ ಅಂವನುಂಡೆ ಚಿತ್ತಿತಿಂಜತ್. ಆನಗುಂಡ್ ರಾಜ ಎಲ್ಲಿ

ಪೋನಕೊ ತಾನ್ ಮಾದ್‌ನ ಕೆಟ್ಟ ಕಾರ್ಬಾರ್ ಏದೇಂಗಿ ಓರ್ ತರತ್ ಅಂವಂಡ ಕಣ್ಣಾಕ್ ಬೂಪ ಇಂಜತ್. ಆಯಿರಾರ್ ಕಣಕ್‌ರ ಜನಡ ಕೊಲೆರ ಪಾಪ ಅಂವಂಡ ಮಂಡೆರ ಕೊಟಲ್ ಇಂಜತ್. ಈನಗುಂಡ್ ರಾಜಂಗ್ ನೆಮ್ಮದಿ ಇಂಚ್‌ಲೆ, ಬೈಟ್ ವರ್‌ಕ್ ಏಪ್ಪ ಇಂಚ್‌ಲೆ.

ಲದೇ ಕಾಲ ಮೇ ನಾಳಂಕೆ 23ಂಗ್ ವೀರರಾಜೇಂದ್ರ ಒಡೆಯ ತಾಂಡ ಮೋವಡ ಬಾಲ್ಯತ್, ರಾಜ್ಯತ್‌ನ ತಾಂಡ ಪೆರಿಯ ಪೊಣ್ಣಾರ ಮೋವ ರಾಜಮ್ಮಾಜಿರ ವಡಿಯ ಸ್ವಾದೆ ಬಸವಲಿಂಗರಾಜ ದೇವಮ್ಮಾಜಿರ ಪೆದತ್ ಆಳಿಯಂಡ್ ಇರೊಂಡೂಂಡ್ ಬಯಂದಂಡ್ ಅದೇ ಪೋಲೆ ಓರ್ ಶಾಸನ ಪತ್ರ ಎಳ್ಳಚಿ. ರಾಜ ಎಳ್ಳನ ಕನ್ನಡ ಕಾಗದ ಕೆಟ್ಟತಾಂಗ್ ಲದೊಂಡ ಇಂಗ್ಲೀಷ್ ತರ್ಬುಮೆ ಇನ್ನನೆ ಉಂಡ್.

## A Translation of the will of Veera Rajendra Woodier written and signed on the 23rd of May 1809.

Six years ago my eldest daughter Rahjee Ammajee was by my consent married to Basaling Rahje Rajah of Soond. Of all friends in the world a son-in-law is the greatest.

At this time my children are all very young and with the exception of Basaling Raja I have no person to execute their marriage ceremonies to undertake the management of my domestic concerns and my country; for this reason I consider him the same as my eldest son and have appointed to the charge of these offices. I am convinced that he will execute my wishes for he belongs to an ancient family of princes.

Until this period I have made him a regular allowance for this support, from henceforth that arrangement is no longer requisite. Whatever may be requisite for his expenditure may be taken from the Treasury.

As there will constantly be disputes and disturbance amongst the people of Coorg, it is my wish that a Resi-

dent be appointed from the English Circar to superintend the management of my affairs and to protect my children, my son-in-law and his children. It was to obtain this support that I conducted myself agreeable to the desires of the British Govt for the last 20 years.

It is my wish that the son of my daughter Devammaji shall succeed to the musnad of Coorg. I have four lakhs of rupees in the company's treasury at Bombay and I request that one lakh of Rupees be taken from that sum and a Bond for that amount be made out in the names Sadashiv Raja and Veera Rajender, my grandsons and the interest arising from it be annually given to them. The interest of the other three lakhs to be placed in the treasury (account of Devammaje). I formerly wrote to Lord Wellesley that it was my wish that the interest of one lakh of Rupees which I have deposited in the treasury at Bombay should be given to my eldest daughter, the wife of the Soonda Rajah and Lord Wellesley despatched an order to that effect to Bombay.

I have communicated every other particular to my son-in-law who will detail the whole to Lord Minto.

(Sd/) G. Ingledew

(Sd/) A.H.Cole

Assistants in-charge

### ವೀರರಾಜೇಂದ್ರ ಒಡೆಯಂದ ಚಾವು

ಕೋಲ್ ಸಾಹೇಬ ಮೈಸೂರ್‌ಗೆ ಪೋನ ಚೆನ್ನಂಗ್ ದಿನತೆ ವೀರರಾಜೇಂದ್ರ ಒಡೆಯಂದ ಬುದ್ದಿ ಪಾಳಾಚಿ. 1809ನೇ ಇಸವಿ ಮೇ 29ತ್ ಕೋಲ್ ಸಾಹೇಬ ಚೆನ್ನೈ ಸರ್ಕಾರತ್‌ರ ಮುಖ್ಯ ಕಾರ್ಯದರ್ಶಿಕ್ "ವೀರರಾಜೇಂದ್ರ ಒಡೆಯಂಗ್ ಬುದ್ದಿ ಪಾಳಾಯಿತ್, ಜನ

ಎಲ್ಲ ಜಿಂವತಾರ ಮೀದ ಬೊತ್ತಿಯಂಡ್ ಉಂಡ್. ಅನ್ನನೆ ಡಾ. ಕ್ಲಾರ್ಕ್ ಸಹ ತಾಂಡ ಜಿಂವಕ್ ರಕ್ಷಣೆ ಇಲ್ಲತೆ ಉಂಡ್"ಂದ್ ಕಾಗದ ಎಳ್ಳೆಚಿ.

ವೀರರಾಜೇಂದ್ರಂಗ್ ಮಿಳ್ಳಾಂಜೆ ಮೈಸೂರ್‌ನ ಆಳಿಯಂಡ್ ಇಂಜ ರಾಜಂಗಡ ಮೀದ ಪಿಳ್ಳಾ ಎಲ್ಲ ಅಧಿಕಾರಿಯಡ ಮೀದ ಪಗೆ ಇಂಜತ್. ಈ ನೇರತ್ ಅಂವಂಗ್ ಮೈಸೂರ್‌ಲ್ ಇಂಜ ಎಲ್ಲ ಅಧಿಕಾರಿಯಡ ಮೀದ ಪಗೆ ಇಳ್ಳಾ ಅಧಿಯಾನಾಂಗ್ ಕೋಲ್ ಸಾಹೇಬ, ತಾಂಡ ತಕ್ಕ್‌ನ ಕೇಪಕಿಲ್ತೆಂದ್ ಗೇನ ಮಾಡ್‌ಚಿ.

ಡಾ. ಇಂಗಲ್‌ಡ್ಲ್ಯೂ ಮಾತ್ರ ರಾಜಂಡ ವಿಶ್ವಾಸ ಎಡ್‌ತಂಡ್ ಅಂವಂಡ ಆಪ್ತ ಕೋಲ್ ಸಾಹೇಬ, ಡಾ. ಇಂಗಲ್‌ಡ್ಲ್ಯೂನ ಮಡಿಕೇರಿಕ್ ರಾಜಂಡ ಪಕ್ಕ ಅಯೆಚತ್. ಡಾ. ಕ್ಲಾರ್ಕ್, ಡಾ. ಇಂಗಲ್‌ಡ್ಲ್ಯೂ ಮಡಿಕೇರಿಕ್ ಎತ್ತಣೆ ರಾಜಂಡ ಎಚ್ಚರ ಎಡ್‌ತಂಡತ್.

ಕೊಡಗಲ್ ಪಂಡ್ ಬ್ರಿಟಿಷ್ ರೆಸಿಡೆಂಟ್ ಆಯಿತಿಂಬ ಕ್ಯಾ.ಮೆಹೋಸಿ ಕೊಡಗಕ್ ಬಂದಿತ್ ರಾಜ್ಯಾಡಳಿತತ್‌ನ ಅವಶ್ಯ ಇಂಜಕ ಮಾತ್ರ ವಹಿಸಿಯವನ್ನಕೆಯೂ, ರಾಜ ಚತ್ತಪೋನಕ ಕೊಡಗ್ ರಾಜ್ಯತ್‌ರ ಉತ್ತರಾಧಿಕಾರತ್‌ನ ಅಂವನೆ ತೀರ್ಮಾನ ಮಾಡುವನ್ನಕೆಯೂ ಕೋಲ್ ಸಾಹೇಬ ಕೊಡಿಯತ ಅಧಿಕಾರಿಯಕ್ ಸೂಚನೆ ಕೊಡ್‌ತತ್. ಈಂಡೆಡಲ್ ತಾನೆ ಮಿದ್ವ್ ಮಡಿಕೇರಿಕ್ ಪೋಪಕ್ ತಯಾರುಳ್ಳೆಂದ್ ಅರಿಚಿಟ್ಟತ್.

ಡಾ. ಇಂಗಲ್‌ಡ್ಲ್ಯೂ ಮಡಿಕೇರಿ ಎತ್ತವಕ ವೀರರಾಜೇಂದ್ರಂಗಡ ಚಾವು ಬಂದೆತ್ತಿತಿಂಬತ್. ರಾಜ ಈ ಕುರಿ ಡಾ. ಇಂಗಲ್‌ಡ್ಲ್ಯೂನ ತಾಂಡ ಪಕ್ಕ ಕಾಕಿತ್ ತಕ್ಕ್ ಪರಂದ ರೆಕಾರ್ಡ್ ಏದೂ ಇಲ್ಲೆ. ಚಾವು ಪಕ್ಕ ಬಪ್ಪಕ ರಾಜ, ಡಾಕ್ಟರ್‌ನ ಗೊತ್ತ್ ಮಾಡುವಕೂ ಕಯ್ಯತಾಯಿತಿಕ್ಕು.

ಸುರೂಲೆ ಎಣ್ಣೆನನ್ನಕೆ ರಾಜ ತಾನ್ ಚತ್ತದು ತಾಂಡ ಪೆರಿಯ ಮೈಮ ಸ್ವಾದೆ ಬಸವಲಿಂಗ ರಾಜನ ತಾಂಡ ಉತ್ತರಾಧಿಕಾರಿ ಮೋವ ದೇವಮ್ಮಾಜಿ ಬಯತ್‌ಕ್ ಬರಣೆ ಕೊಡಗರ ದಿವಾನನಾಯಿತ್ ರಾಜ್ಯಾಡಳಿತ ನಡೆತೊಂಡೊಂದ್ ಆಸೆ ಪಟ್ಟತ್. ತಾಂಡ ಆಖೀರಿ ಗೆಳೆಗೆಲೂ ತಾಂಡ ರಾಜ್ಯತ್‌ರ ಕಾರ್ಬಾರ್‌ನ ಮೈಂಮಂಗೆ ವಹಿಸಿತಿಂಬತ್.

1809ನೆ ಇಸವಿ ಜೂನ್ ನಾಳಂಕೆ 9ಂಗ್ ನಿರ್ಭಾಗ್ಯನಾನ ಆ ರಾಜ ತಾಂಡ ಕೊದಿರ ಮೋವ ದೇವಮ್ಮಾಜಿನ ತಾಂಡ ಕಟ್ಟರ ಪಕ್ಕ ಕಾಕಿತ್ ಅವಡ ಕೈಕ್ ತಾಂಡ ರಾಜಮುದ್ರೆನ ಕೊಡ್‌ತಿತ್ ಓರ್ ಗೆಳೆಗೆಲ್ ಉಸಿರ್ ನಿಪ್ಪೆಚಿಟ್ಟತ್.

ಇನ್ನನೆ ಕೊಡಗರ ಹಾಲೇರಿ ಅರಸಡಾತ್ ಪೇರ್ತ್ ವೀರತ್ತತ್ ಟಿಪ್ಪು ಸುಲ್ತಾನಂಡ ಕೂಡೆ ಪೋರಾಡಿತ್ ತಾಂಡ ರಾಜ್ಯತ್‌ನ ವಾಪಾಸ್ ಪಡ್‌ಂದಂಡ್, ಕೇಳಿ ಪಡ್‌ಂದ್

ಚೆನ್ನಂಗ್ ಕಾಲಕೆತ್ತನೆ ಆಳನ ವೀರರಾಜೇಂದ್ರ ಒಡೆಯ ಆಖೀರಕ್ ತಾಂಡ ಕೊದಿರ ಮಹಾರಾಣಿನ ಕಳಂದಂಡ್ ದುಃಖತ್, ಅಗ್ಗೇನತ್ ತಾಂಗೂ ಸುಖ ಇಲ್ಲತೆ, ತಾಂಡ ಪ್ರಚೆಯಕೂ ಹಿಂಸೆ ಕೊಡ್ತಂಡ್, ನಮ್ಮದಿ ಇಲ್ಲತೆ ಬದ್‌ಕನದ್ ಅಂವಂಡ ದುರಾದೃಷ್ಟಾಂದೆ ಎಣ್ಣೊಂಡು.

ರಾಜಂಡ ಇನ್ನತ ಓರ್ ಆಖೀರಿರ ಮೀದ ಓರ್ ಐರೋಪ್ಯ ಚರಿತ್ರಕಾರ ಮನಸ್ಸಕ್ ದುಂಬ ಪಡುವನ್ನಕೆ ಇನ್ನನೆ ಎಳ್ಳಿತ್.

'A sad spectacle! A noble vessel after having gallantly weathered the storms of Mussalman domination and conquest is torn from its moorings by the swell of wild grief and passion and drifts into the breakers of sanguinary phrenzy and suicidal despair to perish there a miserable wreck, with many to look, but none to help. The forelorn Raja lived ages of anguish from the days of the death of his beloved wife, the 17th May 1807, to the date of his own disease, the 9th of June 1809.'

ವೀರರಾಜೇಂದ್ರಂಡ ಚಾವುನ ಅಂವಂಡ ಕೊದಿರಾಣೆರ ಚಾವುರ ಬರಿಲೆ ಮಹದೇವಪೇಟೆರ ಉತ್ತರಕುಂದ್‌ಲ್ ಉಳ್ಳ ಗದ್ದುಗೆಲ್ ಸಮಾಧಿ ಮಾಡ್‌ಚಿ. ಈ ಗೋರಿ ಪೇಟೆರ ತುದಿಂಜ ಪೋಪಕ ಎಡ್‌ತೆ ಬರಿಲ್ ಉಂಡ್. ಇದ್‌ನ ವೀರರಾಜೇಂದ್ರ ತಾನ್ ಜಿಂವತ್ ಇಪ್ಪಕೆ ಕೆಟ್ಟುಪಕ್ ಸುರು ಮಾಡಿತಿಂಜತ್! ಆನಗುಂಡ್ ಈ ಗೋರಿರ ಕಲ್ಲ್, ಕಿಟಕೆರ ಕೊಡಿಲೂ, ಕಿಡ್‌ಕೆರ ಕಚ್ಚಿರ ರಾಡ್‌ಲೂ 'ವಿ' ಎಣ್ಣುವ ಅಕ್ಷರ ಕೆತ್ತಿತುಂಡ್.

ವೀರರಾಜೇಂದ್ರ ಒಡೆಯ ಚಿತ್ತಪಿಳ್ಳಾ ಅಂವಂಡ ಪ್ರಚೆಯ ಅದತೂ ಮುಖ್ಯವಾಯಿತ್ ಲಿಂಗಾಯತಂಗ ಅಂವನ ದೇವಾಂಶ ಸಂಭೂತಂಡ್ ಗೇನ ಮಾಡಿತ್ ಪೂಜೆ ಮಾಡುವಕೂಡ್‌ಚಿ. ಶಿವಪಾದರೆರ ದಿನ ಪೊವ್‌ಲ್ ಪಿಳ್ಳಾ ಬೈಟ್ ಏರ ಕಣ್‌ಕ್‌ಲ್ ಲಿಂಗಾಯತಂಗ ದೊಡ್ಡ ವೀರರಾಜೇಂದ್ರಂಡ ಗದ್ದುಗೆಲ್ ಕೂಡಿತ್ ಅಂವಂಗೂ ಪಿಳ್ಳಾ ರಾಜಮನೆತನತ್‌ರ ಗುರು ಶ್ರೀ ರುದ್ರಪ್ಪಸ್ವಾಮಿಕೂ ಪೂಜೆ ಮಾಡುವ ಇಂಜತ್.

ಮಡಿಕೇರಿಂಜ ನಾಲ್ಕಾಡ್ ಅರಮನೆಕ್ ರಾಜಸೀಟ್‌ರ ಬಲ್‌ತೆ ಬರಿಲ್ ಇಳ್‌ಂಜಿತ್ ಕಗ್ಗೋಡ್ಲ್, ಮುತ್ತಾಮುಡಿ, ಮೂರ್ನಾಡ್, ಬಲಂಬೇರಿ ಪಿಳ್ಳಾ ಕೊಣಂಜಗೇರಿಕಾಲೆ ಆ ಕಾಲತ್ ಪೋಕಂಡಿಂಜತ್. ರಾಜ ಕುಟುಂಬತ್‌ರ ಪೊಣ್ಣಾಳ ಪಿಳ್ಳಾ ಮಕ್ಕ ಪಲ್ಲಕ್ಕಿಲ್ ಅಳ್‌ತಂಡ್ ಬೋಯಿಯಳುಂಡ್ ಪೊರ್‌ಪ್‌ಚಿಟ್ಟುಂಡ್ ಪೋಪ ಇಂಜತ್. ಅನ್ನನೆ ಪೋಪಕ



ರಾಜ, ರಾಣಿಯ ಪ್ರಕೃತಿರ ಚಾಯಿ ಬೋಜತನ ನೋಟಿಯಂಡ್, ಅನುಭವಿಚಿಡುವಹ್ ಪಿಳ್ಳಾ ಸುಸ್ತನ ಕಮ್ಮಿ ಮಾಡುವಹ್ ಅನುಕೂಲ ಆಪನ್ನಕೆ ಓರ್ ಮಂಟಪತನ ವೀರರಾಜೇಂದ್ರ ಕೆಟ್ಟಾಚಿಟ್ಟತ್. ಈ ಮಂಟಪತನ ನಂಗ ಇಂದ್ 'ರಾಜಾಸೀಟ್' ಎಣ್ಣುವ ಪೆದತ್ ಕಾಕಿಯಂಡ್ ಉಳ್ಳ. ರಾಜ ಅಳುತ್ಂಡ್ ಇಪ್ಪಾನುಂಡ್ ಈ ಚಾಗಕ್ ಇಂಗ್ಲೀಷ್‌ಕಾರ 'ರಾಜಾಸೀಟ್'ಂಡ್ ಪೆದ ಕೊಡತತ್. ಇಂದೇಕೂ ಈ ರಾಜಾಸೀಟ್‌ಂಜ ಪೇರ್ತ್ ಚಾಯುಳ್ಳ ಪ್ರಕೃತಿರ ಬೋಜ ಕಾಂಬಕ್‌ಟ್ಟುವ.

ನಾಲ್ಕಾಡ್ ಅರಮನೆಕ್ ಪೋಪ ಬಟ್ಟೆಲ್ ದೊಡ್ಡವೀರ ರಾಜೇಂದ್ರ ಬಲಂಬೇರಿಲ್ ಕಾವೇರಿ ಪೊಳೆರ ಬಲಾತ ಬರಿಲ್ ಓರ್ ಬಿಡಾರ ಕೆಟ್ಟಾಚಿಟ್ಟತ್. ಇದ್‌ನ ಪ್ರವಾಸಿಯ ಉಪಯೋಗ ಮಾಡುವ ಇಂಜತ್. ಈ ಕಟ್ಟಡ ಇಕ್ಕಲೂ ಉಂಡ್.

ದೊಡ್ಡ ವೀರರಾಜೇಂದ್ರ ಕೆಟ್ಟಾಚಿಟ್ಟ ಇಂಗ್ಲೋರ್ ಮುಖ್ಯಪಟ್ಟ ಕಟ್ಟಡ ಎಣ್ಣಕ ಇಂಗ್ಲೀಷ್ ಜನಕಾಯಿತ್ ಕೆಟ್ಟಾಚಿಟ್ಟ, ಬೆಂದು ಬಿಡಾರ. ಅಕ್ಕ ಮೈಸೂರ್, ಬೆಂಗಳೂರ್, ತಲಚೇರಿ ಪಿಳ್ಳಾ ಕಣ್ಣಾನೂರ್ಲ್ ಇಂಜ ಇಂಗ್ಲೀಷ್ ಅಧಿಕಾರಿಯಡ ಕೂಡೆ ದುಂಬ ಸಿನೇತಿಕೆಲ್ ಇಂಜತ್. ಅವು ಟಿಪ್ಪು ಚತ್ತಪಿಳ್ಳಾ ಕೊಡಗುಕ್ ಬೋಟೆಕ್ ಗೆಡಿ ಗೆಡಿ ಬಪ್ಪ ಇಂಜತ್. ಅವು ಮಡಿಕೇರಿಕ್ ಬಪ್ಪಕ ಒಳಂಜವಕ್ ಎಲ್ಲ ಅನುಕೂಲ ಉಳ್ಳ ಐರೋಪ್ಪ ಶೈಲಿರ ಓರ್ ಬೆಂದು ಬಿಡಾರತನ ರಾಜ ಕೆಟ್ಟಾಚಿಟ್ಟತ್. ಆ ಕಟ್ಟಡಕ್ ನುಗ್ಗುವಕ ದಂಡೂ ಬರಿಲ್ ಪಾರಕಾರ ನಿಂದವಕ್ ಅನುಕೂಲ ಆಪನ್ನಕೆ ಗುಮ್ಮಟ ಇಂಜ ಉರ್‌ಟ್ ಆಕಾರತರ ಓರ್ ಬಲ್ಯ ಪಡಿನ ಕೆಟ್ಟಾಚಿಟ್ಟತ್. ಬೆಂದು ಬಿಡಾರತರ ಸುತ್ತೂ ಪುಳಿ ಗೌಡ, ಚೋಂದ ಮೀನುಂಡ್ ದುಂಬನ ಕೆರೆಯೂ ಇಂಜತ್. ಈ ಬೆಂದು ಬಿಡಾರತರ ವರ್ಣನೆನ ಅಲ್ಲಿ ಬೆಂದು ಆಯಿತ್ ಒಳಂಜ ಸೈನ್ಯಾಧಿಕಾರಿ ಚೇಮ್ಸ್ ವೇಲ್ಸ್ ಭಾರಿ ಚಾಯಿತೆ ಮಾಡಿತ್.

ದೊಡ್ಡ ವೀರರಾಜೇಂದ್ರ ಒಡೆಯ ಚತ್ತನ್ನಕೆ ಮಡಿಕೇರಿಲ್ ಸಭೆ ಕೂಡನ ಮುಖ್ಯಸ್ಥಂಗ ದೇವಮ್ಮಾಜಿನ ಕೊಡಗು ರಾಣೆಂದ್ ಒತ್ತಂಡತ್. ಸ್ವಾದೆ ರಾಜ, ರಾಣಿರ ಪ್ರತಿನಿಧಿ ಪಿಳ್ಳಾ ಮುಖ್ಯ ದಿವಾನ ಆಯಿತ್ ರಾಜ್ಯತ್ ಕಾರ್ಬಾರ್ ನಡೆತುವ ಇಂಜತ್. ಕೊಡಗು ಜನ ಎಲ್ಲ ತೃಪ್ತಿಲ್, ಸುಖತ್ ಉಳ್ಳನ್ನಕೆ ಕಂಡತ್. ಡಾ.ಇಂಗಲ್‌ಡ್ಸೂ ಕೊಡಗು ಪರಿಸ್ಥಿತಿನ ಮೈಸೂರ್ ಬ್ರಿಟಿಷ್ ರೆಸಿಡೆಂಟ್ ಕೋಲ್ ಸಾಹೇಬಂಗ್ ಇನ್ನನೆ ಎಳ್ಳಾಚಿ.

ಚತ್ತಪೋನ ರಾಜ ಮಾಡನ ಪಿಳ್ಳಾ ಮಾಡ್‌ಚಿಟ್ಟ ಎಚ್ಚೆಕೊ ಹಿಂಸೆನುಂಡ್ ಬುಡ್‌ಂಜಿ ಪೋಯಿತಿಂಜ ಕೊಡಗು ಜನ ಏದೇ ಓರ್ ಸಾಧಾರಣ ತರತರ ರಾಜ್ಯಭಾರತನ ಒತ್ತವನ್ನಕೆ ಇಂಜತ್. ಪಂಡ್ ರಾಜಂಡ ಕಾಲತ್ ಅದತೂ ಆಖೀರಿ ದಂಡ್ ಕಾಲತ್ ಇಂಜ ಸ್ಥಿತಿಂಜ ಪ್ರಚೆಯಡ ಬದ್‌ಕ್ ನೆಮ್ಮದಿ ಬೋಂಡಿಯಾಯಿತಿಂಜ ಈ ಕಾಲತ್

ಮಹಾರಾಣಿರ ಆಳ್ವಿಕೆಯುಂಡ್ ತೃಪ್ತಿ ಪಟ್ಟಿತೆ ಪಡುವ.

ದೊಡ್ಡ ವೀರರಾಜೇಂದ್ರ ಚತ್ತಪಿಳ್ಳಾ ಅವಂಡ ಅರಮನೆಲ್ ಇಂಜ ಚೆನ್ನಂಗ್ ನಪುಂಸಕ ಪಾರಕಾರ ಇಳ್ಳಾ ತಂಗಡ ಅಧಿಕಾರ ನಡಪಾಂದ್ ಗರ್ವತ್ ಕೊಡಗರ ಬೋರೆ ಬೋರೆ ಮುಕ್ರಿಯಡ ಕೂಡ ಕೆಣಿ ಮಾಡುವ ಕೂಡ್‌ಚಿ. ಆಚೇಂಗಿ, ಅಕ್ಕ ದಿವಾನಂಗಡಾತ್ ಒಬ್ಬ ಆಯಿತಿಂಜ ಹೊಂಬಾಳೆ ನಾಯಕ ಈ ನಪುಂಸಕ ಪಾರಕಾರಳ ಕೆಲಸತ್‌ಂಜ ಎಡ್‌ಕೊಂಡೂಂದೂ, ಇಲ್ಲೇಂಗಿ ತಾನ್ ದಿವಾನ್ ಪದವಿಕ್ ರಾಜಿನಾಮೆ ಕೊಡ್‌ಪನ್ನೆಕೆಯೂ ಮುಖ್ಯ ದಿವಾನ ಸ್ವಾದೆ ಬಸವಲಿಂಗ ರಾಜಂಗ್ ಅರಿಚಿಟ್ಟತ್. ಅಕ್ಕ ಮುಖ್ಯ ದಿವಾನ, ಆ ಪಾರಕಾರಳ ಆಯಾಯ ಊರ್‌ಕ್ ಪೋಪನ್ನೆಕೆ ಆಜ್ಜೆ ಮಾಡ್‌ಚಿ. ಅನ್ನನೆ ಆ ಊರ್‌ಲೆಲ್ಲ ಅಯಿಂಗಡ ಕೆಲಸ ಕಾರ್ಬಾರ್ ಮೀದ ಕಣ್ಣ್ ಬೆಪ್ಪ ವ್ಯವಸ್ಥೆ ಮಾಡ್‌ಚಿ.

ಸ್ವಾದೆ ಬಸವಲಿಂಗ ರಾಜ ಇನ್ನನೆ ಪಾರಕಾರಳ ಅಡ್‌ಕನಕೊ ಅವಂಗ್ ವಿರೋಧಿಯಳುಂಡ್ ತೊಂದರೆ ತಪ್ಪಾಲೆ. ಅಲ್ಲಿಂಜ ಅವಂಡ ವಿರೋಧಿಯ, ದೊಡ್ಡ ವೀರರಾಜೇಂದ್ರ ಒಡೆಯ ಸ್ವಾದೆ ರಾಜ, ರಾಣಿರ ಬಾಲ್ಯತ್ ಅವಳ ಪೆದತ್ ಆಳೊಂಡೂಂದ್ ಬಯಂದಿತ್ ಮರಣ ಶಾಸನತ್‌ನ ಸ್ವಾದೆ ರಾಜ ತಾನೆ ಎಳ್ಳೆಚಿಟ್ಟಿಯೆಂದ್ ಸುದ್ದಿ ಮಾಡ್‌ಚಿ. ಆನಗುಂಡ್ ಸ್ವಾದೆ ರಾಜನ ದಿವಾನ್‌ಗಿರಿಂಜ ಎಡ್‌ಕೊಂಡೂಂದ್ ಡಾ. ಇಂಗಲ್ ಡ್ಯೂನ ಒರಾತ ಮಾಡ್‌ಚಿ.

ಈನಗುಂಡ್ ರಾಜ್ಯತ್ ಅಶಾಂತಿ ಆಕೂಂದ್ ಗೇನ ಮಾಡಿತ್ ಡಾ. ಇಂಗಲ್ ಡ್ಯೂ ಸ್ವಾದೆರ ಮೀದ ಮಾಡಿತಿಂಜ ಆರೋಪತ್‌ನ ವಿಚಾರಣೆ ಮಾಡ್‌ಚಿ. ಅಕ್ಕ ಸ್ವಾದೆ ಅವಂಗ್ ಕಾಟ್‌ನ ದೊಡ್ಡವೀರ ರಾಜೇಂದ್ರಂಡ ಮರಣಶಾಸನತ್ ರಾಜ ಸೈನ್ ಮಾಡಿತಿಂಜಾಲೆ! ಆಚೇಂಗಿ, ಅದತ್ ದೊಡ್ಡ ವೀರ ರಾಜೇಂದ್ರಂಡ ಆಪ್ತ ಅಶ್ವವೈದ್ಯ ವೀರರಾಜೇಂದ್ರಂಡ ಪರವಾಯಿತ್ ಮಾಡ್‌ನ ಸೈನ್ ಇಂಜತ್. ಆಚೇಂಗಿ, ಈ ಮರಣಶಾಸನ ವೀರರಾಜೇಂದ್ರ ತಾನ್ ಚಾವಾಂಗ್ ಮುಪ್ಪಡೆ ಕಾಟಿಯಂಡ ಆಸೆಕೆಲ್ಲ ಸೆರಿಯಾಯಿತೆ ಇಂಜತ್. ಆನಗುಂಡ್ ಮರಣಶಾಸನತ್ ಸೈನ್ ಬದಲಾವಣೆ ಏದೇ ಪರಿಣಾಮತ್‌ನ ವೀರರಾಜೇಂದ್ರಂಡ ಆಸೆಕ್ ವಿರೋಧ ಆಯಿತ್ ಮಾಡುವನ್ನೆಕೆ ಇಂಜಾಲೆ. ಆಚೇಂಗೂ, ಕೊಡಗರ ಮುಕ್ರಿಯಳ ಸಮಧಾನ ಪಡ್‌ತುವಕಾಯಿತ್ ಡಾ. ಇಂಗಲ್ ಡ್ಯೂ, ವೀರರಾಜೇಂದ್ರಂಡ ಸೈನ್ ಇಲ್ಲತ ಮರಣಶಾಸನತ್‌ನ ರದ್ದ್ ಮಾಡ್‌ಚಿ. ಸ್ವಾದೆ ರಾಜನ ದಿವಾನ ಆಯಿತೆ ಮುಂದರ್‌ಚಿಟ್ಟತ್. ಆಚೇಂಗಿ, ಕೂಡೆನ್ನೆ ಕೊಡಗರ ರಾಜಕೀಯ ಕೋವುಲ್ ಸಮಸ್ತೆ ಎದ್ದತ್.

ದೊಡ್ಡ ವೀರರಾಜೇಂದ್ರ ಒಡೆಯಂಡ ತಮ್ಮಣ ಲಿಂಗರಾಜೇಂದ್ರ ಕೊಡಗರ ಮುಕ್ರಿಯ

ಪಿಳ್ಳಾ ಡಾ. ಇಂಗಲ್ ಡ್ಯೂರ ಮೀದ ತಾಂಡ ಪ್ರಭಾವತನ ಈ ನೇರತ್ ಕಾಟುವ ಕೊಡ್ಚಿ. ಲಿಂಗರಾಜೇಂದ್ರಂಗ್ ಅಕ್ಕ 34 ಬಯತ್. ಅವ ಗೆಡಿ ಗೆಡಿ ಡಾ. ಇಂಗಲ್ ಡ್ಯೂರ ಕಂಡಿತ್ ತಾಂಡ ತಕ್ಕಲ್ ತಾನ್ ಸತ್ಯವಂತ, ಸರಳ ಸ್ವಭಾವಿ ಪಿಳ್ಳಾ ವಿನಯವಂತಂದ್ ಗೊತ್ತ್ ಮಾಡುವನ್ನೆಕೆ ಪರೆಯುವ ಇಂಜತ್. ಲಿಂಗರಾಜೇಂದ್ರ, ಡಾ. ಇಂಗಲ್ ಡ್ಯೂರ ಕೂಡೆ ತಾಂಡ ಅಣ್ಣ ವೀರರಾಜೇಂದ್ರ ಒಡೆಯಂಡ ಉತ್ತರಾಧಿಕಾರಿ ಆಯಿತ್ ಮಾಡತಾಂಗ್ ತಾಂಡ ನಿರಾಸೆನ ಕಾಟಿಯಂಡಕೊ, ವೀರರಾಜೇಂದ್ರ ಪಡೆಪೊತ್ತಿತ್ ಅವಂಡ ರಾಜ್ಯತ್‌ನ ವಾಪಾಸ್ ಪಡೊಂದಾನುಂಡ್ ಅವಂಗ್ ತಾಂಡ ರಾಜ್ಯಕ್ ದಾರ್ ಉತ್ತರಾಧಿಕಾರಿ ಆಂಡೊಂದ್ ತೀರ್ಮಾನ ಮಾಡುವಕ್ ಹಕ್ಕು ಉಂಡೊಂದೊ, ಆನಗುಂಡ್ ತಾಂಗ್ ಕೊಡಗ್ ರಾಜ್ಯ ಕೊಟ್ಟೊಂದ್ ಬೆಲ್ಕ ಪರೆಯುವಾಂಗ್ ಏದೇ ಮೊಳಿ ಇಲ್ಲೊಂದೊ ಎಣ್ಣೊಚಿ.

ಆಚೇಂಗಿ, ಅವ ಇಂಗಲ್‌ಡ್ಯೂರ ಕೂಡೆ ತಾಂಡ ಖರ್ಚಿಕ್ ರಾಜ್ಯ ಭಂಡಾರತ್‌ಂಜ ಕಾಲಕ್ ತಪ್ಪ 200 ಕಂಠೀರಾಯ ವರಹ 8 ತಿಂಗಕ್ ಮುಪ್ಪಡೆ ಚಾವ್‌ಚಿಟ್ಟಿ ತಾಂಡ ಅಣ್ಣ ಅಪ್ಪಾಜಿ ರಾಜಂಡ ಪೊಣ್ಣ್, ಮಕ್ಕಡ ಖರ್ಚಿಕ್ ಕಾಲಕ್ ತಪ್ಪ 600 ಕಂಠೀರಾಯ ವರಹ ಪೊರತಾಪ. ಆನಗುಂಡ್ ಈ ಪಣತನ ಜಾಸ್ತಿ ತಪ್ಪನ್ನೆಕೆ ಆಂಡೊಂದ್ ಎಣ್ಣೊತ್ ಗ. ಜನರಲ್‌ಕ್ ಮನವಿ ಕೊಡ್‌ತಿತಿಂಜತ್.

ಈ ಮನವಿಲ್ ಲಿಂಗ ರಾಜೇಂದ್ರ 1809ನೆ ಇಸವಿ ಜುಲೈ 4ಲ್ ಡಾ. ಇಂಗಲ್ ಡ್ಯೂಕ್ ಕೊಡ್‌ತಿತ್ ಗ. ಜನರಲ್‌ರ ಏದ್ ಏರ್ಪಾಡ್ ಆನಕೋ ತಾನ್ ಅದೊನ ಕುಶಿಲ್ ಒತ್ತವಿಂದ್ ಎಣ್ಣೊಚಿ. ಡಾ. ಡ್ಯೂ ಲಿಂಗರಾಜೇಂದ್ರಂಡ ಮಜಣೆ ತಕ್ಕಲ್ ಮರಳಾಯಿತ್, ಇಂಪ ಸಾಧು. ಇಂವಂಗೂ ಕೊಡಗ್ ರಾಜ್ಯತ್ ಹಕ್ಕು ಇರೊಂಡಿಂಜತ್. ಆನಗುಂಡ್ ಬಂಗಾಳ ಸರ್ಕಾರ ಇಂವಂಡ ಬೋಡಿಕೆನ ಕೊಡ್‌ಪನ್ನೆಕೆ ಮಾಡೊಂಡೊಂದ್ ಶಿಫಾರಸ್‌ರ ಕಾಗದ ಎಳ್ಳೊಚಿ.

ಆಚೇಂಗಿ, ಲಿಂಗರಾಜೇಂದ್ರ ಮೋಸ ಅರಿಯತ ಡಾ.ಡ್ಯೂಕ್ ಕಾಟಿಯಂಡನ್ನೆಕೆ ರಾಜ್ಯತ್‌ರ ಆಸೆಯಾಡ್, ಅಧಿಕಾರತ್‌ರ ಆಸೆಯಾಡ್ ಬುಟ್ಟಿಂಪ ಆಯಿತಿಂಜಾಲೆ. ಅವ ಈ ನೇರತ್ ಗೆಡಿ ಗೆಡಿ ಅರಮನೆಕ್ ಬಪ್ಪ ಇಂಜತ್. ಮಡಿಕೇರಿಲ್ ಇಂಜ ಕೊಡಗ್‌ರ ಮುಕ್ರಿಯಡ ಕೂಡೆ ತಕ್ಕು ಬಾಕ್ ನಡೆತುವ ಇಂಜತ್. ಕೊಡಗ್‌ರ ಮುಕ್ರಿಯ ಸ್ವಾದೆ ರಾಜ ಪೊರರಾಜ್ಯಕಾರ ಆನಾನುಂಡ್ ಅವಂಡ ಆಳ್ವಿಕೆನ ಒತ್ತಂಡಾಲೆ. ಆಚೇಂಗಿ, ಅಯಿಂಗಕ್ ತಂಗಡ ಪಂಡೇತ ರಾಜಂಡ ತಮ್ಮಣ, ರಾಣಿರ ಪೆದತ್ ಆಳೊಂಡೊಂದ್ ಎಣ್ಣುವಾತ್ ದುಂಬ ಇಷ್ಟ ಇಂಜನ್ನೆಕೆ ಕಂಡಾಲೆ.

ಕೊಡಗರ ಆಡಳಿತ ಪರಿಸ್ಥಿತಿ ಇನ್ನನಿಪ್ಪಕ ಒನ್ನಾಂದ್ ಮಡಿಕೇರಿ ಅರಮನೆರ ಬಾಡಲ್ ಕೊಡಗರ ಮುಕ್ರಿಯಡ ಓರ್ ಬಲ್ಯ ಸಭೆ ಕೂಡ್‌ಚಿ. ಇದತ್ ಸ್ವಾದೆ ರಾಜನ ಕೊಡಗರ ಆಡಳಿತಾಧಿಕಾರತ್‌ಂಜ ಎಡ್‌ತಿತ್, ಅಂವಂಡ ಬದಲ್ ಲಿಂಗ ರಾಜೇಂದ್ರನ ಅಧಿಕಾರಕ್ ಬಪ್ಪಚಿಡೊಂಡು ಎಣ್ಣುವ ವಿಷಯತ್ ಚರ್ಚೆ ಮಾಡ್‌ಚಿ. ಇದತ್ ಲಿಂಗರಾಜಂಗ್ ಎರ ವಿರೋಧ ಕಾಟ್‌ಚಿ.

ಅಲ್ಲಿಂಜ ಲಿಂಗರಾಜ ಕುದರೆಲ್ ತಾಂಡ ವಾಸಸ್ಥಾನ ಹಾಲೇರಿಕ್ ಮಡಿಕೇರಿ ಮಹದೇವ ಪೇಟೆಕಾಲೆ ಸವಾರಿ ಮಾಡಿಯಂಡ್ ಪೋಚಿ. ಅಕ್ಕ್ ಅಂವ ದುಂಬಾ ಬೇಜಾರತ್ ಚೆರಿಯಕುಳ್ಳಾರನ್ನೆ ಮೊರ್‌ಟಂಡ್ ಇಂಜತ್. ಕೊಡಗರ ದಿವಾನಂಗಡಾತ್ ಒಬ್ಬನಾನ ಚೊರಿರ ಅಪ್ಪಣ್ಣ ತಾನ್ ಅರಮನೆಕ್ ಪೋಯಂಡಿಪ್ಪಕ ಲಿಂಗರಾಜೇಂದ್ರ ಮೊರ್‌ಟಂಡ್ ಇಂಜಾನ ಕಂಡಿತ್ ಕೇಟತ್.

"ಕೊಡಗರ ಪಂಚಾಯಿತಿಲ್ ನನ್ನ ತಿರಸ್ಕಾರ ಮಾಡ್‌ಚಿ. ನಾಡ ಆಸೆ ಎಲ್ಲ ಪಾಳಾಚಿ"ಂದ್ ಲಿಂಗರಾಜ ಜವಾಬ್ ಕೊಡ್‌ತತ್. ಅಕ್ಕ್ ಅಪ್ಪಣ್ಣ, "ನಿಂಗ ನಾಡ ಕೂಡೆ ಬಾರಿ. ನಾನ್ ನಿಂಗಳ ಕೊಡಗರ ಸಿಂಹಾಸನತ್ ಅಳ್‌ಪ್‌ಚಿಡುವಿ"ಂದ್ ಎಣ್ಣಿತ್ ಲಿಂಗರಾಜೇಂದ್ರಂಡ ಕುದರೆ ಲಗಾಮ್‌ನ ಪುಡ್‌ಚಂಡ್ ಬಾತ್.

ಅಲ್ಲಿ ಸಭೆ ಕೂಡಿತಿಂಜ ಮುಕ್ರಿಯಡ ಕೂಡೆ, ಲಿಂಗರಾಜೇಂದ್ರಂಡ ಪರ ವಾದ ಮಾಡ್‌ಚಿ. ಅಪ್ಪಣ್ಣ ಓರ್ ಪ್ರಾಮಾಣಿಕ ದಿವಾನ ಆಯಿತ್ ಕೊಡಗರ ಮುಕ್ರಿಯಡಾತ್ ನೆಲ್ವ ಪ್ರಭಾವ ಇಂಜಾನುಂಡ್ ಅಂವಂಡ ತಕ್ಕ್‌ಕ್ ಜನ ಬೆಲೆ ಕೊಡ್‌ತತ್. ತಂಗಡ ಮನಸ್ಸಿನ ಬದಲ್ ಮಾಡಿತ್ ಸ್ವಾದೆ ರಾಜಂಡ ಬದಲ್ ಲಿಂಗರಾಜೇಂದ್ರ, ರಾಣಿರ ಪ್ರತಿನಿಧಿ ಆಯಿತ್ ಕೊಡಗರ ರಾಜ್ಯಾಡಳಿತನ ನಡೆತುವಕ್ ತಂಗಡ ಒಪ್ಪಿಗೆ ಕಾಟ್‌ಚಿ.

ಆಚೇಂಗಿ, ಕೊಡಗಲ್ ಈ ನೇರತ್ ಬ್ರಿಟಿಷ್ ಸರ್ಕಾರ್‌ರ ಪ್ರತಿನಿಧಿ ಆಯಿತ್ ಇಂಜ ಡಾ. ಇಂಗಲ್‌ಡ್ಯೂಕ್ ಕೊಡವ ಮುಕ್ರಿಯಡ ಸಭೆಲ್ ನಡೆಂದ ಎದೇ ವಿಷಯ ಗೊತ್ತಾಯಿಲೆ. ಇದಾಯಿತ್ ಒಂದ್, ದಂಡ್ ದಿನತ್ ಎಣ್ಣಕ 1809ನೆ ಇಸವಿ ಜುಲೈ 9ಂಗ್ ಚೆರಿಯ ಬಯತ್‌ರ ರಾಣಿ ದೇವಮ್ಮಾಜಿ, ಡಾ. ಇಂಗಲ್‌ಡ್ಯೂನ ಅರಮನೆಕ್ ಕಾಕ್‌ಚಿಟ್ಟಿತ್, ತಾಂಗ್ ಸ್ವಾದೆ ರಾಜ ತಾಂಡ ರಾಜ್ಯಾಡಳಿತ ನಡೆತುವಕ್ ತೃಪ್ತಿ ಇಲ್ಲೇಂದೂ, ಅದಂಡ ಬದಲ್ ತಾಂಡ ಬೋಜಪ್ಪ ಲಿಂಗರಾಜೇಂದ್ರ ತಾಂಡ ಪೋಷಕ ಆಯಿತುಳ್ಳಾಂಗ್ ತಾಂಗ್ ಒಪ್ಪಿಗೆ ಉಂಡ್ ಎಣ್ಣವಕ ಅಂವಂಗ್ ದುಂಬ ಆಶ್ಚರ್ಯ ಆಚಿ.

ವೀರರಾಜೇಂದ್ರ ಚತ್ತಿತ್ ಬೊರಿ ಅಂಜಿ ವಾರ ಆಯಿತಿಂಜತ್. ಡಾ. ಇಂಗಲ್‌ಡ್ಯೂಕ್

ಈನಗುಂಡ್ ದುಂಬ ಮಾನಕೇಡಾಚಿ. ಡಾ.ಇಂಗಲ್ ಡ್ಯೂರ ಪಕ್ಕ ಬಂದಿತ್ ಸ್ವಾದೆ ರಾಜ ತಾನ್ ತಾಂಡ ಗೋವಾಕ್ ಪೋಪಿಂದ್ ಒಪ್ಪಿಗೆ ಕೇಟತ್. ತಾಂಗ್ ದುಂಬ ವಿರೋಧಿಯ ಉಳ್ಳಾನುಂಡ್ ಮಿಳ್ಳಾಕ್ ಅಪಾಯ ಆಪಾಂಗ್ ಮುಪ್ಪಡೆ ತಾನ್ ಪೋಪದ್ ನಲ್ಲದೊಂದ್ ಗೇನ ಮಾಡಿಯೇಂದೂ ಎಣ್ಣೆಯಂಡತ್.

ಡಾ.ಇಂಗಲ್ ಡ್ಯೂ, ಸ್ವಾದೆ ರಾಜ ಇಚ್ಚೆಕ್ ಬೆರಿಯ ತಾಂಡ ಅಧಿಕಾರ ಬುಟ್ತ್ ಕೊಡ್ಪಾಂಗ್ ವಿರೋಧ ಮಾಡ್ಚಿ. ತಾಂಡ ಸರ್ಕಾರತ್ಂಜ ತಾಂಡ ಕಾಗದಕ್ ಆದೇಶತ್‌ನ ಪಾರ ಕಾತಂಡ್ ಉಳ್ಳಾಂದೂ, ವೀರರಾಜೇಂದ್ರ ಚಾವಾಂಗ್ ಮುಪ್ಪಡೆ ಮಾಡ್‌ನ ರಾಜ್ಯಾಡಳಿತತ್‌ರ ಏರ್ಪಾಡ್‌ನ ಗ. ಜನರಲ್‌ರ ಒಪ್ಪಿಗೆ ಇಲ್ಲತೆ ತಾಂಗ್ ಒತ್ತವ ಕಯ್ಯಲೆಂದ್ ಎಣ್ಣೆಚಿ.

ಆಚೇಂಗಿ, ಸ್ವಾದೆ ರಾಜ ಅಕ್ಕಣೆಕ್ ಲಿಂಗರಾಜೇಂದ್ರ ಕೊಡಗೂರ ರಾಜ್ಯಾಡಳಿತ ವಹಿಸಿಯಂಡ ವಿಷಯತ್‌ನ ಎಣ್ಣೆಚಿ. ಇಕ್ಕ ಇಂಗಲ್‌ಡ್ಯೂ ತಾನ್ ಲಿಂಗರಾಜೇಂದ್ರನುಂಡ್ ಮೋಸಪೋಯಿಟಂದ್ ಅರಾಂಜಂಡತ್. ಅವ ಲಿಂಗ ರಾಜೇಂದ್ರ, ರಾಣಿರ ಅಧಿಕಾರತ್‌ನ ಬಲ್‌ಚಂಡಾಂಗ್ ವಿರೋಧ ಮಾಡ್ಚಿ. ಕೂಡೆನ್ನೆ ತಾನ್ ಕೊಡಗ್ ಬುಟ್ಟಿತ್ ಪೋಪ ನಿರ್ಧಾರತ್‌ನ ಎಣ್ಣೆಚಿ. ಆಚೇಂಗಿ, ಚೆರಿಯ ರಾಣಿ ಇದ್‌ನ ಅರಾಂಜಿತ್ ಅವ ಕೊಡಗಲೆ ಇಪ್ಪನ್ನಕೆ ಬೋಡಿಯಂಡತ್. ಆನಗುಂಡ್ ಬಂಗಾಳತ್‌ಂಜ ಸರ್ಕಾರತ್‌ರ ಆಜ್ಞಾಪತ್ರ ಬರಣೆಕ್ ಮಡಿಕೇರಿಲ್ ಇಪ್ಪಿಂದ್ ಒತ್ತಂಡತ್. ಆಚೇಂಗಿ, ಲಿಂಗರಾಜೇಂದ್ರಂಡ ಕೂಡೆ ಏದೇ ವ್ಯವಹಾರ ಮಾಡುವಕ್ ಒತ್ತಂಡ್‌ಲೆ.

ಡಾ.ಇಂಗಲ್ ಡ್ಯೂ ಮೈಸೂರ್‌ಲ್ ರೆಸಿಡೆಂಟ್ ಆಯಿತಿಂಜ ಕೋಲ್ ಸಾಹೇಬಂಗ್ ತಾನ್ ದುಂಬ ಸಾಧು, ಶಾಂತಿ ಪ್ರಿಯ, ವಿನಯವಂತಾಂದ್ ನಂಬಿತಿಂಜ ಲಿಂಗ ರಾಜೇಂದ್ರನುಂಡ್ ಇದಿಕ್ಕ ಮೋಸ ಪೋನ ಸತ್ಯತ್‌ನ ಅರಿಚಿಡಂಡಿಯಾಚಿ. ಈ ಪೋಲೆ ಕೋಲ್ ಸಾಹೇಬ, ತಾಂಗ್ ಬಂದ ಡಾ.ಡ್ಯೂಕೂರ ಕಾಗದತ್‌ನ ಚೆನ್ನೆ ಸರ್ಕಾರಕೂ, ಬಂಗಾಳ ಸರ್ಕಾರಕೂ ಅಯೆಚತ್.

ವೀರರಾಜೇಂದ್ರ ಚಾವಾಂಗ್ ಚೆನ್ನಂಗ್ ಮಿಳ್ಳಾ ಕೋಲ್ ಸಾಹೇಬ ಕೊಡಗೂರ ಅಕ್ಕತ ರಾಜಕೀಯ ಪರಿಸ್ಥಿತಿನ ವಿವರೊಚಿಟ್ಟಂಡ್, ಸ್ವಾದೆ ರಾಜ ತಾತ್ಕಾಲಿಕ ಆಯಿತ್ ಕೊಡಗೂರ ರಾಜ್ಯಭಾರ ವಹಿಸಿಯಂಡ ವಿಚಾರತ್‌ನ ಈ ದಂಡೂ ಸರ್ಕಾರಕೂ ಎಳ್ಳಿತಿಂಜತ್. ಅವಂಡ ಅಭಿಪ್ರಾಯ ವೀರರಾಜೇಂದ್ರ ಚತ್ತಪಿಳ್ಳಾ ಅವಂಡ ತಮ್ಮಣ ಲಿಂಗರಾಜೇಂದ್ರ, ಲಿಂಗರಾಜೇಂದ್ರ ಚತ್ತದು ಅವಂಡ ಮೋಂವ ಕೊಡಗೂರ ಉತ್ತರಾಧಿಕಾರಿ ಆಂಡು. ಲಿಂಗರಾಜಂಗ್ ಮೋಂವ ಇಲ್ಲೇಂಗಿ ಸ್ವಾದೆ ರಾಜಂಡ ಮೋಂವ ಕೊಡಗೂರ ರಾಜ

ಆಂಡು. ಕೊಡಗರ ರಾಜಂಗಕ್ ಕಣ್ಣು ಮಕ್ಕ ಇಲ್ಲತಪೋನಕ, ಅವಂಡ ಮೂಡಿಕುಳ್ಳಾಯಕ್ ರಾಜ್ಯತರ ಉತ್ತರಾಧಿಕಾರಿ ಆಪಕ್ ಹಕ್ಕಿಲ್ಲೆ ಎಣ್ಣುವದ್. ಅವಂಗ್ ಕೊಡಗ್ ರಾಜಂಗಡ ಮೂಲಪುರುಷ ಇಕ್ಕೇರಿ ರಾಜ ಮನೆತನತ್ ಮೂಡಿ ಕುಳ್ಳಾಯಕ್ ಸಿಂಹಾಸನ ಪತ್ತುವ ಹಕ್ಕು ಉಳ್ಳದ್ ಗೊತ್ತಿಂಚ್ಲೆ.

ಆನಗುಂಡ್ ಅವ ಬಂಗಾಳ ಸರ್ಕಾರಕ್ ತಾಂಡ ಅಭಿಪ್ರಾಯ ಎಳ್ಳಿತ್ ಮಡಿಕೇರಿಲ್ ಇಂಜ ಬ್ರಿಟಿಷ್ ಸರ್ಕಾರ ಪ್ರತಿನಿಧಿ ಕೊಡಗರ ರಾಜತ್ವತರ ವಿಷಯತ್ ಎನ್ನನೆ ನಡ್ಂದವಂಡೂಂದ್ ನಿರ್ದೇಶನ ಪಡ್ಂದವಕ್ ಬಯಂದತ್. ಅವ ತಾಂಡ ಮೀದ ಇಂಜ ಮೂಂದ್ ಅಭಿಪ್ರಾಯತನ ಸ್ವಾದೆ ರಾಜ ವಿರೋಧ ಮಾಡೂಂದ್ ಗೇನ ಮಾಡ್ಚಿ. ಎನ್ನಂಗಣ್ಣಕ ಅವಂಡ ಅಭಿಪ್ರಾಯಪೋಲೆ ಸ್ವಾದೆ ರಾಜ ಕೊಡಗನ ಆಳಿಯಂಡ್ ಇಂಜಕೊ ಅವಂಗ್ ರಾಜ್ಯತರ ಉತ್ತರಾಧಿಕಾರಿ ಆಪ ಹಕ್ಕಿಂಚ್ಲೆ.

ಜೂನ್‌ಲ್ ದೊಡ್ಡ ವೀರರಾಜೇಂದ್ರ ಚತ್ತದು ಕೋಲ್ ಸಾಹೇಬ, ಕೊಡಗರ ಮುಕ್ರಿಯ ಪಿಳ್ಳಾ ಕೊಡಗರ ಜನ ಎಲ್ಲ ಸ್ವಾದೆ ರಾಜಂಡ ಆಳ್ವಿಕೆನ ಒತ್ತಂಡತೇಂದೂ, ಆನಗುಂಡ್ ಬ್ರಿಟಿಷ್ ಸರ್ಕಾರ ಅವಂಡ ಆಳ್ವಿಕೆನ ಒತ್ತವಂಡೂಂದ್ ಚೆನ್ನೆ ಸರ್ಕಾರಕ್ ಎಳ್ವ್ಚಿ. ಜೂನ್ 18ಂಗ್ ರಾಜಂಡ ತಮ್ಮಣ ಲಿಂಗರಾಜೇಂದ್ರ, ಸ್ವಾದೆರ ಆಳ್ವಿಕೆಕ್ ಒಪ್ಪಿಗೆ ಕಾಟಾನಾನೊ ಎಳ್ವ್ಚಿ. ಜುಲೈ 4ಂಗ್ ಲಿಂಗರಾಜೇಂದ್ರ, ದೊಡ್ಡ ವೀರರಾಜೇಂದ್ರ ಚತ್ತಪಿಳ್ಳಾ ಕೊಡಗರ ಉತ್ತರಾಧಿಕಾರತ್ವತನ ಬಯಂದವತೆ, ಎದೇ ಗೊಂದಲಕೂ ಎಡೆಯಾಕತೆ ಅವಂಗ್ ಉದಾರ ರಾಜಕೀಯ ಸಂಬಳ ಕೊಡ್ಕೊಂಡೂಂದ್ ಶಿಫಾರಸ್ ಮಾಡಿತ್ ಸರ್ಕಾರಕ್ ಎಳ್ವ್ಚಿ. ಕೋಲ್ ಸಾಹೇಬ ಈ ಎಲ್ಲ ಕಾಗದತನ ದಾ. ಇಂಗಲ್ ಡ್ಯೂ ಎಕ್ಸೋಲು ಮಡಿಕೇರಿಂಜ ಅಯೆಚಂಡಿಂಜ ವರದಿನ ನೋಟಿಯಂಡ್ ಚೆನ್ನೆ ಸರ್ಕಾರಕೂ, ಬಂಗಾಳ ಸರ್ಕಾರಕೂ ಎಳ್ಳಿಯಂಡ್ ಇಂಜತ್.

ಕೋಲ್ ಸಾಹೇಬಂಡ ಆಖೀರಿ ಕಾಗದ ಚೆನ್ನೆ ಸರ್ಕಾರಕ್ ಎತ್ತುವಕ ಲಿಂಗರಾಜೇಂದ್ರ ಕೊಡಗರ ರಾಜ್ಯಭಾರ ವಹಿಸಿಯಂಡಿತ್. ಅಲ್ಲಿಂಜ ಸ್ವಾದೆ ರಾಜ ತಾಂಗ್ ಓರ್ ಲಕ್ಷ ಪಣ ಪಿಳ್ಳಾ ತಾಂಗ್ ತಾಂಡ ರಾಜ್ಯಕ್ ಪೋಪಾಂಗ್ ಪ್ರಯಾಣ ಖರ್ಚ್ ನಾಲಾಯಿರ ಉರ್‌ಪಿಯ ತಂದಕ ತೃಪ್ತಿಂದ್ ಎಣ್ಣ್ಚಿ. ಅನ್ನನೆ ಕೊಡಗರ ಖಜಾನೆಂಜ ಅವ ಕೇಟ ಪಣತನ ಅವಂಗ್ ಕೊಡ್ತಪಿಳ್ಳಾ ಅವ ತಾಂಡ ಸ್ವಂತ ರಾಜ್ಯ ಗೋವಾತರ ಬಾಂದೇವಾಡಿಕ್ 1809ನೆ ಆಖೀರತ್ ಪೋಚಿ.

## ಲಿಂಗರಾಜೇಂದ್ರ ಒಡೆಯ ಚೆನ್ನೈ ಗವರ್ನರ್‌ಕ್ ಓರ್ ನಿಯೋಗತರ ಕೂಡೆ ಕೊದಿಮೊದ ಪಿಳ್ಳಾ ಕಾಗದ ಅಯೆಚಿತ್

ಈಂಡೆಡೆಲ್ ಲಿಂಗರಾಜೇಂದ್ರಂಗ್ ಕಂಪೆನಿ ಸರ್ಕಾರಕ್ ತಾಂಡ ಮೀದ ಕೆಟ್ಟು ಅಭಿಪ್ರಾಯ ಬಂದಿತಿಕ್ಕೊಂದ್ ಪೋಡಿಯಾಚಿ. ಆನಗುಂಡ್ ಅವ ಅದೇ ಕಾಲ ಚೆನ್ನೈ ಸರ್ಕಾರಕ್ ತಾಂಡ ಅಧಿಕಾರಿಯಳಾಯಿತಿಂಜ ಅಯ್ ಪೊನ್ನಪ್ಪ, ಮುತ್ತಣ್ಣ ಪಿಳ್ಳಾ ಪಾರ್ಸಿಹೀರ್ಜಿರ ಓರ್ ನಿಯೋಗತನ ಅಯೆಚಿತ್, ಅಯಿಂಗಡ ಕೂಡೆ ದೊಡ್ಡ ವೀರರಾಜೇಂದ್ರಂಡ ಓರ್ ಬಲ್ಯ ಪೋಟೋ ಪಿಳ್ಳಾ ಕೊದಿಮೊದತನ ಕೊಡಪನ್ನಕೆ ಎಣ್ಣೆಚಿ.

ಚೆನ್ನೈ ಸರ್ಕಾರ ಲಿಂಗರಾಜೇಂದ್ರ ಅಯೆಚ ಕೊದಿ ಮೊದತನ ಕುಶಿಲ್ ಸ್ವೀಕಾರ ಮಾಡಿತ್, ನಿಯೋಗಕಾರಕ್ ಇನಾಂ ಕೊಡತಿತ್ ಲಿಂಗರಾಜಂಗ್ ಸಮಧಾನ ಆಪನ್ನತ ಓರ್ ಕಾಗದ ಅಯೆಚಿತ್. ಅದತ್ ಲಿಂಗ ರಾಜೇಂದ್ರ, ರಾಣಿ ದೇವಮ್ಮಾಜಿ ಪಿಳ್ಳಾ ವೀರರಾಜೇಂದ್ರಂಡ ಬೋರೆ ಮಕ್ಕಳ ಚಾಕುವ ಜವಾಬ್ದಾರಿ ಎಡ್‌ತಂಡ್, ದೇವಮ್ಮಾಜಿರ ಆಸೆರಪೋಲೆ ಅವಡ ರಾಜ್ಯತನ ಅವಡ ಪರವಾಯಿತ್ ಆಳಿಯಂಡ್ ಉಳ್ಳಾಂಗ್ ಸ್ವಾದೆ ರಾಜಂಗ್ ಉದಾರ ಪಣ ಕೊಡತಿತ್ ಅಯೆಚಾಂಗ್ ವೀರರಾಜೇಂದ್ರ ಒಡೆಯಂಡ ಪೋಟೋ ತಂದಾಂಗ್ ಆಖೀರಕ್ ಕಂಪೆನಿ ಸರ್ಕಾರ ಕುಶಿ ಕಾಟಿತ್, ಲಿಂಗರಾಜೇಂದ್ರಂಡ ಕೂಡೆ ಸಿನೇತಿಕೆಲ್ ಇಪ್ಪನ್ನಕೆ ಎಳ್ಳಿತಿಂಜತ್.

ಲಿಂಗರಾಜೇಂದ್ರಂಗೂ, ರಾಣಿ ದೇವಮ್ಮಾಜಿಕೂ ಗ.ಜನರಲ್ ಕಾಗದ ಎಳ್ಳೆನಾಂಗ್ ಕಂಪೆನಿ ಸರ್ಕಾರ ಲಿಂಗರಾಜೇಂದ್ರಂಡ ಚೆರಿಯ ಬಯತ್‌ರ ರಾಣಿರ ಪೋಷಕ ಪಿಳ್ಳಾ ಅವಡ ರಾಜ್ಯ ಪ್ರತಿನಿಧಿಂದ್ ಅಂಗೀಕಾರ ಮಾಡಿತಿಂಜತ್. ಮಿಳ್ಳಾಕ್ ಅವಂಡ ಅಣ್ಣಂಡ ಮೋವ ರಾಣಿ ದೇವಮ್ಮಾಜಿರ ಮೀದೇತ ಪ್ರೀತಿ ಪಿಳ್ಳಾ ಯೋಗ್ಯ ಪಟ್ಟ ಬೋಜಪ್ಪಂಗ್ ತಾಂಗ್ ಕೊಡಗ್ ರಾಜ್ಯತರ ಮೀದ ಹಕ್ಕನ ಬುಟ್ಟ್, ತಪ್ಪನ್ನಕೆ ಮಾಡಿತ್ ಆಂಡ ಮೀದ ಓರ್ ಕರಾರ್ ಕಾಗದಕ್ ಅವಡ ಸೈನ್ ಇಡುವದ್ ಆಯಿತಿಂಜತ್.

ರಾಣಿ ದೇವಮ್ಮಾಜಿ ಲಿಂಗರಾಜಂಡ ಆಸೆರನ್ನಕೆ ಅವ ತಯಾರ್ ಮಾಡ್‌ನ ಕರಾರ್‌ಕ್ ಸೈನ್ ಇಟ್ಟತ್. ಲಿಂಗರಾಜೇಂದ್ರ ಒಡೆಯ ಇದ್‌ನ ಕೋಲ್ ಸಾಹೇಬಂಗ್ ಅಯೆಚಿತ್, ಅದ್‌ನ ಚೆನ್ನೈ ಗವರ್ನರ್‌ಕೂ, ಬಂಗಾಳಕೂ ಎತ್ತಿಚಿಡುವನ್ನಕೆ ಕೇಟಂಡತ್. ಈ ಕಾಗದ ಕೋಲ್ ಸಾಹೇಬಂಗ್ 1810ನೆ ಇಸವಿಲ್ ಅಯೆಚಿತ್.

ಆ ಕಾಗದತರ ಇಂಗ್ಲೀಷ್ ತರ್ಜುಮೆ ಇನ್ನನೆ ಉಂಡ್.

From the Rani of Coorg Received 9th September 1810

After the proper expression of respect, I proceed to make known my sentiments to your Lordship. I have been honoured by the receipt of your Lordship's friendly letter under the date the 28th of Feb. 1810 which was delivered to me by Eia Punna. Mootanna and Heerjee Parsee. The contents of it have afforded me great satisfaction and I consider it as conferring the highest honour on me. Your Lordship's desire that I should accept the badge which was intended for my deceased father and that I should wear it as an amulet of hereditary favour and protection from the British Govt was made known to me and the moment that I received the amulet from Mr. Cole, considering it as a pledge of the protection of the British Govt, I made a solem return of thanks for so great a blessing and binding it on my arm. I imagined myself possessed of temporal and eternal happiness, for this token of your Lordship's gracious letter, it is stated that the arrangement which has been made for the administration of the Govt. of Coorg during your Minority has my entire approbation, as your uncle and guardian Ling Rajender Wuddeer was justly the object of your choice, while from his respectable character he possesses in a great degree the confidence and affection of the people. I am satisfied that an administration conducted by his virtues and abilities is calculated to promote the prosperity of your country and the happiness of your subjects.

In reply I beg to assure your Lordship that the fatherly kindness and attention of my respected uncle towards myself and all classes of people in the country, exceeds the powers of expression. Although it is now a year and a half since the death of my father Veer rajender Wuddeer, yet such has been the kindness of my uncle, that I have never had the occasion to regret his loss, indeed there is



no one who is calculated to have charge of my interests and those of my family and dependents, who is qualified to conduct the affairs of the Govt, or worthy of filling the Musnud, excepting Ling Rajender Wuddeer. When therefore I Attain my full age, I propose to lead a life of retirement. It would then be impossible that the administration of public affairs, the maintenance and efficiency of the army, the wants of the people, or my own comfort should be provided for without the assistance of my respected uncle, who in fact supplies the place of my father. I have therefore resigned to him for ever the Musnud and Govt of this country that he may take me under the wing of his protection and watching over the welfare of all my subjects, may preserve inviolate the dignity and prosperity of this kingdom. By day and by night my prayers are addressed to the throne of the almighty that he may long preserve my respected uncle in honour and happiness, for the protection of myself and my people secure under the protection of my revered uncle. I shall pass my whole life in rendering my tribute of gratitude to the British Govt and generally to all the English gentlemen, and in offering up my prayers for their prosperity.

(A true translation)

(Sd) C.A. MOLONY  
Asst to the Persian  
Secretary to Government  
(A true copy)  
(Sd) N.B. Edmonstone  
Chief Secretary to Govt.

ಈ ಕಾಗದ ಪಿಳ್ಳಾ ಕೋಲಾರ ಕಾಗದಕ್ ಜವಾಬ್ ಆಯಿತ್ ಕೊಡಗುರ ರಾಜ್ಯಾಧಿಕಾರ ವಿಷಯತರ ಮೀದ ಬಂಗಾಳತ ಗವರ್ನರ್ ಜನರಲ್ ಮಾರ್ಕ್ವೀಸ್ ಆಫ್ ಹೆಸ್ಟಿಂಗ್ಸ್ ಲದೇ ಕಾಲ ಡಿಸೆಂಬರ್ 14ಂಗ್ ತಾಂಡ ಸರ್ಕಾರತರ ತೀರ್ಮಾನಕ್ ಸೈನ್ ಇಟ್ಟಿತ್ ಚೆನ್ನೈ ಸರ್ಕಾರಕ್ ಅಯೆಚತ್.

ಅವಂಡ ದೃಷ್ಟಿಲ್ ಚೆರಿಯ ಬಯತ್‌ರ ರಾಣಿ ತಾಂಡ ಸಿಂಹಾಸನ ಹಕ್ಕನ ಲಿಂಗರಾಜಂಗ್ ಬುಟ್ಟಾಕೊಡ್‌ತಿತ್ ಎಳ್ವೊನ ಕಾಗದತ್ ಏದೆ ಬೆಲೆ ಇಂಜ್‌ಲೆ. ಎನ್ನಂಗ್ಲೆಣ್ ಚೆರ್ಪತಂಜೆ ಅವಕ್ ಸ್ವತಂತ್ರ ಆಯಿತ್ ಗೇನ ಮಾಡುವ ತಾಕತ್, ಹಕ್ಕ ಪಂಡೊಂದ್ ಅರ್‌ಂಜವಕ್ ಸಾಧ್ಯ ಇಂಜ್‌ಲೆ. ರಾಣಿ ದೇವಮ್ಮಾಜಿ ಎಳ್ವೊನ ಕಾಗದ ಓದ್‌ನಕ ಅದ್ ಲಿಂಗರಾಜೇಂದ್ರನ್ ಅವಳ ಸಿಂಹಾಸನತ್‌ಂಜ ಬಲ್‌ಚಿತ್ ಇಡೊಂಡೊಂದ್ ತಾನೆ ಅವಕ್ ಎಣ್ಣೆತ್ ಎಳ್ವೊಚಿಟ್ಟಿನ್ನೆಗೆ ಗೊತ್ತಾಪ ಇಂಜತ್! ಎನ್ನನೆಯೂ ಗ.ಜನರಲ್ ಆ ನೇರತ್ ಕೊಡಗರ ರಾಜ್ಯಭಾರ ಹಕ್ಕರ ಮೀದ ಏದ್ ತೀರ್ಮಾನ ಎಡ್‌ತವ ಅವಶ್ಯ ಇಲ್ಲೇಂದ್ ಚೆರಿಯ ಬಯತ್‌ರ ರಾಣಿ, ಬಯತ್‌ಕ್ ಬಂದದು ಅವ ನೇರಾಯಿತೂ ಕೊಡಗರ ಸಿಂಹಾಸನತ್‌ರ ಮೀದ ತಾಂಗುಳ್ಳ ಹಕ್ಕನ ಬುಟ್ಟಾಕೊಡ್‌ಪ ನಿರ್ಧಾರಕ್ ಬಪ್ಪ ಎಣ್ಣುವಾನ ಅಕ್ಕ ವಿಚಾರಣೆ ಮಾಡೊಲು. ಅದ್‌ಂಗ್ ಇಣ್ಣೊ ದುಂಬನೇರ ಉಂಡೊಂದ್ ಅಭಿಪ್ರಾಯ ಪಟ್ಟಿತ್.

1811ನೆ ಇಸವಿಲ್ ಲಿಂಗರಾಜೇಂದ್ರ ತಾನ್ ಕೊಡಗರ ಸಿಂಹಾಸನತ್‌ನ ಖಾಯಂ ಆಯಿತ್ ವಹಿಸಿಯಂಡಿಯೆಂದ್ ಚೆನ್ನೈ ಸರ್ಕಾರಕ್ ಅರಿಚಿಟ್ಟಿತ್. ಅಕ್ಕ ಚೆನ್ನೈ ಗವರ್ನರ್ ತಾಂಡ ಆಡಳಿತ ಸಭೆರ ತೀರ್ಮಾನಪೋಲೆ ಮೈಸೂರ್‌ರ ಬ್ರಿಟಿಷ್ ರೆಸಿಡೆಂಟ್‌ಕ್ ಅವ ಕೊಡಗಕ್ ಪೋಯಿತ್ ಕೊಡಗರ ಕಾನೂನ್ ಪಿಣ್ಣಾ ಸಂಪ್ರದಾಯತ್‌ರ ಪೋಲೆ ಲಿಂಗರಾಜೇಂದ್ರ ಒಡೆಯಂಗ್ ಕೊಡಗರ ಸಿಂಹಾಸನತ್ ಹಕ್ಕ ಉಂಡಾಂದ್ ಕೊಡಗರ ಮುಕ್ರಿಯಳ ವಿಚಾರಣೆ ಮಾಡಿತ್ ಅರಿಯೊಂಡೊಂದ್ ಎಳ್ವೊಚಿ.

ಆಚೇಂಗಿ, ಮೈಸೂರ್ ರೆಸಿಡೆಂಟ್ ಈ ಕಾರ್ಬಾರ್‌ರ ಮೀದ ಮಡಿಕೇರಿಕ್ ಬಂದಿತಿಂಜಕೊ ಪ್ರಯೋಜನ ಆಪಕಿಂಜ್‌ಲೆ. ಎನ್ನಂಗ್ಲೆಣ್ ಕೊಡಗಲ್ ತಾಂಡ ಬದ್‌ಕರ ಮೀದ ಆಸೆ ಉಳ್ಳ ದಾರಾಚೇಂಗೂ ಅಕ್ಕ ರಾಜತ್ವತ್‌ನ ವಹಿಸಿಯಂಡಿಂಜ ಲಿಂಗರಾಜೇಂದ್ರ ಒಡೆಯಂಡ ಸಮ್ಮಂಧತ್‌ರ ವಿಚಾರತ್ ಸತ್ಯ ಸಂಗತಿನ ಎಣ್ಣುವನ್ನೆಗೆ ಇಂಜ್‌ಲೆ.

ಇಕ್ಕ ಲಿಂಗರಾಜೇಂದ್ರ ಒಡೆಯ ತಾಂಡ ಅಣ್ಣಂಡ ಮೋವಡ ರಾಜ್ಯತ್‌ರ ಹಕ್ಕನ ಬರಿಕ್‌ಟ್ಟಿತ್ ತಾನ್ ಕೊಡಗರ ರಾಜ್ಯಾಧಿಕಾರ ವಹಿಸಿತಿಂಜತ್. ಇನ್ನನೆ ರಾಜ್ಯಾಧಿಕಾರ ವಹಿಸಿಯಂಡಾಂಗ್ ಈಸ್ಟ್ ಇಂಡಿಯಾ ಕಂಪೆನಿ ಸರ್ಕಾರ ಸೀದ ಒಪ್ಪಿಗೆ ಕೊಡ್‌ಕತೆ ಇಂಜಕೋ ಮುಂಡತೆ ಕೂಡಿರ್‌ತ್. ಆಚೇಂಗಿ, ಲಿಂಗರಾಜೇಂದ್ರಂಗ್ ತಾಂಡ ಆಸೆನ ತೇತವಕ್ ಓರ್ ಕಾರ್ಬಾರ್ ಬಾಕಿ ಇಂಜತ್.

ಅದ್ ದೇವಮ್ಮಾಜಿರ ಪೆದತ್ ಮುಂಬೈ ಸರ್ಕಾರತ್ ದೊಡ್ಡ ವೀರರಾಜೇಂದ್ರ ಬೆಚ್ಚಿತಿಂಜ ಮೂಂದ್ ಲಕ್ಷ ಉರ್‌ಪಿಯತ್‌ನ ಚೆನ್ನೈ ಸರ್ಕಾರತ್ ಬೆಚ್ಚಿ ಅಂಜರೆ ಲಕ್ಷ

ಉರ್‌ಪಿಯಕೂ ಏರ ಪಣತ್‌ನ ತಾಂಡದಾಕಿಯವದ್. 1811ನೆ ಇಸವಿಲ್ ಇದ್‌ಂಗ್ ಲಿಂಗ ರಾಜೇಂದ್ರ ಒಡೆಯ ಈ ದಂಡ್ ಸರ್ಕಾರತ್‌ರ ಕೂಡೆ ಪತ್ರ ವ್ಯವಹಾರ ಮಾಡ್‌ಚಿ. ಅದೇ ಕಾಲ ಚೆನ್ನೈ ಸರ್ಕಾರತ್‌ರ ಖಜಾನೆಲ್ ವೀರ ರಾಜೇಂದ್ರ ನಿರ್ಕ್ ಬೆಚ್ಚಿತಿಂಜ ಪಣತ್‌ರ ಮೀದ ಬಡ್ತಿ ಪಣತ್‌ನ ಕೊಂಡಬಪ್ಪಕ್ ಲಿಂಗರಾಜೇಂದ್ರ ಚೆನ್ನೈಕ್ ತಾಂಡ ಚೆನ್ನಂಗ್ ಪ್ರತಿನಿಧಿಯಳ ಅಯೆಚತ್.

ಚೆನ್ನೈ ಸರ್ಕಾರತ್‌ರ ಪಣ ವ್ಯವಹಾರತ್‌ರ ಅಧಿಕಾರಿ ಸುರೂಲ್ ವೀರರಾಜೇಂದ್ರಂಡ ಮೋವ ದೇವಮ್ಮಾಜಿರ ಪೆದತ್ ಇಂಜ ಪಣತ್‌ರ ಬಡ್ತಿನ ದೇವಮ್ಮಾಜಿಂಜ ಅಧಿಕಾರ ಪತ್ರ ಪಡ್‌ಂದ ಅವಡ ಪ್ರತಿನಿಧಿಯಕ್ ಅಲ್ಲತೆ ಬೋರೆ ದಾರ್‌ಕೂ ಕೊಡ್‌ಪಕಯ್ಯುಲೆಂದ್ ಎಣ್ಣ್‌ಚಿ. ಅಕ್ಕ ಲಿಂಗರಾಜೇಂದ್ರ, ವೀರರಾಜೇಂದ್ರ ತಾಂಡ ಮೋವ ಕೊಡಗುರ ರಾಣಿಯಾಂಡೂಂದ್ ಉದ್ದೇಶಪಟ್ಟಿತ್ ಅಚ್ಚಕ್ ಬಲ್ಯ ಪಣತ್‌ನ ಅವಡ ಪೆದತ್ ಬೆಚ್ಚಿತ್‌ಂದ್ ಆನಕ ಇಕ್ಕ ತಾನ್ ಕೊಡಗುರ ರಾಜ್ಯಭಾರ ಮಾಡಿಯಂಡ್ ಉಳ್ಳಾನುಂಡ್ ರಾಜ್ಯಕ್ ಕೂಡ್‌ನ ಆ ಪಣ ರಾಜ ಮನೆತನತ್‌ರ ಏದೇ ಓರ್ ವ್ಯಕ್ತಿರ ಸ್ವಂತ ಸೊತ್ತೆಂದ್ ಪರಿಗಣನೆ ಮಾಡುವಾನ ತಾನ್ ಪ್ರತಿಭಟನೆ ಮಾಡುವೀಂದ್ ಚೆನ್ನೈ ಸರ್ಕಾರಕ್ ಎಳ್ಳ್‌ಚಿ.

ಇದೇ ನೇರತ್ ಲಿಂಗರಾಜೇಂದ್ರ ಮುಂಬೈ ಸರ್ಕಾರತ್ ಇಂಜ ದೇವಮ್ಮಾಜಿರ ಮೂಂದ್ ಲಕ್ಷ ಪಣತ್‌ನ ತಾಂಡದಾಕಿಯವಕ್ ಪ್ರಯತ್ನ ಮಾಡಿಯಂಡ್ ಇಂಜತ್. ಈಸ್ಟ್ ಇಂಡಿಯಾ ಕಂಪೆನಿ ಸರ್ಕಾರ ಈ ನೇರತ್ ಮುಂಬೈ ಸರ್ಕಾರತ್ ಸಾರ್ವಜನಿಕಂಗಡ ಠೇವಣಿರ ಮೀದ ಬಡ್ತಿನ ಕಮ್ಮಿ ಮಾಡ್‌ಚಿ. ಈ ಕಮ್ಮಿ ಬಡ್ತಿನ ತಂಗಡ ಠೇವಣಿಕ್ ಎಡ್‌ತವಕ್ ಇಷ್ಟಪಡತವು ತಂಗಡ ಠೇವಣಿ ಪಣತ್‌ನ ವಾಪಾಸ್ ಪಡ್‌ಂದವಲೂಂದ್ ಮುಂಬೈ ಸರ್ಕಾರ ಠೇವಣಿದಾರಕ್ ಅರಿಚಿಟ್ಟತ್.

ಲಿಂಗರಾಜೇಂದ್ರ ಒಡೆಯ ಈ ಸಂದರ್ಭತ್ ತಾಂಡ ಉದ್ದೇಶ ಸಾಧನೆಕ್ ಬಳಸಿಯಂಡ್ ದೇವಮ್ಮಾಜಿರ ಪೆದತ್ ಇಂಜ ಮೂಂದ್ ಲಕ್ಷ ಉರ್‌ಪಿಯ ಠೇವಣಿನ ಪೋರ್ಬಸ್ ಕಂಪೆನಿ ಎಣ್ಣುವ ಇಂಗ್ಲೀಷ್ ವರ್ತಕಂಗ್ ಮಾರ್‌ಚಿ. ಈ ಕಂಪೆನಿಕಾರ ಠೇವಣಿ ಪಣತ್‌ನ ತಂಗಕ್ ತರೊಂಡೂಂದ್ ಮುಂಬೈ ಕಂಪೆನಿ ಸರ್ಕಾರತ್‌ನ ಕೇಟತ್. ಆಚೇಂಗಿ, ಈ ಠೇವಣಿ ಲಿಂಗರಾಜೇಂದ್ರಂಡ ಪೆದತ್ ಇಲ್ಲತಾನಗುಂಡ್ ಮುಂಬೈ ಸರ್ಕಾರತ್‌ರ ಖಜಾನೆ ಅಧಿಕಾರಿಯ ಈ ಪಣತ್‌ನ ಪೋರ್ಬಸ್ ಕಂಪೆನಿಕ್ ಕೊಡ್‌ತಾಲೆ. ತಂಗಡ ಮೀದ ವೀರರಾಜೇಂದ್ರ ಬೆಚ್ಚ ಪಣತ್‌ರ ಮೀದ ಎನ್ನನೆ ವ್ಯವಹಾರ ಮಾಡೊಂಡೂಂದ್ ಮುಂಬೈ ಪಿಳ್ಳಾ ಚೆನ್ನೈ ಸರ್ಕಾರ ಬಂಗಾಳತ್‌ರ ಸರ್ವೋನ್ನತ ಸರ್ಕಾರತ್‌ನ ಕೇಟತ್.

ಬಂಗಾಳತ್ ರ ಗ.ಜನರಲ್ ಮುಂಬೈ, ಚೆನ್ನೈ ಸರ್ಕಾರತ್ ವೀರರಾಜೇಂದ್ರ ದೇವಮ್ಮಾಜಿರ ಪೆದತ್ ಬೆಚ್ಚ ಪಣ ದಾರ್ಕ್ ಪೋಂಡೂಂದ್ ದೇವಮ್ಮಾಜಿ ಬಯತ್ ಹ್ ಬಂದಪಿಳ್ಳಾ ತೀರ್ಮಾನ ಮಾಡೂಲೂಂದ್ ಆಚೀಂಗಿ ಆ ನೇರಕೆತ್ತನೆ ಅಯಿಂಗಡ ಪೋಷಕ ಆಯಿತ್ ಪಿಳ್ಳಾ ಕೊಡಗುರ ರಾಣಿರ ಪ್ರತಿನಿಧಿ ಆಯಿತ್ ಲಿಂಗರಾಜೇಂದ್ರ ಆ ಪಣತ್ ರ ಬಡ್ತಿ ಪಡ್ಂದವಲೂಂದ್ ಚೆನ್ನೈ ಸರ್ಕಾರಕ್ ಅಪ್ಪಣೆ ಕೊಡ್ತತ್.

ಮುಂಬೈ ಸರ್ಕಾರತ್ ವೀರರಾಜೇಂದ್ರ ಬೆಚ್ಚಿತಿಂಜ ಪಣ ತಾಂಗ್ ಬರೊಂಡೂಂದ್ ಲಿಂಗರಾಜೇಂದ್ರ ಕೋರ್ಟ್ ವ್ಯವಹಾರ ಮಾಡಿತ್ ತೀರ್ಪು ಪಡ್ಂದಕ ಅವಂಡ ಹಕ್ಕ್ ಪಡ್ಂದಯಿಂಗಕ್ ಆ ಪಣತನ ಕೊಡ್ಕೊಲೂಂದ್ ಗ.ಜನರಲ್ ಮುಂಬೈ ಸರ್ಕಾರಕ್ ಎಳ್ಚಿ.

ಲಿಂಗರಾಜೇಂದ್ರ ಈ ಪಣತ್ ರ ಮೀದ ಕೋರ್ಟ್ ಪೋಷಕ್ ಬಯಂದ್ಲೆ. ಆಚೀಂಗಿ, ಅವ ಅಲ್ಲಿಂಜ ಎನ್ನನೆಯೋ ದೇವಮ್ಮಾಜಿರ ಪೆದತ್ ಇಂಜ ಪಣತನ ತಾನೆ ಪಡ್ಂದಂಡತ್. ಚೆನ್ನೈ ಸರ್ಕಾರತ್ ಇಂಜ ಪಣಕ್ ಚೆನ್ನೈರ ಬಿನ್ನಿ ಕಂಪೆನಿಕಾರ ಕಾಲೋದಿ ಆದ್ ದೇವಮ್ಮಾಜಿರ ಪರವಾಯಿತ್ ಬಡ್ತಿ ಪಡ್ಂದಿತ್ ಲಿಂಗರಾಜೇಂದ್ರಂಗ್ ಕೊಡ್ತತ್. ಅಲ್ಲಿಂಜ ಲಿಂಗರಾಜೇಂದ್ರಂಡ ಪೆದತ್, ಅವಂಡ ಕಾಲ ಕೈಂಜದು ಅವಂಡ ಮೋಂವ ಚಿಕ್ಕವೀರ ರಾಜೇಂದ್ರಂಡ ಪೆದತೂ ಬಡ್ತಿನ ಪಡ್ಂದ್ ಕೊಡ್ತತ್. ದೇವಮ್ಮಾಜಿರ ಪೆದತ್ ಇಂಜ ಕರಾರ್ ಪತ್ರ ಲಿಂಗರಾಜೇಂದ್ರ ಪಿಳ್ಳಾ ವೀರರಾಜೇಂದ್ರ ಇಯಂಗಡ ಪೆದಕ್ ಎನ್ನನೆ ವರ್ಗ ಆಚೀಂದ್ ಗೊತ್ತಾಪುಲೆ.

ಲಿಂಗರಾಜೇಂದ್ರ ಒಡೆಯ 1811ತ್ ಇಂಜ ಕೊಡಗುರ ರಾಜತ್ವತನ ಮನಾರ ವಹಿಸಿಯಂಡತ್ಂದ್ ಎಣ್ಣೊಲು. 1810ಲ್ ಅವ ರಾಣಿ ದೇವಮ್ಮಾಜಿಂಜ ಅವ ಅವಂಗ್ ಕೊಡಗುರ ರಾಜ್ಯತ್ ರ ಹಕ್ಕ್ ನ ಬುಟ್ಟ್ ಕೊಡ್ತ ಕಾಗದತನ ಕಂಪೆನಿ ಸರ್ಕಾರಕ್, ಅಯಿಂಗಡ ಅರಿವಿಕೆಕ್ ಅಯೆಚಿತಿಂಜತ್. ದೇವಮ್ಮಾಜಿರ ಪೆದತ್ ವೀರರಾಜೇಂದ್ರ ಒಡೆಯ ಕಂಪೆನಿ ಸರ್ಕಾರತ್ ಬೆಚ್ಚ ಪಣಕ್ ಬಡ್ತಿನ ಪಡ್ಂದವಕ್ ಕಂಪೆನಿ ಸರ್ಕಾರ ಅವಂಗ್ ತೊಂದರೆ ಮಾಡ್ಲೆ.

ಇನ್ನನೆ ಕಂಪೆನಿ ಸರ್ಕಾರ ದೇವಮ್ಮಾಜಿರ ಪೆದತ್ ಇಂಜ ಕೊಡಗುರ ರಾಜ್ಯತನ ಸ್ವತಂತ್ರ ಆಯಿತ್ ಆಳುವಕ್ ಪಿಳ್ಳಾ ಅವಡ ಪೆದತ್ ಇಂಜ ಪಣತ್ ರ ಬಡ್ತಿನ ಕಾಲೋದಿ ಪಡ್ಂದವಕ್ ಲಿಂಗ ರಾಜೇಂದ್ರಂಗ್ ತೊಂದರೆ ಮಾಡತೆ ಇಂಜಾನುಂಡ್ ಕಂಪೆನಿ ಸರ್ಕಾರ ವೀರರಾಜೇಂದ್ರ ಒಡೆಯಂಡ ಆಖೀರಿ ಆಸೆಕೆತ್ತನೆಕೂ ಅವಂಗ್ ಆಖೀರಿ ಕಾಲತ್ ಕೊಡ್ತ ತಕ್ಕ್ ಹ್ ವಿರೋಧ ಮಾಡ್ನನ್ನೆ ಇಂಜತ್.

ಇನ್ನನೆ ಇಂಜಕೋ ಲಿಂಗರಾಜೇಂದ್ರಂಡ ಮನಸ್ಸಲ್ ಕಂಪೆನಿ ಸರ್ಕಾರ ವೀರ ರಾಜೇಂದ್ರಂಡ ಆಖೀರಿ ಆಸೆರನ್ನಕೆ ಎಕ್ಕಾಚೇಂಗೂ ಒಮ್ಮತೆ ರಾಜ್ಯಾಧಿಕಾರತಾಂಜ ಕೋದಕ್ ಉಳ್ಳಪು ಎಣ್ಣುವ ಪೋಡಿ ಇಂಜತ್. ಈ ಪೋಡಿಂಜ ಅವ ಕಂಪೆನಿ ಸರ್ಕಾರತಾರ ಕೂಡೆ ಎಕ್ಕೋಲು ದುಂಬ ಗೌರವ, ಭಕ್ತಿ, ವಿನಯತ್ ನಡೊಂದವ ಇಂಜತ್. ಆಚೇಂಗೂ ಮನಸ್ಸಲ್ ಅಯಿಂಗಕ್ ಬೊತ್ತಿಯಂಡ್ ತಾಂಡ ರಾಜ್ಯತಾರ ತೆರಿನ ಭದ್ರ ಪಡ್ತಿಯವ ಇಂಜತ್ ಪಿಳ್ಳಾ ತಾಂಡ ಪ್ರಜೆಯ ಕಂಪೆನಿ ಸರ್ಕಾರತಾರ ಅಧಿಕಾರಿಯಡ ಕೂಡೆ ಏದೇ ಸಮ್ಮಂಧ ಬೆಚ್ಚವತನ್ನಕೆ ನಿರ್ಬಂಧ ಮಾಡಿತಿಂಜತ್. ಆಚೇಂಗಿ, ತಾನ್ ಇಂಗ್ಲೀಷ್ ಅಧಿಕಾರಿಯಕ್ ತಾಂಡ ಅಣ್ಣನೆ ತಾಂಗ್ ಆಪ್ತಂಗಾಂದ್ ಕಾಟಿಯವಕ್ ಅಯಿಂಗಳ ಗೆಡಿ ಗೆಡಿ ತಾಂಡ ರಾಜ್ಯಕ್ ಬೋಟೆಕ್ ಕಾಕುವ ಇಂಜತ್. ಅಯಿಂಗಳ ಪೇರ್ತ್ ಚಾಯಿತೆ ತಕ್ಕಾರ ಮಾಡುವ ಇಂಜತ್. ಓರಮ್ಮತೆ ಐರೋಪ್ಯ ಮಿಲಿಟರಿ ಅಧಿಕಾರಿಯಡನ್ನಕೆ ಬಟ್ಟೆ ಇಟ್ಟಂಡ್ ತಾನೂ ಅಯಿಂಗಡ ರೀತಿ ನೀತಿನ ಅನುಸರಣೆ ಮಾಡಿಯಂಡ್ ಉಳ್ಳಂದೂ, ತಾಂಡ ಪ್ರಜೆಯಳುಂಡ್ ತಾನೋರ್ ಆದರ್ಶ ರಾಜಾಂದ್ ಕಾಕ್‌ಚಿಟ್ಟಂಡ್ ಉಳ್ಳಂದೂ ಕಂಪೆನಿ ಸರ್ಕಾರತಾರ ಅಧಿಕಾರಿಯಕ್ ಅರ್ಥ ಮಾಡುವಕ್ ಪೇಚಾಡುವ ಇಂಜತ್. ಅನ್ನನೆ ತಾನೋರ್ ಸ್ವತಂತ್ರ ರಾಜಾಂದ್ ಕಾಟಿಯವ ಇಂಜತ್. ಆಚೇಂಗಿ, ಕಂಪೆನಿ ಸರ್ಕಾರ ವೀರರಾಜೇಂದ್ರ ಒಡೆಯಂಡ ಮರಣಶಾಸನತಾರನ್ನಕೆ ನಡೊಂದವಕ್ ಪರೋಕ್ಷವಾಯಿತ್ ತಕ್ಕ ಕೊಡತಕೊ ಅದಾನ್ ಮರಂದಿತ್ ತಂಗಡ ಅಧಿರಾಜತ್ವತಾರ ಜವಾಬ್ದಾರಿಕೆನ ಕಮ್ಮಿ ತರತ್ ಎಡೊತಂಡತ್.

## ದಂಡನೆ ಲಿಂಗರಾಜೇಂದ್ರ ಒಡೆಯ

ರಾಜ್ಯಭಾರ ಕ್ರಮ ಭೂಮಿರ ಶಿಸ್ತಿನ ಎಳ್ಳಿತ್ ಕಂದಾಯ ನಿರ್ಕ್  
ಮಾಡೊಂದ್. ರಾಜ್ಯಾಡಳಿತಕ್ **52** ಹುಕುಂನ ಪೊರ್‌ಡೊಚಿಟ್ಟಿದ್

ಲಿಂಗರಾಜೇಂದ್ರ ಒಡೆಯ ತಾಂಗ್ ವಿರೋಧಿಯಾಂದ್ ಕಂಡ್ ಬಂದಯಿಂಗಳೆಲ್ಲ ಕಡೊಪತಾರ ಶಿಕ್ಷೆ ಕೊಡತಕೊ ಸಾಮಾನ್ಯ ಜನಕ್ ಅದತೂ ರೈತಂಗಕ್ ನಲ್ಲದಾಪನ್ನಕೆ ಆಳ್‌ಚಿ. ನೆಲ್ಲ್ ಕೃಷಿ ಮಾಡುವ ಇಂಜ ಎಲ್ಲ ರೈತಂಗಡ ಭೂಮಿನ 'ಲಿಂಗರಾಜ ಕೋಲ್' ಎಣ್ಣುವ ಅಳತೆ ಕೋಲ್‌ಂಜ ಅಳತೆ ಮಾಡೊಚಿಟ್ಟಿತ್ ಮಣ್ಣಾರ ಗುಣಕ್ ಸೆರಿಯಾಯಿತ್ ಕಂದಾಯತಾನ ನಿರ್ಕ್ ಮಾಡೊಚಿ. ಇನ್ನನೆ ಮಣ್ಣಾರ ಗುಣಕ್ ಸೆರಿಯಾಯಿತ್ ಕಂದಾಯ ನಿರ್ಕ್ ಮಾಡಿತ್ ಎಳ್ಳಿಬೆಚ್ಚ ಬಲ್ಯ ಪುಸ್ತಕಕ್ ಲಿಂಗರಾಜಂಡ ಶಿಸ್ತ್ ಎಣ್ಣುವ ಪೆದ. ಮಡಿಕೇರಿ ಅರಮನೆರ ರೆಕಾರ್ಡ್ ಆಫೀಸ್‌ಲ್ ಲಿಂಗ ರಾಜೇಂದ್ರ ಒಡೆಯ ಕೊಡಗರ ಪ್ರತಿನಾಡೊಲೂ ಮಾಡೊಚಿಟ್ಟ ಭೂಮಿ ಅಳತೆ ಪಿಳ್ಳಾ ಕಂದಾಯ ಶಿಸ್ತರ ಬಲ್ಯ ಬಲ್ಯ

ಪುಸ್ತಕ ಉಂಡ್. ಈ ಶಿಸ್ತು ಕನ್ನಡತ್ ಕೈ ಎಳ್ಳಲ್ ಉಂಡ್.

ಲಿಂಗರಾಜೇಂದ್ರ ಒಡೆಯ ಭೂಮಿರ ಶಿಸ್ತುನ ಎಳ್ಳಾಚಿಟ್ಟಿತ್ ಬೆಚ್ಚಿದ ಅಲ್ಲತ್, ಅರಮನೆ ಎಣ್ಣಕ ಸರ್ಕಾರಿ ಚಾಕ್ರಿಕಾರ ಪ್ರಜೆಯಡ ಕೂಡೆ ಎನ್ನನೆ ಇರೊಂಡು, ಪ್ರಜೆಯ ಸರ್ಕಾರತಾರ ಕೂಡೆ ಏದ್ ಪೋಲೆ ನಡ್ಂದವಂಡೊಂದ್ ವಿವರಣೆ ಕೊಡಾತಿತ್ 54 ಹುಕುಂ ಎಣ್ಣಕ ಆಜ್ಜನೆ ಎಳ್ಳಾಚಿಟ್ಟಿತ್ ಪ್ರತಿ ನಾಡಾರ ಪಾರ್ಪತ್ಯೆಗಾರಂಗೊ, ಶಾನ್ ಭೋಗಂಗೊ ಆಯೆಚಿತ್. ಈ 54 ಹುಕುಂಕ್ ಒಕ್ಕಚಿ ಹುಕುಂ ನಾಮಾ ಎಣ್ಣುವ ಪೆದ. ಇದ್ನ ನಾಲ್ ಭಾಗ ಆಯಿತ್ ವಿಭಾಗ ಮಾಡಿತಿಂಜತ್.

1ನೆ ಭಾಗ : ಸರ್ಕಾರಿ ನೌಕರಂಗ ನಡ್ಂದವಂಡಿಯ ರೀತಿ ಪಿಳ್ಳಾ ತಂಗಡ ಕೆಲಸತಾರ ಪಾಲನೆ

2ನೆ ಭಾಗ : ರಾಜ್ಯತ್ ರೈತಂಗಡ ಕರ್ತವ್ಯ ಪಿಳ್ಳಾ ರಾಜನುಂಡ್ ಅಯಿಂಗಕ್ ಮಾಡುವ ಸಹಾಯ.

3ನೆ ಭಾಗ : ಭೂಮಿ ಕಂದಾಯ ಪಿಳ್ಳಾ ಅದ್ಂದ ಹುಕುಂ.

4ನೆ ಭಾಗ : ನ್ಯಾಯ ಪರಿಪಾಲನೆ ಪಿಳ್ಳಾ ನ್ಯಾಯ ವಿತರಣೆಕ್ ಸಮ್ಮಂದಪಟ್ಟ ಹುಕುಂ.  
ಈ ಹುಕುಂಲ್ ರೈತಂಗಲೆ ಆಡ್ ಅರಮನೆ ಎಣ್ಣಕ ರಾಜ್ಯ ನೌಕರಂಗಲೆ ಆಡ್ ತಂಗಡ ಎಂತ ಬೋಡಿಕೆ ಇಂಜಕೊ ಮಡಿಕೇರಿಲ್ ಇಂಜ ದಿವಾನಂಡ ಆಫೀಸ್ ಕೊಡ್ ಕೊಂಡಿಂಜತ್.

ದಂಡನೆ ಅಪ್ಪಣೆಲ್ ಸರ್ಕಾರಿ ಚಾಕ್ರಿಲ್ ಉಳ್ಳವು ರೈತಂಗುಂಡ್ ಕಂದಾಯ ವಸೂಲ್ ಮಾಡುವಕ ದಬ್ಬಾಳಿಕೆ ನಡ್ತುವಕಯ್ಯಂದ್ ಎಣ್ಣಿತ್.

17ನೆ ಹುಕುಂಲ್ ಸರ್ಕಾರಿ ಚಾಕ್ರಿಕಾರ ಅರಮನೆ ಆಡಳಿತವಾಯಿತ್ ಅರಮನೆ ಆಫೀಸ್ ಲ್ ನಡ್ಪಾನ ದಾರ್ಕೊ ಅರಿಚಿಡುವಕಯ್ಯಂದ್ ಎಣ್ಣಿತ್. ಈ ಹುಕುಂರ ಪರಿಣಾಮ ಕೊಡಗಲ್ ದಂಡ್ ಕಾಲ ರಾಜ್ಯತಾರ ಭೂಮಿ ಅಳತೆ ಮಾಡ್ನ ಲೆ.ಕೋನರಕ್ ಏದೇ ಓರ್ ಪ್ರಜೆರ ಕೂಡೆ ತಕ್ ಪರೆಯುವಕ್ ಸಾಧ್ಯ ಆಯಿಲೆ.

18ನೆ ಅಪ್ಪಣೆಲ್ ಪಾರ್ಪತ್ಯೆಗಾರ ಅರಮನೆ ಪತ್ರಕ್ ಎಚ್ಚಕ್ ನೇರತ್ ಜವಾಬ್ ಕೊಡ್ ಕೊಂಡೊಂದ್ ಎಣ್ಣಿತ್.

21ನೆ ಅಪ್ಪಣೆಲ್ ದಿವಾನ್ ಆಫೀಸ್ ಒಂದ ನಿರೂಪ / ಕಾಗದತಾರ ಸಾರಾಂಶ ಪಾರ್ಪತ್ಯೆಗಾರ ಪಿಳ್ಳಾ ಶಾನ್ ಭೋಗ ಎಳ್ಳೊಂಡು.

22ನೆ ಅಪ್ಪಣೆಲ್ ಖಜಾನೆಂಜ ಪಣ ಕೊಡ್ಪ ಪಿಳ್ಳಾ ಖಜಾನೆಕ್ ಪಣ ಪಾವತಿ ಮಾಡುವ ನೇರತ್‌ನ 31ನೆ ಅಪ್ಪಣೆಲ್ ಸರ್ಕಾರತ್‌ರ ಬೋರೆ ಬೋರೆ ವರ್ಗತ್‌ರ ನೌಕರಂಗ ಶ್ಯಾನ್‌ಭೋಗಂಡ ಕರ್ತವ್ಯತ್‌ನ 44ನೆ ಅಪ್ಪಣೆಲ್ ಪಾರ್‌ಪತ್ಯೆಗಾರ ಕಂದಾಯತ್‌ರ ನೆಲ್ಲ್ ಎಡ್‌ತವ ವಿಧಾನತ್‌ನ 53ನೆ ಅಪ್ಪಣೆಲ್ ಪಾರ್‌ಪತ್ಯೆದಾರಂಡ ಕರ್ತವ್ಯತ್‌ನ ಕಾಟಿತ್.

ಕೊಡಗ್ ರಾಜಂಡ ಕಾಲತ್ ನೆಲ್ಲ್‌ನ ಬೊಳ್‌ತುವದೆ ರೈತಂಗಡ ಮುಖ್ಯಪಟ್ಟ ಕೃಷಿ ಆಯಿತಿಂಜತ್. ಕಾಲತ್‌ರ ಚೆನ್ನಂಗ್ ತಿಂಗತ್ ತರಕಾರಿನ, ಕೈಬಿನ ಬೊಳ್‌ತುವ ಇಂಜತ್. ಅಕ್ಕ ಕಾಫಿ ವ್ಯವಸಾಯ ಕೊಡಗ್‌ಲ್ ಸುರು ಆಯಿತಿಂಜಾಲೆ. ಮಲೆಲ್ ಯಾಲ ಬೊಳ್‌ತುವ ಇಂಜತ್. ರೈತಂಗ ಬೊಳ್‌ತುವಾತ್ ಮೂಂದನೆ ಓರ್ ಭಾಗತ್‌ನ ಅರಮನೆಕ್ ಕೊಡ್‌ಕಂಡಿಯ ಸಾಮಾನ್‌ರ ಮೀದ ಅಪ್ಪಣೆ ಉಂಡ್.

7ನೆ, 28ನೆ ಪಿಳ್ಳಾ 33ನೆ ಅಪ್ಪಣೆಲ್ ರೈತಂಗ ಅನುಕ್ರಮ ಆಯಿತ್ ಪಣಪುಳಿ, ತೇನ್, ಮೇಣ, ನೆಲ್ಲಮಳು ಪಿಳ್ಳಾ ಕಾಡ್‌ಲ್ ಚೆನ್ನಂಗ್ ಮರತ್‌ರ ಕುರು ಇನ್ನತಾನ ಅರಮನೆಕ್ ಕೊಡ್‌ಕೊಂಡೊಂದ್ ಎಳ್ಳಿತ್. 11ನೆ ಅಪ್ಪಣೆಲ್ ರೈತಂಗ ಪುದಿಯದಾಯಿತ್ ನೆಲ್ಲ್ ಕೃಷಿ ಮಾಡುವ ಪಿಳ್ಳಾ ಚೆನ್ನಂಗ್ ಕಾಲಕೆತ್ತನೆ ಪಡ್ ಬುದ್ಧ ಭೂಮಿನ ತಿರಿತ್ ಕೃಷಿ ಮಾಡುವ ಭೂಮಿಕ್ ಎಚ್ಚಿಕ್ ಕಾಲ ಕಂದಾಯ ಇಲ್ಲೆ, ಎಲ್ಲಿಂಜ ಕಾಲ್ ಕಂದಾಯ, ಅರೆ ಕಂದಾಯ ಪಿಳ್ಳಾ ಪೂರ್ತಿ ಕಂದಾಯಂದ್ ಕಾಟಿತ್. ಇದಲ್ಲತೆ ರೈತಂಗಕ್ ಬೋಂಡಿಯಾಚೇಂಗಿ ಅರಮನೆ ಲೆಕ್ಕತ್ ಅತ್ತ, ಕಡ್‌ಚಿಯಳ, ನೆಲ್ಲ್‌ನ, ಪಣತ್‌ನ ಸಾಲ ಆಯಿತ್ ಕೊಡ್‌ತಿತ್ ಅಯಿಂಗಳುಂಡ್ ಎದ್ ಇಡ್‌ಕೆಟ್ಪರ ಮೀದ ಬಡ್ಡಿಸಮೇತ ಕೊಡ್‌ತ ವಸ್ತುನ ವಾಪಾಸ್ ಪಡ್‌ಂದವಲೊಂದ್ ಎಳ್ಳಿತ್. ಈ ಅಪ್ಪಣೆಲ್ ಊರ್‌ರ ಪಟೇಲ ಪಿಳ್ಳಾ ಪಾರ್‌ಪತ್ಯೆಗಾರ ರೈತಂಗಕ್ ಸಾಲ ಆಯಿತ್ ಕೊಡ್‌ತ ಪಣತ್‌ರ ಮರು ಪಾವತಿಕ್ ಅರ್ಹಂಗಂದ್ ಎಳ್ಳಿತ್.

ಈ ಓರ್ ಅಪ್ಪಣೆನುಂಡ್ ಊರ್‌ರ ಪಟೇಲ ಪಿಳ್ಳಾ ಪಾರ್‌ಪತ್ಯೆಗಾರಂಗ ರೈತಂಗ ತಂಗಡ ವ್ಯವಸಾಯತ್‌ನ ಚಾಯಿತೆ ಮಾಡುವನ್ನೆಕ್ ಎಚ್ಚಿರ ವಹಿಸುವ ಇಂಜತ್.

ಅನ್ನನೆ 13ನೆ ಅಪ್ಪಣೆಲ್ ನೆರೆಕರೆರ ರೈತಂಗ ತಂಗಡ ಭೂಮಿರ ಭಾಗತ್‌ನ ಬದ್‌ಲ್ ಮಾಡುವಕ ಎಡ್‌ತವಂಡಿಯ ನೇಮತ್‌ನ ಎಣ್ಣಿತ್.

26ನೆ ಅಪ್ಪಣೆಲ್ ರೈತಂಗ ಎನ್ನನೆ ನೈಚಿತ್ ತಂಗಡ ನೆಲ್ಲ್‌ರ ಬೊಳೆ ಪಿಳ್ಳಾ ಕರೆ ಫಸಲ್‌ನ ಜಾಸ್ತಿ ಮಾಡಿಯವಲೊಂದ್, ಆಂಡ ಮೀದ ಊರ್‌ರ ಪಟೇಲ,



ಪಾರ್ವತ್ಯಗಾರ ಎನ್ನನೆ ರೈತಂಗಕ್ ಒರಾತ ಮಾಡೊಂಡೊಂದ್ ಎಳ್ವಿತ್.

ಲಿಂಗರಾಜಂಡ ಕಾಲತ್ ಆಹಾರ ಉತ್ಪಾದನೆಕ್ ಏರ ಆಸಕ್ತಿ ಕೊಡ್ತಿತಿಂಜತ್ ಎಣ್ಣುವದ್ ಕಾಗದ ಪತ್ರತರ ಆಧಾರತ್ ಪೇರ್ತ್ ಚಾಯಿತೆ ಗೊತ್ತ್ ಕಟ್ಟುವ.

29ನೆ ಅಪ್ಪಣೆಲ್ ರಾಜಂಡ ಸ್ವಂತ ಭೂಮಿಯಾನ ಪನ್ಯತ್ ನಾಟಿ ಕೆಲಸತರ ನೇರತ್ ಪಿಳ್ಳಾ ಬೊಳೆ ಕೊಯ್ಯವ ನೇರತ್ ನಾಡರ ರೈತಂಗ ಕೆಲಸ ಮಾಡಿ ಕೊಡ್ಪ ಇಂಜ ಕ್ರಮತನ ಎಣ್ಣಿತ್. ಇದತ್ ರೈತಂಗಕ್ ಕಷ್ಟ ಆಕತನ್ನೆ ಪಾರ್ವತ್ಯದಾರ ಭೂಮಿ ಪಣಿಕ್ ಕೆಲಸಕ್ ಕಾಕುವ ಸೂಚನೆ ಕೊಡ್ತಿತ್.

41ನೆ ಅಪ್ಪಣೆಲ್ ನಾಡಲ್ ಉಳ್ಳ ಚಾಂದ್ ಮರತನ ಕೆತ್ತುವಕ್ ಎಡ್ತವಂಡಿಯ ಕ್ರಮತನ ವಿವರಾಚಿಟ್ಟಿತ್. ಇಕ್ಕತರನ್ನೆ ಆ ಕಾಲತೂ ಚಾಂದ್ ಮರ ಸರ್ಕಾರತರ ಆಸ್ತಿ ಆಯಿತಿಂಜತ್. ದಾರೆಂಗಿ ರಾಜಂಡ ಅಪ್ಪಣೆ ಇಲ್ಲತೆ ಚಾಂದ್ ಮರ ಕೆತ್ತನಕ ಶಿಕ್ಷೆ ಅನುಭವಿಚಂಡಿಂಜತ್.

ಲಿಂಗರಾಜೇಂದ್ರಂಡ ಮೂಂದನೆಲ್ ಅಪ್ಪಣೆಲ್ ರೈತಂಗಡ ಭೂಮಿರ ಒಟ್ಟು ಉತ್ಪತ್ತಿರ ಪತ್ತನೆ ಓರ್ ಅಂಶ ಕೊಡ್ತಕ ಮದಿಂದ್ ಎಳ್ವಿತ್. ಈ ಕ್ರಯ ಸಾಗ್ ರೈತಂಗಕ್ ಅನ್ವಯ ಆಪ. ಜಮ್ಮ ಭೂಮಿಕ್ ಈ ಕ್ರಯತರ ಪಾದಿ ಕಂದಾಯ ಎಣ್ಣಕ ಆ ಕಾಲತ್ ಅಂಜಿ ಉರ್ಪಿಯ ಉಂಬಳಿ ಭೂಮಿಕ್, ಮೂಂದ್ ಉರ್ಪಿಯ, ದಂಡರೆ ಉರ್ಪಿಯ ಇಂಜತ್. ರಾಜಂಡ ದುಂಬ ಆಪ್ತಂಗಕ್, ವಿಶೇಷ ಸಹಾಯ ಮಾಡ್ನಯಿಂಗಕ್ ರಾಜ ಜಹಗೀರ್ ಭೂಮಿ ಕೊಡ್ಪ ಇಂಜತ್. ಈ ಭೂಮಿಕ್ ಕಂದಾಯ ಇಂಚ್ಲೆ.

ನೆರೆದೇಶತರ ರೈತಂಗ ಸರ್ಕಾರಕ್ ಕೊಡ್ಪ ಇಂಜ ಭೂಮಿಕ್ ಕಂದಾಯಕ್ಂಜ ಕೊಡಗಲ್ ಭೂಮಿ ಕಂದಾಯ ಕಮಿಷನ್ದೂ ಆನಗುಂಡ್ ಕಂದಾಯ ಪಸೂಲಾತಿ ಸುಲಭ ಇಂಜತ್ಂದ್ ಕೊಡಗರ ಭೂಮಿರ ಅಳತೆ ಎಡ್ಪಕ್ ಬಂದ ಕ.ಕೋನರ್ ಎಣ್ಣುವ ಬ್ರಿಟಿಷ್ ಅಧಿಕಾರಿ ಎಳ್ವಿತ್.

ಪ್ರತಿಯೋರ್ ಊರ್, ನಾಡರ ರೈತಂಡ ಮನೆಲ್ ಅರಮನೆ ಲೆಕ್ಕತ್ ಉಗ್ರಾಣ ಇಂಜತ್. ಇದ್ಂಗೆ ರೈತಂಗ ತಂಗಡ ಕಂದಾಯತರ ನೆಲ್ಗನ್ನ ಇಡೊಂಡಿಂಜತ್. ಕಂದಾಯ ಪಾವತಿಕ್ ಫೆಬ್ರವರಿ, ಮಾರ್ಚಿ, ಏಪ್ರಿಲ್ ಪಿಳ್ಳಾ ಮೇ ತಿಂಗ ಎಣ್ಣುವ ನಾಲ್ ಕಂತ್ ಇಂಜತ್.

ರೈತ ಸರ್ಕಾರಕ್ ಕೊಡ್ಪ ನೆಲ್ಗ್ / ಪಣಿಕ್ ಪಾರ್ವತ್ಯದಾರ ರಶೀತಿ ಕೊಡ್ಕೊಂಡಿಂಜತ್. ಅರಮನೆಂಜ ಕಮಿಷನ್ ಕ್ರಯತರ ಕಂದಾಯತ್ ಭೂಮಿ ಪಡ್ಂದ



ಜಮ್ಮ ಪಿಳ್ಳಾ ಉಂಬಳಿ ಭೂಮಿ ರೈತಂಗ ರಾಜಂಗ್ ಎಣ್ಣಕ ಸರ್ಕಾರಕ್ ಚೆನ್ನಂಗ್ ತರತ್ ಸೇವೆ ಕೊಡ್ಕೊಂಡಿಂಜತ್. ಈ ಸೇವೆ ಎಣ್ಣಕ ರಾಜ ಕಾಕುವಕ ಬೋಟೆಕ್ ಪೋಪ, ಅರಮನೆ ಪಾರ, ಉಕ್ಕಡ ಪಿಳ್ಳಾ ತೆರಿಲ್ ಪಾರಕಾಪ, ಪಡೆರ ನೇರತ್ ಆಯುಧತೋಡೆ ರಾಜ ಕಾಕ್‌ನನ್ನೆ ಪೋಪ... ಇನ್ನತದ್.

ಲಿಂಗರಾಜೇಂದ್ರಂಡ ಕಾಲತ್ ರೈತಂಗ ಬೋರೆ ಬೋರೆ ಕ್ರಯತ್ ಭೂಮಿ ಕಂದಾಯತ್‌ನ ಅರಮನೆಕ್ ಕೊಡ್‌ಪಾಂಡ ಕೂಟ್‌ಕ್ ನೆಲ್ಲ್ ಪಿಳ್ಳಾ ನೆಯ್ಯರ ಕಂದಾಯ ಕೊಡ್‌ಕಂಡಿಂಜತ್. ರೈತ ಕೊಡ್‌ಪ ನೆಯ್ಯನ ರಾಜ ಪುತ್ತರಿ ನಮ್ಮೆಲ್ ಮಡಿಕೇರಿ ಅರಮನೆಕ್ ಕೋಲಾಟಕ್ ಬಪ್ಪ ಇಂಜ ಜನಡ ಊಟಕ್ ಉಪಯೋಗ ಮಾಡುವ ಇಂಜತ್.

25ನೆ ಅಪ್ಪಣೆಲ್ ಕೃಷಿ ಮಾಡತ ಕೈಪಣಿಕಾರ ಕೊಡ್‌ಕಂಡಿಯ ಪಣತಾರ ಕ್ರಯ ಉಂಡ್. ಅರಮನೆರ ಸೇವೆಲ್ ಪಾರ ಕೆಲಸ, ಬೋಟೆಕ್ ಪೋಪ, ಕೆಲಸ ಮಾಡುವಕ್ ಕುಶಿ ಇಲ್ಲತವು ಏರ ಕಂದಾಯ ಕೊಡ್‌ತಿತ್ ಭೂಮಿ ಸಾಗುವಳಿ ಮಾಡೊಲಿಂಜತ್. ಇನ್ನತ ಭೂಮಿಕ್ ಸಾಗ್ ಹಕ್ಕರ ಭೂಮಿಂದ್ ಪೆದ.

ಪಂಡ್ ರಾಜಂಡ ಕಾಲತ್ ನ್ಯಾಯವಿತರಣೆ ಪದ್ವತಿಕೊತ್ತ ನಡಪ ಇಂಜತ್. ಸಾಧಾರಣ ಅಪರಾಧತ್‌ನ ತಕ್ಕಮುಖ್ಯಸ್ಥಂಗ, ಪಾರ್‌ಪತ್ಯೆಗಾರ, ದಿವಾನಂಗಡ ಆಫೀಸ್‌ಕಾರ, ಸೀಮೆ ಅಮೀಲಂಗ ತೇಪ ಇಂಜತ್. ಅನ್ನತ ಅಪರಾಧಕ್ ಶಿಕ್ಷೆ ಆಪ ಇಂಜತ್. ರಾಜ ಎಣ್ಣಾನದೆ ತೀರ್ಮಾನ. ರಾಜ ಕೊಡ್‌ಪ ಶಿಕ್ಷೆ ಎಣ್ಣಕ ಕಿರಿನ ಕತ್ತರಿಚಿಡುವ, ಆನೆನುಂಡ್ ಈತಂಡ್ ಚಾವ್‌ಚಿಡುವ, ತೂಕುವ, ಒಡಿಕತ್ತಿಲ್ ಕೆತ್ತಿತ್ ಕೊಲ್ಲುವ, ಬಂಡೆಕಲ್ಲರ ಕೊಡಿಂಜ ತಳ್ಳಿತ್ ಚಾವ್‌ಚಿಡುವ, ಮರಕ್ ಕೆಟ್ಟಿತ್ ಆಣಿ ಪೊಯ್ಯಾಚಿಟ್ಟಿತ್ ಚಾವ್‌ಚಿಡುವ... ಇನ್ನತದ್.

ಕೊಡಗರ ರಾಜಂಗ ದಾರ್‌ನೊ ತಂಗಡ ರಾಜ್ಯ ಬುಟ್ಟಿತ್ ಪೊರ ಊರ್‌ಲ್ ಪೋಯಿತ್ ನೆಲೆ ನಿಪ್ಪಕ್ ಬುಡುವ ಇಂಜಲೆ. ಲಿಂಗರಾಜ ಮರಣದಂಡನೆಕ್ ಗುರಿ ಆಪಯಿಂಗಡ ಪೆದತ್‌ನ ಎಣ್ಣುವ ಇಂಜಲೆ. ಅವು ಕೊಡಗ್ ಬುಟ್ಟಿತ್ ಪೋಯಿರ್‌ತ್‌ಂದೂ, ಅಯಿಂಗಳ ಪುಡ್‌ಚಿ ತಂದಯಿಂಗಕ್ ಇನಾಂ ತಪ್ಪಿಂದೂ ಸುದ್ದಿ ಮಾಡುವ ಇಂಜತ್. ಆಚೇಂಗಿ, ಇದ್ ಪೊಟ್‌ಂದ್ ಜನಕ್ ಗೊತ್ತಿಂಜಕೊ ರಾಜಂಡ ಶಿಕ್ಷೆಕ್ ಬೊತ್ತಿಯಂಡ್ ಮುಂಡತೆ ಇಪ್ಪ ಇಂಜತ್!

ಲಿಂಗರಾಜೇಂದ್ರಂಡ ಕಾಲತ್ ಕಣ್ಣ್ ಎಡ್‌ತಂವಂಡ ಕಣ್ಣ್ ಎಡ್‌ಕೊಂಡು. ಪಲ್ಲ್ ಪೊಳ್‌ಚಂವಂಡ ಪಲ್ಲ್ ಪೊಳ್‌ಕೊಂಡು ಎಣ್ಣುವ ಶಿಕ್ಷಾ ನಿಯಮ ಇಂಜತ್.

ಅರಮನೆಕ್ / ರೈತಂಗಕ್ ಸಮ್ಪಂಧಪಡುವ ಸಾಮಾನ್ಯನ ದಾರೇಂಗಿ ಕಟ್ಟಕ ಅಯಿಂಗಳುಂಡ್ ಕಟ್ಟ ಸಾಮಾನ್ಯರ ಕ್ರಯಕ್ಂಜ ಒಂದರೆಪಾಲ್ ಕ್ರಯ ಕೊಡ್ಕೊಂಡೂಂದ್ ಅಪ್ಪಣೆಲ್ ಎಳ್ಳಿತ್.

39ನೆ ಅಪ್ಪಣೆಲ್ ಕೊಡಗಲ್ ದಾರೇಂಗಿ ಚಿತ್ಪೋಯಿತ್ ಅಯಿಂಗಳ್ ಬಯತ್ಕ್ ಬಂದ ಮಕ್ಕ ಇಂಜಕ ಅಯಿಂಡ ಸ್ಥಿರ ಚರಾಸ್ತಿನ ಎನ್ನನೆ ನೋಟಿಯವಂಡೂಂದ್ ಎಳ್ಳಿತ್.

ಅನ್ನನೆ 34ನೆ ಅಪ್ಪಣೆಲ್ ಪೊರಜಾಗತ್ ಪಾಪಾರಕಾರ ಎಲ್ಲೆಲ್ಲಿ ತಂಗಡ ಸಾಮಾನ್ಯನ ಬೆಚ್ಚಂಡ್ ವ್ಯಾಪಾರ ಮಾಡೂಂಡೂಂದ್ ಎಳ್ಳಿತ್.

ತಾಂಡ ಪ್ರಜೆಯ ಪೊರಜಾಗಕಾರಡ ಕೂಡೆ ಗುಟ್ಟಾಯಿತ್ ತಕ್ಕ ಪರ್ಂದಕ ತಾಂಡ ರಾಜ್ಯಭಾರತ್ ದೋಷ ಗೊತ್ತಾಯಿರೂಂದ್, ವ್ಯಾಪಾರಿಯ ಮನೆ ಮನೆಕ್ ಬಂದಿತ್ ವ್ಯಾಪಾರ ಮಾಡುವಕಯ್ಯಾಂದ್ ಆಜ್ಞೆ ಮಾಡಿತಿಂಜತ್. ಆ ಕಾಲತ್ ವೀರರಾಜೇಂದ್ರಪೇಟೆ, ಕೊಡ್ಲಿಪೇಟೆ, ರಾಮಸ್ವಾಮಿ ಕಣಿವೆ ಪಿಳ್ಳಾ ಸೋಮವಾರಪೇಟೆ ಮುಖ್ಯಪಟ್ಟ ವ್ಯಾಪಾರ ಕೇಂದ್ರ ಆಯಿತಿಂಜತ್. ಮಡಿಕೇರಿ ರಾಜಧಾನಿ ಆನಕೊಳ್ಳಿ ಪರ ಊರ್ಕಾರಡ ವ್ಯಾಪರ ಇಂಜಾಲೆ.

10ನೆ ಅಪ್ಪಣೆಲ್ ಪಾರ್ಪತ್ಯದಾರಂಗ್ ಕೂಡ್ ನಾಡಲ್ ಏದೇಂಗಿ ರೈತ ಚಿತ್ ಪೋನಕ / ಪೊರ ರಾಜ್ಯಕ್ ಎಣ್ಣೆತೆ ಪೋನಕ ಅಯಿಂಗಡ ಮನೆಲ್ ದಾರೂ ಇಲ್ಲತಾನಕ ಆ ಊರ್ ಪಟೇಲ ಈ ಸುದ್ದಿನ ಪಾರ್ಪತ್ಯದಾರಂಗ್ ಅರಿಚಿಡೊಂಡು.

ಲಿಂಗರಾಜೇಂದ್ರಂಡ ಕಾಲಕೂ ಮುಪ್ಪಡೆ ಕೊಡವ ಜನಾಂಗತ್ ಪೊಮ್ಮಕ್ಕಕ್ ಉಡ್ಪಕ್ ಪೊಡಿಯ ಕೊಡ್ತಿತ್ ಮಂಗಲ ಆಪ ಪದ್ಧತಿ ಇಂಜನ್ನಕೆ ಕಾಂಬ. ಇನ್ನನೆ ಕೊಡ್ಪಾಂಗ್ 'ಪಚ್ಚಡ' ಪಿಳ್ಳಾ ಮಂಗಲ ಆಪ ಪೊಣ್ಣಕ್ 'ಪಚ್ಚಡ ಪೊಣ್ಣ'ಂದ್ ಎಣ್ಣುವ ಇಂಜದ್ ಗೊತ್ತ್ ಕೊಟ್ಟುವ.

ಓರ್ ಆಣಾಳ್ ಓರ್ ಪೊಣ್ಣಾಳ್ ಓರ್ ಪಚ್ಚಡ ಎಣ್ಣಕ ಪೈಲತೆ ನೆಜ್ಜ ಬಟ್ಟೆರ ಪೊಡಿಯತ್ ಉಡ್ಪಕ್ ಕೊಡ್ಪಕ ಆಪ ಅದ್ನ ಕೇಟಂಡಕ, ಅವ ಮಿಳ್ಳಾಕ್ ಏದೇ ಓರ್ ವಿಧಿ ವಿಧಾನ ಇಲ್ಲತೆ ಅವಂಡ ಪೊಣ್ಣ ಆಪ ಇಂಜತ್. ಇನ್ನನೆ ಮಂಗಲ ಆನ ಪೊಣ್ಣನ ಎಕ್ಕಾಚೇಂಗೂ ಆ ವಡಿಯ ಬುಡೊಲಿಂಜತ್! ಅನ್ನನೆ ಅವಳ ಬುಡುವಕ, ಅವಳೆ ಆಡ್, ಅವಡ ಗರ್ಭತ್ ಅವನುಂಡ್ ಪುಟ್ಟನ ಕುಳ್ಳಿಯಳೆ ಆಡ್ ಚಾಕುವ ಜವಾಬ್ದಾರಿ ಅವಂಗ್ ಇಂಜಾಲೆ. ಈ ಪೋಲೆ ಪಚ್ಚಡ ಕೊಡ್ತಿತ್ ಪೊಣ್ಣನ ಮಂಗಲ ಕೈಪಂವ ಊರ್ ಮುಕ್ರಿಯ, ರಾಜಂಡ ಅಧಿಕಾರಿಯ ಆಯಿತ್ ತಂಗಕ್ ಮಿಳ್ಳಾಲೆ

ವಿಧಿಪೋಲೆ ಮಂಗಲ ಆನ ಪೊಣ್ಣ್ ಮನೆಲ್ ಇಂಜವೆಂದ್ ಕಾಂಬ. ಇನ್ನತ ಪಚ್ಚಡ ಕೊಡ್ತಿತ್ ಮಂಗಲ ಆಪದ್ ಸಾಮಾನ್ಯ ಆಯಿತಿಂಜಲೆಂದ್ ಕಾಂಬ. ಆಚೇಂಗೂ ಕೊಡಗಲ್ ಇನ್ನತ ಪದ್ವತಿ ಇಂಜತ್ ಎಣ್ಣುವಾಂಗ್ ಲಿಂಗರಾಜೇಂದ್ರ ಒಡೆಯ ಇನ್ನತ ಓರ್ ಮಂಗಲ ನಿಷೇಧ ಮಾಡ್ನ ಅಪ್ಪಣೆ ಇದಾಂಗ್ ಓರ್ ಉದಾಹರಣೆ.

ಲಿಂಗರಾಜೇಂದ್ರಂಡ ಹುಕುಂನಾಮರ 28ನೆ ಅಪ್ಪಣೆಲ್ ರೈತಂಗ ಏದೇ ನೇರತ್ ಮರತ್ ಕೆಟ್ಟಿತುಳ್ಳ ತೇನ್‌ಗೂಡ್‌ಂಜ ತೇನ್ ಕೊಯ್ಯೊಲೂ, ಅದೊಂಡ ಮೇಣತ್‌ನ ಏದ್ ಕ್ರಯತ್ ಅರಮನೆಕ್ ಮಾರೊಲೊಂದ್ ಎಳ್ಳಿತ್.

32ನೆ ಅಪ್ಪಣೆಲ್ ಊರ್ ತಿರಿಕೆಲ್ ಆಗಸ್ತ್, ಸೆಪ್ಟೆಂಬರ್ ಪಿಳ್ಳಾ ಫೆಬ್ರವರಿ ತಿಂಗತ್ ಎನ್ನನೆ ಪೂಜೆ ಮಾಡೊಂಡೊಂದ್ ಎಳ್ಳಿತ್. ಹಾಲೇರಿ ರಾಜಂಗ ಶಿವಂಗ್ ಏರ ಪ್ರಾಮುಖ್ಯತೆ ಕೊಡ್ತಿತಿಂಜತ್. ಅಯಿಂಡ ಕಾಲತ್ ಕೊಡಗರ ತಿರಿಕೆಲ್ ಶಿವಂಡ ಎಣ್ಣಕ ಮಾದೇವ ಪಿಳ್ಳಾ ಸುಬ್ರಹ್ಮಣ್ಯಂಡ ತಿರಿಕೆ ಇಂಜತ್.

33ನೆ ಅಪ್ಪಣೆಲ್ ಅರಮನೆಕ್ ಬೋಂಡಿಯಾನ ಮದ್ವೆ, ಬೇರ್, ಕಳ್‌ಂಜಿ, ಕುರು ಇನ್ನತಾನ ಕುಂದ್‌ರ ಕೊಡಿಲ್ ಪಿಳ್ಳಾ ಕೇದತ ರೈತಂಗ ಕೊಂಡಬಂದಿತ್ ಕೊಡ್‌ಪಾಂಡ ಮೀದ ಎಳ್ಳಿತ್. ಅನ್ನನೆ 36ನೆ ಅಪ್ಪಣೆಲ್ ಕೊಡಗರ ರೈತಂಗ ಮಲಬಾರ್‌ಕ್ ಅತ್ತಡ ಮೀದ ಅಕ್ಕಿ, ನೆಲ್‌ನ ಪೋರಿಯಂಡ್ ಪೆಗ್ಗಲತರ ಉಕ್ಕಡಕಾಲೆ ಪೋಪಕ ಅಯಿಂಗಳುಂಡ್ ಪಟ್ಟಿಪೋಲೆ ತೆರಿಗೆ ಎಡ್‌ತಂಡ್ ದಿವಾನ್ ಆಫೀಸ್‌ಂಜ ಅಯೆಚ ಬಟ್ಟೆರ ಲೈಸೆನ್ಸ್‌ರ ಕಾಪಿನ ಕೊಡ್‌ಕೊಂಡೊಂದ್ ಎಳ್ಳಿತ್.

47ನೆ ಅಪ್ಪಣೆಲ್ ಅರಮನೆ ಸೀಮೆ ಉಕ್ಕಡ ಬಕ್ಕ ಪಡಿಲ್ ಪಾರ ಕಾವಯಿಂಡ ವಿವರ ಪಿಳ್ಳಾ ಕೆಲಸತ್‌ನ ಎಳ್ಳಿತ್.

42ನೆ ಅಪ್ಪಣೆಲ್ ಕೊಡಗ್‌ಕ್ ಪೊರಜಾಗಕಾರ ಬಂದಕ ಇಲ್ಲಿಯತ ಜನ ಅಯಿಂಗಳ ಎನ್ನನೆ ತಕ್ಕಾರ ಮಾಡೊಂಡೊಂದ್ ಎಳ್ಳಿತ್. ಈಂಡ ಪೋಲೆ ಏದೇ ಪೊರಜಾಗಕಾರಂಗೂ ಕೊಡಗ್ ರಾಜ್ಯತರ ನಿವಾಸಿಯ ದಂಡ್ ಪೊತ್ತ್ ಕೂಳ್ ಕೊಡ್‌ಕೊಂಡು, ಅನ್ನನೆ ಕೊಡ್‌ಕತ ಪೋನಕ ಪಾರ್‌ಪತ್ಯದಾರ ಇಲ್ಲಿಯತ ಮನೆಕಾರಳ ವಿಚಾರಣೆ ಮಾಡೊಲೊಂದ್ ಉಂಡ್. ಕೊಡಗಲ್ ಮಿಳ್ಳಾಲೇ ಇಂಜ ಬೆಂದು ತಕ್ಕಾರತ್‌ರ ಪದ್ವತಿಕ್ ಲಿಂಗರಾಜೇಂದ್ರ ಓರ್ ಅಪ್ಪಣೆ ರೂಪ ಕೊಡ್‌ತಿತ್.

ದೊಡ್ಡ ವೀರರಾಜೇಂದ್ರ ಒಡೆಯಂಡ ಕಾಲತ್‌ಂಜ ಕೊಡಗ್‌ಕ್ ಬ್ರಿಟಿಷ್ ಅಧಿಕಾರಿಯ ಬೋಟೆಕ್ ಬಪ್ಪ ಇಂಜತ್ ಪಿಳ್ಳಾ ತಲಚೇರಿ, ಕಣ್ಣಾನೂರ್‌ಂಜ ಮೈಸೂರ್,

ಬೆಂಗಳೂರ್‌ಕಾಲೆ ಕೊಡಗ್‌ಕ್ ಬಪ್ಪ ಇಂಜತ್. ಇವು ಕೊಡಗ್‌ಕ್ ಬಂದಿತ್ ಕೊಡಗ್‌ನ ಬುಡಣೆಕೂ ಅಯಿಂಗ್‌ಕ್ ಬೋಂಡಿಯಾನ ಕೋಳಿ, ಕೋಳಿ ಮುಟ್ಟೆ, ಪಾಲ್ ಇನ್ನತಾನ ರಾಜ ತಾಂಡ ಸರ್ಕಾರತ್‌ರ ಖರ್ಚಿಲ್ ಕೊಡ್‌ಪ ಇಂಜತ್. ಈ ಸಮ್ಮಂಧ 48ನೆ ಅಪ್ಪಣೆಲ್ ಪಾರ್‌ಪತ್ಯೆದಾರ ರೈತನುಂಡ್ ನಿರ್ಹಪಡ್‌ತಾನ ಕ್ರಯತ್ ಕೊಡ್‌ಪ್‌ಚಿಟ್ಟಿ ಸಾಮಾನ್‌ಕ್ ಅಯಿಂಗ್‌ಳುಂಡ್ ದಿವಾನ್ ಆಫೀಸ್‌ಂಜ ಕ್ರಯತ್‌ರ ಪಣ ತರೊಂಡೂಂದ್ ಎಳ್ಳಿತ್.

ಬ್ರಿಟಿಷ್ ಸರ್ದಾರಂಗ ಅಯಿಂಗಡ ಕುಟುಂಬಕಾರ ಪಲ್ಲಕ್ಕಿಲ್ ಅಳ್‌ತಂಡ್ ಪ್ರಯಾಣ ಮಾಡುವ ಇಂಜತ್. ಆಣಾಳ ಆನೆರ ಕೊಡಿಲ್ ಅಳ್‌ತಂಡ್ ಪೋಪ ಇಂಜತ್. ಪಲ್ಲಕ್ಕಿ ಪೊರ್‌ಪಕ್ ಬೋಯಿಯ ಪೋರತಾನಕ ನಾಡ್‌ಬೋಯಿಯಳ ಸಂಬಳ ಕೊಡ್‌ತಿತ್ ಕಾಕ್‌ಚಿಡುವ ಇಂಜತ್.

49ನೆ ಅಪ್ಪಣೆಲ್ ಗೊತ್ತಗುರಿ ಇಲ್ಲತ ಗರೀಬಂಗ, ಪರದೇಶಿಯ ದಾರೆಂಗಿ ಚತ್ತ್ ಪೋನಕ ಅಯಿಂಗಡ ಚಾವು ತಡಿರ ದಫನ ಕಾರ್ಬಾರ್‌ನ ಎನ್ನನೆ ಮಾಡೊಂಡೂಂದ್ ಉಂಡ್. ಚತ್ತಯಿಂಗಡಾತ್ ಪಣ ಇಲ್ಲೇಂಗಿ ಅರಮನೆ ಖರ್ಚಿಲ್ ಅಯಿಂಗಡ ದಫನ ಮಾಡೊಂಡೂಂದ್ ಎಳ್ಳಿತ್.

50ನೆ ಅಪ್ಪಣೆಲ್ ಕೊಡಗ್‌ರ ದೊರೆ, ನರಿನ ಪೊಜ್ಜಕ ಪ್ರತಿ ನಾಡ್‌ಂಜ ತಕ್ಕಂಗ, ಗೌಡಂಗ ಇನಾಂ ಪಣತ್‌ನ ದೊರೆಕ್ ಕೊಡ್‌ಕೊಂಡೂ, ನಾಡ್‌ರ ರೈತಂಗ ನರಿಕ್ ಪೊಜ್ಜಿತ್ ಅದ್‌ಂಡ ಪಲ್ಲ್, ಒಯ್ ಪಿಳ್ಳಾ ತೋಲ್‌ನ ಕೊಂಡ ಬಂದಿತ್ ದಿವಾನ್‌ರ ಆಫೀಸ್‌ಕ್ ಕೊಡ್‌ತಕ, ನರಿ ಪೊಜ್ಜಂವಂಗೂ ಪಾಲ್ ಕೊಡ್‌ತಿತ್ ಮೂಂದ್, ದಂಡ್ ಉರ್‌ಪಿಯತ್‌ರನ್ನೆಗೆ ಪ್ರತಿ ನಾಡ್‌ಂಜ ಇಯಂಗ್‌ಕ್ ದಂಡ್, ಓರ್ ಉರ್‌ಪಿಯತ್‌ನ ಇನಾಂ ಕೊಡ್‌ಕೊಂಡೂಂದ್ ಎಳ್ಳಿತ್.

51ನೆ ಅಪ್ಪಣೆಲ್ ಓರ್ ಜಾಗತ್ ಕಟ್ಟಿತ್ ಇಇಸ್ಲೋರ್ ಜಾಗಕ್ ಓಡಿಪೋನಯಿಂಗಳ ಪುಡ್‌ಚಂಡ್ ಬಪ್ಪಕ್ ಎನ್ನ ಮಾಡೊಂಡೂಂದ್ ಎಳ್ಳಿತ್.

52ನೆ ಅಪ್ಪಣೆಲ್ ಮಡಿಕೇರಿ ಪಿಳ್ಳಾ ಕೊಡಗ್‌ರ ಬೋರೆ ಜಾಗತ್ ಅರಮನೆಕ್ ಕಾಲಕೊಮ್ಮೆತ ಪಿಲ್ಲ್ ಪೊದ್‌ಪ್‌ಚಿಡುವಾಂಡ ವಿಷಯ ಉಂಡ್.

ಕೊಡಗ್‌ರ ಅರಮನೆಲ್ ಮಡಿಕೇರಿ ಅರಮನೆ ಬಲ್ಯದ್. ಇದ್‌ಂಗ್ ಪಿಲ್ಲ್‌ನ ಪಕ್ಕತ ನಾಡ್‌ಂಜ ಕೊಂಡ ಬರೊಂಡಿಂಜತ್. ಇದ್‌ಂಗ್ 1865ನೆ ಇಸವಿ ಕೈಂಜಪಿಳ್ಳಾ ಬ್ರಿಟಿಷಡ ಕಾಲತ್ ಹಂಚ್ ಇಟ್ಟಿತ್.

54ನೆ ಅಪ್ಪಣೆಲ್ ಲಿಂಗರಾಜೇಂದ್ರ ಒಡೆಯಂಡ ಹುಕುಂನಾಮೆರ ಆಖೀರಕ್ ಪಾರ್ಪತ್ಯೆದಾರ ತಾಂಗ್ ವಹಿಸಿ ತಂದ ಕೆಲಸತ್‌ನ ಉದಾಸೀನ ಮಾಡತೆ ಒನ್ನನೆ ಮಾಡೊಂಡೊಂದ್ ಕಡ್‌ಪ ಆಯಿತ್ ಎಳ್ವಿತ್. ರಾಜಂಡ ಕಾಲತ್ ಸರ್ಕಾರಿ ಚಾಕ್ರಿಲ್ ಉಳ್ಳವು ತಿಂಗತ್ 20 ದಿನ ಕೆಲಸ ಮಾಡಿತ್ ಪತ್ತಾದಿನ ತಂಗಡ ಮನೆಕ್ ಪೋಕಲಿಂಬತ್.

ಒರ್ ಚಾಕ್ರಿಕಾರ ಮನೆಕ್ ಪೋನಲ್ಲಿ ಅವಂಡ ಚಾಗತ್ ಅದೇ ವರ್ಗತ್‌ರ ಇಇಷ್ಟೋರ್ ಚಾಕ್ರಿಕಾರ ಇಂಜಿತ್ ಅವಂಡ ಪಾಲ್ ಬಪ್ಪಕ ಅವ ತಾಂಡ ಮನೆಕ್ ಪೋಕಲಿಂಬತ್.

ರಾಜ ಮಾಡ್‌ನ ಅಪ್ಪಣೆ, ಎಣ್ಣೊನ ತಕ್ಕ ಎಲ್ಲಾನೊ ಉಳ್ಳನ್ನೆಕೆ ಪಾಲನೆ ಮಾಡೊಂಡಿಂಬತ್. ಈ ಎಲ್ಲ ಅಪ್ಪಣೆನುಂಡ್ ಆ ಕಾಲತ್ ಸರ್ಕಾರ ಪ್ರಜೆಯಡ ಮೀದ ಮಾಡಿಯಂಡಿಂಬ ಕಾರ್ಬಾರ್‌ರ ಮೀದ ಪರಿಚಯ ಆಪ. ಆ ಕಾಲತ್ ರಾಜ್ಯತ್ ಶಾಂತಿಪಾಲನೆ, ನ್ಯಾಯ ವಿತರಣೆ, ಭೂಕಂದಾಯ, ವಸೂಲಿ, ಭೂಮಿ ಸಾಗುವಳಿ ಪಿಳ್ಳಾ ರಾಜ ಕುಟುಂಬತ್‌ರ ಸುಖ ಪಿಳ್ಳಾ ರಕ್ಷಣೆ...ಇದೆಲ್ಲ ಸರ್ಕಾರತ್‌ರ ಕರ್ತವ್ಯ. ವಿದ್ಯಾಭ್ಯಾಸ ಪಿಳ್ಳಾ ವೈದ್ಯಕೀಯ ಸಹಾಯತ್‌ನ ಜನಳೆ ತಂಗ, ತಂಗಲಾಯಿತ್ ಮಾಡಿಯವಂಡಿಂಬತ್.

## ಲಿಂಗರಾಜೇಂದ್ರ ಒಡೆಯಂಡ ಆಳ್ವಿಕೆರ ಮೀದ ಬೊಳಿ ಕಾಟುವ

### ಚೆನ್ನಂಗ್ ನಿರೂಪ

1. ಲಿಂಗರಾಜೇಂದ್ರ ತಾಂಡ ಚಾಕ್ರಿಕಾರಡ ಆರೋಗ್ಯತ್‌ರ ಮೀದ ಎಚ್ಚರ ಎಡ್‌ತವ ಇಂಜ ನಿರೂಪ.
2. ಅರಮನೆರ ಚಾಕ್ರಿಕಾರ ಕಳ್ಳ ಕುಡ್‌ಚಿತ್ ಮಾಡ್‌ನ ಅಪರಾಧಕ್ ಮಾಫ್ ಕೇಟಿತ್ ಎಳ್ವೊನ ನಿರೂಪ.
3. ಲಿಂಗರಾಜೇಂದ್ರ ಒಡೆಯಂಡ ಆಪ್ತ ಲಕ್ಷ್ಮಿನಾರಾಯಣಂಡ ಅವ್ವ ಚೆತ್ತಲ್ಲಿ ಸಂತಾಪ ಪಿಳ್ಳಾ ಸಮಧಾನ ಕಾಟಿತ್ ಎಳ್ವೊನ ಕಾಗದ.
4. ಜನ ತಂಗಡ ಜಾತಿರ ಇಡ್‌ಕೆಟ್ಟೊನ ಅನುಸರಣೆ ಮಾಡೊಂಡಿಂಬತ್. ತಪ್ಪನಕ

ಅದ್‌ಂಗ್ ಜಾತಿ ಕಟ್ಟಳೆಪೋಲೆ ಶುದ್ಧಿ ಮಾಡಿಯವಂಡಿಂಜತ್.

5. ಮಂಗಲಾನ ಪೊಣ್ಣ್ ವ್ಯಭಿಚಾರ ಮಾಡ್‌ನಕ ಅದ್‌ಂಗ್ ಸಮ್ಮಂಧಪಟ್ಟಿ ನಿರೂಪ.
6. ದೊಡ್ಡವೀರರಾಜೇಂದ್ರ ಒಡೆಯಂಡ ಕಾಲತ್ ಪಿಳ್ಳಾ ಲಿಂಗರಾಜೇಂದ್ರ ಒಡೆಯ ಆಳುವಕ್ ಸುರುಮಾಡಿತ್ ಒಂದ್, ದಂಡ್ ಕಾಲತ್ ನಾಲ್ಕಾಡ್ ಅರಮನೆಕ್ ಪುತ್ತರಿ ನಮ್ಮರ ಕದ್ ಎಡ್‌ಪಂದ್ ಅರಮನೆರ ಪನ್ಯ ಬೇಲ್‌ಂಜ ಕದ್ ಎಡ್‌ಪಕ ಓರ್ ಫಿರಂಗಿ ಬೊಡಿ, ಅರಮನೆಕ್ ಬಪ್ಪ ಬಟ್ಟೆಲ್ ಫಿರಂಗಿ ಬೊಡಿ ಪಿಳ್ಳಾ ಅರಮನೆ ಎತ್ತನದು ಓರ್ ಬೊಡಿ... ಇನ್ನನೆ ಮೂನಾಲ್ ಕುರಿ ತೋಕ್‌ಂಜ ಒಟ್ಟು 16 ಬೊಡಿ ಬೆಪ್ಪ ಪದ್ಧತಿ ಇಂಜತ್.

ಲಿಂಗರಾಜೇಂದ್ರ ಒಡೆಯ ಬಯ್ಯಂಜಿ ಖರ್ಚ್ ಕಮ್ಮಿ ಮಾಡುವ ಉದ್ದೇಶತೊ ಎನ್ನೊ ಬೊಡಿಬೆಪ್ಪಾನ ನಿಪ್ಪಾಚಿಟ್ಟಿತ್ ನಿರೂಪ ಪೊರ್‌ಡ್‌ಚಿಟ್ಟಿತ್.

7. ಪುತ್ತರಿ ನಮ್ಮಲ್ ನಾಲ್ಕಾಡ್ ಅರಮನೆಲ್ ಪೊಣ್ಣಾಳಳ ಉಂಬ್‌ಚಿಟ್ಟಿತ್ ಅಯೆಪಾಂಗ್ ಸಮ್ಮಂಧಪಟ್ಟಿನ್ನಕೆ ಓರ್ ನಿರೂಪ.

ಕೊಡಗುರ ಐರೋಪ್ಯ ಚರಿತ್ರಕಾರಳ ಅನುಸರಣೆ ಮಾಡಿತ್ ಚೆನ್ನಂಗ್ ಸ್ಥಳೀಯ ಎಳ್ತಕಾರ ಹಾಲೇರಿ ಮನೆತನತ್‌ರ ಲಿಂಗಾಯತ ಅರಸಂಗ ಪಟ್ಟಮಕ್ ಪುರ್‌ಡ್ ಕೊಡ್‌ಪ ಇಂಜಾಲೆ. ಕೂಟ್‌ಕ್ ಅಯಿಂಗಳ ಕಮ್ಮಿ ತರತ್ ಕಂಡಂಡ್ ದೂರತ್ ಬೆಚ್ಚಿತಿಂಜತ್‌ಂದ್ ಎಳ್ಳಿತ್. ಆಚೇಂಗಿ, ನೇರಾನ ಸ್ಥಿತಿ ಅನ್ನನೆ ಇಂಜಾಲೆ. ದೊಡ್ಡ ವೀರ ರಾಜೇಂದ್ರಂಡ ಕಾಲಕ್ ಮುಪ್ಪಡೆ ಪಟ್ಟಮ ಕೊಡಗುಲ್ ನಲ್ಲ ಚಾಕ್ರಿ ಪಿಳ್ಳಾ ರಾಜಂಗಡ ನಂಬಿಕೆಕ್ ಒಳಪಟ್ಟಿನ್ನಕೆ ಕಂಡ್ ಬಪ್ಪ.

ಒಂದನೆ ಲಿಂಗರಾಜೇಂದ್ರಂಡ ಕಾಲತ್ ಪಟ್ಟ ಸುಬ್ಬರಸಯ್ಯ, ಅವಂಡ ತಮ್ಮಣ ನಾಗಪ್ಪಯ್ಯ ಬಲ್ಯ ಚಾಕ್ರಿಲ್ ಇಂಜತ್. ಒಂದನೆ ಲಿಂಗರಾಜೇಂದ್ರ ಚತ್ತದು ಹೈದರಾಲಿ ಟಿಪ್ಪು ಸುಲ್ತಾನ ಕೊಡಗುನ ಆಳಿಯಂಡ್ ಇಪ್ಪಕ ಪಟ್ಟ ಸುಬ್ಬರಸಯ್ಯ, ಅಲ್ಲಿಂಜ ನಾಗಪ್ಪಯ್ಯ ಕೊಡಗುರ ಅಮಲ್‌ದಾರಂಗ ಆಯಿತಿಂಜತ್. ದೊಡ್ಡ ವೀರರಾಜೇಂದ್ರಂಡ ಕಾಲತ್ ಕರಣಕ ಸುಬ್ಬಯ್ಯ, ಮುತ್ತುಭಟ್ಟ, ದಳವಾಯಿ ಈಶ್ವರಯ್ಯ, ಶಂಭಯ್ಯ ಇನ್ನತವು ಬಲ್ಯ ಚಾಕ್ರಿಲ್ ಇಂಜಿತ್ ರಾಜಂಡ ವಿಶ್ವಾಸಕ್ ಎಡೆ ಆಯಿತಿಂಜತ್. ಇಯಂಗಕೆಲ್ಲ ದೊಡ್ಡ ವೀರರಾಜೇಂದ್ರ ಒಡೆಯ ಭೂಮಿ ಕೊಡ್‌ತಿತ್.

ಲಿಂಗರಾಜೇಂದ್ರ ಒಡೆಯ ಏಳಾಯಿರ ಸೀಮೆರ ಪಟ್ಟಮಕ್ ಭೂಮಿನ ಕೊಡ್‌ತಾಂಗ್

ನಿರೂಪ ಉಂಡ್.

ಲಿಂಗರಾಜಂಡ ಕಾಲತ್ ಪಡೆಪೊಪ್ಪ ಅವಕಾಶ ಅಚ್ಚಕ್ ಇಂಜಾಲೆ. ಎನ್ನಂಗೇಣ್ಣಕ ಅಕ್ಕ ದಕ್ಷಿಣ ಹಿಂದೂಸ್ಥಾನತ್‌ಲೆಲ್ಲ ಬ್ರಿಟಿಷಡ ಆಳ್ವಿಕೆ ಇಂಜತ್. ಕೊಡಗರ ಲಿಂಗರಾಜೇಂದ್ರ ಒಡೆಯ ಬ್ರಿಟಿಷಡ ಆಶ್ರಿತನಾಯಿತಿಂಜತ್. ಕೊಡಗರ ಜಾಗ ಎಲ್ಲ ಅಯಿಂಗಡ ಅಧಿಕಾರಕ್ ಒಳಪಟ್ಟಿತಿಂಜತ್. ಆನಗುಂಡ್ ಲಿಂಗರಾಜೇಂದ್ರಂಡ ಕಾಲತ್ ಅವಂಡ ದಳವಾಯಿಯ, ಕಾರ್ಯಕರ್ತಂಗ, ಪ್ರಜೆಯ ತಂಗಡ ಪರಾಕ್ರಮತ್‌ನ ರಾಜ ಬೋಟೆಕ್ ಪೋಪ ಸಂದರ್ಭತ್ ಕಾಟುವ ಇಂಜತ್. ಇನ್ನನೆ ಬೋಟೆಲ್ ತಂಗಡ ಶೂರತನ ಕಾಟನಯಿಂಗಕ್ ರಾಜ ಭೂಮಿ ಪಿಳ್ಳಾ ಕೃಷಿಕ್ ಆಳಳ ಕೊಡ್‌ತಿತ್ ನಿರೂಪತ್ ಅದ್‌ನೆಲ್ಲ ಎಳ್ವಿತ್. ಹಾರಂಗಿರ ದಳವಾಯಿ ರಾಮಯ್ಯ ಏರ ಕಣಕ್‌ಲ್ ಬೋಟೆ ನಾಯಿಯಳ ಚಾಕಿಯಂಡ್ ಇಂಜದೆ ಅಲ್ಲತೆ, ಅವ ಬೋಟೆಲ್ ದುಂಬ ಹುಷಾರ್ ಇಂಜತ್‌ಂದ್ ಅವಂಡ ಕುಟುಂಬಕಾರ ಎಣ್ಣುವ. ರಾಮಯ್ಯಂಗ್ ಭೂಮಿ ಪಿಳ್ಳಾ ಆಳಳ ಜಮ್ಮ ಆಯಿತ್ ಕೊಡ್‌ತಾಂಗ್ ನಿರೂಪ ಉಂಡ್.

8. ರಾಜಂಡ ಕಾಲತ್ ಅವಂಡ ಅಧಿಕಾರಿಯಡ ಮನೆಲ್ ನಡಪ ಮಂಗಲತ್ ಕ್ಣ್ಣಿ, ಮೂಡಿ ಏರ ಕೊದಿಮೊದ ಪಡ್‌ಂದಕ ಅದ್ ತಪ್ಪಾವ ಇಂಜತ್‌ಂದ್ ಕಾಂಬ. ಅನ್ನನೆ ಏರ ಕೊದಿಮೊದ ಪಡ್‌ಂದಾಂಗ್ ರಾಜ ವಿಶೇಷ ಒಪ್ಪಿಗೆ ಕೊಡ್‌ತದ್ ನಿರೂಪತ್ ಗೊತ್ತ್ ಕಟ್ಟುವ.
9. ಲಿಂಗರಾಜೇಂದ್ರ ಒಡೆಯಂಡ ಕಂಪೆನಿ ಸರ್ಕಾರತ್‌ರ ಟಪಾಲ್ ಕಡ್‌ತುವಾಂಡ ಮೀದ ಪೊರ್‌ಡ್‌ಚಿಟ್ಟ ಓರ್ ನಿರೂಪ.
10. ವೀರರಾಜೇಂದ್ರ ವೇಟೆ ಕ್ಯಾಥಲಿಕ್ ಕ್ರೈಸ್ತ ಗುರುಕ್ ನಿರೂಪ.
11. ಅರಮನೆರ ಚಾಕ್ರಿಕಾರಂಗ್ ಕ್ಷಮೆರ ಓರ್ ನಿರೂಪ.



## ಮಡಿಕೇರಿ ಕೋಟೆ ಪುರದಿಯ ಅರಮನೆ

ಲಿಂಗರಾಜೇಂದ್ರ ಒಡೆಯ ಮಡಿಕೇರಿ ಕೋಟೆರ ಒಳ್ಳೆ ಸುರೂಲ್ ಇಂಜ ಅರಮನೆನ ಬೂಕಿತ್ ಅದೇ ಜಾಗತ್ ಓರ್ ಬಲ್ಯದಾನ ಪುರದಿಯ ಅರಮನೆ ಕೆಟ್ಟುಚಿಟ್ಟುತ್. ಸುರೂವೆತ ಅರಮನೆರ ಸುತ್ತು ಎದಿಕೆ ಭಾಗತ್‌ನ ಬುಟ್ಟುತ್ ಬಾಕಿ ಮೂಂದ್ ಭಾಗತ್ ಎತ್ತರ ದ್‌ಟ್ಟೆ ಇಂಜನ್ನಕೆ ಕಾಂಬ. ಈ ದ್‌ಟ್ಟೆನೆಲ್ಲ ರಾಜ ಎಡ್‌ಪ್‌ಚಿಟ್ಟುತ್ ಜಾಗತ್‌ನ ಸಮ ಮಡಿತ್ ಪುರದಿಯ ಅರಮನೆ ಕೆಟ್ಟುಚಿ. ಇದ್‌ಂಡ ಕೆಲಸ ಕಾರ್ಬಾರ್ 1735ಂಗ್ ಸುರು ಆಯಿತ್ 1737ಂಗ್ ತೇಂದತ್. ಈಂಡ ಕಾರ್ಬಾರ್‌ರ ಮೀದ ರಾಜ ಅರಮನೆರ ಎದಿಕೆ ಓರ್ ಕೋಂಬರೆರ ಕೆಂವತ್ ತಾಮ್ರಶಾಸನತ್‌ನ ಬೆಪ್ಪುಚಿಟ್ಟುತ್.

ಲಿಂಗರಾಜೇಂದ್ರ ಒಡೆಯ ಕೆಟ್ಟುಚಿಟ್ಟು ಈ ಅರಮನೆರ ಪರ್ಣನೆನ ಕ್ರಿ.ಶ. 1815ತ್‌ಂಜ 1817ಕೆತ್ತನೆ ಕೊಡಗುರ ಪ್ರಾಕೃತಿಕ ವಿಸ್ತೀರ್ಣ, ಜನಡ ಬದ್‌ಕ್... ಇನ್ನತಾನ ಅರಾಂಜಂಡ್ ಎಳ್ವವಕ್ ಈಸ್ಟ್‌ಇಂಡಿಯಾ ಕಂಪೆನಿ ಸರ್ಕಾರಕಾರ ಕೊಡಗುಕ್ ಅಯೆಚಿ ಲೆ.ಕೊನ್ನರ್ ಎಣ್ಣುವ ಅಧಿಕಾರಿ ಈ ಪೋಲೆ ಎಳ್ವಿತ್.

The next remarkable building is the palace, a structure of recent date, being erected by the present Prince ; it is within the fort, of which it occupies a large part. This edifice consists of two stories, is lofty and spacious, and loke most Hindoo buildings of this nature, covers a great extent of area. It is of a square form having a small court in the centre ; three of its sides present nearly a blank space varied only by a few apertures to admit the air (for they cannot be called windows) considerable innovations however have been made in the architecture of the country with regard to the face of this structure, which is quite after the European fashion, presenting a very handsome front of about 200 feet long ; a range of arches runs along the whole extent of the bottom part, the upper having a contiguous row of windows shut in by glass sashes and Venetian blinds the centre window projecting into a small balcony supported by two rearing horses formed of masnry. Along the ridge of the roof runs a balustrade of ornamental masonry. The front rooms are quite after the



European manner and visitors are received in an apartment the architecture and furniture of which differ in nothing from an English one ; as to the interior arrangements they are doubtless more consonant to native ideas of excellence and comfort. The whole however is an exceedingly stately fabric presenting something greatly superior to most Hindoo palaces, being conceived and executed, after a much better taste than those Royal residencies generally are ; it is of brick and altogether finished with equal solidity as elegance.

ಅರಮನೆರ ಎದಿಕೆ ದಕ್ಷಿಣತರ ಮೂಲೆಲ್ ಲಿಂಗರಾಜೇಂದ್ರ ಓರ್ ವೀರಭದ್ರ ತಿರಿಕೆನೆ ಅರಮನೆ ಕೆಟ್ಟುಚಿಡುವಕೆ ಕೆಟ್ಟುನನ್ನಕೆ ಕಾಂಬ. ಅರಮನೆರ ಎದಿಕೆ ಉತ್ತರ ಬರಿಲ್ ಕೋಟೆ ಕೆಂವತರ ಬರಿಲ್ ಇಟ್ಟಿಗೆ ಪಿಳ್ಳಾ ಗಾರೆಲ್ ದಂಡ್ ಆನೆರ ಆಕ್ಕತಿನ ಮಾಡಿತ್ ಸಿಪ್ಪುಚಿಟ್ಟಿತ್. ಅದ್ ಇಕ್ಕಲೂ ಉಂಡ್.

ಲಿಂಗರಾಜೇಂದ್ರ ಖೈದಿಯಳ ಅರಮನೆರ ಎದಿಕೆ ಪಟ್ಟಿಲ್ ಅಡ್ಡ ಆಯಿತ್ ಬಲೆತ್ ಬಲಂಬ ಆನೆ ಇಂಜಲ್ಲಿಕ್ ಓಡ್ಚಿಡುವ ಇಂಜತ್'ಂದೂ, ತಾಂಡ ಅರಮನೆರ ಮಾಡಿರ ಪೂ ಮೊಗತ್‌ಂಜ ಅಯಿಂಗಕ್ ಬೊಡಿ ಬೆಪ್ಪ ಇಂಜತ್‌ಂದೂ, ಅಕ್ಕ ಬೊಡಿ ಪಟ್ಟಿಚಿಟ್ಟಿವತೆ ಆನೆಯ ಉಳ್ಳಲ್ಲಿಕೆತ್ತನೆ ಓಡಿಬಂದಯಿಂಗಕ್ ಜೈಲಂಜ ಬುಡ್‌ಗಡೆ ಆಪ ಇಂಜತ್‌ಂದ್ ಕತೆ ಉಂಡ್. ಆಚೇಂಗಿ, ಅನ್ನನೆ ಓಡುವ ಇಂಜ ಖೈದಿಯ ಬೊಡಿನ ತಪ್ಪುಚಿಟ್ಟಿಂಡ್ ಓಡ್‌ನದ್ ಪೇರ್ತ್ ಅಪರೂಪ ಎಣ್ಣೊಲು! ಎನ್ನಂಗಣ್ಣಕ ಲಿಂಗ ರಾಜೇಂದ್ರ ನಲ್ಲ ಗುರಿಕಾರ ಆಯಿತಿಂಜತ್.

ಮಡಿಕೇರಿ ಅರಮನೆರ ಬೆಂಬರಿಲ್ ಅರಮನೆರ ಗೋಡೌನ್ ಪಿಳ್ಳಾ ಅಡಿಗೇಕಾರ ಬುದ್ಧವ ಕೋಂಬರೆ ಇಂಜತ್. ಕೋಟೆರ ಒಳ್‌ಲ್ 300 ಜನ ಚಾವಡಿಕಾರ ಇಂಜತ್. ತಿಂಗತ್ 15 ಜನ ಅರಮನೆಲ್ ಪಾರ ಇಂಜತ್ ಇವು ನಾಡ್‌ಲ್ ಇಂಜ ತಂಗಡ ಮನೆಕ್ ಪೋಪಕ, ನಾಡ್‌ಂಜ ಅಚ್ಚಕೆ ಕಣಕಾರ ಜನ ಬಾಕಿ 15 ದಿನ ಅರಮನೆರ ಪಾರಕ್ ಬರೊಂಡಿಂಜತ್. ಇನ್ನನೆ ಅರಮನೆ ಚಾವಡಿಕಾರಡ ಕೆಲಸ ನಡಪ ಇಂಜತ್.



## ಕ್ರಿ.ಶ. 1811ತ್ ಬೋಟೆಕ್ ಕೊಡಗ್ಗಕ್ ಬಂದ ಜ.ಜೇಮ್ಸ್ ವೆಲ್ಸ್ ಎಳ್ನ್ ನ ಕೊಡಗ್ಗರ ವಿವರ

ಜ.ಜೇಮ್ಸ್‌ವೆಲ್ಸ್ ಚೆನ್ನೆ ರೆಜಿಮೆಂಟ್‌ರ ಓರ್ ಸೈನ್ಯಾಧಿಕಾರಿ. ಅವ ಕೊಡಗ್ಗ ಕುಂದ್, ಕಾಡ್‌ರ ಸೀಮೆ ಆನನುಂಡ್ ಇಲ್ಲಿ ಕಾಡ್ ಜಾತಿಯಳ ಬೋಟೆಯಾಡುವಕ್ ಕ್ಕಟ್ಟುವಾಂದ್ ಬ್ರಿಟಿಷ್ ಮಿಲಿಟರಿ ಅಧಿಕಾರಿಯಳುಂಡ್ ಅರ್‌ಂಜಿತಿಂಜತ್. ಆನಗುಂಡ್ ಅವ ಕ್ರಿ.ಶ. 1811ಂಡ ಮಾರ್ಚಿಲ್ ಕೊಡಗ್ಗಕ್ ಬೋಟೆಕ್ ಬಾತ್. ಅವ ಕೊಡಗ್ಗಕ್ ಬಪ್ಪಕ ಲಿಂಗರಾಜೇಂದ್ರ ಒಡೆಯನುಂಡ್ ಇಲ್ಲಿ ಅವಂಗ್ ಇರಂಡಿಯ ಸೌಲಭ್ಯತನ ಪಡ್‌ಂದವಕ್ ಮೈಸೂರ್‌ಲ್ ಬ್ರಿಟಿಷ್ ರೆಸಿಡೆಂಟ್ ಆಯಿತ್, ಕೊಡಗ್ಗಲೂ ಕಂಪೆನಿ ಸರ್ಕಾರತ್‌ರ ಪ್ರಾತಿನಿಧ್ಯ ಅಧಿಕಾರ ಪಡ್‌ಂದಿತಿಂಜ ಅರ್ಥರ್ ಕೋಲ್ ಸಾಹೇಬನುಂಡ್ ಲಿಂಗರಾಜೇಂದ್ರ ಒಡೆಯಂಗ್ ಪರಿಚಯ ಪತ್ರ ಕೊಂಡ ಬಾತ್. ಇಂವ ಇದೇ ಕಾಲ ಮಾರ್ಚ್ ಪಿಇನ್ 1812ಂಡ ಅಕ್ಟೋಬರ್ ತಿಂಗತ್ ದಂಡನೆ ಕುರಿ ಕೊಡಗ್ಗಕ್ ಬಂದಿತ್ ರಾಜಂಡ ಬೆಂದು ತಕ್ಕಾರ ಪಡ್‌ಂದಿತ್ ಇಲ್ಲಿಯತ ಕಾಡ್‌ಲ್ ಬೋಟೆಯಾಡಿತ್ ತಾಂಡ ಜಾಗಕ್ ವಾಪಾಸ್ ಪೋನಂವ. ಈ ದಂಡ್ ಕುರಿ ಅವ ಕೊಡಗ್ಗಕ್ ಬಂದಾಂಡ ಮೀದ ಅವ ಓರ್ ವಿವರವಾನ ವರದಿನ ತಾಂಡ 'ಪೂರ್ವ ದೇಶತ್ ಸೈನ್ಯ ವೃತ್ತಿರ ಗೇನ' ಎಣ್ಣುವ ಪುಸ್ತಕತ್ ಎಳ್ವಿತ್.

ಜ.ಜೇಮ್ಸ್‌ವೆಲ್ಸ್ ಎಳ್ನ್ ಕೊಡಗ್ಗಕ್ ಸಮ್ಪಂಧಪಟ್ಟ ವರದಿನುಂಡ್ ಲಿಂಗರಾಜೇಂದ್ರ ಬ್ರಿಟಿಷ್ ಅಧಿಕಾರಿಯಳ ಮೆಚ್ಚ್‌ಚಿಟ್ಟಿತ್ ಅಯಿಂಗಳುಂಡ್ ತಾಂಡ ಮೀದ ನಲ್ಲ ಅಭಿಪ್ರಾಯ ಪಡ್‌ಂದವಕ್ ಪ್ರಯತ್ನ ಪಟ್ಟಿತ್‌ಂದೂ, ಆಚೇಂಗಿ, ಅಯಿಂಗಕ್ ಕೊಡಗ್ಗರ ಮೀದ ತಂಗಳಾಯಿತೆ ಏದೊಂದಾನೊ ಅರ್‌ಂಜವಕ್ ಆಕತನ್ನೆಕೆ ತಾಂಡ ಪ್ರಜೆಯಳ ಅಯಿಂಗಳುಂಡ್ ದೂರ ಬೆಪ್ಪಕ್ ಎಚ್ಚರ ಎಡ್‌ತವ ಇಂಜತ್‌ಂದೂ ಗೊತ್ತಾಪ. ಇಚ್ಚೆಕೆ ಅಲ್ಲತೆ ಅವ ತಾಂಡ ಪ್ರಜೆಯಳ ಗರ್ವತ್ ಆಳುವ ಇಂಜತ್ ಪಿಇನ್ ಕೊಡಗ್ಗಲ್ ಒಮ್ಮತೆ ನೆಲೆ ನಿಂದ ಪೊರಜಾಗಕಾರಳ ತಾಂಡ ರಾಜ್ಯಾಡಳಿತತ್‌ರ ವಿಷಯ ಪೊರ್‌ಮೆತಯಿಂಗಕ್ ಅರಿಚಿಡುವ ಕಯ್ಯಾಂದೆಣ್ಣುವ ಉದ್ದೇಶತ್ ಕೊಡಗ್ಗನ ಬುಟ್ಟಿತ್ ಪೊರ್‌ಮೆ ಪೋಪಕೂ ಬುಡುವ ಇಂಜ್‌ಲೆಂದ್ ಈ ವರದಿನುಂಡ್ ಗೊತ್ತ್ ಕಟ್ಟುವ.

"ಕೊಡಗ್ಗಲ್ ಬೋಟೆಕ್ ಬೋಂಡಿಯಾನ ಕಾಡ್‌ಜಾತಿಯ ಕ್ಕಟ್ಟುವಾಂದ್ ಪೇರ್ತ್ ದಿನತ್‌ಂಜ ಕೇಟಾನುಂಡ್, ನಾಕ್ ಕೊಡಗ್ಗಕ್ ಬಪ್ಪಕ್ ಅವಕಾಶ ಕ್ಕಟ್ಟಾನಾಂಗ್ ನಾನ್ ಬೆಂಗಳೂರ್‌ಂಜ ಕ್ರಿ.ಶ. 1811ಂಡ ಮಾರ್ಚಿ 19ಂಗ್ ನಾಡ ಸೈನ್ಯತ್‌ರ ಓರ್ ಬಾಲೆಕಾರ ಲೆ.ವಿಲಿಯಂಸನ್‌ರ ಕೂಟಿಯಂಡ್ ಪೊರ್‌ಟ. ವಿಲಿಯಂಸನ್ ನಲ್ಲ ಬೋಟೆಕಾರ.

ಕೂಟ್‌ಕ್ ನಾಕ್ ಚಾಯಿತೆ ಒಗ್ಗುವ ಕೂಟ್‌ಕಾರ. ನಂಗ ಬೆಂಗಳೂರಾಂಜ 150 ಮೈಲ್ ದೂರತ್ ಉಳ್ಳ ವೀರ ರಾಜೇಂದ್ರ ಪೇಟೆಕ್ ಪಲ್ಲಕ್ಕಿಲ್ ಅಳೊತಂಡ್ ನೇರೆ ಬಾತ್.

ಮಾರ್ಚ್ 22ಂಗ್ ರಾಜಂಡ ಜನ ಬಣ್ಣೆ ತಂದ ಪೊಲಾಕತ್ ಕಾಪಿ ಆನಪಿಳ್ಳಾ ನಂಗ ದಂಡ್ ಬಲ್ಯ ಆನೆಯಡ ಕೊಡಿಲ್ ಅಳೊತಂಡ್ ಕುಂದಾರ ತುದಿ ಪಿಳ್ಳಾ ಇಳಿಜಾರ್‌ಕಾಲೆ ಉಳ್ಳ ಬಟ್ಟೆಲ್ ಎಟ್ಪ್ ಗಂಟೆ ಸುತ್ತಾಡ್‌ಚಿ. ಅಲ್ಲಿಂಜ ಮಡಿಕೇರಿ ಕಲ್ಲಾಕೋಟೆರ ಪೊರಮೆ ಐರೋಪ್ಯ ಶೈಲಿಲ್ ಕೆಟ್ವಾನ ಬಲ್ಯಮನೆಕ್ ಎತ್ತ್‌ಚಿ.

ಮಡಿಕೇರಿ...ಈ ಜಾಗ ಮನಸ್ಸಕ್ ಕುಶಿ ತಪ್ಪ ಪಿಳ್ಳಾ ಚಾಯಿ ಉಳ್ಳ, ಕುಂದ್ ಸಾಲಾರ ಪಕ್ಕತ್ ಓರ್ ಎತ್ತರವಾನ ಜಾಗತ್ ಉಂಡ್. ಆ ಕುಂದಾಂಜ ಮಡಿಕೇರಿ ಚಾಯಿತೆ ಕಾಂಬ. ಕುಂದ್‌ಸಾಲ ಕಡಂಗ್, ದೊಟ್ಟೆನುಂಡ್ ಭದ್ರ ಆಯಿತ್ ಬಟ್ಟೆಲ್ ಪಾರಕಾರ ಉಂಡ್. ಪೊರಮೆಂಜ ಬಪ್ಪ ಬಟ್ಟೆ ಎಲ್ಲ ಈ ಕುಂದ್‌ಸಾಲಾಂಜ ಕಾಂಬ. ವೀರರಾಜೇಂದ್ರ ಪೇಟೆಕ್ ಇಲ್ಲಿಂಜ 24 ಮೈಲ್ ಇಕ್ಕೂಂದ್ ನಂಗ ಅಂದಾಜ್ ಮಾಡ್‌ಚಿ. ರಾಜಂಡ ಅರಮನೆ ಕೋಟೆರ ಒಳಲ್ ಉಂಡ್. ಅವಂಡ ಕುದರೆ ಪಿಳ್ಳಾ ಆನೆ ಲಾಯ ಕೋಟೆರ ಪೊರಮೆ ಇಳಿಜಾರ್‌ಲ್ ಉಂಡ್.

ಪೇಟೆ, ಕೋಟೆಂಜ ಸುಮಾರ್ ಅರೆಮೈಲ್ ದೂರತ್ ಇಂಜಿತ್ ಮನಾರತೆ ಉಂಡ್. ಇಲ್ಲಿಯತ ಮನೆನೆಲ್ಲ ಚಾಯಿತೆ ಕೆಟ್ಟಿತುಂಡ್. ಕೋಟೆಂಜ ಪೇಟೆಕ್ ನಲ್ಲ ರಸ್ತೆ ಉಂಡ್. ಪೇಟೆರ ಆ ಬರಿಲ್ ಎತ್ತರ ಆನ ಸಮತಟ್ಟಾನ ಜಾಗ ಉಂಡ್. ಅಲ್ಲಿಕ್ ನಂಗ ಪೋಪಕ ಬಲ್ಯೋರ್ ಮಣ್ಣಾರ ದೊಟ್ಟೆ ಇಂಜತ್. ಆ ದೊಟ್ಟೆರ ನಡುಕಾಲೆ ಪೋನ ನಂಗಕ್ ಓರ್ ಪರಂಬ್ ಕಂಡತ್. ಆ ಪರಂಬ್‌ಲೆ ಓರ್ ಬಲ್ಯ ಗೋರಿ ಉಂಡ್. ಅದ್‌ನ ಇಕ್ಕ ಉಳ್ಳ ಲಿಂಗರಾಜ ತಾಂಡ ಅಣ್ಣ ವೀರರಾಜೇಂದ್ರ ಪಿಳ್ಳಾ ಅವಂಡ ಪೊಣ್ಣಾರ ಸಮಾಧಿರ ಮೀದ ಕೆಟ್ಪಿಚಿಟ್ಟಿತ್. ಇಲ್ಲಿ ಉಳ್ಳ ಜನ ಐರೋಪ್ಯಂಗಳ ಕಾಕಿತ್ ಗೋರಿರ ಎಲ್ಲ ಭಾಗತನ ಕಾಟುವ.

ಈ ಗೋರಿ ಔರಂಗಜಾದಾರ ರಾಜ ಔರಂಗಜೇಬ್ ಕೆಟ್ಪಿಚಿಟ್ಟಿ ತಾಂಡ ಕೊದಿರ ಪೊಣ್ಣಾರ ಸಮಾಧಿನೊ, ಹೈದರಾಲಿ ಪಿಳ್ಳಾ ಟಿಪ್ಪು ಸುಲ್ತಾನಂಡ ಗೋರಿನೊ ಮೀತನ್ನಕೆ ಉಂಡ್‌ಂದ್ ನಾಕ್ ತೋಂದುವ. ಈ ಗೋರಿ ಓರ್ ಬಲ್ಯ ಚೌಕಾಕೃತಿಲ್ ಇಂಜಂಡ್ ಈಂಡ ನಾಲ್‌ಮೂಲೆಲ್, ನಾಲ್ ಗೋಪುರ. ಈಂಡ ನಡುಲ್ ಓರ್ ಚಾಯಿ ಉಳ್ಳ ಉರ್‌ಟಾನ ಗುಮ್ಮಟ ಉಂಡ್. ಗುಮ್ಮಟತ್ ಕೊಡಿಲ್ ಓರ್ ಪೊನ್ನಾರ ಚೆಂಡ್, ಆಂಡ ಕೊಡಿಲ್ ಗಾಳಿರ ಕೋಳಿ ಉಂಡ್. ಈ ಗೋರಿರ ಕಿತ್‌ಕೆರ ರಾಡ್ ಗೆಟ್ಟಿಯಾನ ಪಿಚ್ಚಳೆರದ್.

ಈ ಪರಂಬಲ್ ನಂಗ ಮಿಳ್ಳಾಲೆ ನಿರ್ಕಪಡ್ತಾನ ಪೋಲೆ ಮಜ್ಜಣ 3 ಗಂಟೆಕ್ ಮಹಾ ಸ್ವಾಮಿನ ಕಂಡತ್. (ಕೊಡಗರ ರಾಜನ ಮಹಾಸ್ವಾಮಿಂದೆ ಕಾಕೊಂಡಿಂಜತ್). ರಾಜ ಅಂದ್ ಇಂಗ್ಲೀಷ್ ಸೈನ್ಯತಾರ ಮೇ.ಜ. ಯೂನಿಫಾರ್ಮ್ ಇಟ್ಟಿತಿಂಜತ್. ಅಂದಾಜ್ 30 ಬಯತ್ ರಾಜ ಚಾಯಿಕಾರ, ನಲ್ಲ ತಡಿಕಾರ. ನಲ್ಲ ಹುಷಾರ್ ಲಾ ಕಾರ್ಬಾರ್ ಮಾಡುವನ್ನಕೆ ಕಂಡತ್. ನಂಗಳ ಕಂಡದೆ ರಾಜ ಕೈ ಕುಲಕಿತ್, ತಾಂಡ ದ್ವಿಭಾಷಿ (ಇಂಗ್ಲೀಷ್ ಪಿಳ್ಳಾ ಹಿಂದೂಸ್ಥಾನಿ ತಕ್ಕ ಪಡ್ಚಂವ)ರ ಕೂಡೆ ತಕ್ಕ ಪರಂದಿತ್ ನಂಗಳ ಅಳತವನ್ನಕೆ ಕೇಟಂಡತ್. ಅಕ್ಕಣೆಕ್, ರಾಜಂಗ್ "ನಾಕ್ ಹಿಂದೂಸ್ಥಾನಿ ಗೊತ್ತುಂಡ್"ಂದ್ ಅರಾಂಜಿತ್ ಹಿಂದೂಸ್ಥಾನಿಲೆ ತಕ್ಕ ಪರೆಯುವಕ್ ಕೂಡ್ಚಿ.

ಅಲ್ಲಿಂಜ ರಾಜ ಮದ್ದು ದುಂಬ್ಚಿಟ್ಟ ಚೆನ್ನಂಗ್ ರೈಫಲ್ ನಂಗಡ ಎದಿಕೆ ಬೆಚ್ಚತ್. 50 ಗಜ ದೂರತ್ ಭರ್ಜಿರ ತುದಿಲ್ ತೆಂಗಿನ ಕೆಟ್ಟಿತ್ ಬೆಪ್ಪಕ್ ತಾಂಡ ಜನಕ್ ಆಜ್ಜೆ ಮಾಡ್ಚಿ. ಇದಾಯಿತ್ ಅವ ನಂಗಳ ತೆಂಗಿಕ್ ರೈಫಲ್ ಪೊಯ್ಯುವಕ್ ಎಣ್ಣೆಚಿ. ತೆಂಗಿಕ್ ಗುರಿ ಬೆಚ್ಚಿತ್ ಪೊಯ್ಯುವಾತ್ ರಾಜ ನಂಗಳ ಬಯ್ಯಕ್ಟ್ಟತ್ಂದ್ ನಂಗ ಎಣ್ಣೆತೆ ಇಪ್ಪಲೆ. ಅವ ತಾಂಡ ಪ್ರತಿಯೋರ್ ಬೊಡಿಕ ತೆಂಗಿರ ನಡು ಒಡ್ಂದಿತ್ ಚೂರಾಯಿತ್ ಬೂವ ಇಂಜತ್! ನಂಗ ಪೊಜ್ಜದ್ ಗುರಿ ತಪ್ಪಿ ಪೋಯಿರುವ ಇಂಜತ್.

ಇದಾಯಿತ್ ರಾಜ ನಂಗಳ ಅವಂಡ ಕೂಡ ಕುದರೆ ಸವಾರಿ ಮಾಡುವಕ್ ಕೇಟಂಡತ್. ಓರ್ ಚಾಯಾನ ಇಂಗ್ಲೀಷ್ ಕುದರೆನ ಕೊಂಡಬಪ್ಪಿಚಿಟ್ಟತ್. ಓರ್ ಅರಬಿ ಕುದರೆನ ಲೆ.ವಿಲಿಯಂ ಸನ್ ಕೊಡ್ತಿತ್ ತಾನೂ ಓರ್ ಕುದರೆ ಪತ್ಚಿ. ನಂಗ ಅರೆ ಗಂಟೆ ಆ ಪರಂಬಲ್ ಕುದರೆ ಸವಾರಿ ಮಾಡ್ಚಿ. ಇದಾನದು ರಾಜ ನಾಕ್ ರೆಸ್ಪ್ ಎಡ್ತವಕ್ ಎಣ್ಣೆಚಿ. ಆಚೇಂಗಿ, ರಾಜ ಮಾತ್ರ ಕುದರೆಲೆ ಅಳತಂಡ್ ಓರ್ ಉದ್ದ ಶೂಲತನ ತಾಂಡ ಕೈಲ್ ಪುಡ್ಚಂಡ್ ಪೇರ್ತ್ ಹುಷಾರ್ ಲಾ, ಕೆಣಿಲ್ ಚೆನ್ನಂಗ್ ಸಾಸ ಕಾರ್ಬಾರ್ ಮಾಡಿತ್ ಕಾಟ್ಚಿ. ಅಲ್ಲಿಂಜ ನಂಗಲ್ಲ ಕುದರೆ ಪತ್ತಿತ್ ರಾಜಂಡ ಕೂಡೆ ಕೋಟೆಕ್ ಪೊರಟತ್. ಗದ್ದಿಗೆಂಜ ಕೋಟೆಕೆತ್ತನೆ ನಂಗ ದಂಡಾಳೂ ರಾಜಂಡ ಬಲೆತೆ, ಎಡ್ತೆ ಬರಿಲ್ ಸವಾರಿ ಮಾಡೊಂಡೂಂದ್ ರಾಜ ಕೇಟಂಡನ್ನಕೆ ನಂಗ ಅನ್ನನೆ ಮಾಡ್ಚಿ.

ಅಕ್ಕಣೆಕ್ ಒಯಿಪತ್ ಏಳ್ ಗಂಟೆ. ಪೊರಮೆತ ಪಟ್ಟಿಲ್ ಪೊವಲ್ ಬೊಳಿರ ಬದಲ್ ಚೆನ್ನಂಗ್ ಇರಾಟ್ ಕಾಂಜಿತ್. ನಂಗ ಕಿಟಾಕಿಲ್ ಗುರಿ ಬೆಚ್ಚಿತ್ ಬೋರೆ ಬೋರೆ ಸಾಮಾನ್ ಕೆ ಬೊಡಿ ಬೆಚ್ಚತ್. ನಾನ್ ಓರ್ ತೆಂಗಿರ ಕೊಡಿಲ್ ಬೆಚ್ಚಿತಿಂಜ ಬೋರಂಗಿನ ಪೊಜ್ಜಿ ಬೂಕ್ ನ. ನಾಡ ಬೊಡಿ ಅಕಸ್ಮಾತ್ ಆಯಿತ್ ಗುರಿನ ಸೆರಿಕ್ ಪಟ್ಟಿತಿಂಜತ್. ಇದಾನದು ರಾಜ ಪಿಳ್ಳಾ ಅವಂಡ ಮೋಂವ ಪಿಳ್ಳಾ ಬೆಂದುವಳ ನಂಗಕ್ ಪರಿಚಯ ಮಾಡ್ಚಿ. ಅವೆಲ್ಲ ಚಾಯಿಕಾರ ಕಣ್ಣುಮಕ್ಕ. ರಾಜಂಡ ಮೋಂವ ಯುವರಾಜ

ಏಳೆತ್ತರ ಬಯತ್‌ಕಾರನಾಯಿತ್ ಜನರಲ್ ಪದವಿರ ಸೈನ್ಯಾಧಿಕಾರಿರ ಯೂನಿಫಾರ್ಮ್ ಇಟ್ಟಿತ್, ನಡುಲ್ ಓರ್ ಪಡೆಕತ್ತಿನ ಚಿಕ್ಕಚಿಟ್ಟಿತಿಂಜತ್. ರಾಜಕುಮಾರ ಪಿಳ್ಳಾ ಬೋರೆ ಕಣ್ಣುಮಕ್ಕಳ ಕಾಂಬಕ ನಾಕ್ ಫ್ರೆಂಚ್ ಜನಡ ಪಳೇಯ ಕಾಲತಾರ ಪೋಟೋ ಗೇನ ಬಾತ್.

ಅಂದ್ ನಂಗ ಚಾಯಿತೆ ಓಡಿಕಳ್‌ಚಾಂಗ್ ನಂಗ ಚಾಯಿತೆ ವರಾಚಿಂದೆ ಎಣ್ಣೆಯವಲು. ಪಿತ್ಯಾಂದ್ ಎಕ್ಕೋಲು ಏವನ್ನೆಕೆ ಬೆರಿಯ ಎದ್ದತ್. ಪೂರ್ವದೇಶತ್ ಇರಂಡಿಯ ಐರೋಪ್ಯ ಬಾಲೆಕಾರ ಪೊಲಾಕ ಬೆರಿಯ ಏವಂಡೂಂದ್ ನಾನ್ ಒರಾತ ಮಾಡುವಿ. ನಂಗ ಎದ್ದಿತ್ ರಾಜಂಡ ಕುದರೆ, ಆನೆನ ನೋಟುವಕ್ ಪೋಚಿ. ಆನೆಲ್ ಅಂದಾಚ್ ದಂಡ್ ಬಯತ್‌ರ ಮಿನಿ ಮಿನಿಂದ್ ಮಿನ್ನುವ ತಲ್ಮಿರ, ಚಾಯಿ ತೋಲುಳ್ಳ ಬೊಳ್‌ತ ಆನೆನ ಕಂಡತ್. ರಾಜಂಡ ರಾಜ್ಯತ್ ದುಂಬ ಆನೆಯ ಉಳ್ಳಾನುಂಡ್ ರಾಜ ಏರ ಕಣ್‌ಕ್‌ಲ್ ಆನೆಯಳ ಪಳಗಿಚಿಟ್ ಬೆಚ್ಚಂಡಿತ್.

ನಂಗ ಪೊಲಾಕ ಕಾಪಿ ಕುಡ್‌ಚಿತ್ ಆಕಣೆ ರಾಜ ತಾಂಡ ಪರಿವಾರತಾರ ಕೂಡೆ ಆನೆರ ಮೀದ ಅಳಾತಂಡ್ ಬಂದಾನ ಕಂಡಿತ್ ನಂಗಕ್ ಆಶ್ಚರ್ಯ ಆಚಿ. ಇಂದ್ ರಾಜ ದುಂಬ ಪೊನ್ನರ ಮಾಲ್ ಮಟ ಇಟ್ಟಿತ್ ದೇಶಿ ಪೊರಪಾಡ್‌ಲ್ ದುಂಬ ಚಾಯಿತೆ ಎಲಂಗಿಯಂಡ್ ಇಂಜತ್. ನಾಡ ಕಣ್‌ಕ್ ಅಂವ ನೇರಾಯಿತೂ ದುಂಬ ಚಾಯಿ ಕಂಡತ್! ಅಂವ ಚಿನ್ನಂಗ್ ನೇರ ರಾಜಂಡ ಕೂಡೆ ಇಂಜತ್. ಅಕ್ಕಣೆ ಓರ್ ಕಾಡಾನೆ ಮಡಿಕೇರಿರ ಪಕ್ಕ ಬಂದ ಸುದ್ದಿ ರಾಜಂಗ್ ಕೊಟ್ಟಿಚಿ. ನಂಗಕ್ ಕುಶಿ ಉಂಡೇಂಗಿ ರಾಜ ನಂಗಡ ಕೂಡೆ ಆ ಆನೆನ ಬೊಡಿ ಬೆಪ್ಪಕ್ ಬಪ್ಪಿಂಡ್ ಎಣ್ಣೆಚಿ.

ಕೂಡೆನ್ನೆ ನಂಗ ಬೋಟೆರ ಪೊರ್‌ಪಾಡ್ ಇಟ್ಟಂಡ್, ತೋಕ್, ಮದ್ದನೆಲ್ಲ ಎಡ್‌ತಂಡ್ ನಂಗಡ ಕೋಂಬರೆಂಜ ಪೊರ್‌ಮೆ ಬರಣೆ ರಾಜ ಪಿಳ್ಳಾ ಪರಿವಾರ ತಯಾರ್. ರಾಜನೆ ಖುದ್ ಆನೆನ ನಡ್‌ತುವ ಇಂಜತ್. ಆನೆರ ಬೋಳೆರ ಮೀದ ಅಳಾತಂಡ್ ಬಲ್‌ತೆ ಕೈಲ್ ರಾಜ ಅಂಕುಶ ಪುಡ್‌ಚಂಡ್ ನಡ್‌ಪಕ ಬಟ್ಟೆಲ್ ಅಡ್ಡ ಕೊಟ್ಟುವ ಮರತಾರ ಚೆರಿಯ ಕೊಂಬೆನೆಲ್ಲ ಕೆತ್ತುವಕ್ ಓರ್ ಕತ್ತಿನೊ ಪುಡ್‌ಚಂಡಿಂಜತ್. ಪೂರ್ವದೇಶತಾರ ಎಚ್ಚೆಕೊ ರಾಜಂಗಡ ಬಲ್ಕರಿಕೆಂಜ ಈ ರಾಜಂಡ ನಡವಳಿಕೆ ನಾಕ್ ನೇರಾಯಿತೂ ವಿಶೇಷ ಆಯಿತ್ ಕಂಡತ್.

ಮಡಿಕೇರಿಂಜ ಬೊರಿ ಓರ್ ಮೈಲ್ ದೂರ ಇಂಜ ಬೋಟೆರ ಜಾಗಕ್ ಬಂದ ನಂಗ ಆನೆಂಜ ಇಳಾಂಜತ್. ಅಕ್ಕ ರಾಜಂಡ ಜನ ಮರತಾರ ಕೊಡಿಲ್ ನಂಗ ಅಳಾಪಕ್ ಪುಂಡತಾರ ಅಟ್ಟಣಿ ಕೆಟ್ಟುವ ಇಂಜತ್. ಆ ನೇರತ್ ನಂಗ ಓರ್ ಗುರಿಕ್ ಬಾಣ ಬುಟ್ಟಂಡ್



ಮಜ ಮಾಡುವ ಇಂಜತ್. ಇನ್ನನೆ ಗುರಿ ಪೊಯ್ಯುವಾತೂ ರಾಜ ನಂಗಳ ಚೋಪ್‌ಚಿಟ್ಟತ್. ಅಟ್ಟಣೆ ಕೆಟ್ಟಿತ್ ಆನಪಿಳ್ಳಾ ನಂಗ ಮರ ಪತ್ತಿ ಅಳತಂಡತ್. ರಾಜ ನಂಗ ದಂಡಾಳಾರ ಮರತಾರ ನಡೂಲ್ ಉಳ್ಳ ಮರತ್ ಕೆಟ್ಟನ ಅಟ್ಟಣೆಲ್ ಅಳತತ್. ನಂಗ ದಂಡಾಳಡಾತ್ ರಾಜ ತಂದ ಮೂಂದ್ ತೋಕ್ ಇಂಜತ್. ನಂಗಡ ತೋಕ್‌ನ ದುಂಬ್‌ಚಿಟ್ಟಿತ್ ತಪ್ಪಕ್ ರಾಜಂಡ ಅರಮನೆರ ದಂಡ್ ಜನ ನಂಗಡ ಕೂಡೆ ಇಂಜತ್. ರಾಜಂಡ ಪಕ್ಕ 12 ಔನ್ಸ್ ಉಂಡೆ ದುಂಬ್‌ಚಿಡುವ ಚೋಡ್‌ಬೊಡಿರ ರೈಫಲ್ ಇಂಜತ್. ನಂಗ ಅಟ್ಟಣೆ ಪತ್ತುವಾಂಗ್ ಮುಪ್ಪಡೆ ರಾಜ ಆನೆಕ್ ಬೊಡಿಬೆಪ್ಪಕ ಏದ್ ಜಾಗಕ್ ಪೊಯ್ಯೊಂಡೂಂದ್ ವಿವರಣೆ ತಾತ್. ಅವ ಎಣ್ಣೆನಪೋಲೆ ಆನೆನ ಕೊಲ್ಲೊಂಡೂವೇಂಗಿ ಅದೊಂಡ ಕಣ್ಣಾರ ಕೊಡಿಲ್ ಎತ್ತರ ಉಳ್ಳ ಭಾಗಕ್ ಬೊಡಿ ಬೆಕ್ಕೊಂಡು. ಆ ಭಾಗ ಚಿರಿಯ ಆನೆಲ್ ನಾಲ್ ಇಂಚ್‌ರಚ್ಚಕ್ ಉದ್ದ, ಬಲ್ಯ ಆನೆಲ್ ಎಟ್ಟ್ ಇಂಚ್ ಉದ್ದ ಇಪ್ಪ.

ನಂಗಡ ಕೂಡೆ ಇಂಜ ಜನ ಆನೆ ನಂಗ ಉಳ್ಳಲ್ಲಿಕ್ ಎಚ್ಚಕ್ ಪಕ್ಕ ಬಪ್ಪಕ ಬೊಡಿ ಬೆಕ್ಕೊಂಡುಂದ್ ಎಣ್ಣೆಯಂಡ್ ಇಂಜತ್. ನಂಗ ಅಲ್ಲಿ ನಾಲ್ ಗಂಟೆಕೆತ್ತನೆ ಪಾರಕಾತಂಡ್ ಅಳಪಕ ಕಾಡಾನೆನ ನಂಗಡ ಬರಿಕ್ ಓಡ್‌ಚಿಡುವಕ್ ಕಾಡ್‌ಲೆಲ್ಲ ಜನ ತಮಟೆ ಬಡಿಪ ಇಂಜತ್, ಕೊಂಬು ಉರ್‌ಪುವ ಇಂಜತ್ ಪಿಳ್ಳಾ ಇಂಗ್ಲೀಷ್ ಡೋಲ್ ಪೊಯ್ಯುವ ಇಂಜತ್.

ಆಖೀರಕ್ ಓರ್ ಆನೆ ಭಯಂಕರ ಗರ್ವ ಪಿಳ್ಳಾ ತಾಕತ್ತಲ್ ತಾಂಡ ಕೈಕ್ ಕೆಟ್ಟನ ಗಾಡ ಪಿಳ್ಳಾ ಮರತಾರ ಕೊಂಬೆನ ಪೊಳಚಂಡ್ ನಂಗಡ ಬರಿಯ ಬಾತ್. ಅದ್ ವಿಲಿಯಂಸನ್ ಇಂಜ ಮರತಾರ ಅಡಿಕ್ ಬಪ್ಪಕ ಅವ ಬೊಡಿ ಬೆಚ್ಚಿತ್ ಕೊಂದಾರ್‌ತ್. ಅದ್ ಕೇದಕ್ ಬೂವಕ ಆಂಡ ಬಲ್ಯ ತಡಿಕ್ ಕೆಣ್‌ಜಂಡ ಎಚ್ಚಕೊ ಚಿರಿಯ ಮರ ಪೊಳಂಜಿಬುದ್ದತ್. ಅಕ್ಕಣೆಕ್ ಆನೆನ ಬೊಡಿ ಬೆಚ್ಚಿ ಕೊಂದ ವಿಲಿಯಂಸನ್ ಓರ್ ಮಿನಿಟ್ ಆಶ್ಚರ್ಯತ್ ತಾಂಡ ಬಾಯಿನ ತೊರ್‌ಂದಂಡ್ ಆನೆನ ನೋಟಿಯಂಡೆ ಮರತಾರ ಅಟ್ಟಣೆಲ್ ಅಳತಾರ್‌ತ್!

ಆಚೀಂಗಿ, ಇನ್ನತ ಬೋಟೆಲ್ ಏರ ಕೂಡಿಯಾಡಿತಿಂಜ ರಾಜ ಪಿಳ್ಳಾ ನಾನ್ ಚತ್ ಬುದ್ದ ಆನೆರ ಕೊಡಿಲ್ ನಿಂದತ್. ಆ ಆನೆ ಪತ್ತ ಅಡಿ ಎತ್ತರ ಆಯಿತ್ ನಲ್ಲ ಆರೋಗ್ಯತ್ ಇಂಜತ್. ಅದೊಂಡ ಉದ್ದ ಸಹ ಹೆಚ್ಚಿಕಮ್ಮಿ ಪತ್ತಡಿ ಇಂಜತ್. ಆನೆಕೊಂಬು ಬಾಯಿಂಜ ಪೊರ್‌ಮೆ ದಂಡ್ ಅಡಿ ಇಂಜದ್, ಬಾಯಿಂಜ ಬಲ್‌ಚಿತ್ ಎಡ್‌ಪಕ ಮೂಂದಡಿ ಇಂಜತ್. ಅಂದ್ ಪೊಲಾಕ ಆ ಆನೆ ಮಸ್ತ್‌ಲ್ ಎಚ್ಚಕೋ ರೈತಂಗಡ ಬಾಳೆತೋಟ, ನೆರ್‌ಕೆಮನೆನೆಲ್ಲ ಪೊಳಚಿಟ್ಟಿತ್ ನಂಗಡ ಪಕ್ಕ ಬಂದಿತ್ ಅವಸಾನ ಕಂಡತ್. ಆನೆಕ್ ಮಸ್ತ್ ಬಂದಿತಿಪ್ಪಕ ಮಾತ್ರ ಅದ್ ದುಂಬ ಅಪಾಯ. ತಾಂಗ್ ಅಡ್ಡ ಬಂದ ಏದೊ

ಅದ್ ಬುಡತೆ ಕಣ್ಣ್ ಮುಚ್ಚಿ ಬುದ್ಧರುವ. ಆಚೇಂಗಿ, ಬೋರೆ ನೇರತ್ ಗಾಯ ಆನಕೊ, ಉಗ್ರ ಆಯಿತಿಂಜಕೊ ಸಾಮ್ಯತಲ್ ಇಂಜಿತ್ ತಾಂಡ ಎದಿಕೆ ಬಂದಯಿಂಗಡ ಮೀದ ಸಹ ಬೂವುಲೆ.

ಆನೆನ ಬೊಡಿ ಬೆಚ್ಚಿತ್ ಬೂಕ್‌ನಪಿಳ್ಳಾ ನಂಗಡ ಅಂದೇತ ಕಾರ್ಬಾರ್ ಆಚೇಂದ್ ನಂಗ ದಂಡಾಳ್ ರಾಜನ ಕೇಟಿತ್ ಬೆಂದು ಬಿಡಾರಕ್ ಪೋಪನ್ನಕೆ ಇಂಜತ್. ಅಕ್ಕಣೆ ಈ ರಾಜ ನಂಗಕಾಯಿತ್ ಮಾಡ್‌ನ ಏರ್ಪಾಡ್‌ನ ನಂಗ ಇಳ್ಳಾಚ್ಚಕೂ ಅರ್‌ಂಜವಂಡಿಯಾಚಿ. ಮೂಂದ್ ಗಂಟೆ ಆನಾಂಗ್ ನಂಗ ಬೆಂದು ಬಿಡಾರಕ್ ಪೋಯಿತ್ ಉಂಬಕ್ ಕಯ್ಯತಾಂಗ್ ಅಲ್ಲಿಕೆ ನಂಗಕ್ ಊಟ ಕೊಂಡಬಪ್ಪಕ್ ಜನಕ್ ಅಪ್ಪಣೆ ಮಾಡಿಯೇಂದ್ ಎಣ್ಣೆಚಿ. ಅಲ್ಲಿ ನಂಗ ನೋಟುವಕ ಪಕ್ಕತೆ ಎಲೆಲ್ ಪೊದ್‌ಪಾಚಿಟ್ಟಿ ಓರ್ ಚೆರಿಯ ಮನೆನ ಕಂಡಿತ್ ಆಶ್ಚರ್ಯ ಆಚಿ. ಅದ್‌ಂಡ ಒಳ್‌ಲಾ ಮೇಜ್ ಪಿಳ್ಳಾ ಕುರ್ಚಿನ ನಂಗಕಾಯಿತ್ ಬೆಚ್ಚಿತಿಂಜತ್. ಅಲ್ಲಿ ನಂಗಕ್ ಕೊಂಡಬಪ್ಪಾಚಿಟ್ಟಿ ಯರ್ಚಿ ಬರಾತದ್, ಪಲ್ಯ ಇನ್ನತದ್ ಇಂಜತ್. ನಂಗ ಉಂಬಕ್ ಅಳಕಣೆ ರಾಜ ನಂಗಡ ಪಕ್ಕ ಬಂದಿತ್ ತಾಂಗ್ ಆರೋಗ್ಯ ಚಾಯಿಲ್ಲೆಂದ್ ತಾನ್ ಅರಮನೆಕ್ ಪೋಪಿಂದ್ ಎಣ್ಣೆತ್ ಪೊರ್‌ಟತ್.

ಆಚೇಂಗಿ, ನಂಗ ಉಂಡಿತಾನಪಿಳ್ಳಾ ನಂಗಕ್ ಇಷ್ಟ ಬಂದನ್ನಕೆ ಬೋಟೆಯಾಡುವಕ್ ತೋಕ್, ಮದ್ದರ ಕೂಡೆ ನಾಲ್ ಜನಳ ಅಲ್ಲಿಯೆ ಆಕಿತಿಂಜತ್. ಆನಗುಂಡ್ ನಂಗ ಬೋಟೆಕ್ ಓರ್ ಬಲ್ಯ ಕಾಡ್‌ಕ್ ನುಗ್ಗಿಚಿ. ಆಚೇಂಗಿ, ಏದೇ ಓರ್ ಜಾತಿನ ಕಂಡ್‌ಲೆ. ಎನ್ನಂಗ್‌ಗಣ್ಣಕ ಬೇನಿಗಾಲ ಆನಾನುಂಡ್ ಈ ನೇರತ್ ದಾರ್‌ಕೂ ಪೋಪಕಯ್ಯತನ್ನತ ಜಾಗಕ್ ಜಾತಿಯ ಪೋಯಿರುವ. ನಂಗ ಅಂದೇತ ಸಾಸ ಕಾರ್ಯತ್‌ನ ಕುಶಿ ಪಟ್ಟಿಂಡ್ ಒಯಿಪತ್ ಅಂಜಿ ಗಂಟೆಕ್ ನಂಗಡ ಬೆಂದು ಬಿಡಾರಕ್ ವಾಪಾಸ್ ಬಾತ್.

ನಾಳಂಕೆ 24ಂಗ್ ಒಯಿಪತ್ ಬೋಟೆಕ್ ನಂಗ ಪಿಳ್ಳಾ ರಾಜ ನಡ್‌ಂದಂಡೆ ಪಕ್ಕತ ಕಾಡ್‌ಕ್ ಪೋಚಿ. ಆಚೇಂಗಿ, ಆ ಕಾಡ್‌ರ ಬಟ್ಟೆಂಜ ಪತ್ತ್ ಗಜ ದೂರತೆ ಒಳ್‌ಲಾಕ್ ನುಗ್ಗುವಕಯ್ಯತಚ್ಚಕ್ ಕಾಡ್ ಇಂಜಾನುಂಡ್ ನಂಗಕ್ ಏದೇ ಜಾತಿಕ್ ಬೊಡಿ ಬೆಪ್ಪ ಕೈಂಜ್‌ಲೆ. ಆಚೇಂಗಿ, ಇಂದ್ ಬೊಡಿ ಬೆಪ್ಪಾತ್ ನಾನ್ ರಾಜನ ಬಯ್ಯಕ್‌ಟ್ಟಿ. ರಾಜ ನಂಗಕ್ ಎಣ್ಣೆತೆ ಇಂಜಕೋ ಅವ ದುಂಬ ಕೆಲಸತ್ ಉಂಡ್‌ಂದ್ ಅರ್‌ಂಜಂಡ್ ನಂಗಲೆ ಬೆರಿಯ ಅವಂಗ್ ಎಣ್ಣೆತ್ ಬಂದ್‌ರ್‌ತ್.

ಅಲ್ಲಿಂಜ ರಾಜ ಚಾಕ್‌ನ ಪ್ರಾಣಿಯಳ ಅವು ಇಂಜಲ್ಲಿಯೆ ಪೋಯಿತ್ ನೋಟುಚಿ. ರಾಜಂಡ ಪೊಣ್ಣ್ ಚಿಂಗಕ್ ಕೋಟಿರ ಒಳ್ಳಾ ಕೇದಲ್ ಪಾರ್ ಇಟ್ಟಿತ್ ಗ್ಲಾಸ್‌ರ ಕಿಡಿಕ್ ಉಳ್ಳ ಓರ್ ಬಲ್ಯ ಮನೆ ಉಂಡ್. ಚಿಂಗಕ್ ಇನ್ನತ ಮನೆ ಉಳ್ಳದ್ ಪೂರ್ವ ದೇಶತ್

ದುಂಬ ಅಪರೂಪ. ಈ ಚಿಂಗ, ರಾಜಂಡ ಕೊದಿ ಚಿಂಗಂದ್ ಕಾಂಬ. ನಾಕ್ ಸುರೂವೆತ ದಿನ ಅದ್ ಆಣಾ, ಪೊಣ್ಣಾಂದ್ ಗೊತ್ತಾಯಿಲೆ. ಈಂಡ ಪಕ್ಕತೆ ಓರ್ ಬಲ್ಯ ಫಿರಂಗಿನ ಎತ್ತರತ್ ಬೆಚ್ಚಿತ್. ಇದ್ ನಂಗಕ್ ಆಶ್ಚರ್ಯ ಆಚಿ. ಕೊಡಗ್ ರಾಜ್ಯತ್ ನಾನ್ ನೋಟನ್ ಫಿರಂಗಿ ಇದೊಂದೆ. ರಾಜ ತಾಂಡ ಪಕ್ಕ ಉಳ್ಳ ತೋಕ್ ಪಿಳ್ಳಾ ಕೋಟೆರ ಭದ್ರತೆಕಿಂಜ ತಾಂಡ ಪ್ರಜೆಯಡ ಪ್ರೀತಿ ಪಿಳ್ಳಾ ಇಂಗ್ಲೀಷ್ ಜನಡ ನ್ಯಾಯತ್ ಏರ ನಂಬಿಕೆ ಬೆಚ್ಚನ್ನಕೆ ಕಾಂಬ.

ಮಾರ್ಚಿ 25ಂಗ್ ನಂಗ ರಾಜನ ಕಂಡಿತ್ ಪೊರ್ಟತ್. ಅಂಪ ನಂಗಕ್ ದಂಡ್ ಪೊನ್ನಾರ ಪುಡಿ ಉಳ್ಳ ಪೀಚೆಕತ್ತಿ, ದಂಡ್ ಚಿರತೆ ತೋಲ್ತಾರ ತೊಪ್ಪ. ದಂಡ್ ಚಾಂದ್ ಮರತಾರ ಕೋಲ್, ಓರ್ ನರಿ, ದಂಡ್ ಚಿರತೆರ ತೋಲ್ತಾರ ಇನಾಂ ಆಯಿತ್ ತಾತ್.

ತಾಂಡ ಆರೋಗ್ಯ ಚಾಯಿಲ್ಲತಾಂಗ್ ಈ ಕುರಿ ಬೋಟೆಕ್ ಕಾಡ್‌ಕ್ ಪೋಪ ಕಯ್ಯತಾಂಗ್ ಬಪ್ಪ ಕಾಲ ಇದೇ ನೇರತ್ ಕೊಡಗ್‌ಕ್ ಬಾರಿಂದ್ ಎಣ್ಣೆತ್ ರಾಜ ನಂಗಳ ಅಯೆಚತ್. ಇನ್ನನೆ ಕೊಡಗ್‌ರ ನಂಗಡ ಆದ್ಯತ ಪ್ರವಾಸ ತೇಂದತ್.

### ಲಿಂಗರಾಜೇಂದ್ರ ತಾಂಡ ರಾಜ್ಯ ವಿಷಯತ್‌ನ ಪೊರದೇಶಕ್ ಗೊತ್ತಾಕತನ್ನಕೆ ಎಚ್ಚರ ವಹಿಸ್‌ನದ್.

ಜ.ವೆಲ್ಸ್ ಸಾಹೇಬ ಕೊಡಗ್‌ರ ಪ್ರವಾಸತಾರ ಮೀದ, ಕೊಡಗ್‌ರ ಜನ, ರಾಜಂಡ ಮೀದ ಬ್ರಿಟಿಷ್ ಅಧಿಕಾರಿಯಕ್ ಎಣ್ಣುವ ವಿಷಯ ಬೋರೆ ಜನಳುಂಡ್ ಗೊತ್ತಾಕತನ್ನಕೆ ಪೇರ್ತ್ ಎಚ್ಚರ ಎಡ್‌ತವ ಇಂಜತ್. ರಾಜ ತಾಂಡ ರಾಜ್ಯಕ್ ಬಂದ ಬ್ರಿಟಿಷ್ ಅಧಿಕಾರಿಯಡ ಕೂಡೆ ಎಕ್ಕೋಲು ತಾಂಗ್ ನಂಬಿಕೆ ಉಳ್ಳಯಿಂಗಳೆ ಆಕುವ ಇಂಜತ್. ಇನ್ನತಯಿಂಗಳ್ ಹಿಂದೂಸ್ಥಾನಿ ತಕ್ಕ್ ಗೊತ್ತಿರೊಂಡು, ಗೊತ್ತಿಂಜತ್. ಎನ್ನಂಗ್ಲೆಣ್ಣಕ ಅಕ್ಕ ಹಿಂದೂಸ್ಥಾನತ್ ಬ್ರಿಟಿಷ್ ಅಧಿಕಾರಿಯ ಇಲ್ಲಿಯತ ದೇಶಿಯಡ ಕೂಡೆ ಸಂಪರ್ಕ ಬೋಳುತುವಕ್ ಹಿಂದೂಸ್ಥಾನಿನ ಮುಖ್ಯ ಆಯಿತ್ ಪಡಿಪ ಇಂಜತ್.

ಏರ ಸಂದರ್ಭತ್ ಕೊಡಗ್‌ನ ಬುಟ್ಟಿತ್ ಪೊಂಡೊಂದ್ ರಾಜನ ಬೋಡಿತ್ ಒರಾತ ಮಾಡುವ ಇಂಜಯಿಂಗಳ, ರಾಜ ದಾರ್‌ಕೂ ಗೊತ್ತಾಕತನ್ನಕೆ ತಾಂಡ ಜನಳುಂಡೆ ಚಾವಾಚಿಡುವ ಇಂಜತ್. ಇದ್‌ಂಗ್ ಫಕ್ರುದ್ದೀನ್ ಎಣ್ಣುವ ಉರ್ದ್, ಪಾರ್ಸಿ ಮುನ್ನಿ ಪಿಳ್ಳಾ ಪಾರ್ಸಿ ವರ್ತಕ ಬೈರಾಮ್‌ಜಿ ಉದಾಹರಣೆ.



ಲಿಂಗರಾಜೇಂದ್ರ ಒಡೆಯ ಬಹಿರಂಗವಾಯಿತ್ ಬ್ರಿಟಿಷರಲ್ಲಿ ತಾಂಡ ಅಣ್ಣ ವೀರರಾಜೇಂದ್ರಂಡ ಮೀದ ವಿಶ್ವಾಸ, ಗೌರವ ಕಾಟುವ ಇಂಜತ್. ಆಚೀಂಗಿ, ಅವ ತಾನ್ ನ್ಯಾಯರೀತಿಲ್ ಕೊಡಗರ ಸಿಂಹಾಸನಕ್ ಬಂದಾಲೆ ಎಣ್ಣುವ ಪೋಡಿಕ್ ಬ್ರಿಟಿಷ ಎಕ್ವಾಚೀಂಗೂ ತಾಂಡ ಮೀದ ಸರ್ವಾಧಿಕಾರ ಸ್ಥಾಪನೆ ಮಾಡೂಂದ್ ಪೋಡಿ ಇಂಜತ್.

ಒಮ್ಮತೆ ಕಣ್ಣಾನೂರಂಜ ಕೊಡಗರ ಮೂಲಕ ಬ್ರಿಟಿಷ್ ಸೈನ್ಯ ಮೈಸೂರ್‌ಕ್ ಪೋಪಾಂದ್ ಸುದ್ದಿ ಕೇಟಿತ್ ಅವ ಆ ಸೈನ್ಯ ತಾಂಡ ರಾಜ್ಯ ಪುಡಾಚೆವಕ್ ಬಪ್ಪಾಂದ್ ಬೊತ್ತಿಯಂಡಿಂಜತ್.

## ತಾತಂಡ ಸುಬ್ಬಯ್ಯ

ಲಿಂಗರಾಜೇಂದ್ರ ಒಡೆಯಂಡ ಕಾಲತ್ ವೀರರಾಜೇಂದ್ರ ಪೇಟೆರ ಪಕ್ಕತ ಕುಕ್ಕೂರ್ ಊರರ ತಾತಂಡ ಸುಬ್ಬಯ್ಯ ರಾಜಂಡ ಕಾರ್ಯಕಾರ. ಎಣ್ಣಕ ಸೈನ್ಯಾಧಿಕಾರಿಯಡ ಓರ್ ಮುಖ್ಯಸ್ಥ. ಅವ ಬೋಟೆಲ್ ಹುಷಾರ್‌ಂದ್ ರಾಜಂಡ ಆಸ್ಥಾನತೆ ಪೆದ ಎಡ್‌ತಂವ. ರಾಜ ಗೆಡಿ ಗೆಡಿ ಕಾಡ್‌ಕ್ ಬೋಟೆಕ್ ಪೋಪಕ ತಾತಂಡ ಸುಬ್ಬಯ್ಯ ಪೋಪ ಇಂಜತ್.

ಇನ್ನನಿಪ್ಪಕ 1811ತ್ ಮಾರ್ಚಿಲ್ ಕೊಡಗ್‌ಕ್ ಜ.ವೆಲ್ಸ್ ಪಿಳ್ಳಾ ಕ್ಯಾ.ವಿಲಿಯಂಸನ್ ಬೋಟೆಕ್ ಬಂದಿತಿಂಜತ್. ಬೋಟೆರ ಪಿತ್ಯಾಂದ್ ಬೈಟ್ ರಾಜ, ಸುಬ್ಬಯ್ಯನ ತಾಂಡ ದರ್ಬಾರ್‌ಕ್ ಕಾಕ್‌ಚಿಟ್ಟಿತ್. ಸುಬ್ಬಯ್ಯ ಒನ್ನಾಂದೆಕ್ ಮುಪ್ಪಡೆ ತಂಗಡ ಬೋಟೆಕ್ ಮಾಡ್‌ನ ಏರ್ಪಾಡ್‌ನ ತಾಂಡ ಮಂತ್ರಿ ಪಿಳ್ಳಾ ಬೋರೆ ಕಾರ್ಯಕಾರಡ ಕೂಡೆ ಎಣ್ಣೆತ್, ಹೊಗಳಿತ್ ಎಲ್ಲಾಡ ಎದಿಕೆ ಸುಬ್ಬಯ್ಯಂಗ್ ಓರ್ ಪೊನ್ನಾರ ಪದಕ ಪಿಳ್ಳಾ ತೋಕ್‌ನ ಇನಾಂ ಆಯಿತ್ ಕೊಡ್‌ತತ್. ಇಚ್ಚಕೆ ಅಲ್ಲತೆ ತಾನ್ ಸಿಂಹಾಸನತ್ ಅಳಾತಿತ್, ಸುಬ್ಬಯ್ಯನ ತಾಂಡ ಎದಿಕೆ ನಿಂದನ್ನಕೆ ಓರ್ ಪೋಟೊ ಬುಡುತುವನ್ನಕೆ ತಾಂಡ ಅರಮನೆರ ಚಿತ್ರಕಾರಂಗ್ ಅಪ್ಪಣೆ ಮಾಡ್‌ಚಿ. ಒಂದ್, ದಂಡ್ ದಿನತ್ ಅವು ಚಿತ್ರ ಬುಡ್‌ತನಪಿಳ್ಳಾ ರಾಜ ತಾನೂ, ಸುಬ್ಬಯ್ಯನೂ ಇಂಜ ಆ ಚಿತ್ರತ್‌ನ ಆನೆಕೊಂಬರ ಫ್ರೇಮಲ್ ಬೆಚ್ಚಿತ್ ಸುಬ್ಬಯ್ಯಂಗ್ ಇನಾಂ ಕೊಡ್‌ತತ್.

ಕೊಡಗರ ರಾಜಂಡ ಕಾಲತ್ ರಾಜ ತಾಂಡ ಮಂತ್ರಿ / ಕಾರ್ಯಕಾರಡಾತ್ ದಾರ್‌ನೇಂಗಿ ತಾಂಡ ಎದಿಕೆ ನಿಪ್ಪಾಚಿಟ್ಟಿತ್ ಚಿತ್ರ ಬುಡ್‌ತಚಿಟ್ಟಕ ಓರ್ ಬಲ್ಯ ಗೌರವ ಕೊಡ್‌ತನ್ನಕೆ ಆಪ ಇಂಜತ್. ರಾಜ ಎಣ್ಣಕ ದೇವಾಂದ್ ಜನ ಅರಾಂಜಿತಿಂಜ ಆ ಕಾಲತ್ ಇನ್ನತ

ಇನಾಂನುಂಡ್ ಸುಬ್ಬಯ್ಯಂಗ್ ದುಂಬಾ ಕುಶಿಯಾಚಿ. ಆಚೇಂಗಿ, ಅವಂಡ ಈ ಕುಶಿ ದುಂಬಾ ದಿನ ಇಂಜಾಲೆ.

ಕೊಡಿಯತ ಬೋಟೆ ಆಯಿತ್ ಆರ್ ತಿಂಗ ಕೈಂಜಪಿಳ್ಳಾ ಹೊರೂರ್ ಮಡಿಕೇರಿ ನಾಡ್‌ರ ಜನ ಲಿಂಗರಾಜೇಂದ್ರಂದ್ರಲ್ಲಿಕ್ ಬಂದಿತ್, "ಮಹಾಸ್ವಾಮಿ ನಂಗಡ ನಾಡ್‌ಲಾ ನರಿಯಡ ಉಪದ್ರ ಜಾಸ್ತಿ ಆಯಿತ್ ನಂಗಕೂ, ನಂಗಡ ಅತ್ತ ಕಡ್‌ಚಿಯಕೂ ದುಂಬ ಕಷ್ಟ ಆಯಿತ್. ಆನಗುಂಡ್ ನರಿಯಳ ಕೊಂದಿತ್ ನಂಗಡ ಕಷ್ಟತನ ಪರಿಹಾರ ಮಾಡೊಂಡೂ"ಂದ್ ಬೋಡಿಯಂಡತ್.

ಅಕ್ಕ ರಾಜ "ನಾಡ್‌ಕ್ ಬೋಟೆಕ್ ಬಪ್ಪಿ"ಂದ್ ಎಣ್ಣೆತ್ ಸಮಧಾನ ಪಡ್‌ತಿತ್ ಜನಳ ಆಯೆಚತ್.

ಕೂಡೆನ್ನೆ ರಾಜ ತಾಂಡ ಕಾರ್ಯಕಾರಕ್ ರಾಜಂಡ ಬೋಟೆಕ್ ಮಾಡಂಡಿಯ ಏರ್ಪಾಡ್‌ನೆಲ್ಲ ಮಾಡುವನ್ನೆಕ್ ಎಣ್ಣೆಚಿ. ಅದತ್ ಸುಮಾರಾಳ್‌ಕ್ ತಾತಂಡ ಸುಬ್ಬಯ್ಯನ ರಾಜ ಎಲ್ಲಾಡ ಎದಿಕೆ ತಾತಂಡ ಸುಬ್ಬಯ್ಯನ ಹೊಗಳಿತ್ ಇನಾಂ ಕೊಡ್‌ತದ್ ಕೇಡ್‌ಕ್ ಮೊಳಿಯಾಚಿ. ಎನ್ನನೇಂಗಿ ಮಾಡಿತ್ ಸುಬ್ಬಯ್ಯನ ರಾಜಂಡ ಚೆಡಿಕ್ ಕೆಣಿಕೊಂಡೂಂದ್ ಪಾರ ಕಾತಂಡ್ ಇಂಜತ್. ಆನಗುಂಡ್ ಅವು ಬೋಟೆಕ್ ಎಲ್ಲ ತಯಾರಿ ಮಾಡಿತ್ ರಾಜಂಡ ಕೂಡೆ, "ಮಹಾಸ್ವಾಮಿ ಮರತ್‌ರ ಕೊಡಿಲ್ ಅಟ್ಟಣಿ ಕೆಟ್ಟ್‌ಚಿದುವಾತ್ ತಾತಂಡ ಸುಬಯ್ಯ ಗೆಟ್ಟಿಗ. ನಂಗ ಆ ಕೆಲಸ ಮಾಡ್‌ನಕ ಅದ್ ಅಚ್ಚಕ್ ಚಾಯಾಪಕಿಲ್ಲೆ. ಆ ಕೆಲಸತನ ಅವಂಗೆ ಒಪ್ಪಿಚಿಡಿ"ಂದ್ ಎಣ್ಣೆಚಿ.

ರಾಜ ಇಯಂಗಡ ತಕ್ಕುರ ಒಳಾರ್ಥತನ ಅರಿಯತೆ ಇಯಂಗಡ ತಕ್ಕುಕ್ ಒತ್ತಂಡ್ ಮರತ್‌ರ ಕೊಡಿಲ್ ಅಟ್ಟಣಿ ಕೆಟ್ಟುವಕ್ ಸುಬ್ಬಯ್ಯಂಗ್ ಎಣ್ಣೆತ್ ಆಯೆಚತ್.

ತಾತಂಡ ಸುಬ್ಬಯ್ಯ ಸ್ವಾಮಿಭಕ್ತ, ಧೀರ. ಲಿಂಗ ರಾಜೇಂದ್ರಂಡ ಕಾಲತ್ ಪಡೆ ನಡ್‌ಕತಾಂಗ್ ರಾಜಂಡ ಕಾರ್ಯಕಾರಕ್ ಪಿಳ್ಳಾ ಅಧಿಕಾರಿಯಕ್ ತಂಗಡ ಶೌರ್ಯ ಪಿಳ್ಳಾ ಸ್ವಾಮಿಭಕ್ತಿನ ಕಾಟಿಯವಕ್ ಬೋಟೆರ ನೇರ ಅಲ್ಲತೆ ಬೋರೆ ಸಂದರ್ಭತ್ ಅವಕಾಶ ಇಂಜಾಲೆ.

ಆನಗುಂಡ್ ಇಕ್ಕ ಬೋಟೆರ ನೇರತ್ ಮುಖ್ಯ ಕೆಲಸತನ ತಾಂಗೆ ವಹಿಸ್‌ನಾಂಗ್ ಸುಬ್ಬಯ್ಯಂಗ್ ಕುಶಿ ಆಚಿ. ಅವ ರಾಜ ಪಿಳ್ಳಾ ಕೂಟ್‌ಕಾರ ಅಳ್‌ತವಕ್ ಕಾಡ್‌ಲಾ ಅಟ್ಟಣಿ ಕೆಟ್ಟಿಚಿಟ್ಟಿತ್, ಕಾಡ್‌ಜಾತಿಯ ಬಪ್ಪಕ ಕಾಡ್‌ರ ಸುತ್ತೂ ಕುರುಬಂಗ ಪಿಳ್ಳಾ ನಾಡ್‌ರ ರೈತಂಗ ನಿಂದವನ್ನೆಕ್ ಎಣ್ಣೆತ್ ತಾನ್ ಏರ್ಪಾಡ್ ಮಾಡ್‌ನ ವ್ಯವಸ್ಥೆರ ಮೀದ

ಎಣ್ಣುವಕ್ ಅಂದೇ ಬೈಟ್ ಮಡಿಕೇರಿಕ್ ಬಾತ್.

ಇದೇ ನೇರತನ ಪಾರಕಾತಂಡ್ ಇಂಜ ಸುಬ್ಬಯ್ಯಂಡ ಶತ್ರುವ, ಸುಬ್ಬಯ್ಯ ಅಳ್‌ಪಕ್ ಮಾಡ್‌ಚಿಟ್ಟಿ ತೂರತರ ಅಟ್ಟಣಿರ ಕೆಟ್ಟನ ಚೆನ್ನ ಚೆನ್ನ ಮುರ್‌ಚಿ ಬೆಚ್ಚತ್.

ಪಿತ್ಯಾಂದ್ ರಾಜ ತಾಂಡ ಪರಿವಾರತರ ಕೂಡೆ ನರಿಬೋಟೆಕ್ ಕಾಡ್‌ಕ್ ಬಾತ್. ಅಕ್ಕ ಸುಬ್ಬಯ್ಯ ಕಾಡ್‌ರ ಪೊರ್‌ಮೆ ಪೋಯಿತ್ ಅಲ್ಲಿ ಜಾತಿಯ ತಪ್ಪಿಚಿಟ್ಟಂಡ್ ಪೋಕತನ್ನೆಕೆ ನೋಟಿಯವಕ್ ಜನ ಪಾರಕಾತಂಡ್ ಉಂಡಾಂದ್ ನೋಟುವಕ್ ಆನೆರ ಕೊಡಿಲ್ ಅಳ್‌ತಂಡ್ ಪೋಯಂಡಿಂಜತ್. ಅಕ್ಕಣೆ ರಾಜ ತಾಂಗ್ ಅಳ್‌ಪಕ್ ಮಾಡ್‌ಚಿಟ್ಟಿ ಅಟ್ಟಣಿಕ್ ಪುಂಡ ಏಣಿಲ್ ಪತ್ತಿತ್ ಪೋಯಿತ್ ಅಳ್‌ತಂಡತ್. ಅವಂಡ ಬೆಂಬರಿಲೆ ರಾಜಂಡ ತೋಕ್‌ಕ್ ಮದ್ ದುಂಬ್‌ಚಿಟ್ಟಿತ್ ಕೊಡ್‌ಪಕ್ ದಂಡ್ ಸೇವಕಂಗ ಪತ್ತಿತ್ ರಾಜ ಅಳ್‌ತ ಜಾಗತರ ಬೆಂಬರಿ ನಿಂದತ್.

ಅಕ್ಕಣೆಕ್ ಓರ್ ನರಿ ಮರತರ ಸೆರೆಂಜ ರಾಜ ಅಳ್‌ತ ಜಾಗತರ ಬರಿಕಾಲೆ ಕಾಡ್‌ಕ್ ಓಡಿಯಂಡ್ ಬಾತ್. ಕೂಡೆನ್ನ ರಾಜ ತಾಂಡ ತೋಕ್‌ಂಜ ಮೊಟ್ಟೂರಿತ್ ನರಿಕ್ ಬೊಡಿ ಬೆಚ್ಚದೆ ನರಿ ಚತ್ ಬುದ್ದತ್.

ಆಚೇಂಗಿ, ಇತ್ತಟಿ ರಾಜ ತಾಂಡ ಮೊಟ್ಟೂರಿತ್ ಕಾಲ್ ಊರ್‌ನ ರಭಸಕ್ ಅವ ಅಳ್‌ತ ಜಾಗಕ್ ಕೆಟ್ಟಿಂಜ ಪುಂಡತರ ಕೆಟ್ಟ ಸುರೂಲೆ ಪಾದಿ ಮುರ್‌ಚದ್ ಇಕ್ಕ ತುಂದಾಯಿತ್ ರಾಜಂಡ ಜಾಗ ಮಡ್‌ಂಗ್‌ನನ್ನೆ ಆಚಿ. ರಾಜ ಕೂಡೆನ್ನ ಪಕ್ಕತ್ ಇಂಜ ಕೊಂಬೆನ ಪುಡ್‌ಚಂಡ್ ನಿಂದತ್. ರಾಜ ಇನ್ನನೆ ಅಪಾಯಕ್ ಎಡೆಯಾನಾನ ಕಂಡ ಸೇವಕಂಗ ನೋಟಿತ್ ಗಾಬರಿ ಆಯಿತ್ ಪಕ್ಕತೆ ಇಂಜ ಕಾರ್ಯಕಾರಳ ಕಾಕ್‌ಚಿ. ಅವು ಬರಣೆಕ್ ರಾಜ ಮರತಂಜ ಇಳ್‌ಂಜಿತ್ ಚೆಡಿಲ್ ಅಲ್ಲಿ ಇಂಜಯಿಂಗಳ ನೋಟಿತ್ "ಈ ಮರತರ ಅಟ್ಟಣಿನ ದಾರ್ ಕೆಟ್ಟಿಯೆ? ಅವನ ಕೂಟಿಯಂಡ್ ಬಾರಿ. ಇಕ್ಕಲೆ ಅವಂಡ ಮಂಡೆನೆ ಕೆತ್ತಚಿಟ್ಟರುವಿ"ಂದ್ ಜೋರ್‌ತೆ ಕೂತ್‌ಟ್ಟತ್.

ಚೆನ್ನಂಗ್ ಚಾವಡಿಕಾರ ರಾಜಂಡ ಅಪ್ಪಣೆಪೋಲೆ ಸುಬ್ಬಯ್ಯನ ಕೂಟಿಯಂಡ್ ಬಪ್ಪಕ್ ಕಾಡ್‌ರ ಒಳ್‌ಕ್ ಓಡ್‌ಚಿ. ಅಕ್ಕ ರಾಜಂಡ ಪಕ್ಕತೆ ಇಂಜ ಸುಬ್ಬಯ್ಯಂಡ ವಿರೋಧಿಯ "ಮಹಾಸ್ವಾಮಿ, ನಿಂಗ ಸುಬ್ಬಯ್ಯನ ಅಂದ್ ಹೊಗಳಿತ್ ಇನಾಂ ಕೊಡ್‌ತಾಂಗ್ ಅವಂಡ ಮಂಡೆ ಜಂಬತ್ ತಿರಿಪೋಯಿತ್. ಆನಗುಂಡ್ ಅವ ತಾನೇ ನಿಂದಿತ್ ಅಟ್ಟಣಿ ಕೆಟ್ಟಿಚಿಡುವದ್ ಬುಟ್ಟಿತ್ ಎನ್ನನೇಂಗಿ ಕೆಟ್ಟಡ್‌ಂದ್ ಕುರುಬಂಗ್ ಒಪ್ಪಿಚಿಟ್ಟಿಕ್ಕು. ಅದ್‌ಂಗಿ ನಿಂಗಡ ಜಿಂವಕ್ ಅಪಾಯ ಆಯೆ"ಂದ್ ಎಣ್ಣೆತ್ ರಾಜಂಡ ಮನಸ್ಸಿನ ಸುಬ್ಬಯ್ಯಂಡ ವಿಷಯತ್ ಕೆಡ್‌ತ್‌ಚಿ.

ಈ ನೇರತ್ ಸುಬ್ಬಯ್ಯ ಕಾಡಾರ ಪೊರಮೆ ಇಂಜಂವ ರಾಜಂಡ ಪಕ್ಕ ಬಂದಂಡ್ ಇಂಜತ್. ಅಕ್ಕಣೆಕ್ ಓರ್ ಕುರುಬ ರಭಸತ್ ತಾಂಡ ಪಕ್ಕ ಓಡಿ ಬಂದಿತ್ ನಡೊಂದ ವಿಷಯತ್‌ನೆಲ್ಲ ಒರೇಪೋಲೆ ಎಣ್ಣೆಚಿ.

ಕೂಡೆನ್ನೆ ಸುಬ್ಬಯ್ಯಂಗ್ ತಾಂಗ್ ಆಕತವು ಮಾಡ್‌ನ ಕೇತರೆ ಇದೊಂದ್ ಗೊತ್ತಾಯಿರ್‌ತ್. ಅನ್ನನೆ ರಾಜನುಂಡ್ ತಾಂಗ್ ಚಾವು ಗ್ಯಾರೆಂಟಿಂದೂ ಆಚಿ.

ಅಕ್ಕ ಸುಬ್ಬಯ್ಯ, 'ನಾನ್ ಇಚ್ಚ ದಿವಸ ಮಹಾಸ್ವಾಮಿರ ನಿಸ್ಸೀಮ ಭಕ್ತನಾಯಿತ್ ಮೆಚ್ಚುಗೆ ಪಡೊಂದಿಯೆ. ಇಕ್ಕ ನಾನ್ ಏದ್ ಓರ್ ತಪ್ಪು ಮಾಡತೆ ನಾಡ ಶತ್ರುವಡ ಕುತಂತ್ರತ್ ರಾಜಂಡ ಚೆಡಿಕ್ ಎಡೆಯಾಯಿತ್ ಅವಮಾನ ಪಟ್ಟಂಡ್ ಚಾವಂಡುವಲ್ಲ! ಇನ್ನನೆ ಚಾವಾಂಗ್‌ಇಲ್ಲಿ ಬೋರೆ ಏದೇಂಗಿ ತರತ್ ನಾನ್ ನಾಡ ಕೈಯಾರೆ ಚಾವದ್ ನಲ್ಲದ್'ಂದ್ ಗೇನ ಮಾಡ್‌ಚಿ.

ಅನ್ನನೆ ತಾಂಡ ದುರ್ದಸೆನ ಗೇನ ಮಾಡಿಯಂಡ್ ತಾನೇ ತಾಂಡ ಜಿಂವ ಎಡೊತವಕ್ ತೀರ್ಮಾನ ಮಾಡ್‌ಚಿ. ಅವಂಡ ನಿಪ್ಪುರ ಮೀದ ಮದ್ದ್ ದುಂಬ್‌ಚಿಟ್ಟ ತೋಕ್ ಇಂಜತ್. ಅದೊನ ಪುಡ್‌ಚಂಡ್ ಪೋಪಕ್ ರಾಜಂಡ ಜನ ಬಪ್ಪಾಂಗ್ ಮುಪ್ಪಡೆ ಕುರುಬಂಡ ಕೂಡೆ, "ಮಹಾ ಸ್ವಾಮಿಕ್ ಎಂದೂ ಕೇಡ್ ಬಯಂದಂವನಲ್ಲ ಈ ಸುಬ್ಬಯ್ಯ. ನಾಕ್ ಆಕತವು ದಾರೊ ಈ ಕೇತರೆ ಮಾಡಿತ್ ಎಣ್ಣುವ ಸತ್ಯಸಂಗತಿನ ನೀನ್ ರಾಜಂಗ್ ಅರ್ಥ ಆಪನ್ನಕೆ ಎಣ್ಣೆ ಕೊಡ್"ಂದ್ ಅವನ ಅಲ್ಲಿಂಜ ಅಯೆಚತ್.

ಅನ್ನನೆ ಕುರುಬ ಮರತ್‌ರ ಎಡೆಲ್ ಮರೆಯಾನದೆ ಸುಬ್ಬಯ್ಯ ಓರ್ ಮರತ್‌ರ ಮೊರ್‌ಡ್‌ಲ್ ಅಳೊತಂಡ್ ತೋಕ್‌ರ ತುದಿನ ತಾಂಡ ಎದೆಕ್ ಸೆರಿಕ್ ಬೆಚ್ಚಂಡ್, ತಾಂಡ ಕಾಲ್‌ಂಜ ಕೇರ್‌ರ ತುದಿಲ್ ಇಂಜ ತೋಕ್‌ರ ಕೊತ್ತಿನ ಮೊರ್‌ಡ್‌ಲ್ ಇಂಜ ತೋಕ್‌ರ ಮದ್ದ್‌ಕ್ ಮುಟ್ಟ್‌ಚಿಟ್ಟತ್. ಕೂಡೆನ್ನೆ ಬೊಡಿ ಪಾರಿತ್ ಸುಬ್ಬಯ್ಯ ಚತ್ ಬುದ್ದತ್.

ಬೊಡಿರ ಸದ್ ಕೇಟಿತ್ ಸುಬ್ಬಯ್ಯನ ತೇಡಿಯಂಡ್ ಬಪ್ಪ ಇಂಜ ರಾಜಂಡ ಜನ ಸದ್ ಕೇಟಿಲ್ಲಿಕ್ ಓಡಿಯಂಡ್ ಬಾತ್. ಸುಬ್ಬಯ್ಯಂಡ ಚಾವು ಚೋರೆರ ಪೊಳೆಲ್ ಇಂಜತ್! ಅದೊನ ಕಂಡಿತ್ ಜನ ಬೊತ್ತಿಯಂಡ್ ಚೆನ್ನಂಗ್ ನೇರ ಅಲ್ಲಿಯೆ ನಿಂದ್ ಪೋಚಿ. ಅಲ್ಲಿಂಜ ಅವು ಚಾವುನ ಪೊರ್‌ತಂಡ್ ರಾಜಂಡ ಪಕ್ಕ ಪೋಚಿ. ಈಂಗ್ ಮುಪ್ಪಡೆ ಸುಬ್ಬಯ್ಯ ಅಯೆಚ ಕುರುಬ ರಾಜಂಡ ಪಕ್ಕ ಬಂದಿತ್ ಸುಬ್ಬಯ್ಯ ಎಣ್ಣೆನಾನ ಎಣ್ಣೆತಿಂಜತ್.

ಲಿಂಗರಾಜೇಂದ್ರಂಗ್ ಅಕ್ಕ ಸುಬ್ಬಯ್ಯ ತಾಂಗ್ ದ್ರೋಹ ಮಾಡ್‌ಲೆ, ಆಕತವು

ಮಾಡ್‌ನ ಕುತಂತ್ರ ಇದೊಂದ್ ಅಗ್ಗೇನ ಬಾತ್. ಸುಬ್ಬಯ್ಯಂಡ ಚಾವು ನೋಟುವಕ ರಾಜಂಡ ಅಗ್ಗೇನ ಇಞ್ಞಾ ಗ್ಯಾರೆಂಟಿಯಾಚಿ. ಚತ್ ಪೋನ ಸುಬ್ಬಯ್ಯಂಡ ಮೂಡಲ್ ಏದೇ ಓರ್ ಪೋಡಿ ಪಿಞ್ಞ ಕಪಟ ಸ್ವಭಾವತಾರ ಗುರ್‌ತ್ ಇಂಜಾಲೆ.

ಮಡಿಕೇರಿಕ್ ಪೋನಪಿಞ್ಞ ತಾಂಡ ಆಪ್ತಂಗಡ ಕೂಡೆ ಸುಬ್ಬಯ್ಯಂಡ ಮೀದ ವಿಚಾರಣೆ ಮಾಡೊಂಡೊಂದ್ ರಾಜ ವಾಪಾಸ್ ಬಾತ್.

ಇದಾಯಿತ್ ಚೆನ್ನಂಗೇ ದಿನತ್ ಲಿಂಗರಾಜೇಂದ್ರಂಗ್ ಸುಬ್ಬಯ್ಯ ತಪ್ಪಿತಸ್ಥ ಅಲ್ಲಾಂದ್ ತಾಂಡ ಆಪ್ತಂಗಳುಂಡ್ ಗೊತ್ತಾಚಿ. ಸ್ವಾಮಿಭಕ್ತ ಆಯಿತಿಂಜ ಸುಬ್ಬಯ್ಯಂಡ ಚಾವುಕ್ ಬೇಚಾರಪಟ್ಟುಂಡ್ ಅವಂಡ ಗೇನಕ್ ಅವಂಡ ಸೋದರ ಪೂಪಣ್ಣನ ಅರಮನೆಕ್ ಕಾಕಿತ್ ತಾತಂಡ ಕುಟುಂಬಕಾರಕ್ 300 ಬಟ್ಟಿ ಭೂಮಿನ ಕೊಡ್‌ತತ್. ಇಚ್ಚೆ ಅಲ್ಲತೆ ಈ ಭೂಮಿರ ಕೆಲಸಕ್ ಜಮ್ಮ ಪೊಲೆಯಳ ಕೊಡ್‌ತತ್. ಕೂಟ್‌ಕ್ ರಾಜ ಪಿಞ್ಞ ಸುಬ್ಬಯ್ಯಂಡ ಬುಡ್‌ತನ ಚಿತ್ರ ಆನೆಕೊಂಬರ ಪ್ರೇಮ್‌ಲ್ ಉಳ್ಳದ್ ಇಂದೇಕೂ ತಾತಂಡ ಒಕ್ಕಡ ಐನ್‌ಮನೆಲ್ ಉಂಡ್. ಇದೊನ ಒಕ್ಕಕಾರ ಪೇರ್ತ್ ಗೌರವತ್ ಕಂಡಂಡ್ ಉಂಡ್. ಈನಗುಂಡ್ ಇಂದೇಕೂ ಸುಬ್ಬಯ್ಯಂಡ ಗೇನ ತಾತಂಡ ಒಕ್ಕತ್ ಉಂಡ್.

(ತಾತಂಡ ಸುಬ್ಬಯ್ಯಂಡ ವೀರಕಥೆನ ಒಕ್ಕಡ ಪೆರಿಯ ವ್ಯಕ್ತಿಯಳುಂಡ್ 40 ಕಾಲಕ್ ಬಯ್ಯ ಕೇಟಿತ್ ಎಳ್ಳನದ್.)

ಲಿಂಗರಾಜೇಂದ್ರ ಒಡೆಯ ಬೋಂದ ಮುಕ್ಕಾಟಿರ ಐಪಣ್ಣಂಗ್  
ಲಿಂಗಧಾರಣೆ ಮಾಡ್‌ಚಿಟ್ಟಿತ್ ಅವಂಗ್ ತಾಂಡ ಮೂಡಿ  
ಕುಞ್ಞಯಳ ಮಂಗಲ ಕೈಚದ್ ಪಿಞ್ಞ ದೊಡ್ಡ ವೀರರಾಜೇಂದ್ರ  
ಒಡೆಯಂಡ ಮೋಳಿಯಡ ಮಂಗಲ

ಕೊಡಗೂರ ರಾಜಂಗ ಏರ ಆಯಿತ್ ಕೊಡವತಿಯಳ, ಓರಮ್ಮತೆ ಪಟ್ಟತಿಯಳ ತಂಗಡ ಅಂತಃಪುರಕ್ ಕೂಟಿಯಂಡ್ ಅಯಿಂಗಕ್ ಲಿಂಗಧಾರಣೆ ಮಾಡ್‌ಚಿಟ್ಟಿತ್, ಮಂಗಲ ಕೈಚವ ಇಂಜತ್ ಇಲ್ಲೇಂಗಿ ರಾಜಕುಟುಂಬತಾರ ಬಾಲೆಕಾರಕ್ ಮಂಗಲ ಮಾಡಿ ಕೊಡ್‌ಪ ಇಂಜತ್. ಇನ್ನನೆ ತಂಗಡ ಮೂಡಿಕುಞ್ಞಯಳ ಚಾಯಿಕಾರ, ಶೂರಂಗಳಾನ ಬಾಲೆಕಾರಕ್

ಮಂಗಲ ಕೈಚತ್. ಆಚೇಂಗಿ, ಅನ್ನನೆ ಕೈಪಾಂಗ್ ಮುಪ್ಪಡೆ ಅವು ಲಿಂಗಧಾರಣೆ ಮಾಡಿತ್ ಅಯಿಂಗಳ ಲಿಂಗಾಯತಂಗಳಾಯಿತ್ ಮಾಡುವ ಇಂಜತ್. ಇನ್ನನೆ ವೀರಾಜಪೇಟೆ ಬಿಳುಗುಂದ ನಾಡ್‌ರ ಬೋಂದ ಮುಕ್ಕಾಟಿರ ಐಪಣ್ಣ ಮಂಗಲ ಆಯಿತಿಂಜತ್.

ಲಿಂಗರಾಜೇಂದ್ರ ಒಡೆಯಂಗ್ ಮುದ್ದಮ್ಮಾಜಿ ಪಿಳ್ಳಾ ದೇವಮ್ಮಾಜಿ ಎಣ್ಣುವ ದಂಡ್ ಮೋಳಿಯ ಇಂಜತ್. ಅದತ್ ಮುದ್ದಮ್ಮಾಜಿಕ್ ಮಂಗಲತ್‌ರ ಬಯತ್ ಆನನ್ನಕೆ ಕ್ಕಣ್ಣ ತೇಡಿಯಂಡ್ ರಾಜ ವೀರಾಜಪೇಟೆಂಜ ಮಡಿಕೇರಿಕ್ ಕುದರೆಲ್ ಬಂದಂಡ್ ಇಂಜತ್. ಅಕ್ಕ ಕೊಂಡಂಗೇರಿಕಾಲೆ ಮೂರ್ನಾಡ್‌ಕ್ ಬಪ್ಪಕ ಓರ್ ಚಾಯಿಕಾರ ಬಾಲೆಕಾರ ತಾಂಡ ನಿಪ್ಪುಲ್ ತೋಕ್‌ನ ಬೆಚ್ಚೆಂಡ್ ಚೆನ್ನಂಗ್ ಜನಡ ಕೂಡೆ ಚೆನ್ನಂಗ್ ದೂರತ್ ಬಂದಂಡ್ ಉಳ್ಳಾನ ಕಂಡತ್. ಅವ ದಾರ್‌ಂದ್ ಅರಿಯಣೆ ಕೂಡೆ ಇಂಜ ಮುದ್ದಯ್ಯ, ಆ ಬಾಲೆಕಾರ ತಾಂಡ ತಮ್ಮಣಂದ್ ಎಣ್ಣೆಚಿ. ಮುದ್ದಯ್ಯ ರಾಜಂಡ ದಿವಾನ ಆಫೀಸ್‌ಲ್ ಮುನ್ನಿ ಎಣ್ಣಕ ನಿರೂಪ ಎಳ್ಳುವ ಪಿಳ್ಳಾ ಕಂದಾಯ ವಸೂಲಿರ ಲೆಕ್ಕ ಎಳ್ಳುವ ರಾಜಂಡ ಆಪ್ತ ಗುಮಾಸ್ತ.

ರಾಜಂಗ್ ಆ ಬಾಲೆಕಾರ ಮುದ್ದಯ್ಯಂಡ ತಮ್ಮಣಂದ್ ಕೇಟಿತ್ ದುಂಬ ಕುಶಿಯಾಚಿ. ತಾಂಡ ಪಕ್ಕ ಬಂದಿತ್ ನಮಸ್ಕಾರ ಮಾಡಿತ್ ನಿಂದ ಆ ಬಾಲೆಕಾರನ "ನೀಕ್ ಏದ್‌ಲ್ ಏರ ಆಸಕ್ತಿ?"ಂದ್ ಕೇಟತ್.

"ನಾಡ ಪೆದ ಐಪಣ್ಣ, ನಾಕ್ ಬೋಟಲ್ ಏರ ಆಸಕ್ತಿ"ಂದ್ ಆ ಬಾಲೆಕಾರ, ರಾಜಂಗ್ ಜವಾಬ್ ಕೊಡ್‌ತತ್.

ರಾಜಂಗ್ ಐಪಣ್ಣ ತೋಕ್‌ಂಜ ಬೊಡಿನ ಗುರಿ ಬೆಪ್ಪಾತ್ ಎಚ್ಚಕ್ ಹುಷಾರ್‌ಂದ್ ಅರಿಯೊಂಡೂಂದಾಚಿ. ಎನ್ನಂಗಣ್ಣಕ ರಾಜನೆ ನಲ್ಲ ಓರ್ ಗುರಿಕಾರ. ಆನಗುಂಡ್ ರಾಜ ತಾಂಡ ಕುದರೆಂಜ ಇಳ್‌ಂಜಿತ್, ತಾನ್ ನಿಂದಲ್ಲಿಂಜ ಸುಮಾರ್ ಮೂಂದ್ ಫರ್ಲಾಂಗ್ ದೂರತ್ ಬೇಲ್‌ಲ್ ಮೇಂಜಂಡಿಂಜ ಓರ್ ಪೋರಿರ ಬೆನ್ನರ ಮೀದ ಅಳ್‌ತ ಕಾಕೆಕ್ ಬೊಡಿ ಬೆಚ್ಚಿತ್ ಬೂಕ್‌ಚಿ. ರಾಜ ಕಾಕೆನ ಬೂಕ್‌ನ ಜಾಗತ್ ಓರ್ ಕಲ್ಲ್ ನಡ್‌ಪ್‌ಚಿಟ್ಟತ್. ಇಕ್ಕ ಮೂರ್ನಾಡ್ ಕೊಂಡಂಗೇರಿ ರಸ್ತೆರ ಬಲ್‌ತೆ ಬರಿಯತ ಕೆರೆಮನೆ ಜಹಗೀರ್‌ದಾರಡ ಭೂಮಿಲ್ ನಟ್ಟ ಕಲ್ಲ್ ಇನ್ನನೆ ಲಿಂಗರಾಜೇಂದ್ರ ನಡ್‌ಪ್‌ಚಿಟ್ಟ ಕಲ್ಲ್‌ಂದ್ ಜನ ಎಣ್ಣುವ.

ರಾಜ ತಾನ್ ತಾಂಡ ಗುರಿಕ್ ಸೆರಿಯಾಯಿತ್ ಬೊಡಿ ಬೆಚ್ಚಪಿಳ್ಳಾ ಅಲ್ಲಿ ಇಂಜಯಿಂಗಡ ಕೂಡೆ "ನಿಂಗಡಲ್ಲಿ ದಾರೇಂಗಿ ನಲ್ಲ ಗುರಿಕಾರ ಇಂಜಕ ನಾನ್ ಎಣ್ಣೆನ ಗುರೆಕ್ ಬೊಡಿ ಬೆಯ್ಕಿರಿ"ಂದ್ ಎಣ್ಣೆಚಿ.

ಅಕ್ಕ ದಾರೂ ಮಿಳ್ಳಾಕ್ ಬರತೆ ಐಪಣ್ಣ ಬಂದಿತ್ ರಾಜ ಎಣ್ಣಾನ ಗುರಿಕ್ ಬೊಡಿ ಬೆಪ್ಪಕ್ ಒತ್ತಂಡತ್. ರಾಜ ತಾನ್ ಸುರೂಲ್ ಬೊಡಿ ಬೆಚ್ಚ ಜಾಗತಾರ ಪಕ್ಕತೆ ಮೇಂಜಂಡಿಂಜ ಪೋರಿರ ಬೆನ್ನರ ಕೊಡಿಲ್ ಅಳಾತ ಕಾಕೆಕ್ ಗುರಿ ಬೆಪ್ಪಕ್ ಎಣ್ಣಾನದೆ ಐಪಣ್ಣ ಬೆಚ್ಚಿತ್ ಕಾಕೆನ ಬೂಕ್‌ಚಿ! ಇದ್‌ನ ಕಂಡಿತ್ ಪೇರ್ತ್ ಕುಶಿಪಟ್ಟ ರಾಜ, ಐಪಣ್ಣನ ಕೂಟಿಯಂಡ್ ಮಡಿಕೇರಿಕ್ ಪೋಚಿ.

ತಾಂಡ ಪರಿವಾರತಾರ ಕೂಡ ಮಡಿಕೇರಿಕ್ ಪೋನ ರಾಜಂಗ್, ಐಪಣ್ಣ ಕುದರೆ ಸವಾರಿಲ್ ಎಚ್ಚಕ್ ಹುಷಾರ್‌ಂದ್ ಗೊತ್ತ್ ಮಾಡೊಂಡಿಂಜತ್. ಅವ ಪಿತ್ಯಾಂದ್ ಕುದರೆ ಲಾಯತ್‌ಂಜ ಸ್ಪೀಡ್‌ಲ್ ಓಡುವ, ಓರ್ ತುಂಟ ಕುದರೆನ ಕೊಂಡಬಪ್ಪಚಿಟ್ಟಿತ್ ಐಪಣ್ಣನ ಕಾಕೆಚಿ.

"ಐಪಣ್ಣ ನೀನ್ ಈ ಕುದರೆನ ಪತ್ತಿತ್ ದಂಡ್ ಗಂಟೆರ ಒಳ್‌ಲ್ ಭಾಗಮಂಡಲ ತಿರಿಕೆಕ್ ಪೋಯಿತ್ ಅಲ್ಲಿಯತ ಪಟ್ಟಮಳುಂಡ್ ದೇವಕ್ ಪೂಜೆ ಮಾಡ್‌ನ ಪೂವ್, ಪ್ರಸಾದ ಕೊಂಡ ಬರೊಂಡು. ನೀನ್ ಕುದರೆ ಸವಾರಿಲ್ ಎಚ್ಚಕ್ ಹುಷಾರ್‌ಂದ್ ನಾನ್ ಪರೀಕ್ಷೆ ಮಾಡೊಂಡೂ"ಂದ್ ಎಣ್ಣಾಚಿ.

ಕೂಡೆನ್ನೆ ಐಪಣ್ಣ ಕುದರೆ ಪತ್ತಿತ್ ಭಾಗಮಂಡಲಕ್ ಸ್ಪೀಡ್‌ಲ್ ಪೋಯಿತ್ ಅಲ್ಲಿಯತ ತಿರಿಕೆಲ್ ಪಟ್ಟಮಳ ಕಂಡಿತ್, ರಾಜ ಎಣ್ಣಾನನ್ನೆಕೆ ಪೂವ್, ಪ್ರಸಾದ ಕೇಟಂಡ್ ಮಡಿಕೇರಿ ಲರಮನೆಕ್ ರಾಜ ಎಣ್ಣಾನ ದಂಡ್ ಗಂಟೆರ ಒಳ್‌ಲೆ ಬಂದಿತೆತ್ತಚಿ.

ಕುದರೆ ಸವಾರಿಲೂ ಪಾಸಾನ ಐಪಣ್ಣನ ಕಂಡಿತ್ ರಾಜಂಗ್ ಕುಶಿನ ತಡ್‌ಪ ಕಯ್ಯತಾಚಿ. ಇನ್ನತ ವೀರಂಗೆ ತಾಂಡ ಪೆರಿಯ ಮೋವಳ ಮಂಗಲ ಕೈಚಿ ಕೊಡ್‌ಕೊಂಡೊಂದ್ ಗೇನ ಬಾತ್. ಆನಗುಂಡ್ ಆದ್ಲ ಐಪಣ್ಣಂಗ್ ಲಿಂಗಧಾರಣೆ ಮಾಡ್‌ಚಿಟ್ಟಿತ್ ಲಿಂಗಾಯತ ಆಯಿತ್ ಮಾಡೊಂಡು.

ಆಚೇಂಗಿ, ಇದ್ ರಾಜನುಂಡ್ ಕಯ್ಯತ ಕಾರ್ಬಾರ್ ಒಂದೂ ಅಲ್ಲ. ತಾಂಡ ಮಹಾರಾಣಿ ಪಿಳ್ಳಾ ಪೆರಿಯ ಮೋವ ಮುದ್ದಮ್ಮಾಜಿರ ಅಭಿಪ್ರಾಯ ಕೇಟಿತ್ ಮಿಳ್ಳಾಕ್ ಕಾರ್ಬಾರ್ ಮಾಡನಾಂದ್ ಐಪಣ್ಣನ ಅಂಪನ ಮನೆಕ್ ಪೋಯಿತ್ ದಂಡ್ ವಾರ ಕೈಂಜದು ಮಡಿಕೇರಿ ಅರಮನೆಕ್ ಬಪ್ಪನ್ನೆಕೆ ಎಣ್ಣಿತ್ ಅಯೆಚಿತ್.

ಐಪಣ್ಣ ಭಾಗಮಂಡಲತ್‌ಂಜ ಕುದರೆಸವಾರಿಲ್ ಮಡಿಕೇರಿಕ್ ಬಪ್ಪ ನೇರತ್ ರಾಜ ತಾಂಡ ಮಹಾರಾಣಿ ಪಿಳ್ಳಾ ಪೆರಿಯ ಮೋವ ಮುದ್ದಮ್ಮಾಜಿನ ಅರಮನೆರ ಮಾಡಿಲ್ ಅಳಾತಂಡ್ ಕಿಡ್‌ಕೆರ ಸೆರೆಂಜ ಐಪಣ್ಣನ ನೋಟುವನ್ನೆಕೆ ಎಣ್ಣಿತಿಂಜತ್! ಅನ್ನನೆ ರಾಣಿಕ್ ಮೋಪಡ ಮಂಗಲತಾರ ಮೀದ ತಕ್ಕ ಪರ್‌ಂದಿತ್, ಐಪಣ್ಣನ ಕುಶಿ ಉಂಡಾಂದ್



ಕೇಪನ್ನೆಗೆ ಎಣ್ಣೆತಿಂಜತ್. ಐಪಣ್ಣ ಅರಮನೆರ ಪಟ್ಟಿಕ್ ಬಪ್ಪಕ ರಾಣಿ ಪಿಳ್ಳಾ ಮೋವ ಅಂವನ ನೋಟಿತ್ ಕುಶಿ ಪಟ್ಟಿತಿಂಜತ್. ಮುದ್ದಮ್ಮಾಜಿ ತಾಂಗ್ ಐಪಣ್ಣನ ಮಂಗಲ ಕೈಪಕ್ ಕುಶಿ ಉಂಡ್‌ಂದ್ ಒಪ್ಪಿಗೆ ಕೊಡ್‌ತತ್.

ಲಿಂಗರಾಚೇಂದ್ರ ಅರಮನೆಕ್ ಬರೊಂಡೂಂದ್ ಎಣ್ಣೆನ ದಿನ ಐಪಣ್ಣ ಪೊಲಾಕ ಬೆರಿಯ ಕುಳಚಿತ್, ಶ್ರೀ ಕಾವೇರಿ ಮಾತನ ತುದ್‌ಚಿತ್ ಬೊಳ್‌ತ ಕುಪ್ಪೆ ಇಟ್ಟುಂಡ್ ಕುದರೆ ಸವಾರಿ ಮಾಡಿಯಂಡ್ ಬಾತ್. ಅಂವ ಮನೆಂಜ ಪೊರ್‌ಡುವಕ ಮನೆಕಾರ ಎಂತ ಆಪೊಂದ್ ಬೊತ್ತಿಯಂಡತ್. ಎನ್ನಂಗೇಣ್ಣಕ ಅಂದ್ ಕಾಲತ್ ರಾಜನುಂಡ್ ಅರಮನೆಕ್ ಬರೊಂಡೂಂದ್ ಅಪ್ಪಣೆ ಆನಕ ಅಪಾಯ ಉಂಡ್‌ಂದ್ ಜನ ನಂಬಿತಿಂಜತ್.

ಐಪಣ್ಣ ಮಡಿಕೇರಿ ಅರಮನೆಕ್ ಎತ್ತುವಕ ಪೊಲಾಕ 11 ಗಂಟೆ. ಅಂವ ಅರಮನೆರ ಪಟ್ಟಿಕ್ ಬಂದದೆ ರಾಜ ಮಾಡಿಲ್ ಇಂಜ ತಾಂಡ ದರ್ಬಾರ್ ಕೋಂಬರೆಕ್ ಕಾಕಿತ್ "ಎನ್ನ ಐಪಣ್ಣ...ನಲ್ಲ ಮಂಗಲಕಾರನಾಯಿತ್ ಇಲ್ಲಿಕ್ ಬಂದಿತುಳ್ಳಿಯ? ರಾಜ ಕಾಕ್‌ಚಿಟ್ಟಕ ಎಕ್ಕೋಲು ನಲ್ಲದ್‌ಂದೆ ಗೇನ ಮಾಡಿಯ?"ಂದ್ ತೆಳ್‌ಚಂಡ್ ಕೇಟಿತ್.

ಅದ್‌ಂಗ್ ಐಪಣ್ಣ "ಮಹಾಸ್ವಾಮಿ ನನ್ನ ಕಾಕ್‌ಚಿಡುವಕ ನಾಕ್ ನಲ್ಲದೊ, ಕೆಟ್ಟದೊ ಆಪಾಂದ್ ಎನ್ನನೆ ಎಣ್ಣುವ? ದಂಡಾಂಗೂ ರೆಡಿ ಆಯಿತೆ ಬಂದಿಯೆ!"ಂದ್ ಎಣ್ಣೆಚಿ.

ಬೋರೆ ನೇರ ಆಯಿತಿಂಜಕ ರಾಜಂಗ್ ಐಪಣ್ಣಂಡ ತಕ್ಕ ಚೆಡಿ ಬಪ್ಪಕಿಂಜತೆನ್ನೊ. ಆಚೇಂಗಿ, ಇಂದ್ ತಾಂಡ ಮೋವಳ ಮಂಗಲ ಕೈಚಿಕೊಡ್‌ಪಾಂಗ್ ತೀರ್ಮಾನ ಮಾಡ್‌ನಾಂಗ್, "ಐಪಣ್ಣ ನೀಕ್ ನಲ್ಲದೆ ಆಪ. ನೀಕ್ ನಂಗಡ ರಾಜಕುಮಾರಿ ಮುದ್ದಮ್ಮಾಜಿನ ತಂದಿತ್ ಮಂಗಲ ಕೈಪ. ಆಚೇಂಗಿ, ಆಂಗ್ ಮುಪ್ಪಡೆ ನೀಕ್ ಲಿಂಗಧಾರಣೆ ಮಾಡುವ! ಇಕ್ಕ ನೀನ್ ಮನೆಕ್ ಪೋ. ಲಿಂಗಧಾರಣೆ ಪಿಳ್ಳಾ ಮಂಗಲಕ್ ನಲ್ಲ ದಿನ ನೋಟಿತ್ ನಿನ್ನ ಕಾಕ್‌ಚಿಡುವ. ನೀಡ ಅಣ್ಣಯ್ಯಂಗೂ ಈ ತಕ್ಕನ ಎಣ್ಣೆಯೆ"ಂದ್ ಎಣ್ಣೆಚಿ.

ಅದ್‌ಂಗ್ ಐಪಣ್ಣ "ಮಹಾಸ್ವಾಮಿರ ಚಿತ್ತ"ಂದ್ ಎಣ್ಣೆಯುಂಡ್ ತಾಂಡ ಮನೆಕ್ ಪೋಚಿ.

ಇದಾಯಿತ್ ಚೆನ್ನಂಗ್ ದಿನತ್ ಲಿಂಗರಾಜ ತಾಂಡ ಗುರುವಳುಂಡ್ ಐಪಣ್ಣಂಡ ಲಿಂಗಧಾರಣೆ ಪಿಳ್ಳಾ ಮಂಗಲಕ್ ನಲ್ಲ ಮೂರ್ತ ನೋಟಿಚಿಟ್ಟಿತ್ ಆ ದಿನಕ್ ಒನ್ನಾಂದ್ ಮುಪ್ಪಡೆ ಐಪಣ್ಣನ ಅರಮನೆಕ್ ಕಾಕಿಯಂಡತ್.

ಪಿತ್ಯಾಂದ್ ನಲ್ಲ ನೇರತ್ ರಾಜ ತಾಂಡ ದಿವಾನ ಪಿಳ್ಳಾ ಕಾರ್ಯಕಾರಡ ಎದಿಕೆ





ತಾಂಡ ಗುರುವಳುಂಡ್ ಐಪಣ್ಣಂಗ್ ಲಿಂಗಧಾರಣೆ ಮಾಡ್‌ಚಿಟ್ಟಿತ್ ಅಂವಂಗ್ 'ಚನ್ನಬಸಪ್ಪ' ಎಣ್ಣುವ ಪುದಿಯ ಪೆದ ಇಟ್ಟಿತ್. ಅಂದೇ ಅರಮನೆಲ್ ತಾಂಡ ಮೋವ ಮುದ್ದಮ್ಮಾಜಿನ ಚನ್ನಬಸಪ್ಪಂಗ್ ಕೊಡ್‌ತಿತ್ ಮಂಗಲ ಕೈಚಿತ್. ಲಿಂಗಾಯತನಾನ ಚನ್ನಬಸಪ್ಪ ರಾಜ ಕುಟುಂಬಕಾರಡನ್ನಕೆ ಪಟ್ಟಾ (ರೇಶ್ಮೆ)ರ ಬಟ್ಟಿನ ಇಟ್ಟಿವ ಇಂಜತ್.

ಚನ್ನಬಸಪ್ಪ ಮುದ್ದಮ್ಮಾಜಿನ 1816ನೆ ಇಸವಿಲ್ ಮಂಗಲ ಆಚಿ. ಅಲ್ಲಿಂಜ ಮೋವಕ್ ಲಿಂಗರಾಜೇಂದ್ರ ಪೊರಮಲೆನಾಡ್ ಕಳಕೇರಿ ನಿಡುಗಣೆ ಊರ್‌ಲ್ ಭೂಮಿನ ಉಂಬಳಿ ಆಯಿತ್ ಕೊಡ್‌ತಿತ್ ಅಲ್ಲಿ ಮೋವ ಪಿಳ್ಳಾ ಮೈಮನ ದಂಡ್ ಕಾಲ ಆಕ್‌ಚಿ. ಆ ನೇರತ್ ಅಪ್ಪಂಗಳ ಅರಮನೆಲ್ ಲಿಂಗರಾಜೇಂದ್ರಂಡ ಅಣ್ಣ ಅಪ್ಪಾಜಿರಾಜಂಡ ದಂಡನೆ ಮೋವ ನಂಜುಂಡರಸ ವಾಸ ಇಂಜತ್. ಗರ್ವಾಲೆ ಅರಮನೆಲ್ ಅಪ್ಪಾಜಿರಾಜಂಡ ಪೆರಿಯ ಮೋವ ವೀರರಾಜ ಇಂಜತ್. ಆಚೇಂಗಿ, ನಿಡುಗಣೆ

ಪನ್ನತ್ ಮುದ್ದಮ್ಮಾಜಿಕ್ ತಡಿಕ್ ಸೌಖ್ಯ ಕಮ್ಮಿ ಆನಾಂಗ್ ದಂಡ್ ಕಾಲ ಕೈಂಜಪಿಳ್ಳಾ ಲಿಂಗ ರಾಜೇಂದ್ರ ಅವಕ್ ಅಪ್ಪಂಗಳ ಪನ್ನ ಕೊಡ್‌ತಿತ್ ತಾಂಡ ವಡಿಯಂಡ ಕೂಡೆ ವಾಸಕುಳ್ಳ ಏರ್ಪಾಡ್ ಮಾಡ್‌ಚಿ. ತಾಂಡ ಮೋವ ಮುದ್ದಮ್ಮಾಜಿಕ್ ಪೊರಮಲೆಲ್ ಭೂಮಿ ಉಂಬಳಿ ಕೊಡ್‌ತಾಂಗ್ ಲಿಂಗರಾಜೇಂದ್ರಂಡ ನಿರೂಪ ಉಂಡ್.

ಆಚೇಂಗಿ, ಚನ್ನಬಸಪ್ಪಂಡ ಮಂಗಲ ಕೈಂಜಿತ್ ದಂಡೇ ಕಾಲತ್ ಪೊಣ್ಣ್ ಮುದ್ದಮ್ಮಾಜಿ ಚತ್ತಾ ಪೋಚಿ! ಚೆರಿಯ ಬಯತ್‌ರ ಚನ್ನಬಸಪ್ಪ ತಾಂಡ ಪೊಣ್ಣ್‌ರ ಚಾವ್‌ನುಂಡ್ ಪೇರ್ತ್ ನೊಂಬಲತ್ ಕೊರ್‌ಗಿಯಂಡ್ ಇಂಜತ್. ಇದ್ ಲಿಂಗ ರಾಜೇಂದ್ರಂಡ ಪೊಣ್ಣ್ ಪಿಳ್ಳಾ ಮುದ್ದಮ್ಮಾಜಿರ ಅವ್ವ ದೇವಕಿಕ್ ಗೊತ್ತಾಯಿತ್, "ನಂಗ ಚನ್ನಬಸಪ್ಪಂಗ್ ದಂಡನೆ ಮೋವಳ ಎನ್ನಂಗ್ ಮಂಗಲ ಕೈಚಿ ಕೊಡ್‌ಪಕಾಗಾ?"ಂದ್ ಗೇನ ಮಾಡ್‌ಚಿ. ದೇವಕಿ ಕಾಂತ ಮೂರ್ನಾಡ್ ಪಳಜಂಡ ಒಕ್ಕಡ ಮೂಡಿಕುಳ್ಳಾ. ಇವಳ ಲಿಂಗರಾಜೇಂದ್ರ ಲಿಂಗಧಾರಣೆ ಮಾಡ್‌ಚಿಟ್ಟಿತ್ ಮಂಗಲ ಕೈಚಂಡಿಂಜತ್!

ಅವ ತಾಂಡ ಪೆರಿಯ ಮೋವ ಚತ್ತಪಿಳ್ಳಾ 'ಚೆರಿಯ ಬಯತ್‌ರ ಚನ್ನಬಸಪ್ಪ ಬೋರೆ ದಾರ್‌ನೇಂಗಿ ಮಂಗಲ ಕೈಚಕ ಅದ್ ನಂಗಕೆ ಓರ್ ಕೊರು'ಂದ್ ಗೇನ ಮಾಡ್‌ಚಿ. ಆನಗುಂಡ್ ತಾಂಡ ನಿರ್ಧಾರತ್‌ನ ರಾಜಂಗ್ ಎಣ್ಣೆಚಿ. ಅವ ಚಾಯಿತೆ ಬೇರ್‌ಚಿಟ್ಟಿತ್ ದಂಡನೆ ಮೋವ ದೇವಮ್ಮಾಜಿನ 1819ನೆ ಇಸವಿಲ್ ಚನ್ನಬಸಪ್ಪಂಗ್ ಕೊಡ್‌ತಿತ್ ಮಂಗಲ ಕೈಚಿತ್.

ಇದಾಯಿತ್ ದೊಡ್ಡ ವೀರರಾಜೇಂದ್ರಂಡ ನಾಲ್ ಮೂಡಿ ಮಕ್ಕಳ ಲಿಂಗರಾಜೇಂದ್ರ ಮಂಗಲ ಕೈಚಿ ಕೊಡ್‌ತತ್. ಇದತ್ ಪೆರಿಯ ದಂಡ್ ಮೋಳಿಯಕ್ ಕೊಡವಳ

ಲಿಂಗಧಾರಣೆ ಮಾಡ್‌ಚಿಟ್ಟಿತ್ ಮಂಗಲ ಕೈಚಿತ್. ಪೆರಿಯವ ದೇವಮ್ಮಾಜಿನ ಹೊನ್ನಯ್ಯಗೌಡನ ಬಸಪ್ಪಂಗ್ ಮಂಗಲ ಕೈಚಿತ್ ಇಗ್ಗೋಡ್ಲ ಉರಲ್ ಆಯಿರ ಬಟ್ಟಿ ಭೂಮಿನ ಜಹಗೀರ್ ಆಯಿತ್ ಕೊಡ್‌ತತ್.

ದಂಡನೆ ಮೋವ ಮುದ್ದಮ್ಮಾಜಿ ಪಳಜಂಡ ಚನ್ನವೀರಪ್ಪನ, ಮೂಂದನೆ ಮೋವ ಮಹದೇವಮ್ಮಾಜಿ ಶಿವಾಚಾರ ಹೊಸಮನೆ ಮಲ್ಲಪ್ಪನ ಪಿಳ್ಳಾ ನಾಲನೆಯ ರಾಜಮ್ಮಾಜಿ ಶಿವಾಚಾರ ಹೊಸಮನೆ ನಂಜಪ್ಪನ ಮಂಗಲ ಆಚಿ.

ಲಿಂಗರಾಜೇಂದ್ರ ಈ ನಾಲ್ ರಾಜಕುಮಾರಿಯಡ ವಡಿಯಂಗಕ್ ಆಳಣ್ಣ ಆಯಿರ ಬಟ್ಟಿ ಭೂಮಿನ ಜಹಗೀರ್ ಕೊಡ್‌ತತ್. ಇದತ್ ದೇವಮ್ಮಾಜಿರ ವಡಿಯಂಗ್ ಕೊಡ್‌ತ ಭೂಮಿ ಅಲ್ಲತೆ ಬೋರೆ ಮೂಂದಾಳಾರ ಭೂಮಿರ ವಿವರ ಗೊತ್ತಾಪುಲೆ.

### ಲಿಂಗರಾಜೇಂದ್ರ ಒಡೆಯ ತಾಂಡ ರಾಜಧಾನಿ ಮಡಿಕೇರಿಲ್ ಓಂಕಾರೇಶ್ವರ ಲಿಂಗ ಪ್ರತಿಷ್ಠಾಪನೆ ಮಾಡಿತ್ ತಿರಿಕೆ ಕೆಟ್ಟಾನದ್

ಲಿಂಗರಾಜೇಂದ್ರ ಒಡೆಯ ಕ್ರಿ.ಶ. 1817ತ್ಂಜ 1820ಂಗತ್ತನೆ ತಾಂಡ ರಾಜಧಾನಿ ಆಯಿತಿಂಜ ಮಡಿಕೇರಿಲ್ ಬಲ್ಲೋರ್ ತಿರಿಕೆನ ಕೆಟ್ಟಾಚಿಟ್ಟಿತ್ ಅದತ್ ಕಾಶಿಂಜ ಕೊಂಡ ಬಪ್ಪಾಚಿಟ್ಟಿ ಓಂಕಾರೇಶ್ವರ ಲಿಂಗತ್‌ನ ಪ್ರತಿಷ್ಠಾಪನೆ ಮಾಡ್‌ಚಿ. ಅನ್ನನೆ ಆ ತಿರಿಕೆಲ್ ಪಟ್ಟಿಮಳುಂಡ್ ತ್ರಿಕಾಲ ಪೂಜೆ ನಡಪನ್ನಕೆ ವ್ಯವಸ್ಥೆ ಮಾಡ್‌ಚಿ. ಇಲ್ಲಿ ಶಿವಲಿಂಗ ಪ್ರತಿಷ್ಠಾಪನೆ ಆನಲ್ಲಿಂಜ ಕೆರಿಯ ದೇವಡ ಬೊಳ್‌ಚಿತ್‌ರ ಬೊಳಿ (ನಂದಾದೀಪ) ಇಪ್ಪನ್ನಕೆ ಬೊಳ್‌ಚಿ ಕತ್ತಾಚಿಡುವ ಏರ್ಪಾಡ್ ಮಾಡ್‌ಚಿ. ಇನ್ನತ ಬೊಳ್‌ಚಿ ಎಂದಿಕೂ ಕೆಡತನ್ನಕೆ ಇರೊಂಡುವೇಂಗಿ ಅದೊಂಡ ಪಾತ್ರಲ್ ಇರಂಡಿಯ ಅಣ್ಣೆ, ನೆಯ್ಯ್, ತಿರಿ ಪಿಳ್ಳಾ ಅದ್ ಬೆಪ್ಪ ಜಾಗತ್‌ರ ಮೀದ ಚೆನ್ನಂಗ್ ನೇಮತ್‌ನ ಪಾಲನೆ ಮಾಡೊಂಡು. ಆ ನೇಮತ್‌ರ ಪೋಲೆ ಅಂದ್‌ತೊಟ್ಟ್ ಇಂದೇಕೂ ತಿರಿಕೆಲ್ ಬೊಳ್‌ಚಿ ಬೆಪ್ಪ!

ಮಡಿಕೇರಿ ಓಂಕಾರೇಶ್ವರ ತಿರಿಕೆರ ಗರ್ಭಗುಡಿಲ್ ಇಂದ್ ಕತ್ತಿಯಂಡುಳ್ಳ ಬೊಳ್‌ಚಿ 1820ತ್ ಲಿಂಗಪ್ರತಿಷ್ಠಾಪನೆ ಮಾಡ್‌ಚಿಟ್ಟಿ ಬೊಳ್‌ಚಿ ಇಂದೇಕೂ

ಕತ್ತಿಯಂಡೆ ಉಂಡ್!

ಲಿಂಗರಾಜೇಂದ್ರ ಲಿಂಗಾಯತ. ಅವ ಕೊಡವ / ಬೋರೆ ಜನಾಂಗತಾರ ಪೊಣ್ಣಾಳಳ ತಾಂಡ ಅಂತಃಪುರಕ್ ಕೂಟಿಯಂಡಕೊ ಅಲ್ಲಿಯೆ ಅಯಿಂಗಕ್ ಲಿಂಗಧಾರಣೆ ಮಾಡ್‌ಚಿಡುವ ಇಂಜತ್. ಲಿಂಗಾಯತಂಗಕ್ ತಂಗಡ ಮನೆಲ್ ಏದೇ ಓರ್ ನಲ್ಲ ಕಾರ್ಬಾರ್ಕ್ ಅರ್ಚಕ / ಪಟ್ಟಮಡ ಅವಶ್ಯಕತೆ ಇಪ್ಪುಲೆ. ಅಯಿಂಗಕ್ ಅಯಿಂಗಡ ಗುರುವಳೆ ಇಪ್ಪು. ಕೊಡಗರ ಹಾಲೇರಿ ರಾಜಂಗಕೂ ಗುರು ಇಂಜತ್. ದೊಡ್ಡ ವೀರರಾಜೇಂದ್ರ ಒಡೆಯ ಕೊಡಗಲ್ 57 ಲಿಂಗಾಯತ ಮಠತನ ಸ್ಥಾಪನೆ ಮಾಡಿತ್.

ಪಂಡ್ ಕೊಡಗರ ಲಿಂಗಾಯತ ಅರಸಂಗಕ್ ತಂಗಡದೆ ಆನ ಮಠ ಇಂಜಂಡ್ ಪಟ್ಟಮಡ, ಅರ್ಚಕಂಗಡ ಅವಶ್ಯಕತೆ ಇಲ್ಲತೆ ಇಂಜನ್ನತ ಪರಿಸ್ಥಿತಿಲ್ ಲಿಂಗ ರಾಜೇಂದ್ರ ಒಡೆಯ ತಾಂಡ ರಾಜಧಾನಿ ಆಯಿತಿಂಜ ಮಡಿಕೇರಿಲ್ ಅರಮನೆರ ಬಲ್ಯ ಪಡಿರ ಕೇದತ ತಗ್ಗ ಜಾಗತ್ ಪಟ್ಟಮ ಅರ್ಚಕಂಗಳುಂಡ್ ಪೂಜೆ ನಡ್‌ತುವ ತಿರಿಕೆನ ಸ್ಥಾಪನೆ ಮಾಡ್‌ಚೇಂದ್ ಎಣ್ಣುವಕ್ ಅದ್‌ಂಗ್ ಏದೋ ಮೊಳಿ ಇಂಜಿತಿಕ್ಕು! ಮಡಿಕೇರಿರ ಒಂಕಾರೇಶ್ವರ ತಿರಿಕೆರ ಸ್ಥಾಪನೆಕ್ ಮೊಳಿಯಾನ ಓರ್ ಕಥೆ ಇನ್ನನೆ ಉಂಡ್.

ಕೊಡಗರ ರಾಜಂಗ ಸಾಧಾರಣ ಆಯಿತ್ ತಂಗಡ ರಾಜ್ಯತ್ ಇಂಜ ಚಾಯಿಕರ್ತಿಯಳ ತಂಗಕ್ ಕುಶಿ ಆನಕ ಏದೇ ಅಡೆತಡೆ ಇಲ್ಲತೆ ಕೂಡೆನ್ನೆ ತಂಗಡ ಅಂತಃಪುರಕ್ ಕೂಟಿಯವ ಇಂಜತ್. ರಾಜಂಡ ಇಪ್ಪಕ್ ದಾರೂ ಅಡ್ಡ ಬಪ್ಪಕ್ ಸಾಧ್ಯ ಇಂಜಾಲೆ. ಅನ್ನನೆ ಬಂದಯಿಂಗಳ ರಾಜ ಶಿಕ್ಷೆ ಕೊಡ್‌ತಿತ್ ಕೊಲ್ಚಿಡುವ ಇಂಜತ್.

ಇನ್ನನೆ ಲಿಂಗ ರಾಜೇಂದ್ರ ಒಡೆಯ ಕೊಡಗನ ಆಳಿಯಂಡ್ ಇಪ್ಪಕ ಎಣ್ಣಕ ಕ್ರಿ.ಶ. 1817ನೆ ಇಸವಿಲ್ ದ.ಕನ್ನಡ ಜಿಲ್ಲೆಂಜ ಬಯತಾನ ಓರ್ ಪಟ್ಟ ಚಾಯಿಕರ್ತಿ 'ಮೂಡಿನ ಕೂಟಿಯಂಡ್ ಕುಂದ್‌ರ್ಮೊಟ್ಟೆನ ಪತ್ತಿಯಂಡ್ ಮಡಿಕೇರಿಕ್ ಬಂದಂಡ್ ಇಂಜತ್. ನಡ್‌ಂದಿತ್ ಸುಸ್ತಾಯಿ ಪೋಯಿತಿಂಜ ಆ ಬಯತ್‌ಪಟ್ಟ ಪಟ್ಟಂಡ ಕೂಡೆ ಇಂಜ ಚಾಯಿಕರ್ತಿ ಮೂಡಿ ಓರ್ ಪಳೆಯ ಪೊಡಿಯ ಉಡ್‌ತಿತಿಂಜತ್. ಅವಡ ಮೂಡಲ್ ದುಃಖ ಪಿಳ್ಳಾ ನಿರಾಸೆ ಎದ್ಲ್ ಕಾಂಬ ಇಂಜತ್.

ಇವು ದಂಡಾಳೂ ತಾಳತ್ ಮನೆಂಜ ರಾಜಾಸೀಟ್‌ಕ್ ಬಪ್ಪ ಕುಂದ್‌ರ ಬಟ್ಟೆಲ್ ಬಪ್ಪಕ ಮಡಿಕೇರಿಂಜ ಸುಬ್ಬರಸಯ್ಯ ಎಣ್ಣುವ ಅರಮನೆರ ಶಾಸ್ತ್ರಕಾರ, ನಡುಬಯತ್‌ರ ಓರ್ ಪಟ್ಟ ಅದೇ ಬಟ್ಟೆಕಾಲೆ ಕುಂದ್ ಇಳ್‌ಂಜಿ ಪೋಯಂಡ್ ಇಂಜತ್. ಆ ನೇರತ್ ಬಯತಾನ ಪಟ್ಟ ಪಿಳ್ಳಾ ಕೂಡೆ ಇಂಜ ಚಾಯಿಕರ್ತಿ ಮೂಡಿನ ಈ ಶಾಸ್ತ್ರಕಾರ ಕಂಡತ್.



ಸುಬ್ಬರಸಯ್ಯ ಹವ್ಯಕ ಬ್ರಾಹ್ಮಣ. ಆ ಕುಂದಾನ ಪತ್ತಿಯಂಡ್ ಉಳ್ಳವು ಹವ್ಯಕ ಬ್ರಾಹ್ಮಣಗಳೆಂದ್ ಅಯಿಂಗಡ ಪೊರಪಾಡ್, ನೆತ್ತಿಲ್ ಇಂಜ ಚಾಂದ್ ಗೆರೆನುಂಡ್ ಸುಬ್ಬರಸಯ್ಯ ಕಂಡ್‌ಪುಡ್‌ಚೆತ್. ಆನಗುಂಡ್ ಅವ "ಎನ್ನಸ್ವಾಮಿ, ನಿಂಗ ಎಲ್ಲಿಂಜ ಬಂದಂಡ್ ಉಳ್ಳಿರ, ಎಲ್ಲಿಕ್ ಪೋಪವು?"ಂದ್ ಕೇಟಿತ್.

ಅದ್‌ಂಗ್ "ನಂಗ ಪುತ್ತೂರ್‌ಂಜ ಬಂದಂಡುಳ್ಳ, ಮಡಿಕೇರಿಕ್ ಪೋಯಂಡ್ ಉಳ್ಳಿ"ಂದ್ ಆ ಬಯತಾನ ಪಟ್ಟಿ ಜವಾಬ್ ಕೊಡ್‌ತತ್.

ದ.ಕನ್ನಡ ಜಿಲ್ಲೆರ ಓರ್ ಬಯತಾನ ಪಟ್ಟಿ, ಗರೀಬತನತ್‌ನ ಸಹಿಸುವಕಯ್ಯತೆ ತಾಂಡ ಓರ್ ಮೋವಳ ರಾಜಂಡ ಅಂತಃಪುರಕ್ ಕೂಟಿತ್ ಆ ಮೂಲಕ ರಾಜನುಂಡ್ ಪೊನ್ನ ಪಣತ್‌ನ ಪಡ್‌ಂದವಲೂಂದ್ ಮಡಿಕೇರಿಕ್ ಬಂದ ಉದ್ದೇಶತ್‌ನ ಅರ್‌ಂಜ ಸುಬ್ಬರಸಯ್ಯ ಬೇಜಾರಪಟ್ಟಿತ್.

ಅಲ್ಲಿಂಜ ಆ ಪಟ್ಟಿಂಡ ಕೂಡೆ ತಕ್ಕ್ ಪರ್‌ಂದಿತ್ ತಾಂಡ ಮನೆಕ್ ಅಯಿಂಗಳ್ ಕೂಟಿಯಂಡ್ ಬಾತ್. ಮನೆಲ್ ಉಂಬ್‌ಚಿಟ್ಟಿ ಸುಬ್ಬರಸಯ್ಯ, ಆ ಪಟ್ಟಿಂಗ್ ಚೆನ್ನಂಗ್ ದುಡ್ಡ್ ಕೊಡ್‌ತಿತ್, ರಾಜಂಗ್ ಮೋವಳ ಒಪ್ಪ್‌ಚಿಡೊಂಡು ಎಣ್ಣುವ ದುರಾಲೋಚನೆನ ಬುಡುವನ್ನಕೆ ಎಣ್ಣಿತ್ ವಾಪಾಸ್ ಅಯೆಚಿತ್.

ಬಯತಾನ ಪಟ್ಟಿ ಮಡಿಕೇರಿಕ್ ಬಪ್ಪಕ ಲಿಂಗ ರಾಜೇಂದ್ರ ಮಡಿಕೇರಿಲ್ ಇಂಜಾಲೆ. ಅವ ಬೋಟಿಕೊ, ಬೋರೆ ಏದೊ ಕೆಲಸಕ್ ಕೊಡಗರ ಬೋರೆ ನಾಡ್‌ಕ್ ಪೋನಂವ ದಂಡ್ ದಿನ ಕೈಂಜದು ವಾಪಾಸ್ ಮಡಿಕೇರಿಕ್ ಬಾತ್.

ಪಿತ್ಯಾಂದ್ ರಾಜ ತಾಂಡ ಕೋಂಬರೆಲ್ ಇಪ್ಪಕ ಗೂಢಚಾರಂಗ ರಾಜನ ಕಂಡಿತ್ ಮಡಿಕೇರಿಕ್ ದ.ಕನ್ನಡ ಜಿಲ್ಲೆಂಜ ಓರ್ ಬಯತಾನ ಪಟ್ಟಿ ತಾಂಡ ಚಾಯಿಕರ್ತಿ ಮೋವಳ ಕೂಡೆ ಬಂದಿತ್ ರಾಜಂಡ ಅಂತಃಪುರಕ್ ಕೂಟುವಕ್ ಬಯಂದಲ್ಲಿ, ಸುಬ್ಬರಸಯ್ಯ ಅದ್‌ನ ತಪ್ಪ್‌ಚಿಟ್ಟಿತ್ ಅಯಿಂಗಳ ವಾಪಾಸ್ ಅಯೆಚಾನ ಎಣ್ಣಿಚಿ!

ರಾಜ ಇದ್‌ನ ಕೇಟಿತ್ ತಾಂಡ ಅಂತಃಪುರಕ್ ಓರ್ ಚಾಯಿಕರ್ತಿ ಮೂಡಿ ತಪ್ಪಿಪೋಚಿಲ್ಲ ಎಣ್ಣುವ ಬೇಜಾರತ್, ಅದ್‌ನ ತಪ್ಪ್‌ಚಿಟ್ಟಿ ಸುಬ್ಬರಸಯ್ಯಂಡ ಮೀದ ಚೆಡಿ ಪಟ್ಟಂಡತ್. ರಾಜ ದಿವಾನ, ಕರಣಿಕ ಪಿಳ್ಳಾ ಕೊಡಗರ ಮುಕ್ರಿಯಳ ತಾಂಡ ಕೂಡೆ ಅಚ್ಚಕರ ಮಟ್ಟಿಕೆ ಕೂಟಿಯವ ಇಂಜಾಲೆ. ಅದ್‌ಂಡ ಬದಲ್ ಕಾದತ ವರ್ಗತ್‌ರ ಚಾವಡಿಕಾರ ಪಿಳ್ಳಾ ಸೇವಕಂಗಳ ಕೂಡೆ ಆಕಿಯಂಡ್ ಅಯಿಂಗಡ ತಕ್ಕ್‌ಕ್ ಏರ ಬೆಲೆ ಕೊಡ್‌ಪ ಇಂಜತ್. ತಾಂಡ ಮನಸ್ಸಕ್ ದಾಡ ಮೀದೇ ಆಡ್ ಅಪನಂಬಿಕೆ ಬಂದಕ,

ಚೆಡಿ ಬಂದಕ ಅಯಿಂಗಳ ಕೂಡೆನ್ನೆ ಇಲ್ಲತಾಕಿರುವ ಇಂಜತ್! ಆನಗುಂಡ್ ಲಿಂಗರಾಜೇಂದ್ರ ತಾಂಡ ಕುಶಿಕ್ ಅಡ್ಡ ಬಂದ ಸುಬ್ಬರಸಯ್ಯನ ಕ್ರೂರವಾಯಿತ್, ಹಿಂಸೆ ಕೊಡತ್ ಚಾವ್‌ಚಿಡೊಂಡೊಂದ್ ತೀರ್ಮಾನ ಮಾಡಿತ್ ಸುಬ್ಬರಸಯ್ಯನ ಅಂವಂಡ ಮನೆಂಜ ಪುಡ್‌ಚಂಡ್ ಬಪ್ಪಕ್ ತಾಂಡ ಸಿದ್ವಿ ಜನಳ ಅಯೆಚಿತ್.

ಸಿದ್ವಿಯ ಮಿಳ್ಳಾಲೆ ಕ್ರೂರಿಯ. ಇಕ್ಕ ಬೋರೆ ಮಹಾಸ್ವಾಮಿರ ಅಪ್ಪಣೆ. ಅವು ಸುಬ್ಬರಸಯ್ಯ ತಾಂಡ ಮನೆಲ್ ದೇವಡ ಪೂಜೆ ಮಾಡಿಯಂಡ್ ಇಪ್ಪಕ ಒರಾತತ್ ಪುಡ್‌ಚಂಡ್ ಅರಮನೆಕ್ ಈತಂಡ್ ಬಾತ್. ಕೂಡೆನ್ನೆ ಸುಬ್ಬರಸಯ್ಯಂಗ್ ವಿಷಯ ಗೊತ್ತಾಚಿ. ಅವ ತಾಂಡ ಮನೆಕಾರಳ ಕಾಕಿತ್ "ನಾನ್ ಇಳ್ಳೊ ಜಿಂವತೋಡೆ ಬಪ್ಪನ್ನಕೆ ಇಲ್ಲೆ. ನಾಡ ಮಾದಕಾರ್ಬಾರ್‌ನ ಎಕ್ಕ ಮಾಡೊಂಡೊಂದ್ ರಾಜಂಡ ಅಪ್ಪಣೆ ಎಡ್‌ತಂಡ್ ಮಾಡಿ"ಂದ್ ಎಣ್ಣೊಚಿ.

ಅರಮನೆಲ್ ಲಿಂಗರಾಜೇಂದ್ರ ಒಡೆಯ, ಸುಬ್ಬರಸಯ್ಯ ಬಪ್ಪಾನೆ ಪಾರ ಕಾತಂಡ್ ಇಂಜತ್. ಅವ ದುಂಬ ಚೆಡಿಲ್ ಇಂಜಂವ, ಸುಬ್ಬರಸಯ್ಯನ ಕ್ರೂರ ದೃಷ್ಟಿಲ್ ನೋಟಿಯಂಡ್ "ಎನ್ನಾ ಸುಬ್ಬರಸಯ್ಯ ಅರಮನೆರ ಕೂಳ್ ತಿಂದಿತ್ ನೀಕ್ ಗರ್ವ ಬಂದನ್ನಕೆ ಕಾಂಬ. ನಂಗಕ್ ಬಪ್ಪ ಜನಳ ತಪ್ಪಾಚಿಡುವಕ್ ನೀಕ್ ಅದೆಚ್ಚಿಕ್ ಧೈರ್ಯ? ಕೂಡೆನ್ನೆ ಆ ಮೂಡಿನ ಕೂಟಿಯಂಡ್ ಬಂದಿತ್ ಒಪ್ಪಾಚಿಡ್. ಇಲ್ಲೇಂಗಿ ನೀಡ ಜಿಂವ ಇಪ್ಪುಲೆ"ಂದ್ ರಭಸ ಇಟ್ಟಿತ್.

"ನಾಕ್ ಏದ್ ನ್ಯಾಯಾಂದ್ ಕಂಡಿತ್ ಅದ್‌ನ ನಾನ್ ಮಾಡಿಯೆ. ಮಹಾಸ್ವಾಮಿ ಆ ಮೂಡಿಕುಳ್ಳೊ ಇಕ್ಕಣೆಕ್ ಅಯಿಂಗಡ ಊರ್‌ಕ್ ಎತ್ತಿರ್‌ತಿಕ್ಕು. ಅವಳ ನಿಂಗಕ್ ಒಪ್ಪಾಚಿಡುವ ಕೆಲಸ ನನ್ನಗುಂಡ್ ಆಕತದ್" ಎಣ್ಣೊಚಿ ಸುಬ್ಬರಸಯ್ಯ!

ಅದ್‌ಂಗ್ ರಾಜ "ಈ ಪಟ್ಟಿಂಗ್ ಎಚ್ಚಿಕ್ ಗರ್ವ. ಇಂವಂಗ್ 20 ಚಾಟಿ ಪೊಯ್ತ ಪೊಯ್ತಿರಿ"ಂದ್ ಸಿದ್ವಿಯಕ್ ಎಣ್ಣೊಚಿ.

ಅನ್ನನೆ ರಾಜಂಡ ಎದಿಕೆ ಸಿದ್ವಿಯ ಸುಬ್ಬರಸಯ್ಯಂಗ್ 20 ಚಾಟಿ ಪೊಯ್ತ ಪೊಜ್ಜತ್. ಅಂವಂಡ ಮೇಲ್‌ಂಜ ಚೋರೆ ಪರಿವ ಕೂಡಾಚಿ.

ಅಕ್ಕ ರಾಜ "ಎನ್ನಾ ಪಟ್ಟಿ...ಇಕ್ಕ ಆಚೇಂಗೂ ನೀಡ ತಪ್ಪುನ ಒತ್ತಂಡ್ ಆ ಮೂಡಿನ ಕೂಟಿಯಂಡ್ ಬಂದಿತ್ ಒಪ್ಪಾಚಿಡುವಿಯ?"ಂದ್ ಕೇಟತ್.

ಅದ್‌ಂಗ್ ಸುಬ್ಬರಸಯ್ಯ ನೊಂಬಲತ್ ವಯಿಂಗಿಯಂಡ್ "ಮಹಾಸ್ವಾಮಿ ಅದ್ ನನ್ನಗುಂಡ್ ಆಪುಲೆ. ನಿಂಗಡ ಮನಸ್ಸಕ್ ಬಂದನ್ನಕೆ ಮಾಡಿ"ಂದ್ ಎಣ್ಣೊಚಿ.

ಅಕ್ಕ ರಾಜ, ಸುಬ್ಬರಸಯ್ಯಂಡ ದಂಡ್ ಕಣ್ಣ ಮಕ್ಕಳ ಕಾಕಿಯಂಡ್ ಬಪ್ಪಕ್ ಸಿದ್ಧಿಯಳ ಮನೆಕ್ ಅಯೆಚತ್. ಅವು ಬಂದದೆ ರಾಜ "ನೋಟ್ ಸುಬ್ಬರಸಯ್ಯ ಇಕ್ಕಲೆ ನೀಡ ದಂಡ್ ಮೋನೆಯಳ ಕೊಲ್ಲಾಚಿಡುವಿ. ನಾನ್ ಎಣ್ಣನ್ನಕೆ ಕೇಪಿಯ?"ಂದ್ ಎಣ್ಣಾಚಿ.

"ಮಹಾಸ್ವಾಮಿ ನಾಕ್ ಉಳ್ಳ ಒರೇ ನಾವು. ನಾನ್ ಮಿಳ್ಳಾಲೆ ಎಣ್ಣಾನನ್ನಕೆ ನಡಪಂವ"ಂದ್ ಸುಬ್ಬರಸಯ್ಯ ಎಣ್ಣಾಚಿ.

ಈ ತಕ್ಕನ ಕೇಟ ರಾಜಂಗ್ ತಾಂಡ ಚೆಡಿನ ತಡಪ ಕಯ್ಯತಾಚಿ. ಕೂಡೆನ್ನೆ ಅವ ತಾಂಡ ಸಿದ್ಧಿಯಕ್ ಸುಬ್ಬರಸಯ್ಯಂಡ ದಂಡ್ ಮೋನೆಯಂಗಳ ಮಂಡೆನ ಕೆತ್ತುವಕ್ ಅಪ್ಪಣೆ ಕೊಡತತ್. ಅವು ಅನ್ನನೆ ಮಾಡ್ಚಿ! ಅಲ್ಲಿಂಜ ರಾಜ ಸುಬ್ಬರಸಯ್ಯಂಡ ತಡಿನ ಚೆನ್ನ ಚೆನ್ನಂಗ ಕೆತ್ತುವಕ್ ಎಣ್ಣಾಚಿ.

"ಇಕ್ಕಾಚೇಂಗೂ ಆ ಮೂಡಿನ ನಾಕ್ ಒಪ್ಪಾಚಿಡುವಿಯ?"ಂದ್ ರಾಜ ಕೇಟಂಡ್ ಇಂಜತ್.

ಅದ್‌ಂಗ್ ಸುಬ್ಬರಸಯ್ಯ ಕಷ್ಟತ್ "ಮಹಾಸ್ವಾಮಿ ಈ ತಡಕ್ ನಿಂಗ ಏದೇ ಶಿಕ್ಷೆ ತರೊಲು. ಆಚೇಂಗಿ, ಆತ್ಮ ಎಣ್ಣುವದ್ ಶಾಶ್ವತ. ಆತ್ಮವಂಚನೆನ ಮಾಡುವಕ್ ನನ್ನಗುಂಡ್ ಕಯ್ಯಲೆ. ನಿಂಗ ಅನ್ಯಾಯತರ ಬಟ್ಟೆಕ್ ಇಳಿಯತಿ. ಇದ್‌ನುಂಡ್ ನಲ್ಲದಾಪುಲೆ. ಇದ್‌ಂಗ್ ಪ್ರತಿಫಲ ತಪ್ಪುಲೆ"ಂದ್ ಎಣ್ಣೆತ್ ತಾಂಡ ಜಿಂವ ಬುಟ್ಟತ್.

ಅವ ಜಿಂವಬುಡುವಕ ಅವಂಡ ಕಣ್ಣ ಒರೇಪೋಲೆ ರಾಜನ ನೋಟಿಯಂಡ್ ಇಂಜತ್. ಅಕ್ಕ ಲಿಂಗರಾಜಂಗ್ ಚೆನ್ನಂಗ್ ಪೋಡಿ ಆಚಿ.

ಸುಬ್ಬರಸಯ್ಯ ನಿಷ್ಠಾವಂತ ಪಟ್ಟ: ಸಕಲ ಶಾಸ್ತ್ರ ಅರಾಂಜವ. ವ್ರತ, ಪಟ್ಟಣಿನ್ನೆಲ್ಲ ಕ್ರಮಪೋಲೆ ಮಾಡುವ ಇಂಜತ್. ಮನೆಲ್ ಮೂಂದ್ ನೇರ ದೇವಡ ಪೂಜೆ ಮಾಡುವಂವ, ಕೂಟ್‌ಕ್ ದೇವಿರ ಉಪಾಸನೆ ಇಂಜತ್.

ಅಂದ್ ಬೈಟಾಚಿ. ತಾನ್ ಒಬ್ಬನೆ ಕೋಂಬರೆಲ್ ಇಪ್ಪಕ ದಾರೋ ಮಂತ್ರ ಎಣ್ಣುವನ್ನಕೆ ಲಿಂಗರಾಜಂಗ್ ಕೇಟತ್. ಚೆನ್ನ ಗಾಬರಿಲ್ ರಾಜ ನೋಟುವಕ ಎದಿಕೆ ಅವಂಗ್ ಸುಬ್ಬರಸಯ್ಯ ನಿಂದನ್ನಕೆ ಆಚಿ. ಅಕ್ಕ ಬೊತ್ತನ ರಾಜ ಪಡಿರ ಪೊರಮೆ ಪಾರ ಇಂಜ ಚಾವಡಿಕಾರಳ ಕಾಕ್‌ಚಿ. ಅವು ರಾಜಂಡ ಕೋಂಬರೆಕ್ ಬಪ್ಪಕ ಅಯಿಂಗಕ್ ರಾಜನ ಬುಟ್ಟಕ ಬೋರೆ ದಾರನೋ ಕಂಡ್‌ಲೆ. ಅವು ಪೊರಮೆ ಬಪ್ಪಕ ರಾಜಂಗ್ ಸುಬ್ಬರಸಯ್ಯ ತಾಂಡ ಎದಿಕೆ ನಿಂದಂಡ್ ತಾಂಡ ಬರಿಯ ಬೆರ ಕಾಟಿಯಂಡ್ ಉಳ್ಳನ್ನಕೆ ಕಾಂಬ ಇಂಜತ್!

ದಿನ ಕೈಂಜನ್ನಕೆ ರಾಜಂಗ್ ಸುಬ್ಬರಸಯ್ಯಂಡ ಕೂಳಿರ ಉಪದ್ರ ಅಧಿಯಾಚಿ. ಬೈಟ್

ಉಂಬಕ್ ಅಳ್ತಕ ಅಂಪ ಉಂಬ ಇಂಜ ಪೊನ್ನಾರ ಬಟ್ಟಿ ಬೆಚ್ಚ ಜಾಗತ್‌ಂಜ ಇಞ್ಚೋರ್ ಮೂಲೆಕ್ ಪೋಪ ಇಂಜತ್. ರಾಜ ಬುದ್ಧಂಡಪಿಞ್ಚ ಕಟ್ಟಾರ ಕೊಡಿಂಜ ದಾರೊ ಬಲ್‌ಚಿತ್ ಕೋದಕ್ ಇಡುವ ಇಂಜತ್. ಇನ್ನನೆ ರಾಜಂಗ್ ದಿನ ಕೈಂಜನ್ನಕೆ ಉಪದ್ರ ಜಾಸ್ತಿ ಆಯಿತ್ ಮಂತ್ರವಾದಿಯಳ ಅರಮನೆಕ್ ಕಾಕ್‌ಚಿಟ್ಟಿತ್ ಅಯಿಂಗಳುಂಡ್ ತಾತಿ ಕೆಟ್ಟಿಚಿಟ್ಟಂಡತ್.

ಆಚೀಂಗಿ, ಇದೇದಾನಗುಂಡೂ ಅವಂಗ್ ಪ್ರಯೋಜನ ಆಯಿಲೆ. ಆಖೀರಕ್ ದಿವಾನಂಗ ಪಿಞ್ಚ ಕರಣಿಕ ಸುಬ್ಬಯ್ಯ ರಾಜಂಡ ಕೂಡೆ ನೀಲೇಶ್ವರತ್‌ಂಜ ತಂತ್ರಿಯಳ ಕಾಕ್‌ಚಿಟ್ಟಿತ್ ಅಯಿಂಗಳುಂಡ್ ಮಂತ್ರ ಪಿಞ್ಚ ಬೋರೆ ಭದ್ರತೆನ ಮಾಡ್‌ಚಿಟ್ಟಕ ನಲ್ಲದೊಂದ್ ಸಲಹೆ ಕೊಡ್‌ತತ್. ಆನಗುಂಡ್ ರಾಜ ತಂತ್ರಿಯಳ ಕಾಕಿಯಂಡ್ ಬಪ್ಪಕ್ ಕರಣಿಕ ಸುಬ್ಬಯ್ಯನ ಅಯೆಚತ್.

ಕರಣಿಕ ಸುಬ್ಬಯ್ಯ ದ. ಕನ್ನಡಕ್ ಅಡ್‌ಂಗ್‌ನ ನೀಲೇಶ್ವರತ್‌ಂಜ ತಂತ್ರಿಯಳ ರಾಜ ಮರ್ಯಾದಿಲ್ ಕೂಟಿಯಂಡ್ ಮಡಿಕೇರಿಕ್ ಬಾತ್. ತಂತ್ರಿಯ ಮಡಿಕೇರಿಲ್‌ಶಾಸ್ತ್ರ ನೋಟುವಕ ಅಯಿಂಗಕ್ ಸುಬ್ಬರಸಯ್ಯ, ಬ್ರಹ್ಮರಾಕ್ಷ ಆಯಿತ್‌ಂದೂ, ಆ ರಾಕ್ಷಂಗ್ ಓರ್ ಜಾಗತ್‌ನ ಶಾಸ್ತ್ರೋಕ್ತ ಆಯಿತ್ ಮಾಡೊಂಡೊಂದೂ, ಇಲ್ಲೇಂಗಿ ರಾಜಂಗ್ ಕಷ್ಟ ತಪ್ಪಿನದಲ್ಲಂದ್ ಅರ್‌ಂಜತ್.

ಅಕ್ಕ ರಾಜ ಎನ್ನನೇಂಗಿ ಮಾಡಿತ್ ಆ ಬ್ರಹ್ಮರಾಕ್ಷಂಡ ಉಪದ್ರ ಇಲ್ಲತನ್ನಕೆ ಮಾಡೊಂಡೊಂದ್ ಕೇಟವಕ "ತಂತ್ರಿಯ ಸುಬ್ಬರಸಯ್ಯಂಡ ಮನೆ ಇಂಜ ಜಾಗತೆ ಓರ್ ಈಶ್ವರ ತಿರಿಕೆನ ಕೆಟ್ಟಿಚಿಡೊಂಡೊಂದ್, ಆ ತಿರಿಕೆಲ್ ಕಾಶಿಂಜ ಶಿವಲಿಂಗ ಕೊಂಡಬಂದಿತ್ ಪ್ರತಿಷ್ಠಾಪನೆ ಮಾಡೊಂಡೊಂದ್, ಆ ತಿರಿಕೆರ ಪಕ್ಕತೆ ಬ್ರಹ್ಮರಾಕ್ಷಂಗ್ ಓರ್ ಜಾಗ ಕೊಡ್‌ಕೊಂಡೊಂದೂ, ರಾಕ್ಷಂಗ್ ಬೈಟ್ ನೇರತ್ ತಿರಿಕಳಿಪಕ್ ಓರ್ ನಿರ್ಕಪಟ್ಟಿ ಜಾಗತ್‌ನೊ ಗೊತ್ತ್ ಮಾಡೊಂಡೊ"ಂದ್ ಎಣ್ಣೆಚಿ.

ತಂತ್ರಿಯಡ ಆದೇಶಪೋಲೆ ರಾಜ ಅರಮನೆಕ್ ಪೂರ್ವ ಬರಿಯತ ತಗ್ಗಾನ ಜಾಗತ್ ಸುಬ್ಬರಸಯ್ಯಂಡ ಮನೆ ಇಂಜ ಜಾಗತೆ ತಂತ್ರಿಯಳುಂಡ್ ಪಂಚಾಂಗ ನೋಟ್‌ಚಿಟ್ಟಿತ್, ತಿರಿಕೆರ ಕೆಲಸತ್‌ನ 1739ನೆ ಇಸವಿಲ್ ಸುರು ಮಾಡ್‌ಚಿ. ಇನ್ನನೆ 2 ಕಾಲ, 9 ತಿಂಗ, 25 ದಿನತ್ ಎಣ್ಣಕ 1817ಂಗ್ ತಿರಿಕೆ ಕೆಟ್ಟುವ ಕೆಲಸ ಆಚಿ. ತಿರಿಕೆ ಮಹಮ್ಮದ್ ಶೈಲಿಲ್ ಪೇರ್ತ್ ಚಾಯಿತೆ ಉಂಡ್. ಮಾಡಿರ ಕೊಡಿಲ್ ನಡುಲ್ ಗಾರೆಂಜ ಮಾಡ್‌ಚಿಟ್ಟಿ ಉರ್‌ಟ್ ಆಕಾರತ್‌ರ ತುದಿಲ್ ಪೊನ್ನಾರ ನೀರ್ ಕೊಡ್‌ತ ಓರ್ ಕಲಶ ಉಂಡ್.

ತಿರಿಕೆರ ಸುತ್ತೂ ನಾಲ್ ಬರಿಲ್ ಪ್ರಾಕಾರ ಉಂಡ್. ಪ್ರಾಕಾರಕೂ, ಗರ್ಭಗುಡಿಕೂ

ನಡುಲ್ ಕೆತ್ತಕಲ್ ಹಾಸಿತ್. ತಿರಿಕೆರ ಎದಿಕೆ ಬರಿ ಕೋದತ್ ಓರ್ ಕೆರೆ ಉಂಡ್. ಕೆರೆರ ನಡೂಲ್ ಓರ್ ಚೆರಿಯ ಮಂಟಪ ಉಂಡ್. ಈ ಚೆರಿಯ ಮಂಟಪಕೂ, ಕೆರೆರ ಪಶ್ಚಿಮ ಬರಿಕೂ ದಂಡ್ ಬರಿಲ್ ಕಟ್ಟೇ ಉಳ್ಳ, ಓರ್ ಚೆರಿಯ ಬಟ್ಟೆ ಉಂಡ್. ಕೆರಿರ ಸುತ್ತೂ ತಿರಿಕೆರ ಪ್ರಾಕಾರತರ ಸುತ್ತು ಕಲ್ ಹಾಸನನ್ನಕೆ ಕೆತ್ತಕಲ್ ಹಾಸಿತ್. ಒಟ್ಟಾರೆ ಎಣ್ಣುವೇಂಗಿ ತಿರಿಕೆರ ಸುತ್ತು ಮುತ್ತು ಜಾಗ ಚಾಯಿತೆ, ಮನಾರತೆ ಉಂಡ್.

ಲಿಂಗರಾಜೇಂದ್ರ ಒಡೆಯ 1741ತ್ ತಿರಿಕೆ ಕೆಟ್ಟಚಿ. ಆಚೇಂಗಿ, ಅದತ್ ಶಿವಲಿಂಗ ಪ್ರತಿಷ್ಠಾಪನೆ ಮಾಡುವಕ್ ಕಾಶಿಂಜ ತಂತ್ರಿಯ ಎಣ್ಣಾನನ್ನಕೆ ಶಿವಲಿಂಗ ಕೊಂಡಬಪ್ಪಕ್ ತಾಂಡ ರಾಜಧಾನಿರ ಪಂಡಿತ ರಾಮಯ್ಯ, ತಿರಮಲೇಶ್ವರ ಭಟ್ಟ, ನಾರಾಯಣ ಭಟ್ಟ ಎಣ್ಣುವಯಿಂಗಳ ಚೆನ್ನಂಗ್ ಕಾರ್ಯಕಾರಡ ಕೂಡ ಕಾಶಿಕ್ ಅಯೆಚತ್.

ಇವು ಬಲ್ಯ ಓರ್ ಶಿವಲಿಂಗತ್‌ನ ಕೊಂಡಬಾತ್. ಬಪ್ಪಕ ನೇಮಪೋಲೆ ಈ ಪಟ್ಟಮ ಕುಳಚಿತ್ ಪೂಜೆ ಮಾಡಿಯಂಡ್, ಪಟ್ಟಣಿಲ್ ಲಿಂಗತ್‌ನ ನೆಲತರ ಮೀದ ಬೆಕ್ಕತೆ ಕೊಂಡಬಾತ್. ಲಿಂಗ ಮಡಿಕೇರಿಕ್ ಎತ್ತುವ ನೇರಕ್ ತಂತ್ರಿಯಳ ಕಾಕ್‌ಚಿಟ್ಟತ್ 1820ನೆ ಇಸವಿ ಮಾರ್ಚ್ 26ಂಗ್ ಶಿವಲಿಂಗ ಪ್ರತಿಷ್ಠಾಪನೆ ಮಾಡ್‌ಚಿ. ಈ ಲಿಂಗತ್‌ನ ತಂತ್ರಿಯ 'ಓಂಕಾರೇಶ್ವರ ಲಿಂಗಾ'ಂದ್ ಕಾಕ್‌ಚಿ.

ಅನ್ನನೆ ಈ ತಿರಿಕೆಕ್ ಓಂಕಾರೇಶ್ವರ ತಿರಿಕೆಂದ್ ಪೆದ ಬಾತ್. ಇಲ್ಲಿ ದಿನಕ್ ಮೂಂದ್ ಕುರಿ ಪೂಜೆ ಮಾಡುವನ್ನಕೆ, ಪೂರಜಾಗಕಾರಕ್ ಕೂಳಾದಾನ ಆಂಡೂಂದ್, ನೇರಕೊತ್ತ ನಮ್ಮ ನಡೆತೊಂಡೂಂದ್, ನಂದಾದೀಪ ಎಂದಿಕೂ ಗರ್ಭಗುಡಿಲ್ ಕತ್ತಿಯಂಡೆ ಇರೊಂಡೂಂದ್ ತಂತ್ರಿಯ ಸಲಹೆ ಮಾಡ್‌ನಾಂಗ್, ಲಿಂಗರಾಜೇಂದ್ರ ಅದೊಂಗುಳ್ಳ ವ್ಯವಸ್ಥೆನೆಲ್ಲ ತಾಂಡ ಕರಣಿಕ ಪಿಳ್ಳಾ ಬೋರೆ ಪಟ್ಟಮಳುಂಡ್ ಮಾಡ್‌ಚಿಟ್ಟತ್. ಸುಬ್ಬರಸಯ್ಯ ತಾಂಡ ಮನೆಲ್ ಪೂಜೆ ಮಾಡುವ ಇಂಜ ಬೊಳ್ಳಿರ ಶಿವಲಿಂಗತನೊ ರಾಜ ತಿರಿಕೆಲ್ ಬೆಪ್ಪೆಚಿಟ್ಟತ್.

ಓಂಕಾರೇಶ್ವರ ತಿರಿಕೆಲ್ ಶಿವಲಿಂಗ ಪ್ರತಿಷ್ಠಾಪನೆ ಮಾಡ್‌ಚಿಟ್ಟಾಂಡ ಮೀದ ರಾಜ ಗರ್ಭಗುಡಿರ ಪಡಿಲ್ ಓರ್ ತಗಡ್ ಶಾಸನತ್‌ನ ಎಳ್ಳೆಚಿಟ್ಟತ್. ಲಿಂಗರಾಜೇಂದ್ರ ಒಡೆಯಂಗ್ ಬ್ರಹ್ಮರಾಕ್ಷಂಡ ಉಪದ್ರ ತಪ್ಪೆಚಿಡುವಾಂಗ್ ಈ ತಿರಿಕೆ ಕೆಟ್ಟೆಚಿಡುವಾಂಡ ಕೂಟ್‌ಕ್ ಬ್ರಹ್ಮ ರಾಕ್ಷಂಗ್ ಓರ್ ಜಾಗತ್‌ನ ತಿರಿಕೆರ ಪಕ್ಕತೆ ಮಾಡೊಂಡಿಂಜತ್. ಆಂಗಾಯಿತ್ ನೀಲೇಶ್ವರ ತಂತ್ರಿಯ ತಿರಿಕೆರ ಉತ್ತರ ಬರಿಲೆ ಎಣ್ಣಕ ಎಡ್‌ತೆ ಬರಿಲ್ ಓರ್ ಚಪ್ಪೆಪೂವಾರ ಗಡ ನೆಟ್ಟಿತ್ ಅದತ್ ಬ್ರಹ್ಮ ರಾಕ್ಷಂಗ್ ಜಾಗ ಕೊಡ್‌ತತ್.

ಅನ್ನನೆ ಬ್ರಹ್ಮರಾಕ್ಷಂಗ್ ತಿರಿಕಳಿಪಕ್ ಮಾಡುವಕ್ ಓರ್ ದೂರತ ಜಾಗ



ಬೋಂಡಿಂಜತ್. ಇದೊಂಗೂ ತಂತ್ರಿಯ ತಿರಿಕೆಂಜ ಸುಮಾರ್ ಓರ್ ಕೂಗಳತೆ ದೂರತ್ ಓರ್ ಅಶ್ವತ್ಥ ಮರತ್ ನಟ್ಟಿತ್ ಅಲ್ಲಿ ನಾಗಂಡ ಕಲ್ಲರ ಪ್ರತಿಷ್ಠಾಪನೆ ಮಾಡಿತ್ ಪಟ್ಟಮಳುಂಡ್ ಪೂಜೆನ ನಿರ್ಕ್ ಪಡ್ತಾಚಿ. ಬ್ರಹ್ಮರಾಕ್ಷ ತಿರಿಕೆರ ಪಕ್ಕತ್ ಇಂಜ ಚಪ್ಪೆ ಪೂ ಮರತ್ಂಜ ಅಶ್ವತ್ಥಮರತ್ ಕಟ್ಟಿಕೆತ್ತನೆ ಬೈಟ್ ಸಂಚಾರ ಮಾಡೂಂದ್ ನೀಲೇಶ್ವರ ತಂತ್ರಿಯ ಮಂತ್ರವಾದತ್ಂಜ ಬ್ರಹ್ಮ ರಾಕ್ಷಂಗ್ ಕೆಟ್ತ್ ಇಟ್ಟಿತ್.

ಅಂದೊಂಜ ರಾಜಂಗ್ ಬ್ರಹ್ಮರಾಕ್ಷಂಡ ಉಪದ್ರ ತಪ್ಪಿಚಿ. ನೀಲೇಶ್ವರ ತಂತ್ರಿಯಕ್ ರಾಜ ಬೋಂಡಿಯಾನ ದುಡ್ಲ್, ಬಟ್ಟೆ ಪಿಳ್ಳಾ ಬೋರೆ ಕಾಣಿಕೆ ಕೊಡ್ತದೆ ಅಲ್ಲತೆ ಅಯಿಂಗಕ್ ಕೊಡಗರ ಎಲ್ಲಾ ತಿರಿಕೆರ ತಾಂತ್ರಿಕ ಅಧಿಕಾರ ಎಣ್ಣಿಕ ತಿರಿಕೆಲ್ ಲಿಂಗಕ್ ಅಷ್ಟ ಬಂಧ ಇಡುವ, ಬ್ರಹ್ಮಕಲಶ ಪೂಜೆ, ಪುದಿಯ ಲಿಂಗ ಯಾ ವಿಗ್ರಹ ಪ್ರತಿಷ್ಠಾಪನೆ ಇನ್ನತಾನ ವಿಶೇಷ ಅಧಿಕಾರತ್ನೊ ಕೊಡ್ತತ್. ತಂತ್ರಿಯಕ್ ರಾಜ ಈ ಕೆಲಸ ಕೊಡ್ಪಾಂಗ್ ಮುಪ್ಪಡೆ ಇನ್ನತ ಕೆಲಸತ್ನೆಲ್ಲ ಮಲಬಾರ್ ಕಾಳೇಘಾಟ್ ತಂತ್ರಿಯ ನಡತಿಯಂಡ್ ಇಂಜನ್ನಕೆ ಕಾಂಬ.

ಲಿಂಗರಾಜೇಂದ್ರ ಓಂಕಾರೇಶ್ವರ ತಿರಿಕೆ ಕೆಟ್ಪಿಚಿಟ್ಟದೆ ಅಲ್ಲತೆ ಮಡಿಕೇರಿ ಪಕ್ಕತ ಕರ್ಣಂಗೇರಿ ಊರರ ಕರವಲೆ ಬಾಡಗತ್ ಈಶ್ವರ ತಿರಿಕೆನ ಕೆಟ್ಪಿಚಿಟ್ಟಿತ್ ಲಿಂಗ ಪ್ರತಿಷ್ಠಾಪನೆ ಮಾಡ್ಚಿಟ್ಟಿತ್. ಆ ತಿರಿಕೆರ ಬಲ್ಯ ಪಡಿರ ಕೊಡಿಯತ ಕಲ್ಲಲ್ 'ಲಿಂ'ದ್ ಲಿಂಗರಾಜಂಡ ಮುದ್ರೆ ಕೆತ್ತನದ್ ಇಂದೇಕೂ ಉಂಡ್.

ವೀರಾಜಪೇಟೆರ ಪಕ್ಕತ ಕುಕ್ಕೂರ್ಲ್ ಶ್ರೀ ಭದ್ರಕಾಳಿ ದೇವಿರ ತಿರಿಕೆಕ್ ಲಿಂಗರಾಜ ತಾಂಡ ರಾಜಮುದ್ರೆ 'ಲಿಂ'ದ್ ಉಳ್ಳ ದಂಡ್ ಬಾಳಕತ್ತಿನ ಪರಿಕೆ ಆಯಿತ್ ಒಪ್ಪಿಚಿಟ್ಟಿತ್. ಆ ಕತ್ತಿ ಇಕ್ಕಲೂ ತಿರಿಕೆಲ್ ಉಂಡ್.

### ಲಿಂಗರಾಜೇಂದ್ರ ಒಡೆಯಂಡ ಚಾವು

ಲಿಂಗರಾಜೇಂದ್ರ ಒಡೆಯ 1820ತ್ ಸ್ವರ್ಗವಾಸಿಯಾಚಿ. ಅಕ್ಕ ಅಂವಂಗ್ 45 ಬಯತ್. ಅವ ಚಾವ ನೇರಕ್ ತಾನ್ ತಾಂಡ ಶತ್ರುವಡ ಮಾಟಭಿದ್ರತ್ ಚೆತ್ತಂಡ್ ಉಳ್ಳಂದ್ ನಂಬ್ಚಿ. ಅವ ಚಾವಕ ಅಂವಂಡ ಕೊದಿರ ಪೊಣ್ಣ್ ವಜ್ರತ್ ಪೊಡಿ ತಿಂದಿತ್ ತಾನೂ ಚೆತ್ತತ್. ಲಿಂಗರಾಜೇಂದ್ರ ಪಿಳ್ಳಾ ಅಂವಂಡ ಪೊಣ್ಣ್ನ ದೊಡ್ಡ



ವೀರರಾಜೇಂದ್ರ ಒಡೆಯಂಡ ಗದ್ದುಗೆರ ಎಡ್ತೆಬರಿಯ ಗದ್ದುಗೆಲ್, ಲಿಂಗರಾಜಂಡ ಮೋಂವ ಚಿಕ್ಕವೀರರಾಜೇಂದ್ರ ಒಡೆಯ ಸಮಾಧಿ ಮಾಡ್‌ಚಿಟ್ಟತ್. ಕೊಡಗ್ ರಾಜಂಗಕ್ ಶಾಸ್ತ್ರೋಕ್ತ ಆಯಿತ್ ಮಂಗಲ ಕೈಚಂಡ ಪೊಣ್ಣಾಳ ಪಿಳ್ಳಾ ಮಂಗಲ ಕೈಚವತ ಪೊಣ್ಣಾಳಳೂ ಅರಮನೆಲ್ ಇಂಜತ್. ಐರೋಪ್ಯ ಚರಿತ್ರೆಕಾರಂಗ ವಜ್ರಪೊಡಿ ತಿಂದಿತ್ ಚತ್ತ ಲಿಂಗರಾಜೇಂದ್ರ ಒಡೆಯಂಡ ಪೊಣ್ಣ್ ರಾಣಿ ಆಯಿತಿಂಜತ್‌ಂದ್, ಅವ ಚಿಕ್ಕವೀರರಾಜೇಂದ್ರ ಒಡೆಯನ ಪಗೆಲ್ ಕಾಂಬ ಇಂಜತ್‌ಂದ್ ಆನಗುಂಡ್ ಅವ ತಾಂಡ ವಡಿಯ ಚತ್ತಪಿಳ್ಳಾ, ತಾನ್ ಚಿಕ್ಕವೀರರಾಜೇಂದ್ರನುಂಡ್ ಕೆಟ್ಟಾನ ಅನುಭವಿಚಿಡುವಾಂಗ್‌ಂಜ ಚಾವದೆ ನಲ್ಲದ್‌ಂದ್ ವಜ್ರ ಪೊಡಿ ತಿಂದಿತ್ ಚತ್ತತ್‌ಂದ್ ಎಳ್ಳಿತ್.

ಲಿಂಗರಾಜೇಂದ್ರ ಒಡೆಯ ಕನ್ನಡ ಪಿಳ್ಳಾ ಹಿಂದೂಸ್ಥಾನಿನ ಚಾಯಿತೆ ಪಡ್‌ಚಿಂಜತ್. ಅಂವ ಕನ್ನಡತ್ ಕವನ ಎಳ್ಳುವ ಇಂಜತ್. ತಾಂಡ ಪೊಣ್ಣ್‌ರ ಮೀದ ಎಳ್ಳಾನ ಕವನತನ್ ಇಳ್ಳಾ ಬೆಚ್ಚಿತ್‌ಂದ್ 1855ತ್ ಕೊಡಗರ ಚರಿತ್ರೆ ಎಳ್ಳಾನ ಡಾ. ಮೂಗ್ಲಿಂಗ್ ಎಣ್ಣುವ.

ನಿಜಗುಣ ಶಿವಯೋಗಿ ಕನ್ನಡತ್ ಎಳ್ಳಾನ 'ವಿವೇಕ ಚಿಂತಾಮಣಿ' ಎಣ್ಣುವ ಕನ್ನಡ ಗ್ರಂಥತನ್ ಲಿಂಗರಾಜೇಂದ್ರ ಸಂಸ್ಕೃತಕ್ ಅನುವಾದ ಮಾಡ್‌ನದ್ ಓರ್ ಶ್ರೇಷ್ಠ ಗ್ರಂಥಾಂಡ್ ವಿದ್ವಾಂಸಂಗ ಎಣ್ಣುವ. ಲಿಂಗರಾಜ ಬೋಟೆ, ಕುದರೆ ಸವಾರಿ, ಗುರಿಕ್ ಬೋಡಿ ಬೆಪ್ಪಾತ್ ದುಂಬ ನೇರ ಕೈಪ ಇಂಜತ್. ಶೂಲತನ್ ಪೆರ್ತ್ ಚಾಯಿತೆ ಬಳ್ಳಸುವ ಇಂಜತ್, ನಲ್ಲ ಮಾವುತ, ನಲ್ಲ ಕುದರೆ ಸವಾರನೆ ಅಲ್ಲತೆ ಎಕ್ಕೋಲು ನಲ್ಲ ಪುರ್‌ಡ್ ಪಿಳ್ಳಾ ಗೆಲುಲೆ ಇಪ್ಪ ಇಂಜತ್. ಮೂಡ್ ಚೆನ್ನಂಗ್ ಕರ್ಪು ರಂಗಲ್ ಇಂಜಕೊ, ಮೂಡ್‌ರ ಭಾವನೆ ನೋಟುವಯಿಂಗಕ್ ಹಿತ ಆಪ ಇಂಜತ್.

ಲಿಂಗರಾಜೇಂದ್ರ ಎಕ್ಕೋಲು ಬೋಳೆಂಜ ಅಂಗಾಲ್‌ಕೆತ್ತನೆ ಓರ್ ಉದ್ಭುತ ಗೌನ್ ಇಟ್ಟಿತ್ ನಡುಕ್ ಓರ್ ಕರ್ತ ಪಟ್ಟರ, ಕೈ ಇಲ್ಲತ ಶರ್ಟ್‌ನ ಇಟ್ಟವ ಇಂಜತ್. ಮಂಡೆಕ್ ಪಟ್ಟರ ತೊಪ್ಪ. ಆಚೇಂಗಿ, ವಿಶೇಷ ನಾಳ್‌ಲ್ ಇಂಗ್ಲೀಷ್ ಸೈನ್ಯಾಧಿಕಾರಿಯಡ ಯೂನಿಫಾರ್ಮ್ ಪಿಳ್ಳಾ ಚೆನ್ನಂಗ್ ಮಾಲ್, ಮುತ್‌ಸರ ಇಡುವ ಇಂಜತ್. ಅಂವ ದರ್ಬಾರ್‌ಲ್ ಅಳತಿತಿಪ್ಪಕ ಓರ್ ಒಡಿಕತ್ತಿನ ಅಂವಂಡ ಎದಿಕೆ ಉಳ್ಳ ಮೇಜಿರ ಕೊಡಿಲ್ ಬೆಚ್ಚವ ಇಂಜತ್. ಅನ್ನನೆ ಸಂಚಾರ ಪೂರ್‌ಡುವಕ ಆ ಕತ್ತಿನ ಪುಡ್‌ಚಂಡ್ ಮಿಳ್ಳಾಲ್ ಪೋಪ ಇಂಜತ್. ಒಡಿಕತ್ತಿ ರಾಜಂಡ ಅಧಿಕಾರತರ್ ಓರ್ ಗುರ್‌ತ್ ಆಯಿತಿಂಜತ್.

ಲಿಂಗರಾಜೇಂದ್ರ ಕಾಲ ಕಾಲಕ್ ಸೆರಿಯಾಯಿತ್ ಚೆನ್ನಂಗ್ ಸಮಾರಂಭ ನಡ್‌ತುವ ಇಂಜಕೊ ಅನಾವಶ್ಯ ಖರ್ಚ್ ಮಾಡುವ ಇಂಜಾಲೆ. ಕೂಟ್‌ಕ್ ಪಣ ಸಂಪಾದನೆಕ್

ಅನ್ಯಾಯತರ ಬಟ್ಟೆಲ್ ಪೋಪ ಇಂಜತ್. ಎಣ್ಣೆಕ ರಾಜ್ಯ ಬುಟ್ಟ್ ಪೋಪಿಂದ್ ಅಪ್ಪಣೆ ಪಡ್ಂದ್ ಪೋಪ ಜನಡ ಪಣತ್‌ನ ತಾಂಡ ಪಾರಕಾರಳುಂಡ್ ಬಲ್‌ಚೆಂಡ್ ಅಯೆಪ ಇಂಜತ್. ಇಲ್ಲೇಂಗಿ ಅಯಿಂಗಳ ಕೊಲ್ಲ್‌ಚಿಟ್ಟಿತ್ ಪಣ ಪಡ್ಂದವ ಇಂಜತ್. ರಾಜಂಡ ಅರಮನೆಲ್ ಅಂವಂಡ ವೈಭವತರ ಪ್ರದರ್ಶನಕ್ 90 ಆನೆಯ, ಸುಮಾರ್ 45 ಕುದರೆಯ ಪಿಳ್ಳಾ ಚೆನ್ನಂಗ್ ನರ್ತಕಿಯಡ ಗುಂಪ್ ಇಂಜತ್. ಚಾವಡಿಕಾರಂದ್ ಕಾಕುವ ಇಂಜ ದಂಡಾಳುವ ಅಂವಂಡ ಅರಮನೆ ಪಿಳ್ಳಾ ಉಕ್ಕಡತ್‌ನ ಪಾರ ಕಾಪ ಇಂಜತ್. ರಾಜ ತಾಂಡ ಅರಮನೆಲ್ ನಲ್ಲ ಪದವಿ ಪಿಳ್ಳಾ ವರ್ಗಕಾರಡ ಕೂಡ ಕೂಡಿಯಾಡುವಾಂಡ ಬದಲ್ ಸೇವಕಂಗಡ ಕೂಡ ಏರ ಇಪ್ಪ ಇಂಜತ್.

ಲಿಂಗರಾಜೇಂದ್ರ ತಾಂಡ ಅಣ್ಣಂಡ ಮೋವ ದೇವಮ್ಮಾಜಿ ಆಳಂಡಿಯ ಕೊಡಗ್ ರಾಜ್ಯತ್‌ನ ಕುತಂತ್ರತ್ ತಾನ್ ಪಡ್ಂದಾನಗುಂಡ್ ದೊಡ್ಡ ವೀರರಾಜೇಂದ್ರಂಗ್ ಅಂವಂಡ ಕಾಲತ್ ಆಪ್ತಂಗಳಾನ ದಾರೆಂಗಿ ತಾಂಗ್ ಕೇಡ್ ಮಾಡೂಂದ್ ಪೋಡಿ ಇಂಜತ್. ಅನ್ನನೆ ತಾನ್ ಸೇವಕಂಗಂಡ ಕೂಡ ಇಪ್ಪಾನುಂಡ್ ಅಯಿಂಗಡ ತಕ್ಕ ಕೇಟಿತ್ ಅಹಂಕಾರಿ, ನಿರ್ದಯಿ ಪಿಳ್ಳಾ ಕ್ರೂರಿ ಆಯಿತಿಂಜತ್. ಈನಗುಂಡ್ ತಾಂಗ್ ದಾಡ ಮೀದ ಅಗ್ಗೇನ ಬಾತ್ ಕೂಡನ್ನೆ ಅಯಿಂಗಳ ತಡ ಮಾಡತೆ ಕೊಲ್ಲ್‌ಚಿಟ್ಟಿರುವ ಇಂಜತ್. ಸುಮಾರ್‌ಕ್ ಅನ್ನತಯಿಂಗಳ ಕುಟುಂಬತೋಡ ಕೊಂದದೂ ಉಂಡ್. ರಾಜಂಗ್ ಸಮ್ಮಂಧಪಟ್ಟ ವಿಷಯತ್ ರಾಜ ಎಣ್ಣೆನದೆ ಕಾನೂನ್, ಶಿಕ್ಷೆ ಆಪ ಇಂಜತ್. ಬೋರೆ ವಿಷಯತ್ ರಾಜಂಡ ಅಧಿಕಾರಿಯ ಅಪರಾಧಕ್ ಒತ್ತನ್ನಕೆ ಶಿಕ್ಷೆ ಕೊಡ್‌ಪ ಇಂಜತ್.

ಲಿಂಗರಾಜೇಂದ್ರಂಡ ಕಾಲತ್ ಸಾಮಾನ್ಯ ಜನತೆ ಸುಖತ್ ಇಂಜತ್. ಅಂವಂಡ ಕಾಲತ್ ಪಡೆ ಇಂಜಾಲೆ. ತಂಗಕ್ ತಿಂಬಕ್ ಬೋಂಡಿಯಾನಾನ ತಂಗಳಾಯಿತ್ ಬೊಳ್‌ತುವ ಇಂಜತ್. ಬೋರೆ ಸಾಮಾನ್ಯನ ಪಕ್ಕತ ಜಿಲ್ಲೆಂಜ ಪಡ್ಂದವ ಇಂಜತ್. ಆ ಕಾಲತ್ ಜನಕ್ ವ್ಯಕ್ತಿ ಸ್ವಾತಂತ್ರ್ಯ ಎಣ್ಣುವಾಂಡ ಕಲ್ಪನೆ ಇಲ್ಲತಿಂಜಕೊ ಪೊರಜಿಲ್ಲೆಕಾರಡ ಸಮ್ಮಂಧ ದುಂಬ ಕಮ್ಮಿ ಇಂಜತ್. ಅಯಿಂಗಡ ಕಷ್ಟ, ಸುಖ ಬೋರೆಯಿಂಗಕ್ ಗೊತ್ತಾಪ ಇಲ್ಲತೆ ತಂಗ ಇಂಜ ಸ್ಥಿತಿಲೆ ತೃಪ್ತಿ ಪಿಳ್ಳಾ ನೆಮ್ಮದಿಲ್ ಇಂಜತ್.



## ಚಿಕ್ಕ ವೀರರಾಜೇಂದ್ರ ಒಡೆಯ

ಲಿಂಗರಾಜೇಂದ್ರ ಒಡೆಯ ಚಿತ್ತದು ಅಂವಂಡ ಒರೇ ಓರ್ ಮೋಂವ ಆಯಿತಿಂಜ ವೀರರಾಜೇಂದ್ರ ಒಡೆಯ ಕೊಡಗುರ ಸಿಂಹಾಸನ ಪತ್ತ್‌ಚಿ. ಅಕ್ಕ ಅಂವಂಗ್ 17 ಬಯತ್. ಚಿರ್ಪತೆ ಅಂವ ತಾಂಡ ಅಪ್ಪಂಡ ಆಸ್ಥಾನತ್ ಇಂಜ ಅಡಿಯತ ಮಟ್ಟತ್ತರ್ ಜನಡ ಕೂಡ ಕೂಡನಾಂಗ್, ಅಂವ ಆಡಳಿತಕ್ ಬಂದಪಿಳ್ಳಾ ಇನ್ನತ ಜನಳುಂಡೆ ಕೂಡಿಯಂಡ್ ದುರಹಂಕಾರಿ, ಕ್ರೂರಿ ಪಿಳ್ಳಾ ಕೇಡ್ ಸ್ವಭಾವಕಾರ ಆಯಿತಿಂಜತ್. ಅರಮನೆರ ವಿದ್ವಾಂಸಂಗ ವಿದ್ಯೆ ಪಡ್‌ಪ್‌ಚಿಟ್ಟಿಕೊ ಪೊರ ಪ್ರಪಂಚತ್ತರ್ ಅರಿವು ಇಲ್ಲತಾಂಗ್ ಅಂವ ತಾನ್ ನಿರಂಕುಶಪ್ರಭು, ತಾಂಗ್ ದಾರೂ ಅಡ್ಡಿ ಬಪ್ಪ ಸಾಧ್ಯೆ ಇಲ್ಲೆಂದ್ ಗೇನ ಮಾಡ್‌ಚಿ. ಇನ್ನತ ಸ್ವಭಾವತ್ತರ್ ರಾಜ ಕೊಡಗಲ್ ಪಟ್ಟಕ್ ಬಂದಾನುಂಡ್ ಜನಕ್ ಸುಖ ಇಂಜಾಲೆ. ಅವು ಅಕ್ಕಾಕಣೆಕ್ ಅನುಭವಿಚಿಟ್ಟಿಂಡ್ ಇಂಜ ಕ್ರೂರ ಆಳ್ವಿಕೆ ಮುಂದರೊಂಜತ್.

ಚಿಕ್ಕ ವೀರರಾಜೇಂದ್ರ ಒಡೆಯಂಡ ಆಳ್ವಿಕೆರ ಆಖೀರಕ್ ಬ್ರಿಟಿಷ್ ತಾಂಡ ರಾಜ್ಯ ಪುಡಿಪಕ್ ಬಪ್ಪಕ್ ಇನ್ನನೆ ದಂಡ್ ಕುರಿ ನಿಷ್ಕರುಣೆಂಜ ತಾಂಗ್ ಆಕತಯಿಂಗಳ ಚಾವ್‌ಚಿಟ್ಟಿತ್ತಂದ್ ಐರೋಪ್ಯ ಚರಿತ್ರಕಾರಂಗ ಎಳ್ಳಿತ್. ಅಪ್ಪಂಡ ಆಡಳಿತತ್ ಅಡ್ಡ ಬಂದಯಿಂಗಳ, ವಿರೋಧಿಯಳೆಲ್ಲ ಚಾವ್‌ಚಿಟ್ಟಿತ್.

ವೀರರಾಜೇಂದ್ರಂಡ ಆಪ್ತ ಸೇವಕ ಬಸವಪ್ಪ. ಇಂವ ಒಕ್ಕಲಿಗಡಾತ್ ಅಡಿಯತ ಜಾತಿ ಆಯಿತಿಂಜತ್. ಅಂವ ರಾಜಂಡ ಕಾಲತ್ ಅರಮನೆರ ನಾಯಿಯಳ ಚಾಕುವಕ್ ಬಂದಂವ. ಸಿಪಾಯಿ, ಜಮದಾರ, ಕಾರ್ಯಕಾರ ಪದವಿನುಂಡ್ ಕೊಡಕ್ ಬಂದಿತ್ ಆಖೀರಕ್ ಲಿಂಗರಾಜೇಂದ್ರಂಡ ಮುಖ್ಯ ದಿವಾನನಾಚಿ. ಬಸವಪ್ಪ ದುಷ್ಟ ಪಿಳ್ಳಾ ಅಹಂಕಾರಿ. ಏದೇ ಕೆಟ್ಟ ಕೆಲಸ ಮಾಡುವಕ್ ಬಯ್ಯಕ್ ನಿಪ್ಪ ಇಂಜಾಲೆ. ಲಿಂಗ ರಾಜೇಂದ್ರಂಡ ಕಾಲತ್ ಅಂವಂಡ ಎಲ್ಲ ಕೆಟ್ಟ ಕಾರ್ಬಾರ್ಕ್ ಇಂವ ಕೈಯಾಳ್ ಆಯಿತಿಂಜತ್. ನೋಟುವಕ್ ದುಂಬ ಎತ್ತರ, ಬಣ್ಣತೆ ಇಂಜ ಬಸವಪ್ಪಂಡ ಓರ್ ಕಾಲ್ ನಡುಬಯತ್‌ಲ್ ಕುಂಟುವಕಾಚಿ. ಆನಗುಂಡ್ ಇಂವಂಡ ವಿರೋಧಿಯ 'ಕುಂಟ ಬಸವ'ಂದ್ ಕಾಕುವ ಇಂಜತ್!

ಚಿಕ್ಕ ವೀರರಾಜೇಂದ್ರ ಪಟ್ಟಕ್ ಬಪ್ಪಾಂಗ್ ಮುಪ್ಪಡೆ, ಬಂದಪಿಳ್ಳಾ ಕುಂಟಬಸವ ರಾಜಂಡ ಕೆಟ್ಟ ಕಾರ್ಬಾರ್ಕ್ ಅನುಕೂಲ ಮಾಡಿಯಂಡ್ ಇಂಜತ್. ಈನಗುಂಡ್ ಚಿಕ್ಕ ವೀರರಾಜೇಂದ್ರ ಒಡೆಯ ಪಟ್ಟಕ್ ಬಪ್ಪಕ್ ಅಂವ ಕುಂಟಬಸವನ ತಾಂಡ ನಾಲ್ ದಿವಾನಂಗಡಾತ್ ಮುಖ್ಯ ದಿವಾನ ಆಯಿತ್ ಮಾಡಿತಿಂಜತ್.

ಕಮ್ಮಿ ಮಟ್ಟತ್ತಂಜ ಮುಖ್ಯ ದಿವಾನ ಪದವಿಕ್ ಎತ್ತನ ಇಂವ ದುರಹಂಕಾರಿ

ಆಯಿತ್ ಕೊಡವ ಪಿಳ್ಳಾ ಬೋರೆ ದಿವಾನಂಗಡ, ಕಾರ್ಯಕಾರಂಗಳ ಎಕ್ಸೋಲು ಪಗಲೆ ಕಾಂಬ ಇಂಜತ್. ಆನಗುಂಡ್ ಅಯಿಂಗಕೂ ಇಂವನ ಕಂಡಕ ಆಪ ಇಂಚ್ಲೆ. ಆಚೇಂಗಿ, ರಾಜಂಡ ಆಪ್ತ ಅನಾನುಂಡ್ ರಾಜಂಡ ಅಧಿಕಾರ ನಡ್ಂದಚ್ಚಕ್ ಕಾಲ ಅವಂಡ ಕೆಟ್ಟ ಕೆಲಸತನ ತಡೆ ಮಾಡುವವು ದಾರೂ ಇಂಚ್ಲೆ. ಇನ್ನತ ದುಷ್ಟಂಡ ಸಲಹೆಂಜ ಚಿಕ್ಕ ವೀರರಾಜೇಂದ್ರ ತಾಂಡ ಪ್ರಚೆಯಡ ಸುಖತನ ಗೇನ ಮಾಡತೆ, ತಾಂಡ ಆಸೆಕೊತ್ತನ್ನೆಕೆ ಮಾಡುವ ಕೂಡ್ಚಿ. ಆನಗುಂಡ್ ಪ್ರಚೆಯ ಚಾವ್, ಕಷ್ಟ ಪಿಳ್ಳಾ ಅವಮಾನತನೆಲ್ಲ ಸಹಿಸಿಯವಂಡಿಯಾಚಿ.

ಚಿಕ್ಕ ವೀರರಾಜೇಂದ್ರ ಒಡೆಯ ಪಟ್ಟಕ್ ಬಂದ ಚೆನ್ನಂಗಿ ದಿನತ್ ತಾಂಡ ರಾಜಪದವಿಕ್ ವಿರೋಧ ಮಾಡುವಾಂದ್ ಬೊತ್ತಿತ್ ರಾಜಕುಟುಂಬತರ್ ಸಮ್ಮಂಧಿಯಡಾತ್ ಚೆನ್ನಂಗಾಳನ ಕೊಲ್ಚಿಟ್ಟತ್. ಇದತ್ ದೊಡ್ಡ ವೀರರಾಜೇಂದ್ರ ಒಡೆಯಂಡ ದಂಡನೆ ಪೋವ ಮುದ್ದಮ್ಮಾಜಿ ಪಿಳ್ಳಾ ಅವಡ ವಡಿಯ ಪಳಬಂಡ ಚೆನ್ನವೀರಪ್ಪನೂ ಇಂಜತ್. ಚಿಕ್ಕವೀರ ಪಟ್ಟಕ್ ಬಪ್ಪಕ, ಚೆನ್ನವೀರಪ್ಪ ದೊಡ್ಡವೀರಪ್ಪಂಡ ಮೋವಳ ಮಂಗಲ ಆನಾಂಗ್ ಅವ ತಾಂಡ ಅಧಿಕಾರಕ್ ಅಡ್ಡಿ ಮಾಡೂಂದ್ ಬೊತ್ತಿಯಂಡ್ ಕೊಲ್ಚಿಟ್ಟತ್ ಕಾಂಬ.

ಅನ್ನನೆ ಚಿಕ್ಕವೀರ ರಾಜೇಂದ್ರ ತಾಂಗ್ ಕೇಡ್ ಮಾಡೂಂದ್ ಸುಯಾಂಕ್ ಕೊಟ್ಟನದೆ ಚೆನ್ನವೀರಪ್ಪ ತಾಂಡ ಕುಟುಂಬಕಾರಡ ಕೂಡೆ ಕೊಡಗ್ ಬುಟ್ಟಿತ್ ಮೈಸೂರ್ ರಾಜ್ಯತ್ ತೆರಿ ದಾಟಿಪೋಚಿ. ಆಚೇಂಗಿ, ಅವಂಡ ದುರಾದೃಷ್ಟತ್ ಅವಂಡ ಉದ್ದೇಶ ಮಣ್ಣ್ ಪಾಲಾಚಿ.

ಚಿಕ್ಕವೀರರಾಜೇಂದ್ರ ಬ್ರಿಟಿಷ್ ಸರ್ಕಾರತರ್ ಕೂಡೆ ಅವಂಡ ಪಂಡೇತ ಕಾಲತ್ಂಜ ನಡ್ತಿಯಂಡ್ ಬಂದ ಸಿನೇತಿಕೆನುಂಡ್ ಇಕ್ಕ ತಾಂಗ್ ಬೋಂಡಿಯಾನನ್ನೆಕೆ ಮಾಡಿಯಂಡತ್. ಅಕ್ಕ ಮೈಸೂರ್ ರಾಜ್ಯತ್ ಕಂಪೆನಿ ಸರ್ಕಾರತರ್ ಪ್ರತಿನಿಧಿ / ರೆಸಿಡೆಂಟ್ ಆಯಿತಿಂಜ ಕೋಲ್ ಸಾಹೇಬಂಗ್ ತಾಂಡ ರಾಜ್ಯತ್ಂಜ ಓರ್ ಬಲ್ಯ ದುಷ್ಕಾರ್ಯ ಮಾಡಿತ್ ಅಹಂಕಾರಿಯಾನ ಓರ್ ರೈತ ತಾಂಡ ಕುಟುಂಬ ಸಮೇತ ಮೈಸೂರ್ ರಾಜ್ಯತನ ಪ್ರವೇಶ ಮಾಡ್ಚಿಂದ್ ಅವಂಡ ಕುಟುಂಬ ಸಮೇತ ಪುಡ್‌ಪ್‌ಚಿಟ್ಟಿತ್, ತಾಂಡ ಸೇವಕಂಗಡ ಪುಡ್‌ತಕ್ ತರೊಂಡೂಂದ್ ಕಾಗದ ಅಯೆಚತ್. ತಾಂಡ ಜನ ಅವಂಡ ಪಕ್ಕ ಪೋಯಿತ್ ತಾಂಡ ಕೋರಿಕೆನ ಅವಂಗ್ ಅರ್ಥ ಮಾಡಿ ಕೊಡ್‌ಪನ್ನೆಕೆಯೂ ಅಯೆಚತ್.

ಕೋಲ್ ಸಾಹೇಬ, ಚೆನ್ನವೀರಪ್ಪನ ಕುಟುಂಬತೋಡೆ ಪಿರಿಯಾಪಟ್ಟತರ್ ಪಕ್ಕ ಪುಡ್‌ಚಿತ್ ಅಯಿಂಗಳೆಲ್ಲ ಕೊಡಗ್ ರಾಜಂಡ ಪುಡ್‌ತಕೆ ಒಪ್ಪ್‌ಚಿಟ್ಟಿತ್ ವಾವಾಸ್

ಕೊಡಗ್ಗರ ಅಯೆಚತ್. ಆಚೇಂಗಿ, ಅಯಿಂಗಲ ಅನ್ನನೆ ಅಯೆಪಕ ಕೋಲ್, ರಾಜಂಗ್ ಕಾಗದ ಎಳ್ಳಿತ್ ಅದತ್ ಚನ್ನವೀರಪ್ಪ ಮಾಡ್‌ನ ಅಪರಾಧ ಪಿಳ್ಳಾ ಅದ್‌ಂಗ್ ರಾಜ ಕೊಡ್‌ಪ ಶಿಕ್ವೆರ ಮೀದ ತಾಂಗ್ ಅರಿಚಿಡೊಂಡೂಂದ್ ಎಣ್ಣೆಚಿ.

ಆಚೇಂಗಿ, ರಾಜ ಕೋಲ್‌ಕ್ ಏದೇ ಜವಾಬ್ ಅಯೆಚಾಲೆ. ಒರೇ ದಿನತ್ ಅವ ಚನ್ನವೀರಪ್ಪ, ಪೊಣ್ಣ್ ಪಿಳ್ಳಾ ಕುಟುಂಬಕಾರ ಎಣ್ಣಕ ಒಟ್ಟು 22 ಜನಳ ಕಾಂತಮೂರ್ನಾಡ್‌ಲ್ ಕೊಲ್ಚಿಟ್ಟಿತ್.

ಇದಾಯಿತ್ ಚೆನ್ನಂಗ್ ಸಮಯತ್ ಬ್ರಿಟಿಷ್ ರೆಸಿಡೆಂಟ್ ರಾಜಂಡ ಕೂಡೆ ಚನ್ನವೀರಪ್ಪಂಡ ವಿಷಯ ಒಂದೂ ಕೇಟಾಲೆ. 1826ತ್ ಬ್ರಿಟಿಷ್ ರೆಸಿಡೆಂಟ್ ಆನ ಕಾಸಮೈಜೋರ್ ತಾಂಡ ಪ್ರತಿನಿಧಿ ಆಯಿತ್ ಕ್ಯಾ.ಮಾಂಕ್ ಮಡಿಕೇರಿಲ್ ರಾಜನ ಕಾಂಬಕ್ ಅಯೆಚತ್. ಆ ನೇರತ್ ಕಾಸ್ ಮೈಜೋರ್, ಕ್ಯಾ. ಮಾಂಕ್‌ರ ಕೂಡೆ ಚನ್ನವೀರಪ್ಪಂಡ ವಿಚಾರತನ ಅರ್‌ಂಜಂಡ್ ಬರೊಂಡೂಂದ್ ಆದೇಶ ಮಾಡ್‌ಚಿ. ಅನ್ನನೆ ಕ್ಯಾ.ಮಾಂಕ್ ರಾಜನ ಚನ್ನವೀರಪ್ಪಂಡ ವಿಷಯ ಕೇಪಕ, ಅವು ಕೊಡಗ್‌ಲ್ ವಾಂತಿ ಕಾಯಿಲ ಆಯಿತಿಪ್ಪಕ ಚತ್‌ಪೋಚಿಂದ್ ಎಣ್ಣೆಚಿ.

ಚಿಕ್ಕವೀರರಾಜೇಂದ್ರ ತಾಂಡ ಆಡಳಿತತರ ಸುರೂಲ್ ಮಾಡ್‌ಚಿಟ್ಟಿ ಕೊಲೆ ಕ್ರಮೇಣ ಕಮ್ಮಿ ಆಯಂಡ್ ಬಾತ್‌ಂದ್ ಐರೋಪ್ಯ ಚರಿತ್ರಕಾರಂಗ ಎಳ್ಳಿತ್. ಕೊಡಗ್ಗರ ಆಖೀರತ ಮೂಂದ್ ರಾಜಂಗ ಪಿಳ್ಳಾ ಅಯಿಂಗಡ ಆಡಳಿತತರ ಮೀದ ಪೇರ್ತ್ ಚಾಯಿತೆ ಅರ್‌ಂಜಿತಿಂಜ ಕುಶಾಗ್ರಮತಿರ ಪಟ್ಟಿ ಡಾ. ಮೂಗ್ಲಿಂಗ್‌ರ ಕೂಡೆ 1854ತ್ ಎಣ್ಣೆನ ಪೋಲೆ ದೊಡ್ಡ ವೀರರಾಜೇಂದ್ರ ಅಂಜಾಯಿರ ಜನಳ ಕೊಲ್ಚಿಟ್ಟಿತಿಂಜತ್!

ಲಿಂಗರಾಜೇಂದ್ರ ಮೂಂದಾತ್‌ಂಜ ಮೂಂದರೆ ಆಯಿರ, ಚಿಕ್ಕವೀರರಾಜೇಂದ್ರ 1500 ಜನಳ ಚಾವ್‌ಚಿಟ್ಟಿತ್. ಆಚೇಂಗಿ, ಆ ಕಾಲತ್ ಸೆರಿಯಾನ ಲೆಕ್ಕತನ ಅರ್‌ಂಜವಕ್ ಅವಕಾಶ ಇಂಜಾಲೆಂದ್ ಡಾ.ಮೂಗ್ಲಿಂಗ್ ಪಿಳ್ಳಾ ಐರೋಪ್ಯ ಚರಿತ್ರಕಾರ ಅಭಿಪ್ರಾಯ ಪಟ್ಟಿತ್.

ಚಿಕ್ಕವೀರರಾಜೇಂದ್ರ ತಾಂಡ ಅಪ್ಪ ಪಿಳ್ಳಾ ಬಲ್ಕಪ್ಪಂಡಚ್ಚಕ್ ಕ್ರೂರಿ ಅಲ್ಲೇಂಗೂ ತಾಂಡ ಪೊಣ್ಣ್ ಪಿರಾಂದ ಬುದ್ಧಿಮಂಡ್ ರಾಜ್ಯತರ ಜನತೆಕ್ ಓರ್ ಶಾಪ ಆಯಿತಿಂಜತ್. ತಾಂಡ ಅಪ್ಪಂಡ ಎಳಿಯ ಪೊಣ್ಣ್‌ನ ತಾಂಡ ಅಂತಃಪುರಕ್ ಕೂಟಿಯಂಡತ್. ಅನ್ನನೆ ತಾಂಡ ಅಂತಃಪುರತ್ ನೂರ್ ಪೊಣ್ಣ್‌ಳ ಇಂಜತ್. ಇದತ್ ಚೆನ್ನಂಗಾಳ್ ನರ್ತಕಿಯ, ಪರಿಚಾಕ್ರಿಕಾರಳೂ ಇಂಜತ್. ಚಿಕ್ಕವೀರರಾಜೇಂದ್ರ ಪೊಣ್ಣ್ ಪಿರಾಂದ ಆನಾನುಂಡ್ ಅವಂಡ ತಡಿರ ತಾಕತ್‌ಕ್ ಪೆತ್ತ ಪೊಣ್ಣ್‌ಳದ ಎದೆಪಾಲ್‌ನ ಒಕ್ಕಚಿ

ಕೂಟಿತ್ ಅದ್‌ನ ಕುಡಿಕ್ಕೊಂಡೂಂದ್ ಅಂವಂಡ ವೈದ್ಯಂಗ ಸಲಹೆ ಮಾಡ್‌ನನ್ನೆ ಕಾಂಬ! ಈನಗುಂಡ್ ಅಂವ ಕೊಡಗುರ ನಲ್ಲ ಕುಟುಂಬತ್‌ರ ಮುತ್ತೈದೆಯ ಪೆತ್ತಿತ್ ತಂಗಡ ಆರೈಕೆ ಆನಪಿಳ್ಳಾ ಮಡಿಕೇರಿಕ್ ಬಂದಿತ್ ಅರಮನೆ ಪಕ್ಕತ ಮನೆಲ್ ವಾಸ ಇಂಜಂಡ್ ತಂಗಡ ಎದೆಪಾಲಾರ ಚೆನ್ನಂಗ್ ಭಾಗತ್‌ನ ರಾಜಂಗ್ ಕೊಡ್‌ಕೊಂಡೂಂದ್ ಅಪ್ಪಣೆ ಮಾಡಿತಿಂಜತ್! ಇಲ್ಲೇಂಗಿ ಅಯಿಂಗಡ ಚಾವು ಗ್ಯಾರಂಟಿ ಇಂಚಾನುಂಡ್ ಪೆತ್ತ ಮುತ್ತೈದೆಯ ತಂಗ, ತಂಗಡ ಪಾಕುಳ್ಳಾಯಡ ಕೂಡೆ ಅರಮನೆಲ್ ವಾಸ ಇಂಜತ್. ಇನ್ನತ ಪೊಣ್ಣಾಳ ಪೊಲಾಕ ಕುಳ್‌ಚಿತ್ ಅರಮನೆರ ಎದಿಕೆ ಕಲ್ಲ್ ಹಾಸಾನ್ ಪಟ್ಟಿಲ್ ಸಾಲಾಯಿತ್ ನಿಂದಂವಂಡಿಂಜತ್. ಕೂಟ್‌ಕ್ ಬೊಳ್ಳಿರ ಕಿಂಡಿಕ್ ಅವು ತಂಗಡ ಪಾಲಾನ್ ಕರಂದಿತ್ ಕೊಡ್‌ಕೊಂಡಿಂಜತ್!

ಚಿಕ್ಕವೀರರಾಜೇಂದ್ರ ತಾನ್ ಉಂಬ, ತಿಂಬಕ್ಕೆಲ್ಲ ಇನ್ನನೆ ಕರಂದ ಎದೆಪಾಲಾನ್ ಕುಡಿಪ ಇಂಜತ್. ಆನಗುಂಡ್ ಅಂವ ಇಷ್ಟಪಟ್ಟ ಪೊಣ್ಣ್ ಅಂವಂಡ ಅಂತಃಪುರಕ್ ಪೋಂಡಿಂಜತ್. ಅಂವಂಡ ಈ ಪೋಲಿತ ಪಿರಂದ್ ಎಚ್ಚಕ್‌ರ ಮಟ್ಟಿಕೆ ಇಂಜತ್ ಎಣ್ಣಕ ಒಮ್ಮತೆ ಅಂವ ತಾಂಡ "ರಾಜ್ಯತ್ ಇಂಜ ಮಂಗಲ ಕಯ್ಯತ ಎಲ್ಲಾ ಮೂಡಿಯಳ ತಾಂಡ ಅರಮನೆಕ್ ಅಯೆಚಿ ತರೊಂಡು. ಅದತ್ ತಾಂಗ್ ಬೋಂಡಿಯಾನಯಿಂಗಳ ಆಯ್ಕೆ ಮಾಡಿಯವಿ"ಂದ್ ಅಪ್ಪಣೆ ಮಾಡ್‌ಚಿ.

ಇನ್ನತ ದುಷ್ಟ ಪಿಳ್ಳಾ ಕೆಟ್ಟ ಅಪ್ಪಣೆ ಕೇಟ ಕೊಡವ ಮೂನಾಲ್ ದಿನತ್ ತಂಗಡ ಮಂಗಲಕಯ್ಯತ ಮೂಡಿ ಕುಳ್ಳಾಯಳಿಲ್ಲ ಮಂಗಲ ಕೈಚಿತ್ ಅಯಿಂಗಡ ವಡಿಯಂಗಡ ಮನೆಕ್ ಅಂವೆಚಿರ್‌ತ್. ಅಕ್ಕ ಅಯಿಂಗಕ್ಕೆಲ್ಲ ಮಂಗಲ ಊಟಕ್ ಬೋಂಡಿಯಾನ ಯಚ್ಚಿ ಕೊಟ್ಟತೆ ಸುಮಾರ್‌ಕ್ ಎಲ್ಲಾರೂ ಬೆಲ್ಲಕುಂಬಳತ್‌ರ ಕರಿ ಮಾಡಿತ್ ಬೆಂದುವಕ್ ತಕ್ಕಾರ ಮಾಡಂಡಿಯಾಚಿಂದ್ ಬಯತಾನ ಓರ್ ವ್ಯಕ್ತಿ ಚೆನ್ನಂಗ್ ಕಾಲಕ್ ಬಯ್ಯ ಎಣ್ಣೆತಿಂಜತ್!

ಈ ವಿಷಯ ಅರಂಜ ಚಿಕ್ಕ ವೀರರಾಜೇಂದ್ರಂಗ್ ದುಂಬ ಚೆಡಿ ಬಾತ್. ಅಂವ ಇನ್ನತ ಮೂಡಿಯಳ ಮಂಗಲ ಕೈಚಿ ಅಪ್ಪಂಗಳೆಲ್ಲ ಕಾಕಿತ್ ಚಾಟಿಲ್ ಪೊಯ್ಯಚಿಟ್ಟಿತ್, ಕೆಮಿನ ಮುರ್‌ಪ್‌ಚಿಟ್ಟಿತ್. ಇದೂ ಪೋರಾಂದ್ ಅಯಿಂಗಳೆಲ್ಲ ಜೈಲ್‌ಕೊಟ್ಟಿತ್ ಶಿಕ್ಷೆ ಕೊಡ್‌ತತ್!

ಈ ಘಟನೆ ಆನಪಿಳ್ಳಾ ರಾಜ ಚೆನ್ನಂಗ್ ಸಮಯ ಪೊಂಗಡ ಸಹವಾಸತ್‌ನ ಬುಟ್ಟಿನ್ನೆ ಕಾಂಬ. ರಾಜಂಡ ಪಕ್ಕತ್ ಇಂಜ ಚೆನ್ನಂಗ್ ಮಹಮ್ಮದೀಯ ಹಕೀಮಂಗ ರಾಜ ನಲ್ಲ ತಾಕತ್‌ಲ್ ಇರೊಂಡುವೇಂಗಿ ಅಂವ ಬ್ರಹ್ಮಚರ್ಯ ಪಾಲನೆ ಮಾಡೊಂಡೂಂದ್ ಸಲಹೆ ಕೊಡ್‌ತತ್. ಆನಗುಂಡ್ ತಾಂಗ್ 30 ಬಯತಾಪಕ ಏದೇ ಪೊಣ್ಣಾಳ್‌ರ ಕೂಡೆ, ಅಚ್ಚಕೆ



ಎನ್ನಂಗ್ ತಾಂಡ ಅಂಜಿ ಪೊಣ್ಣಾಳಡ ಕೂಡೆ ಸಹ ಲೈಂಗಿಕ ಸಮ್ಮಂಧ ಬೆಚ್ಚಂಡಿತಿಂಚ್‌ಲೆಂದ್ ಎಣ್ಣುವ. ಆಚೇಂಗೂ, ರಾಜಂಗ್ ತಾಂಡ ಪೊಣ್ಣ್, ಬೋರೆಯಯಿಂಗಳುಂಡ್ ಅವಂಗ್ 30 ಬಯತಾಕಣೆಕೂ ಮಕ್ಕ ಇಂಚ್‌ಲೆಂದ್ ಎಣ್ಣುವ ವಿಷಯ ನೇರ್!

### ಚಿಕ್ಕವೀರರಾಜೇಂದ್ರಂಡ ಚೆನ್ನಂಗ್ ವಿಚಿತ್ರ ನಡವಳಿಕೆ

ಚಿಕ್ಕವೀರರಾಜೇಂದ್ರ ಏದೇ ಕೆಲಸ ಆಡ್ ತಾಂಗ್ ವಿರೋಧ್ ಆಯಿತ್ ನಡ್‌ಂದಂಡಯಿಂಗ್ ಹಿಂಸೆರ ಮೂಲಕ ಶಿಕ್ಷೆ ಕೊಡ್‌ಪ ಇಂಜತ್. ಅಲ್ಲತೆ ತಾಂಡ ರಾಜ್ಯತ್ ನಡ್‌ಪ ಏದೇ ಸಂಗತಿ ಪೊರರಾಜ್ಯಕ್ ಅದತೂ ಬ್ರಿಟಿಷ್ ಅಧಿಕಾರಿಯಕ್ ಕಟ್ಟಿತನ್ನಕೆ ಪೇರ್ತ್ ಎಚ್ಚರತ್ ಇಪ್ಪ ಇಂಜತ್. ಕೊಡಗ್‌ಕ್ ಬಪ್ಪಕ್ ಚೆನ್ನಂಗ್ ಬಟ್ಟೆ ಇಂಜಿಯೆ. ಅದತ್ ಅಲ್ಲಲ್ಲಿ ಉಕ್ಕಡತ್ ಪಾರಕಾರ ಇಂಜತ್. ಕೊಡಗ್‌ಕ್ ಬಪ್ಪ, ಪೋಪಯಿಂಗ್ ಲೈಸೆನ್ಸ್ ಇರೊಂಡಿಂಜತ್.

ಕೊಡಗ್‌ರ ವೀರರಾಜೇಂದ್ರಪೇಟೆಕ್ ವಾರಕ್ ಒಮ್ಮತೆ ಚಿತ್ತೆಕ್ ಪೆರಿಯಾ ಪಟ್ಟಿತ್‌ಂಜ ವ್ಯಾಪಾರಿಯ ತಂಗಡ ಸಾಮಾನ್‌ನ ಕೊಂಡಬಂದಿತ್ ಇಲ್ಲಿ ಮಾರಿತ್, ಇಲ್ಲಿಂಜ ಪೋಪಕ ಅಕ್ಕಿನ ಎಡ್‌ತಂಡ್ ಪೋಪ ಇಂಜತ್. ಕಾಲಕ್ ಒಮ್ಮತೆ ತೊಲೆಯಾರ್‌ಲಾ ಪೊರರಾಜ್ಯತ್‌ಂಜ ತಲಕಾವೇರಿ ಭಾಗಮಂಡಲಕ್ ಏರ ಕಣಕ್‌ಲ್ ಪ್ರವಾಸಿಯ ಬಪ್ಪ ಇಂಜತ್. ಚಿತ್ತೆಕ್ ಬಂದವು, ಯಾತ್ರೆಕ್ ಬಂದವು ತಂಗ ಏದ್ ಕೆಲಸಕ್ ಬಂದಿತ್ತೊ, ಅದ್‌ನ ಮಾಡಿಯಂಡ್ ಪೋಪಾಂಗ್ ರಾಜಂಡ ಅಡ್ಡಿ ಇಂಚ್‌ಲೆ. ಆಚೇಂಗಿ, ಅವು ಇಲ್ಲಿಯತ ಜನಡ ಕೂಡೆ ಕೂಡಿತ್ ಈ ರಾಜ್ಯ/ರಾಜಂಡ ವಿಷಯತ್ ತಕ್ಕ ಪರೆಯತನ್ನಕೆ ರಾಜಂಡ ಗೂಢಚಾರಂಗ ನೋಟಿಯವ ಇಂಜತ್.

ಕೊಡಗ್‌ಲ್ ಈ ನೇರತ್ ಎಣ್ಣಕ 1824ತ್ ಮ್ಯಾನ್ಯುಯಲ್ ಪಿರೇರ ಎಣ್ಣುವ ಬ್ರಿಟಿಷ್ ರಾಜ್ಯತ್‌ರ ಪ್ರಜೆ ಪಿಳ್ಳಾ ಸ್ಯಾಮ್ಪುಯಲ್ ಜೋಸೆಫ್‌ನ ಚಿಕ್ಕವೀರ ರಾಜೇಂದ್ರ ಜೈಲ್‌ಕ್ ಕೂಟಿತಿಂಜತ್. ಇದತ್ ಸ್ಯಾಮ್ಪುಯಲ್ ಯಹೂದಿ. ಕೊಡಗ್‌ಕ್ ಬಂದ ಚೆನ್ನಂಗಾಳ್ ಕಾಂಗತೆ ಆಪ ಇಂಜತ್. ಇನ್ನತ ಪರಿಸ್ಥಿತಿಲ್ ಮೈಸೂರ್ ಚೆನ್ನೆಲ್ ಇಂಜ



ಅಧಿಕಾರಿಯ ದೊಡ್ಡ ವೀರರಾಜೇಂದ್ರ ಒಡೆಯಂಡ ಮೋವ ಪಿಳ್ಳಾ ಅವಂಡ ಉತ್ತರಾಧಿಕಾರಿ ಆಯಿತ್ ಮಾಡ್‌ನ ದೇವಮ್ಮಾಜಿರ ಭದ್ರತೆರ ಮೀದ ಬೊತ್ತಿಯಂಡಿಂಜತ್.

ಕೊಡಗ್ ರಾಜಂಡ ಪಿಳ್ಳಾ ರಾಜ್ಯಭಾರತ್‌ರ ವಿಷಯ ಕೊಡಗ್‌ಲೆ ಅರಿಯೊಂಡೊಂದ್ ಮೈಸೂರ್‌ಲ್ ರೆಸಿಡೆಂಟ್ ಆನ ಪಿಳ್ಳಾ ಕೊಡಗ್‌ಕೂ ಕಂಪೆನಿ ಸರ್ಕಾರಕೂ ಪ್ರತಿನಿಧಿ ಆಯಿತಿಂಜ ಕಾಸಮ್ಮೆಜೋರ್ 1826ಂಡ ನವೆಂಬರ್‌ಲ್ ಮುದ್ದ್ ಮಡಿಕೇರಿಕ್ ಬಾತ್. ಅವ ರಾಜಂಡ ಮನಸ್ಸನ ನೊಂಬಲ ಪಡ್‌ತುವಾಂಗ್ ಪೇರ್ತ್ ಸಮಧಾನತ್ ಇಂಜತ್. ಈನಗುಂಡ್ ರಾಜ ಅವಂಗ್ ಕೊಡಗ್‌ರ ವಿಷಯ ಒಂದೂ ಗೊತ್ತಿಲ್ಲತನ್ನೆಕೆ ಮಾಡಿತ್ ಅವಂಡ ಉದ್ದೇಶ ನಡೆಕತನ್ನೆಕೆ ಮಾಡ್‌ಚಿ.

ಕೊಡಗ್‌ಲ್ ಅವ ಬೆಂದ್‌ಕ ಆಯಿತ್ ಇಪ್ಪಚ್ಚಕ್ ನೇರ ಅವಂಡ ಕೂಡೆ ತಾಂಡ ಪಾರಕಾರಳ ಪಿಳ್ಳಾ ಗೂಢಚಾರಳ ಆಕಿಯಂಡ್ ತಾಂಡ ರಾಜ್ಯತ್‌ರ ರೈತಂಗಳ ಕಂಡಿತ್ ತಕ್ಕ್ ಪರೆಯತನ್ನೆಕೆ ಎಚ್ಚರ ಎಡ್‌ತಂಡತ್.

ಮಿಳ್ಳಾಲ್ ರಾಜಂಡ ಕಡ್‌ಪ ಸ್ವಭಾವ ಅರ್‌ಂಜಿತಿಂಜ ಜನ ದಾರೂ ಈ ಬ್ರಿಟಿಷ್ ಸರ್ಕಾರತ್‌ರ ಪ್ರತಿನಿಧಿಯಕ್ ಜವಾಬ್ ಕೊಡ್‌ಪ ಧೈರ್ಯತ್ ಇಂಜ್‌ಲೆ. ಕಾಸಮ್ಮೆಜೋರ್ ರಾಜನ ಕೊಡಗ್‌ರ ಮೀದ ಕೇಪಕ ರಾಜ ಅವಂಗ್ ಸೆರಿಕ್ ಉತ್ತರ ಕೊಡ್‌ತ್‌ಲೆ.

"ದೊಡ್ಡ ವೀರರಾಜೇಂದ್ರ ಒಡೆಯಂಡ ಪೊಣ್ಣ್, ಮಕ್ಕ ದೇವಮ್ಮಾಜಿ ಪಿಳ್ಳಾ ಮಹಾ ದೇವಮ್ಮಾಜಿ ಎಲ್ಲಿ ಉಂಡ್?"ಂದ್ ಕೇಪಕ "ಅವು ಮಡಿಕೇರಿ ಅರಮನೆಲ್ ಇಲ್ಲೆ. ದೂರತ ನಾಡ್‌ಲ್ ಉಂಡ್"ಂದ್ ಎಣ್ಣೆಚಿ.

ಅನ್ನನೆ ಕಾಸಮ್ಮೆಜೋರ್‌ಕ್ ಮಡಿಕೇರಿಲ್ ಉಂಡ್‌ಂದ್ ಎಣ್ಣೆನ ಬ್ರಿಟಿಷ್ ಪ್ರಜೆ ಮ್ಯಾನ್ಯುವಲ್ ಪಿರೇರಾನ ಸಹ ನೋಟುವಕ್ ಸಾಧ್ಯ ಆಯಿಲೆ. ಆನಗುಂಡ್ ಅವ ಮಡಿಕೇರಿಕ್ ಬಂದ ನೇರತ್ ಪೇರ್ತ್ ಅಸಮಧಾನತ್ ಮೈಸೂರ್‌ಕ್ ವಾಪಾಸಾಚಿ. ಆಚೇಂಗೂ, ಚಿಕ್ಕ ವೀರರಾಜೇಂದ್ರ ಒಡೆಯಂಡ ಮೀದ ಅವಂಗ್ ನಲ್ಲ ಅಭಿಪ್ರಾಯ ಇಂಜತ್.

ತಾಂಡ ಕೊಡಿಯತ ಅಧಿಕಾರಿಯಕ್ ರಾಜಂಡ ವಿಷಯತ್ ಎಳ್ಳೊನ ಕಾಗದತ್ ಚಿಕ್ಕ ವೀರರಾಜೇಂದ್ರ ಬ್ರಿಟಿಷ್ ಸರ್ಕಾರತ್‌ನ ಕುಶಿ ಪಡ್‌ತ್‌ವಕಾಯಿತ್ ಕಳ್‌ಚಂಡ್ ಉಳ್ಳನ್ನೆಕೆ ಕಂಡತ್. ದುಂಬ ಬುದ್ಧಿಕಾರಂಡನ್ನೆಕೆ ಕಾಟಿಯಂಡತ್. ಪ್ರಪಂಚತ್‌ರ ವಿಷಯ ಅರ್‌ಂಜವಕ್ ಪುರ್‌ಡ್ ಉಳ್ಳ ಅವ ಮಿಳ್ಳಾಕ್ ನಲ್ಲ ಮನುಷ್ಯ ಆಪ ನಂಬಿಕೆ



ಉಂಡ್‌ಂದ್ ಎಳ್ಳೆಚಿ.

ಕಾಸಮೈಚೋರ್ ಮೈಸೂರ್‌ಕ್ ಪೋನ ಚೆನ್ನಂಗ್ ಸಮಯತ್ ಅಂವಂಗ್ ಚಿಕ್ಕ ವೀರರಾಜೇಂದ್ರ ಒಡೆಯ ಕೊಡಗ್‌ಲ್ ತಾಂಗ್ ಆಕತಯಿಂಗಳ ಗೆಡಿ ಗೆಡಿ ಕೊಲ್ಲೆಚಿಟ್ಟಿಂಡ್ ಉಂಡ್ ಎಣ್ಣುವ ವರ್ತಮಾನ ಎತ್ತಚಿ. ಕೊಡಗ್‌ಂಜ ದಾರೂ ಪೊರ್‌ಮೆ ಪೋಪಕಯ್ಯಾಂಡ್ ರಾಜ ಅಜ್ಜೆ ಮಾಡಿತಿಂಜಕೊ ಚೆನ್ನಂಗಾಳ್ ಅಪರೂಪವಾನ ಕಾಡ್ ಬಟ್ಟೆಕಾತೆ ಕೊಡಗ್‌ರ ತೆರಿ ದಾಟಿತ್ ಪೋವ ಇಂಜತ್. ಓರಮ್ಮತೆ ಕೊಡಗ್‌ರ ದಿವಾಂಗ ರಾಜಂಗ್ ಗೊತ್ತಾಕತನ್ನಕೆ ತಂಗಡ ಪರಿಚಯತ್‌ರ ಚೀಟಿನ ತಂಗಕ್ ಬೋಂಡಿಯಾನಯಿಂಗಳ್ ಕೊಡ್‌ಪ ಇಂಜತ್. ಉಕ್ಕಡತ್‌ರ ಪಾರಕಾರ, ದಿವಾನಂಗ ಕೊಡ್‌ತ ಚೀಟಿನ ಕೇಟಂಡ್ ಜನಳ ಪೊರ್‌ಮೆ ಪೋಪಕ್ ಬುಡುವ ಇಂಜತ್. ಅಲ್ಲಿಂಜ ಆ ಬಟ್ಟೆನೆ ಇಲ್ಲತನ್ನಕೆ ಮಾಡಿರುವ ಇಂಜತ್. ಇನ್ನನೆ ಕೊಡಗ್‌ಂಜ ಮೈಸೂರ್‌ಕ್ ಪೋನಯಿಂಗಳುಂಡ್, ಇಲ್ಲೇಂಗಿ ಅಯಿಂಗಳುಂಡ್ ಅರ್‌ಂಜಯಿಂಗಳುಂಡ್ ಮೈಸೂರ್‌ಲ್ ಇಂಜ ಬ್ರಿಟಿಷ್ ಅಧಿಕಾರಿಯ ಕೊಡಗ್‌ರ ಸುದ್ದಿನ ಅರ್‌ಂಜವ ಇಂಜತ್.

ಕೊಡಗ್‌ಲ್ ಗೆಡಿ ಗೆಡಿ ನಡಪ ಇಂಜ ಕೊಲೆರ ಸುದ್ದಿನ ಮೈಸೂರ್ ರೆಸಿಡೆಂಟ್‌ರ ಮೂಲಕ ಅರ್‌ಂಜ ಚೆನ್ನೈ ಗವರ್ನರ್ ಮೈಸೂರ್ ರೆಸಿಡೆಂಟ್ ಕಾಸಮೈಚೋರ್‌ಕ್ ಕೊಡಗ್‌ರ ರಾಜನುಂಡ್ ಅಂವ ಅಂವಂಡ ರಾಜ್ಯತ್ ಕೊಡ್‌ಪ ಶಿಕ್ಷೆ, ಮರಣ ದಂಡನೆರ ವಿವರತನ ಪ್ರತಿಯೋರ್ ಸಂದರ್ಭತ್ ಕೇಕೊಂಡೂಂದ್ ಆದೇಶ ಕೊಡ್‌ತತ್.

ಇದ್‌ನ ಕಾಸಮೈಚೋರ್ ರಾಜಂಗ್ ಅರ್‌ಚಿಡುವಕ ಚಿಕ್ಕವೀರರಾಜೇಂದ್ರ ಇನ್ನತ ಆದೇಶ ತಾಂಡ ಸರ್ವಾಧಿಕಾರಿಕ್ ತೊಂದರೆ ಆಪಾಂಡ್ ಕೂತ್‌ಕೊಡ್‌ತತ್. ಆಚೇಂಗಿ, ಕಂಪೆನಿ ಸರ್ಕಾರ ಗೆಡಿ ಗೆಡಿ ರಾಜಂಗ್ ರಾಜ್ಯತ್ ಆಪ ಮರಣ ದಂಡನೆ ಪಿಳ್ಳಾ ಬೋರೆ ಶಿಕ್ಷೆರ ವರದಿ ಅಯಿಕ್ಕೊಂಡೂಂದ್ ಎಳ್ಳೆಚಿ. ಆಚೇಂಗೂ, ರಾಜ ಮನ್ನಣೆ ಕೊಡ್‌ತಲೆ. ಅನ್ನನೆ ಕಂಪೆನಿ ಸರ್ಕಾರ ರಾಜನ ತಿರಿತ್ ಜವಾಬ್ ತರೊಂಡೂಂದ್ ಒರಾತ ಮಾಡ್‌ಲೆ.

ಚಿಕ್ಕವೀರರಾಜೇಂದ್ರ ತಾಂಡ ರಾಜ್ಯತ್‌ರ ಪ್ರಜೆಯಳ ಕರುಣೆಲ್ ಕಾಂಬ ಇಂಜತ್. ಅವು ಕೊಡ್‌ಕಂಡಿಯ ಭೂಮಿರ ಕಂದಾಯ ಕಮ್ಮಿ ಇಂಜತ್. ಆಚೇಂಗಿ, ಅವು ರಾಜಂಡ ಕೋಟೆಲ್, ಅರಮನೆಲ್ ಪನ್ಪ ಎಣ್ಣಕ ರಾಜಂಗ್ ಕೂಡ್‌ನ ಭೂಮಿ ಪಿಳ್ಳಾ ತೋಟತ್ ಬಿಟ್ಟಿ ಎಣ್ಣಕ ಸಂಬಳ ಇಲ್ಲತ ಚಾಕ್ರಿ ಮಾಡೊಂಡಿಂಜತ್.

ಇನ್ನತ ಬಿಟ್ಟಿ ಚಾಕ್ರಿ ಪೇರ್ತ್ ಕಷ್ಟ ಆಯಿತ್ ಜನ ರಾಜಂಡ ಮೀದ ಅಸಮಧಾನ ಪಟ್ಟಿತ್. ರಾಜ ಆನೆ ಬೋಟೆ ಪಿಳ್ಳಾ ಬೋರೆ ಕಾಡ್‌ಜಾತಿಯಡ ಬೋಟೆಕ್ ಪೋಪಕ ಆಯಾಯ ನಾಡ್‌ರ ಜನ ರಾಜಂಡ ಕೂಡೆ ಇಂಜಂಡ್, ರಾಜ ಅಳ್‌ತ ಜಾಗಕ್ ಆನೆ

ಪಿಳ್ಳಾ ಜಾತಿಯಳ ಓಡ್‌ಚಿಟ್ಟಂಡ್ ಬರೊಂಡಿಂಜತ್. ರಾಜಂಡ ಅಪ್ಪಣೆ ಇಲ್ಲತೆ ಅವು ಆನೆರ ಮೀದ ಬೊಡಿ ಬೆಪ್ಪದಾಡ್, ಬೋರೆ ಏದೇ ಆಯುಧ ಬಳಸುವನ್ನಕೆ ಇಂಜಾಲೆ.

ಜನ ಆನೆರ ಸುತ್ತ ಬೇಲಿರನ್ನಕೆ ನಿಂದವಂಡು. ಅನ್ನನೆ ನಿಪ್ಪಕ ತಂಗಡ ಕೈ, ಕಾಲಾನ ಆಟತೆ ಆಯುಧತಾನ ನೇರೆ ನೇತಿ ಪುಡ್‌ಚಿವಂಡು. ಅಕ್ಕ ಕಾಡ್‌ಲ್ ಉಂಬುಳು ಚೋರೆ ಊತ್‌ನಕೊ, ಕೋಟತ್ ಶೀತ ನೆಲತ್ ನಿಂದಂಡ್ ಕೈ, ಕಾಲ್ ಮರಕೆಟ್ಟಿಪೋನಕೊ, ನಿಂದಲ್ಲೆ ನಿಂದಿತ್ ನೊಂಬಲ ಪಟ್ಟಿಕೊ ನಿಂದ ಜಾಗತ್‌ಂಜ ಅಲ್ಲಾಡುವನ್ನಕೆ ಇಂಜಾಲೆ!

ಅಕಸ್ಮಾತ್ ನಿಂದಲ್ಲಿಂಜ ಅಲ್ಲಾಡ್‌ನಕ ರಾಜಂಡ ಕಡ್‌ಪ ಶಿಕ್ಷೆ ಆಪ ಇಂಜತ್. ಆನಗುಂಡ್ ರಾಜ ಬೋಟೆಕ್ ಪೋಪ ಎಣ್ಣಕ ಜನಕ್ ಶಿಕ್ಷೆರ ಲೆಕ್ಕ. ಆನಗುಂಡ್ ಜನಕ್ ರಾಜಂಡ ಆನೆ ಬೋಟೆ ಪಿಳ್ಳಾ ಜಾತಿಯಡ ಬೋಟೆ ಎಣ್ಣಕ ಬುಡ್‌ಂಜಿ ಪೋಯಿತಿಂಜತ್.

ಒಮ್ಮೆ 1828ತ್ ಕೊಡಗರ ತೆರಿರ ಪಕ್ಕ ಮೈಸೂರ್ ರಾಜ್ಯತ್ ಓರ್ ಬತ್ತನಕೆರೆರ ಅಡಿಲ್ ಓರ್ ಆನೆ ಮೈಸೂರ್ ರಾಜ ಪಿಳ್ಳಾ ಅವಂಡ ಕೂಟ್‌ಕಾರಳುಂಡ್ ತಪ್ಪಿಚಿಟ್ಟಂಡ್ ಕೊಡಗ್‌ಕ್ ಬಾತ್. ಅಕ್ಕ ಚಿಕ್ಕವೀರರಾಜೇಂದ್ರ ತಾಂಡ ರಾಜ್ಯತ್‌ರ ನಾಪದ್ ಜನಕ್ ಆ ಆನೆನ ಸುತ್ತ ಇಟ್ಟಿಂಡ್ ತಾಂಡ ಬೋಟೆಕ್ ಓರ್ ಜಾಗತ್‌ನ ನಿರ್ಕ್ ಪಡ್‌ತೊಂಡೂಂಡ್ ಕಟ್ಟಪ್ಪಣೆ ಮಾಡ್‌ಚಿ. ಆಚೇಂಗೂ ಆನೆ ಜನಳುಂಡ್ ತಪ್ಪಿಚಿಟ್ಟಂಡ್ ಯಾಲೆಯೊ ಪೋಯಿರ್‌ತ್.

ಅಕ್ಕ ರಾಜ ಆ ನಾಪದ್ ಜನಕ್ ಗೊತ್ತಮಾಡ್‌ನ ನೇರತ್‌ರ ಒಳ್‌ಲ್ ಆನೆನ ಬೋಟೆಕ್ ಕೊಂಡ ಬರತೆ ಪೋನಕ ನಾಪದ್ ಜನಳ ಮಂಡ ಕೆತ್ತುವಿಂದ್ ಎಣ್ಣೆಚಿ.

ಜನಡ ದುರಾದೃಷ್ಟಕ್ ಆನೆ ಕೊಟ್ಟಲೆ. ಅಯಿಂಗಳೆಲ್ಲ ರಾಜ ಚಾವ್‌ಚಿಟ್ಟತ್. ಇದಾಯಿತ್ ಮೂಂದ್ ದಿನತ್ ಈ ಆನೆ ಪುತ್ತೂರ್‌ಲ್ ಕಾಂಬ್‌ಚಿಟ್ಟಂಡ್ ಕೊಡಗ್ ರಾಜಂಡ ಪಕ್ಕ ಬಾತ್. ಆಚೇಂಗಿ, ಬೋರೆ ಬೋರೆ ಜಾಗತ್ ಜನ ಮುತ್ತಿಯಂಡ್ ಅದ್‌ಂಗ್ ಆನ ಗಾಯತ್‌ನುಂಡ್ ಮಡಿಕೇರಿಕ್ ಬಂದನ್ನಕೆ ಅದ್ ಚತ್‌ಪೋಚಿ.

ಇನ್ನೊಮ್ಮೆ ರಾಜ ಬೋಟೆಕ್ ಪೋನಲ್ಲಿ ಒಬ್ಬ ತೋಕ್ ಪುಡಿಪಕ ಆಂಡ ಕೊಳ ರಾಜಂಡ ಬರಿಕ್ ಇಂಜತ್. ಅವ ಅರಿಯತೆ ರಾಜಂಡ ಬರಿಕ್ ಪುಡ್‌ಚತೊ, ಇಲ್ಲೆ ಬೋರೆ ಏದೇಂಗಿ ಪಕ್ಷಿರ ಬರಿಕ್ ಗುರಿ ಬೆಚ್ಚಿಂಡ್ ಪುಡ್‌ಚತೊ ಗೊತ್ತಾಪುಲೆ. ಆಚೇಂಗಿ, ರಾಜ ಮಾತ್ರ ಅವ ತಾಂಡ ಬರಿಕ್ ಬೋಂಡೂಂದೆ ಬೊಡಿ ಬೆಪ್ಪಕ್ ಕೊಳ ಕಾಟಿಯೆಂಡ್ ಅವನ ಅಕ್ಕಲೆ ಕೊಲ್‌ಚಿಟ್ಟತ್!

ರಾಜ ಕುಂಟಬಸವಂಡ ತಕ್ಕೊರನ್ನಕೆ ಅಬ್ಬಾಸ್ ಆಲಿ ಎಣ್ಣುವ ಇನ್ನೊರ್

ಕೆಟ್ಟಬುದ್ಧಿರ ಸಿನೇತಂಡ ತಕ್ಕನ ಕೇಟಿತ್ ಕೊಡಗ್ಗರ ಚೆನ್ನಂಗ್ ಮುಕ್ರಿಯಳ ವಿರೋಧ ಕೆಟ್ಟಿಯಂಡತ್. ಅವು ತಾಂಡ ಎದಿಕೆ ಇಲ್ಲೇಂಗೂ ಮರೆಲ್ ತಾಂಗ್ ಕೆಟ್ಟಿದ್ ಮಾಡೂಂದ್ ರಾಜಂಗ್ ಅಗ್ಗೇನ ಇಂಜತ್. ಅನ್ನನೆ ರಾಜ ತಂಗಕ್ ಕೇಡ್ ಮಾಡುವಾಂದ್ ಬೊತ್ತಿತ್ ಚೆನ್ನಂಗಾಳ್ ಓರಮ್ಮತೆ ಕೊಡಗ್ಗಂಜ ದಾರ್ಕೂ ಅರಿಯತನ್ನಕೆ ಪೋಪ ಇಂಜತ್.

1832ತ್ ಕೊಡಗ್ಗರ ನಾಗ ಎಣ್ಣುವಂವ ಕೊಡಗ್ ಬುಟ್ಟಿತ್ ಪೋನಲ್ಲಿ ಚಿಕ್ಕ ವೀರರಾಜೇಂದ್ರ ಒಡೆಯ, ನಾಗಂಡ ಓರ್ ರೂಪು ಮಾಡಿತ್ ಮಡಿಕೇರಿಲ್ ಅದ್‌ಂಗ್ ಬೊಡಿ ಬೆಪ್ಪಾಚಿಟ್ಟಿತ್. ಆಚೇಂಗಿ, ಅಂದ್ ಕಾಲತ್ ಇನ್ನತ ರೂಪುಕ್ ಬೊಡಿ ಬೆಪ್ಪದ್ ಪೇರ್ತ್ ಅಪರೂಪ ಆಯಿತಿಂಜಾಂಗ್ ಇದ್ ಜನಕ್ ವಿಶೇಷ ಆಯಿತ್ ಕಂಡಿತಿಕ್ಕು. ಮೈಸೂರ್ ರೆಸಿಡೆಂಟ್ ಕಾಸಮೈಜೋರ್‌ಕ್ ಕೊಡಗ್ಗರ ರಾಜಂಡ ಇನ್ನತ ವಿಪರೀತ ಕೆಲಸತರ ಮೀದ ಸುದ್ದಿ ಎತ್ತುವಕ ಪಂಡ್ ದೊಡ್ಡ ವೀರ ರಾಜೇಂದ್ರಂಡ ಮಂಡೆ ಕೆಟ್ಟಿನ್ನಕೆ ಚಿಕ್ಕವೀರರಾಜೇಂದ್ರಂಡ ಮಂಡೆ ಕೆಟ್ಟಿತಿಕ್ಕು ಕಾಂಬಾಂದ್ ಅಗ್ಗೇನ ಪಟ್ಟಿತ್!

## 1832ತ್ ಕೊಡಗ್ಗಂಜ ಚನ್ನಬಸಪ್ಪ ಪಿಳ್ಳಾ ದೇವಮ್ಮಾಜಿ

### ಮೈಸೂರ್ ರಾಜ್ಯಕ್ ಪೋಪಕ್ ಮೊಳಿ

1832ತ್ ಕೊಡಗ್ಗರ ರಾಜ ಚಿಕ್ಕವೀರರಾಜೇಂದ್ರ ಒಡೆಯಂಗೂ, ಕಂಪೆನಿ ಸರ್ಕಾರಕೂ ವಿರೋಧ ಬೊಳ್‌ಂದಿತ್ ಅದ್ ಮಿಳ್ಳಾಕ್ ರಾಜಂಗ್ ಕೆಟ್ಟಿದ್ ಮಾಡ್‌ಚಿ. ಅದೇ ಕಾಲ ಸೆಪ್ಟೆಂಬರ್ ತಿಂಗತ್ ಕಾಸಮೈಜೋರ್ ಚೆನ್ನೈರ ಪೋರ್ಟ್ ಸೈಂಟ್ ಜಾರ್ಜ್ ಸರ್ಕಾರತರ ಎಣ್ಣುಕ ಚೆನ್ನೈರ ಕಂಪೆನಿ ಸರ್ಕಾರ ಮುಖ್ಯ ಕಾರ್ಯದರ್ಶಿಕ್, ತಾಂಡ ಬಂಗಲೆಲ್ ಚನ್ನಬಸಪ್ಪ ಎಣ್ಣುವಂವ ಕೊಡಗ್ ರಾಜಂಡ ಸೋದರಿ ಪಿಳ್ಳಾ ಅಂವಂಡ ಪೊಣ್ಣ್ ದೇವಮ್ಮಾಜಿ ನೆಲೆ ಪಡ್‌ಂದಿತ್‌ಂದ್, ಅಯಿಂಗಡ ಜಿಂವ ಪಿಳ್ಳಾ ರಕ್ಷಣೆಕಾಯಿತ್ ಕೊಡಗ್ಗಂಜ ತಪ್ಪಾಚಿಟ್ಟಿಂಡ್ ಬಂದಿತ್‌ಂದ್ ಬ್ರಿಟಿಷ್ ಸರ್ಕಾರತರ ರಕ್ಷಣೆ ಬೋಡಿಯಂಡ್ ಉಂಡ್‌ಂದ್ ಕಾಗದ ಎಳ್ಳಿಚಿ.

ಚನ್ನಬಸಪ್ಪ ರೆಸಿಡೆಂಟ್‌ರ ಕೂಡೆ "ಚಿಕ್ಕವೀರರಾಜೇಂದ್ರ ತಾಂಡ ಪೊಣ್ಣ್‌ನ ಇಷ್ಟಪಟ್ಟಿತ್. ನಾಡ ಪೊಣ್ಣ್ ರಾಜನ ಇಷ್ಟಪಡತೆ ಪೋನಕ ಬಪ್ಪ ಶಿವಪಾದರೆಲ್ ಅವಳ

ಕೊಲ್ಲಾಚಿಡುವಿಂದ್ ಬೊತ್ತಾಚಿಟ್ಟಿತ್"ಂದ್ ರಾಜಂಡ ಮೀದ ಪುಕಾರ್ ಮಾಡ್‌ಚಿ. ಚನ್ನಬಸಪ್ಪ ಬ್ರಿಟಿಷ್ ಅಧಿಕಾರಿಯಡ ನಂಬಿಕೆ ಪಡ್‌ಂದವಕ್ ಕೊಡಗ್ ರಾಜಂಡ ಮೀದ ಈ ಪೊಟ್ವ್ ಸುದ್ದಿ ಮಾಡ್‌ಚಿ. ಆಚೇಂಗಿ, ಬ್ರಿಟಿಷ್ ಅಧಿಕಾರಿಯ ಇದತ್ ನೇರ್ ಇಲ್ಲೆಂದ್ ಅರ್‌ಂಜತ್.

ಲಿಂಗರಾಜೇಂದ್ರ ಒಡೆಯ ಚನ್ನಬಸಪ್ಪಂಗ್ ಅವಂಡ ಸುರೂವೆತ ಪೊಣ್ಣ್ ಮುದ್ದಮ್ಮಾಚಿ ಚತ್‌ಪೋನಪಿಳ್ಳಾ ತಾಂಡ ದಂಡನೆ ಮೋವ ದೇವಮ್ಮಾಚಿನ ಮಂಗಲ ಕೈಚಿ ಕೊಡ್‌ತಿತಿಂಜತ್. ಅಕ್ಕ ಚನ್ನಬಸಪ್ಪ ಪೊಣ್ಣ್‌ರ ಕೂಡೆ ಪೊರಮಲೆ ಪನ್ಯತ್ ಇಂಜತ್. ದೇವಮ್ಮಾಚಿ ಕಳಕೇರಿ ನಿಡುಗಣೆ ಪನ್ಯತ್‌ರ ವಾತಾವರಣಕ್ ಒಗ್ಗತೆ ಪೋನಾಂಗ್ ಲಿಂಗ ರಾಜೇಂದ್ರ ಒಡೆಯ, ಚನ್ನಬಸಪ್ಪ ಪಿಳ್ಳಾ ದೇವಮ್ಮಾಚಿಕ್ ಅಪ್ಪಂಗಳ ಅರಮನೆ ಪಿಳ್ಳಾ ಭೂಮಿನ ಕೊಡ್‌ತಿತ್ ಅಯಿಂಗಳ ಅಲ್ಲಿಯೆ ಆಕ್‌ಚಿ.

ಲಿಂಗರಾಜೇಂದ್ರ ಚತ್ತಪಿಳ್ಳಾ ಚನ್ನಬಸಪ್ಪ ತಾಂಡ ಪೊಣ್ಣ್ ಪಿಳ್ಳಾ ಪರಿವಾರತ್‌ರ ಕೂಡೆ ಮೂನಾಲ್ ಕಾಲ ಅಪ್ಪಂಗಳತ್ ಸುಖತ್ ಇಂಜನ್ನಕೆ ಕಾಂಬ. ಈ ನೇರತ್ ರಾಜ ತಾಂಡ ದುಷ್ಟ ಸಿನೇತ ದಿವಾನ್ ಕುಂಟಬಸವ ಪಿಳ್ಳಾ ಅಬ್ಬಾಸ್ ಆಲಿರ ತಕ್ಕ ಕೇಟಂಡ್, ಕೊಡಗ್ ಮುಕ್ರೀರ ಕೂಡೆ ಪೇರ್ತ್ ಅಪಂಕಾರತ್ ನಡ್‌ಂದಂಡ್ ಅಯಿಂಗಡ ಪ್ರೀತಿನ ಕಳೊಂದಂಡತ್. ಅಯಿಂಗಕ್ ರಾಜಂಡ ಮೀದ ಬಹಿರಂಗ ಆಯಿತ್ ವಿರೋಧ ಕಾಟುವಕ್ ಧೈರ್ಯ ಇಂಚ್‌ಲೇಂಗೂ ಒಳೀಯ ಅವಂಡ ಮೀದ ಬುಡ್‌ಂಜಿ ಪೋನನ್ನಕೆ ಇಂಜತ್. ಚನ್ನಬಸಪ್ಪ ಕೊಡಗರ ಮುಕ್ರಿಯಡಾತ್ ಏರ ಜನಕ್ ರಾಜಂಡ ಮೀದ ಪಗೆ ಉಂಡ್‌ಂದ್ ಅರ್‌ಂಜಿತ್ ತಾನ್ ಆ ಮುಕ್ರಿಯಡ ಸಪೋರ್ಟ್ ಪಡ್‌ಂದ್ ರಾಜನ ಸಿಂಹಾಸನತ್‌ಂಜ ಉಳ್‌ಪೊಂಡೂಂದ್ ಗೇನ ಮಾಡ್‌ಚಿ. ಈಂಗಾಯಿತ್ ಅವ ಆದ್ಯ ತಾಂಡ ಚನ್ನಂಗ್ ಆಪ್ತಂಗಡ ಕೂಡೆ ಇದ್‌ನ ಎಣ್ಣಿಯಂಡತ್ ಕಾಂಬ. ಚನ್ನಬಸಪ್ಪ ರಾಜಂಡ ತಂಗಿನ ಮಂಗಲ ಆಯಿತ್ ಲಿಂಗಾಯತ ಆನಕೊ, ಪುಟ್ಟುಪಕ ಕೊಡವ! ಆನಗುಂಡ್ ಅವಂಗ್ ಕೊಡವ ಮುಕ್ರಿಯಡಾತ್ ಚನ್ನಂಗಾಳ್‌ರ ಸಪೋರ್ಟ್ ಇಂಜತ್. ಚನ್ನಬಸಪ್ಪಂಡ ಅಣ್ಣ ಮುದ್ದಯ್ಯ ರಾಜಂಡ ಆಪ್ತ ಮುನ್ನಿ ಆಯಿತಿಂಜತ್.

ಚನ್ನಬಸಪ್ಪಂಗೂ, ಚಿಕ್ಕವೀರರಾಜೇಂದ್ರಂಗೂ ಪಟ್ಟಕ್ ಬಂದಪಿಳ್ಳಾ ಸೆರಿ ಆಯಿಲೆ ಕಾಂಬ. ಚನ್ನಬಸಪ್ಪ ಗೆಡಿಗಡಿ ರಾಜಂಡಲ್ಲಿಕ್ ಪೋಪ ಇಂಚ್‌ಲೆ ಪಿಳ್ಳಾರಾಜಂಡ ಕೂಡೆ ಗೌರವತ್ ನಡ್‌ಂದವ ಇಂಚ್‌ಲೆ. ಈನಗುಂಡ್ ರಾಜ, ಚನ್ನಬಸಪ್ಪಂಡ ಕೂಡೆ ಚೆಡ್‌ಂಜಂಡ್ ಅವಂಡ ಪೊಣ್ಣ್ ಪಿಳ್ಳಾ ತಾಂಡ ತಂಗಿ ದೇವಮ್ಮಾಚಿ ಅಪ್ಪಂಗಳತ್‌ಂಜ ಮಡಿಕೇರಿ ಅರಮನೆಕ್ ಬಪ್ಪಕ, ಅವಳ ವಡಿಯಂಡ ಪಕ್ಕ ಅಯೆಕತೆ ಮಡಿಕೇರಿ ಅರಮನೆಲೆ ಚೆನ್ನಂಗ್ ಕಾಲಕೆತ್ತನೆ ಆಕಿತಿಂಜತ್. 1830ತ್

ಅವ ಅಪ್ಪಂಗಳಕ್ ವಡಿಯಂಡ ಪಕ್ಕ ಪೋಚಿ. ರಾಜ ತಾಂಡ ತಂಗಿನ ಚನ್ನಬಸಪ್ಪಂಡ ಪಕ್ಕ ಅಯೆಚಕೊ ಅಯಿಂಗಡ ಸಮ್ಮಂಧ ಚಾಯಿತೆ ಇಂಚಾಲೆ.

ಈ ನೇರತ್ ರಾಜ ಚನ್ನಬಸಪ್ಪಂಡ ಆಪ್ತಂಗಳಾನ ನಾಲ್ ಜನಳ ಕೊಲ್ಚಿಟ್ಟಿತ್. ತಾಂಡ ಆಪ್ತಂಗಡ ಕೊಲೆನುಂಡ್ ಚನ್ನಬಸಪ್ಪಂಗ್ ರಾಜಂಡ ಮೀದ ಇಂಜ ಪಗೆ ಇಳ್ಳಾ ಅಧಿಯಾಚಿ.

1832ತ್ ಚನ್ನಬಸಪ್ಪ ಅಂವಂಡ ಅಣ್ಣ ಮುದ್ದಯ್ಯ, ಬೋಪಣ್ಣ ಪಿಳ್ಳಾ ಬೋರೆ ಚನ್ನಂಗ್ ಕೊಡವ ಮುಕ್ರಿಯಳ ಕೂಟಿಯಂಡ್ ರಾಜನ ಪಟ್ಟಿತ್ಂಜ ಉಳ್ಳಾಪಿತ್ ಚನ್ನಬಸಪ್ಪನ ಅಳ್ಳಪ್ಚಿಡುವನ್ನಕೆ ಉಪಾಯ ಮಾಡ್ಚಿ. ಆಚೇಂಗಿ, ರಾಜಂಗ್ ಅಂದೇ ಬೈಟ್ ಅಂವಂಡ ಇಷ್ಟದೇವ ವೀರಭದ್ರ ಸ್ವಾಮಿ ಸೊಪನತ್ ಕಂಡಿತ್ ವಿಷಯತ್‌ನ ಅರಿಚಿಟ್ಟಿತ್.

"ಪಿತ್ಯಾಂದ್ ರಾಜ ಚನ್ನಬಸಪ್ಪನ ಅಪ್ಪಂಗಳತ್ಂಜ ಕಾಕ್‌ಚಿಟ್ಟಿತ್ ಕುಂದರ್‌ವೊಟ್ಟೆಲ್ ಮಂಡೆ ಕೆತ್ತೊಂಡೊಂದ್ ಇಂಜತ್. ಇದ್ ಚನ್ನಬಸಪ್ಪಂಡ ಪೊಣ್ಣಕ್ ಎನ್ನನೆಯೊ ಗೊತ್ತಾಯಿತ್ ಅಂದೇ ಬೈಟ್ ಚನ್ನಬಸಪ್ಪ, ದೇವಮ್ಮಾಜಿ ಪಿಳ್ಳಾ ಪರಿವಾರ ಕೊಡಗ್ ಬುಟ್ಟಿತ್ ಮೈಸೂರ್‌ಕ್ ಪೋಚಿ"ಂದ್ ರಾಜಂಡ ಬೇಡ ದಳತ್‌ರ ನಾಯಕ ಚನ್ನಪ್ಪನಾಯಕ 1833ತ್ ಬ್ರಿಟಿಷ್ ಅಧಿಕಾರಿ ಗ್ರೇಮ್‌ಕ್ ಕೊಡ್ತ ಹೇಳಿಕೆಲ್ ಎಣ್ಣಿತ್.

ಚನ್ನಬಸಪ್ಪ ರಾಜಂಡ ಮೀದ ಅಪವಾದ ಮಾಡ್‌ನಾತ್ ಸತ್ಯ ಇಂಚಾಲೆ. ಅಂವ ದೇವಮ್ಮಾಜಿ ಪಿಳ್ಳಾ ಪರಿವಾರತ್‌ರ ಕೂಡೆ ಮೈಸೂರ್‌ಕ್ ಪೋಪಾಂಗ್ ಮುಪ್ಪಡೆ ದಂಡ್ ಕಾಲ ಅಪ್ಪಂಗಳತೆ ಇಂಜತ್. 1832ತ್ ಚನ್ನಬಸಪ್ಪ ಕೊಡಗ್ಂಜ ಬ್ರಿಟಿಷಡ ರಕ್ಷಣೆಕ್ ಪೋಪಕ ದೇವಮ್ಮಾಜಿಕ್ ಒಂದರೆ ಬಯತ್‌ರ ಕಣ್ಣುಕುಳ್ಳಿ ಇಂಜತ್.

ದೇವಮ್ಮಾಜಿ ಅಪ್ಪಂಗಳಕ್ ಪೋನಪಿಳ್ಳಾ ರಾಜಂಗೂ, ಚನ್ನಬಸಪ್ಪಂಗೂ ಪಗೆ ಅಧಿಯಾಚಿ. ತಾಂಡ ಪೊಣ್ಣನ ರಾಜ, ಕೆಟ್ಟ ತರತ್ ಕಂಡತ್‌ಂದ್ ಚನ್ನಬಸಪ್ಪ ರಾಜಂಡ ವಿರುದ್ಧ ಕೆಲಸ ಮಾಡುವ ಕೂಡ್‌ಚಿ. ಇದ್ ಗೊತ್ತಾನ ರಾಜ ಅಂವನ ಶಿವಪಾದರೆರ ಒಳ್ಳಲ್ ಚಾವ್‌ಚಿಡೊಂಡೊಂದ್ ಗೇನ ಮಾಡ್‌ಚಿ.

ಈ ವಿಷಯ ದೇವಮ್ಮಾಜಿಕ್ ನಮ್ಮೆಕ್ ಚೆನ್ನಂಗಿ ದಿನ ಬಾಕಿ ಇಪ್ಪಕ ಗೊತ್ತಾಚಿ. ಅವಳ ನಮ್ಮೆಕ್ ವಡಿಯಂಡ ಕೂಡೆ ಬರೊಂಡೊಂದ್ ಕಾಕುವಕ್ ಬಂದ ಹರಿಕಾರಂಡ ಕೂಡೆ ಅರಮನೆರ ಇನಾಂ ಆಯಿತ್ ನಲ್ಲ ಕ್ರಯ ಉಳ್ಳ ಪೊಡಿಯತ್‌ನ ಅಯೆಚಿತಿಂಜತ್.

ದೇವಮ್ಮಾಜಿ ಬಯ್ಯ ಆ ಪೊಡಿಯತ್ತರ ಮಡ್‌ಕನ ಬುಡ್‌ತಿತ್ ನೋಟುವಕ ಅದತ್ ಓರ್ ಚೆರಿಯ ಕಾಗದ ಇಂಜಾನ ಕಂಡತ್. ಅದತ್ ಅರಮನೆರ ಓರ್ ಸಿನೇತೆ, "ಮಹಾಸ್ವಾಮಿ ನಿಂಗಡ ವಡಿಯನ ನಮ್ಮೆರ ನೇರತ್ ಚಾವ್‌ಚಿಡುವ ವರ್ತಮಾನ ಉಂಡ್. ಆನಗುಂಡ್ ನಿಂಗ ಆಪಚ್ಚಕ್ ಬೆರಿಯ ಕೊಡಗ್ ಬುಟ್ಟಿತ್ ಪೋಪದ್ ನಲ್ಲದ್"ಂದ್ ಎಳ್ಳಿತಿಂಜತ್.

ಈ ಕಾಗದತ್‌ನ ದಾರ್ ಎಳ್ಳಿಯೆಂದ್ ಪೆದ ಇಲ್ಲತಿಂಜಕೊ ದೇವಮ್ಮಾಜಿ ಎಳ್ಳನಯಿಂಗಳ ಅರ್‌ಂಜಂಡತ್. ಅವಕ್ ಪೋಡಿ ಆಚಿ. ವಡಿಯಂಗ್ ವಿಷಯ ಅರಿಚಿಡುವದೆ ಅಪ್ಪಂಗಳತ್ ಇಂಜ ಚೆನ್ನಬಸಪ್ಪಂಡ ಆಪ್ತ ಸಿನೇತಂಗಳಾನ ಮಂದಯ್ಯ, ಚೇಂದ್ರಿಮಾದ ಅಚ್ಚಯ್ಯ, ಸುಬ್ಬಯ್ಯ ಪಿಳ್ಳಾ ಗಣಪತಿರ ಕೂಡೆ ತಕ್ಕ ಬಾಕ್ ನಡ್‌ತಿತ್ ಮಿಳ್ಳಾತ ಕಾರ್ಬಾರ್ ಮಾಡ್‌ಚಿ.

### ಚೆನ್ನಬಸಪ್ಪ, ದೇವಮ್ಮಾಜಿ ಪಿಳ್ಳಾ ಪರಿವಾರ ಕೊಡಗ್ ಬುಟ್ಟಿತ್ ಮೈಸೂರ್ ಇಲವಾಲಕ್ ಎತ್ತನ ಸಾಸ ಕತೆ

ಕೊಡಗ್ ರಾಜಂಡ ಕಾಲತ್ ಕೊಡಗರ ತೆರಿ ದಾಟಿ ಪೋಪದ್ ಪೇರ್ತ್ ಕಷ್ಟತರ ಕೆಲಸ ಆಯಿತಿಂಜತ್. ಕೊಡಗರ ಒಳ್‌ಕೂ, ಪೂರ್‌ಮೆ ಇಂಜ ಚೆನ್ನಂಗೆ ಬಟ್ಟೆಲ್ ಪಾರಕಾರ ಇಂಜತ್. ಚೆನ್ನಬಸಪ್ಪಂಗ್ ಕೊಡಗ್ ಬುಟ್ಟಿತ್ ಪೋಪಕ್ ದಾರ್‌ನುಂಡ್ ಸಹಾಯ ಕೊಟ್ಟುವನ್ನಕೆ ಇಂಜಾಲೆ. ಚೆನ್ನಂಗಾಳ್ ಪ್ರತಿಯೋರ್ ಗೆಳೆಗೆಲೂ ಅವಂಡ ಮೀದ ಕಣ್ಣ್ ಬೆಚ್ಚಿತೆ ಇಪ್ಪ ಇಂಜತ್.

ಕೊಡಗ್ ಬುಟ್ಟಿತ್ ಪೋಪಕ ಚೆನ್ನಬಸಪ್ಪ ತಾಂಡ ಪೊಣ್ಣ್, ಕಣ್ಣುಕುಳ್ಳಿ ಪಿಳ್ಳಾ ಚೆನ್ನಂಗ್ ಆಪ್ತಂಗಳ ಕೂಟಿಯಂಡ್ ಪೋಂಡು. ಇದ್‌ನೆಲ್ಲ ಅವು ಗೇನಮಾಡಿತ್ ಓರ್ ತೀರ್ಮಾನಕ್ ಬಾತ್. ಚೆನ್ನಬಸಪ್ಪ ಚಿಕ್ಕ ವೀರ ರಾಜೇಂದ್ರಂಗ್ ನವರಾತ್ರಿರ ಆದಿಲ್ ಒಮ್ಮತೆ ತಾಂಡ ಅಮ್ಮತಿ ನಾಡ್‌ರ ಭೂಮಿಕ್ ಪೋಯಿತ್ ಬರೊಂಡೂಂದ್, ತಾನ್ ಮಡಿಕೇರಿಕ್ ನವರಾತ್ರಿರ ನವಮಿಕ್ ಬಪ್ಪಿಂದ್ ಎಳ್ಳೊಂಡು. ನವರಾತ್ರಿಕ್ ಮುಪ್ಪಡೆ

ಚನ್ನಬಸಪ್ಪ ಪೊಣ್ಣಾರ ಕೂಡೆ ಅಮ್ಮತ್ತಿ ನಾಡ್ಕಾಲೆ ಮೈಸೂರ್‌ಕ್ ಪೋಂಡು. ಮೈಸೂರ್ ತೆರಿಕೆತ್ತನೆ ದೇವಮ್ಮಾಜಿ ವಡಿಯ ಚನ್ನಬಸಪ್ಪಂಡ ಕೂಡೆ ಪೋಪದ್ ದಾರ್ಕೂ ಗೊತ್ತಾಪಕಯ್ಯ, ಇದ್‌ಂಗಾಯಿತ್‌ಅವಳ ಓರ್ ಉದ್ದತ ಬಲ್ಕಪೊಟ್ಟಿರ ಒಳ್‌ಲ್ ಬುದ್ದಾಕಿತ್, ಅದತ್ ಮನೆರ ಸಾಮಾನ್ ಉಂಡ್‌ಂದ್ ಆಳಕ್ ಎಣ್ಣೆತ್ ಆ ಪೊಟ್ಟಿನ ಪೊರ್‌ಪ್‌ಚಿಡೊಂಡೊಂದ್ ತೀರ್ಮಾನ ಮಾಡ್‌ಚಿ.

ದೇವಮ್ಮಾಜಿ ಬುದ್ದವಕ್ ಓರ್ ಮರತ್‌ರ ಪೊಟ್ಟಿನ ಚೇಂದ್ರಿಮಾಡ ಅಚ್ಚಯ್ಯ ಅಲ್ಲಿ ಇಂಜ ಪೊಟ್ಟಿಯಡಾತ್ ಆಂಜಿತ್ ಓರ್ ಪೊಟ್ಟಿರ ಬರಿಲ್ ದಂಡ್ ಚೆರಿಯ ತೂತ ಮಾಡ್‌ಚಿ. ಬೋರೆಯಿಂಗಕ್ ಅದ್ ಗೊತ್ತಾಕತನ್ನಕೆ ತಳ್ಳನೆತ ಬಟ್ಟೆಲ್ ಅದ್‌ನ ಮುಚ್ಚಿರ್‌ತ್. ಆಳಕ್ ಆ ಪೊಟ್ಟಿನ ಎಡ್‌ತಂಡ್ ಪೋಪಕ್ ಎಣ್ಣೆಚಿ.

ಆಚೇಂಗಿ, ಅಪ್ಪಂಗಳ ಅರಮನೆಲ್ ಪಾರಕಾರ ಇಂಜತ್. ಅಯಿಂಗಳುಂಡ್ ತಪ್ಪೊಚಿಟ್ಟಂಡ್ ಎನ್ನನೆ ಪೊರ್‌ಡುವಾಂದ್ ಚನ್ನಬಸಪ್ಪ ಪಿಳ್ಳಾ ಕೂಟಕಾರ ಗೇನ ಮಾಡಿತ್ ಓರ್ ತಂತ್ರ ಮಾಡ್‌ಚಿ.

ನವರಾತ್ರಿಕ್ ಕುದರೆ ಸವಾರಂಗ ಎಲ್ಲರೂ ಮಡಿಕೇರಿಕ್ ಪೋಯಿತಿಂಜತ್. ಐಂಬದಾಳಾ ಮಾತ್ರ ಅಪ್ಪಂಗಳತ್ ಇಂಜತ್. ಚನ್ನಬಸಪ್ಪ ಮಡಿಕೇರಿಕ್ ಪೋಪಾಂಗ್ ಮುಪ್ಪಡೆ ಅಯಿಂಗಳೆಲ್ಲ ಪಾಯಸ ಊಟ ತಪ್ಪಿಂದ್ ಎಣ್ಣೆತಿಂಜತ್. ಈ ಪೋಲೆ ಚನ್ನಬಸಪ್ಪ ಪಿಳ್ಳಾ ಆಪ್ತಂಗ ಪಾಯಸ ಊಟತ್‌ರ ಏರ್ಪಾಡ್ ಮಾಡ್‌ಚಿ. ದುಂಬ ಬೆಲ್ಲ, ತೆಂಗಿನ ಇಟ್ಟಿತ್ ಪಾಯಸ ಪಿಳ್ಳಾ ಕಡ್‌ಂಬುಟ್ ಮಾಡ್‌ಚಿ.

ಅಂದ್ ಅಪ್ಪಂಗಳ ಅರಮನೆಲ್ ಗೌಜಿ. ಅಣಕಣ್ಣೆರ ಬೊಳ್‌ಚ ಕತ್ತ್‌ಚಿಟ್ಟಿತ್ ಅರಮನೆರ ಪಟ್ಟಿರ ಸುತ್ತ ಬೆಚ್ಚತ್. ಪಾರಕಾರ ಎಲ್ಲ ಒರೇ ಸಾಲ್‌ಲ್ ಉಂಬಕ್ ಅಳಾತತ್. ಚನ್ನಬಸಪ್ಪಂಡ ಆಪ್ತ ಸೇವಕಂಗ, ಕುರುಬಂಗ, ಯರವಂಗ ಬೋರೆ ಬೋರೆ ಅಳಾತತ್. ಪಾರಕಾರಕ್ ಬಳಂಬುವಕ್ ಬೋರೆ ಏರ್ಪಾಡ್ ಇಂಜತ್.

ಅಯಿಂಗಳ್ ಬಳಂಬುವಾಂಗ್ ಮುಪ್ಪಡೆ ಅಚ್ಚಯ್ಯ ಕರ್‌ತ ಪುಟ್ಟಾರ ಓರ್ ಸಾಮಾನ್‌ನ ಆ ಪಾಯಸತ್‌ರ ಗಂಜಿಕ್ ಕೂಟಚಿ. ಬಳಂಬುವವು ಪಾರಕಾರಕ್ ಚಾಯಿತೆ ಪಾಯಸ ಪಿಳ್ಳಾ ಕಡ್‌ಂಬುಟ್ ಇಟ್ಟ್ ಕೊಡ್‌ತತ್. ಪಾರಕಾರ ಮೊದ್‌ರ ಇಂಜ ಪಾಯಸತ್‌ನ ಚಾಯಿತೆ ತಿಂದತ್. ಉಂಡಿತಾಕಣೆ ಅಯಿಂಗಳೆಲ್ಲ ಅಮಲಾಯಿತ್ ಸೊಯ ಇಲ್ಲತನ್ನಕೆ ಅಳಾತಲ್ಲೆ ಬುದ್ದಾರ್‌ತ್! ಬಸಪ್ಪಂಡ ಆಪ್ತಂಗ ಬೋರೆ ಜನಕೂ ಎಲ್ಲ ಇಟ್ಟ್ ಕೊಡ್‌ತತ್. ಅಮಲಾಯಿತ್ ಬುದ್ದಾಪೋನ ಪಾರಕಾರಳೆಲ್ಲ ಅರಮನೆರ ಪೊರ್‌ಮೆ ಕಯ್ಯಾಲೆಲ್ ಬುದ್ದಾಕ್‌ಚಿ.



ಅಲ್ಲಿಂಜ ಊಟ ಆನನ್ನಕೆ ಚನ್ನಬಸಪ್ಪ ಪಿಳ್ಳಾ ಕೂಟಾಕಾರ ತೋಕ್, ಕತ್ತಿನ ಪುಡ್‌ಚೆಂಡ್ ಕುದರೆ ಪತ್ತಿ ಪೊರ್‌ಟತ್. ದೇವಮ್ಮಾಜಿ ಪೊಟ್ಟಿಲ್ ಓರ್ ತಳ್ಳನೆ ಕಡಿಕೆ ಬಿರ್‌ಚಿತ್ ಬುದ್ದಂಡತ್. ಅನ್ನನೆ ತಾಂಡ ಮಾಲ್‌ಮಟ, ಪೊಡಿಯ ಪಿಳ್ಳಾ ಬೋರೆ ಸಾಮಾನ್‌ನ ಅದತೆ ಬೆಚ್ಚಂಡತ್. ಅವ ಬುದ್ದಂಡ ಪೊಟ್ಟಿನ ತಡಿಲ್ ನಲ್ಲ ತಾಕತ್ ಉಳ್ಳ ಗೆಟ್ಟಿಮುಟ್ಟಾನ ಕುರುಬಂಗ ಪೊರ್‌ತಂಡತ್.

ಇನ್ನನೆ ಬೈಟ್ ನೇರತ್ ಅಪ್ಪಂಗಳತ್‌ಂಜ ಪೊರ್‌ಟ ಇವು ಪೊಲಣೆಕ್ ಅಮ್ಮತ್ತಿನಾಡ್‌ರ ಮಾಚಿಮಂಡ ಮನೆಕ್ ಎತ್ತಣೆಕ್ ಮೂಂದ್ ಬಾಲೆಕಾರ ತಂಗಡ ನಿಪ್ಪುಲ್ ತೋಕ್ ಬೆಚ್ಚಂಡ್ ನಿಧಾನ ಆಯಿತ್ ನಡಪಾನ ಕಂಡತ್. ದೇವಮ್ಮಾಜಿ ಇಂಜ ಪೊಟ್ಟಿನ ಪೊರ್‌ತಂಡ ಕುರುಬಂಗ ಪಿಳ್ಳಾ ಬೋರೆ ಚೆನ್ನ ಜನ ಅಕ್ಕಣೆಕ್ ಮೈಸೂರ್‌ರ ತೆರಿರ ಪಕ್ಕ ಪೋಯಿತಿಂಜತ್.

ಮಾಚಿಮಂಡ ಬಾಲೆಕಾರಳ ಕಂಡ ಚನ್ನಬಸಪ್ಪಂಡ ಕೂಟಾಳಿಯ "ಮಹಾಸ್ವಾಮಿರ ಸವಾರಿ ಬಂದಂಡ್ ಉಂಡ್. ನಿಂಗ ಬಟ್ಟೆ ಬುಟ್ಟಿತ್ ದೂರ ಪೋಯಿ"ಂದ್ ಎಣ್ಣೆಚಿ.

ಈ ತಕ್ಕನ ಕೇಟಿತ್ ಬಾಲೆಕಾರಕ್ ಅಗ್ಗೇನ ಬಂದ್‌ರ್‌ತ್. ರಾಜ ನಮ್ಮರ ನೇರತ್ ಮಡಿಕೇರಿ ಬುಟ್ಟಿತ್ ಊರ್‌ಕ್ ಬಪ್ಪ ಇಂಚ್‌ಲೆ. ಅನ್ನನೆ ರಾಜ ನಾಡ್‌ಕ್ ಬಪ್ಪಾಂಗ್ ದಂಡ್ ದಿನಕ್ ಮುಪ್ಪಡೆ ಆಯಾ ನಾಡ್‌ಕ್ ಬಪ್ಪ ವರ್ತಮಾನತನ ಚಾವಡಿಕಾರ ಸಾರುವ ಇಂಜತ್.

ಆನಗುಂಡ್ ಮಾಚಿಮಂಡ ಬಾಲೆಕಾರಕ್ ಇವು ಚನ್ನಬಸಪ್ಪ ಪಿಳ್ಳಾ ಕೂಟಾಕಾರಂದ್ ಅಗ್ಗೇನ ಬಂದಿತ್ ಇಯಂಗಡ ಮೀದ ಬೊಡಿ ಪಾರ್‌ಚಿಟ್ಟಿತ್. ಚನ್ನಬಸಪ್ಪ ನಲ್ಲ ಗುರಿಕಾರ ಆಯಿತಿಂಜಾಂಗ್ ಅವನೂ ಇಯಂಗಕ್ ಬೊಡಿ ಬೆಚ್ಚಿತ್. ಕೂಟಾಕಾರಳೂ ಬೆಚ್ಚಿತ್. ಇನ್ನನೆ ದಂಡ್ ಕಡೆಕಾರಳೂ ಅಪ್ಪರಿಪ್ಪರ ಬೊಡಿ ಬೆಚ್ಚಿ ಪರಿಣಾಮ ಮಾಚಿಮಂಡ ಜೋಯಪ್ಪ ಪಿಳ್ಳಾ ಮನೆಕಾರ ಚತ್‌ಪೋಚಿ. ಸೋಮಯ್ಯ ಬೆಚ್ಚಿ ಬೊಡಿ ಚನ್ನಬಸಪ್ಪಂಡ ಎಡ್‌ತೆ ಕೈಕ್ ಪಟ್ಟಿತ್. ಇದ್‌ನ ಕೂಟಾಕತೆ ಚನ್ನಬಸಪ್ಪ ತಾಂಡ ಕುದರೆನ ಸ್ಪೀಡ್‌ಲ್ ಓಡ್‌ಚಿಟ್ಟಿತ್.

ಅನ್ನನೆ ಕೂಟಾಕಾರ ತಂಗಡ ಅರೆಲ್ ಬೆಚ್ಚಂಡಿತಿಂಜ ಪೊನ್ನಾರ ಪಾನ್‌ನ ತಂಗಡ ಬೆಂಬರಿ ಕನ್‌ಚಿತ್ "ಇದ್‌ನ ಪೊರ್‌ಕಿಯೋಳಿ"ಂದ್ ಎಣ್ಣೆಯಂಡ್ ಕುದರೆನ ರಭಸತೆ ಓಡ್‌ಚಿಟ್ಟಿತ್. ಅಕ್ಕಣೆ ಮಾಚಿಮಂಡ ಮನೆಕಾರ ತೋಕ್ ಬೊಡಿರ ಸದ್ಲ್ ಕೇಟಿತ್ ಪೊರ್‌ಮೆ ಬರಣೆ ಬಾಕಿ ಜನಳೂ ಬಾತ್. ಅವು ಪೊಲಾಕತ ಬೊಳಿಲ್ ಪಾನ್‌ನ ತೇಡಿಯಂಡ್ ಇರಣೆ ಚನ್ನಬಸಪ್ಪ ಪಿಳ್ಳಾ ಕೂಟಾಕಾರ ಎಚ್ಚಿ ಕೊ ದೂರ ಪೋಯಿರ್‌ತಿಂಜತ್!

ಚನ್ನಬಸಪ್ಪಂಡ ಕಣ್ಣು ಕುಣ್ಣಿನ ಎಡ್ತಂಡ್ ಬೆಂಬರಿಲ್ ಬಪ್ಪನ್ನಕೆ ಓರ್ ಎರವಂಗ್ ಎಣ್ಣಿ ತಿಂಜತ್. ಆ ಕುಣ್ಣಿ ಮೊರ್ಟಕ ಬಟ್ಟೆಲ್ ನಂಗಕೆ ತೊಂದರೆಂದ್ ಚನ್ನಬಸಪ್ಪ ಆ ಕುಣ್ಣಿಕ್ ಮಂಕಾಪಕ್ ಅಫೀಮ್ ಉಂಡೆಯೊಂದಾನ ಆ ಎರವಂಗ್ ಕೊಡ್ತಿಂಜತ್. ಅವಂಡ ಕೂಡ ಚನ್ನಬಸಪ್ಪಂಡ ಮನೆರ ಸಾಮಾನ್ ದುಂಬ್ ಚಿಟ್ಟಿ ಪೊಟ್ಟಿನ ಇಣ್ಣೋರ್ ಗುಂಪ್ ಎರವ, ಕುರುಬ ಪೊರ್ತಂಡ್ ಬಂದಂಡ್ ಇಂಜತ್. ಇನ್ನನೆ ಬಪ್ಪಕ ಮಾಚಿಮಂಡ ಒಕ್ಕಕಾರ ಬಟ್ಟೆಲ್ ಬುದ್ದಿ ತಿಂಜ ಅಯಿಂಗಡ ಮನೆಕಾರಡ ಚಾವುನ ಪೊರ್ತಂಡ್ ಮನೆಕ್ ಪೋಪ ಇಂಜತ್.

ಚನ್ನಬಸಪ್ಪ ಪಿಣ್ಣ ಕೂಟ್ಕಾರ ತಂಗಡ ಕುದರೆನ ಸ್ಪೀಡ್ ಓಡ್ ಚಿಟ್ಟಂಡ್ ಹೊಸೂರ್ಕಾಲೆ ಪೋಪಕ ಪುದ್ರಿಮಾಡ ಮನೆಕಾರ ಇಯಿಂಗಳ ತಡ್ಪಕ್ ನೋಟ್ಚಿ. ಅಯಿಂಗಕ್ ಬೊಡಿ ಪಾರ್ಚಿಟ್ಟಿತ್, ಬೊತ್ತ್ ಚಿಟ್ಟಂಡ್ ಇವು ಕೊಡಗರ ತೆರಿಕ್ ಎತ್ತಿರ್ತ್. ಅಲ್ಲಿ ಉಕ್ಕಡತ್ ಪಾರಕಾರ ತಡ್ತತ್. ಅಯಿಂಗಕ್ಂಜ ಚನ್ನಬಸಪ್ಪಂಡ ಕಡೆಕಾರ ಏರ ಕಣ್ಣಲ್ ಇಂಜಾನುಂಡ್ ಅಯಿಂಗಳ ಬೊತ್ತ್ ಚಿಟ್ಟಂಡ್ ಮಿಣ್ಣಕ್ ಪೋಪಕ್ ಕೂಡ್ಚಿ. ಅಕ್ಕಣೆಕ್ ದೇವಮ್ಮಾಜಿನ ಪೊರ್ತಂಡ್ ಬಂದ ಯರವ, ಕುರುಬ ಅಲ್ಲಿಕ್ ಎತ್ತ್ಚಿ.

ಪೊಟ್ಟಿನ ಪೊರ್ತವು ಮಧ್ಯ ಮಧ್ಯ ಕೋದಕ್ ಉಳ್ಳಪಿತ್ ಚೆನ್ನ ರೆಸ್ಪ್ ಎಡ್ತವ ಇಂಜತ್. ಅಕ್ಕಣೆಕ್ ಪೊಲಾಕ ಪತ್ತ್ ಗಂಟಿ. ಮಜ್ಜಣಕ್ ಪೆರಿಯಾಪಟ್ಟಿ ಎತ್ತ್ತನ ಇವು ತಂಗ ಕೊಂಡಬಂದಿ ತಿಂಜ ಕೂಪೊದಿನ ಉಂಡಿತ್ ರೆಸ್ಪ್ ಎಡ್ಕೊಂಡಿಂಜತ್. ಅನ್ನನೆ ಪೊಟ್ಟಿರ ಒಳ್ಳಲೆ ಇಂಜ ದೇವಮ್ಮಾಜಿಕೂ ಪೊರ್ತಮೆ ಬರೊಂಡಿಂಜತ್.

ಚನ್ನಬಸಪ್ಪಂಡ ಕುಣ್ಣಿ ಎಡ್ತಂಡ ಕುರುಬ ಪಿಣ್ಣ ಯರವ ಎಲ್ಲಿ ಉಂಡ್ಂದ್ ಗೊತ್ತಾಯಿಲೆ. ಮಿಣ್ಣಕ್ ಪೊಟ್ಟಿ ಪೊರ್ತಂಡ್ ಪೋನಕ ಕುರುಬ, ಎರವಕ್ ದೇವಮ್ಮಾಜಿ ಅದ್ಂದ ಒಳ್ಳಲ್ ಉಳ್ಳದ್ ಗೊತ್ತಾಯಿತ್ ಅವು ರಾಜಂಗ್ ಅರಿಚಿಟ್ಟಕ ನಂಗಕೆ ತೊಂದರೆಂದ್ ಚನ್ನಬಸಪ್ಪ ಪೊಟ್ಟಿನ ಅಲ್ಲಿಯೆ ಬುಟ್ಟಿತ್ ದೇವಮ್ಮಾಜಿನ ತಾಂಡ ಬೆನ್ನರ ಬೆಂಬರಿ ಕುದರೆಲ್ ಅಳ್ ಪ್ ಚಿಟ್ಟಂಡ್ ಪೋಪಕ್ ಚನ್ನಬಸಪ್ಪ ಉಪಾಯ ಮಾಡ್ಚಿ.

ಕೊಡಗರ ತೆರಿ ದಾಟಿತ್ ಓರ್ ಬಲ್ಯ ಕಾಡ್ ಪಕ್ಕ ಪೋಯಂಡ್ ಇಪ್ಪಕ ಚನ್ನಬಸಪ್ಪಂಡ ಆಪ್ತ ಸೇವಕಂಗ "ಮದ್ದಾನೆ ಬಾತ್. ಪೊಟ್ಟಿನ ಅಲ್ಲಿಯೇ ಬೆಚ್ಚಿತ್ ಓಡಿ"ಂದ್ ಕೂತ್ಚಿಟ್ಟತ್.

ಕೂಡೆನ್ನೆ ಪೊಟ್ಟಿ ಪೊರ್ತಂಡ್ ಇಂಜವು ಅಲ್ಲಿಯೆ ಬುಟ್ಟಿತ್ ಓಡಿರ್ತ್. ಅವು ಕಣ್ಣಕ್ ಕಾಂಗತಚ್ಚಕ್ ದೂರ ಓಡಿ ಪೋನಪಿಣ್ಣ ಚನ್ನಬಸಪ್ಪ ಪೊಟ್ಟಿ ತೊರ್ಂದತ್. ಅಕ್ಕಣೆಕೂ

ಬುದ್ಧಂಡೆ ಸುಸ್ತಾಯಿತಿಂಜ ದೇವಮ್ಮಾಜಿ ಪೊಟ್ಟಿಂಜ ಪೊರಮೆ ಬಾತ್. ಅವಕ್ ತಾಂಡ ಕುಳ್ಳಾರ ಗೇನ ಬಾತ್. ಕುಳ್ಳಾನ ಎಡ್ತಂಡ್ ಇಂಜ ಯರವಂಡ ವಿಷಯ ಗೊತ್ತಾಯಿಲೆ.

ರಾಜಂಡ ಜನಡ ಕೈಕ್ ಎಲ್ಲಿಯೇಂಗಿ ಕುಳ್ಳಾ ಕೊಟ್ಟಿರ್ತಾಂದ್ ಚನ್ನಬಸಪ್ಪ ದಂಪತಿಯ ಬೊತ್ತಿಯಂಡತ್. ಆಚೇಂಗಿ, ಅವು ಬಯ್ಯಕ್ ಪೋಪಕೂ ಕೈಂಜಾಲೆ. ಆನಗುಂಡ್, ಚನ್ನಬಸಪ್ಪ ಪೊಣ್ಣನ ಕುದರೆಲ್ ಅಳಪ್ಪಚಿಟ್ಟಂಡ್ ತಾಂಡ ಪರಿವಾರತರ್ ಕೂಡೆ ಮಿಳ್ಳಾಕ್ ಪೋಚಿ. ಅಕ್ಕ ದೇವಮ್ಮಾಜಿಕ್ ವಡಿಯಂಡ ಕೈಕ್ ಆನ ಗಾಯ ಕಂಡತ್. ಆ ಗಾಯತಂಜ ಚೋರೆ ಒಕ್ಕಿತ್ ಚನ್ನಬಸಪ್ಪಂಗ್ ಸುಸ್ತಾಚಿ. ಆಚೇಂಗೂ ಹರತ್ ಮಜ್ಜಣತರ್ ನೇರಕ್ ಪೆರಿಯಾಪಟ್ಟ ಕೋಟೆನ ಅವು ಎತ್ತಚಿ.

ಅಲ್ಲಿ ಅವು ತಂಗಡ ಕೂಪೊದಿನ ತೊರಂದ್ ಉಂಬಕ್ ಅಳಪಕ ಓರ್ ಜಂಗಮ ಇವು ಕೊಡಗ್ ರಾಜಂಡ ಸಮ್ಮಂಧಿಯಾಂದ್ ಅರಂಜಿತ್ ಅಯಿಂಗಕೆಲ್ಲ ಪಣ್ಣ್, ಪಾಲಾ ಕೊಡ್ತತ್. ಅಕ್ಕಣಕ್ ಬಸಪ್ಪಂಡ ಕೈ ದುಂಬ ನೊಂಬಲ ಆಪ ಕೂಡ್ಚಿ. ಪೊಣ್ಣ್ ಅದಂಗ್ ಕೆಟ್ಟಿತಿಂಜ ಬಟ್ಟೆನ ಉತ್ತುವಕ ಕೆಟ್ಟ ವಾಸನೆ ಬಪ್ಪ ಇಂಜತ್. ಅಂತೂ ತಂಗಕ್ ಗೊತ್ತಿಂಜ ಮದ್ದನ ಇಟ್ಟಿತ್ ಪುನಾದಿಯ ಗಾಯಕ್ ಕೆಟ್ಚಿ.

ಅಲ್ಲಿಂಜ ಅವು ಮೈಸೂರ್ಕ್ ಪೋಪ ಬಟ್ಟೆಲೆ ಇಲವಾಲಕ್ ಎತ್ತಚಿ. ಅಲ್ಲಿ ಕೊಡಗರ ರೆಸಿಡೆಂಟ್ ಆಯಿತಿಂಜ ಮೇ. ಕಾಸಮ್ಮಜೋರ್ ತಾಂಡ ಬಿಡಾರ ಇಟ್ಟಿತಿಂಜತ್. ಅಲ್ಲಿ ಆಶ್ರಯ ಪಡ್ಂದಕ ತಂಗಡ ಜಿಂವಕ್ ಅಪಾಯ ಇಲ್ಲೆಂದ್ ಚನ್ನಬಸಪ್ಪ ನಂಬ್ಚಿ. ಅನ್ನನೆ ಅವು ಪಿತ್ತಾಂದ್ ಒಯ್ಪತ್ ನೇರಕ್ ಇಲವಾಲಕ್ ಎತ್ತಿತ್ ಮೇಜರರ ಕೂಡೆ ತಂಗಡ ಕತೆನೆಲ್ಲ ಎಣ್ಣಿಯಂಡತ್.

ರಾಜಂಡ ಕ್ರೂರತ್ವ ಪಿಳ್ಳಾ ಹಿಂಸೆನ ಅರಂಜ ರೆಸಿಡೆಂಟ್ ಚನ್ನಬಸಪ್ಪ ಪಿಳ್ಳಾ ಕೂಟ್ಕಾರಕ್ ನೆಲೆ ಕೊಡ್ತತ್. ಕೂಡೆನ್ನೆ ಅವಂಡ ಗಾಯತನ ಕತ್ತಿತ್ ಮದ್ದ್ ಇಟ್ಟಿತ್ ಕೆಟ್ಚಿಟ್ಟಿತ್. ಚನ್ನಬಸಪ್ಪ ದಂಪತಿಯಡ ದುರಾದೃಷ್ಟಕ್ ಅಯಿಂಗಡ ಕೊಣ್ಣಕುಳ್ಳಾ ಎರವಂಡ ಕೈಯಿಂಜ ಚಿಕ್ಕವೀರ ರಾಜೇಂದ್ರಂಡ ಜನಡ ಕೈಕ್ ಕೊಟ್ಟಿರ್ತತ್. ಅವು ಕೊಂಡ ಪೋಯಿತ್ ಆ ಕುಳ್ಳಾನ ರಾಜಂಗ್ ಒಪ್ಪಚಿಟ್ಟಿತ್. ಅವಂಗ್ ಮಕ್ಕ ಇಲ್ಲತಾಂಗ್ ರಾಜಂಡ ಪೆರಿಯ ಪೊಣ್ಣ್ ಆ ಕೊಣ್ಣಕುಳ್ಳಾನ ಬಾಕ್ಚಿ.

## ಚನ್ನಬಸಪ್ಪ ದಂಪತಿಯ ಕೊಡಗ್ ಬುಟ್ಟಿತ್ ಪೋನಾಂಗ್ ಚಿಕ್ಕವೀರರಾಜೇಂದ್ರಂಡ ಪ್ರತಿಕ್ರಿಯೆ

ಚನ್ನಬಸಪ್ಪ, ಪೊಣ್ಣ್ ಪಿಳ್ಳಾ ಕೂಟ್ಕಾರ ಕೊಡಗ್ಂಜ ತಪ್ಪಿಚಿಟ್ಟಂಡ್ ಪೋನ ಸಂಗತಿ ಚಿಕ್ಕವೀರರಾಜೇಂದ್ರ ಒಡೆಯಂಗ್ ಸಹಿಸುವಕಯ್ಯತಚ್ಚಕ್ ಚೆಡಿ ಬಾತ್. ಅವು ತಾಂಡ ಮೀದ ಕಂಪೆನಿ ಅಧಿಕಾರಿಯಕ್ ಎಣ್ಣಿತ್ ಅಯಿಂಗಡ ಮನಸ್ಸಿನ ಪಾಳ್ ಮಾಡುವಂದ್ ರಾಜ ಗೇನ ಮಾಡ್ಚಿ. ಅನ್ನನೆ ತನ್ನ ಸಿಂಹಾಸನತ್ಂಜ ಉಳ್ಳಪಿತ್ ಚನ್ನಬಸಪ್ಪನೆ ಕೊಡಗ್ ರಾಜನಾಪಕ್ ಪ್ರಯತ್ನ ಪಡೊಂದ್ ಅಗ್ಗೇನ ಪಟ್ಟಿತ್.

ಆನಗುಂಡ್ ಚಿಕ್ಕ ವೀರರಾಜೇಂದ್ರ, ಚನ್ನಬಸಪ್ಪನ ಎನ್ನೇಂಗಿ ಮಾಡಿತ್ ಪೊಣ್ಣ್ ಸಮೇತ ಪುಡ್ಚಿತ್ ತಂಗಡ ಪುಡ್ತತ್ ಆಕಿಯವಂಡೊಂದ್ ಹಟ ಪುಡ್ಚಿತ್. ಅದ್ಂಗೆ ಎಚ್ಚಕೆ ಕಷ್ಟ, ನ್ಯಾಯಬಾಹಿರ ಆಡ್... ಚನ್ನಬಸಪ್ಪನ ಬ್ರಿಟಿಷ್ಕಾರ ತಾಂಗ್ ಒಪ್ಪಿಚಿದತೆ ಪೋನಕ ತಾಂಡ ರಾಜತ್ವತ್ ಅಧಿಕಾರಕ್ ತೊಂದರೆ ಆಪಾಂದ್ ಗೇನಮಾಡ್ಚಿ.

ಚಿಕ್ಕವೀರರಾಜೇಂದ್ರ ಮೈಸೂರ್ ರೆಸಿಡೆಂಟ್‌ಕ್ "ಚನ್ನಬಸಪ್ಪ ಇಲ್ಲಿ ಗಲಾಟೆ ಮಾಡಿತ್, ತಾಂಡ ಚೆನ್ನಂಗ್ ಜನಳ ಕೊಂದಿತ್ ಮೈಸೂರ್‌ಕ್ ಬಂದಿಯೆ. ಆನಗುಂಡ್ ಅವನ ನಾಡ ಪುಡ್ತಕ್ ಒಪ್ಪಿಚಿಡೊಂಡೊ"ಂದ್ ಎಳ್ವಿಚಿ.

ಆಚೇಂಗಿ ರೆಸಿಡೆಂಟ್‌ಕ್ ರಾಜ, ಪಂಡ್ ಚನ್ನವೀರಪ್ಪ ಪಿಳ್ಳಾ ಅವಂಡ ಸಂಸಾರತ್‌ನ ಹಂಸೆ ಪಿಳ್ಳಾ ಕ್ರೂರತ್ವತ್ ಕೊಲೆ ಮಾಡ್‌ನದ್ ಚಾಯಿತೆ ಗೊತ್ತಿಂಜಾಂಗ್ ಈ ಕುರಿ ಅವ ಚನ್ನಬಸಪ್ಪನ ಕೊಡಗ್‌ಕ್ ಅಯೆಪಕ್ ಒತ್ತಂಡ್‌ಲೆ. ಈ ವಿಷಯತ್‌ನ ಚೆನ್ನೈ ಗವರ್ನರ್‌ಕೂ, ಕೊಲ್ಕತ್ತಾ ಗವರ್ನರ್‌ಕೂ ಅರಿಚಿಟ್ಟಿತ್.

1833ತ್ ಬೆಂಗಳೂರ್ ಕಂಪೆನಿರ ಅಧಿಕಾರಿಯ "ಚನ್ನಬಸಪ್ಪ, ಅವಂಡ ಪೊಣ್ಣ್ ಪಿಳ್ಳಾ ಕೂಟ್ಕಾರಳ ರಾಜಂಡ ಪುಡ್ತಕ್ ಕೊಡ್‌ಪಕಯ್ಯಾ"ಂದ್ ನಿರ್ಧಾರ ಮಾಡ್‌ಚಿ. ಅನ್ನನೆ ಅಯಿಂಗಳ ಭದ್ರತೆರ ದೃಷ್ಟಿಲ್ ಬೆಂಗಳೂರ್‌ಕ್ ಅಯೆಚಿತ್ ಅಲ್ಲಿಯೆ ಆಕ್‌ಚಿ.

ಈಂಡೆಡೆಲ್ ಚಿಕ್ಕ ವೀರರಾಜೇಂದ್ರ ಚನ್ನಬಸಪ್ಪ ಕೊಡಗ್ಂಜ ಪೋಪಕ್ ತಾಂಡ ಮುನ್ನಿ, ಚನ್ನಬಸಪ್ಪಂಡ ಅಣ್ಣ ಮುದ್ದಯ್ಯ ಎನ್ನೇಂಗಿ ಕೆಣಿ ಮಾಡಿತಿಕ್ಕೊಂದ್ ಅಗ್ಗೇನ ಪಟ್ಟಂಡ್ ಅವಂಡ ಕೂಡೆ ನಾಪದ್ ಜನಳ ಕೊಲ್ಲಚಿಟ್ಟಿತ್. ಮುದ್ದಯ್ಯ ರಾಜಂಡ ಆಪ್ತ, ನಲ್ಲ ಮರ್ಯಾದಸ್ಥ, ಕೆಲಸ ಕಾರ್ಬಾರ್‌ಲ್ ಹುಷಾರ್ ಇಂಜತ್.

ಆಚೇಂಗೂ ರಾಜನೆ ಮುದ್ದಯ್ಯನ ಪೊಜ್ಜಿತ್, ದಿವಾನ್ ಕುಂಟ ಬಸವನುಂಡ್

ಅಂವಂಡ ಮಂಡೆ ಕೆತ್ತಚಿಟ್ಟತ್. ಆಚೇಂಗಿ, ಜನಕ್ ಮುದ್ದಯ್ಯ ನಿರಪರಾಧಿಂದ್ ಚಾಯಿತೆ ಗೊತ್ತಿಂಜತ್. ಬಯ್ಯ ರಾಜಂಗೆ ಮುದ್ದಯ್ಯಂಡ ಮೀದ ಪಶ್ಚಾತ್ತಾಪ ಆಚಿ. ಅಂವನ ವರುವಕೆ ಬುಡುವ ಇಂಚಾಲೆ. ರಾಜಂಗ್ ವರ್ಕ್ ಪತ್ತಾಚಿ ಎಣ್ಣುವಕ ಮುದ್ದಯ್ಯ ತಾಂಡ ಅರೆಂಜ ಕತ್ತಿ ಎಡ್ತಿತ್ ಪುಡ್ಚಂಡ್ ತಾಂಡ ಎದಿಕೆ ನಿಂದನ್ನಕೆ ಕಾಂಬ ಇಂಜತ್.

ಇನ್ನನೆ ಚೆನ್ನಂಗ್ ದಿನ ಕಯ್ಯುವಕ ಓರ್ ಮಂತ್ರವಾದಿ ಬಂದಿತ್ ರಾಜಂಗ್ ಮುದ್ದಯ್ಯಂಡ ಉಪದ್ರ ತಪ್ಪಾಚಿಡುವಕ್ ಓರ್ ಉಪಾಯ ಎಣ್ಣಾಚಿ. ರಾಜ ಓರ್ ಪುದಿಯ ಕೆಂವತ್ ಮುದ್ದಯ್ಯಂಡ ರೂಪ ಬುಡ್ತಿತ್ ಅದ್ನ ಪ್ರತಿ 24 ಮಿನಿಟ್ ಒಮ್ಮೆ ನೋಟಿತ್ "ಮುದ್ದಯ್ಯ ರಾಜದ್ರೋಹ ಆನಾಂಗ್ ಕೊಲ್ಚಿಟ್ಟಿಯೆ"ಂದ್ ಎಣ್ಣಿಯಂಡ್ ಇರೊಂಡೂಂದ್ ರಾಜಂಗ್ ಸಲಹೆ ಮಾಡ್ಚಿ.

ಈ ಪೋಲೆ ರಾಜ ಎಣ್ಣಿಯಂಡ್ ಇಪ್ಪಕ ಕ್ರಮೇಣ ಅಂವಂಗ್ ಶಾಂತಿಯಾಯಿತ್ ವರ್ಕ್ ಬಪ್ಪಕೂಡ್ಚಿ.

ಮುದ್ದಯ್ಯ ಪಿಳ್ಳಾ ಕೂಟ್ಕಾರಳ ಚಾಪ್ಚಿಟ್ಟದೆ ರಾಜ, ಬೇಡದಳತರ ಮುಖ್ಯಾಧಿಕಾರಿ ಮರಿಯಪ್ಪ ನಾಯಕ ಪಿಳ್ಳಾ ಚಿಕ್ಕ ನಾಯಕನ ಕೊಲ್ಚಿಟ್ಟತ್. ಇನ್ನನೆ ರಾಜ, ಚೆನ್ನಬಸಪ್ಪಂಡ ಆಪ್ತಂಗಳ ಕೊಲ್ಚಿಟ್ಟಂಡ್ ಉಳ್ಳಾನ ಕಂಡಿತ್ ಚೆನ್ನಬಸಪ್ಪಂಡ ಆಪ್ತಂಗಳಾನ 20 ಜನ ಕಾಡ್ ಬಟ್ಟಿಕಾತೆ ಮೈಸೂರ್ ತೆರಿಕ್ ಪೋಯಿತ್ ಬೆಂಗಳೂರ್‌ಕ್ ಎತ್ತಿಯಂಡ್ ಚೆನ್ನಬಸಪ್ಪನ ಕೂಡಿಯಂಡತ್. ಎಕ್ಕ ಜನ ಬೆಂಗಳೂರ್‌ಕ್ ಪೋಪ ಕೂಡ್ಚಿ ಚಿಕ್ಕವೀರರಾಜೇಂದ್ರ, ಸೈನ್ಯಕ್ ಕೂಡುವಕ್ ಅರ್ಹತೆ ಇಂಜ ಚೆನ್ನಂಗ್ ಜನಳ ಮಡಿಕೇರಿಕ್ ಕಾಕ್ಚಿಟ್ಟಿತ್ ಅಯಿಂಗಳುಂಡ್ ತಾಂಡ ಮೀದ ಭಕ್ತಿ ಉಂಡ್‌ಂದ್ ಪ್ರಮಾಣ ಮಾಡ್ಚಿಟ್ಟತ್. ಇನ್ನನೆ ಪ್ರಮಾಣ ಮಾಡುವಾಂಗ್ ಮುಪ್ಪಡೆ ಅಯಿಂಗಡ ಕೂಳ್‌ಕ್ ಪಾಲ್ ಇಟ್ಟಿತ್ ಉಂಬ್‌ಚಿಟ್ಟಿತ್. ಆ ಕಾಲತ್ ಕೂಳ್‌ಕ್ ಪಾಲ್ ಇಟ್ಟಿತ್ ಉಂಬ್‌ಚಿಟ್ಟಿಯಿಂಗಕ್ ವಿರೋಧ ಕಾಟುವದ್ ಅಪರಾಧ ಆಯಿತಿಂಜತ್!

ಇದಾನದು ಏಳಾಯಿರ ಸೀಮೆರ ಜನಳ ಮಡಿಕೇರಿಕ್ ಕಾಕಿತ್ ಅಯಿಂಗಡ ಮುಕ್ರಿಯಕ್ ಪೂವ್ ಪಚ್ಚಡ ಎಣ್ಣಕ ಪೂವ್‌ರ ಪೊಲ್ಲಪಣಿ ಮಾಡ್‌ನ ನಿಪ್ಪುಕ್ ಇಟ್ಟಿವ ಪಟ್ಟಾ ವಸ್ತ್ರತ್‌ನ ಇನಾಂ ಆಯಿತ್ ಕೊಡ್ತತ್. ಸಾಮಾನ್ಯ ಜನಕ್ ತೋಕ್, ಮದ್ದಾನ ಕೊಡ್ತಿತ್ ಇಂಗ್ಲೀಷ್‌ಕಾರ ರಾಜಂಡ ಮೀದ ಎಕ್ಕೇಂಗಿ ಪಡೆಪೊಪ್ಪಕ್ ಬಂದಕ ಅಯಿಂಗಳ ಎದ್‌ರಾಡುವಕ್ ಬರೊಂಡೂ. ಅಕ್ಕ ಅಯಿಂಗಕ್ ಸುದ್ದಿ ತಪ್ಪಿಂದ್ ಎಣ್ಣಾಚಿ. ಇಚ್ಚಕೆ ಅಲ್ಲತೆ ಚಿತ್ರದುರ್ಗ ಪಿಳ್ಳಾ ರಾಯ ದುರ್ಗತ್‌ಂಜ ಬೇಡರ ಸೈನ್ಯತ್‌ನ ಕಾಕ್ಚಿಟ್ಟಿತ್ ಮಡಿಕೇರಿಲ್ ಆಕ್‌ಚಿ.

## ಚಿಕ್ಕವೀರರಾಜೇಂದ್ರ ಚನ್ನಬಸಪ್ಪನ ತಾಂಡ ಪ್ರದಾತಕ್

### ಕೊಂಡ ಬಪ್ಪಕ್ ಮಾಡ್ತನ ಪ್ರಯತ್ನ

ಕಾಸವೈಜೋರ್ ಚನ್ನಬಸಪ್ಪನ ವಾಪಾಸ್ ಅಯೆಚಿಕೊಡ್ತಾಂಗ್ ವೀರರಾಜೇಂದ್ರಂಗ್ ದುಂಬ ಚಡಿ ಇಂಜತ್. ತಾನ್ ತಾಂಡ ರಾಜ್ಯತ್ ಒಳ್ಳಲ್ ಎಂತ ಬೋಂದುವೇಂಗೂ ಮಾಡೊಲೊಂದ್ ಗೇನ ಮಾಡಿತಿಂಜ ರಾಜಂಗ್ ಕುಂಟ ಬಸವಯ್ಯ ಪಿಳ್ಳಾ ಅಬ್ಬಾಸ್ ಆಲಿ ಸಮರ್ಥನೆ ಮಾಡುವ ಇಂಜತ್. ಈ ಗೇನತ್ ಬ್ರಿಟಿಷ್‌ಕಾರ ಚನ್ನಬಸಪ್ಪನ ತಾಂಗ್ ಒಪ್ಪಾಚಿಡತೆ ಉಳ್ಳದ್ ತಾಂಡ ರಾಜತ್ವಕ್ ಅವಮಾನಂದ್ ಅರ್‌ಂಜತ್. ಆನಗುಂಡ್ ಕೂಡ ಕೂಡೆ ಗವರ್ನರ್‌ಕ್ ಕಾಗದ ಎಳ್ಳೆಚಿ.

ಅನ್ನನೆ ಬೆಂಗಳೂರ್‌ಲೆ ಚನ್ನಬಸಪ್ಪನ ಕೊಲ್ಲ್‌ಚಿಡುವಕ್ ಸುಮಾರ್ ತರ ಪೇಚಾಡ್‌ಚಿ. ಪಾರ್ಸಿ ವ್ಯಾಪಾರಿ ದಾರಾಶೇಟ್‌ನ ಅಯೆಚಿ ನೋಟ್‌ಚಿ. ಅವು ಪಂಡ್ ದೊಡ್ಡ ವೀರರಾಜೇಂದ್ರಂಡ ಕಾಲತ್‌ಂಜೆ ಮಡಿಕೇರಿಕ್ ಬಂದಿತ್ ರಾಜನುಂಡ್ ಯಾಲ, ತೇನ್, ಮೇಣ ಎಡ್‌ತಂಡ್ ಪೋಪ ಇಂಜತ್. ಅನ್ನನೆ ಬಪ್ಪಕ್ ಅವು ಅರಮನೆಕ್ ಬೋಂಡಿಯ ಸಾಮಾನ್ ಕೊಂಡಬಪ್ಪ ಇಂಜತ್. ಇನ್ನನೆ ಬಪ್ಪ ಇಂಜ ಪಾರ್ಸಿಯ ಕೊಡಗರ ರಾಜ್ಯಭಾರತ್ ರಾಜಂಗ್ ಸಹಾಯ ಮಾಡ್‌ನವು ಉಂಡ್.

ಲಿಂಗರಾಜಂಡ ಕಾಲತ್ ಮಡಿಕೇರಿಲ್ ಪುದಿಯ ಅರಮನೆ ಕೆಟ್ಟಾಚಿಡುವಕ್ ಪಾರ್ಸಿ ವರ್ತಕ ಕವಾಸ್‌ಜಿ ಎಣ್ಣುವಂವ ದುಂಬ ಸಹಾಯ ಮಾಡಿತಿಂಜತ್. ಅನ್ನನೆ ಹೀರ್‌ಜಿ, ದಾರಾ ಶೇಟ್...ಇವೆಲ್ಲ ರಾಜಂಡ ಆಪ್ತ ಸಿನೇತಂಗ. ಇದ್‌ತ್ ಹೀರ್‌ಜಿನ ಕುಂಟ ಬಸವಂಡ ಚಾಡಿ ತಕ್ಕ್ ಕೇಟಿತ್ ಹಿಂಸೆಲ್ ಚಾವ್‌ಚಿಟ್ಟತ್. ಹೀರ್‌ಜಿ ಮಕ್ಕಂದೂರರ್ ಒರೇ ಮನೆಕಾರಡ ದಂಡ್ ಕೊಡವತಿಯಳ ಮಂಗಲ ಕೈಂಜಿತಿಂಜತ್.

ಇನ್ನನೆ ವೀರರಾಜೇಂದ್ರ ಒಡೆಯ, ಚನ್ನಬಸಪ್ಪನ ಕೊಡಗ್‌ಕ್ ಕಾಕ್‌ಚಿಟ್ಟವಕ್ ಕಮಿಷನರ್ ಕ.ಬ್ರಿಗ್ಸ್‌ರ ಪಕ್ಕ ತಾಂಡ ಓರ್ ನಿಯೋಗ ಅಯೆಚತ್. ಅನ್ನನೆ ಕಮಿಷನರ್ ಆಫೀಸ್‌ಲ್ ಇಂಜ ಧಾರಾವಾಡ ಕೃಷ್ಣಯ್ಯ ಪಿಳ್ಳಾ ಅವಂಡ ಬೋಜಪ್ಪ ಶಾಮರಾಯಂಗ್ ನಿರೂಪ ಎಳ್ಳಿತ್ ಅಯಿಂಗಕ್ ಇನಾಂ ಆಯಿತ್ ನಾಲ್ ಪೀಚಿಕತ್ತಿನ ಅಯೆಚಿತ್ ಕ. ಬ್ರಿಗ್ಸ್‌ಕ್ ಪ್ರಭಾವ ಕಾಟುವಕ್ ನೋಟ್‌ಚಿ. ಎದೂ ಪ್ರಯೋಜನ ಆಯಿಲೆ.

ಆನಗುಂಡ್ ಚನ್ನಬಸಪ್ಪನ ಮೋಸತ್ ಕೊಲ್ಲೊಂಡೂಂದ್ ಗೇನ ಮಾಡ್‌ಚಿ. ಇದ್‌ಂಗಾಯಿತ್ ಮೈಸೂರ್‌ರ ನಂದಾಲಾಲ್ ಭಾರತಿ ಎಣ್ಣುವ ವ್ಯಾಪಾರಿನ ಕಾಕಿತ್ ಎರ್ಪಾಡ್ ಮಾಡ್‌ಚಿ. ಇದೂ ಆಕತಿಪ್ಪಕ ಬ್ರಿಟಿಷ್‌ಕ್ ವಿರೋಧಿ ಆಯಿತಿಂಜ

ಶಿವಮೊಗ್ಗತ್ ಒಳಚಂಡ್ ಇಂಜ ಸರ್ಜಪ್ಪ ನಾಯಕ ಪಿಳ್ಳಾ ಕೂಟಾಕಾರಕ್ ತಾಂಡ ರಾಜ್ಯತ್ ನೆಲೆ ಕೊಡ್ತತ್.

ಈಂಡೆಡೆಲ್ ಬೇಡರ ಜಟ್ಟಿಯೊಬ್ಬನ ಬೆಂಗಳೂರ್‌ಲ್ ಇಂಜ ಚನ್ನಬಸಪ್ಪಂಡ ಮನೆಕ್ ಅಯೆಚಿತ್ ಕೊಲ್ಲುವಕ್ ನೋಟಾಚಿ. ಈ ಜಟ್ಟಿ ಎಕ್ಕೋಲು ತಂಗಡ ಮನೆರ ಪಕ್ಕ ಓಡಿ ಕಳಿಪಾನ ನೋಟಿತ್ ದೇವಮ್ಮಾಜಿಕ್ ಅಗ್ಗೇನ ಬಾತ್. ಅವ ಬೈಟ್ ಎಕ್ಕೋಲು ಓರ್ ಪೊಣ್ಣಾಳ್‌ರ ಮನೆಕ್ ಪೋಪಾನ ಕಂಡ ದೇವಮ್ಮಾಜಿ ಅವನ ಪುಡಿಪಕ್ ತಾಂಡ ಜನಕ್ ಎಣ್ಣಾಚಿ. ಈ ಪೋಲೆ ಒನ್ನಾಂದ್ ಬೈಟ್ ಜಟ್ಟಿ ಆ ಪೊಣ್ಣಾಳ್‌ರ ಮನೆಕ್ ಪೋನದೆ ಚನ್ನಬಸಪ್ಪಂಡ ಕೂಟಾಕಾರ ಮನೆರ ಸುತ್ತು ನಿಂದಂಡತ್. ಇದಾನರ್‌ಂಜ ಜಟ್ಟಿ ಬೊತ್ತಿತ್ ಬೆಂಬರ ಕೆಂವತಾನ ಬೂಕಿತ್ ಓಡುವಕ ಅವಂಡ ಕಾಲ್‌ಕ್ ಗೂಟ ಕುತ್ತಿತ್ ಅಲ್ಲಿಯೆ ಬುದ್ಧಾರ್‌ತ್.

ಪಿತ್ಯಾಂದ್ ಅವನ ಪುಡಾಚಿತ್ ಕಂಪೆನಿರ ಅಧಿಕಾರಿಯಕ್ ಒಪ್ಪಾಚಿಟ್ಟಿತ್. ಇನ್ನನೆ ವೀರರಾಜೇಂದ್ರ ಮಾಡಾನ ಪ್ರಯತ್ನ, ಕೆಣಿ ಎಲ್ಲ ವಿಫಲ ಆಚಿ.

### ದೊಡ್ಡ ವೀರರಾಜೇಂದ್ರಂಡ ಮೋಳಿಯಡ ಆಖೀರಿ

ಲಿಂಗರಾಜೇಂದ್ರ ಒಡೆಯ, ದೊಡ್ಡ ವೀರರಾಜೇಂದ್ರ ಒಡೆಯಂಡ ನಾಲ್ ಮೂಡಿಕುಳ್ಳಿಯಳ ಕೊಡವಕ್ ಲಿಂಗಧಾರಣೆ ಮಾಡಿತ್ ಮಂಗಲ ಕೈಚಿತಿಂಜತ್.

ಪುಂಗನೂರ್ ಪಿಳ್ಳಾ ಸ್ವಾದೆ ರಾಜಕುಮಾರಂಗ ದೇವಮ್ಮಾಜಿನ ಮಂಗಲ ಆಪಕ್ ಬಯಂದಕೊ ಲಿಂಗರಾಜೇಂದ್ರ ಒಡೆಯ ಅಯಿಂಗಕ್ ಮೋಳಿಯಳ ಮಂಗಲ ಕೈಚಕ, ಮಿಳ್ಳಾಕ್ ತಾನ್ ಅವಳುಂಡ್ ಬಲ್‌ಚಂಡ ರಾಜ ಪದವಿಕ್ ತೊಂದರೆ ಆಕೂಂದ್ ಬೊತ್ತಿತ್, ಅವಳ ದಾರ್‌ಕೂ ಮಂಗಲ ಕೈಚಿ ಕೊಡ್‌ಕತೆ ತಾಂಡ ಪ್ರಜೆಯಡಾತೆ ಮಂಗಲ ಕೈಚಿತಿಂಜತ್.

ದೊಡ್ಡ ವೀರರಾಜೇಂದ್ರಂಡ ನಾಲ್ ಮೂಡಿಯಡಾತ್ ದಂಡನೆ ಪೋವ ಮುದ್ದಮ್ಮಾಜಿರ ವಡಿಯ ಚನ್ನವೀರಪ್ಪನ ಚಿಕ್ಕವೀರರಾಜೇಂದ್ರ ಒಡೆಯ ಪಟ್ಟಕ್ ಬಂದಿತ್

ಬೊರಿ ದಂಡಡ್ ಕಾಲತ್ ಚಾವ್‌ಚಿಟ್ಟತ್. ಎಳೆಯ ಮೋವ ರಾಜಮ್ಮಾಜಿ ಈ ನೇರಕ್ ಮುಪ್ಪಡೆ ಚತ್ತನ್ನಕೆ ಕಾಂಬ. ಎನ್ನಂಗಣ್ಣಕ ಅವಡ ಪೆದ ಮಿಳ್ಳಾಕ್ ಎಲ್ಲಿಯೂ ರಾಜ ಕುಟುಂಬತ್ ಬಪ್ಪಲೆ. ಈ ನೇರತ್ ಜಿಂವತ್ ಇಂಜ ದೇವಮ್ಮಾಜಿ ಪಿಳ್ಳಾ ಮಹದೇವಮ್ಮಾಜಿನ ಚಾವ್‌ಚಿಡತೆ ಪೋನಕ, ಚನ್ನಬಸಪ್ಪ ಕೊಡಗರ ಸಿಂಹಾಸನಕ್ ಅಯಿಂಗಡ ಹಕ್ಕನ ಬ್ರಿಟಿಷ್ ಅಧಿಕಾರಿಯ ತಾಂಡ ರಾಜಪದವಿಕ್ ತೊಂದರೆ ಆಕೊಂದ್ ಬೊತ್ತಚಿ. ಅಂವಂಡ ದುಷ್ಟ ಸಲಹೆಗಾರ ದಿವಾನ್ ಕುಂಟಬಸವ ರಾಜಂಡ ಈ ಪೋಡಿನ ಬಲಪಡ್‌ತ್‌ಚಿ.

ಇನ್ನನೆ ದೇವಮ್ಮಾಜಿ, ಮಹದೇವಮ್ಮಾಜಿನ ಕೊಲ್ಲುವ ದುರುದ್ದೇಶತ್ ಚನ್ನಬಸಪ್ಪ ಕೊಡಗಂಜ ಪೋಯಿತ್ ಚೆನ್ನಂಗ್ ದಿನತ್ ವೀರರಾಜೇಂದ್ರ ತಾಂಡ ಜನಳ ಅಯಿಂಗಡ ಮನೆಕ್ ಅಯಿಚಿತ್ ಅಯಿಂಗಳ ಪಿಳ್ಳಾ ಮಕ್ಕಳ ಅಪ್ಪಂಗಳತ್ ಆಕ್‌ಚಿ. ಒನ್ನಾಂದ್ ಪೊಲಾಕ ದಿವಾನ್ ಬಸವಪ್ಪ ಪಿಳ್ಳಾ ಜಮೆದಾರ ಮಂದಯ್ಯ ಅಪ್ಪಂಗಳ ಅರಮನೆಕ್ ಬಂದಿತ್ ಮಡಿಕೇರಿ ಕೋಟೆಕ್ ಈ ರಾಜಕುಮಾರಿಯಳ ಪಲ್ಲಕ್ಕಿಲ್ ಅಳಪ್‌ಚಿಟ್ಟಂಡ್ ಪೋಚಿ.

ಮಡಿಕೇರಿ ಅರಮನೆರ ಬೆಂಬರಿಲ್ ಇಂಜ ಗೋಡೌನ್‌ರ ಓರ್ ಕೋಂಬರೆಲ್ ರಾಜಕುಮಾರಿಯಳ ಬಂಧನಕ್ ಇಟ್ಟಿತ್ ಸುತ್ತೂ ಪಾರಕಾರಳ ಆಕ್‌ಚಿ.

ಅಂದೇ ಮಜ್ಜಣಕ್ ಮುಪ್ಪಡೆ ಬಸಪ್ಪ ಪಿಳ್ಳಾ ಮಂದಯ್ಯ ರಾಜಕುಮಾರಿಯ ಇಂಜ ಕೋಂಬರೆಕ್ ಬಂದಿತ್ ಅಲ್ಲಿ ಪಾರ ಇಂಜ ಜನಡ ಎದಿಕೆ ಅವು ತಂಗಡ ಕೈನ ಕಾಂಜಂಡ್ ಇಂಜ ನೆಯ್ಯಕ್ ಇಡುವನ್ನಕೆ ಎಣ್ಣ್‌ಚಿ. ಅಲ್ಲಿಂಜ ರಾಜಕುಮಾರಿಯಳ ಅದೆ ಕೋಂಬರೆಲ್ ಬುಟ್ಟಿತ್ ಪಡಿ ಇಟ್ಟಂಡ್ ಪೊರ್‌ಟ್ ಪೋಚಿ. ಸುಮಾರ್ ದಂಡ್ ಗಂಟೆರ ನೇರಕ್ ಪುನಾದಿಯ ಬಂದ ಬಸಪ್ಪ ಪಿಳ್ಳಾ ಮಂದಯ್ಯ ಪಾರಕಾರಕ್ ದಂಡ್ ಕೇರ್‌ನ ಕೊಂಡ ಬಪ್ಪಕ್ ಎಣ್ಣಿತ್ ಕೇರ್‌ರ ಓರ್ ತುದಿನ ದೇವಮ್ಮಾಜಿರ ಬೋಳೆಕ್ ಕೆಟ್ಟಚಿ. ಅವ "ನಾಡ ಬೋಳೆಕ್ ಕೇರ್ ಕೆಟ್ಟತೆ"ಂದ್ ಬೋಡಿಯಂಡತ್. ಇದೇ ಪೋಲೆ ಮಹದೇವಮ್ಮಾಜಿಕೂ ಮಾಡ್‌ಚಿ. ದಂಡಾಳೂ ಮೊರ್‌ಟಂಡ್ "ನಂಗಳ ರಾಜಂಡ ಪಕ್ಕ ಕೂಟಿಯಂಡ್ ಪೋ"ಂದ್ ಎಚ್ಚಕ್ ಗೋಳಾಡ್‌ನಕೊ ನಿರ್ದಯಿ ದಿವಾನ್ ಬಸವ ಕೂಟಾಕ್‌ಲೆ. ಅಲ್ಲಿಂಜ ದಂಡ್ ರಾಜಕುಮಾರಿಯಳ ಬೋಳೆಕ್ ಕೇರಾಯಿತೆ ಕುಂದ್‌ರ ಕೊಡಿಂಜ ಅಡಿಕ್ ಇಟ್ಟಂಡ್ ಚಾವ್‌ಚಿಟ್ಟತ್. ಅವು ಚತ್‌ಪೋಚಿಂತ್ ಗೊತ್ತಾನದೆ ದಿವಾನಂಡ ಅಪ್ಪಣೆಪೋಲೆ ಪಾರಕಾರ ಅಯಿಂಗಡ ಚಾವುತಡಿನ ಓರ್ ಬಟ್ಟೆಲ್ ಸುತ್ತಿತ್, ಆ ಗೋಡೌನ್‌ರ ಕೋಂಬರೆರ ಪೊರ್‌ಮೆ ಓರ್ ಚೆರಿಯ ಕೈಬು ತೋಟತ್ ಬೆಚ್ಚತ್.



ಈಂಡೆಲ್ ದಿವಾನ್ ಬಸವ ಕೋಟೆಂಜ ಸುಮಾರ್ ಓರ್ ಮೈಲ್ ದೂರತ್ ಇಂಜ ಕುಂಬಳಗೇರಿ ಉಕ್ಕಡತರ ಹರಿಜನ ಪಿಳ್ಳಾ ವಾಲೆಕಾರಕ್, ಕುಂಬಳಗೇರಿ ಉಕ್ಕಡತರ ಬೆಂಬರಿ ಜನ ಸಂಚಾರ ಇಲ್ಲತ ಓರ್ ಕಾಡಲ್ ದಂಡ್ ಚಾವುನ ಪೂಪಕ್ ಓರ್ ಕುಂಡ್ ಎಡ್‌ಪಕ್ ಅಯೆಚತ್. ಇಳ್ಳಾ ಚೆನ್ನಂಗ್ ಪಾರಕಾರಕ್ ಒಯಿಪತ್ ಏಳ್ ಗಂಟೆರ ಒಳ್‌ಲ್ ಅರಮನೆರ ವಾಯವ್ಯ ದಿಕ್ಕಲ್ ಕೋಟೆ ಕೆಂವತ್‌ರ ಅಡಿಲ್ ಇಂಜ ಗುಟ್ಟ್ ಬಟ್ಟೆಲ್ ಇಪ್ಪಕ್ ಆಚ್ಲೆ ಮಾಡ್‌ಚಿ.

ಅನ್ನನೆ ಏಳ್ ಗಂಟೆಕ್ ದಿವಾನ್ ಬಸವ ಗೋಡೌನ್ ಕೋಂಬರೆರ ಪಾರಕಾರಳುಂಡ್ ರಾಜಕುಮಾರಿಯಡ ಚಾವುನ ಕುಂಬಳಗೇರಿ ಉಕ್ಕಡತರ ಕಾಡಲ್ ಎಡ್‌ತ ಕುಂಡಲ್ ಪೂಪಕ್ ಪೊರ್‌ಪ್‌ಚಿಟ್ಟುಂಡ್ ಪೋಯಿತ್ ಅಲ್ಲಿ ತಾನೆ ಖುದ್ಸ್ ನಿಂದಿತ್ ಪೂಪ್‌ಚಿಟ್ಟತ್.

ಇನ್ನನೆ ದೊಡ್ಡ ವೀರರಾಜೇಂದ್ರಂಡ ಕೊದಿರ ಮೂಡಿಕುಳ್ಳಾಯ ಭಯಂಕರ ಹಿಂಸೆಲ್ ಚತ್‌ಪೋಚಿ. ದೇವಮ್ಮಾಜಿ ತಾನ್ ಚಾವಾಂಗ್ ಚೆನ್ನಂಗ್ ದಿನಕ್ ಮುಪ್ಪಡೆ ಇಂಗ್ಲೆಂಡ್‌ರ ತಾಂಡ ಮನೆಲ್ ತಾಂಡ ಮಾಲ್‌ಮಟತ್‌ನ ಎಲ್ಲಿ ಪೂತ್ ಬೆಚ್ಚಿಯೆಂದ್ ಚಿಕ್ಕ ವೀರರಾಜೇಂದ್ರಂಗ್ ಎಣ್ಣೆತ್. ಅವನುಂಡ್ ತಾಂಗ್ ಜಿಂವಭಯ ಇಲ್ಲೆಂದ್ ತಕ್ಕ್ ಎಡ್‌ತಂಡಿತಿಕ್ಕು. ಎನ್ನಂಗೇಣ್ಣಕ ದಿವಾನ್ ಬಸವ ಅವಡ ಜಿಂವ ಎಡ್‌ಪ ನೇರತ್ ಅವ "ನನ್ನ ರಾಜಂಡ ಪಕ್ ಕೂಟಿಯಂಡ್ ಪೋ"ಂದ್ ದುಂಬ ನೊಂಬಲತ್ ಕೇಟಂಡತ್‌ಂದ್ ಕೊಡಗರ ಚರಿತ್ರೆಕಾರ ಡಾ. ಮೂಗ್ಲಿಂಗ್ ಎಳ್ಳಿತ್.

ಚಿಕ್ಕ ವೀರರಾಜೇಂದ್ರ ಒಡೆಯಂಗ್ ದೇವಮ್ಮಾಜಿ ತಾಂಡ ಮನೆಲ್ ಮಾಲ್‌ಮಟ ಬೆಚ್ಚಿತಿಂಜ ಜಾಗ ಗೊತ್ತಿಂಜತ್. ಎನ್ನಂಗೇಣ್ಣಕ ವೀರರಾಜೇಂದ್ರ ದೇವಮ್ಮಾಜಿನ ಇಗ್ಗೋಡ್ಲಂಜ ಅಪ್ಪಂಗಳಕ್ ಕಡ್‌ತನ ಚೆನ್ನಂಗ್ ದಿನತ್ ದಿವಾನ್‌ಬಸವಂಡ ಕೂಡೆ ಯಡವ ನಾಡ್‌ರ ಕಾಳಿಂಗಯ್ಯ ಎಣ್ಣುವಂವ ತಾಂಡ ಸ್ವಂತ ಮುನಿನ ದೇವಮ್ಮಾಜಿರ ಮನೆಕ್ ಅಯೆಚತ್ ಪಿಳ್ಳಾ ದಿವಾನಂಡ ಕೂಡೆ ದೇವಮ್ಮಾಜಿರ ಬುದ್ಧವ ಕೋಂಬರೆರ ಬಲತ್ ಬರಿರ ಕೆಂವತ್‌ನ ನೆಲತ್‌ಂಜ ಚೆನ್ನಂಗ್ ಕೊಡಿಕ್ ಒಡ್‌ಕೊಂಡು. ಅಲ್ಲಿ ಮಾಲ್‌ಮಟತ್‌ರ ಚೊಂಬು ಕೊಟ್ಟುವಾಂದ್ ಎಣ್ಣೆಂಜತ್.

ರಾಜ ಎಣ್ಣಾನಪೋಲೆ ಕೆಂವ ಒಡ್‌ಪಕ ಮಾಲ್‌ರ ಚೊಂಬು ಕೊಟ್ಟನಾನ ಕಾಳಿಂಗಯ್ಯ ತಾಂಡ ತಕ್ಕ್‌ಲ್ "ನಂಗ ಕೆಂವ ಒಡ್‌ಪಕ ಒಂದರೆ ಸೇರ್ ನೀರ್ ದುಂಬುವಚ್ಚಕ್ ಬಲ್ಟ ಪಿಚ್ಚಳೆರ ಚೊಂಬು ಕೊಟ್ಟಚಿ. ಅದ್‌ನ ನಂಗಡ ಕೈಲೆ ನೇತೋಲಿಂಜತ್. ನಂಗ ಅದ್‌ಂಡ ಬಾಯಿನ ಉತ್ತಲೆ. ಮಡಿಕೇರಿಕ್ ಕೊಂಡ ಬಂದಿತ್ ದಿವಾನ್ ಬಸವ್ ಅದ್‌ನ ರಾಜಂಗ್ ಕೊಡ್‌ತತ್. ಆ ಚೊಂಬುನ ನಂಗಡ ಮಿಳ್ಳಾ ತೊರ್‌ಂದಾಲೆ. ಅದತ್ ಏದ್ ತರ

ಮಾಲ್ಮಾಟ, ರತ್ನ, ನಾಣ್ಯ ಇಂಜತೊ ಗೊತ್ತಿಲ್ಲೆ. ಚೊಂಬು ದುಂಬಿತಿಂಚಲೆ. ಎನ್ನಂಗ್ಗಣ್ಣಕ ಅದ್‌ನ ಕೈಲ್ ಪುಡಿಪಕ ಅದ್‌ಂಡ ಒಳ್‌ಲ್ ಇಂಜ ಸಾಮಾನ್ ಕುಲ್‌ಂಗುವ ಇಂಜತ್. ದೇವಮ್ಮಾಜಿ ರಾಜಂಗ್ ಆ ಮಾಲ್‌ರ ಮೀದ ಎಣ್ಣಾನಾಂಗ್ ಅವಡ ಜಿಂವ ಉಳಿವಾಂದ್ ಗೇನ ಮಾಡಿತಿಂಜತ್. ಆಚೇಂಗಿ, ಇದ್‌ನುಂಡ್ ಅವಳ ಕೊಲ್ಲುವಕ್ ಏದೇ ತಡೆ ಆಯಿಲೆ"ಂದ್ ಎಣ್ಣಚಿ.

ಬ್ರಿಟಿಷ್ ಅಧಿಕಾರಿಯ ಚಿಕ್ಕ ವೀರರಾಜೇಂದ್ರ ಒಡೆಯಂಗ್ ಕೊಡತ  
ಎಚ್ಚರಿಕೆ ಮೈಸೂರ್ ರೆಸಿಡೆಂಟ್ ಕಾಸಮ್ಮಜಾರ್ ಮಡಿಕೇರಿಕ್ ಬಂದಿತ್  
ರಾಜಂಗ್ ರಾಜ್ಯಭಾರತ್‌ರ ವಿಷಯತ್ ಸಲಹೆ ಕೊಡತದ್.

ಚಿಕ್ಕ ವೀರರಾಜೇಂದ್ರ ಒಡೆಯ ಕೊಡಗರ ಏದ್ ಸಮಾಚಾರ ಆಡ್, ತಾಂಡ ಹಿಂಸಾಕೃತ್ಯ ಆಡ್ ಬ್ರಿಟಿಷ್ ಅಧಿಕಾರಿಯಕ್ ಗೊತ್ತಾಪಕಾಗಾಂದ್ ಪೇರ್ತ್ ಎಚ್ಚರ ವಹಿಸ್‌ನಕೊ ಇಕ್ಕಿಕ್ಕ ಅಂವಂಡ ವಿರೋಧಿಯ ಏರ ಆನಾಂಗ್ ಅಂವಂಡ ದುಷ್ಟ ಕಾರ್ಬಾರ್ ಎಲ್ಲ ಗೊತ್ತಾಯಂಡಿಂಜತ್. ಆನಗುಂಡ್ ಚೆನ್ನೈ ಗವರ್ನರ್ ಸರ್ ಫೆದ್ರಿಕ್ ಏಡಂ 1833ತ್ ಕೊಡಗರ ರಾಜಂಗ್ ಓರ್ ಬಲ್ಯ ಕಾಗದ ಎಳ್ಳಿತ್ ತಾಂಡ ಪ್ರಜೆಯಳ ಏದ್ ತತ್ವತ್‌ರ ಮೀದ ಆಳೊಂಡೂಂದ್ ವಿವರಚಿಟ್ಟತ್. ಅನ್ನನೆ 1827ತ್ ಕೊಡಗಲ್ ಆನ ಮರಣದಂಡನೆರ ವರದಿನ ಮೈಸೂರ್ ರೆಸಿಡೆಂಟ್ ಪಿಳ್ಳಾ ಚೆನ್ನೈ ಗವರ್ನರ್‌ಕ್ ಅಯೆಕೊಂಡೂಂದ್ ಗೇನ ಬಪ್ಪಚಿಟ್ಟತ್. ಇಳ್ಳಾ ಮಿಳ್ಳಾಕಾಚೇಂಗೂ ಕೊಡಗರ ರಾಜ ಕೊಡಪ ಮರಣದಂಡನೆ ಪಿಳ್ಳಾ ಕರಿಣ ಶಿಕ್ಷೆರ ಮೀದ ಎಲ್ಲಾ ವಿವರತ್‌ನ ಬ್ರಿಟಿಷ್ ಅಧಿಕಾರಿಯಕ್ ಖಡ್ಡಾಯ ಆಯಿತ್ ಅರಿಚಿಡೊಂಡೂಂದ್ ಎಚ್ಚರಿಕೆ ಕೊಡತತ್.

ಚೆನ್ನೈ ಗವರ್ನರ್ ಕೊಡಗರ ರಾಜಂಗ್ ಎಳ್ಳೊನ್ನಕ್ಕೆ ಮೈಸೂರ್‌ರ ರೆಸಿಡೆಂಟ್ ಕಾಸಮ್ಮಜೋರ್ 1833ಂಡ ಜನವರಿ ಆಖೀರಿರ ಒಳ್‌ಲ್ ಚಿಕ್ಕವೀರರಾಜೇಂದ್ರಂಡ ಕೂಡೆ ವಿಚಾರ ವಿನಿಮಯ ಮಾಡುವಕ್ ಮಡಿಕೇರಿಕ್ ಬಾತ್. 1826ತ್ ಕೊಡಗ್‌ಕ್ ಬಂದಿತಿಂಜ ಕಾಸಮ್ಮಜೋರ್ ಇದಿಕ್ಕ ಏಳ್ ಕಾಲ ಕೈಂಜಪಿಳ್ಳಾ ಬಾತ್. ಕೊಡಗರ ರಾಜಂಡ ಕ್ರೂರಹಿಂಸೆ ಪಿಳ್ಳಾ ಕೊಲೆರ ಮೀದ ಅಚ್ಚಕ್ ವಿಷಯತ್‌ನ ಅರಿಯತಾಂಗ್ ಚಿಕ್ಕ

ವೀರರಾಜೇಂದ್ರಂಗ್ ರೆಸಿಡೆಂಟ್ ಕೂಡೆ ತಕ್ಕ ಪರೆಯುವಕ ಎಲ್ಲಿ ತಾಂಡ ಗುಟ್ಟ್ ರಟ್ಟಾಯಿರುವ ಎಣ್ಣುವ ಪೋಡಿ ಇಂಜತ್. ಅನ್ನನೆ ಕಾಸಮೈಸೋರ್ ಕೇಟ ಚೋದ್ಯಕ್ ಜವಾಬ್ ಕೊಡ್ಪಕ್ ಬೊತ್ತುವ ಇಂಜತ್. ಇಇಸ್ಲಿಮಿಇಕ್ ತಾಂಡ ಪ್ರಚೆಯಳ ಕ್ರೂರ ರೀತಿಲ್ ಆಳುವಾನ ನಿಪ್ಪಚಿಡೊಂಡು ಪಿಇಕ್ ಕಂಪೆನಿ ಸರ್ಕಾರತ್ ಜನಡ ಕೂಡೆ ಕೊಡಗರ ಜನ ಸಮ್ಮಂಧ ಬೊಳ್ತುವಕ್ ಇಕ್ಕ ಉಳ್ಳ ನಿರ್ಕನ ಸಡಾಲ ಮಾಡೊಂಡೊಂದ್ ಕಾಸಮೈಸೋರ್ ಸಲಹೆ ಕೊಡ್ತತ್.

ಇದೊಂಗ್ ರಾಜ, ತಾಂಡ ರಾಜ್ಯತ್ ಪ್ರಚೆಯ ನೆರೆ ರಾಜ್ಯತ್ ಜನಡ ಕೂಡೆ ಕೂಡಿಯಾಡತನ್ನೆ ಉಳ್ಳ ಸಂಪ್ರದಾಯ ಪಂಡ್ಂಜೆ ಉಳ್ಳದ್. ಆನಗುಂಡ್ ಅದ್ನ ಇಕ್ಕ ಸಡಾಲ ಪಡ್ತನಕ ತಾಂಡ ಅಧಿಕಾರ ಕಮ್ಮಿ ಆಪಾಂಡ್ ಎಣ್ಣಿಯಂಡತ್.

ಆಖೀರಕ್ ಕಾಸಮೈಸೋರ್, "ರಾಜ ಇಕ್ಕಿಕ್ಕ ಕಂಪೆನಿ ಸರ್ಕಾರಕ್ ವಿರೋಧ ಆಯಿತ್ ಉಳ್ಳದ್ ಗೊತ್ತಾಯಂಡ್ ಉಂಡ್. ಇಇಸ್ಲಿಮಿಇಕ್ ಕೂ ಇದೇಪೋಲೆ ಆನಕ ರಾಜನ ಸಿಂಹಾಸನತ್ಂಜ ಉಳ್ಳಪೊಲು" ಎಣ್ಣುವ ಸೂಚನೆನ ರಾಜಂಗ್ ಕೊಡ್ತತ್.

ಇದೊಂಗ್ ರಾಜ ತಾನ್ ನಿರಪರಾಧಿ. ತಾಂಡ ಶತ್ರುವ ಅಪವಾದ ಪೊರ್ಪ್ಚಿಟ್ಟಿಂಡ್ ಉಳ್ಳ. ತಾನ್ ಕಂಪೆನಿ ಸರ್ಕಾರತ್ ನೇಮತನ ಸೆರಿಕ್ ಪಾಲನೆ ಮಾಡಿಯಂಡ್ ಉಳ್ಳಂದ್ ಎಣ್ಣುವಕ, ಮೈಸೂರ್ ರೆಸಿಡೆಂಟ್ ಪ್ರಚೆಯಕ್ ಏರ ಸ್ವಾತಂತ್ರ್ಯ ಕೊಡ್ಕೊಂಡೊಂದ್ ಎಣ್ಣೊಚಿ.

ಕೊಡಗ್ ಸ್ವತಂತ್ರ ರಾಜ್ಯ. ಇದೊಂಡ ರಾಜನಾನ ತಾನ್ ತಾಂಡ ರಾಜ್ಯತ್ ಇಪ್ಪಬಂದನ್ನೆ ಮಾಡುವೀಂದ್ ರಾಜ ಜವಾಬ್ ಕೊಡ್ತತ್.

ಅಕ್ಕ ಕಾಸಮೈಸೋರ್ "ಕೊಡಗ್ ಪಂಡ್ ಟಿಪ್ಪರ ಅಧೀನತ್ ಇಂಜದ್, ಬಯ್ಯಂಜ ಕಂಪೆನಿ ಸರ್ಕಾರತ್ ಅಧೀನ ಆಚಿ. ಸುಲ್ತಾನಂಗ್ ಕೊಡಗ್ ರಾಜ್ಯತ್ಂಜ ಉ. 24 ಆಯಿರ ಕಪ್ಪ ಆಯಿತ್ ಕೊಡ್ಪ ಇಂಜದ್ ಇಕ್ಕ ಆಂಡ ಬದಲ್ ಕಾಲಕ್ ಓರ್ ಆನೆನ ಕಾನಿಕೆ ಆಯಿತ್ ಕೊಡ್ತಂಡ್ ಉಳ್ಳದ್ ಕೊಡಗ್ ಕಂಪೆನಿ ಸರ್ಕಾರತ್ ಅಧೀನತ್ ಉಳ್ಳಾಂಡ ಸಂಕೇತ" ಎಣ್ಣೊಚಿ.

ದೊಡ್ಡವೀರರಾಜೇಂದ್ರಂಡ ಮೋವ ದೇವಮ್ಮಾಜಿ ಪಿಇಕ್ ರಾಜ ಕುಟುಂಬಕಾರಳ ಚಾಯಿತೆ ನೋಟಿಯವಂಡೊಂದ್ ರಾಜಂಗ್ ಎಣ್ಣುವಕ, ತಾಂಗ್ ಅನ್ನತ ಬುದ್ಧಿ ತಕ್ಕ ಎಣ್ಣುವ ಅವಶ್ಯಕತೆ ಇಲ್ಲೆ. ಅವು ಎಲ್ಲ ಚಿತ್ತಿತ್ ದುಂಬ ಕಾಲ ಆಚೀಂದೂ ಎಣ್ಣೊಚಿ.

ಇನ್ನನೆ ಕೊಡಗ್ ರಾಜನ ಕಂಪೆನಿ ಸರ್ಕಾರಕ್ ವಿಧೇಯ ಆಯಿತ್ ಇಂಜಂಡ್ ರಾಜ್ಯ

ಆಳುವಕ್ ಎಣ್ಣನ ರೆಸಿಡೆಂಟ್‌ರ ಪ್ರಯತ್ನ ಎಲ್ಲ ವಿಫಲಾಚಿ.

ಚಿಕ್ಕವೀರರಾಜೇಂದ್ರ ಕ್ರಮೇಣ ತಾನ್ ಕಂಪೆನಿ ಸರ್ಕಾರತ್‌ರ ಆಶ್ರಿತಂಡನ್ನಕೆ ಇಂಚ್‌ಲೆ. ಕಂಪೆನಿ ಸರ್ಕಾರತ್‌ರ ವಿರೋಧ ಇಂಜಯಿಂಗ್‌ಕೆಲ್ಲ ತಾಂಡ ರಾಜ್ಯತ್ ನೆಲೆ ಕೊಡ್‌ತತ್. ಅನ್ನನೆ ಮೈಸೂರ್ ರಾಜಂಡ ಅಧಿಕಾರಿಯಡ ಕೂಡ ಒಳೀಯ ಕೇತರೆ ಮಾಡ್‌ಚಿ.

ಇದ್‌ನೆಲ್ಲ ಅರ್‌ಂಜ ರೆಸಿಡೆಂಟ್ ಕೊಡಗೂರ ಪ್ರಜೆಯಳ ಕಾಪಾಡುವ ನ್ಹಲ್ ಅ ಕಂಪೆನಿ ಸರ್ಕಾರ ಓರ್ ದೇಶೀಯ ಸೈನ್ಯತ್‌ನ ಮಡಿಕೇರಿ ಪಕ್ಕ ಬೆಕ್ಕೊಂಡೂಂದ್ ಒರಾತ ಮಾಡ್‌ಚಿ. ಅನ್ನನೆ ಅಧಿಕಾರಿಯ ರಾಜಂಗ್ ತಂಗಕ್ ವಿರೋಧ ಕೆಲಸ ಮಾಡುವಕಯ್ಯಂದ್ ಗೆಡಿ ಗೆಡಿ ಎಲ್ಲಿಯಂಡೇ ಇಂಜತ್.

### 1830ತ್ ಕೊಡಗೂಕ್ ಬಂದ ಡಾ.ಜಫರ್‌ಸನ್ ಪಿಳ್ಳಾ ಕ್ಯಾ.ಹಿಲ್ ಚಿಕ್ಕವೀರಾಜೇಂದ್ರಂಗೂ ಡಾ.ಜಫರ್‌ಸನ್‌ಕೂ ಚಿನ್ನಬಸಪ್ಪಂಡ ಸಮ್ಮಂದ್ರ ಕಾಗದ ವ್ಯವಹಾರ

1830ತ್ ಚಿಕ್ಕವೀರರಾಜೇಂದ್ರ ಒಡೆಯಂಗ್ ದುಂಬ ಕಯ್ಯತಾಚಿ. ಕಾಯಿಲೆ ವಾಸಿಯಾಂಡುವೇಂಗಿ ಆಪರೇಷನ್ ಅವಶ್ಯಂದ್ ರಾಜಂಡ ಹಕೀಮಂಗ ಅಭಿಪ್ರಾಯ ಪಟ್ಟತ್. ಇದ್‌ಂಗ್ ಓರ್ ಬ್ರಿಟಿಷ್ ಡಾಕ್ಟರ್‌ನ ಅಯೆಚಿತರೊಂಡೂಂದ್ ರಾಜ ಮುಂಬೈ ಸರ್ಕಾರತ್ ಅಧಿಕಾರಿಯಕ್ ಎಳ್ಳಚಿ. ಈ ಪೋಲೆ ಅವು ಡಾ.ಜಫರ್‌ಸನ್ ಎಣ್ಣವ ನಲ್ಲ ಓರ್ ಡಾಕ್ಟರ್‌ನ ಮಡಿಕೇರಿಕ್ ಅಯೆಚತ್. ಡಾಕ್ಟರ್‌ರ ಕೂಡ ಸರ್ಕಾರತ್‌ರ 54ನೆ ರೆಜಿಮೆಂಟ್‌ರ ಕ್ಯಾ. ಹಿಲ್ ಬಾತ್.

ಡಾ.ಜಫರ್‌ಸನ್ ಮಡಿಕೇರಿಕ್ ಬಂದಿತ್ ರಾಜನ ಪರೀಕ್ಷೆ ಮಾಡುವಕ ಕಾಯಿಲೆ ಒಂದೂ ಇಲ್ಲೆಂದ್ ಗೊತ್ತಾಚಿ. ರಾಜಂಡ ಹಕೀಮಂಗ ಮುಂಡತೆ ಎಣ್ಣೆತ್. ಬ್ರಿಟಿಷ್ ಡಾಕ್ಟರ್ಸ್ ಕೊಡಗೂಲ್ ಚಿನ್ನಂಗ್ ದಿನ ಕುಶಿಲ್ ಇಪ್ಪಕ್ ಓರ್ ಅವಕಾಶ ಮಾಡ್‌ಚಿ. ರಾಜ ಇಯಂಗಳ ಕೊಡಗೂಲ್ 22 ದಿನ ಆಕಿಯಂಡ್ ಬೆಂದು ತಕ್ಕಾರ ಮಾಡ್‌ಚಿ. ಈ ನೇರತ್ ರಾಜ ಅಯಿಂಗಳ ಗೆಡಿ ಗೆಡಿ ಬೋಟಿಕ್ ಕೂಟಿಯಂಡ್ ಪೋಪ ಇಂಜತ್. ಈ ನೇರತ್ ಡಾ.ಜಫರ್‌ಸನ್ ತಾಂಡ ಓರ್ ಸಿನೇತಂಗ್ ಎಳ್ಳನ ಕಾಗದ ಇನ್ನನೆ ಉಂಡ್.

"ನಂಗ ಅರಮನೆಕ್ ಎತ್ತುವಕ ನಂಗಳ ರಾಜಂಡ ಪಕ್ಕ ಕೂಟಿಯಂಡ್ ಪೋಚಿ. ರಾಜ ನಂಗಳ ಪೇರ್ತ್ ಪ್ರೀತಿಲ್ ತಕ್ಕಾರ ಮಾಡ್‌ಚಿ. ಅಲ್ಲಿಂಜ ಪಣ್ಣ್‌ಫಲ, ಪೂತೋಟ ಬೊಳ್‌ತಾನ ಇಂಗ್ಲೀಷ್‌ಕಾರಕ್ ಆಯಿತ್ ಕೆಟ್ಟ್‌ನ ಬಲ್ಯ ಓರ್ ಬಂಗ್ಲೆಕ್ ಕೂಟಿಯಂಡ್ ಪೋಚಿ. ಈಂಡ ಸುತ್ತೂ ಪಲತರ ಪಣ್ಣ್ ಪಿಳ್ಳಾ ಎರ ಗಮನ ಉಳ್ಳ ಪೂವಾರ ತೋಟ ಇಂಜತ್. ಅಲ್ಲಿ ದುಂಬ ಪಣ್ಣ್ ಬುಟ್ಟಿ ಮರ ಇಂಜತ್. ಈ ಮರ ಬಂಗಲೆಕ್ ನಲ್ಲ ನಳ ಕೊಡ್‌ಪ ಇಂಜತ್.

ಬಂಗ್ಲೆರ ಪಕ್ಕತ್ ಮಾರ್ಬಲ್‌ಲ್ ಕೆಟ್ಟ್‌ನ ಕಟ್ಟೆ ಪಿಳ್ಳಾ ಮೊಟ್ಟ್‌ಂಜ ಮಾಡ್‌ನ ಓರ್ ಕೆರೆ ಇಂಜತ್. ಈಂಡ ನಡೂಲ್ ಓರ್ ಕಾರಂಜಿ ಇಂಜತ್. ಆದತ್ ಮನಾರ ಪಿಳ್ಳಾ ದುಂಬ ಚಾಯುಳ್ಳ ನೀರ್ ಇಂಜದೆ ಅಲ್ಲತೆ ಅದತ್ ಸುಮಾರ್ ಬಲ್ಯ ಬಲ್ಯ ಮೀನ್ ಅಪ್ಪರಿಪ್ಪರ ಪಾರಿ ಕಳಿಪ ಇಂಜತ್. ರಾಜ ಇಲ್ಲಿಕ್ ಎಕ್ಸೋಲು ಮಜ್ಜಣ ಬಪ್ಪ ಇಂಜತ್. ಆ ನೇರತ್ ಅವ ತಾಂಡ ಕೈಲ್ ಓರ್ ಪೊನ್ನಾರ ಗಂಟೆನ ಅಲ್ಲಾಚಿಡುವ ಇಂಜತ್. ಗಂಟೆರ ಸದ್ ಕೇಪದೆ ಎಲ್ಲ ಮೀನ್ ಅವಂಡ ಎದಿಕೆ ತೀನಿಕಾಯಿತ್ ಬಂದ್‌ಕೂಡುವ ಇಂಜತ್! ಅಕ್ಕ ರಾಜಂಡ ಸೇವಕ ಪುಡ್‌ಚಂಡ್ ಇಪ್ಪ ಕುಕ್ಕೆಂಜ ಮರಿಕಪ್ಪೆ ಪಿಳ್ಳಾ ಪೊರಿಕಡ್ಲೆನ ಇಡುವ ಇಂಜತ್.

ಈ ತೋಟತರ ಇಞ್ಚೋರ್ ಬರಿಲ್ ಕರ್ತ ಸಂಗಮರವರಿ ಕಲ್ಗರ ಮೊಟ್ಟ್ ಇಂಜ ಗೋಪುರಾಕೃತಿ ಕಟ್ಟಡ ಇಂಜತ್. ಈಂಡ ಎದಿಕೆ ಇಂಜ ಚಾಯುಳ್ಳ ಮೊಟ್ಟ್‌ಲ್ ರಾಜ ಬೋಟೆಲ್ ಕೊಂದ ಅದೆಚ್ಚೆಕೊ ಕಣಕರ ಆನೆಯಡ ಬೊಳ್‌ತ ಮಂಡೆರ ಓಡ್‌ನ ಸಾಲಾಯಿತ್ ಬೆಚ್ಚಿಂಜತ್!

ರಾಜಂಡ ಮೂಡ್ ನೋಟುವಕ್ ದುಂಬ ಚಾಯಿಂಜತ್. ಅವಂಗ್ ಬೋಟೆ, ಕುದರೆಸವಾರಿ ಎಣ್ಣಕ ದುಂಬ ಕುಶಿ. ಬಲ್ಯ ಕಣ್ಣ್, ಗಾಣಿ ಮೂಕ್ ಪಡ್‌ಂದ ರಾಜ ಬುದ್ಧಿವಂತಂಡನ್ನೆ ಕಾಂಬ ಇಂಜತ್. ನಲ್ಲ ಗುರಿಕಾರ. ಅವಂಡ ಕೊದಿರ ಆಯುಧ ಎಣ್ಣಕ ಕತ್ತಿ ಪಿಳ್ಳಾ ಶೂಲ. ಅನ್ನನೆ ನಲ್ಲೋರ್ ಚಿತ್ರಕಾರ, ಸಂಗೀತತ್ ದುಂಬ ಆಸಕ್ತಿ. ಅರಮನೆಲ್ ಒಮ್ಮತೆ ಐರೋಪ್ಯ ಸಂಗೀತಗಾರಡ ಓರ್ ಮೇಳ ಇಂಜತ್.

ಅರಮನೆಲ್ ಬಲ್ಲೋರ್ ಆಯುಧತರ ಮ್ಯೂಸಿಯಂ ಇಂಜತ್. ರಾಜಂಗ್ ತಾಂಡ ಆಯುಧತನೆಲ್ಲ ಬಂದಯಿಂಗ್ ಕಾಟುವದೆ ಓರ್ ಕುಶಿ. ಈ ರಾಜಂಡಲ್ಲಿ ನಂಗ ಕಂಡ ಓರ್ ಕುಶಿರ ವಿಷಯ ಎಣ್ಣಕ ಅವಶ್ಯ ಪಟ್ಟಲ್ಲಿ ಒಮ್ಮೆಗೆ 25 ಆಯಿರ ಜನಳ ತಂಗಡ ಆಯುಧತೋಡೆ ಕೂಟುವ ತಾಕತ್ ಇಂಜತ್. ಅನ್ನನೆ ಎಲ್ಲ ರೈತಂಗಡ ಕೂಡೆ ಕೂಡಿಯಂಡ್ ಅಯಿಂಗಡ ಕಷ್ಟ, ಸುಖತನ ಅರಿವ ಇಂಜತ್. ರಾಜಂಡ ಕೂಡೆ

ಇಂಗ್ಲೀಷ್‌ಕಾರಳಾನ ನಂಗಳ ನೋಟುವಕ್ಂದೇ ಏರ ಕಣಕ್‌ಲ್ ಜನ ಬಂದ್ ಕೂಡುವ ಇಂಜತ್! ಪ್ರಜೆಯ ರಾಜನ ದುಂಬ ಪ್ರೀತಿಲ್ ಕಾಂಬ ಇಂಜತ್‌ಂದ್ ಎಣ್ಣುವಕ್ ನಾಕ್ ದುಂಬ ಕುಶಿಯಾಪ. ಎನ್ನಂಗೇಣ್ಣ ಕೆನ್ನಂಗಾಳ್ ತಂಗಡ ದುರುದ್ದ ಶೇತ್‌ನ ಸಾಧನೆ ಮಾಡುವಕಾಯಿತ್ ರಾಜಂಡ ಮೀದ ಬೋಂಡತ ಅಪಪ್ರಚಾರ ಮಾಡ್‌ಚಿಟ್ಟಿದ್ ಸತ್ಯಕ್ ದೂರ ಆನದ್‌ಂದ್ ಎಣ್ಣುವದ್ ನಾಡ ಕರ್ತವ್ಯಂದ್ ಗೇನ ಮಾಡಿಯೆ. ರಾಜನುಂಡ್ ಕೊಲ್ಲ್‌ಚಿಟ್ಟ ಜನಡ ಬೆಂದುವ ಮುಂಬೈಂಜ ನಾಕ್ ಅರಿಚಿಟ್ಟವು, ನಾಡ ಎದಿಕೆ ಜಿಂಪತ್ ಉಳ್ಳಾನ ಕಂಡಿತ್ ನಾಕ್ ದುಂಬ ಕುಶಿಯಾಚಿ. ಎಣ್ಣ ಕ ರಾಜ ಕೊಲ್ಲ್‌ಚಿಟ್ಟಿತ್‌ಂದ್ ಮಾಡ್‌ನ ಸುದ್ದಿ ಪೊಟ್.

ಒನ್ನಂದ್ ಬೈಟ್ ನಡಪಾದ್ರೆ ನೇರಕ್ ರಾಜಂಡ ಸೇವಕ ನನ್ನ ಒಪ್ಪಿತ್ ರಾಜ ಕಾಕಿಯಂಡ್ ಉಂಡ್‌ಂದ್ ಎಣ್ಣೊಚಿ. ನಾನ್ ರಾಜಂಗ್ ಬೈಟ್ ಒಮ್ಮೆಕೆ ಕಯ್ಯತಾಯಿರ್‌ತ್ ಕಾಂಬಾಂದ್ ಬೊತ್ತಿಯಂಡ್ ಅಲ್‌ಂಬಲ್‌ಲ್ ಅರಮನೆಕ್ ಪೋನ. ಅಕ್ಕ ರಾಜ ಕ್ಯಾ.ಹಿಲ್‌ರ ಕೂಡ ನನ್ನ ರಾಜಂಡ ಕೂಡ ಬೋಟೆಕ್ ಕಾಕ್‌ನದ್ ಕೇಟಿತ್ ಆಶ್ಚರ್ಯ ಆಚಿ.

ಮಿದ್ವ ರಾಜನೆ ಆನೆರ ಎದಿಕೆ ಅಳೆತಂಡ್ ಮಾವುತನಾಚಿ. ನಂಗ ದಂಡಾಳೂ ರಾಜಂಡ ಬೆಂಬರಿ ಅಳೆತತ್. ನಂಗ ಬೋಟೆರ ಜಾಗ ಎತ್ತುವಕ ಪೊಲಾಕ ಆರ್ ಗಂಟೆ. ಅಲ್ಲಿ ನಂಗಕ್ ಪೊಲಾಕತ್‌ರ ಕಾಪಿರ ವ್ಯವಸ್ಥೆ ಇಂಜತ್. ಅಲ್ಲಿ ದುಂಬಾ ಡೇರೆ ಇಟ್ಟಿತಿಂಜದೆ ಅಲ್ಲತೆ ರಾಜಂಡ ಪೊಣ್ಣಾಳ ಆ ಡೇರೆ ಒಳಂಜೆ ನಂಗ ಜಾತಿಯಕ್ ಬೊಡಿ ಬೆಪ್ಪಾನ ನೋಟುವನ್ನೆ ಮಾಡಿತಿಂಜತ್.

ರಾಜ ಬೋಟೆಕ್ ತಯಾರಿ ಆಕಣೆ ನಂಗ ಜಾಯಿತೆ ವರಿಯಂಡತ್. ಅಲ್ಲಿಂಜ ನಂಗಕ್ ಬೋಟೆರ ಮೀದ ಅರಿವಿಕೆ ತಾತ್. ಮರತ್ ಕೆಟ್ಟಿತಿಂಜ ಅಟ್ಟಣಿಲ್ ನಂಗ ದಂಡಾಳೂ ಅಳೆತತ್. ಅನ್ನನೆ ರಾಜ ಪತ್ತನದು ಅಂವಂಡ ಬಯ್ಯ ರಾಜಂಡ ಪರಿಚಾರಕಂಗ ಪತ್ತಿತ್ ನಂಗ ಬೆಂಬರಿ ನಿಂದತ್.

ಸುಮಾರ್ ನೇರಕೆತ್ತನೆ ನಂಗ ಜಾತಿಯ ಬಪ್ಪಾನೆ ಕಾತಂಡ್ ಅಳೆತತ್. ಆ ನೇರತ್ ರಾಜ ತಾಂಡ ಬೋಟೆರ ಅನುಭವತ್‌ನೆಲ್ಲ ಎಣ್ಣೆಯಂಡ್ ನಂಗಕ್ ಬೇಜಾರ ಆಕತನ್ನೆಕೆ ನೋಟಿಯಂಡತ್.

ಅಕ್ಕಣೆ ಬೊಡಿರ ಸದ್ವ್, ಕೊಂಬು ಉರ್‌ಪುವ, ಧೋಳ್ ಸದ್ವ್, ಬೋಟೆಕ್ ಬಂದ ಜನಡ ಕೂತ್ ಕೇಟಿತ್. ಅಕ್ಕ ಬೋಟೆ ಸುರು ಆಯಿತ್ ನಂಗ ಇಂಜ ಜಾಗಕ್ ರಾಜಂಡ ಜನ ಜಾತಿಯಳ ದೊವ್‌ತಿಯಂಡ್ ಬಪ್ಪಾಂದ್ ಗೊತ್ತಾಚಿ. ಚೆನ್ನ ನೇರತೆ ಸುಮಾರ್

ಕಾಡ್‌ಜಾತಿಯ ನಂಗಡ ಬರಿಕ್ ಬಪ್ಪ ಕೂಡ್‌ಚಿ. ಅದತ್ ಬೊರಿ ಆನೆಯಕ್ ಮಾತ್ರ ನಂಗ ಬೊಡಿ ಬೆಕ್ಕೊಂಡೂಂದ್ ರಾಜ ಎಣ್ಣೆತಿಂಜತ್. ಕೂಡೆನ್ನೆ 12 ಆನೆಯ ನಂಗಡ ಎದಿಕೆ ಬಂದ್‌ರ್‌ತ್. ಅದತ್ ಇಂಜ ಓರ್ ಬಲ್ಯ ಆನೆನ ಕಾಟಿತ್ ರಾಜ ಇದ್‌ನ ಜಿಂವತೋಡೆ ಪುಡ್‌ಚಿತ್ ಗ.ಜನರಲ್‌ಕ್ ಇನಾಂ ಕೊಡ್‌ಪಿಂದ್ ಎಣ್ಣೆಚಿ.

ಆರ್ ಆನೆಯ ನಾಡ ರೈಫಲ್ ಬೊಡಿಕ ಬುದ್ದಕ, ನಾಲ್ ಕ್ಯಾ.ಹಿಲ್‌ರ ಬೊಡಿಕ ಬುದ್ದತ್. ರಾಜ ಎಣ್ಣೆನ ಆನೆ ಅನ್ನನೆ ಇಂಜತ್. ಅದ್‌ಂಡ ಕಾಲ್‌ಕ್ ಕೇರ್ ಕೆಟ್ಟಿತ್ ವಾಲಗ ಸದ್ವ್ ಮಾಡಿಯಂಡ್ ಆನೆನ ನಡ್‌ಪಾಚಿಟ್ಟಿಂಡ್ ಆಯಿರಾರ್ ಕಣಕ್‌ಲ್ ಜನ ನಡ್‌ಪ ಕೂಡ್‌ಚಿ.

ಈ ಬೋಟೆ ಆಯಿತ್ ಚೆನ್ನಂಗ್ ದಿನತ್ ರಾಜಂಡ ಕೂಡೆ ಪುನಾದಿಯ ಬೋಟೆಕ್ ನಂಗ ಕಾಡ್‌ಕ್ ಪೋಚಿ. ಅಕ್ಕ ನಾನ್ ಬಲ್ಯೋರ್ ನರಿನ ಬೊಡಿ ಬೆಚ್ಚಿತ್ ಕೊಂದ. ಅದ್‌ನ ಮಡಿಕೇರಿಕ್ ಪೊರ್‌ತಂಡ್ ಪೋಯಿತ್ ಅರಮನೆರ ಪಟ್ಟಿಲ್ ಪ್ರದರ್ಶನಕ್ ಬೆಚ್ಚಿತ್. ಅಲ್ಲಿ ಪಚ್ಚೆತೊಪ್ಪ್ ಪಿಳ್ಳಾ ಎಲಕಂಡತ್ ಚಿಂಗಾರ ಮಾಡಿತ್. ವಾಲಗ ಸದ್ವ್‌ರ ಕೂಟ್‌ಕ್ ಜನ ಮೆರವಣಿಗೆಲ್ ಬಪ್ಪನ್ನೆ ಕಂಡತ್. ರಾಣಿಯ ಅರಮನೆರ ಮಾಡಿರ ಕಿಡ್‌ಕೆಂಜ ನೋಟುವ ಇಂಜತ್. ಇನ್ನತದೆಲ್ಲ ನಂಗಕ್ ಪುದಿಯದಾಯಿತ್ ಕಂಡತ್.

ಇನ್ನನೆ ರಾಜ ನಂಗಳ ಬೋರೆ ಬೋರೆ ಜಾಗಕ್ ಬೋಟೆಕ್ ಕೂಟಿಯಂಡ್ ಪೋಚಿ. ಬೈಟ್ ನೇರತ್ ಬಾಯಿಲ್ ನೀರ್ ಬಪ್ಪನ್ನೆ ಯರ್ಚಿರ ತರ ತರ ಅಡಿಗೆ ಮಾಡಿತ್ ಇಡುವ ಇಂಜತ್. ಬೈಟಾಪಕ ನಂಗ ಬಿಡಾರತ್‌ರ ಒಳ್‌ಕ್ ಕೂಡಿಯವೆ ಇಂಜತ್. ನಂಗ ದಾರೂ ತಕ್ಕ ಪರೆಯುವ ಇಂಜ್‌ಲೆ. ನಂಗಕ್ ಸನ್ನೆ ಮಾಡ್‌ನದೆ ಬೊಡಿ ಬೆಪ್ಪ ಇಂಜತ್.

ಕಾಡ್‌ಲ್ ಇಪ್ಪ ನೇರತ್ ನಂಗ ಸುಮಾರ್‌ಕ್ ಎಲ್ಲಾ ಜಾತಿಯಳ ಪಿಳ್ಳಾ ಅಪ್ಪ ಮಾಡುವ ಇಂಜ ಸದ್ವ್‌ನೆಲ್ಲ ಕೇಟಿತ್ ಕುಶಿ ಪಟ್ಟಿತ್. ಇನ್ನನೆ ಎಕ್ಕೋಲು ಕುಶಿಲ್ ಇಂಜಂಡ್ ನಂಗಕ್ ಏದೇ ಓರ್ ಕೊರು ಇಲ್ಲತೆ ರಾಜಂಡ ಕೂಡೆ 22 ದಿನ ಕೈಂಜಿತ್ ನಂಗ ಕೊಡಗ್‌ನ ಮುಟ್ಟಿತ್ ಪೋಪ ದಿನ ಬಾತ್.

ಪೋಪಾಂಗ್ ಒನ್ನಾಂದೆಕ್ ಮುಪ್ಪಡೆ ಮಡಿಕೇರಿ ಅರಮನೆಕ್ ನಂಗ ರಾಜಂಗ್ ಎಣ್ಣಾವಕ್ ಪೋಚಿ. ನಂಗ ಅರಮನೆಕ್ ಎತ್ತ್‌ನದೆ ವಾಲಗಕಾರ "ದೇವ ರಾಜನ ಕಾಪಾಡಡ್"ಂದ್ ಪಾಡ್‌ಚಿ. ರಾಜಂಡ ಸೈನಿಕಂಗ ತೋಕ್ ನೇತಿತ್ ನಂಗಕ್ ಗೌರವ ಕಾಟ್‌ಚಿ. ಕ್ಯಾ.ಹಿಲ್ ಯೂನಿ ಫಾರ್ಮ್‌ಲ್ ಇಂಜಂವ ರಾಜಂಡ ಸೈನ್ಯಾಧಿಕಾರಿಯ ತಂದ ಗೌರವಕ್ ಮಿಲಿಟರಿ ಸಲ್ಯೂಟ್ ಕೊಡ್‌ತತ್.

ನಂಗ ರಾಜಂಗ್ ಬಪ್ಪಾಂದ್ ಎಣ್ಣೆತ್ ಕೈ ಕುಲ್ಕುವಕ ಅಂಪಂಗ್ ದುಂಬ ದುಃಖ ಆನದ್ ಗೊತ್ತಾಚಿ. ನಂಗಡೆಲ್ಲಡ ಮೂಡಲ್ ಮೌನ ಇಂಜತ್. ನಂಗಡ ಮಿಳ್ಣಾತ ಸಂದರ್ಶನ ಈ ಪೋಲೆ ಕುಶಿಲ್ ಇಪ್ಪ ಎನ್ನೊ ಎಣ್ಣುವ ಅಗ್ಗೇನ ಆಚಿ. ಎನ್ನಂಗ್ಣೆಕ ಪಿತ್ಯಕಾಲ ರಾಜಂಗೂ, ಕಂಪೆನಿ ಸರ್ಕಾರಕೂ ಚೆನ್ನಬಸಪ್ಪಂಡ ವಿಷಯತ್ ಮನಸ್ತಾಪ ಆಯಿತ್, ಆಖೀರಕ್ ಗೊತ್ತಾಪಂದ್ ಎಣ್ಣೆತ್ ನಾಡ ಕಾಗದತ್‌ನ ಇಲ್ಲಿಕ್ ನಿಪ್ಪಾಚಿಡುವಿ".

ಚಿಕ್ಕವೀರರಾಜೇಂದ್ರ ಮುಂಬೈಲ್ ಇಂಜ ತಾಂಡ ಸಿನೇತ ಡಾ.ಜಫರ್‌ಸನ್ನ್‌ಕ್ ಚೆನ್ನಬಸಪ್ಪಂಡ ಮೀದ ಕಾಗದ ಎಳ್ಳಿತ್ ಇಂಜಲ್ಲಿ, ಜಫರ್‌ಸನ್ನ್ ರಾಜಂಗ್ ಜವಾಬ್ ಅಯೆಚತ್. ಈಂಡೆಡೆಲ್ ಕೊಡಗ್ ರಾಜಂಡಲ್ಲಿಕ್ ಎಚ್ಚಕೊ ಬ್ರಿಟಿಷ್ ಅಧಿಕಾರಿಯ ಬಂದಿತ್ ಬೆಂದುವಳಾಯಿತ್ ಇನಾಂ, ಕೊದಿಮೊದ ಪಡೊಂದಂಡ್ ಪೋಪ ಇಂಜತ್. ಇನ್ನೆ ರಾಜಂಡಲ್ಲಿಕ್ ಬ್ರಿಟಿಷ್ ಕಂಪೆನಿ ಸರ್ಕಾರತ್‌ಂಜ ಅಯೆಕತೆ ತಂಗಳಾಯಿತೆ ಬ್ರಿಟಿಷ್ ಅಧಿಕಾರಿಯ ಬಪ್ಪ ಇಂಜದೆಲ್ಲ ಮೈಸೂರ್ ರೆಸಿಡೆಂಟ್‌ಕ್ ಸೆರಿ ಕಂಡ್‌ಲೆ. ಆನಗುಂಡ್ ಸರ್ಕಾರತ್‌ರ ಒಪ್ಪಿಗೆ ಇಲ್ಲತೆ ಕೊಡಗ್‌ಕ್ ಮೈಸೂರ್, ತಲಚೇರಿಕಾಲೆ ಪೋಪಾನ ನಿಪ್ಪಾಚಿಟ್ಟಿತ್. ಕೊಡಗ್ ರಾಜನ ಕೇಕತೆ ಇಂಗ್ಲೀಷ್‌ಕಾರಳ ಬರತೆ ಮಾಡ್‌ನದ್ ಚಿಕ್ಕವೀರರಾಜೇಂದ್ರ ಒಡೆಯಂಗ್ ಅವಮಾನ ಆಯಿತ್ ಕಂಡತ್. ಈನಗುಂಡ್ ದಂಡೂ ಬರಿಕೂ ಕಾಗದ ವ್ಯವಹಾರ ನಡೊಂದತ್.

### ಚಿಕ್ಕವೀರರಾಜೇಂದ್ರ ಗ.ಜನರಲ್‌ಕ್ ಎಳ್ವೊನ ಕಾಗದತ್ ಮೈಸೂರ್ ರೆಸಿಡೆಂಟ್ ತಾಂಡ ಬೋಡಿಕೆಕ್ ವಿರೋಧ ಕಾಟಾಚಿಂದ್ ಆಪಾದನ

ಚಿಕ್ಕವೀರರಾಜೇಂದ್ರ ಚೆನ್ನಬಸವನ ತಾಂಡ ಪುಡ್‌ತತ್ ಬೆಚ್ಚವಕ್ ಮಾಡ್‌ನ ಪ್ರಯತ್ನ ಎದೂ ಪ್ರಯೋಜನ ಆಯಿಲೆ. ಈ ನೇರತ್ ರಾಜಂಡ ದುಷ್ಟ ಸಲಹೆಗಾರಳಾನ ಅಬ್ಬಾಸ್ ಆಲಿ ಪಿಳ್ಣಾ ದಿವಾನ್ ಬಸಪ್ಪ, "ಮೈಸೂರ್‌ಲ್ 1831ತ್ ರಾಜಾಡಳಿತ ಎಡ್‌ತಿತ್ ಬ್ರಿಟಿಷ್‌ಳೆ ಆಳುವಕ್ ಸುರು ಮಾಡ್‌ನಾಂಗ್ ಮೈಸೂರ್ ಜನ ಬ್ರಿಟಿಷ್‌ಡ ವಿರುದ್ಧ ಉಂಡ್. ಕೊಡಗ್‌ರ ಜನ ಬ್ರಿಟಿಷ್‌ಡ ಮೀದ ಪಡೆಪೊಪ್ಪ ಸಂದರ್ಭ ಬಂದಕ ಅವು ಕೊಡಗ್ ರಾಜಂಗ್ ಸಹಾಯ ಮಾಡುವಾ"ಂದ್ ಚಿಕ್ಕವೀರಂಗ್ ಪೊಟ್ತ್ ಭರವಸೆ ಕೊಡ್‌ತತ್.



ಅನ್ನನೆ ಪಡೆ ಆನಕ ತಂಗಲ್ಲ ಜಿಂವತನ ಕೂಟಾಕತೆ ಕೊಡಗ್ಗರ ಸ್ವಾತಂತ್ರ್ಯ ಕಾಪಾಡುವಾಂದ್ ರಾಜಂಗ್ ತಕ್ಕ ಕೊಡ್ತತ್. ಪಂಡ್ ಟಿಪ್ಪುರ ಸೈನ್ಯತನ ಕೊಡಗ್ಗರ ಚೋಪ್‌ಚಿಟ್ಟನ್ನೆ ತಂಗ ಬ್ರಿಟಿಷ್ ಚೋಪ್‌ಚಿಡುವಾಂದ್ ನಂಬ್‌ಚಿ. ಪೊರರಾಜ್ಯ ಸಂಪರ್ಕ ಇಲ್ಲತಾನುಂಡ್ ಬ್ರಿಟಿಷ್ ಸೈನ್ಯತರ ಮೀದ ಅಯಿಂಗ್‌ಕ್ ಅರಿವಿಕೆ ಕೈಂಚ್‌ಲೆ. ಆನಗುಂಡ್ ರಾಜ ತಾಂಡ ದುಷ್ಟ ಸಲಹೆಗಾರಡ ತಕ್ಕನೆಲ್ಲ ನಂಬ್‌ಚಿ. ಪಡೆರ ತಯಾರಿ ಮಾಡಿಯಂಡ್ ತೆರಿನೆಲ್ಲ ಭದ್ರ ಪಡ್‌ತಚಿ. ತಾಂಡ ರಾಜ್ಯಕ್ ಪೊರಮೆಂಜ ಬಪ್ಪ ಬಟ್ಟೆಲೆ ಬಲ್ಯ ಬಲ್ಯ ಮರ ಬೂಕಿತ್ ತಡೆ ಮಾಡ್‌ಚಿ.

ಈಂಡೆಡೆಲ್ ತಂಗಡ ಆಖೀರಿ ಪ್ರಯತ್ನ ಎಣ್ಣುವನ್ನೆ ಕಂಪೆನಿ ಸರ್ಕಾರ ರಾಜಂಡ ಕೂಡೆ ಚಾಯಿತೆ ಇಪ್ಪನ್ನೆ ಬುದ್ಧಿ ಎಣ್ಣುವಕ್ ನಾಗಪುರ ರೆಸಿಡೆಂಟ್, ಬೆಂಗಳೂರ್ ನಿವಾಸಿ ಹೆಚ್.ಎಸ್. ಗ್ರಾಮ್ ಎಣ್ಣುವಂವನ ಮಡಿಕೇರಿಕ್ 1833ತ್ ಅಯೆಚತ್.

ಆಚೇಂಗಿ, ರಾಜ ಗ್ರಾಮ್‌ನ ಕಾಂಬಕ್ ಇಷ್ಟಪಡತೆ ತಾಂಗ್ ಸೌಖ್ಯ ಇಲ್ಲೆಂದ್ ಎಣ್ಣೆಯಂಡ್ ವಾಪಾಸ್ ಪೋವನ್ನೆ ಮಾಡ್‌ಚಿ. ಆನಗುಂಡ್ ಗ್ರಾಮ್ ಚೆನ್ನಂಗ್ ದಿನತ್ ಮಲಬಾರ್‌ಲ್ ಕಲೆಕ್ಟರ್‌ರ ಶಿರಸ್ತೆದಾರ್ ಆಯಿತಿಂಜ ಕರುಣಾಕರ ಮೆನನ್‌ನ ಮಡಿಕೇರಿಕ್ ಅಯೆಚತ್. ಇದೇ ನೇರಕ್ ದಾರಾ ಶೇಟ್ ಎಣ್ಣುವ ಪಾರ್ಸಿ ಪ್ಯಾಪಾರಿಯೂ ರಾಜನ ಕಾಂಬಕ್ ಮಡಿಕೇರಿಕ್ ಬಾತ್.

ಅಕ್ಕ ದಾರಾಶೇಟ್ ಪಿಳ್ಳಾ ಕರುಣಾಕರ ಮೆನನ್‌ನ ಕಂಪೆನಿ ಸರ್ಕಾರತರ ಗೂಢಾಚಾರಂಗಂದ್ ಗೇನ ಮಾಡಿತ್ ಪುಡ್‌ಚಿ ಕೂಟ್‌ಚಿ. ದಾರಾಶೇಟ್ ರಾಜಂಗ್ ಮಿಳ್ಳಾಲೆ ಸಿನೇತ ಆನಾನುಂಡ್ ಬುಡುಗಡೆ ಮಾಡಿತ್ ತಲಚೇರಿಕ್ ಅಯೆಚತ್. ಕರುಣಾಕರನ ಮಾತ್ರ ಚೆನ್ನಬಸಪ್ಪನ ಕಂಪೆನಿ ಸರ್ಕಾರ ಅಯೆಕಣೆ ಬುಡುಲೆಂದ್ ರಾಜ ಆಕಿಯಂಡತ್.

ಕೂಡೆನ್ನೆ ಗ್ರಾಮ್, ಕರುಣಾಕರ್ ಮೆನನ್‌ನ ಬುಡುಗಡೆ ಮಾಡೊಂಡೊಂದ್ ರಾಜಂಗ್ ಅಧಿಕೃತ ಒರಾತ ಮಾಡ್‌ಚಿ. ಆಚೇಂಗಿ, ರಾಜ, ಚೆನ್ನಬಸಪ್ಪನ ಬುಟ್ಟಿಕ್ ಮೆನನ್‌ನ ಬುಡುವಿಂದ್ ಎಳ್ಳಚಿ. ಈ ವಿಷಯತ್ ಸುಮಾರ್ ಪತ್ರ ವ್ಯವಹಾರ ನಡೊಂದತ್. ಈಂಡೆಡೆಲ್ ಬ್ರಿಟಿಷ್ ವಿರೋಧಿ ಸರ್ಜಪ್ಪ ನಾಯಕ ಕೊಡಗ್ಗಕ್ ಬಂದಿತ್ ರಾಜ ಪಿಳ್ಳಾ ಕುಂಟ ಬಸವನ ಕಂಡಿತ್ ತಕ್ಕ ಪರೊಂದ್ ಪೋಚಿ.

ಬಂಗಾಳತರ ಗ.ಜ. ಲಾರ್ಡ್ ವಿಲಿಯಂ ಬೆಂಟಿಕ್ ಚಿಕ್ಕ ವೀರರಾಜೇಂದ್ರಂಗ್ ಕರುಣಾಕರನ ಬುಡುಗಡೆ ಮಾಡೊಂಡೊಂದ್ ಎಳ್ಳಚಿ. ಆಚೇಂಗಿ ರಾಜ ತಾಂಡ ದುಷ್ಟಂಗಳುಂಡ್ ಗ.ಜನರಲಾರ ಕಾಗದಕ್ ಬೆಲೆ ಕೊಡ್‌ತಲೆ. ರಾಜಂಡ ಈ



ವರ್ತನೆನುಂಡ್ ಬ್ರಿಟಿಷ್ ಅಧಿಕಾರಿಯ ಚೆಡ್‌ಂಜಂಡ್, ಮೆನನ್‌ನ ಆರ್ ದಿನತಾರ ಒಳ್‌ಲೆ ಬುಡ್‌ಗಡೆ ಮಾಡ್‌ಲೇಂಗಿ ಕಂಪೆನಿ ಸರ್ಕಾರ ಕೊಡಗ್ ರಾಜಂಡ ಸಿನೇತಿಕೆ ಬುಟ್ಟಿತ್, ಶತ್ರುರ ಮೀದ ಎಡ್‌ತವ ಕ್ರಮತನ್‌ನ ಎಡ್‌ತವಾಂಡ್ ಎಚ್ಚರಿಕೆರ ಓರ್ ಕಾಗದ ಅಯೆಚತ್.

ಆಚೇಂಗಿ ರಾಜ ಆರ್ ದಿನತ್ ಏದೇ ಓರ್ ಪ್ರತಿಕ್ರಿಯೆ ಕಾಟತಾಂಗ್ ಗ.ಜನರಲ್ ಕೊಡಗ್ ರಾಜ ಚಿಕ್ಕವೀರ ರಾಜೇಂದ್ರ ಒಡೆಯನ ಅಧಿಕಾರತ್‌ಂಜ ಉಳ್‌ಪಿತ್ ಕೊಡಗ್‌ರಾಜ್ಯತನ್ ಕಂಪೆನಿ ಸರ್ಕಾರಕ್ ಕೂಟಿಯಂಡಿತಂಡ್ ಓರ್ ಚಾಹೇರ್‌ನಾಮೆ (proclamation)ನ ಪ್ರಕಟಣೆ ಮಾಡ್‌ಚಿ.

ಇದ್ 1834ನೆ ಮಾರ್ಚ್ 15ಂಗ್ ಲೆ.ಕ. ಪಿ.ಎ. ಗ.ಜ. ಬಹಾದ್ದೂರ್‌ರ ರಾಜಕೀಯ ಪ್ರತಿನಿಧಿ ಜೆ.ಎಸ್.ಪ್ರೇಸರ್‌ರ ಸೈನ್ ಆಯಿತ್ ಬೆಂಗಳೂರ್‌ಲ್ ಪ್ರಕಟ ಆಚಿ.

ಈ ಇಸ್ತಿಹಾರ್‌ನಾಮೆನ ಕಂಪೆನಿ ಸರ್ಕಾರ ಅಧಿಕಾರಿಯ ಪೊರ್‌ಡ್‌ಚಿಡುವಾಂಗ್ ಮುಪ್ಪಡೆ ಚಿಕ್ಕ ವೀರರಾಜೇಂದ್ರ ಕಂಪೆನಿ ಸರ್ಕಾರಕ್ಕೂ, ಅಧಿಕಾರಿಯಕ್ಕೂ ಅವಮಾನತಾರ ಓರ್ ಇಸ್ತಿಹಾರ್ ನಾಮೆನ ತಾನ್ ಪೊರ್‌ಡ್‌ಚಿಟ್ಟಿತ್. ಆಂಡ ಇಂಗ್ಲೀಷ್ ರೂಪಾಂತರ ಇನ್ನನೆ ಉಂಡ್.

## **PROCLAMATION OF VIRARAJA**

*Abstract translation of the Proclamation published by the Coorg Rajah, received from the Officer Commanding in Wynad with his letter of the 31st March 1834.*

Proclamation published for the information and guidance of the Hindoos, Musulmans, Poligars, Public servants, Ryots, Chetty Merchants and people of other castes in Hindoostan.

1. It is well known that Kaffers, Nasara (Christian) low Pheringhies, with the view of converting people of other religions to their dirty faith, have, ill intentionally, polluted the Devastanums, Muszeeds and other temples at Bangalore, Cudapah, Mussulibunder, Nagpoor, Raneepet and several other countries sent out their Padres and ruined them. This circumstance being certainly too well

impressed on the mind of every one, what more need be said,

2. Those who have from time to time strenuously attempted to convert, by force, people of other religions to their faith, have by the commands of God, perished but set this aside, an instance in proof of this may be given. Tipoo Sultan attempted to force all the other religion and with this view ruined a great number of people destroyed the Hindoo temples and committed verious sorts of oppressions; which acts not being acceptable to God, he was destroyed. This fact is well known to all of you. Now the Kaffers, Nasara, low Pheringhies have in like manner commenced to destroy the religion observed by people of different castes and to introduce their own religion. When evil comes, people lose their senses. When death comes, medicine avails naught; thus then their end is fast approaching. There is no doubt of it. The Hindus and Musalmans having respectively consulted their Shasters have found that, if for the protection of their religions these Kaffer, Nasara, Pheringhies be now fought with, God will help us and make us successful. There is no doubt of this so let us all be fully convinced of it.
3. These Kaffers, Nasara low, Pheringies have now wickedly determined to wage war with the Halery Samstanam and have accordingly collected some black people of Hindoostan, whom they are going to send in front, that they may all be cut down and the race thus annihilated in some degree, thinking that by these means they will be able easily to convert the rest to their faith. It is therefore to protect people of all castes against such invasion, the Halery Samstanum you will not only be defended, but you will also render the devastation of those Kaffers, Pheringies, quite easy; after this is done, you



will be protected and enabled to live happy and contented, following the religion of your respective castes unmolested. Do not think, that another such opportunity will offer itself again.

4. to avert the evil which threatens you now, we have taken all this trouble and published this proclamation. Should any of you pay no attention to it, but keep yourself neutral, you will at last find yourselves under the yoke of the Pheringhies, lose your caste, and experience the greatest misery to the end of your lives, and after death you will not be admitted before God, for having thus sinned against him. Do not doubt this. Therefore if you people of all countries, join the Halery Samstan and help it, you will meet with every kind of protection from it, and be able to live happy. Accordingly it is expected, that all of you will come forward and help the Halery Samstanam.
5. P.S. It is further hereby commanded. Those Nasaras, Kaffers, Pheringhies will, in order to get possession of the Halery Samstan spare no pains to gain you over. They will even give ten, where one would be enough. Let not this allure you and make you swerve from your real intention or lead you to entangle to your selves; for after they attain their object they will oppress you, and violate your religion. Be sure of this.

**(True copy and Translation)**

Sd/- F. Clementson

Pl. Collector

ಈ ಇಸ್ತಿಹಾರ್‌ನಾಮೆಲ್ ಚಿಕ್ಕ ವೀರರಾಜೇಂದ್ರ ತಾಂಡ ಪ್ರಚಾರದ ಪಿಳ್ಳಾ ರಾಜ್ಯತರ ಜನಡ ಮತೀಯ ಭಾವನೆ ಪಿಳ್ಳಾ ಧಾರ್ಮಿಕ ಸಂಪ್ರದಾಯ, ಪದ್ಧತಿಕ್ ಪುರಾಡ್ ಕಾಟಿತ್ ಬ್ರಿಟಿಷ್‌ಳುಂಡ್ ಎಲ್ಲಾಂಗ್ ತೊಂದರೆ ಆಯಿತ್ ಅವು ಮತಾಂತರ ಆಯಿರುವ ಎಣ್ಣುವ ಬೆದರಿಕೆನ ಇಟ್ಟಿದ್ ಕಂಡ್ ಬಪ್ಪ. ಅನ್ನನೆ ರಾಜ್ಯತರ ಸರ್ವ ಜನತೆ ಬ್ರಿಟಿಷ್ ಸೈನ್ಯತನ ಎದಾರ್‌ಡುವಕ್ ಸಹಾಯ ಮಾಡ್‌ನಕ, ಅಯಿಂಗಳೆಲ್ಲ ಹಾಲೇರಿ ಸಂಸ್ಥಾನ ಕಾಪಾಡುವಂದ್

ಎಣ್ಣೆನದ್ ಬ್ರಿಟಿಷಡ ಸೈನ್ಯ ಪಿಳ್ಳಾ ತಾಕತ್ತರ ಮೀದ ಇಂಜ ಅಚ್ಚಾನತನ, ತಪ್ಪಾಭಿಪ್ರಾಯತನ ಕಾಟುವ.

ಇಸ್ತಿಹಾರ್‌ನಾಮೆರ ಕಾಪಿನೆಲ್ಲ ತೆರಿರ ಮುಖ್ಯಪಟ್ಟ ಜಾಗತ್ ಪಿಳ್ಳಾ ಜನ ನೋಟುವ ಜಾಗತ್ ಅಂಟ್‌ಚಿಟ್ಟತ್. ಬ್ರಿಟಿಷಡ ನೇರಾನ ತಾಕತ್ತನ ಅರ್‌ಂಜವತೆ, ರಾಜ ದುಷ್ಟಂಗಡ ತಕ್ಕನೆ ನಂಬಿಯಂಡತ್.

ಆಚೇಂಗಿ, ಸಿನೇತ ಪಿಳ್ಳಾ ವ್ಯಾಪಾರಿಯಾನ ದಾರಾ ಶೇಟ್ ರಾಜಂಗ್ ಪಡೆನುಂಡ್ ಅಪಾಯ ಉಂಡ್‌ಂದ್ ಎಚ್ಚರಿಕೆ ಕೊಡ್‌ಪಕ ರಾಜ, ದಿವಾನ್ ಪೊನ್ನಪ್ಪನ ಕಾಕಿತ್ "ನೀಡ ಅಭಿಪ್ರಾಯ ಎಂತ?"ಂದ್ ಕೇಟತ್.

ಪೊನ್ನಪ್ಪ ರಾಜಂಡ ಎದಿಕೆ ನಿಪ್ಪ ಕ್ರಮತ್ ಕೈನ ತಾಂಡ ಎದೆರ ಮೀದ ಬೆಚ್ಚಂಡ್ ಮಂಡೆ ಕುಂಬ್‌ಟ್ ನಿಂದತ್. "ನಂಗ ಕಂಪೆನಿ ಸರ್ಕಾರತರ ಕೂಡೆ ಪಡೆ ಪೊಪ್ಪಕ್ ಸಾಧ್ಯೆ ಇಲ್ಲೆ. ಅವು ಸಮುದ್ರ. ನಂಗ ಓರ್ ನೀರ್ ದುಂಬ್‌ಚಿಟ್ಟ ಕೆರೆ! ಅಯಿಂಗಡ ಕೂಡೆ ನಂಗ ಮಾಡಿಯಂಡ ಒಪ್ಪಂದತನ ಗೇನ ಮಾಡಿಯಂಡಕ ಅವು ನಂಗಲ ಕಾಪಾಡುವ"ಂದ್ ಎಣ್ಣೆಕೆ ದಿವಾನ್ ಕುಂಟಬಸವ ಇರ್‌ಂಬುರನ್ನಕೆ ಇಂಜ ತಾಂಡ ಕೈಲ್ ಪೊನ್ನಪ್ಪಂಡ ದಪಡೆಕ್ ಪೊಜ್ಜಿತ್, ಅಂಪ ಸೊಯ ತಪ್ಪುವನ್ನಕೆ ಉರ್‌ಟಿತ್‌ಚ್ಚಿತ್! ಅಕ್ಕ ರಾಜಂಡ ಕೂಡೆ ಇಂಜವು ಪೊನ್ನಪ್ಪನ ಕೊಡಿಕ್ ಒಪ್ಪುವಕ್ ನೋಟುವಕ, ರಾಜ "ಅಂವನ ಅನ್ನನೆ ಒಟ್ಟಿರಿ"ಂದ್ ಚೋರತೆ ಎಣ್ಣೆಚಿ. ಅಂದ್‌ಂಜ ಪೊನ್ನಪ್ಪನ ರಾಜಂಗ್ ಆಪ ಇಂಚಾಲೆ.

ಇನ್ನನೆ ರಾಜ ತಾಂಗ್ ನಲ್ಲ ಸಲಹೆ ಕೊಡ್‌ತಯಿಂಗಳ ಕೂಟಾಕತೆ ತಾಂಗ್ ಕೇಡ್ ಕೊಂಡ ಬಾತ್.

ಕ.ಫ್ರೇಸರ್‌ರ ಇಸ್ತಿಹಾರ್ ನಾಮೆರ ಕಾಪಿನ ಕಂಡಿತ್ ರಾಜ ಚೆಡ್‌ಂಜಂಡ್ ಕುಂಟ ಬಸವಂಡ ಕೂಡೆ ತಕ್ಕ ಪರ್‌ಂದಿತ್ ಇಂಗ್ಲೀಷ್‌ಕಾರಕ್ ಓರ್ ಇಸ್ತಿಹಾರ್ ನಾಮೆನ ಪೊರ್‌ಡ್‌ಚಿಟ್ಟತ್. ಅದ್‌ಂಡ ಇಂಗ್ಲೀಷ್ ರೂಪಾಂತರ ಇನ್ನನೆ ಉಂಡ್.

*The explanation of a Proclamation issued for the knowledge of the bad English people, who are mean slaves and servants of the auspicious feet of the Halery Samstan Maharaja.*

In answer to a proclamation of the bad Englishman son of a Whore who in a state of forgetting Mahadeva (God) and through pride had written on a paper whatever

occured to his mind, for the purpose of giving information to the inhabitants of Halery Samstan and fastened the same near the boundary. I the slave of my Master's Majesty. let you know as follows, that the Proclamation which was fastened in the boundry by the wicked Englishman, the son of a slave, is not at all possible even to be seen with our eyes or hear with our ears, and in the very time of trying the said proclamations which are replete with indecent subjects. the hearts of all of us, who are the servants of the king's feet, were inflamed as the fire through wind. The wicked Christian European the son of a slave who resolved to prepare this, should be beheaded and his herd thrown out, the hands, mouth and head of the person who wrote this should be cutoff and the generation of the low caste, blasphemmer and bad European should be burnt down. These hopes are to be soon effected. All the above subjects are certain. All the wicked Europeans the sons of whores have evil intentions very well, very well. we will fillup all your belies according to your wishes. Be this known to you written on Sunday, 6th decreasing moon of the month of Palguna, of the year Vijaya corresponding with 30th March 1934.

ಮನಸ್ತಾಪ ಅಧಿ ಆನನ್ನಕೆ ಚಿಕ್ಕವೀರರಾಜೇಂದ್ರಂಗ್ ಎಕ್ಕಾಚೇಂಗೂ ಕಂಪೆನಿ ಸರ್ಕಾರ ತಾಂಡ ರಾಜ್ಯತ್‌ನ ಮನಾರ ಅಯಿಂಗಡ ಪುಡ್‌ತಕ್ ಎಡ್‌ತವಾಂದ್ ಪೋಡಿ ಇಂಜತ್. ಆಚೇಂಗಿ, ಅನ್ನತ ನೇರತ್ ಕೊಡಗಲ್ ರಾಜಂಡ ಆಳ್ವಿಕೆನ ಮನಾರ ಎಡ್‌ತರುವಾಂದ್ ಅಂವ ಗೇನ ಮಾಡ್‌ಲೆ. ಕಂಪೆನಿಕ್ ತಾಂಡ ಮೀದ ವಿರೋಧ ಇಂಜಕ ಬೋರೆಯಿಂಗಳ ನಾಡ ಜಾಗತ್ ಅಳ್‌ಪ್‌ಚಿಡುವ. ರಾಜಮನೆತನತ್ ದಾರೂ ಜಿಂವತ್ ಇಲ್ಲತ ಪೋಚೇಂಗಿ ಬೋರೆ ವಿಧಿ ಇಲ್ಲತೆ ಅವು ಪುನಾದಿಯ ನನ್ನೆ ರಾಜ ಆಯಿತ್ ಮಾಡುವಾಂದ್ ಗೇನ ಮಾಡ್‌ಚಿ. ಆನಗುಂಡ್ ಬ್ರಿಟಿಷ್ ಸೈನ್ಯ ಕೊಡಗರ್ ತೆರಿ ಎತ್ತನದೆ ಅಂವ ಮಡಿಕೇರಿ ಪಿಳ್ಳಾ ನಾಲ್ವಾಡಲ್ ಇಂಜ ತಾಂಡ ರಾಜ ಮನೆತನಕಾರಳ್ಳಿ ಕೊಲ್ಚಿಟ್ಟತ್. ಅನ್ನನೆ ಚನ್ನಬಸಪ್ಪಂಡ ನಾಲ್ ಬಯತ್‌ರ ಕ್ಕಣ್ಣುಕುಳ್ಳಿ ನ ಕೊಂದಿತ್ ಕುಂಬಳಗೇರಿ ಉಕ್ಕಡತ್ ಪೂತತ್.

ಆಖೀರಕ್ ದೊಡ್ಡ ವೀರರಾಜೇಂದ್ರಂಡ ಮೂಡಿಮಕ್ಕ, ಅಪ್ಪಾಬಿರಾಜ ಪಿಳ್ಳಾ ಲಿಂಗರಾಜಂಡ ಪೊಣ್ಣ್, ಮಕ್ಕ, ತಾಂಡ ಮಹಾರಾಣಿಯಳ ಮಾರ್ಚಿ ಆಖೀರಕ್ ಕೂಟಿಯಂಡ್ ನಾಲ್ವಾಡ್ ಅರಮನೆಕ್ ಪೋಚಿ. ಅಕ್ಕ ಮಡಿಕೇರಿ ಅರಮನೆಲ್ ಇಂಜ ಬೋಂಡಿಯಾನ ಪಣ ಎಡ್ತಂಡ್ ಪೋಚಿ. ಆ ಕಾಲತ್ ನಾಲ್ವಾಡ್ ಅರಮನೆಕ್ ಶತ್ರುವ ಅಚ್ಚಕ್ ಬೆರಿಯ ಬಪ್ಪಕಯ್ಯವ ಇಂಜ್ಲೆ.

1855ತ್ ಕೊಡಗರ ಚರಿತ್ರೆ ಎಳ್ಳನ ಡಾ.ಮೂಗ್ಗಿಂಗ್ ಚಿಕ್ಕವೀರರಾಜೇಂದ್ರ ನಾಲ್ವಾಡ್ ತಾಂಡ ಕುಟುಂಬಕಾರಳ ಕೂಟಿಯಂಡ್ ಪೋನ ಉದ್ದೇಶತನ ಇನ್ನನೆ ಎಳ್ಳತ್.

"Veeraraj had taken with him...and what remained of the Coorg Rajah's families, that he might destroy there all if necessary in order to render impossible for the English Govt. to transfer the Principality or the property of the murdered Devammaji to any other heir of Dodda Veerarajendra and thus secure his wealth and his country to himself."

ಬ್ರಿಟಿಷರ ಸೈನ್ಯ ಕೊಡಗನ ನುಗ್ಗಿನ ಪಿತ್ಯಾಂದ್ ರಾಜಂಡ ಆಸೆಕೊತ್ ಕುಂಟಬಸವ, ಎಲ್ಲ ರಾಣಿಯಳ, ಮಕ್ಕಳ ಒಕ್ಕಚೆ ಆಯಿತ್ ಎಣ್ಣಕ 22 ಜನಳ ಕೊಲ್ಲಚಿಟ್ಟಿತ್ ಓರ್ ಮೈಲ್ ದೂರತ ಕಾಡ್‌ರ ನಡೂಲ್ ಪರಿವ ಓರ್ ಪೊಳೆ ಕರೆಲ್ ಬಲ್ಯ ಕುಂಡ್ ಎಡ್‌ಪ್‌ಚಿಟ್ಟಿತ್ ಪೂತ್‌ರ್‌ತ್!

### ಬ್ರಿಟಿಷ್ ಸೈನ್ಯತ್ ಕೊಡಗರ ಪುಡ್‌ತ

ಕಂಪೆನಿ ಸರ್ಕಾರ ಕೊಡಗರ ಚಿಕ್ಕವೀರರಾಜೇಂದ್ರಂಡ ಮೀದ ಪಡೆ ಘೋಷಣೆ ಮಾಡ್‌ನದೆ ಕೊಡಗನ ತಾಂಡ ಪುಡ್‌ತತ್ ಬೆಚ್ಚವಕ್ ತಯಾರಾಚಿ. ಈಂಡ ಮುಕ್ರಿ ಆಯಿತ್ ಬ್ರಿ.ಲಿಂಡ್ಸೆ ಪಿಳ್ಳಾ ಪ್ರತಿನಿಧಿ ಆಯಿತ್ ಕ.ಪ್ರೇಸರ್ ಇಂಜತ್.

ಆರಾಯಿರ ಜನ ಇಂಜ ಕಂಪೆನಿ ಸೈನ್ಯತನ ನಾಲ್ ತುಕಡಿ ಮಾಡಿತ್ ಕೊಡಗರ



ನಾಲ್ ಬರಿಯ ಅಯೆಚಿತ್ ಆಪಚ್ಚಕ್ ಬೆರಿಯ ಮುತ್ತಿಗೆ ಇಡುವ ಕೂಡ್‌ಚಿ. ಕೊಡಗ್ ರಾಜಂಡ ಕಡೆಕಾರಳೂ ಬಟ್ಟೆರ ನಡುಲೆಲ್ಲ ಬಲ್ಯ ಬಲ್ಯ ಮರ ಬೂಕಿತ್ ಆಂಡ ನಡೂಲ್ ತೂರತಾರ ಪಲ್‌ಂಬ್ ಇಟ್ಪ್ ಬಟ್ಟೆನ ಮುಚ್ಚಿತಿಂಜತ್. ಮಣ್ಣಾರ ಕೆಂವ ಕೆಟ್ಟಿತ್ ಅದತ್ ತೋಕ್ ಬೆಚ್ಚಿತ್ ಬೊಡಿ ಬೆಪ್ಪಕ್ ಉಳ್ಳಚ್ಚಕ್ ಮಾತ್ರ ತೂತ ಮಾಡ್‌ಚಿ. ಕೊಡಗ್ಗರ ಸೈನ್ಯತ್ ಫಿರಂಗಿ ಇಂಜಾಲೆ. ಕೊಡಗ್ ರಾಜಂಡ ಸೈನ್ಯ ಧೈರ್ಯತ್ ತಂಗಡ ಕೂಡೆ ಪೋರಾಡುವ ಎಣ್ಣುವ ನಂಬಿಕೆಲ್ ಬ್ರಿಟಿಷ್‌ಕಾರ ಅಚ್ಚಕ್ ಕ್ರಮಬದ್ಧ ತಯಾರಿ ಮಾಡಿತಿಂಜತ್.

ಕೊಡಗ್ಗರ ಎಲ್ಲಾ ಬರಿಂಜ ಬ್ರಿಟಿಷ್ ಸೈನ್ಯ ನುಗ್ಗಿತ್ ಬಂದಂಡುಳ್ಳ ವಿಷಯತ್‌ನ ಗೂಢಚಾರಂಗಳುಂಡ್ ಅರ್‌ಂಜ ಚಿಕ್ಕವೀರರಾಜೇಂದ್ರಂಗ್ ಗಾಬರಿ ಆಚಿ. ತಾಂಡ ಸೈನ್ಯ ಅಯಿಂಡ ಕೂಡೆ ಪೋರಾಡುವದ್ ಕಷ್ಟಾಂದ್ ಗೊತ್ತಾನದೆ ಏಪ್ರಿಲ್ ನಾಲಾಂಗ್ ತಾನ್ ಪಡೆ ನಿಪ್ಪಾಚಿಟ್ಟಿತ್, ಬ್ರಿಟಿಷಡ ಕೂಡೆ ರಾಜಿ ಮಾಡಿಯವಿಂದ್ ಎಣ್ಣುವಕ್ ತಾಂಡ ದಿವಾನ ಲಕ್ಷ್ಮಿ ನಾರಾಯಣನ ನಾಲಾಳ್‌ರ ಕೂಡೆ ಬೊಳ್‌ತ ಬಾವುಟ ಆಯಿತ್ ಕುಶಾಲನಗರತಾರ ಪಕ್ಕ ಇಂಜ ಶಿಬಿರಕ್ ಅಯೆಚಿತ್.

ಇದ್‌ಂಗ್ "ಬ್ರಿಟಿಷ್ ರೆಸಿಡೆಂಟ್ ಕರುಣಾಕರ ಮೆನನ್‌ನ ಬಂಧನತ್‌ಂಜ ಬುಡ್‌ತಿತ್ ಕಂಪೆನಿಕ್ ಅಯೆಚಿಕೊಡ್‌ತಿತ್, ಚಿಕ್ಕವೀರರಾಜ ಕಂಪೆನಿ ಸರ್ಕಾರತಾರ ವ್ಯವಸ್ಥೆಕ್ ಬದ್ವನಾಯಿತ್ ಕೂಡೆನ್ನೆ ಸೋಲನ್ ಒತ್ತಂಡಕ ಪಡೆ ನಿಪ್ಪಾಚಿಡುವಾ"ಂದ್ ಕಂಪೆನಿ ಸರ್ಕಾರ ಎಣ್ಣಿತ್ ಅಯೆಚಿತ್.

ಇದ್‌ಂಗ್ ಕೂಡೆನ್ನೆ ರಾಜ, ಬಂಧನತ್‌ಂಜ ಮೆನನ್‌ನ ಬುಡ್‌ಗಡೆ ಮಾಡಿತ್ ಅವಂಗ್ ನಲ್ಲ ಪೂರಪಾಡ್ ಇಡ್‌ಚಿಟ್ಟಿತ್, ಏರ ಕ್ರಯತಾರ ಇನಾಂ ಪಿಳ್ಳಾ ಓರ್ ಆನೆನ ಕೊಡ್‌ತಿತ್ ರಾಜ ಮರ್ಯಾದಿಲ್ ಬ್ರಿಟಿಷಡ ಶಿಬಿರಕ್ ಅಯೆಚಿತ್. ಆಚೇಂಗಿ, ತಾನ್ ಬ್ರಿಟಿಷಕ್ ಸೋಲನ್ ಒತ್ತವದ್ ಮಾತ್ರ ಅನ್ನನೆ ಇಂಜತ್.

ರಾಜ ರಾಜಿ ಒಪ್ಪಂದಕ್ ತಾಂಡ ದಿವಾನನ ಅಯೆಪಕ ಮಡಿಕೇರಿಲ್ ಚೆಪ್ಪುಡಿರ ಪೊನ್ನಪ್ಪ ಪಿಳ್ಳಾ ಅಪ್ಪಾರಂಡ ಬೋಪು ಮಾತ್ರ ಇಂಜತ್. ಅಯಿಂಗ ದಂಡಾಳ್‌ಕ್ ರಾಜ, ಬ್ರಿಟಿಷಡ ಕೂಡೆ ರಾಜಿ ಮಾಡಿಯಂಡ್ ರಾಜನಾಯಿತ್ ಇಪ್ಪದ್ ಇಷ್ಟ ಇಂಜಾಲೆಂದ್ ಕಾಂಬ. ಆನಗುಂಡ್ ರಾಜ ನಾಲ್ವಾಡ್‌ಂಜ ಮಡಿಕೇರಿಕ್ ಎತ್ತುವಾಂಗ್ ಮುಪ್ಪಡೆ, ಬ್ರಿಟಿಷಕ್ ಮಡಿಕೇರಿನ ಒಪ್ಪಾಚಿಡೊಂಡೂಂದ್ ಗೇನ ಮಾಡ್‌ಚಿ.

ಈ ಪೋಲೆ ಅಪ್ಪಾರಂಡ ಬೋಪು ದಿವಾನ 400 ಕೊಡಗ್ಗರ ಜನಡ ಕೂಡೆ ಏಪ್ರಿಲ್ 50ಂಗ್ ಕ. ಫ್ರೆಸರ್‌ರ ಪಕ್ಕ ಪೋಯಿತ್ ಸೋಲನ್ ಒತ್ತಂಡ್ ಅವಂಡಲ್ಲಿ ಇಂಜ



ಕಂಪೆನಿಸೈನ್ಯತನ ಮಡಿಕೇರಿಕ್ ಕೂಟಿಯಂಡ್ ಪೋಪನ್ನಕೆ ಎಣ್ಣೆಚಿ. 1856ತ್ ಕೊಲ್ಕತ್ತಾ ರಿವ್ಯೂ ಪತ್ರಿಕೆಲ್ ದಾ. ಮೂಗ್ಲಿಂಗ್ ಇದ್‌ನ ಇನ್ನನೆ ಎಳ್ತೆತ್.

"When Viraraja had gone to Nalnad the Dewans Bopu & Ponnappa who were left at Mercara considered matters for themselves & with their friends and came to the resolution of surrendering to the company, and of exchanging if possible, a master from whom they had everything to fear for the just & peaceable dominion of the company"

ದಿವಾನ್ ಬೋಪುರ ಬೋಡಿಕೆರನ್ನಕೆ ಕ.ಪ್ರೇಸರ್ ಪಿಳ್ಳಾ ಲಿಂಡೈ ಕುಶಾಲನಗರತ್‌ಂಜ ಮಡಿಕೇರಿಕ್ ಬಪ್ಪ ಅಗಲ ಕಮ್ಮಿ ಉಳ್ಳ ಬಟ್ಟೆಲ್ ತಂಗಡ ಫಿರಂಗಿನ ಮಿಳ್ಳಾಲ್ ಬೆಚ್ಚಂಡ್, ಅಡ್ಡ ಬೂಕನ ಮರತನ ಬರಿಕ್‌ಚ್ಚಿತ್ ಏಪ್ರಿಲ್ 6ಂಗ್ ಮಡಿಕೇರಿಕ್ ಬಾತ್.

ಕೂಡೆನ್ನೆ ಅವು ಕೋಟೆರ ಕೆಂಪತ್ ಪಾರಿಯಂಡ್ ಇಂಜ ಕೊಡಗ್ ರಾಜಂಡ ಬಾವುಟತನ ಕೇದಕ್ ಉಳುಪಿತ್ ಬ್ರಿಟಿಷ್ ಸರ್ಕಾರತ್‌ರ ಬಾವುಟತನ ಪಾರ್‌ಚಿಟ್ಟಿತ್! 21 ಬೊಡಿ ಪಾರ್‌ಚಿಟ್ಟಿತ್ ಬ್ರಿಟಿಷ್ ಅಧಿಕಾರಿಯ ಧ್ವಜವಂದನೆ ಸ್ವೀಕಾರ ಮಾಡ್‌ಚಿ. ಬ್ರಿಟಿಷ್ 39ನೆ ನಂಬರ್ ರೆಜಿಮೆಂಟ್‌ರ ಓರ್ ಕಂಪೆನಿ ಕೋಟೆರ ಒಳ್‌ಲೆ ಡೇರೆ ಇಟ್ಟಂಡಕ ಬಾಕಿ ಎಲ್ಲ ರಾಜಾಸೀಟ್ ಪಿಳ್ಳಾ ಎತ್ತರ ಜಾಗತ್ ಡೇರೆ ಇಟ್ಟಂಡ್ ಒಳ್‌ಂಜತ್.

ಕೊಡಗರ ಕಾರ್ಯಕಾರಂಗ ಬ್ರಿಟಿಷ್‌ಸೈನ್ಯತ್‌ರ ಕೂಡೆ ಪೋರಾದುವ ಕಯ್ಯಾಂದ್ ರಾಜ ಅಪ್ಪಣೆ ಅಯೆಚ್‌ಕೊ ಅದ್ ತಡ ಆಯಿತ್ ಎತ್ತ್‌ಚಿ. ಆಂಡ ಒಳಿಯ ಕೊಡಗರ ಜನ ಪೋರಾಡಿತ್ ಚೆನ್ನಂಗ್ ಚಾವು, ನಷ್ಟ ಆಚಿ.

ಇನ್ನನೆ ಕ.ಫೌಲಿಸ್ ಪೆಗ್ಗಲತ್‌ಂಜ ಪೊರಟಿತ್ ವೀರರಾಜೇಂದ್ರ ಪೇಟೆಕ್ ಎತ್ತಿತ್ ನಾಲ್ ತುಕಡಿ, ಫಿರಂಗಿ, ಸೈನಿಕಂಗಳ ಆಕ್‌ಚಿ. ಈ ಸೈನ್ಯತ್ ಓರ್ ತುಕಡಿ ನಾಲ್ಕಾಡ್‌ಕ್ ಪೋಯಿತ್ ಅರಮನೆನ ಪುಡ್‌ಚಂಡತ್. ಅಕ್ಕಣೆಕ್ ರಾಜ ಮಡಿಕೇರಿಕ್ ಬಂದಿತ್ ಬ್ರಿಟಿಷ್ ಅಧಿಕಾರಿಯಕ್ ಸೋಲನ ಒತ್ತಂಡತ್.



## ಚಿಕ್ಕವೀರರಾಜೇಂದ್ರ ಇಂಗ್ಲೀಷ್‌ಕಾರಡ ಕೂಡ ತಾಂಡ ಸೋಲಾನ ಒತ್ತಂಡದ್

ಏಪ್ರಿಲ್ 6ಂಗ್ ಮಡಿಕೇರಿ ಕೋಟಿನ ತಂಗಡ ಪುಡ್‌ತಕ್ ಎಡ್‌ತಂಡ ಕ.ಫ್ರೇಸರ್ ರಾಜಂಗ್ ಮೂಂದ್ ದಿನತರ ಒಳ್ಳಲ್ ಬಂದಿತ್ ಸೋಲಾನ ಒತ್ತಂಡಕ ಅಂವನ ಮರ್ಯಾದಿಲ್ ಕಾಂಬಂದ್ ಎಣ್ಣೆತ್ ಅಯೆಚತ್.

ಇದ್‌ಂಗ್ ರಾಜ 15 ದಿನತರ ವಾಯಿದ ಕೇಟತ್. ಇದ್‌ಂಗ್ ಕರ್ನಲ್ ಒತ್ತಂಡಲ್. ಏಪ್ರಿಲ್ 10ಂಡ ಮಜ್ಜಣ ರಾಜ, ರಾಣಿ ಪಿಳ್ಳಾ ಸುಮಾರ್ ದಂಡಾಯಿರ ಜನ ಅರಮನೆ ಕೋಟೆಕ್ ಬಾತ್. ಸೈನ್ಯಾಧಿಕಾರಿ ರಾಜನ ಗೌರವತೆ ಕಂಡತ್. ರಾಜ ಪರಿವಾರತರ ಕೂಡ ಅರಮನೆಕ್ ಪೋಚಿ. ದಾರೂ ಅಲ್ಲಿಂಜ ತಪ್ಪೆಚಿಟ್ಟುಂಡ್ ಪೋಕತನ್ನೆ ಪಾರ ಇಂಜಾನುಂಡ್ ರಾಜ ಅರಮನೆಲೇ ಬ್ರಿಟಿಷಡ ರಾಜಖೈದಿಯಾಚಿ!

ಪಿತ್ಯಾಂದ್ ರಾಜ, ಕ.ಫ್ರೇಸರ್‌ನ ಅರಮನೆಕ್ ಕಾಕ್‌ಚಿಟ್ಟತ್. ಈಂಡ ಮೀದ ಕರ್ನಲ್, ಗ.ಜನರಲ್‌ಕ್ ಎಳ್ವೊನ ಕಾಗದತ್ ಒಯಿಪತ್ ಅಂಜಿ ಗಂಟೆಕ್ ಅರಮನೆಕ್ ಪೋನಲ್ಲಿ ರಾಜ ನಾಡ ಕೂಡ ಏಳ್ ಗಂಟೆತ್ತನೆ ದುಂಬ ತಕ್ ಪರ್ಂದತ್. ಇದತ್ ಮುಖ್ಯವಾಯಿತ್ ಇಂಗ್ಲೀಷ್‌ಕಾರಡ ಮೀದ ತಾಂಡ ಪೆರಿಯವು ಬೆಚ್ಚಿತಿಂಜ ಸಿನೇತಿಕೆ, ಬೆಂಗಳೂರ್‌ಲ್ ಉಳ್ಳ ಚನ್ನಬಸಪ್ಪನ ಬ್ರಿಟಿಷ್ ಅಧಿಕಾರಿಯ ತಾಂಡ ಪುಡ್‌ತಕ್ ಎಚ್ಚಕ್ ಕುರಿ ಬೋಡಿಯಂಡಕೊ ಒಪ್ಪೆಚಿಡತದ್, ತಾನ್ ಚೆರಿಯಂವನಾಯಿತ್ ಸಮಾಜತ್ ಉಳ್ಳ ನಲ್ಲ ಸಂಗತಿನುಂಡ್ ಏದೇ ಓರ್ ಪ್ರಯೋಜನ ಪಡ್‌ಂದವ ಕಯ್ಯತದ್, ಇದ್‌ಂಗೆಲ್ಲ ತಾಂಡ ದುಷ್ಟ ಪರಿವಾರ ಮೊಳಿ. ಅವು ರಾಜದ್ರೋಹಿಯ, ನೀಚಂಗ. ನಲ್ಲ ಮಾರ್ಗದರ್ಶನ ಕೊಟ್ಟಿತಿಂಜಕ ತಾನ್ ಸಮಾಜತ್ ನಲ್ಲೋರ್ ಬಟ್ಟೆಲ್ ಬದ್‌ಕ್ ನಡ್‌ತುವ ಇಂಜಂದ್ ಎಣ್ಣೆಚಿ. ಆಖೀರಕ್ ರಾಜ ತಾನ್ ಕೊಡಗಲೇ ಇಪ್ಪಕ್ ಬ್ರಿಟಿಷ್‌ಕಾರ ಒಪ್ಪಿಗೆ ತಪ್ಪಾಂದ್ ಗೇನ ಮಾಡಿತಿಂಜತ್. ಆಚೇಂಗಿ, ಅದ್ ಕಯ್ಯತಿಪ್ಪಕ ಯಡತೊರೆ ಇಲ್ಲೇಂಗಿ ಶ್ರೀರಂಗಪಟ್ಟಿತ್ ಇಪ್ಪಕ್ ಬುಡೊಂಡೊಂದ್ ಕೇಟಂಡತ್. ಅದ್‌ಂಗ್ ನಾನ್ ಗ.ಜನರಲ್‌ಕ್ ಎಳ್ಳಿತ್ ನೋಟುವಿಂದ್ ಎಣ್ಣೆನ.

...ಇನ್ನನೆ ಕ.ಫ್ರೇಸರ್ ವಿವರವಾಯಿತ್ ಎಳ್ಳಿತಿಂಜ ಕಾಗದ ಅದಾಯಿತಿಂಜತ್.

ಆಖೀರಕ್ ತಾನ್ ಇಕ್ಕಾಕಣೆ ಮಾಡ್‌ಚಿಟ್ಟ ಕೊಲೆ ಪಿಳ್ಳಾ ಬೋರೆ ಹಿಂಸೆಕ್ ತಾಂಡ ದಿವಾನ ಬಸವನೆ ಮೊಳಿ. ತಾನ್ ಚರ್ಪತ್ ಬೋಟೆಲೆ ಏರ ಪುರ್‌ಡ್ ಕಾಟ್‌ನಾಂಗ್, ಬಸವ ದಿವಾನಂಗ್ ಎಲ್ಲ ಅಧಿಕಾರ ಕೊಡ್‌ತದ್ ಈ ಎಲ್ಲ ಕೆಟ್ಟ ಕಾರ್ಬಾರ್‌ಕ್ ಮೊಳಿ ಆಚಿಂದ್ ಎಣ್ಣೆಯಂಡತ್.

ರಾಜಂಡ ಈ ಎಲ್ಲ ತಕ್ಕನ ಕೇಟಿತ್ ಕ.ಪ್ರೇಸರ್ "ರಾಜ್ಯತ್ ದುಂಬ ದುಷ್ಟ ಪಿಳ್ಳಾ ಅಪಾಯಕಾರಿ ವ್ಯಕ್ತಿ ದಿವಾನ್ ಬಸವಂದ್ ಎಣ್ಣೆಯಂಡ್ ಅಂವನ ಪುಡ್‌ಚಿ ತಂದಯಿಂಗಕ್ ಓರಾಯಿರ ಉರ್‌ಪಿಯ ಇನಾಂ ತಪ್ಪಾ"ಂದ್ ಘೋಷಣೆ ಮಾಡ್‌ಚಿ.

ಇತ್ತೆಟಿ ಕುಂಟಬಸವ, ಬ್ರಿಟಿಷ್‌ಕಾರ ಎಕ್ಕ ಮಡಿಕೇರಿ ಅರಮನೆಕ್ ನುಗ್ಗಿಚಿ ಅಕ್ಕೆ ತಾಂಡ ಜಿಂವ ಕಳ್‌ಂದವಕ್ ಗೇನ ಮಾಡ್‌ಚಿ. ರಾಜ ಮಡಿಕೇರಿಕ್ ಪೊರ್‌ಡುವಾಂಗ್ ಒನ್ನಾಂದೆಕ್ ಮುಪ್ಪಡೆ ಬೈಟ್ ಉಂಬಕ್ ತಾಂಗ್ ಕೂಳ್ ಬೋಂಡೂಂದ್ ಬಸವ ಕೇಟಿತ್. ರಾಜಂಡ ಕಾಲತ್ ಅಯಿಂಗಕ್ ಮಾಡ್‌ನ ಅಡಿಗಿನ ಬೋರೆಯಪು ಪಡ್‌ಂದವದೂ ಓರ್ ಬಲ್ಯ ಗೌರವತ್‌ರ ಸಂಗತಿ ಆಯಿತಿಂಜತ್!

ಅಂದ್ ಬೈಟ್ ಉಂಡಂಡ್ ಇಪ್ಪಕ ಕುಂಟ ಬಸವ ತಾಂಡ ಕೂಡೆ ಇಂಜ ಜನಡ ಕೂಡೆ, "ಮಹಾಸ್ವಾಮಿ ನಾಳೆ ಮಡಿಕೇರಿಕ್ ಪೋಪ. ನಾನ್ ಇಳ್ಳಾ ನಾಡ ಜಿಂವ ಬೆಚ್ಚಪುಲೆಂದ್ ರಾಜಂಗೂ ಎಣ್ಣೆಯೆ. ನಾನ್ ಬ್ರಿಟಿಷಡ ಶಿಬಿರಕ್ ಬಪ್ಪುಲೆ. ಅವು ನನ್ನ ಫಿರಂಗಿರ ಬಾಯಿಕ್ ಕೆಟ್ಟಿತ್ ಪಾರ್‌ಚಿಟ್ಪಿರುವ. ನಾನ್ ಬೋರೆ ದೇಶಕೂ ಪೋಪುಲೆ. ಎನ್ನಂಗೇಣ್ಣಕ ನಾನ್ ಕುಂಟ. ನಾಕ್ ನಡ್‌ಪ ಕಯ್ಯಲೆ. ನಾಡ ದಿನ ತೇಂದತ್. ನಾನ್ ನೇರಾಯಿತೂ ನನ್ನ ನಾನೆ ಕೊಂದವಿ"ಂದ್ ಎಣ್ಣೆಯಂಡ್ ಮೊರ್‌ಟತ್.

ಪಿತ್ಯಾಂದ್ ತಾಂಡ ಅಂಗರಕ್ಷಕ ಪದ್ವಯ್ಯ ಸಿಪಾಯಿರ ಕೈಕ್ ತಾಂಡ ಅರೆರ ಬೊಳ್ಳಿ ತೊಡ್‌ಜ್, ಬೊಳ್ಳಿ ಪುಡಿರ ಪೀಚಿ ಕತ್ತಿ ಪಿಳ್ಳಾ ತಾಂಡ ತಡಿಲ್ ಇಂಜ ಮಾಲ್ ಮಟತ್‌ನೆಲ್ಲ ಉತ್ತಿತ್, ತಾಂಡ ಮನೆಲುಳ್ಳ ದಂಡ್ ಮೋನೆಯಕ್ ಕೊಡ್‌ಪನ್ನಕೆ ಎಣ್ಣೆಚಿ.

ಪದ್ವಯ್ಯ ಕುಂಟ ಬಸವಂಡ ಮಕ್ಕಕ್ ಮಾಲ್ ಮಟ ಕೊಡ್‌ತಿತ್, ಪಾಪಾಸ್ ಬಂದಿತ್ ನಾಲ್ವಾಡ್‌ಲ್ ನೋಟಣೆ ದಿವಾನ್ ಅಲ್ಲಿ ಇಂಜಾಲೆ. ಚಿಕ್ಕ ವೀರರಾಜೇಂದ್ರ ಏಪ್ರಿಲ್ 10ಂಗ್ ಮಡಿಕೇರಿಕ್ ಪೊರ್‌ಟದೆ ದಿವಾನ್ ಬಸಪ್ಪ ನಾಲ್ವಾಡ್ ಅರಮನೆಂಜ ಚೆನ್ನಂಗ್ ದೂರತ್ ಇಂಜ ಕಾಡ್‌ಕ್ ಪೋಚಿ. ಅಲ್ಲಿ ವಾಸ ಇಂಜ ಕುರುಬ ಕುಟುಂಬಕಾರಡ ಕೂಡೆ ಇಪ್ಪಕ್ ನೋಟ್‌ಚಿ.

ನಾಳಂಕೆ 14ಂಗ್ ಓರ್ ಕೊಡವ, ಕುಂಟಬಸವನ ತಾಳ್‌ತಮನೆ ಕೋದ ಇಂಜ ಕಗ್ಗೋಡ್ ನಾಡ್ ಕಚೇರಿಕ್ ಕೂಟಿಯಂಡ್ ಬಾತ್. ಪಿತ್ಯಾಂದ್ ಪೊಲಾಕ ಬಸವನ ತೇಡಿಯಂಡ್ ಪೊರ್‌ಟ ಕೊಡವಕ್, ಕಾಡ್‌ಲ್ ಬಸವ ಓರ್ ಮರತ್‌ರ ಕೊಂಬೆಕ್ ತೂಂಗಿಯಂಡ್ ಚತ್ತ್ ಪೋನಾನ ಕಂಡತ್!

ಕೂಡೆನ್ನೆ ಅವು ಕ. ಪ್ರೇಸರ್‌ಕ್ ಸುದ್ದಿ ಎಣ್ಣುವಕ್ ಬಾತ್. ಆನಗುಂಡ್ ಕಂಪೆನಿ



ಸೈನ್ಯತರ ಡಾಕ್ಟರ್ ಪಿ.ಬಾಕಿ ಅಧಿಕಾರಿಯ ದಿವಾನ್ ಬಸವಂಡ ಚಾವುನ ಪರೀಕ್ಷೆ ಮಾಡಿತ್ ಡಾಕ್ಟರ್ ರಿಪೋರ್ಟ್‌ಪೋಲೆ ಬಸವ ಸ್ವ ಇಚ್ಛೆಲ್ ಸ್ವರ್ಗವಾಸಿ ಆಚಿಂದ್ 1854ತ್ ಇಂಡಿಯಾ ಸರ್ಕಾರತರ ಕಾರ್ಯದರ್ಶಿಕ್ ಎಲ್ವಿತ್ ಅರಿಚಿಟ್ಟಿತ್.

### ಮಿಷನ್ ಕೊಡಗುರ ಆಡಳಿತ ವ್ಯವಸ್ಥೆ

ಎಪ್ರಿಲ್ 11ಂಗ್ ಕ.ಫ್ರೇಸರ್ ಕೊಡಗುಲ್ ಚಿಕ್ಕವೀರರಾಜೇಂದ್ರ ಒಡೆಯಂಡ ಆಡಳಿತ ಆಖೀರಿ ಆಯಿತ್ ಬ್ರಿಟಿಷ್ ಒಡತನಕ್ ಬಂದಲ್ಲಿ ತತ್ಕಾಲ ಆಡಳಿತ ಎನ್ನನೆ ಇರೊಂದು ಎಣ್ಣುವ ಘೋಷಣೆನ ಮಡಿಕೇರಿಂಜ ಪೊರ್ಡ್‌ಚಿಟ್ಟಿತ್. ಅದ್ ಇನ್ನನೆ ಉಂಡ್.

Whereas the rule & dominion of Rajah Vira Rajendar Wodeyar over the country of Coorg have now definitely & forever ceased. It is hereby proclaimed & directed that the whole civil administration of the country shall be conducted as hereafter by the Gowdas, Shanbogs, Hoblidars, Parpadigars, Subedars, Dewans & Karnik as at present employed in their respective stations with the privilege of immediate & direct & appeal from every native of Coorg of whatever rank or degree to Lieut. Col. Fraser the Political Agent of His Excellency the Right Honourable the Governor General until the permanent establishment of a form of Govt which will be determined under the Authority of the Governor General & upon the model best calculated to secure the future well being & happiness of the people of the country.

It is hereby further distinctly explained that the administration of justice will be exercised by the authorities above enumerated only to that extent & degree with which they

have been hitherto individually charged to the entire exclusion of that superior power & jurisdiction which have been heretofore exercised by the Raja Vira Rajendra Wodeyar alone. No punishment thereafter extending to life or limb or more severe than Simple Imprisonment will on any account whatever take place without a reference to Col. Fraser & the sanction of the British Govt.

Marcara

11th April 1834

(Sd) J.S.FRASER

Lt.Col & Political Agent

ಕ.ಫ್ರೇಸರ್ ಗ.ಜನರಲ್ ಕಾರ್ಯದರ್ಶಿ ಕಾಗದಪೋಲೆ ಕೊಡಗ್ಗನ ಮಿಷನ್ ಎನ್ನುನೆ ಆಳೊಂಡು ಎಣ್ಣುವಾಂಡ ಮೀದ ಕೊಡಗ್ಗರ ಮುಕ್ರಿಯಡ ಅಭಿಪ್ರಾಯ ಲರಾಂಜವಕ್ ನೋಟ್‌ಚಿ. ಈ ಪೋಲೆ ಕ.ಫ್ರೇಸರ್ ಏಪ್ರಿಲ್ 19ಂಗ್ ಪೊಲಾಕ ಮಡಿಕೇರಿಲ್ ಕೊಡಗ್ಗರ ಮುಕ್ರಿಯಡ ಓರ್ ಸಭೆನ ವೀರರಾಜೇಂದ್ರ ಒಡೆಯ ಕೆಟ್ಟಿಚಿಟ್ಟು ಐರೋಪ್ಪ ಶೈಲಿರ ಬೆಂದು ಬಿದಾರತ್ ಕಾಕ್‌ಚಿ.

ಅದತ್ ಮಿಷನ್ ಕೊಡಗ್ ರಾಜ್ಯತ್ ಅಡಳಿತ ಏದ್ ಪೋಲೆ ಇರೊಂಡೂ ಎಣ್ಣುವಾಂಗ್ ನಿಂಗ ಏದೇ ಓರ್ ಪೋಡಿ, ಇಾಣ ಇಲ್ಲತೆ ನಿಂಗಡ ಅಭಿಪ್ರಾಯತ್‌ನ ವಣ್ಣೊಂಡೂಂದ್ ಕೇಟಂಡತ್. ಆ ನೇರತ್ ಕ.ಫ್ರೇಸರ್ ರಾಜಂಗ್ ಅವಂಡ ಕುಟುಂಬತ್ ಜಿಂವತ್ ಉಳ್ಳ ಸದಸ್ಯಂಗಡ ಪೆದ ತರೊಂಡೂಂದ್ ಕೇಟಿತ್ ಎಳ್ಳೊನ ಕಾಗದತ್‌ನ ಕೊಡವ ಮುಕ್ರಿಯಕ್ ಕೊಡ್‌ತತ್.

ಅದೊನ ಓದಿಯಂಡ ದಿವಾನ, ಕರಣಿಕ ಪಿಷ್ಣ ಬೋರೆ ಅಧಿಕಾರಿಯ ಫ್ರೇಸರ್‌ರ ಪಕ್ಕ ಬಂದಿತ್ "ಕೊಡಗ್ಗನ ಕಂಪೆನಿ ಸರ್ಕಾರತ್‌ರ ಅಡಳಿತಕ್ ಕೂಟೊಂಡು. ಅನ್ನನೆ ಮಿಷನ್ ಕಂಪೆನಿ ಸರ್ಕಾರಕ್ ಕೂಡ್‌ನ ಜಾಗತ್ ಉಳ್ಳ ಕಾನೂನ್ ಕೊಡಗ್ಗಕ್ ಇರಡ್"ಂದ್ ಒಮ್ಮತತ್ ಎಣ್ಣೊಚಿ.

ಅನ್ನನೆ ಚಿಕ್ಕವೀರರಾಜೇಂದ್ರನ ಮಡಿಕೇರಿಲೆ ಇಪ್ಪಕ್ ಬುಡೊಂಡು, ಕೊಡಗ್ಗಂಜ ರಾಜನ ಪೊರಾಮೆ ಅಯೆಪದ್ ಅವಮಾನಂದ್ ಒರಾತತ್ ಕೇಟಂಡತ್.



ಈ ಅಭಿಪ್ರಾಯತ್ನ ಸಭೆಲ್ ಕೂಡಿತಿಂಜ ಸುಮಾರ್ 588 ಮುಕ್ರಿಯ ಎಳ್ಳಿತ್, ಸೈನ್ ಮಾಡಿತ್ ಕ.ಪ್ರೇಸರ್ಕ್ ಕೊಡ್ತತ್.

ಆನಗುಂಡ್ ಕ.ಪ್ರೇಸರ್ ಕೊಡಗ್ಗನ ಬ್ರಿಟಿಷ್ ಆಳೊಂಡೊಂಡ್ ಕೊಡಗ್ಗರ ಮುಕ್ರಿಯ ಒಮ್ಮತತ್ ಅಭಿಪ್ರಾಯ ಕಾಟ್ನ ಪರಿಣಾಮ, ಗವರ್ನರ್ ಜನರಲ್ ಅಪ್ಪಣೆ ಪೋಲೆ ಕೊಡಗ್ಗನ ಬ್ರಿಟಿಷ್ ಸರ್ಕಾರತ್ ಆಡಳಿತಕ್ ಕೂಟಿತ್ಂಡ್ ಎಣ್ಣುವ ಜಾಹೀರ್ ನಾಮೆನ ಮೇ 7ಂಗ್ ಮಡಿಕೇರಿಲ್ ಪೂರ್ಡ್ಚಿಟ್ಟತ್. ಅದ್ ಇನ್ನೆ ಉಂಡ್.

"Where as it is the unanimous wish of the inhabitants of Coorg to be taken under the protection of the British Govt. His Excellency the Right Honourable the Governor General has been pleased to resolve that the territory hereafter governed by Vira Rajendra Wodeyar shall be transferred to the Honourable Company.

The inhabitants are hereby assured that they shall not again be subjected to native rule, that their civil & religious usages will be respected & that the greatest desire will invariably be shown by the British Govt to augment their security comfort & happiness.

Camp at Mercara

7th May 1834

(Sd)- J.S.Fraser

Lt.Col.Political Agent

ಚಿಕ್ಕವೀರರಾಜೇಂದ್ರನ ಕೊಡಗ್ಗಂಜ ಪೂರ್ಮೆ ಏದೇಂಗಿ ಜಾಗತ್ ಖೈದಿ ಆಯಿತ್ ಬೆಕ್ಕೊಂಡೊಂಡ್ ಕ.ಪ್ರೇಸರ್ ಕೊಡಗ್ಗಕ್ ಬಪ್ಪಾಂಗ್ ಮುಪ್ಪಡೆ ತೀರ್ಮಾನ ಮಾಡಿತಿಂಜತ್. ಗ.ಜನರಲ್ ಒಪ್ಪಿಗ್ಪೋಲೆ ರಾಜ ಕೊಡಗ್ಗಲೆ ಇಪ್ಪಕ್ ಬುಡೊಂಡೊಂಡ್ ಕೊಡಗ್ಗರ ಮುಕ್ರಿಯಡ ಬೋಡಿಕೆಕ್ ಕಾರ್ಯದರ್ಶಿ ಕ.ಪ್ರೇಸರ್ಕ್ ಎಳ್ಳಿಚಿ.

In explaining to the principal inhabitants of Coorg the causes which prevent the Governor General from acceding in their requests in favour of the Ex-Rajah you will take care to assure them that His Lordship had every disposition to attend to their wishes but that though he highly

appreciates the feeling which urged them to come forward on behalf of one whose rule over them had been to oppressive yet he is satisfied that feeling could not be indulged without the greatest danger of being abused so as to interfere with the due administration of the affairs of the country & consequently with their own prosperity & happiness.

The papers in the native language which accompanied your letter will be forwarded to Madras for translation. I have the honour to be, your most obedient servant.

Ootacamund

(Sd) W.H.Macnaughten

The 22nd April 1834

Secretary to the Governor General.

ಚಿಕ್ಕವೀರರಾಜೇಂದ್ರ ಒಡೆಯರ ಮಡಿಕೇರಿಂಜ ರಾಜಖೈದಿ ಆಯಿತ್ ಕೊಡಗುಂಜ ಪೊರ್ಡುವಾಂಗ್ ಮುಪ್ಪಡೆ ಕಂಪೆನಿ ಸರ್ಕಾರ, ರಾಜ ಪಿಳ್ಳಾ ಪರಿವಾರತರ ಮೀದ ಎಚ್ಚರ ಎಡ್ತವಕ್ ಕ್ಯಾ.ಕಾರ್ಪೆಂಟರ್ ಎಣ್ಣುವ ಮಿಲಿಟರಿ ಆಫೀಸರ್‌ನ 1834ತುಂಜ 1848ಂಗತ್ತನೆ ನೇಮಕ ಮಾಡ್‌ಚಿ.

ಕ.ಫ್ರೇಸರ್‌ರ ಆದೇಶಪೋಲೆ ಚಿಕ್ಕವೀರರಾಜೇಂದ್ರ 16 ಲಕ್ಷತರ ಮಾಲ್‌ಮಟ, ಪೊನ್ನೂರ ಪೌನ್, ಏರ ಕ್ರಯತರ ಸಾಮಾನ್‌ನೆಲ್ಲ ತಾನ್ ಮಡಿಕೇರಿ ಅರಮನೆನ ಬುಡುವಾಂಗ್ ಮುಪ್ಪಡೆ ಒಪ್ಪಾಚಿಟ್ಟಿತ್. ಬ್ರಿಟಿಷ್ ಅಧಿಕಾರಿಯ ತಾನ್ ಕೊಡಗುಂಜ ಎಡ್ತಂಡ್ ಪೋಪಕ್ ಒಪ್ಪಿಗೆ ತಂದ ಪತ್ತಾಯಿರ ಉರ್‌ಪಿಯ ಅಲ್ಲತೆ ಬಲ್ಲಪ್ರಮಾಣತ್ ಪೊನ್ನೂರ ಪೌನ್, ಮಾಲ್‌ನ ರಾಣಿ ವಾಸತರ ಪಲ್ಲಕ್ಕಿಲ್ ಎಡ್ತಂಡ್ ಪೋಪಕ್ ಒಳ್‌ಪಾಚಿಟ್ಟಿತಿಂಜತ್! ರಾಜಂಗ್ ಮೂಂದ್ ಪೊಣ್ಣ್, ಪತ್ ಬೆಚ್ಚಂಡ ಪೊಣ್ಣಾಳ ಇಂಜತ್. ಇದತ್ ಗಂಗಮ್ಮಾಜಿ, ದೇವಮ್ಮಾಜಿ, ನಂಜಮ್ಮಾಜಿ ಮಹಾರಾಣಿಯ ಆನಕ, ರಾಜೀವಮ್ಮ, ಕಾಳಮ್ಮ, ಗೌರಮ್ಮ, ಕಾವೇರಮ್ಮ, ಪಾರ್ವತಿಯಮ್ಮ, ಗೌರಮ್ಮ, ಸುಬ್ಬಮ್ಮ, ಚಾನಕಮ್ಮ, ಸುಭದ್ರಮ್ಮ ಪಿಳ್ಳಾ ಮುದ್ದು ವೀರಮ್ಮ ಬೆಚ್ಚಂಡ ಪೊಣ್ಣಾಳ.

ಇದತ್ ಗೌರಮ್ಮಂಗ್ ಮಡಿಕೇರಿಲ್ ಇಪ್ಪಕೆ ಚಿಕ್ಕವೀರ ರಾಜೇಂದ್ರನುಂಡ್ ಚಿತ್ರಶೇಖರ ಎಣ್ಣುವ ದಂಡ್ ಬಯತರ ಮೋಂಪ ಇಂಜತ್. ಇಂವನಲ್ಲತೆ ರಾಜಂಗ್ ಮಡಿಕೇರಿ ಬುಡುವಕ ಬೋರೆ ಮಕ್ಕ ಇಂಜಾಲೆ! ರಾಜ ಪೊರ್ಡುವಕ ಅವಂಡ ಅಪ್ಪ

ಲಿಂಗರಾಜೇಂದ್ರ ಪಿಳ್ಳಾ ದೊಡ್ಡವೀರರಾಜೇಂದ್ರಂಡ ಚೆನ್ನಂಗ್ ಬೆಚ್ಚಂಡ ಪೊಣ್ಣಾಳ ಪೊರಾಟತ್. ಈ ರಾಣಿಯಡ ಸಖಿಯ, ದಾಸಿಯ ಎಣ್ಣೆಯಂಡ್ ಅಳಾತ ಪಲ್ಲಕ್ಕಿ 70ಂಗಂಜ ಏರ ಇಂಜತ್. ಇದತೆಲ್ಲ ರಾಜ ದುಂಬ ಪೌನ್ ಪಿಳ್ಳಾ ಮಾಲ್‌ನ ಬಟ್ಟೆಲ್ ಕೆಟ್ಟಿತ್ ಬೆಪ್ಪಾಚಿಟ್ಟಿತ್! ಪಲ್ಲಕ್ಕಿನ ಪೊರ್‌ಪಕ್ 300 ಬೋಯಿಯ ಇಂಜತ್. ಕೂಟಾಕ್ ರಾಜಂಡ ಅರಮನೆರ ಬೇಲ್ ಪಣಿಕಾರ, ಅಡಿಗಕಾರ ಎಚ್ಚಕೊ ಇಂಜತ್.

ವೀರರಾಜೇಂದ್ರ ಪೊರ್‌ಡುವಕ ಕೂಡ ದಿವಾನ್ ಪೊನ್ನಪ್ಪ, ಕಾರ್ಯಕಾರ ಬಿದ್ದಂಡ ಸೋಮಯ್ಯ, ಚೋಕಿರ ಅಪ್ಪಯ್ಯ, ಹೆಬ್ಬಾಳೆ ತಿಮ್ಮಣ್ಣ, ಕನ್ನಡ, ಹಿಂದೂಸ್ಥಾನಿ, ಪರ್ಶಿಯನ್ ಮುನ್ನಿಯ, ಕಾರ್ಯಕಾರಳೊ ಇಂಜತ್.

ಇನ್ನನೆ ಚಿಕ್ಕ ವೀರರಾಜೇಂದ್ರ ತಾಂಡ ಇಡೀ ಪರಿವಾರತ್‌ರ ಕೂಡ ಏಪ್ರಿಲ್ 24ಂಗ್ ಮಜ್ಜಣ ಮೂಂದ್ ಗಂಟೆಕ್ ಮಡಿಕೇರಿ ಅರಮನೆಂಜ ಕುದರೆಲ್ ಅಳಾತಂಡ್ ಪೊರಾಟತ್. ಇನ್ನನೆ ಪೊರ್‌ಡುವಕ ತಾಂಡ ಇಂಗ್ಲೀಷ್ ವಾದ್ಯಕಾರಕ್ ಗೆಲಿರ ಪಾಟನ್ ಪಾಡಿಯಂಡ್ ಪೋಪಕ್ ಅಪ್ಪಣೆ ಮಾಡ್‌ಚಿ! "ವಾಸ್ತವತ್ ಈ ಪಾಟನ್ ಮೆರವಣಿಗೆ ಪೋಪಕ ಕುಶಿಲ್ ಇಪ್ಪಕ ಪಾಡುವ. ಆಚೇಂಗಿ, ಕೊಡಗರ ರಾಜ ತಾಂಡ ರಾಜ್ಯ ಕಳಂದಂಡ್, ರಾಜ್ಯತನೆ ಬುಟ್ಟಿತ್ ಪೋಪಕ ಈ ಪೋಲೆ ಪಾಡುವಕ್ ಎಣ್ಣಾನದ್ ಅಂವಂಗ್ ಇದ್ ತಾಂಡ ಆಖೀರಿ ಎಣ್ಣುವದ್ ಗೊತ್ತಾಯಿಲೆ ಕಾಂಬಾ"ಂದ್ ಡಾ.ಮೂಗ್ಲಿಂಗ್ ಎಣ್ಣುವ.

ರಾಜ ತಾಂಡ ರಾಣಿಯಡ ಪಲ್ಲಕ್ಕಿಲ್ ದುಂಬ ಪೊನ್ನ ಪಿಳ್ಳಾ ಮಾಲ್‌ಮಟ ಬೆಚ್ಚಿತಿಂಚಾನುಂಡ್ ಬೋಯಿಯಕ್ ಪೊರ್‌ಪಕ್ ಕಷ್ಟ ಆಚಿ. ಎತ್ತರತ್‌ರ ದಾಟ್ಲೆ, ಕುಂಡ್ ಕಾಟ್ಟುವಕ ಬೋಯಿಯ ಬೂವ ಇಂಜತ್. ಚೆನ್ನಂಗ್ ದೂರ ಪೋನದು ಬೋಯಿಯ ತಂಗಕ್ ಪೊರ್‌ಪಕಯ್ಯುಲೆಂದ್ ಎಣ್ಣಿರತ್! ಅಕ್ಕ ಬುದ್ಧ ಪೊನ್ನರ ಪೌನ್ ಪಿಳ್ಳಾ ರಾಣಿಯ ಚಾಡ್‌ನ ಪೌನ್‌ನ ಬೋಯಿಯ ಪಿಳ್ಳಾ ರಾಜಂಡ ಪರಿವಾರ ಎಡ್‌ತಂಡತ್.

ಬೋಯಿಯ ಪಲ್ಲಕ್ಕಿ ಪೊರ್‌ಪಕಯ್ಯುಲೆಂದ್ ಎಣ್ಣುವಕ ರಾಜಂಗ್ ಪೋಡಿಯಾಚಿ. ಬ್ರಿಟಿಷ ಕೊಡಗಂಜ ಬೊರಿ ಪತ್ತಾಯಿರ ಉರ್‌ಪಿಯ ಎಡ್‌ತಂಡ್ ಪೋಪಕ್ ಒಪ್ಪಿಗೆ ತಂದಿತಿಪ್ಪಕ ತಾನ್ ಅದ್‌ಂಡ ಎಚ್ಚಕೊ ಫಾಲ್ ಪೊನ್ನ, ಮಾಲ್‌ನ ಪಲ್ಲಕ್ಕಿಲ್ ಒಳಾಪ್‌ಚಿಟ್ಟಂಡ್ ಎಡ್‌ತಂಡ್ ಪೋಪದ್ ಗೊತ್ತಾನಕ ತಾಂಗೆ ಕೇಡ್‌ಂದ್ ಬೊತ್ತಿತ್, ತಾಂಡ ಆದ್ಯ ಶಿಬಿರ ಇಡುವ ಜಾಗತೆ ನೆಲತ್ ಕುಂಡೆಡ್‌ತ್ ಚೆನ್ನಂಗ್ ಮಾಲ್ ಮಟತನ ಪೊಪನ್ನಕೆ ತೀರ್ಮಾನ ಮಾಡ್‌ಚಿ.

ರಾಜಂಡ ಪರಿವಾರ ಬ್ರಿಟಿಷಡ ಪಾರಕಾರಡ ಕೂಡ ಕಾವೇರಿ ಪೊಳೆ ಕಡ್‌ಂದಿತ್



ಮೈಸೂರ್ ಪಕ್ಕತ ಸೂಳೆಕೋಟೆ ಎತ್ತಿ. ದಂಡ್ ದಿನ ಕೆರಿಯ ನಡೆಂದ ಸುಸ್ತಲ್ ಬ್ರಿಟಿಷ ಅಲ್ಲಿ ಓರ್ ಶಿಬಿರ ಇಟ್ಟಿತ್. ಶಿಬಿರತರ ಸುತ್ತು ಬ್ರಿಟಿಷ್ಕಾರ ಪಾರ ಇಂಜತ್. ಈ ನೇರತ್ ಕೇಳಿಪಟ್ಟ ಶಾಸ್ತ್ರಕಾರ ಹಾರಂಗಿ ನರಸಿಂಹ ಶಾಸ್ತ್ರಿನುಂಡ್ ರಾಜ ಅಲ್ಲಿ ಓರ್ ಹೋಮ ಇಡ್ಚಿಟ್ಟಿತ್.

ರಾಜಂಡ ಪರಿವಾರಕ್ ಅಡಿಗಿ ಮಾಡುವಕ್ ಇಟ್ಟಿ ಡೇರೆಲ್ ಒಲೆ ಇಟ್ಟಿ ಜಾಗತೆ ವೀರರಾಜೇಂದ್ರ ತಾಂಡ ಕಾರ್ಯಕಾರಂಗಳುಂಡ್ ಬಲ್ಲೋರ್ ಕುಂಡ್ ಎಡ್ಪಾಚಿಟ್ಟಿತ್ ಲಿದತ್ ಪೊನ್ನರ ಪಾನ್ ದುಂಬಿತಿಂಜ ಚೀಲತ್ನ ಒಂದಾಂಡ ಮೀದ ಒಂದಾಂಡನ್ನೆಕೆ ಬೆಚ್ಚಿತ್ ಕುಂಡ್ನ ಮುಚ್ಚಿರ್ತಾ! ಅಲ್ಲಿಂಜ ನೆಲಸಮ ಮಾಡಿತ್ ಅಲ್ಲಿಯೆ ಒಲೆ ಇಟ್ಟಿತ್ ಅಡಿಗಿ ಮಾಡ್ಚಿಟ್ಟಿತ್. ಈ ನೇರತ್ ಅಲ್ಲಿ ಇಂಜ ಎಲ್ಲಾ ಜನಳುಂಡ್ ಪೊನ್ನ ಪೂತ ವಿಷಯತ್ ಗುಟ್ಟಾಯಿತ್ ಇಪ್ಪಾಂದ್ ಆಣೆ ಮಾಡ್ಚಿಟ್ಟಿಂಡತ್.

ಅಲ್ಲಿ ದಂಡ್ ದಿನ ಇಂಜಿತ್ ರಾಜಂಡ ಪರಿವಾರ ಬೆಂಗಳೂರ್ಕ್ ಪೊರಟತ್. ಪಲ್ಲಕ್ಕಿ ತೂವೆ ಆಯಿತಿಂಜತ್. ಮೇ 12ಂಗ್ ಅವು ಎಲ್ಲ ಬೆಂಗಳೂರ್ ಎತ್ತಿಚಿಂದ್ ರೆಕಾರ್ಡ್ ಉಂಡ್.

ರಾಜ ಮಡಿಕೇರಿಂಜ ಪೊರಡುವಕ್ ಪತ್ತಾಯಿರಕ್ಂಜ ಏರ ಪಣ ಕೊಂಡ ಪೋಯಿತ್ಂದ್ ಬ್ರಿಟಿಷಕ್ ಅಗ್ಗೇನ ಬಂದಾಂಗ್ ಬೆಂಗಳೂರ್ ಕಮಿಷನರ್ಕ್ ಎಳ್ಳಿಚಿ. ಬೆಂಗಳೂರ್ಲ್ ರಾಜಂಡ ಕೂಡೆ ಚೆನ್ನಂಗ್ ದಿನ ಬ್ರಿಟಿಷ್ ಅಧಿಕಾರಿಯ ಇಂಜತ್. ತಾಂಡ ಮುನ್ನಿಯಡ ಸಹಾಯತ್ ರಾಜ ಕೊಡಗರ ಜನ ಪಿಳ್ಳಾ ಮೈಸೂರ್ ರಾಜಂಡ ಜನಡ ಕೂಡೆ ಕಾಗದ ವ್ಯವಹಾರ ನಡೆತು ಎಣ್ಣುವ ಅಗ್ಗೇನತ್ ಕೊಡಗರ ರಾಜನ ವೆಲ್ಲೂರ್ಕ್ ಅಯೆಪನ್ನಕೆ, ದಿವಾನ ಪೊನ್ನಪ್ಪ ಪಿಳ್ಳಾ ಪರ್ಶಿಯನ್, ಕನ್ನಡ ಮುನ್ನಿಯಳ ವಾಪಾಸ್ ಕೊಡಗ್ಗೆ ಅಯೆಪನ್ನಕೆ ಗ. ಜನರಲಾರ ಕಾರ್ಯದರ್ಶಿಕ್ ಕಾಗದ ಅಯೆಚಿತ್.

ಆನಗುಂಡ್ ಕೊಡಗರ ರಾಜ ಪಿಳ್ಳಾ ಪರಿವಾರ ವೆಲ್ಲೂರರ ಕೋಟೆಕ್ ಪೋಚಿ. ಈಂಗ್ ಮುಪ್ಪಡೆ ಅಲ್ಲಿ ಶ್ರೀಲಂಕಾತರ ಕ್ಯಾಂಡಿ ರಾಜ್ಯತರ ರಾಜ ಆ ಮನೆಲ್ ಇಂಜತ್. ಬೆಂಗಳೂರಂಜ ಐಂಬದ್ ಜನಳ ಮಾತ್ರ ವೆಲ್ಲೂರ್ಕ್ ಅಯೆಚಿತ್ ಬಾಕಿ ಜನಳ ಕೊಡಗ್ಗೆ ಅಯೆಚಿತ್.

ವೆಲ್ಲೂರ್ಲ್ ಇಂಜ ನೇರತ್ ಚಿಕ್ಕವೀರರಾಜೇಂದ್ರಂಗ್ ಚೆನ್ನಂಗ್ ಮಕ್ಕ ಪುಟ್ಟಿಚಿ. ಅದತ್ ದಂಡ್ ಮಕ್ಕ ಪಿಳ್ಳಾ ಓರ್ ರಾಣಿ ಚಿತ್ತಪೋಚಿ. ಇನ್ನನೆ 1834ನೆ ಜುಲೈ 6ತ್ಂಜ 1835ನೆ ಮಾರ್ಚಿ 6ಂಗತ್ತನೆ ಇವು ವೆಲ್ಲೂರಲೆ ಇಂಜತ್.



## ಕೊಡಗ್ಗರ ಆಖೀರಿ ಮೂಂದ್ ರಾಜಂಗಡ ಆಳ್ವಿಕೆ, ಪ್ರಜೆಯಡ ಕೂಡೆ ಅಯಿಂಗಡ ಸಮ್ಮಂದ

1834ತ್ ಕೊಡಗ್ಗಲ್ ಹಾಲೇರಿ ಲಿಂಗಾಯತ ರಾಜಂಡ ಆಳ್ವಿಕೆ ಆಖೀರಿಯಾಚಿ. ಇಯಂಡ ಆಳ್ವಿಕೆರ ಕಾಲತ್ ಜನಕ್ ಹಿಂಸೆ ಇಂಜತಾ, ಜನ ಎಕ್ಸೋಲು ಬೊತ್ತಿಯಂಡೆ ಇಂಜತಾಂದ್ ನೋಟುವಕ್ ಪೋನಕ, ದೊಡ್ಡ ವೀರರಾಜೇಂದ್ರ ಪಿಳ್ಳಾ ತಮ್ಮಣ ಲಿಂಗರಾಜೇಂದ್ರ ಚರ್ಪತ್ ಟಿಪ್ಪುರ ಬಂಧನತ್ ಇಂಜಿತ್ ಕಷ್ಟ ಅನುಭವಿಚಿಟ್ಟಪ್ಪ. ಅಲ್ಲಿ ಸುಲ್ತಾನಂಡ ಅಧಿಕಾರಿಯ ತಂಗಕ್ ಆಕತಯಿಂಗಲ ಮಂಡೆ ಕೆತ್ಚಿಡುವ ಇಂಜತ್. ಇದ್ ಕೊಡಗ್ ರಾಜಂಗಕೂ ಗೊತ್ತಿಂಜತ್. ವಿರೋಧಿಯಲ ಈ ಪೋಲೆ ಕೊಲ್ಲುವದ್ ಆ ಕಾಲತ್ ಮಾಮೂಲ್ ಆನಾನುಂಡ್ ಪ್ರಜೆಯ ಅದ್ನ ತಪ್ಪೊಂದ್ ಗೇನ ಮಾಡ್ಲೆ. ಅಕ್ಕತ ಕಾಲತ್ ಜನ ತಂಗಡ ರಾಜ ನ್ಯಾಯತ್ ಉಂಡಾ, ಇಲ್ಲಿಯಾಂದ್ ವಿಚಾರ್ಚಿಡುವ ಸ್ಥಿತಿಲ್ ಇಂಜ್ಲೆ. ಅಯಿಂಗಡ ಮನಸ್ಸಲ್ ರಾಜ ಮಾಡ್ನದೆಲ್ಲ ಸರಿ! ರಾಜಂಡ ಆಜ್ಞೆನ ದೇವಡ ಆಜ್ಞೆಂದ್ ಪಾಲನೆ ಮಾಡುವದೆ ಅಯಿಂಗಡ ಬದ್ಕಾಯಿತಿಂಜತ್.

ಕೊಡಗ್ಗರ ರಾಜಂಗ ತಂಗಡ ವಿರೋಧಿಯಲ ಕೊಲ್ಲ್ಚಿಟ್ಟಕೊ ಜನ ಸಾಮಾನ್ಯಂಗ ನೆಮ್ಮದಿಲ್ ಬದ್ಕ ನಡುತುವಕ್ ಸೆರಿಯಾನ ಸರ್ಕಾರ ಸ್ಥಾಪನೆ ಮಾಡಿತಿಂಜತ್. ಜನಕ್ ಭೂಮಿ ಸಾಗುವಳಿ ಮಾಡುವಕ್ ಅತ್ತ, ಕಡ್ಚಿಯ, ಜಮ್ಮತಾಲಲ ಕೊಡ್ತತ್. ಮಣ್ಣಾರ ಗುಣ ಪರೀಕ್ಷೆ ಮಾಡಿತ್ ಅದ್ಂಗೊತ್ತನ್ನೆ ಕಂದಾಯ ನಿರ್ಕ್ ಮಾಡ್ಚಿ. ಇದ್ನುಂಡ್ ಜನಕ್ ಸರ್ಕಾರಕ್ ತಂಗಲುಂಡ್ ಕೊಡ್ಕಂಡಿಯದ್ ಇಚ್ಚೆಕೆಂದ್ ಗೊತ್ತಾಯಿತ್ ನೆಮ್ಮದಿ ಇಂಜತ್.

ಹಾಲೇರಿ ರಾಜಂಗ ತಂಗಡ ವಿರೋಧಿಯಲ ಕೊಲ್ಲ್ಚಿಟ್ಟದ್ ನೇರ್ ಆನಕೊ, ಇನ್ನೆ ಕೊಲ್ಲ್ಚಿಡುವಕ್ ಕೊಡಗ್ಗರ ಜನಡ ಸರ್ಪೋರ್ಟ್ ರಾಜಂಗಕ್ ಇಂಜತ್. ರಾಜಂಗಡ ಕಾರ್ಯಕಾರ ಪಿಳ್ಳಾ ಸೈನಿಕಂಗ ಎಲ್ಲ ಸುಮಾರ್ಕ್ ಕೊಡವಲೆ ಆಯಿತಿಂಜತ್.

ಕೊಡಗ್ಗರ ರಾಜಂಗ ಪೊಣ್ಣ್ ಪಿರಾಂದಂಗ, ವಿಷಯಾಸಕ್ತಂಗಂದ್ ಬ್ರಿಟಿಷ್ ಚರಿತ್ರೆಕಾರ ಆರೋಪ ಮಾಡಿತ್. ಅಕ್ಕತ ಕಾಲ ಪಿಳ್ಳಾ ಅಲ್ಲಿಂಚೊ ಹಿಂದೂದೇಶತಾರ ರಾಜಂಗಡ ಸ್ವಂತ ಬದ್ಕನ ನೋಟನಕ ಸುಮಾರ್ಕ್ ತಂಗಡ ಅಂತಃಪುರತ್ ಏರಕಣಕ್ಲ್ ಕೆಟ್ಟಿಯಂಡ ಪೊಣ್ಣಾಲ ಪಿಳ್ಳಾ ಬೆಚ್ಚಂಡ ಪೊಣ್ಣಾಲ ಆಕಿಯಂಡದ್ ಸಾಮಾನ್ಯ ಆಯಿತ್ ಕಂಡ್ಬಪ್ಪ. ಅದ್ ಕಾಲತ್ ಬೊರಿ ರಾಜಂಗಲೆ ಅಲ್ಲತೆ ದಿವಾನಂಗ, ರಾಜ್ಯತ್ ಪೆದ ಪೋನಯಿಂಗ ಒಂದಾಂಗ್ಂಜ ಏರ ಪೊಣ್ಣನ ಮಂಗಲ ಆಪದ್,

ಬೆಚ್ಚವದ್ ಎಲ್ಲ ಮಾಮೂಲ್ ಆಯಿತಿಂಜತ್!

ಕೊಡಗರ ರಾಜಂಗ ಅದತೂ ಆಖೀರಿ ಮೂಂದ್ ರಾಜಂಗ ಕೊಡವ, ಪಟ್ಟಮ ಜನಾಂಗತ್ ಕನ್ನಿಯಳ ಅರಮನೆಕ್ ಕೂಟಿಯಂಡ್ ಅಯಿಂಗಕ್ ಲಿಂಗ ಕೆಟ್ಟಿತ್ ಮಂಗಲ ಆನದ್ ಕಂಡ್ ಬಪ್ಪ. ಕೊಡವಳ ಲಿಂಗಾಯತ ಮಾಡಿತ್ ಅಯಿಂಗಕ್ ತಂಗಡ ಪೋಳಿಯಳ ಮಂಗಲ ಕೈಚಿತ್. ಇನ್ನತ ಮಂಗಲತ್‌ನುಂಡ್ ರಾಜ ಕುಟಂಬಕೂ, ಕೊಡಗರ ಎಚ್ಚಕೂ ಕೇಳಿಪೋನ ಒಕ್ಕಕೂ ಆತ್ತೀಯತೆ ಬೊಳಂದನ್ನೆ ಕಾಂಬ.

ಪಾಲೇರಿ ರಾಜಂಗ ದಾರ್ಕ್ ಪೊಣ್ಣ್ ಇಂಜಲಿಯೊ ಅನ್ನತಯಿಂಗಕ್ ಅರಮನೆಲ್ ಆಶ್ರಯ ಪಡ್‌ಂದ ಕನ್ನಿಯಳ ಪೊಣ್ಣಾಯಿತ್ ಕೊಡಪ್ ಇಂಜತ್. ಅನ್ನನೆ ಪ್ರಚೆಯಕ್ ಪೊರಮೆತ ಜಿಲ್ಲೆರ ಸಂಪರ್ಕ್ ಇಲ್ಲತಾಂಗ್ ಅಪು ತಂಗಡ ಬದ್‌ಕ್‌ಲ್ ತೃಪ್ತಿ ಪಟ್ಟಿತಿಂಜತ್. "ರಾಜ ಮಾಡುವಾನ ಕೇಪಕಯ್ಯ, ಅಯಿಂಗಡ ಅಪ್ಪಣೆನ ಮಂಡೆ ಕುಂಬ್‌ಟ್ ಪಾಲನೆ ಮಾಡೊಂಡು" ಎಣ್ಣುವದೆ ಅಂದೇತ ಕಾಲತ ಕೊಡಗರ ಜನಡ ಉದ್ದೇಶ ಆಯಿತಿಂಜತ್.

ಆನಗುಂಡ್ ಚಿಕ್ಕವೀರರಾಜೇಂದ್ರ ಒಡೆಯ ಕೊಡಗ್ ಬುಟ್ಟಿತ್ ತಾಂಡ ಪರಿವಾರತ್ ಕೂಡೆ ಮಡಿಕೇರಿಂಜ ಪೊರಟಿತ್ ಕೊಡಗರ ತೆರಿಕ್ ಎತ್ತಣೆಕೂ ಆಯಿರಾರ್ ಕಣಕ್ ಅಣಾಳ, ಪೊಣ್ಣಾಳ ಪಿಳ್ಳಾ ಮಕ್ಕ ರೋಡ್‌ರ ದಂಡೂ ಬರಿಲ್ ನಿಂದಂಡ್, ತಂಗಡ ರಾಜ ಬುಟ್ಟಿತ್ ಪೋಯಂಡ್ ಉಂಡಲ್ಲಾಂದ್ ಕಣ್ಣೀರ್ ಇಟ್ಟಂಡ್ ಇಂಜತ್.

ಚಿಕ್ಕವೀರರಾಜ ಕೊಡಗ್ ಬುಡುವಾಂಗ್ ಮುಪ್ಪಡೆ ಬ್ರಿಟಿಷ್ ಸರ್ಕಾರಕ್ ಒಪ್ಪಿಚಿಟ್ಟ 16 ಲಕ್ಷ ಉರ್‌ಪಿಯ, ಸಾಮಾನ್, ಮಾಲ್ ಮಟ, ಪೊನ್ನ, ಕುದರೆರನ್ನತ ಕ್ರಯ ಉಳ್ಳ ಸಾಮಾನ್‌ನ ಕೊಡಗರ ಆಕ್ರಮಣತ್ ಕೂಡಿಯಾಡ್‌ನ ಸೇನಾಧಿಕಾರಿಯ ಪಿಳ್ಳಾ ಬೋರೆ ಅಧಿಕಾರಿಯಕ್ ಇನಾಂ ಆಯಿತ್ ಕೊಡಪಕ್ ದಂಡ್ ಕಾಲ ಬೋಂಡಿಯಾಚಿ! ಎನ್ನಂಗ್ಗೆಣ್ಣಕ ಇನಾಂ ಪಡ್‌ಂದಯಿಂಗಡ ಚಾಕ್ರಿ ಪಿಳ್ಳಾ ಪಡೆಲ್ ಎದ್‌ರೊಟ್ಟ ಕಪ್ಪ ನೋಟಿತ್ ಕೊಡತತ್.



### ಕ.ಪ್ರೇಸರ್ ಕೊಡಗ್ಗರ ಆಡಳಿತ ವಹಿಸಿಯಂಡ್ ಮಾಡ್ನ ಕಾರ್ಬಾರ್

ಕ.ಪ್ರೇಸರ್ ಕೊಡಗ್ಗರ ರಾಜ ಚಿಕ್ಕ ವೀರರಾಜನ ತಾಂಡ ಆಡಳಿತಾಂಜ ಉಳ್ಳಪನದ ಕೊಡಗ್ಗರ ಆದ್ಯತ ಕಮಿಷನರ್ ಆಯಿತ್ ಆಡಳಿತ ವಹಿಸಿಯಂಡತ್. ಚೆನ್ನಂಗಿ ತಿಂಗ ಎಣ್ಣಕ ಅಕ್ಟೋಬರ್‌ಕೆತ್ತನೆ ಮಾತ್ರ ಈ ಪದವಿಲ್ ಇಂಜ ಕರ್ನಲ್ ಮಾಡ್ನ ಕಾರ್ಬಾರ್ ಈ ಪೋಲೆ ಇಂಜತ್.

1. ಬೆಂಗಳೂರ್‌ಲ್ ಬ್ರಿಟಿಷ್ ಅಧಿಕಾರಿಯಡ ಆಶ್ರಯತ್ ಇಂಜ ಚೆನ್ನಬಸಪ್ಪ ಪಿಳ್ಳಾ ದೇವಮ್ಮಾಜಿನ ಕೊಡಗ್ಗರ್ ವಾಪಾಸ್ ಬರೊಂಡೂಂಡ್ ಮೈಸೂರ್ ರಾಜ್ಯ ಆಡಳಿತ ನಡ್ತುವ ಇಂಜ ಕಮಿಷನರ್‌ರ ಮೂಲಕ ಕಾಗದ ಎಳ್ಳಚಿ. ಆನಗುಂಡ್ ಚೆನ್ನಬಸಪ್ಪ ತಾಂಡ ಪೊಣ್ಣರ ಕೂಡೆ 1834ನೆ ಇಸವಿ ಮೇ 15ಂಗ್ ಬಾತ್. ಆ ನೇರತ್ ಅವ ಮಿಳ್ಳಾಕ್ ತಾಂಡ ವಾಸಕ್ ನಾಲ್ವಾಡ್ ಅರಮನೆನ ಬುಟ್ಟ್ ತರೊಂಡೂಂಡ್ ಕೇಟಲ್ಲಿ, ಕ.ಪ್ರೇಸರ್ ಕೊಡಗ್ಗರ ದಿವಾನಂಗ ಪಿಳ್ಳಾ ಮುಖ್ಯಪಟ್ಟಿಯಿಂಗಳ ಅಭಿಪ್ರಾಯ ಕೇಟತ್. ಚೆನ್ನಬಸಪ್ಪಂಗ್ ನಾಲ್ವಾಡ್ ಅರಮನೆಲ್ ಏದೇ ಓರ್ ಹಕ್ಕ್ ಇಲ್ಲತಾಂಗ್, ಅವಂಡ ಬೋಡಿಕೆನ ತಿರಸ್ಕಾರ ಮಾಡಿತ್ ಅಪ್ಪಂಗಳಕ್ ಅಯೆಚತ್.
2. 1834ತ್ ಪೂರ್‌ಡ್‌ಚಿಟ್ಟ ಇಸ್ತೀಹಾರ್‌ನಾಮೆಲ್ ಕಂಪೆನಿ ಸರ್ಕಾರ ಕೊಡಗ್ಗ ಜನಡ ಸಾಮಾಜಿಕ ಪಿಳ್ಳಾ ಧಾರ್ಮಿಕ ಪದ್ಧತಿ, ಕಟ್ಟಪಾಡ್‌ನ ಗೌರವತ್ ಕಾಂಬಾಂದೂ, ರಾಜಂಡ ಕಾಲತ್ ಅಧಿಕಾರಿಯಡ ಅಧಿಕಾರ ಪಿಳ್ಳಾ ರಾಜ್ಯಾಡಳಿತ ಪದ್ಧತಿನ ಮುಂದರ್‌ಚಿಡುವಾಂಡ್ ಘೋಷಣೆ ಮಾಡ್‌ಚಿ.
3. ಚಿಕ್ಕವೀರರಾಜೇಂದ್ರ ಕೊಡಗ್ಗ ಬುಟ್ಟಿತ್ ಬೆಂಗಳೂರ್‌ಕ್ ಪೋಪಕ ಮುಖ್ಯ ಅಧಿಕಾರಿಯಳಾನ ದಿವಾನ್. ಪೊನ್ನಪ್ಪ ಪಿಳ್ಳಾ ಕಾರ್ಯಕಾರ ಬಿದ್ದಂಡ ಸೋಮಯ್ಯ ಇಂಜತ್. ಅಲ್ಲಿಂಜ ರಾಜನ ವೆಲ್ಲೂರ್‌ಕ್ ಅಯೆಪಕ, ಕರ್ನಲ್ ಪೊನ್ನಪ್ಪ ದಿವಾನನ ಕೊಡಗ್ಗರ್ ವಾಪಾಸ್ ಕಾಕಿಯಂಡತ್. ಪೊನ್ನಪ್ಪ ದುಂಬ ಪ್ರಭಾವಿ ವ್ಯಕ್ತಿಂದ್ ಅರ್‌ಂಜ ಕರ್ನಲ್ ಬ್ರಿಟಿಷ್ ಅಧಿಕಾರಿಯಡ ಅಧೀನತೆ ಪೆರಿಯ ದಿವಾನನಾಯಿತ್ ನೇಮಕ ಮಾಡ್‌ಚಿ.
4. ಕೊಡಗ್ಗಂಜ ಪೊರ ರಾಜ್ಯತ್ ಮಾರುವ ಪಿಳ್ಳಾ ಕೊಡಗ್ಗರ್ ಪೊರ ರಾಜ್ಯತ್‌ಂಜ ಮಾರುವಕ್ ಕೊಂಡ ಬಪ್ಪ ಏದೇ ಓರ್ ಸಾಮಾನ್‌ರ ಮೀದ ರಾಜಂಗಡ ಕಾಲತ್ ಉಕ್ಕಡತ್ ವಸೂಲಿ ಮಾಡುವ ಇಂಜ ಕಂದಾಯತ್‌ನ ಮನಾರ ಎಡ್‌ಪ್‌ಚಿಟ್ಟಿತ್. ಈನಗುಂಡ್ ಕೊಡಗ್ಗಕಾರಕೂ ಪಿಳ್ಳಾ ಪೂರ್‌ಮೆತರಯಿಂಗಳಕೂ ವ್ಯಾಪಾರ ದುಂಬ ಆಪಕೂಡ್‌ಚಿ.

## ಕ.ಪ್ರೇಸರ್ ತಾಲೋಕ್ ಆಫೀಸಿನ ಮಾತಿತ್, ಕುಶಾಲನಗರಕ್ ಪ್ರೇಸರ್ ಪೇಟೆಂದ್ ಕಾಕ್‌ಚಿ.

ನಂಜರಾಯಪಟ್ಟ (ಸೋಮವಾರ ಪೇಟೆ ತಾಲೋಕ್‌ರ ಪಳೆಯ ಪೆದ)ತ್ ವೀರರಾಜೇಂದ್ರಂಡ ಕಾಲತ್ ಇಂಜ ತಾಲೋಕ್ ಸುಬೇದಾರ್ ಆಫೀಸಿನ ಕ.ಪ್ರೇಸರ್ ಕುಶಾಲನಗರಕ್ ವರ್ಗ ಮಾಡಿತ್, ಆ ನಗರತ್‌ನ 'ಪ್ರೇಸರ್ ಪೇಟೆ'ಂದ್ ಕಾಕ್‌ಚಿ. ಈ ತಾಲೋಕ್ ಆಫೀಸ್ 1895ತ್ ಸೋಮವಾರಪೇಟೆಕ್ ವರ್ಗ ಆಚಿ.

ಕ.ಪ್ರೇಸರ್ ಕೊಡವಳ ಸುಲಭತೆ ಕ್ರೈಸ್ತ ಜನಾಂಗಕ್ ಮತಾಂತರ ಮಾಡೊಲೊಂದ್ ಗೇನ ಮಾಡ್‌ಚಿ. ಆನಗುಂಡ್ ಅವ 1834ನೆ ಇಸವಿ ಜೂನ್ 10ಂಗ್ ಗ.ಜನರಲ್ ಕಾರ್ಯದರ್ಶಿ ಮೆಕ್ವಾಟನ್ ಸಾಹೇಬಂಗ್ ಈ ಪೋಲೆ ಕಾಗದ ಎಳ್ಳೆಚಿ.

There is not probably a spot of ground in all India of this limited extent capable of so much improvement at Coorg. The people appear to have little or no attachment to the debasing superstition of the country & their minds seem to me to be more open than those of any other Indians I have seen to be prepared for receiving the light of Christian religion, while their intellect may be expected rapidly to expand under the influence of that education they are soliciting.

ಕ.ಪ್ರೇಸರ್ ಇನ್ನನೆ ಸುಲಭತ್ ಕೊಡವಳ ಮತಾಂತರ ಮಾಡೊಲೊಂದ್ ಗೇನ ಮಾಡಿತ್ ತಾಂಡ ಪಾಲ್‌ಕ್ ಬಂದಿತಿಂಜ ಪಡೆರ ಇನಾಂ ಪಣತ್‌ನ ಏದೇಂಗೋರ್ ಪ್ರಾಟೆಸ್ಟೆಂಟ್ ಮತೀಯ ಸಂಘಕ್ ಕೊಡಪಕ್ ಗೇನ ಮಾಡ್‌ಚಿ.

ರಾಜಮನೆತನತ್‌ರ ಪೊಣ್ಣಾಳಕ್ ರಾಜಕೀಯ ಸಂಬಳತ್‌ನ ನಿರ್ಕ್ ಪಡ್‌ತಿತ್ ಅಯಿಂಗಕ್ ಪ್ರತಿ ತಿಂಗ ಅದ್ ಸೆರಿಯಾಯಿತ್ ಎತ್ತುವನ್ನಕೆ ಏರ್ಪಾಡ್ ಮಾಡ್‌ಚಿ.

ಕೊಡಗ್ ರಾಜಂಡ ಪುಡ್‌ತತ್ ಇಂಜ ಕುಂದ್‌ರ ಅಡಿಯತ ಜಾಗತ್‌ನ ದ.ಕನ್ನಡತ್‌ರ ಕಲೆಕ್ಟರ್‌ರ ಅಧಿಕಾರಕ್ ಒಳಪಡ್‌ತುವದ್ ಬಲ್ಯ ಓರ್ ತೊಂದರೆ ಆಯಿತಿಂಜತ್. ದೊಡ್ಡ ವೀರಪ್ಪಂಡ ಕಾಲತ್ ಇಕ್ಕೇರಿ ಸೋಮಶೇಖರನಾಯಕಂಗ್ ಇನಾಂ ಆಯಿತ್ ಪಿಳ್ಳಾ ಮಾರಿಕೆ ಆಯಿತ್ ಅಮರ ಪಿಳ್ಳಾ ಸುಳ್ಳೆ ಮಾಗಣೆ ಬಂದಿತಿಂಜತ್. ಆಚೀಂಗಿ ಹೈದರಾಲಿ ಪಿಳ್ಳಾ ಟಪ್ಪುಸುಲ್ತಾನಂಡ ಕಾಲತ್ ಮಾತ್ರ ಈ ಮಾಗಣೆ ಕೊಡಗ್ ರಾಜಂಡ ಕೈ ಬುಟ್ಟ್.



ಪೋಯಿಂಜತ್. ಟಿಪ್ಪು ಚತ್ತದು ಕಂಪೆನಿ ಸರ್ಕಾರ ಇಕ್ಕತ ದ.ಕನ್ನಡತ್ ಸಂಪಾಚೆಂಜ ಪುತ್ತೂರಾರ ಪಡಿಇಾರಾಕ್ ಸುಮಾರ್ ನಾಲ್ ಮೈಲಾಕೆತ್ತನೆ ಇಂಜ ಸೀಮೆನ ದೊಡ್ಡ ವೀರರಾಚೆಂದ್ರ ಒಡೆಯಂಗ್ ಅವ ಟಿಪ್ಪುರ ಕೂಡೆ ಬ್ರಿಟಿಷ ಮಾಡ್‌ನ ಪಡೆಲ್ ಬ್ರಿಟಿಷಕ್ ಸಹಾಯ ಮಾಡ್‌ನಾಂಗ್ ಇನಾಂ ಆಯಿತ್ 1864ತ್ ಕೊಡ್‌ತತ್. ಕೊಡಗ್ ರಾಜಂಡ ಕಾಲತ್ ಹೊಂಬಾಳೆ ನಾಯಕ, ಐಚೆಟ್ಟಿರ ಅಪ್ಪಯ್ಯ ಇನ್ನತವು ಪುತ್ತೂರ್ ಕುಂದ್‌ರ ಕೇದತ ಜಾಗಕ್ ಸುಬೇದಾರ್ ಆಯಿತಿಂಜತ್.

ಕೊಡಗ್ ರಾಜಂಡ ಅಳ್ವಿಕೆ ತೇಂದ್ ಪಿಳ್ಳಾ ಕಂಪೆನಿ ಸರ್ಕಾರ ಆಡಳಿತ ಅನುಕೂಲಕಾಯಿತ್ ದ.ಕನ್ನಡ ಜಿಲ್ಲೆಕ್ ವರ್ಗ ಮಾಡುವ ತೀರ್ಮಾನ ಎಡ್‌ತಂಡತ್. ಈ ಜಾಗತ್‌ರ ಜನಡ ಸಂಸ್ಕೃತಿ, ವೈಶಿಷ್ಟ್ಯ, ತಕ್, ಪದ್ಧತಿ ಬ್ರಿಟಿಷಡ ಅಳ್ವಿಕೆಕ್ ಒಳಪಟ್ಟ ಜನಡ ಸಂಸ್ಕೃತಿಕ್ ಸಮ್ಮಂಧ ಪಟ್ಟಿತಿಂಜತ್. ಆಯಿಂಗಡ ವ್ಯಾಪಾರ ಪಶ್ಚಿಮ ಕರಾವಳಿರ ಜನಡ ಕೂಡೆ ಇಂಜತ್.

ಆಚೇಂಗಿ, ಕಂಪೆನಿರ ಈ ತೀರ್ಮಾನ ಪುತ್ತೂರಾರ ಪೂರ್ವಕ್ ಉಳ್ಳ ಸುಳ್ಳ, ಅಮರ, ಪಂಜ ಜಾಗತ್‌ರ ಜನಕ್ ಒಪ್ಪಿಗೆ ಆಯಿಲೆ. ಅಪು ಸೂರಾಂಡೆಕೂ ಏರ ಕಾಲ ಕೊಡಗ್‌ರ ಹಾಲೇರಿ ರಾಜಂಗಡ ಅಧೀನತೆ ಇಂಜಾನುಂಡ್, ಕಂಪೆನಿ ಸರ್ಕಾರತ್‌ರ ಕಾಲತೂ ಕೊಡಗ್‌ರ ಆಡಳಿತಾಧಿಕಾರತೆ ಇಪ್ಪಕ್ ಬಯಂದತ್. ಪುತ್ತೂರ್ ಪಿಳ್ಳಾ ಪಶ್ಚಿಮತ್‌ರ ಜನ ತಂಗಡ ಪಟೇಲ ಪಿಳ್ಳಾ ಮುಕ್ರಿಯ 14 ಜನಳುಂಡ್ ತಂಗ ಮಿಳ್ಳಾಕ್ ಕೊಡಗ್ ರಾಜಂಡ ಅಧೀನತ್ ಇಪ್ಪಕ್ ಕಾಯಿಸ ಪಡುಲೆಂದ್ ಅರ್ಜಿ ಎಳ್ಳಚಿ.

ಆಖೀರಕ್ ಗ.ಜನರಲ್‌ರ ಅಭಿಪ್ರಾಯಪೋಲೆ 1834ತ್ ಕುಂದ್‌ರ ಕೇದತ ಸೀಮೆ ದ. ಕನ್ನಡಕ್ ಕೂಡ್‌ಚಿ.

ಕ.ಪ್ರೇಸರ್‌ಕ್ ಕೊಡಗ್‌ರ ಜನ ಕೊಡಗ್ ರಾಜ್ಯತ್ ಅತ್ತ, ಕಡಚಿಯಳ ಕೊಲ್ಲ್‌ಚಿಡುವ ಕಯ್ಯ ಎನ್ನಂಗೇಣ್ಣಕ ಅವು ತಂಗಕ್ ಪವಿತ್ರ ಪ್ರಾಣಿಯಂದ್ ಕೇಟಂಡಿಂಜತ್. ಕೊಡಗ್‌ರ ಸೈನಿಕಂಗಕ್ ಎತ್ತರ್ಚಿ ಬೋಂಡುವೇಂಗಿ ಅದ್‌ನ ಮಡಿಕೇರಿಕ್ ಪೊರ್‌ಮೆಂಜ ಕೊಂಡ ಬಪ್ಪಚಿಡೊಂಡೊಂದ್ ಅಪ್ಪಣೆ ಮಾಡ್‌ಚಿ. ಅಂಪ ಬೆಂಗಳೂರ್‌ಕ್ ಕಮಿಷನರ್ ಆಯಿತ್ ಪೋನದು 1835ತ್ ಮಡಿಕೇರಿಕ್ ಬಂದಲ್ಲಿ ಅತ್ತಳ ಕೊಲ್ಲುವ ಕಯ್ಯಾಂದ್ ಕೊಡಗ್‌ರ ಸೂಪರಿಂಟೆಂಡೆಂಟ್ ಲೆ.ಸಿ.ಎಫ್.ಲೀಹಾರ್ಡ್‌ಕ್ ಅಚ್ಚೆನ ಅಯೆಚತ್.

ಈ ಪೋಲೆ ಕೊಡಗ್‌ಲ್ ಅಂದ್‌ಂಜ ಇಂದೇಕೆತ್ತನೆಕೂ ಅತ್ತ, ಕಡಚಿಯಳ ಕೊಲ್ಲುವ ಕಯ್ಯಾಂದ್ ಎಣ್ಣುವ ಆಚ್ಚೆ ರೂಢಿಲ್ ಉಂಡ್.

## ಚಿಕ್ಕವೀರರಾಜೇಂದ್ರ ಒಡೆಯ ಸೂಳಿಕೋಟೆಲ್ ಪೂತ್‌ಬೆಚ್ಚು ಪೊನ್ನಾ, ಪಣ ಕೊಡಗರ ಸೂಪರಿಂಟೆಂಡೆಂಟ್‌ಕ್ ಕೊಟ್ಟನದಾ

ಚಿಕ್ಕ ವೀರರಾಜೇಂದ್ರ ಬೆಂಗಳೂರ್‌ಲ್ ಚೆನ್ನಂಗ್ ದಿನ ಇಂಜಿನಿಯರ್ ವೆಲ್ಲೂರ್‌ಕ್ ಪೋಪಕ, ರಾಜಂಡ ಕೂಡೆ ಕೊಡಗಂಜ ಪೋಯಿತಿಂಜ ಸುಮಾರಲ್ಲ ಪೆರಿಯ ಅಧಿಕಾರಿಯ, ಕಾರ್ಯಕಾರಂಗ ಪಿಳ್ಳಾ ಬ್ರಿಟಿಷ್ ಅಧಿಕಾರಿಯ ಕೊಡಗಕ್ ವಾಪಾಸ್ ಬಾತ್. ಇನ್ನನೆ ಬಂದಯಿಂಗಡಾತ್ ಮಂಡಿರ ಉತ್ತಯ್ಯ ಒಬ್ಬ. ಉತ್ತಯ್ಯ, ರಾಜ ಸೂಳಿಕೋಟೆಲ್ ಚೀಲಗಟ್ಟೆ ಪೊನ್ನಾ, ಪಣತನ ನೆಲತ್ ಪೂತ್ ಬೆಪ್ಪಕ್ ಕೂಡಿತಿಂಜತ್. ಅವ ಕೊಡಗಕ್ ವಾಪಾಸ್ ಬಂದಿತ್ ಚೆನ್ನಂಗ್ ಸಮಯತ್ ತಾಂಡ ಬಾವನ ಕೂಟಿಯಂಡ್ ಮೂಡ್‌ಸೀಮೆಂಜ ರಾಗಿ ಕೊಂಡಬಪ್ಪಕ್‌ಂದ್ ಅತ್ತಳ ಆಟಿಯಂಡ್ ಸೂಳಿಕೋಟೆಕ್ ಪೋಚಿ. ಅಲ್ಲಿಂಜ ವಾಪಾಸ್ ಬಪ್ಪಕ ದಂಡಾಳೂ ಅತ್ತಡ ಬೆನ್ನರ ಮೀದ ಈ ಪೊನ್ನಾ, ಪಣತರ ಚೀಲತನ ಇಟ್ಟಿಂಡ್ ಬೈಟ್ ವಾಪಾಸ್ ಕೊಡಗಕ್ ಬಾತ್. ಇನ್ನನೆ ಬಪ್ಪಕ ಹುದಿಕೇರಿ ನಾಡ್‌ಲ್ ಇಂಜ ಉತ್ತಯ್ಯಂಡ ಓರ್ ಬೆಂದುರ ಮನೆರ ಪಕ್ಕ ಓರ್ ಭದ್ರವಾಸ ಜಾಗಕ್ ಈ ಚೀಲತನ ಕಡ್‌ತ್‌ಚಿ. ಅಲ್ಲಿಂಜ ನಿಧಾನ ಆಯಿತ್ ನಾಲ್ಕಾಡ್‌ಕ್ ಕಡ್‌ತಿಯಂಡ್ ಇಪ್ಪಕ ಎನ್ನನೆಯೊ ಕ್ಯಾಲೀ ಹಾರ್ಡ್‌ಕ್ ಈ ವಿಷಯ ಗೊತ್ತಾಯಿರಾತ್!

ಕೂಡೆನ್ನೆ ಅವ ಉತ್ತಯ್ಯಂಡ ಉಸ್ತುವಾರಿಲೆ ಓರ್ ಆನನ ಹುದಿಕೇರಿಕ್ ಅಯೆಚಿತ್ ಅಲ್ಲಿ ಇಂಜ ಪಣತನಲ್ಲ ಕ್ಯಾಪ್ಟನ್‌ಕ್ ಒಪ್ಪಿಚಿಡುವಕ್ ಎಣ್ಣೆಚಿ. ಅಕ್ಕ ಉತ್ತಯ್ಯ ಸೂಳಿಕೋಟೆಲ್ ರಾಜ ಪೂತ್ ಬೆಚ್ಚಿತಿಂಜ 400 ಸೇರ್ ಉರ್‌ಪಿಯ ಪೂತ ಜಾಗತನ ಕಾಟ್‌ಚಿ. ಎಲ್ಲಾ ಪಣತನ ಉತ್ತಯ್ಯ ಕ್ಯಾಪ್ಟನ್‌ಕ್ ಒಪ್ಪಿಚಿಟ್ಟಾಂಗ್ ಆಯಿರ ಉರ್‌ಪಿಯ ಇನಾಂ ಕೊಡ್‌ತತ್.

ಆಚೀಂಗಿಯೂ ಮಂಡಿರ ಉತ್ತಯ್ಯಂಡ ಕಷ್ಟ ಅಲ್ಲಿಕೆ ತೇಂದ್‌ಲೆ. ಅವ ಈಂಗ್ ಮುಪ್ಪಡೆ ನಾಲ್ಕಾಡ್‌ಲ್ ತಾಂಡ ಮನೆರ ಬೆಂಬರಿ ತೋಟತ್ ಪೌನ್‌ರ ಚೀಲತನ ಪೂತ್ ಬೆಚ್ಚಿತಿಂಜತ್. ಅವ ಈ ಜಾಗಕ್ ಗೆಡಿ ಗೆಡಿ ಪೋಪ ಇಂಜದ್ ಬೋರೆ ಜನಡ ಅಗ್ಗೇನಕ್ ಎಡೆಯಾಚಿ. ಅವು ಗುಟ್ಟಾಯಿತ್ ಈ ಜಾಗತನ ಕಳಾತಿತ್ ನೋಟುವಕ ಅಯಿಂಗಕ್ ಪೊನ್ನಾರ ಪೌನ್ ಉಳ್ಳ ಚೀಲ ಕೊಟ್ಟಿ. ಇನ್ನನೆ ಉತ್ತಯ್ಯಂಡ ಒಕ್ಕತ್ ಓರಬ್ಬಕ್‌ಂದೆ ಪೂತ್‌ಬೆಚ್ಚು ಪೌನ್‌ರ ಚೀಲ ಕೊಟ್ಟಿ.

ಈ ವಿಷಯ ಉತ್ತಯ್ಯಂಡ ಕೂಡೆ ಅತ್ತಳ ಆಟಿಯಂಡ್ ಸೂಳಿಕೋಟೆಕ್ ಪೋಯಿತಿಂಜ ಪಾಲೆಯಕೂ ಗೊತ್ತಾಚಿ. ಆನಗುಂಡ್ ಅವು ಉತ್ತಯ್ಯಂಡ ಕೂಡೆ ತಂಗಕೂ ಪೌನ್ ಬೋಂಡೂಂದ್ ಜಗಳ ಮಾಡುವ ಕೂಡ್‌ಚಿ! ಈನಗುಂಡ್ ಉತ್ತಯ್ಯಂಗ್ ನೆಮ್ಮದಿ

ಪಾಳಾಚಿ. ಅಂವ ಪೂತ್‌ಬೆಚ್ಚ ಪೌನ್ ಎಚ್ಚಕೊ ಜನಡ ಕೈಕ್ ಕ್ಕಟ್ಟಿತ್ ನಾಲ್ವಾಡ್‌ಲ್ ಚೆನ್ನಂಗ್ ಕಾಲಕೆತ್ತನೆ ಪೌನ್ ಧಾರಾಳ ಆಯಿತ್ ಓಡಿ ಕಳಿವ ಇಂಜತ್‌ಂದ್ ಡಾ.ಮೂಗ್ಗಿಂಗ್ 1856ತ್ ಎಳ್ವನ ಓರ್ ಎಳ್ವಲ್ ವಿವರಣೆ ಕೊಡ್‌ತಿತ್.

## ಸ್ವಾಮಿ ಅಪರಂಪರ

ಚಿಕ್ಕವೀರರಾಜೇಂದ್ರಂಡ ಆಳ್ವಿಕೆರ ಆಖೀರಕ್ ಎಣ್ಣಕ 1833ತ್ ರಾಜ ಕಾಕ್‌ನಾಂಗ್ ಓರ್ ವಿಚಿತ್ರ ಜಂಗಮ ಸನ್ಯಾಸಿ ಬಂದಿತ್ ಮಡಿಕೇರಿಲ್ ಓರಚ್ಚಕ್ ದಿನ ಇಂಜಂವ ದಾರ್‌ಕೂ ಗೊತ್ತಾಕತನ್ನೆ ವಾಪಾಸ್ ಪೋಯಿತಿಂಜತ್. ಅಲ್ಲಿಂಜ ಕಂಪೆನಿ ಸರ್ಕಾರ ಕೊಡಗನ ತಾಂಡ ಪುಡ್‌ತತ್ ಬೆಚ್ಚವಕ 1835ತ್ ಕೊಡಗರ ಉತ್ತರ ಬರಿಲ್ ಇಂವ ಕಾಂಬ್‌ಚಿಟ್ಟಂಡತ್.

ಇಂವನ ಕಂಡಿತ್ ಓರಚ್ಚಕಾಳ್ ಅಪ್ಪಾಚಿ ರಾಜಂಡ ಮೋಂವ ವೀರಪ್ಪ ಒಡೆಯಂದ್ ಗೇನ ಮಾಡ್‌ಚಿ. ಜನ ಅನ್ನನೆ ನಂಬಿಯಂಡ್ ಪೆದ ಕೇಪಕ ಅಂವ, "ನಾನೋರ್ ಗರೀಬ ಸನ್ಯಾಸಿ, ಏದೇ ಕೇಳಿಪಟ್ಟಿ ವ್ಯಕ್ತಿ ಅಲ್ಲ"ಂದ್ ಜವಾಬ್ ಕೊಡ್‌ಪ ಇಂಜತ್.

ವಾಸ್ತವತ್ ಈ ವ್ಯಕ್ತಿ ಮೈಸೂರ್ ಸೀಮೆ ತುಮಕೂರ್‌ರ ಮಾಯಸಂದ್ರ ತಾಲೋಕ್‌ರ ಕಡಗನೂರ್‌ಕಾರ. ಅಪ್ಪ ಹನುಮಂತ ರಾಯ, ಅವ್ವ ಗೋಪಮ್ಮ. ಇಂವಂಗ್ ಪೊಣ್ಣ್, ಮೋವ ಇಂಜತ್. ಆಚೀಂಗಿ ಇಂವ ಚೆರ್ಪತೆ ಊರ್ ಬುಟ್ಟಿತ್ ಸನ್ಯಾಸಿಯಾಚಿ. ಅಲ್ಲಿಂಜ ಅಂವಂಗ್ ಕೇದಾರಭಾವಂದ್ ಪೆದ. ಅಂವ 1807ತ್ ತಾಂಡ ಊರ್ ಬುಟ್ಟಿತ್ ಪೋನಂವ 20 ಕಾಲ ಕೈಂಜದು ಓರ್ ಜಂಗಮಂಡ ವೇಷ ಇಟ್ಟಂಡ್ ವಾಪಾಸ್ ತಾಂಡ ಊರ್‌ಕ್ ಬಾತ್.

ಚೆನ್ನಂಗ್ ದಿನತ್ ಅಂವ ಪವಾಡಕಾರಂದೂ, ಜನಡ ಪೂರ್ವೋತ್ತರ ಎಣ್ಣವಂವಂದ್ ಪೆದ ಎಡ್‌ತಾಂಗ್ ಅಂವಂಡ ಬಯ್ಯ ಓರಚ್ಚಕ್ ಶಿಷ್ಯಂಗ ಇಂಜತ್. ಇನ್ನನೆ 1835ತ್ ಅಪರಂಪರ, ಚೆನ್ನಂಗ್ ಜಂಗಮ ಪಿಳ್ಳಾ ಪಟ್ಟಮಡ ಕೂಡೆ ಕೊಡ್ಲಿಪೇಟೆಕ್ ಬಾತ್. ಇನ್ನನೆ ಅಂವ ಸೋಮವಾರಪೇಟೆರ ಹಾರಂಗಿ, ಹಾಲೇರಿಕ್ ಬಂದಿತ್ ಅಲ್ಲಿಂಜ ಕೆಂಚಮ್ಮನ ಹೊಸಕೋಟೆಕ್ ಪೋಚಿ. ಪೋಪಕ ಅಂವಂಡ ಕೂಡೆ ಎಡೆನಾಡ್, ಹಾಲೇರಿನಾಡ್ ಪಿಳ್ಳಾ ಏಳಾಯಿರ ನಾಡ್‌ಂಜ ಸುಮಾರ್ 70 ಜನ ಇಂಜತ್.

ಕೆಂಚಮ್ಮನ ಹೊಸಕೋಟೆಂಜ ಅಪರಂಪರ ಕೊಡಗರ 20 ಜನಡ ಕೂಡೆ



ಸುಬ್ರಹ್ಮಣ್ಯಕ್ ಪೋಚಿ. ಅಕ್ಕ ಹಾಲೇರಿರ ರಾಜಮ್ಮಾಜಿ ಅವಂಗ್ ಓರ್ ಪೊನ್ನಾರ ಚೈನ್ ಅಯೆಚಿತ್‌ಂದ್ ಸುದ್ದಿ ಆಚಿ. ಆಚೇಂಗಿ, ಕ್ಯಾ.ಲೀಹಾರ್ಡ್ ರಾಜಮ್ಮಾಜಿನ ಕೇಪಕ ತಾನ್ ದಾರ್‌ಕೂ ಪೊನ್ನಾರ ಚೈನ್ ಅಯೆಚಿತ್ತಿಲ್ಲೆಂದ್ ಎಣ್ಣೊ ಚಿ.

ಅರಪಂಪರ ಪುತ್ತೂರ್‌ಲ್ ಇಪ್ಪಕ ಸುಬೇದಾರ್ ಅಚ್ಚುರ ಗಾಯತ್‌ನ ವಾಸಿ ಮೂಡ್‌ನಾಂಗ್ ಅಚ್ಚು ಓರ್ ಕುದರೆ ಪಿಳ್ಳಾ ಬೋರೆ ಸಾಮಾನ್‌ನ ಕೊಡ್‌ತತ್. ಅರಪಂಪರ ಸುಬ್ರಹ್ಮಣ್ಯತ್‌ಂಜ ವಾಪಾಸ್ ಕೆಂಚಮ್ಮನ ಹೊಸಕೋಟೆಕ್ ಬಪ್ಪಕ ಅವಂಡ ಶಿಷ್ಯಂಗ, "ಇಂವ ಅಪ್ಪಾಜಿರಾಜಂಡ ಮೋಂವ ವೀರಪ್ಪ ಒಡೆಯ, ಕೊಡಗುರ ಸಿಂಹಾಸನಕ್ ಹಕ್ಕದಾರ"ಂದ್ ಬಹಿರಂಗ ಘೋಷಣೆ ಮಾಡ್‌ಚಿ. ಈ ನೇರತ್ ಅಪರಂಪ ಕೊಡಗುರ ರಾಜಂಗ ಇಟ್ಟವ ಇಂಜ ಕೊಂಬು ತೊಪ್ಪತ್‌ನ ಮಂಡೆಕ್ ಇಟ್ಟಿತ್ ರಾಜಂಡ ಚಿಹ್ನೆ ಇಟ್ಟಿಂದತ್.

ಕೂಡೆನ್ನೆ ಅವ ಓರ್ ಇಸ್ತಿಹಾರ್‌ನಾಮೆ ಪೊರ್‌ಡ್‌ಚಿಟ್ಟಿತ್ ಅದತ್ ಕೊಡಗುಲ್ ಸದ್ಯತೆ ಓರ್ ಗಲಾಟೆ ಆಪಾಂದ್ ಸೂಚನೆ ಕೊಡ್‌ತತ್. ತಾಂಡ ಕೂಡೆ ಇಂಜಯಿಂಗಳ ಕೂಟಿಯಂಡ್ ಸೂರ್ಲಬ್ಬಿನಾಡ್‌ಕ್ ಬಂದದೆ ಈ ಅಪರಂಪರಂಡ ಕೂಡೆ ಚೆನ್ನಂಗಾಳ್ ಕೂಡಿಯಂಡ್ ರಾಜಂಡ ಮೋಂವಂದ್ ಗೌರವತ್ ತಕ್ಕಾರ ಮಾಡ್‌ಚಿ. ಆಚೇಂಗಿ, ಇಕ್ಕ ಕೊಡಗುಲ್ ಬ್ರಿಟಿಷ್ ಆಡಳಿತ ಉಳ್ಳಾನುಂಡ್ ರಾಜವಂಶ ಕೊಡಗುಕ್ ಬಪ್ಪಕ್ ಒತ್ತಪುಲೆಂದ್ ಎಣ್ಣೊ ಚಿ. ಆನಗುಂಡ್ ಜನಡ ತಕ್ಕಾರ ಸತ್ಯ ಅರ್‌ಂಜ ಅಪರಂಪರ ತಾಂಡ ಜನಡ ಕೂಡೆ ದ.ಕನ್ನಡ ಕಡಬಕ್ ಪೋಚಿ.

ಕ್ಯಾ.ಲೀಹಾರ್ಡ್ ಅವಂಡ ಮೀದ ವಿಚಾರ್‌ಚಿಟ್ಟಲ್ಲಿ, ಅವ ತಾಂಡ ಕೂಟ್‌ಕಾರಕ್ ಕಾಡ್ ಕುರುಬಂಡನ್ನೆಕೆ ಬಟ್ಟೆ ಇಟ್ಟುಂಡ್ ಅಯಿಂಗಡ ಊರ್‌ಕ್ ಓಡಿ ಪೋಪಕ್ ಎಣ್ಣೊ ಚಿ. ತಾನ್ ತಾಂಡ ಚೆನ್ನಂಗ್ ಆಪ್ತಂಗಡ ಕೂಡೆ ಶಿವಮೊಗ್ಗತ್‌ರ ಸೀಮೆಕ್ ಪೊರ್‌ಟತ್. ಆಚೇಂಗಿ, ಬ್ರಿಟಿಷ್‌ಕಾರಳುಂಡ್ ತಪ್ಪಾಚಿಟ್ಟವಕ್ ಕಯ್ಯತೆ ಮಂಜರಾಬಾದ್‌ಕ್ ಪೋಪಾಂಗ್ ಮುಪ್ಪಡೆ ಕ್ಕಟ್ಟಿಬುದ್ಧಿತ್ ತಿರುಚಿನಾಪಳ್ಳಿ (ಟ್ರಿಚ್ಚಿ)ಲ್ ರಾಜಕೀಯ ಬೈದಿಯಾಚಿ.

ಆಖೀರಕ್ 1869ತ್ ಜೈಲಂಜ ಬುಡ್‌ಗಡೆ ಆಯಿತ್ ಮೈಸೂರ್‌ಕ್ ಪೋಯಂಡ್ ಇಪ್ಪಕ ಶ್ರೀರಂಗಪಟ್ಟಣ್ 1870ತ್ ಚತ್‌ಪೋಚಿ.

## ಕಲ್ಯಾಣಪ್ಪ

ಬ್ರಿಟಿಷರುಂಡ್ ಅರಂಪರ ಖೈದಿ ಆಯಿತ್ ಚೆನ್ನಂಗ್ ತಿಂಗತೆ ಅಂವಂಡ ಕೂಡೆ ಇಂಜ ಕಲ್ಯಾಣ ಸ್ವಾಮಿ ಎಣ್ಣುವ ಓರ್ ಜಂಗಮ ತಾನ್ "ಅಪ್ಪಾಜಿರಾಜಂಡ ದಂಡನೆ ಮೋಂವ ನಂಜುಂಡಪ್ಪ" ಎಣ್ಣೆಯಂಡ್ ತಾಂಗೂ ಕೊಡಗ್ಗ ಸಿಂಹಾಸನತ್ ಅಳ್ಳಪಕ್ ಹಕ್ಕ್ ಉಂಡ್ಂದ್ ಎಣ್ಣೆಯಂಡತ್. ಇಂವಂಡ ಬಯ್ಯ ಉ.ಕೊಡಗ್ಗಲ್ ದುಂಬ ಜನ ಇಂಜತ್.

ಕಲ್ಯಾಣಪ್ಪ ತಾನ್ ಕೊಡಗ್ಗ ರಾಜ್ಯತ್ ಹಕ್ಕ್ದಾರಂದ್ ಎಣ್ಣೆಯವಕ ಕಲ್ಯಾಣಸ್ವಾಮಿಂದ್ ಜನಳುಂಡ್ ಕಾಕ್ಚಿಟ್ಟಿಂಡತ್. ಆಚೇಂಗಿ, ಕೊಡಗ್ಗಲ್ ಕಲ್ಯಾಣ ಸ್ವಾಮಿರ ಕೆಣಿ ನಡ್ಕತಾಂಗ್ ದಿವಾನ್ ಚೆಪ್ಪುಡಿರ ಪೊನ್ನಪ್ಪ ಅಡ್ಡಿ ಪಡ್ತಾಚಿ. ಅಪ್ಪಾಜಿ ರಾಜಂಡ ಮಕ್ಕ ದಾರೂ ಜಿಂವತ್ ಇಲ್ಲೆ. ಇಂಜಕ ಅವು ಚೆನ್ನಬಸಪ್ಪಂಡನ್ನಕ ಚಿಕ್ಕವೀರರಾಜೇಂದ್ರಂಡ ಕಾಲತ್ ಬ್ರಿಟಿಷಡ ಪಕ್ಕ ಬಪ್ಪ ಇಂಜತ್ಂದೂ, ಚಿಕ್ಕವೀರ ರಾಜೇಂದ್ರಂಡ ಕಾಲತೆ ಅಯಿಂಗಳ ಪಟ್ಟಣಿ ಬೂಕಿತ್ ಚಾವ್ಚಿಟ್ಟಿಲ್ಲಿ ಅಯಿಂಗಡ ತಡಿನ ಸಮಾಧಿ ಮಾಡ್ನ ಜನಳೆ ಕಾಕ್ಚಿಟ್ಟಿತ್ ಸಾಕ್ಷಿ ಎಣ್ಣೆಚಿಟ್ಟಿತ್.

ಜ.ಪ್ರೇಸರ್ ಕಾಗದಕ್ ಈಸ್ಟ್ ಇಂಡಿಯಾ ಕಂಪೆನಿಕಾರ "ಕೊಡಗ್ಗರ ರಾಜ್ಯತ್ ಪಂಡೇತ ರಾಜವಂಶಕಾರ ಸೆರಿಯಾನ ಹಕ್ಕ್ ಉಳ್ಳವು ದಾರೇಂಗಿ ಇಂಜಕ ಅಯಿಂಗಕ್ ವಹಿಸಿ ಕೊಡ್ಕೊಲೂ"ಂದ್ ಎಳ್ಳಿತಿಂಜತ್.

ಈಂಡಪೋಲೆ ಕ.ಪ್ರೇಸರ್ ಕೊಡಗ್ಗರ ರಾಜವಂಶತ್ ರಾಜಕುಮಾರಂಗ ದಾರೇಂಗಿ ಜಿಂವತ್ ಉಂಡಾಂದ್ ವಿಚಾರಣೆ ನಡ್ತನಲ್ಲಿ ದಾರೂ ತಂಗಡ ಹಕ್ಕ್ನ ಸ್ವಾಪನೆ ಮಾಡುವಕ್ ಮಿಞ್ಲಾಕ್ ಬಂದಾಲೆ. ಅಪ್ಪಾಜಿ ರಾಜಂಡ ಮಕ್ಕ ಜಿಂವತ್ ಇಂಜಿತ್ ಮಿಞ್ಲಾಕ್ ಬಂದಿತಿಂಜಕ ಅಯಿಂಗಕೆ ರಾಜ್ಯ ಕೊಟ್ಟವ ಇಂಜತ್. ಇಲ್ಲೇಂಗಿ, ದೇವಮ್ಮಾಜಿಕ್ ಕೊಡ್ತನ್ನಕೆ ಅಯಿಂಗಕೂ ರಾಜಕೀಯ ವೇತನ ಕೊಟ್ಟವ ಇಂಜತ್. ಆನಗುಂಡ್ ಕಲ್ಯಾಣಸ್ವಾಮಿನ ವೇಷಧಾರಿ ವಂಚಕಂದ್ ಕೊಡಗ್ಗರ ಸೂಪರಿಂಟೆಂಡೆಂಟ್ ಕ್ಯಾ.ಲೀ ಹಾರ್ಡಿಕ್ ಎಣ್ಣೆಚಿ.

ಇನ್ನನೆ ಕಲ್ಯಾಣಸ್ವಾಮಿಕ್ ಕೊಡಗ್ಗರ ಜನ ತನ್ನ ರಾಜ ವಂಶಕಾರಾಂದ್ ನಂಬುಲೆಂದ್ ಗೊತ್ತಾಯಿತ್ ಅಲ್ಲಿಂಜ ದ. ಕನ್ನಡಕ್ ಪೋಪಕ್ ಇಷ್ಟಪಟ್ಟಿತ್. ಆಚೇಂಗಿ, ಅಲ್ಲಿಕ್ ಪೋನಕ ಬ್ರಿಟಿಷ್ ಸೈನಿಕಂಗ ಪುಡ್ಚಿರೂಂದ್ ಬೊತ್ತಿಯಂಡ್ ವೈನಾಡ್ಕ್ ಪೋಚಿ. ಅಲ್ಲಿಕ್ ಕ್ಯಾ.ಲೀ ಹಾರ್ಡಿ ಸಿಪಾಯಿಯಳ ಅಯೆಕಣೆ ಕಲ್ಯಾಣಸ್ವಾಮಿ ವೇಷ ಬದ್ಲಾಲ್

ಮಾಡಿತ್ ಬೈತೂರ್ಕ್ ಎತ್ತಿರ್ತ್. ಇನ್ನನೆ ಮಲಬಾರ್ ಸಿಪಾಯಿಯಡ ಸಹಾಯತ್ 1837ತ್ ಕಲ್ಯಾಣಸ್ವಾಮಿನ ಪುಡ್ಚೆತ್. ಅಂವನ ಕೂಟಿಯಂಡ್ ಮಡಿಕೇರಿಕ್ ಪೋಯಿತ್, ಮೈಸೂರ್ಕ್ ಅಯೆಪಕ ಕೊಡಗ್ಗರ ಜನ ದಾರೂ ಗಲಾಟೆ, ಸದ್ವ್ ಮಾಡ್ಲೆ

## ಅಮರಸುಳ್ಳ ಪಡೆ

ಲೀ.ಹಾರ್ಡಿರ ಜನ ಕಲ್ಯಾಣ ಸ್ವಾಮಿನ ಪುಡ್ಚೆಕೊ ಅಮರಸುಳ್ಳ ಜನ ಬ್ರಿಟಿಷಡ ವಿರುದ್ವ ಪಡೆರ ಯೋಜನೆನ ಬುಟ್ಟಲೆ. ಅಮರ ಸುಳ್ಳ, ಬೆಳ್ಳಾರೆಲ್ ಚಳುವಳಿ ಜೋರಾನಕ ಕೊಡಗ್ಗರ ತಾವ್ ನಾಡ್, ಬೇಂಗ್ನಾಡ್, ತೆರಿನಾಡ್, ಎಡೆನಾಡ್ ಪಿಳ್ಳಾ ಏಳಾಯಿರ ಸೀಮೆರ ಜನ ಕೊಡಗ್ಗಲ್ ಬ್ರಿಟಿಷಡ ಮೀದ ಗಲಾಟೆ ಮಾಡೂಂದ್ ಕಲ್ಯಾಣಸ್ವಾಮಿರ ಜನ ಗೇನ ಮಾಡ್ಚಿ.

ಈ ಪೋಲೆ ಅಮರಸುಳ್ಳತ್ ಏಪ್ರಿಲ್ 6ಂಗ್ ಉಗಾದಿರ ದಿನ ಬ್ರಿಟಿಷಡ ವಿರುದ್ವ, ಕೊಡಗ್ ರಾಜಂಡ ಪರ ಗಲಾಟೆ ಮಾಡುವದ್ ನಿರ್ಕಮಾಡ್ನಕೊ ಎಟ್ಲಾದಿನಕ್ ಮುಪ್ಪಡೆ ಜನ ಸದ್ವ್ ಮಾಡ್ಚಿ. ಇದ್‌ಂಗ್ ಅಲ್ಲಿಯತ ಗೌಡಂಗಕೂ, ಸುಳ್ಳೆತರ ಅಮಲ್ವಾರ್ ಲಕ್ಷ್ಮಿ ನಾರಾಯಣಂಡ ತಮ್ಮಣ ರಾಮಪ್ಪಯ್ಯಂಗೂ ಇಂಜ ಪಗೆ ಮೊಳಿ ಆಯಿತಿಂಜತ್.

ತಾಂಡ ಅಣ್ಣ ಕೊಡಗ್ ರಾಜಂಡ ದಿವಾನಂದ್ ರಾಮಪ್ಪಯ್ಯ ಅಹಲ್ ಅಮರ ಸುಳ್ಳೆತರ ಜನಡ ಕೂಡೆ ಕಳಿಪ ಇಂಜತ್. ಇನ್ನನೆ ಗೌಡ ಜನಕ್ ತೊಂದರೆ ಮಾಡಿಯಂಡ್ ಇಪ್ಪಕ, ಗೌಡ ಜನ ಕೆಂದಪಾಡಿ ರಾಮ ಗೌಡಂಡ ಮುಂದಾಳತ್ವತ್ ರಾಮಪ್ಪಯ್ಯನ ಕೊಲ್ಲೊಂಡೂಂದ್ ತೀರ್ಮಾನ ಮಾಡ್ಚಿ.

ಈ ಪೋಲೆ ಒನ್ನಾಂದ್ ರಾಮಪ್ಪಯ್ಯ ತಾಂಡ ಕುದರೆಲ್ ಪೋಯಂಡ್ ಇಪ್ಪಕ ಕಾಂತ ಮಂಗಲ ಎಣ್ಣುವಲ್ಲಿ ಬೆಂಬರಿಂಜ ದಾರೂ ಬಂದಿತ್ ಕತ್ತಿಲ್ ಪೊಜ್ಜತ್. ರಾಮಪ್ಪಯ್ಯ ಗಾಯತ್‌ನ ಸಹಿಸಿಯಂಡ್ ಮಿಳ್ಳಾಕ್ ಪೋನನ್ನಕೆ ವಿರೋಧಿಯ ಸುತ್ತಾಟ್ಟಿಂಡ್ ಪೊಜ್ಜಿ ಕೊಂದತ್.

ಆನಗುಂಡ್ ಅಮರಸುಳ್ಳ ರೈತಂಗ್ ರಾಮಪ್ಪಯ್ಯನ ಕೊಂದದ್ ಬಲ್ಯ ಸಾಧನೆ ಮಾಡ್‌ನನ್ನಕೆಂದ್ ಆಚಿ. ಅದೇ ತರ ತಂಗ ಬ್ರಿಟಿಷಡ ಆಳ್ವಿಕೆನ ಆಖೀರಿ ಮಾಡೊಲೂಂದ್

ಗೇನ ಮಾಡ್‌ಚಿ.

1936ತ್ ಡಿಸೆಂಬರ್ 5ತ್ ಕೊಡಗಲ್ ಗಲಾಟೆ ಆಕೂಂದ್ ದಿವಾನ್ ಲಕ್ಷ್ಮಿ ನಾರಾಯಣ ಕ್ಯಾ. ಲೀಹಾರ್ಡ್ ಕೂಡೆ ಎಣ್ಣುವಕ ಮಡಿಕೇರಿ ಕೋಟೆಲ್ ಇಂಜ ಮಿಲಿಟರಿ ಅಧಿಕಾರಿಯ ಮಡಿಕೇರಿಲ್ ಭದ್ರ ಮಾಡ್‌ಚಿ. ಕುಂದಾರಡಿಲ್ ವಿದ್ರೋಹಿಯ ಗುಂಪ್ ಕೆಟ್ಟಿಯಂಡ್ ಉಂಡ್‌ಂದ್ ಕ್ಯಾ. ಲೀಹಾರ್ಡ್ ಅರ್‌ಂಜದೆ ಕೊಡಗರ ಜನಡ ಸರ್ಪೋರ್ಟ್ ಇಲ್ಲತೆ ಮಡಿಕೇರಿನ ರಕ್ಷಣೆ ಮಾಡುವದ್ ಬ್ರಿಟಿಷ್ ಅಧಿಕಾರಿಯಕ್ ಕಯ್ಯುವ ಇಂಜ್‌ಲೆ. ಎನ್ನಂಗಣ್ಣಕ ಅಕ್ಕ ಮಡಿಕೇರಿಲ್ ಸೈನಿಕಂಗಕ್ ದಂಡ್ ದಿನಕ್ ಬೋಂಡಿಯಾನಚ್ಚಕ್ ಉಂಬ ತಿಂಬಕ್ ಇಂಜ್‌ಲೆ.

ಆನಗುಂಡ್ ಕೊಡಗರ ಜನಡ ವಿಶ್ವಾಸ ಕಳಂದಂಡಕ ತಂಗಕ್ ಕೇಡ್‌ಂದ್ ಅರ್‌ಂಜಂಡ್ ಗಲಾಟೆ ಸುರುವಾನದೆ ಲೀಹಾರ್ಡ್ ವಿರೋಧಿಯಳ ಅಡ್‌ಕವಕ್ ದಿವಾನ್ ಬೋಪು ಪಿಳ್ಳಾ ಸುಬೇದಾರ್ ಬಿದ್ದಯ್ಯಂಡ ಜನಳ ಕೂಟಿಯಂಡ್ ಪೊರ್‌ಟತ್. ಮಿಳ್ಳಾಕ್ ತಳಿನೀರ್ ಕಣಿವೆಲ್ ಎಚ್ಚಕೊ ವಿದ್ರೋಹಿಯಳ ಓಡ್‌ಚಿಟ್ಟದೆ ಅಲ್ಲತೆ ಆರಾಳನ ಪುಡ್‌ಚತ್.

ಏಪ್ರಿಲ್ 18ಂಗ್ ಕ್ಯಾ. ಲೀಹಾರ್ಡ್ ಈ ವಿದ್ರೋಹಿಯಡ ಮುಕ್ತಿಯಡ ಕೂಡೆ ಇಂಜ ಕನ್ನಡ ಜನಳ ಪುಡ್‌ಚಿತ್ ಮಡಿಕೇರಿಲ್ ಆಕ್‌ಚಿ. ಬಾಕಿ ಜನಡ ತೋಕ್‌ನ ಬಲ್‌ಚಿ ಬೆಚ್ಚಿತ್ ತಂಗ ತಂಗಡ ಮನೆಕ್ ಪೋಪಕ್ ಬುಟ್ಟತ್.

ಇನ್ನನೆ ಕೊಡಗಲ್ ಜನ, ಬ್ರಿಟಿಷಡ ಆಳ್ವಿಕೆರ ವಿರುದ್ಧ, ಕೊಡಗ್ ರಾಜಂಡ ಪರ ಗಲಾಟೆ ಮಾಡ್‌ನ ದಂಡ್ ಪ್ರಯತ್ನ ಪ್ರಯೋಜನ ಆಯಿಲೆ.

ಅಮರಸುಳ್ಳ ಕಾಟಕಾಯಿ ಆಖೀರಿ, ವಿದ್ರೋಹಿ ಮುಕ್ತಿಯಕ್  
ಶಿಕ್ಷೆ, ಕೊಡಗ್‌ನ ಚಿನ್ನೆ ರಾಜ್ಯಕ್ ಕೂಟೊಂಡೂಂದ್ ಚಿನ್ನೆ  
ಸರ್ಕಾರ ಈಸ್ಟ್ ಇಂಡಿಯಾ ಕಂಪೆನಿ ಡೈರೆಕ್ಟರ್‌ಕ್ ಸಲಹೆ

ಕಂಪೆನಿ ಸರ್ಕಾರ ಕಪಟ ಕಲ್ಯಾಣ ಸ್ವಾಮಿನ ಪುಡ್‌ಚಿ ತಂದಯಿಂಗಕ್ ಪತ್ತಾಯಿರ ಉರ್‌ಪಿಯ, ಕುಕ್ಕನೂರ್ ಚಿನ್ನಯ್ಯ ಪಿಳ್ಳಾ ಕರಣಿಕ ಸುಬ್ರಾಯನ ಪುಡ್‌ಚಿ ತಂದಯಿಂಗಕ್ ಅಂಜಾಯಿರ ಉರ್‌ಪಿಯ ಇನಾಂ ತಪ್ಪಾಂದ್ ಘೋಷಣೆ ಮಾಡ್‌ಚಿ. ಬಾಕಿ ಮುಕ್ತಿಯಳಾನ

ನಾಲ್ಕಾಡ್ ಉತ್ತು, ಶಾಂತಳ್ಳಿ ಮಲ್ಲಯ್ಯ, ಗುಡ್ಡೆಮನೆ ಅಪ್ಪಯ್ಯ, ಚೆಟ್ಟಿಕುಡಿಯ, ಕರ್ತ ಕುಡಿಯ, ಲಕ್ಷಪ್ಪ ಬಂಗರಸ ಇನ್ನತವು ಈಂಗ್ ಮುಪ್ಪಡೆ ದಿವಾನ್ ಬೋಪುನುಂಡ್ ಪಿಳ್ಳಾ ಕಂಪೆನಿ ಸರ್ಕಾರತರ್ ಸಿಪಾಯಿಯಳುಂಡ್ ಪುಡ್‌ಚಿತಿಂಜತ್.

ಕಪಟಕಲ್ಯಾಣ ಸ್ವಾಮಿ ಬ್ರಿಟಿಷ್ ಸೈನ್ಯಾಧಿಕಾರಿಯಕ್ ಮೋಸ ಮಾಡಿತ್, ತಾಂಡ ವೇಷ ಬದಲ್ ಮಾಡಿತ್ ಮಂಜರಾಬಾದ್‌ರ ತಾಂಡ ನಾಡ್‌ಕ್ ಪೋಚಿ. ಅಕ್ಕ ಕಂಪೆನಿ ಸರ್ಕಾರ ಪೂರ್‌ಡ್‌ಚಿಟ್ಟಿ ಘೋಷಣೆ ಕಪಟ ಕಲ್ಯಾಣಸ್ವಾಮಿಕೂ ಗೊತ್ತಾಚಿ. ಅಂವ ಬೊತ್ತಿಯಂಡ್ ಕಾಡ್‌ಲ್ ಒಳ್‌ಚಿತಿಪ್ಪಕ, ಅಂವಂಡ ಮಾಂವ ಕರಿ ಬಸವಯ್ಯ ವಿಷಯ ಅರ್‌ಂಜತ್.

ನಂಗ ಸುಬೇದಾರಂಡ ಪಕ್ಕ ಪೋಯಿತ್ ತಕ್ಕ ಪರೆಯನಂದ್ ಕಲ್ಯಾಣಸ್ವಾಮಿನ ಕೂಟಿಯಂಡ್ ಚೆನ್ನಂಗ್ ದೂರ ಪೋಚಿ. ಅಕ್ಕಣೆಕ್ ಇಯಂಗಲ ಕಂಡ ಸುಬೇದಾರ್ ಮಾದಯ್ಯ ಪಿಳ್ಳಾ ಕೂಟ್‌ಕಾರ ಇಂವನೆ ಕಲ್ಯಾಣ ಸ್ವಾಮಿಂದ್ ಪುಡ್‌ಚಿಂಡ್ ಮಡಿಕೇರಿಕ್ 1837ತ್ ಬಾತ್.

ಅಲ್ಲಿ ಕ್ಯಾ.ಲೀ ಹಾರ್ಡಿರ ಎದಿಕೆ ಈ ಸ್ವಾಮಿನುಂಡ್ ಅಂವಂಡ ಬದ್‌ಕ್, ಕಾಟಕಾಯಿರ ಮೀದ ಹೇಳಿಕೆ ಪಡ್‌ಂದತ್. ಅಕ್ಕ ತಾನ್ ಶನಿವಾರಸಂತೆ ಪಕ್ಕತ ಹೆಮ್ಮನಿಕಾರ, ರೈತ. ಅಲ್ಲಿಕ್ ಕೆದಂಪಾಡಿ ರಾಮಗೌಡಂಡ ಜನ ಬಂದಿತ್ ತನ್ನ ಅಮರಸುಳ್ಳಕ್ ಕೂಟಿಯಂಡ್ ಪೋಯಿತ್ ಅಲ್ಲಿ ಕೊಡಗರ ದೊರೆಂದ್ ಜನಕ್ ಎಣ್ಣಿಕೊಡ್‌ತಿತ್ ಗಲಾಟೆ ಮಾಡ್‌ಚಿ. ತಾಂಡ ಪೆದ ಬಸಪ್ಪ, ಕ್ರಮೇಣ ಪುಟ್ಟಬಸವ, ಮರಿ ಬಸವಂದ್ ಎಣ್ಣೆಚಿ!

ಅಲ್ಲಿಂಜ ಸೈನ್ಯಾಧಿಕಾರಿಯಡ ಎದಿಕೆ ವಿಚಾರಣೆ ನಡ್‌ತಿತ್ ಕೊಡಗರ ದೊರೆಂದ್ ಎಣ್ಣಿಯಂಡ ಪುಟ್ಟಬಸಪ್ಪ, ನಂದಾವರ ಲಕ್ಷಪ್ಪ, ಬಂಗರಸಂಗ್ ಮಂಗಳೂರ್‌ಲ್ ಮರಣದಂಡನೆ ಆಚಿ. ನಾಲ್ಕಾಡ್‌ರ ಮಂಡಿರ ಉತ್ತು, ತೆರಿನಾಡ್‌ರ ಶಾಂತಳ್ಳಿ ಮಲ್ಲಯ್ಯ ಕೂಟ್‌ಕಾರಕ್ 7-14 ಕಾಲ ಶಿಕ್ಷೆ, ಚೆಟ್ಟಿ ಕುಡಿಯ, ಕರ್ತ ಕುಡಿಯ, ದಿವಾನ್ ಲಕ್ಷ್ಮಿ ನಾರಾಯಣಂಡ ಮೈಂಮ ಪೆರಾಜೆ ಪಾರ್‌ಪತ್ಯದಾರ ಕೃಷ್ಣಯ್ಯಂಗ್ ಜೀವಾವಧಿ ಶಿಕ್ಷೆಕ್ ಸಿಂಗಾಪುರಕ್ ಅಯೆಚತ್.

ಅನ್ನನೆ ಗುಡ್ಡೆಮನೆ ಅಪ್ಪಯ್ಯನ ಬಹಿರಂಗ ಆಯಿತ್ ತೂಕುವನ್ನಕೆ ತೀರ್ಮಾನ ಆನ ಪೋಲೆ 1837ನೆ ಅಕ್ಟೋಬರ್ 31ಂಗ್ ಪೊಲಾಕ ಮಡಿಕೇರಿ ಕೋಟರ ಎದಿಕೆ ಪರ್‌ಂಬಲ್ ತೂಕ್‌ಚಿ. ಆ ನೇರತ್ ತೂಕುವಾನ ನೋಟುವಕ್‌ಂದ್ ಕೊಡಗರ ಎಲ್ಲ ಪಟೇಲಂಗಳ ಪಿಳ್ಳಾ ಪಂಡ್ ತೋಕ್‌ನ ಕ್ಯಾ.ಲೀಹಾರ್ಡಿಕ್ ಒಪ್ಪ್‌ಚಿಟ್ಟಿತಿಂಜ ಎಡೆನಾಡ್, ತೆರಿನಾಡ್ ರೈತಂಗಳ ಕಾಕ್‌ಚಿಟ್ಟತ್. ಅಪ್ಪಯ್ಯನ ತೂಕ್‌ನಪಿಳ್ಳಾ ಆ ರೈತಂಗಳ್ ಅಯಿಂಗಡ ತೋಕ್, ಆಯುಧತನೆಲ್ಲ ವಾಪಾಸ್ ಕೊಡ್‌ತತ್.

ಅಮರಸುಳ್ಳ ಕಾಟಕಾಯಿಲ್ ತಂಗಡ ಪ್ರಾಣ ಕಳೊಂದಂಡ ಬಾಕ್ರಿಕಾರಡ ಕುಟುಂಬಕ್ ಚೆನ್ನೈ ಸರ್ಕಾರ ಪರಿಹಾರ ವೇತನ ಕೊಡೊತತ್. ಅನ್ನನೆ ಕಂಪೆನಿ ಸರ್ಕಾರತೊರ ಸೈನಿಕಂಗ ಗೊತ್ತಾಕತೆ ಬೊಡಿಬೆಚ್ಚಿತ್ ಕೊಂದ ಓರ್ ಪಟ್ಟಂಡ ಕುಟುಂಬಕ್ ಪರಿಹಾರ ಕೊಡೊತತ್.

ಅಮರಸುಳ್ಳ ಕಾಟಕಾಯಿ ಸಮ್ಮಂಧತೊರ ವರದಿನ ಚೆನ್ನೈ ಸರ್ಕಾರ ಗ.ಜನರಲ್‌ರ ಮೂಲಕ ಈಸ್ಟ್‌ಇಂಡಿಯಾ ಕಂಪೆನಿರ ಡೈರೆಕ್ಟರ್‌ಕ್ ಅಯೆಪಕ ಅವು ಕೊಡಗೊನ ಚೆನ್ನೈ ಸರ್ಕಾರತೊರ ಲಿಫೀನಕ್ ಕೊಂಡಬಪ್ಪಕ್ ಸಲಹೆ ಮಾಡ್‌ಚಿ. ಇದೊಂಗ್ ಬತ್ತವತ ಈಸ್ಟ್‌ ಇಂಡಿಯಾ ಕಂಪೆನಿ ಡೈರೆಕ್ಟರ್ ಎಳ್ಳೊನ ಜವಾಬ್ ಇನ್ನನೆ ಉಂಡ್.

The Madras Govt have further represented to us the inconvenience which they consider to be caused by the arrangement under which the Commissioner in Mysore & Coorg is under the direct authority of your Govt & have urged upon us the desirableness of replacing that officer under the Govt of Madras, the principal reason they assign is that the troops stationed in those territories form part of the Madras army, but it is not a very unusual arrangement for one presidency to supply the troops to a country which is under the Civil Govt or political superintendence of another Presidency or of the Central Govt. The Madras army for example, furnishes the Hyderabad & Nagpur subsidiry force & supplies the troops stationed in the Tenasserim provinence under the Presidency of Bengal & we are not aware that any considerable inconvenience is felt in consequence of those arrangements.

We are unwilling to expose the excellent system of Administration now existing in Coorg & the beneificial & improving system which has at length been introduced into Mysore to the hazard which might be incurred by a change in the Superintending authority & those countries therefore must continue to be governed under your direct control.

ಇದೊನ 1838ನೆ ಇಸವಿ ಮೇ 31ಂಗ್ ಈಸ್ಟ್‌ ಇಂಡಿಯಾತೊರ 13 ಡೈರೆಕ್ಟರ್ಸ್ ಸೈನ್ ಮಾಡಿತ್ ಹಿಂದೂಸ್ಥಾನತೊರ ಗ.ಜನರಲ್ ಸರ್ಕಾರಕ್ ಅಯೆಚಿತ್.

ಕಾಟಕಾಯಿನ ಅಡ್ಡ್‌ನ ಸುರೂವೆತ ವರ್ಗತ್ 25 ಜನಕ್ ಬೋಡ್‌ಕೊಳ ತೋಕ್, 14 ಜನಕ್ ಕುದರೆ ಕೊಡ್‌ತತ್. ಚೆನ್ನಂಗಾಳ್‌ಕ್ ಒಡಿಕತ್ತಿ ಕೊಟ್ಟೆಚಿ. ಈ ಸಮ್ಮಂಧ ಸುಮಾರ್ ಜನಕ್ ತಂಗ ತಂಗಡ ಅರ್ಹತೆಪೋಲೆ ಪೊನ್ನಾರ ಬಿಲ್ಲೆನ ದಂಡ್ ದಿವಾನಂಗ ಪಿಳ್ಳಾ ಸುಬೇದಾರಂಗಕ್ ಕೊಡ್‌ತಕ, ಬೊಳ್ಳಿರ ಬಿಲ್ಲೆನ ಸುಮಾರ್ 200 ಜನಕ್ ಕೊಡ್‌ತತ್. ಪೊನ್ನಾರ ಬಿಲ್ಲೆ ಚೆಬ್ಬೋಲೆ ಆಯಿತ್ ಸುಮಾರ್ ಪನ್ನಂದರೆ ತೊಲ ತೂಕ ಇಂಜತ್. ಪೊನ್ನಾ, ಬೊಳ್ಳಿರ ಬಿಲ್ಲೆರ ಓರ್ ಬರಿಲ್ ಕೊಡಗರ ಯೋಧ ಪಡೆ ಪೊಪ್ಪ ಅಚ್ಚ್ ಇಂಜಕ ಇಣ್ಣೋರ್ ಬರಿಲ್ ಪೀಚೆಕತ್ತಿ, ಒಡಿಕತ್ತಿನ ಓರ್ ಮಾಲೆಲ್ ಕೆಟ್ಟಿತ್ ಚಿಕ್ಕಚಿಟ್ಟನ್ನೆ ಇಂಜತ್. ಅಲ್ಲತೆ ಬಿಲ್ಲೆರ ಓರ್ ಬರಿಲ್ ಇಂಗ್ಲಿಷ್‌ಲ್ "For distinguished conduct & loyalty to the British Govt, Coorg, April 1837"ಂದ್ ಎಳ್ವಿತಿಂಜತ್. ಇಣ್ಣೋರ್ ಬರಿಲ್ ಕನ್ನಡಕ್ ತರ್ಜುಮೆ ಮಾಡಿತಿಂಜತ್.

ಅಮರಸುಳ್ಳ ಪಿಳ್ಳಾ ಕೊಡಗಲ್ ಪೇರ್ತ್ ನೈಚಿ ಕ್ಯಾ.ಲೀಹಾರ್ಡ್‌ಕ್ ತಾಂಡ ಚಾಕ್ರಿಲ್ ಬದ್ತಿ ಕೊಡ್‌ತಿತ್ ಸಂಬಳ ಏತ್‌ಚಿ.

ಕಾಟಕಾಯಿ ಮಿಳ್ಳಾಕ್ ದ.ಕನ್ನಡತ್ ಮಂಡೆ ನೇತೃತ್ವಕ್ಕೆ ಮಾಡುವಕ್ ಚೆನ್ನೈ ಸರ್ಕಾರ ಪುತ್ತೂರ್‌ಲ್ 1837ಲ್ ಕಾಟಕಾಯಿ ಅಡ್‌ಂಗ್‌ನದೆ ದ. ಕನ್ನಡತ್‌ರ ಕಲೆಕ್ಟರ್ ಕೊಡಗರ ನಾಸೂರ್ ಜನ ಜಮ್ಮ ರೈತಂಗಡ ಪೊಲೀಸ್ ದಳತ್‌ನ ಅಮರಸುಳ್ಳ ಪುತ್ತೂರ್‌ಲ್ ಆಕೊಂಡೊಂದ್ ಬಯಂದಿತ್ ಕ್ಯಾ.ಲೀಹಾರ್ಡ್‌ಕ್ ಎಣ್ಣೆಚಿ. ಆಚೇಂಗಿ, ಕೊಡಗರ ಜನ ಚೆನ್ನೈ ಸರ್ಕಾರತ್‌ರ ಸಿವಿಲ್ ಕೋಡ್‌ರ ನೇಮಕ್ ಬದ್ತಿಂಗಲಾಪುಲೆ, ಅವು ಕೊಡಗ್ ಬುಟ್ಟಿತ್ ಪೊರ್‌ಮೆ ಪೋಪಕ್ ಇಷ್ಟ ಪಡುಲೆಂದ್ ಕ್ಯಾ.ಹಾರ್ಡ್ ಎಳ್ವಿನಾಂಗ್ ದ. ಕನ್ನಡ ಜಿಲ್ಲೆರ ಕೊಡಗರ ಜನಡ ಪೊಲೀಸ್ ದಳತ್‌ರ ಏರ್ಪಾಡ್ ನಿಂದ್‌ಪೋಚಿ.

### ಚಿಕ್ಕವೀರರಾಜೇಂದ್ರನ ವೆಲ್ಲೂರ್‌ಂಜ ಕಾಶಿಕ್ ಕೂಟಿಯಂಡ್ ಪೋಯಿತ್ ಅಲ್ಲಿ ರಾಜಬಂದಿ ಆಯಿತ್ ಆಕ್‌ನದ್

ಕಂಪೆನಿ ಸರ್ಕಾರ 1835ನೆ ಮಾರ್ಚ್ 6ಂಗ್ ಕೊಡಗರ ರಾಜನಾಯಿತಿಂಜ ಚಿಕ್ಕವೀರ ರಾಜೇಂದ್ರ ಪಿಳ್ಳಾ ಕೂಟಕಾರಳ ಕಾಶಿಕ್ ಕೂಟಿಯಂಡ್ ಪೋಪಕ್ ಪೊರ್‌ಟತ್. ಈಂಗ್ ಮುಪ್ಪಡೆ ರಾಜ ಪಿಳ್ಳಾ ಪರಿವಾರಕ್ ಬೋಂಡಿಯಾನ ಬಟ್ಟೆಕ್ ಉ.4,999 ಪಿಳ್ಳಾ

ಖರ್ಚು ಉ. 2,384.12ಂದ್ ಗ.ಜನರಲ್ ಮಂಜೂರ್ ಮಾಡ್‌ಚಿ. ರಾಜ ಪಿಳ್ಳಾ ಪರಿವಾರತನ ಪೆಲ್ಲಕ್ಕಿಲ್ ಪೊರ್‌ಪಾಚಿಟ್ಟಿಂದ್ ಚೆನ್ನೈ ಪಿಳ್ಳಾ ಪ್ರೂವ್ ಕರಾವಳಿ ಕಾಲೆ ಕಾತಿಕ್ ಕೂಟಿಯಿಂದ್ ಪೋಪ ವ್ಯವಸ್ಥೆ ಮಾಡಿತ್ ಪೆಲ್ಲಕ್ಕಿ ಪೊರ್‌ಪ ಬೋಯಿಯಕ್ ತಿಂಗಕ್ ಉ. 500ಂದ್ ತೀರ್ಮಾನ ಮಾಡ್‌ಚಿ.

ರಾಜ ತಾಂಡ ಪರಿವಾರತರ ಕೂಡೆ ಗಂಜಾಮ್ ಪಟ್ಟಣತನ ಜುಲೈ ತಿಂಗತ್ ಎತ್ತುಪಕ ಮಳೆ ಪೊಯ್ಯುವ ಕೂಡ್‌ಚಿ. ಆನಗುಂದ್ ಇಲ್ಲಿಯೆ ದಂಡ್ ಮನೆನ ಬಾಡಿಗೆಕ್ ಎಡ್‌ತಂದ್ ನವೆಂಬರ್‌ಕಿತ್ತನೆ ಇಂಜತ್. ಈ ನೇರತ್ ರಾಜಂಡ ಓರ್ ಮೋಂವಂಗ್ ಪೆದ ಇದುವ, ಲಿಂಗಧಾರಣೆ ಪಿಳ್ಳಾ ಪತ್ತ್ ಕೊಡಪತಿಯಕ್ ಲಿಂಗಧಾರಣೆ ಮಾಡ್‌ಚಿಟ್ಟಿತ್.

ಓಸೆಂಬರ್‌ಲ್ ಕ್ಯಾ. ಕಾರ್ಪೆಂಟರ್ ರಾಜ ಪಿಳ್ಳಾ ಅವಂಡ ಪರಿವಾರತನ ಗಂಜಾಮ್ ಟೌನ್‌ಂಜ ಪೊರ್‌ಪಾಚಿಟ್ಟಿಂದ್ ಫೆಬ್ರವರಿ ಆಗೀರಕ್ ಕಾತಿಕ್ ಎತ್ತ್‌ಚಿ. ಅಲ್ಲಿಯೆ ಕೋಟ ಸಹಸಿಯಚ್ ರಾಜಂಡ ಪರಿವಾರಕ್ ಪರ ಕ್ರಯತರ ಬೆಕ್ಕಿ ಉಳ್ಳ ಸ್ವೆಟರ್, ಕೋಟನೆಲ್ಲ ಎಡ್‌ತ್ ಕೊಡ್‌ತತ್.

ರಾಜ ಕಾತಿಲ್ ಬಂಧಿ ಆನಕೊ ಕಂಪೆನಿ ಸರ್ಕಾರ ಅಯಿಂಗಕ್ ಆರಾಮ್‌ಲ್ ಬದ್‌ಕುಚ್ ಎಲ್ಲ ತರತರ ಲನುಕೂಲ ಮಾಡ್‌ಕೊಡ್‌ತತ್. ಲಿನ್ಯೆ ಕ್ಯಾ. ಕಾರ್ಪೆಂಟರ್ ರಾಜ ಪಿಳ್ಳಾ ಪರಿವಾರತರ ಖರ್ಚು ಅಂದಾಜ್ ಪಟ್ಟಿನ ಗ.ಜನರಲ್ ಕಾರ್ಯದರ್ಶಿ ಅಯೆಚಿ ಕೊಡ್‌ತತ್.

N.B. The expenses on occasions of Hindoo festivals & ceremonies which have been as limited as possible under my superintendence are not estimated as they must always be various & will depend very much on the means at the Ex-Rajah's disposals no provision is made in the above estimate for the charges attending births, funerals etc as they cannot be calculated by anticipation. Some allowance should perhaps be made for pocket expenses, if it be intended that the Ex-Rajah shall enjoy comparative liberty & in the latter case he will also, I think, require a sum of money to be expended in the purchase of a conveyance, fitting up his house with furniture & a variety of articles necessary for the convenience of the family as they are destitute of almost every domestic comfort. Part of the place in Coorg was furnished in the European style



& the Ex-Rajah wishes to adopt a similar fashion in Benares.

(Sd) T.D.Carpenter

Supdt with the Ex-Rajah of Coorg

Benares

16th April 1836

ಕ್ಯಾ.ಕಾರ್ಪೆಂಟರ್ ಅಯೆಚ ರಾಜ ಪರಿವಾರತಾರ ಖರ್ಚ್‌ಪಟ್ಟಿ ಕೊಡಗೂರಾಜ್ಯತಾರ ಸಂಪತ್ತಾಂಜ ಎಚ್ಚಕೋ ಚಾಸ್ತಿ. ಆವಗುಂಡ್ ಕೊಡಗೂರ ಪಟ್ಟಿತಾಂಜ ಉಳ್‌ಪಾನ್ ರಾಜಂಗ್ ಆನೆ, ಮುನ್ನಿ, ಸಿಪಾಯಿಯಡ ಅವಶ್ಯಕತೆ ಇಲ್ಲೆ, ರಾಜ ಪರಿವಾರತಾರ ಖರ್ಚ್ ತಿಂಗಳ್ ಉ.2,500 ಮೀರತನ್ನಕೆ ಇರೊಂಡೂಂಡ್ ಎಳ್ಳೊಚಿ.

You are therefore desired to prepare & submit a revised estimate limiting the total expenditure to the sum of 2,500 company's rupees per mensem, including all occasional charges, as the Governor General, in Council is not disposed to exceed this limit. In framing your estimate you will bear in mind that the Ex-Rajah is not considered entitled to any indulgence beyond what may be consistent with a reasonable degree of comfort.

Firt William  
2nd May 1836

(Sd) W.H.Macnaughten  
Secretary to the Govt of India

ಗ.ಜನರಲಾರ ಈ ಆಜ್ಞೆನುಂಡ್ ಎಚ್ಚಕಾಳ್ ಕಮ್ಮಿ ಆಚೊ ಗೊತ್ತಾಪುಲೆ. ಆಚೇಂಗಿ, ರಾಜ ತಾನ್ ಇಂಗ್ಲೆಂಡ್‌ಕ್ ಪೋಕಣೆ ಎಣ್ಣಕ 1836ತ್‌ಂಜ 1852ಂಗೆತ್ತನೆ ರಾಜ ವೈಭವತೆ ಬದ್‌ಕ್ ನಡತ್‌ಚಿ. ಕೊಡಗೂರ ರಾಜ್ಯ ಬುಟ್ಟಿತ್ ಪೋಪಕ ರಾಜಂಗ್ ಚಿತ್ರಶೇಖರ ಎಣ್ಣವ ಒರೇ ಮೋಂವ ಇಂಜತ್. ಕಾಶಿಕ್ ಬಂದದು ಆರ್ ಮೋನೆಯ, ನಾಲ್ ಮೋಳಿಯ ಪುಟ್ಟೊಚಿ. ಇದತ್ ರಾಜಂಡ ಕೊದಿಮೋವ ಗೌರಮ್ಮ 1841ನೆ ಇಸವಿ ಜುಲೈ 4ಂಗ್ ಕಾಶಿಲೆ ಪುಟ್ಟೊನವ.

ವೀರರಾಜೇಂದ್ರ ಕಾಶಿಲ್ ಇಂಜಕೋ ಗೆಡಿಗಡಿ ಐರೋಪ್ಯ ಅಧಿಕಾರಿಯ ಪಿಳ್ಳಾ

ದೇಶೀಯ ರಾಜ ಕುಟುಂಬಕಾರಕ್ ಉಟೋಪಚಾರ ಮಾಡುವ ಇಂಜತ್. ಈ ನೇರತ್ ರಾಜಂಗ್ ಪರಿಚಯ ಆನ ಲೇಡಿ ಲೋಗಿನ್ ರಾಜಂಡ ಮೀದ "the Rajah of Coorg was himself much liked by Englishmen, for whom he had a great admiration, but for that very reason was regarded with disfavour by his own countrymen"ಂದ್ ರಾಜಂಡ ಮೋಪ ಗೌರಮ್ಮಂಡ ಮೀದ ಎಳ್ವನ ಪುಸ್ತಕತ್ ಎಳ್ವಿತ್.

1848ತ್ ವೀರರಾಜೇಂದ್ರ ಒಡೆಯ ಹಿಂದೂಸ್ಥಾನತ್ ಗ. ಜನರಲ್ ಆಯಿತಿಂಬ ಲಾರ್ಡ್ ಡಾಲ್‌ಹೌಸಿಕ್ ತಾಂಡ ಕೊದಿ ಮೋವ ರಾಜಕುಮಾರಿ ಗೌರಮ್ಮನ ಇಂಗ್ಲೆಂಡ್‌ಕ್ ಕೂಟಿಯಂಡ್ ಪೋಪಕ್ ಒಪ್ಪಿಗೆ ತರೊಂಡೂಂದ್ ಕಾಗದ ಎಳ್ವಚಿ. ಅಚ್ಚಕೆ ಅಲ್ಲ ತಾಂಡ ಮೋವಕ್ ಅಲ್ಲಿ ಕ್ರೈಸ್ತ ಧರ್ಮತ್‌ರ ದೀಕ್ಷೆ ಕೊಡ್‌ಪ್‌ಚಿಟ್ಟಿತ್, ಅಲ್ಲಿಯತ ಶ್ರೀಮಂತ ಮಕ್ಕಡನ್ನಕೆ ವಿದ್ಯೆ ಕೊಡ್‌ಪ್‌ಚಿಡೊಂಡೂಂದ್ ಎಳ್ವಿತಿಂಬತ್. ಇದ್‌ಂಗ್ ಲಂಡನ್‌ರ ಈಸ್ಟ್‌ಇಂಡಿಯಾ ಕಂಪೆನಿಂಬ ಒಪ್ಪಿಗೆ ಕ್‌ಟ್ಪಚಿ. ಆಚೇಂಗಿ ಇಂಗ್ಲೆಂಡ್‌ಕ್ ಪೋಯಿತ್ ಓರ್ ಕಾಲ ಕೈಂಬ ಪಿಳ್ಳಾ ವಾಪಾಸ್ ಹಿಂದೂಸ್ಥಾನಕ್ ಬಪ್ಪ ಖರ್ಚನ ಸರ್ಕಾರ ವಹಿಸಿಯವುಲೆಂದ್ ಆದೇಶ ಕೊಡ್‌ತತ್.

ರಾಜ ಇಂಗ್ಲೆಂಡ್‌ಕ್ ಪೋನಪಿಳ್ಳಾ ಕಂಪೆನಿ ಸರ್ಕಾರ ತಾಂಗ್ ತರತೆ ಇಂಬ ದೊಡ್ಡ ವೀರರಾಜೇಂದ್ರ ಒಡೆಯ ಪಿಳ್ಳಾ ಅಂಬಂಡ ಮೋವ ದೇವಮ್ಮಾಚಿರ ಪೆದತ್ ಸರ್ಕಾರತ್ ನಿರ್ಕ್ ರೇವಣಿ ಆಯಿತ್ ಬೆಚ್ಚಿತಿಂಬ ಪನ್ನಂದ್ ಲಕ್ಷ ಪಣತ್‌ರ ಬಡ್ತಿ ಪಿಳ್ಳಾ ಅಸಲ್ ಪದ್‌ಂದವಕ್ ಇಂಗ್ಲೆಂಡ್‌ರ ಸರ್ಕಾರತ್‌ರ ಕೂಡೆ ವ್ಯವಹಾರ ಮಾಡುವಿಂದ್ ಇಂಗ್ಲೆಂಡ್‌ಕ್ ಪೋಪಾಂಗ್ ಚೆನ್ನಂಗ್ ತಿಂಗಕ್ ಮುಪ್ಪಡೆ ಗ.ಜನರಲ್‌ಕ್ ಎಳ್ವಿತ್ ಅರಿಚಿಟ್ಟಿತಿಂಬತ್.

ಈ ಪೋಲೆ ರಾಜ 1852ತ್ ತಾಂಡ ಕೊದಿಮೋವ ಗೌರಮ್ಮನ ಕೂಟಿಯಂಡ್ ಇಂಗ್ಲೆಂಡ್‌ಕ್ ಪೋರೊಟತ್. ಈ ನೇರತ್ ರಾಜಂಗ್ ಚಿತ್ರಶೇಖರ ರಾಜ, ಲಿಂಗರಾಜೇಂದ್ರ, ಸೋಮಶೇಖರ ರಾಜೇಂದ್ರ, ವೀರಭದ್ರ ರಾಜೇಂದ್ರ, ನಂಬುಂಡ ರಾಜೇಂದ್ರ, ಮುದ್ದು ರಾಜೇಂದ್ರ ಪಿಳ್ಳಾ ಪದ್ಮರಾಜೇಂದ್ರ ಎಣ್ಣುವ ಏಳ್ ಮೋನೆಯ, ವೀರಮ್ಮ, ಗೌರಮ್ಮ, ಗಂಗಮ್ಮ ಪಿಳ್ಳಾ ಮುದ್ದಮ್ಮ ಎಣ್ಣುವ ನಾಲ್ ಮೋಳಿಯ ಇಂಜತ್.

## ಕೊಡಗ್ಗಲ್ ಬ್ರಿಟಿಷ್ ಆಡಳಿತ

ಕೊಡಗ್ಗಲ್ ಬ್ರಿಟಿಷ್ 1834ತ್ಂಜ 1947ಂಗೆತ್ತನೆ ಆಳ್ವಾಚಿ. ಅಕ್ಖ ಹಿಂದೂಸ್ಥಾನತ್‌ರ ಬೋರೆ ಜಾಗತ್ ಇಂಜನ್ನಕೆ ಕೊಡಗ್ಗಲೂ ಕಂಪೆನಿ ಸರ್ಕಾರತ್‌ರ ಅಳ್ವಿಕೆ ಇಂಜತ್. ಈ ನೇರತ್ ಕೊಡಗ್ಗಲ್ ಆರ್ ತಾಲೋಕ್ ಇಂಜತ್.

ತಾಲೋಕ್ ಚ.ಮೈಲ್‌ಲ್ ವಿಸ್ತೀರ್ಣ ಊರ್ ತಾಲೋಕ್ ಕಚೇರಿ

ಮಡಿಕೇರಿ - 216.30 ಮೈಲ್ - 58 - ಮಡಿಕೇರಿ

ಪಾಡಿನಾಲ್ವಾಡ್ - 367.06 ಮೈಲ್ - 56 - ನಾಪೋಕ್

ಎಡೆನಾಲ್ವಾಡ್ - 201.45 ಮೈಲ್ - 52 - ವೀರರಾಜೇಂದ್ರಪೇಟೆ

ಕೊಗ್ಗಟ್ವನಾಡ್ - 403.25 ಮೈಲ್ - 63 - ಹುದಿಕೇರಿ

ನಂಜರಾಯಪಟ್ಟಿ - 261.27 ಮೈಲ್ - 115 - ಪ್ರೇಸರ್‌ಪೇಟೆ

ಏಳಾಯಿರ ಸೀಮೆ - 90.89 ಮೈಲ್ - 168 - ಶನಿವಾರಪೇಟೆ

ಒಟ್ಟು - 1,540.22 ಮೈಲ್ - 512

ಬ್ರಿಟಿಷ್ಡ ಕಾಲತ್ ಕೊಡಗ್ ರಾಜಂಡ ಕಾಲತ್‌ರನ್ನಕೆ ಭೂಹಿಡುವಳಿ ಇಂಜತ್. ಆಚೇಂಗಿ, ಇಯಂಗಡ ಕಾಲತ್ ಕಂದಾಯ ಇಲ್ಲತ ಜಹಗೀರ್ ಭೂಮಿ, ನಾಲಾತ್ ಓರ್ ಪಾಲ್ ಕಂದಾಯ ಉಂಬಳಿ ಭೂಮಿ, ನಾಲಾತ್ ದಂಡ್ ಪಾಲ್ ಕಂದಾಯ ಜಮ್ಮ ಭೂಮಿ ಪಿಳ್ಳಾ ಕಂದಾಯತ್‌ರ ಏದೇ ರಿಯಾಯಿತಿ ಇಲ್ಲತ ಸಾಗು ಭೂಮಿ ಇಂಜತ್. ಅಮರಸುಳ್ಳ ಕಾಟಕಾಯಿನ ಅಡ್‌ಕುವಕ್ ಸಹಾಯ ಮಾಡ್‌ನ ಕೊಡಗ್ಗರ ಜನಕ್ ಬ್ರಿಟಿಷ್ ಭೂಮಿನ ಜಹಗೀರ್, ಉಂಬಳಿ ಪಿಳ್ಳಾ ಜಮ್ಮ ಆಯಿತ್ ಕೊಡ್‌ತ ಉದಾಹರಣೆ ಉಂಡ್.

ಅನ್ನನೆ ರಾಜಂಡ ಕಾಲತ್ ಇಂಜ ಭೂಮಿ ಕಂದಾಯ ಮುಖ್ಯ ಆಯಿತಿಂಜತ್. ಕೂಟ್‌ಕ್ ಪಂಡೇತ್‌ರನ್ನಕೆ ಪುತ್ತರಿ ನೆಯ್ಯಾರ ತೆರಿಗೆ, ಮನೆ ತೆರಿಗೆ ಪಿಳ್ಳಾ ನೆಲ್ಲ್ ತೆರಿಗೆನ ವಸ್ತುರೂಪತ್ ನೂರ್ ಬಟ್ಟಿ ಭೂಮಿಕ್ ಪಾದಿ ಕೂಡ್‌ನನ್ನಕೆ ಭೂಮಾಲೀಕಂಗ ಸರ್ಕಾರಕ್ ಕೊಡ್‌ಕೊಂಡಿಂಜತ್. ಕ್ರಮೇಣ ನೆಯ್ಯಾರ ತೆರಿಗೆನ ನಿಪ್ಪಾಚಿಟ್ಟತ್.

ಮನೆಕಂದಾಯತ್ ಪ್ರತಿಯೋರ್ ರೈತ ಕುಟುಂಬಕ್ 9 ಆಣೆ, 7 ಕಾಸಾರನ್ನಕೆ ಕೊಡ್‌ಕೊಂಡಿಂಜತ್. ಪೊಲೆಯ ಈ ಪಣತ್‌ರ ಪಾದಿನ ಮನೆ ಕಂದಾಯ ಆಯಿತ್ ಕೊಡ್‌ಕೊಂಡಿಂಜತ್. ವ್ಯಾಪಾರಿಯ. ಕೈಪಣಿಕಾರ ತಂಗಡ ವೃತ್ತಿ, ಜಾತಿಕೊತ್ತನ್ನಕೆ ಮನೆಯೊಂದಾಂಗ್ ಮೂಂದಾಣೆ, ದಂಡರೆ ಕಾಸಾಂಜ ಮೂಂದ್ ಉರ್‌ಪಿಯ ಪತ್ತಾಣೆ,



ಪತ್ತಾ ಕಾಸುಕೆತ್ತನೆ ಮನೆ ಕಂದಾಯ ಕೊಡುಕೊಂಡಿಂಜತ್.

ಬ್ರಿಟಿಷರ ಕಾಲತ್ ರಾಜಂಡ ಕಾಲತ್ ಇಂಜನ್ನಕ್ಕೆ ಸುಬೇದಾರ, ಪಾರ್ಪತ್ಯದಾರ, ಶಾನ್‌ಭೋಗಂಗ ತಂಗಡ ಉಸ್ತುವಾರಿಲ್ ಇಂಜ ಉರ್‌ಕ್ ಬೋರೆ ಬೋರೆ ನೇರತ್ ಪೋಯಿತ್ ಅಲ್ಲಿ ರೈತಂಗ ಮನಸ್ಸುಟ್ಟಿತ್ ತಂಗಡ ಭೂಮಿಲ್ ವ್ಯವಸಾಯ ಮಾಡುವನ್ನಕ್ಕೆ ಪ್ರಯತ್ನ ಮಾಡೊಂಡಿಂಜತ್. ಅನ್ನನೆ ರೈತಂಗಕ್ ಕೃಷಿಕ್ ಅತ್ತ, ಪೋರಿಯ, ಆಯುಧತಾನ ಎಡ್‌ತವಕ್ ಸಾಲ ಕೊಡುಕೊಂಡಿಂಜತ್.

ಪಟೇಲ ಅಂಜಿ ಉರ್‌ಪಿಯತರ ಒಳ್ಳಲ್ / ಜಾಗಕ್ ಸಮ್ಮಂಧಪಟ್ಟಿ ಸಿವಿಲ್ ವ್ಯಾಜ್ಯತ್‌ನ ವಿಚಾರಣೆ ಮಾಡಿತ್ ತೀರ್ಮಾನ ಮಾಡೊಲಿಂಜತ್. ಅನ್ನನೆ ಸೂಪರಿಂಟೆಂಡೆಂಟ್ ತಪ್ಪ್ ಮಾಡುನಯಿಂಗಕ್ ಕಠಿಣ ಶಿಕ್ಷೆ ಕೊಡುಪ ಅಧಿಕಾರ ಇಂಜತ್.

ಅಕ್ಕ ಕೊಡಗ್‌ಲ್ ಪೊಲೀಸ ಇಂಜಾಲೆ. ಉರ್‌ರ ಪಟೇಲ ಆ ಉರ್‌ರ ಜಮ್ಮ ರೈತದ ಸಹಾಯತ್‌ಂಜ, ಉರ್‌ನ ಕಳ್ಳಂಗಡ ಉಪದ್ರತ್‌ಂಜ ತಪ್ಪುಚಿಡುವ, ಸರ್ಕಾರತ್‌ಂಜ ಪಣ ಕೊಡುಪುಚಿಡುವ ಇನ್ನತಾನ ಮಾಡೊಂಡಿಂಜತ್.

ಬ್ರಿಟಿಷ ತಂಗಡ ಆಳ್ವಿಕೆರ ಈ ನೇರತ್ ಮಾಡುನ ಮುಖ್ಯಪಟ್ಟಿ ಕೆಲಸ ಎಣ್ಣೆಕ ಕೊಡಗ್‌ಲ್ ಅಕ್ಕಣೆಕ್ ಇಂಜ ಕೆಲಸಕಾರಡ ಗುಲಾಮಗಿರಿನ ನಿಪ್ಪುಚಿಟ್ಟಿದ್. ಕೊಡಗ್‌ಲ್ ಗುಲಾಮಗಿರಿ ಇಂಜತ್ ಎಣ್ಣೆಕ ಆಶ್ಚರ್ಯ ಆಕು. ಚಿಕ್ಕ ವೀರರಾಜೇಂದ್ರ ಒಡೆಯ ಕೊಡಗ್‌ಲ್ ಇಪ್ಪಕ 6,080 ಜನ ಜಮ್ಮ ಆಳ ಇಂಜತ್‌ಂದ್ ಲೆಕ್ಕ ಇಟ್ಟಿತ್. ಇದತ್ ರಾಜಂಡ ಪನ್ನ ಭೂಮಿಲ್ ಪಿಳ್ಳಾ ಅರಮನೆಲ್ ಒಟ್ಟು 1,750 ಜನ ಇಂಜತ್. ಆಚೇಂಗಿ, ಕಂಪೆನಿ ಸರ್ಕಾರ ಸೈನ್ಯತೋಡೆ ಬಪ್ಪಕ ರಾಜಂಡ ಜಮ್ಮತಾಳ್‌ಲ್ ಪಾದಿರಚ್ಚಕ್ ಜನ ಪಕ್ಕತ ಜಿಲ್ಲೆಕ್ ಓಡಿಪೋಚಿಂಜ್ ಆ ಕಾಲತ್‌ರ ಓರ್ ಬ್ರಿಟಿಷ್ ಮಿಲಿಟರಿ ಅಧಿಕಾರಿ ಎಳ್ಳಿತ್. ಇನ್ನತ ಜಮ್ಮತಾಳ ಬೇಲ್‌ಪಣಿರ ಕೂಟಕ್ ರಾಜಬೋಟೆಕ್ ಪೋಪಕ ಅಂವಂಡ ತೋಕ್, ಕತ್ತಿ ಪಿಳ್ಳಾ ಬೋರೆ ಸಾಮಾನ್‌ನೊ ಪೊರ್‌ತಂಡ್ ಪೋಕಂಡಿಂಜತ್.

ಜಮ್ಮತಾಳಡಾತ್ ಭೂಮಿ ಜಮ್ಮತಾಳ್ ಪಿಳ್ಳಾ ಒಕ್ಕ ಜಮ್ಮತಾಳ್‌ಂದ್ ದಂಡ್ ವರ್ಗ ಇಂಜತ್. ಭೂಮಿ ಜಮ್ಮತಾಳ್‌ಕಾರ ತಂಗ ಇಂಜ ಭೂಮಿಲ್ ಆಳ ಆಯಿತ್ ಆ ಭೂಮಿರ ಯಜಮಾನಂಡ ಬದಲ್ ಅಲ್ಲಿ ವಾಸ ಮಾಡುವ. ಒಕ್ಕ ಜಮ್ಮತಾಳ್ ತಂಗ ದಾಡ ಆಳ ಆಯಿತೊ, ಅವು ಅಲ್ಲಿ ಭೂಮಿ ಮಾಡಿಯಂಡ್ ಉಂಡೊ ಅಯಿಂಗಡ ಕೂಡ ಪೋಯಿತ್ ಅಲ್ಲಿ ಕೆಲಸ ಮಾಡೊಂಡಿಂಜತ್. ಎಣ್ಣೆಕ ದಾರೇಂಗಿ ರಾಜಂಡ ಪ್ರಚೀಯ ರಾಜನುಂಡ್ ಭೂಮಿ ಪಡ್‌ಂದ್ ಆ ಜಾಗತ್ ವಾರಕ್ ಪೋನಕ ಅಯಿಂಗಡ ಒಕ್ಕತ್‌ರ ಜಮ್ಮತಾಳ ತಂಗಡ ಯಜಮಾನಂಡ ಕೂಡ ಆ ಭೂಮಿಕ್ ಪೋಂಡಿಂಜತ್.



ಓರಮ್ಮತೆ ಬೊರಿ ಜಮ್ಮತಾಳಳ ತಾರಿಂದ್ ಕೇಟಂಡ ರೈತಂಗಕ್ ರಾಜಂಗ ಜಮ್ಮತಾಳಳ ಕೊಡ್ಪ ಇಂಜತ್. ಅಯಿಂಗಕ್ ತಂಗ ಇಂಜ ಭೂಮಿಯಾಡ್, ಯಜಮಾನನೆ ಆಡ್ ಬುಟ್ಟಿತ್ ಪೋಪ ಸ್ವಾತಂತ್ರ್ಯ ಇಂಜಾಲೆ. ಈ ಜಮ್ಮತಾಳಡಾತ್ ಮುಖ್ಯ ಅಯಿತ್ ಕೆಂಬಟ್ಟಿ ಪೊಲೆಯ, ಮಾರಂಗಿ ಪೊಲೆಯ, ಬಲತೆ ಕೈ ಪೊಲೆಯ, ಪಂಜರಿಯ, ಕಾಗಿ ಎರವ, ಬೆಟ್ಟ ಕುರುಬ, ತೇನ್ ಕುರುಬ, ಮುಂಡ ಪೊಲೆಯ, ಪಾತಿ, ಮಾರಿ ಪೊಲೆಯ, ಕುಕ್ಕ ಪೊಲೆಯ, ಮಾದಿಗಂಗ. ಇಯಂಗಡಾತ್ ಕೆಂಬಟ್ಟಿ ಪೊಲೆಯ ಪಿಳ್ಳಾ ಅಂವಂಡ ಪೊಣ್ಣಾಕ್ 12 ಉರ್‌ಪಿಯ, ಬಲತೆ ಕೈ ಪೊಲೆಯ ಪಿಳ್ಳಾ ಪೊಣ್ಣಾ, ಬೆಟ್ಟಕುರುಬ, ತೇನ್‌ಕುರುಬ ಪಿಳ್ಳಾ ಅಯಿಂಡ ಪೊಣ್ಣಾಳಕ್ ಪತ್ತ್ ಉರ್‌ಪಿಯ. ಎರವಡ ಚೋಡಿಕ್ ಆರ್ ಉರ್‌ಪಿಯ.

1836ತ್ ಬ್ರಿಟಿಷ ಜಮ್ಮತಾಳಕ್ ಸ್ವಾತಂತ್ರ್ಯ ಕೊಡ್ಪಕ್ ಗೇನ ಮಾಡ್‌ನಲ್ಲಿ ಇಲ್ಲಿಯತ ಜನ ಅದ್‌ಂಗ್ ವಿರೋಧ ಮಾಡ್‌ಚಿ. ಎನ್ನಂಗಣ್ಣ ಕ ಜಮ್ಮತಾಳ ಇಂಜಾಲೇಂಗಿ ಅಯಿಂಗಡ ಭೂಮಿ ಪಣಿ ನಡ್‌ಪ ಇಂಜಾಲೆ. ಅನ್ನನೆ ಕೊಡಗ್ ರ ಜನ ಇನ್ನತ ಜಮ್ಮತಾಳಳ ದುಂಬ ಪ್ರೀತಿಲ್ ನೋಟಿಯವ ಇಂಜತ್. ಆನಗುಂಡ್ ಜಮ್ಮತಾಳ ಸಹ ತಂಗಡ ವಾಸ ಜಾಗ ಪಿಳ್ಳಾ ಯಜಮಾನನ ಬುಟ್ಟಿತ್ ಪೋಪಕ್ ಇಷ್ಟ ಪಡುವ ಇಂಜಾಲೆ.

ಕಂಪೆನಿ ಸರ್ಕಾರ 1843ತ್ Act V of 1843 ಎಣ್ಣುವ ಕಾಯ್ದೆನ ಗುಲಾಮಗಿರಿನ ಇಲ್ಲತಾಕುವಕ್ ಕೊಡಗಲ್ ರೂಢಿಕ್ ಕೊಂಡ ಬಾತ್. ಈಂಡ ಪೊಲೆ ಓರ್ ಜಮ್ಮತಾಳ ತಾಂಡ ಯಜಮಾನನ ಬುಟ್ಟಿತ್ ಪೋನಕ ಅವ ಸ್ವತಂತ್ರ್ ಆಪ ಇಂಜತ್. ಯಜಮಾನಂಗ್ ಅವನ ಎಡ್‌ತವ, ಮಾರುವ ಅಧಿಕಾರ ಇಂಜಾಲೆ. ಈ ಕಾಯ್ದೆ ಬಂದನ್ನಕೆ ಜಮ್ಮತಾಳ ತಂಗಡ ಯಜಮಾನಂಡಲ್ಲಿ ಕೆಲಸ ಮಾಡುವಾನ ಬುಟ್ಟಾಲೆ. ಆಚೇಂಗಿ ಮಿಳ್ಳಾಕ್ ಐರೋಪ್ಯಂಗ ಕೊಡಗಲ್ ಕಾಫಿ ಪಣಿ ಸುರು ಮಾಡುವಕ ಅವು ತೋಟ ಕೆಲಸಕ್ ಪೋಪ ಇಂಜತ್. ಪಂಡೇತ ಯಜಮಾನಂಗಳೂ ಅಯಿಂಗಕ್ ಏರ ಕೂಲಿ ಕೊಡ್‌ತಿತ್ ತಂಗಡ ಭೂಮಿ ಕೆಲಸ ಮಾಡ್‌ಚಿಡೊಂಡಿಂಜತ್. ಇಕ್ಕಲೂ ಕೊಡಗಲ್ ಚೆನ್ನಂಗ್ ಭೂ ಹಿಡುವಳಿದಾರಡ ಭೂಮಿಲ್ ಪಂಡೇತ ಜಮ್ಮತಾಳಡ ಸಂತಾನ ನೆಲೆ ನಿಂದಿತ್ ಕೆಲಸ ಮಾಡಿಯಂಡ್ ಉಂಡ್. ಅಯಿಂಗಳ 'ಜಮ್ಮ ಪೊಲೆಯ' ಎಣ್ಣುವ. ಇವು ಬೋರೆಯಿಂಗಡ ತೋಟ ಪಣಿಕೂ, ಭೂಮಿ ಪಣಿಕೂ ಪೋಪಕ್ ಇಕ್ಕ ತೊಂದರೆ ಇಲ್ಲೆ.

ಕೊಡಗ್ ರ ರಾಜಂಗಕ್ ಕೊಡಗಲ್ 20 ಪನ್ನ ಭೂಮಿ ಎಣ್ಣುಕ ಸ್ವಂತ ಭೂಮಿ ಇಂಜತ್. ಇದತ್ ಸುಮಾರ್ 46,872 1/2 ಬುಟ್ಟಿ ನೆಲ್ಲಾ ಬೊಳಿಯುವ ಇಂಜತ್. ಈ ಭೂಮಿಲ್ 168 ಭೂಮಿ ಜಮ್ಮತಾಳ, 1,055 ಒಕ್ಕ ಜಮ್ಮತಾಳ ಇಂಜತ್.

ಚಿಕ್ಕವೀರರಾಜನ ಕೊಡಗಂಜ ಅಯೆಚಪಿಳ್ಳಾ ಕಂಪೆನಿ ಸರ್ಕಾರ ರಾಜಂಗಡ ಪನ್ನ ಭೂಮಿನ ದಿವಾನಂಡ ಸಲಹೆಪೋಲೆ ರೈತಂಗಕ್ ಹಂಚ್ಚಿ. ಅಕ್ಕ ಈ ಜಮ್ನುತಾಳಳ ಇಡ್ಕೆಟ್ವರ ಮೀದ ಹಂಚ್ಚಿ.

'ಜಮ್ನುತಾಳಡ ಮಕ್ಕ ಸರ್ಕಾರತರ ಆಸ್ತಿ, ಇವು ತಂಗ ವಾಸ ಮಾಡುವ ಊರರ ಪೆಟೇಲಂಡ ಉಸ್ತುವಾರಿಲ್ ಇರೊಂಡು. ಅನ್ನನೆ ಓರ್ ಊರಂಜ ಇಣ್ಣೋರ್ ಊರಕ್ ವಾಸಕ್ ಪೋಪೇಂಗಿ ಸರ್ಕಾರತರ ಒಪ್ಪಿಗೆ ಪಡ್ವಂವಂಡೂ'ಂದ್ ದಿವಾನಂಗ ಮಾಡ್ನ ಸಲಹೆನ ಕಂಪೆನಿ ಸರ್ಕಾರತರ ಅಧಿಕಾರಿಯ ಒತ್ತಂಡತ್.

## ಕೊಡಗಲ್ ಸ್ಕೂಲರ ಸ್ಥಾಪನೆ

1834ನೆ ಇಸವಿಕ್ ಮಿಣ್ಣಾ ಕೊಡಗಲ್ ಸ್ಕೂಲ್ ಇಂಚ್ಚಲೆ. ರಾಜಂಗ ತಂಗಡ ಮಕ್ಕಕ್ ಕನ್ನಡ, ಹಿಂದೂಸ್ಥಾನಿ ಪಿಣ್ಣಾ ಪರ್ಶಿಯನ್ ತಕ್ಕ್ಲ್ ಓದಿತ್ ಎಳ್ವವಾನ ಎಣ್ಣಿ ಕೊಡ್ಪಕ್ ಪಿಣ್ಣಾ ಸುಲಭ ಲೆಕ್ಕ ಪಡ್ಪಾಚಿಡುವಕ್ ಮೌಲ್ವಿಯಳ, ಪಂಡಿತಂಗಳ ಬೆಚ್ಚಂಡಿತಿಂಜತ್. ರಾಜಂಡ ಪ್ರಚೆಯ ಓದುವಕ್ ಗೊತ್ತುಳ್ಳವು ತಂಗಡ ಮನೆಲ್ ತಂಗಡ ಮಕ್ಕಕ್ ಪಿಣ್ಣಾ ಬೆಂದುಪಡ ಮಕ್ಕಕೂ ತಂಗ ಪಡ್ಚಾನ ಪಡ್ಪಾಚಿಡುವ ಇಂಜತ್.

1834ತ್ ಜ.ಪ್ರೇಸರ್ ತಾಂಡ ಖರ್ಚಿಲ್ ಪ್ರೇಸರ್ ಪೇಟೆಲ್ ಓರ್ ಸ್ಕೂಲ್ ನಡ್ತುವಕ್ ಏರ್ಪಾಡ್ ಮಾಡ್ಚಿ. ಅದೇ ಕಾಲ ಮಡಿಕೇರಿ, ವೀರರಾಜೇಂದ್ರ ಪೇಟೆಲ್ ಇಂಗ್ಲೀಷ್, ಹುದಿಕೇರಿಲ್ ಕನ್ನಡ ಸ್ಕೂಲ್ ತೊರಂದತ್. ವೀರರಾಜ ಪೇಟೆ ಸ್ಕೂಲರ ಮಕ್ಕ ಎಲ್ಲ ಕೊಂಕಣಿ ತಕ್ಕ್ ಪರೆಯುವ ರೋಮನ್ ಕ್ಯಾಥಲಿಕ್ ಕ್ರಿಶ್ಚಿಯನ್ ಆನಾಢುಂದ್ ಅಯಿಂಗಡ ಧರ್ಮ ಗುರು ಓರ್ ಸ್ಕೂಲ್‌ನ 1842ತ್ ತೊರಂದತ್. ಈ ಸ್ಕೂಲ್‌ಕ್ ಸರ್ಕಾರಿ ಸ್ಕೂಲ್‌ಲ್ ಇಂಜ ಮಕ್ಕ ಎಲ್ಲ ಪೋನಾಂಗ್ ಸರ್ಕಾರಿ ಸ್ಕೂಲ್ ಮುಚ್ಚಿಪೋಚಿ.

1843 ಕೈಂಜಪಿಣ್ಣಾ ಮಡಿಕೇರಿಲ್ ಒಟ್ಟು 21 ಕನ್ನಡ ಸ್ಕೂಲ್ ಇಂಜತ್. ಇಡತ್ ಓರೋರ ಸ್ಕೂಲ್‌ಲ್ 30 ಮಕ್ಕಕಂಜ ಕಮ್ಮಿ ಇಂಜಕ ಟೀಚರ್‌ಕ್ ಅಂಜಿ ಉರ್‌ಪಿಯ ಸಂಬಳ. ಈ ಎಲ್ಲ ಸ್ಕೂಲರ ಕೆಲಸತ್ ಏದೇ ಓರ್ ಮೇಲ್ವಿಚಾರಕ ಇಂಚ್ಚಲೆ. 1854ತ್ ದಾ. ಮೂಗ್ಗಿಂಗ್ ಈ ಸ್ಕೂಲರ ಮೀದ ಇನ್ನನೆ ಎಳ್ವಿತ್.

"The Coorgs have been taught nothing & have learned nothing. The consequence is that during these last 20 years there has been no moral & internal improvement & their superstitions have rather gained in strength than declined. Their natural capacities are equal, if not superior, to those of many other races of India, but their ignorance is extreme. There is probably not a single Coorg who can lay claim even to a low degree of what passes for education now in this country"

ಕೊಟ್‌ಕ್ ಡಾ.ಮೂಗ್ಲಿಂಗ್‌ಕ್ ಸರ್ಕಾರ ಸಹಾಯ ಮಾಡ್‌ನಕ ಮಡಿಕೇರಿಲ್ ಓರ್ ಲೋವರ್ ಸೆಕೆಂಡರಿ ಕನ್ನಡ ಇಂಗ್ಲೀಷ್ ಸ್ಕೂಲ್‌ನ ಸಡ್‌ತುವಿಂದ್ ಎಣ್ಣೆ ಚಿ. ಈ ಪೋಲೆ 1855ತ್ ಮೈಸೂರ್ ಕೊಡಗ್ ಕಮಿಷನರ್ ಸರ್ ಮಾರ್ಕ್ ಕಬ್ಬನ್, ಡಾ. ಮೂಗ್ಲಿಂಗ್‌ಕ್ ಮಡಿಕೇರಿಲ್ ಓರ್ ಲೋವರ್ ಸೆಕೆಂಡರಿ ಸ್ಕೂಲ್ ತೊರ್‌ಪಕ್ ಒಪ್ಪಿಗೆ ಕೊಡ್‌ತತ್.

ಓರಾಂಡ್ ಈ ಸ್ಕೂಲ್ ಸರ್ಕಾರತ್‌ರ ಸಹಾಯ ಪಣತ್ ಬಾಸೆಲ್ ಮಿಷನರಿಕಾರಳುಂಡ್ ನಡೆಂದತ್. ಡಾ.ಮೂಗ್ಲಿಂಗ್ ಮುಖ್ಯೋಪಾಧ್ಯ ಆಚಿ. ಪಿತ್ಯಕಾಲ ಆ ಸಂಘ ಖರ್ಚ್ ದುಂಬ ಆಪಾಂದ್ ಸ್ಕೂಲ್‌ನ ಸರ್ಕಾರಕೆ ವಹಿಸಿರ್‌ತ್. ರೆವರೆಂಡ್ ಜಿ. ರಿಕ್ಟರ್ ಸ್ಕೂಲ್‌ರ ಮುಖ್ಯೋಪಾಧ್ಯ ಆನಕ, ಡಾ.ಮೂಗ್ಲಿಂಗ್ ಪ್ರಿನ್ಸಿಪಾಲ್ ಆಚಿ.

ಈ ಸ್ಕೂಲ್ ಮಡಿಕೇರಿಲ್ ಸುರುವಾಪಕ ಕೊಡಗರ ಸುಮಾರ್ ಚಾಕ್ರಿಕಾರ ಕೊಡವ ತಂಗಡ ವಿರೋಧ ಕಾಟ್‌ಚಿ. ಆಚೀಂಗಿ, ಕೊಳುವಂಡ ಕಾರ್ಯಪ್ಪ ಎಣ್ಣುವ ಬಾಲೆಕಾರ ಕೊಡವಡ ವಿರೋಧತ್‌ನ ಸಹಿಸಿಯಂಡ್ ಈ ಸ್ಕೂಲ್ ಕೊಡ್‌ಚಿ. ಅವ ಈ ಸ್ಕೂಲ್‌ಲ್ ಓದ್‌ನಪಿಳ್ಳಾ ಕೊಡಗ್ ಸರ್ಕಾರತ್ ಬಲ್ಯ ಪದವಿಕ್ ಎತ್ತ್‌ಚಿ.

1857ತ್ ಮೈಸೂರ್ ಜ್ಯುಡಿಷಿಯಲ್ ಕಮಿಷನರ್ ಓರ್ ಪ್ರದಿಯ ವಿದ್ಯಾಭ್ಯಾಸ ಪದ್ಧತಿನ ಕೊಂಡಬಂದಲ್ಲಿ ಕೊಡಗರ ಆರ್ ತಾಲೋಕ್ ಕೇಂದ್ರತ್ ಸರ್ಕಾರಿ ಪ್ರಾಥಮಿಕ ಸ್ಕೂಲ್ ಇರೊಂಡೊಂದ್, ಇದ್ ಮೈಸೂರ್ ವಿದ್ಯಾ ಇಲಾಖೆರ ಓರ್ ಅಧಿಕಾರಿನುಂಡ್ ಪರೀಕ್ಷೆ ಆಯಂಡ್ ಇರೊಂಡೊಂದ್ ಸರ್ಕಾರ ಏರ್ಪಾಡ್ ಮಾಡ್‌ಚಿ.

1860ತ್ ಮೂಗ್ಲಿಂಗ್ ಆರೋಗ್ಯ ಸೆರಿ ಇಲ್ಲತೆ ಹಿಂದೂಸ್ಥಾನ ಬುಟ್ಟಿತ್ ಜರ್ಮನಿಕ್ ಪೋಚಿ. ರೆ. ರಿಕ್ಟರ್‌ನ ಮಡಿಕೇರಿ ಸ್ಕೂಲ್‌ರ ಪ್ರಿನ್ಸಿಪಾಲ್ ಆಯಿತ್ ನೇಮಕ ಮಾಡ್‌ಚಿ.

## ಕೊಡಗಲ್ ಕಾಫಿತೋಟ ಸುರು

ಕೊಡಗಲ್ ಯಾಲ, ಪುಳಿ, ಚೋರಂಗಿ ಪೇರ್ತ್ ಕಾಲತ್‌ಂಜ ಬೊಳೆವ ಇಂಜತ್. ರೈತಂಗ ತಂಗ ಬೊಳೆತನ ಯಾಲತನ ರಾಜಂಗ್ ಓರ್ ಕ್ರಯಕ್ ಮಾರೊಂಡಿಂಜತ್. ಪಾರ್ಸಿ ವ್ಯಾಪಾರಿಯಡ ಮೂಲಕ ರಾಜಂಗ ಕೊಡಗಲ್ ಬೊಳೆಂದ ಯಾಲತನ ಪೊರ ಊರ್‌ಲ್ ಮಾರುವ ಇಂಜತ್.

ಕೊಡಗಲ್ ಆದ್ ಕಾಫಿ ಬೊಳೆತುವಕ್ ಸುರುಮಾಡ್‌ನವು ನಾಲ್ಕಾಡ್‌ರ ಮಾಪಳೆಯ. ಇವು ಚಿಕ್ಕ ವೀರರಾಜೇಂದ್ರ ಒಡೆಯಂಡ ಕಾಲತ್ ಮಲಯಾಳತ್‌ಂಜ ಕಾಫಿ ಕುರುನ ಕೊಂಡ ಬಂದಿತ್, ನಟ್ಟಿತ್ ಗಾಡ ಮಾಡಿತ್ ಅದತ್ ಫಸಲ್ ಪಡೊಂದಪಿಳ್ಳಾ ಮಲಯಾಳತೆ ಮಾರಿತ್ ಪಣ ಸಂಪಾದನೆ ಮಾಡುವ ಇಂಜತ್.

ತಂಗಡ ಪಕ್ಕತ್ ಉಳ್ಳವು ಕಾಫಿನ ಬೊಳೆತುವಕಯ್ಯಾಂದ್ ಅಯಿಂಗಳ ಬೊತ್ತಚಿದುವಕ್, 'ಕಾಫಿಗ್‌ಡತ್‌ರ ಬೇರ್‌ಲ್ ವಿಷ ವಸ್ತು ಉಂಡ್. ಇದ್‌ನ ಅತ್ತ ಕಡ್‌ಚಿಯ ಕುಡ್‌ಚಕ ಚತ್ತ್ ಪೋಪಾ'ಂದ್ ಪಬ್ಬಚಿಟ್ಟಿತ್. ಇದ್‌ಂಗೊತ್ತನ್ನತ ಮಾಪಳೆಯ ತಂಗಡ ಪಕ್ಕ ಇಂಜ ಅತ್ತ, ಕಡ್‌ಚಿಯೆಲ್ಲ ಮಾರಿರ್‌ತ್. ಕೂಟ್‌ಕ್ ಕಾಫಿಗ್‌ಡತ್‌ರ ನಡೂಲ್ ಒಕ್ಕುವ ನೀರ್ ಬೇಲ್‌ಕ್ ಪೋನಕ ಅಲ್ಲಿ ನೆಲ್ ಬೊಳೆಯುವ ಕಯ್ಯಲೆಂದ್ ಬೇಲ್ ನಡ್‌ಪಾನೊ ನಿಪ್ಪಚಿಟ್ಪಾರ್‌ತ್! ಆಚೇಂಗಿ, ಇವು ಮಾತ್ರ ತಂಗಡ ಕರೆ ಜಾಗತ್, ಬಾಣೆ ಜಾಗತ್ ಕಾಫಿನ ಚಾಯಿತೆ ಬೊಳೆತಿಯಂಡ್ ಅದ್‌ನ ಮಾರಿತ್ ನಲ್ಲ ಪಣ ಸಂಪಾದನೆ ಮಾಡುವ ಇಂಜತ್. ಇದ್‌ನೆಲ್ಲ ಕಂಡ ಅನುಕೂಲತ್ ಉಳ್ಳ ಚೆನ್ನಂಗ್ ಕೊಡವ ಧೈರ್ಯ ಎಡ್‌ತಂಡ್ ಕಾಫಿ ಬೊಳೆತುವಕ್ ಸುರು ಮಾಡ್‌ಚಿ. ಅವು ತಂಗಡ ಅತ್ತ, ಕಡ್‌ಚಿಯೆಳ ಮಾರ್‌ಲೆ. ಬೇಲ್ ನಡ್‌ಪಾನ ಬಾಕಿ ಮಾಡ್‌ಲೆ. ಕೂಟ್‌ಕ್ ಕ್ಯಾಲೀಹಾರ್ಡಿ ಕೊಡಗಲ್ ಕಾಫಿ ಬೊಳೆತುವಕ್ ಪುರ್‌ಡ್ ಕಾಟ್‌ಚಿ. ಅಂದ್ ಕಾಲತ್‌ರ ಕಾಫಿ ಗಾಡ ಮರತ್‌ರ ಪೋಲೆ ದುಂಬ ಎತ್ತರ ಬೊಳೆಯುವ ಇಂಜತ್.

ಕೊಡಗಲ್ ಕಾಫಿನ ಓರ್ ಕ್ರಮಪೋಲೆ ಬೊಳೆತುವಕ್ ಸುರು ಮಾಡಿಯೆ ಐರೋಪ್ಯ ತೋಟಕಾರನಾನ ಡಾ.ಫೌಲರ್ ಎಣ್ಣುವಂವ. ಇಂವ ಮಡಿಕೇರಿಲ್ 1854ತ್ ಕಾಫಿ ತೋಟ ಸುರು ಮಾಡ್‌ಚಿ. ಈ ಪೋಲೆ ಹರ್ಬರ್ಟ್ ಮ್ಯಾನ್ ಸಂಪಾಜೆ ರಸ್ತೆ ಪಕ್ಕತ ಕಾಡಲ್, ಡೊನಾಲ್ಡ್ ಸ್ಟೀವರ್ಟ್ ಅಬ್ಬಿ ಫಾಲ್ಸ್‌ಕ್ ಪೋಪ ಬಟ್ಟೆಲ್, ಡಾ. ಮ್ಯಾಕ್ಸ್‌ವೆಲ್ಸ್ ಪೆರಂಬಾಡಿ ಪಕ್ಕತ್, ಕೌಂಡಿನ್ಯ ಆನಂದಪುರತೂ ತೋಟ ತೊರ್‌ಂದತ್. ಈಂಗ್ ಮುಪ್ಪಡೆ ಐರೋಪ್ಯ ತೋಟಕಾರ ಮಂಜರಾಬಾದ್, ನೀಲಗಿರಿ ಪಿಳ್ಳಾ ವೈನಾಡಲ್ ಕಾಫಿ ಬೊಳೆತುವ ಇಂಜತ್.



1857ನೆ ಇಸವಿ ಕೈಂಜಪಿಳ್ಳಾ ಕೊಡಗುರ ಕಾಡ್‌ಲ್ ಐರೋಪ್ಯಕಾರ ಪಿಳ್ಳಾ ಕೊಡಗುರ ಜನಳೂ ಕಾಡ್ ಕೆತ್ತಿತ್ ಏರ ಜಾಗತ್ ಕಾಫಿ ತೋಟ ಮಾಡ್‌ಚಿ. ಪೂರ ಜಿಲ್ಲೆಂಜ ಆಯಿರ ಕಣಕ್‌ಲ್ ಕೂಲಿಯಾಳ ಇಲ್ಲಿಯತ ಕೆಲಸಕ್ ಬಾತ್. ಕೊಡಗುಲ್ ಆದ್ಯದಾಯಿತ್ ಆಯಿರಾರ್ ಏಕ್ರೆರ ಬಲ್ಯ ಬಲ್ಯ ಕಾಡ್‌ನೆಲ್ಲ ಕಾಫಿ ತೋಟಕಾಯಿತ್ ಕೆತ್ತಿತ್‌ಟ್ಟತ್. ಆ ಕಾಲತ್ ಓರ್ ಬಟ್ಟಿ / 80 ಸೇರ್ ಚೆರಿಕಾಫಿಕ್ 7-10 ಉರ್‌ಪಿಯ ಕ್ರಯ ಇಂಜತ್.

1834ತ್ ಕ.ಪ್ರೇಸರ್ ಮೈಸೂರ್‌ಕ್ ಕಮಿಷನರ್ ಆಯಿತ್ ಪೋನದೆ ಕೊಡಗುಲ್ ಸೂಪರಿಂಟೆಂಡೆಂಟ್ ಎಣ್ಣುವ ಜಿಲ್ಲಾಧಿಕಾರಿ ಚಾಕ್ರಿ ಸುರು ಮಾಡಿತ್ ಕ್ಯಾ.ಲೀ ಹಾರ್ಡಿನ್ ಇಲ್ಲಿಕ್ ನೇಮಕ ಮಾಡ್‌ಚಿ. ಅಲ್ಲಿಂಜ ಈ ಕೇದತ್‌ರವು ಸೇವೆಲ್ ಇಂಜತ್.

ಕ್ಯಾ. ಹೇಯ್ಲ್ಡ್	:	1843 -1844
ಕ್ಯಾ. ಅನ್‌ಸೋ	:	1844 -1846
ಮೇ. ಗಸ್ಪಾರ್ಡ್	:	1846 -1855
ಕ್ಯಾ. ಮಾರ್ಟಿನ್	:	1855-1856
ಮೇ. ಗಸ್ಪಾರ್ಡ್	:	1856-1856
ಕ್ಯಾ. ಮಾರ್ಟಿನ್	:	1857-1859
ಕ್ಯಾ. ಇಲ್ಲಿಯಟ್	:	1859-1861

ಜ.ಪ್ರೇಸರ್ 1856ಲ್ ತಿರುವಾಂಕೂರ್ ಸಂಸ್ಥಾನಕ್ ಬ್ರಿಟಿಷ್ ರೆಸಿಡೆಂಟ್ ಆಚಿ. ಅದೆ ಕಾಲ ಜನವರಿಲ್ ಲೆ.ಕ. ಮಾರ್ಕ್ ಕಬ್ಬನ್ ಮೈಸೂರ್ ಪಿಳ್ಳಾ ಕೊಡಗುರ ಕಮಿಷನರ್ ಆಚಿ. ಇಂವಂಡ ಆಫೀಸ್ ಬೆಂಗಳೂರ್‌ಲ್ ಇಂಜತ್.

ಕೊಡಗುರ ದಂಡ್ ದಿವಾನಂಗಡಾತ್ ಅಪ್ಪಾರಂಡ ಬೋಪು ದಿವಾನ 1840ತ್ ಸ್ವರ್ಗವಾಸಿಯಾನಕ, ಚೆಪ್ಪುಡಿರ ಪೊನ್ನಪ್ಪ ದಿವಾನ 1847ತ್ ಸ್ವರ್ಗವಾಸಿಯಾಚಿ. ಬೋಪುರ ಜಾಗತ್ ಮಡಿಕೇರಿ ಸುಬೇದಾರ್ ಮಂಡೇಪಂಡ ತಿಮ್ಮಯ್ಯ ಮುಖ್ಯ ಶಿಸ್ತಿದಾರ ಆಚಿ. ಪೊನ್ನಪ್ಪ ದಿವಾನಂಡ ದಂಡನೆ ಮೋಂವ ಮಾಡಯ್ಯ 1866ತ್ ಓರ್ ಪೇಟೆ ಕೆಟ್‌ಚಿಟ್ಟಿತ್ ಕ್ಯಾ.ಕೋಲಾರ ಒಪ್ಪಿಗೇಲ್ ಅದಾಂಗ್ ತಾಂಡ ಅಪ್ಪಂಡ ಪೆದ ಇಟ್ಟಿತ್. ಇದೇ 'ಪೊನ್ನಂಪೇಟೆ'. ಮಂಡೇಪಂಡ ತಿಮ್ಮಯ್ಯ ನಿವೃತ್ತಿ ಆನದು ಬುಟ್ಟಿಯಂಡ ನಂಜಪ್ಪ ಶಿರಸ್ತೆದಾರನಾಯಿತ್ 1862ತ್ ಕುದರೆಂಜ ಬುದ್ದಿತ್ ಚತ್‌ಪೋಚಿ.

## ಕೊಡಗ್ಗಲ್ ಪ್ರಾಟೆಸ್ಪಂಟ್ ಕ್ರೈಸ್ತಮತ ಪ್ರಚಾರ

ಕೊಡಗ್ಗಲ್ ದೊಡ್ಡವೀರರಾಜೇಂದ್ರ ಒಡೆಯ 1792ತ್ ವೀರ ರಾಜೇಂದ್ರ ಪೇಟೆ ಕೆಟ್ಟುಚಿಟ್ಟಿತ್ ಅದತ್ ಜನಳ ದುಂಬ್ಚಿಡುವಕ್ ರೋಮನ್ ಕ್ಯಾಥಲಿಕ್ಸ್ ನೆಲೆ ನಿಪ್ಪುಚಿಟ್ಟಿತಿಂಜತ್. ಇವು ಮೂಲತಃ ದ.ಕನ್ನಡಕಾರ. ಇದತ್ ಓರಚ್ಚಕಾಳ್ ಇಲ್ಲಿಯೆ ಭೂಮಿ, ಮನೆ ಆಯಂಡ್ ಇಕ್ಕಲೂ ಕೊಡಗ್ಗಲೆ ಶಾಶ್ವತ ನಿವಾಸಿಯ. ಇವು ಇಲ್ಲಿ ನೆಲೆ ನಿಪ್ಪುಕ್ ಕೊಡಗ್ಗ ರಾಜಂಗಡ ಪುರ್ಡ್ ಪಿಳ್ಳಾ ಒರಾತ ಇಂಜತ್.

ಆಚೇಂಗಿ, ಕೊಡಗ್ಗಲ್ ಪ್ರಾಟೆಸ್ಪಂಟ್ ಮತ ಪ್ರಚಾರ ಆನದ್ ಗೇನ ಮಾಡತದ್! 1834ತ್ ಜ.ಫ್ರೇಸರ್ ಈ ಧರ್ಮ ಪ್ರಚಾರತ್ ಕೊಡಗ್ಗ ಯೋಗ್ಯವಾನ ಜಾಗಂದ್ ಗೇನ ಮಾಡಿತಿಂಜತ್. ಇದೇ ನೇರತ್ ದ. ಕನ್ನಡತ್ ಮುಖ್ಯ ಪಟ್ಟಣ ಆನ ಮಂಗಳೂರ್ಲೆ ಪ್ರಾಟೆಸ್ಪಂಟ್ ಕ್ರೈಸ್ತ ಸೇವಾ ಸಂಘ ಇಂಜತ್. 1852ತ್ ಈಂಡ ಗುರು ದಾ. ಮೂಗ್ಗಿಂಗ್ ಎಣ್ಣುವ ಜರ್ಮನಿಕಾರ. ಅವ ತಾಂಡ ತಡಿರ ಚೆಕಪ್ಪಕ್ ಜರ್ಮನಿಕ್ ಪೊರ್ಟಿತಿಪ್ಪಕ ಓರ್ಸನ್ನಾಸಿ ವೇಷ ಇಟ್ಟ ಕೊಡವ ಬಂದಿತ್ "ನಾನ್ ಕ್ರೈಸ್ತಮತಕ್ ಕೂಡುವಿ"ಂದ್ ಎಣ್ಣೆಚಿ.

ಮೂಗ್ಗಿಂಗ್ಗಕ್ ಈ ಮನುಷ್ಯ ಬುದ್ಧಿವಂತ ಪಿಳ್ಳಾ ಚುರ್ಕ್ ಉಳ್ಳೆವಾಂದ್ ತೋಂದ್ಚಿ. ಈ ವ್ಯಕ್ತಿ ಕೊಡಗ್ಗರ ವೀರಾಜಪೇಟೆ ತಾಲೂಕ್ರ ಬೆಪ್ಪುನಾಡ್ಕ್ ಅಡ್ಗಂಗ್ನ ಅರಮೇರಿ ಊರ್ ಅಳಮಂಡ ಒಕ್ಕತ್ ಸೋಮಯ್ಯ. ಸೋಮಯ್ಯಂಡ ಅಪ್ಪ ಬೊಳ್ಳು, ಟಿಪ್ಪುರ ಸೈನ್ಯತ್ ಕೊಡಗ್ಗಂಜ ಓಡ್ಚಿಡುವಕ್ ದೊಡ್ಡ ವೀರರಾಜೇಂದ್ರಂಗ್ ದುಂಬ ಸಹಾಯ ಮಾಡ್ಚಿ. ಆನಗುಂಡ್ ಬೊಳ್ಳುಕ್ ರಾಜ ಉಂಬಳಿ ಆಯಿತ್ 650 ಬಟ್ಟಿ ಭೂಮಿ ಪಿಳ್ಳಾ ಈಂಡ ಕೆಲಸಕ್ ಓರ್ ಜೊತೆ ಎರವಳ ಕೊಡ್ತತ್. ಕೂಟ್ಕ್ ಓರ್ ಪೊನ್ನರ ಬಳೆ, ಊರ್ ತಕ್ಕಾಮೆನ ಕೊಡ್ತತ್.

ಸೋಮಯ್ಯ ಚರ್ಪತಿಪ್ಪಕೆ ಬೊಳ್ಳು ಚತ್ಪೋಚಿ. ಬ್ರಿಟಿಷ ಕೊಡಗ್ಗಕ್ ಬಂದಿತ್ ಪಿತ್ ಕಾಲ ಅಮರಸುಳ್ಳ ಕಾಟಕಾಯಿ ಸುರುವಾಪಕ ಸೋಮಯ್ಯ ಪಿಳ್ಳಾ ಅಣ್ಣ, ಕಲ್ಯಾಣಸ್ವಾಮಿರ ಜನಡ ಕೂಡ ಪೋರಾಡುವಕ್ ಬಿಸ್ಲೆ ಫಾಟ್ಕ್ ಪೋಯಿತಿಂಜತ್. ಆನಗುಂಡ್ ಇಯಂಗಕ್ ಕಂಪನಿ ಸರ್ಕಾರತ್ 100 ಬಟ್ಟಿ ಭೂಮಿ ಉಂಬಳಿ ಆಯಿತ್ ಕೊಟ್ಟಿತಿಂಜತ್.

ಅನ್ನನೆ 1842ತ್ ಸೋಮಯ್ಯ ಕಾಶಿಲ್ ಇಂಜ ಚಿಕ್ಕವೀರರಾಜೇಂದ್ರನ ನೋಟುವಕೂ, ಗಂಗಾಪೊಳೆಲ್ ಕುಳಿಪಕೂ ಪೋನಂವ ಅಲ್ಲಿಯೆ 3 ಕಾಲ ಇಂಜಿತ್ ಕೊಡಗ್ಗಕ್ ವಾಪಾಸ್ ಬಾತ್. 1846ತ್ ತಾಂಡ ಪಿಳ್ಳಾ ಅಣ್ಣಂಡ ಮಂಗಲಕ್, ಅತ್ತಳೆ

ಎಡ್‌ಪಕ್ ಸಾಲ ಮಾಡಂಡಿಯಾಚಿ. ಈ ಸಾಲ ತ್ತೇಪಕ್ ಅವ ಯಾಲ ವ್ಯಾಪಾರ ಸುರು ಮಾಡ್‌ಚಿ. ಅದತೂ ನಷ್ಟ ಆಚಿ. ಸಾಲ ಪಣ ತ್ತೇಪಕ್ ಕಯ್ಯತಾಪಕ ತಾಲೋಕ್ ಸುಬೇದಾರ್ ಬೆಪ್ಪುನಾಡ್ ಆಫೀಸ್‌ಲ್ ಆಕ್‌ಚಿ. ಪಿತ್ಯಾಂದ್ ಅಲ್ಲಿಂಜ ತಪ್ಪುಚಿಟ್ಟಿಂಡ್ ಪೋನ ಸೋಮಯ್ಯ ತಾಂಡ ಪೊಣ್ಣ್ ಪಿಳ್ಳಾ ಮೂಂದ್ ಮಕ್ಕಳ ಕೂಟಿಯಂಡ್ ತಾಮನೆಕ್ ಪೋಪಕ್‌ಎಣ್ಣ್‌ಚಿ. ತಾನ್ ಪೊರ ಊರ್‌ಕ್ ಪೋಯಿತ್ ಜಿಂವತ್ ಉಂಡೇಂಗಿ 12 ಕಾಲ ಕೈಂಜಪಿಳ್ಳಾ ವಾಪಾಸ್ ಬಪ್ಪಿಂಡ್ ಎಣ್ಣಿತ್ ಮೂಗ್ಗಿಂಗ್ಗರ ಪಕ್ಕ ಬಾತ್.

ಆನಗುಂಡ್ ಮೂಗ್ಗಿಂಗ್ ಸೋಮಯ್ಯಂಗ್ 'ಸ್ವೀಫನಾಸ್' ಎಣ್ಣುವ ಕ್ರೈಸ್ತ ಪೆದ ಕೊಡ್‌ತತ್. ಸೋಮಯ್ಯಂಡ ವಿಷಯತ್‌ನೆಲ್ಲ ಮೂಗ್ಗಿಂಗ್ ಅರ್‌ಂಜಂಡತ್. ಆಖೀರಕ್ ಮೂಗ್ಗಿಂಗ್ ಎಣ್ಣ್‌ನ ಪೋಲೆ ಸ್ವೀಫನಾಸ್ ಸೋಮಯ್ಯ ಕೊಡಗ್‌ಕ್ ಬಪ್ಪಕ ಕೂಡೆ ಇಂಜ ಮೂಗ್ಗಿಂಗ್, ಡಾ.ಗುಂಡರ್ಬ ರೆವರೆಂಡ್ ಹರ್ಮನ್ ಆನಂದ ರಾವ್ ಕೌಂಡಿನ್ಯ ಬಾತ್. ಅಂದ್ ಬೈಟ್ ಅಳಮಂಡ ಮನೆಲ್ ತಾಂಡ ವಡಿಯನ ಕಂಡಿತ್ ಸೋಮಯ್ಯಂಡ ಪೊಣ್ಣ್‌ಕ್ ದುಂಬ ಕುಶಿಯಾಚಿ. ಅವ ಕ್ರೈಸ್ತಧರ್ಮಕ್ ಮತಾಂತರ ಆನಾನ ಕೇಟಿತ್ ಅವಳೂ, ಮಕ್ಕಳೂ ಮತಾಂತರ ಆಪಾಂದ್ ಎಣ್ಣ್‌ಚಿ. ಪಿತ್ಯಾಂದ್ ಸೋಮಯ್ಯಂಡ ಕೂಡೆ ಬಂದವು ಸೋಮಯ್ಯ ಕಾಕ್‌ನಪೋಲೆ ಅಳಮಂಡ ಮನೆಕ್ ಬಾತ್. ಅಂದ್ ಅಲ್ಲಿ ಬೋರೆ ಕೊಡವ ಬೆಂದಕಳೂ ಇಂಜತ್. ಅಯಿಂಗಕೆಲ್ಲ ಬೈಟ್ ಉಟಿತ್‌ರ ಏರ್ಪಾಡಾಚಿ.

ಅಂದ್ ಅಲ್ಲಿ ಇಂಜ ಬೋರೆ ಕೊಡವ ಮೂಗ್ಗಿಂಗ್ ಪಿಳ್ಳಾ ಕೂಟ್‌ಕಾರಳ ಗೌರವ, ವಿಶ್ವಾಸತ್ ಕಂಡತ್. ಸ್ವೀಫನಾಸ್ ಸೋಮಯ್ಯ ತಾಂಡ ಪೊಣ್ಣ್ ಪಿಳ್ಳಾ ಇಞ್ಚೋರ್ ಪೊಣ್ಣಾಳ್‌ನ ಮತಾಂತರ ಮಾಡುವಾಂಗ್ ಮುಪ್ಪಡೆ ಅಯಿಂಗಕ್ ಕ್ರೈಸ್ತಮತ ಬೋಧನೆ ಮಾಡುವಕ್, ಅಳಮಂಡ ಮನೆರ ಪಕ್ಕತೆ ಇರೊಂಡೂಂದ್, ಆನಗುಂಡ್ ಓರ್ ಚೆರಿಯ ಮನೆ ಕೆಟ್ಟಿಕೊಡ್‌ಕೊಂಡೂಂದ್ ಸೋಮಯ್ಯಂಗ್ ಎಣ್ಣ್‌ಚಿ.

ಆಚೇಂಗಿ, ಅಂದ್ ಮಜ್ಜಣಿತ್‌ರ ಮೀದ ಮೂಂದ್ ಕೊಡವ ಸೋಮಯ್ಯಂಡ ಮನೆಕ್ ಬಂದಿತ್ ಡಾ.ಮೂಗ್ಗಿಂಗ್ ಪಿಳ್ಳಾ ಕೂಟ್‌ಕಾರ ಅಲ್ಲಿಂಜ ಪೊರ್‌ಟ್ ಪೋಂಡೂಂದ್ ಎಣ್ಣ್‌ಚಿ. ಅಕ್ಕ ಸ್ವೀಫನಾಸ್ ಸೋಮಯ್ಯ 'ಅದ್ ನಾಡ ಮನೆ'ಂದ್ ಎಣ್ಣುವಕ ಅವು ಸೋಮಯ್ಯನ ಪೊರಂಬಡಿ ಬೆಪ್ಪಾಂದ್ ಬೊತ್ತ್‌ಚಿಟ್ಟಿತ್. ಅಂದೇ ಬೈಟ್ ಎಣ್ಣಕ 1853ನೆ ಫೆಬ್ರವರಿಲ್ ಸೋಮಯ್ಯ ಕೂಟ್‌ಕಾರಳುಂಡ್ ವೀರರಾಜೇಂದ್ರ ಪೇಟೆಕ್ ಪೋಚಿ.

ಸೋಮಯ್ಯ ಪ್ರಾಟೆಸ್ಟಂಟ್ ಕ್ರೈಸ್ತನಾಯಿತ್ ಅಳಮಂಡ ಮನೆಕ್ ಪೋಯಿತ್ ಅಲ್ಲಿ ವಾಸ ಮಾಡುವಕ್ ಬಂದ ಸುದ್ದಿ ಕೊಡಗ್‌ಡಿ ಕಾಡ್‌ತಿತ್‌ರ ಪೋಲೆ ಪಬ್ಲಿಚಿ.

ಎಡೆನಾಲ್ಲಾಡ್ ಸುಬೇದಾರ್ ಮಾತಂಡ ಅಪ್ಪಚ್ಚಣ್ಣ ಸ್ವೀಫನಾಸ್ ಸೋಮಯ್ಯಂಗ್ ಅಂವ ಕ್ರೈಸ್ತ ಆನಾನುಂಡ್ ಅಂವಂಡ ಆಸ್ತಿರ ಮೀದ ಹಕ್ಕ್ ಇಲ್ಲೆಂದ್ ಅಭಿಪ್ರಾಯ ಪಟ್ಟಿತ್. ಆಂಡ ಪೋಲೆ ಫೆಬ್ರವರಿ 20ಂಗ್ ಬೈಟ್ 9 ಗಂಟೆಕ್ ಅಳಮಂಡ ಸುಬ್ಬಯ್ಯ ಪಿಳ್ಳಾ ಬೋರೆ ಜನ ಸೋಮಯ್ಯಂಡ ಮನೆಕ್ ಬಂದಿತ್ ಕೂಡೆನ್ನೆ ಅಂವ ಮನೆ ಬುಡೊಂಡೂಂದ್ ಇಲ್ಲೇಂಗಿ ಅಂವನ ಪೊಜ್ಜಿ ದೊವ್ತುವ ಎಣ್ಣೆಚಿ.

ಅಕ್ಕ ಸೋಮಯ್ಯ ಬೊತ್ತಿತ್ ಅಲ್ಲಿಂಜ 3 ಮೈಲ್ ದೂರತ ವೀರಾಜಪೇಟೆಕ್ ಪೊರ್ಟತ್. ಕೂಡೆ ಪೊಣ್ಣಾ, ಮಕ್ಕ, ಮೊಮ್ಮ ಪಿಳ್ಳಾ ಅವಡ ಅವ್ವನೂ ಪೊರ್ಟತ್. ವೀರಾಜಪೇಟೆಕ್ ಎತ್ತುವಕ 11 ಗಂಟೆ. ಡಾ.ಮೂಗ್ಗಿಂಗ್ ಅಯಿಂಗಕ್ ಓರ್ ಕೋಂಬರೆನ ಬುಟ್ಟಾಕೊಡ್ತಿತ್ ಅಂದೇ ಬೈಟ್ ಸೋಮಯ್ಯ ಕ್ರೈಸ್ತ ಆನಾನುಂಡ್, ಅಂವಂಡ ಮನೆಂಜ ಅಂವಂಡ ಕುಟುಂಬಕಾರ ಓಡ್ಚಿಟ್ಟಿ ವಿಷಯತ್ ಕೊಡಗರ ಸೂಪರಿಂಟೆಂಡೆಂಟ್‌ಕ್ ಓರ್ ಅರ್ಜಿ ಎಳ್ಳೆಚಿ. ಕ್ಯಾ. ಗಸ್ಪಾರ್ಡ್ ಈ ದಂಡ್ ಅರ್ಜಿನ ಎಡೆ ನಾಲ್ಲಾಡ್ ಸುಬೇದಾರ್ ಮಾತಂಡ ಅಪ್ಪಚ್ಚಣ್ಣ ಅಂವಂಡ ಅಭಿಪ್ರಾಯಕ್ ಅಯೆಚಿತ್.

'ಪಂಡ್ ಮೂಳೆರ ಉತ್ತ, ಮೇರಿಯಂಡ ಬದ್ತು, ಮೇಕತಂಡ ಚೋಟು ಇನ್ನತವು ಕೊಡವ ಜಾತಿನ ಬುಟ್ಟಿತ್ ಬೋರೆ ಮತಕ್ ಪೋನಲ್ಲಿ, ಸುಬೇದಾರ್ ಅಚ್ಚಪ್ಪ ಅಯಿಂಗಕ್ ಅಯಿಂಗಡ ಕುಟುಂಬತರ ಆಸ್ತಿಲ್ ಏದೇ ಪಾಲ್ ಕೊಡ್ತಾಲೆಂದ್, ಅವು ತಂಗಡ ಸ್ವಂತ ಕೆಲಸತಾಂಜ ತಂಗಡ ಬದ್‌ಕ್ ನಡ್ತಂಡಿಯಾಚಿ. ಆನಗುಂಡ್ ಕೊಡವದ ಜಾತಿಪದ್ವತಿ ಕಟ್ಪಾಡಾರ ಪೋಲೆ ಇಕ್ಕ ಸ್ವೀಫನಾಸ್ ಸೋಮಯ್ಯಂಗ್ ತಾಂಡ ಕುಟುಂಬತರ ಮನೆ ಆಸ್ತಿರ ಮೀದ ಏದೇ ಹಕ್ಕ್ ಇಲ್ಲೆ'ಂದ್ ತಾಂಡ ಅಭಿಪ್ರಾಯ ಕೊಡ್ತತ್.

ಈ ಅಭಿಪ್ರಾಯತಾನ ಸಮರ್ಥನೆ ಮಾಡಿಯಂಡ್ ಶಿರಸ್ತೆದಾರ ಮಂಡೇಪಂಡ ತಿಮ್ಮಯ್ಯ, ಕರಣಿಕ ಮೀನಾಕ್ಷಯ್ಯ, ಶಿರಸ್ತೆದಾರ್ ಬುಟ್ಟಿಯಂಡ ನಂಜಪ್ಪ ತಂಗ, ತಂಗಡ ಅಭಿಪ್ರಾಯ ಎಣ್ಣೆಚಿ. ಇಚ್ಚೆಕೆ ಅಲ್ಲತೆ ಸ್ವೀಫನಾಸ್ ಸೋಮಯ್ಯಂಗ್ ಅಳಮಂಡ ಆಸ್ತಿಲ್ ಇಪ್ಪಕ್ ಬುಟ್ಟಕ ಬ್ರಿಟಿಷ 1834ತ್ ಕೊಡಗನ ಪುಡ್‌ಚೆವಕ ಇಲ್ಲಿಯತ ಜನಡ ಜಾತಿ ಪದ್ವತಿ ಸಂಪ್ರದಾಯಕ್ ಅಡ್ಡಿ ಬಪ್ಪುಲೆಂದ್ ಪೊರ್ಡ್‌ಚಿಟ್ಟಿ ಇಸ್ತಿಹಾರ್‌ನಾಮೆಕ್ ವಿರೋಧ ಆಯಿತ್ ಇಲ್ಲಿಯತ ಜನಕ್ ಕಂಪೆನಿ ಸರ್ಕಾರತರ ಮೀದ ವಿಶ್ವಾಸ ಪೋಯಿರುವಾಂದ್ ಒರೇ ಮನೆಲ್ ಕೊಡವ ಮತಾಂತರ ಆನವು ಇಂಜಕ ಅಯಿಂಡೊಳ್‌ಲ ಜಗಳ ಆಪಾಂದ್ ಎಳ್ಳೆಚಿ. ಕ್ಯಾ. ಗಸ್ಪಾರ್ಡ್ ಅಯಿಂಗಡ ಅಭಿಪ್ರಾಯತಾನ ಕೊಡಗರ ಕಮಿಷನರ್ ಮಾರ್ಕ್ ಕಬ್ಬನ್‌ಕ್ ಅಯೆಚಿತ್.



ಡಾ.ಮೂಗ್ಗಿಂಗ್ ಸೋಮಯ್ಯ, ಅಂವಂಡ ಪೊಣ್ಣ್, ಮಕ್ಕ ಪಿಳ್ಳಾ ಬೋರೆ ಪೊಣ್ಣಾಳ ಚೆನ್ನಂಗ್ ದಿನ ವೀರರಾಜೇಂದ್ರ ಪೇಟೆಲ್ ಇಂಜವು ಅಲ್ಲಿಂಜ ಮಡಿಕೇರಿಕ್ ಪೋಚಿ. ಅಲ್ಲಿ ಡಾ.ಮೂಗ್ಗಿಂಗ್ ಕ್ರೈಸ್ತ ಮತತಾರ ದೀಕ್ಷೆ ಕೊಡ್ತತ್. ಸೋಮಯ್ಯಂಡ ಪೊಣ್ಣಾಕ್ ಸಲೋಮ್ ಎಣ್ಣುವ ಪೆದ ಇಟ್ಟತ್. ಡಾ. ಮೂಗ್ಗಿಂಗ್ ಮಡಿಕೇರಿಲ್ ಓರ್ ಪಿಲ್ಲಾರ ಮನೆ ಕಟ್ಟಿಯಂಡತ್. ಚತ್ತೇರ ದಿನ ಪಿಳ್ಳಾ ಕೊಡಗುರ ನಮ್ಮೆ ನಾಳಲ್ ಕ್ರೈಸ್ತಮತತಾರ ಬೋಧನೆಕ್ ಪೋಪ ಇಂಜತ್.

ಇನ್ನನೆ ದಂಡ್ ತಿಂಗ ಕೈಂಜಪಿಳ್ಳಾ ಆ ಕಾಲ ಜೂನ್‌ಲ್ 'ಸ್ವೀಫನಾಸ್ ಸೋಮಯ್ಯ ಮತಾಂತರ ಆನಾಂಗ್ ಅಂವಂಡ ಆಸ್ತಿರ ಮೀದೇತ ಹಕ್ಕ್ ಪೋಪುಲೆಂದೂ, ಅಂವಂಡ ಕುಟುಂಬಕಾರಕ್ ಪಿಳ್ಳಾ ಆಸ್ತಿಕ್ ಅಂವ ಮತಾಂತರ ಆನಾಂಗ್ ಹಕ್ಕಿಲ್ಲೆಂದ್ ತೋಂದ್‌ನಕ ಈ ವಿಷಯತಾನ ಸಿವಿಲ್ ಕೋರ್ಟ್ ಮೊಕವ್ವಮೆ ಎಡ್‌ತಂಡ್ ಪೋಯಿತ್ ಅವು ತೀರ್ಮಾನ ಪಡ್‌ಂದವಲೂ'ಂದ್ ಕಮೀಷನರ್ ಸಾಹೇಬ ಓರ್ ಆಜ್ಞಾಪತ್ರ ಪೊರ್‌ಡ್‌ಚಿಟ್ಟಿತ್ ಕೊಡಗುರ ಸೂಪರಿಂಟೆಂಡೆಕ್ ಅಯೆಚತ್.

ಈ ಪೋಲೆ ಎಡೆನಾಲ್ವಾಡ್ ಸುಬೇದಾರ್ ಮೂಲಕ ಸ್ವೀಫನಾಸ್ ಸೋಮಯ್ಯಂಗ್ ಅಂವಂಡ ಆಸ್ತಿ ಪಿಳ್ಳಾ ಮನೆನ ಕೊಡ್‌ಪ್‌ಚಿಟ್ಟಿತ್. ಆನಗುಂಡ್ ಅವು 1853ನೆ ಇಸವಿ ಜೂನ್‌ಲ್ ತಂಗಡ ಮನೆಕ್ ವಾಪಾಸ್ ಪೋಚಿ. ಡಾ. ಮೂಗ್ಗಿಂಗ್ ಸೋಮಯ್ಯಂಡ ಮನೆರ ಪಕ್ಕ ವಾಸಕ್ ಬಾತ್. ಮಳೆಗಾಲ ಕೈಂಜನ್ನಕೆ ಮೂಗ್ಗಿಂಗ್ ಸ್ವೀಫನಾಸ್ ಸೋಮಯ್ಯಂಡ ಮನೆರ ಪಕ್ಕತ ಓರ್ ಪರಂಬ್‌ಲ್ ಚೆರಿಯ ಓರ್ ಚರ್ಚ್ ಪಿಳ್ಳಾ ತಾಂಡ ವಾಸಕ್ ಓರ್ ಮನೆ ಕಟ್ಟುವಕ್ ಸುರು ಮಾಡ್‌ಚಿ. ಈ ದಂಡ್ ಕಟ್ಟಡತಾರ ಕೆಲಸ ಮಾಡಿಯಂಡ್ ಇಂಜ ಅಳಮಂಡ ಜಮ್ಮಪೊಲೆಯಡ ಎಟ್ತ್ ಕುಟುಂಬಕ್ ಸೇರ್‌ನ 130 ಜನ ಪ್ರಾಟೆಸ್ಟೆಂಟ್ ಕ್ರೈಸ್ತ ಮತತಾನ ಪಾಲನೆ ಮಾಡ್‌ಚಿ. ಅಲ್ಲಿಂಜ ಮೋದೂರ್ ಊರರ ಮನ್ನಾಲಚಂಡ ಪೂವಕ್ಕ ಪಿಳ್ಳಾ ಅವಡ ಮೋಂವ ಪೊನ್ನಪ್ಪ ಕ್ರೈಸ್ತ ಮತ ದೀಕ್ಷೆ ಪಡ್‌ಂದತ್.

ಅಳಮಂಡ ಜಮ್ಮ ಪೊಲೆಯ ತಂಗ ಕ್ರೈಸ್ತಂಗ ಆನಪಿಳ್ಳಾ ಅಲ್ಲಿ ಪಂಡೇತಾರನ್ನಕೆ ಗುಲಾಮಂಗಲಾಯಿತ್ ಅಳಮಂಡ ಮನೆರ ಕೆಲಸ ಮಾಡುವಕ್ ಇಷ್ಟ ಪಟ್ಟೆಲೆ. ಆನಗುಂಡ್ ಮೂಗ್ಗಿಂಗ್ ಕೊಡಗುರ ಸೂಪರಿಂಟೆಂಡೆಂಟ್‌ಕ್ ಅರ್ಜಿ ಎಲ್ಲಿತ್ ಅಮ್ಮತ್ತಿನಾಡಲ್ ಅವು ನೆಲೆ ನಿಪ್ಪಕ್, ಅಯಿಂಗಡ ಬದ್‌ಕ್ ಓರ್ ಕಾಫಿ‌ತೋಟತನ ಮಾಡುವಕ್ 1856ತ್ ಸುಮಾರ್ 97 ಎಕ್ರೆ ಕಾಡ್‌ಜಾಗ ಪಡ್‌ಂದತ್. ಈ ಜಾಗತ್ ದುಂಬ ಪುಂಡ ಇಂಜಂಡ್ ಈ ಜಾಗ ಮಾರಪನಿರ ಮೂಲಸ್ಥಾನ ಪಿಳ್ಳಾ ಕೂಳಿ ಮಾರಿಯಡ ಜಾಗಾಂದ್ ಕಟ್ಟಿ ಪೆದ ಪಡ್‌ಂದಿತಿಂಜತ್. ಇಲ್ಲಿಕ್ ಡಾ. ಮೂಗ್ಗಿಂಗ್‌ರ ಆಧ್ಯಾತ್ಮಿಕ

ಮೋಂವ, ರೆವರೆಂಡ್ ಹರ್ಮನ್ ಆನಂದರಾವ್ ಕೌಂಡಿನ್ಯ 1857ತ್ ಬಂದಿತ್ ಕಾಡ್ ಕೆತ್ತಚಿಟ್ಟಿತ್ ಮತಾಂತರ ಆನ ಅಳಮಂಡ ಪೊಲೆಯಳ ಆಕ್ಚಿ. ಇದೇ 'ಆನಂದಪುರ'. ಇಚ್ಚೆಕೆ ಅಲ್ಲತೆ ಓರ್ ಕಾಲತ್ ಇಲ್ಲಿ ಓರ್ ಚರ್ಚ್‌ನ ಕೆಟ್ಟಚಿಟ್ಟಿತ್ ಆನಂದಪುರ ಕಾಫಿ ತೋಟಂದ್ ಮಾಡ್ಚಿ. ಅವಂಡ ಈ ಎಲ್ಲ ಕೆಲಸ ಕಾರ್ಬಾರ್ಕ್ ಸ್ಪೀಫನಾಸ್ ಸೋಮಯ್ಯ ಪಿಳ್ಳಾ ಮತಾಂತರ ಆನ ಪೊಲೆಯ ದುಂಬ ಸಹಾಯ ಮಾಡ್ಚಿ.

ಈ ನೇರತ್ ಡಾ. ಮೂಗ್ಗಿಂಗ್ ಮಡಿಕೇರಿಲ್ ನೆಲೆ ನಿಂದಿತ್ ಅಲ್ಲಿ ಸರ್ಕಾರತ್ ಒಪ್ಪಿಗೇಲ್ ತೊರಂದ ಲೋವರ್ ಸೆಕೆಂಡರಿ ಸ್ಕೂಲ್‌ರ ಪ್ರಿನ್ಸಿಪಾಲ್ ಆಚಿ. ಅವ ಕೊಡಗಲ್ ಬಾಸೆಲ್ ಮಿಷನ್‌ರ ಆಶ್ರಯತ್ ಮತಪ್ರಚಾರ ಮಾಡಿಯಂಡ್ ಇಂಜಕೊ ಅಯಿಂಗಳುಂಡ್ ವಿರ್ಚ್‌ಕ್ ಪಣ ಬಪ್ಪ ಇಂಚ್‌ಲೆ. ಆನಗುಂಡ್ ಅವ ಜರ್ಮನ್ ಪಿಳ್ಳಾ ಇಂಗ್ಲೀಷ್‌ಲ್ ಕೊಡಗುರ ಚರಿತ್ರೆ, ಜನಡ ಬದ್‌ಕ್, ವಾತಾವರಣ, ಬೊಳ್ ಇನ್ನತಾಂಡ ಮೀದ ವಿಷಯ ಅರಂಜಂಡ್ ಕೊಡಗುರ ವತ್ತಾಂತ (Coorg Memoirs) ಎಣ್ಣುವ ಪುಸ್ತಕ ಎಳ್ಳೆಚಿ. ಕೊಲ್ಕತ್ತಾ ರಿವ್ಯೂ ಪಿಳ್ಳಾ ಚೈನ್ನೆ ಕ್ರಿಶ್ಚಿಯನ್ ಪತ್ರಿಕೆಕ್ ಕೊಡಗುರ ಮೀದ ಪಿಳ್ಳಾ ಇಲ್ಲಿಯತ ಕ್ರೈಸ್ತ ಮತಾಂತರ ಕಾರ್ಬಾರ್‌ರ ಮೀದ ಎಳ್ಳೆಚಿ. ಅವಂಡ ಈ ಎಳ್ಳೆಕೆಲ್ಲ ಸರ್ಕಾರ, ಪತ್ರಿಕೆಕಾರ ಪಿಳ್ಳಾ ದಾನಿಯ ಪಣ ಕೊಡ್‌ತತ್. 1856ತ್ ಓರ್ ಕ್ರೈಸ್ತ ವಿಧವೆನ ಮಂಗಲಾಚಿ. 1860ತ್ ಪೊಣ್ಣ್‌ನ ಆರೋಗ್ಯತ್‌ರ ಮೀದ ಜರ್ಮನಿಕ್ ಅಯೆಚದು, ತಾನೂ ಚೆನ್ನಂಗ್ ಸಮಯತ್ ಅಲ್ಲಿಕ್ ಪೋಯಿತ್ ಚತ್‌ಪೋಚಿ.

ಆನಂದಪುರತ್ ಆನಂದರಾವ್ ಕೌಂಡಿನ್ಯ ಪಿಳ್ಳಾ ಸ್ಪೀಫನಾಸ್ ಸೋಮಯ್ಯಂಗ್ ಸೆರಿಬರತೆ ಸ್ಪೀಫನಾಸ್ ಅಳಮಂಡ ಮನೆಕ್ ವಾಪಾಸಾಚಿ. ಅಕ್ಚ ಆನಂದಪುರತ್ 25 ಏಕ್ರೆ ಕಾಫಿ ತೋಟ ಇಂಜತ್. ಆಚೇಂಗಿ, ಅಲ್ಲಿಯತ ಪರಿಸರ ಜನಡ ಆರೋಗ್ಯತ್‌ನ ಪಾಳ್ ಮಾಡಿಯಂಡೆ ಬಾತ್. ಕೌಂಡಿನ್ಯಂಡ ಕಾಲ ಕೈಂಜಪಿಳ್ಳಾ ಕನ್ನಡ ಇಂಗ್ಲೀಷ್ ನಿಘಂಟುರ ರೆವರೆಂಡ್ ಕಿಟಲ್, ಸ್ಪೋಕ್ಸ್, ಕಾಫೊಮ್ಯಾನ್ ಇನ್ನತವೆಲ್ಲ ಧರ್ಮಗುರುವಳಾಯಿತ್ ಇಲ್ಲಿ ಕಾರ್ಬಾರ್ ಮಾಡ್ಚಿ. ತಂಗಡ ಅನಾರೋಗ್ಯತ್ ಚೆನ್ನಂಗಾಳ್ ಚತ್ತಕ, ಇಳ್ಳಿ ಚೆನ್ನಂಗಾಳ್ ಜಾಗ ಬುಟ್ಟತ್. ಈ ಜಾಗ ಬಲ್ಲೋರ್ ಬರ್ಕತ್ ಕಂಡ್‌ಲೆ.

1855ತ್ ಮಡಿಕೇರಿಲ್ ಪ್ರಾಟೆಸ್ಟೆಂಟ್ ಕ್ರೈಸ್ತ ಮತ ಪ್ರಚಾರ ಸುರುವಾಚಿ. ತಂಗಡ ಪ್ರಾರ್ಥನೆಕ್ ಸೈಂಟ್ ಮಾರ್ಕ್ಸ್ ಚರ್ಚ್‌ನ ರಾಜಂಡ ಕಾಲತ್ ವೀರಭದ್ರ ತಿರಿಕೆನ ಬೂಕಿತ್ ಅದೇ ಜಾಗತ್ ಕೆಟ್ಟಚಿ.

## ಚಿಕ್ಕವೀರರಾಜೇಂದ್ರಂಡ ಅಂತ್ಯ

ರಾಜ ಕಾಶಿಲ್ ಇಪ್ಪಕ 1849ತ್ ಪೀರೋಜಿ ಎಣ್ಣುಪ ಚಿತ್ರ ಬುಡ್ತುವ ಕಲಾವಿದ ಕೊಡಗಂಜ ರಾಜಂಡ ಪಕ್ಕ ಬಾತ್. ರಾಜ ಕೊಡಗಲ್ ಇಪ್ಪಕ ಪೀರೋಜಿರ ಅಪ್ಪ ಗಂಗೋಜಿ ರಾಜಂಡ ಆಸ್ಥಾನತ್ ಚಿತ್ರಗಾರ. ಆನಗುಂಡ್ ರಾಜ ದುಂಬ ವಿಶ್ವಾಸತ್ ತಾಂಡ ಕೊದಿಮೋವ ಗೌರಮ್ಮಂಡ ಕೂಡ ಇಂಗ್ಲೆಂಡ್‌ಕ್ ಪೋಪಾಂಗ್ ಮುಪ್ಪಡೆ ಕೊಡಗಂಜ ವಾಲಗಕಾರಳ, ರಾಣಿವಾಸತ್‌ರ ಪಾರಕಾರ, ಪೀರೋಜಿರ ಅಪ್ಪ ಗಂಗೋಜಿನ ಕೂಟಿಯಂಡ್ ಬರೊಂಡೂಂಡ್ ಪೀರೋಜಿನುಂಡ್ ಕಾಗದ ಎಳ್ಳೆಚಿಟ್ಟತ್. ಇದ್‌ನ ರಾಜ ತಾಂಡ ಮೇಲ್ವಿಚಾರಕ ಕ್ಯಾ.ಮೆಕ್ ಗ್ರೆಗರ್‌ರ ಮೂಲಕ ಕೊಡಗರ ಸೂಪರಿಂಟೆಂಡೆಂಟ್‌ಕ್ ಅಯೆಚತ್.

ತಾಂಗ್ ಈಸ್ಟ್‌ಇಂಡಿಯಾ ಕಂಪೆನಿಂಜ ಇಂಗ್ಲೆಂಡ್‌ಕ್ ಪೋಪಕ್ ಒಪ್ಪಿಗೆ ಕೊಟ್ಟನದೆ ರಾಜ ತಾಂಡ ಕೊದಿಮೋವ ಗೌರಮ್ಮ, ರಾಣಿಯಳಾನ ಮುದ್ದುವೀರಮ್ಮ ಪಿಳ್ಳಾ ಸಿದ್ದವೀರಮ್ಮ ಪಿಳ್ಳಾ ಚೆನ್ನಂಗ್ ಪರಿಚಾರಕಳ ಕೂಟಿಯಂಡ್ ಕಾಶಿಂಜ ಕೊಲ್ಕತ್ತಾಕಾಲೆ ಲಂಡನ್‌ಕ್ ಪೊರ್‌ಟತ್. ರಾಜಬಂಧಿ ಆನಾನುಂಡ್ ಅವಂಡ ಕೂಡ ಮೇ. ಡ್ರಮ್ಮಂಡ್ ಪಿಳ್ಳಾ ಪೊಣ್ಣ್‌ನ ಅಯೆಚತ್. ಆನಗುಂಡ್ ಮೇಜರ್‌ರ ಓರ್ ಕಾಲತ್‌ರ ಸಂಬಳ ಪಿಳ್ಳಾ ಅಯಿಂಗಡ ಪ್ರಯಾಣ ಖರ್ಚ್‌ಂದ್ ಒಟ್ಟು 1,376 ಪೌಂಡ್ ಪಣತ್‌ನ ಕಂಪೆನಿ ಸರ್ಕಾರಕ್ ಕೊಡ್‌ಕಂಡಿಯಾಚಿ.

ಚಿಕ್ಕವೀರರಾಜೇಂದ್ರ ತಾಂಡ ಮೋವ, ರಾಣಿ ಪಿಳ್ಳಾ ಕೂಟಾಕಾರಡ ಕೂಡೆ ಲಂಡನ್ ಪಟ್ಟಣತ್‌ನ 1852ನೆ ಮಾರ್ಚ್‌ಲ್ ಎತ್ತ್‌ಚಿ. ಹಿಂದೂಸ್ಥಾನತ್‌ಂಜ ಇಕ್ಕಾಕಣೆ ಏದೆ ಓರ್ ರಾಜ ಲಂಡನ್‌ಕ್ ಪೋಕತೆ ಇಂಜಾನುಂಡ್ ವೀರರಾಜೇಂದ್ರನೆ ಆದ್ಯ ಪೋನ ರಾಜಾಂದ್ ಅವಂಗ್ ಈಸ್ಟ್‌ ಇಂಡಿಯ ಕಂಪೆನಿರ ಡೈರೆಕ್ಟರ್ಸ್ ಗೌರವತ್ ತಕ್ಕಾರ ಮಾಡ್‌ಚಿ. ಅವನ ಗೆಡಿ ಗೆಡಿ ಉಂಬಕ್ ಕಾಕೆಚಿಟ್ಟಂಡ್ ತಂಗಡ ಸಿನೇತಂದ್ ಬಲ್ಯ ಪಣಕಾರಡ ಕೂಡೆ ಪರಿಚಯ ಮಾಡಿಯಂಡತ್.

ರಾಜ ಲಂಡನ್‌ಲ್ ವಾಸ ಮಾಡುವಕ್ ಸುರು ಮಾಡಿತ್ ದಂಡ್ ತಿಂಗ ಕೈಂಜದು ಇಂಗ್ಲೆಂಡ್‌ರ ವಿಕ್ಟೋರಿಯಾ ಮಹಾರಾಣಿ ತಾಂಡ ಮೋವ ಗೌರಮ್ಮಳ ಎಡ್‌ತಂಡ್ ಅವಕ್ ಕೈಸ್ತಮತ ದೀಕ್ಚೆ ಕೊಡ್‌ತಿತ್ ಓದ್‌ಚಿಡೊಂಡೂಂಡ್ ಓರ್ ಉದ್ದತ್‌ರ ಕಾಗದ ಎಳ್ಳೆಚಿ.

ಅದೇ ಕಾಲ ಜೂನ್ 30ಂಗ್ ವಿಂಡ್ಸರ್ ಅರಮನೆರ ಚರ್ಚಲ್ ರಾಜಕುಮಾರಿ



ಗೌರಮ್ಮಂಗ್ ಕ್ಯಾಂಟರ್‌ಬರಿ ಆರ್ಚ್ ಬಿಷಪ್ ಕ್ರೈಸ್ತಮತ ದೀಕ್ಷೆ ಕೊಡ್ತತ್. ವಿಕ್ಟೋರಿಯಾ ರಾಣಿ ಗೌರಮ್ಮ ರಾಜಕುಮಾರಿಕ್ ಧರ್ಮತರ ಅವ್ವನಾಯಿತ್ ನಿಂದಿತ್, ಅವಳ 'ರಾಜಕುಮಾರಿ ವಿಕ್ಟೋರಿಯ ಗೌರಮ್ಮ'ಂದ್ ಕಾಕ್‌ಚಿ. ಈ ಸಮಾರಂಭಕ್ ರಾಜ ಬಂದಿತಿಂಜತ್. ಮಹಾರಾಣಿ ವಿಕ್ಟೋರಿಯ ಗೌರಮ್ಮನ ಮೇ. ಡ್ರಮ್ಮಂಡ ಪೊಣ್ಣರ ಆರೈಕೆಲ್ ಆಕಿತ್ ಅವಡ ವಿದ್ಯಾಭ್ಯಾಸಕ್ ಏರ್ಪಾಡ್ ಮಾಡ್‌ಚಿ.

ಕಂಪೆನಿ ಸರ್ಕಾರ ಚಿಕ್ಕವೀರರಾಜೇಂದ್ರಂಗ್ ಕೊಡ್‌ಪ ಇಂಜ ಅಂಜಾಯಿರ ಉರ್‌ಪಿಯತ್ ನಾನೂರ್ ಉರ್‌ಪಿಯತ್‌ನ ರಾಜಕುಮಾರಿನ ಚಾಕುವಕ್ ಪಿಳ್ಳಾ ಓದ್‌ಚಿಡುವಕ್‌ಂದ್ ಕೊಡ್‌ತತ್. 1858ಂಗೆತ್ತಣೆ ಮೇ.ಡ್ರಮ್ಮಂಡ್ ಆರೈಕೆಲ್ ಇಂಜ ಗೌರಮ್ಮನ ಅಲ್ಲಿಂಜ ಲೇಡಿ ಲೋಗನ್‌ರ ಆರೈಕೆಕ್ ಅಯೆಚತ್.

ಲೇಡಿ ಲೋಗನ್ ಪಿಳ್ಳಾ ವಡಿಯ ಸರ್‌ಜಾನ್ ಲೋಗನ್ ಅಯೋಧ್ಯೆ ನವಾಬ್‌ರ ಆಸ್ಥಾನತ್ ದುಂಬ ಕಾಲತಿಂಚೆ ಹಿಂದೂಸ್ಥಾನತ್‌ರ ತಕ್ಕ್, ರೀತಿ ನೀತಿನ ಅರಾಂಜಪು. ಆಚೇಂಗಿ, ವಿಕ್ಟೋರಿಯ ಗೌರಮ್ಮನ ಮಹಾರಾಣಿ ಇಂಗ್ಲೀಷ್ ವಾತಾವರಣತೆ ಬೊಳ್‌ತುವಕ್ ಬಯಂದಾಂಗ್ ರಾಜಕುಮಾರಿನ ಅಪ್ಪಂಡ ಕೂಡೆ ಇಪ್ಪಕ್ ಬುಟ್ತ್‌ಲೆ. ಓರಮ್ಮತೆ ಅವ ತಾಂಡ ಅಪ್ಪನ ಕಾಂಬ ಇಂಜತ್. ಆನಗುಂಡ್ ಗೌರಮ್ಮಂಗ್ ಇಂಗ್ಲೆಂಡ್‌ಕ್ ಪೋಯಿತ್ ದಂಡ್ ಕಾಲತೆ ಹಿಂದೂಸ್ಥಾನಿ ತಕ್ಕ್ ಮರ್‌ಂದ್ ಪೋಚಿ! ಅಪ್ಪ ವೀರರಾಜೇಂದ್ರಂಗ್ ಇಂಗ್ಲೀಷ್ ಗೊತ್ತಿಂಚ್‌ಲೆ. ಆನಗುಂಡ ಮೋವ, ಅಪ್ಪಂಡ ಕೂಡೆ ಇಂಗ್ಲೀಷ್ ಪಿಳ್ಳಾ ಹಿಂದೂಸ್ಥಾನತೆ ತಕ್ಕ್ ಪರೆಯುವ ಇಂಜತ್. ರಾಜ ತಾಂಡ ಬದ್‌ಕಡಿ ಮೋವಳ ಕೊದಿಲೆ ಕಾಂಬ ಇಂಜತ್.

ಚಿಕ್ಕವೀರರಾಜೇಂದ್ರ ಲಂಡನ್ ಎತ್ತಿತ್ ಚೆನ್ನಂಗ್ ತಿಂಗತೆ ಚಾನ್ಸರಿ ಕೋರ್ಟ್‌ಲ್, ತಾಂಡ ಬಲ್ಯಪ್ಪ ದೊಡ್ಡ ವೀರರಾಜೇಂದ್ರ ಒಡೆಯ ಕಂಪೆನಿ ಸರ್ಕಾರತ್ ನಿರ್ಕ್ ಠೇವಣಿ ಆಯಿತ್ ಬೆಚ್ಚಿತಿಂಜ ಪಣ ಪಿಳ್ಳಾ ಅದ್‌ಂಡ ದುಂಬಾ ಕಾಲತ್‌ರ ಬಡ್ತಿಪಣತ್‌ನ ಕಂಪೆನಿ ಸರ್ಕಾರ ತಾಂಗ್ ತರೊಂಡೂಂದ್ ವ್ಯಾಜ್ಯ ಇಟ್ಟತ್.

ಅದ್‌ನ ಕೋರ್ಟ್‌ಕಾರ ಹಿಂದೂಸ್ಥಾನ ಸರ್ಕಾರತ್‌ರ ಅಭಿಪ್ರಾಯ ಪಿಳ್ಳಾ ಜವಾಬ್‌ಕಾಯಿತ್ ಅಯೆಚತ್. ಈಂಡ ಪತ್ರ ವ್ಯವಹಾರ ಸುಮಾರ್ ಕಾಲಕೆತ್ತನೆ ನಡ್‌ಂದತ್. ಈಂಡ ಸಮ್ಮಂಧ ರಾಣಿ ದೇವಮ್ಮಾಜಿ ಪಿಳ್ಳಾ ಬೋರೆ ರಾಜಕುಟುಂಬಕಾರ ಕೊಲೆರ ಮೀದ ಅರಿವಕ್ ಚೆನ್ನೈ ಸರ್ಕಾರ ತಂಗಡ ಮುಖ್ಯ ನ್ಯಾಯವಾದಿ ಸ್ಥಿತನ ಬೆಂಗಳೂರ್ ಪಿಳ್ಳಾ ಮಡಿಕೇರಿಕ್ ಅಯೆಚತ್. ಆಚೇಂಗಿ, ಸ್ಥಿತ್ ಮಡಿಕೇರಿಕ್ ಬಂದಾಂಗ್ ರೆಕಾರ್ಡ್ ಇಂಚ್‌ಲೆ. ಮಡಿಕೇರಿರ ಸೂಪರಿಂಟೆಂಡೆಂಟ್ ದೇವಮ್ಮಾಜಿರ ಕೊಲೆರ ವಿಷಯ



ಅರಂಜ ಜನಳುಂಡ್ ಹೇಳಿಕೆ ಪಡ್ಂದಂಡ್ ಅಯೆಚಿಕೊಡ್ತತ್.

ಈಂಡೆಡೆಲ್ ವೀರರಾಜೇಂದ್ರ ವ್ಯಾಜ್ಯ ತೇರುವಾಂಡ ಒಳ್ಳಲ್ ತನ್ನ ಹಿಂದೂಸ್ಥಾನಕ್ ವಾಪಾಸ್ ಬಪ್ಪಕ್ ಒರಾತ ಮಾಡುವ ಕಯ್ಯ, ತಾನ್ ರಾಜತ್ವ ಕಳಂದಂಡ್ ಬ್ರಿಟಿಷಡ ಕೂಡೆ ನಡ್ಂದಂಡಾನ ನೋಟಿತ್ ತಾಂಡ ಮೀದ ಉಳ್ಳ ನಿರ್ಬಂಧ ಎಡ್ಕೊಂಡು ಪಿಳ್ಳಾ ಹಿಂದೂಸ್ಥಾನತ್ ಉಳ್ಳ ತಾಂಡ ಪೊಣ್ಣ್, ಮಕ್ಕಳ ಅಯಿಂಡ ಯೋಗ್ಯತೆಕ್ ಸೆರಿಯಾಯಿತ್ ಬದ್ಕ ನಡ್ತುವಕ್ ಅಯಿಂಗಕ್ ಭೂಮಿನ ಬಣ್ಣೆ ಕೊಡ್ಕೊಂಡುಂಡ್ ವಿಕ್ಟೋರಿಯ ರಾಣಿಕ್ ಓರ್ ಅರ್ಜಿ ಕೊಡ್ತತ್.

ಈ ಅರ್ಜಿ ಪಿಳ್ಳಾ ವ್ಯಾಜ್ಯತ್ ಕಾಗದ ಇಂಗ್ಲೆಂಡ್ ಪಿಳ್ಳಾ ಹಿಂದೂಸ್ಥಾನ ಸರ್ಕಾರತ್ ಆಫೀಸ್‌ಲ್ ಓಡಿಕಳಚಂಡ್ ಇಪ್ಪಕ ಸಿಪಾಯಿದಂಗೆ / ಆದ್ಯತ ಸ್ವಾತಂತ್ರ್ಯ ಸಂಗ್ರಾಮ ನಡ್ಂದಿತ್ ಹಿಂದೂಸ್ಥಾನತ್ ರಾಜ್ಯಭಾರತ್ ಜವಾಬ್ದಾರಿನ ವಿಕೋರಿಯ ಮಹಾರಾಣಿ ಈಸ್ಟ್ ಇಂಡಿಯಾ ಕಂಪೆನಿ ಸರ್ಕಾರ ಡೈರೆಕ್ಟರ್ಸ್‌ಳುಂಡ್ ಪಹಿಸಿಯಂಡಿಂಜತ್. ಆನಗುಂಡ್ ವ್ಯಾಜ್ಯ ಪಿಳ್ಳಾ ಮನವಿರ ತೀರ್ಮಾನ 1858ತ್ ಮಿಳ್ಳಾಕ್ ಪೋಕಣೆ ರಾಜಂಗ್ ಕಯ್ಯತಾಚಿ.

ತಾಂಡ ಅಪ್ಪಂಗ್ ಸದ್ಯ ಕಯ್ಯತಾಪಕ ಮೋವ ರಾಜಕುಮಾರಿ ವಿಕೋರಿಯ ಗೌರಮ್ಮ ಲೇಡಿ ಲೋಗಿನ್‌ರ ಕೂಡೆ ಬಂದಿತಿಂಜತ್. ಆ ನೇರತ್ ಅಪ್ಪ ತಾಂಡ ಕೊದಿ ಮೋವಕಾಯಿತ್ ಎಡ್ತ್ ಚೆಚ್ಚಿತಿಂಜ ಮಾಲ್‌ರ ಕೆಟ್ನ ಕೊಡ್ತತ್. ರಾಜ 1859ನೆ ಸೆಪ್ಟೆಂಬರ್ 24ಂಗ್ ಸ್ವರ್ಗವಾಸಿ ಆಪಕ ಮೋವ ದೂರತ ವೈಟ್ ದ್ವೀಪತ್ ಇಂಜಾನುಂಡ್ ಅವಕ್ ಅಪ್ಪಂಡ ಆಖೀರಿ ಕಾರ್ಬಾರ್‌ಕ್ ಬಂದೆತ್ತುವಕ್ ಕಯ್ಯತಾಚಿ.

ತಾನ್ ಚಾವಾಂಗ್ ನಾಲ್ ದಿನಕ್ ಮುಪ್ಪಡೆ ರಾಜ ಓರ್ ಮರಣಶಾಸನ ಎಳ್ವಚಿಟ್ಟಿತ್ ಅದತ್ ತಾಂಡ ಸೈನ್‌ಟಿತ್ ಕಾರ್ಬಾರ್ ನೀಸುವಕ್ ರಾಬರ್ಟ್ ಮಾಂಟಗೋಮರಿ ಮಾರ್ಟಿನ್ ಪಿಳ್ಳಾ ಸರ್ ಚಾನ್ ಲೋಗಿನ್ ಎಣ್ಣುವಯಿಂಗಳ ನೇಮಕ ಮಾಡ್ಚಿ. ಆಚೀಂಗಿ, ರಾಜ ಚಾವಕ ಮಾರ್ಟಿನ್ ಮಾತ್ರ ಪಕ್ಕತಿಂಜಾನುಂಡ್ ರಾಜಂಡ ಕಾರ್ಬಾರ್ ನಡ್ತ್‌ಚಿ. ಈ ಕಾರ್ಬಾರ್‌ರ ಮೀದ ಮಾರ್ಟಿನ್, ಹಿಂದೂಸ್ಥಾನ ಸರ್ಕಾರತ್ ಕಾರ್ಯದರ್ಶಿಕ್ ಎಳ್ವನ ಕಾಗದ ಈ ಪೋಲೆ ಉಂಡ್.



*R. Montgomery Martin, Esqr to the Secretary of State for India, dated 1st October 1859.*

Sir,

I beg to inform you for the information of the Council of India, that the ex-Rajah of Coorg died in London on the 24th ultimo. A few hours before his death I was written to by his solicitors & informed of his approaching demise; they also stated that they had in their possession a will, & that I was named as one of the executors & they further informed me that a considerable amount of property had already been carried off from the house of the dying prince; that there was a large mass of jewels still in the house, which they feared would be abstracted & they requested my advice on the subject. I replied that no information had previously been given to me about the will; that the Rajah had often sought my advice on his affairs: but if the solicitors were certain that I was named as an executor along with Sir John Login (who was not in London) they had my orders to secure all the property of the Rajah & to place a seal upon it. On my arrival in London the Rajah was dead. I secured as much of the property as I could find, placed on it the seals of the solicitors & described by Ryder & Hancock, the jewellers. The jewels are now deposited under seal, in the fireproof department of London & Westminster Bank, Lothbury. There being no one to act, I undertook the interment of the Rajah, who died from a lingering disease of the liver & lungs, latterly indeed, he refused sustenance & expressed his disinclination to life. I have had his body placed in a lead & oak coffin in No.1 of the unconsecrated catacombs at Kensal Green Cemetery. The funeral was conducted in a manner befitting the rank of the deceased: a portion of the beautiful burial service of the Church of England was read in the chapel to a large auditory, by the Rev. W.Arthur,

now Secretary to the Wesleyan Mission in London, formerly a missionary in Mysore & conversant in the language of the Raja (Canarese). Mr. Arthur who had been intimately acquainted with the Raja for many years & knew his favourable opinions with regard to Christianity (though he had not been baptized) felt justified in the permanence of a funeral service address to the congregation & most solemn prayer for the soul of the deceased, prefaced, however by the clear declaration that the Rajah was not claimed as a convert to Christianity, but that he was as an exile, who had died in a foreign land. The service gave great satisfaction to the audience. I send by the book-post of this date a copy of the presumed will of the ex-Rajah of Coorg There is, however, no time to be lost in securing the property of the deceased prince at Benares for the benefit of all the members of his family. I do not know what may be the amount of that property. I hear of one sum of 11,000 found in money & of a large mass of jewels. some in a large chest in the house of the Rajah at Benares & some buried under or near the house. As I am now acting as executor & contemplate placing the will under the direction of the Court of Chancery to which I will handover the jewels & property now in my possession. I solicit as an act of justice & of humanity that instructions be sent to the Resident at Benares to secure & place under seal the property in the house of the Rajah at Benares & any other property which may be found in India belonging to the estate. These instructions may, I hope, be sent by Marsailles or better still by telegram should the Council of India have any instructions to give me on the subject, they Shall be promptly attended to. I trust that the Secretary of State for India will deem that I have fulfilled my duty.

ಚಿಕ್ಕವೀರರಾಜೇಂದ್ರ ಒಡೆಯ ಚಿತ್ತಸುದ್ದಿನ ಅವಂಜ ಕಾರ್ಯದರ್ಶಿ ಜಾನ್ ಬೇಮ್ಸ್



ಬಿರ್ಕೆಟ್ ಕಾಶಿಲ್ ಇಂಜ ರಾಜಂಡ ಪೆರಿಯ ಮಹಾರಾಣಿ ಗಂಗಮ್ಮಾಜಿಕ್ ಅಕ್ಟೋಬರ್ 24ಂಕ್ ಎಲ್ವಿತ್ ಅರಿಚಿಟ್ಟಿತ್.

ಈ ಸುದ್ದಿ ಕೇಟದೆ ಅವಳೊ, ಇಇಷ್ಟೋರ್ ರಾಣಿ ದೇವಮ್ಮಾಜಿ ಅಫೀಮ್ ಎಡ್ತಂಡ್ ಸ್ವ ಇಚ್ಚೆಲ್ ಸ್ವರ್ಗವಾಸಿಯಾಚಿ. ಆ ನೇರತ್ ಕಾಶಿಲ್ ಮೂಂದನೆ ಮಹಾರಾಣಿ ನಂಜಮ್ಮಾಜಿ, ರಾಜಂಡ ಆರ್ ರಾಣಿಯ, ಏಳ್ ಮೋನೆಯ ಪಿಳ್ಳಾ ಮೂಂದ್ ಮೋಳಿಯ ಇಂಜತ್.

ರಾಜಂಡ ಚಾವುನ 1859ತ್ಂಜ ತಾತ್ಕಾಲಿಕ ಆಯಿತ್ ಲಂಡನ್‌ರ ಕನ್ನಾಲ್ ಗ್ರೀನ್ ಸಮಾಧಿಲ್ ಬೆಚ್ಚಿತಿಂಜತ್. ಅಲ್ಲಿಂಜ 1861ತ್ ಲೇಡಿ ಮಿಲ್‌ವಿಲ್ ಎಣ್ಣುವ ಹಡಗ್‌ಲ್ ಕೊಲ್ಕತ್ತಾಕ್ ಕೊಂಡಬಾತ್. ಅಲ್ಲಿಂಜ ಕಾಶಿಕ್ ನೆಲಮಾರ್ಗತ್ ಬಂದಿತ್ ಜೂನ್ 24ಂಕ್ ವೀರಶೈವ ಮತಕೊತ್ತನ್ನೆ ಸಮಾಧಿ ಮಾಡಿತ್ ಅದೊಂಡ ಮೀದ ಓರ್ ಗೋರಿನ ಕೆಟ್ಟೊಚಿಟ್ಟಿತ್. ಇನ್ನೆ ಕೊಡಗ್ ರಾಜಂಡ ಸಮಾಧಿ ಕಾರ್ಯಕ್ ಉ. 2,500 ಬಿರ್ಚ್ ಆನಾನ್ ಹಿಂದೂಸ್ಥಾನತ್‌ರ ಬ್ರಿಟಿಷ್ ಸರ್ಕಾರ 1861ನೆ ಏಪ್ರಿಲ್ 13ಂಕ್ ಮಂಜೂರ್ ಮಾಡ್‌ಚಿ.

ರಾಜ, ತಾನ್ ಚಾವಾಂಗ್ ನಾಲ್ ದಿನಕ್ ಮುಪ್ಪಡೆ ಎಲ್ವಿಬೆಚ್ಚಿ ಮರಣಶಾಸನತ್‌ರ ಪೋಲೆ ಅಂವಂಡ ಪಣ ಪಿಳ್ಳಾ ಸಾಮಾನ್ ಸಾಹಿತ್ಯತ್‌ನ ಕೊಡ್‌ತತ್. ಈಂಡೆಡೆಲ್ ರಾಜ ತಾಂಡ ಬಲ್ಯಪ್ಪ ದೊಡ್ಡವೀರರಾಜೇಂದ್ರ ಒಡೆಯ ಕಂಪೆನಿಲ್ ಬೆಚ್ಚಿತಿಂಜ ನಿರ್ಕೊ ಪಣತ್‌ರ ಅಸಲ್‌ನ ಬಡ್ತಿ ಸಮೇತ ತಾಂಗ್ ತರೊಂಡೊಂದ್ ಕಂಪೆನಿ ಸರ್ಕಾರತ್‌ರ ಮೀದ ಇಟ್ಟಿತಿಂಜ ವ್ಯಾಜ್ಯ ಇಂಡಿಯಾ ಸರ್ಕಾರಕ್ ಪೋನದ್ ಇಂಗ್ಲೆಂಡ್‌ರ ಶ್ರೀಮಂತಂಗಡ ಸಭೆ (House of Lords)ರ ನ್ಯಾಯಸ್ಥಾನಕ್ ಆಖೀರಿ ತೀರ್ಮಾನಕ್ ಒಪ್ಪೊಚಿಟ್ಟಿತ್.

ಈಂಡೆಡೆಲ್ ಇಂಗ್ಲೆಂಡ್‌ರ ಚಾನ್ಸರಿಕ್ಲೋರ್ ರಾಜ ತಾಂಡದೊಂದ್ ಪಾದ ಮಾಡಿಯಂಡಣ ಉಳ್ಳ ಪಣ ಈಸ್ಟ್ ಇಂಡಿಯಾ ಕಂಪೆನಿ ಸರ್ಕಾರಕ್ ಕೂಡ್‌ನದೊಂದ್ ತೀರ್ಪು ಕೊಡ್‌ತತ್. ಈಂಡ ಮೀದ ರಾಣಿರ ಸರ್ಕಾರ ಚಿಕ್ಕವೀರರಾಜಂಡ ಚಾವು ಆನಪಿಳ್ಳಾ ಕಷ್ಟತ್‌ನ ಅರ್ಂಜಿತ್ ಅಂವಂಡ ಸಂಸಾರಕ್ ಸಹಾಯ ಮಾಡೊಂಡೊಂದ್ ಕೋರ್ಟ್‌ಕ್ ಓರ್ ಮನವಿನ ಕೊಡ್‌ತಿತಿಂಜತ್.

ಆಚೇಂಗಿ, ಇಂಡಿಯಾತ್‌ರ ಗ.ಜನರಲ್ ರಾಣಿ ವಿಕ್ಟೋರಿಯಾ ಸರ್ಕಾರತ್‌ರ ಒಪ್ಪಿಗೆಪೋಲೆ ಕಾಶಿಲ್ ಇಂಜ ಚಿಕ್ಕವೀರರಾಜೇಂದ್ರಂಡ ಕುಟುಂಬಕ್ ಮೂಂದಾಯಿರ ಉರಾಪಿಯ ವೇತನ ಮಂಜೂರ್ ಮಾಡ್‌ಚಿ.

ಲಂಡನ್‌ಲ್ ರಾಜ ಚಾವಕ ಅಂವಂಡ ಮನೆಲ್ ಇಂಜ ದುಡ್ಲ್, ಮಾಲ್‌ಮಟ, ಏರ ಕ್ರಯತ್‌ರ ಬಟ್ಟೆ ಬರಲ ಅಂದಾಚ್ 1,73,189.20 ಉರ್‌ಪಿಯ ಇಂಜತ್. ಕಾಶಿಲ್ ಇಂಜ ರಾಜ ಕುಟುಂಬತ್‌ರ ಪಣ ಪಿಳ್ಳಾ ಬೋರೆ ಸಾಮಾನ್‌ರ ಕ್ರಯ 1,78,227.11. ಈ ದಂಡಾನೊ ತಂಗಕ್ ನ್ಯಾಯ ಆಯಿತ್ ಪಾಲ್‌ಟ್ಲಿ ತರೊಂಡೊಂದ್ ರಾಜಂಡ ರಾಣಿಯ ಪಿಳ್ಳಾ ಮಕ್ಕ ಇಂಗ್ಲೆಂಡ್‌ರ ಚಾನ್ಸರಿ ಕೋರ್ಟ್‌ಕ್ ಅರ್ಜಿ ಇಟ್ಟಿತ್. ಈ ಪೋಲೆ ಕೋರ್ಟ್ ತಂಗಕ್ ನ್ಯಾಯ ಕಂಡ್ ಬಂದನ್ನೆ ಪಣತಾನ ಪಾಲ್‌ಟ್ಲಿ ಕೊಡ್‌ತತ್.

1858ತ್ ರಾಜಂಡ ಕಣ್ಣಿಮಕ್ಕ ತಂಗಕ್ ಮಂಗಲ ಕೈಪಕ್ ಮೂಡಿ ತೇಡುವಕ್ ಕೊಡಗ್ ಪಿಳ್ಳಾ ಮೈಸೂರ್‌ಕ್ ಪೋಪಕ್ ಒಪ್ಪಿಗೆ ತರೊಂಡೊಂದ್ ಕಾಶಿಲ್ ಇಂಜ ಬ್ರಿಟಿಷ್ ಅಧಿಕಾರಿರ ಮೂಲಕ ಕೊಡಗ್ ಸೂಪರಿಂಟೆಂಡೆಂಟ್ ಕ್ಯಾ. ಮಾರ್ಟಿನ್‌ಕ್ ಅರ್ಜಿ ಇಟ್ಟಿತ್. ಇದೊಂಗ್ ಕ್ಯಾ.ಮಾರ್ಟಿನ್ ಶಿರಸ್ತೆದಾರ ಬುಟ್ಟಿಯಂಡ ನಂಜಪ್ಪ ಪಿಳ್ಳಾ ಮಾತಂಡ ಅಪ್ಪಚ್ಚೆಂಡ ಅಭಿಪ್ರಾಯ ಕೇಟಿತ್.

ಅದೊಂಗ್ "ಪಂಡ್ ಕೊಡಗ್ಗರ ರಾಜಂಗ ಮಂಗಲ ಕಯ್ಯವಕ ತಂಗಡ ಆಪ್ತಂಗಲುಂಡ್ ಚಾಯಿಕರ್ತಿ ಕೊಡವತಿ ಪಿಳ್ಳಾ ಪಟ್ಟತಿ ಮೂಡಿಯಳ ಆಯ್ಕೆ ಮಾಡುವಕ್ ಅಯೆಪ ಇಂಜತ್. ಅಲ್ಲಿಂಜ ರಾಜಂಗ ಲಿಂಗಧಾರಣೆ ಮಾಡ್‌ಚಿಟ್ಟಂಡ್ ಮಂಗಲ ಕೈಪ ಇಂಜತ್. ಇಕ್ಕ ಕಾಶಿಲ್ ಉಳ್ಳ ಕೊಡಗ್ ರಾಜಂಗಡ ಮಕ್ಕ ಕೊಡಗ್‌ಲ್ ಮೂಡಿಯಳ ತೇಡುವ ಅವಶ್ಯಕತೆ ಇಲ್ಲೆ"ಂದ್ ತಂಗಡ ಅಭಿಪ್ರಾಯ ಕೊಡ್‌ತತ್.

ಆನಗುಂಡ್ ರಾಜಂಡ ಮೋನೆಯಂಗಕ್ ಕೊಡಗ್‌ಕ್ ಬಪ್ಪಕ್ ಬ್ರಿಟಿಷ್‌ಕಾರ ಒಪ್ಪಿಗೆ ಕೊಡ್‌ತಲೆ. ಆಚೀಂಗಿ, ಕೊಡಗ್‌ಂಜ ದೇವಮ್ಮಾಜಿ ಪಿಳ್ಳಾ ಅವಡ ಕುಟುಂಬಕಾರ ಕಾಶಿಕ್ ಪೋಯಿತ್ ಕೊಡಗ್ಗರ ರಾಜ ಮನೆತನತ್‌ರ ಕೊಡೆ ಚೆನ್ನಂಗ್ ಸಮಯ ಇಂಜಿತ್ ಬಂದದ್ ಬ್ರಿಟಿಷಡ ರೆಕಾರ್ಡ್‌ಲ್ ಉಂಡ್.

ಆನಗುಂಡ್ ಚಿಕ್ಕವೀರ ರಾಜೇಂದ್ರಂಡ ಮೋನೆಯ ಕಾಶಿಲೆ ಮಂಗಲ ಕೈಚಂಡತ್. ಇದತ್ ಲಿಂಗರಾಜ ಎಣ್ಣುವ ಮೋಂವ ಮಹಾರಾಣಿರ ಮೋಂವನಾಯಿತ್ ನ್ಯಾಯಪಾನ ಹಕ್ಕಿದಾರ ಆಯಿತಿಂಜತ್.

ಅನ್ನನೆ ಚಿತ್ರಶೇಖರ ಸ್ವಾಮಿ, ಸೋಮಶೇಖರ ಸ್ವಾಮಿ, ವೀರಭದ್ರ ಸ್ವಾಮಿ, ನಂಜುಂಡ ಸ್ವಾಮಿ, ಮುದ್ದುರಾಜ ಸ್ವಾಮಿ ಪಿಳ್ಳಾ ಪದ್ಮರಾಜ ಸ್ವಾಮಿ ರಾಜಂಡ ಆರ್ ಮೋನೆಯ. ಮೋಳಿಯಳಾನ ಗಂಗಮ್ಮಾಜಿ ಹೈದ್ರಾಬಾದ್‌ರ ಜಮೀನ್ದಾರನ, ವೀರಮ್ಮ ಮಧ್ಯಪ್ರದೇಶತ್‌ರ ಮೈಹರ್ ರಾಜ ಪಿಳ್ಳಾ ಮುದ್ದಮ್ಮ ನೇಪಾಳತ್‌ರ ಮುಖ್ಯಮಂತ್ರಿ ಜಂಗ್ ಬಹಾದೂರ್‌ನ ಮಂಗಲ ಆಚಿ. ಇಯಂಗ್‌ಕೆಲ್ಲ ಬ್ರಿಟಿಷ್ ಸರ್ಕಾರ ತಿಂಗಕ್



ರಾಜಕೀಯ ವೇತನ ಕೊಡ್ತಂಡ್ ಬಾತ್. ಇನ್ನನೆ ಬ್ರಿಟಿಷ ತಂಗಡ ಆಡಳಿತತ್‌ನ ಹಿಂದೂ ದೇಶಿಯಕ್ ಬುಟ್ಟಿತ್ ಪೋಪಕ ಕೊಡಗ್ಗರ ಆಖೀರಿ ರಾಜಂಡ ಕ್‌ರ್ಮೋಂವ ಚಂದ್ರಶೇಖರ ರಾಜೇಂದ್ರ ಪಿಳ್ಳಾ ಇಂವಂಡ ಲಣ್ಣಂಡ ಮೋಂವ ಲಿಂಗರಾಜೇಂದ್ರ ಒಡೆಯಂಗ್ ಆಳಣ್ಣ 50 ಉರ್‌ಪಿಯ ರಾಜಕೀಯ ವೇತನ ಕೊಟ್ಟುವ ಇಂಜತ್. ಇವು ಇಕ್ಕ ಕಾಶಿಲ್ ತಂಗಡ ಸ್ವಂತ ಮನೆಲ್ ಉಂಡ್.

## ಇಂಗ್ಲೆಂಡ್‌ಲ್ ರಾಜಕುಮಾರಿ ವಿಕ್ಟೋರಿಯ ಗೌರಮ್ಮಂಡ

### ಆರೈಕೆ ಪಿಳ್ಳಾ ವಿದ್ಯಾಭ್ಯಾಸ

ಚಿಕ್ಕವೀರರಾಜೇಂದ್ರ ತಾಂಡ ಕೊದಿಮೋವ ಗೌರಮ್ಮನ 1852ತ್‌ಂಜ 1857ಕೆತ್ತನೆ ಮಹಾರಾಣಿ, ಮೇ.ಡ್ರಮ್ಮಂಡ್‌ರ ಕೂಡ ಆಕಿತಿಂಜತ್. ಈ ನೇರತ್ ಗೌರಮ್ಮಂಡ ಬದ್‌ಕ್ ಕುಶಿಲ್ ಇಂಜಾಲೆ. ಡ್ರಮ್ಮಂಡ್‌ಕ್ ದಂಡ್ ಮೋಳಿಯ ಇಂಜತ್. ಇವು ಓದುವಾತ್ ದುಂಬ ಹುಷಾರ್. ಗೌರಮ್ಮಂಗ್ ಓದುವಾತ್ ಆಸಕ್ತಿ ಇಲ್ಲತೆ ಅವ ತಾಂಡ ಬಯತ್‌ಕ್‌ಂಜ ಚಿರಿಯವಡನ್ನೆ ಇಪ್ಪ ಇಂಜತ್. ಆನಗುಂಡ್ ಅವಳ ಕಮ್ಮಿ ತರತ್ ಕಂಡ ಡ್ರಮ್ಮಂಡ್ ಬಯ್ಯ ರಾಣಿರ ಕೂಡ ಗೌರಮ್ಮನ ನೋಟುವಕ್ ಚೆನ್ನ ಕಷ್ಟ ಆಪಾಂಡ್ ಎಣ್ಣಿಯಂಡತ್.

ಆನಗುಂಡ್ ರಾಣಿ ಗೌರಮ್ಮನ ಲೇಡಿಲೋಗಿನ್‌ರ ಕೂಡ ಆಕೊಚಿ. ಅವಡ ವಡಿಯ ಸರ್ ಜಾನ್ ಲೋಗಿನ್ ಹಿಂದೂಸ್ಥಾನತ್ ಸುಮಾರ್ ಕಾಲ ಇಂಜಂವ ರಾಜಮನೆತನತ್‌ರ ರೀತಿ, ನೀತಿ, ಪದ್ಧತಿ, ಸ್ವಭಾವತ್‌ನ ಚಾಯೋಡೆ ಲರ್‌ಂಜಿತಿಂಜತ್. ಕೂಟ್‌ಕ್ ಪಂಚಾಬ್‌ರ ಚಿಂಗಾಂದ್ ಕಾಕುವ ಇಂಜ ರಣಜಿತ್‌ಸಿಂಗ್‌ರ ಮೋಂವ ದಿಲೀಪ್‌ಸಿಂಹನ ಚರ್ಪತ್‌ಂಜೆ ಚಾಕಿತ್ ಓದ್‌ಚಿಟ್ಟಿತಿಂಜತ್. ದಿಲೀಪ್‌ಸಿಂಹ ಕ್ರೈಸ್ತಧರ್ಮ ಪಾಲನೆ ಮಾಡ್‌ನ ಹಿಂದೂಸ್ಥಾನ ರಾಜವಂಶಕಾರಡಾತ್ ಆದ್ಲ ವ್ಯಕ್ತಿ. ಅನ್ನನೆ ರಾಜಕುಮಾರಿ ಗೌರಮ್ಮ ಪೂಣ್ಣಾಳಾಡತ್ ಆದ್ಲ ಕ್ರೈಸ್ತ ಧರ್ಮಕ್ ಮತಾಂತರ ಆನವ!

ಲೇಡಿ ಲೋಗಿನ್ ಗೌರಮ್ಮನ ಚಾಯಿತೆ ನೋಟ್‌ಚಿ. ಅವ ಎಳ್ಳನ Lady Login's Recollections ಎಣ್ಣುವ ಪುಸ್ತಕತ್ ಗೌರಮ್ಮಂಡ ವಿಷಯತ್ ಈ ಪೋಲೆ ಎಳ್ಳಿತ್.

Personally, I found the little Princess most amiable & en-

gaging & in no way intractable while she showed a real affection for both me & my husband & never resented or disregarded our necessary restriction"

ವಿಕ್ಟೋರಿಯಾ ಮಹಾರಾಣಿ, ರಾಜಕುಮಾರಿ ಗೌರಮ್ಮಂಡ ಆರೋಗ್ಯತನ ಗೆಡಿ ಗೆಡಿ ಲೇಡಿ ಲೋಗನುಂಡ್ ಅರ್ಂಜವ ಇಂಜತ್. ರಾಜಕುಮಾರಿ ನೋಟುವಕ್ ಚಾಯಿ ಇಂಜಕೊ ಅವಡ ಆರೋಗ್ಯ ಚಾಯಿ ಇಂಜಾಲೆ. ಅವಕ್ ಚರ್ಪತ್ಂಜೆ ಟಿ.ಬಿ. ಕಾಯಿಲೆರ ಲಕ್ಷಣ ಇಂಜತ್. ಆನಗುಂಡ್ ಅವಳ ಇಟಲಿಕ್ ಕೂಟಿಯಂಡ್ ಪೋಪಕ್ ಮಹಾರಾಣಿ, ಲೇಡಿ ಲೋಗಿನ್‌ಕ್ ಎಣ್ಣೆಚಿ.

ಆಚೇಂಗಿ, ಗೌರಮ್ಮ ಇಟಲಿಕ್ ಪೋಪಾಂಗ್ ಮುಪ್ಪಡೆ ಅವಡ ಕ್ರೈಸ್ತಧರ್ಮತರ ಆಖೀರಿ ಪರೀಕ್ಷೆ ಆಂಡಿಂಜತ್. ಈ ಪರೀಕ್ಷೆ ಪಿಳ್ಳಾ ಸಮ್ತಂಧಪಟ್ಟ ಸಮಾರಂಭ ಇಂಗ್ಲೆಂಡ್‌ರ ಕ್ಯೂ ಎಣ್ಣುವ ಜಾಗತ್ ನಡಂದತ್. ವಿಕ್ಟೋರಿಯಾ ಮಹಾರಾಣಿರ ಪ್ರತಿನಿಧಿಯಳಾಯಿತ್ ಡೀಲೆ ಹಾರ್ಡಿಂಚ್ ಪಿಳ್ಳಾ ಸರ್ ಜೇಮ್ ವಿರ್‌ಹಾಗ್ ಬಂದಿತಿಂಜತ್. ಆಚೇಂಗಿ, ವಿಕ್ಟೋರಿಯಾ ಮಹಾರಾಣಿ ಬಪ್ಪ ಕಯ್ಯತಾನುಂಡ್ ರಾಜಕುಮಾರಿಕ್ ಓರ್ ಜೊತೆ ಪವಳ ಸರ ಪಿಳ್ಳಾ ವಜ್ರತರವಾಲೆನ ಅಯೆಚಿತ್ ನಲ್ಲರಿಮೆ ಬಯಂದತ್. ಇದ್‌ನ ಕಂಡಿತ್ ವೀರಾಚೇಂದ್ರಂಗ್ ದುಂಬ ಕುಶಿಯಾಚಿ.

ಇದಾಯಿತ್ ಗೌರಮ್ಮನ ಇಟಲಿಕ್ ಕೂಟಿಯಂಡ್ ಪೋನಲ್ಲಿ ಜಾಗ ಪಿಳ್ಳಾ ಹವಾಮಾನತರ ಬದಲಾವಣೆಲ್ ಗೌರಮ್ಮಂಡ ತಡಿ ಚಾಯಾಯಂಡ್ ಬಂದದೆ ಅಲ್ಲತೆ ಅವಡ ಮಾನಸಿಕ ತಾಕತ್ತೂ ಬೊಳಂದತ್. ಅವ ರೋಮ್‌ಲ್ ಇಪ್ಪಕ ಮಹಾರಾಜ ದಿಲೀಪ್‌ಸಿಂಹ ಲೇಡಿಲೋಗಿನ್‌ರ ಬೆಂದು ಬಿಡಾರಕ್ ಗೆಡಿ ಗೆಡಿ ಬಪ್ಪ ಇಂಜತ್. ದಂಡಾಳೂ ಕ್ರೈಸ್ತ ಧರ್ಮಕ್ ಮತಾಂತರ ಆನಾನುಂಡ್ ಇಯಂಗಕ್ ಮಂಗಲ ಕೈಕೊಂಡೂಂಡ್ ಲೇಡಿ ಲೋಗಿನ್ ಬಯಂದತ್. ಆಚೇಂಗಿ, ಗೌರಮ್ಮ ಅಚ್ಚಿಕ್ ಹುಷಾರ್ ಇಲ್ಲತಾನಗುಂಡ್ ತಾಂಡ ಬದ್‌ಕ್ ಸುಖತ್ ಇಪ್ಪುಲೆಂಡ್ ದಿಲೀಪ್ ಸಿಂಹ ತಾಂಡ ಲಭಿಪ್ರಾಯ ಎಣ್ಣೆಯಂಡತ್.

ಮೇ ತಿಂಗತ್ ಇಂಗ್ಲೆಂಡ್‌ಕ್ ವಾಪಾಸ್ ಬಂದ ಲೇಡಿ ಲೋಗಿನ್ ತಾಂಡ ಮಕ್ಕ ಬಲ್ಲದಾಯಂಡ್ ಬಂದನ್ನಕೆ ಅಯಿಂಗಡ ಕೂಡೆ ತಾನ್ ಇರೊಂಡೂಂಡ್, ಆನಗುಂಡ್ ರಾಜಕುಮಾರಿ ವಿಕ್ಟೋರಿಯಾ ನೋಟಿಯವಕ್ ಬೋರೆ ದಾರ್‌ನೇಂಗಿ ಏರ್ಪಾಡ್ ಮಾಡೊಂಡೂಂಡ್ ಕೇಟಂಡತ್.

ಆನಗುಂಡ್ ಮಹಾರಾಣಿ ಲೇಡಿ ಕ್ಯಾಥರಿನ್ ಹಾರ್‌ಕೋರ್ಟ್‌ರ ಆರೈಕೆಲ್ ಬುಡುವಕ್



ತೀರ್ಮಾನ ಮಾಡ್‌ಚಿ. ಆಚೇಂಗಿ, ಅಲ್ಲಿಯೂ ಗೌರಮ್ಮ ಸುಖತ್ ಇಂಜಾಲೆ. ಇದ್‌ನರ್‌ಂಜ ಮಹಾರಾಣಿ, ಗೌರಮ್ಮನ ಸರ್‌ ಜೇಮ್ಸ್‌ ವಿರ್‌ಹಾಗ್‌ರ ಆರೈಕೆಲ್‌ ಬುಟ್ಟಿತ್‌. ಈ ನೇರತ್‌ ಮಹಾರಾಜ ದಿಲೀಪ್‌ ಸಿಂಹ ಗೌರಮ್ಮನ ಲೇಡಿ ಲೋಗಿನ್‌ರ ತಮ್ಮಣ ಕರ್ನಲ್‌ ಕ್ಯಾಂಪ್‌ಬೆಲ್‌ಕ್‌ ಪರಿಚಯ ಮಾಡ್‌ಚಿ. ಕ್ಯಾಂಪ್‌ಬೆಲ್‌ ಆರ್ಮಿಲ್‌ ಬಲ್ಯ ಪದವಿಲ್‌ ಇಂಜಂವ. ಇಂವಂಡ ಪೊಣ್ಣ್‌ ಚಿತ್ತಪೋಯಿತಿಂಜತ್‌. ಕಣ್ಣ ಮಕ್ಕಳೂ ಇಂಜತ್‌.

ನೋಟುವಕ್‌ ಚಾಯಿಕಾರ ಆಯಿತಿಂಜ ಕ್ಯಾಂಪ್‌ಬೆಲ್‌ಕೂ, ಗೌರಮ್ಮಂಗೂ ಅಪ್ಪರಿಪ್ಪರ ಕುಶಿ ಆಯಿತ್‌ 1860ನೆ ಜುಲೈ ತಿಂಗತ್‌ ಮಂಗಲ ಆಚಿ. ಪಿತ್ಯ ಕಾಲ ಇಯಂಗಕ್‌ ಓರ್‌ ಮೂಡಿ ಕುಣ್ಣಿ ಪುಟ್‌ಚಿ. ಈ ಕುಣ್ಣಿರ ಪೆದ ಎಡಿತ್‌ ವಿಕ್ಟೋರಿಯ ಗೌರಮ್ಮ.

ಮಂಗಲ ಕೈಂಜಿತ್‌ ದಂಡ್‌, ಮೂಂದ್‌ ಕಾಲತೆ ಗೌರಮ್ಮಂಗ್‌ ಟಿ.ಬಿ.ಕಾಯಿಲ ಜಾಸ್ತಿ ಆಯಂಡ್‌ ಬಾತ್‌. ಮಹಾರಾಣಿ, ಗೌರಮ್ಮಂಡ ಆರೋಗ್ಯತ್‌ರ ಮೀದ ಎಚ್ಚಿರ ಎಡ್‌ತಪ ಇಂಜತ್‌. ಆಚೇಂಗಿ, ಗೌರಮ್ಮ ರಾಜಕುಮಾರಿ 1864ನೆ ಮಾರ್ಚ್‌ 30ಂಗ್‌ ಸ್ವರ್ಗವಾಸಿ ಆಚಿ. ಅಕ್ಕ ಅವಕ್‌ 23 ಬಯತ್‌!

ಗೌರಮ್ಮನ ವಿಕ್ಟೋರಿಯ ಮಹಾರಾಣಿ ಎಣ್ಣ್‌ನಪೋಲೆ ಲಂಡನ್‌ರ ಬ್ರಾಂಸ್ಲೆನ್ ಕೇಕೊಳತ್‌ ಪೂತಿತ್‌ ಆ ಜಾಗತ್‌ರ ಕೊಡಿಲ್‌ ಓರ್‌ ಅಮೃತಶಿಲೆ ಬೆಚ್ಚತ್‌. ಅದತ್‌ ಇನ್ನನೆ ಎಳ್ಳೆಚಿಟ್ಟಿತ್‌.

"Sacred to the memory of the Princess Victoria Gowramma daughter of the Ex Rajah of Coorg, the beloved wife of Lieut Colonel John Campbell. Born in India July 4th 1841, she was brought early in life to England babtized into the Christian faith under the immediate care & protection of Queen Victoria who stood sponsor to her & took a deep interest in her through life. She died 30th March 1864, other sheep I have, which are not of this fold (John 10;16)

ರಾಜಕುಮಾರಿ ವಿಕ್ಟೋರಿಯ ಗೌರಮ್ಮ ಚಿತ್ತಪಿಣ್ಣ್‌ ಅವಡ ಮೂಡಿ ಕುಣ್ಣಿ ನೆಡಿಯ ಕ.ಕ್ಯಾಂಪ್‌ಬೆಲ್‌ರ ಸಿನೇತಂಗ ಚೆನ್ನಂಗ್‌ ಕಾಲ ಚಾಕ್‌ಚಿ. ಗೌರಮ್ಮ ಲೇಡಿ ಲೋಗಿನ್‌ ತಾಂಡ ಕುಣ್ಣಿ ನ ಚಾಕೊಂಡೂಂದ್‌ ಬಯಂದಿತಿಂಜಪೋಲೆ ಅವ 1882ಕೆತ್ತನೆ ಚಾಕ್‌ಚಿ.



ಈಂಡೆಡೆಲ್ ಗೌರಮ್ಮಂಡ ವಡಿಯ ಕ. ಕ್ಯಾಂಪ್ ಬೆಲ್ ಎಣ್ಣಕ ಲೇಡಿ ಲೋಗಿನ್ ರ ತಮ್ಮಣ 1867ನೆ ಆಗಸ್ಟ್ 4ಂಗ್ ಅಕ್ಕಂಡ ಮನೆಕ್ ಬಂದಿತಿಂಜತ್. ಅದೇ 7ಂಗ್ ಕ್ಯಾಂಪ್ ಬೆಲ್ ಓರ್ ಬ್ಯಾಗ್ ಪುಡ್ ಚಂಡ್ ಅಕ್ಕಂಡ ಮನೆಂಜ ಪೂರಮೆ ಪೋನಂವ ವಾಪಾಸ್ ಬಂದ್ ಲೆ. ಅವ ಮಾಲ್ ನ ಕೌಟ್ಸ್ ಬ್ಯಾಂಕ್ ಲ್ ಬೆಪ್ಪಕ್ ಪೂರಟಿತಿಂಜತ್ ಒಂದ್ ಪಕ್ಕತ ಮನೆಕಾರ ಎಣ್ಣೆ ಚಿ. ಆನಗುಂಡ್ ಈ ಮಾಲ್ ನ ಕಪ್ಪಕ್ ಒಂದೆ ಜನ ಅವನ ಕಿಡ್ನಾಪ್ ಮಾಡಿತಿಕ್ಕೊಂದ್ ಗೇನ ಮಾಡ್ ಚಿ. ಆ ಮಾಲ್ ರಾಜಕುಮಾರಿ ಗೌರಮ್ಮಂಗ್ ಅವಡ ಅಪ್ಪ ವೀರರಾಜೇಂದ್ರ ಒಡೆಯ ಕೊಡ್ತ ಮಾಲ್ ಆಯಿತಿಕ್ಕು.

ರಾಜಕುಮಾರಿ ವಿಕೋರಿಯಂಡ ಮೋವ ಎಡಿತ್ ಗೌರಮ್ಮ ಕ್ಯಾಪ್ಟನ್ ಹೆಚ್. ಇ. ಯಾರ್ಡ್ಲಿ ಎಣ್ಣವ ಆರ್ಮಿ ಆಫೀಸರ್ ನ ಮಂಗಲ ಆಚಿ. ಇವಕೂ ಮಹಾರಾಣಿ ವಿಕೋರಿಯ ಪೆನ್ಸನ್ ಕೊಡ್ ಪನ್ನಕೆ ಇಂಗ್ಲೆಂಡ್ ಸರ್ಕಾರಕ್ ಆಜ್ಞೆ ಮಾಡಿತಿಂಜತ್.

ಎಡಿತ್ ಕ್ ವಿಕೆರ್ ಯಾರ್ಡ್ಲಿ ಎಣ್ಣವ ಓರ್ ಕ್ಲೆಕ್ಟಿಕ್ ಇಂಜತ್. ಎಡಿತ್ 1934ತ್ ಚತ್ತ್ ಪೋಚಿ. ಇಂಜ ಒರೇ ಮೋಂವ ಯಾರ್ಡ್ಲಿ 1936ತ್ ಆಸ್ಟ್ರೇಲಿಯಾತ್ ನಡ್ ಒಂದೆ ಆಕ್ಸಿಡೆಂಟ್ ಲ್ ಚತ್ತ್ ಪೋಚಿ.

ಈ ಪೋಲೆ ಎಡಿತ್ ಗೌರಮ್ಮ ಪಿಳ್ಳಾ ಅವಡ ಮೋಂವ ವಿಕೆರ್ ಯಾರ್ಡ್ಲಿ ರ ಚಾವುರ ಮೀದ, ಗೌರಮ್ಮಂಡ ಮಚ್ಚಿಣ ಎಫ್. ಸಿ. ಯಾರ್ಡ್ಲಿ, 1938ತ್ 'ಕೊಡಗರ ಇತಿಹಾಸ' ತನ ಕನ್ನಡತ್ ಎಳ್ಳೆನ ಎಳ್ಳೆಕಾರ ಶ್ರೀ ಡಿ. ಎನ್. ಕೃಷ್ಣಯ್ಯಂಗ್ ಓರ್ ಕಾಗದ ಬಂದಿತಿಂಜತ್.

ಅದತ್ 'ರಾಜಕುಮಾರಿ ಗೌರಮ್ಮಂಡ ವಡಿಯ ಕ. ಕ್ಯಾಂಪ್ ಬೆಲ್, ಪೋಣ್ಣ ಚಾವಾಂಗ್ ಮುಪ್ಪಡೆ ಕಾಂಗತಾಚಿಂವ್ ಎಣ್ಣೆ ನದ್ ಸೆರಿಯಲ್ಲ. ಲೇಡಿ ಲೋಗಿನ್, ರಾಜಕುಮಾರಿ ಗೌರಮ್ಮ ಚಿತ್ತಪಿಳ್ಳೊ ಅವಡ ವಡಿಯ ಪಿಳ್ಳಾ ಲೇಡಿ ಲೋಗಿನ್ ರ ತಮ್ಮಣ ಕ್ಯಾಂಪ್ ಬೆಲ್ ಕಾಂಗತಾಯಿತ್ ಚೆನ್ನಂಗ್ ಕಾಲತ್ Lady Login's Recollection ಎಣ್ಣವ ಪುಸ್ತಕ ಎಳ್ಳಿತ್ ಅದತ್ ರಾಜಕುಮಾರಿ ಗೌರಮ್ಮ ಪಿಳ್ಳಾ ಅವಡ ವಡಿಯಂಡ ವಿಷಯ ಎಳ್ಳೆನದ್ ಸೆರಿ'ಂದ್ ಉಂಡ್.

ಈ ಪೋಲೆ ಲೇಡಿ ಲೋಗಿನ್ ಪಿಳ್ಳಾ ಎಫ್. ಸಿ. ಯಾರ್ಡ್ಲಿ ರ ಎಳ್ಳೆನುಂಡ್ ಚಿಕ್ಕವೀರ ರಾಜೇಂದ್ರಂಡ ಕೊದಿಮೋವ ರಾಜಕುಮಾರಿ ವಿಕೋರಿಯ ಗೌರಮ್ಮಂಡ ಸಂತಾನ ವಿಕೆರ್ ಯಾರ್ಡ್ಲಿ ರ ದುರ್ಮರಣತ್ ನುಂಡ್ ಆಖೀರಿ ಆಚಿಂವ್ ಗೊತ್ ಕಟ್ಟುವ.



## ಕೊಡಗ್ ಜನದ ಬದ್‌ಕ್ ಸಂಸ್ಕೃತಿ

ಕೊಡಗ್‌ರ ನಿವಾಸಿಯಡಾತ್ ಮೂಲನಿವಾಸಿಯ ಪಿಳ್ಳಾ ಪೊರ್‌ಮೆಂಜ ಬಂದ್ ಕೊಡ್‌ನಯಿಂಗ ಎಣ್ಣುವ ದಂಡ್ ವರ್ಗ ಮಾಡೊಲು. ಮೂಲ ನಿವಾಸಿಯ ಎಣ್ಣುಕ ಎರವ, ತೇನ್ ಕುರುಬ, ಬೆಟ್ಟಕುರುಬ, ಮಲೆ ಕುಡಿಯ ಪಿಳ್ಳಾ ಪೊಲೆಯ ಮುಖ್ಯ ಪಟ್ಟವು.

ಇದತ್ ಎರವ ಪಿಳ್ಳಾ ಕುರುಬಂಗಕ್ ಕೊಡಗೇ ಮೂಲ ವಾಸಸ್ವಾನ ಆಯಿತಿಂಚ್‌ಲೆ. ಇಕ್ಕಲೂ ಇಲ್ಲೆ. ಎರವ ದ. ಕೊಡಗ್‌ರ ದ.ಕೇರಳತ್ ವೈನಾಡ್‌ಲ್ ಪಂಡ್‌ಂಜೆ ಇಂಜಪು ಅಲ್ಲಿಂಜ ಕ್ರಿ.ಶ.ಕ್ ಮುಪ್ಪಡೆ ದ.ಕೊಡಗ್‌ರ ಶ್ರೀಮಂಗಲ ನಾಡ್ ಪಿಳ್ಳಾ ಪೊನ್ನಂಪೇಟೆ ನಾಡ್‌ಕ್ ವಲಸೆ ಬಂದಿತ್ ಇದತ್ ಚೆನ್ನಂಗಾಳ್ ವೀರಾಜಪೇಟೆ ನಾಡ್‌ಲೂ ಉಂಡ್. ಇಯಂಗಡಾತ್ ಪಂಜರಿ, ಪಣಿಯ, ಬಡವ ಪಿಳ್ಳಾ ಕಾಗಿ ಎಣ್ಣುವ ನಾಲ್ ಚಾತಿ ಉಂಡ್. ಕೊಡಗ್‌ರ ದ.ಭಾಗತ್‌ರ ಕುಟ್ಟತ್ ಕುಟ್ಟತಮ್ಮ / ಕಾಳಿ ಕೊಡಗ್‌ರ ಎರವಕ್ ಮುಖ್ಯಪಟ್ಟ ದೇವತೆ.

ಶಿವಪಾದರೆರ ದಂಡನೆ ದಿನ ಎರವ ದ.ಕೊಡಗ್‌ರ ಇರ್ಪುರ ಲಕ್ಷ್ಮಣತೀರ್ಥ ಪೊಳೆರ ಬರಿಲ್ ಉಳ್ಳ ರಾಮೇಶ್ವರ ತಿರಿಕೆಲ್ ತಂಗಡ ಪರಿಕೆ ಒಪ್ಪಚಿಡುವ. ಪಂಡ್ ಎರವ ಈ ಬೆಟ್ಟಕುರುಬಂಡ ಅಧೀನತ್ ಇಂಜತ್‌ಂದ್ ಚರಿತ್ರೆ ಎಣ್ಣುವ. ಇಕ್ಕ ಅನ್ನನೆ ಇಲ್ಲೆ.

ಎರವಂಗ ಕುಳ್ಳಂಗ. ಕರ್ಪು ತೋಲ್‌ರ, ಜುಂಗ್‌ರ್ ತಲ್ಮಿ ಉಳ್ಳವು. ಚಪ್ಪಟೆ ಮೂಕ್ ಪಿಳ್ಳಾ ಬಲ್ಮ ಕಿರಿಕಾರ. ಆಣಾಳ ನಡುಂಜ ಮೊಣ್ಣೆಕಾಲ್‌ಕೆತ್ತನೆ ಲುಂಗಿ, ನಡುರ ಕೊಡಕ ಶರ್ಟ್‌ರನ್ನಕೆ ಉಳ್ಳ ಬಟ್ಟೆ ಇಟ್ಟಂಡಕ, ಪೊಣ್ಣಾಳ ಕೊಡವತಿ ಪೊಣ್ಣಾಳಡನ್ನಕೆ ಪೊಡಿಯ ಉಡ್‌ಪ. ಆಚೀಂಗಿ, ಇಯಂಗಡ ಪೊಡಿಯತ್‌ರ ನೆರಿ ಎದಿಕೆ ಇಪ್ಪ. ಬೇಲ್ ಪಿಳ್ಳಾ ಕಾಫಿ ತೋಟತ್ ನೈಪದ್ ಇಯಂಗಡ ಕೆಲಸ.

## ಕುರುಬ

ಕುರುಬಂಗಡಾತ್ ತೇನ್ ಪಿಳ್ಳಾ ಬೆಟ್ಟ ಕುರುಬ ಎಣ್ಣುವ ದಂಡ್ ಪಂಗಡ ಉಂಡ್. ತೇನ್ ಕುರುಬ ಕೊಡಗ್‌ಲ್ ಶ್ರೀಮಂಗಲ, ಪೊನ್ನಂಪೇಟೆ ಪಿಳ್ಳಾ ಸೋಮವಾರಪೇಟೆ ನಾಡ್‌ಲ್ ಉಂಡ್. ಇವು ಪಂಡ್ ಕಾಡ್‌ರ ಮರತ್‌ರ ಕೊಂಬೆ, ಮರತ್‌ರ ಪೊಟೆ, ಮಣ್ಣರ ಪುತ್ತತ್‌ಂಜ ತೇನ್ ಎಡ್‌ಪ ಇಂಜತ್. ಇನ್ನನೆ ಎಡ್‌ತ ತೇನ್‌ನ ಊರ್‌ರ

ಜನಕ್ ಕೊಡ್ತೀತ್ ಅಯಿಂಗಳುಂಡ್ ತಂಗಡ ಬದ್ಕಕ್ ಬೋಂಡಿಯಾನ ಅಕ್ಕಿ, ನುಚ್ಚಿ ಪಿಳ್ಳಾ ಬೋರೆ ಸಾಮಾನ್ ಪಡ್ಂದವ ಇಂಜತ್. ಆಚೇಂಗಿ, ಇವು ಒರೇ ಜಾಗತ್ ಸ್ಥಿರ ಆಯಿತ್ ನಿಪ್ಪ ಇಂಜಾಲೆ. ಕಾಡ್ಲ ಪುಂಡತ್ ನೆರ್ಕೆ ಕೆಟ್ಟಿಯಂಡ್ ಚೆನ್ನಂಗ್ ಸಮಯಕೆತ್ತನೆ ಅದತ್ ವಾಸ ಇಂಜಂಡ್ ಅಲ್ಲಿಂಜ ಬೋರೆ ಜಾಗಕ್ ಪೋಪ ಇಂಜತ್. ಇಯಂಗಳ್ ಸಿದ್ವೇಶ್ವರ ಪಿಳ್ಳಾ ಬಸವೇಶ್ವರ ದೇವ. ಇವು ಚತ್ತ ತಂಗಡ ಮೂಲಪುರುಷನ ಪೂಜುವ.

ಬೆಟ್ಟಕುರುಬಂಗ ಕೊಡಗ್ಗರ ಶ್ರೀಮಂಗಲನಾಡ್, ಪೊನ್ನಂಪೇಟೆ ಪಿಳ್ಳಾ ವೀರಾಜಪೇಟೆ ನಾಡ್ಲ ಉಂಡ್. ಇಯಂಡ ಪೂರ್ವಜಂಗ ಕೇರಳತ್ ವೈಸಾಡ್ ಪಿಳ್ಳಾ ಮಲಬಾರ್ಂಜ ಬಂದವು. ಇವು ಪುಂಡತ್ ಕುಕ್ಕಿ, ತೊಟ್ಟ್ ಪಿಳ್ಳಾ ಮೀನ್‌ಪುಡಿಪ ಬಟ್ಟಿ ಮಾಡುವಾತ್ ದುಂಬ ಹುಷಾರ್. ಆನಗುಂಡ್ ಇಯಂಗಳ 'ಪುಂಡ ಕುರುಬ'ಂದ್ ಕಾಕುವ. ಇವು ಕುರ್ಚಿ ಊರ್‌ರ ಕುಟ್ಟಾಲಮ್ಮ / ಕರಿಂಗಾಳಿನ ಪೂಜುವ. ಅನ್ನನೆ ಅಜ್ಜ ಪಿಳ್ಳಾ ಕೂಡ ಎಣ್ಣುವ ಭೂತ ಪೂಜುವ. ಎನ್ನಂಗಣ್ಣಕ ಇವು ತಂಗಡ ಮೂಲ ಪುರುಷಂಗಾಂದ್ ನಂಬಿಕೆ.

ತೇನ್‌ಕುರುಬ, ಬೆಟ್ಟ ಕುರುಬಂಗಡ ತೋಲ್ ಕರ್ಪು ರಂಗ್, ಮಂಡೆಲ್ ಜುಂಗಾರ್ ತಲ್ಮಿ, ಸಾಧಾರಣ ಎತ್ತರ ಉಳ್ಳ ಇಯಂಗಡ ಪೊಣ್ಣಾಳ ಪೊಡಿಯಕ್ ಎದಿಕೆ ನೆರಿ ಬೆಪ್ಪ. ಅನ್ನನೆ ಇವು ರೈತಂಗಡ ಭೂಮಿ, ತೋಟತ್ ಕೆಲಸ ಮಾಡುವ.

## ಮಲೆಕುಡಿಯ

ದ.ಕನ್ನಡ ಪಿಳ್ಳಾ ಕೊಡಗ್ಗರ ತೆರಿಲ್ ಏರ ವಾಸ ಉಳ್ಳವು. ಇವು ಕಾಡ್ಲ ಇಂಜಂಡ್ ಜಾತಿಯಳ ಬೋಟೆಯಾಡತ್ ಪಂಡ್ ಬದ್ಕುವ ಇಂಜತ್. ಅನ್ನನೆ ಪನೆ ಮರತ್‌ಂಜ ಬೊಳ್ಳಕಳ್ಳ ಎಡ್‌ಪ ಇಂಜತ್. ಇಕ್ಕ ಇವು ಬೇಲ್ ಪಣಿ ಕೆಯ್ಯುವ.

## ಪೊಲೆಯ

ಪೊಲೆಯ ದ.ಹಿಂದೂಸ್ಥಾನತ್‌ರ ಬೋರೆ ಬೋರೆ ಜಾಗತ್ ಬೋರೆ ಬೋರೆ ಪೆದತ್ ಉಂಡ್. ಮಹಾತ್ಮ ಗಾಂಧಿ ಇಯಂಗಳ್ 'ಹರಿಜನ' ಎಣ್ಣುವ ಪುದಿಯ ಪೆದ ಕೊಡ್ತತ್. ಈ ಪೆದ ಸರ್ಕಾರಿ ಕಾಗದಪತ್ರ ಪಿಳ್ಳಾ ವಿದ್ಯಾವಂತಂಗಡ ಬಾಯಿಲ್ ಏರ ವಾಡಿಕೆಲ್ ಉಂಡ್. ಆಚೇಂಗಿ, ನಾಡ್ಲ ಇಂದೇಕೂ ಇನ್ನತ ಬಯ್ಯಲುಳ್ಳ ವರ್ಗಕಾರಳ

ಪೊಲೆಯಂದ್ ಕಾಕುವದ್ ಇಕ್ಕಲೂ ಉಂಡ್. ಪೊಲೆಯ ಹಿಂದೂಸ್ಥಾನತ್ ದ್ರಾವಿಡ ಪಿಳ್ಳಾ ಆರ್ಯಂಗ್‌ಕಂಜ ಬೆಂಬರಿಲ್ ಇಂಜಪುಂದ್ ಚರಿತ್ರಕಾರ ಅಭಿಪ್ರಾಯ ಪಡುವ. ಅಯಿಂಗಡ ಮೂಲ ವಿಷಯತರ ಮೀದ ದಾ.ಕೀನ್ ಎಣ್ಣುವ ವಿದ್ವಾಂಸ ಈ ಪೊಲೆ ಎಣ್ಣುವ.

Judging by their short stature, thick lips, low forehead & high cheek bones, they belong to the Negrito race, which once formed the substratum throughout the peninsula, though now submerged by the later arrivals of the Kolarians & Dravidians & the Aryans.

ಕೊಡಗರ ಪೊಲೆಯ ಕ್ರಿ.ಶ.ಕ್ ಮುಪ್ಪಡೆ ಇಂಜತ್‌ಂದ್ ಕಾಂಬ. ಆಚೇಂಗಿ, ಅಕ್ಕತ ಚರಿತ್ರರ ವಿವರ ಗೊತ್ತಿಲ್ಲತಾನಗುಂಡ್ ಇಯಂಗಡ ಸ್ಥಿತಿ ಎನ್ನನೆ ಇಂಜತ್‌ಂದ್ ಎಣ್ಣುವಕ್ ಕಯ್ಯಲೆ. ಆಚೇಂಗಿ, ಇವು ಅಂದಾಂಜ ಇಂದೇಕೆತ್ತನೆಕೂ ಏದೇ ಆಸ್ತಿ ಇಲ್ಲತೆ ಬೋರೆಯಿಂದ ತೋಟ, ಬೇಲ್‌ಲ್ ಆಳಳಾಯಿತ್ ನೈಚಂಡ್ ತಂಗಡ ಬದ್‌ಕನ ಕಷ್ಟತ್ ನಡ್‌ತಿಯಂದ್ ಉಂಡ್‌ಂದ್ ಎಣ್ಣೊಲು.

ಕೊಡಗಲ್ ಎರವ, ಕುರುಬ, ಮಲೆಕುಡಿಯಂಗಡ ಮೂಲಸ್ಥಾನ ಕೊಡಗ್ ಮಾತ್ರ ಅಲ್ಲತೆ ವೈನಾಡ್, ಮಲಬಾರ್ ಪಿಳ್ಳಾ ದ.ಕನ್ನಡತರ ನೀಲಗಿರಿಂದೂ ಎಣ್ಣೊಲು. ಆಚೇಂಗಿ ಕೆಂಬಟ್ಟಿ ಪೊಲೆಯಂಗ ಮಾತ್ರ ಕೊಡಗರ ಮೂಲ ನಿವಾಸಿಯಂದ್ ಎಣ್ಣೊಲು. ಬಲ್‌ತಕ್ಕೈ, ಎಡ್‌ತಕ್ಕೈ, ಪಾಲೆ ಪಿಳ್ಳಾ ಮಾರಂಗಿಯ ಬಯ್ಯಂಜ ಕೊಡಗ್‌ಕ್ ಬಂದಿತ್ ನೆಲೆ ನಿಂದವು. ಕೆಂಬಟ್ಟಿಯ ಮಾರಿಯಮ್ಮ, ಚಾಮುಂಡಿ, ಭಗವತಿಂದ್ ಕಾಕುವ ಪಾರ್ವತಿರ ಉಗ್ರರೂಪತನ ಪೂಜುವ. ಈ ದೇವತೆಕ್ ಕೋಳಿ ಪಿಳ್ಳಾ ಬೋರೆ ಜಾತಿಯಳ ಕೊಂದಿತ್ ತಂಗಡ ಪರಿಕೆ ಒಪ್ಪಾಚಿಡುವ.

ಕೊಡಗಲ್ 4ನೆ ಶತಮಾನತ್‌ಂಜ 11ಂಗೆತ್ತನೆ ಜೈನ ಅರಸಂಗ ಅಲ್ಲಲ್ಲಿ ಆಳಿಯಂದ್ ಇಂಜತ್‌ಂದ್ ಅಕ್ಕತ ಕಾಲತ ಶಾಸನತ್‌ಂಜ ಗೊತ್ತಾಕ್‌ಟ್ಟುವ. ಆ ಕಾಲತ್ ಕೊಡಗಲ್ ಜೈನ ಧರ್ಮ ಪಬ್ಬಿತ್‌ಂಜತ್ ಚರಿತ್ರೆ ಎಣ್ಣುವ. ಶಾಸನತ್ ಕ್‌ಗ್ಗಟ್ವಾನಾಡ್‌ರ ಬಿಳೂರ್ ಪಿಳ್ಳಾ ಶನಿವಾರಸಂತೆ ಹೋಬಳಿರ ಹಾರುವನಳ್ಳಿ, ಅರಕನಳ್ಳಿ ಪಿಳ್ಳಾ ನಿಡ್ತ ಊರ್‌ಲ್ ಅಕ್ಕ ಆಳನ ಬೋರೆ ಬೋರೆ ವಂಶತರ ಜೈನ ರಾಜಂಗ ಭೂಮಿನ ಜೈನ ಬಸದಿ ಪಿಳ್ಳಾ ಜೈನಗುರುವಕ್ ದಾನ ಆಯಿತ್ ಕೊಡ್‌ತದ್ ಗೊತ್ತಾಪ. ಈ ಅರಸಂಗಂಡ ಕಾಲತ ಜೈನಗುರುವ ಕೊಡಗರ ತಲಕಾವೇರಿಂಜ ಮೈಸೂರ್‌ರ ಯಡತೊರೆ (ಇಕ್ಕತ ಕೃಷ್ಣರಾಜ ನಗರ)ತಾಲೋಕ್‌ರ ಹನಸೋಗೆಕೆತ್ತನೆ ಜೈನ ಬಸದಿಯಡ ಮೀದ ಅಧಿಕಾರ

ಪಡ್ಂದಿತಿಂಜತ್ಂದ್ ಗೊತ್ತ್ ಕಟ್ಟುವ.

4ತ್ಂಜ 13ನೆ ಶತಮಾನಕ್ಕೆನೆ ಕೊಡಗಲ್ ಜೈನ ಅರಸಂಗ ಇಂಜತ್. ಅಲ್ಲಿಂಜ ಲಿಂಗಾಯತ ಧರ್ಮಕ್ ಸೇರ್ನ ರಾಜಂಗ ಕೊಡಗರ ಪೂರ್ವ ತೆರಿಲ್ ಕಾವೇರಿ ಪೊಳೆರ ಎಡ್ತೆಬರಿಲ್ ಕೊಡಗರ ಶ್ರೀರಂಗಪಟ್ಟಣ ಎಣ್ಣುವ ಪೆದತ್ ಪಟ್ಟಣ ಕಟ್ಟಿತ್ ತಂಗಡ ರಾಜಧಾನಿ ಆಯಿತ್ ಮಾಡಿಯಂಡತ್. ಇಲ್ಲಿ ಓರ್ ಶತಮಾನ ಆಳನ ಇವು ಮಿಳ್ಳಾಕ್ ತಂಗಡ ರಾಜಧಾನಿನ ಮೈಸೂರ್ ಜಿಲ್ಲೆರ ಪೆರಿಯಾಪಟ್ಟಣ್ ವರ್ಗಾವಣೆ ಮಾಡಿಯಂಡತ್. ಇಯಂಗಡ ಪೆರಿಯ ರಾಜ 'ಸಿಂಗ ಪಟ್ಟಣಾ'ಂದ್ ಇಂಜ ಆ ಟೌನ್‌ಲ್ ಕೋಟೆ ಕಟ್ಟಿತ್ ಅದಾಂಗ್ ತಾಂಡ ಪೆದತ್ 'ಪೆರಿಯಾಪಟ್ಟಣ್'ಂದ್ ಕಾಕ್‌ಚಿ. ಕ್ರಿ.ಶ. 4ನೆ ಶತಮಾನತ್ಂಜ 16ಂಗೆತ್ತನೆ ಆಳನ ಈ ರಾಜಂಗಡ ಕಾಲತ್ ಕೊಡಗಲ್ ಬೋರೆ ಬೋರೆ ಜಾತಿರ ಹಿಂದುವ ಇಂಜದ್ ಕಂಡ್ ಬಪ್ಪ. ಅಕ್ಕತ ಕಾಲತ ಶಾಸನತ್ ಧರ್ಮಶೆಟ್ಟಿ, ರಾಜ ವಲ್ಲಭ ಶೆಟ್ಟಿ, ಬೀರೇಗೌಡ, ಮಲ್ಲಿಗೌಡ, ಸಿದ್ದೇಗೌಡ, ಲಿಂಗೇಗೌಡ, ಈರಮ್ಮ, ಬಿಡದೆ, ಬೂವಯ್ಯ, ಬಮ್ಮೋಜ, ಮಲ್ಲೋಜ, ಬೊಮ್ಮದೇವ ಜಿನಯ್ಯ, ಸಾತ್ಯಯ್ಯ, ಮಾಯಣ್ಣ, ಮಲ್ಲಯ್ಯ, ವೆಂಕಟ್ಟ, ನನ್ನಗೌಡ, ಚಂದನಂದಯ್ಯ, ಜಕ್ಕಿಯಬ್ಬೆ ಇನ್ನತ ಪೆದ ಕಂಡ್ ಬಪ್ಪ.

## ಕೊಡವ

ಕೊಡಗಲ್ ದುಂಬ ಕಾಲತ್ಂಜ ಮುಖ್ಯ ಜನಾಂಗ ಆಯಿತ್ತುಳ್ಳ ಪಿಳ್ಳಾ ಕೊಡಗರ ಒಟ್ಟು ಜನಸಂಖ್ಯೆಲ್ ಸುಮಾರ್ ಮೂಂದಾತ್ ಓರ್ ಅಂಶ ಆಯಿತ್ತುಳ್ಳ ಕೊಡವ ಕೊಡಗಕ್ ಸುಮಾರ್ 7ತ್ಂಜ 8ನೆ ಶತಮಾನತ್ರ ಒಳ್‌ಲ್ ಕದಂಬ ಸೀಮೆಂಜ ಇಲ್ಲಿಕ್ ಬಂದನ್ನಕೆ ಕಾಂಬ. ಕೊಡಗರ ಪೆದ ಆದ್ಯ ಕ್ರಿ.ಶ.1174ನೆ ಇಸವಿಲ್ ಹುಣಸೂರ್‌ಲ್ 20ನೆ ಶಾಸನತ್ ಕಾಂಬ. ಇದತ್ ಎಲ್ಲಾ ನಾಡ್‌ರ ಕೊಡವ ಪೊನ್ನಂಪೇಟೆ ನಾಡ್‌ಲ್ ಪಾಲ್ವರೆ ಎಣ್ಣುವ ಜಾಗತ್‌ನ ರಾಜಧಾನಿ ಮಾಡಿಯಂಡ್ ಆಳಿಯಂಡ್ ಇಂಜ, ಚೆಂಗಾಳ್ಳ ರಾಜಮನೆತನತ್ ಪೆಮ್ಮ ವೀರಪ್ಪಂಡ ಪರ ಹೊಯ್ಸಳ ರಾಜಂಡ ದಂಡನಾಯಕ ಬೆಟ್ಟರಸಂಡ ಕೂಡೆ ಪಡೆ ಪೊತ್ತತ್ಂದ್ ಎಲ್ಲಿತ್. ಈ ಶಾಸನತ್ 'ಎಲ್ಲಾ ನಾಡ್‌ರ ಕೊಡವ'ಂದ್ ಎಲ್ಲಿತಿಪ್ಪಕ ಕೊಡವ ಈ ಕಾಲತ್ ಮುಪ್ಪಡೆ ಚೆನ್ನಂಗ್ ಶತಮಾನಕ್ ಬಯ್ಯ ಪಾಲ್ವರೆರ ಸುತ್ತ ಸುಮಾರ್ ನಾಡ್‌ಲ್ ನೆಲೆ ನಿಂದಿತಿಂಜತ್ಂದ್ ಗೊತ್ತಾಪ. ಇದಲ್ಲತೆ ಎಲ್ಲಾ ನಾಡ್‌ರ ಕೊಡವ ಚೆಂಗಾಳ್ಳರಸ ಪೆಮ್ಮವೀರಪ್ಪಂಗ್ ಸಹಾಯ ಮಾಡ್‌ಚಿಂತ್ ಎಣ್ಣಕ ಇವು ಧೀರಂಗ ಪಿಳ್ಳಾ ಪಡೆ ವಿದ್ಯೆಲ್ ಪಡಿಪುಕಾರ ಎಣ್ಣುವದ್ ಗೊತ್ತ್ ಕಟ್ಟುವ.

ಇವು ಕೊಡಗ್ ಎಲ್ಲಿಂಜ ಬಂದಿತ್ ನೆಲೆ ನಿಂದತ್ ಎಣ್ಣವಾಂಗ್ ಏದೇ ಎಳ್ತರ ಆಧಾರ ಇಲ್ಲೆ. ಇವು ಇಲ್ಲಿಕ್ ಬಲ್ಯ ಕಣಕ್‌ಲ್ ಬಂದಿತ್ ನೆಲೆ ನಿಂದತ್. ಇನ್ನೆ ನೆಲೆ ನಿಪ್ಪಕ ಈ ಬಾಗತ್ ಕುಂದ್‌ಕಾಡ್ ಇಂಜಾನಗುಂಡ್ 'ಕೊಡಿಮಲ್ಲೆನಾಡ್' ಎಣ್ಣವ ಪೆದ ಇಂಜತ್. ಕೊಡವ ಏರ ಕಣಕ್‌ಲ್ ಬಂದಿತ್ ನೆಲೆ ನಿಂದಾಂಗ್ ತಂಗಡ ಧೀರತನ ಪಿಳ್ಳಾ ಬುದ್ಧಿಪಂತ್ರಿಕೆಲ್ ತಂಗಡ ಪ್ರಭಾವ ಕಾಟ್‌ನಾಂಗ್ ತಾಕತ್ ಇಂಜಾನುಂಡ್ ಇಯಂಗಳ ಕೊಡವ, ಬಾಕಿ ಉಳ್ಳಯಿಂಗಳ ಪಕ್ಕತ ಪ್ರದೇಶಕಾರಾಂಡ್ ಕಾಕ್‌ಚಿಂದ್ ಎಣ್ಣೊಲು.

ಕೊಡವಕ್ ತಂಗಡ ಪಳೇಯ ಜಾತಿ ಪಿಳ್ಳಾ ಮೂಲತರ ವಿಷಯ ಹಾಲೇರಿ ರಾಜಂಗಡ ಕಾಲತ್ ಗೊತ್ತಿಂಜಾಲೇಂದ್ 1817ತ್ ಲಿಂಗರಾಜೇಂದ್ರಂಡ ಕಾಲತ್ ಕೊಡಗರ ವಿಸ್ತೀರ್ಣತನ ಕಂಡ್‌ಪುಡಿಪಕ್ ಕೊಡಗ್ ಬಂದಿತಿಂಜ ಓರ್ ಆರ್ಮಿ ಆಫೀಸರ್ ಇನ್ನೆ ಎಳ್ಳಪ.

"They (Coorgs) as will be imagined are totally ignorant of their own origin nor are there any grounds that could justify presumed that they are an ancient race. Their country holds out but few temptations to invasion & the mountains secure it in some measure from the encroachment of conquest. A lively curiosity is awakened as to their origin, which however is involved in an obscurity that leaves but few traces by which it could be removed"

ಆಚೀಂಗಿ, ಕೊಡವ ಕೊಡಗ್ ಉತ್ತರ ಹಿಂದೂ ಸ್ಥಾನತಂಜ ಬಂದಪೂಂಡ್ ಅಯಿಂಗಡ ತಡಿರ ಆಕಾರ, ತೋಲಾರ ರಂಗ್, ನೆತ್ತಿ, ಮಂಡರ ಓಡಾರ ಅಳತೆನುಂಡ್ ಮಾನವ ವರ್ಣನಾ ಶಾಸ್ತ್ರಜ್ಞಂಗ ಅಭಿಪ್ರಾಯ ಪಟ್ಟಿತ್. 1901ತ್ ಬಂಗಾಳತರ ಏಷ್ಯಾಟಿಕ್ ಸೊಸೈಟಿರ ತಿಂಗ ಪತ್ರಿಕೆಲ್ ಸರ್ ಥಾಮಸ್ ಹಾಲೆಂಡ್ ಕೊಡಗರ ಮೀದ ಇನ್ನೆ ವಿವರಣೆ ತಂದಿತ್.

He describes Coorgs as the finest race without any exception is Southern India & considers them as even superior to the Brahmans in respect of skin, colour, stature & prominence of the nose. Their average cephalic index is 80.6.

ಕೊಡವದ ಮೂಲಪುರುಷಂಗ ಹಿಂದೂಸ್ಥಾನತರ ಸಿಂಧು ಪೊಳೆರ ಬರಿಕಾಲೆ ವಾಯವ್ಯ ದಿಕ್ಕಿಂಜ ಮೊಹೆಂಜೊದಾರ ಪಿಳ್ಳಾ ಹರಪ್ಪ ನಲ್ಲ ಸ್ಥಿತಿಲ್ ಇಪ್ಪಕೆ ಬಂದಿತ್ ನೆಲೆ

ನಿಂದಿತಿಕ್ಕು. ಬಯ್ಯ ಅವು ಜನಸಂಖ್ಯೆಲ್ ಜಾಸ್ತಿ ಆನಾಂಗೊ, ಬೋರೆ ಏದೊ ಕಾರಣತ್ ಪಶ್ಚಿಮ ಕರಾವಳಿಕಾಲೆ ದಕ್ಷಿಣಕ್ ಪಿಳ್ಳಾ ಕೊಡಗಕ್ ಬಂದಿತಿಕ್ಕೊಂದ್ ಡಾ.ಹಟ್ಟನ್ ಎಣ್ಣುವ ಮಾನವ ಕುಲ ಶಾಸ್ತ್ರಜ್ಞ ಎಳ್ಳುವ. ಲಂವಂಡ ಅಭಿಪ್ರಾಯ ಇಂಗ್ಲೀಷ್‌ಲ್ ಇನ್ನನೆ ಉಂಡ್.

It appears to be a much a simpler & more satisfactory view to regard the brachycephalic stock as preceding the Aryans. We may suppose them to have entered into the Indus valley during the Mohanja Daro period & to have extended down to the west coast as far as Coorg forming the physical basis of several of the brachycephalic or mesatocephalic caste of Western India.

ಹರ್ಬರ್ಟ್ ರಿಸ್ಲೆ ಎಣ್ಣುವ ಇಂಗ್ಲೋರ್ ಐರೋಪ್ಯ ಮಾನವ ಕುಲ ಶಾಸ್ತ್ರಜ್ಞ ಕೊಡವದ ಮೀದ ಇನ್ನನೆ ಎಳ್ಳತ್.

Herbert Risley characterises the Kodavas as Indo Sythians & illustrates the Kodavas a specimen taking into consideration the proportion of the head, nose root to the nose & stature"

ಮುಂಬೈ ವಿಶ್ವವಿದ್ಯಾನಿಲಯತ್ ಪ್ರಾಧ್ಯಾಪಕ ಡಾ.ಗುರ್ಯೆ ಎಳ್ಳನ Caste & Class in India ಪುಸ್ತಕತ್ ಹರ್ಬರ್ಟ್ ರಿಸ್ಲೆರ ಅಭಿಪ್ರಾಯತ್‌ನ ಸಮರ್ಥನ ಮಾಡುವನ್ನಕೆ ಇನ್ನನೆ ಎಳ್ಳತ್.

A Scytho Dravidian type or western type characterizes the western coast from Gujrat to South Canara & then spreads inwards into Coorg, Mysore, the Deccan etc. He then gives the nasal index & remarks that the Vakkaliga, Coorg, Shenvi, Prabhu, Nagar, Chitpavan, Havika & Mahg are representations of the type.

ಕೊಡಗ್ ಗೆಜೆಟಿಯರ್ ಎಣ್ಣುವ ಕೊಡಗರ ಎಲ್ಲ ವಿಷಯತ್‌ನ ಮೈಸೂರ್ ರಾಜ್ಯತ್‌ರ ವಿದ್ಯಾ ಇಲಾಖೆರ ಮುಖ್ಯಾಧಿಕಾರಿ, ಪ್ರಾಚ್ಯಶಾಸ್ತ್ರತ್‌ರ ಅಧಿಕಾರಿ ಆಯಿತಿಂಬ ಲೂಯಿಸ್‌ರೈಸ್ ಮೈಸೂರ್ ಸರ್ಕಾರಕ್ ಎಳ್ಳಿ ಕೊಡತಿತ್ ಆ ಸರ್ಕಾರ 1878ತ್ ಪ್ರಕಟ ಪಡೆತ್‌ನ ಪುಸ್ತಕತ್ The Coorgs are the southernmost ex-



tension of a Scytho Dravidian type which prevails throughout the west of India ಎಳ್ಳುವ.

ಆನಗುಂಡ್ ಕೊಡವ, ಮಾನವಕುಲ ಶಾಸ್ತ್ರಜ್ಞಂಗಡ ಅಭಿಪ್ರಾಯಪೋಲೆ, ಕೊಡವ ಹಿಂದೂಸ್ಥಾನತ್ ವಾಯವ್ಯ ಬರಿಕಾಲೆ ಹಿಂದೂಸ್ಥಾನತ್ ನ ಸುಗ್ಗಿತ್ ಒಳ್ಳೆಕ್ ಬಂದ ಜನಡ ಕೂಡೆ ಕೂಡಿಯಾಡಿತ್ ಅಲ್ಲಿಂಜ ಪಶ್ಚಿಮ ಕರಾವಳಿಕಾಲೆ ದಕ್ಷಿಣಕ್ ಬಂದ ಎಚ್ಚೆಕೊ ಗುಂಪಾರ ಜನಡಾತ್ ಓರ್ ಗುಂಪಾರ ಜನಾಂದ್ ಗೊತ್ತಾಪ.

ಸರ್ ಎಸ್‌ಕಿನ್ ಪೆರ್ರಿ ಕೊಡಗ್ಗರ ಮೀದ ಇನ್ನನೆ ಎಳ್ಳುವ.

"He points out that the Kodavas have no resemblance to any of the races of South India & says that they are by far the finest race he had seen in India in point of Independent bearing, good looks & all the outward signs of well being."

ಆಚೇಂಗಿ, ಕೊಡವ ದ್ರಾವಿಡ ಬುಡಕೆಟ್ಟಾಕ್ ಕೂಡ್‌ನವುಂದ್ 1887ತ್ ಕೊಡಗ್ಗರ ಜಾತಿ ಪಿಗ್ಲಾ ಬುಡಕೆಟ್ಟಾ ಜನಾಂಗತ್ ಮೀದ ರಿಕ್ಟರ್ ಎಣ್ಣುವ ಚರಿತ್ರೆಕಾರ ಎಳ್ಳಿತ್. ಅನ್ನನೆ ಚೆನ್ನೆ ಅಧಿಪತ್ಯತ್ ದ್ರಾವಿಡ ಬುಡಕೆಟ್ಟಾರ ಜನಡ ಮೀದ ಎಳ್ಳಿನ ದಾ. ಮಕಲಿಯಾನ್ ಎಣ್ಣುವ ಮಾನವಕುಲ ಶಾಸ್ತ್ರಜ್ಞ ಇನ್ನನೆ ಎಳ್ಳಿತ್.

Dr. Maclean writing of the interior movements of the Dravidian race mentions the Nairs as having come from the North Kannada country.

ದಾ. ಮೆಕಾಲಿಯನ್ ಅಭಿಪ್ರಾಯಕೊತ್ ರಿಕ್ಟರ್ ಇನ್ನನೆ ಎಳ್ಳಿತ್.

It is very likely that the Coorgs as a branch of the same tribe have diverted to & settled in Coorg, where they displaced the anterior or Hill Tribes already described & asserted their lordship over them.

ಕೊಡವ ಸಂಶೋಧಕಂಗಡಾತ್ ಚೆನ್ನಂಗಾಳ್ ಕೊಡವ ಆರ್ಯ ಇಲ್ಲೇಂಗಿ ಹಿಂದೂಸ್ಥಾನತ್ ನೆಲೆ ನಿಂದ ಸಿಥಿಯ ಬುಡ ಕೆಟ್ಟಾಕಾರಂದೂ, ಚೆನ್ನಂಗಾಳ್ ದ್ರಾವಿಡಂಗಂದೂ ಅಭಿಪ್ರಾಯ ಪಟ್ಟಿತ್. ದ್ರಾವಿಡಂಗ ಮೊಹೆಂಜೊದಾರೊ ನಾಗರಿಕತೆರ ಕಾಲತ್ ಉತ್ತರ ಹಿಂದೂ ಸ್ಥಾನತ್ಂಜ ದಕ್ಷಿಣಕ್ ಬಂದವುಂದ್ ಚೆನ್ನಂಗಾಳ್ ಎಣ್ಣುವ.



ಆಚೇಂಗಿ, ಇಕ್ಕಾಕಣೆ ಕೊಡವಡ ಮೂಲತರ ವಿಷಯ ಎಳ್ವನ ಏರ ಮಾನವಕುಲ ಶಾಸ್ತ್ರಜ್ಞಂಗಡ ಅಭಿಪ್ರಾಯ ಕೊಡವ ಉತ್ತರತ್ ನೆಲೆ ನಿಂದ ಸಿಥಿಯನ್ ವಂಶಕಾರಂದ್ ಉಳ್ಳಾಂಗ್ ಸಮರ್ಥನೆ ಮಾಡಿಯವಲೂಂದ್ ಕಾಂಬ. ಇಕ್ಕ ಕೊಡವಡ ಮೂಲ ಪುರುಷಂಗ ಕೊಡಗ್ಗಕ್ ಬಂದಿತ್ ನೆಲೆ ನಿಪ್ಪಕ್ ಇಂಜ ಕಾರಣ ಎಂತೇಂದ್ ನೋಟೊಂಡು.

ಕೊಡಗ್ಗಲ್ 9ನೆ ಶತಮಾನತ್ ಕದಂಬ ವಂಶಕ್ ಸೇರ್ನ ದುದ್ದರಸ ಕೊಡಗ್ಗರ ಸೋಮವಾರಪೇಟೆಲ್ ಆಳುವ ಇಂಜತ್ ಎಣ್ಣುವಾಂಗ್ ಆಧಾರ ಆಯಿತ್ ಯಡೂರ್ ಸುಗ್ಗಿದೇವಡ ಗುಡಿಲ್ ಓರ್ ಶಾಸನ ಉಂಡ್. ಅದೇ ನೇರತ್ ಕದಂಬ ವಂಶತರ ತುಂಡರಸ ಗೋವೆ, ಪಿಳ್ಳಾ ಹಾನಗಲ್ಲನ್ ಆಳುವ ಇಂಜತ್.

ಕದಂಬ ವಂಶ ನಲ್ಲ ಸ್ಥಿತಿಲ್ ಬನವಾಸಿಲ್ ಆಳಿಯಂಡ್ ಇಪ್ಪಕ ಆ ವಂಶತ್ ಚಂದ್ರವರ್ಮ ಎಣ್ಣುವ ರಾಜ ಇಂಜದ್ ಗೊತ್ತಾಪ. ಕ್ರಿ.ಶ. 6ತ್ಂಜ 8ನೆ ಶತಮಾನತರ ಒಳ್ಳಲ್ ರಚನೆಯಾನ 'ಕಾವೇರಿ ಪುರಾಣ'ತ್ ಮತ್ಸ್ಯದೇಶತರ ರಾಜ ಚಂದ್ರವರ್ಮ ಕೊಡಗ್ಗಕ್ ಬಂದಿತ್ ಕೊಡಗ್ಗನ ಆದಿ ನಿವಾಸಿಯಳುಂಡ್ ತಾಂಡ ಪುಡ್ತತ್ ಬೆಚ್ಚಂಡತ್ಂದೂ, ಅಂವಂಡ ಮೋಂವ ದೇವಕಾಂತ ಕೊಡವಡ ಮೂಲಪುರುಷಾಂದೂ ಎಣ್ಣಿತ್. ಮತ್ಸ್ಯದೇಶ ಧಾರವಾಡ ಜಿಲ್ಲೆರ ಹಾನಗಲ್ಲರ ಸುತ್ತ ಉಳ್ಳ ಜಾಗ ಎಣ್ಣುವ.

1801ತ್ ಮೈಸೂರ್ ದೀರ್ಘ ಚರಿತ್ರೆ ಎಳ್ವನ ಸರ್ ಮಾರ್ಕ್ ವಿಲ್ಕ್ಸ್ ಎಣ್ಣುವ ಬ್ರಿಟಿಷ್ ಆರ್ಮಿ ಆಫೀಸರ್ ಪಿಳ್ಳಾ ಚರಿತ್ರೆಕಾರ, ಕದಂಬ ವಂಶತರ ರಾಜಂಡ ಅಧೀನತ್ ಕೊಡಗ್ಗಲ್ ನೆಲೆ ನಿಂದ ಕೊಡವಡ ಮೂಲ ಪುರುಷಂಗ ಸೈನಿಕಂಗ. ಚಂದ್ರವರ್ಮಂಡ ಸಂತಾನಕಾರ ಕೊಡಗ್ಗಕ್ ಬಂದಲ್ಲಿ / ಅದೊಂಡ ಭಾಗತನ ಆಳಿಯಂಡ್ ಇಪ್ಪಕ ಇಲ್ಲಿಕ್ ತಂಗಡ ರಾಜಂಡ ಕೂಡೆ ಬಂದಿತ್ ನೆಲೆ ನಿಂದತ್ಂದ್ ಅಭಿಪ್ರಾಯ ಪಡುವ. ಇದೊಂಗ್ ಓರ್ ಧಾರ್ಮಿಕ ರೂಪು ಕೊಡ್ತಿತ್ ಅದೊನ ಕಾವೇರಿ ಪುರಾಣತ್ ಕೂಟಿತ್ಂದ್ ಚರಿತ್ರೆಕಾರಂಗಡ ಅಭಿಪ್ರಾಯ.

1398ನೆ ಇಸವಿಲ್ ರಚನೆ ಆನ ಮಂಗರಾಜಂಡ ಕನ್ನಡ ನಿಘಂಟ್ಲ್ 'ಕೊಡವ ಹಿಂದೂಸ್ಥಾನತರ ಪೊರ್ಮೆಂಜ ಬಂದವು, ಇಲ್ಲಿಯತ ಹಿಂದುವಡ ಕೂಡೆ ಕೂಡಿಯಂಡವು, ಬೋಟೆಕ್ ಪೋಪ ಜನಾ'ಂದ್ ವರ್ಣನೆ ಮಾಡಿತ್. ಎನ್ನಂಗಣ್ಣಕ ಈ ನಿಘಂಟ್ ಕಾಲತ್ ಕೊಡವ ತಂಗಡ ಪೊರದೇಶತರ ವೈಶಿಷ್ಟ್ಯ ಕಾಪಾಡಿಯಂಡ್ ಬಂದವೂಂದ್ ಗೊತ್ತಾಪ. ಆ ಕಾಲತ್ ಕೊಡಗ್ಗ ಕಾಡ್ಂಜ ದುಂಬಿತಿಂಜಾಂಗ್ ಆ ಕಾಲತ್ ಕಾಡ್ಜಾತಿಯಳ ಬೋಟೆಯಾಡುವಕ್ ಕೊಡವಳೆ ಅಲ್ಲ, ಕಾಡ್ ಪಕ್ಕ ಭೂಮಿ, ಮನೆ ಮಾಡಿಯಂಡ್ ಇಂಜ ಎಲ್ಲಾ ಜನ ಬೋಟೆಕಾರಳೆ ಆಯಿತ್



ಇರೊಂಡಿಂಜತ್.

ಕೊಡವಡ ಮೂಲಪುರುಷಂಗ ಕೊಡಗ್ಗಲ್ ನೆಲೆನಿಂದಪಿಳ್ಳಾ ಅಯಿಂಗಕೂ ವೈನಾಡ್ ಪಿಳ್ಳಾ ಉತ್ತರ ಮಲಬಾರ್ ಜನಡ ಸಮ್ಮಂಧ ದುಂಬ ಬೊಳ್ಳಂದತ್. ಅವು ಕಾಲಕ್ ದಂಡ್, ಮೂಂದ್ ಕುರಿ ಮಲಬಾರ್ ಕರಾವಳಿಕ್ ಪೋಯಿತ್ ಅತ್ತಡ ಮೀದ ಅಕ್ಕಿ ಪೋರಿಯಂಡ್ ಅಕ್ಕಿನ ಅಲ್ಲಿ ಮಾರಿತ್ ಪಾಪಾಸ್ ಬಪ್ಪಕ ತಂಗಕ್ ಬೊಂಡಿಯಾನ ಉಪ್ಪು, ಇರಾಂಬ್ ಸಾಮಾನ್, ಬಟ್ಟೆ ಇನ್ನತಾನ ಕೊಂಡ ಬಪ್ಪ ಇಂಜತ್.

ಕೊಡವಡ ಮೂಲಪುರುಷ ಕೊಡಗ್ಗಕ್ ಬಪ್ಪಕ ಉ.ಕನ್ನಡತ್ ಓರ್ ಪಳೇಯ ಕನ್ನಡ ತಕ್ಕನ ಪರಂದವ ಇಂಜತ್ ಕಾಂಬ. ಕೊಡಗ್ಗಕ್ ಬಂದಪಿಳ್ಳಾ ಇಲ್ಲಿಯತ ಮೂಲನಿವಾಸಿಯ ಪರೆವ ಇಂಜ ತಮಿಳ್ ಮಿಶ್ರ ಆನ ಮಲಯಾಳ ಪಿಳ್ಳಾ ಮಲಬಾರ್ ಕರಾವಳಿರ ಜನಡ ಮಲಯಾಳ ಕೂಡಿತ್ ಇಕ್ಕ ಕೊಡವ ತಂಗಡ ತಕ್ಕನ ಅನುಸರಣೆ ಮಾಡಿಯಂಡ್ ಕೊಡಗ್ಗಲ್ ಉಳ್ಳ ಬೋರೆ ಎಚ್ಚಕೋ ಜಾತಿಯ ಪರೆವ ಇಂಜ ಕೊಡವ ತಕ್ಕ ಆಯಿತಿಕ್ಕು. 'ಕೊಡವ ತಕ್ಕ ಸ್ವತಂತ್ರ ದ್ರಾವಿಡ ತಕ್ಕ' ಎಣ್ಣುವವೂ ಉಂಡ್. ಆಚೇಂಗಿ, ಈ ವಿಷಯತ್ ಏದೇ ಓರ್ ಆಖೀರಿ ತೀರ್ಮಾನ ಕೊಡಪಕ್ ಸಾಧ್ಯ ಇಲ್ಲೆ.

ಕೊಡವ ಮಲಬಾರ್ ಹಿಂದೂವಡ ಸಮ್ಮಂಧತೆ ಇಂಜಾನುಂಡ್ ಅಲ್ಲಿಯತಪೋಲೆ ಕೊಡಗ್ಗರ ಊರ್, ನಾಡಲ್ ತಿರಿಕೆ ಕೆಪ್ಪಚಿ. ಅಲ್ಲಿ ಪೂಜೆ ಮಾಡುವ ಇಂಜ ಮಾದೇವ, ಭಗವತಿ, ಶಾಸ್ತಾವು ದೇವತೆಯಳ ಇಲ್ಲಿಯೂ ಪೂಜೆ ಮಾಡುವಕಾಚಿ. ಕೊಡಗ್ಗಲ್ ಕೊಡವ ಆದ್ ಕಾವೇರಿ ಪೊಳೆರ ದಕ್ಷಿಣನಾಡಲ್ ಬೊಳ್ಳಂದವು. ಈ ನಾಡ್ ಮಲಬಾರ್ಕೂ, ವೈನಾಡ್ಕೂ ಮುಟ್ಟಿಯಂಡಿತ್. ಈ ಕಾಲತ್ ಅಲ್ಲಿಯತ ಊರ್ಕ್ ಪೋಪಕ್ ವೆಹಿಕಲ್ ಪೋಪಕುಳ್ಳ ಚಾಯುಳ್ಳ ರಸ್ತೆ ಉಂಡ್. ಆಚೇಂಗಿ, ಬ್ರಿಟಿಷ ಕೊಡಗ್ಗನ ಪುಡ್ಚವಾಂಗ್ ಮುಪ್ಪಡ ಆ ಜಾಗಕ್ ಕುಂದ್ ಕುಡ್ಪುಕಾಲೆ ಅತ್ತ, ಆನೆ ಪಿಳ್ಳಾ ಪಲ್ಲಕ್ಕಿಲ್ ಪೋಪನ್ನತ ಕಾಲ ಬಟ್ಟೆ ಮಾತ್ರ ಇಂಜತ್.

ಕೊಡವಕ್ ನಾಲ್ಕಾಡ್ ಪಾಡಿ ಇಗ್ಗುತ್ತಪ್ಪ ದೇವತೆ ಕುಲದೈವ. ಈ ದೇವಡ ಸಮ್ಮಂಧಿಯಳಾನ ಕಡಿಯತ್ತಾಡ್ ಚೋಮಕುಂದ್ ತಂಬಿರಾನ್, ಪಾಲೂರಪ್ಪ ಎಣ್ಣುವ ದೇವತೆ ಕಡಿಯತ್ತಾಡ್ ಕರಡತ್ ಚೋಮಕುಂದ್ಲೂ, ಕುಯ್ಯಂಗೇರಿ ನಾಡಲ್ ಉಳ್ಳ ಪಾಲೂರಲೂ ಪ್ರತಿಷ್ಠಾಪನೆ ಆಯಿತ್. ಈ ದೇವತೆಯಡ ಪೆರಿಯ ಅಣ್ಣ ಕೊಡಗ್ ತೆರಿಂಜ ಚೆನ್ನಂಗ್ ಮೈಲ್ ದೂರತ್ ಉತ್ತರ ಮಲಬಾರ್ ಬೈತೂರ್ಲ್ ಪ್ರತಿಷ್ಠಾಪನೆ ಆಯಿತುಂಡ್. ಇಂವಂಡ ಎಳಿಯ ತಮ್ಮಣ ಕುಟ್ಟುತಂಜ ಮಾನಂದವಾಡಿಕ್ ಪೋಪ ಬಟ್ಟೆಲ್ ವೈನಾಡ್ ತಿರ್ನೆಲ್ಲಿಲ್ ಪ್ರತಿಷ್ಠಾಪನೆ ಆಯಿತ್. ಇಂವಂಗ್ ಮಲಯಾಳಕಾರ

'ಪೆರುಮಾಳ್', ಕೊಡವ 'ಪೆಮ್ಮಯ್ಯ'ಂದ್ ಕಾಕುವ. ಈ ಸೋದರಂಗಡ ತಂಗಿ ಜಾತಿಭ್ರಷ್ಟಳಾಯಿತ್ ಕೊಡಗ್ಗರ ಪಾಡಿ ನಾಲ್ಕಾಡ್ ಯವಕಪಾಡಿಲ್ 'ಪನ್ನಂಗಾಲತಮ್ಮಿ' ಎಣ್ಣುವ ಪೆದತ್ ಹರಿಜನಳುಂಡ್ ಅಯಿಂಗಡ ದೇವತೆ ಆಯಿತ್ ಪೂಜೆ ಮಾಡ್ಚಿಟ್ಟವ.

ಪೌರಾಣಿಕ ಆಯಿತ್ ಮಲಬಾರ್ಂಜ ಈ ಅಂಜಿ ಸೋದರಂಗ ಪಿಳ್ಳಾ ಓರ್ ಸೋದರಿ ಪೊರ್ಟಿತ್ ತಂಗಡ ಬಟ್ಟೆಲ್ ಅಲ್ಲಿ ಯತ ದೇವತೆ ಆಯಿತ್ ನೆಲೆ ನಿಂದತ್ಂದ್ ಎಣ್ಣೊನಕೊ, ಚಾರಿತ್ರಿಕ ಆಯಿತ್ ನಂಗ ಈ ಎಲ್ಲ ದೇವತೆಯಡ ಪಂಡ್ ಕಾಲತ್ ಭಕ್ತಂಗ ಆಯಾಯ ಜಾಗತ್ ಪ್ರತಿಷ್ಠಾಪನೆ ಮಾಡ್ಚಿಂದ್ ಎಣ್ಣೊಲು.

ಬೈತೂರ್ಲ್ ಕಾಲಕ್ ಒಮ್ಮೆತೆ ನಡಪ ಪತ್ತ್ ದಿನತಾರ ನಮ್ಮೆಲ್ ಕೊಡಗ್ಗರ ಚೆನ್ನಂಗ್ ಒಕ್ಕಕಾರ ಕಾಲಕ್ ಒಮ್ಮೆತೆ ಅಕ್ಕಿನ ಅತ್ತಡ ಮೀದ ಪೋರಿಯಂಡ್ ಬೈತೂರ್ಕ್ ಪೋಯಿತ್ ತಂಗಡ ಪರಿಕೆನ ಒಪ್ಪಿಚಿಡೊಂಡು. ಬೈತೂರ್ಕ್ ಕೊಡಗ್ಗಂಜ ಪೋನ ಕೊಡವಕ್ ಪತ್ತನೆ ದಿನ ವಿಶೇಷ ಮರ್ಯಾದಿ, ಊಟ, ತಕ್ಕಾರ ಕೊಡಪ.

ಕೊಡಗ್ಗರ ಊರ್ ತಿರಿಕೆಲ್ ದೇವ, ಮನುಷ್ಯಂಡ ಮೀದ ತಿರುವಳ ಬಪ್ಪಕ ಆ ದೇವ ಇಂದೇಕೊ ಮಲಯಾಳತೆ ತಕ್ಕ ಪರೆಯುವ. ಕೊಡಗ್ಗರ ಊರ್ ತಿರಿಕೆಲ್ ದೇವಡ ತಿರುವಾಳ ಬಪ್ಪ ಚೆನ್ನಂಗ್ ಒಕ್ಕತಾರ ಜನ ಇಂದೇಕೊ ಬೈತೂರ್ ತಿರಿಕೆರ ಅಧಿಕಾರಿಯಳುಂಡ್ ತಿರುವಾಳ ಬಪ್ಪ ಅಧಿಕಾರತ್ನ ಆದ್ಯ ಪಡ್ಂದವಂಡು.

ಮಲಬಾರ್ಲ್ ರೂಢಿಲ್ ಉಳ್ಳ ಮಂದಣ್ಣ ಮೂರ್ತಿ, ವಿಷ್ಣು ಮೂರ್ತಿಯಳ ಕೊಡವ ಕಾಲಕ್ ಒಮ್ಮೆ ಇಲ್ಲೇಂಗಿ ದಂಡ್ ಕಾಲಕ್ ಒಮ್ಮೆತೆ ತಂಗಡ ಮನೆಲ್ ಆ ದೇವಡ ವೇಷ ಇಡುವಕ್ ಮಲಯಾಳತ್ಂಜ ಇಲ್ಲಿ ಬಂದಿತ್ ನೆಲೆ ನಿಂದಿತುಳ್ಳ ಬಣ್ಣಂಗ, ಮಲಿಯಂಗ, ಪಣಿಕಂಗಳುಂಡ್ ಕೆಟ್ಟಚಿಟ್ಟಿತ್ ಪೂಜುವ. ಊರ್ ತಿರಿಕೆರ ಕಾಲತಾರ ನಮ್ಮೆಲ್ ಚಾಮುಂಡಿ ಪಿಳ್ಳಾ ಕುಟ್ಟಿಚಾತನ ಕೆಟ್ಟಚಿಟ್ಟಿತ್ ಪೂಜುವ.

ಕೊಡವ ಕಾಲಕ್ ಮುಖ್ಯ ಆಯಿತ್ ಮೂಂದ್ ನಮ್ಮೆನ ಕೈಪ. ಇದ್ ಸೆಪ್ಟೆಂಬರ್ಲ್ ಕೈಲ್ ಪೊವ್ವ್, ಅಕ್ಟೋಬರ್ಲ್ ಕಾವೇರಿ ಚಂಗ್ರಂದಿ ಪಿಳ್ಳಾ ನವೆಂಬರ್/ಡಿಸೆಂಬರ್ಲ್ ಬಪ್ಪ ಪುತ್ತರಿ ನಮ್ಮೆ.

ಕೈಲ್ ಪೊವ್ವ್ ಎಣ್ಣಕ ಆಯುಧಪೂಜೆ ಮಾಡಿತ್ ಬೋಟೆಕ್ ಪೋಪಕ್ ಸುರು ಮಾಡುವ ನಮ್ಮೆ. ಕಾವೇರಿ ಪೊಳೆ ಪುಟ್ಟನಲ್ಲಿಂಜ ಕೊಡಗ್ಗಲ್ ಬರ್ಕತ್ ದುಂಬಿತಂದ್ ಕೊಡಗ್ಗರ ಜನ ನಂಬಿತುಳ್ಳಾನುಂಡ್ ಕಾವೇರಿ ಪೊಳೆನ ದೇವತೆಂದ್ ಗೇನ ಮಾಡಿತ್, ತೊಲೆಯಾರ್ ಚಂಗ್ರಂದಿರಂದ್ ಕೊಡಗ್ಗರ ಜನಡಾತ್ ಏರ ಜನ ಪಿಳ್ಳಾ ಕೊಡಗ್ಗಂಜ



ಪೊರಮತ ಜಿಲ್ಲೆಕಾರಳೂ, ಕೇರಳಕಾರ, ತಮಿಳುಡಾಕಾರ ಕಾವೇರಿ ಪೊಳೆ ಕನ್ನಿಕೆರ ಕೂಡೆ ಸಂಗಮ ಆಪ ಜಾಗತ್ ಭಾಗಮಂಡಲ ಕ್ಷೇತ್ರತ್ಂಜ ನಡಂದಂಡ್ ಸುಮಾರ್ ನಾಲಾ ಮೈಲ್ ದೂರತ್ ಬ್ರಹ್ಮಕುಂದಾರ ನಡೂಲ್ ಕಾವೇರಿ ಪೊಳೆರ ಉಗಮ ಸ್ಥಾನಕ್ ತೀರ್ಥಕಾಯಿತ್ ಬಪ್ಪ.

ಪುತ್ತರಿ ಎಣ್ಣಕ 'ಪುದಿಯ ಅಕ್ಕಿ'ಂದ್ ಅರ್ಥ. ಪುದಿಯ ನೆಲ್ಲರ ಬೊಳೆ ಬಪ್ಪಕ ಅದೊಂಡ ಮಲಿಂಜ ಅಕ್ಕಿ ತೊಲ್ಚಿತ್ ಪಾಯಸ ಮಾಡಿತ್ ಈ ನಮ್ಮೆ ಕೈಪ. ಇದ್ ಸುಮಾರ್ ಆರ್ ದಿನಕೆತ್ತನೆ ಊರ್, ನಾಡಾರ ಪರಂಬಾಲ್ ವಾದ್ಯತೋಡೆ ಆಟ್ ಪಾಟ್ಲ್ ಕೈಪನ್ನತ ನಮ್ಮೆ.

ಈ ನಮ್ಮೆ ಅಲ್ಲತೆ ಕಾಲಕ್ ಒಮ್ಮತೆ ಕೊಡವಡ ಪ್ರತಿಯೋರ್ ಒಕ್ಕತೂ ತಂಗಡ ಒಕ್ಕಡ ಮೂಲಪುರುಷಂಗ್ ಒಕ್ಕಚಿ ಕೂಡಿತ್ ಪೂಜೆ ಮಾಡುವ. ಒಕ್ಕಡ ಮೂಲಪುರುಷನೆ ಕಾರಣ. ಮಲಯಾಳತ್ 'ಕಾರಣವನ್' ಎಣ್ಣುವ. ಕೊಡವ ಒಕ್ಕತರ ಮೂಲ ಪುರುಷನೆ ಪೂಜೆ ಮಾಡುವದ್ ಮಲಬಾರ್ ನಾಯರಂಡ ಕೂಡಿಯಾಟತ್ಂಜ ಬಾತ್ಂದ್ ಕಾಂಬ.

ಕೊಡವ ತಂಗಡ ಊರಾರ ತಿರಿಕೆಲ್ ಅಕ್ಕಿರ ಪರಿಕೆ ಒಪ್ಪಚಿಡುವ, ಆಡುವ. ಆಚೇಂಗಿ, ಕೊಡವ ತಂಗಡ ಏದೇ ನಮ್ಮೆ ನಾಳ್, ನಲ್ಲದ್ ತೀಯಾಲ್ ಪಟ್ಟಮ, ಪುರೋಹಿತಂಗಳ ಕಾಕ್ಚಿಡುಲೆ. ಕೊಡವಡ ಮಂಗಲಕೂ ಬೋರೆ ಹಿಂದೂವಡ ಮಂಗಲ ಪದ್ಧತಿಕೂ ವ್ಯತ್ಯಾಸ ಉಂಡ್. ಕೊಡವ ಮಂಗಲತರ ಮೂರ್ತತ್‌ರಂದ್ ತಂಗ, ತಂಗಡ ಮನೆಕ್ ಕೊಣ್ಣ, ಮೂಡಿ ಮುಕ್ಕಾಲಿಲ್ ಅಳ್ತಂಡ್ ತಂಗಡ ಪೆರಿಯಯಿಂಗಳುಂಡ್ ಆಶೀರ್ವಾದ ಪಿಳ್ಳಾ ಇನಾಂ ಪಡಂದವ. ಅಂದ್ ಒಯಿಪತ್ / ಪಿತ್ಯಾಂದ್ ಪೊಲಾಕ ಕೊಣ್ಣ, ಮೂಡಿರ ಮನೆಕ್ ಪೋಯಿತ್ ಅಲ್ಲಿ ಬಾಳೆ ಕೆತ್ತಿತ್ ಮೂಡಿರ ಕೈ ಪುಡ್ಚಿ ಒಪ್ಪಿತ್ ತಾಂಡ ಮನೆಕ್ ಮೂಡಿ ಪಿಳ್ಳಾ ಅವಡ ಬೆಂದುವಳ ಕೂಟಿಯಂಡ್ ಮನೆಕ್ ಬಪ್ಪ. ಮೂಡಿನ ತಾಂಡ ಮನೆಕ್ ಕೂಟಿಯಂಡ್ ಬಂದ ಬೈಟ್ ಕೊಣ್ಣ, ಮೂಡಿನ ಕೋಂಬರೆಕ್ ಕೂಟಾನಪಿಳ್ಳಾ ಕೊಡವಡ ಮಂಗಲ ಪದ್ಧತಿ ಆಖೀರಿಯಾಪ.

ಕೊಡವ ಆಣಾಳ ಉತ್ತರ ದೇಶತ್ಂಜ ಬಪ್ಪಕ ಇಟ್ಟವ ಇಂಜ ಬೋಳೆಂಜ ಮೊಣ್ಣೆಕಾಲ್‌ಕೆತ್ತನೆ ಮುಚ್ಚುವ ಗೌನ್, ನಡುರ ಕೊಡಿಕ್ ಓರ್ ಶರ್ಟ್ ಪಿಳ್ಳಾ ನಡುರ ಕೋದಕ್ ಮೊಣ್ಣೆಕಾಲ್‌ಕೆತ್ತನೆ ಓರ್ ಚಡ್ಡಿ. ಮಂಡೆಕ್ ಎಕ್ಕೋಲು ಓರ್ ವಸ್ತ್ರ, ಮಂಗಲ ಪಿಳ್ಳಾ ಬೋರೆ ನಮ್ಮೆ ನಾಳಾರ ದಿನತ್ ಮಂಡೆರ ಮೀದ ಚಪ್ಪಟೆಯಾನ ಓರ್ ಮಂಡೆತುಣಿ ಇಟ್ಟವ ಇಂಜತ್. ಗೌನ್ ನಡುರ ಸುತ್ತ ಟೈಟಾಯಿತ್ ನಿಪ್ಪನ್ನೆ ಉದ್ದ ಬಟ್ಟೆನ ಮಡಕಿತ್, ಕೆಟ್ಟಿತ್ ನಡುರ ಎದಿಕೆ ಆಂಡ ತುದಿನ ಬುಡುವ ಇಂಜತ್. ಕೈಲೆ ಬಟ್ಟೆ ಪೊಂದಿತ್,

ಕೊಂಡಿ, ಹುಕ್ ಇನ್ನತದ್ ಇಲ್ಲತಿಂಜ ಆ ಕಾಲತ್ ಲಾಡಿ ಪಿಳ್ಳಾ ನಡುಪಟ್ಟಿನುಂಡೆ ಆಣಾಳ ತಂಗಡ ಪೊರಪಾಡ್‌ನ ಮುರ್ಕಿ ಬೆಚ್ಚವಂಡಿಂಜತ್.

ಕೊಡವತಿಯಡ ಪೊರಪಾಡ್‌ಲ್ ಮಾತ್ರ ಅವು ಕೊಡಗ್‌ಕ್ ಬಂದಪಿಳ್ಳಾ ಅಯಿಂಗಡ ಪೊಡಿಯತ್‌ರ ಎದಿಕೆ ಇಂಜ ನೆರಿ ಬಯ್ಯಕ್ ಪೋಚಿ. ಕೊಡಗ್ ಕೈಂಜ ಶತಮಾನತ್‌ರ ಮಧ್ಯಕೆತ್ತನೆ ಕೆರೀಯ ಕಾಡ್, ವಿಷಜಾತಿಯ ಪಿಳ್ಳಾ ಕ್ರಿಮಿಯಳುಂಡ್ ದುಂಬಿ ಪೋಯಿತಿಂಜಾಂಗ್ ಇಲ್ಲಿಯತ ಆಣಾಳ ಪಿಳ್ಳಾ ಪೊಣ್ಣಾಳ ನಾಡ್‌ಲ್ ತಿರಿಕಳಿಪಕ ಕಾಡ್ ಜಾತಿಯಳುಂಡ್ ತಪ್ಪಾಚಿಟ್ಟವಕ್ ಚುರ್‌ಕ್‌ಲ್ ಮರ ಪತ್ತೊಂಡಿಂಜತ್.

ಕೊಡಗ್‌ರ ಆಖೀರಿ ರಾಜಂಡ ಕಾಲತ್ ಎಣ್ಣಕ 19ನೆ ಶತಮಾನತ್‌ರ ಆದ್ಯತ ಮೂಂದ್ ದಶಕತೂ ಪೊಣ್ಣಾಳ ಮರ ಪತ್ತಿಯಂಡ್, ಅಲ್ಲಿಂಜ ಶತ್ರುವಕ್ ಬಿಲ್ಲ್ ಬಾಣ ಪೊಯ್ಯುವ ಇಂಜತ್‌ಂದ್ ಕೊಡಗ್‌ಕಾರನೊಬ್ಬ ಬ್ರಿಟಿಷ್ ಮಿಲಿಟರಿ ಅಧಿಕಾರಿಕ್ ಹೇಳಿಕೆ ಕೊಡ್‌ತತ್‌ಂದ್ ರಾಜಂಡ ಕಾಲತ್‌ರ ರೆಕಾರ್ಡ್‌ನುಂಡ್ ಗೊತ್ತ್‌ಕ್‌ಟ್ಟುವ.

ಕೊಡಗ್‌ರ ಪತ್ತಿಮ ತೆರಿಲ್ ವಾಸ ಇಂಜ ಮಲೆ ಕುಡಿಯಡ ಪೊಣ್ಣಾಳ ಪನೆಮರ ಪತ್ತಿತ್ ಬೊಳ್ಳೆಕಳ್ಳಿನ ಕೋದಕ್ ಉಳ್ಳಪುವ ಇಂಜತ್‌ಂದ್ ಪಂಡೇತ ಬಯತಾನವು ಎಣ್ಣುವ ಇಂಜತ್. ಇನ್ನನೆ ಮರಪತ್ತುವಕ್ ಸುಲಭ ಆಂಡುವೇಂಗಿ ಪೊಣ್ಣಾಳ ತಂಗಡ ಪೊಡಿಯತ್‌ರ ನೆರಿನ ಬೆಂಬರಿಕ್ ಚಿಕ್ಕಾಚಿಟ್ಟೊಂಡಿಂಜತ್. ಈ ಕಾರಣತ್‌ನಗುಂಡ್ ಪೊಣ್ಣಾಳ ತಂಗಡ ಪೊಡಿಯತ್‌ರ ನೆರಿನ ಬಯ್ಯಕ್ ಚಿಕ್ಕಾಚಿಟ್ಟವನ್ನಕೆ ಮಾಡಿಯಂಡತ್.

ಕೊಡಗ್‌ರ ಮೂಲಪುರುಷಂಗ ಕೊಡಗ್‌ಕ್ ಕ್ರಿ.ಶ. 5,6ನೆ ಶತಮಾನ ಕೈಂಜಪಿಳ್ಳಾ ಬಂದಿತ್ ಉಂಡೇಂಗಿಯೂ, ಬಯ್ಯಂಜ ಮಲಬಾರ್, ವೈನಾಡ್‌ಂಜ ಜನ ಕೊಡಗ್‌ಕ್ ಬಂದಿತ್ ಇಲ್ಲಿಯತ ಕೊಡಗ್‌ಕಾರಡ ಕೂಡ ಕೂಡಿಯಂಡ ಚೆನ್ನಂಗ್ ಸಂದರ್ಭ ಉಂಡ್. ದೊಡ್ಡವೀರರಾಜೇಂದ್ರ ಒಡೆಯಂಡ ಕಾಲತ್ ಅವಂಡ ಜನ ಟಿಪ್ಪುಸುಲ್ತಾನಂಡ ಸೀಮೆಂಜ ಸುಲಿಗೆ ಮಾಡಿತ್ ಕೊಂಡಬಂದ ಸಾಮಾನ್‌ನೆಲ್ಲ ಎಡ್‌ತಂಡ್ ಬಂದ ಆಣಾಳ, ಪೊಣ್ಣಾಳ, ಮಕ್ಕ ಕೊಡಗ್‌ಲ್ ನೆಲೆ ನಿಂದಿತ್ ಕೊಡವ ಆಚೀಂದ್ ಆ ರಾಜ ಎಳ್ಳಾಚಿಟ್ಟ ಚರಿತ್ರಲ್ ಉಂಡ್.

ಬ್ರಿಟಿಷ ಕೊಡಗ್‌ಕ್ ಬಂದಪಿಳ್ಳಾ ಬೋರೆ ಜಾತಿಕಾರ ಕೊಡವ ಆಪ ಇಂಜತ್‌ಂದ್ ಡಾ.ಮೂಗ್ಗಿಂಗ್ ಪಿಳ್ಳಾ ರಿಕ್ತರ್ ಎಳ್ಳಿತ್.

ಕೊಡವಡಾತ್ ಸುರೂಲ್ ನಾಲ್ ಪಂಗಡ ಇಂಜತ್‌ಂದ್ ಕೊಡವಡ ಆಸ್ತಿ ಸಮ್ಮಂಧ ಕಾಯ್ದೆನ 1871ಲ್ ರಚನೆ ಮಾಡ್‌ನ ಕೊಡಗ್‌ರ ಸೂಪರಿಂಟೆಂಡೆಂಟ್



ಕ್ಯಾ.ರಾಚ್‌ಕೋಲ್ ಎಣ್ಣುವಂವ ಎಳ್ಳಿತ್. ಇದತ್ ಅಮ್ಮಕೊಡವ, ಚೆರಿಯ ಕೊಡ್‌ವ, ಮಲ್ಲ ಕೊಡವ ಪಿಳ್ಳಾ ಜಮ್ಮ ಕೊಡವ ಎಣ್ಣುವ ನಾಲ್ ಪಂಗಡ.

ಇದತ್ ಅಮ್ಮಕೊಡವ ಸಸ್ಯಾಹಾರಿಯ. ಅವು ಪಂಡ್ ಪುರೋಹಿತಂಗ, ಪಟ್ಟಿಂಗ ಆಯಿತಿಂಜತ್‌ಂದ್ ಓರ್ ಹೇಳಿಕೆ ಉಂಡ್. ಇತಿಹಾಸತ್‌ರ ಕಾಲತ್ ಅವು ಅನ್ನತ ಜಾಗ ಪಡ್‌ಂದದ್ ಕಂಡ್‌ಬಪ್ಪಲೆ. Religion & Society among the Coorgs ಎಣ್ಣುವ ಪುಸ್ತಕ ಎಳ್ಳಿನ್ ಡಾ.ಎಂ.ಎನ್.ಶ್ರೀನಿವಾಸ್, ಅಮ್ಮಕೊಡವಡ ಮೂಲಪುರುಷ ವೈನಾಡ್‌ರ ತಾಯಿಕಾಟ್ ನಂಬಿರಾನ್ ಎಣ್ಣುವ ಪಟ್ಟಂಡ ಮೋವಕ್, ಓರ್ ಕೊಡವಂಗ್ ಪುಟ್‌ಚಿ. ಅವ ತಾಂಡ ಅವ್ವಂಡ ಪದ್ವತಿನ ಪಾಲನೆ ಮಾಡಿಯಂಡ್ ಬಂದಾನುಂಡ್ 'ಅಮ್ಮಕೊಡವ' ಆಚೀಂದ್ ಅವಂಡ ಸಂತಾನಕಾರ ಅಲ್ಲಿಂಜ ಅದೇ ಪೆದತ್‌ನುಂಡ್ ಕಾಕ್‌ಚಿಟ್ಟಿಂಡತ್‌ಂದ್ ಎಳ್ಳುವ.

ರಿಕ್ಟರ್, ಅಮ್ಮಕೊಡವ ವೈನಾಡ್‌ಂಜ ಬಂದವುಂಡ್ ಅಲ್ಲಿ ಇದೇ ತರತ್‌ರ ಜನಡ ಕೂಡೆ ಆಯಿಂಗಡ ಸಮ್ಮಂಧ ಇಂಜತ್ ಎಣ್ಣಿತ್. ಈಂಡೆಡೆಲ್ ಅಮ್ಮ ಕೊಡವ ಯಜ್ಞೋಪವೀತಧಾರಣೆ ಬುಟ್ಟಿತಿಂಜತ್. 1834ತ್ ಕೊಡಗ್ ರಾಜಂಡ ಕರಣಿಕ ತಿಮ್ಮಪ್ಪಯ್ಯ ಬಲಂಬೇರಿಲ್ ಪಾಡಿ ನಾಲ್ವಾಡ್‌ರ ಅವ್ವ ಕೊಡವಕ್ ಯಜ್ಞೋಪವೀತಧಾರಣೆ ಮಾಡ್‌ಚಿಟ್ಟಿತ್ ಆಯಿಂಗಳ ಶ್ರೀರಾಮಚಂದ್ರಪುರ ಮಠತ್‌ರ ಗುರುರ ಶಿಷ್ಯನಾಯಿತ್ ಮಾಡ್‌ಚಿ. ಕ್‌ಗ್‌ಟ್‌ನಾಡ್‌ರ ಅಮ್ಮ ಕೊಡವಳ ಉಡುಪಿ ಮಠತ್‌ರ ಅಧಿಕಾರಿಯ ಯಜ್ಞೋಪವೀತಧಾರಣೆ ಮಾಡ್‌ಚಿಟ್ಟಿತ್ ಆ ಮಠತ್‌ರ ಗುರುರ ಶಿಷ್ಯನಾಯಿತ್ ಮಾಡ್‌ಚಿ.

ಚೆರಿಯ ಪಿಳ್ಳಾ ಮಲ್ಲ ಕೊಡವ ಕ್ರಮೇಣ ಒಕ್ಕಚೆ ಕೂಡಿಯಂಡತ್. ಜಮ್ಮ ಕೊಡವ ಸುರೂಲ್ ಹಾಸನ ಪಿಳ್ಳಾ ಚಿಕ್ಕಮಗಳೂರ್ ಜಿಲ್ಲೆರ ಒಕ್ಕಲಿಗ ಆಯಿತಿಂಜತ್. ಕೊಡಗ್‌ರ ಹಾಲೇರಿ ರಾಜಂಡ ಕಾಲತ್ ಇಲ್ಲಿಕ್ ಬಂದಿತ್ ನೆಲೆನಿಂದಪಿಳ್ಳಾ ಕೊಡವ ತಕ್ಕ, ಪದ್ವತಿ, ಸಂಪ್ರದಾಯತ್‌ನ ಅನುಸರಣೆ ಮಾಡಿಯಂಡ್ ಕ್ರಮೇಣ ಕೊಡವಳಾಚಿ. ಇನ್ನನೆ ಉಂಡೇಂಗಿಯೂ ಈ ಜಮ್ಮ ಕೊಡವಡಾತ್ ಚೆನ್ನಂಗ್ ಒಕ್ಕಕಾರ ಒಕ್ಕಲಿಗಳಾಯಿತೆ ಇಂಜಂಡ್ ಇಕ್ಕ ಹಾಸನ, ಚಿಕ್ಕಮಗಳೂರ್, ಶಿವಮೊಗ್ಗ ಜಿಲ್ಲೆರ ಒಕ್ಕಲಿಗಡ ಕೂಡೆ ತಂಗಡ ಬೆಂದೂರ್ಥ ಬೆಚ್ಚಂಡಿತ್.

ಕೊಡವ ಪಂಡ್‌ಂಚೇ ಶೂರಂಗ ಎಣ್ಣುವ ಪೆದ ಎಡ್‌ತವು. 1817ತ್ ಲೆ.ಕೊನ್ನರ್ ಕೊಡವಡ ಶೂರತ್ವತ್‌ರ ಮೀದ ಇನ್ನನೆ ಎಳ್ಳುವ.

In the words of Lt. Connor, they may be said to be armed

from their childhood & the military spirit is inculcated into them right from their birth. War & agriculture seem their twin natural pursuits & no harm has risen from this happy combination of soldier & husbandman. They show no trace of savage disposition which often characterises the material class. The feeling which attach the highlander to the mountain & that fondness for their country which distinguishes subjects of small states are observed among Goorgs.

ಇಕ್ಕಲೂ ಹಿಂದೂಸ್ಥಾನತರ ಆರ್ಮಿ, ನೇವಿ ಪಿಗ್ಲಾ ಏರ್‌ಪೋರ್ಟ್ ಅಲ್ಲತೆ ಸೆಂಟ್ರಲ್ ರಿಸರ್ವ್ ಪೊಲೀಸ್ ಇಲಾಖೆಲ್ ಏರ ಕಣಕ್‌ಲ್ ಮುಖ್ಯ ಆಯಿತ್ ಕೊಡವ ಪಿಗ್ಲಾ ಕೊಡಗ್ಗರ ಜನ ಸೇವೆಲ್ ಉಂಡ್. ಸ್ವತಂತ್ರ ಭಾರತತರ ಆದ್ಯತ ಭೂಸೈನ್ಯತರ ಮಹಾ ದಂಡನಾಯಕ ಜನರಲ್ ಕೆ.ಎಂ. ಕಾರ್ಯಪ್ಪ, ನಾಲನೆ ಭೂಸೈನ್ಯತರ ಮಹಾದಂಡನಾಯಕ ಜನರಲ್ ಕೆ.ಎಸ್.ತಿಮ್ಮಯ್ಯ ಕೊಡವ.

ಇಕ್ಕಾಕಲೆ ಎಣ್ಣಾನ ಮುಂದ್ ಪಡೆರ ವಿಭಾಗತೂ ಕೊಡವ ನಲ್ಲ ಪದವಿಲ್ ಉಂಡ್. 1966ತ್ ಕೇಂದ್ರ ಮಂತ್ರಿ ಮಂಡಲತ್ ಇಂಜ ಚೆಪ್ಪುಡಿರ ಪೂಣಚ್ಚ ಕೊಡವ. ಕೊಡವ ಬೋಟೆಲೂ ಪೆದ ಎಡ್‌ತವು. ಕೊಡವ ನರಿಕ್ ಬೊಡಿ ಬೆಚ್ಚಕ ನರಿರ ಚಾವುರ ಕೂಡೆ, ಮೂಡಿರ ಕೂಡೆ ಮಂಗಲಕೈಪನ್ನಕೆ ನರಿ ಕೊಂದಂವನ ಅಳಪ್‌ಚಿಟ್ಟಿತ್ ಇನಾಂ ಕೊಡಪ. ಇದ್‌ಂಗ್ 'ನರಿಮಂಗಲ' ಎಣ್ಣವ.

ಕೊಡಗ್ಗರ ಹಾಲೇರಿ ರಾಜಂಡ ಕಾಲತ್ ಕೊಡವಳೆ ಅಲ್ಲತೆ ಪಟ್ಟಮಡ ದಳವಾಯಿ ಈಶ್ವರಯ್ಯ, ಕರಣಿಕ ಸುಬ್ಬಯ್ಯ, ಒಕ್ಕಲಿಗ ಹೊಂಬಾಳೆ ನಾಯಕ, ನಗರಳ್ಳಿ ಪುಟ್ಟೆಗೌಡ, ಬಂಟಡ ಅಣ್ಣಪ್ಪ, ಅಪ್ಪಯ್ಯ ಸೈನ್ಯಾಧಿಕಾರಿಯಳಾಯಿತ್ ಇಂಜವು. ಕೊಡವೇತರಂಗಳಾನ ಇಯಂಗ ಚೆರಿಯ ಕಣಕ್‌ಲ್ ಇಂಜತ್.

ಕ್ರಿ.ಶ.ಆದಿನೆ ಕೊಡಗ್ಗಕ್ ಮಲಬಾರ್ ಪಿಗ್ಲಾ ವೈನಾಡ್‌ರ ಕೂಡೆ ವ್ಯಾಪಾರ ಸಮ್ಮಂಧ ಇಂಜತ್. ಅಕ್ಕಂಜೆ ಹಾಲೇರಿ ರಾಜಂಡ ಕಾಲಕೆತ್ತನೆಕೂ ಅಲ್ಲಿಯತ ಎಚ್ಚೆಕೊ ಉಪವೃತ್ತಿ ಪಿಗ್ಲಾ ಕೈ ಪಣಿಕಾರ ಕೊಡಗ್ಗಕ್ ಬಂದಿತ್ ನೆಲೆ ನಿಂದತ್. ಇವು ಕೊಡಗ್ಗಕ್ ಬಂದಪಿಗ್ಲಾ ಇಲ್ಲಿ ಏರ ಕಣಕ್‌ರ ಜನ ಆಯಿತಿಂಜ ಕೊಡವಡ ತಕ್ಕ, ಪೊರಪಾಡ್, ಪದ್ವತಿ, ಸಂಪ್ರದಾಯತನ ಪಾಲನೆ ಮಾಡ್‌ಚಿ.

ಈ ಪೋಲೆ ಕೊಡಗ್ಗಲ್ ನೆಲೆ ನಿಂದ ಮಲಬಾರ್‌ರ ಜನ ಎಣ್ಣಕ ಐರಿಯ (ಮರಪಣಿ),

ಕೊಲ್ಲಂಗ (ಇರ್ಂಬು ಪಣಿ), ತಟ್ಟಂಗ (ಪೊನ್ನಾ ಪಣಿ), ಕೋಲೆಯ (ಮಣ್ಣಾ ಕೆಂಪ ಕೆಟ್ಟುವವು), ಕೋಯವ (ಮಡಿಕೆ ಮಾಡುವವು), ಬಣ್ಣಂಗ (ಭೂತ ವೇಷ ಇಡುವವು), ಮಲೆಯಂಗ (ಭೂತವೇಷ ಇಡುವವು), ಪಣಿಕಂಗ (ಮದ್ದಾ ಮಾಡುವವು), ಕಣಿಯ (ಮಂತ್ರವಾದಿಯ ಪಿಳ್ಳಾ ಚ್ಯೋತಿಶಾಸ್ತ್ರ ಅರಾಂಜವು), ಚೀಣಿಪಟ್ಟ (ಪಾಡಿಯಂಡ್ ಭಿಕ್ಷೆ ಬೋಡುವವು), ಕಾಪಾಳ (ರಾಜಂಡ ಕಾಲತ್ ಮಂಡೆ ಕೆತ್ತುವ, ಪಾರಕಾರ), ಗಾಣಿಗ, ಪೆಗ್ಗಡೆ ಪಿಳ್ಳಾ ಗೊಲ್ಲಂಗ (ಕೃಷಿಕಂಗ).

ಈ ಎಲ್ಲಾ ಚಾತಿಕಾರ ಕೊಡಗರ ದ.ಭಾಗತ್ ನೆಲೆ ನಿಂದತ್. ಕೊಡಗರ ಹಾಲೇರಿ ರಾಜ ಇಯಂಗಕ್ಕೆಲ್ಲ ಪಡ್ ಬುದ್ಧ ಭೂಮಿನ ಜಮ್ಮ ಆಯಿತ್ ಕೊಡತ್.

ಕೊಡಗರ ಉತ್ತರ ಪಿಳ್ಳಾ ಪೂರ್ವತ್ ಹಾಸನ ಪಿಳ್ಳಾ ಮೈಸೂರ್ ಜಿಲ್ಲೆ ಪಕ್ಕತೆ ಇಂಚಾನುಂಡ್ ಆ ಜಿಲ್ಲೆಂಜ ಲಿಂಗಾಯತ, ದೇವಾಂಗ, ಬಿಳಿಮಗ್ಗ, ವೈಶ್ಯ, ಗಂಗಡಿಕಾರ, ಒಕ್ಕಲಿಗಂಗ ಬಂದಿತ್ ನೆಲೆ ನಿಂದತ್. ಇವು ವ್ಯಾಪಾರ ಪಿಳ್ಳಾ ಕೃಷಿ ಮಾಡುವ ಇಂಜತ್.

ಕೊಡಗರ್ಕ್ ಹಾಲೇರಿ ರಾಜಂಗ ಬಪ್ಪಾಂಗ್ ಮುಪ್ಪಡೆ ಮಲಬಾರ್ ನಂಬೂದರಿ ಪಟ್ಟಿಮ ಕೊಡಗಲ್ ಇಂಜತ್ ಕಾಂಬ. ಕೊಡವ ದ.ಕೊಡಗಲ್ ಪಟ್ಟಿಮಳ 'ನಂಬುಡಿಯಪ್ಪ'ಂಡ್ ಕಾಕುವ. ಕೊಡಗರ್ಕ್ ಶಿವಮೊಗ್ಗ ಜಿಲ್ಲೆರ ಇಕ್ಕೇರಿಂಜ ಓರ್ ರಾಜಕುಮಾರ ಬಂದಿತ್ ಹಾಲೇರಿಲ್ ಅಂಪ ತಾಂಡ ರಾಜ್ಯ ಕೆಟ್ಟನದು, ತಾಂಡ ರಾಜ್ಯತ್ ಗುಮಾಸ್ತ, ಕರಣಿಕ, ದಿವಾನ, ಪುರೋಹಿತ ಆಯಿತ್ ಕೆಲಸ ಮಾಡುವಕ್ ಹವ್ಯಕ ಪಟ್ಟಿಮಳ ಕೂಟಿಯಂಡ್ ಬಂದಿತ್ ಕೊಡಗಲ್ ಅಯಿಂಗಳ ನೆಲೆ ನಿಪ್ಪಚಿಟ್ಟಿತ್. ಇಕ್ಕೇರಿ ಸೀಮೆಲ್ ಹವ್ಯಕ ಪಟ್ಟಿಮಳ ಇಂಚಾನುಂಡ್ ಅಯಿಂಗಳೆ ಇಕ್ಕೇರಿ ನಾಯಕಂಡ ದಿವಾನಂಗ ಪಿಳ್ಳಾ ಬೋರೆ ಅಧಿಕಾರಿಯ ಆನಾನುಂಡ್ ಕೊಡಗರ ಸುರೂಪತ ಹಾಲೇರಿ ಸಂತಾನತರ ರಾಜಂಗ ಆ ಪಟ್ಟಿಮಳ ಕೊಡಗರ್ಕ್ ಕೂಟಿಯಂಡ್ ಬಪ್ಪಕ್ ಮೊಳಿಯಾಚಿ.

ಅಮಲ್ತಾರ ಸುಬ್ಬರಸಯ್ಯ, ಕರಣಿಕ ಸುಬ್ಬಯ್ಯ, ದಳವಾಯಿ ಈಶ್ವರಯ್ಯ, ಕಾಸಾರಹಸ್ಯ ಶಂಭಯ್ಯ ಇನ್ನತವು ಹವ್ಯಕ ಪಟ್ಟಿಮ. ಅಯಿಂಗಡ ಸಂತಾನಕಾರ ಕೊಡಗಲ್ ಇಕ್ಕಲೂ ಉಂಡ್. ಅನ್ನನೆ ಜ.ಕನ್ನಡ, ಹಾಸನ ಪಿಳ್ಳಾ ಮೈಸೂರ್ಂಜ ಪಟ್ಟಿಮ ಬಂದಿತ್ ಕೊಡಗಲ್ ನೆಲೆ ನಿಂದಿತ್.

ಕೊಡಗರ ಪೆದಪೋನ ದೊಡ್ಡವೀರರಾಜೇಂದ್ರ, ಟಿಪ್ಪು ಸುಲ್ತಾನಂಡ ಕೂಡೆ ಪೋರಾಡ್ ನ ಪಡೆಲ್ ಜನ ಚತ್ತಾನುಂಡ್ ಪಿಳ್ಳಾ ಅದಾಂಗ್ಂಜ ಮುಪ್ಪಡೆ ಟಿಪ್ಪು ಕೊಡಗಂಜ ಆಯಿರಾರ್ ಕಣಕ್ ಲ್ ಮೈಸೂರ್ ರಾಜ್ಯಕ್ ಒರಾತತ್ ಕೂಟಿಯಂಡ್ ಪೋಯಿತ್ ಮುಸಲ್ಮಾನ ಧರ್ಮಕ್ ಮತಾಂತರ ಮಾಡಿತ್ ಅಯಿಂಗಳೆಲ್ಲ ತಾಂಡ



ರಾಜ್ಯತ್ವರ ತೆರಿಕ್ ಅಯಿಚಾನುಂಡ್ ಕೊಡವಡ ಸಂಖ್ಯೆ ದುಂಬ ಕಮ್ಮಿ ಆಚಿ. ಇನ್ನನೆ ಕೊಡಗಲ್ ಜನ ಕಮ್ಮಿ ಆನಾನುಂಡ್ ಬೇಲ್ ಪಣಿಕ್ ಜನ ಇಲ್ಲತೆ ಭೂಮಿ ಪಡ್ ಬುದ್ದಾನ ತಪ್ಪಾಚಿಡುವಕ್ ರಾಜ ದ.ಕನ್ನಡ, ಮೈಸೂರ್ ಪಿಳ್ಳಾ ಹಾಸನ ಜಿಲ್ಲೆಂಜ ತಾಂಡ ಸೈನ್ಯಾಧಿಕಾರಿಯ ಅಲ್ಲಿಕ್ ಪೋನಲ್ಲಿ ಒರಾತತ್ ಜನಳ ಕೂಟಿಯಂಡ್ ಬಂದಿತ್ ಇಲ್ಲಿ ದುಂಬಾಚಿಟ್ಟತ್.

ಅನ್ನನೆ ಕೂಟಿಯಂಡ್ ಬಂದ ಜನಡಾತ್ ಚೆನ್ನಂಗ್ ಜನ ಇಲ್ಲಿಯತ ಕೋಟ, ಕುಳಾರ್ ಪಿಳ್ಳಾ ಪನಿನ ಸಹಿಸುವಕಯ್ಯತೆ ಚತ್ತ್ ಪೋಚಿ.

ಆಚೀಂಗೂ, ಇಕ್ಕ ಕೊಡಗಲ್ ಉಳ್ಳ ಬಂಟಂಗ ಆ ಕಾಲತ್ ಇಲ್ಲಿಕ್ ಬಂದಯಿಂಗಡ ಸಂತಾನ, ದೊಡ್ಡ ವೀರರಾಜೇಂದ್ರ ಒಡೆಯ ಕ.ಕನ್ನಡ ಜಿಲ್ಲೆಲ್ ತಾಂಗ್ ಕೂಡ್ನ ಪುತ್ತೂರ್ ಸೀಮೆಂಜ ತುಳುಗೊಡಂಗಳ ಇಲ್ಲಿಕ್ ಕಾಕ್‌ಚಿಟ್ಟಿಂಡ್ ಅಯಿಂಗಕ್ ಜಮ್ಮ ಭೂಮಿ ಕೊಡ್ತಿತ್ ನೆಲೆ ನಿಪ್ಪಾಚಿಟ್ಟತ್. 1795ತ್ ತಾಂಡ ಪೆದತ್ ವೀರರಾಜೇಂದ್ರ ಪೇಟೆನ ಕೆಟ್ಟಾಚಿಡುವಕ ಪಿರಿಯಾಪಟ್ಟಿತ್‌ಂಜ ತಮಿಳ್ ಶೆಟ್ಟಿಯಳ, ಕಣ್ಣಾನೂರ್‌ಂಜ ಮುಸಲ್ಮಾನಂಗಳ ಕಾಕ್‌ಚಿಟ್ಟಿತ್ ಪುದಿಯದಾಯಿತ್ ಕೆಟ್ಟನ ಪೇಟೆಲ್ ಅಯಿಂಗಳ ಆಕ್‌ಚಿ.

ಈಂಗ್ ಮುಪ್ಪಡೆ ಎಣ್ಣಕ 1792ತ್ ಮೂಂದನೆ ಮೈಸೂರ್ ಪಡೆರ ನೇರತ್ ಶ್ರೀರಂಗಪಟ್ಟಿತ್‌ಂಜ ತಪ್ಪಾಚಿಟ್ಟಿಂಡ್ ಬಂದ ಮತಾಂತರ ಆನ ಕೊಡವಕ್ ಬೋರೆ ಊರ್‌ಲ್ ಭೂಮಿನ ಜಮ್ಮ ಆಯಿತ್ ಕೊಡ್ತ್ ನೆಲೆ ನಿಪ್ಪಾಚಿಟ್ಟತ್. ಇಯಂಗಳ 'ಜಮ್ಮಾ ಮಾಪಳೆ' ಎಣ್ಣವ. ಇವು ಇಂದೇಕೂ ಅಯಿಂಗಡ ಭೂಮಿಲ್ ಕೃಷಿ ಮಾಡಿಯಂಡ್ ಕೊಡಗರ ಬೋರೆ ಬೋರೆ ಭಾಗತ್ ಉಂಡ್.

ಈ ನೇರತ್ ದ.ಕನ್ನಡ ಜಿಲ್ಲೆಂಜ ಶ್ರೀರಂಗಪಟ್ಟಿಕ್ ಒರಾತ ಆಯಿತ್ ಟಿಪ್ಪುರ ಸೈನಿಕಂಗಳುಂಡ್ ಪೋನ ಕೊಂಕಣ ತಕ್ಕ್ ಪರೆಯುವ ಕ್ಯಾಥಲಿಕ್ ಕ್ರೈಸ್ತಂಗ ತಂಗಡ ಜಿಲ್ಲೆಕ್ ವಾಪಾಸ್ ಪೋಪಕ್ ಕೊಡಗಕ್ ಬಪ್ಪಕ, ದೊಡ್ಡ ವೀರರಾಜೇಂದ್ರ ಒಡೆಯ ಅಯಿಂಗಳ ವೀರ ರಾಜೇಂದ್ರಪೇಟೆರ ಸುತ್ತ ಉಳ್ಳ ಊರ್‌ಲ್ ಭೂಮಿ ಕೊಡ್ತಿತ್ ನಿಪ್ಪಾಚಿಟ್ಟತ್. ಅಯಿಂಗಡ ಸಂತಾನ ಕೊಡಗಲ್ ಇಕ್ಕ ಎಚ್ಚಕೊ ಆಯಿರ ಉಂಡ್. ಕೊಡಗಲ್ ಉಳ್ಳ ಚೆರಿಯ ಕಣಕರ ಪ್ರಾಟೆಸ್ಪೆಂಟ್ ಕ್ರೈಸ್ತಂಗ ಕೈಂಜ ಶತಮಾನತ್ ಕೊಡಗಲ್ ಆ ಮತಕ್ ಸೇರ್‌ನ ಕೊಡವ ಪಿಳ್ಳಾ ಜಮ್ಮ ಪೊಲೆಯಡ ಸಂತಾನಕಾರಳೆ ಆಯಿತುಂಡ್. ಇದತ್ ಚೆನ್ನಂಗಾಳ್ ದ.ಕನ್ನಡ ಜಿಲ್ಲೆಂಜ ಇಲ್ಲಿಕ್ ಬಂದಿತ್ ನೆಲೆ ನಿಂದಿತಿಕ್ಕು.

ಬ್ರಿಟಿಷರ ಕಾಲದ ಅಚ್ಚುಕೊಡು ಐರೋಪ್ಯದ ಕೊಡಗ್ ಬಂದಿತು ಕಾಫಿ ತೋಟ ಮಾಡ್ತು. ಅಚ್ಚುಕೊಡು, ಈ ಶತಮಾನದ ದಂಡನೆ ಜಾಗತಿಕ ಪಡೆರ ನೇರತೂ, ಅದೊಂಗೆಂಜ ಮುಪ್ಪಡೆ ಅವು ತಂಗಡ ಕಾಫಿ ತೋಟದ ಮಾರಿತ್ ಕೊಡಗ್ನ ಬುಟ್ಟಿತ್ ಪೋಯಿತ್, ಇಕ್ಕ ಕೊಡಗ್ ಒಂದೊ, ದಂಡೊ ಐರೋಪ್ಯ ಜನಡ ಕುಟುಂಬ ಮಾತ್ರ ಉಂಡ್. ಬ್ರಿಟಿಷರ ಕಾಲದ ಕೊಡಗ್ ವ್ಯಾಪಾರಕಾಯಿತ್ ಉ. ಕನ್ನಡತರ ನವಾಯತ ಮುಸಲ್ಮಾನ, ಕೇರಳ ಮಾಪಳೆಯ, ತಮಿಳುಡ್ ಲಭ್ಯಯಂದ್ ಕಾಕುವ ತಮಿಳು ತಕ್ಕ ಪರೆಯುವ ಮುಸಲ್ಮಾನಂಗ ಬಂದಿತು ಕೊಡಗ್ ನೆಲೆ ನಿಂದಿತು. ಅನ್ನನೆ ಹಿಂದುಸ್ಥಾನಿ ತಕ್ಕ ಪರೆಯುವ ಮುಸಲ್ಮಾನಂಗ ಚೆನ್ನಂಗಾಳ್ ಉಂಡ್.

ಈ ಶತಮಾನದ ತಮಿಳುಡ್ ಚೆಟ್ಟಿಯಾರ್, ಕೇರಳತರ ಮಲಯಾಳ ತಕ್ಕ ಪರೆಯುವ ಸೀರಿಯನ್ ಪಂಗಡತರ ಕ್ರೈಸ್ತಂಗ ಕೊಡಗ್ ಕಾಫಿ ತೋಟ ಮಾಲೀಕಂಗ ಪಿಳ್ಳಾ ಭೂಮಾಲೀಕಂಗ ಆಯಿತ್ ಇಲ್ಲಿ ಏರ ಕಣಕ್ ನೆಲೆ ನಿಂದಿತು.

ಇನ್ನನೆ ಇಕ್ಕ ಕೊಡಗ್ 1971ಂಡ ಜನಗಣತಿರ ಪೋಲೆ ಒಟ್ಟು 3,78,281 ಜನ ಉಂಡ್. ಇದತ್ 60 ಆಯಿರಕೊಂಜ ಏರ ಕೊಡವ ಇಕ್ಕು. ಇಕ್ಕಲೂ ಕೊಡವಳೆ ಭೂಮಾಲೀಕತ್ವ, ಸರ್ಕಾರಿ ಚಾಕ್ರಿ ಪಿಳ್ಳಾ ಬೋರೆ ಚಾಕ್ರಿಲೂ ಮಿಳ್ಳಾತ್ ಉಂಡೊಂದ್ ಎಣ್ಣೊಲು. ವಿದ್ಯಾಭ್ಯಾಸತೂ ಕೊಡಗ್ ಪೇರ್ತ್ ಮಿಳ್ಳಾತ್ ಉಂಡ್. ಪೊಮ್ಮಕ್ಕಡಾತ್ ಕೊಡಗ್ ಪೊಮ್ಮಕ್ಕ, ಕೇರಳತನ ಬುಟ್ಟಕ ದಂಡನೆ ಸ್ಥಾನತ್ ಉಂಡ್! ಮೈಸೂರ್ ರಾಜ್ಯತ್ ಬೆಂಗಳೂರ್ ನಗರತರ ಪೊಮ್ಮಕ್ಕಕ್ ಆದ್ ಸ್ಥಾನ ಆನಕ, ಕೊಡಗ್ ಪೊಮ್ಮಕ್ಕಕ್ ದಂಡನೆ ಸ್ಥಾನ ಕೊಟ್ಟವ.

ಕೊಡಗ್ ದುಂಬಾ ಚಾಯುಳ್ಳ ಬರ್ಕತ್ತರ ಭೂಮಿ. ಇಲ್ಲಿ ನೋಟುವನ್ನತ ಜಾಗ ದುಂಬಾ ಉಂಡ್. ಇಲ್ಲಿಯತ ಗಾಳಿ, ವಾತಾವರಣ, ಪರಿಸರ ಸಹ ಅಚ್ಚುಕೋರ್ ಚಾಯಿ. ಆನಗುಂಡ್ ಜನ ಇಲ್ಲಿ ಕಾಲತಂಜ ಕಾಲಕ್ ಅಧಿ ಆಯಂಡ್ ಉಂಡ್. ಇನ್ನನೆ ಕೊಡಗ್ ಸರ್ವತರತೂ ಸಮೃದ್ಧಿ ದುಂಬಿತಿರಡ್.







ಬೆಪ್ಪುನಾಡ್, ಕಾಕೋಟ್‌ಪರಂಬ್‌ಕಾರಳಾನ ಮಂಡೇಟಿರ  
ಮುತ್ತಪ್ಪ-ರುಕ್ಕಿಣಿ ದಂಪತಿಯಡ ಮೋವ ಪ್ರಮೀಳ (ಶೋಭ)  
ನಾಚಯ್ಯ ಡಿಪ್ಲಮೊ ಮಾಡ್‌ನ ಇವು ಎಡೆನಾಲ್ವಾಡ್  
ಚೆಂಬೆಬೆಳಿಯೂರ್ ಅಜ್ಜಿನಿಕಂಡ ಚಂಗಪ್ಪ-ಪೊನ್ನಮ್ಮ  
ದಂಪತಿಯಡ ಮೋಂವ, 'ಪೂಮಾಲೆ' ಪತ್ರಿಕೆರ ಸಂಪಾದಕ  
ಮಹೇಶ್ ನಾಚಯ್ಯಂಡ ಪೊಣ್ಣ್. ದಂಪತಿಯಕ್ ಓರ್ ಮೋವ,  
ಮೋಂವ. ನಡಿಕೇರಿಯಂಡ ಚಿಣ್ಣಪ್ಪ ಎಳ್ಳೊನ 'ಪಟ್ಟೋಲೆ  
ಪಳಮೆ'ನ ಕೈಂಜ 2006ಲ್ ಕೊಡವ ತಕ್ಕ್‌ಕ್ ಮಾತಿತ್ ಡೆಲ್ಲಿಲ್  
ನಡ್‌ಂದ 'ಕೊಡವ ತಕ್ಕ್ ನಮ್ಮೆ'ಲ್ ಬುಡ್‌ಗಡೆ ಮಾಡಿತ್. ಇವು  
2007ಲ್ 'ಪಾಕುಇಳ್ಳೆಕ್ ಬೋಜಿ ಪೆದ' ಎಣ್ಣುವ ಪುಸ್ತಕ ಎಳ್ಳಿತ್.

